



Bëngbe Bëtsa Cabëngaftaca Entsoyebuambna

Camsá New Testament

Contents

San Mateo	1
San Marcos	72
San Lucas	114
San Juan	185
Hechos	239
Romanos	308
1 Corintios	347
2 Corintios	383
Gálatas	407
Efesios	421
Filipenses	434
Colosenses	443
1 Tesalonicenses	452
2 Tesalonicenses	459
1 Timoteo	463
2 Timoteo	474
Tito	481
Filemón	486
Hebreos	488
Santiago	519
1 San Pedro	528
2 San Pedro	539
1 San Juan	546
2 San Juan	555
3 San Juan	557
San Judas	559
Apocalipsis	562



Bëngbe Bëtsa Cabëngaftaca Entsoyebuambna

New Testament in Camsá

Language: Camsá

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2009 Wycliffe Bible Translators, Inc. Scripture text used by permission.

© 2009, Wycliffe Bible Translators, Inc. All rights reserved.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-06-27 from source files dated 2017-06-26.

19104c0e-9046-5ff3-82fb-eb838c88dcf9

ISBN: 978-1-5313-0317-4

San Mateo

Jesube bēts taitanga

(Lc 3.23-38)

1 Quemēnga imnamna Jesucristbe bēts taitanga: Jesucristna Rey David y Abrahámbešana entšá inamna.

²⁻⁶ Abraham yojamna Isaacbe taitá; Isaacna Jacobēbe taitá y Jacob, Judá y chabe catšátangbe taitá. Judá, Fares y Zarabe taitá; y chatbe

mamá Tamar yojamna;

Fares Esrombe taitá

y mua Arambe taitá.

Aram Aminadabēbe taitá;

Aminadab Naasonbe taitá

y Naasón Salmonbe taitá.

Salmón Boozbe taitá y muabe mamá Rahab yojamna;

Booz Obedbe taitá y muabe mamá Rut yojamna;

y Obedna Isaíbe taitá.

Isaí Rey Davidbe taitá;

David Salomonbe taitá y muabe mamá yojamna chē Uríasbe shema inamná.

⁷⁻¹¹ Salomón Roboambe taitá;

Roboam Abíasbe taitá

y Abíasna Asabe taitá;

Asa Josafatbe taitá;

Josafat Jorambe taitá

y Joramna Uzíasbe taitá.

Uzías Jotambe taitá,

Jotam Acazbe taitá

y Acazna Ezequíasbe taitá.

Ezequías Manasesbe taitá;

Manasés Amonbe taitá

y Amón Josíasbe taitá.

Josíasna Jeconías y chabe catšátangbe taitá yojamna.

Chē Babilonioca entsānga chē israelitēnga tmojánishēche y choca imojanētāmēna ora, Josías chē básēnga yojánabamna.

¹²⁻¹⁶ Ya Babilonioca ndutámenēnga ora;

Jeconías Salatielbe taitá;

Salatiel Zorobabelbe taitá.

Zorobabel Abiudbe taitá;

Abiud Eliaquimbe taitá

y Eliaquimna Azorbe taitá.

Azor Sadocebe taitá;

Sadoc Aquimbe taitá

y Aquimna Eliudbe taitá.

Eliud Eleazarbe taitá;

Eleazar Matanbe taitá

y Matán Jacobēbe taitá.

Jacob Josebe taitá yojamna y Josena Mariybe boyá.

María Jesube mamá, Jesús chē Bēngbe

Bētsabe Uámāna Uabuayaná, chē

Cristo ca uabainá.

¹⁷ Chcasna, Abrahámbešana Davidbentscoñe bnétsana canta bēts pamíllanga imojéftsemna. Davidbentsana y chē israelitēnga Babilonioca imojanētamenēntscuana inye bnétsana canta bēts pamíllanga; y inye bnétsana canta bēts pamíllanga chē Israeloca entsānga imojanētamenēntšana, chē Cristo tojanonýnántscōne.

Jesucristo tojanonýná

(Lc 2.1-7)

¹⁸ Jesucristo jónýnanamna mēntšá tojanopasá: María tbojanšbuachená Joséftaca jobouamayama, pero cabá ndoñe cánýiñe ibontsiyena ora, tojanopasá Mariyna ngomamaná yojoquéda chē Uámāna Espíritbe obenánaca. ¹⁹ José, Mariybe boyá, canye nyetsca soyēnguiñe tšabá jamama bošá inamna. Cha ndoñe yontseboše entsāngbe delante cha mal jaquédana; chíyecna tojanjuabó nye iytēcana Maríybentsana jtsojuánañana. ²⁰ Y chca yojtsejuabnantscuana, mo otjenayoquéca canye Bēngbe Bētsabe ángel tbojáninye y chana Josébioye tbojanianyana: “José, Davidbentsana entšá, ndoñe matenócochinýenana Maríaftaca

jobouamayama, er chë bochántsebmna šešona chë Uámana Espíritbe obenánaca cha bochántsebmna. ²¹María canýe šešona bochántsebmna y cha Jesús ca cochjuabaye. Chca echantsabaina er cha chabe entšanga chëngbe bacna soyënguentšana echanjátsebacaye ca” — chë ángel tbojaniyana.

²²Lempe chca tojanochnëngo, cachcá chaotsemnama ntšamo Bëngbe Bëtsá chabe juabna oyebuambnayëngbiajana tojanayancá. Chë oyebuambnayá mëntšá tojánayana:

²³Chë cabá boyabása nduabuatomá ngomamaná echanjoquéda y canýe šešona boyabásetema bochántsebmna, y cha mochanjuabaye Emanuel ca. (Emanuel endayana “Bëngbe Bëtsá bën-gaftaca ca”.)

²⁴José chë otjénayentšana tojanofšená ora, tojanma ntšamo chë Bëngbe Bëtsabe ángel tbojanmandacá y Maríaftaca tojanobouamá. ²⁵Pero ndoñe cánýiñe ibontsaninyena, sinó nýe chë šešonatema tojanonýná orscana. Chë šešonatema tojanonýná orna, José chábioye Jesús ca tbojanabaye.

Reyes Magos Jesúsbioye tmojána

2 Herodes judiëngbe rey yojamna ora, canýe pueblo Judeoca, Belén ca uabáinentše Jesús tojanonýná. Chentšana, báseftanga, estrellënga uatsjëndayënga, magos ca uabáinënga, canýe bëts puebloye Jerusalén ca uabáinoye tmojánashjajna. Chënga tmojánabo shinýe bocanoye luarëngocana. ²Jerusalenocna chënga, Heródesbioye tmojána y tmojanënoticiá: “¿Ndayentše yojtsemna chë judiëngbe rey jtsemnama tojonýná cha ca? Bëngbe luarëngoca shinýe bocanoye chabe onýnana estrella fsënjinyë y as muentše cha jaboadorama tifjabo ca.”

³Rey Herodes chca tojanuena ora, corente yojtsenócochinýena, y nýetsca chë Jerusalenentše oyenëgnaca. ⁴Chentšana chë rey tojánachembo nýetsca chë judiëngbe bachnangbe amëndayënga y chë judiëngbe ley abuátambayënga jenoeyunayëngama. Mëntšá tojanatjá: —¿Ndayentše chë Bëngbe Bëtsabe Uámana Uabuayaná, chë Cristo ca uabainá, jónýnama ibomna ca?

⁵Chënga tmojanjuá: —Judeoca, Belén pueblentše ca. Bayté entsemna chë Bëngbe Bëtsabe juabna oyebuambnayá Miqueas mëntšá tojanábema:

⁶Y tšëngaftanga, Judeoca Belenentše oyenënga, canýe mandayá tšëngaftangbentšana echanjabo.

Cha nýetsca chë Judeoca mándayëngbiama más uamaná echántsemna, y atšbe entšanga Israeloca echántsanýena. Chíyeca tšëngaftangbe pueblo ndoñe nýe batšá uámana pueblo quenátsmëna ca.

⁷Chora Herodes iytëcana chë maguënga tojánachembo y cuedádoca tojanatjá ntseco ora chë estrella tmojáninýama. ⁸Herodes chë soyënga yojtsetátšëmbo ora, Belenoye chë maguënga tojanichamó, y mëntšá tojanéyana: “Choye motsajna y tšabá chë šešona šmochjánguango. Chašmójinyëna ora, šmochjabëuenaye, as átšnaca chayobená jama chë šešona jadórama ca.”

⁹Rey Herodes chë soyënga tojánëyanentšana, chë maguënga tmojtsatanoñe. Chora cachiñe tmojtaniñe chë chëngbe luarëngoca tmojáninyë estrella y yojtsanebnatsana chë šešona yojtsemnéntskoñe. Chentša juatsbuacá chë estrella yojójayiye. ¹⁰Chë maguënga chë estrella tmojáninyë orna, corente oyejuayënga imojtsemna.

¹¹ Chë yebnoye tmojánamashjna ora, chë šešona tmojáninÿe chabe mamá Mariaftaca. Chorna, tmojanoshamentšé y chë šešonatema tmojanadorá. Chora chëngbe cajontémenga tmojanëtsécaca y tmojanatštá castellano, incienso y canÿe botamana uanguëtše soye, mirra ca uabáiniye. ¹² Chentšana, mo canÿe otjenayoquécá Bëngbe Bëtsá chë maguënga tojanabuayená rey Herodesbiajana ndoñe chamondesshécuanama. As chënga chentšana inÿe benachëjana cachëngbe luarëngoye tmojésanshécua.

Egiptó luaroye tmojtsanachá

¹³ Chë maguënga tmojtsatanoñe ora, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojaniyana: “Motsbaná, chë šešonatema y chabe mamá mesébiatše y Egiptoye motsachá. Herodes chë šešonatema bochanjáanguango jtsóbama, chíyeca choca cochtsoquedañe atše chacbochjábuaenantscuana ca.”

¹⁴ As José tojantsbaná, chë šešonatema y chabe mamá tojesanébiatše y ibeta Egiptó benache tojéftsanbocna. ¹⁵ Y choca imojtsanomñe Herodes tojanóbanëntscuana. Chca tojanopasá, cachcá chaotsemnana ntšamo Bëngbe Bëtsá chabe juabna oyeuambnayabiajana tojanayancá. Chë oyeuambnayá mëntšá tojánayana: “Egiptocana atšbe uaquiniá sënjanchembo ca.”

Herodes tojanmandá basetémenga jtsëbáyama

¹⁶ Chë maguënga tmojtsaningñema Herodes tojántatšëmbona ora, puerte tbojánetna, y tojanmandá lempe jtsëbáyama base boyabásetémenga uta uata bomnënga y cabá uta

uata ndbomnënga, Belén y chë juachañe pueblënguentšënga. Uta uatama cha tojanjuabó, er uta uata yojtsemna chë maguënga chë estrella tmojáninÿama. ¹⁷ Ntšamo chë Bëngbe Bëtsabe juabna oyeuambnayá Jeremías tojanoyeuambacá, cachcá tojanochnëngo:

¹⁸ Ramá ca uabaina pueblentše canÿe oyeuambnayana tmojanuena, ngménaca ošachiyana y becá tsetšanánaca oyeuambnayana.

Raquel yojamna chabe básengbiana ošachiyiñe,

pero ndoñe yontseboše chamuatebiajuama, chabe básenga ya obanënga causa ca — cha tojanábema.

¹⁹ José cabá Egiptoca yojtsomñe ora, Herodes tojanóbana. Chentšana, otjénayoca José canÿe Bëngbe Bëtsabe ángelbioye tbojáninÿe y cha mëntšá tbojaniyana: ²⁰ “Motsbaná, chë šešonatema y chabe mamá mesébiatše y Israeloye cochtá. Chë šešonatema jóbama bošënga ya obanënga montsemna ca.”

²¹ As José tojantsbaná y chë šešonatema y chabe mamá Israel luaroye tojtésanébiatše. ²² Arquelao Judeoca yojanmánda chabe taitá Heródesbe cuentiñe, y José chca tojántatšëmbona orna, yojtsauatja choye jama. Pero otjénayoca Bëngbe Bëtsá Josébioye tbojanbuayená; chíyeca Josena Galilea ca uabaina luaroye tojána. ²³ Choye tojánashjango ora, José tojána canÿe pueblo Nazaret ca uabáinoye chentše joyéanama. Chca tojanochnëngo cachcá chaotsemnana ntšamo chë Bëngbe Bëtsabe juabna oyeuambnayënga tmojanayancá. Chënga tmojánayana: “Nazaretocá ca Jesús mochantsábobaina ca.”

Juan chë Ubayaná entsanga yojanabuayiyná

(Mc 1.1-8; Lc 3.1-9, 15-17; Jn 1.19-28)

3 Chë tempo, Juan chë Ubayaná, entsanga ndoyena luaroye Judeoca tojánbocna, Bëngbe Bëtsabe soyëngama jábuayenama. ²Mëntšá cha yojanëtsëtsnaye: “Bëngbe Bëtsabe amëndayana ya echanjóshjango. Ngménaca šmochtenójuaboye tsëngaftangbe bacna soyëngama y chca amana šmochtsajbaná y Bëngbe Bëtsabe benache šmochtishache ca.”

³Juan yojamna canya ndabiana chë Bëngbe Bëtsabe juabna oyebuambnayá Isaías mëntšá tojánayana:

Entsanga ndoyena luaroca canya enduáyebuache:

“Bëngbe Utabná echanjabo ca; mo nda canye benache tojtseprontacá canye uámana entšá jashjanguama, tsëngaftángnaca cachcá, Bëngbe Utabná jabama ainaniñe tšabe juabnéngaca šmochtseprontana ca” —cha tojánayana.

⁴Juanbe entsáyá inauapormana camellbe stjénasheca y bobache yojanasnana. Cha inasaye chapulinatémënga y tjoca tjouangbe méloye.

⁵Jerusalenoca entsanga, nyetsca Judea luarentša entsanga y chë Jordán ca uabaina béjaye béconana oyenënga imojánbocana Juan joyeunayama.

⁶Bëngbe Bëtsábiyoye chëngbe bacna soyëngama jaimpáda chentšana, Juan chë Jordán béjajiñe chënga yojanëbáyana.

⁷Pero Juan tojáninye ba fariseunga y saduceunga cha chaubáyama tmojánama. Chënga imojamna chë judiëngbeñe uánatsanënga Bëngbe Bëtsá ndoñe corente ntseyeunanama; as chora tojanéyana: “¡Mëtšcuaye entsanga! ¿Nda tcmënjáuyana chë echanjóshjango uabouana cas-

tigüentšana šmochjotsbocá ca? ⁸Bëngbe Bëtsábeñe ndegombre ošbuáchiyënga šmochtsemna, as chca chaotsinýna chë bacna soyënga amana tsëngaftanga ndegombre šmojtšajbanama. ⁹Y ndoñe šmattsejuabnaye cach tsëngaftangbiana jayanama: ‘Abrahámbentšana entsanga fsëndmëna ca’. Er atše šcuayana, Bëngbe Bëtsá quem ndëtšbéngacnaca Abrahámbentšana entsanga nanjábiana. ¹⁰Chë tatšná ya entsaprontana chë betiyeshënga tbëtëjëngocana jtseshatëtsetšama. Ndaye betiye ndoñe tontseshajo, jtseshatëtšana y iñoye jtsatmetšana. Tsëngaftangaftácnaca cachcá, tšabe soyënga ndoñe šmontsamëse, Bëngbe Bëtsá cmochanjácastigaye.

¹¹“Ndegombre, atšna béjayeca cbondubáyana Bëngbe Bëtsabe benache chašmuatishachama. Pero chë atšbe ústonoye echanjabá, atšbiana más obenana bomná comna, y atše mercedo taitatobuajoñe ni mo chabe shecochëtjonëshe jtsámbañama. Chë chabe benache aíñe chamojtishachëngbiana Bëngbe Bëtsá echanjama chë echanjabábeyeca, chë Uámana Espíritu chëngbe ainaniñe cháuamashënguama. Pero chë benache ndoñe chamontishachëngbiamna, Bëngbe Bëtsá echanjama chë echanjabábeyeca, corente castigánënga chamotsemnana, mo iñeshequécá. ¹²Canye entšá chabe mëtštá cucuatšiiñe jiyëbana, chabe trigo jtsóbobemana y chë ndoservena shácuanënga jtsejashtsëtsana. Chabe trigo chë grano uaquëcnaye tsañe jtsabuájuaana, y chë ndoservena shácuanënga iñoye jtsatmetšana. Cachcá, chë atšbe ústonoye echanjabana, chë tšabe entsanga echanjúbuaja, y chë bacna entsangna canye iñeshiñe echantsacastígaye, y chë iñe ndocna te queochátsfsana ca” —cha tojanéyana.

Juan, Jesúsbioye tbojanabaye

(Mc 1.9-11; Lc 3.21-22)

¹³As Jesús, Galileocana tojána Jordán béjayoye, Juan yojtsemnoye, cha chabuábayama. ¹⁴Pero Juan ndoñe yontseboše Jesús juabáyama, y mentsá tbojaniana: —Atše šontsemna aca chašcuabaye, y ¿más atše aca cbochjuabaye ca?

¹⁵Chora Jesús tbojanjuá: —Morna chca chaotsemna. Entsemna lempe ntšamo Bëngbe Bëtsá tojamandacá jobedésana ca.

As Juan yojouena Jesús juabáyama.

¹⁶Jesús ya uabainá yojtsemna ora, chë buyeshoicana tojtanshëbëbocna. Chorna Jesús tsbanánoye yojontješiye y tojáninye chë celoca atëfjniñe y chë Uámana Espiritu mo canye palomatemcá chábioye yojtsastjajuana. ¹⁷Chora celocana Bëngbe Bëtsá mentsá tojánayana: “Mua atšbe bonshana uaquiñá endmëna. Chabiamana corente sëntsoyejuá ca.”

Jesús tojanobená Satanás jayénjanama

(Mc 1.12-13; Lc 4.1-13)

4 Chentšana chë Uámana Espiritu entšanga ndoyena luaroye Jesús tbojanánatse, as Satanás chauábama cha jisháchichiyama.

²Chentše canta bnétsana te y canta bnétsana ibeta ntjascá tbojanjétana; chíyeca chora tbojaneshéntsena. ³As Satanás tbojanobobeconá y tbojaniana: —Aca ndegombre Bëngbe Bëtsabe Uaquiñá tcomnëse, momandá quem ndëtšbenga tandëse chaobiama ca.

⁴Pero Jesús tbojanjuá: —Bëngbe Bëtsabe uabemana palabrenguine mentsá endayana: “Entsá nye tandëseca ndoñe vida ntsebomnana, sinó entsá endobena jtsiyenana lempe ntšamo Bëngbe Bëtsá tojayancá tbojtseyeunanëse ca.”

⁵Chentšana Satanás, Jerusalén, chë uámana bëts pueblo ca uabáinoye Jesús tbojanánatse, y chë Bëngbe Bëtsabe bëts yebnentše chë más tsbanánoca tbojanatsá. ⁶Chentše Satanás mentsá tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, er Bëngbe Bëtsabe uabemana palabrenguine endayana:

Bëngbe Bëtsá chabe angelënga echanjichamuá, chacmotsinënama.

Chënga buacuatšëngaca cmochanjishache, shecuatše ndëtšbeñe ndocá chacondomama ca —cha tbojaniana.

⁷Chora Jesús tbojanjuá: —Cach Bëngbe Bëtsabe uabemana palabrenguine mentsá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

⁸Cabana, Satanás tbojanánatse canye bëts tjoye y betesco nyetsca quem luarentša amëndayëngbenache y chentša nyetsca uámana soyënga Jesúsbioye tbojaninjinýé. ⁹As Satanás tbojaniana: —Aca chacojoshëntsamentsé y chašcojadorase, lempe chë soyënga cbochjats-taye ca.

¹⁰Y Jesús tbojanjuá: —¡Satanás, átšbentšana mojuaná! Bëngbe Bëtsabe uabemana palabrenguine mentsá endayana: “Bëngbe Bëtsá cochtsadorana y nye cha cochtseservenana ca.”

¹¹As Satanás cachcá tbojanonýá. Cachora Bëngbe Bëtsábiocana angelotëmënga tmojánabo Jesús jtseservënama.

Jesús tojanontsé Galileoca chabe trabajo jamana

(Mc 1.14-15; Lc 4.14-15)

¹²Juan chë Ubayaná cárceloye tmojanëtamiama Jesús tojanuena ora, Galilea luaroye cha tojtaná. ¹³Pero ndoñe tonjanoquedá Nazaret

pueblentše, sinó Capernaumoca, uafjónayē tsachañe; choye tojána joyéanama, chē uámana bēts taitata Zabulón y Neftalibe luariñe. ¹⁴Chca tojanochñengo, cachcá chaotsemnana ntšamo chē Bēngbe Bētsabe juabna oyebuambnayá Isafas tojanayancá. Isafas tojánayana:

¹⁵Zabulón y Neftalibe luare, Jordán bējaye chenguánoica, uafjónayē tsachañe;

Galilea luariñe, ndoñe judío entšanga oyenentše.

¹⁶Chē mo ibetiñe cuaftsiyencá imojyena entšanga, Bēngbe Bētsabe soyēnga nduabuatma causa, tmojinýe canýa entšangbe juabnēnga binýnayá.

Chē chēngbe juabnēnga binýnayá entsebuashinýinýana chē Bēngbe Bēt-sábioye nduabuatmēngbiama,

y chē causa chabiama imomna mo obanēngcá, ndoñe binýniñe jtsiyenēse ca —cha tojanábema.

¹⁷Cach orscana Jesús tojanontšé entšanga jábuayenama: “Bēngbe Bētsabe améndayana ya echanjóshjango. Ngménaca šmochtenójuaboýe tšēngaftangbe bacna soyēngama y chca amana šmochtsajbaná ca.”

**Jesús tojánachembo canta
boyabásenga beonga
ashebuánayēnga cha chamuastama**

(Mc 1.16-20; Lc 5.1-11)

¹⁸Canýe te, Jesús chē Galilea uafjónayē tsachajana yojtsaye y ndeolpe uta boyabásata tojanýe: canýa yojamna Simón, chē Pedro cánaca uabainá, y chabe uabentsá Andrés. Chatna atarraiēshangá ibnetsashbuétsetšañe, er beonga ashebuánayata ibnamna. ¹⁹Jesús tojanéyana: “Atšeftaca mabata; atše

cbochanjábiama Bēngbe Bētsabiama entšanga anguyata, y morscana nýe beonga ashebuánayata ya ndoñe quešochátsmēna ca.” ²⁰Cachora chatbe atarraiēshangá cachcá tbojésanaboshjuana y Jesús tmojanasto.

²¹Y más chcoye, Jesús inýe uta catsátata tojánanyē: Santiago y Juan, chē Zebedeobe uaquiñata. Chata ibojtsomñe canýe barquēshañe, chatbe taitáftaca, chēngbe atarraiēshangá atapórmayañe. Jesús tojánachembo, ²²y cachora chē barquēsha tbojésanaboshjona, chē taitá cachentše imojéseboshjona y Jesús tmojanasto.

**Jesús ba entšanga yojanabuatambá
y yojánashnaye**

(Lc 6.17-19)

²³Jesús nýets Galilea luarējana yojánana, chentše judiēngbe enefjuana yebnēnguenache abuatambaye. Chē tšabe noticiēnga Bēngbe Bētsabe améndayama entšanga yojanabuayinýa y nýetsca šocanēngama y tsetšanēngama yojánashnaye. ²⁴Nýets Siria luarējana entšanga cha imojtsebáyana. As entšanga nýetsca šocana bomnēnga Jesúsbioye imojtsēnachaye: šoquēnga y tsetšanana bomnēnga, bacna bayējbe juabna uambayēnga, ataque osháchichanēnga y jama ndobenēnga. Jesús nýetscanga yojánashnaye.

²⁵Mallajta entšanga Galileocana, Decápolis luarocana, Jerusalenocana, Judeocana y chē Jordán bējaye chenguanoicana Jesús imojústona.

Ndayá Jesús tjoca tojanabuatambá

5 Jesús chē mallajta entšanga tojánanyē ora, batsjoye tojántsjua y tojanótbema. Chabe ústonēnga tmojanobobconá y ²Jesús tojanontšé mēntšá jabuátambana:

**Ndēmuanŷenga imomna chē
ndegombre oyejuayana bomnēnga**

(Lc 6.20-23)

³“Puerte oyejuayēnga mochántsemna chē Bēngbe Bētsabe soyēnga tša imuajaboto ca juabnayēnga. Chca entšanga mochántsemna chē Bēngbe Bētsabe amēndayoca mochtsiyenēnga.

⁴“Puerte oyejuayēnga mochántsemna chē mondbētsošachiyēnga; chēnga Bēngbe Bētsá entsējabuáchana ngménaca ndoñe chamondétsemnama.

⁵“Puerte oyejuayēnga mochántsemna chē uámanēnga ndoñe mondbēt-senobiamnayēnga, er chēnga mo chēngbe otocana soycá quem luare mochanjójyēngacñe.

⁶“Puerte oyejuayēnga mochántsemna chē nŷetsca soyēnguiñe tšabá jamama bošēnga. Chēngbe bošana entsemna mo chē oshēntsiyá y uajuendayabe bošancá. Chē nŷetsca soyēnguiñe tšabá jamama bošēnga mochanjobenaye jēftsinŷana lempe ntšamo tmojtsebošcá.

⁷“Puerte oyejuayēnga mochántsemna chē ínŷengbiamma ongmiaiyēnga, er Bēngbe Bētsá chēngbiamma bochanjóngmia.

⁸“Puerte oyejuayēnga mochántsemna chē nŷe tšabe juabnēnga ainaniñe bomnēnga; chēnga Bēngbe Bētsá mochanjinŷe.

⁹“Puerte oyejuayēnga mochántsemna chē nŷetscanga natjēmbana chamot-siyenama amēnga, er chēnga Bēngbe Bētsabe básenga ca mochantsabaina.

¹⁰“Puerte oyejuayēnga mochántsemna chē ínŷenga tmojama chamotsesufrínēnga, ntšamo Bēngbe Bētsá yobošcá bētsamama; chca entšanga mochántsemna chē Bēngbe Bētsabe amēndayoca mochtsiyenēnga.

¹¹“Puerte oyejuayēnga tšēngaftanga šmochtsemna, entšanga chacmo-joyánguango y chacmojtšécamena

ora y nŷetscna soyēngaca chacmojt-sēbuayatsenaye ora, atšbe ústonēnga bétsemnama. ¹²Móyejuanga, puerte móyejuanga, tšēngaftanga celoca becá šmochanjójyēngacñe. Er ntšamo entšanga tšēngaftanga cmécamena, cachcá chē Bēngbe Bētsabe juabna oyebuambnayēngbioye, chē tšēngaftangbe natsana monjaniyenēngbioye entšanga monjanécamena ca” —Jesús tojánayana.

**Ošbuáchiyēnga jtsemnana
mo tamocá y binŷnayēnga
quem luarentša entšangbiamma**

(Mc 9.50; Lc 14.34-35)

¹³“Tšēngaftanga, quem luarentša entšanga jtsējabuáchanēse šmojt-siyena, Bēngbe Bētsabe soyēnga chamotsetatšēmbuama, as chēngbiamma šmochántsemna mo chē mēntšena ndoñe chaondónbemama tcojatboto tamocá. Pero chē tamó fténana tojtsóbemēse, ndoñe ntsopodénana tempcá sanana cachiñe jtētsmēnana. Chca, ya tondayama ntsoservénana; chíyeca chē tamó tsáshenoye jtsētšenana y entšanga jtsebotájayana.

¹⁴“Tšēngaftanga, ntšamo tšabá yomncá šmojtsiyenēse, as quem luarentša entšangbiamma šmochántsemna mo chē ibetiñe tojtsebínŷna soycá. Canŷe bēts pueblo batsjo juatsbuañe tomnēse, ndoñe ntsopodénana iytēmencá jtsemnama. ¹⁵Canŷe uajuinŷanēsha tcojuajuinŷena ora, ndoñe cajonēshe tajsoye jtsabuájuaama, sinó tsbanánoca juajájuaama, chca, nŷetsca entšanga chē yebnentše tmojtsemnēngbiamma chaotsebínŷnama. ¹⁶Cachcá tšēngaftanga, entšangbe delante mo binŷnayēngcá šmochtsemna, as chēnga tšēngaftanga tšabe soyēnga šmuamama chamuinŷama, y chca, chēnga chamuinŷanŷé chē Taitá, Bēngbe Bētsá celoca endmēná, corente

uamaná y obená bétsemnama ca”
—Jesús tojánayana.

Chë Moisesbe leyama Jesús tojanabuatambá

¹⁷ “Ndoñe šmattsejuabnaye, ntšamo Moisesbe leyine iuayancá y chë Bëngbe Bëtsabe juabna oyebuambnayënga tmojanayancá jabétsepochochocama atše tijabo ca. Atše ndoñe chiyátabo chë soyënga jabétsepochochocama, sinó jabábuayenama ndayá chë soyënga ndegombre bétsayanama.

¹⁸ Ndegombre šcuayana: Celoca y quem luare chaojëftsemnëntscuana, ndocná queochatobenaye ni canye punto, ni canye letra chë leyënguentshana jtsejuánana, lempe ntšamo jochnënguama yomncá chaojtsemnëntscuana. ¹⁹ Chíyeca, nda nye mo canye mando chë leyënguine ndoñe tonjoyeuná cha, masque nye base soye chë mando tojtsemna, y chë ínÿenga cachcá tojtsabuatambá, cha Bëngbe Bëtsabe amëndayoca chë más nduamaná echántsemna. Pero ndëmuanÿenga tmojtsama ntšamo Bëngbe Bëtsá tojamëndacá y chë ínÿenga cachcá chamotsamama tmojtsabuátambase, chënga Bëngbe Bëtsabe amëndayoca uámanënga mochántsemna. ²⁰ Chë soyëngamna mëntšá šcuayana: Tšëngaftanga chë ley abuátambayënga y fariseúngbiyoye ndoñe šmontsayëñjanase, jtsamama ntšamo Bëngbe Bëtsá tcmojamëndacá, ndocna te Bëngbe Bëtsabe amëndayoye quešmochátamashjna.

Ndayá chë ínÿengaftaca tbojetnama Jesús tojanabuatambá

²¹ “Tšëngaftanga šmojouena ntšamo Bëngbe Bëtsá tšëngaftangbe bëts tai-tanga tojanamëndacá: ‘Ndoñe catjóba ca. Chca ochjajnayá bontsemna jobuambayana chë entšangbiana tšabá o ndoñe

tšabá tmonjamama endbayanabe delante, ndáyeca chca ca.’ ²² Pero atše šcuayana, nda cachabe catsátaftaca tbojetna, chánaca bontsemna jobuambayana chë entšangbiana tšabá o ndoñe tšabá tmonjamama endbayanabe delante, ndáyeca chca ca. Nda cachabe catsátbiyoye puerte tbojtsáboyënja, cha bontsemna chë Sanedrín ca uabaina mándayëngbe delante jobuambayana ndáyeca chca ca; y nda cachabe catsátbiana opjema ca tojayana, ntšamo cha bétsamama, cha bontsemna chë infier-noca ññeshoye jama.

²³ “Chíyeca, nderado ndayá Bëngbe Bëtsabe bëts yebnoye tcojuamba Bëngbe Bëtsá jëtschuayama y chora tcojenojuabó acbe catsáta ácaftaca etonaná yojtsemna ca, ²⁴ as chë tcojyëbo soye chë altarentša natsanoica cochjéseboshjona, cochtá y acbe catsátaftaca cochtenoyántsia. Chentshana cocayé altaroye cochjá y chë tcojuamba sóyeca Bëngbe Bëtsá cochjëtschuaye.

²⁵ “Nderado nda tcmojademanda y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandado josticiëngbe cucuatšine cmochanjáboshjona y chënga cárceloye cmochanjutame. ²⁶ Ndegombre cbëyana: Chentshana ndoñe quecochtétsbocna lempe candesopagantscuana ca” —Jesús tojánayana.

Chë boyá o shëmbioye ínÿaftaca íngñayama Jesús tojanabuatambá

²⁷ “Tšëngaftanga šmojouena ntšamo Bëngbe Bëtsá tojanmandacá: ‘Acbe boyá o acbe shëmbioye ínÿaftaca ndoñe catjaíngña.’ ²⁸ Pero atše cbëyana: Nderado canye boyabása ndëmuanÿe shembásabioye tbojinÿe y tojajuabó ‘malaye cha ca’, chë boyabása chca tojajuabose,

ainanoca ya chë inye shembásaftaca cachabe shémbioye tbojtseingñé.

²⁹“Chíyeca, nderado acbe catsbioica bomínýeca bacna soye tcojinýe y cachca soye tcojamése, más tšabá nántsemna chë bomínýe cochtsenobuchjatséca y cochtsétšena. Nýets cuerpo jtsebomnana y lémpca infiernoye jama chacmotsétšenamna, acbiama más tšabá nántsemna nýe canýe soye acbe cuerpentšana chacoperdé. ³⁰Nderado acbe catsbioica cucuátšeca bacna soye tcojamése, más tšabá nántsemna chë cucuatše cochtsenástjango y cochtsétšena. Nýets cuerpo jtsebomnana y lémpca infiernoye chacmotsétšenamna, acbiama más tšabá nántsemna nýe canýe soye acbe cuerpentšana chacoperdé ca” —Jesús tojánayana.

**Chë bouamnata enëtšanama
Jesús tojanabuatambá**

(Mt 19.9; Mc 10.11-12; Lc 16.18)

³¹“Méntšánaca leyíne enduábemana: ‘Ndëmuanýe boyá chabe shémaftaca tbojtsenétšena, chë boyá bontsemna chabe shema canýe tsbuanácha juiyiyana, ndayéchañe chaotsayana cha ya ndoñe chabe shema yontsemna ca.’ ³²Pero atše cbéyana: Nda chabe shémaftaca tbojtsenétšena y chca tojopasá ndoñe chë shema ínýaftaca tbontseingñé causa, as chë boyá jtsamana cha chabotseingñema, chë shema ínýaftaca tojtóbouamase. Y nda chë útšena shémaftaca tojtobouamá, chana canýe uabuatmá jtsebomnana, y chca, chë tsëm boyánaca canýe bacna soye jamana ca” —Jesús tojánayana.

**Chë entsanga júrayama
Jesús tojanabuatambá**

³³“Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado tcojayana: De Dios

chë soye chanjama ca; ojal chë soye ndoñe catjama ca.’ ³⁴Pero atše cbéyana: Tondayama šmattsejúraye; ni celocama, er choca Bëngbe Bëtsabe tbemaniñe endmëna. ³⁵Ni quem luarama, er Bëngbe Bëtsabiama mo tšenëtemcá endmëna, chiñe chabe shecuatšënga jacjayama; ni Jerusalenama, er chë pueblo endmëna Bëngbe Bëtsá chë Bëts Reybe bëts pueblo. ³⁶Ni tšëngaftangbe bestšašama cach ndoñe, er tšëngaftanga ndoñe quešmátobena ni mo canýe stjënashé tsenguëshe o fjantsëshe jabemana. ³⁷Tšëngaftanga aíñe ca jayanama šmojtsebošëse, nýe aíñe ca šmochjayana, y ndoñe casna nýe ndoñe. Ndayá chentšana más šmojatichamo soye, Satanásbiocana jtsóbocanana ca” —Jesús tojánayana.

**Chë entsanga
mondbátenachnënguama
Jesús tojanabuatambá**

(Lc 6.29-30)

³⁸“Tšëngaftanga šmojouena ntšamo tšëngaftangbe bëts taitángbioye tmojanëyancá: ‘Nderado nda tcmojtsebuchjatséca, ácnaca derecho contsebomna canýebé cha jëtsbuchjatsécama ca; y nderado nda canýe juatsaše tcmojtsásiye, ácnaca derecho contsebomna cánýëše cha jtašiyama ca.’ ³⁹Pero atše cbéyana: Ndoñe matsbošana chë ndayánaca tcmojaborlábioye jtachnënguama; chamna, ndánaca catsbioica tcmojajuebjantšetase, cochjomiye chë ínýoica cachcá chacmomama. ⁴⁰Nderado nda tcmojademanda y tojtseboše acbe shabuanguanéjua jtsabocñama, cha molesenciá acbe quëfšaiyanaca chauetsácñama. ⁴¹Nderado nda tcmojasmá y tcmojamanda bnëtsana cuadroca juyambama, inye bnëtsana cuadro cochjuyamba. ⁴²Nda ndaye soye tcmojotjañëse, cochjatštaye; y

nda ndaye soye tcmojuátjase, cha ndoñe stëtsoye catjaquéda ca” —Jesús tojánayana.

**Chë uayayëngbiamama
bonshánana jtse bomnana**

(Lc 6.27-28, 32-36)

⁴³“Tšëngaftanga šmojouena ntšamo tšëngaftangbe bëtš taitángbioye tmojanëyancá: ‘Acbe amigo cochtsebobonshana y acbe uayayá cochtsaboyënja ca.’ ⁴⁴Pero atše cbéyana: Tšëngaftangbe uayayënga šmochtsababuánÿeshana, y chë cmécamenëngbiamama Bëngbe Bëtšá šmochtseimpadana. ⁴⁵Chca tšëngaftanga, chë Taitá, Bëngbe Bëtšá, chë celoca endmënabe básenga šmochántsemna; Bëngbe Bëtšá endbëtšama tšabe y bacna entšángbeñe chabe shinÿe chaotsebinÿayama, y endbëtšama chë nÿetsca soyënguine tšabá jamama bošënga y ndoñe chca entšángbeñe chauaftema. ⁴⁶Tšëngaftanga nÿe chë tšëngaftanga tcmojsababuánÿeshanënga šmojsababuánÿeshanëse, ¿Bëngbe Bëtšábíocana ndayá šmochjuacaná? Romocama crocénana entšángbioye atjanayéngnaca chca monduamana. ⁴⁷Y nÿe chë amiguéngbioye šmojsacheuanase, ¿ndaye bëtš soye šmojsama? Chë ndoñe judiéngnaca chca mondbëtšama. ⁴⁸Tšëngaftangbe Taitá, Bëngbe Bëtšá celoca endmëná, nÿetsca tšabe soyënga bomná y amá endmëna. Tšëngaftángnaca cachcá šmochtsemna ca” —Jesús tojánayana.

**Jesús tojanabuatambá ntšamo tšabe
soyënga ínÿengbiamama jamana**

6“Cuedado šmochtse bomna ndoñe ntsamama entšángbeñe tšëngaftangbe tšabe soyënga, nÿe chënga chca chamuinÿama. Chca šmojamëse, tšëngaftangbe Taitá,

Bëngbe Bëtšá, celoca endmëná ndocna uacanana soye quecmochtétatšataye.

²“Chcasna, nderado nda caridá tcojábemëse, chca ndoñe šmatjama chë ntšamo šmojsamama nÿetscanga chamotsetatšëmbuama, mo canÿe trompetétfjua cuaftsajatëtancá, chë caridá šmojábemama chaotsótatšëmbuama; chca monduamana chë bacna entšanga chë ntšamo ndegombre tmojuabnacá ndinÿinÿayënga, chë judiëngbe enefjuana yebnënguenache y tsáshenañe. Ndegombre cbéyana, chë chca amënga ya chëngbe uacanana soye tmojóyëngañe, ntšamo chënga tmojamama entšanga tšabá chëngbiamama tmojtsoyebuambná ora. ³Chcasna, nda caridá tcojábema ora, ndocná más chaondétsetatšëmbo, mo chë uañicuayoica cucuatše ndoñe queondbatstatšëmbcá ndayá chë catsbioica cucuatše tojtsamama, ⁴chca, acbe caridá iytëcana chaotsemnana. As, tšëngaftangbe Taitá, nda bominÿe endbëtsequëcjnaye chë iytëmencá tcojtsama soye, acbe uacanana soye cmochántatštaye ca” —Jesús tojánayana.

**Jesús tojanabuatambá ntšamo
Bëngbe Bëtšáftaca jencuéntana**

(Lc 11.2-4)

⁵“Bëngbe Bëtšáftaca šmojtsencuénta ora, ndoñe šmattsama chë bacna entšanga ntšamo ndegombre tmojuabnacá ndinÿinÿayëngcá. Chënga corente jtsogusetánana chë judiëngbe enefjuana yebnënguenache tsanana y tsashená tsëntsaca Bëngbe Bëtšáftaca jtsencuéntayana, chca, nÿe entšanga chë soye chamuinÿama. Ndegombre šcuayana: chënga nÿe morscama ya montsábouacanana, chënga tšabá imojtsama ca entšanga tmojayana ora. ⁶Pero aca Bëngbe Bëtšáftaca jencuéntama orna, acbe

tsoye cochtamáshëngo, bësáša cochtatame y cháftaca cochjencuénta. Chánaca chë iytémenentse ácaftaca echántsemna. Bëngbe Taitá lempe bominÿe endetsequëcñá, masque cánÿenga šmojtsemna ora šmojtsama soyëngnaca. As Bëngbe Bëtsá, chca cháftaca chacojtsencuénta ora, cachá acbe uacanana soye cmochántatštaye.

⁷“Bëngbe Bëtsáftaca šmojtsencuénta ora, ndoñe nÿe cachcá ndoservena palabrénga ba soye šmattsichamo. Chca mondbëtsama chë Bëngbe Bëtsábioye nduabuátmënga. Chënga jtsejuabnayana becá chca tmojtsichámësna, Bëngbe Bëtsá chënga más yochjóyaunaye ca. ⁸Ndoñe chëngcá šmattsemna. Cabá nduyana ora, Bëngbe Bëtsá ya jtsetatšëmbuana ntšamo tšëngaftanga cmojtsëjabotcá. ⁹Chamna tšëngaftanga mëntšá cmontsétocana Bëngbe Bëtsáftaca jencuéntana: Bëngbe Taitá, celoca icotsomñe. Acbe uabaina chë más uámana uabainana chauesomñe.

¹⁰Acbe amëndayana chaóshjango.

Celoca yojtsemna ntšamo icobošcá; quem luaríñnaca cachcá chaotsemna.

¹¹Mënté šmiyatšatá cada te šnetsëjaboto tandëše.

¹²Bacna soyënga bënga fsënjama: šmotsaperdónaye; cachcá ntšamo chë bëngbiana bacna soyënga amënga fsëndbetsaperdonaycá.

¹³Bacna soyënga jamama šojocohëngo ora, šcochjujabuache chca ndenobuíyama.

Nÿetsca bacna soyënguentsana šmatsebacaye.

¹⁴“Chë tšëngaftangbiana bacna soyënga amënga šmojtsaperdónasna, Bëngbe Taitá chë celoca endëtsomñá, tšëngaftanga cmochanjáperdonaye.

¹⁵Pero chë tšëngaftangbiana bacna soyënga amënga ndoñe

šmotsaperdónasna, Bëngbe Taitá cachcá, tšëngaftanga ndoñe quemochátaperdonaye ca” —Jesús tojánayana.

Chë Bëngbe Bëtsáftaca jencuéntama tondaye ntjascá

¹⁶“Y nderado tšëngaftanga inÿe ora tondaye ntjascá šmojtsemna Bëngbe Bëtsáftaca jencuéntama, juebëngmëñënga ndoñe šmattsemna, ntšamo chë bacna entšanga chë ndegombre tmojuabnacá ndinÿinÿayënga mondbetsamcá, as chca, chënga imojtsayúnama entšanga chamuinÿama. Ndegombre šcuayana, chëngbe uacanana soye ya tmojóyëngacñe, chënga tmojayunáyeca entšanga tšabá chëngbiana tmojtsoyebuambná ora. ¹⁷Aca nderado tcojtsayúna ora, cochtsojuebjabebiyë y aceitÿyeca botamana cochtenochquëca, ¹⁸as chca, entšanga ndoñe chamondëtsetatšëmbo aca tondaye ntjascá cojtsemnana. Nÿe acbe Taitá, lempe chë mo iytémencá yomna soyëngama tatšëmbuá, chama echántsetatšëmbo. Y cha, chë iytémencá tcojama soye bominÿe endbetsequëcñayá, acbe uacanana soye cmochántatštaye ca” —Jesús tojánayana.

Chë celoca bomnana

(Lc 12.33-34)

¹⁹“Bomnana quem luarentšë ndoñe šmattsëjuabaye. Muentšna chë mejojón y inÿe pochócaye soyënga lempe jtsendbiamana, chë atbëbanënga jtsamashjnana y chë juabana soyënga jesatbëbana. ²⁰Más tšabá tšëngaftangbiana entsemna, mora quem luarentšë tšabe soyënga šmojtsamamna, uacanana soyënga celoca chaotsójuabaye. Chentšë ni chë mejojón, ni chë inÿe pochócaye soyënga acbe soyënga quemochatspochóca,

ni atbëbanënga quemochátamashjna jatbëbama. ²¹ Er chë ndayentse acbe bomnana tojtsemnentša soyëngama acbe ainánaca cochántsejuabnaye ca” —Jesús tojánayana.

Chë cuerpama uajuinÿanësha

(Lc 11.34-36)

²²⁻²³ “Acbe bominÿe tšabá totsomñëse, mo canÿe uajuinÿanëshacá acbe cuerpama jtsemnana, chíyeca aca jtsobenana ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnësa, chë bominÿe tondaye ntso benana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnënga tcojtse bomnëse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnënga tcontse bomnësa, lempe ntšamo chacojtsamcá ndoñe tšabá queochátmëna. Y chca, aca cochantsiyena soyënga jtsamëse mo puerte ibetiñcá ca” —Jesús tojánayana.

Chë Bëngbe Bëtsabiana bonshánana o chë nÿe quem luarentša soyënga jtsebošana

(Lc 16.13)

²⁴ “Ndocná ntso benana uta mandayata jtsaservénana: cánÿabioye bochantšaboyënja y chë ínÿabioyna bochantsebobonshana, o cánÿabiana tšabá echántsetrabajaye y chë ínÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtse bomnana yapa tcojtsebošëse ca” —Jesús tojánayana.

Bëngbe Bëtsá chabe básenga jtšanÿenana

(Lc 12.22-31)

²⁵ “Chcasna atše šcuayana: Ndoñe šmattsenócochinÿena ndayá šmochjase

o šmochjofsiye vida jtse bomnana, ni ndaye entsáyá šmochjuíchëtjuama cach ndoñe. Ndegombre, vida chë sanama más enduámama y cuerpo chë entsáyama más. ²⁶ Šmochjanÿe chë shloftšënga jt-songüefjnayana. Chënga tondaye ntjá-jena, ni jaja saná ntjátbanana, ni chë grano uaquëcjnaye yebnënguiñe quemnatsquëcñá; pero Bëngbe Bëtsá, ce-loca endmëná, chënga saná jtsatšat-nayana. ¡Y tšëngaftanga chë shloft-šetëmëngbiama puerte más šmonduámama! ²⁷ Masque chca endmëna, canÿa masque tša tojtšenócochinÿena, çntšamo nanjobenaye jamana chë ntsachetšá vida yochtse bomnentshana, canÿe hora vida más jabotiyana?

²⁸ “Y ndayá šmochjuíchëtjuama, çndáyeca šmojtšenócochinÿena? Šmochjinÿe chë jajañe lirio uantšefjushangá jtsajuajnana: ndoñe ntsetrabájayana, ni ntseshabiamnayana. ²⁹ Pero atše cbéyana, ndegombre ni mo Rey Salomón nÿetsca chabe bomnánaca nÿetšá botamana mo chë lirio uantšefjushangacá quenjatspormana. ³⁰ Bëngbe Bëtsá tša botamana shácua na tojuama, y chë shácua na mënté jajoca jtsamnana, yëfsana iñoca. Chca chë shácuanaca cha tojamëse, ndegombre tšëngaftangbiámnaca Bëngbe Bëtsá echanjama entsáyá chašmotsábomnana, jentšanga nÿe batšá Bëngbe Bëtsábeñe ošbuáchiyënga! ³¹ Ndoñe šmattsenócochinÿena, mëntšá jtsichámëse: ‘¿Ndayá mochjase?’ o ‘¿Ndayá mochjofsiye?’ o ‘¿Ndayá mochtichëtjo ca?’ ³² Chë soyëngama, chë Bëngbe Bëtsábioye nduabuátmënga mondbëtsenocochinÿena, pero tšëngaftanga ndoñe. Tšëngaftangbe Taitá, Bëngbe Bëtsá, ndayá cmojtséjbotama endétatšëmbo. ³³ Chíyeca, tšëngaftangna natsana šmochjshëtseboše Bëngbe Bëtsá tšëngaftangbe ainaniñe chaotsemándama y lempe ntšamo

cha tojamandacá šmochtsama. Chca šmojamése, Bëngbe Bëtsá lempe ntšamo cmojtsëjbotcá cmochanjátsataye. ³⁴Ndoñe matenócochinÿenana ndayá yëfse yochjochnënguama. Yëfse luare cochántsebomna chë soyënga jinÿama y jamama. Cada tescama endbëtsemna yapa totcá soyënga jájandmanama ca” —Jesús tojánayana.

Ndoñe ntsichámuana chë ínÿenga tšabá o ndoñe tšabá tmonjamama

(Lc 6.37-38, 41-42)

7 “Ndocá ínÿengbiamá šmattsichamo chë ndoñe tšabá tmontsamama. Chca, Bëngbe Bëtsá ndoñe queochátichamo tšëngaftanga ndoñe tšabá šmonjama ca. ²Chë ntšamo tšëngaftanga ínÿengbiamá šmojtsichamcá tšabá o ndoñe tšabá tmontsamama, cachcá Bëngbe Bëtsá tšëngaftangbiamá chë ntšamo šmojamama echántsihomo. Y ntšamo ínÿengbioye chašmojábiamá, uabouana o ndoñe jabuache soyënga, cachcá Bëngbe Bëtsá tšëngaftangbioye cmochanjábiamá.

³⁻⁵“Nderado canÿa chabe bominiÿne canÿe niñëfja tojtsebomnëse, cha ndoñe ntšobenana chabe catšata jauyanama: ‘Acbe bominiÿentšana canÿe polvështema jtsebujátsëcama šmolesenciá ca’. Natsana cha bontsemna cachabe bominiÿentšana chë niñëfja jtšenobuchjátsëcana tšabá jinÿama jobenayama, chabe catšatbe bominiÿentša polvështema jtsebujátsëcama. Cachcá entsemna acbiamá, ¡bacna entšá chë ntšamo ndegombre tcojuabnacá ndinÿinÿnayá!, chë tša bacna soye cojtsama ca acbe catšata tcojauyana ora, cach aca tša bëts bacna soyënga cojtsamama ntjenojuaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama

ngménaca jshatenójuaboyana y chca amana jtsajbanana, y chentšana cocayé cochantsobena acbe catšata juajabuáchana ntšamo tšabá yomncá chaotsamama.

⁶“Chë Bëngbe Bëtsabe soyëngama josértama ndéboše entsanga ndoñe šmattsabuayinÿaye. Añese nántsemna mo chë Bëngbe Bëtsabe bëts yebnoqa uátšëmbona mëntšena quešënga cuaftšëbuajocá; chorna chënga jobuértanana, jobotjajuana y jtsáshantsana. O mo chë uámana ndëtšëtëmënga cotšëngbioye cuaftšëtšancá, chënga nÿe jtsebotájayana ca” —Jesús tojánayana.

Šmochjotjañe, šmochjánguango y šmochjachembo

(Lc 11.9-13; 6.31)

⁷“Šmochjotjañe y Bëngbe Bëtsá cmochanjátsataye; šmochjánguango y šmochanjinÿena; šmochjachembo y bëšáša cmochanjébëtafjo. ⁸Er ndánaca tojtsotjanañá, jóyëngacñana; y nda tojtsenguá cha, jónÿenana; y nda tojtsechembuanábioye jebiatëfjuana.

⁹“¿Ndëmuanyë boyabása tšëngaftanguentšá, canÿe tandëse chabe uaqiñá tbojtsotjanañe ora, canÿe ndëtšbé chábioye buanjatštaye? ¹⁰¿O canÿe mëtscuaye buanjatštaye, beona tbojtsotjanañe ora? ¹¹Y chca, tšëngaftanga, bacna soye amënga, tšëngaftangbe basetëmënga tšabe soyënga jatšatayama šmojtsamanëse, ¡más tšëngaftangbe Taitá, Bëngbe Bëtsá celoca endmëná, chë tmojtsotjanañënga tšabe soyënga echanjátsataye!

¹²“Inÿengaftaca šmochtsama ntšamo chë ínÿenga tšëngaftangtafaca chamotšamama šmojtsebošcá. Chca endmëna ntšamo Moisesbe leyinÿe y chë Bëngbe Bëtsabe juabna oyebuambnayëngbe buatëmbana soyënguiñe endayancá ca” — Jesús tojánayana.

Chë base utëntšá bësháša*(Lc 13.24)*

¹³“Chë base utëntšá bëshášajana š-mochjámashjna. Chë utëntšá bëshášajana y chë paselo jóyename benache, infiernoye cmochanjuánatse y banga chëjana mondámashjuana. ¹⁴Chë tšabe vida binýnoye jamna base utëntšá bëshášajana endmëna y ndoñe paselo jóyename benache, y chiñe báseftanga mondbínýena.

Chë Bëngbe Bëtsabe ndoñe ndegombre juabna oyebuambnayënga*(Lc 6.43-44)*

¹⁵“Cuedado šmochtsebomna chë Bëngbe Bëtsabe ndoñe ndegombre juabna oyebuambnayëngbiama. Chëngna mo oveshëngcá tšëngaftangbiroye mochanjabo, pero ndegombre chënga mondmëna mo tšátjaye tjañe quešëngcá. ¹⁶Tšëngaftanga betiyënga jtsabuatmana ntšamo cada ona tojtseshajcá; cachcá tšëngaftanga chcanga šmochantsëbuatma, ndayá chënga mochtsamama. Uchmašëshe betiyentsšana ndoñe uvas ntjuátabebiana, ni higuëbé cardo betiyentsšana. ¹⁷Chca, nýetsca tšabe betiyiñe tšabe soye jashájonana; y chë ndoñe tšabeshiñna podesca soye. ¹⁸Canýe tšabe betiyiñe quenátópodena podesca soyënga jashájonana, ni canýe ndoñe tšabe betiyiñe tšabe soyënga jashájonana. ¹⁹Ndaye betiye podesca shajuanëshe jtseshatëtsšana y iñoye jtsatmetšana. ²⁰As chca tšëngaftanga chënga šmochantsëbuatma, ndayá chënga mochtsamama ca” —Jesús tojánayana.

Bëngbe Bëtsabe amëndayoye ndoñe nýetscanga jamashjnana*(Lc 13.25-27)*

²¹“Ndoñe nýetscanga chë ‘¡Utabná! ¡Utabná ca!’ atše šmojtsatsëtsnanga, Bëngbe Bëtsabe amëndayoye quemochátamashjna. Nýe ntšamo atšbe Taitá, celoca endmëná, tojtsebošcá amëngna aíñe. ²²Quem luare jopochócama te banga atše šmochanjauyana: ‘¡Bëngbe Utabná! ¡Bëngbe Utabná! Aca jótšëmbonëse, ácbëñe betsošbuáchema, bënga fsëndoyebuambná, y ácbeyeca bacna bayëjëngbe juabna entšángbentsšana fsëndëtabocana, y ácbeyeca bëts soyënga fsëndama ca.’ ²³Chora atše chanjójuaye: ‘Ndocna te checbaishëbuátmana. Atšbentsšana mojuánanga, bacna soye ama entšanga ca” —Jesús tojánayana.

Chë uta ucuatjoniñe*(Mc 1.22; Lc 6.47-49)*

²⁴“Chcasna, nda atše šojoyeuná y chë ntšamo sentsichamcá tojtsama, endmëna mo canýe tšabá juabnaye boyabasacá. Chë boyabásana ndëtsbeñe chabe yebna yojajebo. ²⁵Uaftena yojuáshjango, chë béjayënga yojóftjajna, chë yebnoye puerte yojtsebinýiaye, pero chë yebna ndoñe ntjuáshajayana, chë yebna ndëtsbeñe inajéboyeca. ²⁶Pero nda atšbe palabra tojouena y ntšamo sentsichamcá ndoñe tontsama, endmëna mo canýe ndëjuabnaye boyabasacá. Chë boyabásana chabe yebna cascajuiñe yojajebo. ²⁷Uaftena yojuáshjango, chë béjayënga yojóftjajna, chë yebnoye puerte yojtsebinýiaye y chë yebna uabouancá yojtsáshajaye ca” —Jesús tojánayana.

²⁸Jesús chë soyënga jóyebuambayama tojanpochocá ora, chë entšanga ojnanánënga imojtsemna ntšamo cha tojánabuatambama. ²⁹Jesús

tojanabuatambá nyets obenánaca, mo canya mando bomnacá y ndoñe nye mo chë ley abuatambayëngcá.

**Jesús, canya bacna nguayanánaca
šocábioye tbojanshná**

(Mc 1.40-45; Lc 5.12-16)

8 Jesús tjoicana tojtantsmá ora, ba entšanga tmojanasto. ²Chora canye boyabása bacna nguayanánaca šocá Jesúsbioye tojanobeconá, chabe delante yojoshamentšiyi y tbojaniyana: —Utabná, aca tojtsebošëse, catjobenaye atšbe šocana jtsebojuánana ca.

³As Jesús tojanacuenyanëjaná, chë boyabásabioye tbojánbojajo y tbojaniyana: —Añe, séntsebošë. Šocana cbotsebojuaná ca.

Y cachora chabe šocana tbojtsanóbojuanañe. ⁴Jesús chë shnanábioye tbojaniyana: —Mouena, ndocnábeñe cattse-cuéntaye; nye chë Jerusalenoca báchnëbioye motsa, y cha cochjinjinyiye mora aca ya tšabá cojtsatsmënama. Bayá cochtsambaye, Bëngbe Bëtsá chama jëtschuayama, ntšamo Moisés tojëftsanmandacá, as chca nyëtscanga chamotatšëmbona mora aca ya ndoñe šocá consemnama ca —Jesús tbojaniyana.

**Jesús canye Romano
soldadëngbe amëndayabe
bochichnayábioye tbojanshná**

(Lc 7.1-10)

⁵Jesús Capernaumoye tojánamashëngo ora, canye Romano soldadëngbe amëndayá Jesúsbioye tojanobeconá canye pavorama jaimpádama. ⁶Jesúsbioye tbojaniyana: —Utabná, atšbe bochichnayá yebnoca šocá entsemna, jama ndoñe quenátobena y jabuache tsetšanánaca entsobësná ca.

⁷Chora Jesús tbojanjuá: —Cha jáshnama chanjá ca.

⁸As chë soldadëngbe amëndayá tbojaniyana: —Señor, atšbe merecido tait-satobuajoñe atšbe yebnentšë chacuamashënguama; nye mayana y atšbe bochichnayá tšabá echántsatsmëna. ⁹Atšbioye mándayënga atšë sëndábamna y átšnaca soldadëngbe amëndayá sëndamëna. Atšë canye soldado stjauyana “motsa ca”, cha cachora jana; y inya stjauyana “mabo ca”, cha cachora jabana; y nderado atšbe bochichnayá ndayánaca chaomama stjamánda, chánaca cachora chë soye jamana ca —cha tojánayana.

¹⁰Jesús chca tojanuena ora, tojanenjaná y chë ústonënga tojanéyana: —Ndegombre cbéyana, ni mo nyets Israelentšë ni canya quem boyabasacá Bëngbe Bëtsábeñe nyëtšá ošbuachiyá chiyátinyena. ¹¹Y šcuayana, shinye bocanoicana y shinye uenatjëmbambanoicana bëtscá entšanga mochanjabo, y Abraham, Isaac y Jacob, chë judiëngbe tempsca uámana bëts taitángaftaca mochanjotbiama Bëngbe Bëtsabe amëndayoca, cányiñe juasama. ¹²Ba Israeloca entšanga, chë ndëmuanjëngbiama Bëngbe Bëtsabe amëndayana natsana yochtsanmëna, chocana mochantëbuacana chë ndëbinyna luaroye, infernoye. Chentšë puerte mochanjenóbošachna y chë tsetšanama juatsašënga mochantsenoftëšjojnaye ca —Jesús tojánayana.

¹³Chora Jesús chë soldadëngbe amëndayábioye tbojaniyana: —Acbe yebnoye motsatá y chë ntšamo cojtsošbuachecá cachcá chaotsemna ca.

Cachora chë bochichnayá tšabá yojtsatsmëna.

**Jesús, Pédrëbe uambén
mamábioye tbojanshná**

(Mc 1.29-31; Lc 4.38-39)

¹⁴Chentšana Jesús, Pédrëbe yebnoye tojána. Chentšë Pédrëbe uambén mamá

šocá calentóracá yojtsejutsnajona.
¹⁵Chora Jesús chë uambén mamabe cucuatše tojánbojajo y cachora chë calentora tbojtsanóbojuanañe. Chorna chë uambén mamá tojtantsbaná y tojanontšé chënga jobuácuedana.

Jesús ba šoquënga tojanashná

(Mc 1.32-34; Lc 4.40-41)

¹⁶Chë te jaibéatama ora, Jesús yojtsemnoye banga bacna bayëjëngbe juabna uambaye entsanga tmojanënatsé. Chora, nÿe canÿe Jesús jóyebuambayëse chë bacna bayëjënga imojtsaisébocana y nÿetsca šoquënga tojanashná. ¹⁷Chca Jesús tojanma, cachcá chaotsemnama ntšamo chë Bëngbe Bëtsabe juabna oyebuambnayá Isaías tojanayancá. Cha mëntšá tojánayana: “Cha bëngbe šocanënga tonjaftsanca y bëngbe nÿetsca tsetšanana chábeñe tonjanoquedá ca.”

Chë Jesús juastama bošënga

(Lc 9.57-62)

¹⁸Jesús tojánanÿe mallajta entsanga chabe shéconana; as tojanmandá uafjajónaye chenguana jama. ¹⁹Chorna, canÿe ley abuatambayá Jesúsbioye tbojanobobeconá y tbojaniyana: —Buatëmbayá, atše séntseboše aca juastama, ndémoye chacojtsá choye ca.

²⁰As Jesús tbojaniyana: —Chë zorrënga mondbomna cuevëshënga ndayentše jtsiyenama y chë shloftšëngna uajajonëshangá, pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

²¹Chora inÿa, cach uatsjendayënguentšá, Jesúsbioye tbojaniyana: —Bëngbe Utabná, šmolesenciá atšbe taitá chjshesabotbontsañe ca.

²²Chora Jesús tbojanjuá: —Nÿe šmasto. Chë Bëngbe Bëtsabiama mo obanëngcá, ntšamo Bëngbe Bëtsá yomandacá ndoñe tmontsama

causa, chënga cachëngbe obanënga chamotsétebuantsañe ca.

Jesús chë binÿia y chë béjaye bonguana yojétsbema

(Mc 4.35-41; Lc 8.22-25)

²³Chentsana Jesús canÿe barquëshoye tojánamashëngo y chabe uatsjëndayënga imojtsetjëmbambnaye.

²⁴Ndeolpe tša jabuache binÿia chë uafjajónaye béjayiñe yojóshjango; nÿetsá jabuachana yojtsemna, chë olëshënga barquëshá imojtsétsbotsana. Y Jesús chora inétsomañe. ²⁵As chabe uatsjëndayënga tmojána Jesús jetsefsenama y tmojaniyana: —¡Bëngbe Utabná, šmatsebacá. Montsenatjëmbambana ca!

²⁶Chora Jesús tojanéyana: —¿Ndáyeca tša šmojtsauatja? ¿Tša batšatema šmojtsošbuaché, Bëngbe Bëtsá tšëngaftanga jujuabuáchama yobenama ca?

Chca tojanéyana y tojantsbaná. Chora tojanmandá chë binÿia y chë býyeshe bonguana chaotatsmënema, y lempe natjëmbana yojtsatsmëna. ²⁷Chabe uatsjëndayënga ojanánënga imojtsemna y mëntšá imojtsichamo: “¿Nda quem boy-abása yomna? Cha tonjayana y chë binÿia y chë býyeshe tmonjoyeuná ca.”

Chë Gadara luaroca entsáta, bacna bayëjbe juabna uambayata

(Mc 5.1-20; Lc 8.26-39)

²⁸Jesús uafjajónaye chenguana tojánashjango, canÿe luare Gadara ca uabáinentše. Chorna chë utabuantsánëngbentsana útata, bayëjbe juabna uambayata, tbojánbocna y Jesúsbioye tbojanobobéconata. Puerte tšatjayata ibnamna, chíyeca entsanga ndoñe ntsobenana chëjana jtsachnějuanana; ²⁹y chora tbojanontšé chë bacna bayëjëngbeyeca mëntšá uayebuáchana: —¿Ndayá béngaftaca

cojtseboše, Jesús, Bëngbe Bëtsabe Uaquiñá? ¿Moye tcojabo bënga chafsufrima, chama cabá ndoñe chë tempo yontsemna ora ca?

³⁰Chentša béconana ba cotšënga immajena y chënga immétsosañe. ³¹Y chë bayëjënga Jesús tmojanimpadá: —Muentšana jésebocanama aca tcojamëse, cochjama bënga chë cotšëngbeñe fchayamashjnama ca.

³²Y Jesús tojanéyana: —Motsajna ca.

Chora chë bayëjënga chë boyabásatbentšana tmojésanbocana y chë cotšëngbeñe tmojánamashjna; cachora chë cotšënga batsjocana penëšëjana uafjajónayoye imojtsoshbuetše y yojtšatajo.

³³Chora chë cotšënga anýenënga tmojtšanacheta, y chë pueblöye tmojánashhajna ora, tmojanontšé lempe ntšamo yojochnëngcá jacuéntana y ntšamo chë bayëjbe juabna uambayátaftaca tojanopasámnaca.

³⁴Chora nýetsca entšanga chë pueblentšana tmojánbocana y Jesús yojtsemnoye tmojána. Chë entšanga Jesús tmojáninýe ora, tmojanimpadá chë luarentšana chaueseboconama.

Jesús, canýe jama ndobenábioye tbojanšhá

(Mc 2.1-12; Lc 5.17-26)

9 Chca tojanopasá chentšana, Jesús canýe barquëshoye tojánamashëngo, uafjajónayechengua tojána y cachabe pueblöye Capernaumoye tojtánashjango. ²Chora, canýe jama ndobená, tjuashiñe jajoná, Jesús yojtsemnoye básefta boyabásenga tmojanamba. Jesús tojáninýe chënga tša imojtsošbuáchema chë šocábioye jáshnama cha bétsobenama; as chë šocábioye tbojanijana: “Sobreno, añemo matsca; acbe bacna soyënga tcbontseboperdoná ca.”

³Chca causa, báseftanga ley abuátambayënga chentše imojt-

semnënga imojtsejuabnaye: “Chca jayanëse, ndoñe tšabá quenátichamo Bëngbe Bëtsabiamama; mo chábioye cuafjoyenguangcá entsemna ca.”

⁴Pero Jesús yojtsetátšëmbo ntšamo chënga imojtsejuabnycá; chíyeca tojanéyana: “¿Ndáyeca nýetsá bacna juabnënga ainaniñe šmojtseboconna ca? ⁵¿Tšëngaftangbiamama ndayá más paselo nántsemna tšëngaftangbe delante jayanama: ‘Acbe bacna soyënga tcbontseboperdoná’ o ‘Matëtsbaná y motsa ca?’ ⁶Atše cbochanjínýanýiye ntšamo chë Bëngbe Bëtsá Entšá tbojanbemá quem luarentše mando yobomnana, entšanga bacna soyëngama jáperdonama ca” —Jesús tojanéyana.

As chë jama ndobenábioye tbojanijana: “Matëtsbaná, acbe tjuashe mesocñe y acbe yebnoye motsatoñe ca.”

⁷Chorna chë jama ndobená tojtantsbaná y cachabe yebnoye yojtšatoñe.

⁸Chca tmojáninýama chë entšanga auatjanánënga imojtsemna y Bëngbe Bëtsá imojtsatschuanaye, cha chca obenana entšanga tojánatšatama.

Jesús, Matéobioye tbojanchembo chabuastama

(Mc 2.13-17; Lc 5.27-32)

⁹Jesús chentšana tojtšanoñe y canýe entšábioye tbojáninýe, Mateo ca uabainá, chë Romocama impuesto entšángbioye atjanayentše inétsotbemañe. Chora Jesús tbojanijana: “Šmasto ca.” As Mateo chentšana tojéftsantsbaná y tbojanasto.

¹⁰Jesús cach Mateobe yebnentše yojtšesaye ora, banga Romocama impuesto entšángbioye atjanayënga y ínýenga bacna soye amënga tmojánashhajna y mesëshentše Jesús y chabe uatsjëndayëngaftaca imojotbiamama.

¹¹Chë fariseunga chca tmojáninýe ora, Jesusbe uatsjëndayëngbioye

tmojanatjá: —¿Ntšamo chca yojtsemna, tšengaftangbe buatëmbayá chë impuesto atjanayënga y bacna soye amëngaftaca entsesá ca?

¹² Jesús chca tojanuena y chë fariseunga tojanéyana: —Chë salud bomnënga ashnayá ndoñe ntsëjabótana, pero chë šoquënga añe. ¹³ Šmochjá y ntšamo ndegombre iuayancá šmochjuatsjinÿe quem Bëngbe Bëtsabe uabemana palabrënguñe:

Atše séntseboše tšengaftanga lastemadënga chašmotsemna, y ndoñe nÿe bayënga chašmotsëbánaye Bëngbe Bëtsá jëtschuayama ca.

Atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga jabáchembuama ca —Jesús tojánayana.

**Jesús tmojantjá chë Bëngbe
Bëtsáftaca jencuéntama
tondaye saytescama**

(Mc 2.18-22; Lc 5.33-39)

¹⁴ Chentšana, Juan chë Ubayanabe ús-tonënga tmojanobeconá y Jesús tmojantjá: —Bënga y chë fariseunga fsënduamana ba soye tondaye ntjascá jtsemnana, Bëngbe Bëtsáftaca jencuéntama. ¿Ndáyeca acbe uatsjëndayënga ndoñe chca ca?

¹⁵ As Jesús tojanéjua: —Chë casamento ofjanënga chë boyabása bouamná chëngaftaca tojtsemnëntscuana, chëngbiöye saná ndoñe ntsabuáshebenana y ngménaca ndoñe ntsemnëngana. Pero ora echanjobuache y chë boyabása bouamná chentšana mochantsánatseñe; chora cocayé chë ofjanënga tondaye más jasama quemochátsbomna. Ntšamo chë tojobouamá cha y chë ofjanëngaftaca endmëncá, cachcá endmëna atše y atšbe uatsjëndayëngaftacnaca.

¹⁶ “Ndocná canÿe uatanguá entsáyá base tsëm entsëjuaca jtarmëndana. Er

chë tsëm entsëjua jtsabéconana y chë uatanguá entsáyá más jtsatanécanana, y chca chë uátanëcniñe más bëtsiñe jtsabemana. ¹⁷ Y cach ndoñe chë tojtšeshayana vínoye tanguá jasabenguñe ntjataftsuámayana. Tcojuaftsuamasna, chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservënana. Chíyeca comna, chë tojtšeshayana vínoyna tsëm jasabenguñe juaftsuámama; y chca, chë jasabenga y chë vínoye jtsoservënana ca” —Jesús tojánayana.

**Jesús canÿe shembásabiöye
tbojanshná y tojanma Jairëbe
bembetema cháuatayenama**

(Mc 5.21-43; Lc 8.40-56)

¹⁸ Jesús entsanga yojtšëtsëtsnantscuana, chë judiëngbe enefjuana yebnentša canÿe mandayá tojánashjango y Jesusbe shecuatšentše yojošamentšiyë. Chë mandayá tbojaniyana: “Atšbe bembe tontsóbana. Diosmanda atšbe yebnoye mabo; cochjabojajo y cha echántayena ca.”

¹⁹ Chentšana Jesús y chabe uatsjëndayënga chë mandayá tmojanasto. ²⁰⁻²¹ Imojtsaye ora, canÿe shembása stëšoicana Jesúsbiöye yojobeconá. Bnëtsana uta uatama oboftjajuanánaca cha inapadecena. Chë šocá Jesúsbiöye yojobeconá ora, yojtsejuabnaye: “Masque nÿe mo chabe entsáyá sibiájua chajjuábojajo, salud chantinÿena ca.” Chentšana chë šocá Jesusbe entsáyá tojanábojajo.

²² Tojanábojajo ora, Jesús tojanobuértana, chë shembásabiöye tbojáninÿe y tbojaniyana: “Añemo matsca, shembása. Bëngbe Bëtsábeñe icošbuachéyeca, mora tšabá contsatšmëna ca.” Y cach orscana cha tšabá yojtšatsmëna.

²³ Chënga tmojtëtanontsé ayana y chora chë mandayábioca chënga tmo-

jánashjajna. Chentše Jesús tojánanÿe, ínÿengna chë veloríama imojtsanflautaye y ínÿengna tša imojtsošachiye. ²⁴Chora Jesús tojanéyana: “Muentšana mobocnënga. Chë shembásetema cabá ndoñe obaná quenátsmëna; ñÿe endëtso-mañe ca.”

Pero chë entšanga Jesúsbioye ñÿe imojtsáfchaye. ²⁵Pero Jesús pronto chënga chë yebnentsana tojanëbuacna. Chora Jesús tojanamashëngo chë shembásetema yojtsemnoye; cucuatše tbojanábuacueshache y cachora chë shembásetema tojtantsbaná. ²⁶Y ñÿets chë luarëjana ndayá Jesús yojamama ñÿetsca entšanga imojátatsëmbona.

Jesús uta jtanata tojanashná

²⁷Jesús chentšana tojéftsanbocna ora, uta jtanata tbojanasto y mëntsá ibojtsaiuáyebuache: —¡Davídbentsana Entšá, bëndata šmotsalastemá ca!

²⁸Jesús chë yebnoye tojanamashëngo ora, chë jtanata tbojanóbobeconata. As Jesús tojanatjá: —¿Tsëndata sojtsošbuaché atše chca jamama chjobenaye ca?

Y tmojanjuá: —Arseñor. Afñe ca.

²⁹Chora Jesús tojánabuchbojajo y tojanéyana: —Ntšamo tsëndatbe osbuáchiyana yomncá, cachcá chaotsemna ca.

³⁰Y cachora jinÿama ibojtsobena. Jesús bëtscá chata mëntsá tojanamëndá: —Ndocná más quem soye chaondëtsetatšëmbo ca.

³¹Pero chata chentšana tbojéftsanbocna y cachora tbojanontsé ndayá Jesús chátaftaca tojanmama ñÿets chë luarëjana jacúntana.

Jesús, canÿe ndëbíabioye tbojanshná

³²Chë jtanata ibojtsebocanëntscuana, básefta entšanga canÿe ndëbíá,

bacna bayëjbe juabna uambayá, Jesúsbioye tmojanamba. ³³Jesús chë bacna bayëja chábensana tbojtanábcna y cachora chë ndëbíá tojtantonsté oyebuambnayana. Entšanga ojnánánënga imojtsichamo: “¡Ndocna te Israelentše chca bëts soye chemuáisinÿe ca!”

³⁴Pero chë fariseunga imojtsichamo: “Cach bacna bayëjëngbe amëndayá, Satanás, muábioye obenana tbojatštá chë bayëjënga entšangbentsana jtëbuacanama ca.”

Jesús entšangbiana tbojanongmé

³⁵Jesús ñÿetsca pueblënguëjana y luarënguëjana yojttsachñëjuana y chë judiëngbe enefjuana yebnënguenache entšanga yojttsabuátambaye. Yojanabuayíyná chë tšabe noticiënga Bëngbe Bëtsabe amëndayama, y ñÿetsca šocanëngama y tsetšanama yojánashnaye. ³⁶Y chë entšanga tojánanÿe ora, puerte tbojanongmé. Er chënga imojtsemna mo abuajénÿa ndbomna oveshëngcá, puerte uamëntsñayënga ba soyëngama padecena causa, y chaujabuachama ndocná ntsebmncá. ³⁷Chora chabe uatsjëndayënga tojanéyana: “Canÿe bëts jajañe bëtscá játbánama entsemna, pero peonga ñÿe báseftanga. Cachcá quem luarentše, bëtscá entšanga Bëngbe Bëtsábioye nduabuátmënga montsemna, y chëngbioye chabíama abuayíynayënga ñÿe báseftanga. ³⁸Peonga tmojtsashbenëse chë nduíñbioye jaimpádana ba peonga chauichamoma chë jaja saná játbánama. Cachcá, Bëngbe Bëtsábioye moimpadanga ba abuayíynayënga chauichamoma, quem entšanga chábioye chamúbuajama ca” —Jesús tojanéyana.

**Jesús chë bnétsana uta
uatsjéndayënga tojanabacacá**

(Mc 3.13-19; Lc 6.12-16)

10 Chentsana Jesús tojánachembo chabe bnétsana uta uatsjéndayënga, y obenana tojanatsatá bacna bayëjëngbe juabna entsángbentsana jtabocnama y nyetsca šocanëngama y tsetsanama jashnayama.

²Chë bnétsana uta uatsjéndayënga mëntšá imojanabaina: chë natsaná Simón, Pedro cánaca uabainá y chabe uabentsá Andrés; Santiago y chabe uabentsá Juan, Zebedeobe uaquiñata; ³Felipe y Bartolomé; Tomás y Mateo, chë Romocama impuesto entsángbioye atjanayá; Santiago, Alfeobe uaquiñá y Tadeo; ⁴Simón, chë celote ca uabobainá y Judas Iscariote, chë uayayëngbe cucuatšinië Jesúsbioye boshjuaná.

**Jesús, chabe bnétsana uta
uatsjéndayënga tojanichamó, Bëngbe
Bëtsabe amëndayama jábuayenama**

(Mc 6.7-13; Lc 9.1-6)

⁵Jesús chë bnétsana uta boyabásenga tojanichamó chë tšabe noticiënga entsanga jabuátambama, y mëntšá tojanabuayená: “Chë ndoñe judiëngbeñe ndoñe šmattsana y ndaye pueblentše Samaria luaroca ndoñe šmatjéftsamashjna. ⁶Nyë Israeloca publëngoye šmochjá. Choca entsanga mo ótšena oveshëngcá montsemna, Bëngbe Bëtsábioye corente nduabuatma causa. ⁷Šmochjá y entsanga šmochjábuayenaye Bëngbe Bëtsabe amëndayana echanjóshjanguama. ⁸Chë šoquënga šmochjáshnaye, šmochjama chë obanënga chámuatayenama, bacna nguayanánaca šoquënga šmochjáshnaye y bacna bayëjëngbe juabna entsángbentsana šmochtábocna.

Chë obenana šmonjýëngacñe tondaye ntjëtsajajuacá; cachcá, chë soyënga šmojtsamama tondaye entsanga šmattsayëngacaye.

⁹“Ndoñe šmattsambaye crocénana uasnanëchiñe. ¹⁰Ni shecnaja sanaca benachiñama, ni inyë entsáyá jtsenomódama, ni shecochëtjonëshënga, ni jatjonëfja, er chë tšabe trabajayá jtsomerecénana ntšamo tbojtsajabotcá jýëngacñama.

¹¹“Nderado canyë bëts pueblentše o base pueblentše chašmojáshjajna ora, šmochjánguango canyë tšabe entsá, inyëngbioye ndaingñayá, y chabe yebnentše šmochtsoquedañe, inyë puebloye játantscuana. ¹²Canyë yebnoye chašmojámashjna ora, nyetsca chentsa oyenënga mëntšá šmochjácheuaye: ‘Chë bëngbe ainaniñe tšabe ebionana tšëngaftangbe ainaniñe chaotsemna ca.’ ¹³Chë yebnentša entsanga ainaniñe tšabe ebionana jtse-bomnama mercedo tmojtsebuajonëse, chë tšëngaftangbe ainaniñe tšabe ebionana chëngaftaca chaotsemna. Ndoñesna, nyë cach tšëngaftangaftaca chaotsoñe. ¹⁴Y nderado canyë pueblentše o bëts pueblentše chë entsanga ndoñe tcmónjúbuaja y ndoñe tcmónjóyaunase, chentsana šmochjésebocana y chë shecuatšentša polvëshe šmochjésenstoto. Chca, chë entsanga mochántsetatšëmbo chënga tšëngaftangaftaca ndoñe tšabá tmonjamama. ¹⁵Ndegombre šcuayana, quem luare jopochócama te, chë ndoñe chacmonjúbuaja y ndoñe chacmonjayauná entsanga Bëngbe Bëtsá puerte jabuache echantsacastígaye, y chë bacna entsanga Sodoma y Gomorra luaroquëngna ndoñe nyá nyetsá jabuache queochatacastígaye ca” —Jesús tojánayana.

Ntšamo chë uatsjéndayënga mochjansúfria

¹⁶“Šmochjouena. Atše cbontsachamná mo oveshënga cuenta tjañe quešëngbeñe. Chíyeca studio bomnënga mo mëtšcuayëngcá šmochtsemna y uamanënga mo palomatemëngcá. ¹⁷Entšangbiama cuedado šmochtsebomna, chëngbe pueblentša amëndayëngbe cucuatšinë tšëngaftanga cmochanjábashejuana y chëngbe enefjuana yebnënguenache cmochanjátsetšenaye. ¹⁸Atšbe ústonënga bétsemnama, mandadëngbioye y reyëngbioye cmochanjunatse. Y chca, tšëngaftanga šmochanjobenaye chëngbeñe y chë ndoñe judiëngbeñe ntšamo atšbiama šmotatšëmbcá jóyebuambayama. ¹⁹Pero chë mandadëngbe cucuatšinë chacmojábashejuana ora, ntšamo o ndayá šmochjayanama ndoñe šmattsenócochinýena. Chca orna, Bëngbe Bëtsá tšëngaftanga cmochanjabuayená ntšamo o ndayá jóyebuambayama. ²⁰Tšëngaftanga ndoñe chë oyebuambnayënga quešmochátsmëna, sinó chë tšëngaftangbe Taitá, Bëngbe Bëtsabe Espiritu, tšëngaftangbiajana echantsóyebuambnaye.

²¹“Y canýe entšá cachabe catšátbioye uayayëngbe cucuatšinë bochanjáboshjona chamotsóbama; y canýe taitá cachabe uaqiñábioynaca. Y chë básenga chëngbe bëtsétsangbe contra mochántsemna y uayayëngbe cucuatšinë mochanjábashhejuana chamotsébáyama. ²²Tšëngaftanga atšbe ústonënga bétsemnama, nyetsca entšanga cmochantsébuayënja; pero nda nyets tempo átšbeñe ošbuachiyá chaotsomñá, atsbocaná echántsemna. ²³Canýe pueblentše chacmojtšécamena ora, inýe puebloye šmochtsacheta. Ndegombre cbéyana, Israelettša

nyetsca pueblëngoye cabá nda ora, chë Bëngbe Bëtsá Entšá tbojanbemá ya quem luaroye echanjabáshjango.

²⁴“Ni canýe uatsjendayá chabe buatëmbayabiama más uamaná ntsemnana, ni chë oservená chabe nduiñbiama más uamaná. ²⁵Chë uatsjendayá ya cachabe buatëmbayacá jtsemnama tojashjáchëse, ndayá más nanjátšboše. Cachcá endmëna chë oservenáftaca, cachabe nduiñcá tojtsemnëse. Atše sëndmëna mo canýe yebnentša taitacá y tšëngaftangna mo cach yebnentša basengcá. Entšanga jtsichámuana atšna Beelzebú o chë bacna bayëjëngbe amëndayá tsmëna ca. ¿Ntšamo chënga tšëngaftanga cmochtsëbobuatma ca?” —Jesús tojanéyana.

Nda ndegombre cuantsebiauatja

(Lc 12.2-7)

²⁶“Chíyeca entšangbiama ndoñe matauatjëngana. Chë yoiytémëna soyentšana tondaye ntjinýcá queochaisoquéda, y chë ndótatšëmbo soye, ntšotatšëmbcá queochaisoquéda. ²⁷Chë mora cbontsëtsësná soyënga, chë entšangbiama mo ibetiñe cuaftsemncá soyënga, tšëngaftanga šmochjama entšanga botamana chama chamotsetatšëmbuama. Y chë iytcana cbontsëtsësná soyënga nyetsca entšanga šmochtsabuayinyaye, mo nda canýe yebnentša tsbanánocana noticiënga tojtšayebuachcá. ²⁸Ndoñe matauatjëngana nye chë tšëngaftangbe cuerpo japochócama imobenëngbiama y ainana jtsepochócama ndoñe ntšobenana. Más šmochtsebiauatja chë nda endobena tšëngaftangbe cuerpo y tšëngaftangbe ainana jtsepochócama, nyetsca tescama infiernoca.

²⁹“Uta jaja shloftšëtëmata nye canýe denario crocenánama mondbétsena. Masque chca, ni canýetema obanatema

fshantsoye jotsatsana, tšengaftangbe Taitá, Bëngbe Bëtsá ndoñe tontsebošese. ³⁰Y tšengaftangbiama, Bëngbe Bëtsá botamana jtsantješnana, y chca, cha lempe tšengaftangbiama jsetatšëmbuana, bueta stjënashënga tšengaftangbe bestšašinë yomnámnaca. ³¹Chíyeca ndoñe matauatjëngana, tšengaftanga ba jaja shloftšetëmëngbiama corente más šmondúamana ca” —Jesús tojánayana.

**Ndabiamana Jesucristo yochjayana
chabe entšá yomna ca**

(Lc 12.8-9)

³²“Nda atšbe entšá yomna ca entšangbe delante tojayanabiama, átsnaca, atšbe Taitá, chë celoca endmënabe delante chanjayana cha atšbe entšá yomna ca. ³³Pero nda entšangbe delante atšbe entšá ndoñe yondmëna ca tojayanabiama, átsnaca, atšbe Taitá, chë celoca endmënabe delante chanjayana cha atšbe entšá ndoñe yondmëna ca” —Jesús tojanéyana.

**Jesusbé causa, entšángbeñe
más jtsentsjanayana**

(Lc 12.51-53; 14.26-27)

³⁴“Ndoñe šmattsejuabnaye atšbe quem luaroye tijabo nyetsca entšanga natjëmbana chamotsiyenama. Atšbe chama ndoñe chiyátabo; atšbe sënjabo causa, entšanga más mochántsejtsjanaye. ³⁵Atšbe sënjabo chë uaqiñá cachabe taitabe contra chaotsemnana, chë bembe cachabe mamabe contra y chë bebinuá chabe uambén mamabe contra chaotsemnana. ³⁶Y chca, ba entšangbe uayayënga cachëngbe pamíllanga mochántsemna.

³⁷“Nda cachabe taitá o mamábioye atšbiama más tbojtsebobonshánëse, cha ndoñe ntsomerecénana atšbe entšá jtsemnana. Nda cachabe uaqiñá o bémbëbioye atšbiama más

tbojtsebobonshánëse, cha cach ndoñe. ³⁸Y nda nyetsca chabe quem luare soyënga ndoñe tonjëseboshjona atšbe juastama, y atšbiama jasúfriama ndoñe tontseprontana y cruciñe jobanámnaca, cha ndoñe ntsomerecénana atšbe entšá jtsemnana. ³⁹Nda tojtsentsëna quem luarentšë bëtsá soyënga jtsebmomna y atšbiama jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyënga cachcá tojesonyá atšbe juastama, masque chaóbana, chë nyetsca tescama yomna tšabe vida echántsebmomna ca” —Jesús tojánayana.

Chë uacanana soyënga

(Mc 9.41)

⁴⁰“Nda tšengaftanga chacmojúbuaja, átsnaca cha šochanjofja; y nda atšbe chašojofja, chë nda šojichmóbioynaca cha bochanjofja. ⁴¹Nda canyë Bëngbe Bëtsabe juabna oyebuambnayábioye tbojyeyuná, cha chca bëtsemnana, chábioye Bëngbe Bëtsá canyë uacanana soye bochántatšetaye, mo cach Bëngbe Bëtsabe juabna oyebuambnayabe uacanana soycá. Y nda canyë nyetsca soyënguñe tšabá amábioye tbojofja, cha chca uamanama, chábioye Bëngbe Bëtsá canyë uacanana soye bochántatšetaye, mo cach nyetsca soyënguñe tšabá amabe uacanana soycá. ⁴²Y ndánaca, tšengaftanguentšá canyë nduamanábioye masque nyë mo base býeshtema tbojuabuatšetá, atšbe ustoná bëtsemnayeca, ndegombre Bëngbe Bëtsá canyë uacanana soye chábioye bochántatšetaye ca” —Jesús tojánayana.

Juan chë Ubayanabe ichmónënga

(Lc 7.18-35)

11 Jesús tojanpochocá chabe bnëtsana uta uatsjëndayënga

jábuayenama, y chentšana tojtsanoñe chë luariñe pueblënguenache oyena entsanga Bëngbe Bëtsabe palabra jabuátambama y jábuayenama.

²Chë tempo Juan chë Ubayaná cárceloye tmojanëtame. Choca cha yojouena ndayá Jesús yojtsamama. Y as, Jesús yojtsemnoye, básefta chabe ústonënga tojanichamó, ³mëntšá jatjayama: —¿Aca ndegombre cojtsemna chë jabama ibojanmëná, chë Uámana Uabuayaná, o šojtsamna ínjabiana jatobátmama ca?

⁴Chca tmojantjá orna, Jesús tojanéjua: —Šmochjá y Juan šmochjauyana ntšamo šmouyena y šmojinýcá. ⁵Cha šmochjacuénta: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna y chë tšëmënga montsue-nana, chë obanënga tmontayena y chë ndbomnjémëngbioye chë tšabe noticiënga montsabuyiyná ca. ⁶¡Puerte oyejuayá chaotsemna chë nda atše bacna soye ndoñe stsama ca jtsejuabnayëse, átsbeñe ošbuáchiyana ndoñe tontsajbaná cha ca! —Jesús tojanéyana.

⁷Chënga tmojtsatanoñe ora, Jesús tojanontšé Juanbiana chë entsanga jáuyanana, mëntšá: “Juan jinýama šmojánbocana ora, ¿ndayá jinýama chë entsanga ndoyena luaroye šmojánbocana? ¿Canýe entšá ainaniñe tondaye añemo ndbomná, mo canýe šëse bínýiaca shatiyeynëscá? ⁸Y ndóñese, ¿ndayá jinýama choye šmojánbocana? ¿Canýe boyabása uámana entšayaca bopormaná? Ndoñe. Tšëngaftanga šmondétatšëmbo chë boyabásenga uámana entšayaca bopormánëngna chë mándayëngbe yebnënguñe mondbëtsiyenama. ⁹Y asna, ¿ndayama choye šmojánbocana? ¿Canýe Bëngbe Bëtsabe juabna

oyebuambnayá jinýama? Ndegombre, añe; y cbéyana, ndegombre cha canýe Bëngbe Bëtsabe juabna oyebuamb-nayabiama más bëtsá endmëna. ¹⁰Cha, Juan, endmëna ndabiana Bëngbe Bëtsá chabe uabemana palabrenguñe tojánayana mo chabe ichmonacá, mëntšá tojánayana ora:

Cristo, atšbe entšá natsana sënjichmó acbiana chaóyebuambama, entsanga jábuayenama aca jabama ainaniñe tšabe juabnëngaca chamotseprontánama ca.

¹¹Ndegombre cbéyana: Nýets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, más bëtsá echántsemna ntšamo mora Juan yomnama.

¹²“Juan chë Ubayaná tojánabo orscana mëntscoñama, bëtsá entsanga tša mondboše Bëngbe Bëtsabe amëndayoye jamashënguama, y chë Bëngbe Bëtsabe amëndayama contra imomnëngna, chëngbe nýets añémoca montseboše chë mándayana jtse-pochócama. ¹³Juan candabëntscuana, nýetsca Bëngbe Bëtsabe juabna oyebuambnayënga y Moisesbe Ley nye Bëngbe Bëtsabe amëndayama tmonjanobuambá. ¹⁴Y tšëngaftanga chë soyënga jýyëngacñama šmojtsebošëse, Juan entsemna chë Bëngbe Bëtsabe juabna oyebuambnayá Eliascá, chë jabama ibojamná. ¹⁵Chë jouenama tmojtsobenënga, chamouena ca” —Jesús tojánayana.

¹⁶Mëntšánaca Jesús tojánayana: “¿Ndayacá morsca entsanga imomna? Chënga mondmëna mo chë plazëngoca mondbetsetbiámama basetemëngcá; chënga chëngbe enutëngbioye jt-sayebuáchana ¹⁷y mëntšá jtsichámuana: “Tšëngaftangiama fsënjaflautá y ndoñe chešmatslantsá; ngmëna fsënjaversiá

y ndoñe chešmatošachna ca.’¹⁸ Juan tonjánabo, y bëtscá entšángbeñe ndoñe quenjatamana ni jasana, ni jofšiyana, y entšanga montsanichamo chana bacna bayějbe juabna uambayá yojamna ca.¹⁹ Morna, chë Bëngbe Bëtsá Entšá tbojanbemá tonjabo, y chana añe entsamana bëtscá entšángbeñe jtsesayana y jtsofšěšnayana, y entšanga montsichamo chana yapa uasayá y vínoye tmojá entsemna ca y Romocama impuesto entšángbioye atjanayënga y bacna soye amëngbe amigo ca. Pero Bëngbe Bëtsá endbëtsinñanñaye cha nyets osertánana bomná yomnama, chë ndayá cha tojama ora ndayá chentšana tojóhocna soyëngaca ca” —Jesús tojánayana.

Chë nduauenana entšanga

(Lc 10.13-15)

²⁰ Chentšana Jesús tojanontšë jucácanana chë entšanga, ndëmuanñenga imojoyena chë pueblënguñe ndayenache ba chabe bëts soyënga tojanma, chënga bacna soyënga amana ndoñe tmontsanajbanama y Bëngbe Bëtsabe benache ndoñe tmontanishachama. Mëntšá vojtsichamo:²¹ “¡Tša lastema, Corazín pueblaca entšángbiama! ¡Tša lastema, Betsaida pueblaca entšángbiámnaca! Chë chentšë sënjama bëts soyënga, Tiro y Sidón bëts pueblënguentšë matënjochnënguse, chentšá bacna entšanga ya tempo ngménaca matmëntenojuabó chëngbe bacna soyëngama y Bëngbe Bëtsabe benache matmëntishache; y chca tmojamama chaotsótatšëmbuama uajojěsha entšayangaca matmëntopormanga y chëngbe bestšašinë jatinjá matmënjenotbótoto.²² Pero ndegombre cbéyana, ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo

šmochántsebmorna, chë Tiro y Sidonoca bacna entšangbe castiguama.²³ Y tšëngaftanga, Capernaumoca entšanga, ¿šmojtsejuabná celóntscoca atsebánanënga šmochtsemna ca? ¡Chë uabouana infiernoye cmochantsésetjango! Chë muentšë sënjama bëts soyënga Sodomoca matënjochnënguse, choca entšanga ya tempo ngménaca chëngbe bacna soyëngama matmëntenojuabó y Bëngbe Bëtsabe benache matmëntishache, y chë bëts pueblo cabá cachcá mëntscuana mantsoñe.²⁴ Pero ndegombre cbéyana, quem luare jopochócama te, Bëngbe Bëtsá puerte jabuache cmochantsacastígaye, y chë Sodoma luaroca entšángbioye ndoñe nyetsá jabuache quemochatacastígaye ca” —Jesús tojánayana.

“Atšbioye mabënga y šmochjóchna”

(Lc 10.21-22)

²⁵ Chë tempo, Jesús tojánayana: “Atšë cbatschuá, Taita, celoca y quem luar-entša Utabná. Aca, chë nye batsá tatsëmbënga tcojanñanñé, chë tša tatsëmbënga y osertánëngbiama tcojaiyteme soyënga.²⁶ Añe, chama cbontsadorana, Taita, chca chaotsemnama tcojábosënayeca.

²⁷ “Atšbe Taitá lempe chca šonjatštá. Chë Uaquiñábioye ndocná corente quebnatábuatma; nye chë Taitá añe. Y chë Taitábioye ndocná corente quebnatábuatma; nye chë Uaquiñá añe, y ndábioye chë Uaquiñá tojtsebošë nda chë Taitá yomnama jinñanñiyama, chánaca chë Taitábioye bochantšábuatma.

²⁸ “Atšbioye mabënga nyetsca tšëngaftanga uamëntšnayënga y bëtscá trabajo uangménënga, y atšë chanjama tšëngaftanga chašmochnama.²⁹ Ntšamo canñe entšá, uacná yuguëšinë juabatsëcana juanatsama, cachcá, tšëngaftanga atšë šmochjalesëncia jobnatsayama y jabuátambama.

Atšbentsana šmochjuatsjinje: atše uantado mēná sēndmēna y ndoñe quetsatamana yapa uamaná jatenobiamnayana. Y chca, tšabá jóchnama šmochantsobena y ananiñe más añemo šmochántsebomna. ³⁰ Mo canje uacnacá, ndoñe tishuta yugušeca o ndoñe uauta uasmanéshaca, paselo jama jobenayana, cachcá tšengaftanga šmochántsemna atše cbojtsabnatsana y cbojtsabuátambase; y chca, tšengaftanga más oyejuayēnga šmochántsemna y más paselo nyetsca soyēnga jamama echántsemna ca” —Jesús tojánayana.

Jesube uatsjéndayēnga ochnayté trigo tmojanátabebe

(Mc 2.23-28; Lc 6.1-5)

12 Chē tempo, Jesús canje ochnayté canje jajajana yojtsachnějuana. Chabe uatsjéndayēngna shéntseca imojtsemna, chíyeca tmojanontsé trigo jutatabebiana y chē meshēnga jasana. ² Chē fariseunga chca tmojáninje ora, Jesús tmojanianya: —Minje, acbe uatsjéndayēnga canje soye montsama y chē soye ochnayté jamama ndoñe quenát-slesenciana ca.

³ As Jesús tojanéyana: —¿Ndoñe šmēndualfa y šmondétatsēmbo ndayá David y chabe enutēnga tmojanmama, shéntseca imojtsemna ora? ⁴ Chca orna, David, Bēngbe Bētsabe bēts yebnoye yojámashēngo y chē Bēngbe Bētsá chentše yojamnama injinyñayē tandēsēnga yojase. Chē tandēse nye ndánaca jasama ndoñe yonjalesenciana, ni Davidbiana, ni chabe enutēngbiana. Nje bachnangbiana belesenciana chē tandēse jasama. Masque David chca tojanma, Bēngbe Bētsá chora ndoñe tonjánayana David canje bacna soye tojanma ca. ⁵ ¿O ndoñe šmēndualfa y šmondétatsēmbo, Moisesbe leyiñe, chē bachnanga ochnayté Bēngbe

Bētsabe bēts yebnentše jtsetrabájayana, pero ndoñe bacna soye ntsemnana chē bachnanga ochnayté ndoñe mondbóchnama? ⁶ Y atše šcuayana: Muentše canya entsemna, cha chē Bēngbe Bētsabe bēts yebnentša bachnangbiana más uamaná endmēna y chabe amēndayoca soyēnga más entsámana chē bachnangbe mándayentša soyēngama. ⁷ Bēngbe Bētsabe uabemana palabrenguñe mēntšá endayana:

Atše sēntseboše tšengaftanga lastemadēnga chašmotsemna, y ndoñe nye bayēnga chašmotsēbánaye Bēngbe Bētsá jētschuayama ca.

Ntšamo chiñe entsayancá ndegombre cmojtsēsertánese, tšengaftanga ndoñe chēngbe contra šmattsichamo, chē ochnayté chca tmojtsamēngbiana. ⁸ Chē Bēngbe Bētsá Entšá tbojanbemá, chē entšá ochnayté tojtsama sóynaca jtsemándayana ca —Jesús tojánayana.

Chē buashana cucuatše bomna entšá

(Mc 3.1-6; Lc 6.6-11)

⁹ Chentšana Jesús tojtsanoñe y chentša judiēngbe enefjuana yebnoye tojánamashēngo. ¹⁰ Chentše yojtsemna canje boyabása buashana buacuatše bomná. Chē fariseunga imojtsenguaye ndayánaca, as chca chēnga jtsebomnama ndaye sóyeca Jesús mal jaquédama. Chcasna, chora chēnga Jesús tmojantjá: —¿Queojtselesenciana canje ochnayté šocá jáshnama ca?

¹¹ Y Jesús tojanéjua: —¿Nda tšengaftanguentšá, canje oveshá tbojtsebomna y nya chē ochnayté canje fshantsentše atēfjnoye chē oveshá tojtsótsatše, chora chē boyabása nanjá o ndoñe chē oveshá jatábocnama? ¹² ¿Entšá oveshabiana puerta más uamaná endmēna! Chcasna, entselesenciana chē ochnayté tšabe soye jamama ca —Jesús tojanéyana.

¹³Chora Jesús chë buashana buacuatše bomnábioye tbojaniana: “Macuenyanéjaná ca.” Y chë boyabásana tojanacuenyanéjaná y chora chëtša tšabá yojtsatamna mo cach inyetsacá. ¹⁴Pero chë fariseunga tmojésanbocana ora, tmojanontšé juabnayana ntšamo jamése Jesús jóbama.

**Ndayá chë Bëngbe Bëtsabe
juabna oyebuambnayá
Jesusbiana tojánayana**

¹⁵Jesús chë soye tojántatšëmbona ora, chentšana tojtsanoñe y ba entsanga tmojanasto. Nyetsca šoquënga tojanashná, ¹⁶y tojanamëndá chabiana entsángbeñe ndoñe chamondëtsóyebuambnama. ¹⁷Chca tojanamëndá, cachcá chaotsemnama ntšamo chë Bëngbe Bëtsabe juabna oyebuambnayá Isaiás tojanayancá. Cha mëntšá tojánayana:

¹⁸Muentše atšbe oservená entsemna. Atše cha sënjabocacá,
atšbe bonshaná, y atšbe corente chabiana sëntsoyejuá.

Atšbe chanjama atšbe Espiritu chabe ainaniñe chaotsemnama y entsanga echanjabuayená, Bëngbe Bëtsá nyetsca luarënguentšana entsangbiana yochjayanama chënga tšabá o ndoñe tšabá tmonjamama.

¹⁹Cha ndoñe queochátayajuatsana, ni queochátschembumbuana.

Chabe oyebuambnayana tsáshenañe ndocná queochatuena.

²⁰Mo nda chë atcana šëše ndoñe más jatsndbemana,

chë ndobenënga cha ndoñe queochátapochocaye.

Mo nda chë quinýenëfjua nýe uabojátšena uajuinýnëfjua ndoñe ntsafsanana,

chë Bëngbe Bëtsabeñe jtsošbuáchiyama imojtsebojátšangbe obamanana chábeñe, cha ndoñe queochátabuajuanaye.

Cha nyets añémoca echanjëftsetrabája, entsanga chëngbe ainaniñe Bëngbe Bëtsabe ndegombre soyënga chamóyëngacñëntscuana.

²¹Y nyetsca luarënguentšana entsanga chábeñe mochantsobátmana ca — cha tojánayana.

**Fariseunga tmojánayana Jesús
Satanásbentšana obenana
tojanóyëngacñe ca**

(Mc 3.20-30; Lc 11.14-23; 12.10)

²²Chora, Jesús yojtsemnoye canýe boyabása jtaná y ndëbiá tmojanánatse. Chana bacna bayëjbe juabna uambayá inamna; y Jesús chábioye tbojanshná, chabuatabínýnama y chabuatauënanama. ²³Y nyetsca entsanga ojanánënga imojtsichamo: “¿Mua yojtsemna chë Davídbentšana Uámana Entšá, chë Cristo ca?”

²⁴Pero chë fariseunga chca tmojanuena ora, imojtsichamo: “Beelzebú, cach Satanás, chë bacna bayëjengbe amëndayá, quem boyabásabioye obenana tbojatštá chë bayëjënga chauatëbuacnama ca.”

²⁵Y Jesús yojtsetátšëmbo ntšamo chënga imojtsejuabnayama; as tojanéyana: “Canýe amëndayentše entsanga tmojtsenojatá y tmojtsenáyase, cachënga jenpochócana. Cachcá, canýe bëts pueblentša entsanga o canýe yebnentša pamíllanga tmojtsenojatá y ndoñe tmontsenëyeunanëse, chënga ndoñe tšabá nyets tempo quemochátsmëna. ²⁶Cachcá, Satanás cachabe bayëjënga jtëbuacnama tojtsebošëse, chana tojtsenojatá y cachabe contra yojtsemna. Y chca, ¿ntšamo nantsobena chabe mándayana quem luarentše jëftsebomnana?

²⁷ Tšëngaftanga šmontsichamo atše Beelzebube obenánaca chë bayëjënga stsatëbuacana ca; pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebomna chë bacna bayëjënga jtëbuacnama? Chíyecna, chënga montsinÿinÿná ntšamo ndegombre yomnana y tšëngaftanga ndoñe ndegombre soye šmontsichámuama. ²⁸ Y atšna, chë Bëngbe Bëtsabe Espiritbeyeca chë bayëjënga entsángbentsána sëndëtëbua-cana; y chë soye entsinÿinÿná Bëngbe Bëtsabe améndayana tšëngaftangbioye tojóshjanguama.

²⁹ “¿Ntšamo nda nanjobenaye canÿe corente añemo bomna entšabe yebnoye jamashënguana y chabe soyënga jtse-bocana, ndoñe natsana chábioye tcon-jshëtsebatsëquëse? Nÿe tcojshëtsebat-sëquësna aínë cuanjobenaye cha jefcana. Atše ya chca Satanásoftaca sënjama.

³⁰ “Nda ndoñe átšeftaca tontsemná, at-šbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana.

³¹ “Chíyecna cbéyana, Bëngbe Bëtsá entšanga echanjáperdonaye nÿetsca chëngbe bacna soyënga y chë Bëngbe Bëtsabiama puerte bacá oyebuambnayana, mo chábioye cuafjoyenguangcá; pero ndoñe queocháta-perdonaye chë Uámana Espíritbiama puerte bacá ichámënga. ³² Bëngbe Bëtsá bochanjaperdóna chë Cha Entšá tbojanbemabiama ndoñe tšabá ichamuábioye; pero chë Uámana Espíritbiama ndoñe tšabá ichamuábioyna, ni quem luarentše, ni ndocna te quebochatsperdóna ca” —Jesús tojánayana.

Tšabe betiye o ndoñe tšabe betiye tondmënama, jtsotatsëmbuana ntšamo tojashajoncá

(Lc 6.43-45)

³³ “Canÿe betiye tšabá mobocuedanga y botamana echanjashájona; ndoñe tšabá matscuedánana y tšabe shajuana ndoñe queochátsbomna. Chë betiye tšabe betiye o ndoñe tšabe betiye tondmënama, jtsotatsëmbuana ntšamo chëshe tojashajoncá. ³⁴ ¿Mëtšcuaye entsanga! ¿Ntšamo šmattsobena tšabe soyëngama jtsóyebuambnayana, cach tšëngaftanga bacna entsanga šmojtsem-nëse? Er ndayá ainanoca becá tomnama entšá jtsóyebuambnayana. ³⁵ Chë tšabe entšá, chë ainanoca tšabe juabnënga bomnentsána jtsóyebuambnayana, y chë bacna entsána chë ainanoca bacna juabnënga tobomnentsána jtsóyebuambnayana. ³⁶ Y ndegombre cbéyana, chë entsangbiama tšabá o ndoñe tšabá tmonjamama jayanama tempo chaojobuache ora, ndaye ndoservena palabra šmojóyebuambama, Bëngbe Bëtsabe delante šmochanjayana ndáyeca chca ca. ³⁷ Er ntšamo tcojtsóyebuambnama Bëngbe Bëtsá echanjayana tšabá o ndoñe tšabá tconjamama, y cmochanjauyana aínë o ndoñe cmontsemna castiganá jtsemnana ca” —Jesús tojánayana.

Chë bacna entsanga Jesús tmojanimpadá canÿe bëts soye chaoma, chabe obenana jinÿama

(Lc 11.29-32)

³⁸ Chentsána, básefta fariseunga y Moisesbe ley abuatambayënga Jesús tmojantjá: —Buatëmbayá, bënga fsëntseboše aca canÿe bëts soye chacoma, acbe obenana chašcuinÿanÿëma ca.

³⁹ As Jesús tojanéjua: —Quem puerte bacna entsanga y ndošbuáchiyënga

montseboše atše canye bêts soye chaima, atšbe obenana jinyanjyama; pero chca soye ndoñe quemochátinye, sinó nye chë ndayá yomna mo chë Bëngbe Bëtsabe juabna oyebuambnayá Jonásoftaca tojanopasá soycá.⁴⁰ Ntšamo Jonás unga te y unga ibeta chë bêts beonbe uafsbioye yojéftsemncá, cachcá chë Bëngbe Bëtsá Entšá tbojanbemá unga te y unga ibeta fshantse jashenoye echanjéftsemna.⁴¹ Morsca entsānga tšabá o ndoñe tšabá tmonjamama Bëngbe Bëtsá yochjayana te, Nínive bêts puebloca entsānga mochanjotsaye y morsca entsāngbiam mochanjayana ndoñe tšabá tmonjama ca; er chënga, Jonás yojtsabuayiyenaye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiam más uamaná endmëna.⁴² Morsca entsānga tšabá o ndoñe tšabá tmonjamama Bëngbe Bëtsá yochjayana te, chë Sur luaroca reinánaca echanjotsaye y morsca entsāngbiam echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrenga jouenama, y chë mora muentše entsemnana, Salomonbiam más uamaná endmëna ca —Jesús tojánayana.

**Ndayá inopása chë
bacna entsāngaftaca**

(Lc 11.24-26)

⁴³ Jesús mëntšánaca tojánayana: “Canye bacna bayëja canye entsābentšana tojësebozna ora, chë bayëjna bojojo luarënguenache jtsanana ndayentše jóchnama onguayinë, y canye luare ndoñe tonjñyena ora cha jenójuaboyana:⁴⁴ ‘Atšbe oyenoye, chë ndayentšana sënjëftseboznoye chanjesshécona ca’. Y choye tojtashjango orna, jinyenana

lempe tšabá cha jtesamashënguama, mo chentše ndocná tontsiyencá, tsajniñe y lempe botamaniñe cuaftsemncá.⁴⁵ Chorna chë bayëjna jana y inyë canyësëfta bayëjenga chabiam más opëjenga jobiatšana y nyetscanga choye jamashjnana chë boyabásabeñe joyéanama. Y chca, chë boyabása tempscama más bacna entsā jtsemnana, chora chë natsanama más bayëjenga abamna causa. Morsca puerte bacna entsāngaftaca cachcá echanjochnëngo ca” —Jesús tojánayana.

**Chë Jesusbe ndegombre
pamillanguentsënga**

(Mc 3.31-35; Lc 8.19-21)

⁴⁶ Jesús cabá entsānga yojtsëtsësnaye ora, chabe mamá y catšátanga tmojánashjajna y imojtseboše Jesúseftaca jóyebuambayama. Nye shjoca imojtsemna;⁴⁷ asna, canye boyabása Jesúsbioye tbojanbuayená: —Acbe mamá y acbe catšátanga shjoca montsemna y montseboše ácaftaca jóyebuambayama ca.

⁴⁸ Pero Jesús chë jauenayama tojánabioye tbojanianyana: —¿Nda atšbe mamá yomna, y ndëmuanyënga atšbe catšátanga ca?

⁴⁹ Y cachora chabe cucuatše tojanatsbaná, chabe uatsjëndayënga tojanënyanyë y tojánayana: —Quemënga montsemna mo atšbe mamacá y mo atšbe catšátangcá.⁵⁰ Er ndánaca, ntšamo atšbe Taitá, celoca endmëná yobošcá tojtsama, jtsemnana atšbe catšata, atšbe uabena y atšbe mamá, atšbe ndegombre pamillanguentsā ca —Jesús tojánayana.

Chë jenabe cuento

(Mc 4.1-9; Lc 8.4-8)

13 Cach te, Jesús yebnentšana tojëftsanbozna y uafjajónaye tsa-choca tojanótbema.² Mallajta entsānga

choye tmojanobeconá; as Jesús, chë uafjajónayentše yojanamna canÿe barquëshoye tojánášengo, tojanótbema; y chë entsangna tsachoca imojtsemna. ³Chorna ba soyëngama cuenténgaca chënga tojanabatambá.

Mëntsá tojanéyana: “Canÿe jená chë jénaye jauquëshama yojéftsebcocna. ⁴Yojtsëjquëshaye orna, básefta jénaye benache juachañe yojuatquécjana, pero chë jaja shloftšënga imojástjajna y lempe imojtsósañe. ⁵Inÿe meshëngna ndëtsbenguinë yojuatquécjana, ndoñe yapa fshantse binÿnentše. Chiñna betscocna yojuábocna, fshantse ndoñe jashenocana yonjanmëna causa, ⁶pero shinÿe yojábocna ora, puerte yojojënyána y yojtsancta; y yojtsábojo, bëtscá tbëtëjënga tondaye causa. ⁷Inÿe meshëngna uchemëshangañe yojuatquécjana, y chë uchemëshangá yojuájua orna, lempe yojtsatscué. ⁸Y inÿe meshëngna, uanganëshiñe yojuatquécjana y puerte botamana chiñe yojuashajo: ínÿenache nÿe canÿe jénayentšana mo patse meshënga yojuashájona, ínÿeñna mo chnénguana bnëtsana meshe y ínÿeñna mo unga bnëtsana meshe.”

⁹Jesús chca jacuéntama tojanpochocá ora, mëntsá tojánayana: “Chë jouenama tojtsobënënga, šmochjouena ca.”

Ndáyeca Jesús cuenténgaca yojánabatambaye

(Mc 4.10-12; Lc 8.9-10)

¹⁰Chora chë uatsjëndayënga tmojanobeconá y Jesús tmojantjá: —¿Ndáyeca entsanga cuenténgaca cojtsabatambá ca?

¹¹As Jesús tojanéjua: —Bëngbe Bëtsá tsëngaftanga cmonsinyanÿná nÿetsca chë mo iytëmencá yomna soyënga chabe amëndayama, pero chë inÿengbioyna ndoñe. ¹²Nda

tojtsobomnábioye más jatštayana y chca cha corente bëtscá jtsebomnana; pero chë tondaye tondbomnábioyna, chë batšatema tobomna sóynaca mochántseboca. ¹³Chíyeca atše cuenténgaca chënga sentsëtsëtsná.

Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá chë soyënga chamouena, ndoñe tsábá quemochátuenana, ni queochátësertana. ¹⁴Chcáyecna, chëngbeñe entsemna cachcá ntšamo chë Bëngbe Bëtsabe juabna oyebuambnayá Isaiás tojanayancá:

Masque becá chamouena, ndoñe queochátësertana.

Masque puerte chamotsantješna, ndoñe quemochátinÿe

¹⁵Quem entsanga ndoñe quemátsboše botamana jajuaboyana;

chënga uamatsáchtönënga montsemna y chëngbe bomínÿnaca cachcá.

Chca ndóñesna, chënga muantsobena jinÿama, jouenama y ainaniñe josértama;

y chca, chënga bacna soyënga amana muantsajbaná y atšbe benache muantishache,

as atše chënga chayatsebacama ca —cha tojéftsanbema.

¹⁶“Tsëngaftangna oyejuayënga šmochanjoyena, er šmondobomna bominÿe y matscuasënga Bëngbe Bëtsabe soyënga jinÿama y jouenama.

¹⁷Ndegombre cbëyana, banga Bëngbe Bëtsabe juabna oyebuambnayënga y nÿetsca soyënguinë tsábá amënga tmonjánbošena chë tsëngaftanga šmontsonÿá soyënga jinÿama, y ndoñe chemátaninÿe; tmonjánbošena chë tsëngaftanga šmontsuenana soyënga jouenama, y ndoñe chemátanuena ca” —Jesús tojanéyana.

**Jesús chë jenabe
cuentama tojanabuayená**

(Mc 4.13-20; Lc 8.11-15)

¹⁸ “Chcasna, oído šmochhajajo; chë jenabe cuento mëntšá endayana: ¹⁹ Chë Bëngbe Bëtsabe amëndayama tmojouena y ndoñe tontsésertana entšanga mondmëna mo chë benache juachañe yojuatquécjana jenaycá; Satanás jabana Bëngbe Bëtsabe palabra chëngbe ainantšana jabétsabuajuanama, chënga chiñe ndoñe chamondëtsošbuáchema. ²⁰ Y chë ndëtšbenguíne yojuatquécjana jénaye entsemna mo chë aíne Bëngbe Bëtsabe palabra tmojouena y Bëngbe Bëtsabeñe jtsošbuáchiyama oyejuayënga tmojtsemna entšangcá; ²¹ pero ndoñe nyets tempo chana jochójuana, y chca, ndoñe bayté Bëngbe Bëtsáftaca ntjéftsemnëngana, ndoñe yapa tmontsašbuaché causa. Inyënga chëngbiyoye mochantsébuayënja y Bëngbe Bëtsabeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonýaye. ²² Chë uhmëshangañe yojuatquécjana jénaye entsemna mo chë Bëngbe Bëtsabe palabra tmojouena entšangcá, pero quem luarentša soyëngaca oyejuayënga jtsemnama yapa mochántsenojuabnaye y mallajta crocénana y ba soyënga jtsebomnama mochántseboše. Chíyeca chënga Bëngbe Bëtsabe palabra jtsebnétjombana y ntšamo cha tojayancá ndoñe ntsamana. ²³ Pero chë uanguanëshiñe yojuatquécjana jénaye entsemna mo chë Bëngbe Bëtsabe palabra tmojouena y botamana jósertana entšangcá. Mo canye betiye puerte tšabá tojtseshajuancá, chënga bëtscá tšabe soyënga Bëngbe Bëtsabiama mochántsama. Inyëngna inyëngbiama más bëtscá soyënga

mochántsama, y chca, inyënga jtsemnana mo chë patse meshënga tojanshajo jenaycá, inyënga mo chë chnënguana bnëtsancá y inyëngna mo chë unga bnëtsana meshënga tojanshajo jenaycá ca” —Jesús tojanabuayená.

**Chë tríguañe bacna
shacuanama cuento**

²⁴ Jesús mëntšánaca tojanacuntá: “Bëngbe Bëtsabe amëndayana endmëna mo chë tšabe jenaycá, canye boyabása chabe jajañe yojáje. ²⁵ Pero nyetscanga imojtsomañe orna, chabe uayayá yojáshjango y chë trigo jeniñe bacna shácuaana yojesejé y yojtsatoñe. ²⁶ Y chë trigo yojúajua y ya yojtseshajuana orna, chë bacna shácuanënaca yojúabocna. ²⁷ As chë peonga imojá chë nduiño jauyanama: ‘Bacó, chë jajañe tšabe jénaye tconjanjé y as, ¿ndáyeca chë bacna shácuaana chiñe tojuábocna ca?’ ²⁸ Y chë nduiño yojáuyana: ‘Atšbe uayayá chca tojama ca.’ Chora chë peonga imojatjaye: ‘¿Quectseboše bënga fchayá chë bacna shácuaana jetsejashtsëtsama ca?’ ²⁹ Pero chë nduiño yojáuyana: ‘Ndoñe. Chë bacna shácuaana šmojtsejashtsëtsana ora, chë trígnaca šmattsejashtse ca. ³⁰ Más tšabana, cachcá mochjonýaye cánýiñe chaójuama, chë jaja saná játbanama tempo chaojobuáchëntscuana. Chora chë trabájayënga chanjichamuá y chanjámëndaye natsana chë bacna shácuaana chamotsejashtsëtse y chamotsentsacuacjuá jtsejuinýiyama, y chentšana chë shajuana chamuatbaná y atšbe grano uaquëcnaye yebniñe chamotsatsuamá ca” —Jesús tojánayana.

Chë mostaziye jenayama cuento

(Mc 4.30-32; Lc 13.18-19)

³¹ Jesús mëntšánaca tojanacuntá: “Bëngbe Bëtsabe amëndayana endmëna

mo canÿe mostaza betiye jenaycá, canÿe boyabása chabe jajañe yojáje. ³²Ndegombre, nyetsca jenayëngama chë mostaza jénaye chë más básetema endmëna, pero tojójua orna, chë jajañentše chë más bëts betiye jóbemana. Tša bëts betiye jtsemnana, chíyeca ba buacuashangá jtsabomnana y chë jaja shloftšënga jana y chiñe uajajonëtemëngá jauábopormana ca” —Jesús tojánayana.

Chë levadurama cuento

(Lc 13.20-21)

³³Quem inÿe cuéntnaca tojanéyana: “Bëngbe Bëtsabe amëndayana endmëna mo levadurcá; canÿe shembása chana jenájubana unga medida arninÿañe, nyetsana chauabochama ca.”

Ndáyeca Jesús entsanga cuenténgaca yojanabuayiñá

(Mc 4.33-34)

³⁴Jesús nyetsca chë soyëngama lempe cuenténgaca entsanga jtsëtsësnayana, y cuenténgaca ndóñesna ndoñe yon-janoyebuambná. ³⁵Chca yojamna ndayá cachcá chaochnënguama ntšamo chë Bëngbe Bëtsabe juabna oyebuambnayá tojanayancá, mëntšá:

Jabuátambamna cuenténgaca
chanjóyebuambaye;
chanjayana chë iytëmena soyëngama y
chë entsanga ndoñe mondétatšëmbo
soyëngámnaca;

Bëngbe Bëtsá quem luare tojanma
orscana chë soyënga yomna ca
—cha tojánayana.

Chë tríguañe bacna shácuaña cuentama Jesús tojanabuayená

³⁶Chentšana Jesús chë entsanga toj-tanichamá y yebnoye tojtanamáshëngo. Chentšna chabe uatsjëndayënga tmojanimpadá ndayá chë bacna shacuanama cuento betsayancá

chauabuayenama. ³⁷As Jesús tojanéyana: “Chë tšabe jénaye jená endmëna chë Bëngbe Bëtsá Entšá tbojanbemá, ³⁸y chë jajañna, quem luare. Chë tšabe jénaye entsemna chë Bëngbe Bëtsabe amëndayoye mochjámashjna entsanga, y chë bacna shácuaña entsemna chë bacna bayëjëngbe amëndayabe entsanga, ³⁹y chë uayayá, chë bacna shácuaña yojáje chana, Satanás. Chë jaja saná atbanayana entsemna chë quem luare jopochócama chaojobuache ora, y chë trabájayëngna chë angelotëmënga.

⁴⁰Ntšamo chë bacna shácuaña jtsejashtsëtsana y iñoeye jtsatmetšana jtsejuinÿiyama, cachcá echántsemna quem luare jopochócama te. ⁴¹Chorna, chë Bëngbe Bëtsá Entšá tbojanbemá chabe angelotëmënga echanjichamuá chë ínÿenga bacna soye chamomama amënga y chë bacna soyënga amënga chabe amëndayentsana chamotsajuanayama. ⁴²Y chora chëngbioye chë uabouana íñeshoye mochantsësetjango y chentše puerte mochanjenóbošachna y chë tsetšanama juatsašënga mochantsenoftëšjojnaye. ⁴³Chora, chë ntšamo Bëngbe Bëtsá yomandacá amëngna corente mo shinÿcá mochantsebuashinÿinÿana chëngbe Taitá, Bëngbe Bëtsabe amëndayoca. Chë jounama tmojtsobenënga, šmochjouena ca” —chora Jesús tojánayana.

Chë fshantsiñe uaiyitémena bomnanama cuento

⁴⁴“Bëngbe Bëtsabe amëndayana endmëna mo chë fshantsiñe uaiyitémena bomnancá. Canÿe boyabása chë bomnana yojuñÿena y chentšana iytëcana cachentše yojesatbontsá. Corente oyejuayá yojtá, nyetsca chabe bomna soyënga yojetsatobuiye y

chentšana chë fshantse yojtobuámiñe ca” —Jesús tojanáyana.

Chë corente uámana fjantse ndëtšëtémama cuento

⁴⁵ “Mo canýe entšá uámana fjantse ndëtšëtémenga obuamnañacánaca endmëna chë Bëngbe Bëtsabe amëndayana. ⁴⁶ Chana, canýe corente uámana ndëtšëtëma yojínýena ora, yojtá y lempe chë inabomma soyënga yojetsatobuiye y chë ndëtšëtëma yojtobuámiñe ca” —Jesús tojanáyana.

Chë atarraíëshama cuento

⁴⁷ “Bëngbe Bëtsabe amëndayana endmëna mo canýe atarraíëshacá, buyeshoye jutšenana y nýetsca beonga jashebuáyana. ⁴⁸ Chë atarraíëshá jútjena tojtsamna orna, chë beonga ashebuánayënga jtsashëbjátsëcana, tsachoye juyambana y chentšë juatbëmana chë beonga jabocacayama; chë tsábënga sbarëquënguñe juatsuámana y chë ndoñe tsábëngna jtsëtšanana. ⁴⁹ Cachcá echanjochnëngo quem luare jopochócama tempo chaojobuache ora. Chë angelotémënga mochanjábocana chë tsábe entšángbentšana bacna entšanga jaluárama, ⁵⁰ y chë bacna entšangna chë uabouana íñeshoye mochántsatquëcjaye, y chentšë puerte mochanjenóbošachna y chë tsetšanama juatsašënga mochantsenoftésjójnaye ca” —Jesús tojanacuntá.

Anteo y tsëm uámana bomnana

⁵¹ Chora chabe uatsjëndayënga Jesús tojanatjá: —¿Lempe chama quecmojt-sësértana ca?

Y chënga tmojanjuá: —Arseñor, añe ca.

⁵² As Jesús tojanéyana: —Canýe ley abuatambayá jtsetatšëmbuana ndayá Bëngbe Bëtsá tempo Moisesbiajana

yojanoyebuambná soyëngama. Ntšamo Bëngbe Bëtsabe amëndayana bëtsemnama cha tojtsatsjëndá orna, mo canýe yebnentša nduiñcá cha jtsemnana. Chë nduiña chabe grano uaquëcjnaye yebnocana anteo y tsëm uámana bomnana juabocnana. Cachcá chë ley abuatambayá, Bëngbe Bëtsabe soyëngama jtsabuátambayana chë tempo Bëngbe Bëtsá tojanoyebuambá soyëngama y chë tsëm soyëngnaca Bëngbe Bëtsabe amëndayama ca —tojanéyana.

Jesús Nazaretoca

(Mc 6.1-6; Lc 4.16-30)

⁵³ Jesús chë soyënga jacuéntama tojanpochocá ora, chentšana tojtsanoñe. ⁵⁴ Y cachabe luaroye tojtanashjango y chentša judiëngbe enefjuana yebnentšë tojanontšë jabuátambama. Entšanga ojanánënga imojtsichamo: —¿Chë lempe yojtsetatšëmbcá ndémoca mua tojuat-sjinýe ca? ¿Ntšamo nantsobena chca bëtš soyënga jamama ca? ⁵⁵ ¿Mua ndoñe yondmëna chë calpinterbe uaquiñá y chabe mamá ndoñe María? ¿Mua ndoñe yondmëna Santiago, José, Simón y Júdasbe catšata, ⁵⁶ y chabe uabëngana ndoñe muentšë béngaftaca mondoyena? ¿Ndayentšana lempe chca mua yojtse-bomna ca? —chënga imojtsichamo.

⁵⁷ Y chë causa chë entšanga tmojanotjayaná y ndoñe imontseboše cha joyeunayana. Pero Jesús tojanéyana: —Nýetsquénache canýe Bëngbe Bëtsabe juabna oyebuambnayá bëtšá jabëmëngana, pero cachabe luarentšë, cachabe yebnentšë ndoñe ca.

⁵⁸ Chíyeca chentšë Jesús ndoñe tonjéftsanma ba bëtš soyënga Bëngbe Bëtsabe obenánaca, chë entšanga chábeñe ndoñe montsanošbuachë causa.

**Ntšamo Juan chë
Ubayaná tojanóbana**

(Mc 6.14-29; Lc 9.7-9)

14 Chë tempo, Rey Herodes, chë Galileoca mandayá tojanuena ntšamo nyetsca entsanga Jesucristbiana imojtsichamcá. ²As cha chabe oservénënga tojanéyana: “Mua Juan chë Ubayaná ctsemna, obanënguentshana tojtayena, chíyeca chca obenana bëts soyënga jamama yojtsebomna ca.”

³Juan cabá ainá ora, Herodes tojanmandá cha chamishache, cadenéjuangaca chamobátsëca y chca cárceloye jutámiamama. Herodes chca tojanma Herodíasbe causa, chabe catsata Felipbe shema. ⁴Juan Heródesbioye mëntšá ibnauácacana: “Ndoñe quenátslesenciana aca acbe catsatbe shëmaftaca jobouamayama, acbe catsata cabá ainá yotsomñe ora ca.”

⁵Y chama Herodes yojtsebošë Juan jóbana, pero entsangbiana yojtsauatja, er chënga imnajuabnaye Juan ndegombre Bëngbe Bëtsabe obenánaca yojanoyebuambná ca. ⁶Pero Heródesbe cumpleño oboyejuaye ora, Herodíasbe bembe entsangbe delante tojanlantsá y Herodes puerte chama yojtsóyejuaye. ⁷Chíyeca Herodes, jajúrase, tbojanšbuachená ndayánaca jatšëtayana, ntšamo tbojotjañcá. ⁸Y Herodíasna lempe bémbëbioye ibojabuayená ntšamo Herodes jojuama. As chë bembe tbojaninyana: “Canýe šcneniñe Juan chë Ubayanabe bestšaše šmatšëta ca.”

⁹Herodes chë soyama tbojanongmé, pero chë ófjanëngbe delante jajúrase tbojanšbuachená causa, yojamánda chca chaotsemnama. ¹⁰Y as tojanmandá chë Juan yojanëtámenoca chabe bestšaše chamuetsštjanguama. ¹¹Chentshana, canýe šcneniñe chë

bestšaše tmojanamba y chë tobiäše tmojanëntšabuaché y chana, chabe mamábioye.

¹²Chentshana, Juanbe ústonënga tmojánashjajna, chabe cuerpo tmojésanocñe y tmojána jauátbontsama. Y chora, Jesús yojtsemnoye chënga tmojána y chë soyëngama tmojancuentá.

**Jesús shachna uaranga boyabásenga
saná tojanacaredadó**

(Mc 6.30-44; Lc 9.10-17; Jn 6.1-14)

¹³Jesús chca tojanuena ora, canýe barquëshañe tojtsanoñe canýe bën luaroye, entsanga ndoyena luaroye. Pero entsanga chama imojátatšëmbona y chë pueblënguentshana tmojánbocana shecuátšëca cha juastama. ¹⁴Chentshana, chë barquëshoicana tojtastjango ora, Jesús ba entsanga tojánanye, chë cha tmojánguanguënga. Chëngbiana tbojanongmé y chë entsanguentshana ba šoquënga tojanashná. ¹⁵Ya jetiñe yojtsemna, chíyeca chë uatsjëndayënga Jesúsbioye tmojanobeconá y tmojaninyana: —Ya jetiñe entsemna y quem luariñe ndocná quenatiyena. Entsanga cuantichamuá, pueblotëmëngoye chamotsoñama, saná chamobuámiñama ca.

¹⁶As Jesús tojanéjua: —Ndoñe quenátsiyta chënga chamotsatoñama. Tšëngaftanga saná šmochjacaredádaye ca.

¹⁷Y chënga tmojanjuá: —Muentšë tondaye queftsátsbomna; nýe shachna tandëse y uta beónata ca.

¹⁸As Jesús tojanéyana: —Chë soyënga moye miyëbo ca.

¹⁹Chentshana Jesús tojanmandá entsanga chamoshëntsjatbiamama. Chorna, chë shachna tandëse y chë uta beónata tojanca, celoye tojanontješë y Bëngbe Bëtsábioye chama tbojtanchuá. Chora chë saná tojanjatá, chabe uatsjëndayënga

tojanējátaye, y chëngna nýetsca entsānga tmojanacaredadó. ²⁰Nýetsca entsānga tmojanse jtoshachaye nýetsá y cabá chë ojannëtémēngaca bnétsana uta sbarécua tmojanajutjé. ²¹Chë tmojansēnga imojamna mo shachna uaranga boyabásenga, shembásenga y básenga ntjacuntacá.

Jesús bėjaye juatsbuacá yojsaye

(Mc 6.45-52; Jn 6.16-21)

²²Chentsāna, Jesús chabe uatsjéndayēnga tojanamēndá chë barquëshoye jtamashjnama y chë uafjájōnaye chenguánoica chabe natsana jashjajnana. Chëntscuana Jesús entsānga yojtichamuá. ²³Nýetscanga tojtanichamó orna, Jesús canýe tjoye tojántsjua canýa jtsemnama, Bēngbe Bětsáftaca jencuéntama. Yojaibétata ora, cha canýa chentše yojtsemna, ²⁴y chë barquëshana tsachocana bēnoca yojsamna. Y chë olěshēnga chë barquësha yojsájantšetaye, chë binýia chēngbe contra yojtsemna causa. ²⁵Ya binýanoyna, Jesús chēngbiōye yojobeconá; bėjaye juatsbuacá yojsaye. ²⁶Chabe uatsjéndayēnga chca cha tmojáninýe orna, tša imojocochauatjaná y puerte auatjanánēnga tmojanoyó: —¡Canýe añemése entsemna ca!

²⁷Pero chora Jesús tojanéyana: —¡Añemo šmochtsebomna, atše Jesús sēndmēna; ndoñe matauatjēngana ca!

²⁸Chora Pedro, Jesúsbiōye tbojaniyana: —Bēngbe Utabná, ndegombre aca tcojtsemnēse, momandá atše bėjaye juatsbuacá ácbiōye chayá ca.

²⁹Y Jesús tbojaniyana: —Mabo ca.

Chora Pedro chë barquëshoicana tojānastjango y tojanontšé bėjaye juatsbuacá Jesúsbiōye jama. ³⁰Pero chë binýia tša jabuache yojtsemnama tojáninýe ora, Pedro puerte yojsauatja y tbojanontšé jtse natjēmbambana. Chýyeca

cha jabuache tojanchembo: —¡Bēngbe Utabná, šmatsbocá ca!

³¹Y cachora Jesús tbojtano buácuētēntšiyē y tbojaniyana: —¡Tša batsatema ošbuachiyá! ¿Ndáyeca ndoñe bētscá átšbeñe contsošbuaché ca?

³²Chentsāna chë barquëshoye chata tbojtanamáshēngo y cachora chë binýia bonguana yojsatsmēna. ³³Y chora, chë barquëshoye imojtsemnēnga Jesusbe shecuatšentše tmojanoshamentšé y tmojaniyana: —¡Aca ndegombre Bēngbe Bětsabe Uaquiñá comna ca!

Genesaret ca uabáinoca, Jesús ba šoquēnga tojanashná

(Mc 6.53-56)

³⁴Chë uafjájōnaye tmojánenashbuachengo y canýe luare Genesaret ca uabáinoye tmojánashjajna. ³⁵Chentša entsānga Jesús tmojantēmbá ora, chë luarentša nýetsca entsānga chama tmojántatšēmbona. As chë entsānga chēngbe šoquēnga Jesúsbiōye tmojanēnatse. ³⁶Y imojtseimpadana nýe mo chabe entsáyá sibiájuanaca juabojajuama chë šoquēnga chaualesenciama. Y nýetscanga chabe entsáyá sibiájua tmojanábojajēnga, shnánēnga imojtsatoquédaye.

Ndáyeca canýe entšá Bēngbe Bětsabe delante ndoñe tšabia nántsemna

(Mc 7.1-23)

15 Chora básefta fariseunga y judiēngbe ley abuátambayēnga, Jerusalenocana tmojánabēnga, Jesúsbiōye tmojanobeconá y tmojaniyana: ²—¿Ndáyeca acbe uatsjéndayēnga ndoñe montsama chë ntšamo bēngbe bēts taitanga monjanamancá ca? ¿Ndáyeca ndoñe ntsacuentšabiana ndayá jasama ora, ntšamo bēnga chë judiēnga

fsënduamancá, Bëngbe Bëtsabe delante tšábenga jtsatsmënema ca?

³As Jesús tojanéjua: —¿Y ndáyeca tšëngaftanga ndoñe šmotsama ntšamo Bëngbe Bëtsá tojanmandacá, nÿe cach tšëngaftangbe bëtsétsanga imnétsama soyënga jtsamama ca? ⁴Bëngbe Bëtsá mëntšá tojanmandá: “Acbe bëtsétsata stëtsoye ndoñe catjáquedaye”, y “nda cachabe bëtsétsatbiana podesca tojóyebuambase, chana jóbanama jtsemnana ca.” ⁵Pero tšëngaftanga šmondbëtsichamo canÿe entšá canobena chabe taitá o chabe mamá jauyanana: “Lempe ntšamo sëndbomncá Bëngbe Bëtsá jaserviama entsemna, chíyeca tondaye quetsátsbomna aca juajabuáchama ca”; ⁶y šmondbëtsichamo nÿe ndánaca chca tojayanëse, ya ndoñe ntsemnana chabe taitá o chabe mamá stëtsoye ndoñe ntjaquédana, ni ntjuajabuáchana ca. Y chca, tšëngaftangbiana tondaye ntsámanana ntšamo Bëngbe Bëtsá tojanmandacá, y añe šmotsama ntšamo tšëngaftangbe bëtsétsanga imojanamancá. ⁷¿Bacna entšanga, ntšamo ndegombre šmojuabnacá ndinÿinÿnayënga! Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojanoyebuambá, mëntšá tojánayana ora:

⁸Bëngbe Bëtsá tonjayana: “Quem entšanga mondbëtsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše atšbiana ndocna tšabe juabnéngaca.

⁹Chënga nÿe bonamente mondbëtsichamo: Bëngbe Bëtsá tša tšabia yomna ca; chënga nÿe entšangbe mandënga jtsabuátambayana y Bëngbe Bëtsabe mandënga ndoñe ca” —cha tojánayana.

¹⁰Chentšana Jesús entšanga tojánachembo y tojanéyana: —Šmochjouena y chacmësertá.

¹¹Ndayá entšá tojtsesacá, ndoñe quebochátsbema Bëngbe Bëtsabe delante ndoñe tšabia. Inÿetšá comna: ndayá entšá tojtsejuabná y tojtsoyebuambnacá endobena cha jabemana Bëngbe Bëtsabe delante ndoñe tšabia ca.

¹²Chora chë uatsjëndayënga Jesúsbioye tmojanobeconá y tmojanianyana: —¿Quéctsetatšëmbo, ntšamo tconjayanama chë fariseunga ndoñe tšabá chenatëuénnana ca?

¹³As Jesús tojanéjua: —Ndaye betiye atšbe Taitá celocá ndoñe tonjájese, tbëtëjocana mochántsejashtse. Cachcá echanjama chë nÿe entšangbe buatëmbana soyëngaca. ¹⁴Cachcá mónÿaye; chënga montsemna mo jtanënga inÿe jtanënga unachayëngcá. Y canÿe jtaná inÿe jtaná tbojtsánachase, nÿets útata canÿe tbuabentše bochanjetsótsatše ca —Jesús tojánayana.

¹⁵Chora Pedro, Jesúsbioye tbojanianyana: —Ntšamo chë cuento bëtsayanama šmabuayená ca.

¹⁶As Jesús tojanéjua: — ¿Tšëngaftángnaca cabá ndoñe cmontsésertana ca? ¹⁷¿Cabá ndoñe cmontsésertana lempe ntšamo šmojascá uafsbioye jomashënguana y chentšana cuerpentšana jtabocnana? ¹⁸Pero ntšamo šmojtsoyebuambnacana lempe ainanocana jtsóbocanana y chë soye endobena tšëngaftangbioye Bëngbe Bëtsabe delante ndoñe tšábenga jábiamana. ¹⁹Ainanocana jtsóbocanana bacna juabnënga: jenóbama, shema o boyábioye ínÿaftaca jáingñama, shembása o boyabásaftaca bacna soye jamama, jatbëbama, jobostërama y ínÿabiyama jtsayátsenayama. ²⁰Chë soyënga cocayé jtsoyebenana entšábioye Bëngbe Bëtsabe delante ndoñe

tšabia jabemama; pero chë ndoñe ntsacuentšabiana ndayá jasama ora, ndoñe ntsobenana Bëngbe Bëtsabe delante ndoñe tšabia jabemama ca —Jesús tojánayana.

Canÿe shembása inÿe luarocana ashjangoná Jesúsbeñe yojtsošbuaché

(Mc 7.24-30)

²¹ Jesús chentšana, Tiro y Sidón luarëngoye tojtsanoñe. ²² Canÿe shembása Caná luarocá chentše inoyena; cha Jesúsbioye yojobeconá y mëntšá yojtsáyebuache: —¡Utabná, Rey Davídbentšana Entšá, šmotselastemá! ¡Atšbe bembe puerte entsesufrina, bacna bayëjbe juabna entsebmna causa ca!

²³ Jesús ndocá tbojanjuá. As chabe uatsjëndayënga tmojanobobeconá y tmojanimpadá: —Chë shembása mëyana chaotsatoñe; bëngbe ústonoye yapa entsáyebuache ca.

²⁴ As Jesús tojánayana: —Bëngbe Bëtsá atše šonjichmó jtsanÿenama ñye chë entsanga, chë mo ótšena oveshëngcá imomnënga Israeloquënga, y chë ndoñe judiëngna ndoñe ca.

²⁵ Pero chë shembása tojána, Jesusbe shecuatšentše tojanoshamentšé y tbojanayana: —¡Utabná! Diosmanda pavor šmotsebema. ¡Šmotsajabuache ca!

²⁶ Y Jesús tbojanjuá: —Chë judiënga mondmëna mo Bëngbe Bëtsabe basengcá y atše ácbioye tbojuajabuache y chëngbioye ndoñesna, nántsemna mo chë básengbe saná chënga cuaftsëbaquëcá y quešënga ftsëbuajocá. Chca jamana ndoñe tšabá quenátsmëna ca.

²⁷ As cha tbojanjuá: —Arseñor. Pero chë quešëngnaca chëngbe nduiñëngbe mesëshentšana tmojatquécjanatemënga mondbase, chë nduiñënga tmojtsešá ora. Chcasna, Diosmanda šmotsajabuache ca.

²⁸ Chora Jesús tbojanayana:

—¡Shembása, Bëngbe Bëtsabeñe tša ošbuachiyá comna! Ntšamo cojtsebošcá chca chaotsemna ca.

Y cach orscana chabe bembe tšabá yojtsatsmëna.

Jesús ba šoquënga tojanashná

²⁹ Jesús chentšana tojéftsanbocna y chë Galilea uafjajónaye tsachoye tojána. Chentšana, canÿe batsjoye tojántsjua y choca tojanótbema. ³⁰ Mallajta entsanga Jesús yojtsemnentše tmojánashjajna, y coshetënga, jtanënga, tšabá jobónjuama ndobenënga, ndëbianga y ba šocana bomnënga imojtsënachaye. Jesusbe shecuatšentše tmojanëshejango y cha ñyetscanga tojanashná. ³¹ Y chca orna, chë entsanga tmojáninÿe: chë ndëbianga imojtsatoyebuambná, chë tšabá jobónjuama ndobenënga tšabá imojtsatsmëna, chë coshetënga tšabá imojtsatana y chë jtanëngna yojtsëbinÿna; y chama chënga corente ojnánanënga imojtsemna. Chora chënga tmojanontšé jëtschuayana chë Israelentša entsanga imojánadorana Bëngbe Bëtsá.

Jesús canta uaranga boyabásenga saná tojanacaredadó

(Mc 8.1-10)

³² Chentšana Jesús, chabe uatsjëndayënga tojánachembo y tojanéyana: —Quem entsangbiana šontsengmena, er ya unga te chënga átšeftaca muentše montsemna y jasama tondaye quemátsbmna. Atše ndoñe quetsátsbošë ntjascá cachëngbe yebnoye chënga jtichamuana, er benachiñe shëntsama nantsabuatëcja ca.

³³ As chabe uatsjëndayënga tmojantjá: —¿Ntšamo muatjobenaye quem luarentše, ndocna entšá ndoyenentše, chëfta entsangbiana saná jinÿenama ca?

³⁴ Y Jesús tojanatjá: —¿Bueta tandëse šmojtse bomna ca?

Y chënga tmojanjuá: —Canÿsëfta tandëse y básiëfta beonatémënga ca.

³⁵ Chora Jesús tojanamëndá nÿetsca entšanga fshantsiñe chamotbiamama.

³⁶ As chë canÿsëfta tandëse y chë beonatémënga tojanca; Bëngbe Bëtsábioye chama tbojtanchuá, chë saná tojanatá y chabe uatsjédayënga tojanëjatá. Chentšana nÿetsca entšángbioye tmojanacaredadó.

³⁷ Nÿetsca entšanga tmojanse jtoshachaye nÿetsá. Y chentšana cabá canÿsëfta bëts sbarécua tmojanajutjé chë tojanójamëtemëngaca. ³⁸ Chë tmojansënga imojamna canta uaranga boyabásënga, shembásënga y básënga ntjacuntacá. ³⁹ Chentšana Jesús, chë entšanga tojtanichamó, barquëshoye tojánamashëngo y Magadán luaroye tojtsanoñe.

**Chë fariseunga y saduceunga
tmojánbošëna Jesús
chaoma canÿe bëts soye**

(Mc 8.11-13; Lc 12.54-56)

16 Fariseunga y saduceunga tmojána Jesús jinÿama, y jisháchichiyama imojtseimpadana canÿe bëts soye chaoma, as jtsetatšëmbuama Jesusbe obenana ndegombre Bëngbe Bëtsábioyana tainóbocanama.

² Pero Jesús tojanëjua: “Tšëngaftanga jetiñoje šmondbëtsichamo: ‘Yëfse tšabe te echántsemna, er celoca buánganiñe entsemna ca.’ ³ Y cachëse šmondbëtsichamo: ‘Mënté echanjuafté, er celoca buánganiñe y ibetiñe entsemna ca.’ Tšëngaftanga celoye jontjësüyëse, ntšamo chë tempo yochtsemnama tša tšabá jayanama šmojtsobenëse, ¿ndáyëca ndoñe šmontsobena jtsetatšëmbuana ndaye bëts soye Bëngbe Bëtsá quem tempo

cmojtsinÿanÿnama? ⁴ Quem puerte bacna entšanga y ndošbuáchiyënga montseboše atše canÿe bëts soye chaima, obenana jinÿanÿiyama; pero ndoñe chca quemochátinÿe, sinó nÿe chë ndáyá yomna mo chë Bëngbe Bëtsabe juabna oyebuambnayá Jonásoftaca tojanopasá soycá ca” —Jesús tojánayana.

Chora Jesús tojësanashejuana y chentšana tojtsanoñe.

**Jesús tojanabuayená chë
fariseunga buatëmbana soyëngama**

(Mc 8.14-21)

⁵ Chë uafjajónaye chenguanoyana chënga tmojtano ora, chë uatsjédayënga yojësebnëtjomba tandëse jesocñana. ⁶ Chora Jesús tojanëyana: —Šmochtsantjësna; cuedado šmochtse bomna chë fariseunga y saduceunga levadurama ca.

⁷ Pero chë uatsjédayëngna imojtse natsëtsnaye: —Chca entsichamo, bënga tandëse ndoñe tmonjesocñana ca.

⁸ Jesús chë soye yojtsetatšëmbo; chíyëca mëntsá tojanëyana: —¿Ndáyëca tandëšama šmojtse natsëtsná ca? ¡Tša batsatema ošbuáchiyana šmobomna!

⁹ ¿Cabá ndoñe cmontsësertana y ndoñe šmontsaboutinÿna chë shachna tandëšentšana shachna uaranga entšanga sënjanëjuatšëma y bnëtsana uta sbarécua šmonjájajutjema?

¹⁰ ¿Y ndoñe šmontsaboutinÿna chë canÿsëfta tandëšentšana canta uaranga entšanga sënjanëjuatšëma y canÿsëfta sbarécua šmonjájajutjema?

¹¹ ¿Ndáyëca ndoñe cmontsësertana atše tandëšama ndoñe sëntsóyëbuambnama? Cuedado šmochtse bomna fariseunga y saduceunga levadurama ca —Jesús tojanëyana.

¹² As chora chë uatsjédayënga tojanësertá, Jesús ndoñe tonjájayana chë tandëšentša levadurama cuedado jtse-

bomnana ca, sinó ndayá chë fariseunga y saduceungbe uatëmbana soyëngama.

**Pedro tojánayana, Jesús chë
Cristo bétsemnama**

(Mc 8.27-30; Lc 9.18-21)

¹³ Jesús, Cesarea de Filipo luaroye tojánashjango ora, chabe uatsjëndayënga tojanatjá: —¿Nda ca entsãnga imojtsichamo chë Bëngbe Bëtsá Entsó tbojanbemá yojtsemna ca?

¹⁴ Chënga tmojanjuá: —Báseftanga montsichamo Juan chë Ubayaná ca, ínÿengna Elías ca, ínÿengna Jeremías y ínÿengna tempsca inÿe Bëngbe Bëtsabe juabna oyebuambnayá ca.

¹⁵ As Jesús tojanatjá: —Y tsëngaftangna, ¿nda atše bétsemnama ntšamo šmochjayana ca?

¹⁶ Chora Simón Pedro tbojanjuá: —Acna chë Bëngbe Bëtsabe Uámana Uabuayaná condmëna, chë Bëngbe Bëtsá Ainabe Uaquiñá ca.

¹⁷ Y Jesús tbojanianya: —Simón, Jonasbe uaquiñá, oyejuayá cochanjoyena. Ndocna quem luarentša entsá chë soye checmatinÿinÿé, sinó atšbe Taitá, celoca endmëná. ¹⁸ Y mëntsánaca cbëyana: Mora acna Pedro o chë ndëtsbecá contsemna, y chë ndëtsbeñe atšbe bëts yebna chanjajebo, y ni Satanás, chabe obenánaca entsá jóbana, quechatobenaye jtsepochócama. ¹⁹ Atše cbochanjätšetaye obenana, mo llavëfjá, entsãnga Bëngbe Bëtsabe amëndayoye jamashënguama chamobenama. Bëngbe Bëtsáftaca chacojtsencuënta ora, canÿe soye ndoñe chaondëtsemna ca chacojayanëse, Bëngbe Bëtsá cachcá echanjayana. Y cháftaca chacojtsencuënta ora, canÿe soye aínë chaotsemna ca chacojayanëse, Bëngbe Bëtsá echanjayana aínë chca chaotsemna ca —Jesús tbojanianya.

²⁰ Chentsana chabe uatsjëndayënga tojanamëndá ndocnábeñe ntsecuën-

tayana cha, Jesús, chë Bëngbe Bëtsabe Uámana Uabuayaná, chë Cristo bétsemnama.

**Jesús tojánayana cha ibojamna
jóbanana y jtayenana ca**

(Mc 8.31–9.1; Lc 9.22-27)

²¹ Chorscana Jesús tojanontsé chabe uatsjëndayënga jábuayenana cha ibojtsemna Jerusalenoye jama, y chozna chë bëtsëjemëngcá mándayënga, chë judiëngbe bachnangbe amëndayënga y chë ley abuátambayënga mochjanma cha puerte chaopadecema ca. Tojanéyana cha mochjanóba, pero unga tianoye yochtanayena ca. ²² Chora Pedro, Jesúseftaca tojanoluaré y tojanontsé mëntšá uatsëtsnayana: —¡Atšbe Utabná, Bëngbe Bëtsá ndoñe chaondëlesenciá chca chaopasama! ¡Ndocna te quenaisopodena chca ácaftaca jopásana ca!

²³ As Jesús tojanobuértana y Pédrëbioye tbojanianya: —¡Satanás, átšbentsana mojuaná! ¡Aca contseboše atše canÿe bacna soye chašócochënguama! Pedro, acbe juabnënga Bëngbe Bëtsábiocana ndoñe quenatóbocana, sinó nÿe entsãngbentsana ca.

²⁴ Chentsana Jesús chabe uatsjëndayënga tojanéyana: —Nda atšbe uatsjendayá jtsemnama tojtseboše, cháuyana nÿe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonÿá atše juastama, y atšbiana jasúfriama chaotseprontana y cruciñe jobanámna. ²⁵ Nda tojtsama quem luarentše bëtscá soyënga jtsebomnama y atšbiana jasúfriama ndoñe tontseprontana, chë nÿetsca tescama yomna tšabe vida echanjopërdia. Pero nda quem luarentša soyënga cachcá tojëftsonÿá atše juastama, masque chaóbana, chë nÿetsca tescama yomna tšabe vida echántsebomna.

²⁶ ¿Ndayama entšá buanjósérvia nýetsca quem luarentša soyënga jtsebomnana, chë nýetsca tescama yomna tšabe vida tojtsoperdese? Ndegombre, canýe entšá chë nýetsca tescama yomna tšabe vida tojtsoperdese, ndocna soye quenátsmëna cha chaobená joyiyama, chë nýetsca tescama yomna tšabe vida jtsebomnana. ²⁷ Chë Bëngbe Bëtsá Entšá tbojanbemá, chabe Taitabe obenánaca y puerta buashinýinýaniñe echanjabo chabe angelotémëngaftaca, y chora cada cánýabioye bochántatšetaye cachcá ntšamo cada ona tojéftsemcá. ²⁸ Ndegombre šcuayana: Báseftanga muentše montsemnënga ndoñe quemochatóbana, Bëngbe Bëtsá Entšá tbojanbemá amëndayacá jabana ntjéftsinýcá ca —Jesús tojánayana.

Jesús inýetšá tojanobinýná

(Mc 9.2-13; Lc 9.28-36)

17 Chentšana chnénguana tianoje, Jesús tojéftsanëbiatše Pedro, Santiago y chabe catšata Juan, y ínýoye tojanënatse nýe chënga, canýe bëts tjoye. ² Chentše, chëngbe delante inýetšá cha tojanobinýná. Chabe jubiá shinýcá yojtsebuashinýinýana, y chabe uichëtjonëjuangana mo binýniñcá uafjantsëjuangá yojtsamna. ³ Chca orna, chabe uatsjëndayënga tmojáninýe Moisés y Elías tbojanobinýná, Jesúseftaca encuéntaye.

⁴ Chora Pedro, Jesúsbioye tbojanianya: “Bëngbe Utabná, jtša tšabá bëngbiana cuanmëna muentše jtsemnana ca! Tcojtsebošëse, unga tambotémënga atše chjapórma: cánýetema acbiana, ínýetema Moisesbiana y ínýetemna Elíasbiana ca.”

⁵ Pedro chca yojtsóyebuambnantscuana, canýe buashinýinýana jantšëtëshe nýetscanga yojáutsbotse. Y chë jantšëtëshoicana canýe

oyebuambnayana tmojanuena mëntšá: “Mua atšbe bonshana Uaquiñá endmëna, atšbe chabiana sëntsoyejuá. Cha šmochtseyeunana ca.”

⁶ Y chë uatsjëndayënga chca tmojanuena ora, tmojanoshamentšë y jubiaca fshantsóntscoñe tmojanotsejbéna, puerta auatjanánënga. ⁷ Chora Jesús chabe uatsjëndayëngbioye tojanobeconá, tojánabojajo y tojanéyana: “Matëtsbananga; ndoñe matauatjëngana ca.”

⁸ Y tsbanánoye tmojanontjeshë ora, Jesús nýe canýa tmojáninýe, ndocná inýa más.

⁹ Chë tjocana imojtsatstsmaye ora, Jesús tojanamëndá: —Bëngbe Bëtsá Entšá tbojanbemá obanënguentšana candétayenëntscuana, ndocnábeñe chë šmonjinýe soyama šmattsecuéntaye ca.

¹⁰ As chë uatsjëndayënga Jesús tmojantjá: —¿Ndáyeca chë ley abuatambayënga mondbëtsichamo, canmëna Elías jabana chë Bëngbe Bëtsabe Uámana Uabuayanabe natsana ca?

¹¹ Chora Jesús tojanéjua: —Ndegombre canýa Eliascá natsana echanjabo y ntšamo jtsemnana yomncá, lempe echánjabatsma ca. ¹² Pero atšbe cbéyana, canýa mo Eliascá ya tonjabo, entšanga ndoñe chematanotëmbá y cháftaca entšanga tmonjanma lempe ntšamo tmojanbošencá. Y cachcá, chë Bëngbe Bëtsá Entšá tbojanbemá entšangbe cucuatšinë echanjasúfria ca —Jesús tojánayana.

¹³ Chora chë uatsjëndayënga tojanësertá, Juan chë Ubayanabiana Jesús chca yojtsëtsëtsnana.

Jesús, canýe bacna bayëja tbojanbojuaná

(Mc 9.14-29; Lc 9.37-43)

¹⁴ Entšanga imojtsemnoye chënga tmojtanashajna ora, canýe boyabása

tojanobeconá, Jesusbe natsanoica yojoshamentsiye y tbojaniana: ¹⁵— Utabná, atšbe uaquiná motselastemá. Cha ataque bontsësháchichana y puerta entsesufrina, er cha inye ora inoye jtseshajayana y inye orna, buyeshoye jtsoshbuetsana. ¹⁶Acbe uatsjéndayëngbioye cha sênjuánatse y ndoñe chematobená jtseboshnama ca —cha tbojaniana.

¹⁷As Jesús tojánayana: —¡Nyetšá ndošbuáchiyënga y bacna entsanga ca! ¿Buetayté šojtsemna tšëngaftangafata jëftsemnana? ¿Buetayté uantado tšëngaftangafata chjëftsemna? Moye chë básetema mánatse ca.

¹⁸Chora Jesús, chë basetémeñe bacna bayéjbioye tbojanácacana y chábensana cha tojésanbocna. Cach orscana chë básetema tšabá yojtsatsmëna.

¹⁹Chentsana, chë uatsjéndayënga luaroa Jesúseftaca tmojanoyebuambá y tmojaniana: —¿Ndáyeca bënga ndoñe fsênjobená chë bacna bayëja jtabocnama ca?

²⁰Y Jesús tojanéyana: —Tšëngaftanga tša batšatema ošbuáchiyana bomna causa. Ndegombre šcuayana: tšëngaftanga batšatema ošbuáchiyana šmojtsebomñese, masque nye mo canye mostaza betiye jenaycá, quem tjoye šmatjayana: “Muentšana mojuaná y choye motsa ca”, quem tjañe chca nanjama, y tšëngaftanga lempe jamama šmattsobena. ²¹Pero chca bayëjënga jtëbuacnamna jobenayana nye Bëngbe Bëtsáftaca jencuëntase y chama tondaye ntjascá jtsemñese ca —Jesús tojanéyana.

Jesús cachiñe tojánayana cha ibojamna jóbana y jtayenana ca

(Mc 9.30-32; Lc 9.43-45)

²²Jesús y chabe uatsjéndayënga cányiñe Galilea luaroye imojétsaye ora,

cha tojanéyana: “Chë Bëngbe Bëtsá Entšá tbojanbemá entsangbe cucuatšinë mochanjáboshjona, ²³mochanjóba, pero unga tianoye echántayena ca.” Chë causa chë uatsjéndayënga puerta ngménaca imojtsemna.

Chë Bëngbe Bëtsabe bëts yebnama impuesto jtsatsquécjnyama

²⁴Jesús y chabe uatsjéndayënga Capernaumoye tmojánashajna ora, chë Bëngbe Bëtsabe bëts yebnama entsangbioye impuesto atjanayënga Pédrëbioye tmojána y tmojantjá: —¿Acbe uatëmbayá Bëngbe Bëtsabe bëts yebnama impuesto queonýbetsatsquécjnaye ca?

²⁵Y Pedro tojanéjua: —Aíñe, cha endbetsatsquécjnaye ca.

Chentsana, Pedro chë yebnoye tojánamashëngo ora, Jesús natsana mëntšá chábioye tbojaniana: —Simón, ¿ntšamo catjájuaboye? ¿Quem luarentša reyënga ndëmuanyëngbioye impuesto inmëtsayëngacaye y crocénana inmëtsatjanaye: cach luarentše oyenëngbioye o chë inye luarocana ashjajnëngbioye ca?

²⁶As Pedro tbojanjuá: —Chë inye luarocana ashjajnëngbioye ca.

Y Jesús tbojaniana: —Chcasna, ndoñe quešnátsmëna chë atšbe Taitabe bëts yebnama impuesto jtsatsquécjnyana ca. ²⁷Pero ndocná mal chabonduínñanamna uafjónayoye motsa, anzueléjua cochjútšena y chë natsana chaojuásjana beona cochjuábocna. Cochjuayetëfjoná y choye crocénana cochanjínëna y chánaca echanjoshjache atšbiana y acbiana jëtsjájuama. Cochjëftsejatsëca y cochjatsboshjona ca —Jesús tbojaniana.

¿Nda chë más uamaná yomna?

(Mc 9.33-37; Lc 9.46-48)

18 Chentshana chë uatsjédayénga Jesúsbioye tmojanobeconá y tmojantjá: —¿Chë Bëngbe Bëtsábeyeca mandánëngbeñe nda chë más uamaná yomna ca?

²Chora Jesús canye basetémbioye tbojanchembo y chëngbe tséntsaca tbojanatsá. ³Y tojánayana: —Ndegombre cbéyana, nda mo basetemcá ndoñe tontóbema y ndoñe chacá Bëngbe Bëtsabe soyénga tonjóyëngacñe, cha ndocna te queochatobenaye Bëngbe Bëtsabe améndayoye jamashënguama. ⁴Chca, nda tojtsejuabná canye nduamaná yomna y quem basetemcá yomna ca, cha chë Bëngbe Bëtsabe améndayoca chë más uamaná echántsemna. ⁵Y nda átsbeñe ošbuachiyá bétsemnayeca, tbojofja canya mo quem basetembioycá, chana atše jofjana ca —Jesús tojánayana.

Resjo yomna, nderado bacna soyénga cuanjama

(Mc 9.42-48; Lc 17.1-2)

⁶“Nda canye básetema átsbeñe ošbuachiyábioye tbojaingñé bacna soye jamama, chabiama más tsábá nántsemna canye bëts nantsnëbé chamotsetamoséñtšbua y chë mar béjaye shbuatsëntsoye chamot-sashbuetše chabotsenatjëmbama. ⁷¡Tša lastema quem luarentša entsangbiama, chë ínýenga bacna soye jamama chaócochënguama tmojtsamëngbiama! Nýets tempo chca aménga mochanjëftsemna. Pero, ¡payajema chë inya bacna soye chaomama tojtsamá ca!

⁸“Chíyeca, acbe cucuátseca o acbe shecuátseca bacna soye tcojamése, cochtsenástjango y bënoye cochtsétsena. Acbiama más tsábá

nántsemna celoye jamashënguana chë nýetsca tescama yomna tsábe vida jtsebomnama, cucuatše ndbomná o cosheto, y ndoñe nýets uta cucuátseca o shecuátseca chë nýets tempo echanjesomñe ñëshoye chacmotséštjango. ⁹Nderado acbe bomínýeca bacna soye tcojinýe y cachca soye tcojama, chë bomínýe cochtsenobuchjatsëca y bënoye cochtsétsena. Acbiama más tsábá nántsemna, celoye jamashënguana nýe canye bomínýeca, y ndoñe nýets uta bomínýeca infiernoye chacmotséštjango, chë bëts ñëshoye ca” —Jesús tojánayana.

Chë ótsena oveshabiamna cuento

(Lc 15.3-7)

¹⁰Mëntšánaca Jesús tojánayana: “Ni mo cánýabioye quem tsëm ošbuachiyënguentšana, chë mo basetemëngcá mondmënënga, mo nduamanacá šmattsonyaye. Ndegombre cbéyana, chëngbe angelotémënga celoca, sempre atšbe Taitá celocáftaca mondetsemna ca. ¹¹Er chë Bëngbe Bëtsá Entšá tbojanbemá tonjabo chë pochocánënga jtsemnama imojtsajñënga jabátsebacama.

¹²“¿Ntsámo tšëngaftanga šmatjájuaboje? Canye boyabása patse oveshënga tojtsabamna y ndeolpe canye chentša oveshá tojtsotše. ¿Chë boyabása ndoñe chë inye esconëfta bnëtsana y esconëfta oveshënga tjoca cachcá nanjesënyaye, jama chë ótsena oveshá jetsenguanguama? ¹³Y chë oveshá jetsinýenama tojobenase, ndegombre chë boyabása más oyejuayá jtsemnana chë ótsena oveshabiamna, y ndoñe nya chca chë inye esconëfta bnëtsana y esconëfta oveshëngbiama chë ndoñe tmonjanotsëngbiama. ¹⁴Cachcá, tšëngaftangbe Taitá, Bëngbe Bëtsá, chë celoca endméná, ndoñe quenátsboše

ni canya quem basenguentšana mo otšenacá chaotsemna, bacna soyenga jtsamése oyena causa ca” —Jesús tojánayana.

Ntšamo cuanjama inya japerdónama

(Lc 17.3)

¹⁵“Nderado acbe catšata, bacna soye tcmojaborlase, cochjá, cányata šochjencuénta y cochjama cha chauenójuaboma, ndegombre bacna soye tcmojaborlama. Cha chacmojóyeunasna, acbe catšata cachiñe tšabá ácaftaca echántsatsmëna. ¹⁶Pero ndoñe tcmonjóyeunasna, inye útata cochjáchembo chacmotjëmbambama, chca, chata chabouena ntšamo cochjauyanama y chamuayana ndegombre chca yomnama. ¹⁷Y chata ndoñe tonjóyaunase, chentša Bëngbe Bëtsábeñe ošbuáchiyënga macuntá. Y chënga ndoñe tonjóyaunasna, cochjayana cha yomna mo canya Bëngbe Bëtsábioye nduabuatmacá, mo canye ndoñe judiyá ca o canye bacna entšá mo canya Romocama impuesto entšángbioye atjanayacá yomna ca.

¹⁸“Ndegombre cbéyana: Tšëngaftanga Bëngbe Bëtsáftaca chašmojtsencuénta ora, chašmojayana canye soye ndoñe chaondëtsemna ca, Bëngbe Bëtsá cachcá echanjayana. Y cháftaca chašmojtsencuénta ora, chašmojayana canye soye añe chaotsemna ca, Bëngbe Bëtsá echanjayana añe chca chaotsemna ca.

¹⁹“Mëntšánaca cbéyana: Nderado útata tšëngaftanguentšana quem luarentše tbojenoyeuná Bëngbe Bëtsáftaca jencuéntama ndayánaca jótjañama, Bëngbe Bëtsá chë celoca endmëná pronto chë soye cmochanjátšataye. ²⁰Ndayentše útata o únganga tmojénefjna, átsbeñe ošbuáchiyënga bëtsemnama, chentše

atše chëngbe tsëntsaca chántsemna ca” —Jesús tojánayana.

²¹As Pedro tojána y Jesúsbioye tbojantjá: —Bëngbe Utabná, ¿atšbe catšata bacna soye šojaborlase, bueta soye šojtsemna cha japerdónana? ¿Canysëfta soye ca?

²²Y Jesús tbojanjuá: —Ndoñe nye canysëfta soyama quecbatatsëtsná, sinó canysëfta bnëtsana soye canysëfta ca.

Ndayá inopása chë japerdónama ndëbošëngaftaca

²³Mëntšánaca Jesús tojanéyana: “Cbochanjáuyana ntšamo Bëngbe Bëtsabe amëndayana yomnana. Endmëna ntšamo canye réyefata tojanopasacá. Cha yojábošena chabe oservénënga crocénana jtsëtjañana. ²⁴Jtsëtjañama yojóntša orna, canye boyabása imojúanatse, chë réybioye mallajta crocénana ibnandebena. ²⁵Chë oservená tondaye yonjábomna chë ndebënana jëtsjájuama; asna chë rey yojamánda cha chamotsiye nyets tempo nye inyabiama chaotsooservénama, chabe shema y chabe básengnaca, y lempe ntšamo yojanbomncánaca, y chca chë ndebënana jtopágama. ²⁶Chora chë oservená chë reybe shecuatšentše yojoshamentšiyeye y ibojtseimpáda: ‘Taita, Diosmanda šmotsëuantajema. Atše lempe cbochanjëtšëntšabuachiye ca.’ ²⁷Chë reyna chë boyabásabiama ibojóngmia; as chë ndebënana ibojtseperdóna y ibojëtsboshjona.

²⁸“Chë oservenana chentšana yojësebocna y benachiñe inye oservenáftaca ibojenbetše, cach mandadbiama trabajayá. Chë inye oservenana nye batšatema crocénana chábioye ibnandebena. Chora chë oservená chë enutábioye tamošajentšana ibojishache y ibojóntša jtsëtajuashbebiama y mëntšá ibojauyana: ‘¡Ndebënana šmatsëntšabuaché ca!’ ²⁹Chora

cha chë oservenabe shecuatšentše yojoshamentšiyē y ibojtseimpáda: ‘Diosmanda šmotsēuantajema. Atše lempe cbochanjētsēntšabuachiye ca.’³⁰ Pero chë oservená ndoñe yonjábosēna, sinó yojama chë inye oservenábioye cárceloye chamotsētámíama, chë ndebénana candētsjájēntscuana.³¹ Chë inye oservénēnga chca imojinye ora, puerte yojóngmía y imojá lempe ntšamo yojopasacá chēngbe rey jacuéntama.³² As chë rey yojamánda chë boyabása jobetšana, y ibojauyana: ‘¡Puerte bacna oservená! Šconjaimpadáyeca, nyets ndebénana tcbontseperdoná.³³ Acnaca cachcá cmondmēna chë cach aquēcá muentša trabájayabíama jóngmiana, ntšamo atše acbíama šonjongmecá ca.’³⁴ Y tša chë rey ibojtsetna; as yojamánda jabuache chamotsetsetšená nyets ndebénana candētsjájuantscuana ca” —Jesús tojanacuntá.

³⁵ Chora Jesús tojánayana: “Atšbe Taitá, celoca endmēná, cachcá tšēngaftangaftaca echanjama, tšēngaftangbe catšata ndoñe ndegombre nyets ainánaca šmonjaperdonase ca.”

Ndayá Jesús tojanabuatambá chë bouamnēnga tmojtšenētšenama

(Mc 10.1-12; Lc 16.18)

19 Chë soyēnga tojánayanentšana, Jesús Galilea luarentšana tojtšanoñe y Judeoye tojánashjango, Jordán chenguánoica.² Ba entšanga tmojanasto y chentše šoquēnga tojanashná.

³ Básefta fariseunga Jesúsbioye tmojanobeconá y jisháchichiyama mēntšá tmojantjá: —¿Queojtselesenciana canye boyá nye ndayámnaca chabe shémbioye cachcá jesonýayama ca?

⁴ As Jesús tojanéjua: —¿Tšēngaftanga ndoñe chë Bēngbe Bētsabe uabemana palabrenguiñe šmēndualía, Bēngbe Bētsá, chë entšanga tojanabiamá, quem

luare jobojátšama ora “boyá y shema tojánabiamama”?⁵ Y Bēngbe Bētsá tojánayana: “Chíyeca boyabása chabe taitá y chabe mamá echanjésabashejuana, chabe shémaftaca jenútanama, y chë útata mo canýacá bochántsemna ca.”⁶ Y chca, ya ndoñe útata quebochátsmēna, sinó mo nye canýacá. Chcasna, entšá ndoñe chaondēndbema ndayá Bēngbe Bētsá mo canýiñcá tojéftsema soye ca — Jesús tojánayana.

⁷ Chora chë fariseunga tmojaníyana: —¿As, ndáyeca Moisés tojanmandá, chë shémbioye canye uabemana tsbuanácha juiyiyana jtsenētšenama y cachcá jesonýayana ca?

⁸ Y Jesús tojanéyana: —Tšēngaftanga Bēngbe Bētsabe mandēnga jójyēngacñama ndoñe quešmátsboše causa, Moisés tmojanalesenciá shémbioye jesētšenana. Pero quem luare jobojátšama orna, ndoñe chca quenjatšmēna.⁹ Atše cbéyana, nda chabe shémaftaca tbojtšenētšena y chca tojopasá ndoñe chë shema chabe boyábioye inýaftaca tbtontseingñé causa, y chë boyá inýaftaca tojtóbouamasna, cha chë natsana shémbioye inýaftaca jtséingñayana ca — Jesús tojánayana.

¹⁰ Chora chabe uatsjéndayēnga tmojaníyana: —Chca chë boyá y shémaftaca tojtsemnēsna, ndoñe tšabá yontsemna jobouamayana ca.

¹¹ Y Jesús tojanéyana: —Nyetscanga ndoñe quemátobena chë palabrenga jójyēngacñana, nye chë Bēngbe Bētsá tojama jójyēngacñama chamobenama, chēngna aīñe.¹² Ba soyēnga comna ndaye causa chë boyabásēnga ndoñe ntsobenana jobouamayana. Inyēnga jónýnana jobouamayama ndobenēnga, inýēngbioye cach entšanga jábíamana jobouamayama ndobenēnga y inýēngna, nyets tempo nye Bēngbe Bētsabe amēndayama oservena causa ca —tojanéyana.

**Jesús, basetémëngbiana Bëngbe
Bëtsábioye tbojanimpadá**

(Mc 10.13-16; Lc 18.15-17)

¹³ Entšanga basetémënga Jesúsbioye tmojanénatse, cha chauabojajuama y Bëngbe Bëtsábioye chëngbiana chaboimpadama. Pero chë uatsjëndayënga tmojanontsé chë basetémënga unachayënga jtsécacánana. ¹⁴ Chora Jesús tojanéyana: “Cachá mónýaye chë basetémënga átšbioye chamuabo y ndoñe matéuyanana; er Bëngbe Bëtsabe améndayana endmëna mo quem basetémëngcá imomnëngbiana ca.” ¹⁵ As chë basetémënga tojánabojajo, Bëngbe Bëtsá jaimpádase; y chentsana cha tojtsanoñe.

**Canýe bomna bobontse
Jesúsbioye tojána**

(Mc 10.17-31; Lc 18.18-30)

¹⁶ Chentsana, canýe boyabása tojána Jesús jinýama y mëntsá tbojantjá: — Buatëmbayá, ¿ndaye tšabe soye chjama chë nyetsca tescama yomna tšabe vida jtsebonnama ca?

¹⁷ Y Jesús tbojanjuá: —¿Ndáyeca chë tšabe soye ndayá bëtsemnama šcojtsetjaná ca? Tšabia nýe canýa endmëna: Bëngbe Bëtsá. Aca chë nyetsca tescama yomna tšabe vida jtsebonnama tcojtsebošëse, mandënga cochtsobedecena ca.

¹⁸ Chora chë bobontse tbojantjá: —¿Ndaye mandënga ca?

Y Jesús tbojanjuá: —“Ndoñe catjóba, acbe shema ínýaftaca ndoñe cattseíngñaye, ndoñe catjatbëba, ndoñe catjuaboínýena. ¹⁹ Acbe bëtsétsata stëtsoye ndoñe catjáquedaye y ndëmua entsánaca cochtsebobonshana ntšamo cach aca cuenobobonshancá ca” —Jesús tbojanijana.

²⁰ Chora chë bobontse tbojanjuá: — Atše lempe chca nyets tempo sën-

documplina. ¿Ndayá más šojtsebuášbena ca?

²¹ As Jesús tbojanijana: —Aca lempe tšabá jamama tcojtsebošëse, motsa, acbe bomna soyënga cochjetsatobuiye y chë crocénana, ndbomnëjémënga cochtsatšataye; chca, bëts uacanana soye celoca cochántsebomna. Chentsana cochjabo y šcochjuasto ca.

²² Chë bobontse chca tojanuena ora, ngmënaca yojsatoñe, cha corente bomná bemna causa.

²³ Chora Jesús chabe uatsjëndayënga tojanéyana: —Ndegombre cbéyana, puerte totcá entsemna canýe bomnabiana Bëngbe Bëtsabe améndayoye jamashënguama ca. ²⁴ Chë bomnabiana cachiñe šcuatayana: Más paselo entsemna canýe camello chë coshufjentša atëfjnëjana chauachnëngo, y ndoñe canýe bomná Bëngbe Bëtsabe améndayoye jamashënguana ca.

²⁵ Chabe uatsjëndayënga chca tmojanuena ora, puerte ojanánënga imojtsemna y imojtsichamo: —As, ¿nda yochjobenaye atsbočaná jtsemnama ca?

²⁶ Jesús chënga tojanënyanyé y tojanéyana: —Entšanga ndoñe quemátobena jamama canýa atsbočaná chaotsemnama, pero Bëngbe Bëtsá añe, er cha nyetsca soyënga jamama endobena ca.

²⁷ Chora Pedro tbojanijana: —Aca contsonýá, bënga lempe chë fsëndbomna soyënga fsënjéseboshjona y ácaftaca fsëntsajna. As, ¿ndayá bënga fchjójyëngacñe ca?

²⁸ As Jesús tojanéyana: —Ndegombre cbéyana, nyetsca quem luarentša soyëngama mo tsmëcá jtsemnama tempo chaojobuache ora, chë Bëngbe Bëtsá Entšá tbojanbemá chabe buashinýinýana bëts tšënëšiñe reycá echanjót'bema jtsemándayama; y tšëngaftanga, chë atše šmëstonëngna, chora bnëtsana uta uámana t'bemaniñe

šmochanjotbiana mo reyëngcá, chë Israeloca bnétsana uta bëts pamillentsa entsangbiana jayanama tšabá o ndoñe tšabá tmonjamama. ²⁹Y ndëmuanÿenga, atše jaserviama tmojëftsebhjona cachëngbe yebna, catsátanga o uabénanga, befta o bebmá, básenga o fshantsënga, chë soyëngama patse soye más mochanjóyëngacñe y chë nÿetsca tescama yomna tšabe vídnaca. ³⁰Pero banga mora uámanënga imomnënga, nduámanënga mochántsemna; y banga mora nduámanënga imomnëngna, uámanënga mochántsemna ca —Jesús tojánayana.

Chë trabájayëngbiana cuento

20 Mëntsánaca Jesús tojánayana: “Bëngbe Bëtsabe amëndayana endmëna mo canÿe bëts jajañe nduiñcá. Chë nduiñna canÿe te cabá cachëse yojábocna peonga janguanguama, chabe uvas betiyënga jajañe chamotrabajama. ²Chë nduiño peonga yojánÿena orna, imojenóyeunaye canÿe tescama canÿe denario crocénana jtëbuénayama. As chora yojichamuá chë uvas betiyënga jajoye jatrabájama. ³Mo base mošenana ora, chë nduiño cachiñe yojábocna y plazoca atsanënga ínÿenga yojanÿe, tondaye ntsamcá. ⁴As yojáuyana: ‘Tšëngaftángnaca atšbe uvas betiyënga jajoye motsajna jatrabájama y ntšamo chašmojamcá cbochtëbuénaye ca.’ Y chë entsanga imojá. ⁵Nÿetsto ora y bëts mošenana ora, chë nduiño cachiñe yojábocna y cachiñe cachcá yojopása. ⁶Mo la cinco ora, chë nduiño cachiñe yojábocna y chenache ínÿenga yojánÿena, tondaye ntsamcá. As yojátjaye: ‘¿Ndáyeca tšëngaftanga nÿets día ntjatrabajacá muentše šmotsomñe ca?’ ⁷Y chënga imojojuá: ‘Ndocná bënga chešnataimpadá causa ca.’ As chë nduiño yojáuyana: ‘Tšëngaftángnaca

atšbe uvas betiyënga jajoye motsajna jatrabájama y cbochtëbuénaye ca.’

⁸“Y ya bien jetiñe yojtsemna orna, chë nduiño chabe caporálbioye ibojauyana: ‘Peonga metsachembo y cochtëbuénaye. Chë ústonoye tmojáshjajnënguentšana cochjabojátša y chë natsana tmojáshjajnënga ústonoye ca.’ ⁹Y chë mo la cinco ora imojáshjajnënga imojobeconá, y cada ona canÿe denario crocénana yojtáyentšbuachiye. ¹⁰Chentsana, chë natsana jatrabájama imojáshjajnënga yojtsamna jobéconama y chënga imojëtsejuabnaye más crocénana mochjanóyëngacñe ca. Pero chëngnaca cach canÿe denario crocénana yojtëbuénaye. ¹¹Chca imojóyëngacñe orna, chënga imojóntša chë nduiñbiana bacá ichámuana, ¹²mëntšá: ‘Quemënga chë ústonoye tmonjáshjajnënga nÿe canÿe horatema tmonjatrabajá; ntšamo bënga šcontëbuenacá, cachcá chënga contëbuená y bëngna nÿets día jabuache fsënjatrabajá y corente jënÿá fsënjauantá ca.’

¹³“Pero chë nduiño canÿa chca yojtsichamuábioye ibojojuá: ‘Sobreno, acbiana ndocna ndoñe tšabe soye chiyatsma. ¿Ndoñe canÿe denario crocénana canÿe tescama tbonjenoyeuná ca?’ ¹⁴Chcasna, acbe uacanana crocénana mesocñe y motsatoñe. Atše séntseboše chë ústonoye jatrabájama tojashjanguá jtabuénayana, cachcá ntšamo aca tbojtabuenacá. ¹⁵Chca entsemna, er atše sëndobena atšbe crocénánaca nÿe ndayánaca jamana. ¿O aca envidia cojtsebmna, atše tšabia tsmënama ca?’” —cha yojayana.

¹⁶Chora Jesús tojánayana: “Y chca, chë mora nduámanënga imomnënga, uámanënga mochántsemna; y chë mora uámanënga imomnëngna, nduámanënga mochántsemna ca.”

Jesús cachiñe tojánayana cha jóbanama y jtayenama

(Mc 10.32-34; Lc 18.31-34)

¹⁷ Chënga Jerusalenoye imojtsaye ora, Jesús barie tojánachembo chabe bnétsana uta uatsjédayënga y tojanéyana: ¹⁸ “Tšëngaftanga šmontsonýá mora bënga Jerusalenoye montsajnama. Chocna chë Bëngbe Bëtsá Entšá tbojanbemá, chë bachnangbe amédayënga y ley abuátambayëngbe cucuatšíñe mochanjáboshjona, y chënga mochanjayana jóbanama cha ibojtsemna ca, ¹⁹ y chë ndoñe judiëngbe cucuatšíñe mochanjáboshjona chënga chamotsáboyeyuanama, chamotjanjama y chamocrucificama. Pero unga tianoye cha echántayena ca” —Jesús tojánayana.

Chë Santiago y Juanbe mamabe impadana soye

(Mc 10.35-45)

²⁰ Chentšana, Zebedeobe uaquiñatbe mamá chabe uaquiñataftaca Jesúsbiyoye tojanobeconá, chabe shecuatšentšë yo-joshamentšiyey canýe pavorama jaimpádama. ²¹ As Jesús tbojantjá: —¿Ndayá cojtsebošë ca?

Y chë shembása tbojanayana: —Aca reycá chacojtsemánda ora, cochjamánda atšbe uaquiñata chabótbema canýa acbe catšbioica y chë inýa acbe uañicuayoica, ácaftaca chabotsemándama ca.

²² Y Jesús tojanéjua: —Ntšamo šmontsotjanañama, tsëndata ndoñe quešnátsatšëmbo ca. Ntšamo atšë chjasufriacá, ¿tsëndátnaca cachcá jasúfriama tašatjobenaye ca?

Y chata tbojanjúá: —Añíe, fchanjobenaye ca.

²³ Chora Jesús tojanéjua: —Ndegombre, tsëndátnaca atšcá šochanjasúfria, pero atšë ndoñe quetsátobena jamándana atšbe

catšbioica o atšbe uañicuayoica chašótbemama. Chë útentšë entsemna ndëmuanyëngbiama atšbe Taitá tojaprontacá ca.

²⁴ Chë inýe bnétsana uatsjédayënga chca tmojanuena ora, chë uta catšátaftaca tmojanotjayaná. ²⁵ Chora Jesús chë uatsjédayënga tojánachembo y tojanéyana: —Tšëngaftanga šmondétatšëmbo, chë ndoñe judiëngbeñe chë reyënga lempe jtsemándayana nýa mo nduiñënga cuaftsemncá; y chë bëtsëtsa entšangna chëngbe obenánaca jtsemándayana, ndayánaca jtsamëse, chë inýe entšanga sempre chamotsayaunanama. ²⁶ Pero tšëngaftangbeñna ndoñe chca chaondésemna. Inýetšá; masna, nda tšëngaftanguentšë chë más uamaná jtsemnana tojtsebošá bontsemna chë inýenga jtsaservénana. ²⁷ Y ndánaca tšëngaftanguentšá chë más uamaná jtsemnana tojtsebošá bontsemna jtsemnana mo nýe inýabiama nýets tempo oservenacá. ²⁸ Cachcá, chë Bëngbe Bëtsá Entšá tbojanbemá ndoñe chenátabo cha chamotseservénama, ndayá inýenga jabáserviama. Y mo nda inýenga játsebacama cuafjëtšajocá, cha echanjóbana, ba entšanga atsebácanënga chamotsemnana ca —Jesús tojánayana.

Jesús uta jtanata tojanashná

(Mc 10.46-52; Lc 18.35-43)

²⁹ Chënga, Jericó bëts pueblentšana tmojánbocana ora, ba entšanga Jesús imojtséstona. ³⁰ Uta jtanata benache juachañe ibnatbemana. Jesús chëjana yojtšachñëjuanama chata tbojanuena ora, tbojanontšë uayebuáchana: —¡Utabná, Davídbentšana Entšá, šmotsalastemá ca!

³¹ Entšanga chë jtanátbiyoye tmojtšanëcácana iyteca chabotsemnana, pero

chatna más ibojtsáyebuache: —¡Utabná, Davidbentsana Entśá, śmotsalastemá ca!

³² As Jesús yojotsaye, chë jtanata tojánachembo y tojanatjá: —¿Ndayá šojtseboše atše tsëndatbiamá chjamama ca?

³³ Y chata tbojanjuá: —Utabná, bëndata chabuatëbínýnama ca.

³⁴ Jesús chatbiamá tbojanongmé y tojánabuchbojajo. Cachora chë jtanata tšabá yojtëbinýna y Jesús tmojanasto.

Jesús Jerusalenoye tojánashjango

(Mc 11.1-11; Lc 19.28-40; Jn 12.12-19)

21 Ya Jerusalenoca béconana imojtsemna y canýe pueblo Betfagé ca uabáinoca tmojánashjango, canýe tjashe Olivos ca uabáinentše. Chora Jesús uta chabe uatsjéndayata tojanichamó, ² y mëntśá tojanéyana: “Tsëndatbe natsana entsemna base pueblotémoye mot-sata. Cachora canýe burrá utsbuaná šochanjínýena y cháftaca canýe burrotema echántsemna. Šochjuajafjoná y šochjuánatse. ³ Nderado nda ndayánaca chacmojáuyanése, šochjauyana: ‘Bëngbe Utabná bontsájaboto y chentsána camuentše echanjabáisabashejuana ca.’”

⁴ Chca tojanopasá, cachcá chaotsemnana ntšamo chë Bëngbe Bëtsabe juabna oyebuambnayá tojanayancá. Cha mëntśá tojanábema:

⁵ Jerusalén bëts pueblentše oyenënga méyana:

“Minýënga, tšëngaftangbe Rey chentše tšëngaftangbiyoye entsabó,

ndonë mo canýa cachá bëtsá enobiamnayacá; canýe búrrbeñe enjaquená;

canýe burrotémiñe, canýe uatrabájaye bayabe šëšónbeñe ca.”

⁶ Chora chë uatsjéndayata tbojána y tbojanma ntšamo Jesús tojanamëndacá.

⁷ Chë uatsjéndayatna chë burrá y chë burrotema tmojanënatse, entsáyëjuangá chátbeñe tbojanátatse y chora Jesús chábeñe tojanenoyayé. ⁸ Bëtscá entsanga

chëngbe entsáyá chë benachëjana imojtsëtétsatsana, y inýengna betiyeshënguñe buacuafjënga imojtsetcoye y chiñe imojtsequëcñá. ⁹ Y chë natsana imojtsajñënga y chë ústonoyënga mëntśá imojtsaiuáyebuache: “¡Rey Davidbentsana Entśá matschuanga ca! ¡Corente benedición bonná, chë Bëngbe Utabnabe obenánaca tojabá! ¡Bëngbe Bëtsá celocá matschuanga ca!”

¹⁰ Jesús Jerusalenoye tojánamashëngo ora, nyetsca entsanga imojtsenbouenana y banga imojtsenotíciaye: —¿Nda mua yojtsemna ca?

¹¹ Y chë entsanga imojtsëjuana: —Chë Bëngbe Bëtsabe juabna oyebuambnayá Jesús, chë Galileoca pueblo Nazaretocá ca.

Jesús, Bëngbe Bëtsabe bëts yebnentsána enënga y obuámnyënga tojtanëbuacna

(Mc 11.15-19; Lc 19.45-48; Jn 2.13-22)

¹² Chentsána Jesús, Bëngbe Bëtsabe bëts yebnoye tojánamashëngo y chë entsanga chentše imojtsena y imojtsobuámnañënga chentsána tojtanëbuacna. Chéntšnaca imojtsemna entsanga canýe crocénana enënga, y chë crocénana nýe Bëngbe Bëtsabe bëts yebnentsáma inoservená. Chëngbe mesëshangá tojtsanenásatajchquëca y chë palomatema enëngbe tšëñëšëngnaca. ¹³ Y tojanéyana: “Bëngbe Bëtsabe uabemana palabrënguñe cha mëntśá tojánayana: ‘Atšbe bëts yebna echantsabaina átšeftaca encuëntaye yebna ca’; pero tšëngaftangna, atbëbanëngbe oyeníñe chë yebna šmojtsebema ca” —Jesús tojanéyana.

¹⁴ Chentsána, Jesús yojtsemnoye Bëngbe Bëtsabe bëts yebnentše, jtanënga y coshetënga tmojanobeconá, y cha tojanashná. ¹⁵ Chë bachnangbe más uámána amëndayënga y ley abuatambayënga, Jesús bëts

soyënga yojsamama tmojáninÿe ora, y chë basetémënga Bëngbe Bëtsabe bëts yebnentšë imojt-sayebuáchama tmojanuena ora, tša tmojanotjáyana. Chë basetémënga mëntšá imojtsáyebuache: “¡Chë Rey Davídbentšana Entšá matschuanga ca!”¹⁶ As Jesús tmojaniana: —¿Ntšamo chë basetémënga montsichamcá quectsuenana ca?

Y Jesús tojanéjua: —Añe, séntsuenana. Pero, ¿tšëngaftanga Bëngbe Bëtsabe uabemana palabrenguine chë soyama ndoñe šmëndualía? Chiñe mëntšá endayana:

Chë basetémënga y ochóchaye šësonatémëngbe canténgaca aca tcojama entšanga chacmotsatschuana ca.

¹⁷ Chora Jesús chënga tojésanabashejuana y Jerusalenentšana Betania puebloye tojtsanoñe; y chentšë chë ibeta tbojánbobinÿna.

Jesús tojánayana canÿe higo betiye ndoñe más chaondëšhájona ca

(Mc 11.12-14, 20-26)

¹⁸ Chë te cachëse, Jesús cach bëts puebloye tojtésa ora, tbojánishëntsena.

¹⁹ Chora canÿe higo betiye benache juachaca yojinÿe; as choye yojobconá, pero nÿe ena tsbuanáchënga chiñe yojínÿena. As Jesús chë higo betiyoje tojánayana: “¡Ndocna te más chacondëšhájona ca!” Y betscó chë higo betiye tojtsanbuashá.

²⁰ Chë uatsjéndayënga chca tmojáninÿe ora, imojenjnaná y Jesús tmojantjá: —¿Ntšamo chca chë higo betiye canÿe ora tojtsebuashá ca?

²¹ Y Jesús tojanéjua: —Ndegombre cbéyana, tšëngaftanga Bëngbe Bëtsabeñe ošbuáchiyana šmojtsebmna y chabiamana ainaniñe ndoñe inÿetšá šmonjatsjuabnase, šmochantsobena jamama ndoñe nÿe ntšamo atšë

quem higo betiye ca sënjamcá, sinó quem tjoye, “muentšana mojuaná y uafjajónayoye moshbuetšë ca” šmojayanëse, chca jochnënguana. ²² Y Bëngbe Bëtsaftaca chašmojtsencuënta ora, chábeñe jtsošbuáchiyëse, lempe ntšamo chašmojtjañcá šmochanjóyëngacñe ca —Jesús tojánayana.

Jesusbë obenana

(Mc 11.27-33; Lc 20.1-8)

²³ Chca tojanopasá chentšana, Jesús Bëngbe Bëtsabe bëts yebnoye tojánamashëngo. Chentšë yojsabuátambantscuana, bachnangbe amëndayënga y judiëngbeñe bëtsëjemëngcá amëndayënga tmojanobobconá y tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda mando tcmënjatšá ca?

²⁴ As Jesús mëntšá tojanéjua: —Atšnaca canÿe soye séntsebmna tšëngaftanga jatjayama, y quešmojuase, átšnaca cbochjáuyana ndaye deréchoca atšë chca stsama. ²⁵ ¿Nda Juan chë Ubayaná tbojanichmó entšanga jubáyama, Bëngbe Bëtsá o entšanga ca? —Jesús tojanéyana.

Chama chënga tmojanontšë mëntšá enatsëtsnayana: “Bëngbe Bëtsá ca’ chamojuase, cha šochanjáuyana: ‘As, ¿ndáyeca chë tmojanabuayená soyënguine ndoñe šmonjanošbuaché ca?’ ²⁶ Pero ndoñe quemúatobena jayanana ‘entšanga ca’; muentšá entšangbiama bënga montsauatja, er nÿetscanga mondëjuabná Juan ndegombre Bëngbe Bëtsabe juabna oyebuambnayá yomna ca.” ²⁷ Chcasna chënga Jesús tmojanjuá: —Bënga ndoñe queftsátstšëmbo ca.

Y as Jesús tojanéyana: —Atšë cach ndoñe quebochatéyana ndaye deréchoca chca stsama ca.

Chë uta uaqiñábiama cuento

²⁸ Chora Jesús entsanga tojanatjá: —¿Ntsámo tsëngaftanga quem soyama šmatjayana? Canÿe boyabása uta uaqiñata yojánabamna, y cánÿabioye ibojauyana: “Uaqiñá, mënté motsa atšbe uvas betiyënga jajoye jatrabájama ca.” ²⁹ Chë uaqiñá ibojuá: “¡Jama ndoñe quetsátsboše ca!” Pero botamana yojenójuaboye y pronto choye yojá. ³⁰ Chentsana chë taitá chë inÿe uaqiñábioye cachcá ibojauyana. As cha ibojuá: “Arseñor, aïne chanjá ca.” Pero ndoñe yonjá. ³¹ ¿Chë útatentsana ndëmuanyá tojanma ntsámo chë taitá yojabošcá ca? —Jesús tojanatjá.

Y chënga tmojanjuá: —Chë natsaná ca.

Chora Jesús tojanéyana: —Ndegombre cbéyana, chë Romocama entsángbioye impuesto atjanayënga y chë bacna vida bomna shembásenga, tsëngaftangbiama más montseprontana Bëngbe Bëtsabe amëndayoye jamashënguama. ³² Juan chë Ubayaná tonjánabo tsëngaftanga jábuayenama ntsámo jtsiyenana cmamna, ntsámo Bëngbe Bëtsá yobošcá, y tsëngaftanga chë tmojanabuayená soyënguine ndoñe chešmatanošbuaché; y chë cuenta, chë Romocama entsángbioye impuesto atjanayënga y bacna vida bomna shembásengna aïne chábeñe montsanošbuaché. Y tsëngaftanga, masque ntsámo chënga Bëngbe Bëtsábeñe imojtsošbuáchema lempe šmojinÿëse, chë juabnayana ndoñe šmonjatrocá, chábeñe jtsošbuáchiyama ca —cha tojanéyana.

Chë puerte bacna trabájayëngbiama cuento

(Mc 12.1-12; Lc 20.9-19)

³³ Mëntšánaca Jesús tojánayana: “Inÿe cuento šmochjatuena

chašmuatsjínÿama: Canÿe jajañe nduiño uvas betiyënga yojáje y chë shëconana yojajétja. Chë uvasëšangá juantsëtetjiamna canÿe base luare yojajutjo y canÿe tsbanana jebna soye yojapórma chentše jtsaishanÿama. Chentsana, inÿe trabájayënga chë jajañe yojárrendaye y chana inÿe luaroye yojtsoñe. ³⁴ Chë uvasëšangá juashacama tempo yojobuache orna, chë jajañe nduiño básefta oservënënga yojichamuá chë arrëndayënga jáuyanama ntsachetsá chë nduiño ibojtsotocánama. ³⁵ Pero chë arrëndayëngna chë oservënënga imojishëche: inÿengbioyna imojtsajantšetaye, inÿengbioye imojtsëbaye y chë inÿengbioyna ndëtsbëngaca imojtsatëchénganja. ³⁶ As chë jajañe nduiño chë natsanama más ba oservënënga yojichamuá. Pero chë arrëndayëngna, ntsámo chë natsanëngaftaca imojamcá, cachcá chora imojama.

³⁷ “Cabana, chë jajañe nduiño cachabe uaqiñá ibojíchmua; as mëntšá yojtsejuabnaye: ‘Atšbe uaqiñá cocayé mochanjóyeunaye ca.’ ³⁸ Pero chë arrëndayënga chë uaqiñá imojinÿe orna, imojeniyana: ‘Mua chë fshantse nduiñbe uaqiñá entsemna. Lempe chabe soyënga mua echanjóyëngacñe. Cuajna, motsóbanga y lempe chabe otocana soyënga bëngbiama echanjoquéda ca.’ ³⁹ As chë uaqiñá imojishache, chë uvas betiyënga jajañentsana imojtsábocna y imojtsóba.”

⁴⁰ Chca jacuéntama tojanpochocá orna, Jesús tojánayana: —Y morna, chë jajañe nduiño chaojabo ora, ¿ntsámo šmojtsejuabná chë arrendayëngaftaca cha yochjama ca?

⁴¹ Y chënga tmojanjuá: —Chë puerte bacna arrëndayënga ni mo batšatema ntjalastemaycá echantsëbaye. Chë jajañe inÿenga echanjárrendaye y chë

uvasëshangá juashacama tempo chao-
jobuache ora, ntšamo chë nduiño chabo-
jtsotocancá chënga mochantíyie ca.

⁴²Chora Jesús tojánayana:
—¿Tšëngaftanga ndocna te Bëngbe
Bëtsabe uabemana palabra šmëndualía?
Chiñe mëntšá endayana:

Chë yebna jebuanënga tmojtsanaboté
ndëtšbé,
mora chë más bëts uashacuanëšëntše
entsejájona.

Chë soye Bëngbe Utabná, Bëngbe Bëtsá
chca tojama,
y bënga chama ojanánënga fséntsemna
ca.

⁴³Ntšamo chë nduiño chë arrëndayënga
chë fshantse echántsabaca y ínÿenga
echantsatšataye y chënga chabiana
bëtscá shajuana mochanjatbanacá,
cachcá, Bëngbe Bëtsabe amëndayana
tšëngaftangbentsana mochantsejuána
y ínÿengbioye mochantšatšataye.
Chënga Bëngbe Bëtsabe soyëngama
mochanjouena y chë soyëngama
ínÿengbioye mochanjabuayená, Bëngbe
Bëtsabe amëndayoye jamashënguama.

⁴⁴Ndánaca chë ndëtšbeñe chaojotsatšá,
chëbé bochántsatcacaye; y chë ndëtšbé
ndábeñnaca chaojótšatše, polvëshe
bochántsebema ca —Jesús tojánayana.

⁴⁵Chë bachnangbe amëndayënga y
fariseunga, Jesús chë jabuátambama
cuentënga yojtsëtsëtsnama, tmojanenó-
tatšëmbona chëngbiama chca yojtsóye-
buambnama. ⁴⁶Chora chënga tmoján-
bošena Jesús jishachana, pero entšang-
biama imojtsauatja; chënga imojan-
juabná Jesús Bëngbe Bëtsabe juabna
oyebuambnayá yojamna ca.

Chë casamento fiestama cuento

(Lc 14.15-24)

22 Chentšana Jesús tojanontšé
cachiñe cuentëngaca chënga
jabuátambana. Mëntšá tojánayana:
²“Cbochanjáuyana ntšamo Bëngbe

Bëtsabe amëndayana yomnana.
Endmëna mo ntšamo canÿe réyefata
tojanopasacá. Chë rey yojamánda canÿe
bëts fiesta jamama, chabe uaquiñabe
casamentama. ³Chora chë rey chabe
oservënënga yojichamuá chë ófjanënga
jobiatšama, pero chë ófjanënga
ndoñe imonjouena jama. ⁴As chë
rey inÿe oservënënga yojichamuá y
mentšá yojámëndaye: ‘Chë ófjanënga
šmochjáuyana, ya saná stseboprontana
ca. Sëñjamandá, atšbe uacnënga
y uamna bayënga minÿicánënga
jobáyama y lempe entseprontana; y
chamuabo chë casamento fiestama ca.’

⁵“Pero chë ófjanënga ndoñe
imonjouena. Canÿa, cachabe fshantse
inabomnoye yojtsoñe; ínÿana
chabe obuámnayíñe trabajuama
yojtsoñe; ⁶y ínÿengna, chë reybe
oservënënga imojishëche, jabuache
imojtsatsetšenaye y imojtsëbaye. ⁷Y
chë rey chë soyama yojouena ora,
corente ibojtsetna. As chabe soldadënga
yojichamuá chë oservënënga
obánayënga chamuetsëbáyama y
chëngbe bëts pueblo jetsángbotjuama.

⁸Chora chabe oservënënga yojáuyana:
‘Lempe entseprontana chë casamento
fiestama, pero chë ófjanënga
ndoñe quenjatëmerecena moye
jabama. ⁹Motsajna tsashenangoye y
ndëmuanÿëngnaca chašmójánÿenënga,
chë casamento fiestama šmochjúbuaja
ca.’ ¹⁰As chë oservënënga tsashenan-
goye imojábocana y nÿetscanga
imojánÿenënga imojáchembo, cánÿiñe
tšabe y bacna entšanga, y chca,
chë tsbocnanoica jútjena yojtsemna
entšángaca.

¹¹“Chë ófjanënga jánÿama chë rey
yojámashëngo ora, chentše cánÿabioye
ibojinÿe y chana ndoñe yontsemna
ntšamo canÿe casamento fiestama
endbetsemncá uichëtjoná. ¹²As chë rey
ibojauyana: ‘Sobreno, ntšamo canÿe

casamento fiestama endbetsemná ndoñe quecatichétjona. ¿Ntšamo chca moye tojamáshëngo ca?’ Pero chë boyabásana nÿe iytëca yojtsemna. ¹³ As chë rey chë fiestentše ujuatšnayënga yojámëndaye: ‘Shecuatše y cucuatše motsebatsëca y chë ndëbinÿna luaroye, infernoye motsábocna. Chentše puerte echanjenóbošachna y chë tsetšanama juatsašënga echantsenoftëšjojnaye ca’ —cha yojayana.”

¹⁴ Jesús chca jacuéntama tojanpochocá ora, mëntšá tojánayana: “Chë fiestama ófjanënga banga montsemna, pero chë bocacánënga choca jtsemnama nÿe báseftanga. Er Bëngbe Bëtsá banga jáchembuana chabe amëndayoye jamashënguama, pero nÿe báseftanga choca mochántsemna ca.”

Chë Romoca bëts mandadbiama impuesto jtsatsquécjnyama

(Mc 12.13-17; Lc 20.20-26)

¹⁵ Chentšana chë fariseunga tmojtstanoñe y tmojanenoyeuná ntšamo Jesús tojayaniñe cha jisháchichiyana, as chca, mandadéngbeñe cha mal jaquédama.

¹⁶ Chama chënga tmojanichamó básefta cachëngbe usetonënga y ínÿengna Heródesbe ústonënga, Jesús jauyanama: —Buatëmbayá, bënga fsëndétatšëmbo aca ndegombre soyënga cnetsabuátambama y contsabuatambá ndegombre tšabe vida jtsebomnama, ntšamo Bëngbe Bëtsá yomandacá, y ndoñe jatuenanana nÿe ntšamo entsãnga tmojatichamcá, er acbiama tondaye quenatámana nda más uamaná o nduamaná tomnana. ¹⁷ Chcasna, ¿ntšamo catjájuaboje? ¿Tšabá tayojtsemna, César, chë Romoca bëts mandadbiama, bënga impuesto jtsatsquécjnyana o ndoñe ca?

¹⁸ Jesús yojtsetátšëmbo chëngbe bacna juabnëngama; chíyeca tojanéyana: —Bacna entsãnga,

ntšamo ndegombre šmojuabnacá ndinÿinÿnayënga. ¿Ndáyeca

tšëngaftanga šmojtseboše chë sóyeca atše jisháchichiyama? ¹⁹ Chë šmatsquécjná crocénana šminÿinÿé ca.

As canÿe crocénana tmojanoyé. ²⁰ Jesús tojanatjá: —¿Ndabe jubíá quem crocënaníñe yojtsemna, y ntšamo muentše entsabemancá nda chca iuabaina ca?

²¹ Y chënga tmojanjuá: —Césarbe jubíá; cha chca enduabaina ca.

As Jesús tojanéyana: —Césarbioye šmochtoyiye cha ibotocana soye; y Bëngbe Bëtsana cha ibotocana soye ca.

²² Chënga chca tmojanuena ora, ojnanánënga imojtsemna. As chënga cachcá Jesús tmojanonÿá y tmojtsatanoñe.

Obanënga jtayenama Jesús tmojantjá

(Mc 12.18-27; Lc 20.27-40)

²³ Báseftanga judiëngbe amëndayënga, saduceos ca uabáinënga, imojuabná chë obanënga ndocna te ntayenana ca. Cach te, chë impuestama Jesús tojanoyebuambá te, básefta saduceunga tmojána y mëntšá tmojantjá: ²⁴ —Buatëmbayá, Moisés tojánayana nderado canÿe boyá tojóbana básënga ntjëftsabashejuancá, ana chabe uabentsá jtsemnana chë shëmaftaca jtobouamayana, chca, chabe uabochená obanabiama básënga jtsabamnama ca. ²⁵ Chcase, canÿe béngbentše canÿsëfta catsátanga monjamna. Chë natsaná tonjanobouamá y tontsanóbana. Básënga ndoñe quenjátabamna, chíyeca chë shemna chë uabentsáftaca tontanobouamá. ²⁶ Y cháftaca cachcá tonjanopasá, chë inÿe uabentsáftaca cachcá, y cachcá chë ínÿëngaftaca y chë ústonoca uabentsáftacnaca. ²⁷ Y chentšana chë shembásanaca tontsanóbana. ²⁸ Y morna, chë obanënga chamojtayena ora,

¿ndabe chë canÿsëfta catsatanguentsäbe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁹ As Jesús tojanéjua: —Ntšamo tšëngaftanga šmonjayancá ndmëncá šmontsoyebuambná, Bëngbe Bëtsabe uabemana palabra, ni chabe obenanama ndoñe quecmátësertana causa. ³⁰ Chë obanënga chamojtayena ora, ni boyabásenga, ni shembásenga quemochatóbouamnaye, y chca, chënga mochántsemna mo celoca angelotemëngcá. ³¹ Y chë obanënga jtayenamna, ¿ndoñe šmëndualía ntšamo cach Bëngbe Bëtsá chabe uabemana palabrenguñe tojánayanama? Cha tojánayana: ³² “Atše sëndmëna Abraham, Isaac y Jacobëbe Bëtsá ca.” Bëngbe Bëtsá chca jayanëse entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena ca —Jesús tojánayana.

³³ Chë entsanga chca tmojanuena ora, ojnánanënga imojtsemna ntšamo Jesús yojsabuátambama.

Chë más bëts uámana mando

(Mc 12.28-34)

³⁴ Jesús chë saduceúngbioye iytëca tojánabiamama fariseunga tmojántatšëmbona ora, chënga tmojánenefjna, ³⁵ y canÿa chënguentsá, ley abuatambayá, Jesúsbioye jisháchichiyama tbojantjá: ³⁶ —Buatëmbayá, ¿Moisesbe ley-ñe ndayá chë más bëts uámana mando yomna ca?

³⁷ As Jesús tbojanjuá: —“Utabná Bëngbe Bëtsá cochtsebobonshana nÿets acbe ainánaca, nÿets espíritoca y nÿets juábnaca.” ³⁸ Chë soye

endmëna chë más bëts uámana mando y nÿetsca mandëngama chë natsanoca entsemna. ³⁹ Y quem inÿe soye, chë natsana mandcá endenoparecena. Endayana: “Ndëmua entsánaca cochtsebobonshana, ntšamo cach aca cuenobobonshancá ca.” ⁴⁰ Chë uta mandentsana endóbcana lempe ntšamo Moisesbe ley-ñe endayancá y ntšamo chë Bëngbe Bëtsabe juabna oyebuambnayënga mondbetsabuátambacá ca —Jesús tbojanayana.

¿Cristo, ndabe entsábentsana yomna?

(Mc 12.35-37; Lc 20.41-44)

⁴¹ Chë fariseunga cabá cachentše imojtsemnëntscuana, ⁴² Jesús tojanatjá: —¿Ntšamo šmojtsejuabná chë Bëngbe Bëtsabe Uámana Uabuayanabiamama, chë Cristo? ¿Ndábentsana cha iuabó ca?

Y chënga tmojanjuá: —Davidbentsana ca.

⁴³ As Jesús tojanéyana: —¿Ntšamo chca nántsemna, cach David, chë Uámana Espíritbe mándoca, Cristbioye Utabná ca tbojtsabobuátmëse? David mëntšá tojánayana:

⁴⁴ Bëngbe Bëtsá, atšbe Utabná Cristbioye tbojanayana:

atšbe catsbioica mótbema, atšbe obenánaca acbe uayayënga acbe cucuatšñe chamoquedama chjamëntscuana ca.

⁴⁵ ¿Ntšámose Cristo, Davidbentsana Entšá nántsemna, cach David “Utabná ca” chábioye tbojtsabobuátmëse ca? —Jesús tojanatjá.

⁴⁶ Chora ndocná tonjanobená ni mo canÿe palabra jojuana. Y chë tes-cana ndocná yonjennëmua Jesús más jatstjanayama.

**Jesús chë fariseungbiana y ley
abuátambayëngbiana tojánayana,
chënga ndoñe tšabá montsama ca**

(Mc 12.38-40; Lc 11.37-54; 20.45-47)

23 Chora Jesús, entšanga y chabe uatsjëndayënga mëntšá tojanéyana: ²“Chë fariseunga y chë ley abuátambayënga cmondbétsabuatambaye ntšamo Moisesbe leyënguine iuayancá. ³Chcasna, tšëngaftanga cmontsamna chënga joyaunayana y ntšamo tcmojauyancá, cachá jtsamana. Pero ndoñe šmattsama ntšamo chënga mondbetsamcá, er chënga ndoñe ntsamana ntšamo mondbetsabuatambacá. ⁴Mo canye entsá, couáybioye uauta uasmanésha juasmayana y cachá tondaye tontsasmancá, chënga entšanga jtsamëndayana bëtscá mandënga chamotsocumplínama, pero cachënga ni mo batsatema ntsamana chë mandënga jtsocumplínama. ⁵Chënga lempe jtsamana nye entšanga chamotsénýama. Chënga chë ínýëngbiana más Bëngbe Bëtsá imobobonshana ca chamotsejuabnama, chënga monduamana tëntša sëndachëjënguine juabemana ntšamo Bëngbe Bëtsabe uabemana palabrënguine endayancá, y juentsaca y buacuatšinë chëjënga jenábatsëcana y sibiajana nya tëntša uasebtonanëjuangá jtsichétjonana. ⁶Chënga jtsebošana chë fiestënguine nya quëfseroca jtsetbíamanama, y chë judiëngbe enefjuana yebnënguenache chë más uámana luarënguine. ⁷Chënga jtsebošana tsáshenañe entšanga nya respétoca chamotsacheuanama, y ‘abuátambayënga ca’ chamotsachembuanámnaca chënga jtsebošana. ⁸“Pero tšëngaftangna ndoñe šmattseboše entšanga ‘abuátambayënga ca’ chacmotsachembuanama, er

nýetsca tšëngaftanga mo catšatangcá šmondmëna, Bëngbe Bëtsábeñe betsošbuachéyeca, y nye canya endmëna tšëngaftangbe Buatëmbayá. ⁹Tšëngaftanga ‘taitá ca’ chë ley abuátambayënga šmondbétsachembuana, pero tšëngaftanga ndocna quem luarentšá ‘taitá ca’ šmattsechembuana; tšëngaftanga nye canye Taitá šmond-bomna, chë celoca endmëná. ¹⁰Ndoñe šmattseboše entšanga ‘mándayënga ca’ chacmotsachembuanama; er nye canye Mandayá endmëna y cha Cristo endmëna. ¹¹Nda tšëngaftangbeñe chë más uamaná tojtsemná bontsemna chë ínýënga jtsaservëna. ¹²Nda cachá bëtsá tojtсенobiamná, nduamaná mochántsebema; y nda cachá nduamaná tojtсенobiamnana, más bëtsá mochanjábema.

¹³“;Tša lastema tšëngaftangbiana, bacna entšanga ntšamo ndegombre šmojuabnacá ndinýinýayënga fariseunga y ley abuátambayënga! Tšëngaftanga šmontsama entšangbiana puerte totcá chaotsemna Bëngbe Bëtsabe amëndayoye jamashënguama, mo bëšáša cuaftsebiatamiancá. Pero ni cach tšëngaftanga choye quešmátamashjuana, ni ínýënga choye jamashënguama bošëngbioye chama quešmátalesenciana. ¹⁴;Tša lastema tšëngaftangbiana, ntšamo ndegombre šmojuabnacá ndinýinýayënga fariseunga y ley abuátambayënga! Tšëngaftanga chë viudángbioye chë tmobomna soyënga jtsabacayana, y entšangbe delante tšabá chacmotsénýama y chënga šmojtsaíngñayama ndoñe chamondëtsetatšëmbuamna, Bëngbe Bëtsáftaca tša jtsencuéntayana. Chë causa, Bëngbe Bëtsá tšëngaftanga más jabuache ínýëngbiana cmochanjácastigaye.

¹⁵“;Tša lastema tšëngaftangbiana, bacna entšanga ntšamo ndegombre

šmojuabnacá ndinýinýnayénga fariseunga y ley abuátambayénga! Tšéngaftanga ba luarénguenache jtsajnana canýa tšéngaftangbe ustoná onguayiñe, y šmojínýena ora, tšéngaftanga jamana cha chaotsemna tšéngaftangbiamana uta soye más merecido buajoná infierno chaotsama.

¹⁶“;Tša lastema tšéngaftangbiamana; tšéngaftanga šmondmēna mo jtanénga entsānga unachayéngcá! Tšéngaftanga šmondbétsichamo: ‘Nda ínýabioye tbojašbuachená ndayánaca jamama y tojayana chē Bēngbe Bētsabe bēts yebnama chca jamama ca, cha ndoñe ntsemnana chē tbojašbuachená soye jamama ca. Pero chē Bēngbe Bētsabe bēts yebnentša castellanama cha tojajurasna, aínē jtsemnana chē tbojašbuachená soye jamama ca.’

¹⁷¡Obějémēnga y nduabínýnēnga! ¿Ndayá más uámana soye yomna, chē castellano o Bēngbe Bētsabe bēts yebna? Chē castellano Bēngbe Bētsabiamana josérviamana jtsemnana, nýe Bēngbe Bētsabe bēts yebnoca chē castellano tojtsemnayeca.

¹⁸Tšéngaftanga mēntšánaca šmondbétsichamo: ‘Nda ínýabioye tbojašbuachená ndayánaca jamama y tojayana chē altarama chca jamama ca, cha ndoñe ntsemnana chē tbojašbuachená soye jamama ca. Pero chē Bēngbe Bētsabiamana altaroca tojtsejájona soyéngama tojajurasna, aínē jtsemnana chē tbojašbuachená soye jamama ca.’ ¹⁹¡Nduabínýnēnga! ¿Ndayá más uámana soye yomna, chē Bēngbe Bētsabiamana tmojacjá soyénga o chē altar? Chē tmojacjá soyénga Bēngbe Bētsabiamana josérviamana jtsemnana, nýe chē altaroca chē soyénga tmojacjáyeca. ²⁰Nda chē altarama tojajurá, ndoñe nýe chē altarama ntsejúrayerana. Lempe chē altar juatsboca tojtsemnámna cha jtsejúrayerana.

²¹Nda Bēngbe Bētsabe bēts yebnama tojajurá, ndoñe nýe Bēngbe Bētsabe bēts yebnama ntsejúrayerana. Bēngbe Bētsabiamana cha jtsejúrayerana, cha chē chentše oyená. ²²Y nda celocama tojajurá, chentše reycá Bēngbe Bētsabe tbemaniñama cha jtsejúrayerana y cachora Bēngbe Bētsabíamnaca, chentše yotbemanabiamana.

²³“;Tša lastema tšéngaftangbiamana, bacna entsānga ntšamo ndegombre šmojuabnacá ndinýinýnayénga fariseunga y ley abuátambayénga! Tšéngaftanga Bēngbe Bētsabiamana jtsequécjayerana chē jajañentša sananga bnétsanentsāna canýe soye; chē binche matatémēnga menta, anis y chē cominentša sanágnaca. Pero tšéngaftanga nýe batšá jtsamana chē leyentša más uámana soyénga, mo chē nýetsca entsānga cachca derechénga chamotsebomnana, ínýenga jtsalastemánana y chē tšabe soyénguñe jtseyenana, chca, entsānga tšéngaftangbeñe chamotsošbuáchema. Chē soyénga cocayé cmontsamna jtsamama, chē ínýe tšabe soyénga amana ntjajbanacá. ²⁴¡Jtanénga entsānga unachayénga! Tšéngaftanga chē base soyénga jamama puerte jtsenó-cochinýenana, pero jtsebnétjombana uámana soyénga jamama, Bēngbe Bētsá tojanmandá soyénga. Y chca, tšéngaftanga šmontsemna mo canýe entsá ndayá tojtsabuchetjá bayéjja jtsejuánama, ndoñe ntjasama, jasama ndoñe yondēlesenciana ca chē leyíñe iuayerana causa. Pero šmondmēna mo entsāngcá ndēmuanýénga camellbe mēntšena jasana, y chē leyíñe endayerana chcana jasama ndoñe yondēlesenciana ca.

²⁵“;Tša lastema tšéngaftangbiamana, bacna entsānga ntšamo ndegombre šmojuabnacá ndinýinýnayénga fariseunga y ley abuátambayénga!

Tšëngaftanga šmondmëna mo entsàngcá ndëmuanyënga platillëjënga y tazëšënga shjoicajana jtsóbojabiana, pero tsoyna nÿe cachcá jonÿayana. Tšëngaftanga tša jtsentsënana entsàngbiana mo tšabengcá jtsinÿnama, pero tšëngaftangbe ainantšë jútjena entsemna nÿe jtsatbëbanama y nÿe bëtscá soyënga jéseboinama juabnéngaca. ²⁶ ¡Nduabinÿna fariseo! Cochshetsajbaná ainaniñe bacna soyënga bomnana. Chamna nÿe tšabe juabnénga chentšë cochtsebomna, y lempe ntšamo chacojtsamcá y entsànga chamojtsonÿacá tšabá echántsemna.

²⁷ “¡Tša lastema tšëngaftangbiana, bacna entsànga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga šmondmëna mo obanëngbe cuevēshënga botamana uafjantsenëshëngcá; shjoicajana puerta botamanëshënga, pero tsoyna jútjena obanëngbe betashëngaca y janjuana soyëngaca. ²⁸ Tšëngaftanga chca šmondmëna: entsàngbe delante tšëngaftanga jtsinÿnana mo nÿetsca soyënguiñe tšabá amëngcá, pero ndoñe chca quešmátsmëna. Tšëngaftangbe ainantšna chë bacna entsànga ntšamo ndegombre tmojuabnacá ndinÿinÿnayëngcá y chë bacna soye amëngcá šmontsejuabná.

²⁹ “¡Tša lastema tšëngaftangbiana, bacna entsànga ntšamo ndegombre šmojuabnacá ndinÿinÿnayënga fariseunga y ley abuátambayënga! Tšëngaftanga jtsamana chë Bëngbe Bëtsabe juabna oyebuambnayënga tempsquënga bëtsëtsa entsànga chamotsemnama, chëngbe cuevēshënga jtsatspórmayëse. Tšëngaftanga cachcá jtsamana chë nÿetsca soyënguiñe tšabá amëngaftaca, chë chëngbiana jtenójuaboyama pormániñe jtsatsbótamnayëse; ³⁰ y

chentšana šmondbëtsichamo: ‘Bënga chë bëngbe bëtsëjëmëngbe tempo maftsjanienëse, chëngbioye ndoñe matmëñjanéjabuache chë Bëngbe Bëtsabe juabna oyebuambnayënga jobáyama ca.’ Pero mo chëngcá canÿe buayenana sóyeca tmojabëngbioyna ndoñe ntsayaunanana. ³¹ Pero ntšamo šmojtsamcá jtsamëse, tšëngaftanga šmontsinÿanÿná ndegombre chë Bëngbe Bëtsabe juabna oyebuambnayëngbioye tmojanëbayëngbe entsànguentšana šmomnana. Y mora cach tšëngaftangbe bëts taitangcá tšëngaftanga šmontsama. ³² ¡Mopochocanga jamama chë bacna soyënga, chë tšëngaftangbe bëts taitanga tmojanbojatsé jamama soyënga!

³³ “¡Mëtšcuayënga, mëtšcuaye entsànga! ¿Ndayá šmochjama chë infiernoca uabouana castigüentšana jótsbocama? ³⁴ Chÿyeca atšë tšëngaftangbioye chanjichamuá Bëngbe Bëtsabe juabna oyebuambnayënga, tšabe soye tatsëmbënga y abuátambayënga. Pero tšëngaftangna, inÿengbioye šmochantsëbaye y šmochanjácrucificaye; inÿengbioyna chë enefjuana yebnënguenache šmochanjátsetšenaye y nÿetsca bëts pueblënguenache chënga šmochandúcmena. ³⁵ Chÿyeca, tšëngaftangbiana nÿets castigo echántsemna chë nÿetsca soyënguiñe tšabá amënga tmojëftsóbanama; Abel, chë jóbanama chabotsemnama tondaye tonjanmá, tmojanóba orscana y Zacarías tmojanóbantscoñe. Zacarías, Berequíasbe uaquiñana, Bëngbe Bëtsabe bëts yebnentšë tmojanóba, altar y chë entsànga Bëngbe Bëtsábioye imojánadorana luariñe. ³⁶ Ndegombre cbéyana, lempe chë soyëngama castigo morsca entsàngbiana echántsemna ca” —Jesús tojánayana.

**Jesús tojanošachna
Jerusalenoca entsangbiana**

(Lc 13.34-35)

³⁷ Měntšánaca Jesús tojánayana: “¡Jerusalenentša entsanga, Jerusale-
nentša entsanga! Tšěngaftanga chě
Běngbe Bětsabe juabna oyebuamb-
nayěnga jtsěbáyana y chě Běngbe
Bětsabe ichmóněnga ndětsbėngaca
jtsatěchėnganjana jtsěbáyama. Bueta
soye atše sėnjábošena tšěngaftanga
átšbioye júbuajana, mo canye tuamba
chabe bolletotéměnga chabe juatěng-
miáša tajsoye cuaftajayecá, pero
tšěngaftanga ndoñe chešmátsbošena.
³⁸ Y šmochjiněye, atše mora cachcá
cbochanjesėnyaye, y chca, atšna
enánanga cbochanjėsbashejuana, mo
canye yebna cachcá tcojesonýa y énañe
tcojeseboshjoncá. ³⁹ Y atše cbėyana,
ndegombre tšěngaftanga morscana atše
ndoñe más quešmochátiněye; y atše
šmochántiněye mēntšá chašmojtsichamo
ora: “¡Corente bendición bomná, Běngbe
Utabnabe obenánaca tojabá ca!”

**Jesús tojánayana chě Běngbe
Bětsabe bėts yebna lempe
mochjánpochocama**

(Mc 13.1-2; Lc 21.5-6)

24 Jesús Běngbe Bětsabe bėts yeb-
nentšana tojėftsanbocna y ya
yojtsaye. Chorna chě uatsjėndayěnga
chábioye tmojanobeconá y tmojanontšė
nyetsca chentša bėts yebněnga cha
jinýinýiyana. ² Chora Jesús tojanėyana:
“Tšěngaftanga lempe šmontsonýá. Nde-
gombre šcuayana, quem Běngbe Bětsabe
bėts yebnentše ndoñe queochaisoquėda
ni mo canye ndětsbé iněye ndětsbé juats-
boye. Lempe mochantsepochóca ca.”

**Ntšamo yochtsemna quem luare
jopochócama tempo chaojtsobeco ora**

(Mc 13.3-23; Lc 21.7-24; 17.22-24)

³ Chentšana chěnga Olivos
tjashoye tmojána. Jesús choca
yojtsėtbemana; as, chě uatsjėndayěnga
tmojanobeconá nyě chėngbiana
jatjayama, mēntšá: —Šmėyana. ¿Mocna
ora chě soyěnga Běngbe Bětsabe bėts
yebnoca yochjochněngo ca? ¿Ndayá
yochjochněngo bėnga jinýanýiyama
aca jėsbama ora ya yojtsemnana
y quem luare jopochócama tempo
yojtsobecuama ca?

⁴ As Jesús tojanjúa: —Cuedado
šmochtsebomna ndocná chac-
mondáingñema. ⁵ Banga mochanjabo
y mochantsabíchamo chěnga atše
imomna ca. Mochántsichamo: “Atše
chě Cristo sėndmėna ca” y chca,
ba entsángbioye mochanjáingñaye.
⁶ Tšěngaftanga šmochanjouena canye
luarentša entsanga iněye luaroca
entsángaftaca imojtsentsjanama
y nderado mochjentsjámna.
Ndoñe matauatjėngana, er chca
jochněnguama endmėna; pero masque
chcase, quem luare jopochócama
cabá ndoñe queochátmėna. ⁷ Canye
luarentša entsanga iněye luaroca
entsángaftaca mochántsentsjanaye, y
canye amėndayábentša entsanga iněye
amėndayábioica entsángaftácnaca;
y ba luarėnguine shėntsana
echanjóshjango y chentša fshantsėnga
echanjuangmėmana. ⁸ Masque chca
jasúfriase, más chcoye cabá más
mochanjatssúfria.

⁹ “Chora, entsanga íněngbe
cucuatšine cmochanjábashejuana
chacmatsetšenama y cmochantsėbaye;
y atšbe ústoněnga bėtsemnayeca
nyetsca luarėnguentsa entsanga
cmochantsėbuayěnja. ¹⁰ Chě tempo,
banga mora átšbeñe ošbuáchiyěnga,

oşbuáchiyana mochantsajbaná y mochantsenáboyënja y jóbanama ínÿengbe cucuatşíñe mochántsenboshjuana. ¹¹Banga Bëngbe Bëtsabe ndoñe ndegombre juabna oyebuambnayënga mochanjábocana y ba entşanga mochanjáingñaye. ¹²Nÿetşá bacna juabnënga entşangbe ainaniñe echanjésemna, y chë causa banga ndoñe quemochátenbobonshana. ¹³Pero nda nÿets tempo átsbeñe oşbuachiyá totsomñe, atsbocaná echántsemna. ¹⁴Y quem tşabe noticiënga Bëngbe Bëtsabe amëndayama nÿets quem luariñe entşángbioye mochántsabuyiynaye, chca, chë ndegombre soyënga Bëngbe Bëtsabiana chënga chamotsetatşëmbuama. Chentşana cocayé quem luare jopochócama tempo echántsemna.

¹⁵“Chë Bëngbe Bëtsabe juabna oyebuambnayá Daniel chë puerte uabouana soye tojéftsanabema chë pochócaye soyama. Tşëngaftanga chë puerte uabouana soye chë uámana ca uabaina luarentşe chaşmojinÿe ora (nda tojtsalía, chabosertá), şmochántsetatşëmbo chë puerte ngménana tempo tojóshjanguama; ¹⁶entşanga Judeoca chamojtsemnënga, batsjabengoye chamotsacheta. ¹⁷Y nda cachabe yebnentşa tsbanánoca chaojtsemna, chaotsachá chocana ntjtastjangcá ndayá tsoicana jétsábocnama. ¹⁸Y nda jajoca chaojtsemna, yebnoye ndoñe chaondéta ni mo chabe quëfşaiya jesácñama. ¹⁹¡Tşa lastema chë tempo ngomámanënga chamojtsemnëngbiama o ochóchaye şëşonga chamojtsabamnëngbiama! ²⁰Bëngbe Bëtsá şmochtseimpadana chë tşëngaftanga jachetama, uaftena tempo ora o canÿe ochnayté ndoñe chaondésemnama. ²¹Chca, chora puerte ngménana echántsemna. Tşa jabuache ngmenancá, quem luare

jabojátşama orscana y méntscoñama y más chcoye, cachcá ngménana ndoñe ntjamnana. ²²Chë puerte ngménana tempo yapa bën ndoñe chaondésemnama Bëngbe Bëtsá ndoñe tonjalesenciase, ndocná quentatsbocá; pero chabe ubuáyanënga cha corente endábabuanÿeshanayeca, echanjama yapa bën tempo ndoñe chaondésemnama.

²³“Chora nderado nda cmochanjáuyana: ‘Minÿënga, muentşe chë Cristo entsemna’, o ‘Choca cha entsemna ca’, chë soyëngama ndoñe şmattsayaunana. ²⁴Chora mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëts soyënga chëngbe obenana jinÿanjÿiyama, entşanga jáingñama, y tmojobenase, chë Bëngbe Bëtsabe bocacánëngnaca. ²⁵Atşe ya chama tcbonjabuayená chë tempo cabá ndóshjango ora. ²⁶Chíyeca, nderado chënga chacmojáuyana: ‘Minÿënga, chentşe chë Cristo entsemna, entşanga ndoyenoca ca’, choye ndoñe şmatjá; o chacmojáuyana: ‘Cha canÿe tsoca entsemna ca’, chama ndoñe şmattsayaunana. ²⁷Er ntşamo chë tojatcuinÿe ora, shinÿe bocanoicana y shinÿe uenatjëmbambanëntscoñe jabuashinÿinÿenancá y ba luarëngue-nache entşanga jobenayana jinÿama, cachcá, Bëngbe Bëtsá Entşá tbojanbemá quem luaroye chaojésabo te, entşanga nÿets luarentşe mochanjobenaye cha jinÿama. ²⁸Canÿe obanabe cuerpo tojtsemnama chë gallinacënga tmojátatşëmbona y cachora chë béconana jojotana. Cachcá, chë castigo echántsemna nÿa chama chë tempo chaojtsemna ora ca” —Jesús tojánayana.

**Bëngbe Bëtsá Entśá tbojanbemá
quem luaroye echanjésabo**

(Mc 13.24-37; Lc 21.25-33;
17.26-30, 34-36)

²⁹ Mëntśánaca Jesús tojánayana: “Chë puerte ngménana tempo chaojochnëngüentśana, shinÿe ndoñe queochátsbuashinÿinÿana, juashcona ndoñe queochátsbinÿnaye, celocana estrellënga echanjatquécjana y quem luarentśa tśbanánoca espíritënga obenana bomnënga echanjángmëmana. ³⁰ Chora canÿe soye celoca echanjónÿna entsanga jinÿanÿiyama Bëngbe Bëtsá Entśá tbojanbemá ya iuaisaboma, y nÿets luarenache entsanga mochanjenóbośachna, y Bëngbe Bëtsá Entśá tbojanbemábioye mochanjinÿe celoca jantśetëshiñe echántsaboye, puerte obenánaca y corente buashinÿinÿaniñe. ³¹ Y canÿe trompetéjua jabuache chaojuénana ora, cha chabe angelotëmënga echanjichamuá Bëngbe Bëtsabe ubuáyanënga júbuajama, nÿets luarëngocana, celoca cánÿoica juachoicana y chë ínÿoica juachóntsoñe.

³² “Ntśamo higo betíyeca endbëtsopasanama śmochjuatsjinÿe: Tojtsaisabuacuana y tojtsaiséjotsana ora, chë tśabe tempo ya tojtsaisobecuama jtsotatsëmbuana. ³³ Cachcá, lempe chë ndayama tśëngaftanga tcbonjauyancá chaśmojinÿe ora, śmochántsetatsëmbo Bëngbe Bëtsá Entśá tbojanbemá ya jésabama yojtsemnama. ³⁴ Ndegombre cbéyana, lempe chca echanjochnëngo, morsca entsanga cabá ndóbana ora. ³⁵ Celoca y quem luare echanjopochóca, pero atśbe palabra ndocna te queochaisopochóca.

³⁶ “Pero ndayté y ntseco ora Bëngbe Bëtsá Entśá tbojanbemá yochjésabama, ndocná quenátstatśëmbo, ni chë celoca angelotëmënga, ni Bëngbe

Bëtsabe Uaquiñá. Nÿe chë Taitá chama yotátśëmbo.

³⁷ “Ntśamo Noé yojëftsiyena ora tojanopasacá, cachcá echanjopása chë Bëngbe Bëtsá Entśá tbojanbemá chaojésabo ora. ³⁸ Noebe tempo, chë uabouana uaftena cabá nduáshjango ora, entsanga imnasaye, imnofśëśnaye y imnóbouamnaye; natjëmbana imojtsiyëñe, y chca imojtsomñe Noé chë barquëshoye tojánamashënguëntscuana. ³⁹ Chënga tondaye imonjántatsëmbo, nÿe chë uabouana uaftena tojánashjango y nÿetscanga tojtsanëyamba ora cocayé. Cachcá echántsemna Bëngbe Bëtsá Entśá tbojanbemá chaojésabo ora; ya chaojochnëngo ora, entsanga chama mochanjátatsëmbona. ⁴⁰ Chora uta boyabásata jajoca bochántsemna; canÿa mochanjesbetşe y chë ínÿana ndoñe. ⁴¹ Uta shembásata bochántsejanÿcoye; canÿa mochanjesbetşe y chë ínÿana ndoñe.

⁴² “Chíyeca cuedado śmochtsebonna y yejuana śmochtsantjeśna, er ndoñe queśmátstatśëmbo ndayté tśëngaftangbe Utabná yochjésabama. ⁴³ Pero quem soye tśabá chacmësertá: Chë yebnentśa nduiño, ntseco ora ibeta atbëbaná yochjabama tojtsetatsëmbëse, cha nantsefśna y ndocnábioye buanjaleséncia jushañe chaotsendbemama tsoye jtsamashënguama y jtsatbëbama. ⁴⁴ Chíyeca, tśëngaftángnaca śmochtseprontana, er Bëngbe Bëtsá Entśá tbojanbemá echanjésabo, entsanga chama tondaye chamontsejuabná ora ca” —Jesús tojánayana.

**Chë tśabe oservená y chë
ndoñe tśabe oservená**

(Lc 12.41-48)

⁴⁵ “¿Nda yomna chë oservená ntśamo chë nduiño tojtseboścá amá y nÿets

juábnaca amá? Cha jtsemnana nda chë nduiño bochjéftsebojhona chë yebnentsënga chaotsanýenama y jasama tojtsemna ora chaújuatsema. ⁴⁶Chë nduiño tojtashjango ora, chë oservenábioye tbojínýena ntšamo ibomncá jtsamése, chë oservená puerte oyejuayá echántsemna. ⁴⁷Ndegombre cbéyana, chë nduiño chábioye bochanjaimpáda lempe chabe soyënga chabotsinýënama. ⁴⁸Pero chë oservená bacna entsá tomnësna, jajuaboyana chë nduiño ndoñe betesco yochantabo ca, ⁴⁹y as, cha jóntšana chë inýe oservenënga jtsajantsetayana, becá jtsesana y jtsetmuana inýe tēmiëngaftaca. ⁵⁰Y chabe nduiño jtashjanguama ndoñe tontsejuabná te y ndoñe tontsetátšëmbo ora, cha echántashjango. ⁵¹Chora chë nduiño jabuache bochantsecastíga, y ntšamo chë bacna entsanga ndayá ndegombre tmojuabnacá ndinýinýnayënga jasúfriama entsamncá, cha echanjasúfria. Chora cha puerte echanjenóbošachna y chë tsetšanama juatsäënga echantsenoftésjojnaye ca” —Jesús tojánayana.

Chë bnétsana tobiašëngbiana cuento

25 Mēntšánaca Jesús tojánayana: “Chë te chaojóshjango ora, Bëngbe Bëtsabe amëndayana echántsemna mo ntšamo canýe casamento fiestentše tojanopasacá. Mēntšá yojoπάsa: Bnétsana tobiašënga chëngbe querosine uajuinýanëshangá imojéftsájaca y imojábocana chë casamentero boyabása jajébenguama. ²Chë bnétsana tobiašënguentsána, shachnënga sempre enójuabnayënga imnamna, y chë inýe shachnëngna, ndenójuabnayënga. ³Chë ndenójuabnayëngna chëngbe uajuinýanëshangá imojéftsájaca, pero querosine ndoñe imonjuabuyamba

chë uajuinýanëshangañe cachiñe jtaftsuámama. ⁴Pero chë sempre enójuabnayëngna chëngbe uajuinýanëshangá imojéftsájaca y querosinënaca botellëshënguñe imojuabuyamba. ⁵Chë casamentero boyabásana ndoñe betesco yonjabo, chíyeca nýetsca tobiašënga ocnayana yojubuaiche y imojtsomaná. ⁶Mo tsëntseto orna, chënga imojuena mēntšá uayebuáchana: ‘¡Chë casamentero boyabása ya endabó! ¡Jajébenguama mobocana ca!’ ⁷Asna, nýetsca tobiašënga imojotsbaná y imojóntša chë uajuinýanëshangá juabopróntana. ⁸Chorna, chë shachna ndenójuabnaye tobiašënga chë inýe shachnënga siempre enójuabnayëngbioye imojáuyana: ‘Diosmanda tšëngaftangbe querosinentšana baseytema šmëbuatšatá, bëngbe uajuinýanëshangá tojontsé jtsafsanana ca.’ ⁹Pero chë siempre enójuabnayëngna imojayana: ‘Ndoñe. Tcbojubuatšatase, tšëngaftangbiana y bëngbiámnaca querosine echántšashbe. Más tšabá entsemna, chë querosine mondbét-senoye chašma y tšëngaftangbiana chašmauábuamiñe ca.’

¹⁰“Chorna, chë shachna ndenójuabnaye tobiašënga imojá chë querosine jauabuámiyama; pero chëntscuana chë casamentero boyabása yojáshjango y chë siempre enójuabnayënga cháftaca chë casamento fiestoye imojámashjna, y chentša bēšáša imojtatame. ¹¹Chentšana chë inýe tobiašënga imojáshjajna y mēntšá imojtsichamo: ‘¡Taita, Taita, šmëbëtafjo ca!’ ¹²Pero chë casamentero boyabása yojójuu: ‘Ndegombre cbéyana, tšëngaftanga ndoñe quecbatëbuatma ca.’

¹³“Cachcá echántsemna Bëngbe Bëtsá Entšá tbojanbemá chaojésabo ora; chíyeca šmochtseprontana, tšëngaftanga ndoñe quešmátstātšëmbo ndayté, ni

mocna ora chca yochjopásama ca”
—Jesús tojánayana.

Chë crocenánama cuento

(Lc 19.11-27)

¹⁴“Bëngbe Bëtsabe amëndayana end-mëna mo ntšamo canye boyabásaftaca tojanopasacá. Cha ibojtsemna inye luaroye jtsoñama; as chabe oservénënga yojáchembo y yojaimpádaye chabe crocénana chamotsinýënama. ¹⁵Cánýabioye ibojántšabuachiye shachna uaranga crocénana, ínýabioyna uta uaranga y ínýabioyna canye uaranga. Chca yojamna ntšamo cada ona ibojobiashjachcá. Y as chë boyabása yojtsoñe. ¹⁶Cachora chë shachna uaranga yojoyëngacñá yojá trato jabemama, y chca, inye shachna uaranga crocénana yojábotiye. ¹⁷Chë uta uaranga yojoyëngacñá cachcá yojama y inye uta uaranga yojábotiye. ¹⁸Pero chë canye uaranga yojoyëngacñana, yojá, fshantsiñe yojajutjo y chabe mandayabe crocénana chentše yojtseitëme.

¹⁹“Chentsana baytese chë oservénëngbe amëndayá yojtashjango y yojóntša chë crocenánama chënga jatjayana. ²⁰Natsana yojáshjango chë shachna uaranga yojoyëngacñá y chabe mandayábioye inye shachna uaranga crocénana ibojántšabuachiye y mëntšá ibojauyana: ‘Taita, aca shachna uaranga šconjanoyé y muentše entsemna inye shachna uaranga sënjaboté ca.’ ²¹As chë mandayá ibojauyana: ‘Tša tšabá, tšabe oservená y ntšamo tšbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinýënama. Mamáshëngo y átšeftaca cochjóyejuaye ca.’ ²²Chentsana chë uta uaranga yojoyëngacñá yojáshjango y chë

mandayábioye ibojauyana: ‘Taita, aca uta uaranga šconjanoyé y muentše entsemna inye uta uaranga sënjaboté ca.’ ²³As chë mandayá ibojauyana: ‘Tša tšabá, tšabe oservená y ntšamo tšbošcá amá. Aca quem base soyiñe lempe ntšamo tbojamandacá tcojámayeca, atše cbochanjaimpáda más bëtscá chašcotsinýënama. Mamáshëngo y átšeftaca cochjóyejuaye ca.’

²⁴“Pero chë canye uaranga yojoyëngacñe oservená yojáshjango orna, chabe mandayábioye ibojauyana: ‘Taita, atše sëndétatšëmbo aca canye tšátjaye entsá comnama; acna chë ndoñe tconjajé chentše saná jocñana y chë ndoñe tconjujquëshe luarentše jobuátbanana. ²⁵Chama atše uatjana šjuábuache, chíyeca atše sënjá y fshantsiñe chë crocénana sënjetseitëme. Pero muentše acbe crocénana entsatsmëna ca.’ ²⁶As chë mandayá ibojajuá: ‘¡Bacna oservená y oyënjayá! Chë ndayentše ndoñe tijajé chentše saná jocñana y chë ndoñe tijujquëshe luarentše jobuátbanana atše tsuamanama icojátatšëmbëse, ²⁷aca cmonjamna atšbe crocénana bancoca jetsobuájua y atše matijtabo ora, atšbe crocénana matijtóyëngacñe y chë chentsana tojoboté crocénanëna ca.’ ²⁸Y as yojaménda: ‘Chë uaranga motseboca y chë bnëtsana uaranga entsebomnábioye chana motsatšetá ca. ²⁹Er nda tojtsebomnábioye, más jatšetayana, y chca cha corente bëtscá jtsebomnana; pero tondaye tondbomnábioyna, chë batšatema tobomna sóynaca jtsebocana ca.’

³⁰“Y chora cha yojayana: ‘Quem ndoservena trabajayá shjoca ibetoye matábocna; choca puerte echanjenóbošachna y chë tsetšanama juatsašënga echantsenoftëšjojnaye ca”
—Jesús tojanéyana.

**Ntšamo chë quem luare
jopochócama ora, nyetsca
entsangbiana mochjayana**

³¹ Mëntšánaca Jesús tojánayana: “Chë Bëngbe Bëtsá Entšá tbojanbemá chabe obenánaca, buashinÿinÿaniñe y nyetsca chabe angelotémëngaftaca chaojésabo ora, chë reybiama puerte buashinÿinÿana tbemaniñe echanjót'bema. ³² Chora nyets luarëngoca entsanga chabe natsanoica mochanjénefjna, y cha, entsanguentsana ínÿenga echanjábacacaye, mo chë oveshënga abujénÿa oveshënga chivëngbentsana endbetsabacacaycá. ³³ Chë abujénÿana, oveshënga chabe catsbioica echanjáchembo y chivëngna chabe uañicuayoica. Bëngbe Bëtsá Entšá tbojanbemá cachcá echanjama: chë ubuáyanënga chabe catsbioica echanjúbuaja y chë bacna entsangna chabe uañicuayoica echanjátsaye.

³⁴ “Chorna chë Rey, Bëngbe Utabná, chabe catsbioica chamojtsemna entsanga echanjáuyana: ‘Tšëngaftanga, Atšbe Taitá tsábeñe cmétabna, mabënga ca; atšbe amëndaye luare mo tšëngaftangbiana otocana soycá mosháchiñënga; tšëngaftangbiana endëprontana, Bëngbe Bëtsá quem luare tonjanma orscana. ³⁵ Er atšë šonjanishëntsana y tšëngaftanga saná šmonjancaredadó; šonjanajuendá y tšëngaftanga šmonjanafsé; inÿe luarocana ashjanganocá sënjánana y posada šmonjanántšame. ³⁶ Enašá sënjánana y entsáyá šmonjanëtšetá jtichëtjuama; šocá sënjanájona y šmonjanatsëtsaye; cárceloca sënjanëtámëna y jabëuatsëtsayama šmonjánabo ca.’

³⁷ “As chë Bëngbe Bëtsá chabe bominÿiñe tsábënga tojábiamënga mochanjatjaye: ‘Bëngbe Utabná, ¿ntseco shëntseca tcbënjáninÿe y tcbënjanajuat-

šé? ¿Ntseco uajuendayá tcbënjáninÿe y tcbënjanašé? ³⁸ ¿O ntseco inÿe luarocana ashjanganocá tcbënjáninÿe y posada tcbënjanaántšame, o enašá y entsáyá jtichëtjuama tcbënjanaëtšetá? ³⁹ ¿O ntseco šocá o cárceloca utamená tcbënjáninÿe y jauatsëtsayama tifjana ca?’

⁴⁰ “As chë Utabná echanjójua: ‘Nde-gombre cbéyana, lempe ntšamo chë atšbe catsátanguentsana chë más batšá uá-manëngaftaca šmojamcá, cach átšeftaca šmonjanma ca.’

⁴¹ “Chentsana chë Utabná chabe uañicuayoica chamojtsemna entsanga echanjáuyana: ‘Atšbentsana mojuánanga atšbe Bëtsabe uabotëñënga. Infiernoye motsajna, chë ndocna te queochátsfsana íñeshoye; choca endëprontana Satanás y chabe ustonëngbiana. ⁴² Er atšë shëntseca sënjánana y tšëngaftanga saná ndoñe chešmatancaredadó; šonjanajuendá y ndoñe chešmatanašé; ⁴³ inÿe luarocana ashjanganocá sënjánana y ndoñe posada chešmatanaántšame. Enašá sënjánana y ndoñe entsáyá chešmatanaëtšetá; šocá sënjanájona y cárceloca sënjanëtámëna y ndoñe chešmatanašétsá ca.’

⁴⁴ “As chënga mochanjatjaye: ‘Bëngbe Utabná, ¿ntseco tcbënjáninÿe shëntseca o uajuendayá, o inÿe luarocana ashjanganocá, o enašá, o šocá o cárceloca utamená y ndoñe tcbënjanajabuache ca?’

⁴⁵ “Y chë Utabná echanjójua: ‘Nde-gombre cbéyana, tšëngaftanga ntšamo chë atšbe catsátanguentsana chë más batšá uámanëngaftaca, ndoñe šmonjan-mcá, átšeftaca cach ndoñe chešmánma ca.’

⁴⁶ “Chëngna infiernoye nyetsca tescama mochantsësetjango, y chë Bëngbe Bëtsá chabe bominÿiñe tsábënga tojábiamëngna chë nyetsca tescama yomna tsabe vida mochántsebomna ca” —Jesús tojánayana.

**Entšanga tmojanjuabó ntšamo
jamëse Jesús jishachama**

(Mc 14.1-2; Lc 22.1-2; Jn 11.45-53)

26 Lempe chca tojánayanentšana, Jesús chabe uatsjéndayënga tojanéyana: ²“Tšëngaftanga šmondétatšëmbo, uta te y chë Bashco fiesta echántsemna y Bëngbe Bëtsá Entšá tbojanbemá ñyengbe cucuatšinë mochanjáboshjona chamocrucificama ca.” Chë fiesta inamna jtenójuaboyama Bëngbe Bëtsá chë judiëngbe bëts taitanga Egip-tocana tojánatsebacama.

³Chëntscuana, chë bachnangbe amëndayënga y chë judiëngbeñe bëtsjëmëngcá mándayënga tmojánenefjna, Caifás, chë bachnangbe más uámana amëndayabe bëts yebnentše. ⁴Tmojanenojuabó y tmojanenoyeuná jtseíngñase Jesús jishachama, y jtsóbama. ⁵Pero imojtsichamo: “Quem fiestëntscuana ndoñe, entšanga yapa muanjöntša enbouenanana ca.”

**Canÿe shembása botamana
uanguëtše bėjaye Jesusbe
bestšašinë tbojanbuešcja**

(Mc 14.3-9; Jn 12.1-8)

⁶Jesús Betania pueblentše yojtsemna, Simón chë bacna nguayanánaca šocá ca uabobuatmabe yebnentše. ⁷Chëntscuana canÿe shembása Jesúsbioye tojanabeconá. Chë shembásana tojanamba canÿe alabastro jarrëtema, jútjena canÿe puerte uámana botamana uanguëtše bėjayeca. Jesús mesëshentše yojtsemnëntscuana, chë shembása chabe bestšašinë chë botamana uanguëtše bėjaye tbojanbuešcja.

⁸Chë uatsjéndayënga chca tmojáninÿe orna, tmojanotjayaná y tmojanontšë ichámuana: —¿Ndáyeca ñye bonamente chë soye chca yojtsemna ca? ⁹Chamna, matmënjobenanga chë bėjaye becá cro-

cenánama juiyana y chánaca ndbom-nëjëmënga matmënjújabuache ca.

¹⁰Jesús chë soye tojanuena; as tojanéyana: —¿Ndáyeca ndoñe cachcá quem shembása šmochanjonÿaye ca? Ntšamo tonjamcá tšabá entsemna. ¹¹Er chë ndbomnëjëmëngna ñyets tempo tšëngaftangbeñe mochanjëftsemna, pero atše tšëngaftangafaca ndoñe ñyets tempo quichásemna. ¹²Ntšamo chë shembása tojamcá, chë botamana uanguëtše bėjaye atšbe cuerpiñe jabuëšcjëse, cha šontsepróna atše juatbontsa tescama. ¹³Ndegombre cbéyana, quem luariñe ndayéntšnaca Bëngbe Bëtsabe soyëngama chamojtsabuayiná chentše, ntšamo quem shembása tojamámncaca becá mochanjëftsoyebuambaye, chca, entšanga chabiamana chamotsenójuabnana ca —Jesús tojanéyana.

**Judas tojána bachnangbe
amëndayëngbioye,
Jesús chamuishachama**

(Mc 14.10-11; Lc 22.3-6)

¹⁴Canÿa chë bnétsana uta uatsjéndayënguentšá, Judas Iscariote ca uabainá, tojána bachnangbe amëndayëngafaca jencuëntama. ¹⁵Y tojanatjá: “¿Ntsachetšá šmatjtabuénaye y Jesús tšëngaftangbe cucuatšinë cbochjayentšbashejuana ca?”

As chëngna, unga bnétsana ralbenga tmojtanabuená. ¹⁶Y cach orscana Judas yojtsenguaye ntšámose y ntseco ora, Jesús chëngbe cucuatšinë jayentšbáshejuana.

**Jesús chabe uatsjéndayëngafaca
Bashco saná tojanse**

(Mc 14.12-25; Lc 22.7-23; Jn 13.21-30; 1 Co 11.23-26)

¹⁷Chë Bashco fiesta bojatšenté, chë levadúraca ndëpormana tandëše jasama fiestëntscuana, chë uatsjéndayënga

Jesúsbioye tmojanobeconá y tmojantjá: —¿Ndémoca aca cojtseboše bēnga fchajprontama Bashco saná chacosama ca?

¹⁸ Y Jesús tojanéyana: —Chē bēts puebloye motsajna canye bacobe yebnoye y cha šmochjauyana: “Buatēmbayá tonjayana: ‘Atšbe ora ya echanjobuache, y atše acbe yebnoye séntśá, Bashco fiesta jamama atšbe uatsjéndayēngaftaca ca.’”

¹⁹ As chē uatsjéndayēnga tmojanma ntšamo Jesús tojanamēndacá y chē Bashco fiesta saná tmojanprontá.

²⁰ Y tojanibétata orna, Jesús chē bnétsana uta uatsjéndayēngaftaca meséshentše yojtsemna. ²¹ Y imojtsesantscuana, Jesús tojanéyana: —Ndegombre cbéyana, canya tšēngaftanguentśá uayayēngbe cucuatšīne šochanjáboshjona ca.

²² Chora chē uatsjéndayēnga puerte ngménaca imojtsemna y tmojanontśé canyánya Jesús jatjayama: —Bēngbe Utabná, ¿nderado atše cha chtsemna ca?

²³ As Jesús tojanéjua: —Canya nda chabe tandēše entsefcheacuacná cach atše séntsefcheacuacná šcnenentše, cha uayayēngbe cucuatšīne šochanjáboshjona. ²⁴ Ndegombre, Bēngbe Bētsá Entśá tbojanbemáftaca echanjopása ntšamo Bēngbe Bētsabe uabemana palabrenguīne chabiamuayancá; pero, itša lastema chē bochjáboshjonabiamu! Más tšabá chabiamu manjamna ndoñe ntjónynana ca.

²⁵ As Judas, chē boshjuaná, Jesúsbioye tbojantjá: —Buatēmbayá, ¿nderado atše chtsemna ca?

Y Jesús tbojanjuá: —Ndegombre tcjayana ca.

²⁶ Imojtsesantscuana, Jesús tandēše tojanca, Bēngbe Bētsábioye chama tbojtanchuá, tojanjatá y chē uatsjéndayēnga tojanatśatá. Y mēntśá

tojanayana: “Mocñēnga, mosēnga. Atšbe cuerpo entsemna ca.”

²⁷ Chentśana, canye coptema vínoyeca tojanaca, Bēngbe Bētsábioye tbojtanchuá y chē uatsjéndayēnga tojanéfsaśé. Y mēntśá tojanayana: “Nýetscanga quem coptémēntśana mofšēnga. ²⁸ Quem vínoye atšbe buīne entsemna. Atšbe buīne echanjuábuashana entšanga chamotsetatšēmbuama ntšamo Bēngbe Bētsá entšanga tojanašebuachenacá aīñe yochjochnēnguama. Chē buīne bētscá entšangbiamu echanjuábuashana, chēngbe bacna soyēngama perdonánēnga chamotsemnama. ²⁹ Y ndegombre cbéyana, morscana atše ya ndoñe más chē uvasentśana obocniye quichaisofsiye. Chē tsēm vínoye tšēngaftangaftaca chanjofsiye, atšbe Taitabe amēndayoca chamojtsemna ora ca” —Jesús tojanayana.

**Jesús tojanayana, chábioye
ndoñe bonjanabuátma ca
Pedro yochjánayanama**

(Mc 14.26-31; Lc 22.31-34; Jn 13.36-38)

³⁰ Bēngbe Bētsá jētschuayama tmojancantá chentśana, Olivos tjšashoye tmojéftsanbocana. ³¹ Choca Jesús tojanéyana: —Tšēngaftanga nýetscanga quem ibeta átšbeñe ošbuáchiyana šmochantsobuetše y šmochántsacheta, er Bēngbe Bētsabe uabemana palabrenguīne, cha mēntśá tojanayana: “Chē oveshēngbe abuajénya chanjóba y chē oveshēnga mochantsáshana ca.” Chca tšēngaftangaftaca echanjopása, uayayēnga chašmojishache ora. ³² Pero obanēnguēntśana chaitayenēntśana, tšēngaftangbe natsana Galileoye chanjá ca —cha tojanéyana.

³³ Chora Pedro tbojanjuá: —Masque nýetscanga áceñe ošbuáchiyana chamotsobuetše y chamotsacheta,

ntšamo ácaftaca yochjopása causa, atše ndocna te ca.

³⁴ As Jesús tbojaniyana: —Ndegombre cbëyana, cam ibeta, ngallo cabá ndécánta ora, aca unga soye cochanjayana ndoñe šconduabatma ca.

³⁵ Pero Pedro tbojaniyana: —Masque chaotsemna ácaftaca jóbanama, atše ndoñe quichátayana ndoñe cbonduabatma ca.

Y nyetsca uatsjéndayëngnaca cachcá imojtsichamo.

Getsemaní luarentše Jesús Bëngbe Bëtsáftaca tbojanencuentá

(Mc 14.32-42; Lc 22.39-46)

³⁶ Chentshana, Jesús chabe uatsjéndayëngaftaca canye luare Getsemaní ca uabáinoye tojána. Choca tojanéyana: “Muentše motbiama, chëntscuana atše choye chanjá Bëngbe Bëtsáftaca jencuéntama ca.”

³⁷ Y Pedro y chë Zebedeobe uta uaquiñata tojétsanëbiatše. Choca yojóntša puerte ngménaca y corente cochtsetšenaná jtsemnama. ³⁸ Jesús tojanéyana: “Atšbe ainana puerte ngménaca entsemna, mo jobanamcá. Muentše moquedanga y átšeftaca šmochtsefšna ca.”

³⁹ Chora Jesús más natsanoye tojána, tojanoshamentšé y fshantsóntscoca yojotsejbéna, y mëntšá Bëngbe Bëtsáftaca tbojanencuentá: “Atšbe Taitá, jopódi-anëse moma atše japadésama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

⁴⁰ Chentshana, Jesús chabe unga uatsjéndayëngbioye tojtanabo y chëngna inmëtsomañe. Chca tojánanyena ora, Pédrëbiyoye tbojaniyana: “¿Ni mo canye horatema tšëngaftanga šmonjobená átšeftaca jtsefšnana ca? ⁴¹ Šmochtsefšna y

Bëngbe Bëtsáftaca šmochtsencuëntaye, chca, bacna soye jamama ndoñe chacmondócochënguama. Tšëngaftanga ndegombre šmontseboše espritoca Bëngbe Bëtsá joyeunayama, pero cuerpiñe añemo ndoñe quešmátsbomna ca” —Jesús tojanéyana.

⁴² Uta soyama tojtesaná y mëntšá Bëngbe Bëtsáftaca tbojanencuentá: “Atšbe Taitá, atše japadésama ndoñe chašondétsemnama jamama ndoñe jopódi-anëсна, nye ntšamo aca cojtsebošcá chaotsemna ca.”

⁴³ Y tojtanabo ora, chë uatsjéndayënga cachiñe inmëtsomañe; yapa ocnaye causa nye imojtsefshëtana. ⁴⁴ As Jesús cachcá yojéftsënyaye, y ungama cachiñe tojtesaná Bëngbe Bëtsáftaca jencuéntama, y cach palabrënga tojánayana.

⁴⁵ Chora chë uatsjéndayëngbioye tojtanabo y tojanéyana: “¿Cabá šmotsomañe y šmotsochnañe ca? Ya ora tojjobuache, Bëngbe Bëtsá Entšá tbojanbemá bacna soye amëngbe cucuatšinë mochanjáboshjona. ⁴⁶ Motsbananga, cuajna. Minyënga, chë boshjuaná ya entsebeconá ca.”

Uayayënga Jesús tmojánishache

(Mc 14.43-50; Lc 22.47-53; Jn 18.2-11)

⁴⁷ Jesús cabá yojtsóyebuambnantscuana, Judas, canye chë bnëtsana uta uatsjendayënguentšá, tojánashjango, y cháftaca imojtsemna ba entšanga espadéjangaca y ngarotbéngaca prontánënga. Chënga imojamna chë bachnangbe amëndayënga y chë judiëngbeñe bëtsëjemëngcá amëndayëngbe ichmónënga. ⁴⁸ Judas, chë boshjuaná, tojanjuabó ntšamo jamana entšanga jinyaníyama ndëmua Jesús bëtsemnana. Chíyeca yojáuyana: “Nda chajjauámocho, cha echántsemna. Šmochjishache ca.” ⁴⁹ Cachora Judas

Jesúsbioye tojanobeconá y tbojanchuá:
—Buajtana, Buatëmbayá ca.

Y tbojtanámocho.

⁵⁰ Jesús tbojaniyana: —Enutá, moma
chë ndayá jabomama tcojabo ca.

Chorna, chë entsanga tmojanobeconá,
Jesús tmojánishache y tmojanánatse.

⁵¹ Chca orna, canye enutá
Jesúseftaca yojtsemná, chabe espadéja
tojanenoséngbotëntšena, y chë
bachnangbe más uámana amëndayabe
oservenábioye canye matscuaše
tbojtsanéstjango.

⁵² As Jesús tbojaniyana: “Espadéja
matosëngbuajonýá. Nda espadéjaca tbo-
jóba chana, cach espadéjaca echan-
jóbana. ⁵³ ¿Aca ndoñe condétatšëmbo,
atše atšbe Taitábioye stjaimpádase, cha
cachora atsbiama nanjichamuá bnétsana
utama más ejércitënga angelotémën-
gaca? ⁵⁴ Pero chcasna, ¿ndayá Bëngbe
Bëtsabe uabemana palabrénguine en-
dayancá ntšamo nanjochnëngo? Chiñe
endayana ntšamo entsopasancá jochnën-
guama canmëna ca.”

⁵⁵ Cachora Jesús entsanga tojanatjá:
“¿Ndáyeca šmojabo espadéjangaca
y ngarotbéngaca atše jishachama,
mo atše canye bacá uamana entšá
cuftsemncá ca? Atše cada te Bëngbe
Bëtsabe bëts yebnocá tšëngaftangafaca
sënjántbemana abuátambaye, y choca
ndoñe chešmánishache. ⁵⁶ Pero lempe
quem soyënga chca entsopasana, cachcá
chaotsemnama ntšamo Bëngbe Bëtsabe
uabemana palabrénguine chë Bëngbe
Bëtsabe juabna oyebuambnayënga
tmojanayancá ca” —Jesús tojánayana.

Cachora nyetsca uatsjëndayënga
tmojtsanëuatjaná y tmojtsanacheta,
y Jesús chë uayayëngaftaca cachcá
tmojesanonýá.

Jesús tmojanánatse chë judiëngbe más uámana amëndayëngbioye

(Mc 14.53-65; Lc 22.54-55,
63-71; Jn 18.12-14, 19-24)

⁵⁷ Chë Jesús tmojánishachënga,
tmojanánatse, Caifás chë bachnangbe
más uámana amëndayabe yebnoye.
Chentše chë ley abuátambayënga
y chë judiëngbeñe bëtsëjemëngcá
amëndayënga tmojánenefna. ⁵⁸ Pedro
bënocana Jesús tbojanasto, chë
bachnangbe más uámana amëndayabe
chashjöntscõe; choye tojánamashëngo
y chë Bëngbe Bëtsabe bëts yebnocá
josticiëngaftaca yojótbema, chca,
jtsetatšëmbuama ntšamo yochjopásama.

⁵⁹ Chë bachnangbe amëndayënga, chë
bëtsëjemëngcá amëndayënga y inyënga
judiëngbe amëndayënga imojtsenguaye
ndánaca masque uayátsenaye soye Je-
susbe contra cháuyanama, as chënga
jobenayama cha chaóbana ca jayanama,
⁶⁰ pero ndoñe tmonjáninýena, masque
banga tmojánashjajna Jesusbe contra
uayátsenaye soyënga jayanama. Cabana,
útata tbojánashjango, ⁶¹ y chata tbo-
jánayana: “Quem boyabása tonjayana
canobena Bëngbe Bëtsabe bëts yebna jt-
senásatajchcana y nye unga tese jtëtsje-
buana ca.”

⁶² As chë bachnangbe más uámana
amëndayá tojantsá y Jesúsbioye tbojan-
tjá: —¿Ndocá cochanjayana? ¿Ndayase
yojtsemna chë acbe contra montsichamo
soye ca?

⁶³ Pero Jesús nye iyteca yojtsemna.
Chíyeca chë bachnangbe más uámana
amëndayá tbojaniyana: —Bëngbe Bëtsá
Ainabe mándoca cbomandá chašcuyana
aca ndegombre chë Cristo, chë Bëngbe
Bëtsabe Uaquiñá comna o ndoñe ca.

⁶⁴ Chora Jesús tbojanjuá: —Aca
ndegombre yomncá tcjayana. Y
quem sóynaca cbéyana: Tšëngaftanga
šmochanjinýe, atše, Bëngbe Bëtsá

Entsá tbojanbemá, chë nÿets obenana bomnabe catšbioica jtsetbemanana y celoca jantšetšhiñe jtsaboyana ca.

⁶⁵ Chora chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¡Ntšamo quem boyabása tonjoyebuambacá, Bëngbe Bëtsabiana entsemna mo cha cuafjoyenguangá, chë chabe Uaquiñá yomna ca cha tonjayana ora! ¿Ndayama más entsāng šochjátëjeboto Jesusbe contra chamuayanama? ⁶⁶ ¿Ntšamo šmatjayana ca? —cha tojanatjá.

As chë entsāng tmojanjuá: —Ndegombre cha bëts bacna soye entsebomna; jóbanama bontsemna ca.

⁶⁷ Chora tmojanontšë Jesús juebëbuashëtjnayana, jabuache jantšetayana y ínÿengna imojtsejuëbjantšetaye, ⁶⁸ y imojtsatsëtsnaye: “Cristo, aca ndegombre Bëngbe Bëtsabe juabna oyebuambnayá tcomnëse, ¡momalisiá nda tcmënjajantšetá ca!”

Pedro tojánayana Jesúsbioye ndoñe bonjanabuátma ca

(Mc 14.66-72; Lc 22.55-62; Jn 18.16-18, 25-27)

⁶⁹ Chëntscuana Pédrëna shjoca yojtsemna, chashjoca yojtsetbemana. Chora, canÿe shembása chentša oservená tbojanobobeconá y tbojanayana: —Acnaca, Jesús chë Galileocáftaca conjánana ca.

⁷⁰ Pero Pédrëna, nÿetscangbe delante tojánayana chábioye ndoñe bonjanabuátma ca, mëntšá jayanëse: —Ntšamo contsichamcá, ndoñe quešnátësertana ca.

⁷¹ Chora Pedro bëšoye yojábocna. Chentšna, inÿe shembása oservená chábioye tbojáninÿe y chë inÿe entsāng tojanëyana: —Cha, Jesús chë Nazaretocáftaca enjánana ca.

⁷² Pedro cachiñe tojánayana ndoñe bonjanabuátma ca, y mëntšá yojtse-

júraye: —¡Chë boyabása ndoñe quetsatabuatma ca!

⁷³ Chentšana, chë chentše imojtsemnënga Pédrëbioye tmojanobeconá y tmojanayana: —Ndegombre, ácnaca chë uatsjendayënguentsá condmëna. Chë contsoyebuambnacá contsoyátëmbana ca.

⁷⁴ Chora Pedro tojanontšë ichámuana, Bëngbe Bëtsá chašotsecastigá ndoñe ndegombre soye stsichámëse ca; yojtsejúraye y yojtsichamo: —¡Chë boyabása ndoñe quetsatabuatma ca!

Y cachora canÿe ngallo yojacánta. ⁷⁵ Y Pedro yojenójuaboye ntšamo Jesús tbojanayanama. Cha mëntšá tbojanayana: “Cabá ngallo ndëcánta ora, aca unga soye cochanjayana ndoñe šconduabu-atma ca.” Y chentšana tojésanbocna y corente ngmënaca yojtsenóbošachna.

Jesús, Pilátbioye tmojanánatse

(Mc 15.1; Lc 23.1; Jn 18.28-32)

27 Tojanbinÿna ora, nÿetsca chë bachnangbe amëndayënga y judiëngbeñe bëtsëjemëngcá amëndayënga tmojánenefjna jenóyeunayama ntšamo jamëse Jesús chaóbanama. ² As, Jesús tmojanëcuëbatsëca y tmojanánatse, y chca, Pilato, chë Judeoca Romano mandadbe cucuatšhiñe tmojánboshjona.

Ntšamo Judas tojanóbana

³ Judas, chë boshjuaná, Jesús jóbanama ibojtsemnama tojanuena ora, puerte yojtsenócochinÿena ntšamo tojánchjanguama, y chë unga bnëtsana ralbenga chë bachnangbe amëndayënga y bëtsëjemëngbioye tojtanamba, ⁴ y mëntšá tojanëyana: —Puerte bacna soye tijama. Atše canÿe bacna soye ndbomná tšëngaftangbe cucuatšhiñe tijáboshjona chaóbanama ca.

Pero chënga tmojanjuá: —¿Chë soye ndayá bëngbiama? Cach aca cochátotat-sëmbñe ca.

⁵As Judas chë ralbenga Bëngbe Bëtsabe bëts yebnentse yojesëtšana, y yojá y yojëtsentsešaye.

⁶Chë bachnangbe amëndayëngna chë ralbenga tmojtanatbaná y tmojánayana: —Quem crocenánama buiñe echanjuábuashana; ntšamo leyiñe endayancá, bënga ndoñe quemuátobena chë Bëngbe Bëtsabiama soyënga quëcjnáyëtémiñe chana jasegórana ca.

⁷Chcasna, chënga tmojanenoyeuná, chë crocenánacna chë Alfarerbe Luare ca uabaina fshantse jabuámiyana, y chca, canye luare jtsebomnana ndayentse chë inye luarëngocana entšanga áshjajnënga jutabuantsama. ⁸Chíyeca, chë fshantse méntscóñama Buiñe Luare ca iuabaina.

⁹Chca, tojanochnëngo ntšamo Jeremías, chë Bëngbe Bëtsabe juabna oyebuamb-nayá, tempscá tojanayancá, ndayá yoch-janchnënguama. Chana mëntšá tojánayana: “Y chë unga bnétsana ralbenga tmonjanca, ntsachetšá chë Israe-loca entšanga cha tmojanamananacá,

¹⁰y chánaca chë Alfarerbe Luare tmon-janbuamé, ntšamo Bëngbe Bëtsá šonjan-mandacá ca.”

Jesús Pilatbe delante

(Mc 15.2-5; Lc 23.2-5; Jn 18.33-38)

¹¹Chentšana Jesús, chë mandado Pilátbiye tmojanánatse y cha mëntšá tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

¹²Chë bachnangbe amëndayënga y chë bëtsëjëmënga Jesús mal imojtse-quédantscuana, cha ndocá ntjojuana.

¹³Chíyeca Pilato tbojantjá: —¿Ndoñe contsuenana lempe ntšamo acbe contra montsichamcá ca?

¹⁴Pero Jesús ni canye palabra ndoñe ntjojuana. Chë causa, chë mandado ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mc 15.6-20; Lc 23.13-25; Jn 18.38–19.16)

¹⁵Bashco fiesta ora, chë mandado yojanamana canye utamená jëtsboshjonana, nda entšanga tmojuabuayaná.

¹⁶Chë tempo canye uachuana utamená inamna, Jesús Barrabás ca uabainá.

¹⁷Nyetsca entšanga chentse imojtsemna ora, Pilato tojanatjá: “¿Tšëngaftanga nda šmojtseboše atše chjëtsboshjonama, Jesús Barrabás o Jesús, chë Cristo ca monduabobuatmá ca?”

¹⁸Er chë mandado yojtsetátšëmbo, entšangna envidia causa Jesús chabe cuatšíñe tmojánboshjonama.

¹⁹Pilato chë tribunal ca uabáinentse yojtsetbemanëntscuana, chabe shema canya tbojanichmó mëntšá cha jauyanama: “Chë nyetsca soyënguñe tšabá ama entšábioye ndocá matsborlánana; chabe causa ibeta otjénayoca puerta sënjasufrí ca.”

²⁰Pero chë bachnangbe amëndayënga y chë bëtsëjëmënga entšanga tmojanayëñaná, Barrabás jëtsboshjonama y Jesús chaóbana ca chamuayanama.

²¹Chora chë mandado cachiñe tojanatjá: —¿Chë útatentšana nda šmojtseboše atše chjëtsboshjonama ca?

Y chënga tmojánayana: —¡Barrabás ca!

²²Pilato tojanatjá: —¿As, ndayá Jesús, chë Cristo ca uabobuatmáftaca atše ch-jama ca?

Y nyetscanga tmojanjuá: —¡Motsecrucificá ca!

²³Chora Pilato tojtëtanatjá: —¿Ndáyeca? ¿Ntšamo cha tojobuachjanguá ca?

Pero chënga cachiñe tmojanáyebuachena: —¡Motsecrucificá ca!

²⁴ Ndocá jamama yontsobenama y entšanga más jabuache enbouenanama tmojanontšema Pilato tojáninýe ora, cha tojanmandá búyeshe juabuýëboñana y nýetscangbe delante yoýtsenacuentšabiá. Mëntšá tojánayana: —Atše ndocá chiyátayana, ni chiyatsma quem boyabása chaóbanama. Tšëngaftanga lempe šmonjama ca.

²⁵ Chora nýetsca entšanga tmojanjuá: —¡Quemuá yochjóbanama, bënga y bëngbe básëngbiana castigo chaotsemna ca!

²⁶ As Pilato, Barrabás tbojtanboshjona; tojanmandá soldadënga Jesús jabuache chamotsetsetšenama y chentšana entšangbe cucuatšinë tbojánboshjona chamocrucificama.

²⁷ Chentšana, chë mandadbe soldadënga Jesús tmojanánatse chë mandadbe bëts yebnentša chashjoye y choca nýetsca soldadënga chabe shéconana tmojanójoto. ²⁸ Chorna, entšayá tmojtsanabotsca y shbuenda uafjatsenga entšayá mo reycá tmojanichëtjo. ²⁹ Canýe coronésha tmojanapormá uchmašëfjangaca y tmojanabestšajó, y catšbioica cucuatšinë canýe niñëfja. Chorna, chabe shecuatšëntše imojtsofshëntsaméntšenaye y imojtsáboyejuana. Mëntšá imojtsichamo: “¡Bayté judiëngbe Rey cochtsemna ca!”

³⁰ Chëngnaca imojtsanbuashëtjnaye y cach niñëfjaca bestšašëntše imojtsétsjanjnaye. ³¹ Y chca imnaft-sáboyejuanentšana, chë shbuenda uafjatsenga entšayá tmojtsanabotsca y cachabe entšayá tmojtanichëtjo, y chora, jacrucificama tmojanánatse.

Jesús tmojanrucificá

(Mc 15.21-32; Lc 23.26-43; Jn 19.17-27)

³² Chë entšanga chentšana tmojánbocana ora, tmojánenbetše canýe bacóftaca, Simón ca uabainá, Cirene pueblóca. As, cha tojanmandá Jesusbe cruz chauetsocutsama.

³³ Canýe luare Gólgota ca uabáinoca tmojánashajna ora (hebreo biyañe chca endayana “Obanabe Bestšashe Luare ca”), ³⁴ Jesúsbioye vínoye hiéloyeca enájuañiye tmojanabuýé chaofšema; pero yoýaftántia y ndoñe yonjábošena chiye jofšiyama.

³⁵ Ya tmojanrucificá orna, chë soldadënga Jesusbe entšayamna, tsbanánoye tmojanétsena, chca, jtsetatšëmbuama ndabiama yochjanáquedama. ³⁶ Y chora chënga chentše tmojanotbiama Jesús jtsebojanýama. ³⁷ Y chabe bestšaše juatsboicna canýe uabemana soye tmojananjo. Chiñe yoýétsayana ndáyeca cha tmojanrucificama, mëntšá: MUA JESÚS ENDMËNA, CHË JUDIËNGBE REY ca.

³⁸ Utata bacna soye ochjajnayátnaca chënga chentše tmojanacrucificá, canýa Jesusbe catšbioica y chë inýana chabe uañicuayoica. ³⁹ Y chëjana imojtsach-nëjuana entšangna, Jesús imojtsóyenguaye, imojtsobestšfshanenaye ⁴⁰ y imojtsatsaye: “¡Aca chë icobena Bëngbe Bëtsabe bëts yebna jtsenásatajhcana y nýe unga tese jëtsjebuana, cach aca mentsbocá! ¡Ndegombre Bëngbe Bëtsabe Uaquiñá tcomnëse, chë cruzocana matastjango ca!”

⁴¹ Chë bachnangbe amëndayënga, ley abuátambayënga y chë judiëngbeñe bëtsëjemëngcá mándayënga cachcá imojtsóyenguaye. Mëntšá imojtsichamo: ⁴² “Cha inýenga tojëftsatsebacá, pero cachá jéntsbecama ndoñe quenátobena. Cha Israeloca entšangbe

Rey tojtsemnëse, chë cruzocana chauatastjango, y chca, bënga chábañe fchtsošbuáchiye. ⁴³ Cha tojayana Bëngbe Bëtsábañe puerte yojtsošbuaché ca. ¡Mora Bëngbe Bëtsá chabuatsbocá, cha ndegombre muábioye tbobonshánëse!, er cha tonjánayana Bëngbe Bëtsabe Uaquiñá canmëna ca” —chënga imojtsichamo.

⁴⁴ Y chë bacna soye ochjajnayata, Jesúseftaca ibojtsecrucificanátnaca cachcá ibojtsóyenguaye.

Jesús tojanóbana

(Mc 15.33-41; Lc 23.44-49; Jn 19.28-30)

⁴⁵ Njëtsto orscana las tresétscoñe, njëts quem luare yojtseibétata. ⁴⁶ Chca orna, Jesús chabe biyañe tojanáye-buachena: “Elí, Elí, ¿lema sabactani ca?” (Chca endayana “Atšbe Bëtsá, atšbe Bëtsá, ¿ndáyeca cachcá šcojonýa ca?”)

⁴⁷ Chca tmojanuena ora, báseftanga chentšë imojtsemna entšanguentšana imojtsichamo: “Cha Elías, chë Bëngbe Bëtsabe juabna oyebuambnayá, bontsechembuana ca.”

⁴⁸ As chora, chentša canýa tojëftsánót-jajo canýe esponjëshe janguanguama, untja vínoyeca chëshe tojanfchecuacuá, canýe niñëfjiñe tojananguësétjo y Jesúsbioye tojanbeconá chaofšema. ⁴⁹ Pero ínýengna tmojánayana: “Cachcá mochjonýaye, er Elías tayochjabo jabátsbocama ca.”

⁵⁰ Pero Jesús cachiñe jabuache tojanoyó y tojanóbana. ⁵¹ Y cachora, Bëngbe Bëngbe Bëtsabe bëts yebnoca yojújonýana entšéjua tséntsaca yojtsenájataye, tsbanánocana fshantsoye. Chëjua bënëjua inauamna y chë tsatséntsaca inaújonýana. Fshantse yojuangmémana, ndëtsbenga yojtsashtëtšana, ⁵² y chë cuevëshënga obanëngaca yojtsëtëfjo y banga Bëngbe Bëtsabe entšanga tmojtanayena. ⁵³ Y chënga, Jesús tojtanayenentšana, chë

cuevëshënguentšana tmojánbocana, y Jerusalén, chë uámana bëts pueblo ca uabáinoye tmojánamashjna y ba entšángbioye tmojánëbëbuacana.

⁵⁴ Chë soldadëngbe amëndayá y chë ínýenga, Jesús jtsebojanýama cháftaca tmojanoquedanga, chë fshantse yojuangmémanama tmojáninýe ora, y njëtscá chë yojtsëchnëjuana soyëngama, puerte auatjanánënga imojtsemna y tmojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁵⁵ Ba shembásëngnaca chentšë imojtsemna y bënocana imojtserreparana. Chëngna, Galileocana Jesús tmojanasto y cha imojanájabuachana. ⁵⁶ Chë shembásëngbeñe imojtsemna María Magdalena; María, Santiago y Josebe mamá; y Zebedeobe uaqiñatbe mamá.

Jesús tmojanatbontsá

(Mc 15.42-47; Lc 23.50-56; Jn 19.38-42)

⁵⁷ Ya yojtseibétatana ora, canýe bomna boyabása, José ca uabainá, tojánashjango. Cha inamna Arimatea luarocá y Jesusbe ustoná. ⁵⁸ José tojána Pilato jinýama, Jesusbe cuerpo jotjañama. As Pilato tojanmandá chë cuerpo chamontšabuáchema. ⁵⁹ José chë cuerpo tojanca y canýe nduatsenga lino entšéjuaca tbojanandmaná. ⁶⁰ Y canýe chabe tsëm cuevëshiñe tbojanajó. Tempo cha inamánda chë cuevëshna ndëtsbënguñe chamopormama. Canýe bëts ndëtsbé tojansjoná y chë cuevëshoye amashjuanentšë tojánachto; y chentšana José yojtsatoñe. ⁶¹ Pero María Magdalena y chë inýe Mariyna chentšë tbojtsanoquedañe y chë cuevëshe ndirichiñe tbojanótbema.

Soldadënga tmojána Jesús yojtsatbontsánentšë jtsebojanýama

⁶² Yëfsana, chë ochnayté, chë bachnangbe amëndayënga y chë fariseunga

cányiñe tmojána Pilato jinýama. ⁶³Tmojanianana: —Taita, bēnga fséntsejuabná ntšamo chē bostero cabá ainá ora tonjánayanama, chē unga tianoye cha jtayenama ca. ⁶⁴Chíyeca, momandá chē cuevēshe soldadēnga chamotsashanyá unga tentscuana. Chca, chabe uatsjéndayēnga ndoñe ibeta chamondabo chabe cuerpo jabétsatbēbama, y chentsana chēnga entsānga chamúyana, Jesús tojtayena ca. Y chca, chabiamana quem ústonoye bostero soye, chē cachabiamana tojánayana soyēngama puerte más bacá nántsemna ca —chēnga tmojanianana.

⁶⁵As Pilato tojanéyana: —Tšēngaftanga cach tšēngaftangbiamana soldadēnga šmondábamna. Motsajna y chē cuevēshe cuedádoca šmochtsashanyá, ntšamo šmondētatsēmbcá ca.

⁶⁶Chora chēnga tmojána chē cuevēshe jtsashanyama; chē ndētšbena, tsengájaseca imojuinýnaná, ntšotatsēmbcá ndocná choye chaondámashēnguama, y soldadēnga chentše tmojéftsanashejuana.

Jesús tojtayanena

(Mc 16.1-8; Lc 24.1-12; Jn 20.1-10)

28 Ochnayté chentsana, chē inye semana bojatšenté yojtsebínýana ora, María Magdalena y chē inye María tbojána cuevēshoye jarrepárama. ²Ndeolpe fshantse tojanangmémana, er Bēngbe Bētsabe canye ángel celocana tojántsmá, chē cuevēshoye tojanobconá, chē atamiana ndētšbé tojtsanjuaná y chíñe tojanótbema. ³Chē ángelna mo canye tcuinýējćá yojtsebuashinýinýana, y chabe uichétjonéjuangá uafjantséjuangá mo jantšētēshćá yojtsamna. ⁴Chē soldadēnga chca tmojáninýe ora, de auatja yojtsangmēmnyaye y mo obanēngćá imojtsemna.

⁵Chora chē ángel chē shembásatbioye tojanéyana: “Ndoñe batauatjana. Atše

séntsetatsēmbo tšēngaftanga Jesús, chē tmonjancrucificá cha šmojtsenguama. ⁶Cha muentše ndoñe quenátsmēna; cha tontayena, ntšamo cachá tonjanayancá. Mabata y šochjinýe cha endétsesegoranentše. ⁷Betsco motsata y chē uatsjéndayēnga šochjáuyana: ‘Jesús tontayena y tšēngaftangbe natsana Galileoye echanjá; choca šmochanjinýe ca.’” Y chora cha tojánayana: “Chca šondmēna tšēngaftanga jauyanana ca.”

⁸Cachora chē shembásata chē cuevēshentsana tbojésanbocna, auatjanánata pero puerte oyejuayata, y tbojéftsantotajo chē soye chē uatsjéndayēngbeñe jobuambayama. ⁹Y ndeolpe Jesús chata tojánēbēbuacna y tojanacheuá. Chatna, chábioye tbojanobéconata, tbojtanadorata y chabe shecuatše shéconana imojtbojćuá. ¹⁰Y Jesús tojanéyana: “Ndoñe batauatjana. Motsata atše uatsjéndayēnga, atše catsátanga jáuyanama Galileoye chamotsá y choca atše šmochjinýe ca.”

Ntšamo chē soldadēnga tmojánayana ndayá tojanochnēnguama

¹¹Chē shembásata ibojtsayēntscuana, básefta soldadēnga chē bēts puebloye tmojána y ntšamo tojanopasacá lempe chē bachnangbe amēndayēngbeñe tmojanobuambá. ¹²As chē bachnangbe amēndayēnga, chē judiēngbeñe bētsējemēngćá mandayēngaftaca tmojánenefjna jenóyeunayama. Chēngna chē soldadēngbioye bētsćá crocénana tmojtanatsatá, ¹³y mēntšá tmojanabuayená: “Tšēngaftanga šmochjayana, ibeta šmotsomáñēntscuana, Jesusbe uatsjéndayēnga tmojabo y chabe cuerpo tmojabétsatbēba ca. ¹⁴Y chē mandado chē soyama chaojátatsēmbonēse, bēnga lempe cháftaca fchjenóyeunaye, chca, tšēngaftangaftaca ndocá

chaondopasama ca” —chënga tmojanéyana.

¹⁵As chë soldadënga chë crocénana tmojanóyëngacñe y tmojanma ntšamo chë mándayënga tmojanabuayenacá. Ba entšanga chë cuento tmojanuena y méntscoñama judiënga cachcá mondbétsichamo.

**Jesús chë uatsjëndayënga
tojanichamó, Bëngbe
Bëtsabe soyëngama
nÿetsquénache jábuayenama**

(Mc 16.14-18; Lc 24.36-49; Jn 20.19-23)

¹⁶Chentsana, chë bnétsana canÿe uatsjëndayënga Galileoye tmojána, chë ndëmua tjoye Jesús chënga tojanabuayená choye. ¹⁷Y Jesús

tmojáninÿe ora, tmojtanadorá. Pero báseftangna imojétsejuabnaye nderado cha ndoñe Jesús yontsemna ca. ¹⁸Jesús chëngbioye tojanobeconá y tojanéyana: “Bëngbe Bëtsá nÿets mando atše šonjatšetá celoca y quem luarentše. ¹⁹Chcasna, motsajna, nÿets luarëngue-nache oyenënga atšbe uatsjëndayënga šmochjábiana. Entšanga šmochjubaye atšbe Taitá, atše chabe Uaquiñá y chë Uámana Espiritbe uabaina jayanëse, átšbeñe šmošbuachéyeca, ²⁰y šmochjabuatambá lempe ntšamo atše tcboramëndacá chënga chamóyeunama. Y ndegombre atše nÿets tempo tšëngaftangaftaca chanjëftsemna, quem luare jopochócantscuana ca” —Jesús tojanéyana.

San Marcos

Juan chë Ubayaná entsanga yojanabuayíyná

(Mt 3.1-12; Lc 3.1-9, 15-17; Jn 1.19-28)

1 Měntšá tojanobojaťsě chë tšabe noticiěnga Běngbe Bětsabe Uaquiñá Jesucristbiamá.

²Nťsamo bayťe entsemna, chë Běngbe Bětsabe juabna oyebuambnayá Isaías chabe librěšaňe yojěťsayancá, nťsamo Běngbe Běťsá chabe Uaquiñábíoye ibo-
jauyanama cha tojanábema ora:

Minýe, atšbe abuayíynayá acbe natsana sěntsichamná,

chë aca jabama lempe echanjaprńta cha.

³Entsanga ndoyena luaroca cha enduáyebuache měntšá:

“Běngbe Utabná echanjabo ca; mo nda canýe benache tojtseprontacá canýe uámana entšá jashjanguama, cachcá tšěngaftanga, cha jabama ainaniňe tšabe juabnėngaca šmochtseprontana ca” —cha tojanábema.

⁴Chcase, Běngbe Běťsá Juan tbojanichmó, y cha tojánbocna entsanga ndoyena luaroca, Běngbe Bětsabe soyěngama abuayíynaye y entsanga ubáyana. Cha entsanga yojaněťsěsnaye: “Tšěngaftangbe bacna soyěngama ngmėnacá šmochtenójuaboye, chca amana šochťsajbaná, y Běngbe Bětsabe benache šmochtishache. Chora cbochjúbaye, y Běngbe Běťsá tšěngaftangbe bacna soyěngama cmochanjáperdonaye ca.” ⁵Nýets Judea luarocana chábíoye entsanga imojánbocana, y Jerusaleněťšana nýetsca entšángnaca, y Běngbe Běťsábíoye chěngbe bacna soyěngama

jaimpáda chentšana, Juan Jordán ca uabaina bėjayıňe chěnga yojanėbáyana.

⁶Juanbe entšayá inauapormana camellbe stjėnasheca y bobache yojanasnana; chapulinatėmėnga y tjaňe mėloye inasaye. ⁷Y měntšá entsanga yojaněťsěsnaye: “Atšbe ústonoye inýa echanjabo, atšbiamá más obenana bomná; chíyeca atše mercedo taitatobuajoňe, ni mo jotsejbíyana chabe shechotchjontjėňshentša corriėja jajafjonama. ⁸Atšna búyesheca cbondėubáyana, pero chë echanjabábeyecna, Běngbe Běťsá bochanjíchmua chë Uámana Espířitu tšěngaftangbe ainaniňe cháuamashėnguama ca.”

Juan, Jesúsbíoye tbojanabaye

(Mt 3.13-17; Lc 3.21-22)

⁹Chë tempo, Galilea luarocana Nazaret pueblěťšana Jesús yojěťsebocna, y Juan yojťsemnoye tojána; y Jordán bėjayıňe Jesúsbíoye cha tbojanabaye. ¹⁰Bejayoicana yojťshėbėbocna orna, tojáninýe celoca atěťjniňe, y chë Uámana Espířitu chábíoye mo palomatemcá yojťsastjajuana. ¹¹Y celocana Běngbe Běťsá měntšá tbojaníyana: “Acna atšbe bonshana Uaquiñá condmėna; acbiamá corente sěťtsoyejúá ca.”

Jesús tojanobená Satanás jayėňjanama

(Mt 4.1-11; Lc 4.1-13)

¹²Chentšana chë Uámana Espířitu Jesúsbíoye entsanga ndoyena luaroye tbojanánatse. ¹³Canta bněťsana te chë entsanga ndoyena luaroca tbojanjėťana, y Satanasna yojanábó jisháchichiyama. Chë luarentše tšátjaye bayėnga imnájena; chentšana, Běngbe Bětsabe angelėnga cha imojťseservena.

**Jesús tojanontsé Galileoca
chabe trabajo jamana**

(Mt 4.12-17; Lc 4.14-15)

¹⁴ Juan cárceloye tmojanétamentšana, Jesús Galileoye tojesaná; y chiñe cha yojanabuayiyiná chë tšabe noticiënga Bëngbe Bëtsabiamana. ¹⁵ Jesús entsãnga yojanëtsëtsnaye: “Ora toçjobuache, Bëngbe Bëtsabe amëndayana echanjóshjango. Tšëngaftangbe bacna soyëngama ngménaca šmochtenójuabo, y chca amana šmochtsajbaná y Bëngbe Bëtsabe benache šmochtishache; y ainaniñe chë tšabe noticiënga Bëngbe Bëtsabiamana šmochjóyëngacñe ca.”

**Jesús tojánachembo canta
boyabásenga beonga
ashebuánayënga cha chamuastama**

(Mt 4.18-22; Lc 5.1-11)

¹⁶ Galilea uafjónoye tsachajana Jesús yojtsaye ora, cha tojánanyë Simón y chabe uabentsá Andrés; chatna atarraiëshangá ibnetsashbuétsëtsañe, er beonga ashebuánayata chata ibnamna. ¹⁷ Chora Jesús tojanéyana: “Atšëftaca mabata. Atšë cbochanjábiamana Bëngbe Bëtsabiamana entsãnga anguayata; y morscana, nyë beonga ashebuánayata ndoñe quešochátsmëna ca.”

¹⁸ Y cachora chatbe atarraiëshangá cachcá tbojésanaboshjuana y Jesús tmojanasto.

¹⁹ Más chcoye yojátaye orna, Jesús tojánanyë Santiago y chabe uabentsá Juan, Zebedeobe uaqiñata; chatna barquëshañe ibnetsotbemañe, chatbe atarraiëshangá atapórmayñe. ²⁰ Chora Jesús chë útata tojánachembo; as chatna, chatbe taitá Zebedeo chë barquëshañe tmojésanboshjona chabe peóngaftaca y Jesúseftaca tbojtsanoñe.

**Jesús, bacna bayëjbe juabna
cányabioye tbojanbojuaná**

(Lc 4.31-37)

²¹ Chentsãna, Jesús y chabe uatsjëndayënga Capernaum ca uabaina puebloca tmojánashjajna. Chë ochnayté, Jesús chë judiëngbe enefjuana yebnentšë tojánamashënga y yojóntša entsãnga jabuátambama. ²² Entšãnga imojtsenjanaye ntšamo Jesús yojtsabuatambacá, er chama mo canye mando bomnacá yojtsóyebuambnaye, ndoñe nyë ntšamo Moisesbe ley abuátambayënga imojanabuatambacá. ²³ Chë pueblentšë judiëngbe enefjuana yebnentšë yojtsemna canye entsá bacna bayëja uambayá, y chábeyeca chë boyabása yojóntša mëntšá uayebuáchana: ²⁴ —¿Ndayama bëngbioye tëçjabo, Jesús Nazaretocá? ¿Tcojabo bënga jabétsapochocama? Atšë sëndétatšëmbo nda aca comnama, aca chë Bëngbe Bëtsabe Uamaná ca.

²⁵ Chora Jesús chë bayëjbioye tbojtsanácacana, y tbojanianyana: —¡Iytëca móbema y chábentsãna maisebocna ca!

²⁶ Chora chë bacna bayëjna tojanma chë boyabása ataque chaboshachama, jabuache tojanoyó y chábentsãna tojésanbocna. ²⁷ Chama, nyetsca entsãnga ojnanánënga imojtsemna, y mëntšá imojtsentjanaye: “¿Ndayá chca yojtsemna? ¿Canyë tsëm buatëmbana soye? ¡Quem boyabása mando bomnacá y obenacá entsabuatambá, y chca, chë bayëjënga cha jtsamëndayana y chëngnaca joyeyunayana ca!”

²⁸ Y betesco nyets Galilea luarentša pueblënguenache Jesusbiamana yojtsótatšëmbo.

**Jesús, Simón Pédrëbe uambén
mamábioye tbojanshná**

(Mt 8.14-15; Lc 4.38-39)

²⁹ Chentsana, chë enefjuana yebnentsana tmojánbocana y Santiago y Juánofata Jesús tojána, Simón y Andresbe yebnoye. ³⁰ Simónbe uambén mamá šocá inajájona, jabuache calentóraca, y Jesúsbioye chë šocabiama tmojanianyana. ³¹ As chora, Jesús tojanobeconá, chë šocábioye tbojanábuacueshache y tbojanatsbaná. Cachora chë calentora tbojtsanóbojuanañe; y cachora cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Lc 4.40-41)

³² Chë te jetiñe, shinÿe ya yojuenatjëmbe ora, chë luarentša nÿetsca šoquënga y bacna bayëjënga uambayënga Jesúsbioye tmojanënatse; ³³ y nÿetsca entsãnga bëšoye imojobeconá. ³⁴ Jesús banga tojanashná, nÿetsca šocana bomnënga, y ba bacna bayëjënga entsãnguentšana tojtanëbuacna; y ndoñe tonjanalesenciá chë bayëjënga chamóyebuambama, er chënga imnatátšëmbo cha chë Cristo bëtsemnama.

**Chë judiëngbe enefjuana
yebnënguenache Bëngbe Bëtsabe
soyëngama Jesús yojanabuayiyá**

(Lc 4.42-44)

³⁵ Yëfsana cabá cachëse, cabá ibetcá, Jesús tojëftsantsbaná, chë pueblentsana tojëftsanbocna y entsãnga ndoyena luaroje tojtsanoñe, choca Bëngbe Bëtsáfata jencuëntama. ³⁶ Pero Simón y chabe enutëngna tmojána jetsenguanguama; ³⁷ y tmojtsaninÿena ora tmojanianyana: — Nÿetscanga cmontsenguá ca.

³⁸ Y Jesús tojanéyana: —Inÿoye cuajna, cam béconana pueblëngoye, chíñnaca Bëngbe Bëtsabe soyëngama entsãnga chayábuayenama; er chama atše sënjabo ca.

³⁹ Y chentsana, Jesús yojánana Bëngbe Bëtsabiama entsãnga abuayiyay chë judiëngbe enefjuana yebnënguenache, nÿets Galileiñe, y entsãngbentsana bacna bayëjënga yojtëbuacana.

**Jesús, canÿa bacna nguayanánaca
šocábioye tbojanshná**

(Mt 8.1-4; Lc 5.12-16)

⁴⁰ Chentsana, canÿe boyabása bacna nguayanánaca šocá Jesúsbioye tojanobeconá; y joshamëntšase mëntšá tbojanimpadá: —Aca tcojtsebošëse, aca catjjobenaye atšbe šocana jtsebojuánama ca.

⁴¹ Jesús chabiama tbojanongmé; cucuátseca tbojánbojajo y tbojanianyana: — Aíñe séntseboše. ¡Šocana cbotsebojuaná ca!

⁴² Y cachora chë šocana tbojtsanóbojuanañe y tšabá yojtsatsmëna. ⁴³ Chora Jesús chábioye tbojtanichmó, pero puerte mëntšá tbojanmandá: ⁴⁴ —Mouena; ndocnábeñe quem soye cattsecuëntaye; nÿe Jerusalenoca báchnëbioye motsa y cha cochjinÿinÿiye aca mora ya tšabá cojtsatsmënama. Chora cochjuátšëmbona ntšamo Moisés chabe leyiñe tojanmandacá, Bëngbe Bëtsábioye chama jëtschuayama, chca, nÿetsca entsãnga chamotatšëmbona mora ya tšabá cojtsatsmënama ca.

⁴⁵ Pero chë boyabásana, chentsana tojëftsanbocna y cachora yojóntša nÿetsquénache entsãnga yapa acúntayana Jesús tbojanshnama. Chë causa, Jesús ndoñe yontsobena entsãngbe delante pueblënguenache jtsanana, ndayá nÿe chë pueblënga béconana y nÿetsca chë entsãnga ndoyena luarënguñe yojá-

nana; pero nyets luarëngocana chábioye entsãnga imojánashjajuana.

Jesús, canye jama ndobenábioye tbojanshná

(Mt 9.1-8; Lc 5.17-26)

2 Chentsana, Jesús Capernaumoye tojtánashjango; y entsãnga imojátatšëmbona, Jesús yebnentšë yojsatsmënana. ²Mallajta entsãnga chentšë tmojanójoto; chë causa chë yebnentšë ya tondaye más luare entsãngbiama yontsemna, ni mo chë amashjuanentšë, y Jesús Bëngbe Bëtsabe soyëngama yojsabuayiyenaye.

³Chora tojanopasá, canta boyabásenga tmojanashjango, canye entsá jama ndobená imojtsaismana.

⁴Pero ndoñe tmonjanobená Jesús yojtsemnoye cha juambana, tša entsãnga causa. Chcasna, chë canta boyabásenga yebna tsbanánoca, Jesusbe tatsëtsocha batšá tmojánatëfjo y chëjana chë jama ndobená tjuashiñe tmojanëštjango. ⁵Jesús tojáninye chënga tša imojtsošbuaché chë šocá jáshnama cha yojanobenama; as chë jama ndobenábioye tbojaniyana: “Sobreno, mouena; acbe bacna soyënga tcbontseboperdoná ca.”

⁶Chentšë báseftanga judiëngbe ley abuátambayënga imnatbemana; chënga chora mëntšá imojtsejuabnaye: ⁷“¿Ntšámoyeca quem boyabása chca yojsichamo? Jesús ndoñe tšabá Bëngbe Bëtsabiama quenátichamo; mo chábioye cuafjoyenguangcá entsemna. Ndocna entsá quenátobena inyabioye bacna soyëngama japerdónana; nyë Bëngbe Bëtsana aífne ca.”

⁸Pero Jesús cachora lempe yojtsetátšëmbo ntšamo chënga ainanoca imojtsejuabnacá; as tojanéyana: “¿Ndáyeca chca tšëngaftanga ainaniñe šmojtsejuabná? ⁹¿Tšëngaftangbiama ndayá más paselo nántsemna

tšëngaftangbe delante chë jama ndobenábioye atšë jauyanana: ‘Acbe bacna soyënga tcbontseboperdoná’, o ‘Matëtsbaná, acbe tjuashe mesocñe y motsa ca?’ ¹⁰Y chca, mora atšë cbochanjínyanñiye Bëngbe Bëtsá Entšá tbojanbemá quem luariñe obenana yobomnama, entsãnga bacna soyëngama jáperdonama ca” —Jesús tojánayana.

Y chë jama ndobenábioye tbojaniyana: ¹¹“Atšë cbëyana, matëtsbaná, acbe tjuashe mesocñe y acbe yebnoye motsatoñe ca.”

¹²Cachora chë jama ndobená tojtantsbaná, chabe tjuashe yojesocñe, y entsãngbiyajana chentsana yojësebecna. Chama nyetsca entsãnga imojenjnaná y Bëngbe Bëtsábioye imojtsatschuanaye, y mëntšá imojtsichamo: “Nyã ndocna te tša bëts soye chemuáisinñe ca.”

Jesús, Levíbioye tbojanchembo chabuastama

(Mt 9.9-13; Lc 5.27-32)

¹³Chentsana, Jesús cachiñe chë uafjajónaye tsachoye tojesaná; ba entsãnga chábioye imojobeconá, y Jesús yojsabuátambaye. ¹⁴Chentsana yojsataye orna, Jesús tbojáninye Levíbioye, Alfeobe uaqiñá, yojtсанotbemañe, entsãnga impuesto atjanayacá inétsotrabajañe. Chora Jesús tbojaniyana: “Šmasto ca.”

Y Leví tojantsbaná y tbojanasto.

¹⁵Tojanopasá, Jesús Levibe yebnentšë yojtseye, y banga Romocama entsãnga impuesto atjanayënga y inñe bacna entsãnga, mesëshentšë cánñiñe imojtsetbiámana, Jesús y chabe uatsjëndayëngaftaca; er ba entsãnga cha imojústona. ¹⁶Chë fariseunga y chë ley abuátambayënga, chë entsãngaftaca Jesús yojtseyesama tmojáninye ora, chabe uatsjëndayëngbioye tmojanatjá: —¿Ndáyeca tšëngaftangbe buatëmbayá,

entsanga impuesto atjanayéngaftaca y bacna soye améngaftaca yojtsesá ca?

¹⁷ Jesús chca tojanuena; as méntšá tojanéjua: —Chè salud tmotsobomñénga, ashnyá ndoñe ntséjabótana, pero chë šoquéngna aíñe. Y atše ndoñe chiyátabo chë Bëngbe Bëtsabe bominyiñe tsabá aménga jabáchembuama, ndayá chë bacna soye aménga imomna ca juabnayeñga átsbioye jabáchembuama ca.

**Jesús tmojantjá chë Bëngbe
Bëtsáftaca jencuéntama
tondaye saytescama**

(Mt 9.14-17; Lc 5.33-39)

¹⁸ Canye, Juan chë Ubayanabe ústonénga y chë fariseungbe usetonénga, Bëngbe Bëtsáftaca jencuéntama tondaye ntjascá imojtsemna ora, básefta entsanga Jesúsbioye tmojanobeconá y méntšá tmojaniana: —Juanbe ústonénga y chë fariseungbe usetonénga monduamana tondaye ntjascá jtsemnana Bëngbe Bëtsáftaca jencuéntama. ¿Ndáyeca acbe uatsjédayénga ndoñe chca ca?

¹⁹ As Jesús tojanéjua: —Chë casamento fiestentše, chë ofjanénga saná ndoñe ntsabuáshebenana. ¿Ntsámo chca ndoñe nántsemna? Chë tojobouamá entsá chéngaftaca tojtsemnentscuana, chë ofjanénga bëtscá jasana y cháftaca oyejuayénga jtsemnana. ²⁰ Pero ora echanjobuache y chë boyabása chéngbentšana mochantsánatseñe; chora cocayé chë ofjanénga echántsamna tondaye ntjascá jtsemnana. Ntsámo chë tojobouamá boyabása y chë ofjanéngaftaca endmencá, cachcá endmëna atše y atšbe uatsjédayéngaftacnaca.

²¹ “Ndocná, canye tanguá entsáyá, base tsëm entséjuaca jtarmédana; chca tcojamése, chë tsëm entséjua jtsabéconana y chë tanguá entsáyá más jt-satanécanana, y chca, chë uátanëcniñe más bëtsiñe jtsabemana. ²² Y cach

ndoñe, chë tojtseshayana vínoye tanguá jasabenguiñe ntjataftsuámayana; er chë jasabenga jtseshébëfjuana y chë vínoye jtsabuáshanana, y chë vínoye y chë jasabenga tondayama ntjatoservënana. Chíyeca comna, chë tojtseshayana vínoyna tsëm jasabenguiñe juaftsuámana; chca, chë jasabenga y chë vínoye josérviana ca” —Jesús tojánayana.

**Jesusbe uatsjédayénga canye
ochnayté trigo tmojanátabebe**

(Mt 12.1-8; Lc 6.1-5)

²³ Canye ochnayté, Jesús canye jajajana yojtsaye; y chabe uatsjédayénga chëjana imojtsachnéjuana ora, tmojanontsé trigo juatabebiana. ²⁴ Chë fariseunga chca imojinye ora, Jesúsbioye tmojaniana: —Minye. ¿Ntsámo acbe uatsjédayénga montsamcá, ndoñe quenátslesenciana ochnayté jtsamama ca?

²⁵ Pero cha tojanéjua: —¿Ndoñe šmëndualía y šmondétatsëmbo ntsámo Rey David y chabe enuténga tmojanmama shéntseca imojtsemna ora y jasama yojtséjaboto ora? ²⁶ Chca ora, Abiatar chë judiëngbe bachnangbe más uámana amëndayá inamna ora, David Bëngbe Bëtsabe yebnoye yojámashéngo, y chë luarentše Bëngbe Bëtsá yojamnama inýinynaye tandëšénga yojase; y chë cháftaca imojánajna entsángnaca yojátšataye. Y chë tandëšna nye bachnangbiana belesenciana jasama. Masque David chca tojanma, Bëngbe Bëtsá ndoñe tonjánayana David canye bacna soye tojanma ca.

²⁷ Y Jesús más tojánayana: —Bëngbe Bëtsá ochnayté entsábiana tojama y entsá ndoñe tbonjábema nye chë ochnayté ndoñe chaondëtrabajama. ²⁸ Chíyeca, Bëngbe Bëtsá Entšá tbojanbemá, ndayá entsá ochnayté tojtsama sóynaca jtsemándayana ca.

Chë buashana cucuatše bomna entšá

(Mt 12.9-14; Lc 6.6-11)

3 Chentšana, Jesús cachiñe chë judiëngbe enefjuana yebnoye tojésanamashëngo; y chentše canÿe boyabása yojtsemna, buashana cucuatše bomná. ²Chë fariseunga chiñe imojtserrondana jinÿama nderado Jesús chë ochnayté chábioye tabuanjashnama, as chca chënga jtsebomnama ndaye sóyeca cha mal jaquédana. ³Chora Jesús chë buashana cucuatše bomnábioye tbojaniana: —Chentše, entšangbe delante motsa ca.

⁴Y chë fariseunga tojanatjá: —¿Ndayá yojtselesenciana ochnayté jamama, tšabe soye o ndoñe tšabe soye? ¿Jatsbocama o jtsepochoćama ca?

Pero chënga ndocá tmonjanjuá, nÿe iytëca imojbiamá. ⁵Chora Jesús rábiaca y ngménaca chë fariseunga tojanëñyanÿé, chënga ainaniñe josértama ndoñe montseboše causa; y chë buashana cucuatše bomnábioye tbojaniana: —Macuenÿanéjaná ca.

As chë boyabása tojanacuenÿanéjaná, y chora tšabá chëtša yojtsatamna cach inÿetšacá. ⁶Pero chë fariseungna, chentšana tmojésanbocana ora, Rey Heródesbe ustonëngaftaca tmojanenoyeuná Jesusbe contra, y tmojanontšé juabnayana ntšamo jamëse Jesús jóbama.

Mallajta entšanga Jesúsbioye tmojanobeconá

⁷Chentšana, Jesús chabe uatsjëndayëngaftaca tojanoluaré mar béjaye tsachoye, y Galileocana bëtscá entšanga tmojanasto. ⁸Inÿe entšangnaca chábioye tmojanobeconá Judeocana, Jerusalenocana, Idumea ca uabaina luarocana, Jordán béjaye chenguanoicana, Tiro y Sidón públëngocana. Chënga

tmojanobeconá, Jesús tša bëts soyënga yojtsamama tmojanuena ora. ⁹Jesús chabe uatsjëndayënga tojanéyana: “Motsajna y canÿe barquëshá atšbiamá šmochjuapróna, tša entšanga ndoñe chašmondëtsatsëntšnama ca.” ¹⁰Er cha banga tojanashná, y chë causa, nÿetscanga šocana bomnënga chábioye tmojanajuatsëntšená cha jaboajuama.

¹¹Y chë bacna bayëjënga uambayëngna, Jesús tmojinÿe ora, betscó chabe shecuašentše imojtsofshëntsamëntšenaye, y chë bacna bayëjëngbeyeca mëntšá imojtsáyebuache: “¡Aca Bëngbe Bëtsabe Uaquiñá condmëna ca!”

¹²Pero Jesús puerte tojanamëndá, nda cha bëtsemnama entšangbe delante ndoñe chamondëtsichámuama.

Jesús chë bnëtsana uta uatsjëndayënga tojanabacacá

(Mt 10.1-4; Lc 6.12-16)

¹³Chentšana, Jesús canÿe batsjoye tojántsjua, y ndëmuanÿënga tšabá tbojaninÿnanënga tojánachembo. Y chëngna chábioye tmojanobeconá.

¹⁴Chora, chënguentšana bnëtsana útata tojanëbuáyana, chamotsetjëm-bambnama, y Bëngbe Bëtsabe soyëngama entšanga chámabuayenama; ¹⁵y chënga obenana tojanatšatá entšangbentšana bacna bayëjënga jtëbuacanama. ¹⁶Mënga mondmëna chë bnëtsana uta bocacánënga: Simón, chë ndábioye Pedro ca Jesús tbojanabaye; ¹⁷Santiago y chabe uabentsá Juan, Zebedeobe uaquiñata, chata tojanëbaye “boanerges ca”, y chca endayana “uajuesayabe uaquiñata ca”; ¹⁸Andrés, Felipe, Bartolomé, Mateo, Tomás, Santiago, Alfeobe uaquiñá; Tadeo, Simón chë celote ca uabobainá; ¹⁹y Judas Iscariote, chë chentšana ndoñe baytesna, Jesús uayayëngbe cucuatšiniñe bochjanboshjoná.

**Ley abuatambayenga tmojanayana,
Jesús Satanásbentsana obenana
tojanoyengacne ca**

(Mt 12.22-32; Lc 11.14-23; 12.10)

²⁰ Chentsana, Jesús yebnoye tojtanamáshengo, y tša entsanga chentše tmojanóoto; chë causa, ni cha ni chabe uatsjédayenga, ni mo jasama luare ndoñe imontsebomna. ²¹ Jesusbe pamíllanga ntšamo cha yojtsepásama tmojánatatsëmbona ora, tmojána cha jetsbetšama, er entsanga imojtsencuéntaye cha opá tojtsanóbema ca.

²² Y chë ley abuatambayenga Jerusalenocana tmojánashjajnëgna Jesusbiana mëntšá imojtsichamo: “Chabe ndegombre mandayá Beelzebú, cach Satanás yojtsemna. Cha, chë bacna bayëjenga amëndayá, Jesúsbioye obenana tbojatšetá entsángbentsana bacna bayëjenga chauatëbuacnama ca.”

²³ Chënga chca imojtsichámuama, Jesús chënga tojánachembo, y cuenténgaca tojanontsé jáuyanana, jinýanýiyama chënga canýe ndoñe ndegombre soyiñe imojtsemnama, mëntšá: “¿Ntšamo Satanás nantsobena cachá jtenábocnama ca? ²⁴ Canýe amëndayábentše entsanga tmojtsenojató y tmojtsenáyase, chë amëndayana ndoñe ntjatotonana. ²⁵ Cachcá, canýe yebnentše pamíllanga tmojtsenojató y tmojtsenáyase, chë pamíllanga ndoñe tšabá nyets tempo quemochátsmëna. ²⁶ Y cachcá, Satanás y chábenga ndoñe tmontsenëyeunana y cachabe contra tojtsemnëse, chabe amëndayana ndoñe más queochátstotona; y cha ya ndoñe más chëngbe amëndayá queochátsmëna.

²⁷ “Ndocná quenátobena canýe corente añemo bomna entsabe yebnoye jamashënguana y chabe soyënga jtsebocana, ndoñe natsana tconjshëtse-

batsëquëse. Nýe tcojshëtsebatsëquëse cocayé cuanjobenaye cha jefcana.

²⁸ “Ndegombre cbéyana, Bëngbe Bëtsá entsangbe nyetsca bacna soyënga echanjáperdonaye, y ntšamo Bëngbe Bëtsabiana y ínýengbiana ndoñe tšabá tmontsichamo soyëngnaca; ²⁹ pero chë Uámana Espíritbiana ndoñe tšabá ichámëngna ndocna te queocháta perdonaye, er nyetsca tescama castigánënga jtsemnama chënga jtsamnana ca” —Jesús tojánayana.

³⁰ Jesús chca tojanéyana, er chënga imojtsichamo cha bacna bayëja ibojtsambá ca.

**Chë Jesusbe ndegombre
pamíllanguentsënga**

(Mt 12.46-50; Lc 8.19-21)

³¹ Chëntscuana, Jesusbe mamá y catsátanga choye tmojánashjajna, pero nýe shjoca imojtsemna; y canýa tmojanichmó cha jachembuama. ³² Chë ba entsanga chentše chabe shëconana imojtsetbiámanëngna, chora tmojaniana: —Acbe mamá, acbe catsátanga y uabë-nanga shjoca montsemna; aca cmontsen-guá ca.

³³ Chora cha tojanéjua: —¿Nda atšbe mamá yomna, y ndëmuanýenga atšbe catsátanga ca?

³⁴ Chentsana, chë chabe shëconanana tbiámanëngbioye jarrepárase, tojánayana: —Quemënga mondmëna atšbe mamá y atšbe catsátanga. ³⁵ Er ndánaca, ntšamo Bëngbe Bëtsá yobošcá tojtsamá, jtsemnana atšbe catsáta, atšbe uabena y atšbe mamá, atšbe ndegombre pamíllanguentsá ca.

Chë jenabe cuento

(Mt 13.1-9; Lc 8.4-8)

4 Chentsana, uafjónoye tsachoca Jesús tojtëtanontsé Bëngbe Bëtsabe soyëngama jabuátambama. Mallajta

entsanga tmojanobeconá causa, chë uafjónayentše yojanamna canÿe barquëshoye Jesús tojánasëngo y tojanótbema; y chë entsanga tsachoca imojtsemna. ²Chora cuenténgaca ba soyéngama tojanabuatambá.

Mëntsá tojanéyana: ³“Šmochjouena; canÿe jená chë jénaye jaujuëshama yojéftsebocna. ⁴Yojtsëjquëshaye orna, básefta jénaye benache juachañe yojuatquécjana; pero jaja shloftšënga imojástjajna y lempe imojtsósañe. ⁵Inÿe meshëngna ndëtsbenguinë yojuatquécjana, ndoñe yapa fshantse binÿnentše. Chiñna betscó yojuábocna, ndoñe yapa jashenocana fshantse yojanmëna causa; ⁶pero yojuábocna orna, puerte yojojënyána y yojtsancta; y yojtsábojo yapa tbëtëjënga tondaye causa. ⁷Inÿe meshëngna uchmëshangañe yojuatquécjana; chë uchmashá yojuájua ora, lempe yojtsatscué, y chca, chë jénayentsana tondaye yonjuashájona. ⁸Pero inÿe meshëngna, uanguaniñe yojuatquécjana, y bëtscá tšabe shajuanënga chiñe yojóbcna: ínÿenache, canÿe meshentsana unga bnëtsana meshënga yojóbcna; ínÿenachna, chnénguana bnëtsana meshënga; y ínÿenachna patse meshënga ca” —cha tojánayana.

⁹Y chentsana, Jesús más tojánayana: “Chë jouenama tmojtsobenënga, šmochjouena ca.”

Ndáyeca Jesús cuenténgaca yojánabuatambaye

(Mt 13.10-17; Lc 8.9-10)

¹⁰Chentsana, Jesús canÿa yojoquéda ora, chë chabe béconana imojtsemnënga chabe bnëtsana uta uatsjëndayëngaftaca, tmojantjá ndayá chë cuento bétsayanama. ¹¹As Jesús tojanéjua: “Bëngbe Bëtsá tšëngaftanga cmontsinÿanÿná nÿetsca chë mo iytëmcá yomna soyënga chabe

amëndayama, pero chë ínÿengbioye ndoñe; chë soyéngama chënga lempe cuenténgaca sentsëtsësná. ¹²Chca, masque becá chamotsafšna, ndoñe chamondobená chë Bëngbe Bëtsabe soyënga jinÿama; y masque becá chë soyënga chamouena, ndoñe queochátësertana, chënga Bëngbe Bëtsábioye ndoñe chamondëtobéconama, y cha ndoñe chaondáperdonama ca.”

Jesús chë jenabe cuentama tojanabuayená

(Mt 13.18-23; Lc 8.11-15)

¹³Chentsana, Jesús tojanéyana: “¿Quem cuentama ndoñe tcmónjósertase, ntšamo chcase nÿetsca cuenténgama cmochjóserta ca?

¹⁴Chë jená endmëna chë tšabe noticiëngama abuayinyáy. ¹⁵Básefta entsanga mondmëna mo chë benache juachañe yojuatquécjana jenaycá. Chëngna Bëngbe Bëtsabiama soyënga jouenana; pero chora Satanás betscó jabana, chëngbe ainaniñe yojtsemna Bëngbe Bëtsabe palabra jabétsabuajuanama, chënga chiñe ndoñe chamondëtsošbuáchema.

¹⁶Inÿe entsanga mondmëna mo chë ndëtsbenguinë yojuatquécjana jenaycá; chëngna Bëngbe Bëtsabe palabra jouenana y oyejuayënga jtsemnana; ¹⁷pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, ndoñe yapa tmontsašbuaché causa. Inÿenga mochantsébuayënja, y Bëngbe Bëtsábeñe betsošbuáchiyama mochanjasúfrianga; chíyeca chënga Bëngbe Bëtsabe palabra cachcá mochanjesonÿaye. ¹⁸Inÿenga mondmëna mo chë uchmëshangañe yojuatquécjana jenaycá. Chënga Bëngbe Bëtsabe palabra mochanjouena, ¹⁹pero quem luarentša soyéngaca oyejuayënga jtsemnana yapa mochántseboše,

y n̄ye bomnana j̄eftsebomnama yapa mochanjésenojuabnaye. Ch̄e soyama y in̄ye ba soyëngama yapa enócochin̄yena causa, Bëngbe Bëtsabe soyëngama echantsebnétjomba, y ndoñe quemochátama nt̄samo Bëngbe Bëtsá tojayancá. ²⁰ Pero ín̄yenga mondm̄ena mo ch̄e uanguan̄iñe yojuatquécjána jenaycá. Chëngna Bëngbe Bëtsabe palabra botamana mochanjouena; n̄yets ainánaca mochántseprontana chiñe jtsošbuáchiyama. Mo can̄ye betiye becá t̄sabá tojtseshajuancá, chënga bëtscá t̄sabe soyënga Bëngbe Bëtsabiana mochántsama. In̄yenga ín̄yengbiana más bëtscá soyënga mochanjama; y chca, ín̄yenga mochántsemna mo ch̄e unga bn̄étsana meshe tojanshajo jenaycá, ín̄yenga mo ch̄e chn̄énguana bn̄étsancá, y ín̄yengna mo ch̄e patse meshënga tojanboté jenaycá ca” —Jesús tojánayana.

Ch̄e uajuin̄yanéshama cuento

(Lc 8.16-18)

²¹ Mëntsánaca Jesús tojánayana: “Ndocná juiyëbana can̄ye uajuin̄yanésha cajonëshe o jutsnésha tajsoye juajájuama. Ndoñe; uajuin̄yanésha juiyëbana tsbanánoca juajájuama, lempe chaotsebin̄yana. ²² Ndocna yoiytémena soye ntjin̄yencá queochaisoquéda, y ch̄e ndótatsëmbo soye ntsotatsëmbcá queochaisoquéda. ²³ Ch̄e jouenama tmojtsobenënga, šmochjouena ca.”

²⁴ Y mëntsánaca Jesús tojanéyana: “T̄sabá šmochjájuaoye nt̄samo šmojtsuenanama. N̄ye bat̄satema šmojouenëse, n̄ye bat̄satema cmochanjósertaye; pero añe t̄sabá šmojouenëse, chama corente cmochanjósertaye; y Bëngbe Bëtsá echanjama t̄šëngaftanga más soyëngama chacmósertama. ²⁵ Er

nda Bëngbe Bëtsabe soyëngama t̄sabá tbojosertá, Bëngbe Bëtsá echanjama cha más ba soyëngama chabosertama; pero nda ch̄e soyëngama josértama ndoñe tontsebošá, ch̄e n̄ye bat̄sá ibosertana soyëngama bochántsebnatjëmba ca” —cha tojánayana.

Ch̄e ojuajna jenayama cuento

²⁶ Jesús mëntsánaca tojanéyana: “Bëngbe Bëtsabe amëndayana endm̄ena mo nt̄samo can̄ye boyabása jénaye tojuatbontsá ora echandbopasacá: ²⁷ masque cha cada ibeta jtsojájuaana y bn̄eté jotsbanama, ibeta o bn̄eté, ch̄e jénayentsána juabocnana y juájuaana, nt̄samo chca yojtsájuaajnama ch̄e boyabása ntjatstatsëmbcá. ²⁸ Ch̄e fshantse cachabe ponto jamana ndayánaca chiñe chaójuama; natsana tsbuanachëtema jóbocnana, chentsána ch̄e espiga, y chentsána ch̄e meshënga jashájonana. ²⁹ Y ch̄e meshënga ya tojtsebóchichna orna, játbanama jabocnana, ch̄e saná josháchiñama ora ya tojobuácheyeca ca” —Jesús tojánayana.

Ch̄e mostaztiye jenayama cuento

(Mt 13.31-32; Lc 13.18-19)

³⁰ Jesús mëntsánaca tojanéyana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenama? ³¹ Endm̄ena mo can̄ye mostaza jénaye jajoca tcojajecá. Ndegombre, n̄yetsca quem luarent̄ša jenayëngama, mostaza jénaye ch̄e más bāsetema endm̄ena; ³² pero tcojajé orna, jójuana, y jajañe ch̄e más bēts betiye jóbemana, ba bēts buacuashëngaca; chíyeca ch̄e jaja shloft̄sënga jana y chiñe uajajonëtemëngá jauábopormana ca.”

**Ndáyeca Jesús cuenténgaca
entšanga yojanabuayiná**

(Mt 13.34-35)

³³ Chca Jesús Běngbe Bětsabe soyěngama entšanga yojanabuatambá, ba cuentěnguentšana, mo chě tmonjouena cuentcá, ntsachetšá chě entšanga josértama tmojobenacá. ³⁴ Tondaye yonjanabuatambá ndoñe cuenténgaca ntseměncá; pero chabe uatsjéndayěngna lempe yojanabuayiná, cányenga tmojtsemna ora.

**Jesús chě binýia y chě bėjaye
bonguana yojětsbema**

(Mt 8.23-27; Lc 8.22-25)

³⁵ Cach te, yojtseibétatana ora, Jesús chabe uatsjéndayěngna tojanéyana: “Uafjajónaye chenguana cuajna ca.”

³⁶ Chorna, chě entšanga jesabáshe-juaněse, chě uatsjéndayěngna Jesús tmojtšanánatseñe, cach yojánenjaquena barquěshañe; y inýe entšágnaca inýe barquěshangañe tmojanasto.

³⁷ Chentšana, chě uafjajónaye bėjayiñe tša jabuache binýia yojóshjango; olěshěngca chě barquěsha imojtsětsbotsana, y chě causa chě barquěsha yojóntša búyeshca jtsobuajútjiana.

³⁸ Y chěntscuana, barquěsha stětšoica, tsěntšeněshañe Jesús yojtsomañe. Chora chě uatsjéndayěngna tmojtšanfšená y tmojanianyana: —¡Buatěmbayá! ¿Tondayana cmontsentšamna běngca chašotsěnatjěmbama ca?

³⁹ As Jesús tojantsbaná, chě binýia tbojanácacana, y chě běts uafjajónayoye tojánayana: —¡Natjěmbana cochtsemna! ¡Bonguana ca!

Y cachora chě binýia yojětstěcja, y lempe bonguana yojtsatsměna. ⁴⁰ Chora chabe uatsjéndayěngna tojanéyana: —¿Ndáyeca tša šmojtsauatja? ¿Běngbe

Bětsá tšěngaftanga jujabuáchama yobename cabá ndoñe šmontsošbuaché ca?

⁴¹ Chama, chěngca puerteauatjanáněngca imojtsemna y měntšá imojtsenatsětsnaye: “¿Nda quem boyabása yomna? Cha tonjayana y chě binýia y chě bėjaye tmonjoyeuná ca.”

**Chě Gerasa luaroca
bacna bayějja uambayá**

(Mt 8.28-34; Lc 8.26-39)

5 Chentšana, uafjajónaye chenguánoica tmojánashjajna, Geraseno ca uabaina entšangbe luaroye. ² Jesús barquěshoicana tojánastjango, y cachora, chě obaněngbe cuevěshěnguentšana canýe entšá, bacna bayějbe juabna uambayá, tojánbocna y tbojanjéngca. ³ Chě boyabásana, obaněngbe cuevěshěnguenache inoyena, y ndocná yonjobena cha jtsebátsěcana, ni mo cadenějuangaca; ⁴ er ba soye cadenějuangaca y inýe soyěngaca cha nýetsá tmojanbatsěca, pero cha nýetsca soye yojtsátabebe y yojtsenájaca, y ndocná yonjobenaye cha bonguana chaotsemnama. ⁵ Nýets tempo, bněté y ibeta, obaněngbe cuevěshěnguenache y tjañenache yojánana yoye, y ndětsběngaca enotsetšenaye. ⁶ Jesúsbioye bēnocana tbojáninýe ora, chábioye tojanótjajo y chabe natsanoica yojoshěntsamentšiyi; ⁷ y měntšá yojtsáyebuache: —¿Ndayá átšeftaca cojtseboše, Jesús, celoca Běngbe Bětsabe Uaquiñá? ¡Běngbe Bětsabe delante cboimpadá, ndoñe šcatjatsětšená ca!

⁸ Chca tbojanianyana, er Jesús chábioye tbojanianyana: —¡Bacna bayějbe juabna, chábentšana maisebocna ca!

⁹ Chentšana Jesús tbojantjá: —¿Ntšamo cabaina ca?

Y chě bacna bayějěngbe juábna cha tbojanjuá: —Atšna Legión ca sěndu-abaina, bětsčanga fsěndměna causa ca.

¹⁰Y tša Jesús ibojtserruana chë luarentšana ndoñe chaondëtëbuacanama.

¹¹Chentša béconana ba cotsënga imnájena, batsjoca imnétsoña; ¹²as chë bacna bayëjënga Jesúsbioye tmojanimpadá: —Chë cotsëngbioye šmichamó, chëngbeñe fchayamashjna ca.

¹³Y Jesús añe tojanalesencia; as chë bacna bayëjënga chë entšábentšana tmojésanbocana y chë cotsëngbeñe tmojánamashjna. Cachora chë mo uta uaranga cotsënga batsjocana peñesëjana uafajónayoye imojtsoshbuetše y vojtsatajo.

¹⁴Chora, chë cotsënga anýenënga tmojtsanacheta auatjanánënga, y tmojána chama jacuéntama chë puebloca y chabuenache; y entšanga tmojánabo ntšamo tojanopasacá jinýama. ¹⁵Jesús yojtsemnoye chë entšanga tmojánashjajna ora, tmojáninýe chë tempo bacna bayëjënga uambayá, inétsoñbemañe, entšayá uichëtjoná y chabe nyets juábnaca. Y chë entšanga chama imojtséuatjaná.

¹⁶Chë tmojáninýënga imojtsecuëntaye, ntšamo chë bayëjbe juabna uambayáftaca tojanopasama, y chë cotsëngaftaca ntšamo tojanopasámñaca.

¹⁷Chora chë entšanga tmojanontšé Jesús impadánana chë luarentšana chaotsatoñama.

¹⁸Jesús chë barquëshoye tojtanášëngo ora, chë tempo bacna bayëjbe juabna uambayá tbojanimpadá chabolesencia cháftaca jama ca. ¹⁹Pero ndoñe tbonjanlesencia, sinó mëntšá tbojaniana: “Acbe yebnoye motsatoñe, acbe pamíllangbioye, y cochjácuntaye ndayá Bëngbe Utabná ácaftaca tojamama, y ntšamo cha ácbioye tmojalastemama ca.”

²⁰Chentšana, chë entšá yojtsatoñe y tojanontšé Decápolis uabaina publënguenache jacúntana lempe ntšamo Jesús cháftaca tojanmcá; y nyetscanga imojtsenjanaye.

Jesús canýe shembásabioye tbojanshná y Jairëbe bembetëmbioye tbojtanayená

(Mt 9.18-26; Lc 8.40-56)

²¹Chentšana, Jesús cachiñe chë uafajónaye chenguana tojesaná barquëshañe. Chocna ba entšanga tmojanobuashconá, y Jesús chë uafajónaye tsachañe yojtsemna. ²²Chorna, tojánashjango chë judiëngbe enefjuana yebnentša canýe mandayá, Jairo ca uabainá. Jesúsbioye tbojáninýe ora, chábentše tojanoshëntsamentšé, ²³y tša ibojtseimpadana, mëntšá: —Atšbe bembetema ya echantsóbana; Diosmanda mabo, acbe cucuatšënga chábeñe cochjájajua, salud chauatinýenama y cháuatayenama ca.

²⁴As Jesús cháftaca tojána; pero bëtscá entšanga imojtséstona, chábíoye imojtsenatséñtšenaye. ²⁵Chë entšanguentše yojtsaye canýe shembása šocá; cha ya bnétsana uta uata oboftjajuanánaca inapadecena. ²⁶Cha puerte tojansufrí, ba ashnayëngbe cucuatšíñe, y lempe ntsachetšá inabomncá tojanpochocá jenóshnama; pero ndoñe ibontsatstéccajana, nye más peor ibojtsobiamnaye. ²⁷Chë shembása yojouena ntšamo Jesús ba šoquënga tojánashnama, y as stëtšoicana entšangbe tséntsajana yojobeconá, y Jesusbe entšayá yojauábojajo. ²⁸Cha chca tojanma, er yojtsejuabnaye: “Masque nye mo chabe entšayá sibiájua chaijuábojajo, y salud chantsatsbomna ca.” ²⁹Y cachora chë oboftjajuanana ibojtsobojuána; y chabe cuerpiñe ibojebiónana ya tšabá yojtsatsmënama. ³⁰Chora Jesús yojaséntia chábentšana obenana yojóbocnama, mo ndábíoye tbojashná orcá; as cha tojanobuértana entšangbeñe y tojanatjá: —¿Nda atšbe entšayá tojuabojajo ca?

³¹ Chabe uatsjéndayënga tmojanjuá: —Aca contsonýá chë entsanga cmontsat-sëntsená, y cabá cochjátsnoticiaye nda entsáyá tojuabojajo ca.

³² Pero Jesús cátoye yojtserreparana jinýama nda tbojánbojajuama. ³³ As chë shembása, chë ntšamo cháftaca yojopásama jtsetatšëmbëse, tojanobconá ngmëmnyá y auatjananá, chabe natsanoica tojanoghëntsamentšé, y lempe ntšamo ndogombre cháftaca tojanopasacá Jesúsbioye tbojanianyana. ³⁴ Chora Jesús tbojanianyana: —Bembe, Bëngbe Bëtsábeñe icošbuachéyeca shnaná contsatsmëna. Natjëmbana motsatoñe; acbe šocana tontsopochocá ca.

³⁵ Jesús cabá yojtsóyebuamb-nantscuana, báseftanga tmojánashjajna chë judiëngbe enefjuana yebnentša mandayabe yebnocana, y chë shembásetembe taitá tmojanianyana: —Acbe bembe tontsóbana; ¿ndayama más Buatëmbayá chama cochjátebëyaboma ca?

³⁶ Y Jesús, ntšamo chënga imojtsichamcá ntjatuenancá chë judiëngbe enefjuana yebnentša mandayábioye tbojanianyana: —Ndoñe matauatjana. Nýe Bëngbe Bëtsábeñe cochtsošbuáchiye cha tšabá chaotsatsmënama ca.

³⁷ Y Jesús ndoñe tonjanalesenciá Jairëbe yebnoye banga chamuastama; nýe Pedro, Santiago y Juan, Santiagbe uabentsana, aíñe. ³⁸ Chentšana, chë mandayabe yebnoye tmojánashjajna ora, Jesús tojánanyë entsanga tša imojtsenbouenana, entsanga imojtsošachiye y puerte ngmënaca imojtseyoye. ³⁹ As chë yebnoye tojánamashëngo y chë entsanga tojanéyana: “¿Ndayama tša šmojtzenbouenana y tša šmojtšendëntjana? Chë shembásetema ndoñe chenatóbana, nýe endëtsomañe ca.”

⁴⁰ Pero entsanga nýe imojtsáfchaye. As Jesús nýetsca entsanga shjoye tojtanëbuacna, y tojéftsanëbiatšë chë basetembe bëtsétsata y chabe enutënga; y chë shembásetema yojtsemnoye tojánamashëngo. ⁴¹ Chora Jesús tbojanábuacueshache y cachëngbe biyañe tbojanianyana: “Talita, cum ca.” (Chca endayana “Shembásetema, matëtsbaná ca”.)

⁴² Cachora, chë bnëtsana uta uata bomna shembásetema tojtantsbaná y yojtsobena jama. Y chë entsanga chama imojtsenjnanaye. ⁴³ Pero Jesús corente tojanamëndá ndocnábeñe chama ntse-cuëntayana ca, y tojanamëndá chë básetema saná chamuiyë chaosama.

Jesús Nazaret puebloca

(Mt 13.53-58; Lc 4.16-30)

6 Chentšana Jesús tojéftsanbocna y cachabe luaroye tojtanashjango, y chabe uatsjéndayënga cháftaca tmojána. ² Ochnayté tojanobuache ora, Jesús tojanontšé chë judiëngbe enefjuana yebnentšë entsanga jabuátambana.

Chë ba entsanga cha jóyebuamb-bayama tmojanuenënga, imojenjnaná y tmojánayana: “¿Ndëmoca quem boyabása lempe chca tojuatsjinýe? ¿Ndaye osertánana mua tmojatšëta, y ntšámoyeca cha yojtsobena chca bëts soyënga jtsamana ca? ³ ¿Mua ndoñe chë calpintero yondmëna, Mariybe uaquiná, y chabe catšátanga ndoñe mondmëna Santiago, José, Judas y Simón; y chabe uabëngnaca muentšë ndoñe bëngaftaca mondoyena ca?” —chënga imojtsichamo.

Chë causa chënga tmojanotjayaná, y ndoñe montseboše joyeunayana. ⁴ As Jesús tojanéyana: “Nýetsca luarëngue-nache canýe Bëngbe Bëtsabe juabna oyebuambnayábioye bëtsá jabemana, pero ndoñe chca cachabe luarentšë, ni

cachabe pamíllangbenache, ni cachabe yebnentše ca.”

⁵Chë entsanga chentše chábeñe ndoñe montsanošbuaché causa, Jesús ndoñe tonjanobená ni canye bëts soye Bëngbe Bëtsabe obenánaca chentše jëftsemana; nye básefta šoquëngbeñe cucuatšënga tojanajó y tojanashná. ⁶Jesús ojnananá yojtsemna cachábentša entsanga chábeñe ndoñe montsanošbuaché causa.

Jesús, chabe uatsjédayënga tojanichamó Bëngbe Bëtsabe amédayama jábuayenama

(Mt 10.5-15; Lc 9.1-6)

Chentšana, chë chaboye base publënguenache Jesús yojánana, Bëngbe Bëtsabe soyëngama abuátambaye. ⁷Y chë bnétsana uta uatsjédayënga Jesús tojánachembo, y utáta ínjoye tojanichamó, entsángbentšana bacna bayëjënga jtëbuacnama obenana jatsatayëse; ⁸y mëntšá yojáuyana: “Benachiñama tondaye šmattsambaye, nye canye jatjonëfja; ndoñe šmattsambaye saná, ni shecnaja, ni crocénana uasnanëchiñe. ⁹Nduámanëshe šmochjesóshecochëtjo, y nye canyájua šmochjesíchëtjo ca.”

¹⁰Mëntšánaca tojanëyana: “Posada chacmojúyentsame yebnentše šmochtsoquedañe inye puebloye játantscuana. ¹¹Canye luaroye chašmojáshajna y ndocná posada chacmonjuyentsame, y joyeunayama ndoñe chamontsebošëse, chentšana šmochjésebocana, y shecuatšëntša polvëshe šmochjésenstoto, chca, chëngbioye jinyaníyama chënga ndoñe tšabá tšëngaftangafata tmonjamama ca.”

¹²Chentšana, chë uatsjédayënga tmojëtsanbocana y entsanga imojánabuayiyenaye, chë tšabe benache chámuatishachama, bacna soyënga

amana jtsajbanase. ¹³Entsángbentšana ba bacna bayëjënga tmojtanëbuacna, y ba šoquënga aceitíyeca tmojananétotjo y tmojanashná.

Ntšamo Juan chë Ubayaná tojanóbana

(Mt 14.1-12; Lc 9.7-9)

¹⁴Rey Herodes Jesusbiamá yojátatšëmbona, er nyëtsquénache nyëtsca entsanga chabiamá imojtsóyebuambnaye. Entsanga Jesusbiamá imojtsichamo: “Juan chë Ubayaná obanënguentšana tojtayena, chíyeca cha chca obenana yojtsebomna ca.”

¹⁵Inyëngna imojtsichamo: “Cha entsemna chë Bëngbe Bëtsabe juabna oyebuambnayá Elías ca.”

Y ínýëngna: “Muana canya Bëngbe Bëtsabe juabna oyebuambnayá, mo chë tempsquëngcá ca.”

¹⁶Heródesna ntšamo entsanga Jesusbiamá imojtsichamcá tojanuena ora, tojánayana: “Mua Juan entsemna, chë atše sënjanmandá bestšaše chamotsëstjanguamá, mora obanënguentšana tojtayena ca.”

¹⁷Juan cabá ainá ora, Herodes tojanmandá cha chamishache, cadenëjuangaca chamobátsëca y chca cárceloye jutámiamá. Herodes chca tojanma Herodíasbe causa, chabe uabentsá Felipbe shema. Herodes chë shëmaftaca tojanobouamá, Felipe cabá ainá ora. ¹⁸Y chama, Heródesbiyoye Juan ibojánbuayiyenaye: “Ndoñe quenátslesenciana acbe uabentsabe shema acbe shema chaotsemnana ca.”

¹⁹Chë causa, Herodías Juánbiyoye puerte ibojuáya, y yojánbošë jtsóbama; pero ndoñe yontsobena, ²⁰er Herodes yojántatšëmbo, Juan canye nyëtsca soyënguñe tšabá amá, nye Bëngbe Bëtsábuiyoye sempre oservená inamnana. Chama cha yojánauatja y ndoñe

yonjanaleséncia cha chamóbama. Y Juan Bëngbe Bëtsabe soyëngama Heródesbioye tbojtsebuaiyiná ora, ntšamo jajuaboyana ndoñe yontsetátšëmbo, pero masque chca, oyejuayá Juánbioye ibnayeunana. ²¹ Pero Herodías tojáninÿena mocna ora Juan chamóbama. Heródesbe cumpleaño oboyejuaye ora, bëtscá saná tmojanprontá, y Herodes yojúbuaja chabe amëndayënga, soldadëngbe amëndayënga y Galileoca uámana entšanga. ²² Chora, chë oboyejuaye luaroye Herodíasbe bembe tojánamashëngo, tojanlantsá, y Herodes y nÿetsca ófjanënga chama tša imojtsóyejuaye. As chë rey, chë tobiášbioye tbojanianyana: —Ndayánaca šmotjañe y atše cbochjátšetaye ca.

²³ Y jajúrase, mëntšá tbojanšbuachená: —Ntšamo chašcojotjañcá cbochjátšetaye, masque atšbe amëndayentša bomnantšana tséntsáñnaca ca.

²⁴ Chentšana, chë tobiáše yojéftsebozna y chabe mamábioye ibojatjaye: —¿Ndayá chjotjañe ca?

Y chabe mamá ibojojuá: —Juan chë Ubayanabe bestšaše ca.

²⁵ Cachora chë tobiáše betscó chë rey yojtsemnoye tojtanamáshëngo, y tbojanianyana: —Atše séntseboše, cam ora Juan chë Ubayanabe bestšaše canÿe šcnenëšinë chašcuatšetá ca.

²⁶ Herodes chama corente tbojanongmé, pero chë entšangbe delante y jajúrase tbojanšbuachená causa, ndoñe yonjobenaye ntšamo tbojanianyancá jebëbuetámenana. ²⁷ Cachora chë rey canÿe soldado ibojíchmua, Juanbe bestšaše chauiyëbama. ²⁸ As chë soldado cárceloye tojána, Juánbioye bestšaše tbojtsanéstjango, y canÿe šcnenëšinë tojanamba. Chë tobiášbioye tbojanëntšabuaché, y chana, chabe mamábioye.

²⁹ Juanbe ústonënga chama imojátatšëmbona ora, choye tmojánashjajna, chabe cuerpo tmojésanocñe y jauátbontsama tmojána.

Jesús shachna uaranga boyabásenga saná tojanacaredadó

(Mt 14.13-21; Lc 9.10-17; Jn 6.1-14)

³⁰ Chë Jesús tojánichamonga chábioye tmojtashjajna ora, lempe ntšamo tmojanmama y tmojanabuatambama cha tmojancuentá. ³¹ Chora Jesús tojanéyana: “Cuajna ínÿoye, entšanga ndoyena luaroye, batšatema jóchnama ca.” Cha chca tojánayana, er tša entšanga imojtsaye y imojtsabëbana; ni mo jasama ndoñe luare imontsebozna.

³² As cánÿenga barquëshañe tmojtanoñe, entšanga ndëbínÿnoye. ³³ Pero chënga imojtsoñama entšanga tmojánanÿe, y ndëmuanÿenga imojamnama imojtsetátšëmbo; chcasna, chë entšanga shecuátšeca betscó tmojána, nÿetsca pueblënguentšana, y chëngbe natsana choye tmojánashjajna. ³⁴ Chentšana, chë barquëshoicana tojánastjango ora, Jesús ba entšanga tojánanÿe; chëngbiama tbojanongmé, er imojtsemna mo abujénÿa ndbozna oveshëngcá; y tojanontsé ba soyëngama jajuátambana.

³⁵ Ya jetiñe yojtsemna orna, chabe uatšjëndayënga tmojanobobconá y tbojanianyana: —Ya jetiñe entsemna, y quem luarinë ndocná quenatiyena. ³⁶ Entšanga cuantichamuá, pueblotëmëngoye y inÿe luarëngoye chamotsoñama, ndayánaca jasama chamobuámiñama ca.

³⁷ Y Jesús tojanéyana: —Tšëngaftanga saná chëngbioye šmochjacaredádaye ca. Chora chënga tmojanianyana: —Crocénana queftsátsbozna, uta patse denario nÿetšá, chëfta entšangbiama saná jajuámiyama ca.

³⁸ As Jesús tojanéyana: —¿Bueta tandëse šmojtsebozna? Marrepáringa ca.

Ya imojtsetátšëmbo ora, tmojanianyana: —Shachna tandëse y uta beónata fséntsebomna ca.

³⁹ Chora Jesús entsánga tojanamëndá ínÿoca ínÿoca chamoshéntsjatbiamama.

⁴⁰ As chénga tmojanotbiamá patse patsénga y shachna bnétsátsanénga.

⁴¹ Chora Jesús ché shachna tandëse y ché uta beónata tojanca, y celoye jontjeshiyése, Bèngbe Bètsábioye chama tbojtanchuá. Chentšana ché tandëšénga tojanjatá y chabe uatsjéndayénga tojanayentsbuaché ché entsánga jatstatayama. Y ché uta beónatnaca nÿetscanga tojanējátaye.

⁴² Nÿetscanga tmojanse jtoshachaye nÿetsá. ⁴³ Y chentšana, ché tandëse y ché beonentsána ojammnētéménga tmojanatbaná, y bnétsána uta sbarécua tmojanajutjé. ⁴⁴ Ché saná tmojansénga imojamna shachna uaranga boyabásenga, shembásenga y básenga ntjacuntacá.

Jesús bėjaye juatsbuacá yojsaye

(Mt 14.22-27; Jn 6.16-21)

⁴⁵ Chentšana, Jesús chabe uatsjéndayénga tojanamëndá ché barquëshoye jtašnjama, ché uafjajónaye chenguana jangana y chabe natsana Betsaida ca uabaina puebloca jashjajnana. Chénga imojtsebocanentscuana, Jesús ché entsánga yojtichamuá. ⁴⁶ Nÿetscanga tojtanadiošoftá ora, tjoye cha tojtsanoñe Bèngbe Bètsáftaca jencuéntama.

⁴⁷ Yojtseibétatana ora, ché barquëshá uafjajónaye tséntsaca yojtsamna, y Jesús, canÿa fshantsoca. ⁴⁸ Jesús tojáninÿe chéngbiamá totcá yojtsemna, ché barquëshaca natsanoye jtsayana, er binÿia chéngbe contra yojtsemna. Ya binÿiana ora, chéngbioye yojobeconá, bėjaye juatsbuacá yojsaye, y ya chéngbiajana nÿe ndericho jachnenguama yojtsemna. ⁴⁹ Y chénga, ché bėjaye juatsbuacá cha yojsayama tmojáninÿe

ora, tmojanjuabó cha canÿe añemése yojtsemna ca, y tmojanontsé yoyana; ⁵⁰ er nÿetscanga chca tmojáninÿe y cochauatjanánénga imojtsemna. Pero Jesús cachora tojanéyana: “¡Añemo šmochtsebomna; atše Jesús sèndmèna; ndoñe matauatjéngana ca!”

⁵¹ Chorna, chénga imojtsemna barquëshoye cha tojánášéngo, y ché jabuache binÿia tojanéjbana, y ché nÿetscanga puerte auatjanánénga y ojnanánénga imojtsemna. ⁵² Chénga tmojáninÿe chéfta entsánga tandëse jujátayana, pero chéngbe ainanoca cabá ndoñe imontsobena josértana, Jesús lempe jamama obená bétsemnana.

Genesaret ca uabáinoca Jesús ba šoquénga tojanashná

(Mt 14.34-36)

⁵³ Ché uafjajónaye tmojánenashbuachengo ora, Genesaret ca uabaina luaroye tmojánashjajna, y ché uafjajónaye tsachoca ché barquëshá tmojanétsbua. ⁵⁴ Ché barquëshoicana tmojánastjajna y cachora entsánga Jesús tmojantémbá. ⁵⁵ Chíyeca, ché luariñe yebnènguenache betscó chénga tmojána, y tmojanontsé ché šoquénga tjuashènguñe juyambana, ché ndémoye tmojanuena Jesús yojtsemna luaroye. ⁵⁶ Y ndayentše cha tojámashèngüentše, pueblènguñe, bèts pueblènguñe y base pueblotémènguñnaca, ché šoquénga benachoye imojtsèbuacana, y Jesús corente imojtseimpadana ché šoquénga chaualesenciá, nÿe mo chabe entsáyá sibuájua juabojajuana. Y nÿetscanga tmojuábojajénga tšabá imojtsatsmèna.

Ndáyeca canÿe entsá Bèngbe Bètsabe delante ndoñe tšabia nántsemna

(Mt 15.1-20)

7 Chentšana, fariseunga Jesúsbioye tmojanobeconá y báseftanga ley abuátambayéngnaca, Jerusalenocana

áshjajnënga. ²Chënga tmojáninÿe básefta Jesusbe uatsjëndayënga, cabá ndase ora, ndoñe montsacuentšabiá ntšamo chë judiënga imojanamancá. ³Er chë fariseunga y nyetsca judiënga imojanamana jtsacuéntšabiana ba soye, ndayá jasama ora, ntšamo chëngbe bëtš taitanga imojanamancá. Chënga imojanjuabná, chca jtsamëse Bëngbe Bëtsabe delante tšábënga jtsatsmënama ca. ⁴Chë sananga enocana tmojtashjango ora, ba soye ndoñe tmontsacuentšabese, tondaye ntjasana; y ba soyëngnaca imojánama, pero nÿe chëngbe bëtš taitanga chca jamana imojanamánayeca, mo chë béjayeca juabáyana tazëšënga, matbajënga, calderëshënga y jutsnëshangá. ⁵Chë causa, chë fariseunga y chë ley abuátambayënga Jesús tmojantjá: —¿Ndayëca acbe uatsjëndayënga ndoñe montsama ntšamo bëngbe bëtš taitanga monjanamancá, y montsesá ntsacuéntšabiase, ndoñe ntšamo bënga judiënga fsënduamancá, Bëngbe Bëtsabe delante tšabá jtsatsmënama ca?

⁶Chora Jesús tojanéyana: —Nÿe tšabá chë Bëngbe Bëtsabe juabna oyebuambnayá Isaías tšëngaftangbiana tojánayana, bacna entšanga chë ntšamo ndegombre šmojuabnacá ndinÿinÿnayënga ca, mëntšá enduabemanentše:

Quem entšanga mondbëtsichamo Bëngbe Bëtsá tša tšabia yomna ca; chca nÿe uayásaca, pero chëngbe ainanentše ndocna tšabe juabnéngaca.

⁷Pero chënga nÿe bonamente mondbëtsichamo Bëngbe Bëtsá tša tšabia yomna ca; chënga nÿe entšangbe mandënga jtsabuátambayana, y Bëngbe Bëtsabe mandënga ndoñe ca —cha tojánayana.

⁸Chora Jesús tojanéyana: —Ntšamo Bëngbe Bëtsá tojanmandacá stëtsoye tšëngaftanga šmojtsequedá, nÿe ntšamo entšanga monduamancá jtsamama ca.

⁹Y mëntšánaca tojanéyana: “Tšëngaftanga ntšamo Bëngbe Bëtsá tojanmandacá stëtsoye jtsequédana, nÿe ntšamo tšëngaftangbe anteunga imojanamancá jtsamama. Tšëngaftanga jtsejuabnayana tšabá šmojtsama ca chca šmojtsama ora. ¹⁰Moisés tonjánayana: ‘Acbe bëtšëtsata ndoñe stëtsoye catjáquedaye’, y ‘nda chabe bëtšëtsatbiana ndoñe tšabá tonjoyebuambá chana, jóbánama jtsemnana ca.’ ¹¹Pero tšëngaftanga šmondbëtsichamo, canÿe entšá yobena chabe taitá o chabe mamá jáuyanana: ‘Lempe sëndbomna soyënga corbán entsemna, chíyeca ndoñe quetsátobena juajabuáchana ca’ (corbán endayana “Bëngbe Bëtsabiana uátšëmbona soyënga ca”).

¹²Tšëngaftanga šmondbëtsichamo, nda chca tojayanëse, ya ndoñe obligacionaca ntsemnana chabe taitá o mamabiana ndayánaca jamama ca. ¹³Chca, tšëngaftanga šmontsama entšanga Bëngbe Bëtsabe palabra stëtsoye chamoquedama, mo tondaye tontsamancá, chë cuenta jtsamama ntšamo anteunga imojanamancá, ntšamo entšángbeñe tempscana y mëntšcoñama yochnejuanca. Y ba soyënga tšëngaftanga cachcá šmontsama ca” —Jesús tojánayana.

¹⁴Chora Jesús, cachiñe entšanga tojtanachembo y tojanéyana: “Nyetscanga šmochjouena y chacmësertá. ¹⁵Ndayá entšá tojtsesacá, ndoñe ntjábemana ndoñe tšabia Bëngbe Bëtsabe delante. Inÿetšá comna: ntšamo entšá tojtsejuabná y tojtsoyeuambnacá endobena jabemana ndoñe tšabia Bëngbe Bëtsabe delante.

¹⁶ Chë jouenama tmojtsobenënga, šmochjouena ca” —cha tojánayana.

¹⁷ Jesús entšanga tojéftsanabashejuana y yebnoye tojtanamáshëngo ora, chabe uatsjëndayënga tmojantjá ntšamo cha tojánayanama. ¹⁸ As cha tojanéyana: “¿Tšëngaftángnaca cabá ndoñe cmontsésertana ca? ¿Cabá ndoñe cmontsésertana, lempe ntšamo entšá tojascá ndoñe ntsobenana chábioye jabemana ndoñe tšabia Bëngbe Bëtsabe delante; ¹⁹ er ainanoye ndoñe ntjómashënguana, sinó uafsbioye, y chentšana cuerpentšana jtabocnana ca?”

Y chca, Jesús tojánayana nyetsca sananga tšabá jasama yomna ca y chë saná ndoñe ntjamana canye entšá bacna soye chaotsamama ca. ²⁰ Y mëntšánaca tojánayana: “Ntšamo chë entšá tojtsejuabná y tojtsoyebuambnacá, chë soye cocayé endobena entšá jabemana ndoñe tšabia Bëngbe Bëtsabe delante. ²¹ Er ainanocana jtsóbocanana bacna juabnënga: shembásaftaca o boyabásaftaca bacna soye jamama, jatbëbama, jóbama, ²² bacna juabnënga boyá o shëmbioye ínÿaftaca jáingñama, jtsatbomnayama, nyetsca bacna soyënga jamama, ínÿenga jáingñama, nÿe cachá jenomándama ntsobencá jtsiyenama, ínÿabioye jtsántšabošama, ínÿabiama jtsayátsenayama, jtsenábotamnayama y nÿe opënga jtsobiamnayama. ²³ Nyetsca quem bacna soyënga entšabe ainanocana jóbocnana, y cha jabemana ndoñe tšabia Bëngbe Bëtsabe delante ca” —cha tojánayana.

Canÿe shembása inÿe luarocana ashjanganá Jesúsbeñe yojtsošbuaché

(Mt 15.21-28)

²⁴ Jesús chentšana, Tiro ca uabaina luaroye tojtsanoñe, y canÿe yebnentše tojánamashëngo. Cha yojtseboše ndocná chiama chaondëtsetatšëmbuama;

pero ndoñe yonjobenaye iytëmenana jatsmënana. ²⁵ Y betesco, canÿe shembása, canÿe bembe bacna bayëjbe juabna uambayá ibnabomná, Jesusbiana oyebuambnayana yojouena ora, chábioye tojánabo y chabe shecuatsëntše tojanoshëntsamentšë.

²⁶ Chë shembása ndoñe yonjamna judiá, sinó Sirofenicia luarocá. Tojánabo y Jesúsbioye tbojanimpadá chabe bembetëmbentšana bacna bayëja chabuátábocnama. ²⁷ Pero Jesús tbojaniyana: —Atše šondmëna natsana judío entšangbiana chë soyënga jamana; chentšana cocayé chanjobenaye chca inÿe entšangbiana jamana. Atše acbiana, canÿe ndoñe judiá, soyënga stjämëse, nántsemna mo chë básengbe saná quešënga cuaftsëbuajocá ca.

²⁸ Y cha tbojanjuá: —Arseñor, chca jtsemnana. Pero chë quešëngnaca mondbase chë básenga tmojtsesá ora tmojatquécjanatemënga. Chcasna, Diosmanda átsnaca šmotsajabuache ca.

²⁹ As Jesús tbojaniyana: —Tšabá tcjayana; chcasna, acbe yebnoye mot-satoñe. Chë bacna bayëja acbe bembetëmbentšana tonjësebocna ca.

³⁰ Chentšana, chë shembása chabe yebnoye tojtaná, y tbojáninÿena chë bembetema jutsnëshentše yojtsojajoñe, y chë bacna bayëja ya ndoñe chábeñe yontsemna.

Jesús, canÿe boyabása tësmá y ndëbiábioye tbojanshná

³¹ Tiro pueblentšana Jesús tojéftsanbocna, y Sidón y Decápolis luarentša pueblënguëjana jachnënguse, Galilea uafjajónayoye tojánashjango.

³² Cha chentše yojtsemna ora, chábioye tmojanánatse canÿe entšá tësmá y ndëbiá, y tmojanimpadá chabe cucuatšënga chë šocábeñe chaojájoma, chaboshnama. ³³ Chorna

Jesús entšangbentsana luaroye tbojanánatse, cán̄yata. Chora chë šocabe matscuašoye ntšabuafjenga yojajué, cucuatšīne yojabuashëtjo, y chë šocabe bichtaja yojábojajo. ³⁴Chentsana, Jesús celoye tojanontješé, jabuache yojáshachna, y hebreo palabriñe tbojaniana: “¡Efata ca!” (Chca endayana “¡Chacmotsauenana ca!”)

³⁵Cachora, chë boyabásabe matscuaše tšabá yojsatsmëna y tšabá yojsue-nana; chë bichtaja tšabá yojtóbema y tšabá yojsóyebuambnaye. ³⁶Y Jesús chë entšanga tojanamëndá chama ndocnábene ntsecuéntayana. Pero masque tša chama yojsamëndaye, entšanga más chabiana imojtsencuéntaye. ³⁷Chama chë entšanga puerte imojtsenjnanaye, y mëntšá imojtsichamo: “¡Lempe tšabá entsama! Chë tšëmenga chamouenama, y chë ndëbianga chamóyebuambama entsama ca.”

Jesús canta uaranga entšanga saná tojanacaredadó

(Mt 15.32-39)

8 Chë tempo, ba entšanga Jesúsbioye cachiñe tmojanobeconá, y jasama tondaye imontsebmoma. As Jesús chabe uatsjéndayënga tojánachembo y tojanéyana: ²—Quem entšangbiama šontsengmena, er ya unga te átšeftaca montsemna y mora jasama tondaye quemátsbmoma. ³Cachëngbe yebnoye tondaye ntjascá stichamuase, shëntsama benachëjana nantsabuatëcja; y báseftanga bën luarocana tmojabo ca.

⁴As chabe uatsjéndayënga tmojaniana: —¿Ntšamo nda nanjobenaye quem luarentše, ndocna entšá ndoyenentše, chëfta entšangbiama saná jin̄yenama ca?

⁵Chora cha tojanatjá: —¿Bueta tandëše šmojtsebmoma ca?

Y chënga tmojanjuá: —Can̄yšëftaše ca.

⁶Chentsana, Jesús tojanamëndá entšanga chamoshëntsjatbiamama. Chorna, chë can̄yšëfta tandëše tojanca y Bëngbe Bëtsábioye chama tbojtanchuá. Chentsana tojanjatá, chabe uatsjéndayënga tojanëjatá, y chëngna chë entšangbioye. ⁷Básefta beonatëmëngnaca inmabomna; as Jesús, Bëngbe Bëtsábioye chama tbojtanchuá y chabe uatsjéndayënga tojanamëndá entšanga jujátayama. ⁸Nyetscanga tmojanse jtoshachaye nyetšá. Chentsana cabá can̄yšëfta bëts sbarécua tmojanajutjé chë ojamnëtëmëngaca. ⁹Chë tmojansënga imojamna mo canta uaranga nyetšá. Chentsana Jesús chë entšanga tojtanadiošoftá. ¹⁰Chora Jesús barquëshañe tojánenojayiye chabe uatsjéndayëngaftaca, y tmojtsanoñe Dalmanuta ca uabaina luaroye.

Chë fariseunga tmojánbošena, Jesús chaoma can̄ye bëts soye, chabe ndegombre obenana jin̄yama

(Mt 16.1-4; Lc 12.54-56)

¹¹Chentsana, fariseunga tmojánabo y tmojanontšé Jesúsëftaca enatsëtsnayana. Y jisháchichiyama, imojtseimpadana can̄ye bëts soye chaoma, as jtsetatšëmbuama Jesusbe obenana Bëngbe Bëtsábicocana ndegombre tainóbocanama. ¹²Y Jesús ngmënaca, jabuache yojáshachnëše, mëntšá tojánayana: “¿Ndáyeca tšëngaftanga, chë mora oyenënga, šmojtseboše can̄ye bëts soye chaimama tšëngaftanga atšbe obenana jin̄yan̄iyama ca? Ndegombre cbéyana, quem entšanga ndocna chca soye quemochátin̄ye ca.”

¹³Chorna chë entšanga cachcá tojesanëñyá, chë barquëshoye yojtamáshëngo, y uafjájónaye chenguana yojtsoñe.

**Jesús tojanabuayená fariseungbe
buatëmbana soyëngama**

(Mt 16.5-12)

¹⁴ Chë uatsjëndayënga yojésebnëjtjomba ndaye soye jasama jesocñama, y chë barquëshoye nÿe canÿe tandëse imojtsebomna. ¹⁵ Jesús tojanéyana: —Šmochtsantješna; cuedado šmochtsebomna fariseunga y Heródesbe levadurama ca.

¹⁶ Chora chë uatsjëndayënga tmojanontšë enatsëtsnayaana: —Chca entsichamo, bënga tandëse ndoñe tmonjesocñama ca.

¹⁷ Jesús yojtsetátšëmbo, chabe uatsjëndayënga imojtsejuabnaye chana tandëšama yojtsëtsësnaye ca; pero ndegombre chana yojtsóyebuambnaye ndayá ntšamo fariseunga y Herodes bacna soyënga jtsamëse imojoyenama. Chcasna, mëntšá tojanéyana: —¿Ndáyeca tandëšama šmojtsoyebuambná? ¿Cabá ndoñe cmontsésertana, ni šmontsetátšëmbo? ¿Ainanoca ndoñe šmontseboše chacmésertama? ¹⁸ Bominÿe šmond-bomna, pero ndoñe quešmátobena jinÿana; jouenama šmondobena, y ndoñe quešmátuenana, y ndayá tijamama ndoñe quešmatsjuabná. ¹⁹ Chë shachna uaranga entšanga shachna tandëšentšana sënjanëjatá chentšana, ¿bueta sbarécua chë ojamnëtemëngaca šmënjanajutjé ca? —cha tojanatjá.

Y chënga tmojanjuá: —Bnëtsana utácua ca.

²⁰ —Y chë canÿsëfta tandëšentšana canta uaranga entšanga sënjanëjatá chentšana, ¿bueta bëts sbarécua chë ojamnëtemëngaca šmënjanajutjé ca?

Y chënga tmojanjuá: —Canÿsëftácua ca.

²¹ As Jesús tojanéyana: —¿Y cabá ndoñe cmontsésertana ca?

**Jesús canÿe jtanábioye
tbojanshná, Betsaida puebloca**

²² Chentšana tmojánashhajna Betsaida puebloca; y chora, entšanga canÿe boyabása jtaná Jesúsbioye tmojanánatse, y tmojanimpadá cha jabojajuana chabotseshnama. ²³ As, chë jtanábioye tbojanábuacueshache, y chë pueblo chaboye tbojanánatse. Chorna, yebuáyeca ibojabuchanëtjo, y chábeñe cucuatšënga yojajájua, y tbojantjá nderado ndayá jinÿama tayojtsanobena ca. ²⁴ As chë jtaná yojontješiye y tojánayana: —Boyabásenga sentsénÿa; mo betiyëngcá montsemna, pero montsobonjná ca.

²⁵ Chora Jesús, chë jtanabe fšnëbeñe cachiñe cucuatšënga yojajájua. Y chë boyabása yojtsobena lempe tšabá jinÿama; ya shnaná yojtoquéda. Y yojtsobena nÿetsca soyënga botamana jinÿana. ²⁶ Chentšana, Jesús cachabe yebnoye tbojtanichmó y mëntšá tbojanayana: —Chë puebloye ndoñe catjëftsamashëngo ca.

**Pedro tojánayana, Jesús chë
Cristo bétsemnama**

(Mt 16.13-20; Lc 9.18-21)

²⁷ Chentšana, Jesús tojánbocna chabe uatsjëndayëngaftaca Cesarea de Filipo luaroca pueblëngoye, y benachiñe chabe uatsjëndayënga tojanatjá: —¿Nda atše bétsemnama ca entšanga imojtsichamo ca?

²⁸ Y chënga tmojanayana: —Inÿenga montsichamo Juan chë Ubayaná ca, ínÿengna Elías ca, y ínÿengna, canÿe Bëngbe Bëtsabe juabna oyebuambnayá ca.

²⁹ As Jesús tojanatjá: —Y tšëngaftangna, ¿nda atše bétsemnama ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

³⁰ Chentšana Jesús corente chënga tojanamëndá, chë nda cha yojamnama ndocnábeñe ntsecuéntayana.

Jesús tojánayana cha ibojamna jóbanana y jtsayenana ca

(Mt 16.21-28; Lc 9.22-27)

³¹ Y Jesús tojanontsé chabe uatsjéndayënga jabuátambana, cha, chë Bëngbe Bëtsá Entšá tbojanbemá, ibojamna puerete jasúfriana ca; chë judiëngbeñe bëtsëjemëngcá amëndayëngbiama, chë judiëngbe más uámana bachnangbe amëndayënga y ley abuátambayëngbiama uabotená jtsemnana ca. Entšanga mochjanóba, pero unga tianoye yochtanayena ca. ³² Njëtscanga catafjosertaycá chama yojtsóyebuambnaye. As Pedro, Jesúsbioye luaroye tbojanánatse, y tojanontsé jtsáuyanana. ³³ Pero Jesús yojobuértana, chabe uatsjéndayënga tojanënyanjé, y Pédrëbioye mëntšá tbojtsanbochembo: “¡Satanás, átsbentšana mojuaná! Pedro, acbe juabnënga Bëngbe Bëtsábiocana ndoñe quenatóbocana, sinó nýe entsángbentšana ca.”

³⁴ Chentšana, Jesús chabe uatsjéndayënga y chë inýe entsanga tojánachembo chamouenama, y tojanéyana: “Nda atšbe uatsjendayá jtsemnama tojtseboše, cháuyana nýe Bëngbe Bëtsá yobena sempre chabe vidiñe jtsemándayana ca, chabe quem luarentša soyënga cachcá chauesonyá atše juastama, y atšbiama jasúfriama chaotseprontana y cruciñe jobanámna. ³⁵ Nda tojtsama quem luarentše bëtscá soyënga jtsebmnama y atšbiama jasúfriama ndoñe tontseprontana, chë njëtscá tescama yomna tšabe

vida echanjopérdia. Pero nda quem luarentša soyënga cachcá tojëftsonýá atše juastama, y chë tšabe noticiënga atšbiama abuátambaye causa, masque chaóbana, chë njëtscá tescama yomna tšabe vida echántsebmna.

³⁶ ¿Ndayama entšá buanjósërvia njëtscá quem luarentša soyënga jtsebmnama, chë njëtscá tescama yomna tšabe vida tojtsoperdese? ³⁷ Er canýe entšá chë njëtscá tescama yomna tšabe vida tojtsoperdese, ndocna soye quenátsmëna cha chaobená joyiyama, chë njëtscá tescama yomna tšabe vida jtsebmnama. ³⁸ Chasna, nda mora atšbiama y atšbe buayenana soyëngama tojtsëuatja entsángbeñe, chënga chë Bëngbe Bëtsabiama nduauenanënga y bacna soye amënga, chë Bëngbe Bëtsá Entšá tbojanbemánaca chabiama echantsëuatja, chabe Taitabe bëts obenánaca y chabe angeléngaftaca chaojésabo ora ca” —cha tojanéyana.

9 Mëntšánaca Jesús tojanéyana: “Ndegombre cbéyana, báseftanga muentše montsemnënga ndoñe quemochatóbana, Bëngbe Bëtsá entsángbeñe chabe obenánaca jabomándama jabana ntjëftsinýcá ca.”

Jesús inýetšá tojanobinýná

(Mt 17.1-13; Lc 9.28-36)

² Chentšana chnénguana tianoye, Jesús tojëftsanëbiatše Pedro, Santiago y Juan, y ínýoye tojanënatse nýe chënga, canýe bëts tjoye. Y chëngbe delante Jesús inýetšá tojanobinýná; ³ chabe uichëtjonëjuangá tša yojtsabuashinýinýana; corente uafjantsëjuangá yojtsamna; nýa chca juafjantsama ndocná quem luarentše quentatobenaye. ⁴ Chca orna, chë uatsjéndayënga tmojáninýe, Moisés y Elías tbojanobinýná Jesúseftaca encuéntaye.

⁵Chora Pedro, Jesúsbioye tbojaniana: “¡Buatëmbayá, tša tšabá bëngbiana cuanmëna muentše jtsemnana ca! Mora fchanjapórma unga tambotëmënga: cányetema acbiama, ínyetema Moisesbiana y ínyetema Elíasbiana ca.”

⁶Chca tojánayana, chë uatsjëndayënga yapa auatjanánënga imojtsemna causa, y Pedro ndoñe yontsetátšëmbo ntšamo jayanana.

⁷Chora canye jantšetëshe vojóbema, y chëngbioye yojáutsbotse; y chë jantšetëshoicana canye oyebuambnayanana tojanóbocna, mëntšá: “Mua atšbe bonshana Uaquiñá endmëna; cha šmochtseyunana ca.”

⁸Y ndeolpe, chëngbe shëconana tmojanrepará ora, ya ndocná más tmonjánínye; nye Jesús canya chëngaftaca yojtsemna.

⁹Chë tjocana imojtsatstsmaye ora, Jesús chë uatsjëndayënga tojanamëndá: —Bëngbe Bëtsá Entšá tbojanbemá obanënguentšana candétayenëntscuana, chë mënté tjoca šmonjínnye soyama ndocnábeñe šmattsecuëntaye ca.

¹⁰Chë uatsjëndayënga afñe chca tmojanuena; pero chënga imojtsentjanaye ndayá cha yojtsentšáyana, cha yochtanayena ca cha tojánayana ora. ¹¹Y Jesúsbioye imojtsetjanaye: —¿Ndáyeca chë ley abuatambayënga mondbëtsichamo, canmëna Bëngbe Bëtsabe Uámana Uabuayanabe natsana Elías jabana ca?

¹²As cha tojanéjua: —Ndegombre, canya Eliascá natsana echanjabo, y ntšamo jtsemnana yomncá lempe echánjabatsma. Pero ntšamo Bëngbe Bëtsabe uabemana palabrenguine endayancana, Bëngbe Bëtsá Entšá tbojanbemá puerte caochjasúfria, y ínÿenga puerte camochtsáboyënja ca.

¹³Ndegombre cbéyana, canya Eliascá ya tonjabo, y cháftaca entšanga tmonjanma

lempe ntšamo tmojabošencá, ntšamo chaochnënguama Bëngbe Bëtsabe uabemana palabrenguine endayancá.

Jesús, canye basa bayëjbe juabna uambayábioye tbojanshná

(Mt 17.14-21; Lc 9.37-43)

¹⁴Chentsana, chënga tmojtaná chë inye uatsjëndayëngbioye. Chora, Jesús tojánínnye ba entsanga chë uatsjëndayëngbe shëconana imojtsemnana, y básefta ley abuatambayëngna chëngaftaca imojtsenatsëtsnaye. ¹⁵Nyetsca entsanga cha tmojánínnye ora, imojenjnaná y tmojanótjajo cha jachuyama. ¹⁶Chora Jesús chënga tojanatjá: —¿Ndayama chëngaftaca šmenatsëtsná ca?

¹⁷Y canya entsanguentšá tbojanjúá: —Buatëmbayá, muentše ácbioye sënjuánatse atšbe uaquiñá; bacna bayëjbe juabna entsambá, y chë causa, jóyebuambayama ndoñe quenátobena.

¹⁸Nye ndayëntšnaca cha tojtsemnentše, chë bayëja chábioye jishachana y jtsenajuáchesënjana; chentše uayoicana shashiye jtsabocanana, jtsenoftéšfjojnayana y obanacá jtsatsjájonana. Acbe uatsjëndayënga sënjaimpadá chë bacna bayëja chamuatábocnama, pero ndoñe chematobená ca —cha tbojaniana.

¹⁹As Jesús tojánayana: —¡Nyetsá ndošbuáchiyënga ca! ¿Buetayté šojtsemna tšëngaftangaftaca jëftsemnana? ¿Buetayté uantado tšëngaftangaftaca chjëftsemna? ¡Moye chë básetema mánatse ca!

²⁰Chora chë básetema chábioye tmojanánatse; y chë bayëja Jesúsbioye tbojánínnye ora, tojanma chë basa ataque chaboshachama, y chë basa fshantsoye yojashajaye, yojtsojandouunaye y uayoicana shashiye yojtsábocana. ²¹As Jesús chë básabe taitábioye tbojantjá: —¿Buetayté chca yojtsepása ca?

Y cha tbojanjuá: —Básetema orscana chca; ²²ba soye, chë bayëja chábioye iñoie jtsatmetsana y buyeshoye jtash-buetsana, jtsóbama. Chíyeca, nderado ndayá chabiama jamama tcojtsobenëse, bënga šmotsalastemá y šmotséjabuache ca.

²³Chora Jesús tbojaniana: —¿Ndáyeca “ndayá jamama tcojtsobenëse ca” šcjaunya? Nda Bëngbe Bëtsábeñe tojtsošbuáchebiama lempe endopodena ca.

²⁴Y cachora chë básabe taitá tojanáyebuachena: —Aíñe, Bëngbe Bëtsábeñe sëntsošbuaché; Diosmanda, ¡más jtošbuáchiyama šmajabuache ca!

²⁵Y bëtsá entsanga imojtsójtoma Jesús tojáninye ora, chë bacna bayëja tbojtsanbochembo mëntsá: —¡Bacna bayëja, chë básetema tësmá y ndëbiá biamnayá; chábensana maisebocna y ndocna te más chábeñe catjésamashëngo ca!

²⁶Y chë bayëja chábensana yojësebocna, yojtseyoye y chë básabioye jabuache ibojeshatiyiyé; y chë básana mo obanacá tojanoquedá, y chë causa banga imojtsichamo cha obaná yojtsemna ca. ²⁷Pero Jesús tbojanábuacue-shache y tbojtansbaná; y chë básana yojtëtsaye.

²⁸Chentsana, Jesús canye yebnoye tojánamashëngo, y chabe uatsjéndayëngna luaroca cha tmojantjá: —¿Ndáyeca bënga ndoñe fsënjobená chë bayëja jtabocnana ca?

²⁹Y Jesús tojanéjua: —Chca bayëjënga jtëbuacanamna jobenayana nyë Bëngbe Bëtsáftaca jencuëntase, chabuájabuachama jaimpádase ca.

Jesús cachiñe tojánayana cha ibojamna jóbanana y jtayenana ca

(Mt 17.22-23; Lc 9.43-45)

³⁰Chentsana tmojéftsanbocna ora, Galilea luarëjana imojtsajna;

y Jesús yojtseboše chama ndocná chaondëtsetatsëmbuama, ³¹er cha chabe uatsjéndayënga yojtsabuá-tambaye. Mëntsá cachabiama yojanëtsësnaye: “Bëngbe Bëtsá Entsó tbojanbemá entsangbe cucuatšinë mochanjáboshjona; mochanjóba, pero chentsana unga tianoie echántayena ca.”

³²Pero chënga ndoñe yontsósertana ntšamo Jesús yojtsanëtsësnacá, y chama jatstjanayamna chënga imojtsauatja.

¿Nda chë más uamaná yomna?

(Mt 18.1-5; Lc 9.46-48)

³³Chora Capernaum puebloye chënga tmojánashajna; y cach yebnentše imojtsemna ora, Jesús chë uatsjéndayënga tojanatjá: “¿Ndayama benachiñe šmabáyenatsësnaye ca?” ³⁴Chëngna nyë iytëca tmojanobiama, er benachëjana chënga imnayenatsësnaye, chënguentšá nda chë más uamaná bëtsemnama. ³⁵As Jesús tojanótbema, chabe bnëtsana uta uatsjéndayënga tojánachembo y tojanéyana: “Ndánaca nyëtscangbiama chë más uamaná jtsemnama tojtsebošëse, cha chë más nduamaná chaóbema y nyëtscanga chaotsaserverna ca.” ³⁶Chora Jesús canye básetema tbojánishache, chëngbe tsëntsaca tbojanatsá, tbojantbá y chënga tojanéyana: ³⁷“Ndánaca, átšbeñe ošbuachiyá bëtsemnayeca, tbojofja canya mo quem basetemcá, chana atše jofjana; y nda atše šojofja, chora cha nyë atše ndoñe ntjofjana, sinó chë šojichmó chábioynaca jofjana ca.”

Nda ndoñe bëngbe contra tontsemná, bëngaftaca jtsemnana

(Mt 10.42; Lc 9.49-50)

³⁸Juan, Jesúsbioye tbojaniana: —Buatëmbayá, bënga fsënjinye canye

boyabása, y cha aca jótšëmbonëse, bacna bayëjbe juabna entšangbentšana endëtëbuacana; pero cha bëngaftaca ndoñe quenátšmëna causa, chama fsënjesauyaná ca.

³⁹As Jesús tbojanjuá: —Ndoñe šmatjuauyaná; er ndocná quenátobena canÿe bëts soye jamana Bëngbe Bëtsabe obenánaca, atše jótšëmbonëse, y chentšana atše contra jatóyebuambnayana. ⁴⁰Ndegombre, nda ndoñe bëngbe contra tontsemná, bëngaftaca jtsemnana. ⁴¹Y ndánaca, masque nÿe búyeshtema tšëngaftanga tcmojubuatšatá, tšëngaftanga átšbënga bëtsemnayeca, chábioye Bëngbe Bëtsá canÿe uacanana soye bochantatšetaye, cha chë tšabe soye tojamama ca.

**Resjo yomna, nderado
bacna soyënga cuanjama**

(Mt 18.6-9; Lc 17.1-2)

⁴²Chentšana Jesús tojánayana: “Canÿa átšbeñe ošbuachiyábioye mo quem basetemcá, nda tbojaingñé atše ustonama chaotsajbanama, más tšabá chabiama nántsemna canÿe bëts nantsnëbé chamotsetamošëntšbua y mar bëjayoye asentoye chamotsashbuetše chabotsenatjëmbama. ⁴³Nderado acbe cucuatšëca bacna soye tcojama, más tšabá nántsemna chë cucuatše chacotsenacuéstjango. Acbiama más tšabá endmëna celoye jamashënguana nÿetsca tescama vida jtsebomnama, nÿe canÿe cucuatše bomná, y ndoñe nÿets útátšëca infiernoye chacmotocá jama, chë ndocna te yochanjáfsana ñëshoye; ⁴⁴choca útšëñënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ñëshë ndocna te queochátšfsana.

⁴⁵“Nderado acbe shecuátšëca bacna soye tcojama, acbiama más tšabá nántsemna chë shecuatše

chacotsenashecuástjango. Acbiama más tšabá endmëna cosheto celoye jamashënguana nÿetsca tescama vida jtsebomnama, y ndoñe nÿets útátšëca infiernoye chacmotsétsëna; ⁴⁶choca útšëñënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ñëshë ndocna te queochátšfsana.

⁴⁷“Nderado acbe bomínÿëca bacna soye tcojinÿe y cachca soye tcojama, más tšabá nántsemna chë bominÿe chacotsenobuchjátšëca. Acbiama más tšabá endmëna Bëngbe Bëtsabe amëndayoye jamashënguana nÿe canÿe bominÿe bomná, y ndoñe nÿets útabëca infiernoye chacmotsétsëna; ⁴⁸choca útšëñënga puerte nÿetsca tescama mochanjasúfria. Chëngbioye mochtsasaye mamanga ndocna te quemochatóbana, y chë ñëshë ndocna te queochátšfsana.

⁴⁹“Tamó tšabe soye endmëna. Ntšamo chë tamó canÿe tšabe soye endmëncá, Bëngbe Bëtsá echanjama nÿetsca tšëngaftangbiama tšábënga chašmotsemnama, chë átšbeñe betsošbuáchëma šmojtsepadecena ora šmojauantase. ⁵⁰Tamó tšabe soye endmëna. Pero chë tamó ftënana tojtsóbemëse, ndoñe quešmátobëna jamana cachiñe chabe tempsca sanana chaotsatsbomnama, ni saná jatamuama. Mo tšabe tamocá entšangbiama šmochtsemna, chëngbeñe jtsiyenëse ntšamo Bëngbe Bëtsá yobošcá, y nÿetscángaftaca natjëmbana šmochtsiyëna ca” —cha tojánayana.

**Ndayá Jesús tojanabuatambá
bouamnënga tmojtsenétsënama**

(Mt 19.1-12; Lc 16.18)

10 Chentšana, Jesús chë luarentšana tojétsanbocna y tojána Judea luaroye y Jordán chënguana. Entšanga

cachiñe chábioye tmojánabo, y cha chënga yojtsabuátambaye, chë ntšamo jamana yojanamancá. ²Básefta fariseunga chábioye tmojanobeconá, y jisháchichiyama mëntšá imojtsetjanaye: —¿Queojtselesenciana canýe boyá chabe shémbioye cachcá jesonýayama ca?

³Chora cha tojanéjua: —¿Ntšamo Moisés chë soyëngama tcmënjanamëndaye ca?

⁴Y chënga tmojánayana: —Moisés tojanalesenciá chë boyá chabe shémbioye chabuiyé canýe tsbuanácha, ndayéchañe chaotsayana cha ya ndoñe chabe shema yontsemna ca, y chora cachcá chabe shema chabuesonýá ca.

⁵Chora Jesús tojanéyana: —Tšëngaftanga Bëngbe Bëtsabe mandënga ainaniñe jóyëngacñama ndoñe quešmátsboše causa, Moisés chca tšëngaftanga tcmojéftsanamëndá.

⁶Pero quem luare jobojátšama orna, “Bëngbe Bëtsá canýe boyabása y canýe shembása tonjánabiana. ⁷Chíyeca, chë boyabása chabe taitá y chabe mamá echanjébasashejuana, chabe shémaftaca jenútanama, ⁸y chë útatna mo canýacá bochántsemna.” Y chca, ya ndoñe útata quebochátsmëna, sinó nýe mo canýacá.

⁹Chcasna, entšá ndoñe chaondëndbema ndayá Bëngbe Bëtsá mo canýiñcá tojéftsema soye ca —cha tojánayana.

¹⁰Ya cach yebnoca imojtsatsmëna ora, chabe uatsjëndayënga cach soyama imojtétstjaye. ¹¹Y Jesús tojanéyana: “Nda chabe shémbioye cachcá tbojesonýá y ínýaftaca tojtóbouamase, cha chë natsana shémbioye inýe shembásaftaca jtseíngñayana; chana canýe uabuatmá jtsebomnana. ¹²Y chë shema chabe boyábioye cachcá tbojesonýá, y ínýaftaca tojtóbouamase, chánaca chë natsana boyábioye ínýaftaca jtseíngñayana; canýe uabuatmá jtsebomnana ca” — Jesús tojánayana.

Jesús, basetëmëngbiana Bëngbe Bëtsábioye tbojanimpadá

(Mt 19.13-15; Lc 18.15-17)

¹³Entšanga, basetëmënga Jesúsbioye tmojanënatse, chauabájajuama y Bëngbe Bëtsábioye chëngbiana chaboimpadama; pero chabe uatsjëndayënga tmojanontsé chë basetëmënga unachayënga jtsécácanana. ¹⁴Jesús chca tojáninýe ora, tbojánëtna y chë uatsjëndayënga tojanéyana: “Cachcá mónýaye chë basetëmënga átšbioye chamuabo y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiana.

¹⁵Ndegombre cbéyana, nda Bëngbe Bëtsabe soyënga ndoñe tonjýëngacñe mo canýe basetëmá jtsošbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

¹⁶Y chë basetëmënga tojanchebá, y chëngbeñe cucuatšënga jajájuase, Bëngbe Bëtsábioye tbojanimpadá tšabe bendicionënga chëngbeñe chaotsemnana.

Canýe bomna entšá Jesúsbioye tojána

(Mt 19.16-30; Lc 18.18-30)

¹⁷Jesús jama tojtëtanontsé ora, canýe boyabása chábioye tojanótjajo, chabe shecuatšëntse tojanoshëntsamentsé, y mëntšá tbojantjá: —Tšabe Buatëmbayá, ¿ndayá šojtsemna jamana chë nýetsca tescama yomna tšabe vida jtsebomnana ca?

¹⁸Y Jesús tbojanjúá: —¿Ndáyeca “tšabia ca” šcjayuana? Tšabia nýe canýa endmëna: Bëngbe Bëtsá. ¹⁹Aca icotátšëmbo Bëngbe Bëtsá tojanmandacá: “Ndoñe catjóba, acbe shema ínýaftaca ndoñe cattseíngñaye, ndoñe catjatbëba, ndoñe catjuaboínýena, ínýëngbioye ndoñe

catjáingñaye ndayánaca jabacama, y acbe bétsetsata ndoñe stétsoye catjáquedaye ca.”

²⁰ Chora chë boyabása tbojanjuá: — Buatëmbayá, atse lempe chë mandënga bátsetema orscana sëndocumplina ca.

²¹ Jesús bonshanánaca tbojanonýinýe y mëntšá tbojaniana: —Canýe soye cmontsebuáshbena jamana: Motsa, lempe ntšamo icobomncá cochjetsatobuiye, y chë crocénana, ndbomnjémënga cochtsatšataye; chca, celoca canýe bëtš bomnana cochántsebomna. Chentšana, cochjabo y šcochjuasto ca.

²² Pero chë bobóntsbioye inýetšá ibojtsínýnana Jesús chca tbojanianama; y puerte ngménaca yojtá, cha puerte bomná inamna causa.

²³ Chora Jesús cátoye tojanrepará y chabe uatsjéndayënga tojanéyana: — ¡Puerte totcá entsemna bomnëngbiama Bëngbe Bëtšabe amëndayoye jamashënguama ca!

²⁴ Chca imojouena ora, chë uatsjéndayënga ojnánánënga imojtsemna, pero Jesús cachiñe tojanoyebuambá y mëntšá tojanéyana: —Atšbe básënga; ¡puerte totcá entsemna Bëngbe Bëtšabe amëndayoye jamashënguama!

²⁵ Ndegombre, más paselo endmëna chë coshufjentsa atëfjnëjana canýe camello chauachnëngo, y ndoñe canýe bomná Bëngbe Bëtšabe amëndayoye jamashënguana ca.

²⁶ Pero chë uatsjéndayënga nýe más imojtsenjnanaye y imojtsentjanaye: — ¿As, nda yochjobenaye atsbocaná jtsemnana ca?

²⁷ Chora Jesús tojanënyanýe y tojanéyana: —Entšanga ndoñe quemátobena jamana canýa atsbocaná chaotsemnana, pero Bëngbe Bëtšá aínë; er Bëngbe Bëtšá lempe jamama endobena ca.

²⁸ Chora Pedro tbojaniana: —Aca contsonýá, bënga lempe chë fsënd-

bomna soyënga fsënjéseboshjona y ácafata fsëntsajna ca.

²⁹ As Jesús tojánayana: —Ndegombre cbéyana, ndánaca átšbioye jaserviama y chë tšabe noticiënga jábuayenama, tojéseboshjona chabe yebna, catsátanga o uabënga, bebmá o befta, o básënga, o fshantsënga, ³⁰ cha mora quem luarentše echanjóyëngacñe chama patse soye más yebnënga, catsátanga, uabënga, bebmanga, básënga y fshantsënga, masque puerte chaosufrima ínýënga mochántsama; y chë inýe luarocna, chë nýetsca tescama yomna tšabe vida echanjónýena. ³¹ Pero banga, mora uámanënga imomnënga, nduámanënga mochántsemna; y banga, mora nduámanënga imomnëngna, uámanënga mochántsemna ca —Jesús tojánayana.

Jesús cachiñe tojánayana cha jóbánama y jtayenama

(Mt 20.17-19; Lc 18.31-34)

³² Chentšana Jerusalemoye imojtsaye, y Jesús yojtsebnatsana. Chë uatsjéndayënga puerte ojnánánënga imojtsemna, Jesús ndauatjca choye yojtsayama; y inýe becá entšanga ústonoye imojtsajnëngna, imojtsayáuatja. Jesús cachiñe chabe bnëtsana uta uatsjéndayënga barie tojánachembo y tojanontsé jáuyanana ntšamo cháftaca jopásama yojtsemnana.

³³ Mëntšá tojanéyana: “Tšëngaftanga šmontsonýá, Jerusalemoye bënga mora montsajnama. Chocna, chë Bëngbe Bëtšá Entšá tbojanbemá, chë bachnangbe amëndayënga y ley abuatambayëngbe cucuatšínë mochanjáboshjona, y chënga mochanjayana cha chaóbana ca; y ndoñe judiëngbe cucuatšínë mochanjáboshjona.

³⁴ Chënga mochantsáboyejuana, mochántsebuashëtoto, mochántsetjanja

y mochanjóba, pero chentšana unga tianoye cha echántayena ca.”

Santiago y Juan, Jesús tmojanimpadá canye pavor cháuabiamama

(Mt 20.20-28)

³⁵ Chora, Santiago y Juan, Zebe-deobe uaquíñata, Jesúsbioye tbojanobecóna y tmojaniana: —Buatëmbayá, bëndata fséntseboşe pavor chaşcuabiamama ntşamo chacbojaimpadacá ca.

³⁶ Y Jesús tojanatjá: —¿Ndayá şojtseboşe atşe tsëndatbiamama chjamama ca?

³⁷ Y chata tbojaniana: —Aca reycá chacojtsemánda ora, cochjaleséncia bëndata fchayobená jótbemana, canya acbe catşbioica y inya acbe uañicuayoica ca.

³⁸ As Jesús tojanéjua: —Ntşamo şmontsotjanañama tsëndata ndoñe queşnátstatşembo. ¿Ntşamo atşe chaitsesufrincá, tsëndátnaca cachcá jasúfriama taşatjobenaye? ¿Y entsanga puerte bacá chacmojtşebuatsená ora, taşochjauánta, ntşamo atşe chjauantacá ca?

³⁹ Y chata tbojaniana: —Aíñe fchanjobenaye ca.

Y Jesús tojanéyana: —Ndegombre tsëndátnaca atşcá şochanjasúfria, y atşbe causa cmochántsamna bëtşcá soyëngama jasúfria. ⁴⁰ Pero atşe ndoñe quetsátobena jamándana nda atşbe catşbioica y atşbe uañicuayoica chaótbemama. Chë útentşe entsemna ndëmuanyëngbiamama atşbe Taitá tojaprontacá ca.

⁴¹ Chë inye bnétsana uatsjëndayënga chca tmojanuena ora, tmojanontşé Santiago y Juánoftaca jotjáyanana.

⁴² Pero Jesús nyetsca uatsjëndayënga tojánachembo y tojanéyana: “Tşëngaftanga şmondétatşembo, quem luarentşa amëndayënga lempe jtsemándayana, nya mo nduiñënga cuaftsemncá; y chë bëtşetsa entsanga chëngbe obenánaca jtsemándayana,

ntşámnaca jtsamëse, chë inye entsanga sempre chamotsayaunanama. ⁴³ Pero tşëngaftangbeñe ndoñe chca chaondétsemna. Inyëtşá; masna, nda tşëngaftangbeñe chë más uamaná jtsemnama tojtseboşe, cha bontsemna chë inyënga jtsaservénana; ⁴⁴ y ndánaca tşëngaftanguentşá chë más uamaná jtsemnama tojtseboşá, bontsemna jtsemnana nyetscangbiamama, mo nye inyabiamama nyets tempo oservenacá. ⁴⁵ Cachcá, Bëngbe Bëtşá Entşá tbojanbemá ndoñe chenátabo cha chamotseservénama, ndayá inyënga jabáserviama. Y mo nda, inyënga játsebacama cuaftjopagacá, cha echanjóbana ba entsanga atsebácanënga chamotsemnana ca” —cha tojánayana.

Jesús canye jtanábioye tbojanshná

(Mt 20.29-34; Lc 18.35-43)

⁴⁶ Chentšana, Jesús y chabe uatsjëndayënga Jericó uabaina puebloye tmojánashjajna. Y Jesús chabe uatsjëndayëngaftaca y bëtşcá entsángaftaca Jericó pueblentsana yojtşaisebocana ora, Timeobe uaquíñá, Bartimeo ca uabainá, canye jtaná lemoşna otjanañá, benache juachañe yojtsetbemana. ⁴⁷ Y Jesús Nazaretocá chëjana yojtşachnějuanama cha yojátatşëmbona ora, tojanontşé mëntşá uayebuáchana: —¡Jesús, Davidbentšana Entşá, şmotselastemá ca!

⁴⁸ Chorna, banga chë jtaná imojtsá-cacana iytëca chaótbemama. Pero cha más yojtşáyebuache: —¡Davidbentšana Entşá, şmotselastemá ca!

⁴⁹ Chora Jesús tojantsá y chë inyënga tojanéyana: —Chë jtaná mochembo ca.

As chë jtaná tmojanchembo, y mëntşá tmojaniana: —¡Añemo cochtsebmoma; motsbaná! Jesús cmontsechembuana ca.

⁵⁰ Y chë jtaná, quefsáya jtsenátsejquëse, yojontşënja y betşco Jesús-bioye yojobeconá. ⁵¹ Chora, Jesús chë

jtanábioye tbojantjá: —¿Ndayá cojtseboše atse acbiama chjamama ca?

Y chë jtaná tbojanjuá: —¡Buatëmbayá, šmoleseñciá atse chašuatábínýnama ca!

⁵² As Jesús tbojaníyana: —Motsatoñe. Tšabá jtsatsmënema Bëngbe Bëtsábeñe icošbuachéyeca, tšabá consatsmëna ca.

Y cachora cha tšabá ibojtabinýna, y Jesúsbioye benachëjana ibojtséstona.

Jesús Jerusalenoye tojánashjango

(Mt 21.1-11; Lc 19.28-40; Jn 12.12-19)

11 Ya Jerusalenoye imojtsebeconá ora, Betfagë y Betania pueblënga béconana, Olivos ca uabaina tjashe juachañe, Jesús uta chabe uatsjëndayata tojanichamó, ² y mëntšá tojanéyana: “Tsëndatbe natsana entsemna base pueblotémoye motsata. Chašojáshjango y cachora šochanjínýena canýe burrotema utsbuaná; chábeñe cabá ndocná tonjenojayé. Šochjuajafjoná y šochjuánatse. ³ Nderado nda, ¿ndáyeca šmojtsanachá ca? chacmojtátjase, šochjojuá: ‘Bëngbe Utabná bontsájaboto y chora bochantabáiseboshjona ca.’”

⁴ As chata tbojána, y tbojáninýena chë burrotema tsáshenañe, canýe bëshásañe utsbuaná, y imojuajafjoná.

⁵ Y básefta entsanga chiñe imojtsemnënga, chátbioye tmojanéyana: “¿Ndayá šojtsama? ¿Ndayeca chë burrotema šojtsajafjná ca?”

⁶ As chata tbojanjuá ntšamo Jesús tojanéyancá; y chë entsanga tmojanalesenciá chë burrotema chamuánatsama. ⁷ Chentsána, chë burrotema Jesúsbioye tmojanánatse; chë burrotëbeñe chatbe entsáyá tbojanájtase, y Jesús chábeñe tojanenojayé. ⁸ Bëtscá entsanga chëngbe entsáyá chë benachëjana imojtsanëtétsatsana, y ínýengna chë jajoca imojuatëtsetse buacuashangá chiñe imojuacjaye. ⁹ Y chë natsana imojtsajnënga y chë ústonoyënga

mëntšá imojtsaiuáyebuache: “¡Bëngbe Bëtsá matschuanga! ¡Corente bendición bomná, chë Bëngbe Utabnabe obenánaca tojabá! ¹⁰ ¡Tša tšabá chë echanjóshjango amëndayana, bëngbe bëts taitá David yojëftsemánda orcá! ¡Bëngbe Bëtsá celocá matschuanga ca!”

¹¹ Jesús Jerusalenoye tojánashjango, y Bëngbe Bëtsabe bëtsenoye tojánamashëngo. Chabe šhéconana lempe yojëftserrepárase, y ya yojtseibétatana causa, chabe bnëtsana uta uatsjëndayëngaftaca tojëftsanbocna, Betania puebloye.

Jesús tojánayana canýe betiye ndoñe más chaondëshájona ca

(Mt 21.18-19)

¹² Yëfsana, Betaniocana Jerusalenoye chënga imojtésajna ora, Jesús tbojánishëntsena. ¹³ Bënocana canýe higo betiye yojinýe; as tojána jontješiyama tainashajo o ndoñe.

Pero nýe tsbuanáchënga chiñe yojínýena, chora ndoñe shajo tempo bëtsemna causa. ¹⁴ As Jesús chë higo betiyoje tojánayana: “¡Ndocna te más chacondëshájona entsanga chamosama ca!”

Y chabe uatsjëndayënga imojouena ntšamo cha tojanayancá.

Jesús, Bëngbe Bëtsabe bëts yebnentšana enënga y obuámnayënga tojtanëbuacna

(Mt 21.12-17; Lc 19.45-48; Jn 2.13-22)

¹⁵ Jerusalenoye tmojánashjajnentšana, Jesús Bëngbe Bëtsabe bëts yebnoye tojánamashëngo, y tojanontsé chentsána jtëbuacnana chë chentšë imojtsena y imojtsobuámnãñënga. Chéntšnaca imojtsemna entsanga canýe crocénana enënga, y chë crocénana nýe Bëngbe Bëtsabe bëts yebnentšama inoservena. Chë entsanga crocénana atrocayëngbe mesëshangá

tojtsanenásatajchquëca, y chë palomatémënga enëngbe tšenëšëgnaca; ¹⁶y ndoñe tonjanalesenciá ndocná Bëngbe Bëtsabe bëts yebnëjana chë soyënga chaotsëchnëjuanama. ¹⁷Y tojanontsé entsanga mëntšá jabuátambana: “Ndegombre, Bëngbe Bëtsabe uabemana palabrenguine cha mëntšá tojánayana: ‘Atšbe bëts yebna echantsabaina nyetsca luarentša entsangbiama átšeftaca encuëntaye yebna ca’; pero tšëngaftangna atbëbanëngbe oyeniñe chë yebna šmojtsebema ca” —Jesús tojanéyana.

¹⁸Chë bachnangbe más uámama amëndayënga y chë ley abuátambayënga tmojántatšëmbona ntšamo yojochnënguama; as tmojanontsé enójuabnayana ntšamo jobenayana cha jóbana, cha imojtsebiauatja causa, er nyetsca entsanga imojtsenjanaye ntšamo cha yojanabuátambama. ¹⁹Pero yojtsebétatana ora, Jesús chabe uatsjëndayëngaftaca chë bëts pueblentšana yojesóbocñe.

Chë higo betiye tojtsanbuashá

(Mt 21.20-22)

²⁰Yëfsana cachëse, cachëjana imojtëschnejuana ora, tmojáninye chë higo betiye parejo tbëtëjëngaca yojtsebuashá. ²¹Chora Pedro yojenójuaboje ntšamo yojopásama; as Jesúsbiyoje tbojanayana: —¡Buatëmbayá, minyë; chë tconjayana ndocna te más tšabe betiye chaotsemnama betiye tojtsebuashá ca!

²²Y Jesús tbojanayana: —Bëngbe Bëtsábeñe šmochtsošbuáchiye. ²³Ndegombre cbëyana, nderado nda quem tjoye tojayana, “¡chentsana mojuaná y bëts uafjónayoye motsëshbuetše ca!” y chca tojayana ainaniñe inyetsá juabna ntjatsbomncá, y ainaniñe puerte tojtsošbuaché ntšamo tojayancá aiñe yochjochnënguama, ndegombre chca echanjochnëngo.

²⁴Chíyeca cbochanjáuyana, lempe ntšamo Bëngbe Bëtsáftaca chašmojtsencuënta ora chašmojtsotjanañama, ainaniñe corente šmochtsejuabnaye ya šmojóyëngacñe ca, y ndegombre chca šmochántsebomna. ²⁵Y Bëngbe Bëtsáftaca chašmojtsencuënta ora, šmochjenójuaboje nderado nda ndaye bacna soye tšëngaftangbiama tojamama, y cháftaca cabá etonánënga šmojtsemnëse, šmochtseperdóna; chca, Bëngbe Bëtsá, celoca endmëná, tšëngaftangbe bacna soyëngama chacmotsaperdonama. ²⁶Pero inya ndoñe šmonjaperdonasna, Bëngbe Taitá, celoca endmëná, cach ndoñe tšëngaftanga quecmochátaperdonaye ca —cha tojánayana.

Jesube obenana

(Mt 21.23-27; Lc 20.1-8)

²⁷Chca tojanopasá chentšana, Jerusalenoye chënga tmojesaná. Jesús Bëngbe Bëtsabe bëts yebnëjana yojtsobuertanëntscuana, chábioye tmojanobeconá bachnangbe amëndayënga, ley abuátambayënga y chë judiëngbeñe bëtsëjemëngcá amëndayënga, ²⁸y mëntšá tmojantjá: —¿Ndaye deréchoca chë contsama soyënga aca cojtsama ca? ¿Chca jtsamama nda obenana tcmënjatšetá ca?

²⁹As Jesús tojanéyana: —Atšnaca séntsebomna canyë soye tšëngaftanga jatjayama. Chašmojojuase, átšnaca cbochjáuyana ndaye deréchoca atše chca stsama. ³⁰¿Nda Juan chë Ubayaná tbojanichmó entsanga jubáyama, Bëngbe Bëtsá o entsanga? Šmëyana ca.

³¹Chora chënga tmojanontsé mëntšá enatsëtsnayana: “‘Bëngbe Bëtsá ca’ chamojojuase, cha šochanjáuyana: ‘As ¿ndáyeca chë cha tcmojanabuayená soyënguine ndoñe šmonjanošbuaché ca?’ ³²Pero ndoñe quemuátobena jayanana

‘entsānga ca.’” Chca tmojánayana, er chēnga entsāngbiama imojánauatja, er n̄yetscanga imojanjuabná, Juan ndegombre Bēngbe Bētsabe juabna oyebuambnayá yojamnama. ³³Chcasna, chēnga tmojanjuá: —Bēnga ndoñe queftsátstatšēmbo ca.

Y Jesús tojanéyana: —As atše cach ndoñe quebochatéyana ndaye deré-choca atše chca stsama ca.

Chē puerte bacna trabájayēngbiama cuento

(Mt 21.33-46; Lc 20.9-19)

12 Chora Jesús tojanontšé cuenténgaca jabuátambana. Mēntšá tojanéyana: “Can̄ye entšá bētsca uvas betiyēnga yojáje, y chē shéconana yojajétja. Chē uvasēsāngá juantšétetjamna can̄ye base luare yojajutjo; y can̄ye tsbanana jebna soye yojapórma chiñe jtsashanyāma. Chentsāna, in̄ye trabájayēnga chē jajañe yojúyentšame, y chana in̄ye luaroye yojtsoñe. ²Chē uvasēsāngá juashacama tempo yojobuache orna, chē jajañe nduiño can̄ye oservená ibojíchmua chē arréndayēnga jáuyanama ntsachetšá chē nduiño ibojtsotocánama. ³Pero chēngna, cha imojishache, imojtsejantšetaye, y tondaye ntajatacá imojtichmuá. ⁴Chentsāna, chē nduiño in̄ye oservená ibojíchmua; pero chana, bestšaše imojtselisia y podesca imojtsóyenguango. ⁵Chentsāna in̄ya ibojatichmuá, y chana chē arréndayēnga imojtsóba. Y bāngnaca yojichamuá; pero chēngna, ín̄yengna imojtsajantšetaye y ín̄yengna imojtsēbaya.

⁶“Chē nduiño cabá can̄ya ibojtsábojamna jíchmuama: cachabe bonshana uaquiñá. Cabana, cha ibojíchmua y mēntšá yojtsejuabnaye: ‘Atsbe uaquiñá cocayé mochanjóyeunaye ca.’ ⁷Pero chē arréndayēnga cha imojin̄ye ora,

imojeniyana: ‘Mua chē fshantse nduiñbe uaquiñá entsemna. Lempe chabe soyēnga mua echanjóyēngacñe. Cuajna, motsóbanga, y lempe chabe otocana soyēnga bēngbiama echanjoquéda ca.’ ⁸Chcasna, cha imojishache, imojtsóba y chē uvas betiyēnga jajañentsāna más chcoye imojtsétsēna ca” —Jesús tojancuentá.

⁹Jesús chca jacuéntama tojanpochocá ora, tojánayana: “Y asna, ¿ndayá chē fshantse nduiño yochjama ca? Cha co echanjá y chē trabájayēnga echanjet-sēbaya, y in̄ye trabájayēnga chē uvas betiyēnga jajañe echanjárrendaye.

¹⁰“¿Tšēngaftanga ndocna te Bēngbe Bētsabe uabemana palabra šmēndualía? Chiñe mēntšá endayana: Chē yebna jebuanēnga tmojtsanaboté ndētsbé, mora chē más bēts uashacuanēsēntše entsejájona.

¹¹Chē soye Bēngbe Utabná, Bēngbe Bētsá chca tojama, y bēnga chama ojnanánēnga fsēntsemna ca.”

¹²Chora, chē bachnangbe améndayēnga y chē bētsējemēngcá mándayēnga tmojánbošena Jesús jishachana, er chēnga tmojanenótatšēmbona cha chca tojancuentá jin̄yan̄iyama chēnga mo chē puerte bacna trabájayēngcá imojanmēnama. Pero entsāngbiama imojtsauatja, chíyeca cachcá tmojanon̄yá y chentsāna imojtsóñenga.

Chē Romoca bēts mandadbiama impuesto jtsatsquécjnyama

(Mt 22.15-22; Lc 20.20-26)

¹³Chentsāna chēnga, bāsefta fariseunga y Heródesbe ústonēnga Jesúsbioye tmojanichamó, ndayá cha tojayaniñe jisháchichiyama, as chca jtsebomnama ndaye sóyeca mandadēngbeñe cha mal jaquédana. ¹⁴Chēnga tmojána y Jesús tmojaniyana: —Buatēmbayá,

bënga fsëndétatšëmbo aca ndegombre soyënga cnetsabuátambama, y ndoñe jatuenanana nÿe ntšamo entsanga tmojatichamcá, er acbiama tondaye quenatámana nda más uamaná o nduamaná tomnana; y contsabuatambá ndegombre tšabe vida jtsebomnama, ntšamo Bëngbe Bëtsá yomandacá. Chcasna, ¿tšabá tanántsemana, César, chë Romoca bëts mandadbiama bënga impuesto jtsatsquécjnyana? ¿Fchtsatsquécjnaye o ndoñe ca? —chënga tmojantjá.

¹⁵ Jesús yojtsetátšëmbo, chënga bacna entsanga ntšamo ndegombre tmojuabnacá ndinyinÿayënga imojamnama; chíyeca tojanéyana: —¿Ndáyeca tšëngaftanga šmojtseboše chë sóyeca atše jisháchichiyama? Canÿe denario crocénana šmiyëboñe, atše chayobená jinÿama ca.

¹⁶ As canÿe crocénana tmojanoyé y Jesús tojanéyana: —¿Ndabe jubíá quem crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjúá: —Césarbe jubíá; cha chca enduabaina ca.

¹⁷ Chora Jesús tojanéyana: —Chcasna, César šmochtoyie cha ibotocana soye; y Bëngbe Bëtsana cha ibotocana soye ca.

Y nÿetscanga chama imojenjaná.

Obanënga jtayenama Jesús tmojantjá

(Mt 22.23-33; Lc 20.27-40)

¹⁸ Chentsana, básiftanga saduceo ca uabaina entsanga tmojána Jesús jinÿama. Chënga imojanjuabná obanënga ndocna te ntayenana ca. Chíyeca, Jesús mëntšá tmojanianyana: ¹⁹—Buatëmbayá, Moisés tojëftsanabema, nderado canÿe boyá tojóbana y básenga ndoñe tonjëftsabáshejuanësna, canmëna chë uabentsá chë shémaftaca

jtobouamayana, chca, chabe uabočená obanabiama básenga jtsabamnama ca. ²⁰Y chcase, canÿe, canÿsëfta catsátanga monjamna. Chë natsaná tonjanobouamá y tontsanóbana básenga ntjëftsabashejuancá. ²¹Chentsana, chë ústona uabentsá chë shémaftaca tonjanobouamá, pero chana tontsanóbana, básenga ntjëftsabashejuancá; chë inÿe uabentsáftaca cachcá tonjanopasá. ²²Chca, nÿetsca canÿsëfta catsátangaftaca cha tonjanobouamá, pero ndocná básenga ntjëftsabáshejuanana. Y chentsana chë shembásanaca tontsanóbana. ²³Y morna, chë obanënga chamojtayena ora, ¿ndabe chë canÿsëfta catsatanguentšabe shema chë shembása yochtsemna, nÿetscanga cháftaca tmojanobouamase ca? —chënga tmojantjá.

²⁴ As Jesús tojanéyana: —Ntšamo Bëngbe Bëtsabe uabemana palabren-guñe endayancá ndoñe tcmojosertá, ni Bëngbe Bëtsabe obenanama. Chíyeca ntšamo ndoñe yondmencá šmotsichamo. ²⁵Er obanënga chamojtayena ora, ni boyabásenga ni shembásenga quemochatóbouamnaye, y chca, chënga mochántsemna mo celoca angelotemëngcá. ²⁶Y chë obanënga jtayenama, ¿Moisesbe librëšañe ndoñe šmëndualía ntšamo Bëngbe Bëtsá tbojanianama, chë betiyetema yojtsángbototjuana ora? Bëngbe Bëtsá mëntšá tbojanianyana: “Atše sëndmëna Abraham, Isaac y Jacobëbe Bëtsá ca.” ²⁷Bëngbe Bëtsá chca tojánayana ora, entsichamo cha ndoñe yondmëna obanëngbe Bëtsá, sinó aina entsangbe Bëtsá ca, er masque chënga tmojanóbana, chënga cabá Bëngbe Bëtsáftaca mondoyena. Tšëngaftanga canÿe ndoñe ndegombre soyiñe šmontsemna ca —tojanéyana.

Chë más bëts uámana mando*(Mt 22.34-40)*

²⁸ Chentše yojtsemna canye ley abuatambayá. Cha yojouena ntšamo Jesús y chënga imojtsenatsëtsnayana, y yojtsetátšëmbo Jesús tšabá tojanéjuama. As, tojanobeconá y Jesúsbioye tbojantjá: — ¿Ndayá chë más bëts uámana mando yomna ca?

²⁹ Y Jesús tbojanjuá: —Chë más uámana mando mëntšá endmëna: “Israeloquënga šmochjouena, Utabná, Bëngbe Bëtsá endmëna, y nÿe canye Bëngbe Utabná endmëna, ndocná más. ³⁰ Utabná Bëngbe Bëtsá cochtsebobonshana nÿets acbe ainánaca, nÿets espíritoca, nÿets juábnaca y nÿets añémoca.” ³¹ Y chentšana quem inÿe mándnaca: “Ndëmua entšánaca cochtsebobonshana, ntšamo cach aca cuenobobonshancá.” Ndocna mando quem uta mandama más quenatámana ca —Jesús tojánayana.

³² Chora, chë ley abuatambayá Jesúsbioye tbojaniyana: —Buatëmbayá, puerte tšabá tcjayana. Ndegombre yomncá contsichamo, nÿe canye Utabná endmëna y ndocná más. ³³ Y cha jtsebobonshánana nÿets ainánaca, juábnaca y añémoca, y ndëmua entšánaca jtsebobonshánana cachá cuenobobonshancá, puerte cuámana. Cach nÿetšá ndoñe quenatámana bayënga jtsëbánayana, ni chë uátšëmbona soyënga Bëngbe Bëtsá jëtschuyama ca.

³⁴ Cha nÿets juábnaca tbojanjuama Jesús tojáninÿe ora, tbojaniyana: — Batšatema cmontsebuáshbena jtsepron-tánama, Bëngbe Bëtsá chacolesenciama acbe ainanentše jtsemándayama ca.

Y chentšana, ya ndocná yonjenñëmua Jesús más jatstjanayama.

¿Cristo ndabe entšábentšana yomna?*(Mt 22.41-46; Lc 20.41-44)*

³⁵ Jesús Bëngbe Bëtsabe bëts yebnentše yojtsabuátambaye ora, tojánayana: “¿Ndáyeca chë ley abuatambayënga mondbëtsichamo chë Uámana Uabuayaná Davidbentšana iuabó ca? ³⁶ Cach David, chë Uámana Espíritbe mándoca mëntšá tojánayana: Bëngbe Bëtsá, atšbe Utabná Cristbioye tbojaniyana: atšbe catšbioica mótbema, atšbe obenánaca, acbe uayayënga acbe cucuatšinë chamoquedama chjamëntscuana ca.

³⁷ ¿Ntšámose Cristo Davidbentšana Entšá nántsemna, cach David ‘Utabná ca’ chábioye tbojtsabobuátmëse ca?’ —cha tojanéyana.

Y chë bëtsca entšanga, oyejuayënga imojtsuenana.

Jesús chë ley abuatambayëngbiama tojánayana, chënga ndoñe tšabá montsama ca*(Mt 23.1-36; Lc 11.37-54; 20.45-47)*

³⁸ Mëntšánaca Jesús chënga yojtsabuátambaye: “Cuedado šmochtsebomna y ndoñe šmattsama chë ley abuatambayëngcá. Chënga jtsogusetánana bënëna entšayangaca jtsajnana y jtsebošana tsáshenañe entšanga nÿa respétoca chamotsacheuana. ³⁹ Chë judiëngbe enefjuana yebnënguenache, chë más uámana luarënguñe jtsetbiámanana, y chë fiestënguenache nÿa quëfseroca. ⁴⁰ Pero chënga, viudángbioye chë tmobomna soyënga jtsabacayana, y entšangbe delante tšabá chamotsënyama, y chëngbioye imojtsaíngñama ndoñe chaondëtsótatšëmbuamna, Bëngbe Bëtsáftaca tša jtsencuëntayana. Chë causa, Bëngbe Bëtsá inÿengbiama más

chënga echanjácastigaye ca” —Jesús tojánayana.

**Jesús yojsénÿaye chë
crocénana quécjnayënga**

(Lc 21.1-4)

⁴¹ Jesús jabuátambama tojanpochocá ora, tojanótbema Bëngbe Bëtsabe bëts yebnentše, chë crocénana quécjnayëtema ndirichiñe; y chë crocénana quécjnayënga yojsénÿaye. Bëtsá bomnënga becá crocénana imojtsequécjnaye. ⁴² Chora, canÿe viudá ndbomnjëmnaca yojobeconá y nÿe uta crocénana chëtémiñe yojaftsesegóra. ⁴³ Chora Jesús chabe uatsjëndayënga tojánachembo chamobéconama, y mëntšá tojanéyana: “Ndegombre cbéyana, quem viudá ndbomnjëma, Bëngbe Bëtsabiana nÿetscangbiana más tonjëftsesegóra. ⁴⁴ Chë bomnënga chë yojsóyentšjamentšana tmonjëftsesegóra, y cabá bomnana imotsóbomñe; y chë viudana tonjëftsesegóra lempe ntsachetšá yobomncá; masque tša ndbomnjëma, chë vida jtsebomnana lempe ntsachetšá yobomncá tonjëftsesegóra ca.”

**Jesús tojánayana chë Bëngbe
Bëtsabe bëts yebna lempe
mochjánpochocama**

(Mt 24.1-2; Lc 21.5-6)

13 Jesús Bëngbe Bëtsabe bëts yebnentšana tojëftsanbocna ora, canÿe chabe uatsjëndayá tbojaniana: —Buatëmbayá, minÿe, jtša bëts ndëtšbenga, y tša botamana bëts yebnënga ca!

² Chora Jesús tbojaniana: —Tšabá cochjinÿe tša botamana bëts yebnënga. Pero muentše ndoñe queochaisoquéda ni mo canÿe ndëtšbé inÿebé juatsboye. Lempe mochantsepochóca ca.

**Ntšamo yochtsemna quem luare
jopochócama te chaojtsobeco ora**

(Mt 24.3-28; Lc 21.7-24; 17.22-24)

³ Chentšana, Olivos tÿashoye chënga tmojána. Bëngbe Bëtsabe bëts yebnentša ndirichiñe yojamna; y Jesús tojanótbema ora, Pedro, Santiago, Juan y Andrés iytëcana tmojantjá, ⁴ ntšamo cha tojanayancá ntseco yochjanopásama, y chca jopásama ya tojtsobecuama entšanga chamotsetatšëmbuama, ndayá Bëngbe Bëtsá yochjanma ca.

⁵ Chora Jesús tojanéjua: “Cuedado šmochtsebomna ndocná chacmondáingñema. ⁶ Banga mochanjabo y mochantsabíchamo chënga Jesús imomna ca. Mochántsichamo: ‘Atše chë Cristo sëndmëna ca’, y chca, ba entšanga mochanjáingñaye.

⁷ “Entšanga tmojtsentsjanama y nderado mochjentsjámna tšëngaftanga chašmojouena ora, ndoñe šmattsauatja; er chca chaochnënguama entsemna, pero masque chca, chora chë quem luare jopochócama tempo cabá ndoñe queochátmëna. ⁸ Canÿe luarentša entšanga inÿe luaroca entšángaftaca mochántsentsjanaye, y canÿe amëndayábentša entšanga inÿe amëndayábioca entšángaftácnaca; ba luarënguenache fshantse echanjuangmëmëna y bëts shëntsana echanjóshjango. Masque chca jasúfriase, más chcoye cabá más mochanjatšúsfria.

⁹ “Pero tšëngaftangna cach tšëngaftangbiana šmochtsantješna; entšanga cmochanjíshëche y amëndayëngbe cucuatšíñe cmochanjábashejuana, judiëngbe enefjuana yebnënguenache cmochanjátsetšenaye. Atšbe ústonënga bëtsemna causa, mandadëngbiocyte y reyëngbiocyte cmochanjunatse, choca, chëngbe delante ntšamo atšbiana šmotatšëmbcá

chašmuayanama. ¹⁰ Er entseyta, quem luare cabá ndopochóca ora, Bëngbe Bëtsabe tšabe noticiënga nyetsca luarënguentsä entsängbiöye chaóshjanguama. ¹¹ Y ínÿengbe cucuatšíñe jabáshejuanama chacmojtšénachá ora, ndoñe šmattsenócochinÿena ntšamo chora šmochjayanama. Chora šmochjayana ntšamo Bëngbe Bëtsá yochjamcá tšëngaftanga chašmuayanama, er tšëngaftanga cánÿenga ndoñe chora quešmochátöyebuambnaye, ndayá chë Uámana Espiritu tšëngaftangbiajana echantsóyebuambnaye.

¹² “Canÿe catšata cachabe catšata ínÿengbe cucuatšíñe bochanjáboshjona chamotsóbama, y bëtsétsanga cachëngbe básenga mochanjábashējuana chamotsébáyama; y chë básengna chëngbe bëtsétsangbe contra mochántsemna y chamotsébáyama mochanjábashējuana. ¹³ Atšbe ústonënga bëtsemna causa, nyetsca luarënguentsä entsanga cmochantsébuayënja; pero nda nyets tempo átšbeñe ošbuachiyá totsomñe, atsbocaná echántsemna.

¹⁴ “Chë Bëngbe Bëtsabe juabna oyebuambnayá Daniel, chë puerte uabouana soye quem luare jopochócama tojéftsanabema. Chë puerte uabouana soye, chca jtsemnama ínÿoca tšëngaftanga chašmojinÿe ora (nda tojtsalía, chabosertá), šmochántsetatšëmbo chë puerte ngménana tempo tojóshjanguama; chorna, chë Judeoca chamojtsemna entsanga, batsjabengoye chamotsacheta; ¹⁵ chama, nda cachabe yebnentša tsbanánoca chaojtsemna, chocana ndoñe chaondétastjango, ni chaondétamashëngo tsoicana ndayá jesábocnama; ¹⁶ y nda jajoca chaojtsemna, yebnoye ndoñe chaondéta ni mo chabe quëfsaíya jesácñama. ¹⁷ ¡Tša lastema chë tempo ngomámanënga o

ochóchaye šëšonga chamojtsabamna shembásengbiama! ¹⁸ Bëngbe Bëtsá šmochtseimpadana chë ngménana tempo ndoñe chaondóshjango uaftena tempo ora, ¹⁹ er chora puerte ngmenancá echántsemna. Tša jabuache ngmenancá, quem luare jobojátšama orscana y méntscoñama y más chcoye, cachcá ngménana ndoñe ntjamnana. ²⁰ Chë puerte ngménana ndoñe ntjamnana, yapa bën ndoñe chaondétsemnama Bëngbe Bëtsá ndoñe tonjalesenciase, ndocná quantatsbocá; pero cha, chabe ubuáyanënga, chabe bocacánënga corente endábabuanÿeshanayeca, echanjama yapa bën tempo ndoñe chaondétsemnama.

²¹ “Chora nderado nda chacmojáuyana: ‘Minÿe, muentše chë Cristo entsemna’, o ‘Choca cha entsemna ca’, chë soyëngama ndoñe šmattsayaunana. ²² Er mochanjábocana ndoñe ndegombre uámana ubuáyanënga, chënga Cristo imomna ca jtsichámëse, y Bëngbe Bëtsabe ndoñe ndegombre juabna oyebuambnayëngnaca; y chënga mochanjama bëtš soyënga chëngbe obenana jinÿanÿiyama, entsanga jáingñama, y tmojobenase, chë Bëngbe Bëtsabe bocacánëngnaca. ²³ ¡Cuedado šmochtsebomna! Cabá chca ndochnëngo ora, lempe tcbonjabuayená ca” —Jesús tojanéyana.

Bëngbe Bëtsá Entšá tbojanbemá quem luaroye echanjésabo

(Mt 24.29-44; Lc 21.25-36)

²⁴ Mëntsánaca Jesús tojanéyana: “Pero chë tempo, entsanga puerte chamojasufrí chentsšana, shinÿe ndoñe queochátsbuashinÿinÿana, juashcona ndoñe queochátsbinÿnaye, ²⁵ celocana estrellënga echanjatquécjana, y quem luarentša tsbanánoca espíritënga obenana bomnënga echanjángmëmmana. ²⁶ Y chora, entsanga mochanjinÿe,

Bëngbe Bëtsá Entśá tbojanbemá jantšetěshiñe echántsaboye, corente obenánaca y corente buashinÿinÿaniñe. ²⁷Chora cha chabe angelënga echanjámëndaye chë Bëngbe Bëtsabe ubuáyanënga júbuajama, nÿets luarëngocana, quem fshantsoca cánÿoica juachoicana, celoca ínÿoica juachóntscoñe.

²⁸“Chë higo betiyama šmochjuat-sjinÿe: Tsëm buacuafjënga tojtsebmna ora y tojtsaisëjotsana, jtsotatsëmbuana chë tsabe tempo ya tojtsaisobecuama.

²⁹Cachcá, chë soyënga ndayama tsëngaftanga tbonjauyancá chašmojinÿe ora, šmochántsetatsëmbo Bëngbe Bëtsá Entśá tbojanbemá ya jésabama yojtsemnama. ³⁰Ndegombre cbéyana, lempe chca echanjochnëngo, morsca entsanga cabá ndóbana ora. ³¹Celoca y quem luare echanjopochóca, pero atšbe palabra ndocna te queochaisopochóca.

³²“Pero Bëngbe Bëtsá Entśá tbojanbemá ndayté y ntseco ora yochjésabama, ndocná quenátstatšëmbo, ni chë celoca angelënga, ni Bëngbe Bëtsabe Uaquiñá. Nÿe chë Taitá chama yotátšëmbo.

³³“Chíyeca, cuedado šmochtsebmna y yejuana šmochtsantješna, er ndoñe quešmátstatšëmbo mocna ora yochtsemna Bëngbe Bëtsá Entśá tbojanbemá jésabama tempo.

³⁴Echántsemna mo canÿe entśacá; chana inÿe luaroye ya jëftsebcnana ora, chabe oservënënga jëftsamëndana chabe yebna chamotsinÿenama. Cada ona canÿe trabajo jëftsebnÿiyana, y chë shanÿá jëftsemándana botamana chaotsantješnama. ³⁵Chcasna, cuedado šmochtsebmna, šmochtsantješna, er ntšamo chë trabajayëngcá chë yebna nduiño ntseco jtashjanguama, ndoñe ntsetatsëmbuana, mo nderado jétatana, tséntseto ora, bínÿanoye o cachëse, tsëngaftanga cachcá, Bëngbe Bëtsá

Entśá tbojanbemá ntseco jésabama ndoñe quešmátstatšëmbo; ³⁶ndoñe cuedado šmontsebmne, nderado cha nÿe ndeolpe nántashjango, tsëngaftanga ndëprontánënga šmojtsemna ora, mo ftsomañe cuenta. ³⁷Chíyeca, ntšamo tsëngaftanga cbochanjauyancá, nÿetscanga chanjáuyana: ¡Puerte cuedado šmochtsebmna ca!” —Jesús tojánayana.

Entśanga imojtsejuabnaye ntšamo jamëse Jesús jishachama

(Mt 26.1-5; Lc 22.1-2; Jn 11.45-53)

14 Bashco fiestama uta te yojetsá-jamna, chë Bëngbe Bëtsá Egip-tocana judiëngbe bëts taitanga tojánat-sebacama jtenójuaboyama fiesta, chë levadúraca ndëpormana tandëse say-ora. Chë judiëngbe bachnangbe amëndayënga y chë ley abuátambayënga imojtsenguaye ntšamo Jesús jishachana jtseíngñase, y jtsóbama. ²Báseftanga imojtsichamo: “Quem fiestëntscuana ndoñe, er nderado entsanga yapa muanjótšá enbouenanana ca.”

Canÿe shembása botamana uanguëtse béjaye Jesusbe bestšašinë tbojanbuešcja

(Mt 26.6-13; Jn 12.1-8)

³Jesús Betanioca yojtsemna, Simón chë bacna nguayanánaca šocá ca uabobuatmabe yebnentše; mesëshentše Jesús yojtsemna ora, canÿe shembása tojánashjango. Chë shembása yojúshjango canÿe alabastro jarrëtema jútjena canÿe becá uámana y botamana uanguëtse béjayeca, ena nardana uanguëtšiyey; chana chë jarrëtema yojátsba y chë béjaye Jesusbe bestšašinë tbojanbuešcja. ⁴Chca tmojáninÿe ora, báseftanga chentše imojtsemnënga tmojanotjayaná y mëntśá imojtsenatsëtsnaye: —¿Ndáyeca nÿe bonamente chë soye yojtsemna

ca? ⁵Chamna, matmënjobenanga chë béjaye unga patse denario crocenánama juiyana, y chánaca ndbomnjémënga matmënjújabuache ca.

Y chë shembásabiama podesca imojtsichamo.

⁶Chora Jesús tojanéyana: —¿Ndáyeca quem shembása ndoñe cachcá šmochanjonÿyaye ca? ¡Ndocá matatsana! Atšbiamá tšabe soye tonjama. ⁷Er ndbomnjémënga nÿets tempo tšëngaftangbeñe mochanjëftsemna, ndayénaca šmojábošena ora, šmatjobenaye tšabe soye chëngbiama jamana; er atše tšëngaftangaftaca ndoñe nÿets tempo quichásemna. ⁸Quem shembása lempe ntšamo tojobenacá atšbiamá tonjama. Chca tonjama ora, atšbe cuerpo tonjaprontá atše juatbontsa tescama, cabá ndoñe obaná séntsemna ora. ⁹Ndegombre cbéyana, quem luaroca ndayéntsnaca Bëngbe Bëtsabe tšabe noticiënga chamojtsabuayiyná chentše, ntšamo quem shembása tojamámncaca becá mochanjëftsóyebuambaye, chca, entsanga chabiama chamotsenójuabnama ca —cha tojanéyana.

**Judas tojána bachnangbe
amëndayëngbioye,
Jesús chamuishachama
(Mt 26.14-16; Lc 22.3-6)**

¹⁰Chentšana, Judas Iscariote, canÿe chë bnétsana uta uatsjendayënguentsá, tojána chë bachnangbe amëndayëngaftaca jencuéntama, Jesús chëngbe cucuatšinë jaboshjonama. ¹¹Chca tmojanuena ora, chënga imojóyejuaye y tmojanšbuachená crocénana jtabuénayana. Y cach orscana Judas yojtsenguaye ntšamo jamana y ndëmua ora, Jesús chëngbe cucuatšinë jaboshjonana.

**Jesús chabe uatsjéndayëngaftaca
Bashco saná tojanse**

*(Mt 26.17-29; Lc 22.7-23; Jn
13.21-30; 1 Co 11.23-26)*

¹²Chë Bashco fiesta bojatsënté, chë levadúraca ndëpormana tandëse sayté, chë uatsjéndayënga Jesús tmojantjá: —¿Ndémoca cojtseboše bënga fchauptontama, Bashco saná chacosama ca?

Chca te chë judiënga imojanamana, Bëngbe Bëtsá jëtschuayamna canÿe oveshá jóbana chora jasama, chë Egiptocana chëngbe bëts taitanga Bëngbe Bëtsá tojánatsebacama jtenójuaboyama.

¹³As Jesús uta chabe uatsjéndayata tojanichamó y mëntšá tojanéyana: —Chë bëts puebløye motsata. Chašojáshjango ora, canÿe bacó cmochanjóbiatše, matbajiñe búyeshe echantsabuyambaye; cha šochjuasto y šochtserreparana ndëmuanÿe yebnentše yochjámashënguama; ¹⁴y chë yebna nduiño šochjauyana: “Buatëmbayá tonjayana: ¿Ndayentše chë tsañe yojtsemna, Bashco saná atše atšbe uatsjéndayëngaftaca jasama ca?”

¹⁵As cha cmochanjínÿanÿiye canÿe bëts tsañe, tsbanana pisoca, lempe prontániñe; chentše šochjapróna bënga mochjasama ca.

¹⁶As chë uatsjéndayata tbojána y tbojáninÿena lempe ntšamo Jesús tojanëyancá; y chentše chë Bashco saná tbojanprontata.

¹⁷Tojanibétata ora, Jesús chë yebnoca tojánashjango, chabe bnétsana uta uatsjéndayëngaftaca. ¹⁸Y mesëshentše imojtsesaye ora, Jesús tojanéyana: —Ndegombre cbéyana, canÿa tšëngaftanguentsá, átšeftaca entsesá cha, uayayëngbe cucuatšinë sochanjáboshjona ca.

¹⁹ Chorna chë uatsjéndayënga ngménaca imojtsemna, y tmojanontsé canyánya cha jatjayana: —¿Atše chtsemna ca?

²⁰ Y Jesús tojanéjua: —Canya chë bnétsana utatentsá entsemna. Chabe tandëse cach atše sëntsefchecuacná ōcenenetše cha entsefchecuacná. ²¹ Ndegombre, Bëngbe Bëtsá Entsá tbojanbe-máftaca echanjopása ntšamo chabiana Bëngbe Bëtsabe uabemana palabren-guiñe endayancá. Pero, itša lastema chë bochjáboshjonabiama! Chabiana más tsabá manjanma ndoñe ntjónynana ca — Jesús tojánayana.

²² Imojtsesantscuana, tandëse tojanca, Bëngbe Bëtsábioye chama tbojtanchuá, tojanjataye y chabe uatsjéndayënga tojanéjatá, y mentsá tojánayana: “Mocñënga, mosënga, atšbe cuerpo entsemna ca.”

²³ Chentsana, canye coptema vínoyeca tojanaca, Bëngbe Bëtsábioye tbojtanchuá, chabe uatsjéndayënga tojanéřšasé, y nyetscanga tmojanofsé.

²⁴ Mentsá tojánayana: “Quem vínoye atšbe buiñe entsemna. Atšbe buiñe echanjuábuashana entsanga chamot-setatšëmbuama ntšamo Bëngbe Bëtsá entsanga tojašëbuachenacá ndegombre yochjochnënguama. Chë buiñe bëtscá entsangbe tsabiama echanjuábuashana.

²⁵ Y ndegombre cbëyana, morscana ya ndoñe más chë uvasëšentsana obocniye quichaisofšiye. Chë tsëm vínoye tsëngaftangaftaca chanjofšiye, Bëngbe Bëtsabe amëndayoca chamojtssemna ora ca” —tojánayana.

**Jesús tojánayana, chábioye
ndoñe bonjanabuátma ca
Pedro yochjánayanama**

(Mt 26.30-35; Lc 22.31-34; Jn 13.36-38)

²⁶ Bëngbe Bëtsábioye jëtschuayama tmojancantá chentsana, Olivos tjashoye tmojëřtsanbocana. ²⁷ Jesús

tojanéyana: —Nyetsca tsëngaftanga quem ibeta átšbeñe ošbuáchiyana šmochantsobuetše y šmochántsacheta, er Bëngbe Bëtsabe uabemana palabren-guiñe, cha mentsá tojánayana: “Chë oveshënga abuajénya chanjóba y chë oveshënga mochantsáshana ca.” Chca tsëngaftangaftaca echanjopása, uayayënga chašmojishache ora. ²⁸ Pero obanënguentsana chaitayentšana, tsëngaftangbe natsana Galileoye chanjá ca —cha tojanéyana.

²⁹ Chora Pedro tbojanayana: —Masque nyetscanga ácbeñe ošbuáchiyana chamotsobuetše y chamotsacheta, atše nya ndocna te ca.

³⁰ Chora Jesús tbojanayana: —Ndegombre cbëyana, cam ibeta, ngallo cabá uta soye ndécanta ora, aca unga soye cochanjayana ndoñe šconduabatma ca.

³¹ Pero Pedro más yojtsichamo: —Masque chašotsemna ácaftaca jóbanama, atše ndoñe quichátayana ndoñe cbonduabatma ca.

Y nyetscanga cachcá imojtsichamo.

**Getsemaní luarentše Jesús, Bëngbe
Bëtsáftaca tbojanencuentá**

(Mt 26.36-46; Lc 22.39-46)

³² Chentsana, canye luare Getsemaní ca uabáinoye tmojána. Chocna Jesús tojanéyana: “Muentše motbiana, chëntsacuana atše choye chanjá, Bëngbe Bëtsáftaca jencuéntama ca.”

³³ Y tojëřtsanëbiatše Pedro, Santiago y Juan. Choca cha yojóntša puerte ngménaca jtsemnama y corente cochtset-šenaná. ³⁴ Chëngbiyoe tojanéyana: “Atšbe ainana puerte ngménaca entsemna, mo jobanamcá. Muentše moquedanga y šmochtseřsna ca.”

³⁵ Chentsana, Jesús más natsanoye tojána, tojanoshëntsamentšë y fshantsóntscoca tojanotsejbëna y Bëngbe Bëtsábioye tbojanimpadá,

jopódianëse, chë tša japedësa ora ndoñe chaondóshjanguama. ³⁶Mëntšá yojtichamo: “Atšbe Taitá, aca lempe jamama condobena; tojopodese, cochjama atše japedësama ndoñe chašondétsemnama. Pero ntšamo atše stsebošcá ndoñe chaondétsemna, sinó ntšamo aca cojtsebošcá ca.”

³⁷Chentšana, chabe unga uatsjéndayëngbioye tojtanabo, y chëngna imnétsoñañe. Chca tojánanñena ora, Pédrëbioye tbojaniana: “Simón, ¿cotsomañe? ¿Ni mo nñe canñe hora jtsefšnama ndoñe tconjobená? ³⁸Šmochtsefšna y Bëngbe Bëtsáftaca šmochtsencuëntaye, bacna soye jamama ndoñe chacmondócochënguama. Tšëngaftanga ndegombre šmontseboše espíritoca Bëngbe Bëtsá joyeunayana, pero cuerpiñe ndoñe añemo quešmátsbomna ca.”

³⁹Jesús cachiñe tojesaná y Bëngbe Bëtsáftaca tbojanencuentá, cach palabrënga jayanëse. ⁴⁰Yojtabo orna, chë uatsjéndayënga cachiñe imnétsoñañe; chënga imojtsefshétana ocñaye causa, y ndoñe imontsobena ntšamo jojuana.

⁴¹Chentšana, tojtësaná y tojtanabo ora tojanéyana: “¿Cabá šmotsomañe y šmotsochñañe? Nñe nñetšá; hora tojjobuache, Bëngbe Bëtsá Entšá tbojanbemá bacna soye amëngbe cucuatšiniñe mochanjáboshjona.

⁴²Motsbananga, cuajna. Minñënga, atše boshjuaná ya entsebeconá ca.”

Uayayënga Jesús tmojánishache

(Mt 26.47-56; Lc 22.47-53; Jn 18.2-11)

⁴³Jesús cabá yojtsoýebuambnantscuana, Judas, canñe chë bnétsana uta uatsjëndayënguentšá, tojánashjango y cháftaca ba entšanga espadéjangaca y ngarotbéngaca prontánënga. Chënga imojamna chë bachnangbe amëndayënga, ley abuátambayënga y judiëngbeñe bëtsëjemëngcá mándayëngbe ichmónënga. ⁴⁴Judas,

chë boshjuaná, tojanjuabó ntšamo jamana entšanga jinñanñiyama ndëmua Jesús bétsemnana. Chíyeca, yojáuyana: “Nda chajjauámocho, cha echántsemna; šmochjishache y cuedádoca šmochjuánatse ca.” ⁴⁵Chcasna, Judas Jesúsbioye tojanobeconá y tbojaniana: “¡Buatëmbayá ca!”

Y tbojanámocho. ⁴⁶Chora chë entšanga tmojánishache y tmojanánatse.

⁴⁷Pero canña chentše Jesúseftaca yojtsemná, chabe espadéja yojenosëngboténtšena, y chë bachnangbe más uámana amëndayabe oservená canñe matscuasë tbojtsanéstjango.

⁴⁸Y Jesús chë entšanga tojanatjá: “¿Ndáyeca šmojabo espadéjangaca y ngarotbéngaca atše jishachama, mo atše canñe bacá uamana entšá cuaftsemncá ca? ⁴⁹Atše cada te tšëngaftangbeñe sëndétsemna Bëngbe Bëtsabe bëts yebnocá abuátambaye, y ndocna te choca chešmátanishache. Pero tšëngaftanga chca átseftaca šmontsama, cachcá ntšamo Bëngbe Bëtsabe uabemana palabrënguñe endayancá chaotsemnama ca” —tojánayana.

⁵⁰Chorna, nñetsca uatsjëndayënga tmojtsanëuatjaná y tmojtsanacheta, y Jesús cachcá chë uayayëngaftaca tmojesanonjá. ⁵¹Canñe bobontse Jesúsbioye ibojtséstona, nñe canñe uafjantse entšéjua uichëtjoná. Cha chë entšanga tmojánishache, ⁵²pero chëngbe cucuatšiniñe chë entšéjua jesáboshjonëse, chë bobontsna enašá yojtšachá.

Jesús tmojanánatse chë judiëngbe uámana amëndayëngbioye

(Mt 26.57-68; Lc 22.54-55, 63-71; Jn 18.12-14, 19-24)

⁵³Chentšana, Jesús tmojanánatse chë bachnangbe más uámana amëndayábioye; y chocna, nñetsca chë bachnangbe amëndayënga,

bëtsëjemëngcá amëndayënga y ley abuatambayënga tmojánenefjna. ⁵⁴ Pedro bënocana Jesús tbojanasto, chë bachnangbe más uámana amëndayabe yebnentša chashjóntscoñe; y chentše tojanoquedá. Chë Bëngbe Bëtsabe bëts yebnoca josticiëngaftaca yojtsebemana; iñe juachaca yojtsešbonena.

⁵⁵ Chë bachnangbe amëndayënga y chë judiëngbe uámana mándayënga imojtsenguaye canya, nda ndayánaca Jesusbe contra cháuyana, as jobenayama cha chaóbana ca jayanama; pero ndoñe montsaninñana. ⁵⁶ Er masque banga Jesusbe contra uayátsenaye soyënga imojtsichamo, nyëtscanga ndoñe cachca soye montsanichamo.

⁵⁷ Báseftanga imojtsaye y mëntšá Jesusbe contra, ndoñe ndegombre betsemncá tmojánayana: ⁵⁸ “Bënga cha fsënjoyeuná mëntšá: ‘Atše quem Bëngbe Bëtsabe bëts yebna, entšangbe pormana yebna, chantsepochóca; y unga tese inye Bëngbe Bëtsabe bëts yebna, entšángbeyeca ndëpormana yebna chanjëtšjebo ca.’”

⁵⁹ Pero masque chca imojtsichamo, nyëtscanga ndoñe cachca soye montsanichamo.

⁶⁰ Chorna, chë bachnangbe más uámana amëndayá yojotsbaná, nyëtscangbe tsëntsaca yojotsaye, y Jesúsbioye tbojantjá: —¿Ndocá cochanjayana? ¿Ndayase yojtsemna chë acbe contra montsichamo soye ca?

⁶¹ Pero cha nye iytëca yojtsemna y ndocá ibontsëjuana. Chë bachnangbe más uámana amëndayá cachiñe tbojtëtantjá, mëntšá: —¿Aca chë Cristo icomna, Bëngbe Bëtsá chë nda fsëndadoranabe Uaquiñá ca?

⁶² Y Jesús tbojanjá: —Arseñor, atše cha sëndmëna; y tsëngaftanga šmochanjinye, atše, Bëngbe Bëtsá Entšá tbojanbemá, chë nyëts obenana bomnabe

catsbioica chantsetbemana, y celoca jantšetëshiñe chántsaboje ca.

⁶³ Chora, chë bachnangbe más uámana amëndayá chabe uichëtjonëjuangá yojtsenántšajatanëca, puerte ibojtsetna causa, y tojánayana: —¿Ndayama más entšanga šochjátëjaboto Jesusbe contra chamuayanama ca? ⁶⁴ Tsëngaftanga šmonjouena ntšamo chë entšá entsichamcá, y chca Bëngbe Bëtsabiana entsemna mo cha cuafjoyenguangcá, chë chabe Uaquiñá yomna ca cha tonjayana ora. ¿Ntšamo tsëngaftanga šmatjayana ca? —cha tojanëýana.

Y nyëtscanga tmojánayana, cha ndegombre bacna soye yojtsebmna y jóbanama ibojtsemna ca.

⁶⁵ Chorna báseftanga tmojanontšé Jesús buashëtjnayana; jubiá imojtšbotse, imojtsejantšetaye y imojtsetjanaye: “¡Momalisiá nda tcmënjajantšetá ca!” Y chë Bëngbe Bëtsabe bëts yebnoca josticiëngna imojtsajuebjantšetaye.

Pedro tojánayana Jesúsbioye ndoñe bonjanabuátma ca

(Mt 26.69-75; Lc 22.56-62; Jn 18.15-18, 25-29)

⁶⁶ Pédrëna, tsmanoca yojtsemna chashjoca. Chora, canye shembása, chë bachnangbe más uámana amëndayabe oservená yojáshjango; ⁶⁷ y Pédrëbioye tbojáninye ora, cha iñe juachaca yojtsansbonena, yejuana ibojonýinýie y tbojanayana: —Acnaca, Jesús Nazaretocáftaca conjánana ca.

⁶⁸ Pero Pedro tojánayana chábioye ndoñe bonjanabuátma ca; y mëntšá tojánayana: —Ndayama cojtsichámuama ndoñe quetsátstatšëmbo, ni quešnátësertana ca.

Y shjoye, amashjuanóntscoñe yojábocna; y chora canye ngallo yojacánta. ⁶⁹ Chë oservená cachiñe

Pédrëbioye tbojáninye y tojanontsé chë ínÿenga jauyanana: —Muánaca Jesusbe uatsjendayënguentśá entsemna ca.

⁷⁰ Pero chana cachiñe tojánayana Jesúsbioye ndoñe bonjanabuátma ca. Chentśana, chë chentše imojtsemnënga Pedro tmojátaniyana: —Ndegombre aca chënguentśá contsemna; ácnaca Galileocá contsemna ca.

⁷¹ Pero Pedro tojanontsé ichámuana: —¡Bëngbe Bëtsá chašotsecastigá ndoñe ndegombre soye stschámëse ca! —y yojóntśa júrayana— ¡Atše chë entśá ndoñe quetsatabuatma, ndabiama tšëngaftanga šmonsatsëtsná ca!

⁷² Y cachora chë ngallo uta soyama yojacánta, y Pedro yojenójuaboje ntšamo Jesús tbojaniyanama: “Ngallo cabá uta soye ndëcánta ora, aca unga soye cochanjayana ndoñe šconduabuatma ca.” Y tojanontsé enóbošachiyana.

Jesús Pilátbioye tmojanánatse

(Mt 27.1-2, 11-14; Lc 23.1-5; Jn 18.28-38)

15 Tojanbinÿna ora, chë bachnangbe amëndayënga, chë judiëngbeñe bëtsëjemëngcá amëndayënga y ley abuatambayënga cánÿentše tmojánenefjna, nÿetsca chë luarentśa más uámana mandayëngaftaca, jenóyeunayama ntšamo jamëse Jesús jóbama. Jesús tmojanëcuébatśëca y tmojanánatse, y Pilato, chë Judeoca mandadbe cucuatšinë tmojánboshjona.

² Pilato Jesúsbioye tbojantjá: —¿Aca chë judiëngbe rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

³ Chë bachnangbe amëndayënga bëtscá soyënga Jesusbe contra imojtsichamo; ⁴ chíyeca Pilato cachiñe Jesúsbioye tbojantjá: —¿Ndocá šcochanjojuá ca? Minÿe; bëtscá soyënga acbe contra montsichamo ca.

⁵ Pero Jesús ndoñe más tbonjanjuá; chë causa, Pilato ndoñe yontsetátšëmbo ntšamo jajuaboyana.

Jesús chaóbana ca tmojánayana

(Mt 27.15-31; Lc 23.13-25; Jn 18.38–19.16)

⁶ Cada Bashco fiesta ora, Pilato yojanamana canÿe utamená jëtsboshjonana, ndánaca entšanga tmojuabuayaná. ⁷ Chë tempo yojamna canÿa Barrabás ca uabainá; cárceloye inautámëna chabe enutëngaftaca. Chëngna entšanga tmojtsanëbaye, mandadëngbe entšangaftaca imojentsjaná ora. ⁸ Chora, entšanga tmojánashjajna y tmojanontsé Pilátbioye jauyanana, ntšamo Bashco fiesta ora jamama yojanamancá chaomama. ⁹ Y Pilato tojanëjua: —¿Tšëngaftanga šmojtseboše tšëngaftangbe rey atše chjëtsboshjona ca?

¹⁰ Chca tojánayana, er Pilato yojtsetátšëmbo, chë bachnangbe amëndayëngna envidia causa Jesús chabe cucuatšinë tmojánboshjonama. ¹¹ Pero chë bachnangbe amëndayëngna entšanga tmojanañemó chamuenbouënanama, Pilato jauyanama chëngbiama Barrabás chabuatśboshjona ca. ¹² Y Pilato tojanatjá: —¿Y ntšamo chjama chë “judiëngbe Rey ca” šmonduabobuatmáftaca ca?

¹³ Y chënga tmojanáyebuachena: —¡Motsecrucificá ca!

¹⁴ Y Pilato entšanga tojanëyana: —¿Ndáyeca? ¿Ntšamo cha tojobuachjanguá ca?

Pero chëngna más añëmoca tmojtëtanayebuachena: —¡Motsecrucificá ca!

¹⁵ As Pilato, entšangaftaca tšabá joquédama yojtsebóšeyecna, Barrabás tbojtanboshjona. Yojámëndaye soldadënga jabuache Jesús chamotsetšenama; y chentśana soldadëngbe cucuatšinë tbojánboshjona, chamocrucificama.

¹⁶ Chentšana, chë soldadënga Jesús tmojanánatse chë mandadbe bëts yeb-
nentša chashjoye, y nÿetsca soldadënga
tmojánachembo chamobéconama.

¹⁷ Shbuenda uafjatsenga uinÿna
entšayá mo reycá tmojanichëtjo;
canÿe coronëshá tmojanapormá
uchmašéfjagaca y tmojanabestšajó.

¹⁸ Y chentšana tmojanontšé jachuayana:
“¡Bayté judiëngbe Rey cochtsemna ca!”

¹⁹ Canÿe niñéfjaca Jesús
bestšasiñe imojtsétsjanjnaye,
imajtsebuashëtjnaye, y chabe delante
imajtsofshëntsaméntšenaye.

²⁰ Y
chca imnaftsáboyejuanentšana,
chë shbuenda uafjatsenga entšayá
tmojtšanabotsca y cachabe entšayá
tmojtanichëtjo, y pueblo chaboye
tmojanánatse jacrucificama.

Jesús tmojanrucificá

(Mt 27.32-44; Lc 23.26-43; Jn 19.17-27)

²¹ Chora, canÿe entšá chëjana
yojtsatashjajuana, Simón ca uabainá,
Cirene pueblócá, Alejandro y Rufbe
taitá; jajocana yojtsatachnëjuana; y chë
soldadëngna imojuatária Jesusbe cruz
jëftsocutsayama.

²² Jesús tmojanánatse Gólgota ca
uabaina luaroye (hebreo biyañe
endayana “Obanabe Bestšashe
Luare ca”); ²³ y tmojanabuiyé
vínoye mírraca enájuabniye, pero
Jesús ndoñe yonjuáyëngacñe.
²⁴ Y chentšana tmojanrucificá; y
chabe entšayangamna, tsbanánoye
tmojanétsena jinÿama ndayá cada ona
yochjëftsanácñama.

²⁵ Cachëse, base mošenana ora Jesús
tmojanrucificá. ²⁶ Y chabe bestšashe ju-
atsboicna canÿe uabemana soye tmo-
jananjó. Chiñe yojétsayana ndáyeca cha
tmojanrucificama, mëntšá: MUA CHË
JUDIËNGBE REY ENDMËNA ca.

²⁷ Y cháftaca útata bacna soye
ochjajnayátnaca tmojanacrucificá,

canÿa chabe catšbioica, y ínÿana
chabe uañicuayoica. ²⁸ Chca cháftaca
tmojanma, chaochnënguama
ntšamo Bëngbe Bëtsabe uabemana
palabrënguinië chabiamá iuayancá,
mëntšá: “Y chábioye tmonjáninÿe mo
chë puerte bacna soye amënguentšá
canÿa cuaftsemncá ca.”

²⁹ Y chëjana imojtsachnëjuana
entšanga, Jesús imojtsóyenguaye,
imojtsobestšfshanenaye y imojtsatsaye:
“¡Aca chë Bëngbe Bëtsabe bëts yebna
cochtšánenasatajchca y nÿe unga tese
cochtanjebo, ³⁰ cach aca mentsbocá y
cruzocana matastjango ca!”

³¹ Cachcá chë bachnangbe
amëndayënga y chë ley abuátam-
bayënga imojtsáboyejuana, y chënga
imojtsenatsëtsnaye: “Cha ínÿenga
tojëftsatsëbacá, pero cachá jéntsbo-
camá ndoñe quenátobena. ³² ¡Chë Cristo,
chë Israeloca Rey! ¡Cruzocana
chauatastjango, bënga jinÿama y
chábeñe chaftsošbuachema ca!”

Y cháftaca ibojtsecrucificanátnaca
ibojtsóyenguaye.

Jesús tojanóbana

(Mt 27.45-56; Lc 23.44-49; Jn 19.28-30)

³³ Nÿetsto orscana y las treséntscoñe,
nÿets quem luare yojtseibétata. ³⁴ Chca
orna, Jesús chabe biyañe tojanáye-
buachena: “Eloi, Eloi, ¿lema sabactani
ca?” (Chca endayana “Atšbe Bëtsá, atšbe
Bëtsá, ¿ndáyeca cachcá šcojonÿá ca?”)

³⁵ Chca tmojanuena ora, báseftanga
chentše imojtsemnënga imojtsichamo:
“Mouenënga, chë Bëngbe Bëtsabe
juabna oyebuambnayá Elías
bontsechembuana ca.”

³⁶ As chora, canÿa tojanótjajo,
untja vínoyeca canÿe esponjëshe
tojanfchecuacuá, canÿe niñëfjiñe
tojananguësëtjo y Jesúsbioye
tojanbeconá chaofšema; y tojánayana:

“Cachcá mochjonÿaye, er Elías tayochjabo jabátëstjanguama ca.”

³⁷ Pero Jesusna, jabuache tojanoyó y tojanóbana. ³⁸ Y chë Bëngbe Bëtsabe bëts yebnoca yojújonÿana entšëjuu tsëntsaca yojtsenájataye, tsbanánocana fshantsoye. Chëjua bënëjua inauamna y chë tsatsëntsaca inaujonÿana. ³⁹ Chë romano soldadëngbe amëndayá, Jesusbe ndirichiñe yojtsemna; y ntšamo cha tojanobancá tbojáninÿe ora, tojánayana: “¡Ndegombre quem boyabása Bëngbe Bëtsabe Uaquiñá yomna ca!”

⁴⁰ Básefta shembásengnaca chentšë imojtsemna, bënëcana imojtserreparana; chënguentšë imojtsemna María Magdalena; María, Santiago chë más basa y Josebe mamá; y Salomé. ⁴¹ Chë shembásengna Jesús tmojanasto y tmojanájabuache cha Galileoca yojamna ora; y inÿe ba shembásengnaca chentšë imojtsemna, chë cháftaca Jerusalenoye tmojánanga.

Jesús tmojanatbontsá

(Mt 27.57-61; Lc 23.50-56; Jn 19.38-42)

⁴² Chë yëfsana ochnayté yojtsém-nayeca, cach te yojánamna saná japróntana chë yëfsana jasama. Ya yojtseibétatana ora, ⁴³ Pilato yojtsemnoye tojána canÿe boyabása, José ca uabainá, Arimatea pueblócá; cha inamna canÿe chë luarentša uámana mandayënguentšá. Cha Bëngbe Bëtsabeñe yojtsošbuáchiye y yojanobátmana chabe amëndayana chaóshjanguama. Nduatj cá Pilátbioye Jesusbe cuerpo tbojanotjañe. ⁴⁴ Pilato yojenjaná Jesús tša betso yojóbanama; as tojanmandá chë soldadëngbe amëndayá chamuachembo, jatjayama Jesús ya bën obaná tayojtsemnama. ⁴⁵ Chë soldadëngbe amëndayana Pilátbioye ibojauyana Jesús ya obaná yojtsemna ca; y as

chora, Josébioye tbojanlesenciá Jesusbe cuerpo chabotsámbañama. ⁴⁶ Chora, José canÿe uafjantse lino entšëjua tojanabuamé, Jesusbe cuerpo cruzocana tbojanëstjango, chë lino entšëjuuca tbojanandmaná, y canÿe cuevēshiñe ndëtsbeñe pormánëshiñe tbojanjajó; chentšana canÿe ndëtsbé tojanjoná, y chë cuevēshoye amashjuanentšë tojánachto. ⁴⁷ María Magdalena y María, chë José y Santiagbe mamá, tbojáninÿe ndayentšë Jesusbe cuerpo tbojanjájoma.

Jesús tojtanayena

(Mt 28.1-10; Lc 24.1-12; Jn 20.1-10)

16 Ochnayté tojanopasá ora, María Magdalena, María Santiagbe mamá, y Salomé, botamana uanguëtšë béjaye tmojanabuamé, chíyeca jama Jesusbe cuerpo janëtjuama; ² y tmenguse, chë semana bojatséntena, cabá cachëse, shinÿe yojábocna ora, chë cuevēshoye tmojána. ³ Imojtsaye ora imojtsayénatsëtsnaye: “¿Chë cuevēshoye amashjuanentša ndëtsbé nda bochtsabuajuána ca?”

⁴ Pero imojontješiyë ora, tmojáninÿe chë cuevēshoye amashjuanentša bëts ndëtsbé, chentšana juanáñe. ⁵ As chënga choye tmojánamashjna y choye tmojáninÿe canÿe bobontse bën uafjantse entšëjua uichëtjoná, chë cuevēshentša catsbioica inétsotbemañe; y chë shembásenga imojouatjaná. ⁶ Pero chë bobontse tojanéyana: “Ndoñe matauatjëngana; tsëngaftanga šmondënguá Jesús Nazaretocá, chë tmonjancrucificá cha. Cha ya tontayena; muentšë ndoñe quenátsmëna. Minÿënga cha enjëftsejajonentšë. ⁷ Motsajna, y Pedro y chë inÿe uatsjëndayënga šmochjáuyana: ‘Jesús tsëngaftangbe natsana Galileoye echanjá. Choca cha šmochanjinÿe, ntšamo cachá tmojanéyancá ca.’”

⁸As chë shembásenga betesco chë cuevëshentšana tmojésanbocana, er puerte auatjanánënga imojtsemna y ngmëmnyënga imojtsemna; y chë causa, chë soyama ndocná tmonjaniyana.

**Jesús, María Magdalénbioye
tbojánëbëbocna**

(Jn 20.11-18)

⁹Jesús tojtanayentšana, chë semana bojatšenté, Jesús natsana María Magdalénbioye tbojánëbëbocna. Tempo Jesús chábtentšana canýsëfta bacna bayëjënga tojtanébuacana. ¹⁰Cha Jesúsbioye ainá tbojáninýentšana, tojána Jesúseftaca imojánajnënga chama jaúnayama; chëngna ngménaca y sáchénaca imojtsemna. ¹¹Pero chënga tmojanjuabó nderado mo ndoñe ndegombre yontsemna ca, chë Jesús ainá yojtsemna ca, y María Magdalena chábioye tbojáninýe ca tmojanuena ora.

Uta ustonata Jesúsbioye tbojáninýe

(Lc 24.13-35)

¹²Chentšana, uta ustonátbioye, básefta yebnënga yojamna luaroye ibojétsaye ora, Jesús tojánëbëbuacna, mo inýa cuaftsemncá. ¹³Chora chata tbojésanshëcona chë ínýënga chama jacúntama; pero chëngna cach ndoñe ndegombre ca tmojanjuabó.

**Jesús chë uatsjéndayënga
tojanichamó, Bëngbe
Bëtsabe soyëngama
nyetsquénache jábuayenama**

(Mt 28.16-20; Lc 24.36-49; Jn 20.19-23)

¹⁴Cabana, Jesús chë bnëtsana canýe uatsjéndayënga tojánëbëbuacna, chënga imojtsesaye ora; y tojanécácana chë cha ainá yojtsemnama ndoñe ndegombre yontsemna ca tmojánjuaboma y nyets ainánaca chábeñe ndoñe montsanošbuachema, er cha ainá

tmojáninýënga chama tmojanacuntá ora, chca ndoñe ndegombre yontsemna ca chë uatsjéndayënga tmojánayana.

¹⁵Chentšana Jesús tojanéyana: “Nyets luarëngoye motsajna, y nyetsca entsanga chë tšabe noticiëngama šmochtsabuayiynaye. ¹⁶Nda chiñe chaojtsošbuaché y tšëngaftanga chašmojuabaye, cha atsbocaná echántsemna; pero nda ndoñe tontsošbuaché, cha nyets tempo castiganá echántsemna. ¹⁷Chë átsbeñe ošbuáchiyënga ndegombre soyënga imojtsabuayiynama, entsanga mëntšá mochántsetatšëmbo: atše jótšëmbonëse, átsbeñe betsošbuachéyeca, entsángbentšana bacna bayëjëngbe juabna mochántábocna; tempo chënga ndmabiyañe mochantsóyebuambnaye. ¹⁸Masque nderado cucuatšinë mëtscuayënga tmojishache o veneno tmojofšënga, ndocá quemochatspása; y šoquëngbeñe cucuatšënga chamojacjá ora, chënga shnánënga mochántsatšëmëna ca” —Jesús tojanéyana.

Jesús Bëngbe Bëtsábioye tojtaná

(Lc 24.50-53)

¹⁹Bëngbe Utabná Jesús jóyebuambayama tojanpochocá chentšana, celoye cha tmojtanatsbaná, y uámana luarentše, Bëngbe Bëtsabe catšbioica yojtóbëma jtsemándayama. ²⁰Y chë uatsjéndayënga tmojánbocana y Bëngbe Bëtsabe soyëngama nyetsquénache entsanga tmojanabuayená. Cach Bëngbe Utabná chënga yojanëjabuáchana, y yojánama entsanga chamotsetatšëmbuama chë buayenana soye ndegombre Bëngbe Bëtsabe soyënga bëtsemnama, chë uatsjéndayënga bëts soyënga jamama obenana chamotsebomnama cha jtsamëse.

San Lucas

Jabojátšama

1 Ba entsanga Jesusbe historia tmojuábema, ntšamo bêngbeñe ndegombre tojopasacá. ²Chë historia juabemamna, chënga tmojanuena ntšamo Jesusbe uatsjéundayënga y inye entsanga chabiama inmencuentaycá. Chë entsangna tmojáninye y tmojanuena ndayá Jesús tojanmama y ntšamo tojanayancá, y chentšana chabe tšabe noticiënga entsángbioye tmojanabuayená. ³As, átsnaca sënjontsé cuedádoca juanotíciana lempe ntšamo Jesusbiamma imojtsichamcá, tojanobojatšentsšana méntscõe. Mora šontsinýana tšabá yojtsemna acbiama juabemana ntšamo ndegombre yomncá, uámana taitá Teófilo, chë tjuanoticiá soyëngama, ntšamo ndegombre bêngbeñe tojopasacá. ⁴Ba soyënga Jesusbiamma tcmojabuátëmbanga, y atše séntseboše aca chacotsetátšëmbo, ntšamo tcojouencá ndegombre yomnama.

Canýe ángel tojanabuayená Juan chë Ubayaná jónýnama

⁵Herodes Judea luaroca rey inamna ora, yojamna canýe judiëngbe bachna, Zacarías ca uabainá. Cha yojamna Abíasbe bachnanguentša pamillo. Chabe shemna, Isabel ca yojanabaina, y chana Aarónbentsšana entsá inamna (Aarón, chë más uámana bachnangbe natsana amëndayá). ⁶Chatna tšabá amata ibnamna Bëngbe Bëtsabe bominiñe, y ntšamo Bëngbe Bëtsá yomandacá ibojoyena; y chca, ndocná yonjanobena jayanana chata ndoñe tšabá ibonjánama ca. ⁷Básenga tondaye ibonjánabamna, Isabel šësona

jtsebomnama ndobena causa, y chatna ya bëtsanáata ibojtsemna.

⁸⁻⁹Chë bachnanga Bëngbe Bëtsabe bëts yebnentše tmojtsoserverna ora, sempre imojanamana jabocacayana, nda tšabá tbojtsonýená, Bëngbe Bëtsábioye atschuanaye luaroye cháuama incienso jajuinýiyama. Canýe, Zacaríasbe entsanga Bëngbe Bëtsabe bëts yebnoqa, Bëngbe Bëtsábentše imojtsoserverna orna, Zacaríasbioye tšabá ibojonýena; y chca, cha ibojotóca jana incienso jajuinýiyana. ¹⁰Zacarías, incienso yojtsejuinýnantscuana, ba entsanga shjoca imojtsemna, Bëngbe Bëtsáftaca encuëntaye. ¹¹Nýe ndeolpe, Bëngbe Utabnabe canýe ángel tojanonýná chë incienso jajuinýiyama altarentša catšbioica. ¹²Zacarías chábioye tbojáninye ora, tojanenjanán y corente uatjana tbojanábuache.

¹³Chora chë ángel tbojanianyana: —Zacarías, ndoñe matauatjana. Bëngbe Bëtsá tonjouena ntšamo tconjaimpadacá. Acbe shema Isabel canýe šësona bochántsebmna, boyabásetema, y chana Juan ca cochjuabaye. ¹⁴Chama aca corente oyejuayá cochántsemna, y bëtscá entsanga mochanjóyejuaye acbe uaquiñá tojonýnama. ¹⁵Er cha, Bëngbe Bëtsabiama canýe uámana entsá echántsemna. Ndocna te queochaisofsiye vínoye, ni jabuáchiye. Chë Uámana Espiritu chabe ainaniñe echantsemándaye, cha cabá ndonýna orscana. ¹⁶Banga Israeloca entsanga, ntšamo cha chaojayanama mochanjontsé joyeunayana Bëngbe Bëtsá, chëngbe Utabná. ¹⁷Cha echanjášhango chë Bëngbe Bëtsabe Uámana Uabuayanabe natsana, y echántsebmna obenana y canýe espiritu ntšamo chë Bëngbe Bëtsabe juabna oyebuambnayá Elías inabomncá. Chabe natsana echanjášhango,

bětsětsanga chěngbe básengaftaca ndoñe chamondětsentsjanama, y chě nduauenaněnga cachiñe chamotsatsjuabnama ntšamo chě Běngbe Bětsabe bomin'yiñe tšabá aměnga mondbetsejuabnycá. Y chca, entšanga cha echantsapróntaye Běngbe Utabná jabama orscama ca —chě ángel tbojaniana.

¹⁸ As Zacarías chě ángelbioye tbojan-tjá: —¿Ntšamo atše stjobenaye jtsetatšěmbuana chě šcotsatsá soye ndegombre bětsemnama? Er atše ya bětšějema sěntsemna y atšbe shěmnaca cachcá ca.

¹⁹ Chora chě ángel tbojanjuá: —Zacarías, atše ángel Gabriel sěndmēna; atše Běngbe Bětsábica sěndoservena. Cha šonjichmó chě tšabe noticiěnga aca jauyanama y juenayama. ²⁰ Morna, chě cbontsatsá soyiñe ndoñe quecatošbuaché causa, nděbiá cochanjoquéda, y ntšamo cbontsatsacá chaojopasá ora, chama tempo chaojtsemna ora, chora jóyebuambayama cochantobenaye ca.

²¹ Chě ángel Zacaríaseftaca yojtsóyebuambnantscuana, entšanga shjoca Zacaríasbiama imojtsobátmana, y mēntšá imojtsejuabnaye: “¿Ndáyeca tša bēn Běngbe Bětsabe bětš yebnentšē ibojtsobiamná ca?” ²² Zacarías tojtanbocna ora, ndoñe yontsobena chě entšángaftaca jóyebuambayana. Chěnga tmojántatšěmbona, chě Běngbe Bětsábioye atschuanayentšē Zacarías mo otjenayoquécá Běngbe Bětsábicana canye soye tojánin'yama, er chěngbioye jatšěmbombonana yojáuyana, nděbiá yojoquéda causa.

²³ Chabe tempo, chě Běngbe Bětsabe bětš yebnentšē jtsetrabájayama tojanpochocá ora, Zacarías cachabe yebnoye tojtaná. ²⁴ Chentšana baseftaytese, chabe shema Isabel ngomamaná yojoquéda, y chě causa, chě shema shachna ishin'yē cach tsoca

yebnentšē totanoquedá. ²⁵ Cha mēntšá yojtsichamo: “Běngbe Utabná mora atšbiama tojtenojuabó, entšángbentšē atšbe ngménana jtsebojuánama, básenga tondaye běntsabamna causa ca.”

Canye ángel tojanabuayená Jesús jónyname

²⁶ Isabel chněngwana ishin'yē ngomaná yojtsemna ora, Běngbe Bětsá, ángel Gabriel tbojanichmó Galilea luaroye, Nazaret ca uabaina pueblōye, ²⁷ canye shembása María ca uabainá jauatsětsayama. Mariyna cabá boyabása nduabuatmá inamna, pero Joséftaca jobouamayama tbojanšbuachená. Y Josena, rey Davídbentšana entšá inamna. ²⁸ Chě ángel Maríybioye tojána y mēntšá tbojanчуá: —¡Mouena. Běngbe Bětsá tšabe bendición acbiama tonjama! ¡Běngbe Utabná ácaftaca entsemna ca!

²⁹ Chca tojanuena ora, María yojenjnaná chě soyama, y yojtsejuabnaye ndáyeca chě ángel chca tbojanчуama.

³⁰ Chora chě ángel tbojaniana: —María, ndoñe matauatjana, Běngbe Bětsá entsama tšabe bendicioněnga chacotsebomnama. ³¹ Aca ngomamaná cochanjoquéda y canye šešona boyabásetema cochántsebomna, y chana Jesús ca cochjuabaye. ³² Cha puerta echantsámama, y entšangna Běngbe Bětsabe Uaquiñá ca chábioye mochantsábobuatma. Y Běngbe Bětsá chě Utabná, chábioye canye rey bochanjábema, ntšamo David yojamncá, ³³ y Jacóběbentšana entšanga n'yetsca tescama echántsamēdaye, y chabe mándayana ndocna te queochaisopochóca ca —chě ángel tbojaniana.

³⁴ Chentšana María chě ángelbioye tbojantjá: —¿Ntšamo chca yochjopása, cabá ndoñe boyá sěntsebomněse ca?

³⁵Y chë ángel tbojanjuá: —Chë Uámana Espíritu echanjabo nyets ácebeñe, y Bëngbe Bëtsabe obenánaca ngomananá cochanjoquéda. Chabe obenana mo jantšetëshcá cmochanjaboútsbotse; chíyeca chë echanjónýna šešona Uamaná echántsemna, y chábioye Bëngbe Bëtsabe Uaquiniá ca mochantsábobuatma. ³⁶Mouena, Isabel, acbe primá, canýe šešona bochántse bomna, masque ya bëtsananá cha entsemna; chë “šešona ndbomná ca” monjanabobuatmá, mora ya chnénguana ishinýe ngomamaná entsemna, ³⁷er Bëngbe Bëtsá lempe jamama endobena ca —cha tojánayana.

³⁸Chora María chë ángelbioye tbojanayana: —Bëngbe Bëtsabe oservená atše séntsemna. Bëngbe Bëtsá átšeftaca chaoma ntšamo šcojauyancá ca.

Y chentšana chë ángel tojtsatanoñe.

María tojána Isabel jabuáchama

³⁹Chentšana, María tojanoprontá y tojanochëmo canýe puebioye, Judeoca tjañenache luariñe. ⁴⁰Chocna cha, Zacaríasbe yebnentše tojánamashëngo y Isabélbioye tbojanchuá. ⁴¹Isabel ntšamo María tbojanchuama tojanuena ora, Isabelbe šešona chabe uafsbioye tojanobonjó, y chë Uámana Espíritu Isabélbeñe tojánamashëngo chabe ainaniñe jtsemándayama. ⁴²Chcasna, Isabel jabuache tojánayana: —¡Bëngbe Bëtsá acbiana más tšabe bendicionënga entsama nyetsca shembásengbiama, y chë cochántse bomna šešonbiámna cachcá! ⁴³Atše mercedo taitatobuajoñe, atšbe Utabnabe mamá chašubobuáchama; ⁴⁴er atše sënjouena ntšamo šconjachuá, y cachora atšbe šešona oyejuayá atšbe uafsbioye tonjobonjó. ⁴⁵¡Aca Bëngbe Bëtsábeñe tcojošbuaché; cojtsetátšëmbo Bëngbe Bëtsá ntšamo tcmojašbuachenacá yochjamama; chíyeca puerte oyejuayá cochántsemna ca!

⁴⁶Chora María tojánayana:

“Nyets ainánaca Bëngbe Utabná chantsadorana,

⁴⁷y Bëngbe Bëtsá, atšbe Atsbocayabiama corente chanjóyejuaye.

⁴⁸Bëngbe Bëtsá atšbiana tojtenojuabó, atše chabe oservénëjema.

Er morscana muentša entsanga nyetscanga puerte oyejuayá ca šmochantsábobuatma.

⁴⁹Bëngbe Bëtsá, chë nyets obenana bomná, chabe obenánaca bëts soyënga atšbiana tonjama.

¡Bëngbe Bëtsá puerte Uamaná ca entsabaina!

⁵⁰¡Morsca entsanga y más chcoyënga, chábioye yeunanëngbiama, cha sempre bochántse ngmena!

⁵¹Cha, chabe obenánaca bëts soyënga tojama,

y chë nýe cachënga bëtsétsanga enobiamnayëngbe juabna tojtsepochozá;

⁵²reyëngbioye chëngbe mándayentšana tojtsatsatše;

pero chë nýe cachënga bëtsétsanga ndenobiamnayëngbioye, uámanënga tojábiama.

⁵³Chë shéntseca imomnéngbioye, chamosama bëtscá cha tojatsatá, pero chë bomnéngbioyna tondaye tonjatsatá.

⁵⁴Cha tojanéjabuache chabe entsanga Israeloca, chabe oservénënga, y ndoñe tbonjanebnatjëmbo jtsalastemánana,

⁵⁵nyetsca tescama chë Abraham y chábentšana entsángbioye, ntšamo bëngbe bëts taitanga Bëngbe Bëtsá tojanašebuachenacá ca” —cha tojánayana.

⁵⁶Mariyna unga ishinýe Isabélaftaca tojanoquedá, y chentšana cachabe yebnoye tojtaná.

Juan chë Ubayaná tojanonýná

⁵⁷ Isabel jtseshócanama tojanónťsabuache ora, canýe šešona boyabásetema tojanonýná. ⁵⁸ Isabelbe juachañe oyenenga y chabe pamíllanga tmojántatšëmbona ntšamo Bëngbe Bëtsá chábioye ibojalastemama, y chama corente Isabelaftaca tmojanoyeuanga. ⁵⁹ Chë šešona posuftayté yojtsebmna ora, tmojánashjango y chëtëmbioye chë más delicadentše base bobachtema tmojantëtše, ntšamo chë judiënga imojanamancá. Chënga imojétseboše chë šešónbioye Zacarías ca juabáyana, cach beftcá; ⁶⁰ pero chabe mamá tojanéyana: —Ndoñe. Quem šešona echantsabaina Juan ca.

⁶¹ As chënga Isabelbioye tmojanianyana: —Acbe pamíllangbeñe ndocná chca quenatabaina ca.

⁶² Chora chënga jatšëmbombonana Zacaríasbioye tmojantjá, ntšamo chë šešona chaotsabainama cha yojtseboše ca. ⁶³ Zacaríasna jatšëmbombonana canýe tablëbé tojanéyá y chiñe tojanábema: “Cha entsabaina Juan ca”. Y chë causa, nýetscanga ojanánënga imojtsemna. ⁶⁴ Y cachora Zacarías jóyebuambayama yojtobenaye, y yojontšé Bëngbe Bëtsábioye jëtschuayana. ⁶⁵ Chë juachañe oyenenga nýetscanga tmojanëuatjaná, y Judeoca nýetsca chë tjañenache luariñe entsanga chë soyëngama imojtsencuëntaye. ⁶⁶ Nýetscanga chë soyëngama tmojántatšëmbona ora, chëngnaca corente chama imojtsejuabnaye y mëntšá imojtsichamo: “¿Chë básetema, bëtsá ora nda yochtsemna ca?” Y ndegombre, Bëngbe Bëtsabe obenana cháftaca yojtsemna.

Zacarías, Bëngbe

Bëtsábioye jëtschuayama

⁶⁷ Chë Uámana Espíritu tbojanmandá ora, Zacarías, chë basetembe taitá, Bëngbe Bëtsabe mándoca jtsóyebuambnayëse, mëntšá tojánayana:

⁶⁸ “¿Chë Utabná, chë Israeloca entsangbe Bëtsá matschuanga,

er cha tonjabo chabe entsanga jabújabuachama y jabátsebacama!

⁶⁹ Cha bochanjíchmuá canýe atsebacayá puerte obenana bomná,

y cha echántsemna Bëngbe Bëtsabe oservená Davídbentšana entsá;

⁷⁰ ntšamo Bëngbe Bëtsá bayté entsemna, chë chabe juabna

oyebuambnayëngbiajana, chë chábënga imomnëngbiajana bënga šojanašebuachenacá, mëntšá:

⁷¹ Cha canýa bochjanichmuá bëngbe uayayënga y nýetsca uaboyënjëngbiama bënga jabátsebacama;

⁷² bëngbe bëtsétsangbioye jálastemama, y jenójuaboyama y jamama chabe uámana trato,

⁷³ ntšamo Bëngbe Bëtsá, bëts taitá Abrahámbioye tbojanšbuachenacá.

⁷⁴ Cha tbojanšbuachená bëngbe uayayëngbiama bënga jabátsebacama,

chca, bënga ndauatjácá Bëngbe Bëtsá jasérviamá,

⁷⁵ y chabe entsangcá, nýetsca soyënguñe tšabá amënga, Bëngbe Bëtsabe delante nýetsca te bëngbe vidënguñe jëtsiyenama.

⁷⁶⁻⁷⁷ Y aca, atšbe básetemna, Bëngbe Bëtsabe juabna oyebuambnayá ca cmochantsábobuatma,

entsángbioye Bëngbe Bëtsabe soyëngama cochtsabuayiyinama,

Bëngbe Utabná cabá ndáshjango ora, bacna soyënga amana chamuajbanama;

as Bëngbe Bëtsá chëngbe bacna soyënga echanjáperdonaye, y Bëngbe Utabná jabama mochantsopróntaye.

⁷⁸⁻⁷⁹Bëngbe Bëtsá bënga puerte şualastemánayeca, canya bëngbe juabnënga binýnayá bochanjíchmuá,

bënga chë bacna soyënga causa mo ibetiñcá y obanëngbe luarentşcá vida bomnëngbioye jabátsebacama, y jabuátambama ntşamo natjëmbana jt-siyenana ca” —cha tojánayana.

⁸⁰Chë básetema yojontşé jobóchana y chabe espíritnaca puerte. Bayté, entsanga ndoyena luarënguenache cha yojëftsiyena, Bëngbe Bëtsá Israeloca entsángbioye cha tojáninýanýentscuana. Chentşana, chamuábuatmanamna tojanontşé Israeloca entsángbeñe jóyebuambayana.

Jesucristo tojanonýná

(Mt 1.18-25)

2 Chë tempo yojamna canye Romoca bëts mandado, Augusto ca uabainá; y cha, chë natsanama tojanmandá nýetsca entsanga chamuenábe-mama. ²Chë soye tojanochnëngo Cirenio ca uabainá Siroca mandado yojamna ora. ³Chamna, nýetscanga tojanotocá jtangana jenábemëngama, cada ona ndëmoca chëngbe bëts taitanga imojëftsiyena puebloye.

⁴As, Josénaca Galilea luarentşana Nazaretocana yojëftsebozna y Judeoye, Belén puebloye, tojtaná. Tempo, Josebe bëts taitá rey David, Belenoca inoyena. Y José, Davídbentşana entşá inámnayecna, choye jenábemama tojtaná. ⁵Maríaftaca tojánana jenábemama, y muana tbojanşbuachená Joséftaca jobouamayama. Maríangomamaná yojtsemna, ⁶y Belenoca ibojtsemnëntscuana, chë ora tbojanóntşabuache jtseşocanama. ⁷Y

chentşe María ibojtsebozna chabe natsana şeşona, canye boyabásetema. Posadoca tondaye luare yontsemna causna, chata nýe uacnëngbe átana tambuentşe tbojanoqedá. Y Jesús tojanonýná orna, María tbojtanëntsacjuá y canye bachetémiñe tbojanajájó.

Chë angelotëmënga y chë oveshënga abujéñyanga

⁸Belén béconana, chë ibeta, oveshënga abujéñyanga shëntsjoaca cachëngbe oveshëngaftaca imojtsemna. ⁹Nýe ndeolpe, Bëngbe Bëtsábicocana canye ángel tojánébëbuacna, y Bëngbe Bëtsábentşana corente yojtsebuashinýinýana chëngbe shëconániñe. Chama chënga puerte imojocochauatjaná.

¹⁰Chora chë ángel tojanéyana: “Ndoñe matauatjëngana. Sënjabo tşabe soyënga tonjopasama jábuayenama, nýetscanga chamóyejuama. ¹¹Mora chë David tonjanonýná pueblentşe canye şeşona tonjonýná. Cha tşëngaftangbe atsebacayá echántsemna y tşëngaftangbe entsangbiámnaca. Cha endmëna chë Bëngbe Bëtsabe Uámana Uabuayaná, Cristo ca uabainá, y Bëngbe Utabná. ¹²Ndegombre chca entsemnama mëntşá şmochanjátatşëmbona: canye şeşona ntsacjuaná y uacnëngbe bachetémiñe jajoná şmochanjínýena ca” —cha tojanéyana.

¹³Cachora, celocana mallajta angelënga chë natsana ángelbentşe tmojánbocana y Bëngbe Bëtsábioye mëntşá imojtsatschuanaye:

¹⁴“¡Bëngbe Bëtsá, celoca entsemná matschuanga!

Bëngbe Bëtsábioye yeunanëngbiama, Bëngbe Bëtsá corente entsoyejuá; quem luariñe chëngbeñe puerte tşabá chaotsemna ca.”

¹⁵ Chentsana chë angelënga celoye tmojésanshëcuana. Y chora chë oveshënga abujënyanga tmojanontsé jeniyanana: “Belenoye cuajna, chë quem tojopasá soye jinýama. Ndegombre, Bëngbe Bëtsá chë soye šojanýanýe ca.”

¹⁶ As betso tmojána y tmojánanýena María, José y chë šešonatema bachetëmiñe jjoná. ¹⁷ Chë šešona tmojáninýe ora, chënga tmojanacuntá Jesusbe bëtsétsata y chë inýengbioye, ntšamo chë šešonbiama chë ángel tojanëyancá. ¹⁸ Nyetscanga chë tmojanuenënga tmojanenjnáná ndayá chë oveshënga abujënyanga imojtsacúntama. ¹⁹ Pero Mariyna nýe cachabe ainanoca quem soyëngama más bën inétsenujabnañe.

²⁰ Chentsana, chë oveshënga abujënyanga tmojtáná Bëngbe Bëtsá atschuanaye, ndayá tmojáninýama y tmojanuenama. Nýetsá tojanopasá lempe ntšamo chë ángel tojanëyancá.

Bëngbe Bëtsabe bëts yebnoye Jesús tmojanamba

²¹ Posufta te tojánashjache ora, chë basetëmbioye chë más delicadentše base bobachtema tmojantëtše, Bëngbe Bëtsabe entšá bëtsemnama chaotsinýnama, ntšamo judiënga imojanamancá; y Jesús ca tmojanabaye, ntšamo chë ángel tbojaniancá, María cabá ndoñe ngomamaná yontsemna ora.

²² Y chë tempo tojanóshjango, ndaye ora José y María yojtsamna jamana ntšamo Moisesbe leyinë iuayancá, ndayá jamama yojanmëncá, canýe shembása Bëngbe Bëtsabe delante tsabia jtsatsmënama, canýe šešona tbojtsebomnentsana. Asna, Jerusalenoye tbojánata y chë bášetema tmojanamba, Bëngbe Bëtsabe bëts yebnoca jinýinýiyama, ²³ ntšamo chë Bëngbe Utabná Moisésbioye

tbojanianýe leyënguñe iuayancá, mëntšá: “Canýe yebnentše chë natsana šešona boyabása tojtsemnësna, Bëngbe Bëtsábioye cha jinýinýiyana chábioye chabotseservénama ca.” Chcasna, chë bášetema Bëngbe Bëtsabe bëts yebnoye tmojanamba. ²⁴ Y tmojanamba janshana uta shloftše, Bëngbe Bëtsá jëtschuayama, ntšamo Bëngbe Utabnabe leyinë yomandancá. Chiñe mëntšá endayana: “Chë natsana šešona chaojonýná ora, boyabášetema tojtsemnëse, janshana šmochjuamba uta fchetnatémata o uta šešona palomatémata, Bëngbe Bëtsá jëtschuayama ca.”

²⁵ Jerusalenoca inamna canýe bacó, Simeón ca uabainá; cha inamna nýetsca soyënguñe tsábá amá, y yojanienana ntšamo Bëngbe Bëtsá yomandacá. Cha yojanobátmana chë tempo ndaye ora, Bëngbe Bëtsá bochjanichmuá canýa Israeloca entšanga cháuatsebacama. Y chë Uámana Espíritu chabe ainaniñe yojtsemna; ²⁶ chíyeca, cabá lempe chca ndopása ora, cha yojtsetátšëmbo cha ndoñe yochjanóbanama, chë Bëngbe Bëtsabe Uámana Uabuayaná ntjëfstinýcá. ²⁷ Chë Uámana Espíritu tbojanmandáyeca, Simeón Bëngbe Bëtsabe bëts yebnoye tojána; y Jesusbe bëtsétsata chë bášetema tmojanamba ora, ntšamo Moisesbe leyinë iuayancá chabiama jamama ora, ²⁸ Simeón tbojanocutsá y Bëngbe Bëtsábioye tbojtanchuá. Cha mëntšá tojánayana:

²⁹ “Bëngbe Utabná, mora šmoleseñciá, atše acbe oservená natjëmbana jóbanana,

er ya tconjama ntšamo šconjanšbuachenacá;

³⁰ atše chë entšangbe Atsebacayá sënjinýe.

³¹ Aca cha tcojichmó nýets luarenache entšangbiama.

³² Cha chë ndoñe judiëngbe juabnënga binÿnayá echántsemna;

y chábeyeca, nÿets quem luarentse mochanjátatšëmbona, chë acbe entšangbiama, Israeloquëngbiama ca” —cha tojánayana.

³³ José y María ibojenjnanata ntšamo Simeón Jesusbiana yojtšichámuama.

³⁴⁻³⁵ Chentšana, Simeón Bëngbe Bëtsábioye tbojanimpadá tšabe bendicionënga chata chabotsebomnama chaomama; y María, chë Jesusbe mamábioye tbojaniyana: “Quem soyënga corente cmochanjacochtsetšenaná, mo ainana espadéjaca cuafjenëchnëngcá. Cha Israeloca banga echanjápochochaye y banga echanjátsebacaye; y chca, ntšamo banga ainaniñe imojuabnacá echantsótatšëmbo. Israeloca banga quem básetema mochantsábotena y chabe palabréngnaca ca” —cha tbojaniyana.

³⁶ Chéntšnaca yojtsemna canÿe shembása Bëngbe Bëtsabe juabna oyebuambnayá, Ana ca uabainá; cha yojamna Fanuelbe bembe y Aserbe pamillentsá; ya bëtsananá cha inamna. Nÿe canÿsëfta uata cha yojëftsebouamna; ³⁷ y chabe boyá tojanóbanentšana, cha posufta bnétsana y canta uata viudá inamna. Ndocna te Bëngbe Bëtsabe bëts yebnentšana yonjábocana, y chentšë tojanoquedá bnëté y ibeta, Bëngbe Bëtsáftaca encuëntaye y cha atschuanaye; y chama, ba soye yojanamana tondaye ntjascá jtsemnana. ³⁸ Simeón, María y Josébioye yojtšëtsësnaye ora, Ana chëngbioye yojobeconá, y chë Atsebacayá tojanonÿnama Bëngbe Bëtsábioye tbojtanchuá chentšana, Jerusalemoca entšangbioye, chë canÿe atsebacayá Israeloca entšangbiama imojanobatmanëngbioye tojanéyana, chana Jesús yojësemna ca.

Jesús Nazaret puebloca

³⁹ José y María lempe ntšamo chë Utabnabe leyënguine iuayancá tbojanma ora, Galilea luaroye tbojtanata, cachëngbe puebloye, Nazaretoye. ⁴⁰ Y chë básetema yojtšobóchaye, y más añemo yojtšejacana y más osertánama yojtšebomna. Y Bëngbe Bëtsá yojánama cha bëtscá tšabe bendicionënga chaotsebomnama.

Jesús Bëngbe Bëtsabe bëts yebnoca

⁴¹ Chabe bëtsétsata ibojanamana cada uata Jerusalemoye jana Bashco fiestama, chë Bëngbe Bëtsá chë judiëngbe bëts taitángbioye Egiptocana tojánatsebacama jtenójuaboyama fiesta. ⁴² Jesús bnétsana uta uata tojánashjache ora, Jerusalemoye tmojána, ntšamo imojanamancá. ⁴³ Chë fiesta tojanopochocá chentšana, chabe bëtsétsata yebnoye ibojtsataye, y chata ntsetatšëmbcá, Jesusna Jerusalemoca yojtsoquedañe. ⁴⁴ Chata ibojétsejuabnaye Jesús chë inÿe entšángaftaca yojtšataboye ca; chcasna, canÿe te nÿetsá benachëjana tbojánata ora, tbojanontšé chabe pamíllangbeñe y ubuatmëngbeñe jtsenguanguana, ⁴⁵ pero ndoñe ibonjobenaye jtsinÿenana. As, chata chora Jerusalemoye tbojésanshëcona choca cha jetsenguanguama.

⁴⁶ Unga tianoye chata tbojanobená Bëngbe Bëtsabe bëts yebnentšë cha jetsinÿenana. Chana chë Moisesbe ley abuatambayëngbe tsëntsaca inétsotbemañe, chëngbioye inayaunana, inatjanaye. ⁴⁷ Nÿetsca ouenanënga imojtšenjnanaye Jesús tša osertaná inamna, y tša tšabá jojuama cha yojtšobename. ⁴⁸ Chabe bëtsétsata chca tbojáninÿe ora, chátnaca ibojenjnaná. Chora, chabe mamá tbojaniyana: —Uaquiná, ¿ndáyeca chca bëndátaftaca tcojama?

Taitá y atše corente enócochinjenata cbondënguá ca.

⁴⁹ As Jesús tojanéyana: —¿Ndáyeca atše šmonguá? ¿Ndoñe šondétatšëmbo atše šomna atšbe Taitabe yebnentše jtsemnana ca?

⁵⁰ Pero chë bëtsétsata ndoñe tonjanësertá ntšamo cha tojanéyancá.

⁵¹ Chentšana Jesús chë bëtsétsataftaca Nazaretoye tojtaná y chata yojtsayauana. Y chabe mamana nýe cachabe ainanoca chë soyëngama más bën inétsenouabnañe. ⁵² Jesús yojtsobóchaye y más juabna yojtsebmoma; y Bëngbe Bëtsá y nýetsca entsanga corente oyejuayënga chabiamá imojtsemna.

Juan chë Ubayaná entsanga yojanabuayiná

(Mt 3.1-12; Mc 1.1-8; Jn 1.19-28)

3 Bnétsana shachna uatama Tiberio César Romoca bëts mandado yojamna ora, Poncio Pilato yojamna Judeoca mandado, Heródesna Galileoca rey, chabe catšata Felipe Iturea y Traconitoca rey, y Lisániasna Abilinioca rey. ² Anás y Caifás chë bachnangbe más uámana amëndayata ibojamna. Cach tempo, canýe luare entsanga ndoyenentše Bëngbe Bëtsá tbojanatsëtsá Juánbioye; Juan, Zacaríasbe uaqiñá. ³ As Juan nýetsca luarënguëjana Jordán béjaye béconana tojánachnëngo, entsanga mëntšá utsëtsnaye: “Tšëngaftangbe bacna soyëngama ngménaca šmochtenójuaboje, chca amana šmochtsajbaná y Bëngbe Bëtsabe benache šmochtishache. Chora cbochjúbaye, y Bëngbe Bëtsá tšëngaftangbe bacna soyëngama cmochanjáperdonaye ca.” ⁴ Chë soye tojanopasá, cachcá ntšamo chë Bëngbe Bëtsabe juabna oyebuambnayá Isaiás chabe librësañe yojëftsabemcá. Cha mëntšá tojanábema:

Entšanga ndoyena luaroca canýa enduáyebuache:

“Bëngbe Utabná echanjabo ca; mo nda canýe benache tojtseprontacá canýe uámana entšá jashjanguama, cachcá, tšëngaftángnaca, Bëngbe Utabná jabama ainanentše tšabe juabnëngaca šmochtseprontana.

⁵ Nýetsca jachañe echantojútjia, y tjañe y batsjabenga mochantenájachibiaye.

Chë scundna benachënga ndirichëjënga echántatsmëna, y chë bacá mana benachënga mochantenájachibiaye. Mo chë chca tmojtsamëngcá, canýe benache japróntana canýe rey cháuashjanguama,

tšëngaftángnaca bëtscá šmochtseprontana tšëngaftangbe ainaniñe, Bëngbe Utabná jabama.

⁶ Y nýetsca entsanga mochanjinýe chë Atsebacayá Bëngbe Bëtsábentsana jabana ca” —cha tojanábema.

⁷ Chë entsanga Juan chaubáyama imojánbocana ora, Juan yojanëtsëtsnaye: “¡Mëtšcuaye entsanga! ¿Nda tcmënjáuyana chë echanjóshjango uabouana castigüentšana šmochjotsbocá ca?” ⁸ Bëngbe

Bëtsábeñe ndegombre ošbuáchiyënga šmochtsemna, as chca chaotsinýna, tšëngaftanga chë bacna soyënga amana ndegombre šmojtsajbanama. Y ndoñe šmattsejuabnaye cach tšëngaftangbiamá jayanama: ‘Bëngna Abrahámëntsana entsanga, Bëngbe Bëtsabe entsanga fsëndmëna ca’. Er atše chanjayana, Bëngbe Bëtsá quem ndëtsbéngacnaca Abrahámëntsana entsanga nanjábiamá. ⁹ Tatšniá ya entsaprontana chë betiyeshënga tbëtëjëngocana jtseshatëtsetsama. Ndaye betiye ndoñe tonjashájona, jtseshatëtšana y iñoye jtsatmetšana; tšëngaftangaftácnaca cachcá, tšabe soyënga ndoñe šmontsamëse, Bëngbe

Bëtsá cmochanjácastigaye ca” —cha yojanëtsëtsnaye.

¹⁰—¿Y as, ndayá jamama šojtsamna ca? —chora chë entsànga tmojantjá.

¹¹Y Juan tojanéjua: —Chë uta quëf-saíya uabomná bontsemna canýiyá jutš-tayana chë tondaye tonduabomná. Saná bomná bontsemna juajatayana chë tondaye saná tondomnábioye ca.

¹²Romocama entsángbioye impuesto atjanayégnaca jenábayama tmojanabo. Chënga Juánbioye tmojantjá: —Buatëmbayá, ¿ndayá jamama šojtsamna ca?

¹³Y Juan tojanéyana: —Nýe ntšamo chë leyiñe yomandancá entsángbioye crocénana šmochtsayëngacaye ca.

¹⁴Básefta soldadégnaca chábioye tmojantjá: —¿Ndayá jamama šojtsamna ca?

Y Juan tojanéyana: —Ndocnábioye tondaye šmatjáboca, ni jauátjanase, ni nýe ndayámna bonamente jobuáchëse; y nýe ntsachetšá šmacaná crocénanaca oyejuayënga šmochtsomñe ca.

¹⁵Entsànga chë Bëngbe Bëtsabe Uámana Uabuayanabiama imojt-sobátmana, y chëngna Juanbiam a imojtsejuabnaye nderado cha chë Bëngbe Bëtsabe Uámana Uabuayaná nanjamna ca; ¹⁶pero Juan tojanéyana: “Ndegombre, atšë béjayeca cbondubáyana. Pero chë echanjabá atšbiam a corente más obenana endbomna, y atšë merecido taitatobuajoñe ni mo jotsejbiyana chabe shecochëtjonëshentša corriëja jajafjonama. Chë Bëngbe Bëtsabe benache chamojtishachëngbiam a, Bëngbe Bëtsá echanjama chë echanjabábeyeca, chë Uámana Espiritu chëngbe ainaniñe cháuamashënguama. Pero chë ndoñe chamontishachëngbiamna, Bëngbe Bëtsá echanjama chë echanjabábeyeca, chënga corente castigánënga

chamotsemnama, mo iñeshequëcá. ¹⁷Canýe entsá chabe mëtštá cucuatšinë jiyëbana, chabe trigo jtsóbobemama, y chë ndoserverna shácuanënga jtsejashtsëtsana. Chabe trigo chë grano uaquëcjnaye tsañe jtsabuájua, y chë ndoserverna shácuanëngna iñeshoye jtsatmetšana. Cachcá, chë átšbentšana echanjabá, chë tšabe entsànga echanjúbuaja, y chë bacna entsànga iñeshiñe echantsacastígaye, y chë iñe ndocna te queochátsfsana ca” —cha tojanéyana.

¹⁸Chca y inýe palabréngaca Juan chë tšabe noticiëngama yojanabuayiyá.

¹⁹Tempo, Juan Heródesbioye tbojaná-cacana, cha tojanobouamama cachabe catšata Felipbe shémaftaca, Felipe cabá oyena ora; chana Herodías ca uabainá. Chama Juan tbojanácacana y nyetsca bacna soyënga Herodes tojanmámna. ²⁰Pero Herodes Juánbioye joyeunaye luariñna, cabá inýe más bëts bacna soye tojátanma: Juánbioye cárceloye tbojtsanëtame.

Juan, Jesúsbioye tbojanabaye

(Mt 3.13-17; Mc 1.9-11)

²¹Pero Herodes Juánbioye cabá ndu-tame ora, Juan ba entsànga tojanëbaye, y Jesúsnaca tojánabo jenábayama. Ibo-jtsabayanëntscuana, Jesús Bëngbe Bët-sáftaca ibojtsencuëntaye; y chora ce-loc a yojotëfjo, ²²y chë Uámana Es-piritu mo canýe palomatemcá Jesús-bioye yojtsastajuana; y celocana Bëngbe Bëtsá tbojaniyana: “Acna atšbe bon-shana Uaquiñá condmëna. Acbiam a corente sëntsoyejuá ca.”

Jesúsbe bëts taitanga

(Mt 1.1-17)

²³⁻³⁸Jesús unga bnëtsana uata yojtsebomna, entsángbeñe Bëngbe Bëtsabe soyëngama jóyebuambayama

yojontsé ora. Entšanga imojanjuabná
 Jesús Josebe uaquiñá yojamna ca.
 José yojamna Elibe uaquiñá.
 Elí Matatbe uaquiñá
 y Matatna Levibe uaquiñá.
 Leví yojamna Melquibe uaquiñá,
 Melqui Janabe uaquiñá
 y Jana Josebe uaquiñá.
 José yojamna Matatíasbe uaquiñá,
 Matatíasna Amosbe uaquiñá.
 Amós Nahumbe uaquiñá,
 Nahúm Eslibe uaquiñá
 y Esli yojamna Nagaiibe uaquiñá.
 Nagai yojamna Maatbe uaquiñá,
 Maatna Matatíasbe uaquiñá.
 Matatías Semeibe uaquiñá,
 Semei Josecbe uaquiñá
 y Josec yojamna Judabe uaquiñá.
 Judá yojamna Joananbe uaquiñá
 y Joanán Resabe uaquiñá.
 Resa Zorobabelbe uaquiñá,
 Zorobabel Salatielbe uaquiñá,
 y Salatielna Neribe uaquiñá yojamna.
 Neri yojamna Melquibe uaquiñá,
 Melqui Adibe uaquiñá.
 Adi Cosambe uaquiñá,
 Cosam Elmadambe uaquiñá,
 y Elmadamna yojamna Erbe uaquiñá.
 Er yojamna Jesusbe uaquiñá
 y Jesús Eliezerbe uaquiñá.
 Eliezer Jorimbe uaquiñá
 y Jorimna Matatbe uaquiñá.
 Matat yojamna Levibe uaquiñá,
 Leví Simeonbe uaquiñá
 y Simeón Judabe uaquiñá.
 Judá Josebe uaquiñá,
 José Jonambe uaquiñá,
 y Jonamna yojamna Eliaquimbe
 uaquiñá.
 Eliaquim yojamna Meleabe uaquiñá,
 Melea Menabe uaquiñá.
 Mena Matatbe uaquiñá,
 y Matata yojamna Natanbe uaquiñá.
 Natán yojamna Davidbe uaquiñá,
 David Isaíbe uaquiñá
 y Isaína Obedbe uaquiñá.

Obed Boozbe uaquiñá,
 Booz Salabe uaquiñá
 y Sala yojamna Naasonbe uaquiñá.
 Naasón yojamna Aminadabēbe uaquiñá,
 Aminadab Adminbe uaquiñá
 y Admin Arnibe uaquiñá.
 Arni Esrombe uaquiñá,
 Esrom Fáresbe uaquiñá
 y Fáresna yojamna Judabe uaquiñá.
 Judá yojamna Jacobēbe uaquiñá,
 Jacob Isaacbe uaquiñá
 y Isaacna Abrahambe uaquiñá.
 Abraham Tarebe uaquiñá
 y Taré yojamna Nacorbe uaquiñá.
 Nacor yojamna Serugbe uaquiñá,
 Serug Ragaube uaquiñá
 y Ragauna Pelegbe uaquiñá.
 Peleg Heberbe uaquiñá,
 y Heber yojamna Salabe uaquiñá.
 Sala yojamna Cainanbe uaquiñá,
 Cainán Arfaxadbe uaquiñá
 y Arfaxadna Sembe uaquiñá.
 Sem Noebe uaquiñá
 y Noé yojamna Lamecbe uaquiñá.
 Lamec yojamna Matusalenbe uaquiñá,
 Matusalén Enocbe uaquiñá
 y Enocna Jaredbe uaquiñá.
 Jared Mahalaleelbe uaquiñá,
 y Mahalaleelna yojamna Cainanbe
 uaquiñá.
 Cainán yojamna Enosbe uaquiñá,
 Enós Setbe uaquiñá,
 Set Adanbe uaquiñá
 y Adán Bēngbe Bētsabe uaquiñá.

Jesús tojanobená
Satanás jayénjanama

(Mt 4.1-11; Mc 1.12-13)

4 Juan, Jesúsbioye tbojan-
 abáyentsana, chē Uámána Espíritu
 Jesusbe ainaniñe yojtsemándaye. Jesús
 Jordán bejajoicana tojtaná y chē
 Uámána Espíritna entsanga ndoyena
 luaroye tbojanánatse. ²Chentše canta
 bnétsana te tbojanjétana, y Satanasma
 yojanabó Jesús jisháchichiyama.

Chë canta bnétsana tentscuana Jesús tondaye tonjanse, y cabana ibojeshéntsena.

³Chora Satanás tojésanabo y tbojaniana: —Aca ndegombre Bëngbe Bëtsabe Uaquiñá tcomnëse, momandá quem ndëtsbenga tandëse chaobiama ca.

⁴As Jesús tbojanjuá: —Bëngbe Bëtsabe uabemana palabrenguine mëntsá endayana: “Entsá nÿe tandëseca ndoñe vida ntsebomnana ca.”

⁵Chentsana, Satanás canÿe bëts tjoye tbojanánatse y betscó nÿetsca quem luarentsá amëndayëngbenache tbojaninÿinÿé. ⁶Chora Satanás tbojaniana: —Atse nÿets obenana cbochjátsetaye y lempe quem amëndayëngbenache yobinÿna soyëngnaca. Atse lempe chca sënjóyëngacñe y sentsobena jatsetayama nda stsebošábioye.

⁷Aca chacojoshëntsamentšé y chašcojadorase, lempe nÿetsá acbiama echántsemna ca.

⁸Chora Jesús tbojanjuá: —Bëngbe Bëtsabe uabemana palabrenguine mëntsá endayana: “Acbe Bëtsá, chë Utabná cochtsadorana y nÿe cha cochtseserverna ca.”

⁹Chentsana, Satanás Jerusalenoye tbojanánatse y Bëngbe Bëtsabe bëts yebnentšë chë más tsbanánoca tbojanatsá, y tbojaniana: —Aca ndegombre Bëngbe Bëtsabe Uaquiñá tcomnëse, muentšana fshantsoye montsënja, ¹⁰er Bëngbe Bëtsabe uabemana palabrenguine endayana: Bëngbe Bëtsá chabe angelënga echanjichamuá, chacmotsinÿenama.

¹¹Chënga buacuatšëngaca cmochanjishache, shecuatšë ndocá ndëtsbeñe chacondomama ca —cha tbojaniana.

¹²Chora Jesús tbojanjuá: —Bëngbe Bëtsabe uabemana palabrenguine

mëntšá endayana: “Ndoñe matsbošana acbe Bëtsá chë Utabná bacna soyëngama jacochënguama ca.”

¹³Cabana, Satanás tojanajbaná bošana Jesúsbioye bacna soyëngama jacochënguama, y bënama Jesúsbentsana tojtanojuánañe.

Jesús tojanontšé Galileoca chabe trabajo jamana

(Mt 4.12-17; Mc 1.14-15)

¹⁴Chentsana, Jesús Galileoye tojésaná chë Uámana Espíritbe obenána, y nÿetsca entsanga chë luarinÿe chabiama imojtsencuéntaye. ¹⁵Jesús yojtsabuátambaye chë judiëngbe enefjuana yebnënguenache, y nÿetscanga cha imojtsatschuanaye.

Jesús Nazaret puebloca

(Mt 13.53-58; Mc 6.1-6)

¹⁶Chentsana Jesús Nazaretoye tojtashjango, chë pueblentšë cha tojanoboché, y ochnayté, ntšamo cha yojanamancá, chë judiëngbe enefjuana yebnentšë tojánamashëngo. Y chocna tojantsbaná Bëngbe Bëtsabe palabra jualfama. ¹⁷Chë Bëngbe Bëtsabe juabna oyebuambnayá Isaíasbe libréša tmojaninÿé chauliama. Chë libréša yojutëfjona orna, tojáninÿena mëntsá uábementšë:

¹⁸“Chë Utabnabe Espíritu átšeftaca entsemna,

er atse uabuayaná stsemna chë Bëngbe Bëtsabe tsabe noticiënga chë ndbomnéngbeñe jóyebuambayama.

Cha šonjichmó jábuayenama, chë utámenënga chentsana ya chamuáisebocanama;

jamama chë jtanënga chamobenama tsábá jubínÿnama;

jamama chë ínÿengbe causa imosufrinënga, tempcá cachéa tsábá chamotsatsmënama;

¹⁹y entšanga jáuyanama ndëmua ora chë Utabná chabe entšanga yochjat-sebacaye ca.”

²⁰Jesús jualíama tojanpochocá y chora chë uajabuachanábioye chëša tbojtaniyé y tojtánótbema. Nýetsca entšanga chë enefjuana yebnentše imojtsemnënga Jesúsbioye imojtsobuáuatja. ²¹Chora Jesús tojanontsé mëntšá jayanana: —Camënté tšëngaftangbeñe tonjopasá ntšamo quem librëšañe iuabemancá ca.

²²Nýetscanga Jesusbiana tšabá imojtsencuéntaye y ojnánänënga imojtsemna tša botamana cha yojtsóyebuambnama. Y chënga imojtsentjanaye: —¿Quem boyabása ndoñe Josebe uaqiñá yondmëna ca?

²³Jesús yojtsetátšëmbo ntšamo cha tojánayaniñe chënga ndoñe tmonjanóšbuachema. As tojanéyana: —Ndegombre tšëngaftanga ntšamo entšanga mondëntšayancá atše šmochanjauyana: “Ashnayá, cach aca menoshná ca”. Y tšëngaftanga šmojtsejuabná atše jauyanama: “Bënga fsënjouena chë bëts soyënga Bëngbe Bëtsabe obenánaca Capernaumoca tcojamama. Ntšamo contsichamcá ndegombre tojtsemnëse, cach acbe puebléntšnaca cachcá moma ca”.

²⁴Y cachora Jesús más tojanoyebuambá, mëntšá: “Ndegombre cbéyana, ni canýe Bëngbe Bëtsabe juabna oyebuambnayábioye cachabe pueblentše tšabá quematonýá. ²⁵Ndegombre cbéyana, Elías, chë Bëngbe Bëtsabe juabna oyebuambnayá, Israeloca inamna ora, ba viudanga chentše imojamna. Chë tempo, unga uata y tséntsañe nýetsá ndoñe tonjanafté y bëts shëntsana chë luariñe yojtsebinýna. ²⁶Pero Bëngbe Bëtsá, Elíasbioye ndoñe tbonjanichmó ni mo canýe Israelentša viudábioye, y añe tbojanichmó ínýoye, Sarepta ca

uabáinoye, Sidón béconana, canýe chentša viudábioye. ²⁷Eliseo, chë Bëngbe Bëtsabe juabna oyebuambnayá, Israeloca inamna ora, chentše banga imojamna bacna nguayanánaca šoquënga, y ni mo canýa chentša šocábioye tbonjanshná, pero añe canýe šocábioye, Naamán ca uabainá, cach bacna nguayanánaca, Siriocá ca” —cha tojánayana.

²⁸Chë judiëngbe enefjuana yebnentše imojtsemna entšanga chca tmojanuena ora, puerte tojánetëna. ²⁹As, chora chënga tmojantsbaná, chë pueblentšana Jesús imojtábocna y más tsjuanoye canýe peñëšëjana imojuánatse. Chënga imojanajebna cach peñëšiñe, y chë entšanga imojtseboše Jesús chocana jtsajuatsëntšana. ³⁰Pero Jesusna chëngbe tsëntsajana tojánachnëngo y ínýoye tojtsanoñe.

Jesús, bayëjbe juabna cányabioye tbojanbojuaná

(Mc 1.21-28)

³¹Chentšana, Jesús cach Galileoye tojesaná, Capernaum puebloye, y choca tojanontsé, chë ochnayté, chë judiëngbe enefjuana yebnentše entšanga jabuátambana. ³²Entšanga imojtsenjanaye ntšamo Jesús yojtsabuátambama, er chamna mo canýe mando bomnacá yojtsóyebuambnaye.

³³Chë enefjuana yebnentše, canýe boyabása bacna bayëja uambayá yojtsemna, y chabe causa chë boyabása tojanontsé mëntšá uayebuáchana: ³⁴— ¡Cachcá šmonýá! ¿Ndayama bëngbioye təcjabo, Jesús Nazaretocá? ¿Tcojabo bënga jabétsapochocama? Atše sëndé-tatšëmbo nda aca comnama, aca chë Bëngbe Bëtsabe Uamaná ca.

³⁵Chora Jesús chë bacna bayëjbioye tbojtsanácacana y tbojanianyana: —¡Iytëca móbema y chábentšana maisebocna ca!

As chora chë bayëja entsanguentse chë boyabásabioye tbojanshajayé, y ndocá ntjëftsemcá chábentšana yojésebocna. ³⁶Chë soyama nyetsca entsanga imojénjanaye y mëntšá imojtsenatsëtsnaye: “¡Tša chca palabrënga! ¡Quem entsá mandayacá y obenacá chë bayëjënga entsamënda, y chënga montsaisëbocana ca!”

³⁷Y Galileoca nyetsca pueblënguïne Jesusbiamayojtsótatsëmbo.

Jesús, Simón Pédrëbe uambén mamábioye tbojanshná

(Mt 8.14-15; Mc 1.29-31)

³⁸Chentsana, Jesús chë judiëngbe enefjuana yebnentšana tojëftsanbocna y Simonbe yebnentse tojánamashëngo. Simonbe uambén mamá šocá inajájona jabuache calentóracá, y chë chentse imojtsemna entsanga chabiamay Jesús-bioye tmojanimpadá. ³⁹Chora Jesús chë šocábioye yojotsejbëna y tojánayana: “¡Calentora mojuaná ca!” Y chë calentora tbojtsanóbojuanañe. Y cachora, cha tojtantsbaná y tojanontsé chënga jobuácuedana.

Jesús ba šoquënga tojanashná

(Mt 8.16-17; Mc 1.32-34)

⁴⁰Shinë yojuenatjëmba ora, banga inye y inye šocana bomnënga Jesús-bioye tmojanënatse, y cha nyetsca šoquëngbeñe cucuatšënga tojanjajó y tojanashná. ⁴¹Chora, ba šoquëngbentšana bacna bayëjënga imojtsaisëbocana y mëntšá imojtsanchembumbuana: “¡Aca chë Bëngbe Bëtsabe Uaquiná condmëna ca!” Pero Jesusna yojtsëcácana y ndoñe tonjanalesenciá chamóyebuambama, er chë bayëjënga imnatátšëmbo cha chë Cristo bëtsemnama.

Chë judiëngbe enefjuana yebnënguenache, Bëngbe Bëtsabe soyëngama Jesús entsanga yojanabuayinyá

(Mc 1.35-39)

⁴²Yëfsana tojanbinýna ora, Jesús chë pueblentsana tojëftsanbocna, y canýe luaroye, entsanga ndoyenoye tojtsanoñe. Pero entsanga tmojána cha jetsenguanguama, y cha yojtsemnaye tmojánashjajna. Chënga imojtseboše Jesús cach pueblentse chaotsoquedáñama, ⁴³pero Jesús tojanéyana: “Atse šontsemna chë tšabe noticiënga Bëngbe Bëtsabe amëndayama inye pueblënguenáchnaca jábuayenana. Chama Bëngbe Bëtsá šonjichmó ca.”

⁴⁴Y chentsana, Jesús yojánana Bëngbe Bëtsabiamay entsángbioye abuayinyaye, chë judiëngbe enefjuana yebnënguenache Judeoca.

Canýe te mallajta beonga ashebuánaye te

(Mt 4.18-22; Mc 1.16-20)

5 Canýe te, Jesús, Genesaret ca uabaina uafjajónaye tsachañe yojtsemna ora, ba entsanga tmojánashjajna, y chënga tša imojtsenajuatsëntsnyaye Bëngbe Bëtsabe palabra jouenama. ²Jesús, chë uafjajónaye tsachañe bécoñe tojáninye uta ena barquëshá; chë beonga ashebuánayëngna barquëshanguentsana tojëftsanbocna atarraiešhangá jetsáboshabiamay. ³Jesús canýe barquëshañe tojánamashëngo; chësha Simónbeshay inauamna. Chora Simónbioyey mëntšá tbojanianyana: “Quem tsachañentšana chcoyey mëyamba ca.”

⁴Tojanótbemay ora, Jesús chë barquëshoicamay tojanontsé entsanga jabuátambamay. Jabuátambamay tojanpochocá orna, Simónbioyey tbojanianyana: —Shbuatsëntsoyey

barquëshá mēyamba y tšēngaftangbe atarraishangá šmochjushbuetše, beonga jashebuáyama ca.

⁵Pero Simón tbojanjuá: — Buatēmbayá, n̄yets ibeta fsēndanguá y tondaye chibiátashebuaye. Pero aca chca tcjayánayecna, cachiñe atarraishá chantētēshbuetše ca.

⁶Tmojanēshbuetše orna, bētsca beonga tmojánishēche y chēngbe atarraishangá tojanontšé jtsatanécanana.

⁷As, chē in̄ye barquësháñe imojtsemna enutēngbioye tmojánefjatsēmbo, jabújabuachama chamuábama. Chora chēnga tmojánabo, y n̄yets uta barquëshá beóngaca tmojanajutjé. Tša chēftanga causa, tojanontšé chē uta barquëshá jtsenatjēmbambana. ⁸Simón Pedro chca tojánin̄ye ora, Jesús bēntšé tojanoshēntsamentšé y tbojaniana: —¡Bēngbe Utabná, atše bacna soye amá sēndmēna, chíyeca átšbēntšana mojuaná ca!

⁹Chē tša beonga jashebuáyama Jesús tojanmama, Simón y chē cháftaca imojtsemnēnga imojouatjaná.

¹⁰Santiago y Juan, chē Zebedeobe uaquiñata y Simonbe enutata, chátnaca auatjanánata ibojtsemna. Chora Jesús Simónbioye tbojaniana: —Ndoñe matauatjana. Morscana, entšanga Bēngbe Bētsabiamá cochántanguaye, y n̄ye beonga ashebuanayá ndoñe quec Cochátsmēna ca.

¹¹As chora chē barquëshangá tsa-choye tmojtāyamba y lempe jése-boshjonēse, Jesús tmojanasto.

Jesús, can̄ya bacna nguayanánaca šocábioye tbojanshná

(Mt 8.1-4; Mc 1.40-45)

¹²Jesús can̄ye pueblentšé yojtsemna ora, chentšé tojánashjango can̄ye entšá bacna nguayanánaca šocá. Chē šocá Jesúsbioye tbojánin̄ye ora, tojanoshēntsamentšé y jubiaca

fshantsóntscōñe yojtsejbéna y tbojanimpadá: —Bēngbe Utabná, aca tcojtsebošēse, aca catjobenaye atšbe šocana jtsebojuánana ca.

¹³As Jesús cucuátšeca tbojánbojajo y tbojaniana: —Añe, séntseboše. ¡Šocana cbotsebojuaná ca!

Y cachora chē šocana tbojtsanóbojuanañe. ¹⁴Chora Jesús tbojanmandá: — Ndocnábeñe chē soye cattsecuēntaye; n̄ye Jerusalenoca báchnēbioye motsa, y cha cochjin̄yiniye aca mora ya tšabá cojtsatsmēnama; y chora cochjuátšēmbona ntšamo Moisés chabe leyñe tojanmandacá, Bēngbe Bētsábioye chama jētschuayama, chca, n̄yetsca entšanga chamotatšēmbona mora ya tšabá cojtsatsmēnama ca.

¹⁵Pero ndayá Jesús yojtsamama más entšanga imojátatšēmbona, y ba entšanga imojtsójoye chábioye joyeunayama y chēngbe šocanēngama chauashnama. ¹⁶Pero Jesús yojanamana jtsoñana entšanga ndoyena luarēngoye y choca Bēngbe Bētsáftaca ibn̄encuentaye.

Jesús, can̄ye jama ndobēnábioye tbojanshná

(Mt 9.1-8; Mc 2.1-12)

¹⁷Can̄ye te, Jesús yojtsabuatambá ora, chentšé básefta fariseunga y ley abuátambayēnga imojtsetbiámama, Galileoca n̄yetsca pueblēnguēntšana áshjajnēnga, Judeoquēnga y Jerusaleñoquēnga. Y chora Jesús šoquēnga yojtsashnaye, Bēngbe Bētsabe obenánaca. ¹⁸Chora tojanopasá, básefta boyabásēnga can̄ye šocá, jama ndobēná, tjuashiñe choye imojuamba. Chēnga imojtseboše tsoye cha juambana, Jesús yojtsemnoye, ¹⁹pero jamashjnama ndoñe tmonjanobená, tša entšanga causa. Chcasna, gradasēšēnguējana chē yebnentša tsbanánoye tmojánasēngo y batšá tejēshe tmojtsanjuaná.

Chorna, chë atëfjnëjana chë socá tjuashiñe tmojanéstjango, entsangbe tsentsaca, Jesusbe natsanoica. ²⁰ Jesús tojáninÿe cha chë socá jáshnama bétsobenama chënga puerte imojtsošbuáchema. As, chë jama ndobenábioye tbojaniana: “Bacó, acbe bacna soyënga tcbontseboperdoná ca.”

²¹ Chora chë ley abuátambayënga y chë fariseunga mëntšá tmojanontsé juabnayana: “Quem boyabása ndoñe tšabá Bëngbe Bëtsabiana quenátichamo; mo chábioye cuafjoyenguangcá entsemna. Ndocna entsá quenátobena bacna soyëngama inÿa japerdónana; nÿe Bëngbe Bëtsá añe ca.”

²² Pero Jesús yojtsetátšëmbo ntšamo chënga imojtsejuabnayama; as tojanéyana: “¿Ndáyeca tšëngaftangbe ainaniñe chca šmojtsejuabná? ²³ ¿Tšëngaftangbiana ndayá más paselo nántsemna tšëngaftangbe delante jayanama: ‘Acbe bacna soyënga tcbontseperdoná’, o jayanana: ‘Matëtsbaná y motsa ca?’ ²⁴ Y chca, morna atše cbochanjñyanÿiye, chë Bëngbe Bëtsá Entšá tbojanbemá quem luariñe obenana yobomnama, entsanga bacna soyëngama jáperdonama ca” —Jesús tojánayana.

As Jesús chë jama ndobenábioye tbojaniana: “Atše cbëyana, matëtsbaná, tjuashe mesocñe y acbe yebnoye motatoñe ca.”

²⁵ Cachora chë jama ndobená tojtantsbaná entsangbe delante, chë cha inajájona tjuashe yojesocñe y Bëngbe Bëtsábioye atschuanaye chentšana yojtsatoñe. ²⁶ Chama nÿetsca entsanga imojénjnanaye y Bëngbe Bëtsá imojtsatschuanaye. Y corente auatjanánënga imojtsichamo: “Mënté bëts soyënga tmonjinÿe ca.”

Jesús, Levíbioye tbojanchembo chabuastama

(Mt 9.9-13; Mc 2.13-17)

²⁷ Chca yojochnëngüentšana, Jesús chentšana tojëtsanbocna y canÿe entsábioye tbojáninÿe, Leví ca uabainá, chë entsángbioye impuesto Romocama atjanayentše inëtsotbemañe. Chora Jesús tbojaniana: “Šmasto ca.”

²⁸ Y Leví lempe tojésanboshjona, tojantsbaná y Jesús tbojanasto.

²⁹ Chentšana, Levina bëts fiesta chabe yebnentše Jesusbiana yojama. Y chë fiestentše imojtsemna banga impuesto atjanayënga; y inÿe entsángnaca mesëshentše imojtsetbiámama.

³⁰ Chora, chë fariseunga y chë ley abuátambayënga tmojanontsé chë Jesusbe uatsjëndayëngbiana podesca oyeubambayana; y chëngbioye mëntšá tmojanéyana: —¿Ndáyeca tšëngaftanga impuesto atjanayëngaftaca y bacna soye amëngaftaca šmojtšesá y šmojtsofšëšná ca?

³¹ Y Jesús tojanéjua: —Salud bomnënga ashnayá ndoñe ntšëjabótana, pero šoquëngna añe. ³² Y atše ndoñe chiyátabo chë Bëngbe Bëtsabe bominiñe tšabá amënga jabáchembuama, sinó chë bacna soye amënga imomna ca juabnayënga Bëngbe Bëtsábioye jabáchembuama ca.

Jesús tmojantjá chë Bëngbe Bëtsáftaca jencuëntama tondaye saytescama

(Mt 9.14-17; Mc 2.18-22)

³³ Chora chënga Jesúsbioye tmojaniana: —Juan chë Ubayanabe uatsjëndayënga y chë fariseungbe usetonënga monduamana ba soye Bëngbe Bëtsáftaca jtsencuëntayana, y chama ba soye tondaye ntjascá jtsemnana; pero acbe uatsjëndayënga

nÿe nÿets tempo jesosañana y jesofššēšnañana ca.

³⁴⁻³⁵ Chora Jesús tojanéjua: —Chē boyabása bouamná chē ofjanéngaftaca tojtsemnēntscuana, chēngbioye saná ndoñe ntsabuáshebenana. ¿Ntsamo chca ndoñe nántsemna? Chē tojobouamá cha chēngaftaca tojtsemnēntscuana, chē ofjanénga bētská jasana y cháftaca oyejuayēnga jtsemnana. Pero ora echanjóshjango y chē boyabása chēngbēntšana mochantsánatseñe; chora cocayé chē ofjanénga echántsamna tondaye ntjascá jtsemnana. Ntsamo chē tojobouamá cha y chē ofjanéngaftaca endmēncá, cachcá endmēna atše, atšbe uatsjendayéngaftacnaca ca —cha tojanéjua.

³⁶ Jesús mēntšánaca tojanacuntá jabuátambama: “Ndocná queonÿ-batatētše basájua tsēm entšayañe, tanguá entšayá jtarméndama. Chca tcojamēse, chē tsēm entšayá jtsandbemana, y chē tcojuatētše entšéjua chē tanguájuañe ndoñe tšabá ntsinÿnana. ³⁷ Y cach ndoñe, chē tojt-seshayana vínoye tanguá jasabenguíne ntjataftsuámayana. Tcojuaftsuamasna, chē jasabenga jtseshébēfjuana y chē vínoye jtsabuáshanana; y chca, chē vínoye y chē jasabenga tondayama ntjatoservénana. ³⁸ Chíyeca co, chē tojt-seshayana vínoyna tsēm jasabenguíne juaftsuámama. ³⁹ Ndocná, chē bóchena vínoye tojatēmo y chentšana játsbošana chē tojt-seshayana vínoye jatofšiyana; cha jayanana: ‘Chē bóchena vínoye tša tšabeye ca’.”

Jesusbe uatsjéndayēnga ochnayté trigo tmojanátabebe

(Mt 12.1-8; Mc 2.23-28)

6 Canÿe ochnayté, Jesús canÿe jajajana yojtsaye; chabe uatsjéndayēnga trigo imojtsaiuatabnaye,

imojtsaiúshenēcaye, y imojtsaiuasaye. ² Chē causa, básefta fariseunga tmojanatjaye: —¿Ndáyeca šmojtsama chē ochnayté jamama ndoñe quenátslesenciana soye ca?

³ Y Jesús tojanéjua: —¿Ndoñe šmēndualía y šmondétatsēmo, ntsamo rey David y chabe enutēnga tmojanmama shēntseca imojtsemna ora y jasama yojt-séjaboto ora? ⁴ Chca orna, David Bēngbe Bētsabe bēts yebnentše yojámashēngo y chē Bēngbe Bētsá chentše yojam-nama inÿinÿnaye tandēšēnga yojase, y chē cháftaca imojánajna entšāngnaca yojátšataye. Y chē tandēšna nÿe bachnanga belesenciana jasama. Masque David chca yojama, Bēngbe Bētsá chora ndoñe tonjánayana David canÿe bacna soye tojanma ca —Jesús tojanéjua.

⁵ Y Jesús más tojanéyana: “Chē Bēngbe Bētsá Entšá tbojanbemá, chē entšá ochnayté tojtsama sóynaca jtsemándayana ca.”

Chē buashana cucuatše bomna entšá

(Mt 12.9-14; Mc 3.1-6)

⁶ Inÿe ochnayté, chē judiēngbe enefjuana yebnoye Jesús tojánamashēngo y tojanontšé jabuátambana. Y chentše yojtsemna canÿe entšá, catšbioica cucuatše buashanētše bomná; ⁷ y chē ley abuátambayēnga y fariseunga chiñe imojtserrondana jinÿama nderado Jesús chē ochnayté chábioye tabuanjashna, as chca chēnga jtsebomnama ndaye sóyeca Jesús mal jaquédana. ⁸ Pero Jesús chēngbe juabna yojtsetátšēmo; asna chē buashana cucuatše bomna boy-abásabioye tbojaniana: “¿Motsbaná y chentše tsēntsaca motsa ca!” Y chē entšá yojotsbaná y entšāngbe tsēntsaca yojotsaye. ⁹ Chora Jesús chē inÿēngbioye tojanéyana: “¿Ndayá yojtselesenciana ochnayté jamana, canÿe tšabe soye o canÿe ndoñe tšabe soye? ¿Jatsbocana o jtsepochócana ca?”

¹⁰Y n̄yetscanga chabe chabuajana imojtsemnēnga tojanēnyānyé, y chē buashana cucuatšē bomnábioye tbojaniyana: “Macuenyanējaná ca.” Y chē boyabása tojanacuenyanējaná, y tšabá chētša yojsatamna. ¹¹Pero chē ín̄yengna puerte tmojanotjayaná, y tmojanontšé enatsétsnayana ndayá muanjobenaye Jesusbe contra jamana ca.

**Jesús chē bn̄étsana uta
uatsjéndayēnga tojanabacacá**

(Mt 10.1-4; Mc 3.13-19)

¹²Chē tempo, Jesús tjoye tojána Bēngbe Bētsáftaca jencuéntama; y n̄yets ibeta cháftaca tbojanencuentá.

¹³Tojanbin̄yana ora, chabe ústonēnga tojánachembo, y chēnguentšana tojanēbuáyana bn̄étsana uta uatsjéndayēnga, chē ndēmuan̄yēnga “chabe ichmónēnga cánaca” tojanēbobaye.

¹⁴Chēnga imojamna: Simón, chē Pedro cánaca Jesús tbojanabobayá; Andrés, Simonbe catšata; Santiago y Juan, Felipe y Bartolomé, ¹⁵Mateo y Tomás, Santiago, Alfeobe uaquiñá; Simón, chē celote ca uabobainá; ¹⁶Judas, Santiagbe uaquiñá; y Judas Iscariote, chē más chcoye, Jesús uayayēngbe cucuatšīne bochjanboshjoná.

**Jesús ba entšanga yojanabuatambá
y yojánashnaye**

(Mt 4.23-25)

¹⁷Chentsana, Jesús chēngaftaca chē tjocana tojtantsmá y can̄ye jachañe tojanoquedá ba chabe ustonēngaftaca y ba in̄ye entšángaftaca. Ba entšanga choye tmojánabo Judeocana, Jerusalenocana y Tiro y Sidón, chē mar bėjaye béconana públēnguentšana, Jesúsbioye oído jabuájua y chēngbe šocanēngama chauashnama. ¹⁸Y chábeyeca chē bacna bayējbe juabna uambayēnga tšabá

imojtsatsmēna. ¹⁹N̄yetsca entšanga tša imojtseboše y ndayánaca imojtsama Jesús jabojuama, er chábentšana bēts obenana yojsóvocana y n̄yetscanga yojsashnaye.

**Chē ndegombre oyejuayana
bomnēnga y ndēmuan̄yēngbiama tša
lastema yochtsemna**

(Mt 5.1-12)

²⁰Jesús chabe uatsjéndayēngbioye tojanontjēšé y tojanéyana: “Puerte oyejuayēnga tšēngaftanga, chē quem luar-entša soyēnga ndbomnēnga, er Bēngbe Bētsabe amēndayentša soyēnga tšēngaftangbiama entsemna ca.

²¹“Puerte oyejuayēnga tšēngaftanga chē mora oshēntsiyēnga, er becá š-mochantóshachaye ca.

“Puerte oyejuayēnga tšēngaftanga chē mora šmošachenga, er chentšana š-mochántsatēbiajuaye ca.

²²“Puerte oyejuayēnga šmochtsemna, entšanga chacmojsébuayēnja ora, chacmojsatēbuacana ora, chacmojséyanguá ora, y tšēngaftanga ndoñe tšabá š-montsama ca chēnga chamojsichamo ora, tšēngaftanga atšbe ústonēnga bētsemnama. ²³Chē te puerte šmochjójeyuaye, er celoca can̄ye bēts uacanánana šmochántsebmna. Chēngbe bēts taitanga, cachcá chē Bēngbe Bētsabe juabna oyebuambnayēngaftaca tmonjanma ca.

²⁴“Pero ¡tša lastema tšēngaftanga bomnēngbiama, er mora oyejuayēnga jtsemnama ya bētsca šmojóyēngacñe ca!

²⁵“¡Tša lastema tšēngaftanga chē mora shachanēngbiama, er shēntšana šmochántsebmna ca!

“¡Tša lastema tšēngaftanga chē mora oyejuayēngbiama, er ngménama šmochanjenóbošachna ca!

²⁶“¡Tša lastema tšēngaftangbiama n̄yetsca entšanga tšabá chamojtsoyebuambná ora; er cachcá chēngbe

bëts taitanga monjánama chë Bëngbe Bëtsabe ndoñe ndegombre juabna oyebuambnayéngaftaca ca!" —Jesús tojánayana.

**Chë uayayëngbiana
bonshánana jtsebomnana**

(Mt 5.38-48; 7.12)

²⁷ "Pero tsëngaftanga, átšbioye ouenanënga cbéyana: Tsëngaftangbe uayayënga šmochtsababuánýeshana; chë tcmojtsébuayënjëngbiana tsabe soyënga šmochtsama; ²⁸ chë tsëngaftangbiana bacna soyënga bošëngbiana, Bëngbe Bëtsá šmochtseimpadana tsabe bendicionënga chamóyëngacñama; chë tcmojóyanguanguëngbiana, Bëngbe Bëtsá šmochtseimpadana. ²⁹ Nderado ndánaca cányoica tcmojajuebantsetase, cochjomiye chë ínyoica cachcá chacmomama; nderado ndánaca quëfsaíya tcmojuábocana, cachcá cochjonýaye acbe shabuanguanéjuanaca chauetsácñama. ³⁰ Ndánaca chacmojtjañábioyna, jatsetayana; y nda ndayánaca chacmojefcábioyna, ndoñe catjontšínýena chacmatoyema. ³¹ Inyëngaftaca šmochtsama, ntšamo chë ínýenga tsëngaftangaftaca chamotsamama šmojtsebošcá.

³² "Tsëngaftanga, nýe chë tcmojtsababuánýeshanënga šmojttsababuánýeshanëse, ¿ndaye tsabe soye chca šmattsama?; er chë bacna entšágnaca chca mondbëtsama. ³³ O nderado, nýe chë tsëngaftangbiana tsabe soyënga tmojtsamëngbiana tsabe soyënga šmojtsamëse, ¿ndaye tsabe soye chca šmattsama?; er bacna entšágnaca chca mondbëtsama. ³⁴ O nýe chë cmochtëchenanguama šmojtsejuabnángbioye šmojýentšamëse, ¿ndaye tsabe soye chca šmattsama?; er chë bacna entšágnaca mondbetsenántšamiana, chëngbentsana

cachcá jtóyëngacñama jtsobátmanëse. ³⁵ Pero tsëngaftangna cmontsamna chë uayayënga jtsababuánýeshanana; y tsabe soyënga chëngbiana jtsamana y júyentšamiana, chëngbentsana ndayánaca jtóyëngacñama ntjatobatmancá. Chca, tsëngaftanga uacanánana cuenta canýe bëts soye šmochanjóyëngacñe, y celoca endmëna Bëngbe Bëtsabe básenga šmochántsemna; Bëngbe Bëtsá chë ndochuanayéngaftaca y bacna entšangaftácnaca tsabia comna. ³⁶ Inyëngbiana lastemadënga šmochtsemna, ntšamo tsëngaftangbe Taitá yomncá ca" —Jesús tojánayana.

**Ndoñe ntsichámuana chë ínýenga
tsábá o ndoñe tsábá tmonjamama**

(Mt 7.1-5)

³⁷ "Ndocá ínýengbiana šmattsichamo chë ndoñe tsábá tmontsamama, y Bëngbe Bëtsá ndoñe queochátichamo tsëngaftanga ndoñe tsábá šmonjama ca. Inyëngbiana ndoñe šmattsichamo ndoñe tsábá tmonjama ca, y Bëngbe Bëtsá ndoñe queochátichamo tsëngaftanga ndoñe tsábá šmonjama ca. Inýenga šmochjáperdonaye y Bëngbe Bëtsá cmochanjáperdonaye. ³⁸ Inyëngbioye šmochjatsataye y Bëngbe Bëtsá cmochántatsataye. Mo nda canýe biaco medidiñe bëtscá tojajutjé, uashëshe y cmojtiyecá, Bëngbe Bëtsá cachcá cmochántatsataye. Ntšamo tsëngaftanga ínýengbioye chašmojábiana, uabouana o ndoñe jabuache soyënga, Bëngbe Bëtsá cachcá tsëngaftangbioye cmochanjábiana ca" —Jesús tojánayana.

³⁹ Jesús quem cuétnaca tojánayana jabuátambama: "¿Canýe jtaná nantsobena inýe jtaná jtsanachayama? ¿Chca ndoñe nýets útata ndaye tbuabentse buanjótsatse? ⁴⁰ Chë uatsjendayá ndoñe ntsemnana chë buatëmbayabiana más bëtsá. Pero

chabe uatsjédayana chaojapochocá ora, cach buatëmbayacá jtsemnana.

⁴¹⁻⁴²“Canÿa chabe bominyiñe canÿe niñëfja tojtsebomñese, cha ndoñe ntsobenana chabe catsátbioye jauyanana: ‘Acbe bominyentsana canÿe polvështema jtsebuchjâtsécama šmoleseñciá ca’. Natsana cha bontsemna cachabe bominyentsana chë niñëfja jtsenobuchjâtsécana, tšabá jinÿama jobenayama, chabe catsátbe bominyentsana chë polvotema jtsebuchjâtsécama. ¡Cachcá entsemna acbiana, bacna entšá chë ntšamo ndegombre tcojuabnacá ndinyinÿayá! Chë tša bacna soye cojtsama ca acbe catsátbioye tcojauyana ora, cach aca tša bëts bacna soyënga cojtsamama ntjenouaboycá; y chca, aca jamana canÿe bacna soye. Natsana cmontsemna chë cach aca ndoñe tšabe soyënga cojtsamama ngménaca jshatenójuaboyana y chca amana jshétsajbanana, y chentšana cocayé cochantsobena acbe catsáta juajabuáchana ntšamo tšabá yomncá chaotsamama ca” —Jesús tojánayana.

**Tšabe betiye o ndoñe tšabe betiye
tondmënana, jtsotatsëmbuana
ntšamo tojashajoncá**

(Mt 7.17-20; 12.34-35)

⁴³“Ndoñe queonÿbatsemna, chë canÿe tšabe betiyiñe podesca soye jashájonana; ni canÿe ndoñe tšabe betiyiñe tšabe soye jashájonana. ⁴⁴Betiÿënga jtsabuatmana ntšamo cada betiye tojtseshajcá. Uchmašëshentšana quenátopodena higuëbé jocñana; ni uvašëša, shëshëntša betiyentsana. ⁴⁵Chë tšabe entsana, chabe ainanoca tšabe juabnënga bomnentsana jtsóye-buambnayana; y chë bacna entsana, chabe ainanoca ndoñe tšabe juabnënga bomnentsana jtsóye-buambnayana. Er ndayá becá ainanoca tomnama

entšá jtsóye-buambnayana ca” —Jesús tojánayana.

Chë uta ucuatjoniñe

(Mt 7.24-27)

⁴⁶“¿Ndáyeca tšëngaftanga atše šmnëtsatsaye, ‘Utabná, Utabná ca’, y ntšamo atše stsichamcá ndoñe ntsamana? ⁴⁷Cbochanjáuyana ndacá yomna nda átšbioye tojabo, atšbe palabra tojouena y ntšamo stsichamcá tojtsama: ⁴⁸Cha endmëna mo canÿe entšacá, nda canÿe yebna jajebuamna becá fshantse jashenoye yojajutjo y ndëtšbenguine yojúcuatjoye. Bëjayënga yojtsóftajna ora, chë yebnëjana yojobuachnëngo, pero ndoñe yonjobenaye juashajayana, er chë ndëtšbenguine jabuache yojaúcuatjona. ⁴⁹Pero nda atšbe palabra tojouena y ntšamo stsichamcá ndoñe tontsama, endmëna mo canÿe entšacá, nda canÿe yebna yojajebno nÿe fshantsiñe, tondayinë ntjucuatjoycá. Bëjaye yojóftjango y jabuache chë yebnoye yojobuá ora, chë yebna yojtsáshajaye y lempe yojtsopochóca ca” —Jesús tojánayana.

**Jesús canÿe Romano
soldadëngbe amëndayabe
bochichnayábioye tbojanshná**

(Mt 8.5-13)

7 Entšángbioye chca jáuyanana tojanpochocá ora, Jesús Capernaum puebloye tojána. ²Chentše yojoyena canÿe romano soldadëngbe amëndayá. Cha ibnabomna canÿe bochichnayá puerte bonshaná, y chora cha šocá yojtsemna, ya jtsóbanama. ³Jesús ba šoquëngbioye yojáshnama encuëntayana chë amëndayá yojouena ora, báseftanga bëtsëjemëngcá amëndayënga cha tojanichamó, chauábama Jesús jaimpádama y chabe bochichnayábioye chabotseshnána.

⁴Chénga Jesúsbiyoye tmojánashjango y tša imojtseimpadana, méntšá: “Quem soldadéngbe améndayá mercedo entsebuájona chacotsájabuachama; ⁵er cha bēngbe luarentša entsāngbiyoye corente endábabuanýeshana, y cachá chē bēngbe enefjuana posada šonjayentsjebocana.”

⁶Jesús chéngaftaca tojána. Pero chē mandayabe yebnoye imojtsebeconá ora, chē soldadéngbe améndayá básefta amiguénga yojichamuá, Jesúsbiyoye méntšá chamuauyanama: “Atšbe Utabná, ndoñe yapa matenócochinýenana átsbiyoye jabama. Atšbe mercedo taitsatobuajoñe aca atšbe yebnoye chacuamashénguama; ⁷chíyeca ni mo añemo chiyatentsetá jama aca jajébenguama. Morna nýe cochjayana y atšbe bochichnayá tšabá echántsatsmēna. ⁸Er atšbe sēndábamna átsbiyoye mándayénga y átsnaca soldadéngbe améndayá sēndmēna. Atšbe canýe soldádbiyoye stjauyana ‘motsa ca’, cha cachora jana; y ínýabiyyoye stjauyana ‘mabo ca’, cha cachora jabana; y nderado atšbe bochichnayábíoye ndayánaca chaomama stjamánda, chánaca cachora chē soye jamana ca” —cha yojáuyana.

⁹Jesús chca tojanuena ora, chē mándayabiama yojenjnaná, y jobuértanēse chē ba entsānga cha ustonéngbiyoye tojanéyana: “Ndegombre cbéyana, ni mo nýets Israelentše, ni canýa quem boyabasacá tša ošbuachiyá chiyátinýena ca.”

¹⁰Y chē ichmónēnga yebnoye tmojtaná orna, tmojáninýena chē bochichnayá ya tšabá yojtsatsmēna.

Jesús tojanma canýe viudabe uaquiñá cháuatayenama

¹¹Chca tojanopasá chentšana, Jesús yojétsaye Naín ca uabaina puebyoye, y cháftaca chabe uatsjéndayénga y

ba entsānga imojtsaye. ¹²Chē pueblo amashjuanoye yojtsebeconá orna, entsānga chē pueblentšana canýe obaná imojtsábocana jauátbontsama; chē obaná canýe viudabe uaquiñá inamna y nýe cha uaquiñá. Bētsca entsānga chē obanabe mamá imojtsetjēmbambnaye. ¹³Bēngbe Utabná chē viudábíoye tbojáninýe ora, chabiama tbojanongmé y tbojaníyana: “Ndoñe matošachena ca.”

¹⁴Y jobéconase, chē ataúse tojánbojajo, y chē obaná atambayénga tmojantsá. Y Jesús chē obanábíoye tbojaníyana: “Bobontse, atšbe cbéyana: ¡Matétsbaná ca!”

¹⁵Chora chē obaná tojtantsbaná y tojanontsé oyebuambnayana; y chabe mamábíoye Jesús chē bobontse tbojtánantse. ¹⁶Nýetsca entsānga tša uatjana yojubuahe chca tmojáninýe ora, y Bēngbe Bētsá imojtsatschuanaye, méntšá jayanēse: “Bēngbentše canýe Bēngbe Bētsabe juabna oyebuambnayá cuatēnjonýná ca.” Y méntšánaca: “Bēngbe Bētsá tojabo chabe entsānga jabújabuachama ca.”

¹⁷Y nýets Judea luaréjána y chē chábuañe luarenache entsānga imojátatšēmbona ndayá Jesús tojanmama.

Juan chē Ubayanabe ichmónēnga

(Mt 11.2-19)

¹⁸Juan, lempe ntšamo Jesús yojtsamama yojátatšēmbona; er chabe ústonénga chama tmojancuentá. As Juan, chēnguentšana útata tojánachembo, ¹⁹y Jesúsbiyoye yojichamuá jatjayama cha tayojamna chē Cristo, chē jabama ibojanmēná, chē Uámana Uabuayaná, o ínýabiama jatobátmama tayojétsamna ca. ²⁰As chē Juanbe ichmónēnga Jesúsbiyoye tmojanobeconá y tmojaníyana: —Juan chē Ubayaná šonjichamo jatjayama, aca ndegombre cojtsemna chē

Cristo, chë jabama ibojanmëná, o šojt-samna inýabiama jatobátmana ca.

²¹ Chë ichmónata tbojánashjango ora, Jesús banga yojsashnaye, šocanëngama y tsetšanëngama; bacna bayëjbe juabna uambayënga tšabá imojtsatsmëna, y jtanënga tšabá yojsatëbinýna. ²² Chora Jesús mëntšá tojanéjua: —Motsata y Juánbioye šochjauyana ntšamo šojinýe y šojouenca: Chë jtanënga tšabá entsatëbinýna, chë coshetënga tšabá montsatana, chë bacna nguayanánaca šoquënga shnánënga montsatsmëna, chë tësmënga montsuenana, chë obanënga tmontayena, y chë ndbomnjémëngbioye chë tšabe noticiënga montsabuayinýna. ²³ ¡Puerte oyejuayá chaotsemna, nda atše ndoñe bacna soye stsama ca jtsejuabnayëse, átšbeñe ošbuáchiyana ndoñe tontsajbaná cha ca! —Jesús tojanéyana.

²⁴ Chë Juanbe ichmónata chentšana tbojésanbocnentsana, Jesús tojanontšé Juanbiamá entsanga jáuyanana, mëntšá: “Juan jinýama šmojánbocna ora, ¿ndayá jinýama šmojánbocana entsanga ndoyena luaroye? ¿Canýe entsá ainaniñe tondaye añemo ndbomná, mo canýe šëše bínýiaca shatiyeynëšcá? ²⁵ Y ndóñese, ¿ndayá jinýama choye šmojánbocana? ¿Canýe boyabása uámana entsáyaca bopormaná? Ndoñe. Tšëngaftanga šmondétatšëmbo chë uámana entsáyaca bopormánënga y chë bëtscá bomnánaca nýe tondayama ntsecochinýencá vida bomnëngna, reyëngbe yebnënguñe mondbëtsiyenama. ²⁶ Asna, ¿ndayá jinýama choye šmojánbocana? ¿Canýa Bëngbe Bëtsabe juabna oyebuambnayá? Ndegombre; y chéyana, canýa Bëngbe Bëtsabe juabna oyebuambnayabiama más bëtsá. ²⁷ Cha, Juan, endmëna ndabiama Bëngbe Bëtsá chabe uabemana palabrenguñe tojánayana

mo chabe ichmonacá, mëntšá tojánayana ora:

Cristo, atšbe entsá natsana sënjichmó acbiama chaóyebuambama, entsanga jábuayenama aca jabama ainaniñe tšabe juabnéngaca chamotseprontánama ca.

²⁸ Ndegombre chéyana: Nýets tempo entsángbeñe, ndocná quenátsmëna Juan chë Ubayanabiama más bëtsá; masque chca, Bëngbe Bëtsabe amëndayoca chë más batšá uamaná, cha más bëtsá echántsemna ntšamo mora Juan yomnama ca” —Jesús tojánayana.

²⁹ “Nýetsca entsanga chca Juánbioye tmojanóyeunanga y chë Romocama entsángbioye impuesto atjanayéngnaca, nýets ainánaca tmojánayana Bëngbe Bëtsá nýetsca soyënguñe tšabá amá yomna ca; er tmojánenabaye ntšamo jubáyama Juan yojanamancá. ³⁰ Pero chë fariseunga y ley abuátambayënga, ntšamo jubáyama Juan yojanamancá jójyëngacñama ndoñe tmonjánbošena ora, tmojtsanaboté ndayá Bëngbe Bëtsá chëngbiama jamama yojanjuabnacá.”

³¹ Jesús mëntšánaca tojánayana: “Cbochanjáuyana ndayacá morsca entsanga imomna, y ndayëngcá chënga imomna. ³² Chënga mondmëna mo chë plazëngoca mondbetsetbiámama basetemëngcá; chëngna mëntšá jabuache jtseatsayana: ‘Tšëngaftangbiama fsënjaflautá y ndoñe chešmatslantsá; ngmënacá fsënjaversiá y ndoñe chešmatenóbošachna ca.’ ³³ Juan chë Ubayaná tonjánabo y ndoñe quenjatamana bëtscá entsángbeñe jtsemnana, ni tandëše jasana, ni vínoye jofšiyana; y tšëngaftanga šmontsichamo chana bacna bayëjbe juabna uambayá inamna ca. ³⁴ Morna, chë Bëngbe Bëtsá Entšá tbojanbemá tonjabo y chana añe entsamana bëtscá entsángbeñe jtseatsayana y jtsofšëšnayana, y tšëngaftanga chabiama šmontsichamo:

‘Chana yapa uasayá y vínoye tmoyá entsemna y Romocama entšángbioye impuesto atjanayënga y bacna soyënga amëngbe amigo ca’.³⁵ Pero Bëngbe Bëtsá endbëtsinÿinÿnaye cha nÿets osertánana bomná yomnama, chë ndayá cha tojama ora ndayá chentšana inobocna soyëngaca ca” —cha tojánayana.

Jesús, chë fariseo Simonbe yebnentšë

³⁶ Canÿe fariseo Jesúsbioye tbojanofja saná jauasama, y Jesús chabe yebnoye tojána y meséshentšë yojótbema.³⁷ Chë pueblentšë yojamna canÿe shembása, bacna vida bomná. Jesús chë fariseobe yebnentšë yojtšesama chë shembása yojátatšëmbona; as cha chë yebnoye tojánashjango y tojanamba canÿe alabastro botellëše, jútjena canÿe botamana uanguëtšë béjayeca.³⁸ Jesusbe shecuatšentšë yojoshëntsamentšiyë, šachénaca; shëchbuíyeca chabe shecuatšënga yojtšefchecuacná y cachabe stjënashaca ibojtsatššëcbojuaye. Chabe shecuatšënga yojtonguëtšentšiyë y chë botamana uanguëtšë béjaye ibojtšhecbuešcacia.³⁹ Chë fariseo Jesúsbioye ofjaná chca tojáninÿe ora, mëntšá Jesusbiama yojtšëjuabnaye: “Cha ndegombre canÿe Bëngbe Bëtsabe juabna oyebuambnayá tojtsemnëse, nantsetátšëmbo nda y mocna shembása yomna chë bontsebana shembása: canÿe bacna vida bomna shembása ca.”⁴⁰ As Jesús chë fariséobioye tbojaniyana: —Simón, cuentado palabra šmotsoyeuná ca.

Y chë fariseo tbojanjuá: —Arseñor, Buatëmbayá ca.

⁴¹ Y Jesús tojánayana: —Canÿe entšá crocénana uyentšamianá, uta ndebénata yojánabamna. Canÿa shachna patse denario crocénana ibojandebena, y chë ínÿana, shachna bnëtsana.⁴² Pero

chë útata tondaye ibontsebomna ndayentšana cha jëtsëntšabuáchiyama; as chë uyentšamianá nÿets útata chë ndebénana yojtsaperdónaye.

Chora chë fariséobioye tbojaniyana: —Mora šmëyana, ¿chë útatentšana nda más chë uyentšamianábioye buantsebobonshana ca?

⁴³ Y Simón tbojanjuá: —Atšë šontsinÿana chë más bëtsá ndebená ca.

Y Jesús tbojaniyana: —Ndegombre, ntšamo endmëncá tcjayana ca.

⁴⁴ Jesús, chë shembásabioye jontješiyëse, Simónbioye tbojaniyana: —Minÿe quem shembása. Atšë acbe yebnoye sënjamashëngo y aca búyeshe ndoñe chešcatabuatšëta atšbe shecuatšëngama. Y quem shembásana, cachabe shëchbuíyeca šontseshecjabebé y chabe stjënashaca šontseshecbojó.

⁴⁵ Ndoñe chešcatámocho, pero cha tonjamashëngo orscana ndoñe ntjájbanana atšbe shecuatšënga onguëtšentšnaye.

⁴⁶ “Aca bestšasiñe aceitiye ndoñe chešcatsbuešcja, y chana añe botamana uanguëtšë béjaye šonjashec buešcja.

⁴⁷ Chcasna atšë cbëyana, cha šonjinÿanÿé atšbiama corente bonshánana yojtsebomna, er atšë chabe bëtscá bacna soyënga sëntseboperdoná; pero nda nÿe básefta bacna soyëngama stjaperdóna chana, nÿe batšatema bonshánana jtsebomnana ca.”

⁴⁸ Y chora Jesús chë shembásabioye tbojaniyana: “Acbe bacna soyëngama perdonaná contsemna ca.”

⁴⁹ Chora chë ófjanënga chentšë imnatbiámanëngna tmojanontšë enatsëtšnayana: “¿Nda quem entšá yojtsemna, chë bacna soyëngámnaca entšángbioye jtsaperdónayana ca?”

⁵⁰ Y Jesús más chë shembásabioye tbojaniyana: “Aca átšbeñe icošbuachéyeca, ats bocaná cochántsemna; natjëmbana motsatoñe ca.”

Chë Jesúsbioye imojanájabuachana shembásenga

8 Chca tojanopasá chentšana, Jesús bêts y base pueblënguëjana yojánana, tšabe noticiënga Bëngbe Bëtsabe amëndayama entšanga abuátambaye y abuayiynaye. Chë bnëtsana uta uatsjëndayënga cháftaca imojtsajna. ²Básefta shembásengnaca imojtsetjëmbambnaye; chëngbentšana Jesús bacna bayëjënga tojtanëbuacna y šocanëngama tojanashná. Chënga imojamna, María chë Magdalena ca uabobainá, ndábentšana Jesús canÿsëfta bacna bayëjënga tojtanëbuacna; ³Juana, Cuzbe shema (Cuza yojamna rey Heródesbe canÿe uajabuachaná); Susana y inÿe shembásenga; chëngna chë imojánbomna soyëngaca chëngbioye imojanéjabuáchana.

Chë jenabe cuento

(Mt 13.1-9; Mc 4.1-9)

⁴Ba pueblënguentšana mallajta entšanga tmojánbocana Jesús jinÿama. Ba entšanga jouenama tmojanobeconá ora, Jesús mëntšá tojanacuntá: ⁵“Canÿe, canÿe jená jénaye jaujuëshama yojëftsebozna. Yojtsëjquëshaye orna, básefta jénaye benache juachañe yojuatquëcjana; chiñna entšanga imojtsebotájaye, y jaja shloftšënga imojástjajna y imojtsósañe. ⁶Inÿe meshëngna ndëtsbenguinë yojuatquëcjana. Yojuábocna orna, betscó yojtsábojo, chë fshantsiñe ndoñe yapa búyeshe yonjamna causa. ⁷Inÿe meshëngna uhmëshangañe yojuatquëcjana y chë uhmëshangá lempe yojtsatscué, chë jénayeca canÿiñe yojuábocna ora. ⁸Inÿe meshëngna, uanguaniñe yojuatquëcjana. Yojuájua orna, bëtscá yojuashájona; canÿe jénayentšana nÿa mo patse meshënga yojuashájona.”

Jesús chca jacuéntama tojanpochocá ora, tojanáyebuachena: “Chë jouenama tmojtsobenënga, šmochjouena ca.”

Ndáyeca Jesús cuentëngaca yojánabuatambaye

(Mt 13.10-17; Mc 4.10-12)

⁹As chora chabe uatsjëndayënga tmojantjá: —¿Ntšamo chë cuento yojtsayana ca?

¹⁰Y Jesús tojanéyana: —Bëngbe Bëtsá tšëngaftanga cmontsinÿanÿná nÿetsca chë mo iytëmencá yomna soyënga chabe amëndayama, pero chë inÿyëngbioyna ndoñe; chë soyëngama chënga lempe cuentëngaca sëntsëtsëtsná. Chca, masque corente chamotsafšna, ndoñe chamondobená Bëngbe Bëtsabe soyënga jinÿama; y masque becá quem soyënga chamouena, ndoñe queochátësertana ca.

Jesús chë jenabe cuentama tojanabuayená

(Mt 13.18-23; Mc 4.13-20)

¹¹“Chë cuento mëntšá endayana: Chë jénaye Bëngbe Bëtsabe palabra entsemna. ¹²Chë benache juachañe yojuatquëcjana básefta jénaye endayana chë básefta entšanga Bëngbe Bëtsabiamá soyënga tmojouenënga; pero chora Satanás betscó jabana chënga Bëngbe Bëtsabe palabra jabëtsabuajuanama, chca, chënga ndoñe chamondëtsošbuáchema y bacna soyënguentšana ndatsebácanënga chamotsemnana. ¹³Inÿe entšanga mondmëna mo chë ndëtsbenguinë yojuatquëcjana jenaycá. Chë entšangna Bëngbe Bëtsabe palabra jouenana y oyejuayënga jtsemnana. Pero ndoñe nÿets tempo chana jocochájuana; y chca, ndoñe bayté Bëngbe Bëtsáftaca ntjëftsemnëngana, cha ndoñe yapa tmontsašbuaché causa. Inÿenga mochantsëbuayënja y Bëngbe Bëtsabeñe betsošbuáchiyama mochanjasúfrianga;

chë causa, Bëngbe Bëtsabe palabra cachcá chënga mochanjesonÿaye. ¹⁴Inÿe entsanga mondmëna mo chë ucmëshangañe yojuatquécjana jenaycá. Chëngna Bëngbe Bëtsabe palabra jouenana, pero quem luarentša soyëngaca oyejuayënga jtsemnama yapa jesenójuabnayana, y mallajta crocënana y ba soyënga jtsebomnama yapa jësebošana; chama y ba soyëngama yapa enócochinÿena causa, Bëngbe Bëtsabe soyëngama echantsebnëtjomba y ndoñe quemochátama ntšamo Bëngbe Bëtsá tojayancá. ¹⁵Inÿe entsangna mondmëna mo chë uanguaniñe yojuatquécjana jenaycá. Chëngna Bëngbe Bëtsabe palabra botamana mochanjouena; tšabe ainánaca Bëngbe Bëtsabe palabriñe jtsošbuáchiyama jtseprontánëngana. Mo canÿe betiye puerte tšabá tojtseshajuancá, chënga bëtscá tšabe soyënga Bëngbe Bëtsabiana mochántsama. Chca mochántsama, Bëngbe Bëtsábeñe jtsošbuáchiyëse y nÿetsca soyënguñe puerte uantadënga jtsemnëse ca” —Jesús tojanabuayená.

Chë uajuinÿanëshama cuento

(Mc 4.21-25)

¹⁶“Ndocná canÿe uajuinÿanëshama juajuinÿenana, chentšana ndaye sóyeca chësha jtsëstama o jutsnëshama tajsoye jtsajájuama; juajuinÿenana ndayá tsbanánoca juajájuama, chë luarentše amashjuanëngbiana chaotsebinÿnama. ¹⁷Er ndocna yoiytëmena soye, ntjinÿcá queochaisoquéda, y chë entsangbiana ndótatsëmbo soye, ntsotatsëmbcá queochaisoquéda.

¹⁸“Chcasna, botamana šmochjouena, er nda Bëngbe Bëtsabe soyëngama tšabá tbojosertá, Bëngbe Bëtsá echanjama cha más ba soyëngama chaboser-tama; pero nda chë soyëngama ndoñe tontsebošá, chë nÿe batsá ibosertana

soyëngama bochántsebnatjëmba ca” — Jesús tojánayana.

Chë Jesusbe ndegombre pamíllanguentsënga

(Mt 12.46-50; Mc 3.31-35)

¹⁹Chora, chabe mamá y chabe catšátanga chë Jesús yojtsemnentše tmojánashajna, pero ndoñe imontsobena chábioye jobëconana, yapa entsanga causa. ²⁰As canÿa Jesúsbioye mëntšá tbojaniyana: —Acbe mamá y acbe catšátanga shjoca montsemna y montseboše aca jinÿama ca.

²¹As Jesús tojánayana: —Chë Bëngbe Bëtsabe palabra tmojouenënga y ntšamo tmojouencá tmojtsamënga jtsemnana atšbe mamá y atšbe catšátanga, atšbe ndegombre pamíllanguentsënga ca.

Jesús chë binÿia y chë béjaye bonguana yojëtsbema

(Mt 8.23-27; Mc 4.35-41)

²²Canÿe te, Jesús chabe uatsjëndayëngaftaca canÿe barquëshoye tojánamashëngo y chënga tojanéyana: “Uafjónaye chenguana cuajna ca.”

As tmojána; ²³y imojtsenach-nëjuanëntscuana Jesús yojtsomaná. Ndeolpe, chë béjayiñe corente jabuache binÿia yojóshjango y yojontsé béjaye chë barquëshoye jtsobuajújtjana. Y chca, chëngbiana puerte resjo yojtsemna. ²⁴Chora chë uatsjëndayënga tmojána Jesús jetsefšenama y mëntšá tmojaniyana: —¡Buatëmbayá! ¡Buatëmbayá! ¡Montsenatjëmbambana ca!

Chora Jesús tojantsbaná y chë binÿia y chë bëts olëshëngoye tojanmandá: “Bonguana šochtsemna ca.” Y chë binÿi-ayana tojanéjbana y lempe bonguana yojtsatsmëna.

²⁵Chentšana Jesús chabe uatsjëndayënga tojanéyana: —¿Bëngbe Bëtsá

tšëngaftanga jujabuáchama yobenama, cabá ndoñe šmontsošbuaché ca?

Y chënga auatjanánënga y ojanánënga mëntšá imojtsenatsëtsnaye: —¿Nda quem boyabása yomna? ¡Cha tojamandá ora, masque chë binÿia y chë béjaynaca joyeunayana ca!

**Chë Gerasa luaroca
bacna bayëja uambayá**

(Mc 8.28-34; Mc 5.1-20)

²⁶ Chentšana Gerasa ca uabaina luaroye tmojánashjajna, Galilea ndirichiñe. ²⁷ Jesús fshantsoye tojánastjango ora, chë pueblócana canÿe entšá chábioye tojánabo. Cha ya bayté bayëjbe juabna yojtsebomna, ndocna entšayá yonjanichétjona; y yebniñe ndoñe yonjaniyena, sinó obanëngbe cuevëshënguenache. ²⁸ Chë entšá, Jesúsbioye tbojáninÿe ora, chabe natsanoica yojoshëntsamentšiyey y mëntšá yojtsáyebuache: —¿Ndayá átšeftaca cojtseboše, Jesús chë celoca Bëngbe Bëtsabe Uaquiñá? ¡Diosmanda ndoñe šcatjatsetšená ca!

²⁹ Chca tbojaniyana, er Jesús tojanmandá chë bacna bayëjbe juabna chábentšana chauesebocnama. Ba soye chë bayëja yojánama chë entšá ndoñe tšabá chaotsemnama. Chë entšanga imojuamana cucuatšentšana y shecuatšentšana cha jtsëtsbuayana bonguana chaotsemnama, pero chana jtsatabebiana, y chë bacna bayëjbe mándoca entšanga ndoyena luarëngoye yojánachana. ³⁰ Jesús chë boyabásabioye tbojantjá: —¿Ntšamo cabaina ca?

Y cha tbojanjuá: —Atše sënduabaina Legión ca.

Cha chca tojánayana, er chábeñe ba bacna bayëjënga tmojánamashjna. ³¹ Y chë bayëjënga Jesús tmojanimpadá, chë corente uabouana tboye ndoñe chaondíchamuama. ³² Chentšá

béconana ba cotšënga imnajena, tjoca imnëtsosañe; as chë bayëjënga Jesús tmojanimpadá chë cotšëngbeñe jamashjna chualesenciama, y Jesús añe chca tojanalesenciá. ³³ As chë bayëjënga chë entšábentšana tmojésanbocana y chë cotšëngbeñe tmojánamashjna; y chentšana, chë cotšënga batsjocana peñëšëjana uafjajónayoye imojtsoshbuetše y yojtsatajo.

³⁴ Chë cotšënga anÿenënga chca yojopásama tmojáninÿe ora, chentšana tmojtsanacheta y tmojána chë soye jacuéntama chë pueblóca y chiñe luarenache. ³⁵ Entšanga tmojánbocana ndayá tojanopasacá jinÿama, y Jesús yojtsemnoye tmojánashjajna ora, tmojáninÿe chë entšá chë ndábentšana bayëjënga tmojtanbocna, Jesusbe shecuatšentše yojtsótbemañe, entšayá uichëtjoná y chabe nÿets juábnaca. Y chë entšanga chama corente imojouatjaná. ³⁶ Ntšamo yojopasacá tmojáninÿëngna entšángbioye tmojanacuntá ntšamo chca chë bacna bayëjbe juabna uambayá chora ya tšabá yojtsatsmëmana. ³⁷ Chentšana, nÿetscanga chë Gerasa luarentše oyenënga Jesúsbioye imojtseimpadana chë luarentšana ínÿoye chaotsoñama, er chënga corente imojtsauatja. As Jesús chë barquëshoye tojtanamáshëngo y chentšana tojtsanoñe. ³⁸ Chë entšá chë ndábentšana bacna bayëjënga tmojtanbocana, Jesúsbioye tbojanimpadá cháftaca jama chabolesenciama; pero cha ndoñe tbonjanlesenciá. Jesús tbojanmandá chauatoquedama y mëntšá tbojaniyana: ³⁹ “Acbe yebnoye motsatoñe y cochjácuntaye lempe ntšamo Bëngbe Bëtsá acbiana tojamcá ca.”

Chentšana chë boyabása yojtsatoñe, y nÿets pueblëjana tojanacuntá ntšamo Jesús chabiana tojanmcá

**Jesús canye shembásabioye
tbojanshná y tojanma Jairêbe
bembetema cháuatayenama**

(Mt 9.18-26; Mc 5.21-43)

⁴⁰ Jesús chë uafjajónaye chenguánoica tojtashjango ora, nyetsca entsanga oyejuayënga tmojtanoftja, er nyetscanga chabíama imojanobátmana. ⁴¹ Chora tojánashjango canye entsá, Jairo ca uabainá. Cha inamna chë pueblentse chë judiëngbe enefjuana yebnentša mandayá. Jesusbe shecuatšentse yojoshëntsamentšiye y ibojtseimpadana chabe yebnoye cháuama; ⁴² er chë nye canye bembe cha ibnabomná, bnétsana uta uata bomná, chora ya jóbanama yojtsemna.

Y Jesús yojtsayëntscuana, chë entsanga chábíoye imojtsojuatséntse-naye. ⁴³ Chë entsanguentse yojtsaye canye shembása, oboftjajuanánaca šocá; cha ya bnétsana uta uata chca inapadecena. Lempe ntšamo yojanbomncá ashnayëngbioye atóbocayiñe yojtsepochóca, y ndocná yonjobenaye cha jáshnana. ⁴⁴ Chë shembásana stëtšoicana Jesúsbioye yojobeconá y chabe entsáyá sibuájua tojanábojajo. Y cachora chë oboftjajuanana ibojtsobojuána. ⁴⁵ Chora Jesús tojanatjá: —¿Nda šjabojajo ca?

Nyetscanga imojtsichamo ndoñe ca; as Pedro tojánayana: —Buatëmbayá, entsanga cmontsatsëntšená y cmontsayájuatsëntšenaye ca.

⁴⁶ Pero Jesús cachiñe tojánayana: — Pronto nda šojábojajo, er atše sënjasenté obenana átšbentšana jóbocnana, mo nda stjashna orcá ca.

⁴⁷ Chë shembása tojáninye Jesús yojtsetátšëmbo cha tbojánbojajuama. As chora, ngmëmnyáyá tojána y Jesusbe shecuatšentse yojoshëntsamentšiye; y

nyetscangbe delante tojanobuambá, ndáyeca tbojánbojajuama, y ntšamo cachora tšabá tojtanoquedama. ⁴⁸ Chora Jesús tbojaniyana: —Bembe. Bëngbe Bëtsábeñe icošbuachéyeca shnaná contsatsmëna. Natjëmbana motsatoñe ca.

⁴⁹ Jesús cabá yojtsóyebuambnantscuana, chë judiëngbe enefjuana yebnentša mandayábíocana canya tojánashjango, y chë mandayábíoye tbojaniyana: —Acbe bembe ya tontsóbana; ndoñe más chë Buatëmbayábíoye matébëybomana ca.

⁵⁰ Pero Jesús chë soye tojanuena; as chë mandayábíoye tbojaniyana: — Ndoñe matauatjana. Nye Bëngbe Bëtsábeñe cochtsošbuáchiye y acbe bembe tšabá echántsatsmëna ca.

⁵¹ Chë yebnoye tmojánashjajna ora, Jesús ndoñe tonjanalesenciá banga choye jamashjnama, nye Pedro, Juan y Santiago y chë shembásetembe bëtsétsatna añe. ⁵² Nyetscanga imojtsenóbošachiye y ngménaca imojtsóyebuambnaye, pero Jesús tojanéyana: “Ndoñe matenóbošachengana. Cha ndoñe chenatóbana; cha nye endëtsomañe ca.”

⁵³ Chë entsanga Jesúsbioye nye imojtsáfchaye, er chënga imojtsetátšëmbo chë shembásetema obaná yojëtsemnama. ⁵⁴ Chora Jesús chábíoye tbojanábuacueshache y jabuache tbojaniyana: “¡Shembásetema, matëtsbaná ca!”

⁵⁵ Y cha tojtanyena y cachora tojtantsbaná; y Jesús tojanamëndá chë shembásetema saná chamuajuatšé, chaosama. ⁵⁶ Chë shembásetembe bëtsétsata puerte ojanánata ibojtsemna; y Jesús tojanamëndá, ndayá tojanopasama ndocnábeñe ntsecuëntayana.

Jesús, chabe uatsjéndayënga tojanichamó, Bëngbe Bëtsabe améndayama jábuayenama

(Mt 10.5-15; Mc 6.7-13)

9 Chentšana, Jesús chabe bnétsana uta uatsjéndayënga tojánachembo, y mando y obenana tojanatsatá bacna bayëjënga entsángbentsšana jtëbuacanama y šocanëngama jashnayama. ²Tojanichamó Bëngbe Bëtsabe améndayama jábuayenama y entsángbioye jashnayama. ³Y mëntsá tojanéyana: “Benachiñama tondaye šmattsambaye: ni jatjonëfja, ni shecnaja, ni saná, ni crocénana; ni inye entséjua jenotrócama cach ndoñe. ⁴Canye yebnentše posada chacmojúyentsame ora, chentše šmochjoquéda inye puebloye já-tantscuana. ⁵Nderado ndayentše posada ndoñe chacmonjuyentsame, chentšana šmochjésebocana y shecuatšentša polvëshe šmochjésenstoto, chca, chëngbioye jinyanjyama chënga ndoñe tšabá tšëngaftangataca tmonjamama ca” —Jesús tojanabuayená.

⁶Asna chë uatsjéndayënga tmojëftsanbocana y tmojána, nyetsca chë base pueblotémënguenache chë tšabe noticiënga abuayinyaye y entsanga šocanëngama áshnaye.

Herodes y Jesús

(Mt 14.1-12; Mc 6.14-29)

⁷Jesusbiana y ntšamo yojtšanopasá-nama rey Herodes tojántatšëmbona; y ndoñe yontsetátšëmbo ntšamo jtsejuabnayana, er báseftanga imojtsanichamo Juan chë Ubayaná obanënguentšana tojtanayena ca, ⁸ínýënga imojtsanichamo chë Bëngbe Bëtsabe juabna oyebuambnyá Elías cachiñe tojánbocna ca, y ínýëngna canya chë tempo imojanmëna Bëngbe Bëtsabe juabna oyebuambnyënguentšá

obanënguentšana tojtanayena ca. ⁹Pero Heródesna tojánayana: “Cach atše sënjanmandá Juanbe bestšaše chamotséstjanguama. ¿As, nda cha nántsemna, chë ndabiama chca soyënga jtsóyebuambnayana sentsuenana ca?”

Chíyeca Herodes yojtšenguaye ntšamo jamëse Jesús jinýama.

Jesús shachna uaranga boyabásengasana tojanacaredadó

(Mt 14.13-21; Mc 6.30-44; Jn 6.1-14)

¹⁰Chë Jesús tojánichamonga chábioye tmojtanashjango ora, lempe ntšamo chënga tmojanmama tmojancuentá. Y Jesús, nýe chënga jëftsëbiatšese ínýoye tojtšanoñe, Betsaida ca uabaina puebloye. ¹¹Pero chë entsanga chë soye tmojántatšëmbona, y as tmojanasto; y Jesusna tšabá chënga tojanëbuaja, y Bëngbe Bëtsabe améndayama yojtšëtsësnaye, y chë šoquënga imojtsemnëngbioye tojanashná.

¹²Ya jetiñe yojtšobiamná orna, chë bnétsana uta uatsjéndayënga Jesúsbioye tmojanobeconá y mëntsá tmojanianya: —Chë entsanga cuantichamuá, jóchnama y saná jonguangoñama chamot-sama chë béconana pueblotémënguenache y luarënguenache; er quem luar-ñe ndocná quenatiyena ca.

¹³Jesús chora tojanéyana: —Tšëngaftanga saná chëngbioye šmochjacaredádaye ca.

Pero chënga tmojanjuá: —Nýe shachna tandëse y uta beónata fsëntsebomna; nyetscangbiama saná jabuámiyama nderado nda tojasna, aíñe cuanjacaredádaye ca.

¹⁴Er mo shachna uaranga boyabásenga imnamna. Pero Jesusna chabe uatsjéndayënga tojanéyana: —Mamëndá nyetscanga chamotbiamama shachna bnëtsátsanënga ca.

¹⁵As chënga chca tmojanma y nyetsca entsanga tmojanotbiana.

¹⁶ Chora, Jesús chë shachna tandëse y chë uta beónata tojanca, y celoye tojanontjesé, Bëngbe Bëtsábioye chama tbojtanchuá, tojanjatá y chabe uatsjéndayënga tojanantregá entsángbioye chamuatšatama. ¹⁷ Njetsca entsanga tmojanse jtoshachaye nyëtšá, y cabá bnëtsana uta sbarëco tmojanajutjé chë ojamnëtmëngaca.

**Pedro tojánayana, Jesús chë
Cristo bëtsemnana**

(Mt 16.13-19; Mc 8.27-29)

¹⁸ Canye te, Jesús canya Bëngbe Bëtsáftaca ibojtsencuëntaye ora, chabe uatsjéndayënga cháftaca imojtsemna. Chora tojanatjá: —¿Nda atše bëtsemnana entsanga imojtsichamo ca?

¹⁹ Y chënga tmojanjuá: —Báseftanga montsichamo Juan ca, ínÿengna Elías ca, y ínÿengna canye Bëngbe Bëtsabe juabna oyebuambnayá tempscá mora tojtayena ca.

²⁰ As Jesús tojanatjá: —Y tšëngaftangna, ¿nda atše bëtsemnana ntšamo šmochjayana ca?

Y Pedro tbojanjuá: —Acna chë Cristo condmëna, chë Bëngbe Bëtsabe Uámana Uabuayaná ca.

**Jesús tojánayana cha ibojamna
jóbanana y jtayenana**

(Mt 16.20-28; Mc 8.30–9.1)

²¹ Pero Jesús corente chënga tojanamëndá ndocnábeñe chama ntsecuëntayana. ²² Y mëntšá

cachabiana tojánayana: —Chë Bëngbe Bëtsá Entšá tbojanbemá bontsemna puerta jasúfriana, chë judiëngbeñe bëtšëjemëngcá amëndayëngbiama, chë judiëngbe bachnangbe más uámana amëndayëngbiama y ley abuátambayëngbiama uabotená jtsemnana. Entšanga mochanjóba, pero unga tianoye cha echántayena ca.

²³ Chentšana njetsca entsanga tojanéyana: “Nda atšbe uatsjendayá jtsemnana tojtseboše, cháuyana nye Bëngbe Bëtsá yobena sempre chabe vidiñe jtsemándayama, chabe quem luarentša soyënga cachcá chauesonýá atše juastama, y cada te chaotseprontana átšbeyeca jasúfriama, y cruciñe jobanámnaca. ²⁴ Nda tojtsama quem luarentše bëtscá soyënga jtsebmomnana y atšbiana jasúfriama ndoñe tontseprontana, chë njetsca tescama yomna tšabe vida echanjobuetše. Pero nda quem luarentša soyënga cachcá tojéftsonýá atše juastama, masque chaóbana, chë njetsca tescama yomna tšabe vida echántsebmomna. ²⁵ Er ¿ndayama entšá buanjoservia njetsca quem luarentša soyënga jtsebmomnana, cha pochocaná jtsemnana tojtsá y chë njetsca tescama yomna tšabe vida tojtsoperdese? ²⁶ Er ndëmuanyë entšá, atšbiana o atšbe buayenana soyëngama tojtsëuatja, chë Bëngbe Bëtsá Entšá tbojanbemánaca chabiana echantsëuatja, cha chabe bëtš buashinÿinÿaniñe chaojésabo ora, chabe Taitabe bëtš obenánaca y chabe angelotëmëngaftaca adoraná. ²⁷ Ndegombre cbéyana, báseftanga muentše montsemnënga quemochatóbana, Bëngbe Bëtsá chabe obenánaca entsángbeñe jabomándama jabana ntjéftsinýcá ca” —cha tojánayana.

Jesús inÿetšá tojanobinÿna

(Mt 17.1-8; Mc 9.2-8)

²⁸ Mëntšá tojanopasá: Chca palabrenga tojanoyebuambá chentšana posuftaytese, Jesús tojéftsanëbiatše Pedro, Santiago y Juan, y canye tjoye tojántsjua, Bëngbe Bëtsáftaca jencuëntama. ²⁹ Bëngbe Bëtsáftaca ibojtsencuëntantscuana, chabe jubiá inÿetšá yojtsinÿna, y chabe

uichëtjonëjuangá tša uafjantsëjuangá yojtsamna y tša yojtsabuashinÿinÿana. ³⁰Chora uta boyabásata tbojanonÿná, Jesúseftaca ibojtsencuéntaye. Chata ibojamna Moisés y Elías; ³¹corente buashinÿinÿaniñe ibojtsemna, y chënga imojtsencuéntaye ntšamo Jesús Jerusalenoca jasúfriana y jóbanana. ³²Masque Pedro y chabe enutata tša ocnayënga imojtsemna, ñe imojtsefšna y tmojáninÿe Jesusbe juachañe tša yojtsebuashinÿinÿana y chë uta boyabásata cháftaca ibojtsemna. ³³Chë uta boyabásata Jesús bentshána ibojoluára ora, Pedro, Jesús bioye tbojanianya: “Buatëmbayá, ¡tša tšabá bëngbiamá cuanmëna muentšë jtsemnana ca! Mora fchanjapórma unga tambotëmënga: cánÿetema acbiamá, ínÿetema Moisesbiamá y ínÿetemna Elíasbiamá ca.”

Pero Pedro ndoñe yontsetátšëmbo ntšamo yojtsichámuama. ³⁴Y chca yojtsóyebuambnantscuana, canÿe jantšëtëshe yojóbema, y chëngbiyoye yojáutsbotse, y chënga chë tsoye imojtsemnana tmojáninÿe ora, chë uatsjëndayënga chama imojtsauatja. ³⁵Chora chë jantšëtëshoicana canÿe oyebuambnayana tojanóbocna, mëntšá: “Mua atšbe Uaquiñá endmëna, atšbe uabuayaná; cha šmochtseyeunana ca.”

³⁶Chë oyebuambnayana tmojanuëntšana, tmojáninÿe Jesús canÿa yojtsemna. Chë uatsjëndayënga iytëca imojtsemna, y chë tempo ndocnábiyoye chama imonjuenaye.

Jesús, canÿe basa bacna bayëjbe juabna uambayábioyey tbojanshná

(Mt 17.14-21; Mc 9.14-29)

³⁷Yëfsana, chë tjojana tmojtantsmá ora, ba entšanga tmojánbocana Jesús jajëbenguama. ³⁸Chora, chë entšanguentšana canÿe boyabása tojanontšë mëntšá uayebuáchana:

—Buatëmbayá, Diosmanda atšbe uaquiñá minÿe. Ñe cha atšbe uaquiñá endmëna; ³⁹y mora, bayëjbe juabna chábioyey bontsësháchichana, y ñe ndeolpe jóntšana yoyana, ataque joshachana y uayoicana shashiye jtsabocanana. Y chábentshána chë bayëja ndoñe betscó ntjësebocnana, y cuerpiñe corente maltrataná jeseboshjonana. ⁴⁰Acbe uatsjëndayënga sënjaimpadá chë bayëja chábentshána chamuatábocnana, pero ndoñe chematobená ca.

⁴¹As Jesús tojánayana: —¡Ñyetšá ndošbuáchiyënga y bacna entšanga! ¿Buetayté šojtsemna tšëngaftangaftaca jëftsemnana y jtsëuantánana ca?

Chora chë boyabásabioyey tbojanianya: —Moye chë uaquiñá mánatse ca.

⁴²Chë basa yojtsebeconá ora, chë bacna bayëja chábioyey tbojanshajayé y inÿe ataque tbojanëshache. Pero Jesús chë bayëjbiyoyey tbojanácacana, chë basetëmbioyey tbojanshná y chabe taitábioyey tbojtanëntregá. ⁴³Y ñyetscanga puertey ojanánënga imojtsemna, Bëngbey Bëtsá tša obenana bomná inamnama.

Jesús cachiñe tojánayana chab ibojamna jóbanana y jtayenana ca

(Mt 17.22-23; Mc 9.30-32)

Ñyetasca entšanga, ndayá Jesús yojtsamama ojanánënga imojtsemnëntscuana, chabe uatsjëndayënga chab tojanéyana: ⁴⁴“Quem soyey tšabá šmochjouena y ndoñe chacmondëbnëtjomba: Chë Bëngbey Bëtsá Entšá tbojanbemá entšangbey cucuatšinë mochanjáboshjona ca.”

⁴⁵Pero chënga ndoñe yontsósertana ntšamo Jesús yojtsëtsëtsnacá, er Bëngbey Bëtsá ndoñe tonjanalesenciá chama chaósertama; y imojtsauatja Jesús jaimpádana chama chauabuayenama.

¿Nda chë más uamaná yomna?

(Mt 18.1-5; Mc 9.33-37)

⁴⁶ Chë tempo, chë uatsjéndayënga tmojanontsé enatsëtsnayana, nda chë más uamaná bétsemnama. ⁴⁷ Jesús yojtsetátšëmbo ntšamo chënga imojtsejuabnayama; asna, canye básetema tbojánishache, chabe juachaca tbojántbema, ⁴⁸ y chëngbioye tojanéyana: “Nda átsbeñe ošbuachiyá bétsemnama, quem basetémbioye tbojofja, chana atše jofjana; y nda atše šojofja, chana chë nda šojichmó chábioynaca jofjana. Chíyeca, tsëngaftanguentše chë más nduamaná, cha chë más uamaná entsemna ca.”

Nda bëngbe contra ndoñe tontsemná, béngaftaca jtsemnana

(Mc 9.38-40)

⁴⁹ Juan, Jesúsbioye tbojaniyana: —Buatëmbayá, bënga fsënjinye canye boyabása y cha aca jótšëmbonëse, entšángbentšana bacna bayëjbe juabna endëtëbuacana; pero cha béngaftaca ndoñe quenátsmëna causa, chama fsënjesauyaná ca.

⁵⁰ As Jesús tbojanjuá: —Ndoñe š-matjuauyaná; er nda bëngbe contra ndoñe tontsemná, béngaftaca jtsemnana ca.

Santiago y Juánbioye Jesús tojanécacana

⁵¹ Jesús celoye jtama yojtsobeco ora, nyets añémoca cha yojtsejuabnaye Jerusalenoye jama. ⁵² Natsana báseftanga tojanichamó, y chënga tmojána canye base pueblotémoye Samaria luaroca, posada chabiamana janguangoñama; ⁵³ pero chë luarentša entšanga ndoñe tmonjánbošena posada juantšamiana, er tmojántatšëmbona cha Jerusalenoye yojétsayama, chë chëngbe uayayëngbe uamana puebloye. ⁵⁴ Chabe

uatsjéndayata, Santiago y Juan, chë soye tbojáninye ora, Jesús tmojaniyana: “Bëngbe Utabná, ¿quetseboše bëndata fchaimandá celocana ñneshe chaótsatše y quem entšanga chaotsapochócaye ca?”

⁵⁵ Pero Jesús yojobuértana y chátbioye tojtsanécacana, chca juabna bomna causa. ⁵⁶ Chentsana chënga inye pueblotémoye tmojtsanoñe.

Chë Jesús juastama bošënga

(Mt 8.19-22)

⁵⁷ Benachëjana imojtsajna ora, canye boyabása Jesúsbioye tbojaniyana: —Atšbe Utabná, atše séntseboše aca juastana ndémoye chacojsá choye ca.

⁵⁸ Y Jesús tbojanjuá: —Chë zorrënga cuevëshënga mondbomna ndayentše jt-siyenama y chë shloftšëtëmëngna uajajonëshangá; pero chë Bëngbe Bëtsá Entšá tbojanbemá ndoñe quenátsbomna ndayentše jóchnama ca.

⁵⁹ Jesús inye entšábioye tbojaniyana: —Šmasto ca.

Pero cha tbojanjuá: —Atšbe Utabná, šmoleenciá atšbe taitá chjshesabotbontsañe ca.

⁶⁰ As Jesús tbojaniyana: —Chë Bëngbe Bëtsabiamana mo obanëngcá imomnënga, ntšamo Bëngbe Bëtsá yomandacá ndoñe tmontsama causa, chënga cachëngbe obanënga chamotsétebuantsañe. Acna, motsa y Bëngbe Bëtsabe amëndayama entšanga cochjabuayená ca.

⁶¹ Inyana Jesúsbioye tbojaniyana: —Atšbe Utabná, atše séntseboše aca juastama, pero šmoleenciá natsana atšbe pamíllangbiamana jaisodióšoftama ca.

⁶² As Jesús tbojaniyana: —Nda cachabe soyëngama tbojtsengmena, Bëngbe Bëtsabe amëndayocama ndoñe ntoservénana; er cha jtsemnana mo canye arayacá, chë tojtsetrabája ora, stëtšoye tojtsaisantjeñcá ca.

**Jesús canýsëfta bnétsana y uta
entšanga tojanichamó Bëngbe
Bëtsabe soyëngama jábuayenama**

10 Chë soyënga chentšana, Bëngbe Utabná Jesús inýe canýsëfta bnétsana y útatnaca tojanabacacá, y utáta chabe natsana tojanichamó, chë cha ibojtsemna jama pueblëngoye y luarëngoye.

²Mëntšá chënga tojanéyana: “Canýe bëts jajañe bëtscá játbanama entsemna, pero peonga báseftanga; chíyeca, chentša nduñbioye jaimpádana ba peonga chauichamó chë jaja saná játbanama. Cachcá, quem luarentše bëtscá entšanga montsemna Bëngbe Bëtsábioye nduabuátmënga, y chëngbioye chabíama abuayinayënga nýe báseftanga. Chíyeca, Bëngbe Bëtsá moimpadanga ba abuayinayënga chauichamó quem entšanga chábioye jábuajama. ³Motsajna; šmochjinýe, atše tšëngaftanga cbontsichamná mo oveshënga cuenta, tjañe quešëngbeñe. ⁴Ndoñe šmattsambaye shecnaja, ni crocénana šmattsaiuábuenana, ni shecochëtjonëshe; y nda chacmojacheuá ora, ndoñe yapa bën chentše šmatjáisenobiamnaye.

⁵“Ndaye yebnentše chašmojá-mashjna ora, natsana šmochjayana: ‘Lempe tšabá quem yebnentše chaotsomñe ca’. ⁶Y chë yebnentše chca juabna bomna entšanga tmomñëna, chë tšabiana ndegombre chentše echántsemna; pero ndóñese, chca tšabiana chentše ndoñe queochátmëna. ⁷Canýe yebnentše šmochjoquéda, y šmochjase y šmochjofšiyë ntšamo chentše chacmojacaredadaycá; er chë trabajayá merecido jtsebuájonana chca juácánama. Canýe pueblentše nýe inýe y inýe yebnënguenache ndoñe matajnana.

⁸“Ndaye pueblentše chašmojá-mashjna y tšabá chacmojúbuajentše, šmochjase ntšamo chentše chacmojacaredadaycá; ⁹chentša šoquënga šmochjášhnaye y šmochjáuyana: ‘Bëngbe Bëtsabe amëndayana tšëngaftangbeñe entsemna ca’. ¹⁰Pero canýe pueblentše chašmojáshjango y ndoñe chacmonjúbuaja, chentša tsashenangoye šmochjábocana y mëntšá šmochjayana: ¹¹‘¡Chë tšëngaftangbe pueblentša polvëshe, chë bëngbe shecuatšënguñe tojuanjëshe, camuentše fšcuesenstëtoná, chca, tšëngaftanga chašmotsetatšëmbuama ndoñe tšabá šmonjamama! Pero masque chca, šmochtsetatšëmbo chë Bëngbe Bëtsabe amëndayana tšëngaftangbeñe entsemnama ca.’ ¹²Ndegombre cbéyana, quem luare jopochócama te, chë luarentša entšángbioye Bëngbe Bëtsá puerte jabuache echantsacastígaye, y Sodoma puebloca bacna entšángbioye ndoñe nýa nýetšá jabuache ca” —Jesús tojánayana.

Chë nduauenana entšanga

(Mt 11.20-24)

¹³“¡Tša lastema Corazín puebloca entšangbiama! ¡Tša lastema Betsaida puebloca entšangbiama! Er chë muentše Bëngbe Bëtsabe obenánaca sënjama soyënga, chë bëts pueblënga Tiro y Sidonoca chca matënjochnënguse, chentša bacna entšanga ya tempo chëngbe bacna soyëngama ngmënáca matmëntenójuabonga y Bëngbe Bëtsabe benache matmëntishache, y chca tmojamama chaotsótatšëmbuama, uajojësha entšayangaca matmëntopormanga y jatinyashiñe matmënjotbiama. ¹⁴Pero ntšamo entšanga tmojamama, tšabá o ndoñe tšabá bëtsemnama jayanama chaojobuache ora, tšëngaftanga más bëts castigo šmochántsebomna, chë

Tiro y Sidonoca bacna entsangbe castiguama. ¹⁵Y tšengaftanga, Capernaum pueblentša entsanga, ¿celónstcoca atsebánanënga šmochtsemna ca šmojtsejuabnanga? ¿Chë uabouana infiernoye cmochantsésétjango!

¹⁶“Nda tšengaftanga tcmojoyauná, chana atše joyeunayana; y nda tšengaftanga tcmojtsëbaté, chana atše jtsabotena; y nda atše šojtsaboté, chana chë nda šojichmó chábioye jtsabotena.”

Chë canÿsëfta bnétsana y uta entsanga tmojtanashjajna

¹⁷Chë canÿsëfta bnétsana y útatna Jesús yojtsemnoye tmojtanashjajna, puerte oyejuayënga; y chábioye mëntšá tmojaniana: —¿Bëngbe Utabná, aca jótšëmbonëse, chë bacna bayëjëngnaca šonjoyauná ca!

¹⁸Y Jesús tojanéyana: —Ndegombre. Y tšengaftanga Satanásbioye chca šmontseyëñaná ora, entsemna mo Satanás celocana canÿe tcuinÿcá jtsotsatsana stjinÿcá. ¹⁹Atšna

obenana tcbonjatsatá mëtscuayënga y alacranëngbeñe chašmotsajnama, y bëngbe uayayá Satanasbe nyets obenana jáyëñanama, tšengaftanga ndocá ntjapasacá. ²⁰Pero móyejuanga, ndoñe chë bacna bayëjënga chacmóyaunama obenana šmojtsebomnama, sinó tšengaftangbe uabaina celoca ya yojtsábemanama, er tšengaftanga chë nyetsca tescama yomna tšabe vida šmochántsebomna ca —cha tojanéyana.

Jesús puerte tojanoyejuá

(Mt 11.25-27; 13.16-17)

²¹Chora Jesús, chë Uámana Espíritbeyeca, corente oyejuayá tojánayana: “Atše cbatschuá, Taita, celoca y quem luarentša Utabná. Aca, chë nÿe batsá tatsëmbënga tconjanÿanjé, chë tša tatsëmbënga y osertánëngbiamna tcojaiÿtëme soyënga.

Aíñe, chama cbontsadorana, Taita, aca chca chaotsemnama tcojábóšenayeca.

²²“Atšbe Taitá lempe chca šonjatšetà. Chë Uaquiñábioye ndocná corente quebnatábuatma; nÿe chë Taitá aíñe. Y chë Taitábioye ndocná corente quebnatábuatma; nÿe chë Uaquiñá aíñe, y ndë-muanÿëngbioye chë Uaquiñá tojtseboše nda chë Taitá yomnama jinÿanjiyama, chëngnaca chë Taitábioye mochantsábuatma ca.”

²³Chentsana, Jesús chabe uatsjëndayëngbioye tojanobuértana y nÿe chëngbioye tojanéyana: “¿Puerte oyejuayënga chë ntšamo tšengaftanga šmontsonÿacá jinÿyama tmojtsoberënga! ²⁴Er atše cbéyana, banga Bëngbe Bëtsabe juabna oyebuambnayënga y reyënga tmojánbošena chë tšengaftanga šmontsonÿá soyënga jinÿyana, pero ndoñe tmonjáninÿe; y tmojánbošena chë šmontsuenana soyënga jouenana, pero ndoñe tmonjanuena ca” —cha tojánayana.

Chë Samarioca tšabe entsabiama cuento

²⁵Canÿe judiëngbe ley abuatambayá yojontsé Jesúseftaca jóyebuambayama, y jisháchichiyamna mëntšá tbojantjá: —Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

²⁶Y Jesús tbojanjuá: —¿Ntšamo leyinë iuábemana? ¿Ndayá chiñe condbétsaliaye ca?

²⁷Chë ley abuatambayá tbojanjuá: —“Chë Utabná Bëngbe Bëtsá cochtsebbonshana nyets ainánaca, nyets espíritoca, nyets añémoca y nyets juábnaca”; y “ndëmua entsánaca cochtsebbonshana, ntšamo cach aca cuenobobonshancá ca.”

²⁸Chora Jesús tbojaniana: —Tšabá š-conjojuá. Chca cochtsama y chë nyetsca

tescama yomna tšabe vida cochántse-bomna ca.

²⁹ Pero chë ley abuatambayá tšabá jenoquédamna Jesúsbiøye tbojantjá: — Y ¿ndase chë ndëmua entšánaca yomna ca?

³⁰ As Jesús tbojanjuá: —Canÿe, Jerusalenocana Jericó benache canÿe entšá yojtsetsmá, y básefta salteadorënga imojébëbocna. Lempe imojsetfca, chë entšayánaca; imojtsejantšetaye y chentšana imojtsatónënga, y chë entšá batšá obaná imojéseboshjona. ³¹ Ndeolpe, chë benachëjana canÿe judiëngbe bachna yojtſachnëjuana. Chë entšábiøye ibojinÿe ora, nÿe chabuacá yojtſëchnënguañe. ³² Cachcá, canÿe Levita, chë canÿe Bëngbe Bëtsabe bëts yebnocatrabajayá chëjana yojtſachnëjuana; y chë entšábiøye ibojinÿe orna, nÿe chabuacá yojtſëchnënguañe.

³³ “Chorna, cach benachëjana canÿe samaritano ináboye. Chë entšábiøye ibojinÿe orna, ibojóngmia. ³⁴ Chábiøye yojobeconá, aceitiye y vínoyeca ibojáshna, y lisianënguiñe entšëjuaca ibojuantsacjuá. Chabe couayiñe ibojëftsenjayiye, canÿe yebnoye posada uyentšamianoye ibojuánatse, y chentšë chábiøye ibojëftsinÿena. ³⁵ Yëfsana, chë samaritano uta denario crocénana yojenóbojatsëca, chë mo uta tesca trabajuama crocénana nÿetšá, y chë posada nduññbiøye ibojesabuenaye, y mëntšá ibojauyana: ‘Quem boyabása cochtsinÿena, y nderado más crocénana muabiama chacojenábojafjonasna, mëjana chaitſachnëjuana ora, cbochjabáisabuenaye ca.’ ³⁶ Y chcasna, ¿chë unganguentšana nda cmojtſinÿana chë entšabiama yojtsejuabnaye cha cachacá entšá inamnana ca?”

³⁷ Y chë ley abuatambayá tbojanjuá: —Chë entšabiama tbojanongmé cha ca.

Y Jesús tbojaniyana: —Asna, motsa y cachcá cochjama ca.

Jesús, María y Martbe yebnentšë

³⁸ Chentšana, Jesús benachëjana yojtſaye y canÿe base pueblotëmoye yjëftſanamashëngo; y canÿe shembáſa Marta ca uabainá, chabe yebnentšë tbojanofja. ³⁹ Martna canÿe quenata ibnabomna, María ca uabainá. Cha Jesusbe shecuatšentšë yojtóbema chabe palabra jouenama; ⁴⁰ y chëntſcuana Marta ba soyënga yojtſama. Cha Jesúsbiøye tojanobeconá y tbojaniyana: —Utabná, ¿tondayana cmontsentšamna, atšbe quenata nÿe canÿa chašonÿá lempe jamama ca? Mëyana chašujabuache ca.

⁴¹ Chora Jesús tbojanjuá: —Marta, Marta, bëtscá soyëngama contsenó-cochinÿena y contsenomantšná; ⁴² pero nÿe canÿe soye endmëna chë yoiyta soye jamama. María chca jamama tojobuáyana, chë más tšabe soye, y ndocná queochatsma cha chaotsajbanama ca.

Ntšamo Bëngbe Bëtsáftaca cuanjencuënta

(Mt 6.9-15; 7.7-11)

11 Canÿe, Jesús Bëngbe Bëtsáftaca ibojtsencuëntaye canÿe luarentšë. Tojanpochocá orna, canÿa chabe uatsjendayënguentšá tbojaniyana: —Bëngbe Utabná, Bëngbe Bëtsáftaca jencuëntama šmabuatambá, ntšamo Juan chabe uatsjëndayëngaftaca tojanmcá ca.

² Y Jesús tojanëyana: —Bëngbe Bëtsáftaca chašmojtſencuënta ora, šmochjayana:

Bëngbe Taitá, acbe uabaina chë más uámana uabainana chauesomñe.

Acbe amëndayana chaóshjango.

³ Mënté šmiyatšatá, cada te šnetsëjaboto tandëše.

⁴ Bacna soyënga fsënjama: šmotsaperdónaye; er béngnaca nyetscanga chë bëngbiama bacna soyënga amëngbioye fsëndbetsaperdónaye.

Bacna soyënga jamama šojocochëngo ora, šochjujabuache chca ndenobuíyama.

⁵ Jesús mëntśánaca tojanéyana: “Nderado aca acbe bacóbioye tséntseto ora tcojá y tcojauyana: ‘Bacó, Diosmanda unga tandëše šmotsemná, ⁶er canýe atšbe amigo yebnoca tonjáshjango y tondaye quetsátsbomna cha jonánjama ca.’

⁷Ndegombre, cha tsocana tcmojojuá: ‘Ndoñe šmatébyabomana. Bëšáša ya entsatámena y atše y atšbe básenga ya fsëntsocjá; ndoñe quetsátobena mora jotsbanana y chë tandëše jámnana ca.’ ⁸Ndegombre, chë bacó ndoñe tonjotsbaná chë tandëše jámnama, cháftaca šuenatsëtsnámase, cha pronto jotsbanana chca uébëyabomana ndoñe tconjajbaná causa, y lempe ntšamo cmojtsajabotcá cha cmochanjoyiye.

⁹Chcasna, atše cbéyana: Šmochjotjañe y Bëngbe Bëtsá cmochanjátšataye; šmochjánguango y šmochanjínýena; šmochjachembo y cmochanjébëtafjo.

¹⁰Er ndánaca ndayá tojtsotjanañá, jóyëngacñana; y tojtsenguá cha, jónýenana; y nda tojtsechembuanábioye jebiatëfjuana ca.

¹¹“¿Nda tšëngaftanguentśana nantsobena, taitá tojtsemnëse, cachabe uaquiñábioye canýe mëtšcuaye jatštayana, beona tbojtsotjanañe ora; ¹²o canýe alacránashe joyiyana, shëmnëbé tbojtsotjanañe ora? ¹³Y chca, tšëngaftanga, bacna soyënga amënga, tšëngaftangbe basetemëngbioye tšabe soyënga jatšatayama šmojtsamanëse, ;más chë celoca Taitá, chë Uámana Espíritu echanjátšataye, chca

tmojtsotjanañëngbioye ca!” —Jesús tojánayana.

Fariseunga tmojánayana Jesús Satanásbentśana obenana tojanóyëngacñe ca

(Mt 12.22-30; Mc 3.20-27)

¹⁴Jesús canýe entśábentśana canýe bacna bayëja tbojtanábozna. Chë bayëja ndëbiá chë entśábioye tbojánbema, y chábtentśana tojésanbozna ora, chë ndëbiá tojtantonśë oyebuambnayana. Y chë entśanga chama imojenjaná; ¹⁵pero báseftanga imojtsichamo: “Beelzebú, cach Satanás, chë bacna bayëjëngbe amëndayá, quem boyabásabioye obenana tbojatšetà chë bayëjënga chauatëbuacnama ca.”

¹⁶Y ínýenga, Jesús jisháchichiyamna tmojanimpadá canýe bëts soye chaoma, jinýanjíyama cha celoca obenana inabomna o ndoñe. ¹⁷Pero Jesús yojtsetátšëmbo ntšamo chëngbe juabna bëtsemnana. As tojanéyana: “Canýe amëndayábentšë entśanga tmojtsenojatá y tmojtsenáyase, cachënga jtsenpochócana; y canýe yebnentšë oyenënga tmojtsenojatá y tmojtsenáyase, chë pamíllanga tšabá nyets tempo ndoñe quemochátsmëna.

¹⁸Cachcá, Satanás tojtsenojatá y cachabe contra tojtsemnëse, ¿ntšamo nantsobena chabe mándayana quem luarentšë jëftsebomnana? Chca séntsichamo, er tšëngaftanga šmotsichamo Beelzebube obenánaca chë bayëjënga stsatëbuacana ca; ¹⁹pero chca ndegombre tojtsemnëse, ¿ndábeyeca tšëngaftangbe usetonënga obenana imojtsebmna chë bacna bayëjënga jtëbuacnama? Chíyecna, cachënga montsinýinýná ntšamo ndegombre yomnana, y tšëngaftanga ndoñe ndegombre soye šmotsichámuama. ²⁰Y atšna, Bëngbe Bëtsabe obenánaca entśángbentśana

chë bayëjenga sëndëtëbuacana; y chë soye entsinÿinÿná, Bëngbe Bëtsabe amëndayana tšëngaftangbiöye tojóshjanguama.

²¹ “Canÿe corente añemo bomna entšá, bëtsá ármangaca chabe yebna tojtsinÿenëse, chë tsoca tomna soyënga ndoñe ntjotšana. ²² Pero inÿa chabiama más añemo bomná tojabo y tbojabetseyënjaná, chë cha yojanašbuaché armangá jtsabocana y chë tobomna sóynaca; y ntšamo chë inÿa tojtsebošcá chë soyëngaca jamana.

²³ “Nda ndoñe átšeftaca tontsemná, atšbe uayayá jtsemnana. Y nda átšeftaca ndoñe tontsetrabája, chana atšbe contra jtsetrabájayana ca” —Jesús tojánayana.

Ndayá inopása chë bacna entšángaftaca

(Mt 12.43-45)

²⁴ “Canÿe bacna bayëja canÿe entšábentšana tojësebozna ora, bojojo luarënguenache chë bayëja jtsanana, ndayentše jóchnama onguayinë. Ndoñe tonjñÿena ora, jenójuaboyana: ‘Atšbe oyenoye, chë ndayentšana sënjëftsebochnoye chanješshécona ca.’ ²⁵ Y choye tojtashjango ora, jinÿenana lempe tšabá cha jtesamashënguama, mo tsjajniñe y prontániñe cuaftsemncá. ²⁶ Chora chë bayëja jana y inÿe canÿsëfta bayëjenga, chabiama más opëjenga jobiatšana, nÿetscanga choye jamashjnama, chë boyabásabeñe joyënanama. Y chca, chë boyabása tempscama más bacna entšá jtoquédana, chora chë natsanama más bayëjenga abamna causa ca” —Jesús tojánayana.

Chë ndegombre oyejuayana

²⁷ Jesús chë soyënga yojtsichamëntscuana, entšanguentše canÿe shembása yojuayebuáchena: —¡Puerte oyejuayá chë quem luaroye

tcmojúshjango y tcmojëftseboché shembása ca!

²⁸ As Jesús tbojaniyana: —Más oyejuayana bomnëngna, chë Bëngbe Bëtsabe palabra tmojouena y chca tmojtsamënga ca.

Chë bacna entsanga Jesús tmojanimpadá canÿe bëts soye chaoma, chabe obenana jinÿama

(Mt 12.38-42; Mc 8.12)

²⁹ Entšanga más imojtsójoye Jesús yojtsemnentše, y Jesús tojanontšé jáuyanana: “Morsca entsanga puerte bacna entsanga; chënga montsotjanañe atše canÿe bëts soye chaima atšbe obenana jinÿama, pero ndoñe chca quemochátinÿe, sinó nÿe chë ndayá yomna mo chë Jonásoftaca tojanopasá soyca. ³⁰ Er chca, ntšamo Jonás Nínive puebloca entsanga canÿe bëts soye tojaninÿanjé Bëngbe Bëtsá obená yomnama chamotsetatšëmbuama, chë Bëngbe Bëtsá Entšá tbojanbemánaca entsinÿanÿná morsca entšángbiöye, Bëngbe Bëtsabe amëndayana tojóshjanguama. ³¹ Bëngbe Bëtsá ntšamo morsca entsanga tmojanmama yochjayana te, chë Sur luaroca reiná echanjotsaye y morsca entšángbiamama echanjayana ndoñe tšabá tmonjama ca; er chana chë quem luare iuajbana luarëngocana tojánabo Salomonbe osertanánaca palabrënga jouenama, y chë mora muentše entsemnana, Salomonbiamama más uamaná endmëna. ³² Chë entsanga tšabá o ndoñe tšabá tmonjamama jayanama te, chë Nínive bëts puebloca entšángnaca mochanjotsaye y mochanjayana morsca entsanga ndoñe tšabá tmonjama ca; er chënga, Jonás yojtsabuayinÿenoye ora, tmojanoyeuná y chë tšabe benache tmojtanishache, y chë mora muentše entsemnana, Jonasbiamama más uamaná endmëna ca” —Jesús tojánayana.

Chë cuerpama uajuinÿanésha

(Mt 5.15; 6.22-23)

³³ “Ndocná canÿe uajuinÿanésha juajuinÿenana, canÿe iytémēna luaroye juajájuama, ni canÿe cajonēshe tajsoye, sinó canÿe tsbanana luaroca juajájuama, chca, chë luaroye amashjuanēngbiama chaotsebínÿnama. ³⁴ Acbe bominÿe tšabá totsomñēse, acbe cuerpama mo canÿe uajuinÿanéshacá jtsemnana; chíyeca aca jtsoybenana, ntšamo tcojtsamcá chë bomínÿeca jtsonÿayana. Chë bominÿe ndoñe tšabá tontsemnēsna, chë bominÿe tondaye ntsoybenana jamana, ntšamo tcojtsamcá chacobená jinÿama. Cachcá, acbe ainaniñe tšabe juabnēnga tcojtsebomñēse, lempe ntšamo chacojtsamcá tšabá echántsemna. Y acbe ainaniñe ndocna tšabe juabnēnga tcontsebomñēsna, lempe ntšamo chacojtsamcá ndoñe tšabá queochátsmēna. ³⁵ Cuedado šmochtsebomna, tšēngaftangbe ainaniñe nÿe tšabe juabnēnga chaotsemnama, chca, lempe ntšamo chašmojtsamcá tšabá chaotsemnama, y bacna juabnēnga ndoñe chaondētsemnama. ³⁶ Chcasna, lempe ntšamo šmojtsamcá tšabá tojtsemñēse y ndocna bacna sóyesna, tšēngaftanga bētscá tšabe soyēnga šmochántsama; y chca, tšēngaftanga šmochántsemna mo canÿe uajuinÿanésha puerte tšabá tojtsebinÿnacá ca” —Jesús tojánayana.

Jesús chë fariseungbiama y ley abuátambayēngbiama tojánayana, chēnga ndoñe tšabá montsama ca

(Mt 23.1-36; Mc 12.38-40; Lc 20.45-47)

³⁷ Jesús chca jayanama tojanpochocá ora, chábioye canÿe fariseo tbojanofja chabe yebnoye jauasama. As Jesús tojánamashēngo y meséshentše tojanótbema. ³⁸ Chë fariseo

tojanéuatjaná, Jesús ntsacuentšabiaca jasama yojontsé causa, ndoñe ntšamo chë judiēnga imojanamancá, Bēngbe Bētsabe delante tšábēnga jtsatsmēnama. ³⁹ Pero Bēngbe Utabná tbojaniyana: “Tšēngaftanga fariseunga šmondmēna mo entšangcá ndēmuanÿēnga chë tazēšēnga y šcnenēnga šhoicajana jtsóbojabiana, pero tsoyna nÿe cachcá jonÿayana. Tšēngaftanga becá jtsamana entšangbiama mo tšabēngcá jtšinÿnama; pero tšēngaftangbe ainanentše jútjena entsemna nÿe jtsatbēbanama y bacna soyēnga jtsamama juabnēngaca. ⁴⁰ ¡Juabna ndbomñēnga! Tšēngaftanga ndoñe šmondétatšēmo, chë tšēngaftangbentšana entšanga ndayá jinÿama imobencá tojamá, chë tšēngaftangbe tsoye yomna soyēngnaca tojamama; y chíyeca, chabiama cachcá enduámāna ndayá tšēngaftangbe ainanoye yomna soyēnga, y chë entšangbe delante šmojama soyēnga. ⁴¹ Tšēngaftanga cmontsamna, chë soyēnguiñe ndayá ainaniñe yomnentšana ínÿēngbioye jatsatayana, y chca, lempe ntšamo chašmojtsamcá Bēngbe Bētsabe delante tšabá echántsemna ca.

⁴² “¡Tša lastema tšēngaftangbiama fariseunga! Tšēngaftanga Bēngbe Bētsabiama jtsequēcjnyana chë jajañentša sananga bnētsanentšana canÿe soye nÿetšá, y chë binche matatēmēnguentšana menta, ruda y nÿetsca binche matatemēnguentšánēnaca; pero nÿe batšá jtsamana chë nÿetscanga cachca derechēnga chamotsebomnama y cha jtsebobonshánama. Quem soyēnga cocayé cmontsamna jtsamana, chë inÿe tšabe soyēnga ntjajbanacá ca.

⁴³ “¡Tša lastema tšēngaftangbiama fariseunga! Tšēngaftanga tša jtsebošana chë judiēngbe enefjuana yebnēnguenache chë más uámāna

luarënga jtsebomnama, y benachiñe nña puerte respétoca entsānga chacmotsacheuanayama ca.

⁴⁴“¡Tša lastema tsēngaftangbiamā! Šmondmēna mo obanēnga uatbontsaniñcá, ndoñe ntsinñana, y entsānga ntsetatšēmbcá chiñe jtsebotájayana. Chca šmondmēna, er tsēngaftangbe ainana entsemna jútjena bacna juabnéngaca, pero entsāngbiamā ndoñe chca quešmátinña ca.”

⁴⁵Jesús chca tojánayana ora, canye ley abuatambayá tbojaniana: —Buatēmbayá, chca palabrenga contsoyebuambná ora, bēngbiámna ndoñe tsábá quecátichamo ca.

⁴⁶Pero Jesús tojánayana: —¡Tša lastema tsēngaftangbiámna, chē ley abuátambayēnga! Mo canye entsá, couáybioye canye uauta uasmanēsha tbojuasmá, y chēsha ndoñe yapa chaondētsautama tondaye tontsamcá, tsēngaftanga entsāngbioye jtsaméndayana bētscá mandēnga chamotsocumplínama, pero cach tsēngaftanga ni mo batšatēmnaca jtsamana chē mandēnga jtsocumplínama ca.

⁴⁷“¡Tša lastema tsēngaftangbiamā! Tsēngaftanga jtsamana chē Bēngbe Bētsabe juabna oyeuambnayēnga tempsquēnga bētsētsa entsānga chamotsemnā, chēngbe cuevēshēnga jtsatspórmayēse; pero chē mo chēngcá, canye buayenana sóyeca tmojabēngbioye ndoñe ntsayanana. Y chē tempsquēnga chca oyeuambnayēngbioye tsēngaftangbe bēts taitanga tmojtsanēbaye. ⁴⁸Chca jtsamēse, tsēngaftanga šmontsinñanñá, ntšamo chē bēts taitanga tmojanmcá tsábá yomna ca tsēngaftanga šmojtsejuabnama, er chēnga chē oyeuambnayēngbioye tmojtsanēbaye

y tsēngaftangna chēngbe cuevēshēnga jtsatspórmayana.

⁴⁹“Chíyeca, Bēngbe Bētsá chabe bēts osertanánaca tojánayana: ‘Atše chēngbioye chanjichamuá atšbe juabna oyeuambnayēnga y atšbiamā abuayinayēnga, y báseftangbioye mochantsēbaye y ínñengbioyna mochantsēcamiye ca.’ ⁵⁰Y chca, nñets castigo morsca entsāngbeñe echántsemna, nñetsca Bēngbe Bētsabe juabna oyeuambnayēnga tmojóbanama, Bēngbe Bētsá quem luare tojanma orscana; ⁵¹Abélbioye tbojanóba orscana, Zacarías tmojanóbantscoñe. Zacaríasna Bēngbe Bētsabe bēts yebnentše tmojanóba, altar y chē entsānga Bēngbe Bētsábioye imojánadorana luariñe. Chcasna, Bēngbe Bētsá echanjama chē oyeuambnayēnga tmojanóbanama, morsca entsāngbeñe nñets castigo chaotsemnā ca.

⁵²“¡Tša lastema tsēngaftangbiamā, chē ley abuátambayēnga! Tsēngaftanga jtsamana, Bēngbe Bētsabe soyēngama jtsetatšēmbuama entsāngbiamā yapa totcá chaotsemnā. Cach tsēngaftanga ndoñe quešmátobena chē soyēngama tsábá jtsetatšēmbuana, y chama jtsetatšēmbuama tmojtsebošēngbioyna ndoñe quešmatalesénciaye ca” —Jesús tojánayana.

⁵³Jesús chē soyēnga tojánayanama, chē ley abuátambayēnga y fariseunga puerte tojánētēna, y cha chentšana yojtšaisebocana ora, tmojanontsé chábioye becá tjanayana, y imojtsama ba soyēngama chaóyeuambama, ⁵⁴chca, jisháchichiyama jtsebošēse, cachá ntšamo tojayana sóyeca chēnga jtsebomnama ndáyeca chábioye mal jaquédana.

**Jesús, chë bacna entsanga ntšamo
ndegombre tmojuabnacá
ndinÿinÿnayëngbiana
tojanabuatambá**

12 Chëntscuana, ba uaranga entsanga chentše tmojanójoto; tša entsanga causa, nÿetscanga imojtsenatséntšenaye. Chora Jesús tojanontšé jóyebuambayama, y natsana chabe uatsjëndayëngbioye tojanéyana: “Chë fariseungbe buatëmbana soyëngama cuedado šmochtsebomna, chënga mondmëna bacna entsanga, ntšamo ndegombre tmojuabnacá ndinÿinÿnayënga. Ntšamo chë levadura jamana nÿetsana chauábochema, cachá chëngbe buatëmbana soyëngaca, chë fariseunga montsobena jamana bëtscá entsanga ntšamo ndoñe tšabá tontsemncá chamotsamama. ²Er ndocna yoiytëmena soye, ntjinÿcá queochaisoquéda; y chë ndótatsëmbo soye, ntsotatsëmbcá queochaisoquéda. ³Chíyeca, chë mora nÿe tšëngaftangbiana šmojtsichamo soyënga, chë entsangbiana mo ibetiñcá cuaftsemna soyënga, entsanga chama botamana mochanjátatsëmbona. Y chë iytëcana šmojtsichamo soyënga, nÿetsca entsángbioye mochántسابuayiyay, mo nda canÿe yebnentsá tsbanánocana noticiënga tojtsayebuachcá ca” —cha tojanéyana.

Nda ndegombre cuantsebiauatja

(Mt 10.26-31)

⁴“Tšëngaftanga, atšbe amiguënga, cbochjáuyana: Ndoñe matauatjëngana nÿe chë tšëngaftangbe cuerpo japochócama imobenëngbiana, pero chentšana más jamana ndoñe ntsobenana. ⁵Cbochanjabuayená ndábioye cmojtsamna jtsebiauatjana: šmochtsebiauatja chë nda vida jtسابuajuánama y chentšana infernoye

jtsichámuama obenana endbomnábioye; chábioye cocayé šmochtsebiauatja ca.

⁶“¿Shachna jaja shloftšetëmënga ndoñe nÿe uta denario crocenánama mondbétsena? Pero masque chca, Bëngbe Bëtsá chëngbiana sempre jesenójuabnayana. ⁷Y tšëngaftangbiana Bëngbe Bëtsá lempe endétatsëmbo, y bueta stjënëjënga tšëngaftangbe bestšašine yomnámna. As ndoñe matauatjëngana; tšëngaftanga ba jaja shloftšëngbiana corente más šmonduámna ca” —Jesús tojánayana.

**Ndabiana Jesucristo yochjayana
chabe entšá yomna ca**

(Mt 10.32-33; 12.32; 10.19-20)

⁸“Atšbe cbéyana, nda atšbe entšá yomna ca entsangbe delante tojayanabiama, chë Bëngbe Bëtsá Entšá tbojanbemánaca, Bëngbe Bëtsabe angelëngbe delante echanjayana chë entšá chabia yomna ca; ⁹pero nda entsangbe delante, atšbe entšá ndoñe yondmëna ca tojayanabiama, chë Bëngbe Bëtsá Entšá tbojanbemá, Bëngbe Bëtsabe angelëngbe delante echanjayana, cha chabe entšá ndoñe yondmëna ca.

¹⁰“Bëngbe Bëtsá bochanjaperdóna, nda chë Bëngbe Bëtsá Entšá tbojanbemabiama ndoñe tšabá tontsichamuábioye, pero chë Uámana Espíritbiana ndoñe tšabá tontsichamuábioyna ndoñe.

¹¹“Tšëngaftanga chë judiëngbe enefjuana yebnëngoye, ntšamo entsanga bétsamama ichámëngbioye y mandadëngbioye chacmojunatse ora, ndoñe šmattsenócochinÿena ntšamo o ndáyeca šmochjenéuyanama, o ndayá šmochjayanama; ¹²er chë Uámana Espíritu cmochanjabuayená ntšamo jayanama tojtssemncá, jóyebuambayama chacmojtsamna ora ca” —Jesús tojánayana.

**Entšabiamna resjo yomna, nÿe
yapa bomnana jesejuabayana**

¹³ Chentsana, canÿa entšanguentšá Jesúsbioye tbojaniana: —Buatëmbayá, atšbe catšata momandá chë átšbioye otocana soyënga chašuatoyé ca.

¹⁴ Y Jesús tbojaniana: —Bacó, ¿nda atšbe šojábema tsëndatbe ujetanayá ca?

¹⁵ Y entšángbioye tojanéyana: —Šmochjinÿe y cuedado šmochsebomna chë nÿe yapa soyënga jtsebomnama bošama; er masque bëtsá soyënga chašmotsóbonne, chca ndoñe quešmochátstatšëmbo aïne tšabe vida taišmochjónÿenama ca.

¹⁶ Y chora mëntšá tojanacuntá: “Inamna canÿe bomna entšá, y chabe fshantsënguiñe tša jaja saná yojtsopodena. ¹⁷ Chë bomná chora mëntšá yojtsejuabnaye, ‘¿Y morna, ntšamo chjama? er ndoñe quetsátsbomna ndayentše atšbe jaja saná jtsohocjayama ca.’ ¹⁸ Y mëntšá yojeniana: ‘Chë grano uaquëcjnaye yebnënga chantsendbiama, y inÿe más bëts yebnënga chanjëtšjebo, y chiñe nÿetsca atšbe jaja saná chantsóhocjaye y nÿetsca atšbe soyëgnaca. ¹⁹ Y chora atšbe chjeniana: Bacó, bëtsá soyënga contsehocjana, ba uatama cmochanjuáshjache. Morna, cochjóchna, cochjase, cochjatëmo, cochjóboyejuaye ca.’

²⁰ Pero Bëngbe Bëtsá chábioye ibojauyana: ‘Obëjema, cach quem ibeta cochanjóbona; y asna, chë contsehocjana soye, ¿ndabiamna yochtsemna ca?’”

²¹ Y Jesús chora tojánayana: “Chca endbopása chë nÿe chabiamna bomnana tojtsejuabá y bëtsá Bëngbe Bëtsabe soyënga ndoñe tonjëftsashjacháftaca ca.”

**Bëngbe Bëtsá chabe
básenga jtsanÿenana**

(Mt 6.25-34)

²² Chentsana, Jesús chabe uatsjëndayënga tojanéyana: “Quem soye cbéyana: Ndoñe šmattsenócochinÿena ndayá šmochjase o šmochjofšiyeye vida jtsebomnama, ni ndaye entšayá šmochjuíchëtjuama cach ndoñe. ²³ Ndegombre, vida chë sanama más enduámama y cuerpo chë entšayama más. ²⁴ Chë ftsenga shloftšënga šmochjanÿe: tondaye ntjájena, ni jaja saná ntjátbanana, ni grano uaquëcjnaye yebnënga ntsebomnana; pero Bëngbe Bëtsá chënga saná jtsatšatnayana. ¿Y tšëngaftanga chë ftsenga shloftšëngbiama puerte más šmonduámama! ²⁵ Masque chca endmëna, masque canÿa tša tojesenócochinÿena, ¿ntšamo nanjobenaye jamana, chë ntsachetšá vida yochtsebomnentšana canÿe hora vida más jabotiyana? ²⁶ Chcasna, nÿe chë base soye jamama ndoñe šmontsobenëse, ¿ndayama chë inÿe soyëngama šmochjatenócochinÿena?”

²⁷ “Šmochjuinÿe chë lirio uantšëfjushangá jtsajuajnana: ndoñe ntsetrabájayana, ni ntseshabiamnayana. Pero atšbe cbéyana, ndegombre ni mo rey Salomón, nÿetsca chabe bomnánaca, chë lirio uantšëfjushangacá nÿetšá botamana quenjatspormana. ²⁸ Bëngbe Bëtsá tša botamana shácuaana tojuama, y chë shácuaana mënté jajoca jtsamnana y yëfsana iñoca. Cha chë shácuanaca chca tojamëse, ndegombre tšëngaftangbiámnaca Bëngbe Bëtsá echanjama entšayá chašmotsábomnama, jentšanga Bëngbe Bëtsábeñe nÿe batšá ošbuáchiyënga! ²⁹ Chíyeca, ndoñe šmattsenócochinÿena ndayá jasama o jofšiyama onguayiñe; ³⁰ er chë soyëngama quem luarentša entšanga mondbëtsenocochinÿena, pero

tšëngaftanga ndoñe. Tšëngaftangna canye Taitá šmondpomna, y cha endé-tatšëmbo ndayá cmëjabótama. ³¹Más tšabana, tšëngaftanga šmochtseboše Bëngbe Bëtsá tšëngaftangbe ainaniñe chaotsemándama, y chë cmojtsëjaboto soyënga nÿe šmochanjóyëngacñe ca” —Jesús tojánayana.

Chë celoca bomnana

(Mt 6.19-21)

³²“Ndoñe matauatjëngana atšbe ústonënga, atšbe básefta oveshënga, er Bëngbe Bëtsá tšabá tbonjuínÿnana chabe amëndayana tšëngaftanga jatšatayama. ³³Lempe ntšamo šmobomncá šmochtsatobuiye y chë ujaboténgbiyoe šmochtsatšataye. Mo ndotanguánaye shecna-jiñe crocénana cuafjacjacá, celoca tšabe soyënga šmochjobuajo. Choca ndocna te queochaisopochóca, atbëbanënga choye ndoñe quemochátamashjna jatbëbama, y mejojón ndoñe queochatspochóca; ³⁴er chë ndayentse tšëngaftangbe bomnana tojtsemnentša soyëngama, ainánaca tšëngaftanga šmochántsejuabnaye ca” —Jesús tojánayana.

Bëngbe Utabná yochjésabama jtseprontánana

³⁵“Mo chë oservénënga, chë entsáyá uichétjonënga y uajuinÿyananëshangaca chëngbe nduiño yochtashjanguama cuaftsobatmancá, tšëngaftanga šmochtseprontana Bëngbe Utabná yochjésabama. ³⁶Chca, tšëngaftanga šmochántsemna mo chë oservénënga, tšabe entsáyaca bopormánënga y uajuinÿyananëshangaca chëngbe amëndayá casamentocana yochtashjanguama cuaftsobatmancá; y chca, chë nduiño tojabochembo ora, cachora chë oservénënga jtebiatëfjuama. ³⁷Puerte oyejuayënga chë oservénënga, chë nduiño tojtashjango ora tmojtsefšnënga. Ndegombre cbéyana, chora chë

mandayá sëndorëche echantásnaye, mesëshentse chë oservénënga echanjátbiana, y saná echanjuuatšiyë. ³⁸Puerte oyejuayënga chënga, chë tmojtsefšnënga cha tojtashjango ora, masque tséntseto ora o bínÿanoye. ³⁹Quem soye tšabá chacmësertá: chë yebntšša nduiño, ntseco ora atbëbaná yochjabama tojtsetatšëmbëse, cha ndoñe nanjaleséncia ndocná jushañe chaondbemama, chë yebnoye jtsamashënguama y jtsatbëbama. ⁴⁰Tšëngaftangnaca šmochtseprontana, er chë Bëngbe Bëtsá Entšá tbojanbemá echanjésabo, entsanga chama tondaye tmontsejuabná ora ca” —Jesús tojánayana.

Chë tšabe oservená y chë bacna oservená

(Mt 24.45-51)

⁴¹Pedro, Jesúsbiyoe tbojaniana: —Utabná, ¿chë tconjayana cuento nÿe bëngbiana o nÿetscangbiana yochtsemna ca?

⁴²Y Bëngbe Utabná tbojanjuá: —¿Nda yomna chë oservená, ntšamo chë nduiño tojtsebošcá amá y nÿets juábnaca amá? Cha jtsemnana nda chë nduiño bochjéftsebošhona chë yebnentšënga chaotsanÿenama, y jasama tojtsemna ora chaújuatšema. ⁴³Puerte oyejuayá chë oservená, chë nduiño tojtashjango ora, cha tbojínÿena jtsamëse ntšamo tbojtsemncá. ⁴⁴Ndegombre cbéyana, chë nduiño chábioye bochanjaimpáda nÿetsca chabe soyënga chabotsinÿëñama. ⁴⁵Pero chë oservená, chabe nduiño betseco ndoñe yochantabo ca tojtsejuabná, y tojontsé chë inÿe oservénënga, boyabásenga y shembásenga jtsajantšetayana, becá jtsesana, jofšiyana y jtsótmenana, ⁴⁶cha ndoñe tontsejuabná te y tontsetátšëmbo ora, chabe nduiño echántashjango y puerte jabuache

bochantsecastíga, y echanjama cha jasúfriama chabotsemnama, mo chë Bëngbe Bëtsábeñe ndošbuáchiyënga mochanjasufriacá.

⁴⁷ “Chë oservená, nda tojtsetátšëmbo ndayá chë nduíño tojtsebošama, pero ndoñe tontseprontana y ndoñe tontsobedecena, cha ba soye mochántsetjanja. ⁴⁸ Y chë oservená, ntsetatšëmbcá ntšámnaca tojabuachjuanguá, y chë causa chamotsetjanjama tbojtsemnësna, chana más batšá mochántsetjanja. Nda bëtscá soyënga tmojatštábioye jauyanana, bëtscá soyënga chaoma ca; y nda bëts trabajo tmojabonyébioyna jauyanana, más bëts trabajo chaoma ca.”

**Jesusbe causa, entšángbeñe
más jtsentsjanayana**

(Mt 10.34-36)

⁴⁹ “Atše sënjabo quem luariñe jabojuinñiyama, y itša séntseboše malaye ya ctsangbototjuana! ⁵⁰ Atše šontsemna puerte jasúfriana, y ipuerte ngménaca séntsobátmana chca chaotsemnama! ⁵¹ ¿Tšëngaftanga šmojtsejuabná atše tijabo quem luarentše entšanga natjémbana chamotsiyenama? Ndegombre ndoñe chca queochátmëna; atše sënjabo causa, entšanga más mochántsejtsjanaye. ⁵² Er mëntescana, canye yebnentše, shachnënga ndoñe quemochátenëyeunana, únganga útatbe contra y útata úngangbe contra mochántsemna. ⁵³ Taitá uaquiñabe contra echántsemna, y uaquiñá taitabe contra; bebmá, bembëbe contra, y bembe bebmabe contra; uambén mamá, bebinuabe contra, y bebinuá uambén mamabe contra ca” —cha tojánayana.

**Ndaye tempo yochtsemnama
ntšamo inétsotatšëmbo**

(Mt 16.1-4; Mc 8.11-13)

⁵⁴ Mëntšánaca Jesús entšanga tojanéyana: “Tšëngaftanga, chë jantšetëshënga shinye uenatjémbambanoicana tojóbcnama šmojinye ora šmondbétsichamo ‘echanjuafté ca’, y ndegombre chca jopásana. ⁵⁵ Y tsmoioicana tojtsebínjia orna, tšëngaftanga šmondbétsichamo ‘echanjoñyëna ca’, y ndegombre chca jopásana. ⁵⁶ ¡Bacna entšanga, chë ntšamo ndegombre šmojuabnacá ndinjinñayënga! Ntšamo quem luarentše yochtsemnama, ndayá celoca šmojinñyama tša tšabá šmojtsetatšëmbëse, ¿ndáyeca ndoñe šmontsobena jtsetatšëmbuana ndaye bëts soye quem tempo Bëngbe Bëtsá cmojtšinñanñyama ca?” —Jesús tojánayana.

**Chë uayayáftaca
natjémbana jtënbemana**

(Mt 5.25-26)

⁵⁷ “¿Ndáyeca cach tšëngaftanga ndoñe šmondbéyana ndayá tšabá bëtsemnana? ⁵⁸ Nderado nda tcmoijtse demandá y cabildoye jotsánama cmojtsemna, cabá choye ndáshjango ora, betscó cháftaca cochtenoyántsia. Chca ndóñese, chë demandayá mandádbioye cmochanjúshjango, chë mandadna josticiëngbe cucuatšinë cmochanjáboshjona, y chënga cárceloye cmochanjutame. ⁵⁹ Ndegombre cbéyana, chentšana ndoñe quecochtétsbocna, nyets ndebénana candesopagantscuana ca” —Jesús tojánayana.

Bëngbe Bëtsabe benache jtishachana

13 Cach ora, báseftanga tmojána Jesús jinñyama, y tmojancuentá ndayá chë mandado Pilato tojanmama; chana básefta Galileoca boyabásenga

tojtsanëbaye, y chëngbe buiñe yojenajuabó chë Bëngbe Bëtsábioye jëtschuayama tmojanóba bayëngbe buñeca.

²Y Jesús chënga tojanéyana: “¿Tšëngaftanga šmojtsejuabná, chë Galileoca entšanga chca tmojapasá, chë luarentša inye boyabásengbiana chënga más bacna soye amënga imojamna causa ca? ³Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana. ⁴O, ¿tšëngaftanga šmnétsejuabnaye, chë Jerusalenentša bnétsana posufta entšanga tmojanóbanënga, chë Jerusalenoca binche uafjónaye Siloé béconana tsbanana jebna soye tojtsanáshajaye ora, chënga imojamna chë inyënga Jerusalenentšë oyenëngbiana más bacna soyënga amënga ca? ⁵Ndegombre cbéyana, ndoñe. Y cach tšëngaftanga, bacna soyënga amama ndoñe šmontsajbaná y Bëngbe Bëtsabe benache ndoñe šmontishachëse, tšëngaftángnaca šmochanjóbana ca” —Jesús tojanéyana.

Chë ndëshajona higo betiyama cuento

⁶Jesús mëntšá tojanacuntá jabuátambama: “Canye entšá jajoca canye higo betiye inabomna, y yojá nderado nantse-shájonama, pero tondaye yonjinýena. ⁷Chcasna, chë jajañe bojanýábioye cha ibojauyana: ‘Mouena, ya unga uata tsabó quem higo betiyoye jaborrepárama, nderado nantseshájonama, pero ndocna te tondaye chiyátinyëna; chíyeca, motsetëtše. ¿Ndayama quem jajañe yochját-sjena ca?’ ⁸Pero chë jajañe inýená ibojauyana: ‘Bacó, inye uata cachcá monýá, fshantse chanjáboplojua y uanguanëshe

chanjabotboto. ⁹Nderado chca jamëse, nanjashájona; y ndóñesna, chora cocayé cuantsetëtše ca.”

Jesús canye ochnayté, canye tsëštjona shembásabioye tbojanshná

¹⁰Canye, canye ochnayté Jesús yojontšë entšanga jabuátambana, chë judiëngbe enefjuana yebnentšë, ¹¹y chentšë yojtsemna canye shembása; cha ya bnétsana posufta uata yojtsešoca. Canye bacna bayëja chábeñe tojánamashëngo y chca tseštjoná tbojtsanbema, y tondayama yontsobena jtondiríchana. ¹²Jesús chábioye tbojáninyë ora, tbojanchembo y mëntšá tbojaniyana: “Batá, mora ya ndoñe šocá quecátsmëna ca.”

¹³Chora Jesús chabe cucuatšënga chábeñe tojanjajó, y cachora chë shembása yojtondirícha, y tojanontšë Bëngbe Bëtsábioye jëtschuayama. ¹⁴Pero chë enefjuana yebnentšá mándayana tbojánëtna, Jesús chë shembása ochnayté tbojanshnama, y entšanga tojanéyana: —Chnénguana te comna jatrabájama; chora šmochjabo jenóshnama; ochnaytese ndoñe ca.

¹⁵Y Bëngbe Utabná tbojanjuá: —¡Bacna entšanga, ntšamo ndegombre šmojuabnacá ndinýinýayënga! ¿Tšëngaftanguentšá ndocná chë ochnayté chabe uacná o chabe burrotema buanjuajafjoná, juanatsama béjaye chaofšema? ¹⁶Chcasna, quem shembása, canya Abrahábentšana entšá, y Satanasbe causa bnétsana posufta uata šocá yojtsemna, ¿ndoñe tšabá yondmëna canye ochnayté chë bayëja jtsebojuánana ca?

¹⁷Jesús chca tojánayana ora, chabe uayayënga imojtsëuatja, y nyëtsca entšanga imojtsóyejuaye Jesús tša bëts soyënga yojtsamama.

Chë mostaziye jenayama cuento

(Mt 13.31-32; Mc 4.30-32)

¹⁸ Jesús mëntšánaca tojánayana: “¿Ndayacá Bëngbe Bëtsabe amëndayana yomna, o ndaye sóyeca nanjopódia chama jábuayenana ca? ¹⁹ Endmëna mo canye mostaza jénaye, canye entšá jajañe tojajecá; chiyna jójuana y canye bëts betiye jóbemana; tša bëtsashe jóbemana, chíyeca chë jaja shloftšënga chë buacuashënguñe uajajonëtemëngá jauábopormana ca.”

Chë levadurama cuento

(Mt 13.33)

²⁰ Mëntšánaca Jesús tojánayana: “¿Ndaye sóyeca chjobenaye Bëngbe Bëtsabe amëndayama jábuayenama ca? ²¹ Endmëna mo levadurcá; canye shembása chana jenájuabana unga medida arninyañe, nyetsana chauabochama ca.”

Chë base utëntšá bëshása

(Mt 7.13-14, 21-23)

²² Jerusalenoye benache, Jesús entšanga yojsabuátambaye bëts publënguñe y base pueblotëmënguñe. ²³ Canya chábioye tbojantjá: —Bëngbe Utabná, ¿nye báseftanga imomna chë atsebácanënga mochtsemnënga ca?

Y Jesús tbojanjuá: ²⁴ —Puerte šmochtsentšëna chë base utëntšá bëshásajana jamashjnama; er ndegombre cbéyana, banga mochántseboše chëjana jamashjnama, pero ndoñe quemochatobenaye. ²⁵ Chë yebnentša nduiño chaojtsbaná y chë bëshása chaojtatámentšana, tšëngaftanga chë shjoca chašmojtsemnënga, šmochántsechembuana, mëntšá jtsichámëse: “Utabná, šmebëtafjo ca.” Pero cha cmochanjáuyana, “Atše ndoñe quetsátstatšëmbo ndëmoquënga tšëngaftanga šmomnama ca.” ²⁶ Chora

tšëngaftanga šmochanjontšë ichámuana: “Acaftaca cányiñe fsënjase y fsënjofšë, y aca bëngbe tsáshënañe tconjabuatambá ca.” ²⁷ Pero cha cmochanjójuaye: “Ya tcbonjáuyana, ndëmoquënga šmomnama ndoñe tstatšëmbo ca. ¡Atšbentšana mojuánanga, bacna soyënga amënga ca!

²⁸ “Chora chentše puerte šmochanjenóbošachna y tsetšanama juatsašënga šmochantsenoftéšjojnaye, Abraham, Isaac, Jacob y nyetscanga Bëngbe Bëtsabe juabna oyebuambnayënga Bëngbe Bëtsabe amëndayoca imojtsemnama chašmojinye ora, y tšëngaftanga chentšana cmochtëbuacanama. ²⁹ Y shinye bocanoicana y uenatjëmbambanoicana, tsmanoicana y tsjuanoicana entšanga mochanjabo y juasama mochanjotbiama Bëngbe Bëtsabe amëndayentše. ³⁰ Y banga mora nduámanënga imomnënga, chora uámanënga mochántsemna; y banga mora uámanënga imomnënga, chora nduámanënga mochántsemna ca” —Jesús tojánayana.

Jesús tbojanongmé Jerusalentša entšangbiana

(Mt 23.37-39)

³¹ Jesús chë soyënga tojanéyana ora, básefta fariseunga tmojánashjajna y tmojaniana: —Muentšana motsatoñe; Herodes entseboše aca jtsóbama ca.

³² Y Jesús tojanéjua: —Motsajna y šmochjauyana chë corente studio bomná, mo tjañe mesetcá: “Minye, mënté y yëfse entšangbentšana bacna bayëjënga sëndëtëbuacana y šoquënga sëndáshnaye, y baseftaytesna chanjapochóca ca.” ³³ Pero atše šontsemna mënté y yëfse jtsayana, y baseftaytesna Jerusalenoye jana, er ndoñe tsábá ntsemnana canya Bëngbe Bëtsabe juabna oyebuambnayá Jerusalentša chábuañe chaóbana ca.

³⁴ “¿Jerusalenentša entšanga, Jerusalenentša entšanga, tšëngaftanga chë Bëngbe Bëtsabe juabna oyebuambnayënga jtsëbáyana, y chë Bëngbe Bëtsabe ichmónëngbioye ndëtsbéngaca jtsatëchénganjana jtsëbáyama! ¿Bueta soye atše sënjábošena tšëngaftanga átšbioye júbuajama, mo canye tuamba chabe bolletotémënga juatëngmiášha tajsoye cuaftajayecá, pero tšëngaftanga ndoñe chešmátsbošena! ³⁵ Y šmochjinýe, mora atše cachcá cbochanjesénýaye, y chca, atšna enánanga cbochanjésabashejuana, mo canye yebna cachcá tcojesonýa y énañe tcojeseboshjoncá. Y ndegombre, tšëngaftanga morscana ndoñe más atše quešmochátinýe; y atše šmochántinýe, chë: ‘¿Corente bendición bomná, Bëngbe Utabnabe obenánaca tojabá ca!’ chašmojtsichamo ora ca” —Jesús tojánayana.

Jesús, canye uafshachanánaca šocábioye tbojanshná

14 Canye ochnayté, Jesús tojána jasama fariseungbe canye amëndayabe yebnoye; y chë fariseunga yejuana imojtserreparana, er ndayá Jesús nanjama. ² Chéntšnaca, chabe delante yojtsemna canye entšá uafshachanánaca šocá. ³ As Jesús chë ley abuátambayënga y fariseunga tojanatjá: “¿Quenlesenciana canye ochnayté canye šocá jáshnama o ndoñe ca?”

⁴ Chëngna ndocá tmonjanjuá. As Jesús chë šocábioye tbojánishache, tbojanshná y tbojaniana chaotsatoñe ca. ⁵ Y chë fariseunga tojanéyana: “¿Nda tšëngaftanguentshá, nderado chabe uaquiná o uacná canye tboye tojtsótsatše, cachora ndoñe nanjá jetsejátsécama, masque ochnayté totsomñëse ca?”

⁶ Y chëngna ndocá tmonjanobená cha jojuana.

Chë casamentoye ófjanënga

⁷ Jesús tojáninýe ntšamo chë ófjanënga quëfseroye imojtsachnéjuana jotbiamama; as mentsá chënga tojanabuayená: ⁸ “Canye casamentama nda chacmojojfa ora, quëfseroca ndoñe catjót'bema, er nderado inýe ofjaná acbiamama más uamaná ústonoye nandaboye; ⁹ y nderado chë tsëndatbe ofjajaná nanjabo y cmajtayuyana: ‘Mua chentše chaótbema, maluaré ca’, y chora cmajtótoca ouatjentše chafjoca jana jatótbemana. ¹⁰ Chamna, nda chacmojojfa ora, chafjoca cochjót'bema, chca, chë ofjajaná chaojabo ora chacmëyana: ‘Taita, quëfseroye motsëchnéngoñe ca’. Y chca, aca chë chentše tmojtsetbiámanëngbiama uamaná cochántsemna. ¹¹ Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, aiñe bëtsá mochanjábema ca.”

¹² Y chë tbojanofja entšábioynaca Jesús mentsá tbojaniana: “Fiesta chacojama o sananga chacojtsebomna ora, ndoñe cattsëbuájajana acbe amiguënga, catsátanga, ni pamíllanga, ni acbe juachañe oyenënga bomnënga; er chëngnaca, fiesta chamojtsebomna ora, aca cmochantét'ofja, y chca ya acbe uacanana soye cochántsebomna. ¹³ Chamna, canye fiesta chacojama ora, cochjúbuaja ndbomnjémënga, jama ndobenënga, coshetënga y jtanënga, ¹⁴ y aca corente oyejuayá cochántsemna; er chënga ndoñe quemochatobenaye cachcá aca jtét'ofjana, pero acna acbe uacanana soye cochántsebomna, chë Bëngbe Bëtsabe bominiñe tšábënga imomnënga chamojtayena ora ca” —cha tbojaniana.

Chë bëts sanama cuento

(Mt 22.1-10)

¹⁵ Chca tojanuena ora, canya chë mesëshentše tbemaná tojánayana: — ¡Puerte oyejuayá echántsemna Bëngbe Bëtsabe amëndayoca juasama chaojtsemná ca!

¹⁶ Chora Jesús tbojaniyana: —Canye bacó canye bëts saná vojapróna y ba entsanga vojúbuaja. ¹⁷ Juasama ya vojobuache ora, canye oservená ibojíchmua chë ófjanënga jáuyanama chamotsajna, ya lempe yojtseprontana ca. ¹⁸ Pero chorna nyetscanga imojontsé jtsoyátšëmbuana. Canya vojayana: “Cabá mora canye fshantse sënjobuámiñe, y šontsemna jana jarrepárama. Chcasna, aslëpaye šmotsepacenciá ca.” ¹⁹ Inya vojayana: “Bnëtsana toronga sënjobuámiñe, y šontsemna jana jányama, járama taimochjosérvia. Chcasna, aslëpaye šmotsepacenciá ca.” ²⁰ Y inya vojayana: “Cabá mora sentsobouamá, y chë causa, ndoñe quichatobenaye jama ca.” ²¹ Chora chë oservená yojesshécona y lempe chabe nduñbiöye ibojauenaye. Chë nduiño tša ibojtsetna, y chë oservenábiöye ibojauyana: “Cam ora motsa tsashenangoye y benachëngoye, y moye cochjunatse ndbomñëmënga, jama ndobenënga, jtanënga y coshetënga ca.” ²² Chentša bënëntscose, chë oservená chë nduñbiöye ibojauyana: “Bacó, ya sënjama ntšamo šconjamandacá, y cabá ínÿengbiama luare entsemna ca.” ²³ As chë nduiño ibojauyana: “Motsa benachëngoye y betiyetemëngaca jetjaniñëngoye, y entsanga cochjautári-aye moye chamuábama, atšbe yebna chaojutjiama; ²⁴ er ndegombre cbëyana, chë natsana sënjobuajënguentsá ndocná atšbe saná queochatsse ca.”

Ntšamo yomna Cristbe ustoná jtsemnama

(Mt 10.37-38)

²⁵ Mallajta entsanga Jesús imojtséstona; as cha tojanobuértana y tojanéyana: ²⁶ “Nderado nda átšbiöye tojabo, y ntšamo chabe taitá, chabe mamá, chabe shema, chabe básenga, chabe catšátanga y uabénanga tuababuánÿeshanama, y ntšamo cachá tuenobobonshánama, atše ndoñe más corente šontsebobonshánëse, cha ndoñe ntso benana atšbe uatsjendayá jtsemnana. ²⁷ Y nda, atšbiama ndoñe tontseprontana jasúfriama y cruciñe jobanámnaca, y nyetsca chabe quem luare soyënga ndoñe tonjëseboshjona atše juastama, cha ndoñe ntso benana atšbe uatsjendayá jtsemnama.

²⁸ “Nderado nda tšëngaftanguentsá tojtsejuabná canye tsbanana jebna soye japórmama, ¿cha natsana ndoñe nanjót bema jinÿama ntsachetšá crocénana chentše yochjuába, y japochócama nyetšá crocénana tayojtsebo mnama? ²⁹ Chca ndóñese, nderado chë uajatsana ucuatjoniñe tojapormá y lempe jajebuama ndoñe tonjobenase, nyetscanga chca tmojinÿënga, muantsáfchaye y mëntšá muantsichamo: ³⁰ ‘Quemëjema jajebuama tonjontšë, y japochócama ndoñe chenatobená ca.’

³¹ “O ¿ndaye rey inÿe réyefraca jénts-jama tbojotocase, natsana ndoñe nanjót bema jajuaboyama, nderado nanjobenaye bnëtsana uaranga soldadëngaftaca chë ínÿabiöye jayëñjanana, chë inÿa uta bnëtsana uaranga soldadëngaftaca tojtsabose? ³² Y ndóñesna, chë inÿe rey cabá bënoca tojtsemna ora, básëfta entsanga echanjichamuá, cha jauyanama más tšabá yomna ndoñe jantsjanayana ca.

³³“Chcasna, ndánaca tšën-
gaftanguentsá, lempe ntšamo tobomná
ndoñe cachcá tonjesonjá, cha
ndoñe ntsobenana atšbe uatsjendayá
jtsemnama ca” —Jesús tojánayana.

Chë tamó fténana tojtsebocna ora

(Mt 5.13; Mc 9.50)

³⁴“Tamó tšabe soye endmëna;
pero chë tamó fténana tojtsóbemëse,
tšëngaftanga ndoñe quešmátobena
jamana tempcá sanana cachiñe chaot-
satsmënana, ni saná jatamuama. Chë
ftena tamó tondayama ntsoservénana,
cachcá, chë atšbe uatsjendayënga
jtsemnama tmojtsebošënga, pero lempe
jéseboshjonama ndoñe tmontseboše,
cach ndoñe chama ntsoservénana.
³⁵Chë ftena tamó ndoñe ntsoservénana
ni fshantsama, ni uanguanëshama.
Nye jtsëtšenana. Chë jouenama
tmojtsobenënga, šmochjouena ca”
—Jesús tojánayana.

Chë ótšena oveshabiana cuento

(Mt 18.10-14)

15 Nýetsca chë Romocama impuesto
entšángbioye atjanayënga y inýe
bacna soyënga amënga, Jesúsbioye imo-
jánajna chabe palabra jouenama; ²y chë
fariseunga y ley abuátambayënga chama
Jesusbiana podessa imojtsoyebuambná,
mëntšá: —Mua bacna soyënga amén-
gaftaca entsenuta y chëngaftaca entsesá
ca.

³As Jesús mëntšá tojanacuntá,
chënga jabuátambama: ⁴—¿Nda
tšëngaftanguentsá, canýe patse
oveshënga tojtsabamna, y canýa
tbojtsobuétšëse, chë inýe esconëfta
bnétsana y esconëfta oveshënga
shëntsjañe ndoñe cachcá nanjesénýaye,
y nanjá chë otšená jetsenguanguama
candëtsónýeñëntscuana? ⁵Y
tbojtsinýena ora, oyejuayá chë
oveshá jesotantšájuana; ⁶y yebnoye

tojtashjango orna, chabe amiguënga
y juachañe oyenënga jáchembuana
y mëntšá jáuyanana: “Atšeftaca
móyejuanga, er chë sentsanobuetše
oveshá séntsinýena ca.” ⁷Atše cbéyana,
cachcá, celócnaca más oyejuayana
jtsebínýana, canýe bacna soyënga
amá tšabe benache tojtishachabiana, y
ndoñe nýa yapa, esconëfta bnétsana y
esconëfta tšabe soyënga amëngbiana,
chë ndoñe yondujaboto bacna soyënga
amana jtsajbanana ca.

Chë crocénana tojetsónýena shembásabiana cuento

⁸“O mëntšá, ¿ndëmua shembása,
bnétsana uámana crocénana
tojtsebomna y cánýana tojtsobuétšëse,
chora ndoñe canýe uajuinýanëshá
nanjuajuinýená, y cuedádoca chë
yebna nantsetsjajo y botamana
chë crocénana nantsenguango
candëtsónýeñëntscuana? ⁹Y tojtsinýena
ora, chabe amiguënga y juachañe oyena
shembásenga jáchembuana, y mëntšá
jáuyanana: ‘Atšeftaca móyejuanga,
er chë sentsanobuetše crocénana
séntsinýena ca.’ ¹⁰Atše cbéyana, cachcá,
chë Bëngbe Bëtsabe angelotëmëngbeñe
oyejuayana jtsebínýana, nýe canýe
bacna soyënga amá chë tšabe
benache tojtishachabiana ca” —Jesús
tojánayana.

Chë uaqiñá bacna benachiñe ayá

¹¹Jesús mëntšánaca tojanacuntá:
“Canýe entšá uta uaqiñata
yojánabamna; ¹²y canýe, chë
ngomënche uaqiñá chabe taitábioye
ibojuayana: ‘Taita, atšbe otocana
soyënga šmatatšetá ca.’ As chë befta
lempe chë uta uaqiñata yojtjéataye.

¹³“Chentsána baseftaytesna, chë
más bobontse uaqiñá lempe ntšamo
ibojobuachcá yojtsatobuiye y chë
crocénánaca bën luaroye yojtsoñe, y

choca, cha n̄ye nt̄samo ibojocochēngcá, mocá yojenobuiye, y chca, lempe yojtsepochóca. ¹⁴Lempe crocénana yojtsoshañe orna, bēts shēntsana chē luarentše yojóshjango, y chē causa cha ibojotóca shēntseca jtsejétanana. ¹⁵As, cha yojá trabajo jonguangoñama y yojñyena chē luarentša canye entšábentše; chana, chabe jajoye ibojíchmua cotsēnga jtsanyenama. ¹⁶Chē bobontsna yojtseboše chē cotšbe saná jtsesana, pero ndocná tondaye ibonjanájuatšnyae.

¹⁷“Cabana, botamana yojin̄ye nt̄samo yojtsepasacá, y mēntšá yojenójuaboye: ‘¡Bueta trabájayēnga atšbe taitabe yebnentše bētsacá saná mondētsóbonm̄ne, y atše muentše shēntsama chanjóbana ca! ¹⁸Chantá atšbe taitabe yebnoye y mēntšá cha chanjauyana: Taita, šmotseperdoná. Atše tijama ndayá Bēngbe Bētsá ndoñe yondbošcá, y nt̄samo aca ndoñe condbošcá. ¹⁹Mora ya mercedo taitatobuajoñe acbe uaquiñá jtsabáinama; n̄ye canye acbe trabajayacá Diosmanda šmatofja ca.’ ²⁰Chca jēftsenójuaboyēse, yojontšé cachabe yebnoye jtana.

“Cabá bēnoca yojtsemna ora, chabe taitá chábioye ibojin̄ye, y chabe uaquiñabiama ibojóngmia, y jajébenguama betscó yojá; ibojajebengo, ibojtotsejjuá y tša yojtsóyejuayayama chē uaquiñábioye ibojtámochó. ²¹Chora chē uaquiñá ibojauyana: ‘Taita, šmotseperdoná. Atše tijama ndayá Bēngbe Bētsá ndoñe yondbošcá, y nt̄samo aca ndoñe condbošcá; mora ya mercedo taitatobuajoñe acbe uaquiñá jtsabáinama ca.’ ²²Pero chē Taitana chabe oservénēnga yojámēndaye: ‘Betscó chē más tšabe entšayá mauaca y matspormanga, montšabuechētjo y matsshecochētjo. ²³Mora chē más min̄yica uacná šmochjuánatse y šmochjášbua. ¡Mochjase y

mochjóboyejuaye ca! ²⁴Quem atšbe uaquiñá mo obanacá endánmēna y mora bēnga montsetátšēmo cha ainá yotsomñama. Quem atšbe uaquiñá mo otšenacá endánmēna y mora tmontsin̄yena ca.’ Y chentšana imojontšé joboyeuayama.

²⁵“Chē yebnoca fiesta yojtsemnēntscuana, chē mayor uaquiñana jajoca inētsomñe. Yebnoye yojtsataye y ya bēconana yojtsemna orna, cha yojouena imojtsabuastoye y imojtselántsaye. ²⁶As chora cha canye oservenábioye ibojachembo y mēntšá ibojatjaye: ‘¿Ndayá bēngbe yebnentše yojtsopasana ca?’

²⁷“As chē oservená ibojajuá: ‘Acbe uabentsá tontashjango y chama acbe taitá šonjutarié chē más min̄yica uacná jáshbuama, cha tšabá tojtashjanguama ca.’ ²⁸Pero chē uabóchena catšatna corente ibojtsetna y ndoñe yontseboše tsoye jtamashēnguana. As cach befta yojábocna chē catšátbioye jaimpádama chauatamashēnguana. ²⁹Chora cha chē taitábioye ibojauyana: ‘Taita, aca condétatšēmo bueta uata cbetsajabuáchanama, n̄yets tempo cbetseyeunanama, pero ndocna te ni mo canye chivotema chešcaisatšá atšbe amiguéngaftaca joboyeuayama. ³⁰Y masna, acbe uaquiñá chē bacna vida bomna shembásengaftaca acbe crocénana pochocayá tojtashjango ora, chē más min̄yica uacná chabiama tcojášbua ca’ —chē uaquiñá ibojauyana.

³¹“Chora chē befta ibojajuá: ‘Atšbe uaquiñá, aca sempre átšeftaca condétsemna y lempe nt̄samo atše tsbomncá acbiámnaca endmēna. ³²Pero mora tšabá entsemna joboyeuayama y joyeuayēngama; er acbe uabentsá mo obanacá endánmēna, y mora bēnga montsetátšēmo cha ainá yotsomñama;

mo otšenacá endánmëna, y mora tmontsinÿena ca.”

**Chë nduiñbe ndoñe tšabe
uajabuachanábiama cuento**

16 Jesús mëntšánaca chabe uatsjédayënga tojanacuntá: “Inamna canÿe bomna entsá, y cha ibnabomna canÿe uajabuachaná chabe soyënga chaotsinÿenama; y chë nduiño imojuenaye chë uajabuachaná chabe soyëngaca ndoñe tšabá yontsamama. ²Asna, chë nduiño ibojachembo y mëntšá ibojauyana: ‘¿Ntšamo acbiama šmotsatsëtsnacá ndegombre yojtsemna ca? Mora cuenta šmatatštá ntšamo atšbe soyëngaca tcojamama, er morscana ya ndoñe atšbe soyënga inÿená quecochátsmëna ca.’ ³Chë uajabuachaná yojontsé jenójuaboyana, y mëntšá yojeniyana: ‘¿Y mora ntšamo chtsemana, chë nduiño atšbe trabajuentšana šojtabocna ora? Ndoñe añemo quetsátsbomna fshantse jatrabájama, y lemošna jótjañamna sentsëuatja. ⁴Ya sentsëtatšëmbo ndayá chjama, chca, atšbe trabajuentšana chašojtábocna ora, atšbe jtsabamnama ndëmuanÿenga chëngbe yebnentšë chašmofjama ca.’

⁵“Chentšana, canÿánÿa chë chabe nduiñbioye ndebëñënga yojáchembo. Cánÿabioye ibojatjaye: ‘¿Ntsachetšá atšbe nduiño icondebena ca?’ ⁶Y cha ibojojuá: ‘Canÿe patse barrilëšangá aceitiye ca.’ As cha ibojauyana: ‘Muentšë acbe recibécha entsamna; mora mótbema y inÿácha nÿe shachna bnëtsana barrilëšangama matapormá ca.’ ⁷Chentšana inÿabioye ibojatjaye: ‘Y acna, ¿Ntsachetšá icondebena ca?’ Y cha ibojojuá: ‘Canÿe patse medida trigo ca.’ As cha ibojauyana: ‘Muentšë acbe recibécha entsamna; chiñe nÿe posufta bnëtsanama mábema ca.’ ⁸Chentšana, chë nduiño tšabá yojayana

chë ndoñe tšabá ama mayordombiama, cha stúdioca yojamama. Chë nÿe quem luarama enójuabnaye entsanga, cachëngbe soyëngaca puerte studio bomnënga mondmëna; y chë entsangbe juabnënga binÿnayábenga ndoñe nÿa yapa ca.

⁹“Atšë cbaruayená, quem luarentšë, chë bacna soyënga amëngbe luarentša bomnánaca amiguënga šmochjábíama, inÿenga jtsëjabuáchanëse. Chca, chë bomnana tojtšopochocá ora chašmotsabamna ndëmuanÿenga chë nÿetsca tescama oyenoye chacmúbuajama ca.

¹⁰“Nda básefta soyënguiñe lempe tšabá tojama, bëtscá soyënguiñnaca lempe tšabá echanjama; y nda básefta soyënguiñe ndoñe tšabá tonjama, bëtscá soyënguiñnaca cach ndoñe tšabá queochatsma. ¹¹Chcasna, quem luarentšë, chë bacna soyënga amëngbe luarentša bomnánaca ndoñe tšabá šmonjamëse, ¿nda chë ndegombre bomnana, chë Bëngbe Bëtsabe soyënga cmochjábanÿiye? ¹²Y chë ndoñe tšëngaftangbe sóyeca ndoñe tšabá šmonjamëse, ¿nda cmochjantšabuáchiye ndayá tšëngaftangbiama yomncá ca?

¹³“Ndocná ntsobenana uta mandayata jtsaservénana; er cánÿabioye bochantšáboyënja y chë inÿabioyna bochantšebobonshana, o cánÿabiama tšabá echántsetrabajaye, y chë inÿabiamna ndoñe tšabá. Ndoñe quecátobena Bëngbe Bëtsá jtsebobonshánana, nÿe quem luarentša soyënga jtsebomnama tcojtsebošëse ca” —Jesús tojánayana.

¹⁴Chë fariseunga, becá crocénana jtsebomnama bošënga immamna, lempe chca chënga tmojanuena, y Jesúsbioye imojtsáboyejuana. ¹⁵As Jesús tojanëyana: “Tšëngaftanga entsangbe delante mo tšábenga

cuaftsemncá jtsenobiamnayana, pero Bëngbe Bëtsá endétatšëmbo ndayá tšëngaftangbe ainaniñe yomnama; er ndayá entsānga más tojtsebošcá, Bëngbe Bëtsá jtsáboyënjana ca.

Moisesbe ley y Bëngbe Bëtsabe amëndayana

¹⁶“Moisesbe ley y chë Bëngbe Bëtsabe juabna oyebuambnayënga tšëngaftanga cmonjanabuayiná, Juan chë Ubayaná quem luaroye tonjánabëntscuana. Cha tonjánabo orscana montsabuyayiná chë tšabe noticiënga Bëngbe Bëtsabe amëndayocama, y nyetscanga tša montseboše choye jamashënguama ca.

¹⁷“Más paselo endmëna, celoca y quem luare chaopochocá, y ndoñe chë ntšamo leyinë iuayancá, chë ndayá jopásama yomnama, ni mo canye punto ndoñe chca chaondëtsemnama ca” — Jesús tojánayana.

Ndayá Jesús tojanabuatambá chë bouamnënga tmojtšenëtšenama

(Mt 19.1-12; Mc 10.1-12)

¹⁸“Nda chabe shëmbioye cachcá tbojesonýa y ínÿaftaca tojtóbouamase, cha chë natsana shëmbioye ínÿaftaca jtseíngñayana; y nda chë útšena shembásaftaca tojobouamá chana, canye uabuatmá jtsebomnana, y chca, chana canye bacna soye jtsamana ca” — Jesús tojánayana.

Chë bomná y chë ndbomnjëma Lázaro

¹⁹“Canye bomna entsá inamna; cha yojanamana uámana y botamana shbuenda uafjatsenga y lino entsāyangá jtichëtjuana, y cada te bëts fiestënga yojánama. ²⁰Canye ndbomnjëmnaca inamna, Lázaro ca uabainá, bacna nguayanánaca šocá; y cha yojanamana chë bomnabe bëšásentše fshantsiñe jótbemana.

²¹Quem ndbomnjëma yojtseboše chë bomná yojtsesayentšana yojatquëcjana sanāngaca jtoshachayana; y chë quešënga innaboye chabe nguaye cuerpo jajáfuama. ²²Canye te Lázaro yojtsóbana, y Bëngbe Bëtsabe angelënga Abrahámioye cha imojtamba, chë nyetscanga oyejuayënga mondmëna luaroye. Chë bomnánaca yojóbana y imojuábtontsa.

²³“Chë bomná infiernoca puerta ngmëniñe yojtsesufrina ora, tsbanánoye yojontješiyë y bënoca Abraham ibojinýe, y Lázaro cháftaca yojtsemna. ²⁴As chë bomná yojuyebuáchena: ‘¡Taita Abraham, šmolastemá! Lázaro michmó chabe ntšabuafja chaofchecuacuá y atšbe bichtaja chauabofchecuacuaye, er quem íñeshoca tša séntsesufrina ca.’ ²⁵Pero Abraham ibojauyana: ‘Uaquiná, menojuabó, aca fshantsoca vida conjánbomna ora, lempe ntšamo icojabošcá tconjanóyëngacñe, y Lázaro chë cuenta tondaye quenjátsbomna; pero morna, cha tšabá y oyejuayá entsemna, y aca jabuache ngmënanana contsebomna. ²⁶Y inýe soye, canye bëts tbuañe entsemna tšëngaftangbiocana méntscöñe; chca, chë tšëngaftangbioye muentšana jenachnënguama tmojtsebošënga ndoñe chamondëtsoyena, ni chocana bëngbioye cach ndoñe ca.’

²⁷“Y chë bomná ibojauyana: ‘Masque chca, Taita Abraham, Diosmanda Lázaro michmó atšbe taitabe yebnoye; ²⁸choca sëndábamna shachna catsátanga; as chaúyana ntšamo moca atše stsepasana y ntšamo jamëse chënga ndoñe chaondëtšamna quem ngmëñënga luaroye jabama ca.’ ²⁹Chora Abraham ibojauyana: ‘Chënga ya mondbomna ndayá Moisés y chë Bëngbe Bëtsabe juabna oyebuambnayënga tmojëftsánábema soyënga; ¡chéngbioye chamoyauaná ca!’

³⁰Chë bomná ibojujá: ‘Ndoñe, Taita Abraham; nderado obanënguentšana canya chëngbiye tojase, añe chë tšabe benache muantishache ca.’

³¹Pero Abraham ibojauyana: ‘Chënga ni mo Moisés, ni chë Bëngbe Bëtsabe juabna oyebuambnayëngbiye ndoñe tmonjóyunase, Bëngbe Bëtsabeñe ndoñe quemochatošbuáchiye, masque canye obaná chauatayenëse, chëngbiye jábuayenama ca’” —Jesús tojancuentá.

**Resjo yomna, nderado
bacna soyënga cuanjama**

(Mt 18.6-7, 21-22; Mc 9.42)

17 Jesús chabe uatsjëndayënga tojanéyana: “Sempre echanjéftsemna juabnënga bacna soyënga jamama; pero, itša lastema chë entšabiama ndabe causa ínÿenga bacna soyënga tmojama! ²Más tšabá chabiama nántsemna canye nantsnëbé chamotsetamošéntšbua y mar béjayoye chamotsashbuetše, y ndoñe chë canya Bëngbe Bëtsabeñe ošbuachiyá bacna soye chaomama juanatsana. ³Cuedado šmochtsebmna.

“Acbe catšata bacna soye tojamëse, cochjuácacana; y yochtsajbaná ca cha tojayanëse, cochtseperdóna. ⁴Masque nÿe canye te, canÿsëfta soye ntšám-naca tmojaborlá, y canÿsëfta soye ‘chca ndoñe más quebochatsbórla ca’ tmojauyanëse, aca cmontsemna cha jtmojauyanana ca’” —Jesús tojánayana.

**Bëngbe Bëtsabeñe jtsošbuáchiyëse,
corente obenana jtsebomnana**

⁵Chë uatsjëndayënga Bëngbe Utabnábiye tmojanianana: —Ošbuáchiyana šmababuaté ca.

⁶Y chë Utabná tojanéjua: —Tšëngaftanga ošbuáchiyana, batsatema masque nÿe mo mostaza jenaycá šmojtsebmne, quem sicomoro betiyoye šmatjauyana: “quemuentšana

mojashtse y mar béjayoca mojé ca”, y quem betiye chca nanjama ca.

Chë oservená ndayá ibomna jamana

⁷“Nderado canya tšëngaftanguentšá canye bochichnayá tbojtsebmna, cha jajocana tojtashjango jajañe arayocana o uacnënga anÿenocana, ¿chábioye bochjauyana: ‘Matabo y mabose ca?’ ⁸Ndoñe, chamna mëntšá bochanjauyana: ‘Jetiñe juasama cochjuábua, y moprontá atše jasérviam a atše candëse y candofšentscuana; y chentšana aca cochjase y cochjofsiye ca.’ ⁹Y chë bochichnayábiye ndoñe quebochtétschuaye ndayá tbojuatarieca cha tojamama. ¹⁰Tšëngaftángnaca cachcá, lempe ntšamo Bëngbe Bëtsá tmojutarieca chašmojama ora, cmontsamna jayanana: ‘Nduám ana oservëngnga fsëndmëna; er nÿe ntšamo jamama šuamncá tifjama ca’” —Jesús tojánayana.

**Jesús, bnëtsanënga bacna
nguayanánaca šoquënga tojanashná**

¹¹Jerusalenoye benache, Jesús tojánachnëngo Samaria y Galilea luarëjana. ¹²Y canye pueblotémoye tojánashjango ora, bnëtsana boyabásenga bacna nguayanánaca šoquënga chábioye tmojána; chábentšana bënoca chënga tmojanoquedá, ¹³y mëntšá imojtsáyebuache: —¡Jesús, Buatëmbayá, šmot-salastemá ca!

¹⁴Jesús chënga tojánanye ora, tojanéyana: —Jerusalenoca bachnángbiye motsajna, y chënga šmochjínÿanÿiye tšëngaftanga mora ndëšoquënga šmojtsemnana ca.

Y tojanopasá, chë bnëtsanënga cabá imojétsayëntscuana, ya shnánënga imojtoquédaye. ¹⁵Canya chënguentšá, shnaná yojtsemnana tojáninÿe ora, yojeshécona Bëngbe Bëtsábiye jabuache atschuanaye; ¹⁶y Jesusbe

delante yojoshentsamentšiyē, jubiaca fshantsóntscoñe yojotsejbéna, y chábioye ibojtsatschuanaye; y chë boyabásana Samarioca entsá inamna.

¹⁷ Chora Jesús tbojanियana: — Bnétsanēnga mondmēna chë shnánēnga tmontoquedanga. ¿Ndayentšē chë inye esconéftanga imojtsemna? ¹⁸ ¿Nye quem boyabása, inye luarocana ashjanganó, tojeshhécona Bēngbe Bētsá jētschuayama? ¿Ndáyeca chë ínýenga ndoñe ca?

¹⁹ Y chë entsábioye tbojanियana: — Matétsbaná y motsatoñe; Bēngbe Bēt-sábeñe aca icošbuachéyeca shnaná consatsmēna ca.

Ntšamo Bēngbe Bētsabe améndayana yochjóshjango

(Mt 24.23-28, 36-41)

²⁰ Canye, chë fariseunga Jesús tmojantjá, mocna ora chë Bēngbe Bētsabe améndayana yochjanóshjanguama; y cha tojanéjua: “Bēngbe Bētsabe améndayana chaojóshjango ora, tšēngaftanga ndoñe quešmochatobenaye chca jinýana.

²¹ Chora ndoñe quemochátichamo ‘Muentše entsemna’ o ‘Choca entsemna ca’; er Bēngbe Bētsabe améndayana ya tšēngaftangbeñe entsemna ca” —cha tojánayana.

²² Jesús chabe uatsjéndayēnga tojanéyana: “Canye tempo echanjóshjango, y chora tšēngaftanga šmochántseboše canye te jtsebomnana, ntšamo chë Bēngbe Bētsá Entšá tbojanbemá tšēngaftangbeñe enjēftsemna orcá; pero chora ndoñe chca queochatóshjango.

²³ Chora báseftanga mochántsi chamo: ‘Muentše entsemna’ o ‘Choca entsemna ca’; pero choye ndoñe šmatjá, ni šmatjúseto. ²⁴ Er chë tojatcuinýe ora, ntšamo celoca catoica juachoica tojabuashinýinýenacá, chca echántsemna chë Bēngbe Bētsá Entšá tbojanbemá

quem luaroye chaojésabo te. ²⁵ Pero natsana cha bontsemna puerte jasúfriana, y morsca entsāngbiana uabotená jtsemnana.

²⁶ “Ntšamo Noé yojaniyena ora tojanopasacá, cachcá echanjopása chë Bēngbe Bētsá Entšá tbojanbemá quem luaroye chaojésabo ora. ²⁷ Chë tempo, entsānga imnasaye, imnofšēšnaye, imnóbouamnaye; natjēmbana imojtsiyēñe, y chca, natjēmbana imojtsomñe, Noé chë barquēshoye tojánamashēnguēntscuana; pero chora uabouana uaftena tojánashjango y chë entsānga tojtsanapochocá.

²⁸ Cachcá ntšamo Lot yojaniyena ora tojanopasacá: entsānga imnasaye, imnofšēšnaye, imnóbouamnaye, imojtsena, sananga imnajena y imnajebuana; ²⁹ pero Lot Sodoma bēts pueblentšana tojétsanbocna ora, Bēngbe Bētsá tojanma celocana íñeshe y azufre chauaftema, y chentša entsānga tojtsanapochocá. ³⁰ Cachcá echántsemna chë Bēngbe Bētsá Entšá tbojanbemá chaojtonýna ora.

³¹ “Chë tena, nda cachabe yebnentša tsbanánoca chaojtsemna, y chabe soyēnga cach tsoca tojtsebomñese, chocana ndoñe chaondéastjango chë soyēnga jesabobocnama; y nda jajoca chaojtsemna, yebnoye ndoñe chaondéa. ³² Menójuabonga ntšamo Lotbe shémaftaca tojanopasama.

³³ Nda tojtsentšena quem luarentše bētscá jtsebomnana y atšbiana jasúfriama ndoñe tontseprontana, chë nyetsca tescama yomna tšabe vida echanjobuetše. Pero nda quem luarentša soyēnga cachcá tojonýa atše juastama, masque chaóbana, chë nyetsca tescama yomna tšabe vida echántsebomna.

³⁴ “Atše cbéyana, chë ibeta, chë Bēngbe Bētsá Entšá tbojanbemá chaojtonýna ora, útata canye jutsnéshañe bochántsemna; canya

mochanjesbetše y chë ínÿana ndoñe. ³⁵Uta shembásata cánÿiñe bochántse-janÿcoye; canÿa mochanjesbetše y chë ínÿana ndoñe. ³⁶Uta boyabásata jajoca bochántsetrabajaye; canÿa mochanjesbetše y chë ínÿana ndoñe ca” —cha tojanéyana.

³⁷Chora chë uatsjédayénga Jesús tmojanjá: —Utabná, ¿ndémoca chca yochjopása ca?

Y cha tojanjúá: —Chë obanabe cuerpo tojtsemntše chë gallinacénga jojtana ca.

Chë viudá y chë mandadbiama cuento

18 Jesús mentsá tojanacuntá, entsánga jabuátambama, Bèngbe Bètsáftaca nyets tempo jtsencuéntayana yomnama, ainaniñe añemo jtseboznama ndocna te ntjajbanacá. ²Mentsá tojánayana: “Canÿe pueblentše canÿe mandado inamna; chana ni Bèngbe Bètsábioye ndoñe bonjánebiauatja, ni entsánga yonjánayaunana. ³Chë pueblentše canÿe viudánaca inamna; chana canÿe demanda yojánbomna. As chë mandádbioye yojobeconá y mentsá ibojauyana: ‘Diosmanda atšbe uayayá motsecastigá ndayá šojaborlama ca.’ ⁴Bayté chë mandado ndoñe yonjábosena chë viudábioye joyeunayama; pero chentšana cha yojenójuaboje: ‘Masque Bèngbe Bètsá ndoñe quetsátebiauatja, ni entsánga ndoñe quetsátayaunana, ⁵pero quem viudá cada ora endabó causa, añe chanjóyeunaye, chabe uayayá chanjacastíga; ndóñesna cada te nandaboje y cabana ya šochanjanaméntša ca.’”

⁶Chentšana Bèngbe Utabná tojánayana: “Šmonjouena ntšamo chë ndoñe tšabá ama mandado yojayancá. ⁷Y chca, ¿Bèngbe Bètsá chabe bocacánénga ndoñe yochanjátsebacaye?

Chénga mora ínÿengbe causa montsesufrina y cada te Bèngbe Bètsá mondbétseimpadana chaújabuachama. ¿Más chamuatobatmá ca yochjáuyana? ⁸Atše cbéyana, Bèngbe Bètsá betscotšéngaftanga cmochanjátsebacaye, tšéngaftanga chë ínÿengbe causa mora šmojtseufrínénga. Pero chë Bèngbe Bètsá Entšá tbojanbemá chaojésabo ora, ¿cabá Bèngbe Bètsábeñe ošbuáchiyénga quem luarentše entsánga yochjánÿena ca?” —Jesús tojánayana.

Chë fariseo y chë Romocama impuesto atjanayabiama cuento

⁹Báseftanga imojtsanjuabná chénga tšabe entsánga innamna ca, pero chë ínÿengbioye imojtsébuayénja; chíyeca Jesús mentsá tojanacuntá jabuátambama: ¹⁰“Uta boyabásata Bèngbe Bètsabe bèts yebnoye tbojána Bèngbe Bètsáftaca jencuéntama: canÿa yojamna fariseo, y chë ínÿana, canÿe Romocama entsángbioye impuesto atjanayá. ¹¹Chocna chë fariseo, tsanana Bèngbe Bètsábioye mentsá ibojtsecuéntaye: ‘Bèngbe Bètsá, cbontsatschuaná atše chë ínÿengcá ndoñe quetsatsmënama: atbëbanénga, puerte bacna soye aménga y shémbioye ínÿaftaca íngñayénga; y ni quem Romocama impuesto atjanayacá ndoñe quetsatsmënama. ¹²Atše sënduamana, ácaftaca jencuéntamna, canÿe semaniñe uta soye tondaye ntjascá jtsemnana; y lempe stjonÿenentsšana, bnétsanentsšana canÿe soye acbiama sëndequécjná ca.’ ¹³Pero chë Romocama impuesto atjanayana, bënoca yojtsemna, ni celoye ntjontješiyá, yojtsenócochjantšetaye y mentsá yojtsichamo: ‘¿Atšbe Bètsá, šmotselastemá, atšajema bacna soye amá tsmëna causa ca!’”

¹⁴Chentšana Jesús tojánayana: “Atše cbéyana, quem Romocama impuesto atjanayá chabe yebnoye

tojtaná chabe bacna soyëngama perdonaná, pero chë fariseo ndoñe. Er nda cachá bëtsá tojtsenobiamná, nduamaná mochántsebema; y nda cachá nduamaná tojtsenobiamná, añe bëtsá mochanjábema.”

Jesús, basetëmëngbiana Bëngbe Bëtsábioye tbojanimpadá

(Mt 19.13-15; Mc 10.13-16)

¹⁵Entšanga imojanamana Jesúsbioye basetëmënga junatsana chauabájajuama, y Bëngbe Bëtsábioye chëngbiana chaboimpadama; pero chë uatsjëndayënga chca tmojáninýe ora, tmojanontšé chë basetëmënga unachayënga jtsécácanana. ¹⁶Pero Jesusna chë basetëmënga tojánachembo, y mëntšá tojánayana: “Cachá mónýaye chë basetëmënga átšbioye chamuabo, y ndoñe matéuyanana; er Bëngbe Bëtsabe amëndayana endmëna chë mo quem basetëmëngcá imomnëngbiana. ¹⁷Ndegombre cbéyana, nda Bëngbe Bëtsabe soyënga ndoñe tonjójyëngacñe mo canýe basetëmcá jtsosbuáchiyëse, cha ndoñe queochatobenaye Bëngbe Bëtsabe amëndayoye jamashënguama ca.”

Canýe bomna entšá Jesúsbioye tojána

(Mt 19.16-30; Mc 10.17-31)

¹⁸Canýe mandayá Jesúsbioye tbojan-tjá: —Tšabe Buatëmbayá, ¿ndayá šojtsemna jamana chë nyetsca tescama yomna tšabe vida jtsebomnama ca?

¹⁹Y Jesús tbojanjá: —¿Ndáyeca šcjayana “tšabia ca”? Tšabia nýe canýa endmëna: Bëngbe Bëtsá. ²⁰Aca condétatšëmbo ntšamo Bëngbe Bëtsá tojanmandacá: “Acbe shema inýaftaca ndoñe cattseíngñaye, inýa ndoñe catjóba, ndoñe catjatbëba, ndoñe catjuaboínýena y acbe bëtsétsata ndoñe stëtšoye catjáquedaye ca.”

²¹Chora chë boyabása tbojanjá: —Atše lempe chca básetema orscana sëndocumplina ca.

²²Jesús chca tojanuena ora, tbojanayana: —Cabá canýe soye cmontsebuáshbena jamana: lempe ntšamo icobomncá cochjetsatobuiye, y chë crocénana, ndbomnjëmënga cochtsatšataye; chca, celoca canýe bëts bomnana cochántsebomna. Chentšana, cochjabo y šochjuasto ca.

²³Chë entšá chca tojanuena ora, puerta ngménaca yojtsemna, er cha corente bomná inamna. ²⁴Chca ngmená tbojáninýe ora, Jesús tojánayana: —¡Yapa totcá bomnëngbiana entsemna Bëngbe Bëtsabe amëndayoye jamashënguama! ²⁵Ndegombre, más paselo endmëna canýe camello chë coshufjentša atëfjnëjana chauachnëngo, y ndoñe canýe bomná Bëngbe Bëtsabe amëndayoye jamashënguana ca.

²⁶Chora, chë chca imojouenënga tmojánayana: —¿As nda yochjobenaye ats-bocaná jtsemnana ca?

²⁷Y Jesús tojanéjua: —Ndayá entšanga ndoñe mondobena jamana, Bëngbe Bëtsá añe endobena jamana ca.

²⁸Chora Pedro, Jesúsbioye tbojanayana: —Bëngbe Utabná, aca contsonýá, bënga lempe chë fsëndbomna soyënga fsënjëseboshjona, y ácaftaca fsëntšajna ca.

²⁹Jesús chora tojanéyana: —Ndegombre cbéyana, ndánaca Bëngbe Bëtsábioye jasérviana, chabe amëndayama jtsabuayinayëse, cachcá tojéftseboshjona chabe yebna, shema, catsátanga, bëtsétsanga o básanga, ³⁰cha mora quem luarentšë chë soyëngama más echanjójyëngacñe, y chë inýe luarocna, chë nyetsca tescama yomna tšabe vida ca.

Jesús cachiñe tojánayana cha jóbanama y jtayenama

(Mt 20.17-19; Mc 10.32-34)

³¹ Jesús chabe bnétsana uta uatsjédayënga barie tojánachembo, y mëntšá tojanéyana: “Šmontsetátšëmbo mora Jerusalemoye bënga montsajnama, y choca lempe echanjochnëngo ntšamo chë Bëngbe Bëtsabe juabna oyebuambnayënga, chë Bëngbe Bëtsá Entšá tojanbemabiama tmojanabemcá; ³²er choca cha chë ndoñe judiëngbe cucuatšinë mochanjáboshjona, y mochantsáboyejuana, mochanjóyenguango, mochántsebuashëttojo; ³³y chamojátjanjentsana, mochanjóba, pero unga tianoye cha echántayena ca.”

³⁴Chë uatsjédayënga tondaye tonjanësertá, ni montsetátšëmbo ndayá bëtsemnana ntšamo Jesús yojsëtsët-snacá, er chëngbiama yojamna josértama ndopodena soyënga.

Jesús, Jericó puebloca canye jtanábioye tbojanshná

(Mt 20.29-34; Mc 10.46-52)

³⁵Tojanopasá, Jesús Jericó puebloye yojsébëconaye ora, canye jtaná benache juachañe inatbemana, lemošna otjanañe. ³⁶Entšanga chëjana imojsach-nëjuanama tojanuena ora, yojanotícia ndayá yojsopasana ca, ³⁷y chë entšanga tmojanayana, —Jesús Nazaretocá entsebeconá ca.

³⁸As cha yojontsé uayebuáchana: —¡Jesús, Davídbentšana Entšá, šmotse-lastemá ca!

³⁹Chë natsana imojsajñënga chë jtaná imojsácacana, iytëca chaóbmama; pero cha más yojsáyebuache: —¡Davídbentšana Entšá, šmotselastemá ca!

⁴⁰As Jesús tojantsá y tojanmandá cha chamobëtšama. Cha ya bécoñe yojs-

semna ora, Jesús tbojantjá: ⁴¹—¿Ndayá cojtseboše atše acbiama chjamama ca?

Y chë jtaná tbojanjuá: —Atšbe Utabná, atše séntseboše chašuatábínýnama ca.

⁴²Chora Jesús tbojanayana: —Matinýe, Bëngbe Bëtsabeñe betsošbuachéyeca shnaná contsatsmëna ca.

⁴³Y cachora cha tšabá ibojtabinýna, y Jesúsbioye ibojtséstoná, Bëngbe Bëtsá atschuanaye. Y nyetsca entšanga, chca tmojáninýe ora, Bëngbe Bëtsá imojsatschuanaye.

Jesús y Zaqueo

19 Jesús Jericó puebloca tojá-nashjango ora, chë pueblëjana cha yojsach-nëjuana. ²⁻³Chora, canye bomna entšá, chë Romocama entšanga impuesto atjanayëngbe amëndayá, Zaqueo ca uabainá, yojsseboše Jesús jinýama. Pero ndoñe yontsobena jinýama, bëtscá entšanga causa y cha becuca inamna causa. ⁴Chcasna, cha betesco natsanoye tojafsanótjajo y canye sicomoro betiyeshoye tojánashëngo, chca, Jesús chëjana tojsach-nëjuana ora, jinýama jobenayama. ⁵Jesús chë betiyeshoye tojánashjango ora, tsbanánoye tojanontješé y Zaqueobioye tbojáninýe. As Jesús tbojanayana: “Betsco chocana matastjango, Zaqueo, er mënté chanjá acbe yebnoye jatema ca.”

⁶Chora Zaqueo betesco tojtastjango y chentsana puerte oyejuayá Jesúsbioye tbojanofja. ⁷Entšanga chca tmojáninýe ora, tmojanontšé Jesusbe contra mëntšá ichámuana: “Jesús tonjá canye bacna soyënga amabe yebnentše jatema ca.”

⁸Chora Zaqueo tojantsá, Bëngbe Utabná Jesúsbentše, y mëntšá tbojanayana: —Mouena, atšbe Utabná, atšbe bomna soyënguentsana tsëntsane ndbomnjëmënga chanjátšataye y nda más crocénana tijëftseyëngacá, chë

ntsachetšá tijéftsefcama canta soye más chantoyiye ca.

⁹As Jesús tbojaniyana: —Ménté, aca acbe bacna soyénguentšana atsbocaná contsemna, er Zaqueo, ácnaca Abrahám-bentšana entšá condmëna. ¹⁰Er chë Bëngbe Bëtsá Entšá tbojanbemá tojabo chë pochocánënga jtsemnama imojtsajnénga jabétsanguanguama y jabátsebacama ca.

Chë crocenánama cuento

(Mt 25.14-30)

¹¹Entšanga chë soyënga imojtsuenana, y Jesús inye soye tojanacuntá jabuátambama, er cha ya Jerusalén béconana yojtsemna, y entšanga imojtsejuabnaye chë Bëngbe Bëtsabe amëndayana ya yochjanóshjango ca.

¹²Jesús tojanéyana: “Canye luarentša uámana entšá inye bën luaroye yojá, cachabe luarentša rey chamobemama y chentšana cachábioye jtama. ¹³Cabá nda ora, chabe bnétsana oservénënga yojáchembo y bëtscá crocénana cada cán'yabioye yojéftsayentšbuachiye, y mëntšá yojéftséyana: ‘Quem crocenánaca trato šmochjábema atše candëtabëntscuana ca.’ ¹⁴Pero cachabe luarentša entšanga cha imojuáya, as chëngna básefta entšanga imojichamuá chë inye bën luaroca mëntšá chamuayanama: ‘bënga ndoñe queftsátsboše cha bëngbe rey chaotsemnama ca’.

¹⁵“Pero pronto chë luarentša rey cha imojábema. Y chë luaroye yojtá orna yojamánda chë crocénana yojéftsayentšbuáchenga chamobéconama, jtsetatšëmbuama ntsachetšá cada ona chë crocenánaca yojongánama. ¹⁶Chë natsaná yojáshjango y yojayana: ‘Taita, acbe crocénana bnétsana soye más tonjoboté ca.’ ¹⁷Y chë rey ibojojuá: ‘Tša tšabá, tšabe oservená. Aca quem base soyiñe ntšamo tbojamandacá

tšabá tcojámayeca, bnétsana pueblentša mandado chacotsemnama cbojayé ca.’ ¹⁸Chentšana inya yojáshjango y yojayana: ‘Taita, acbe crocénana shachna soye más tonjoboté ca.’ ¹⁹Y chë rey ibojauyana: ‘Acnaca shachna pueblentša mandado cochántsemna ca.’

²⁰“Chorna inya yojobeconá y mëntšá yojayana: ‘Taita, muentse acbe crocénana entsatsmëna; canye pañueléjuañe bonguana sëntsejajo. ²¹Atše acbiamu uatjana šonjuábuache, er aca canye tšátjaye entšá condmëna; aca chë ndoñe condbuajonentšana jocñana y chë ndoñe tconjajé luarentšana jaja saná jobuátbanana ca.’ ²²As chë rey ibojauyana: ‘Bacna oservená, cach acbe palabrëngaca chanjín'yanyíye aca ndoñe tšabá tconjamama. Atše chë ndoñe sëndbuajonentšana jocñana y chë ndoñe sënjajé luarentšana jobuátbanana tsuamanama icojátatšëmbëse, ²³ñdáyeca ndoñe tconjá chë crocénana bancoca jetsobuájuama, y atše camoye matijtabo ora, mašctoyé chë crocénana y chë chentšana tojoboté crocénanënaca ca?’ ²⁴Y chë chentše imojtsemna entšanga yojáuyana: ‘Chë crocénana motseboca y chë bnétsana soye más tojabotébioye chana motsatšetá ca.’ ²⁵As chënga imojuá: ‘¡Pero cha ya bnétsana soye más entsebomna ca!’ ²⁶Y chë rey yojójuá: ‘Atše cbéyana, nda tojtsebomnábioye, más mochanjátšetaye; pero nda tondaye tondbomnábioye, chë tojtsejuabná batšatema yobomna sóynaca mochántseboca ca. ²⁷Y chë atše uayayënga, chë chëngbe rey atše chaitsemnama ndoñe monjánbošëngna, moye mënátse y atše delante šmochtsëbaya ca’” —cha chora yojayana.

Jesús Jerusalenoye tojánashjango

(Mt 21.1-11; Mc 11.1-11; Jn 12.12-19)

²⁸⁻²⁹Chca tojéftsanayana chentšana, Jerusalenoye yojétsaye ora, Jesús

tojánashjango canye tjashoye, Olivos ca uabáiniñe, Betania y Betfagé publénga béconana. Chora, uta chabe uatsjédayata tojanichamó, ³⁰méntśá jáuyanése: “Tséndatbe natsana entsemna base pueblotémoye motsata. Chašojáshjango ora, canye burrotema utsbuaná šochanjínýena. Chábeñe cabá ndocná tonjenojayé. Šochjuajafjoná y šochjuánatse. ³¹Y nderado nda ndáyeca šojtsajafjná ca chacmojátjasna, šochjauyana: ‘Béngbe Utabná bontsájaboto ca.’”

³²Ché uatsjédayata tbojána y lempe ntšamo Jesús tojanéyancá tbojáninýena. ³³Y ché burrotema imojtsajafjná orna, ché burrotema nduiñénga tmojanéyana: —¿Ndáyeca ché burrotema šojtsajafjná ca?

³⁴Chora chata tbojánayana: —Béngbe Utabná bontsajabótoyeca ca.

³⁵Chentsana Jesúsbioye ché burrotema tmojanánatse, y ché burrotémbeñe chatbe entšayá tbojanájatse, y chábeñe Jesús tmojanenjayé. ³⁶Y cha yojtsachnějuana ora, entšanga chéngbe entšayá benachéjána imojtsététsatsana.

³⁷Olivos tjashe tsmanoye yojtsebeconá ora, ché bétscá entšanga, Jesúsbeñe ošbuáchiyénga, tmojanontsé uayebuáchana y Béngbe Bétśá oyejuayénga jétshuayana, Béngbe Bétśabe obenánaca bétś soyénga Jesús tojanmama. ³⁸Chénga méntśá imojtsichamo: “¡Corente bendición bonná chaotsemna, ché Béngbe Utabnabe obenánaca tojabo Rey ca! ¡Celoca tśabá entsemna! ¡Béngbe Bétśá matschuanga ca!”

³⁹Ché entšanguentše básefta fariseunga imojtsemnénga, Jesús tmojaníyana: —Buatémbayá, acbe ústonénga mécácana chca ndoñe chamondétsáyebuachama ca.

⁴⁰Pero Jesús méntśá tojanéjua: —Ndegombre cbéyana, ménga

iytéca tmojobiamése, ché ndétśbenga muanjuayebuáchena ca.

⁴¹Jesús Jerusalén béconana tojánashjango, y ché bétś pueblo tojáninýe ora, chentśa entšangbiama tojánenobošachna. ⁴²Y méntśá tojánayana: “¡Malaye šméntsetátśembo, nýe mo ménténaca, ndayá yojtseita tšéngaftangbeñe lempe tśabá chaotsomñama! Pero mora ché soye tšéngaftangbe bominýama entséitémena. ⁴³Er Jerusalenoca bacna tenga echanjóshjango; chora uayayénga chentśa shéconánéjána canye tapiése mochantsepórma, mochantsejétja y nyetsca juachocana mochanjontsé tšéngaftanga jtsatsejana, ⁴⁴y lempe mochantsepochoá. Muentśa oyenénga mochantsébaye, y ni mo canye ndétśbé inýebé juatsboca quemochaiseboshjona, ché Béngbe Bétśá tšéngaftanga játsebacama tojabo ora, ndoñe chešmatoyeuná causa ca” —Jesús tojánayana.

**Jesús, Béngbe Bétśabe bétś
yebnentsana enénga y
obuámnayénga tojtanébuacna**

(Mt 21.12-17; Mc 11.15-19; Jn 2.13-22)

⁴⁵Chentsana, Béngbe Bétśabe bétś yebnoye Jesús tojanamashéngo y tojanontsé ché chentše imojtsenénga chentśana jtébuacnana, ⁴⁶y tojanéyana: “Béngbe Bétśá chabe uabemana palabrénguiñe tojayana: ‘Atśbe bétś yebna echántsemna átšeftaca encuéntaye yebna ca’, pero tšéngaftangna, atbēbanéngbe oyeiniñe ché yebna šmojtsebema ca.”

⁴⁷Y cada te, Béngbe Bétśabe bétś yebnentše Jesús entšanga yojtsabuá-tambaye; y bachnangbe améndayénga, ley abuátambayénga y ché pueblentśa mandayéngnaca imojtsenguaye ntšamo jamése cha jóbana. ⁴⁸Pero ndoñe tmon-jáninýena ntšamo, er nyetsca entšanga

corente imojtseyeunana ntšamo cha yojtsoyebuambnacá.

Jesusbé obenana

(Mt 21.23-27; Mc 11.27-33)

20 Canýe te, Běngbe Bětsabe běts yebnentšé Jesús yojtsabuá-tambaye, y chě tšabe noticiěngama yojtsabuayiná ora, tmojánashajna bachnangbe aměndayěnga, ley abuátambayěnga, judiěngbeñe bětsějeměngcá mandayěngaftaca cánýiñe; ²y Jesús tmojaniana: —Šmėyana; ¿ndaye deréchoca chě contsama soyěnga aca cojtsama ca? o ¿chca jtsamama nda obenana tcměnjatšetá ca?

³Chora Jesús tojanėjua: —Atšnaca canýe soye séntsebmoma tšěngaftanga jatjayama. Šmochjojuanga. ⁴¿Nda Juan chě Ubayaná tbojanichmó entsanga jubáyama, Běngbe Bětsá o entsanga ca?

⁵Chora chěnga tmojanontšé enatsětsnayana: “Běngbe Bětsá ca’ chamojojuase, cha šochanjáyana: ‘As ¿ndáyeca chábeñe ndoñe šmonjanošbuaché ca?’ ⁶Y ndoñe quemuátobena jayanana ‘entsanga ca’; entsanga ndětsbėngaca buattsėbaye, er nýetscanga becá mondějuabná Juan ndegombre Běngbe Bětsabe juabna oyebuambnayá yojamnama.” ⁷Chcasna, chěnga tmojanjuá ndoñe monjántatšěmbo nda Juan tbojanichmó entsanga jubáyama ca.

⁸Y Jesús tojanėjana: —Asna atše cach ndoñe quebochatėyana ndaye deréchoca chca stsama ca.

Chě puerte bacna trabájayěngbiama cuento

(Mt 21.33-44; Mc 12.1-11)

⁹Chentšana Jesús tojanontšé entsanga jáuyanana, y quem cuéntoca tojanabuatambá: “Canýe entsá uvas betiyěnga yojáje y chě fshantse

inýe trabájayěnga yojúyentšame, y baytescama bėn luaroye yojtsoñe. ¹⁰Chě uvasěšangá juashacama tempo yojobuache orna, chě jajañe nduiño canýe oservená ibojíčmua chě trabájayěnga jáuyanama ntsachetšá cha ibojtsotocánama. Pero chěngna cha imojtsejantšetaye, y tondaye ntoyicá imojtichmuá. ¹¹Chentšana inýa ibojíčmua; pero chě trabájayěnga cha imojtsejantšetaye, imojtsóyenguango, y tondaye ntoyicá imojtichmuá. ¹²Chě nduiño inýa ibojatichmuá; pero chánaca chěnga imojtsejantšetaye, imojtselisia, y chentšana imojtábocna.

¹³“Chora chě nduiño yojeniyana: ‘¿Y mora ntšamo chjama ca? Cach atšbe bonshana uaquińá chanjíchmua; nderádose cha añe mochanjóyeunaye ca.’ ¹⁴Pero chě trabájayěnga, chě uaquińá imojinýe orna imojeniyana: ‘Mua chě fshantse nduiñbe uaquińá entsemna. Lempe chabe soyěnga mua echanjóyěngacñe; motsóbanga y nýetsca chabe otocana soyěnga bėngbiama echanjoquėda ca.’ ¹⁵Chcasna, chě uvas jajañentsana cha imojtsábocna y imojtsóba.”

Chora Jesús tojanatjá: —Y asna, ¿ntšamo šmojtsejuabná, ndayá chě jajañe nduiño chě trabájayěngaftaca yochjama ca? ¹⁶Cha co echanjá y chě trabájayěnga echanjetsėbaye, y chě uvas betiyěnga jajañe inýe trabájayěnga echanjárrendaye ca.

Chě entsanga chca tmojanuena ora, tmojánayana: —¿Běngaftaca ndocna te chca chaondopasá ca!

¹⁷Pero Jesús tojanėnyanjé y tojanayana: —As ¿ndayama Běngbe Bětsabe uabemana palabrenguĩñe iuayana?: Chě yebna jebuaněnga tmojtsanaboté ndětsėbé,

mora chě más běts uashacuaněsentše entsejájona ca.

¹⁸Ndánaca chě ndětsbeñe chaojtsatšá, chěbé bochántsatcacaye; y chě ndět-

šbé ndábeñnaca chaojótsatše, polvéshe bochántsebema ca —Jesús tojánayana.

¹⁹Chë bachnangbe améndayënga y ley abuatambayënga tmojanenótatšëmbona Jesús chca tojanacuntá jinñanñiyama, chënga mo chë puerte bacna trabajayëngcá imojamnama; asna tmojánbošëna cachora jishachana, pero entšangbiama imojtsauatja.

Chë Romoca bëts mandadbiama impuesto jtsatsquécjnayama

(Mt 22.15-22; Mc 12.13-17)

²⁰Chentsana chënga báseftanga tmojanichamó, mo ndegombre tsabe entšanga cuaftsemncá chamobiamëse, Jesús jisháchichiyama, nderado ndayá cha tojayaniñe; y chca chënga jobenayama cha jishachana y chëngbe mandádbioye juanatsama. ²¹As chënga tmojantjá: —Buatëmbayá, bënga fséntsetatšëmbo ntšamo aca cojtsoyebuambná y cojtsabuatambacá ndegombre tsábá yomnama, ntšamo ndegombre Bëngbe Bëtsá yobošcá, y acbiama tondaye quenatámama nda más uamaná o nduamaná tomnana. Aca contsabuatambá ndegombre tsabe vida jtsebomnama, ntšamo Bëngbe Bëtsá yomandacá. ²²Chcasna, šmëyana, çtsábá tajojtsemna bënga, César, chë Romoca bëts mandadbiama, impuesto jtsatsquécjnayana o ndoñe ca?

²³Jesús yojtsetátšëmbo, ntšamo cha tojayaniñe jisháchichiyama chënga imojtsebošama; as tojanéyana: ²⁴—Chë šmatsquécjná crocénana šminñinñyënga ca; çndabe jubiá chë crocenániñe yojtsemna, y ntšamo muentše entsabemancá nda chca iuabaina ca?

Y chënga tmojanjuá: —Césarbe jubiá; cha chca enduabaina ca.

²⁵Y Jesús tojanéyana: —César šmochtoyie cha ibotocana soye; y Bëngbe Bëtsana cha ibotocana soye ca.

²⁶Y chca, chë ichmónënga ndoñe imonjobenaye jisháchichiyana, ndayá cha entšangbe delante tojayaniñe. Masna, ntšamo tojanéjuama, ojnánánënga iyteca imojobiama.

Obanënga jtayenama Jesús tmojantjá

(Mt 22.23-33; Mc 12.18-27)

²⁷Chentsana, báseftanga saduceo ca uabaina entšanga tmojána Jesús jinñyama. Chënga imojanjuabná obanënga ndocna te ntayenana ca. Jesús mëntšá tmojantjá: ²⁸—Buatëmbayá, Moisés bëngbe leyënguñe tojëftsanabema, nderado canye boyá tojtsóbana y básënga ndoñe tonjëftsabáshejuanësna, canmëna chë uabentsá chë shémaftaca jtobouamayana, chca, chë chabe uabochená obanabiama básënga jtsabamnama ca. ²⁹Chcase, canye bëngbentše canyëšëfta catsátanga monjamna. Chë natsaná tonjanobouamá y tontsanóbana, básënga ntjëftsabashejuancá; ³⁰chentsana chë inña chë shémaftaca tonjanobouamá, y cachcá tonjanopasá. ³¹Chë inye uabentsá chora cháftaca tonjanobouamá, pero tontsanóbana básënga ntjëftsabashejuancá; y cachcá, chë inye uabentsëngnaca cháftaca tmonjanobouamá, pero nyetscanga tmonjanóbana básënga ntjëftsabashejuancá. ³²Cabana, chë shembásanaca tontsanóbana. ³³Y chcasna, chë obanënga chamojtayena ora, çndabe chë canyëšëfta catsatanguentsabe shema chë shembása yochtsemna, nyetscanga cháftaca tmojanobouamase ca? —chënga tmojantjá.

³⁴Chora Jesús tojanéjua: —Quem luarentše boyabásënga y shembásënga mondbëtsobouamnaye; ³⁵pero chë echanjóshjango luaroye jama y obanënguentsana jtayenama merecido jtsebuájonama chamojobenangna, masque boyabásënga o shembásënga,

ya ndoñe quemochatóbouamnaye,
³⁶ni queochátopodena chënga
 chamóbanama, y chca, chënga
 mochántsemna mo angelëngcá,
 y Bëngbe Bëtsabe básënga
 mochántsemna, obanënguentšana
 mochtayénayeca. ³⁷Y Moisésnaca,
 chë yojsángbototjuana betiyetémama
 tojanábementše, bënga šontsinýanýná
 chë obanënga imnátayenama;
 chentše Bëngbe Bëtsá tojánayana cha
 yomna Abraham, Isaac y Jacobëbe
 Bëtsá ca. ³⁸Bëngbe Bëtsá chca
 tojánayana ora, entsichamo cha ndoñe
 yondmëna obanëngbe Bëtsá, sinó aina
 entsangbe Bëtsá ca, er masque chënga
 tmojanóbana, chënga cabá Bëngbe
 Bëtsáftaca mondoyena ca —Jesús
 tojánayana.

³⁹Chora básefta ley abuatambayënga
 Jesús tmojaníyana: —Buatëmbayá,
 tšabá tcjayana ca.

⁴⁰Y ya ndoñe más montsenñémua inýe
 soyëngama jatstjanayana.

¿Cristo ndabe entsábentšana yomna?

(Mt 22.41-46; Mc 12.35-37)

⁴¹Jesús tojanatjá: “¿Ndáyeca tsën-
 gaftanga šmnétsichamo chë Uámana
 Uabuayaná, chë Cristo, Rey David-
 bentšana iuabó ca? ⁴²Er cach David,
 chabe librésañe Salmos ca uabainésañe,
 tojánayana:

Bëngbe Bëtsá, atšbe Utabná Crístbioye
 tbojaníyana:

‘Atšbe catšbioica mótbema,

⁴³atšbe obenánaca, acbe uayayënga
 acbe cucuatšíñe chamoquedama ch-
 jamëntscuana ca.’

⁴⁴¿Ntšámose, Cristo, Davídbentšana
 nántsemna, cach David ‘Utabná ca’
 chábioye tbojtsabobuátmëse ca?” —cha
 tojanatjá.

**Jesús chë ley abuatambayëngbiama
 tojánayana chënga ndoñe
 tšabá montsama ca**

(Mt 23.1-36; Mc 12.38-40; Lc 11.37-54)

⁴⁵Nýetsca entsanga imojtsuenana, y
 Jesús chabe uatsjédayënga tojanéyana:
⁴⁶“Cuedado šmochtsebomna, y ndoñe
 šmattsama chë ley abuatambayëngcá;
 chënga jtsogusetánana bënëna
 entsayangaca jtsajnana, y jtsebošana
 tsáshenañe entsanga becá respétoca
 chamotsacheuanayama. Chënga chë
 judiëngbe enefjuana yebnënguenache
 chë más uámana luarënguñe
 jtsetbiámanana, y fiestënguñe nýa
 quëfseroca. ⁴⁷Pero chë viudángbioye
 chë tmobomna soyënga jtsabacayana;
 y entsangbe delante tšabá chacmot-
 sënýama y chënga imojtsaíngñama
 ndoñe chaondëtsótatšëmbuamna,
 Bëngbe Bëtsáftaca tša jtsencuéntayana.
 Chë causa, Bëngbe Bëtsá ínýëngbiama
 más chënga echanjácastigaye ca”
 —Jesús tojánayana.

**Jesús yojsénýaye chë
 crocénana quëcjayënga**

(Mc 12.41-44)

21 Bëngbe Bëtsabe bëts yebnentše,
 Jesús yojsénýaye chë bomnënga
 crocénana jtsequëcjayana chë
 crocénana quëcjayëtëmiñe; ²y canýe
 viudá ndbomnjémnaca tbojáninýe, uta
 crocénana chëtëmiñe yojaftsesegóra.
³Chora Jesús tojánayana: “Ndegombre
 cbéyana, quem viudá ndbomnjëma,
 Bëngbe Bëtsabiama nýetscangbiama
 más becá tonjëftsesegorá; ⁴er
 nýetscanga tmonjëftsesegorá chë
 yojsóyentšjamentšana, pero chana,
 masque tša ndbomnjëma, cha vida
 jtsebomnama lempe ntsachetšá
 yobomncá tonjëftsesegorá ca.”

**Jesús tojánayana Bëngbe
Bëtsabe bëts yebna lempe
mochjánpochocama**

(Mt 24.1-2; Mc 13.1-2)

⁵ Bâseftanga imojtsichamo chë Bëngbe Bëtsabe bëts yebna, tša yojtsebota-manana puerte uamana ndëtšbëngaca y chë entsanga imojanamana juambana Bëngbe Bëtsábioye uátšëmbona soyëngaca. As Jesús tojánayana: ⁶—Canÿe tempo echanjóshjango, y lempe ntšamo mora muentše šmontsonÿacá tondaye queochatoquéda, ni mo canÿe ndëtšbé inÿebé juatsboye. Lempe mochantse-pochóca ca.

**Ntšamo yochtsemna quem luare
jopochócama te chaajtsobeco ora**

(Mt 24.3-28; Mc 13.3-23)

⁷ Chora chënga tmojantjá: — Buatëmbayá, ¿ntseco chca yochjopása? ¿Y ndayá Bëngbe Bëtsá yochjama, chca jopásama yojtsobecuama entsanga chamotsetatšëmbuama ca?

⁸ Y Jesús tojánayana: —Cuedado šmochtsebomna ndocná chacmondáingñema. Er banga mochanjabo y mochantsabíchamo chënga atše imomna ca. Mochántsicamo: “Atše chë Cristo sëndmëna”, y “Mora chë tempo entsemna ca”. Pero ndoñe šmatjóyaunaye. ⁹ Y tšëngaftanga, entsanga imojtsentsjanama y entsanga mandadëngbe contra imojtsemnana chašmojtsuenana ora, ndoñe šmattsauatja, er entseyta natsana chë soyënga chaochnëngo; pero masque chca, chë quem luare jopochócama tempo cabá ndoñe queochátmëna ca.

¹⁰ Y mëntšánaca Jesús tojanéyana: “Canÿe luarentša entsanga, inÿe luaroca entsángaftaca mochántsejtsjanaye; y canÿe amëndayábentša entsanga, inÿe amëndayábioica entsángaftácna.

¹¹ Ba luarënguñe jabuache

echanjuangmëmana, bëts shëntsana, y entsanga pochócaye socanënga echanjóshjango; y celoca echántsemna puerte uabouana soyënga y bëts soyënga, entsanga jinÿanÿiyama quem luare ya yochtso-pochócama.

¹² “Pero cabá ndoñe chca chaondochnëngo ora, tšëngaftanga cmochanjíshëche y chašmosufrima mochántsama; bënga judiëngbe enefjuana yebnëngoye cmochanjuntatse játsetšenama y cárceloynaca cmochanjútame, y reyënga y mandadëngbióynaca cmochanjuntatse, atšbe ústonënga bëtsemna causa.

¹³ Chca šmochanjapása, ntšamo atšbiama šmotatšëmbcá chënga chašméyanama. ¹⁴ Natsana ndoñe šmatjátšjuabnaye jenéuyanama ntšamo chora jóyebuambayana, ¹⁵ er atše chanjama puerte tšabá y osertanánaca tšëngaftanga chašmóyebuambama; y chca, tšëngaftangbe uayayënga ndoñe quemochatobenaye jayanana ndoñe tšabá šmotsichamo ca, y ndocá jojuama quemochatobenaye. ¹⁶ Pero uayayëngbe cucuatšinë cmochanjábashejuana cach tšëngaftangbe bëtsétsanga, catšátanga, pamíllanga y amiguënga; y tšëngaftanguentsana báseftanga cmochantsëbaye. ¹⁷ Y nÿetsca entsanga cmochantsébuayënja,

atšbe ústonënga bëtsemna causa. ¹⁸ Pero tšëngaftangbe bestšaentsana ni mo canÿe stjënëja quecmochátabajajo. ¹⁹ Tšëngaftanga nÿets tempo átšbeñe ošbuáchiyënga chašmojtsemnëse, chë nÿetsca tescama yomna tšabe vida šmochántsebomna ca.

²⁰ “Jerusalén nÿets shéconana soldadënga chašmojanÿe ora, šmochtsetátšëmbo Jerusalén jopochócama tojobuáchama. ²¹ Chorna, chë Judeoca oyenënga batsjabengoye chamotsacheta; Jerusalemëntše chamojtsemnënga, chentsana

chamuaisebocana; y chë jajenache chamojtsemnëngna, Jerusalemoye ndoñe chamondésamashjna. ²² Er chora echántsemna chë entsangbe jabuache castigo; lempe ntšamo Bëngbe Bëtsabe uabemana palabrënguine endayancá chora echanjochnëngo. ²³ ¡Tša lastema chë tempo shembásenga ngomámanëngbiamana o ochóchaye básenga chamojtsabamnëngbiamana! Er chora corente ngmënana quem luarentše echántsemna, y quem luarentša entsangbiamana chë uabouana castigo. ²⁴ Inyënga espadéjaca mochanjóbana, y inyëngbioye nyetsca luarënguëjana utámenënga mochanjunatse; y chë ndoñe judiëngna, Jerusalemocana entsangbioye mochántsatsejaye y mochantsëbaye, chca chaotsemnana Bëngbe Bëtsá tojalesenciantscuana ca” —Jesús tojánayana.

Bëngbe Bëtsá Entšá tbojanbemá quem luaroye echanjésabo

(Mt 24.29-35, 42-44; Mc 13.24-37)

²⁵ Mëntsánaca Jesús tojánayana: “Chora bëts soyënga echantsinýna shinýine, juashconiñe y estrellënguine; y quem luarentša entsanga tša mochántsausatja, ndayá jamama ntsetatšëmbcá, chë mar béjaye y olëshënga corente echantsefshauenana causa. ²⁶ Entšanga echantsabuatëcja tša auatja causa y ndayá quem luarinë yochjopásama enócochinýena causa; er chë quem luarentša tsbanánoca espíritënga obenana bomnënga echanjángmëmëmana. ²⁷ Y chora entsanga mochanjinýe, chë Bëngbe Bëtsá Entšá tbojanbemá jantšetëshiñe echántsaboye, puerte obenánaca y corente buashinýinýaniñe. ²⁸ Chë soyënga jochnënguama chaojobojatšë ora, añemo šmochjentsetaye y bestšašë játsbanase šmochjarrepára, er chora

echántsemna chë tšëngaftangbe atsebacayana ca” —Jesús tojánayana.

²⁹ Mëntsánaca Jesús tojánéyana jabuátambama: “Šmochjinýe canýe higo betiye o ndaye inyë betýnaca. ³⁰ Tojtsaisëjotsanama šmojinýe ora, jtsatšëmbuana chë tšabe tempo ya yojtsaisobecuama. ³¹ Cachcá, chë soyënga yojtsëchnëjuanama chašmojinýe ora, šmochtsetátšëmba chë Bëngbe Bëtsabe amëndayana ya yojtsobecuama.

³² “Ndegombre chéyana, lempe chca echanjochnëngo, morsca entsanga cabá ndóbana ora. ³³ Celoca y quem luare echanjopochóca, pero atšbe palabran docna te queochaisopochóca.

³⁴⁻³⁵ “Cuedado šmochtsebmoma y ndoñe šmatjaleséncia tšëngaftangbe ainana bacna juabnëngaca chaotsemnana, jenomándama ntsobencá mocá enobuena causa, tmoye causa y nýe quem luarentša soyëngama enócochinýena causa; y tšëngaftanga prontánënga šmochtsemna, nýe ndeolpe chë te chaojobuache ora; y tšëngaftanga ndëprontánënga ndoñe chašmondëtsemna, mo tšëngaftangbiamana canýe uachmaniñe cuaftsemncá. Er nyetsca quem luarentša entsangbiamana chca echántsemna. ³⁶ Cuedado šmochtsebmoma y yejuana šmochtsantješna; nýe ntseco órnaca Bëngbe Bëtsáftaca šmochtsencuëntaye, chca, chë echanjopása soyëngama jótsbocama chašmobenama, y chë Bëngbe Bëtsá Entšá tbojanbemabe delante jashjanguama ca” —Jesús tojánéyana.

³⁷ Jesús, bnëté Bëngbe Bëtsabe bëts yebnentše yojánabuatambaye, y ibetna, Olivos uabaina tjšahoye yojánaye joquédama. ³⁸ Y nyetsca entsanga cabá cachëse Bëngbe Bëtsabe bëts yebnoye imojánajna Jesús joyeunayama.

Entšanga tmojanjuabó ntšamo jamése Jesúsbioye jishachama

(Mt 26.1-5, 14-16; Mc 14.1-2, 10-11; Jn 11.45-53)

22 Ya yojétsobeco Bashco fiesta, chë levadúraca ndëpormana tandëse saye fiesta, chë Bëngbe Bëtsá Egiptocana judiëngbe bëts taitanga tojánatsebacama jtenójuaboyama. ²Chë bachnangbe amëndayënga y ley abuátambayënga imojtsenguaye ntšamo jamése Jesús jóbana, pero entšangbiama imojtsauatja.

³Chora Satanás, Judas chë Iscariote ca uabobuatmabe ainaniñe bacna juabnënga tojanjajó. Chánaca yojamna chë bnétsana uta uatsjendayënguentsá; ⁴y tojána, chë bachnangbe amëndayënga y Bëngbe Bëtsabe bëts yebnocá soldadëngbe amëndayëngaftaca jencuéntama, ntšamo Jesús chëngbe cucuatšine jayentšbáshejuanama. ⁵As chënga imojóyejuaye, y Judas tmojanšbuachená crocénana chama jtatšetayana. ⁶Y Júdasna añe ca tojánayana; y cach orscana cha yojtsenguaye ntšamo jamana y ndëmua ora Jesús chëngbioye jayentšbáshejuanama, ndocna entšanga ora.

Jesús chabe uatsjëndayëngaftaca Bashco saná tojanse

(Mt 26.17-29; Mc 14.12-25; Jn 13.21-30; 1 Co 11.23-26)

⁷Chë Bashco fiesta ora tojanóshjango, chë levadúraca ndëpormana tandëse sayté; chë te yojamna, Bëngbe Bëtsá jëtschuayamna canye oveshá jóbana chora jasama. ⁸As Jesús, Pedro y Juánbioye tojanéyana: —Motsata y saná šochjapróna Bashco fiestama bënga mochjasama ca.

⁹Chora chata tbojantjá: —¿Ndémoca cojtseboše chë saná fchjapróna ca?

¹⁰Y Jesús tojanéjua: —Jerusalentšë chašojámashëngo ora, canye bacó

cmochanjóbiatše, matbajiñe búyeshe echantsabuyambaye. Cha šochjuasto, y šochtsonyaye ndëmuanye yebnentše cha yochjámashënguama; ¹¹y chentša nduiño šochjauyana: “Chë Buatëmbayá šonjichamó aca jauyanama: ‘¿Ndayentše chë tsañe yojtsemna, Bashco saná atše atšbe uatsjëndayëngaftaca jasama ca?’” ¹²As cha cmochanjínñanyie canye bëts tsañe, tsbanana pisoca; ya lempe echántseprontana, y chentše, Bashco fiestama saná šochjapróna ca.

¹³As chë útata tbojána, y tbojáninýena lempe ntšamo Jesús tojanéyancá, y chentše chë Bashco saná tbojanprontata.

¹⁴Jasama tojanobuache ora, Jesús mesëshentše tojanótbema chabe uatsjëndayëngaftaca, chë cachënga más chcoye chabe ichmónënga ca uabáinënga. ¹⁵Chora Jesús tojanéyana: “Tša sëndánboše quem Bashco saná tšëngaftangaftaca jasama, atše cabá ndoñe chandësufri ora. ¹⁶Muentšana ndoñe más quemëntša saná quicháisese, Bëngbe Bëtsabe amëndayana candóshjanguëntscuana. Chora echantsótatšëmbo ntšamo quem fiesta ndegombre iuayancá ca.”

¹⁷Chorna canye coptema vínoyeca tojanaca, Bëngbe Bëtsábioye tbojtanchuá y mëntšá tojánayana: “Quem coptema vínoye menáfšenga; y cbéyana, ¹⁸chë uvas betiyentša shajuanentšana obocniye ndoñe más quichaisofsiye, Bëngbe Bëtsabe amëndayana candóshjanguëntscuana ca.”

¹⁹Chentšana, tandëse tojanca y Bëngbe Bëtsábioye tbojtanchuá; tojanjatá, tojanatšatá y mëntšá tojánayana: “Quem soye, atšbe cuerpo entsemna, y chanjóbana tšëngaftangbe tšabiama. Ntšamo mora bënga montsamcá šmochtsama, atšbiama jtenójuaboyama ca.”

²⁰Tmojansentsana, chë coptémaca tojanma cachcá ntšamo chë tandésecá tojanmcá y mentsá tojánayana: “Quem coptema vínoye entsemna chë Bëngbe Bëtsabe tsëm trato entsángaftaca. Atšbe buiñe echanjuábuashana, tsëngaftanga chašmotsetatšëmbuama ntšamo Bëngbe Bëtsá entsanga tojanašebuachenacá ndegombre yochjochnënguama. Chë buiñe tsëngaftangbe tsábiamá echanjuábuashana. ²¹Pero chë uayayëngbe cucuatšinë šochjaboshjoná, mesëshentše átšeftaca entsemna. ²²Ndegombre, chë Bëngbe Bëtsá Entšá tbojanbemaftaca echanjopása, ntšamo Bëngbe Bëtsá chabiamá tojanjuabocá. ¡Pero tša lastema chë bochjáboshjonabiama ca!” —Jesús tojánayana.

²³Chorna chë uatsjéndayënga tmojanontsé entjanayana, chënguentsá nda chë boshjuaná bëtsemnana.

Nda chë más uamaná yomna

²⁴Chë uatsjéndayënga imojtsenatsët-snaye chënguentsá nda chë más uamaná bëtsemnana. ²⁵As Jesús tojanéyana: “Chë ndoñe judiëngbeñe, chë reyënga chëngbe entsángbioye nye ntšámnaca jt-saméndayana, y chentša améndayënga jtsamana, entsanga chëngbioye tsábe soye amënga ca chamotsëbobaútmama. ²⁶Pero tsëngaftangbeñe ndoñe chca chaondëtsemna; chamna, tsëngaftangbeñe chë más uamaná mo chë más basacá chaóbema, y chë mandayá mo chë oservenacá. ²⁷Er, ¿ndase chë más uamaná yomna, chë mesëshentše jasama tojotbemá o chë uajuatšnayá? Ndegombre co chë mesëshentše tojotbemá; pero atšna tsëngaftangbeñe sëntsemna mo chë oservenacá.

²⁸“Atšbe padecéniñe tsëngaftanga sempre átšeftaca šmondëtsemna. ²⁹Chíyeca, atšbe bariëna, canye améndayana cbochanjátšataye,

ntšamo atšbe taitá canye améndayana šojatštacá; ³⁰chca, atšbe améndayoca mesëshentše átšeftaca šmochanjase y šmochanjofsiye, y uámana tbemaniñe mo reyëngcá šmochanjotbiamá, chë Israeloca bnétsana uta pamíllanga entsangbiamá chašmuayanama tsábá o ndoñe tsábá chënga tmonjamama ca” —Jesús tojánayana.

Jesús tojánayana, chábioye ndoñe bonjanabuátma ca Pedro yochjánayana

(Mt 26.31-35; Mc 14.27-31; Jn 13.36-38)

³¹Jesús mentsánaca tojánayana: —Simón, Simón; cochtsetatšëmbo, Satanás obenana tonjotjañe tsëngaftangaftaca nye ntšámnaca jamama, mo chë trigo matënga tcojtsashatiyeynacá; ³²pero atšna Bëngbe Bëtsá sënjaimpadá, átšbeñe ošbuáchiyana ndoñe chaomondëtsebuáshbenama. Y aca, nyets ošbuáchiyana átšbeñe chacojtsatsbomna ora, chë inyë ošbuáchiyënga cochjújabuache átšbeñe sempre chamotsošbuáchema ca.

³³Chora Simón tbojanianyana: —Bëngbe Utabná, atše sëntseprontana ácaftaca cárceloye jámnaca y jobanámnaca ca.

³⁴Y Jesús tbojanianyana: —Pedro, atše cbëyana, cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuátma ca.

Chë más jabuache ora yojtsobeco

³⁵Chentsana Jesús tojanatjá: —¿Chë ni shecnájaca, ni crocenánaca, ni she-cochëtjonésheca tcbonjanichamó ora, nderado ndayá tmojanabuáshebena ca? Y chënga tmojanjuá: —Tondaye ca.

³⁶Chora tojanéyana: —Mora ndoñe chca; shecnaja tobomná, chëja chauesocñe y crocenánama shecnëbénaca; y nda ndoñe espadëja tondbomna, chabe quëfsaíya chaotsatábuiye y canye espadëja chauatobuámiñe. ³⁷Er cbëyana,

entseyta átseftaca chaopasá, ntšamo Bëngbe Bëtsabe uabemana palabrënguine atšbiana iuayancá, mëntšá: “Y chábioye tmojáninýe mo chë puerte bacna soye amënguentšá canýa cuaftsemncá ca.” Y lempe ntšamo atšbiana iuabemancá, mora ya echanjochnëngo ca —Jesús tojanéyana.

³⁸ As chënga tmojaniyana: —Bëngbe Utabná, muentše uta espadéja entsemna ca.

Y japochócamna cha tojánayana: —Nýe nýetsá ponto ca.

Getsemaní luarentše, Jesús Bëngbe Bëtsáftaca tbojanencuentá

(Mt 26.36-46; Mc 14.32-42)

³⁹ Chentšana, Jesús tojánbocna y ntšamo yojanamancá Olivos tjashoye tojána, y chabe uatsjëndayënga tmojanasto. ⁴⁰ Choca tmojánashjajna ora, Jesús tojanéyana: “Bëngbe Bëtsá moimpadanga, bacna soye jamama ndoñe chacmondócochënguama ca.”

⁴¹ Y chë uatsjëndayëngbentsana yojoluára, mo canýe ndëtšbé jutšenéntscoca nýetsá, y yojoshéntsamentšiyë Bëngbe Bëtsáftaca jencuéntama. ⁴² Jesús mëntšá tojánayana: “Taita, aca tcojtsebošëse, moma atše ndoñe chašondëtsemna chca jasúfrianana. Pero ntšamo atše stsebošcá ndoñe chaondëtsemna, sinó ntšamo aca cojtsebošcá ca.”

⁴³ Chca orna celocana canýe ángel tbojánëbëbocna, añemo chaotsebomnama juajabuáchama. ⁴⁴ Jesús tša ngméniñe yojtsemna, y Bëngbe Bëtsáftaca más ibojtsencuéntaye. Y chabe bosesë yojtsemna mo fshantsiñe buiñe cuaftsebuastëtjuancá.

⁴⁵ Bëngbe Bëtsáftaca jencuéntama tojanpochocá ora, tojtantsbaná y chabe uatsjëndayënga imojtsemnoye tojána; y chënga imnétsomañe, tša ngménaca imojtsemna causa. ⁴⁶ Chora tojanéyana:

“¿Ndáyeca šmotsomañe? Motsbananga y Bëngbe Bëtsá šmochtseimpadana, bacna soye jamama ndoñe chacmondócochënguama ca.”

Uayayënga Jesús tmojánishache

(Mt 26.47-56; Mc 14.43-50; Jn 18.2-11)

⁴⁷ Jesús cabá yojtsóyebuambnantscuana, ba entšanga chentše tmojánashjajna. Chë Judas ca uabainá, canýa chë bnétsana uta uatsjëndayënguentšá, chë entšangbe natsana yojtsaye. Cha yojobeconá Jesús juamóchama; ⁴⁸ pero Jesús tbojaniyana: “Judas, ¿canýe juamochëse chë Bëngbe Bëtsá Entšá tbojanbemá uayayëngbe cucuatšinë cochjaboshjona ca?”

⁴⁹ Chë Jesúseftaca imojtsemnënga tmojáninýe ntšamo chora yochjanopásama; as tmojaniyana: —Bëngbe Utabná, ¿espadéjaca fšcotsatsejaye ca?

⁵⁰ Y canýa chënguentšá, chë bachnangbe más uámana amëndayabe bochichnayábioye catšbioica matscuaše tbojtsantëtše, y tbojtsanéštjango. ⁵¹ Chora Jesús tojanéyana: —Cachcá monýá; nýe nýetsá ponto ca.

Y chë bochichnayábioye chë matscuaše tbojánbojajo y tbojanshná.

⁵² Chentšana, chë bachnangbe amëndayënga, chë Bëngbe Bëtsabe bëts yebnentša soldadëngbe amëndayënga y chë judiëngbeñe bëtsëjemëngcá amëndayënga, chë cha juanatsama tmojánabënga, Jesús tojanéyana: “¿Ndáyeca espadéjangaca y ngarotbéngaca šmojabo atše jishachama, mo atše canýe bacá uamana entšá cuaftsemncá ca? ⁵³ Atše cada te tšëngaftangaftaca sënjamna Bëngbe Bëtsabe bëts yebnentše, y ni chešmánatbojajo. Pero ora tocjobuache tšëngaftanga chca chašmomama, y Satanás ntšamo yojtsebošcá tšëngaftangbeñe echantsemándaye ca” —Jesús tojanéyana.

**Pedro tojánayana Jesúsbioye
ndoñe bonjanabuátma ca**

(Mt 26.57-58, 69-75; Mc 14.53-54,
66-72; Jn 18.12-18, 25-27)

⁵⁴ Chentšana Jesús tmojánishache, y chë bachnangbe más uámana améndayabe yebnoye tmojanánatse. Y Pedro bënocana ibojtséstona. ⁵⁵ Choca, chashja tséntsaca, canýe íñeshe tmojanangbotjó y entšanga chë shéconana imojtsetbiámana; y Pédrénaca chentše chéngaftaca yojótbema. ⁵⁶ Chora, canýe shembásaca chentša oservená, Pédrëbioye tbojáninye chë íñe juachaca yojtsetbemana; tbojanonýinyé y tojánayana: —Muánaca cháftaca endánmëna ca.

⁵⁷ Pero Pedro ndoñe ca tojánayana, y chë shembásabioye mëntsá tbojanianana: —Sobrená, atše cha ndoñe quetsatabu-atma ca.

⁵⁸ Ndoñe yapa bën y inýa chábioye tbojátaninye y tbojanianana: —Acnaca chë uatsjendayënguentsá condmëna ca.

Pero Pedro tbojanjuá: —Bacó, atše ndoñe quetsátsmëna ca.

⁵⁹ Chentša benéntscosna, inýa más yojátayana: —Ndegombre, muánaca cháftaca enjánana; muánaca Galileocá entsemna ca.

⁶⁰ Y Pedro tojánayana: —Bacó, ndayama cojtsichámuama ndoñe quetsátstatšëmbo ca.

Cachora, y Pedro cabá yojt-sóyebuambnantscuana, canýe ngallo yojacánta. ⁶¹ Chora Bëngbe Utabná yojobuértana y Pédrëbioye tbojanonýinyé; y Pedro chora yojenójuaboye ntšamo Bëngbe Utabná tbojanianana: “Cam ibeta bínýanoye, ngallo cabá ndécánta ora, aca unga soye cochanjayana ndoñe šconduabuatma ca.” ⁶² As Pedro shjoye tojánbocna, y corente ngmënaca yojtsenóbošachna.

**Jesús imojtsáboyejuana
(Mt 26.67-68; Mc 14.65)**

⁶³ Chë Jesús imojtsebojanýá entšanga cha imojtsáboyejuana y imojtsejantšeye; ⁶⁴ y jtsabuchéntsacjuase, imojtsetjanaye: “¡Momalisiá, nda tcmënjantšetá ca!” ⁶⁵ Y imojtsóyenguaye, nýe mocá soyënga jtsatsëtsnayëse.

**Jesús, chë judiëngbe uámana
mándayëngbe delante**

(Mt 26.59-66; Mc 14.55-64; Jn 18.19-24)

⁶⁶ Tojanbinýna ora, chë bëtsë-jemëngcá améndayënga, bachnangbe améndayënga y ley abuatambayënga tmojánenefjna, y chéngbioye Jesús tmojanánatse. Choca tmojantjá: ⁶⁷ —Šméyana, ¿aca Bëngbe Bëtsabe Uámana Uabuayaná, chë Cristo comna ca?

Y Jesús tojanéjua: —Aíñe ca tbojáuyanëse, tsëngaftanga chama átsbeñe ndoñe quešmochatošbuáchiye. ⁶⁸ Y nderado tbojájatjasna, tsëngaftanga ndoñe quešmochatojuá ca. ⁶⁹ Pero cam orscana, chë Bëngbe Bëtsá Entšá tbojanbemá, chë Bëngbe Bëtsá nýets obenana bomnabe catšbioica echántatsbemana ca.

⁷⁰ Chora nýetscanga tmojantjá: —¿As, aca chë Bëngbe Bëtsabe Uaquiná comna ca?

Y Jesús tojanéjua: —Cach tsëngaftanga chca šmonsichamo; atše cha sëndmëna ca.

⁷¹ As chora chënga tmojánayana: —¿Ndayama más entšanga šochjátëjaboto Jesusbe contra chamuayanama? Er cach bënga chabe uayášentšana chca tmonjouena ca.

Jesús, Pilatbe delante

(Mt 27.1-2, 11-14; Mc 15.1-5; Jn 18.28-38)

23 Nÿetsca mándayënga tmojëftsantsbaná, y Pilátbioye, chë Judeoca mandádbioye Jesús tmojanantse. ²Y chentše tmojanontsé cha mal jaquédana, mëntsá: —Bënga fsënjínÿena mua entsabuatambá bacna soyënga, quem luarentša entsangbe amëndayëngbioye ndëtsayaunanama. Cha entsichamo bënga ndoñe šontsamna Césarbiama impuesto jtsatsquécjnyana ca; y entsichamo cha yomna chë Cristo, chë Bëngbe Bëtsabe Uámana Uabuayaná, mo canÿe reycá ca.

³Chora Pilato Jesúsbioye mëntsá tbojantjá: —¿Aca chë judiëngbe Rey cojtsemna ca?

Y Jesús tbojanjuá: —Aíñe, aca ndegombre yomncá tcjayana ca.

⁴As Pilato, chë bachnangbe amëndayënga y entsanga tojanéyana: —Atše ni mo canÿe soye chiyátinÿena, quem boyabása castiganá chaotsemnama jayanama ca.

⁵Pero chënga más tmojanáye-buachena: —Nÿets Israel luarëjana entsabuatambá, Galilea entsangbe amëndayëngbe contra jtsemnama. Galilea luaroca chca tonjabojatšé y mora moca Judeócnaca cachcá entsama ca.

Jesús Rey Heródesbe delante

⁶As Pilato, Galilea luarama yjouena ora, tojanatjá Jesús Galileocá tajojamnama. ⁷Y Jesús aíñe Galileoca yojamnama cha tojántatšëmbona ora, Rey Heródesbioye cha tbojanichmó. Herodes inamna Galileoca mandado y chora Jerusalenentše cha yojtsemna. ⁸Herodes Jesúsbioye tbojáninÿe ora, corente tojanoyejuá. Chana tempscana

inaboše Jesús jinÿama. Cha ba soyënga Jesusbiana tojanuena, y yojtseboše jinÿama Jesús jamana canÿe bëts soye, Bëngbe Bëtsabe obenánaca. ⁹Heródesna ba soyënga tbojantjá, pero cha ndocá tbojanjuá. ¹⁰Y chéntšnaca, chë bachnangbe amëndayënga y judiëngbe ley abuatambayënga imojtsemna, y Jesús corente mal imojtsequédaye.

¹¹Chora, Herodes y chabe soldadënga Jesúsbioye corente imojtsáboyënja, y jtsaboyejuanamna, botamana entsayangá tmojanichëtjo, mo canÿe reycá; chentšana cachiñe Pilátbioye tmojesanichmó. ¹²Cach te Herodes y Pilato tbojtananatsëtsaye; tempna chata ibojenáyata.

Jesusbiana chaóbona ca tmojánayana

(Mt 27.15-26; Mc

15.6-15; Jn 18.39-19.16)

¹³Chentšana Pilato, chë bachnangbe amëndayënga, chë pueblentša amëndayënga y nÿetsca entsanga tojánachembo, ¹⁴y mëntsá tojanéyana: —Tšëngaftanga quem entšá átšbioye šmojuánatse, mo bacna soye entšángbeñe abuatambayacá, mandadënga ndëtsayaunanama ca; tšëngaftangbe delante lempe sënjatjá, tšëngaftanga ba soyënga muabiana šmonjayana, pero atšna ni mo canÿe soye chiyátinÿena, quem boyabása castiganá jtsemnama ibojtsemna ca jayanama. ¹⁵Herodes cach ndoñe, chíyeca cachiñe béngbioye cha tbojesichmó. Quem boyabása ni mo canÿe ndoñe tonjobuachjanguá jóbanama chabotsemnama. ¹⁶Chcasna, jabuache chamotsecastigá y chentšana chanjétsboshjona ca —cha tojánayana.

¹⁷Yojamna canÿe utamená jëtsboshjona, ntšamo Bashco fiesta ora jamana imojanamancá. ¹⁸Pero chora entsanga cánÿiñe tmojanáyebuachena: —¡Jesús chaóbona! ¡Barrabás matsboshjona ca!

¹⁹ Barrabás inautámena, mandadéngbiyoye ndétsayaunanama ché bétspueblentše entsanga tojánenautanama y entsá óbanaye causa. ²⁰ Pilato cachiñe tojánayana Jesúsbiyoye jétsboshjonama yojtsanboše ca; ²¹ pero entsangna más tmojtétanayebuachena: —¡Motsecrucificá! ¡Motsecrucificá ca!

²² Pilato ya unga soyama tojtétanayana: —¿Ntšamo bacna soye sua tojobuachjanguá ca? Ni mo canye bacna soye chiyátinyena, mua jóbanama chabotsemnana. Chcasna, chanjacastíga y chora chanjétsboshjona ca.

²³ Pero chéngna más imojtsechembumbuana Jesús chamotsecrucificama. Cabana, ché bachnangbe améndayénga y ché entsangbe jabuache chembumbuanánaca, Pilato tmojanéyénaná Jesús chamóbama. ²⁴ As Pilato tojanmandá ntšamo ché entsanga imojtsotjanañcá chaotsemnana; ²⁵ as chora Pilato, Barrabásbiyoye cachcá tbojtanboshjona, ché nda inautámena mandadéngbiyoye ndétsayaunanama entsángbiyoye tojánenautanama y entsá óbanaye causa. Y Jesusna entsangbe cucuatšinié tbojánboshjona, ntšamo chénga tmojtsebošcá chamomama.

Jesús tmojanrucificá

(Mt 27.32-44; Mc 15.21-32; Jn 19.17-27)

²⁶ As jacrucificama Jesús tmojanánatse. Chora jajocana inátaboje canye boyabása, Simón ca uabainá, Cirene luarocá; y cha Jesusbe cruz tmojancutsá, Jesusbe ústonoye chaotsambama.

²⁷ Y banga ché pueblentša entsanga imojtséstona; y ché shembásenga imojtséstonéngna imojtsayošachiye y ngménaca imojtsaniyoye, Jesús chca yojtsepásama. ²⁸ As Jesús chéngbiyoye tojanobuértana y tojanéyana: “Jerusalenentša shembásenga, atšbiana ndoñe matošachena; cach

tšéngaftangbiama y tšéngaftangbe báséngbiama šmochjenóbošachna. ²⁹ Canye te echanjóshjango y ché te šmochántsicchamo: “Tša tšabá ché shembásenga šešona ndbomnéngbiama, ché quem luaroye šešonga ndoñe tmonjéftséshejajnéngbiama, y ché šešonga ndoñe tmonjéftsabachéngbiama ca.” ³⁰ Chora entsanga jetsóitanama mochántseboše y mochanjontsé ichámuana: “¡Tjashénga šmotsétebuantsá y batsjabenga šmotsaitame ca!” ³¹ Atše, ché ndocna bacna soye amá, chíyeca puerte obená, chca šmojaborlase, ¿ntšamo mochjama ché ndegombre bacna soye améngaftaca, chíyeca ndobenénga? O méntšá, ¿ché nguéšfshna betíyeca chca tmojtsamése, ntšamo ché tojtsebuashá betíyeca mochjama ca?” —cha tojanéyana.

³² Jesúseftaca cruciñe jóbanama, útata bétspueblentšá bacna soyénga ochjajnayátnaca imojtsénachaye. ³³ Ché “Obanabe Bestšashe ca” uabaina luaroye tmojánashjajna ora, Jesús tmojanrucificá y ché bétspueblentšá bacna soyénga ochjajnayátnaca, canya chabe catšbioica y ché ínñana chabe uañicuayoica. ³⁴ Chora Jesús méntšá tojánayana: “Taita, méngbe bacna soye motsaperdónaye, er ntšamo montsamama chénga ndoñe quemátstatšémbo ca.”

Ché soldadénga Jesusbe entsáyamna, tsbanánoye tmojanétséna, chénga jtená-jatayama. ³⁵ Entsanga chentše imojtsemnénga chca imojtsonyaye, y ché pueblentša mandayéngnaca Jesús imojtsáboyejuana y méntšá imojtsenatsétsnaye: “Inyengna aíñe tojéftsatsébacá; mora cachá chauentsbocá, cha ndegombre Cristo, ché Běngbe Bětsabe Uámana Uabuayaná tomněse ca.”

³⁶ Soldadéngnaca Jesús imojtsáboyejuana; tmojanobeconá y untja vínoye imojtsefšéšnaye, ³⁷ y méntšá imojtsat-

saye: “¿Chë judiëngbe Rey tcomnëсна, cach aca mentsbocá ca!”

³⁸ Jesusbe bestšáše juatsboicna canýe uabemana soye tmojananjo; chiñe mëntšá yojtšanábemana: MUA CHË JUDIËNGBE REY ENDMËNA ca.

³⁹ Canýe bëts bacna soyënga ochjajnayá yojtsecrucificaná, Jesúsbioye mëntšá tbojanóyenguango: —Chë Bëngbe Bëtsabe Uámana Uabuayaná tcomnëсна, mentsbocá y bëndátnaca šmatebocá ca.

⁴⁰ Pero chë inýe bëts bacna soyënga ochjajnayana mëntšá tbojanácacana: —¿Ni mo Bëngbe Bëtsá ndoñe condër-respetana? Bëndátnaca bontsamna chacá jóbanama. ⁴¹ Ndegombre bëndata muentše bontsemna bëts bacna soyënga ochjajnaye causa, y chíyeca chca jasúfriama bontsamna. Pero quem boyabása ni mo canýe bacna soye ndoñe tonjobuachjanguá ca.

⁴² Y chorna, quem bëts bacna soyënga ochjajnayá Jesúsbioye tbojaniyana: — Jesús, atšbiama cochtenójuaboye aca reycá jabomándama chacojtabo ora ca.

⁴³ Y Jesús tbojanjuá: —Ndegombre cbëyana, mënté átšeftaca celoca, chë nyëtscanga oyejuayënga mondbetsemnoca, aca cochantsatsmëna ca.

Jesús tojanóbana

(Mt 27.45-56; Mc 15.33-41; Jn 19.28-30)

⁴⁴ Nyëtsto orscana las tresëntscoñe nyëts quem luare yojtsebétata. ⁴⁵ Y shinýe yojtšajbaná binýnayana, y Bëngbe Bëtsabe bëts yebnentše yojtšjonýana entšéjua tsëntsaca yojtšenájataye. Chëjua bënëjua inauamna y chë tsatsëntsaca inajtšjonýana. ⁴⁶ As Jesús tojanáyebuachena: “Taita, atšbe espíritu acbe cucuatšhiñe šcoboshjona ca.”

Y chca jayanama tojanpochocá ora, tojanóbana.

⁴⁷ Chë romano soldadëngbe amëndayá chca tojáninýe ora, Bëngbe Bëtsábioye tbojtanadorá, mëntšá jayanëse: “Ndegombre, quem boyabása ainaniñe tšabe juabnënga bomná inamna ca.”

⁴⁸ Nyëtsca entšanga chë soye jinýama tmojánabënga, chca tojanopasama tmojáninýe ora, tmojanontšé jtangana enochjantšetaye, ngmënama. ⁴⁹ Pero Jesusbe nyëtsca ubuátmënga y chë shembásenga Galileocana tmojanastëngna, chaboca tmojanouquedá chë soyënga onýayañe.

Jesús tmojanatbontsá

(Mt 27.57-61; Mc 15.42-47; Jn 19.38-42)

⁵⁰ Yojanmëna canýe boyabása, José ca uabainá, canýe Judeoca pueblócá, Arimatea ca uabaina; cha inamna canýa chë pueblentša uámana amëndayënguentšá y canýe tšabe entšá y nyëtsca soyënguñe tšabá amá.

⁵¹ Chánaca yojanobátmana chë Bëngbe Bëtsabe amëndayana chaóshjanguama, y tondaye tbojanogustá ntšamo chë inýe amëndayënga tmojanjuabó y Jesúseftaca tmojanmcá. ⁵² Cha Pilátbioye tojána y Jesusbe cuerpo tbojanotjañe. ⁵³ José chë cruzocana Jesusbe cuerpo tbojtanéštjango, canýe lino entšéjuaca tbojanandmaná y canýe cuevëshiñe, peñëshiñe pormániñe, tbojanjajó. Chentše cabá ndocná mondejajo. ⁵⁴ Yëfsana ochnayté bëtsemnayecna, cach te yojanotocana saná japróntana chë yëfsana jasama; y chë ochnayté ya yojtsebinyana.

⁵⁵ Chë shembásenga, Galileocana Jesús tmojantjëmbambanga, tmojána y chë cuevëshe tmojáninýe, y tmojanrrepará ntšamo Jesusbe cuerpo tmojanjajoma. ⁵⁶ Yebnoye tmojtaná orna, tmojanprontá botamana uanguëtše bëjayënga y soyënga chë cuerpiñe janëtuama.

Chë ochnaytena chënga tmojanochná, ntšamo Moisesbe leyinë yojanmandancá.

Jesús tojtanayena

(Mt 28.1-10; Mc 16.1-8; Jn 20.1-10)

24 Y tmengo, chë inye semana bojatséntena, cabá cachëse, Jesús tmojanatbontsá cuevēshoye chë shembásenga tmojána, y tmojanamba chë tmojanprontá botamana uanguëtse soyënga. ²Pero choye tmojánashajna orna, tmojáninýena chë cuevēshoye amashjuantësá ndëtšbé chentsana juanániñe, ³y choye tmojánamashjna ora, Bëngbe Utabná Jesusbe cuerpo ndoñe tmonjáninýena. ⁴Chë shembásengna ndoñe imontsetátšëmbo ntšamo jajuaboyana chë soyama; chora, uta boyabásata, uabuashinýinýana entsáyá uichétjonata chentse tbojabantsaye. ⁵Y chë shembásenga tmojanëuatjanama y fshantsoye imojtsatsejbénama, chata tbojanéyana: “¿Ndáyeca obanéngbentšë chë vida totsobomñá šmojtsenguá ca? ⁶Muentse cha ndocná quenátsmëna, er cha ya tontayena. Menójuabonga ndayá cha tmojanéyanama, cha cabá Galileoca enjamna ora. Cha tonjánayana: ⁷Chë Bëngbe Bëtsá Entšá tbojanbemá bontsemna bacna soye amëngbe cucuatšinë chamoboshjonama, chamocrucificama y unga tianoye cháuatayenama ca” —chata tbojánayana.

⁸Chora chë shembásenga Jesusbe palabrëngama imojtenójuaboyle, ⁹y chë cuevēshentsana tmojtáná ora, chë tšabe noticiënga chë bnétsana canýe uatsjëndayënga y inye entsángbioye tmojanacuntá. ¹⁰Chë uatsjëndayëngbioye chca cuentayëngna imojamna María Magdalena, Juana, y María, chë Santiagbe mamá, y chë inye shembásenga

chëngaftaca imojamnënga. ¹¹Pero chë uatsjëndayëngna mëntšá chë shembásengbiama imojétsejuabnaye: “Chënga montsoyebuambná mo corente juabna ndbomnëngcá ca.” Y chca, chënga chë soyinë ndoñe montsanošbuaché.

¹²Pero chentšana, Pedro tojéftsantsbaná y ochamanana chë Jesús tmojanajó cuevēshoye tojána. Y choca yojtsemna ora, yojotsejbéna tsoye jontješiyama, pero nýe ena entsëjuangá yojuinýe, chë Jesús tmojanbochmëjuangá. As Pedro ojnananá yebnoye yojtá, chca tojanopasama.

Chë Emaús puebloye benachiñe

(Mc 16.12-13)

¹³Cach te, uta uatsjëndayata Emaús puebloye ibojtsaye. Emaús yojamna Jerusalenocana bnétsana canýe kilómetroca. ¹⁴Chata ibojtsayencuëntayate lempe ntšamo tojanopasama. ¹⁵Y tojanopasá, ibojtsencuëntayate y ibojtsenatsëtsnayentscuana, cach Jesús tojanobeconá y chátaftaca cánýinë yojtsaye; ¹⁶masque imojtsonýaye, ndoñe ibontsobena cha jótëmbana. ¹⁷Jesús tojanéyana: —¿Ndayama benachiñe šuabanencuëntayate ca?

As chata ngménaca ibojtsaye, ¹⁸y canýa, Cleofás ca uabainá, tbojaniyana: —¿Nýe aca cojtsemna, inye luarocana ashjanganá Jerusalenentse oyená, ndayá chentse quem diënga yopasánama ndëtatšëmbuá ca?

¹⁹Chora cha tojanéyana: —¿Ndaye soyënga ca?

Y chata tbojaniyana: —Chë Jesús Nazaretocáftaca tonjopasá soyëngama. Cha enjamna canýe Bëngbe Bëtsabe juabna oyebuambnayá, puerte obenana bomná ndayá jamama y jayanama, Bëngbe Bëtsabe delante y nýetsca entsangbe delante. ²⁰Y ntšamo, chë bachnangbe amëndayënga y

chentša mandadënga ínÿengbe cucuatšínë tmonjáboshjona, jóbanama ibojtsemna ca entšanga chamuayanama y chamocrucificama. ²¹ Bënga chabiana fsënjanóbátmana, Césarbe cucuatšentsšana Israeloca entsangbe atsebacayá chaotsemnama; pero morna ya unga te entsemna chca tonjopasá. ²² Y mora ndayá, básefta shembásenga bëngbe enutënga ójnanana soyënga šonjáuyana. Chënga cabá cachëse chë Jesusbe cuerpo tmonjanjájó cuevēshoye tmonjá, ²³ y chabe cuerpo ndoñe tmonjínÿena; as chora chënga bëngbioye tmontabo y montsabíchamo angelënga tmojëftsanÿe y chënga catmënjayana cha ainá yojtsasmëna ca. ²⁴ Bëngbentsšana baseftángnaca chentšana chë cuevēshoye tmonjá, y tmojínÿena ntšamo chë shembásenga tmonjayancá, pero Jesús ndoñe tmonjëftsínÿe ca —chata ibojtsichamo.

²⁵ As Jesús chata tojanéyana: —¡Tša juabna ndbomnënga y tša uenana jošbuáchiyama, chë Bëngbe Bëtsabe juabna oyebuambnayënga tmojánayana soyëngama! ²⁶ ¿Mo ndoñe yonjamna chë Uámana Uabuayaná chë soyënga chaosufrima, y chentšana nÿetsca entšanga corente cha chamuatschuama ca?

²⁷ Chentšana Jesús tojanontsé chata jábuayenana, lempe ntšamo chabiana yojanoyebuambnacá chë Bëngbe Bëtsabe uabemana palabrenguiñe; yojontsé Moisesbe librëšangañe y chë Bëngbe Bëtsabe juabna oyebuambnayëngbe librëšangañnaca.

²⁸ Chë ibojétsaye puebloye imojtsebeconá ora, Jesús tojanma mo más chcoye cuaftsacá. ²⁹ Pero chatna tmojanatarié chentše chaotsoquedáñama, mëntšá jauyanëse: —Bëndátaftaca motsoquedañe; ya jetiñe entsemna y ya echanjaibétata ca.

As Jesús chátaftaca tojtsanoquedañe. ³⁰ Chentšana tojanopasá, juasama mesëshentše imojtsetbiámana ora, Jesús chë tandëse tojanca, Bëngbe Bëtsábioye tbojtanchuá, chë tandëse tojanjatá, y chata tojanatsatá. ³¹ As, chora chë uatsjëndayata ibojobenaye Jesús jótëmbana; pero chana nÿe ndeolpe yojuenatjëmbe. ³² Chora chata ibojtse-natsëtsnaye: “Chë benachiñe Bëngbe Bëtsabe uabemana palabrengama šondabuayiná ora, ndegombre bëngbe ainaniñe más bontseboše cha más chašotsabuayinayama, ¿ndoñe chca ca?”

³³ As, cachora tbojëftsantsbanata y Jerusalenoye tbojtanata; choca tmojínÿena chë bnëtsana canÿe uatsjëndayënga cánÿentše imojtsemna y chëngbe enutëngnaca; ³⁴ y mëntšá imojtsichamo: —¡Ndegombre Bëngbe Utabná tojtayena; Simónbioye tbojébëbocna ca!

³⁵ As chata tbojanontsé jacúntana, ntšamo benachiñe tbojanpasacá, y ntšamo Jesúsbioye imojótëmba, chë tandëse tojanjatá ora.

Jesús chabe uatsjëndayënga tojánebebuacna

(Mt 28.16-20; Mc 16.14-18; Jn 20.19-23)

³⁶ Chë uatsjëndayënga chë soyëngama cabá imojtsencuëntantscuana, Jesús chëngbe tsëntsaca tojabántsaye y mëntšá tojanéyana: “Chë atšbe ainaniñe tšabe ebionana tšëngaftangaftaca chaotsemna ca.”

³⁷ Pero chënga tša auatjanánënga imojtsemna, y canÿe añemëse imojétsonÿaye ca imojtsejuabnaye. ³⁸ Pero Jesús tojanéyana: “¿Ndáyeca auatjanánënga šmojtsemna? y ¿ndáyeca tšëngaftangbe ainaniñe chca šmojtsejuabná ca? ³⁹ Atšbe cucuatšënga y atšbe shecuaštënga minÿënga; šmobjajo y šmochanjínÿe. Cach atšbe séntsemna. Canÿe añemësna, ni mëntšena ni betašënga ntsebomnana;

pero tšëngaftanga šmontsonjá, atšna aífne ca” —tojanéyana.

⁴⁰ Chca yojsichámëse, chabe cucuatšënga y chabe shecuatšënga tojaninýanýé. ⁴¹ Y chënga cabá ndoñe montsanošbuaché, chca noticiama corente imojtsóyejuama y tša ojnánänënga imojtsemna causa; as Jesús tojanatjá: “¿Muentše ndayá jasama quešmëbomna ca?”

⁴² As canýe tabena buana beonbiana tmojanoyé; ⁴³ Jesús tojanocñe y chëngbentše tojanse. ⁴⁴ Chentšana Jesús tojanéyana: “Quem palabrénga entsemna ntšamo cabá tšëngaftangaftaca sënjamna ora tcbonjanëyancá: Entsemna, lempe chaopasá ntšamo atšbiana iuabemancá, Moisesbe leyënguifne, chë Bëngbe Bëtsabe juabna oyebuambnayëngbe uabemana librëšangañe y Salmos librëšañnaca ca.”

⁴⁵ Y chora chë uatsjëndayënga, Jesúsbeyeca tmojanobená chë Bëngbe Bëtsabe uabemana palabréngama josértana. ⁴⁶ Chentšana Jesús tojanéyana: “Ntšamo atšbiana iuabemancana yomna, chë Bëngbe Bëtsá Entšá tbojanbemá chaosufrí y unga tianoye chauatayena ca. ⁴⁷ Y morna atšbe uabaina jayanëse,

átšbeñe betsošbuáchema, nýets quem luarentše šmochjóntša entšanga atšbiana jábuayenama, bacna soyënga amana chamuajbanama, as chca, Bëngbe Bëtsá chëngbe bacna soyëngama cháuperdonama; chë soyënga Jerusalemntše chaobojatšé. ⁴⁸ Tšëngaftanga atšbiana soyënga šmonjinýe y šmondétatšëmbo. ⁴⁹ Atšbe Taitabe šbuachenaná, tšëngaftangbiana chanjichmua. Pero morna camuentše Jerusalemntše moquedanga, Bëngbe Bëtsabe obenana chašmóyëngacñëntscuana ca” —cha tojanéyana.

Jesús celoye tojtantsjuá

(Mc 16.19-20)

⁵⁰ Chentšana, Jesús chabe uatsjëndayënga ínýoye tojanënatse, Betania pueblo béconana. Y chabe buacuatšënga játsbanase, Bëngbe Bëtsá tbojanimpadá chë uatsjëndayënga tšabe benedicionënga chamóyëngacñama. ⁵¹ Chca yojsamëntscuana, cha chëngbentšana tojanoluaré y tojanontšé celoye játsjuana. ⁵² Chë uatsjëndayëngna, Jesús tmojtanadorá chentšana, Jerusalemoye oyejuayënga tmojtaná; ⁵³ y cada te, Bëngbe Bëtsabe bëts yebnoye imojánajna, Bëngbe Bëtsá jëtschuayama.

San Juan

Cristo, chë Bëngbe Bëtsabe Uámana Oyebuambnayana ca Uabainá

1 Quem luare ndobojátša ora, Cristo, chë Bëngbe Bëtsabe Uámana Oye-
buambnayana ya yojtsemna; chora cha,
chë chca uabainá, Bëngbe Bëtsáftaca y-
jtsanmëna, y cachá Bëngbe Bëtsá in-
amna. ²Ndegombre cha, chë tempscana
Bëngbe Bëtsáftaca yojtsanmëna. ³Cháf-
taca, Bëngbe Bëtsá lempe tojanma; cháf-
taca ndóñesna, lempe ntšamo mora
yomncá, Bëngbe Bëtsá tondaye matën-
janma. ⁴Cachábeñe nyets vida inamna,
y quem vídaca tojánabo quem luarentša
entsangbe juabnënga jabuábinÿnayama.
⁵Cha tonjánabo moye, chë entsangbe
juabnënga ndoñe binÿniñe yonjamnoye,
chiñe jabobínÿnayama. Cha sempre chca
yobínÿna, y Satanás chë entsangbe juab-
nënga ndoñe binÿniñe chaondëtsem-
nama amá, ndoñe yondobena chë binÿ-
nayabe obenana jtsejuánana.

⁶Inamna canÿe boyabása,
Juan ca uabainá; y Bëngbe Bëtsá
tbojanichmó, ⁷binÿnayabiama
chaóyebuambama; entsangbeñe
binÿnayabiama cháuyanama, chca,
ntšamo Juan chë binÿnayabiama
tojayana soyéngaca, nyetscanga
Jesúsbeñe chamotsošbuáchema. ⁸Juan
ndoñe yonjamna chë binÿnayá. Cha
inamna canÿe ichmoná, chë nda
binÿnayá yomnabiama entsangbeñe
chauabáyanama. ⁹Chë ndegombrá
quem luaroye tonjánabo chë entsangbe
juabnënga jabuábinÿnayama.

¹⁰Chë Bëngbe Bëtsabe Uámana Oye-
buambnayana quem luariñe yojtsan-
mëna; masque cháftaca Bëngbe Bëtsá
quem luare tojanma, nda cha yojam-
nama muentša oyenënga ndoñe monján-

tatšëmbo. ¹¹Cachabe luare entsangbiroye
tonjánabo, y entsanga ndoñe tmonján-
bošena cha jofjana. ¹²Nyetscanga, ndë-
muanÿenga cha tmojanébuaja y chábeñe
tmojtsošbuáchenga, cha derecho ton-
janatšatá jtsobenama Bëngbe Bëtsabe
básenga ca jtsabáinama. ¹³Quem os-
buáchiyëngna, chca jtsemnama ndoñe
tmonjanobená entsangbe buiñentsana
tmojanonÿnáyeca, o ndaye entsabe juab-
nentsana. Nÿe Bëngbe Bëtsábeyeca chca
chabe básenga imojtsabaina.

¹⁴Cha, chë Bëngbe Bëtsabe Uámana
Oyebuambnayana, entsá tojanóbema,
y quem luare béngaftaca yojéftsiyena.
Cha yomna chë Bëngbe Bëtsabe
nÿe canÿe Uaquiñá; chíyeca bënga
tifjáninÿe chabe bëts obenana y
chabe tšabe juabna, chë Bëngbe
Bëtsábentsana tojanóyëngacñana.
Cha corente jtsababuánÿeshanëse
šojánanÿena y yojéftsiyena ntšamo
ndegombre inamncá. ¹⁵Juan mëntšá
chabiama yojanáyebuache: “Chabiama
sënjanoyebuambná, chë ndabiama
chora atše sënjánayana, chë átsbentsana
jabamana atšbiama más uamaná
endmëna, er atše cabá ndonÿna orna,
cha ya yojtsemna ca.”

¹⁶Cha tša tšabe ainana bómnyeca,
bënga nyetscanga mallajta tšabe
bendicionënga tmojóyëngacñe.
¹⁷Moisesbiajana tifjanóyëngacñe chë
Bëngbe Bëtsá tojanmandá soyënga.
Pero Jesucristbeyeca, Bëngbe Bëtsá
tšabe bendicionënga bëngbiama tojama
y chë ndegombre soyënga bënga
tmojëftsashjache. ¹⁸Ndocná, ndocna te
Bëngbe Bëtsábioye tbonjinÿe. Chë nÿe
canÿe Uaquiñá ibobomná, cach Bëngbe
Bëtsá yomna; y cha, Bëngbe Bëtsá
chë Taitáftaca cánÿiñe mo canÿacá
yomna. Mua, chë Uaquiñá, bëngbiama
tojama, Bëngbe Bëtsá juabuátmanama
chaotsopodénama.

**Juan chë Ubayaná
Jesucristbiana tojanabuayaná**

(Mt 3.11-12; Mc 1.7-8; Lc 3.15-17)

¹⁹ Canÿe te, Jerusalenoca judiënga tmojanichamó básefta chëngbe bachnanga y levitënga, chë Bëngbe Bëtsabe bëts yebnoca trabájayënga, Juan yojtsemnoye, cha nda bëtsemnana chamuatjayama. ²⁰ Chocna, Juan chëngbeñe ndegombre tojanobuambá: —Atše, chë Bëngbe Bëtsabe Uámana Uabuayaná ndoñe quetsásmëna ca.

²¹ As chora, cachiñe tmojantjá: —As, ¿ndase cojtsemna? ¿Chë Bëngbe Bëtsabe juabna oyebuambnayá Elías ca?

Y Juan tojanéjua: —Atše cha ndoñe quetsásmëna ca.

Chora chënga tmojantjá: —As, ¿chë Bëngbe Bëtsabe juabna jabóyeuambayama jabamá ca?

Y Juan tojanéjua: —Ndoñe ca.

²² Chora chënga tmojaniana: —Asna, ¿aca ndase cojtsemna? Bënga šontsamna nda aca cojtsemnana jtsetatšëmbuana, as chë šonjadespachenga jacúntama. ¿Ndayá cojtsobena cach acbiana jayanama ca?

²³ Y Juan mëntšá tojanéjua: —Atše séntsemna chë ndabiama Bëngbe Bëtsabe juabna oyebuambnayá Isafás mëntšá tojanábema: “Entšanga ndoyenoca canÿe abuayiyayá echántsemna, y entšanga mëntšá echántsabuyiyayaye: Bëngbe Utabná echanjabo ca. Mo nda canÿe benache tojtseprontacá, tšëngaftángnaca cachcá, cha jabama tšabe juabnéngaca šmochtseprontana ca.”

²⁴ Chorna, báseftanga chë fariseungbe ichmónënguentšana, ²⁵ Juan tmojantjá: —Chë Bëngbe Bëtsabe Uámana Uabuayaná, Cristo ca uabainá, ndoñe tcontsemnëna, ni Elías, ni chë Bëngbe Bëtsabe juabna jabóyeuambayama

jabamá ndoñesna, ¿ndáyeca entšanga cojtsëbayana ca?

²⁶ Chora Juan tojanéjua: —Atšna, béjayeca entšanga sëndëubáyana. Pero tšëngaftangbeñe canÿa entsemna; cha ndoñe quešmatábuatma; ²⁷ y cha atšbe ústonoye echanjášhango. Atše mercedo taitatobuajoñe, ni mo jotsejbiyama, chabe shecochëtjonëshentša corriëja jajafjonama ca.

²⁸ Chca tojanopasá, canÿe pueblo Betania ca uabainentše, Jordán béjaye chenguana. Cach béjayeñe, Juan entšanga yojanëbayana.

**Jesús chë Bëngbe Bëtsabe
Oveshatema ca uabainá**

²⁹ Yëfsana, Juan yojtsemnoye Jesús yojtsebëconaye, y chë cháftaca imojtsemna entšanga tojanéyana: “Šmochjinÿe. Chë nda Bëngbe Bëtsá tbojichmó y iytanana Oveshatemcá entsobiamná cha, entsashjajuana ca. Cha jóbane, quem luarentša entšanga bacna soyëngama perdonánënga mochántsemna. ³⁰ Atše chabiama cbonjutsësná, mëntšá sënjanayana ora: ‘Atšbe ústonoye canÿa echanjášhango. Cha atšbiana más uamaná endmëna, er atše cabá ndonÿna ora, cha ya yojtsemna ca.’ ³¹ Tempna, cach atše ndoñe quetsjátantatšëmbo nda cha bëtsemnana. Pero atšna ínÿenga béjayeca ubáyana sëndabó, Israeloca entšanga quem boyabása chamuábuatmanama ca” —Juan tojanéyana.

³² Chentšana Juan mëntšánaca tojanobuambá: “Chabiama mëntšá bomiñe sënjanajájó: chë Uámana Espiritu, mo canÿe palomatemcá, celocana tonjánastjango y quem boyabásabe juatsbuañe tonjanototóná. ³³ Atše cabá ndoñe quetsjátantatšëmbo nda cha bëtsemnana, pero chë béjayeca jubáyama šonjanichmó cha, mëntšá šonjaniana: ‘Nda

chacojinÿe, chë Uámana Espíritu jast-janguana y chabe juatsbuañe jototonana, chábeyeca atše chanjíchmuá chë Uámana Espíritu entsangbe ainaniñe cháuamashënguama ca.’³⁴ Y morna, atše aiñe chca tijinÿe, y ndegombre tšëngaftanga cbéyana, cha chë Bëngbe Bëtsabe Uaquiñá entsemna ca” —cha tojanéyana.

Chë Jesusbe natsana ústonënga

³⁵ Yëfsana, Juan chabe uatsjéndayënguentsana útataftaca cachoca yojtësemna. ³⁶ Jesús yojtsachñëjuanama, Juan tbojáninÿe ora, tojanéyana: “Šochjinÿe. Mua entsemna nda Bëngbe Bëtsá tbojichmó y iytanana Oveshatemcá entsobiamná cha ca.”

³⁷ Chora chë Juanbe uta uatsjénday-ata, chca tbojanuena ora, Jesús tmojanasto. ³⁸ Jesús tojesanontjesé y tojáninÿe chata imojétsëstonama. As, tojanatjá: —¿Ndayá šojtsenguá ca?

Y chata tbojaniyana: —¿Rabí, ndayentše icoyena ca? (Rabí endayana “Buatëmbayá ca”).

³⁹ Chora Jesús tojanéjua: —Mabo y šochjinÿe ca.

As chata tbojána y tbojáninÿe ndayentše cha yojaniyenana. Y chentše cháftaca tojéftsanajetana, ya jetiñe mo las cuatro ora yojtsemna causa.

⁴⁰ Chë Jesusbiama oyebuambnayana Juánbioye tbojanóyeunata y Jesús tbojanasto útatentšana cányana Andrés ca yojanabaina; cha yojamna Simón Pédrëbe catšata. ⁴¹ Andrés, cabá ndocna inÿe soye ndëma ora, tojána chabe catšata Simón janguanguama. Y tbojáninÿena ora, Simónbioye tbojaniyana: “Chë Bëngbe Bëtsabe Uámana Uabuayaná, Cristo, fsënjínÿena ca.”

⁴² Chentšana Andrés, Simónbioye tbojanánatse Jesús yojtsemnoye.

Jesús, Simónbioye tbojáninÿe ora, tbojaniyana: “Aca condmëna Simón, Jonasbe uaquiñá, pero Cefas ca cochantsabaina ca.” (Chcana endayana “Pedro o ndëtšbé ca”).

Jesús, Felipe y Natanael tojánachembo chamuastama

⁴³ Yëfsana, Jesús tojanjuabó Galilea luaroye jama. Benachiñe Felípbioye tbojáninÿena y tbojaniyana: “Šmasto ca.”

⁴⁴ Chë boyabása Felipe, Betsaida pueblócá inamna. Andrés y Pédrëna cach pueblócata ibnamna. ⁴⁵ Chentšana Felipe tojána Natanael janguanguama; y tbojaniyana: —Chë ndabiamá leyënga libréšangañe Moisés tojanábema cha fsënjínÿena ca. Cachabiamá, Bëngbe Bëtsabe juabna oyebuambnayëngnaca tmojanábema. Cha Jesús entsemna, Josebe uaquiñá, chë Nazaretocá ca.

⁴⁶ Chora Natanael tbojaniyana: —¿Ndaye tšabe soye Nazaretocana nanjopódia jóbocnama ca?

Y Felipe tbojanjuá: —Mabo y cochjinÿe ca.

⁴⁷ Natanael yojtsebëconama, Jesús tbojáninÿe ora tojánayana: —Moye canÿe entšá entsabó; cha ndegombre endomercena Israelbentsana entšá jtsemnama. Cha tšabe entšá endmëna; ndocnábioye quebnatsíngña ca.

⁴⁸ Chora Natanael Jesúsbioye tbojan-tjá: —¿Ntšamo atše šcuabuatma ca?

Y Jesús tbojanjuá: —Felipe cabá aca ndëchembo ora, atše tcbonjinÿe, chë higo betiye tēchetšoye condëtsomñe ora ca.

⁴⁹ As, Natanael tbojaniyana: —Buatëmbayá, ¡aca chë Bëngbe Bëtsabe Uaquiñá comna! ¡Aca, chë Israeloca entsangbe Rey ca!

⁵⁰ Chora Jesús tbojanjuá: —¿Aca átšbeñe cojtsošbuaché, nÿe chë higo betiye tēchetšoye tcbonjinÿe ca tcbojauyanama? Ndegombre, chë

soyama más bëts soyënga cochanjinÿe ca.

⁵¹ Chentsana Jesús tojanéyana: — Ndegombre šcuayana: Tšëngaftanga š-mochanjinÿe celoca atëfjniñe, y Bëngbe Bëtsabe angelotëmënga jtsëtsjuajnana y jtsastjajuanana Bëngbe Bëtsá Entšá tbojanbemabe tatsëtsoca.

Canÿe casamento Galilea luaroca, Caná pueblentše

2 Chentsana unga tianoeye, canÿe casamento inamna, canÿe pueblentše Caná ca uabáinentše, Galileoca. Chë oboyejuayoca Jesusbe mamá yojtsemna. ² Jesús y chabe uatsjëndayëgnaca chë casamentoca ófjanënga imojtsemna. ³ Chë oboyejuayentše, vínoye yojtsopochóca y Jesusbe mamá tbojaniana: —Ya tondaye vínoye quemátsbomna ca.

⁴ As, Jesús tbojanjuá: —Mama, ¿ndáyeca chca atše šcojtsatsá? Atšbe ora cabá ndoñe ntjoshjanguana ca.

⁵ Chentsana, chabe mamá, chentsa oservénënga tojanéyana: —Lempe šmochjama, ntšamo cha chacmojuayancá ca.

⁶ Chocna, chnënguana ndëtšbé matbaja inamna. Chca matbajënguentša béjayeca, judiënga imojanamana jtsacuëntšabiana cabá ndëse ora, ntšamo tempo entšanga imojanamancá, Bëngbe Bëtsabe delante tšábënga jtsatsmënama. Cada matbajiñe, mo shachna o canÿsëfta bnëtsanájuá bėjaye yojanába.

⁷ Chora Jesús chë oservénënga tojanamëndá: “Quem matbajënga béjayeca mobuajutetjé ca.” Y chënga, chora lempe tmojanbuajutetjé.

⁸ Y Jesús tojanéyana: “Morna, báseye mobuatsjo y chë fiesta otocanábioye mabuyamba ca.” Y chënga chca tmojanma.

⁹ Chora, chë fiesta otocaná, chë bėjaye Jesús vínoye tojanbemiye tojanftantiá,

ndémocana yojóbocnama ntsetatšëm-bcá. Pero chë oservénëngna aíñe imojtsetatšëmbo ndémocana, er cachënga chë bėjaye tmojanbuatsjo. As, chë fiesta otocanana, chë bobontse bouam-nábioye tbojanchembo, ¹⁰ y tbojaniana: “Nÿetscanga monduamana natsana chë más uámana vínoye jushebëcana, y chë ófjanënga becá tmojatëmo ora, chë más batsá uámaniye. Pero acna, chë más uámana vínoye morscama tcojtsabofjajó ca.”

¹¹ Ntšamo Jesús tojanmcá Caná pueblentše, Galileoca, yojamna chabe natsana bëts soye Bëngbe Bëtsabe obenánaca. Y chca, chabe bëts obenana y uámanana cha tojaninÿanjé; y as, chabe uatsjëndayënga chábeñe imojtsošbuaché.

¹² Chca tojanopasá chentsana, Jesús canÿe pueblo, Capernaum ca uabáinoeye tojtsanoñe. Chorna, chabe mamá, chabe catsátanga y chabe uatsjëndayënga cha tmojantjëmbambá, y choca baseftatescama tmojanoqedá.

Jesús Bëngbe Bëtsabe bëts yebnentšana bacna entšanga tojtanëbuacna

(Mt 21.12-13; Mc 11.15-18; Lc 19.45-46)

¹³ Ya canÿe judiëngbe bëts fiesta, chë Bashco fiesta yojétsobeco, chë ntšamo Bëngbe Bëtsá chëngbe bëts taitanga Egiptocana tojánatsebacama jtenójuaboyama. Chë fiestama Jesús Jerusalenoye tojána. ¹⁴ Jerusalenoca, Bëngbe Bëtsabe bëts yebnentše, Jesús tojánanyëna uacnënga, oveshënga y paloma enënga, y entšángbioye crocénana atrócayënga, chëngbe luarënguenache imojtsetbiámana. ¹⁵ Jesús chca tojánanyë ora, białënga tojanaca, tjanjanëja tojanobopormá, y Bëngbe Bëtsabe bëts yebnentšana nÿetscanga tojtanëbuacna, chëngbe oveshënga y uacnëngaca.

Chentsana Jesús, Bëngbe Bëtsabe bëts yebnentsama yojanoservena crocénana atrocayëngbe crocénana tojtsanëjquësheshe, y chë mesëshangá tojtsanenásatajchquëca. ¹⁶ Chë paloma enëngna Jesús tojanéyana: —¡Quem soyënga lempe muentšana matábocana! ¡Ndoñe matsbuamnana ni mátenana atšbe Bëtsabe yebnentsë, mo cányentsë jiyama luarentšë cuaftsemncá ca!

¹⁷ Y as, chabe uatsjëndayënga tmojanenojuabó ntšamo Bëngbe Bëtsabe uabemana palabrenguine iuayanama: “Bëngbe Bëtsabe yebna jtseboguianama juabna, nyets átsbeñe entsemna ca.”

¹⁸ Chora, judiënga Jesús tmojantjá: —¿Ndaye bëts soye cochjama bënga chašcuinyanýema, aca ndaye deréchoca bëngaftaca chca cojtsobenama ca?

¹⁹ As Jesús tojanéjua: —Quem Bëngbe Bëtsabe yebna menásatajchca, y atšë unga tese chtëtsbaná ca.

²⁰ Chora chë judiënga tmojaniyana: —Canta bnëtsana chnénguana uatiñe, quem Bëngbe Bëtsabe yebna tmojanjebo. ¿Y aca, nyë unga tese lempe cochtëtsjebo ca?

²¹ Pero Bëngbe Bëtsabe yebna, ndayama chora cha chca tojánayana, cachabe cuerpo yojtsemna, ndoñe chë jebna soye. ²² Chama, Jesús obanënguentšana tojtanayena ora, chabe uatsjëndayënga tmojanenojuabó ntšamo muentšë cha tojanéyanama. Chca ora, Bëngbe Bëtsabe uabemana palabrenguine y Jesús chora tojánayana palabrenguine más chënga imojtsošbuaché.

Jesús nyetsca entsangbe juabna iuábuatma

²³ Jesús Jerusalenoca chë Bashco fiestama yojtsemnentscuana, entsanga tmojáninye Jesús jamana bëts soyënga Bëngbe Bëtsabe obenánaca. Chíyeca, ba entsanga chábeñe imojtsošbuaché.

²⁴ Pero Jesús chëngbeñe ndoñe yontsošbuaché, cha nyetscanga yojanëbuatma causa. ²⁵ Y Jesús ndoñe bonjanájaboto chë entsangbe soyëngama chabotsebuaiynama, er cachá entsangbe ainaniñe nyetsca juabnënga yojanábuatma.

Jesús y Nicodemo

3 Inamna canye boyabása Nicodemo ca uabainá. Cha yojamna fariseunguentšá y judiëngbe canye amëndayá. ² Chana ibeta Jesúsbioye tojána y tbojaniyana: —Buatëmbayá, bënga fsëntsetatšëmbo aca canye buatëmbayá comnama, Bëngbe Bëtsabe ichmoná. Ndocná quenátobena jamana quem bëts soyënga, aca contsama soyënga, Bëngbe Bëtsá cháftaca ndoñe tontsemnëse. Chíyeca bënga chca fsëntsetatšëmbo ca —cha tbojaniyana.

³ Chora Jesús tbojanjuá: —Ndegombre cbëyana, nda ndoñe cachiñe tontonýná, cha ndoñe quenátobena Bëngbe Bëtsabe amëndayana jinýama ca.

⁴ Y Nicodemo tbojantjá: —¿Ntsamo, canye entšá ya bëtsá tojtsemna ora, nantsobena cachiñe jtónýnama ca? Ndegombre, cha ndoñe ntsobenana cachabe mamabe cuerpiñe jtamashënguana cachiñe jtónýnama ca.

⁵ Chora Jesús tbojanjuá: —Ndegombre cbëyana, béjayeca y chë Uámana Espíritbeyeca ntjonýnacá, ndocná quenátobena Bëngbe Bëtsabe amëndayoye jamashënguama. ⁶ Nda bëtsëtsabentsana tojonýná cha, quem luarentša entsangcá jtsemnana; pero chë Uámana Espíritbeyeca tojonýná chana, jtsemnana canya chë Uámana Espiritu ainaniñe bomná. ⁷ Ndoñe matenjnanana ntšamo tbonjauyanama: “Nyetscanga entsamna cachiñe jtónýnama”. ⁸ Chë binýia ndëmuajana tojtsebošë jtsemnama, chëjana jtsanana. Masque entsanga, chë binýiyama jtsuenanana, ndoñe ntsetatšëmbuana ndé-

mocana yobama y ndémoye yojtsoma. Cachá, tsëngaftanga ndoñe quešmátstátšëmbo ntšamo entšanga chë Uámana Espíritbeyeca tmojtsónýnama; pero tsëngaftanga šmontsetátšëmbo aínë chca yomnama ca —Jesús tbojaniana.

⁹Chora Nicodemo tbojantjá: —¿Ntšamo chca nántsemna ca?

¹⁰Y Jesús tbojanjá: —Aca, canýe Israeloca abuatambayá, ¿chë soyëngama ndoñe condétatšëmbo ca?

¹¹Ndegombre cbëyana, bëngna chë fststátšëmbo soyëngama fsëntsoyebuambná, y chë tifjinýe soyëngama ndegombre bétsemnama fséntsichamo. Pero tsëngaftangna, chë cbontsëtsëtsná soyënguínë ndoñe quešmatošbuaché.

¹²Atšë, quem luarentša soyëngama sënjoyebuambá y tsëngaftanga átsbeñe ndoñe chešmatošbuaché. Y as, ¿ntšamo átsbeñe šmochtsošbuáchiye, celoca soyëngama cbojtsëtsëtsnase?

¹³“Ndocná, nýe cachábeyeca Bëngbe Bëtsábioye tonjátsjua. Nýe chë celocana tojabá aínë, chë Bëngbe Bëtsá Entšá tbojanbemá. ¹⁴Y chcase, ntšamo Moisés entšanga ndoyenoca bronce mëtšcuaye tsbanánoca tbojananguësëtjca, šoquënga tšabá chamotsatsmënama; cachá entsemna, Bëngbe Bëtsá Entšá tbojanbemá entšanga chamuatsbanama; ¹⁵chca, nýetscanga chábeñe tmojtsošbuáchenga, chë nýetsca tescama yomna tšabe vida chamotsebomnama ca” —Jesús Nicodémbioye tbojaniana.

Ntsachetšá Bëngbe Bëtsá entšanga iuababuánýeshana

¹⁶Mëntšánaca Jesús tojánayana: —Bëngbe Bëtsá quem luare entšángbioye tša yojánabuanýeshanayeca, chë nýe canýe Uaquiñá ibobomná, bëngbioye tbojichmó, nýetsca chábeñe ošbuáchiyënga ndoñe

chamondóbanama, y aínë chë nýetsca tescama yomna tšabe vida chamotsebomnama. ¹⁷Er Bëngbe Bëtsá chabe Uaquiñá quem luaroye ndoñe tbonjichmó quem luare entšangbiama jabáyanama ntšamo tmojamama castigánënga chaotsamnama ca, sinó, entšanga chábeyeca atsebácanënga chamotsemmama.

¹⁸“Nda Bëngbe Bëtsabe Uaquiñábeñe tojtsošbuáchebiam, Bëngbe Bëtsá ndoñe queochátayana ntšamo cha tojamama, castiganá chaotsemna ca. Pero chë Uaquiñábeñe ndoñe tontsošbuáchebiam, mora Bëngbe Bëtsá ya tojayana, ntšamo tojamama cha castiganá chaotsemna ca, chë Bëngbe Bëtsá nýe canýe Uaquiñá ibobomnábeñe ndoñe yontsošbuaché causa. ¹⁹Chca, chë ndoñe tmontsošbuáchengiamna cha ya tojayana, ntšamo tmojamama castigánënga chamotsemna ca; er chë entšangbe juabnënga binýnayá quem luaroye tojabo, pero ba entšanga tmojábošena jtsomñana, chë entšangbiama bacna juabnéngaca chamotsebomnama amáftaca. Chënga sempre bacna soyënga jtsamana; chíyeca chënga jtsebošana cháftaca jtsomñama. ²⁰Chë bacna soyënga tojtsamá ndoñe ntsebošana, chë binýnayá chabe bacna soyënga chabuínýinýema, ni chabe bacna soyëngama chabuácacanama. Chíyeca, chë bacna soyënga jtsamëse oyená, chë binýnayábioye jtsáboyënjana, y chë binýnayábioye ndoñe ntjabana. ²¹Pero nda sempre tojtsiyena ntšamo ndegombre yomncá jtsamëse, chana aínë chë binýnayábioye jabana, chë binýnayá chabiam chabuínýinýema, chë tojama soyëngna, ntšamo Bëngbe Bëtsá tojtsëbošcá tojamama ca” —Jesús tojánayana.

**Juan chë Ubayaná cachiñe
Jesucristbiana tojanabuayená**

²² Chca tojanopasá chentšana, Jesús chabe uatsjéndayëngaftaca básefta Judeoca pueblëngoye tojtsanoñe. Chiñe, baseftatescama chë uatsjéndayëngaftaca tojanoquedá, entsanga ubáyana. ²³ Cach tempo, Juanënaca entsanga yojanëbáyana Enonoca, Salim béconana, er choca bëtsá béjaye inabinyna. Ba entsanga choye imojtsaye, y Juan chënga yojanëbáyana. ²⁴ Chca tojanopasá, chë Heródesbe soldadënga Juan cabá ndutame ora.

²⁵ Chë tempo, básefta Juanbe ústonënga tmojanontsé inye judíoftaca enatsëtsnayana ntšamo tempo judiënga chë jtsacuéntšabiama imojanámanama. ²⁶ Chora, chënga Juánbioye tmojánabo y tmojaniana: —Buatëmbayá, chë Jordán chenguánoica ácaftaca enjamná, ndabiama tša tšabá conjanoyebuambná, mora entsanga entsëbayana y nyetscanga cha montséstona ca.

²⁷ As Juan tojanéyana: —Ndocná quenátobena tondaye ntsebomnana, Bëngbe Bëtsá ndoñe tbonjatšetase. ²⁸ Cach tsëngaftanga tšabá šmonjanuena y šmontsobena ndegombre yomnama jayanana, atše ndoñe chë Bëngbe Bëtsabe Uámana Uabuayaná tsjanmëna ca sënjánayanama; sinó, Bëngbe Bëtsá atše šojanichmó chë Uabuayanabe natsana, chabiama entsanga jabábuayenama. ²⁹ Chë tobiaše tojtsobouamá ora, chë bobontse chábioye jtsebomnana; y chabe amigna, chabiama jtsobátmanana y chë bobontse bouamnabe oyebuambnayana jtsuenanana; y chca tojtsuenana ora, tša oyejuayá cha jtsemnana. Cachcá, ntšamo chë Uabuayaná yojtsamama y yojtsóyeuambnama sentsuenana ora, átsnaca corente oyejuayá séntsemna.

³⁰ Cha bontsemna más uamaná jtsemnana, pero atše söntsemna más nduamaná jtsemnana ca —Juan tojanéyana.

Ntšamo yomna chë celocana tojabá

³¹ Mëntšánaca Juan tojánayana: “Chë tšbanánocana tojabá, nyetsca entsangbiana más uamaná endmëna. Chë quem luare oyená quem luare entsangcá jtsemnana y quem luarentša soyëngama jtsóyeuambnayana, pero chë celocana tojabana, nyetsca entsangbiana más uamaná endmëna. ³² Cachá ntšamo tojinye y tojouencá entsoyeuambná, pero chë entsichamo soyënguine ndocná quenatošbuaché. ³³ Nda ntšamo cha tojtsóyeuambnañe tojtsóšbuaché y chca tojtsama, jtsinyanynayana Bëngbe Bëtsá ndegombre soyënga inetsichámuama. ³⁴ Chcasna, Bëngbe Bëtsabe ichmonana, jtsóyeuambnayana ntšamo Bëngbe Bëtsá tojtsichamcá. Bëngbe Bëtsana chë ichmonábioye tbojichmó chë Uámana Espíritu, nyets tempo corente chabotsájabuachanama, ntšamo cach Bëngbe Bëtsá tojtsichamo y cachcá chaotsichámuama. ³⁵ Chë Taitá Uaquiñábioye bondbobonshana, y chë Uaquiñábioye obenana tbojatšetá nyetsca soyënguine jtsemándayama. ³⁶ Nda chë Uaquiñabeñe tojtsóšbuaché, chë nyetsca tescama yomna tšabe vida echántsebomna; y nda chë Uaquiñábioye ndoñe tbonatsšbuaché, chana chë vida ndoñe queochátsbomna, y chë Bëngbe Bëtsabe uabouana castigo nyetsca tescama chábeñe echántsemna ca” —cha tojánayana.

**Jesús y chë Samaria
luaroca shembása**

4 Chë fariseunga tmojanuena Jesús, Juanbiana más ústonënga yojtsabamnama, y más entsanga yojt-

sébáyanama. ²Pero ndegombre, cach Jesús ndocnábioye bonýanábayana, sinó chabe uatsjéndayënga. ³Bëngbe Utabná Jesús, ntšamo chë fariseunga tmojanuena tojántatšëmbona ora, Judea luarocana tojëftsanbocna y Galileoye tojtaná.

⁴Choye jtamna ibojamna Samaria luarëjana jachnënguana. ⁵Samariozna, canye pueblo Sicar ca uabáinoye Jesús tojánashjango. Chë pueblo yojamna, chë Jacob chabe uaquiná Josébioye tbojëftsanlargá fshantse béconana. ⁶Choca yojamna cánýentšë atëfjóniñe, býeshe jobuatsjuama, Jacobëbe atëfjóniñe ca uabáiniñe. Mo nyetsto ora, chentšë Jesús yojtsemna, aniñe uamëntšnyá, chë atëfjóniñe batsjaca yojótbema. ⁷⁻⁸Chabe uatsjéndayëngna chë pueblöye tmojána saná jobuámiñama. Chora, canye shembása Samariocá, chë atëfjónöye tojánashjango, býeshe jauafcama; as Jesús tbojaniana: —Býeshtema šmabuatsšëta ca.

⁹Y chë shembása tbojanjá: —Aca canye judío condmëna y atšna canye samaritaná. ¿Ntšamo cojtsobena atšë býeshe juabuátjañama ca? (Cha chca tojánayana, er canjanopasana, judiëngna samaritanëngaftaca ndoñe monjanenatsëtsná.)

¹⁰Chora Jesús tbojanjá: —Aca mo cojtsetátšëmbo nye ntšamo Bëngbe Bëtsá aca jatšëtayama yojtsebošcá, y nda chë býeshe cmojtsábuatjanañama, acna más cha catjuábuatjañe, y chana béjaye vida bomniye cmatjuabuátšëtaye ca.

¹¹Y chë shembása tbojaniana: —Señor, tondaye quecátsbomna nye mo ndayecnaca býeshe jabuatsjuama, y chë atëfjóniñe corente tboza endmëna; y as, ¿ndayentšana cochjobenaye béjaye vida bomniye atšë juabuatsšëtayama? ¹²Bëngbe tempsca bëts taitá Jacob,

quem atëfjóniñe bëngbiama tojëftsanboshjona. Cachá, chabe básenga y chabe bayënga muentšana býeshe tmojëftsanofšë; y ¿aca chabiama más bëtsá comna ca? —chë shembása yojtsichamo.

¹³As Jesús tbojanjá: —Nyetscanga chë quem býeshentsana tmojofsënga, chënga cachiñe echantëtëjuendaye. ¹⁴Pero chë chanjuabuátšëtaye býeshentsana tojofšë chana ndocna te cachiñe quebochëtajuendaye. Cha chanjuabuátšëtaye býeshna, chábeñe echántsemna mo cánýentšë béjaytema obocaniñcá, chë nyetsca tescama yomna tšabe vida jtsebomnama ca —cha tbojaniana.

¹⁵Chora chë shembása tbojaniana: —Señor, chca býeshe šmabuatsšëta, as atšë ndoñe cachiñe chašondetsajuendama, ni býeshe juafcama moye jtsaboyama ndoñe chašondëtsemnama ca.

¹⁶As Jesús tbojaniana: —Motsa acbe boyá jachembuama y cochjésabo ca.

¹⁷Chora chë shembása tbojanjá: —Boyá ndoñe quetsátsbomna ca.

As Jesús tbojaniana: —Tšabá tçjayana boyá ndoñe condbomna ca.

¹⁸Er, aca shachna boyanga conjánabamna, y chë mora contsebomnana, acbe boyá ndoñe quenátsmëna. Ntšamo tconjayancá ndegombre entsemna ca.

¹⁹Chë shembása chca tojanuena ora, Jesúsbioye tbojaniana: —Señor, mora atšë sëntsetatšëmbo, aca canya Bëngbe Bëtsabe juabna oyebuambnayá comnama. ²⁰Bëngbe tempsca bëts taitanga quem tjoca Bëngbe Bëtsá monjánadorana; pero tšëngaftanga, judiënga šmondbétsichamo, bënga Bëngbe Bëtsá jadóramna, Jerusalenoca chë luare canmëna ca.

²¹Chora Jesús tbojanjá: —Shembása, šmoyeuná; canye tempo echanjóshjango y chora tšëngaftanga ndoñe quecmochátamna Bëngbe Bëtsá jadóramna, ni quem

tjoye jabana, ni Jerusalenoye jana. ²²Tšëngaftanga samaritanënga ndoñe quešmatábuatma nda šmetsadoránama; pero bënga aíñe fsënduábuatma, er chë atsebacayá judiënguentshana endabó. ²³Pero ora entsoshjajuana, ya chë tempo toçjobuache, ndaye ora chë Bëngbe Bëtsá chë Taitá ndegombre atschuanayënga, chë Espíritbeyeca y ndegombre juabnéngaca chábioye mochántadorana. Er chë Taitá entseboše chë chábioye adórayënga chca chamotsamama. ²⁴Bëngbe Bëtsá, Espiritu endmëna; y chë chábioye adórayënga entsamna, chë Uámana Espíritbeyeca y ndegombre juabnéngaca cha jtsadoránana ca —Jesús tbojaniana.

²⁵Chora chë shembása tbojaniana: —Atše sëndétatšëmbo, canmëna chë Bëngbe Bëtsabe Uámana Uabuayaná, chë Cristo jabana ca; y cha chaojáshjango orna, cha nyetsca soyëngama cašochjabuayená ca.

²⁶As Jesús tbojaniana: —Atše, chë ácaftaca entsoyebuambná cha, cha entsemna ca.

²⁷Chëntscuana, Jesusbe uat-sjëndayënga tmojtanashjajna, y tmojtsanëuatjaná, Jesús canyë shembásaftaca yojtsoyebuambná causa. Pero ndocná Jesús tbonjantjá: ¿Ndayá cháftaca cojtseboše? o ¿Ndáyeca cháftaca cojtsoyebuambná ca?

²⁸Chorna, chë shembása chabe uafcanëja tojésanboshjona, y chë puebloye betesco tojtaná. Chocna, entsanga tojanéyana: ²⁹“Mabënga canyë boyabása jinýama ca. Cha atše šonjauyana lempe ntšamo tijamcá. ¿Chë boyabása, chë Cristo tanántsemna ca?” —cha yojtsichamo.

³⁰As chë entsanga chë pueblcana tmojánbocana y Jesús yojtsemnoye tmojánashjajna. ³¹Chca yojt-sopasánëntscuana, chë uatsjëndayënga

Jesúsbioye imojtseimpadana: —Buatëmbayá, batšatema mose ca.

³²Pero cha tojanéyana: —Atše canyë soye jasama séntsebomna. Tšëngaftanga chë soyama ndoñe quešmátstatšëmbo ca.

³³Chora chë uatsjëndayënga tmojanontšë entjanayana: —¿Nderado nda jasama chabiana tojiyëbo ca?

³⁴Y Jesús tojanéyana: —Chë šonjichmó cha ntšamo yojtsebošca jamana, y chabe trabajo japochócana, chë soyënga mo sanacá atšbiama entsemna.

³⁵Tšëngaftanga šmondbétsichamo: “Cabá canta ishinýe entsashbena jaja saná chaotsebínýnama ca”; pero atše cbéyana: Minýënga tša entsanga moye montsabëbana; chënga montsemna mo jajañe saná játbanama tojtseprontancá.

³⁶Tšëngaftanga šmontsemna mo chë saná atbanayëngcá. Chëngna jajañe jtsetrabájayana, y chëngbe uacanána jtsësháchiñana. Cachcá, tšëngaftanga cmontsamna atšbiama entsanga júbuajana, chë nyetsca tescama yomna tšabe vida chamotsebomnama. Chë jaja saná átbanaye ora, jenënga y chë atbanayënga cánýiñe oyejuayënga jtsemnana. Cachcá, chë entsanga átsbeñe chamojtsošbuaché ora, nyetscanga, chë atšbiama obuájajanënga y chë atšbiama trabájayëngnaca cánýiñe oyejuayënga mochántsemna. ³⁷Quem entsangbe ichámuana, canyë ndegombre soye endmëna: “Chë jená canýa jtsemnana, y atbanayana inýa ca.” ³⁸Atše tšëngaftanga cbonjichamó canyë soye játbanama, y tšëngaftanga tondaye chešmatsma chca chaotsebínýnama. Inýënga chiñe bëtscá tmonjëftsetrabája, y tšëngaftangna, chëngbe trabajënguentshana šmojolograñe ca —Jesús tojanayana.

³⁹Bëtscá entsanga, Samarioca pueblentšënga Jesúsbeñe imojt-sanošbuaché, ntšamo chë shembása

tojanéyanama. Chë shembása tojanéyana: “Lempe ntšamo atše tijamcá cha šonjauyana ca.”⁴⁰ As chë samaritanënga, Jesús yojtsemnentše tmojánashjajna ora, tmojanimpadá chëngaftaca chaotsoquedáñama. Y as Jesús, uta te chentše tbojëftsanjétana.⁴¹ Y más entšanga, cach ntšamo Jesús yojtsanëtsëtsnacá tmonjanuena ora, chábeñe imojtsanošbuaché.

⁴² Y chë shembása chë entšanga tmojanijana: “Mora cocayé fsëntsošbuaché, ndoñe nýe ntšamo aca šcojáuyanama, sinó cach bënga chábioye oído fsënjabuajóyeca; y mora fsëntsetatšëmbo ndegombre cha yojtsemna chë quem luare entšangbiana Atsebacyá ca.”

**Jesús, canýe mandado
uajabuachanabe
básabioye tbojanshná**

⁴³ Uta te chentšana, Jesús Samario-cana tojáisanbocna y Galileoye tojataná.⁴⁴ Cach Jesús mëntsá tojánayana: “Canýa Bëngbe Bëtsabe juabna oyebuambnayá, cachabe luarentše oyenënga ndoñe bëtsá ntjabemëngana ca.”⁴⁵ Galileoca oyenënga Jerusalemoye tmojána, y tmojáninýe nýetsca bëts soyënga ntšamo Jesús Bashco fiesta ora choca tojanmcá. Chíyeca, Jesús Galileoye tojtashjango ora, chënga tšabá tmojtanojfa.

⁴⁶ Galileocna, Jesús cachiñe Caná puebloye tojésanashjango, chë béjayeca vínoye cha tojánbementše. Choca yojtsemna canýe mandadbe uajabuachaná, y chabe uaquiñana Capernaum puebloca šocá yojtsejájona.⁴⁷ Jesús Judeocana Galileoye tojánashjanguama, chë uajabuachaná tojanuena ora, Jesúsbioye tojána y ibojtseimpadana chabe yebnoye cháuama, chabe uaquiñá chabuetseshnáñama, er ya jtsóbanama yojtsemna ca.⁴⁸ As Jesús tbojanijana: —Tšëngaftanga, Bëngbe Bëtsabe

obenana jinýanýiyama bëts soyënga atše jamama ndoñe šmonjinýese, átšbeñe ndocna te ntsošbuáchiyana ca.

⁴⁹ Chora, chë mandadbe uajabuachaná Jesúsbioye tbojanijana: —Taita, betesco mabo, atšbe uaquiñá cabá ndóbana ora ca.

⁵⁰ As Jesús tbojanijana: —Acbe yebnoye motsatá. Acbe uaquiñá ainá endëtsomñe ca.

Chë boyabásana tojanošbuaché ntšamo Jesús tbojanijancá y tojtaná.⁵¹ Cha yojtsataye orna, chabe oservënga tmojánbocana jajëbenguama y tmojanijana: —Acbe uaquiñá tšabá entsatsmëna ca.

⁵² As cha tojanatjá: —¿Ntseco orscana tbenjatëcja ca?

Y chënga tmojanjúá: —Tonjopasá yëfse, mošenana orscana chë calentora tbonjábosana ca.

⁵³ Chora chë taitá tojanenojuabó, cachca ora Jesús tbojanijana: “Acbe uaquiñá ainá endëtsomñe ca”. Y cha y nýetscanga chabe yebnentše oyenënga Jesúsbeñe imojtsanošbuaché.

⁵⁴ Ntšamo Jesús chora, chë uajabuachanabe uaquiñabiana tojanmcá, Judeocana Galileoye yojtsataye orna, yojamna chabe utama chca bëts soye jamama, Bëngbe Bëtsabe obenana jinýanýiyama, Galilea luaroca.

**Jesús canýe jama
ndobenábioye tbojanshná**

5 Baseftayté chentšana, chë judiënga canýe oboyejuaye te imojtsebmorna ora, Jesús Jerusalemoye tojána.² Choca, chë Oveshëngbe amashjuana ca uabáinentše yojamna canýe binche uafjájónaye, entšangbe pormániñe. Chë béjayna judiëngbe biyañe Betzata ca inauabaina. Chë béjaye juachañe shachna amashjuana otsbojebniñe inamna.³ Chiñna ba šoquënga jtanënga, coshetënga y

jama ndobenënga imojtsecjana; chë béjaye chamobonjoma imojtsobátmana. ⁴(Nderado nderado, Bëngbe Bëtsábioca canyë ángel yojanamana jastjanguana chë béjaye jabónjuama. Chca ora, chë béjayoye natsana tojamashënguá, chabe šocanama tšabá jtsatsmënana.) ⁵Chë šoquënguñe canyë boyabása inamna, unga bnëtsana y posufta uatama jama ndobená. ⁶Jesús chë jajonábioye tbojáninye ora y ba uatama chca yojamnama tojántatšëmbona ora, tbojantjá: —¿Quecojtseboše tšabá jtsatsmënana ca?

⁷Y chë šocá tbojanjuá: —Taita, ndocná quetsátsbomna nda chašúa-jabuache béjayoye jamashënguama, chë béjaye tojtsobonjná ora. Y atše béjayoye jamashënguama stseboše ora, inya atšbe natsana jtsamashënguana ca.

⁸Y Jesús tbojanijana: —Matëtsbaná, acbe tjuashe mesocñe y matontšé jóyenana ca.

⁹Cach ora chë boyabása tšabá yojtsatsmëna, chabe tjuashe tojésanocñe y tojanontšé jtsanana. Chca tojanopasá ora, chë ochnayté inamna. ¹⁰Chíyeca, chë tbojanshnábioye chë judiënga tmojanijana: —Mëntsa ochnayté. Mënté ndoñe quenátopodena aca tjuashe jtse-cutsnana ca.

¹¹Y chë boyabása tojanéyana: —Chë šonjashná cha mëntšá šonjayana: “Acbe tjuashe mesocñe y montšé jóyenana ca”.

¹²As chënga tmojantjá: —¿Nda yojtsemna chë “acbe tjuashe mesocñe y montšé jóyenana ca” tmojayaná ca?

¹³Pero chë shnaná ndoñe yontsetátšëmbo nda tbojanshnama. Chocna bëtsá entsanga imojtsemna; chcasna, Jesús chëngbe tsëntsajana tojanenatjëmba.

¹⁴Chentsana, Jesús Bëngbe Bëtsabe bëts yebnentše chë boyabásabioye tbojáninyena y tbojanijana: —Mouena;

mora aca ya ndoñe šocá quecátsmëna; bacna soyënga ndoñe cachiñe cattsama. Aíñese, acbiama puerte mal echanjopása ca.

¹⁵Chë boyabása tojtsanoñe y chë judiënga tojanéyana: —Chë šonjashná cha Jesús entsemna ca.

¹⁶Chë causa, chë judiënga imojtsenguaye ntšamo Jesús ndayanaca jabórlana, cha ochnayté chë soyënga tojanmama. ¹⁷Pero Jesús tojanéyana: “Atšbe Taitá nyëts tempo tšabe soyënga endbëtsama; cachcá, átsnaca tšabe soyënga séntsama ca.”

¹⁸Jesús tojanma ntšamo ochnayté ndoñe yonjanapodencá, y Bëngbe Bëtsabiama tojánayana “Atšbe Taitá ca”. Mëntšá Jesús yojtsanobiamná cach Bëngbe Bëtsacá. Chama, chë judiënga más imojtseboše Jesús jóbama.

Bëngbe Bëtsabe Uaquiñabe obenana

¹⁹Chentsana Jesús tojanéyana: “Ndegombre šcuayana: Bëngbe Bëtsabe Uaquiñá, nyë cachabe cuenta tondaye quenátobena jamana. Cha jtsonyayana ntšamo chabe Taitá tojtsamcá. Ntšamo chë Taitá tojtsamcá, chë Uaquiñánaca jtsamana. ²⁰Er Bëngbe Taitá chabe Uaquiñábioye bondbobonshana, y lempe ntšamo cha tojtsamcá chábioye bondinyinyná; y más bëts soyënga bochanjinyinye, chë soyëngama tšëngaftanga chašmenjnanama. ²¹Chë Taitá endama obanënga chámuatayenama y tšabe vida chamotsebomnana; cachcá, chë Uaquiñá entsama tšabe vida chamotsebomnana, ndëmuanyënga cha tojtsebošcá. ²²Chë Taitá ndocnabiama jatichámuana tšabá o ndoñe tšabá yontsama ca. Chabe Uaquiñábioye nyëts obenana tbonjatšetá nyëtschangbiama jayanama tšabá o ndoñe tšabá tmonsamama. ²³Chca, chënga chamuinyinyé Bëngbe Bëtsabe Uaquiñá

puerte uamaná yomnama, ntšamo Bëngbe Bëtsá puerte uamaná yomnama nyetscanga mondbetsinjinayca. Nda chë Uaquiñábioye ndoñe más uamaná tbontsebiamná, cach ndoñe más uamana ntsebiamnayana chë Taitábioye, nda chë Uaquiñá tbojichmóbioye.

²⁴“Ndegombre šcuayana: Nda ntšamo atše sentsichamcá šojoyeuná, y chë muentšë šonjichmó chábeñe tojtošbuaché, chë nyetsca tescama yomna tšabe vida jtsebomnana. Chabiamá chë Uaquiñá ndoñe queochátayana castiganá chaotsemna ca. Chca, Bëngbe Bëtsabiamá cha ya ndoñe más mo obanacá queochátmëna, chábeñe ndošbuáchiye causa; y ya ndoñe nyetsca tescama castiganá queochátmëna. Y aíñe, chë nyetsca tescama yomna tšabe vida echántsebomna.

²⁵“Ndegombre šcuayana: Chë jobuáchama te ya tojjobuache. Chë te, chë Bëngbe Bëtsabiamá mo obanëngcá imomnënga mochanjouena Bëngbe Bëtsabe Uaquiñá jtsóyebuambnayana. Nda chca tšabá chašojoyeuná cha, tšabe vida echántsebomna. ²⁶Er ntšamo Bëngbe Taitá obenana endbomncá, cachá jamama entšanga vida chamotsebomnama, chabe Uaquiñábioynaca obenana tbojatšetá entšanga vida chamotsebomnama jamama. ²⁷Chë Uaquiñá endmëna nda Bëngbe Bëtsá Entšá tbojánbema; chíyeca chë Taitá chábioye obenana tbojatšetá nyetscangbiama jayanama tšabá o ndoñe tšabá tmontsamama. ²⁸Chama ndoñe matenjnanana. Er canye tempo echanjobuache, y chora chë Uaquiñá obanënga echantsachembuana; chënga mochanjouena y cach ora, chëngbe oyenocana mochanjésebocana. ²⁹Tšabe soyënga tmojëftsemënga, obanënguentsána mochántayena, chë

nyetsca tescama yomna tšabe vida jtsebomnana. Pero bacna soyënga tmojëftsemënga obanënguentsána mochántayena nyetsca tescama castigánënga jtsemnama ca” —Jesús tojanéyana.

Jesús, ndegombre Bëngbe Bëtsabe ichmoná inamna

³⁰Mëntšánaca Jesús cachatbiamá tojánayana: “Nye átsbeyeca tondaye quetsátobena jamama. Chë Taitá šontsemánda ntšamo nyetscangbiama jayanama tšabá o ndoñe tšabá tmontsamama. Nye chca atše sentsobena chë soye jamama. Ndoñe quetsátsboše jamana nye ntšamo cach atše stsebošcá; pero sempre sëndbétseboše jamama, ntšamo Taitá, chë šonjichmó cha tojtsebošcá. Chíyeca atše nyetscangbiama séntschamo tšabá o ndoñe tšabá tmontsamama; y ntšamo nyetscangbiama séntschamcá, ndegombre endmëna.

³¹“Ntšamo cach atšbiamá tijayanama, ndegombre entsemna ca stsichámëse, ntšamo stsichamcá, nyetscangbiama tondaye ntsámanana. ³²Pero inya entsemna. Cha endétatšëmbo y entsichamo ntšamo ndegombre atšbiamá yomncá; y séntsetatšëmbo ntšamo cha atšbiamá yojtsichamcá, nyetscangbiama aíñe yojtsámanama. ³³Tšëngaftanga ínënga šmojanichamó atšbiamá Juan jatjayama; y ntšamo cha tcmojauyancá ndegombre endmëna. ³⁴Masque chë soyënga cha tcmojáuyana, ndoñe quešnatájaboto ndocna entšá atšbiamá chaotsichamo ‘cha aíñe chca endmëna ca’. Atše quem soyënga séntschamo ndayá nye tšëngaftanga atsebácanënga chašmotsemnama. ³⁵Juan enjamna mo canye uajuinjanésha tojtsajuinýana y tojtsabuashinjinýanca. Tšëngaftanga chabe buashinjinýanana šmonjinýe,

y šmonjábošena rato cháftaca oyejuayënga jtsemnama. ³⁶ Pero chë atše sënjama soyëngacna más entsinÿinÿëna ntšamo atšbiana ndegombre yomncá, chë ntšamo Juan atšbiana tojánayanama. Ndayá atšbe Taitá šojabonÿé jamama, ntšamo atše séntsamcá, entsinÿinÿná ndegombre chë Taitá šojichmoma. ³⁷ Atšbe Taitá, chë šojichmó chánaca entsichamo ntšamo atšbiana ndegombre yomncá, masque ndocna te chabe oyeuambnayana chešmatuena, ni ntšamo cha yomncá chešmátinÿe. ³⁸ Pero tšëngaftangbe ainanoye chabe palabra ndoñe tonjómashëngo, cha tbojichmóbeñe tšëngaftanga ndoñe quešmatošbuaché causa. ³⁹ Tšëngaftanga, Bëngbe Bëtsabe palabra tša jtsatsjëndayana, er šmondobátmana, chca jtsamëse chë nÿetsca tescama yomna tšabe vida jónÿenama. Y Bëngbe Bëtsabe uabemana palabrënguine atšbiana endayana ntšamo ndegombre yomncá; ⁴⁰ pero masque chca, tšëngaftanga ndoñe quešmátsboše atše jtséstonana, y chca, tšabe vida jtsebomnama.

⁴¹ “Atše ndoñe quetsátsboše entsanga yapa tšabá atšbiana chamotsichámuama. ⁴² Y inÿe soye, atše puerte cbondëuatma, y sëndétatšëmbo tšëngaftanga Bëngbe Bëtsá ndoñe šmondbobonshánama. ⁴³ Atšna atšbe Taitabe cuenta sënjabo, y tšëngaftanga ndoñe quešmátsboše atše jofjana. Pero inÿa, cachabe cuenta tojabábioye cocayé aínë šmatjofja. ⁴⁴ Tšëngaftanga corente jésebošana, ínÿenga tšëngaftangbiama tšabá chamotsichámuama, y ínÿengbiama tšabá jtsichámuama; pero ndoñe ntsebošana chë nÿe canÿe Bëngbe Bëtsá tšëngaftangbiama cachcá chaotsichámuama. Chca šmojtsamëse, ¿ntšamo šmochtobena Bëngbe Bëtsabeñe jtsošbuáchiyana? ⁴⁵ Ndoñe

šmattsejuabnaye, atšbe Taitabe delante tšëngaftangbe contra atše chjayana ca ntšamo tšëngaftanga šmojtsamama. Tšëngaftanga tša jtsobátmanana atsebácanënga jtsemnama, chë ntšamo Moisesbe leyinë endayancá šmojtsamama; pero ndegombre, ntšamo cha tojayancá, cach tšëngaftangbe contra entsemna. ⁴⁶ Tšëngaftanga, chë Moises tojéftsanabema soyinë šmojtsošbuachese, átšbeñnaca šmattsošbuáchiye, er cha atšbiana tojanábema. ⁴⁷ Pero chë tojanábema soyinë tšëngaftanga ndoñe šmontsošbuachena, ¿ntšamo šmochjobenaye chë atše séntichamo soyënguine jtsošbuáchiyana ca?” —Jesús tojanéyana.

Jesús shachna uaranga boyabásenga saná tojanacaredadó

(Mt 14.13-21; Mc 6.30-44; Lc 9.10-17)

6 Chë soyënga tojanopasá chentšana, Jesús chabe uatsjëndayëngaftaca tojána Galilea uafjajónaye chenguana. Chë uafjajónayna Tiberias cánaca inauabaina. ² Ba entsanga imojtséstona, er chënga tmojáninÿe cha bëts soyënga jtsamana, šoquënga jtsashnayëse. ³ As Jesús tjoye tojántsjua, y choca chabe uatsjëndayëngaftaca tojanótbema. ⁴ Ya judiëngbe canÿe fiesta, chë Bashco fiesta, yojétsobeco.

⁵ Jesús tojanótbema ora, tojanontjéšë y tojánanÿe ba entsanga chábioye imojtsebëconaye. As Felípbioye tbojaniyana: —¿Ndayentšë saná cuanjabuámiye nÿetsca quem entsanga chamosama ca?

⁶ Jesús chca tbojaniyana, ana Felípbioye jinÿama ntšamo cha tabuanjokuva; er cach Jesús tšabá inatátšëmbo ndayá jamama. ⁷ Y Felipe tbojanjuá: —Ni mo uta patse denario crocenánaca nanjopódia tandëse jabuámiyama,

njetsca entsanga nje mo batsatémnaca chamuétsetesama ca.

⁸Chorna, Jesusbe canje uatsjendayá, Andrés ca uabainá, Simón Pédrébe catšata, Jesúsbioye tbojanijana: ⁹—Muentše entsemna canje bášetema y cha shachna cebada tanděse y uta beónata entsebomna. Pero, ¿ndayase nje nyetšatema chěfta entsangbiama ca?

¹⁰As Jesús tojánajana: —Entsanga méyana chamotbiama ca.

Becá shácuaana chě luariñe inamna, y njetsca entsanga chiñe tmojanoshénts-jatbiama. Chě entsanguentše shachna uaranga boyabásenga imojtsemna.

¹¹Chora Jesús, chě tanděse chabe cucuatšíñe tojanca, y Běngbe Bětsábioye chě tanděšama tbojtanchuá; y chabe uatsjéndayěnga tojanějató, y chě uatsjéndayěngna njetsca entsanga imojtsetbiámaněnga tmojanatšatá. Cachcá Jesús chě beónaca tojanma, y ntšamo entsanga imojanbošcá tmojanatšatá. ¹²Njetscanga tmojanse y tmojtanoshachá ora, Jesús chabe uatsjéndayěnga tojanéyana: —Chě ojamnětéměnga šmochtsatbananga, tondaye nje cachcá ntjěftsonyayama ca.

¹³As chěnga tmojanatbaná, y chě tmojanse shachna cebada tanděšentsana tojanójamětéměngaca, bnětsana uta sbarécua tmojanajutjé. ¹⁴Chě entsanga quem běts soye Jesús jamama tmojáninje ora tmojánajana: “Ndegombre quem boyabása, chě quem luaroye jabama Běngbe Bětsabe juabna jabóyebuambayama cha entsemna ca.”

¹⁵Jesús yojtsetátšěmbo entsanga chěngbe rey jabemama imojetsebošama. Chíyeca cach tjoye tojtsaisanoñe canya jtsomñama.

Jesús bėjaye juatsbuacá yojtsaye

(Mt 14.22-27; Mc 6.45-52)

¹⁶Tojanibétata ora, Jesusbe uatsjéndayěnga chě uafjajónayoye tmojantsmá;

¹⁷barquěshañe tmojtanenojayé, y tmojanontšé jenashbuachénguana, chca, Capernaumoca jenbocnama. Ya ibeta yojtsemna, y Jesús cabá ndoñe chěngbioye ntashjanguana. ¹⁸Chca imojt-senashbuachnějuana orna, chě bėjay-ñe jabuache binjia tojanóshjango y běts olěshěnga chě barquěshoye yojt-sójantšetaye. ¹⁹Shachna o chrěnguana kilómetro chěnga tmojána ora, tmojáninje Jesús chěngbioye yojtsebéconaye, bėjaye juatsbuacá yojtsaye. Chěnga chca tmojáninje ora tša tmojanocochauat-janá, ²⁰pero Jesús tojanéyana: “Atše sěndměna; ndoñe matauatjěngana ca.”

²¹Chora chě uatsjéndayěnga oyejuayěnga imojtseboše Jesús chě barquěshoye jofjana, y ndoñe bēněntscose ya chě imojtsaye luaroye tmojánashjajna.

Entsanga Jesús tmojánguango

²²Yěfsana, njetsca entsanga, chě uafjajónaye chenguánoica tmojanoquedanga tmojáninje, chě inje yěfsana chě nje canje barquěsha yojuamněshañe Jesusbe uatsjéndayěnga tmojtsanoñama, y Jesús chěngaftaca ndoñe tonjánama. ²³Pero chěntscuana, Tiberias pueblentsana inje barquěshangá tojanáshjajna canje luarentše, chě Běngbe Utabná Jesús chabe Taitábioye tbojtanchuá chentšana, entsanga saná tmojanse luare béconana. ²⁴Asna, ni Jesús ni chabe uatsjéndayěnga chentše ndoñe montsemnama chě entsanga tmojáninje ora, chě barquěshangañe tmojtanenojayé y Capernaumoye tmojána Jesús jetsenguanguama.

Jesús, chě njetsca tescama yomna tšabe vida jtsebomnama tanděse

²⁵Chě uafjajónaye chenguánoye tmojánashjajna ora, Jesús tmojáninjena

y mēntšá tmojantjá: —¿Buatēmbayá, ntseco ora muentše tcojáhjango ca?

²⁶ Y Jesús tojanéyana: —Ndegombre cbéyana, tšēngaftanga ndoñe atše quešmatsnguá, chē bēts soyēnga tijamama, sinó n̄ye chē jtoshachaye nyētsá tandēše šmojasama. ²⁷ Ndoñe matenángmenana chē n̄ye ndoñe bēn y jopochócana sanama; chē ndmopochócaye saná, chē nyētsca tescama yomna tšabe vida jtsebomnama saná šmochjánguango. Chē saná, Bēngbe Bētsá Entšá tbojanbemá cmochanjátšataye, er Bēngbe Bētsá chē Taitá tonjin̄yan̄yé, tšabe soyēngaca, cha chábioye tbojuábuayanama ca —tojánayana.

²⁸ Chora chē entšanga tmojantjá: —¿Ndayá fchjama ntšamo Bēngbe Bētsá yojtsebošcá chaotsemnama ca?

²⁹ Chca tmojantjá ora, Jesús tojanéyana: —Chē Taitá entseboše tšēngaftanga chabe ichmonábeñe chašmotsošbuáchema ca.

³⁰ Chora chēnga tmojanayana: —¿Ndaye tšabe soye cochjama acbe obenana bēnga jin̄yan̄iyama ca? Chē soye chaftsjin̄yēse, áceñe fchantsošbuáchiye. ¿Bēngbiama taicochjama ca? ³¹ Bēngbe tempsca bēts taitanga entšanga ndoyenoca maná ca uabaina saná tmojanse. Bēngbe Bētsabe uabemana palabrenguñe mēntšá endayana: “Cha celoca tandēše tonjanatšatá chamosama ca” —chēnga tmojánayana.

³² Chora Jesús tojanéyana: —Ndegombre cbéyana, Moisés chēnga ndoñe chē celoca tandēše tonjanatšatá; Bēngbe Bētsá Bēngbe Taitá chēngbioye tojanatšatá chē maná ca uabaina tandēše; y cha endmēna nda celocana chē ndocna te ndmopochócaye tandēše ndegombre cmondatsatná.

³³ Er Bēngbe Bētsábíocana tandēše entsemna chē celocana tojastjanguá; y

cha quem luare entšangbiama entsama chē nyētsca tescama yomna tšabe vida chamotsebomnama ca —cha tojanéyana.

³⁴ Chora chēnga tmojanimpadá: —Taita, chē tandēše sempre šcochtsatšatnaye ca.

³⁵ Y Jesús tojanéjua: —Atše sēndmēna entšanga chē nyētsca tescama yomna tšabe vida jtsebomnama tandēše. Nda atše chašojtséstoná, sempre oyejuayá echanjēftsemna y Bēngbe Bētsabe soyēnga nyēts tempo echanjesóbomñe, mo nda nyēts tempo saná totsobomñcá, y ndocna te tbontsishēntsancá.

³⁶ Pero ntšamo ya tcbonjauyancá, tšēngaftanga atše šmonjin̄ye y cabá ndoñe átšbeñe quešmatošbuaché. ³⁷ Nda atšbe Taitá atšbiama tbojabocacá, cha atše šochantséstoná; y nda átšbioye šojtséstoná, átšbentsana quichtētábocna. ³⁸ Er atšna celocana sēnjabo chē šojichmó cha ntšamo yojtsebošcá jamama, y ndoñe n̄ye ntšamo atše stsebošcá. ³⁹ Y chē šojichmó cha entseboše, ni mo can̄ya chē atšbiama tojabacacá chentšana, atše chailenciá pochocaná chaotsemnama; y quem luare jopochócama tena, nyētscanga atšbiama tojábacacangbiama chámuatayenama atše chaimama. ⁴⁰ Er atšbe Taitá entseboše, nda chabe Uaquiñábioye tbojin̄ye y chábeñe tojtsošbuaché, chē nyētsca tescama yomna tšabe vida chaotsebomna, y quem luare jopochócama tena, cha cháuatayenama atše chaimama ca —Jesús tojanéyana.

⁴¹ “Atše sēntsemna chē celocana tojóshjango tandēše ca” Jesús tojanéyana causa, chē judiēnga tmojanontšé chabiama podesca ichámuana. ⁴² Chēnga mēntšá imojtsichamo: —¿Mua ndoñe Jesús yondmēna, chē Josebe uaquiñá? Chabe bētsétsata bēnga tmotsábuatmñe.

¿Ntšamo cha mora yochjátichamo celocana tojástjango ca?

⁴³ As Jesús tojanéyana: —Atšbiana ndoñe podesca matichámuana. ⁴⁴ Ndocná quenátobena atše juastana, chë Taitá, chë šojichmó cha, ainaniñe chca chaotsebošama ndoñe tbonjuajabuachëse; y atše chanjama cha cháuatayenama quem luare jopochócama te. ⁴⁵ Chë tempsquënga Bëngbe Bëtsabe juabna oyebuambnayënga mëntšá tmojanábema: “Cach Bëngbe Bëtsá nyetscanga echanjabuatambá ca.” Chcasna, nda atšbe Taitábioye tbojoyeuná, y ntšamo chë Taitá tbojabuatëmbacá tojuatsjinye, cha atše šochanjuasto.

⁴⁶ “Ndocná atšbe Taitá tbonjinye. Nye chë Bëngbe Bëtsábiocana tojabá aíñe. ⁴⁷ Ndegombre šcuayana: Nda átšbeñe tojtsošbuaché, chë nyetsca tescama yomna tšabe vida echántsebomna. ⁴⁸ Atše sëndmëna entsanga chë nyetsca tescama yomna tšabe vida chamotsebomnama tandëse. ⁴⁹ Masque tšëngaftangbe bëts taitanga, entsanga ndoyenoca chë maná ca uabaina saná tmojanse, pronto tmojanóbana. ⁵⁰ Pero atše sëntsoyebuambná ndayá chë celocana tojóshjango tandëšama. Nda chë tandëse tojase, ndoñe queochatóbana. ⁵¹ Atše sëntsemna entsanga chë nyetsca tescama yomna tšabe vida jtsebomnama tandëse, chë celocana tojóshjanguëse. Nda quem tandëse tojase, nyetsca tescama nye ainá echanjesomñe. Chë chanjátšataye tandëšna, cach atšbe cuerpo entsemna. Chca chanjama quem luare entsanga chë nyetsca tescama yomna tšabe vida chamotsebomnama ca” —Jesús tojánayana.

⁵² Chora chë judiënga tmojanontšë enatsëtsnayana: —¿Ntšamo cha yochjobenaye cachabe cuerpo jatšatayana bënga jasama ca?

⁵³ As Jesús tojanéyana: —Ndegombre šcuayana: Tšëngaftanga Bëngbe Bëtsá Entšá tbojanbemabe cuerpo ndoñe šmonjase y chabe buiñe ndoñe šmonjofšese, ndegombre tšabe vida ndoñe quešmochátsbomna. ⁵⁴ Nda atšbe cuerpo tojase y atšbe buiñe tojofšé, chë nyetsca tescama yomna tšabe vida echántsebomna, y quem luare jopochócama te atše chanjama cha cháuatayenama. ⁵⁵ Atšbe cuerpo ndegombre saná endmëna, y atšbe buiñe ndegombre ofsësnayiye. ⁵⁶ Nda atšbe cuerpo tojase y atšbe buiñe tojofšé, átšeftaca cányiñe mo canyáca echántsemna, y átšnaca cháftaca. ⁵⁷ Atšbe Taitá, chë šojichmó cha, vida endbomna, y atše chábeyeca vida sëndbomna; cachcá, nda atšbe cuerpo tojase, chana átšbeyeca vida jtsebomnana. ⁵⁸ Chë ndaye soyama atše sëntsoyebuambná, atšbe cuerpo y atšbe buiñe, entsemna chë celocana tojóshjango tandëse. Masque tšëngaftangbe bëts taitanga chë maná ca uabaina tandëse tmojanse, pronto tmojanóbana; pero quem tandëse ndoñe cachcá quenátsmëna. Nda quem tandëse tojase, nye nyets tempo vida echanjesóbomñe ca —Jesús tojánayana.

⁵⁹ Chë soyëngna Jesús tonjanabu-atambá Capernaum pueblntše, chë judiëngbe enefjuana yebnntše.

Chë nyetsca tescama yomna tšabe vida jtsebomnana palabrënga

⁶⁰ Chca tmojanuena ora, banga Jesusbe ústonënga imojtsichamo: —Ntšamo cha entsichamcá yapa totcá entsemna mo ndegombre cuaftsemncá joyeunayama. ¿Nda buanjóyeunaye ca?

⁶¹ Jesús yojtsetátšëmbo chënga ndoñe tšabá imontsichámuama; as, chënga tojanatjá: —¿Ntšamo cbontsëtsëtsnacá ndoñe tšabá cmontsëuenana ca? ⁶² Y chcasna, Bëngbe Bëtsá Entšá

tbojanbemá, chë cha tempo inamna luaroye tojëttsjuama šmojinjëse, ¿ntšamo šmattsejuabnaye? ⁶³Bëngbe Bëtsabe Espíritu entsama entsanga chë tšabe vida chamotsebomnama. Chë cuerpo ndoñe uámana soye quenátsmëna; chë tcbonjáuyana soyënguñe entsemna chë Uámana Espíritbe uajabuáchenana y chë tšabe vida. ⁶⁴Pero masque chca entsemna, tšëngaftangbentsana banga átšbeñe ndoñe quešmatošbuaché ca —Jesús tojánayana.

Er Bëngbe Bëtsabe soyëngama entsanga jábuayenama Jesús tojanbojatsé orscana, cha inatátšëmbo ndëmuanýenga chábeñe ndoñe mochanjanošbuáchiye, y nda chë uayayëngbe cucuatšinë yochjétsayentsbashejuanana. ⁶⁵Y Jesús yojtëtóntša oyeuambnayana: —Chíyeca, atše tšëngaftanga tcbonjáuyana: “nda atše juastama ainaniñe chaotsebošama atšbe Taitá ndoñe tbonjuájabuache, cha ndoñe quešochatasto ca”.

⁶⁶Chë causa, chentšana, ba chabe ústonënga cachcá tmojesanonýá, y cháfataca ya ndoñe imontsajna. ⁶⁷Chora Jesús, chë bnétsana uta uatsjéndayënga tojanéyana: —¿Y tšëngaftángnaca, jtsoñama y atše jéseboshjonama šmojtseboše ca?

⁶⁸Chora Simón Pedro tbojanjuá: —Bëngbe Utabná Jesús, ¿chcasna ndábioye fchjanga ca? Nýe aca šcontsëtsësná chë nyetsca tescama yomna tšabe vida jtsebomnama palabrenga. ⁶⁹Acbeñe fsëntsošbuaché, y mora fsëntsetatšëmbo aca chë Bëngbe Bëtsabe Uamaná comnama ca.

⁷⁰Chora Jesús tojanéyana: —Atše tcbonjabacacá, chë bnétsana útata; pero canya tšëngaftanguentsana, mo Satanasbe canye trabajayacá entsemna ca.

⁷¹Judas Iscariote, chë Simonbe uaquiñabiama chca Jesús tojánayana. Er chana masque canya chabe bnétsana uta uatsjendayënguentšá inamna, Jesús uayayëngbe cucuatšinë yochjátsayentsbashejuana.

Jesusbe catsátanga chábeñe ndoñe montsanošbuaché

7 Chë soyënguentšana, Jesús Galilea luarëjana yojánana. Chë tempo, judiënga imojtsanjuabnaye ntšamo jamëse cha jóbama. Chíyeca, Jesús ndoñe yontseboše Judeoye jama. ²Chora, judiëngbe canye bëts fiesta semana yojtsobeco. Quem fiestënguëntscuana, chë judiënga imojanamana tambënguñe jtsiyenana. ³As chora Jesusbe catsátanga tmojanayana: —Muentše ndoñe catjoquéda; Judeoye motsa, choca condbomna ústonënga, ntšamo contsamcá chócnaca chaminýama. ⁴Er nda tojtseboše chamotsábuatmama, chabe soyënga ndoñe iytecana ntsamana. Aca bëts soyënga Bëngbe Bëtsabe obenánaca contsamëсна, motsa y nyetscangbe delante chca cochjama ca —chënga tmojanayana.

⁵Er ni mo cach Jesusbe catsátanga chábeñe ndoñe montsanošbuaché. Chíyeca chënga chca tmojanayana.

⁶Chora Jesús tojanéjua: —Atšbe ora cabá ndoñe quentóshjango, pero tšëngaftangbiamama mocna órnaca tšabá endëtsomñe. ⁷Chë nýe quem luarama enójuabnaye entsanga ndoñe quemátobena tšëngaftanga jtsébuayënjana, pero átšbioyna añe, er atše puerte tšabá sentsinýanýná ntšamo chënga imojtsamcá ndoñe tšabá yontsemnama. ⁸Tšëngaftanga chë fiestama šmochjá. Atšbe ora cabá ndoñe quentóshjango. Chíyeca atše choye ndoñe quicháta ca —cha tojánayana.

⁹ Jesús chë soyënga tojanéyana y cach Galileoca tojtsanoquedañe.

Chë tambënguïne jtsiyenama fiesta

¹⁰ Chabe catsátanga chë fiestoye tmojána chentsána, Jesúsna tojána, masque ndoñe entsángbeñe, sinó mo iytécana cuenta. ¹¹ Chë fiestocna, judiënga Jesús imojtsenguaye y imojtsichamo: —¿Ndayentse chë boyabása yojtsemna ca?

¹² Entsángbeñe ba soyënga chabiana iytécana imojtsichamo. Inyënga chabiana imojtsichamo: “Cha tsábia endmëna ca”; pero ínnyengna: “Cha entsánga entsaíngña ca”.

¹³ Pero ndocná Jesusbiana becá añémoca yontsoyebuambná, chë judiëngbe améndayëngbiana imojtsauatja causa.

¹⁴ Chë fiesta semana tséntsañe yojtsó ora, Jesús Bëngbe Bëtsabe bëts yebnentse tojánamashëngo, y tojanontsé jabuátambana. ¹⁵ Chentse chë judiënga, ntšamo Jesús tojanabatambacá tmojanuena ora, ojanánënga imojtsichamo: —Bëtsca ntjuatsjinýca, ¿ntšamo nyëtšá nantsetátšëmbo ca?

¹⁶ As Jesús tojanéjua: —Atšbe buatëmbayana ndoñe nye átšbentsána quenatóbocana, ndayá chë šonjichmó chábentsána. ¹⁷ Nda tojtseboše jamama ntšamo chë šojichmó cha yojtsebošcá, cha echántsetatšëmbo atšbe buatëmbayana Bëngbe Bëtsábiocana yóbocanama o nye átšbentsána.

¹⁸ Nda nye cachabe juábnaca tojtsoyebuambná, jtsebošana entsánga más bëtsá chamobemama; pero nda bëtsca tojtsama, chë tbojichmóbiyoye entsánga más bëtsá chamobemama, cha cocayé ntšamo ndegombre yomncá jtsóyebuambnayana, y ndocnábiyoye ntseíngñayana.

¹⁹ “Ndegombre, Moisés tsëngaftangbiana ley tojëftsanaboshjona. Pero masque chca, tsëngaftanguentšá

ndocná quenátama ntšamo cha tojëftsanmandacá. Y ¿ndáyeca šmojtseboše atše jóbama ca?” —Jesús tojanatjá.

²⁰ Chora entsánga tmojanjúa: —¿Ndegombre aca bacna bayëjbe juabna contsambá! ¿Nda yojtseboše aca jóbama ca?

²¹ Chora Jesús tojanéyana: —Nyetsca tsëngaftanga ojanánënga atše šmontsonýá, atše canye ochnayté canye entsá tijashnama. ²² Pero, Moisés tcmojtsanamëndá básetema base bobachtema chë más delicadentse jatëtšana, chaotsinýnama (ndoñe nye Moisésbeyeca chca, sinó Moisesbiana más tempsca bëts taitanga chca jamama imojanamánayeca); y tsëngaftanga canye básetema base bobachtema chë más delicadentse jatëtšana, masque chë te canye ochnayté totsomñese. ²³ Y mora, ntšamo Moisés tcmojëftsanamëndacá ndoñe cachcá ntjonýayama, canye básetema chca jatëtšana masque ochnayté; as, ¿ndáyeca atše šmojtsayaná, atše ochnayté canye entsábe nyëts cuerpo tijashnama? ²⁴ Nye batsá jinýese, ínnyëngbiana ndoñe matichámëngana tsábá o ndoñe tsábá tmonjama ca.

Ntšamo chë soyënga ndegombre bëtsemnama natsana lempe tsábá jshëtsetatšëmbëse, šmochjayana tsábá o ndoñe tsábá tmonjama ca —Jesús tojanayana.

Jesús tojanayana ndémocana cha tojánabama

²⁵ Chora básëftanga Jerusalenoca oyenënga tmojanontsé ichámuana: —¿Mua ndoñe yontsemna chë jóbama montsenguá cha ca? ²⁶ Masque ba entsángbe delante entsoyebuambná, ndocná chábioyoye ndocá ntjauyanana. ¿Nderado mo chë bëngbe améndayënga imojtsejuabná cha chë Cristo, chë

Uámana Uabuayaná yojtsemna ca? ²⁷ Pero bēnga mondétatšēmbo ndēmocá quem boyabása yomnana; y chē cuenta, chē Cristo chaojabo ora, ndocná queochátstátšēmbo ndēmocana cha yochjabama ca —chēnga imojtsichamo.

²⁸ Chca tojanuena ora, Bēngbe Bētsabe bēts yebnentše Jesús yojtsabuátambayēntscuana, cha jabuache tojánayana: —¡Tšēngaftanga šmojtsejuabná atše ndegombre šmabuatma, y ndēmocana tijabama šmojtsetátšēmbo ca! Pero nŷe atšbe cuenta, ndoñe chiyátabo, ndayá canŷa šojichmóyeca, nda ntšamo ndegombre yomncá nŷetsca soyēngama endbétsoyebuambnaye; y tšēngaftanga cha ndoñe quešmatábuatma. ²⁹ Atšna aīñe cha sēnduábuatma, er atše chábentšana sēnjabo y cha quem luaroye šonjichmó ca —Jesús tojánayana.

³⁰ Jesús chca tojánayana ora, chēnga tmojánbošena cha jishachama, pero ndocná tbonjánishache, er cha chca japásama cabá ndoñe ora tonjanósh-jango. ³¹ Banga chentše Jesúsbeñe imojtsanošbuaché y tmojánayana: “Chē Uámana Uabuayaná chaojabo ora, ¿quem boyabásabiama más tšabe soyēnga yochjama ca?”

Chē fariseunga tmojánbošena Jesús jishachama

³² Chē fariseunga tmojántatšēmbona ntšamo entšanga Jesusbiama iytēcana imojtsencuéntaye. As, chēnga y chē bachnangbe amēndayēnga tmojanichamó báseftanga Bēngbe Bētsabe bēts yebnocá josticiēnga, Jesús chamuishachama. ³³ Chora Jesús tojánayana: “Muentšana nŷe baseftayté tšēngaftangaftaca chanjéftsemna; chentšana, chē šojichmó chábioye chanjētspadésa. ³⁴ Chora

tšēngaftanga atše šmochántsenguaye, pero ndoñe quešmochátinŷena; y ndayentše chántsemnoca ndoñe quešmochatobenaye jashjanguama ca.”

³⁵ Chora chē judiēnga tmojanontsé entjanayana: “¿Ndēmoye quem boyabása yochjá, y bēnga ndoñe mochanjobenaye jinŷenama ca? ¿Inŷe fshantsēngoye, judiēnga tmojuashanēngbioye yochjá, y choca chē ndoñe judiēnga yochjabu-atambá? ³⁶ ¿Ntšamo yojtsentšáyana cha šonjauyancá, chē ‘tšēngaftanga atše šmochántsenguaye, pero ndoñe quešmochátinŷena; y ndayentše chántsemnoca ndoñe quešmochatobenaye jashjanguama ca?’” —chēnga imojtsichamo.

Béjayēnga vida bomniye

³⁷ Chē fiesta jopochócama te yojamna chē más uámana te. Chē te, Jesús entšángbentše tojantsá y jabuache tojánayana: “¡Nda tbojtsajuendá, átšbioye chauabo y chaofsé! ³⁸ Ntšamo Bēngbe Bētsabe uabemana palabren-guiñe endayancá: ‘Nda átšbeñe tojtsosbuaché, cha echántsemna mo ndabe ainanentšana vida bomna béjayēnga tojtsobocancá.’ Chca echántsemna átšbeñe ošbuáchiyēngbiama ca” —cha tojánayana.

³⁹ Chē sóyeca, Jesús yojtseboše jayanana, chábeñe ošbuáchiyēnga chē Uámana Espíritu mochjanóyēngacñe ca; er chē Uámana Espíritu cabá ndoñe tonjánabo, Jesús corente bētsá yojannama cabá ndoñe tmonjaninŷinŷe causa.

Nŷetsca entšanga ndoñe cachcá Jesusbiama imontsejuabnaye

⁴⁰ Chca tmojanuena ora, inŷenga imojtsichamo: —Quem boyabása ndegombre chē Bēngbe Bētsabe juabna oye-buambnayá entsemna, chē Cristbe natšana jabamá ca.

⁴¹ Inyenga imojtsichamo: —Ndegombre cha chë Cristo, chë Uámama Uabuayaná entsemna ca.

Pero inyengna: —Ndoñe, er chë Cristo Galileocana ndoñe queochátabo. ⁴² Ndegombre, Bëngbe Bëtsabe uabemana palabrënguiñe endayana, chë Cristna rey Davídbentšana entšá canmëna, y Belenocana caochjabo ca, cach pueblócana ndayentšá David inamna ca —chënga imojtsichamo.

⁴³ Y chca, inyengna Jesusbe pavor imojtsemna, y inyengna chabe contra. ⁴⁴ Inyenga imojtseboše Jesús jishachama, pero ndocná tbonjánishache.

Chë amëndayënga Jesúsbeñe ndoñe montsanošbuaché

⁴⁵ Chë fariseunga y bachnangbe amëndayënga imojtsemnoye chë Bëngbe Bëtsabe bëts yebnoca josticiënga tmojtjanashjajna ora, tmojanatjá: —¿Ndáyeca ndoñe Jesús šmonjuánatse ca?

⁴⁶ Chora chë josticiënga tmojanéjua: —Ndocná quenatoyebuambná ntšamo chë boyabása tonjoyebuambacá ca.

⁴⁷ Chora chë fariseunga tmojanéyana: —¿Tšëngaftángnaca šmojalesenciá cha chacmaingñema ca? ⁴⁸ ¿Nderado bëngbe amëndayënguentšá o bënga fariseunguentšá nye mo canya chábeñe tayojtsošbuaché? ⁴⁹ Pero quem entšanga, ntšamo leyíñe iuayancá nduabuátmënga, bacna soyëngaca sempre mochanjëftsemna ca —chënga imojtsichamo.

⁵⁰ Chora Nicodemo, canya fariseunguentšá, chë Jesúseftaca jencuëntama ibeta tojana cha, tojanayana: ⁵¹ —Ntšamo bëngbe leyíñe endayancá, bënga ndoñe quemuátobena jayanana canye entšá castiganá jtsemnama ibojtsemna ca, cha cabá

ntjoyeunaycá, ndayá cha tojamama jtsetatšëmbuama ca.

⁵² Chora chënga Nicodemo tmojanjuá: —¿Acnaca chábeñe cojtsošbuaché y mo canye Galileoca entšacá cojtsejuabná ca? Bëngbe Bëtsabe uabemana palabrënguiñe cochjuatsjinye, y cochanjinye ni canya Bëngbe Bëtsabe juabna oyebuambnayá Galileocana yochjabo ca.

Chë shema boyábioye ínÿaftaca ingñayá

⁵³ Fariseunga y bachnangbe amëndayënga chë josticiëngbioye tmojanécacantëšana, cada ona cachabe yebnoye imojtsatónënga.

8 Pero Jesusna canye tjoye, Olivos ca uabáinoye tojt sanoñe. ² Y chë yëfsana cachëse, Jesús cachiñe Bëngbe Bëtsabe bëts yebnoye tojesaná. Nÿetsca entšanga tmojanobeconá jouenama, y Jesús tojanótbema y tojanontšë jabuátambama.

³ Chorna, báseftanga ley abuátambayënga y fariseunga tmonjánashjajna, y canye shembása tmojanëshjango. Chana tmojaninÿena chabe boyábioye ínÿaftaca ibnetsoíngñañëntscuana; nÿetscangbe tsëntsaca tmojanatsá, ⁴ y Jesús tmojaninyana: —Buatëmbayá, quemuá fsënjínÿena chabe boyábioye ínÿaftaca bondëtoíngñañëntscuana. ⁵ Leyíñe Moisés šonjanamëndá mëntšá uamana shembásengna ndëtšbëngaca jtsëbáyama. ¿Aca ntšamo catjayana ca?

⁶ Jesús chca tmojaninyana ana jisháchichiyama, chca chënga jtsebomnama ndáyeca chabe contra jayanana. Pero Jesús nye fshantsoye yojtsejbëna y yojóntša ntšabuáfjaca fshantsiñe juabemama. ⁷ Chënga nye imojtsetjanaye causa, Jesús tojantsbaná y tojanéyana: —Nda tšëngaftanguentšá tondaye bacna soyënga tondbomná, chaobojatšë ndëtšbeca jatëchënjama ca.

⁸Chentshana Jesús cachiñe fshantsoye yojtosejbéna, y yojtétóntša fshantsiñe jtëtabemama. ⁹Chca tmojanuena ora, entsanga tmojanontsé canyánya chentshana jésebocanana; natsana chë más bëtsanánënga y chë ínÿengna ústonoye. Canya Jesús tonjanoquedá y chë shembásanaca. ¹⁰As, Jesús tojtantsá y tbojantjá: —¿Shembása, ndayentse chë acbe contra ichámënga imojtsemna? ¿Ndocná acbiama tonjayana castiganá chacotsemna ca?

¹¹Ndoñe, Taita, ndocná ca —chë shembása tbojanjá.

Chora Jesús tbojanayana: —Atse cach ndoñe acbiama quichátayana castiganá chacotsemna ca. Morna, motsatoñe, pero ndoñe más bacna soye cattsama ca.

Jesús yomna quem luarentša entsangbe juabna binÿnayá

¹²Jesús cachiñe Bëngbe Bëtsabe bëts yebnentse yojsabuátambaye, y entsanga mëntšá tojanéyana: —Atse sëndbínÿna quem luare entsangbe juabnënga. Nda atse chašojséstona, cha echantsiyena atse chë binÿnayáftaca; y ndoñe mo ibetiñcá queochátaye, y chca, tsabe vida echántsebojna ca.

¹³Chora chë fariseunga Jesús tmojanayana: —Aca ñe cach acbiama chca contsoyebuambná; chcana, chë ntšamo contsichamcá tondaye quenatámana ca.

¹⁴As chora Jesús tojanéjua: —Ntšamo cach atšbiana sentsichamcá añe entsámana, masque ñe atse stsichamo ntšamo atšbiana ndegombre yomncá. Er atse sëndétatšëmbo ndémocana tijabo y ndémoye tstsá. Pero tsëngaftanga ndoñe chca quešmátstatšëmbo. ¹⁵Tšëngaftanga šmondbétsichamo ínÿengbiama tsábá o ndoñe tsábá tmontsamama, chca, ñe ntšamo entsanga mondbetsejuabnycá. Pero atšna ndocnabiama chca quetsátichamo. ¹⁶Atse ndoñe ñe canya

quetsátsmëna ínÿabiama jayanama tsábá o ndoñe tsábá tontsamama; ndayá atšbe Taitá, chë šonjichmó cha, átšeftaca chca jayanana. Chíyeca, atse ínÿabiama tsábá o ndoñe tsábá tonjama ca stsichamo ora, ntšamo stsichamcá ndegombre jtsemnana. ¹⁷Tšëngaftangbe leyíñe enduábemana, uta entšata ndayámna cächá tbojayanëse, ntšamo chata tbojayancá puerte jtsámanana ca. ¹⁸Y morna, atse séntsichamo chë ntšamo cach atšbiana ndegombre yomncá, y atšbe Taitá, chë šonjichmó chánaca entsichamo ntšamo atšbiana ndegombre yomncá ca —Jesús tojánayana.

¹⁹Chora chënga tmojantjá: —¿Ndayentse acbe Taitá yojtsemna ca?

Y Jesús tojanéjua: —Tšëngaftanga ndoñe quešmatábuatma ni atse ni atšbe Taitá. Atse šmojtsábuatmëna, atšbe Taitánaca šmattsábuatma ca.

²⁰Bëngbe Bëtsabe bëts yebnoca, chë crocénana jacjayama luarentse yojsabuátambaye ora, Jesús chca tojánayana. Pero masque cha chentse yojtsemna, ndocná tbonjánishache, er chca japásama cabá ndoñe ora tonjanóshjango.

“Chë chanjá luaroye, tsëngaftanga ndoñe quešmatobena jama”

²¹Chora Jesús yojtétóntša oye-buambnayana: —Atse chantá, y chora tsëngaftanga atse šmochántsenguaye. Masque chca, šmochanjóbana tsëngaftangbe bacna soyëngama ndëperdonánënga. Chë chanjá luaroye, tsëngaftanga ndoñe quešmatobena jama ca —Jesús tojánayana.

²²Chora chë judiënga tmojanontsé enatsëtsnayana: —¿Mo nderado yojtse-juabná jtsenóitanama, y chíyeca yojtsichamo chë cha yochjá luaroye bënga ndoñe montsobena jama ca?

²³ Chora Jesús tojanéyana: —Tšëngaftanga quem luaroquënga šmondmëna; atšna tsbananocá, celocá sëndmëna. Tšëngaftanga nÿe quem luarama enójuabnayënga šmondmëna, pero atše ndoñe. ²⁴ Chíyeca atše chca tcbonjáuyana, chë “tšëngaftangbe bacna soyëngama ndëperdonánënga šmochanjóbana ca”. Er, nda atše ndegombre bëtsemnana ndoñe chašmontsošbuachese, tšëngaftangbe bacna soyëngama ndëperdonánënga šmochanjóbana ca.

²⁵ Chora chënga tmojantjá: —¿As aca ndase cmëna ca?

Y Jesús tojanéyana: —Entšanga jabaúambama sënjanbojatsé orscana chama tcbonjáuyana. ²⁶ Atše ba soyënga séntsebmoma tšëngaftangbiama jayanama, tšëngaftangbe contra jayanama; pero chë šonjichmó cha nÿetsca soyëngama ndegombre endbétsichamo, y atšna ntšamo chábensana tijouencá, cachcá quem luare oyenënga séntsëtsësná ca —cha tojanéyana.

²⁷ Pero chënga ndoñe tonjanësertá Jesús cachabe Taitabiama chca tojanéyanama. ²⁸ As Jesús tojanéyana: —Bëngbe Bëtsá Entšá tbojanbemá chašmojatsbaná ora, šmochántsetatsëmbo nda sëndmëná atše bëtsemnana. Cachcá, tšëngaftanga šmochántsetatsëmbo, nÿe cach atšbe juábnaca atše tondaye jamama sëndobenama. Nÿe ndayá atšbe Taitá šojabatëmbacá atše sëndoyebuambná. ²⁹ Y chë šonjichmó cha ndoñe nÿe canÿa quešnátsboshjuana. Chca endmëna, er atše sempre sëndbët-sama ntšamo cha oyejuayá jabemama tojtsemncá ca —Jesús tojánayana.

³⁰ Jesús chca tojánayana ora, banga chábeñe imojtsanošbuaché.

Bëngbe Bëtsabe básenga y chë nÿe bacna soye jtsamama vida bomnënga

³¹ Chora Jesús, chë chábeñe imojtsanošbuaché judiënga tojanéyana: —Ntšamo cbontsëtsësnacá tšëngaftanga sempre šmojtsamëse, ndegombre atšbe uatsjëndayënga šmochántsemna. ³² Ntšamo ndegombre yomncá šmochántsetatsëmbo; y ntšamo ndegombre yomncá jtsetatsëmbëse, atsebácanënga šmochántsemna ca.

³³ Chora chënga tmojanjuá: —Bëngna Abrahámbentsana entsanga fsëndmëna, y ndocná ndocna te chešnáisishëche nÿe chabiamana nÿets tempo jtsoservënana. As, ¿ndáyeca šcojtsëtsësná bënga atsebácanënga fchtsemna ca?

³⁴ Chora Jesús tojanéyana: —Ndegombre šcuayana: Nda bacna soyënga tojtsama, cha nÿe bacna soyënga jamama juabnéngaca mandaná jëftsemnana. ³⁵ Canÿe oservená ndoñe nÿets tempo chë pamillentšá ntjëftsemnana, ntšamo canÿe uaqiñá sempre chë pamillentšá jesomñancá. ³⁶ Y chca, Bëngbe Bëtsabe Uaqiñá chacmojátsebacase, tšëngaftanga ndegombre atsebácanënga šmochántsemna bacna soyënga juabnënguentšana. ³⁷ Atše sëndëtatšëmbo tšëngaftangna Abrahámbentsana entsanga šmomnana; pero tšëngaftanga šmontseboše atše jóbama, ntšamo atše cbontsëtsësnacá ainaniñe jóyëngacñama ndoñe quešmátsboše causa. ³⁸ Ntšamo atšbe Taitábioca tijinÿcá, cach soyëngama atše sëntsoyebuambná. Tšëngaftangnaca, cachcá ntšamo tšëngaftangbe taitábentsana šmojouencá šmontsama ca —tojanéyana.

³⁹ Chora chënga tmojanjuá: —Bëngbe uámana bëts taitá, Abraham endmëna ca.

As Jesús tojanéyana: —Tšëngaftanga Abrahambe básenga ca jtsabáinama mercedo šmojtsebuajónëse, chë ntšamo Abraham tojëftsema y cachcá tšëngaftanga šmattsama. ⁴⁰ Atšna ntšamo ndegombre yomncá sëndoyebuambná, ntšamo Bëngbe Bëtsábentšana tsouenancá. Pero mora tšëngaftanga šmontseboše atše jóbama; Abraham ndocna te chca chenaisobuachjanguá. ⁴¹ Tšëngaftangna, ntšamo tšëngaftangbe taitá tojëftsemcá y cachcá jtsamana ca — Jesús tojánayana.

Chora chënga tmojaniana: —Bënga nÿe enaquécana básenga ndoñe queftsátsmëna. Chë nÿe canÿe taitá fsënd-bomná, Bëngbe Bëtsá endmëna ca.

⁴² Chora Jesús tojanéyana: —Bëngbe Bëtsá ndegombre tšëngaftangbe taitá tojtsemnëse, tšëngaftangna atše šmattsebobonshana. Er atšna, Bëngbe Bëtsábiocana sënjabo y muentše sëntsemna. Nÿe atšbe ponto ndoñe chiyátabo; Bëngbe Bëtsá šonjichmó. ⁴³ ¿Ndáyeca tšëngaftanga ndoñe šmontsobena atšbe palabrënga josértana? Co, ntšamo cbontsëtsësnacá joyeunayama ndoñe quešmátsboše causa chca. ⁴⁴ Tšëngaftangbe taitá Satanás endmëna. Tšëngaftangna chabe entšanga šmondmëna; chíyeca, tšëngaftanga šmontseboše jamama cachcá ntšamo cha tojtsebošcá. Quem luare jobojátšama orscana, Satanás entšá obanayá endmëna. Satanasbe juabnoqa, ndocna tšabe soyënga ni ndegombre soyënga ntsebíñnana. Chíyeca, ndocna te cha ntšamo ndegombre yomncá ntsamana. Cha canÿe bostero endmëna, y chábtentšana nÿetsca bostero soyënga jtsóbocanana. Chíyeca, cha tojtsebostero ora, nÿe ntšamo cachá yomnama jtsichámuana. ⁴⁵ Atšna sempre ntšamo ndegombre yomncá cbondutsësná; chíyeca, chë sëntsichamo soyiñe tšëngaftanga

ndoñe quešmatošbuaché. ⁴⁶ ¿Nda tšëngaftanguentšá nanjobenaye jinÿanÿiyana atše ndaye bacna soye tijamama? Y atše, nÿe ntšamo ndegombre yomncá stsichámëse, ¿ndáyeca chë tijayaniñe ndoñe šmontsošbuaché? ⁴⁷ Nda Bëngbe Bëtsabe entšá tomna, ntšamo Bëngbe Bëtsá tojtsichamcá jtsuenanana. Pero tšëngaftangna ndoñe Bëngbe Bëtsabe entšanga quešmátsmëna. Chíyeca, ntšamo Bëngbe Bëtsá entsichamcá ndoñe quešmátsboše jouenama ca — Jesús tojanéyana.

Cristo Abrahambiana más natsana ya yojtsemna

⁴⁸ Chora chë judiënga tmojaniana: — Ajá, bënga co ndegombre fstsichamo, aca nÿe samaritano y bacna bayëjbe juabna uambayá comna ca fstsichamo ora ca.

⁴⁹ Y Jesús tojanéjua: —Atše ni mo canÿe bayëjbe juabna quetsatambá. Ntšamo atše sëntsamcá, endmëna jinÿanÿiyama atšbe Taitá Bëngbe Bëtsá uamaná yomnama; pero tšëngaftangna, atše chca tsmënama ndoñe quešmatinÿinÿná. ⁵⁰ Atše ndoñe quetsátsboše inÿenga atše más uamaná chašmobemama. Pero inÿa endmëna; cha añe endboše atše bëtsá bëtsemnama chaminÿanÿema. Y chánaca endmëna chë inÿengbiana tšabá o ndoñe tšabá tmontsamama endbetsichamuá. ⁵¹ Ndegombre šcuayana, nda ntšamo atše sëntsichamcá tojouena y chca tojama, ndocna te quechatóbana ca — Jesús tojánayana.

⁵² Chora chë judiënga tmojaniana: —Mora cocayé fsëntsetatšëmbo aca ndegombre bacna bayëjbe juabna uambayá comnama. Abraham tojanóbana, y cachcá, nÿetscanga Bëngbe Bëtsabe juabna oyebuambnayëgnaca. ¿Y mora aca cochjátichamo, “Nda ntšamo

atše sentsichamcá tojouena y chca tojama, cha ndocna te queochatóbana ca”? ⁵³¿O aca, bēngbe bēts taitá Abrahambiana más bētsá comna? Cha tojanóbana, y Bēngbe Bētsabe juabna oyebuambnayēngnaca. ¿Ndase cojātsmēna ca aca cojātsjuabná ca? —chēnga imojtsichamo.

⁵⁴Chora Jesús tojanéjua: —Atše n̄ye cach atše más bētsá stsenobiamnasna, chē soye tondaye nantsámāna. Pero chē más bētsá šojtsebiamná cha, atšbe Taitá endmēna, cach ndabiana tšēngaftanga šmondbētsichamo tšēngaftange Bētsá canmēna ca. ⁵⁵Pero tšēngaftanga cha ndoñe quešmatábuatma; atše aiñe. Y atše, “cha ndoñe quetsatabuatma ca” stsichámēse, átsnaca cach tšēngaftangcá can̄ye bostero stsemna. Pero ndegombre atše cha sēnduábuatma, y ntšamo cha tojtsichamcá, atše sēndouenana y cachcá sēndbētsama. ⁵⁶Tšēngaftange uámana bēts taitá Abraham, chē atše jabama te jin̄yama yojtsejuabnaye ora, puerte oyejuayá yojtsemna. Y pronto tojēftsanin̄ye, y puerte tojanoyejuá ca —Jesús tojánayana.

⁵⁷Chora chē judiēnga tmojanianya: —Aca cabá ndoñe shachna bnētsana uata quecátsbomna; y as, ŷntšamo cochjátichamo, Abraham tcojēftsín̄ye ca?

⁵⁸Chora Jesús tojanéjua: —Ndegombre cbéyana, Abraham cabá ndoñe ainá quenjātsmēna ora, atše ya sēnjétsemna ca.

⁵⁹Jesús chca tojanéjua ora, chēnga ndētsbēnga tmojanájaca cha jtsatēchēnganjama. Pero Jesusna oitanánana, Bēngbe Bētsabe bēts yebnentsāna tojésanbocna.

Jesús tojanma, can̄ye boyabása jtaná on̄ynaná chabuabín̄yama

9 Can̄ye luarējana yojtsachnējuana ora, Jesús can̄ye boyabásabioye

tbojánin̄ye. Chē boyabásana jtaná inón̄yana. ²Chē uatsjēndayēnga Jesús tmojantjā: —Buatēmbayá, ¿ndáyeca quem boyabása jtaná inón̄yana? ¿Camuá bacna soyēnga tojamama, o chabe bētsétsangbe bacna soyēnga causa ca?

³Chora Jesús tojanéjua: —Ni cachabe bacna soyēngama, y ni chabe bētsétsangbe bacna soyēnga causa. Chca endmēna ndayá entsānga jin̄yan̄iyama ntšamo Bēngbe Bētsá yobencá. ⁴Cabá yojtsēsháchena ora, šontsamna jamana ntšamo chē šonjichmó cha yojtsebošcá. Ndoñe usháchena tempo echanjóshjango; chora ndocná tondaye jamama queochatobenaye. ⁵Quem luariñe chjēftsemnēntscuana, atše quem luare entsāngbe juabnēnga bin̄ynayá chanjēftsemna ca —tojanéyana.

⁶Chca tojánayanentsāna, Jesús fshantsiñe tojanbuashētjo, y chē yebuáyeca batšá ngüiche tojánbema, y chē jtaná chē ngüicheca tbojanbuchanētjo. ⁷Chora chē jtaná tbojanianya: —Motsa y metsobúchjabebiyē, chē binche uafjónayē entsāngbe pormániñe, Siloé ca uabáiniyoca ca. (Siloé, judiēngbe biyañe endayana “Ichmoná ca”.)

Y chē jtaná tojána; choca yojtsobúchjabebiyē, y yebnoye tojtaná ora, ya ibojtsabin̄yana. ⁸Chē juachañe oyenēnga y chē jtaná tempo lemošna otjanañana tmojánin̄yēnga, imojtsentjanaye: —¿Mua ndoñe yondmēna chē enjanamana jótbemana lemošna jótjañama ca?

⁹In̄yēnga imojtsichamo: —Cha entsemna ca.

Y ín̄yēnga: —Cha ndoñe quenátsmēna, pero chacá entsábona ca.

Y cach shnaná yojtsichamo: —Atše cha sēndmēna ca.

¹⁰As chē entsānga tmojantjā: —¿Ntšamo chca mora cmojtsabin̄yana ca?

¹¹ Y cha tojanéjua: —Chë boyabása, Jesús ca uabainá, ngüiche yebuáyeca tonjábema, šonjabuchanëtjo y šonjauyana: “Motsa y Siloé uafjajónayíne metsobúchjabebiyé ca”. Chcasna, atše sënjá, sënjetsobúchjabebiyé y cachora šontsabinýna ca.

¹² Chora chënga tmojantjá: —¿Ndayentše cha yojtsemna ca?

Y chana: —Atše ndoñe quetsátstatšëmbo ca —tojanéjua.

Chë jтана shnanábioye fariseunga imojtsetjanaye

¹³ Chora chë entsanga, chë jtaná inamná fariseúngbioye tmojanánatse.

¹⁴ Chë Jesús batsá yebuáyeca ngüiche tojánbema, y chë jtaná tojanma te, canýe ochnayté inamna. ¹⁵ As chë fariseunga chë boyabása tmojantjá: —¿Ntsámoyeca mora cmojtsabinýna ca?

Chora cha tojanéjua: —Cha ngüiche yebuáyeca tonjábema y šonjabuchanëtjo. Sënjetsobúchjabebiyé, y cachora šonjuabinýna ca.

¹⁶ As chora básefta fariseunga imojtsichamo: —Chë jtaná chabotsabinýnama tojamá ndoñe tonjochná, y ochnayté tojatrabajá. Chíyeca cha Bëngbe Bëtsabe entsá ndoñe quenátsmëna ca.

Inýenga imojtsichamo: —Cha canýe bacna soyënga amá tojtsemnëse, ¿ntšamo nantsobena canýe bëts soye Bëngbe Bëtsabe obenánaca jamama ca?

Y chca, inýenga Jesusbe pavor imojtsemna, y inýengna chabe contra. ¹⁷ Chama chënga cachiñe chë jtaná inamná tmojtëtantjá: —Er aca mora chacmotsabinýnama cha tojamëse, ¿chabiama ntšamo catjayana ca?

Chora cha tojanéjua: —Chana canýa Bëngbe Bëtsabe juabna oyebuambnayá entsemna ca.

¹⁸ Pero chë judiënga ndoñe montsanošbuaché, cha chë jtaná inamnama y chora ibojtsabinýnama.

As chënga, inýenga tmojanichamó chë boyabásabe bëtsétsata jobiatšama.

¹⁹ Chë bëtsétsata tbojánashjango ora, chë judiënga tmojanatjá: —¿Quem boyabása tsëndatbe uaquiñá yomna ca? ¿Ndegombre tašojtsichamo cha jtaná inonýnama? Chcase, ¿ntšamo mora cha ibojtsabinýna ca?

²⁰ Chora chë bëtsétsata tmojanéjua: —Aíne fsëndëtatšëmbo cha bëndatbe uaquiñá endmënama y jtaná tonjanonýnama. ²¹ Pero ndoñe queftsátstatšëmbo ntšámoyeca mora chca ibojtsabinýnama, ni bëndatbe uaquiñá chabotsabinýnama nda tojamama cach ndoñe. Cachá motjanga. Ya bëtsá entsemna, y cachá entsobena tšëngaftanga razón jatšatayama ca —chata tbojánayana.

²² Tempo, chë judiënga imojenóyeunaye, chëngbe enefjuana yebnënguentsana jtëbuacanana chë Jesús ndegombre chë Uámana Uabuayaná, chë Cristo yojamna ca tmojayanënga. Chë bëtsétsatna chama ibojtsauatja; ²³ chíyeca tmojanéyana: “Cha ya bëtsá entsemna. Cachá motjanga ca”.

²⁴ As cachiñe chë judiënga chë jtaná inamná tmojanchembo y tmojanianyana: —Bëngbe Bëtsabe delante cach acbiama ndegombre mobuambá. Bënga fsëndëtatšëmbo chë boyabása canýe bacna soyënga amá yomnama ca.

²⁵ Chora cha tojanéjua: —Cha canýe bacna soyënga amá o ndoñe tondmënama, atše ndoñe quetsátstatšëmbo. Atše nýe mëntšá séntsetatšëmbo: Atše jtaná sënjanmëna, pero mora šontsabinýna ca.

²⁶ Chora chënga cachiñe tmojantantjá: —¿Ntsámo tcmënjama? ¿Ntsámo cha tënjama chacmotsabinýnama ca?

²⁷ Y cha tojanéjua: —Ya tcbonjáuyana y ndoñe chešmatoyeuná. ¿Ndayeca cachiñe šmojtseboše jatuenama?

¿Tšëngaftángnaca šmojtseboše chabe ústonënga jtsemnama ca?

²⁸ Chora chënga cha tmojtsanóyenguango y tmojaniyana: —Acna canÿe chabe ustoná cojtsemna, pero bënga ndoñe; bëngna Moisesbe ústonënga fsëndmëna. ²⁹ Bënga fsëndétatšëmbo, Bëngbe Bëtsá Moisésbioye tbojanatšëtsama, pero chë boyabásabiama ndoñe queftsátstatšëmbo ni mo ndëmocana cha tojabama ca —chënga imojtsichamo.

³⁰ Chora chë boyabása tojanéjua: —¡Ntšamo chca nántsemna! Tšëngaftanga ndoñe šmontsetátšëmbo ndëmocana cha tojabama; pero chašauabinÿnama cha tonjama.

³¹ Bënga tšabá mondétatšëmbo, bacna soyënga amënga Bëngbe Bëtsá ndoñe queondbátayaunanama. Chana, nÿe chábioye adorayá y ntšamo cha tojtsebošcá amábioye joyeunayana.

³² Quem luare jobojátšama orscana ndocna te quenaisótatšëmbo canÿe jtaná onÿnanabiama ndánaca cha chabotsabinÿnama tojéjtsemama.

³³ Quem boyabása, Bëngbe Bëtsabe ichmoná chabe soyënga jamama ndoñe tontsemnëse, tondaye nantsobena jamama ca —chë entšá tojánayana.

³⁴ As chë fariseunga tmojaniyana: —¡Ndayá! Aca tcojanonÿná orscana, corente bacna soyënga amá tcomnëse, ¿ntšamo mora bënga šcochjátabuatabaye ca?

Y chora chë judiëngbe enefjuana yebnentšana cha tmojtanábocna.

Chë Bëngbe Bëtsabe soyëngama mo jtanëngcá imomnënga

³⁵ Chë jtaná tmojtanábocnama Jesús tojanuena ora, tojána cha janguanguama. Tbojáninÿena ora tbojaniyana: —¿Aca Bëngbe Bëtsá Entšá tbojanbëmábeñe quecojtsošbuaché ca?

³⁶ Y cha tbojanjúá: —¿Taita, nda cha yojtsemna, as atše chábeñe jtsošbuáchiyama ca?

³⁷ As Jesús tbojaniyana: —Aca ya tconjinÿe; chë ácaftaca entsoyebuambná cha entsemna ca.

³⁸ Chora, chë boyabása Jesúscentše tojanoshamentšé jëtschuayama y tbojaniyana: —Atšbe Utabná, aifñe sëntsošbuaché ca.

³⁹ Chora Jesús chë entsanga tojanéyana: —Atše quem luaroye tijabo ndayá entsanga jinÿanÿiyama ntšamo cachënga Bëngbe Bëtsabe soyëngama imojuabnama. Chë Bëngbe Bëtsabe soyëngama ndosertánënga, chë soyënga atše chanjínÿanÿiye ora, mo jtanëna shnanëngcá mochántsemna; y chë Bëngbe Bëtsabe soyëngama corente imotátšëmbo ca juabnayëngna chanjínÿanÿiye, nÿe batšá Bëngbe Bëtsabe soyëngama imotatšëmbuama. Y chca, chënga, masna mo jtanëngcá mochántsemna y ndoñe mo chë jinÿama obenëngcá.

⁴⁰ Básefta fariseunga Jesúseftaca imojtsemnënga chca tmojanuena ora, cha tmojaniyana: —Ndegombre bënga ndoñe mo jtanëngcá queftsátsmëna ca.

⁴¹ Chora Jesús tojanéjua: —Tšëngaftanga Bëngbe Bëtsabe soyëngama ndétatšëmbënga šmojtsemna ca, y ndegombre chë soyëngama ndoñe cmonsésertana ca šmojobuabase, ndayá šmojtsamcá Bëngbe Bëtsá mo bacna soyënga cuenta ndoñe queocháttonÿaye. Pero tšëngaftanga corente Bëngbe Bëtsabe soyëngama cmojtsésertana ca šmojtsichámëсна, Bëngbe Bëtsá ndoñe queochatobenaye tšëngaftangbe bacna soyëngama jáperdonana ca —Jesús tojanéyana.

Chë oveshënga abujénÿa y chabe oveshënga

10 As Jesús tojanéyana: “Ndegombre ŝcuayana: Nda chë oveshëngbe luaroye bëshashajana ndoñe tonjámashëngo, pero añe inÿajana tojtsamashëngo, chana canÿe atbëbaná y abacayá jtsemnana. ² Pero chë bëshashajana tojamashënguana, chë oveshënga anÿená jtsemnana. ³ Chë bëshasha ebtafjuaná, chë bëshasha jebëtafjuana, y chë oveshënga abujénÿa ntšamo cada ona tmbaincá chë oveshënga jáchembuana. Y chë oveshënga jtsetatsëmbuana chëngbe abujénÿa yojtsachembuanama; y chë luarentšana cha jubuacnana. ⁴ Nÿetsca oveshënga tmojábocana ora, chë abujénÿa chënga jtsebënatsanana, y chë oveshënga jtséstonana, er chabe oyebuambnayana chënga joyátëmbana. ⁵ Pero chë tmonduabuatmábioyna chë oveshënga ndoñe ntjuastana; nÿe chábentsana jtsachetëngana, chë oveshënga chabe oyebuambnayana ndoñe ntjoyátëmbana causa ca” —Jesús tojánayana.

⁶ Jesús entsanga chca tonjanacuntá, pero chënga ndoñe ntjosértana ntšamo yojtsentsayancá.

Jesús, chë oveshënga tšabe abujénÿa

⁷ As Jesús cachiñe tojanéyana: “Ndegombre cbéyana: Atše sëndmëna chë bëshasha oveshënga mondbëtsamashjuanëjana. ⁸ Nÿetscanga chë atšbe natsana tmojánabënga, atbëbanënga y abacayënga imnamna, pero chë oveshënga ndoñe chëngbioye ntjóyaunayana. ⁹ Atše chë bëshasha sëndmëna. Nda quem bëshashajana tojamashënguá, atsbocaná echántsemna. Canÿe oveshá jamashënguana y jabocnana, y shácuana jónÿenana.

Cachcá, chë quemëjana tojamashënguá, lempe echanjónÿena.

¹⁰ “Chë atbëbaná jabana nÿe jatbëbama, jóbama y lempe jtsepocho-cama; pero atšna, entsanga vida chamotsebomnama y átšeftaca bëtscá tšabe vida chamotsebomnama tijabo.

¹¹ “Atše sëndmëna chë oveshënga tšabe abujénÿa. Chë oveshënga tšabe abujénÿa sempre jtseprontánana chëngbiama jóbana, chabe oveshënga ababuánÿeshanayeca.

¹² Pero nda nÿe crocenánama totrabája y chë oveshënga ndoñe chábenga tmontsemna, cha nderado tojinÿe canÿe tjañe queše chë oveshëngbioye tojtsobécocnama, cachora nÿe cachcá jesénÿayana y jtsachana. Chë tjañe queše oveshënga jtsacamiyana, y chë oveshëngna nÿe cátoye jtsachetana. ¹³ Cha jtsemnana nÿe crocenánama trabajayá; chabiama nÿe chë uacanána más uámama soye jtsemnana, y chë oveshëngbiama tondayana ntsentsamnana; chíyeca cha jtsachana.

¹⁴ “Atše sëndmëna chë oveshënga tšabe abujénÿa. Atše chënga sëndëubuatma, y chëngnaca atše šmonduábuatma. ¹⁵ Cachcá, chë Taitá Bëngbe Bëtsá atše šonduábuatma y atše chábioye. Atše sempre sëndëtseprontana jóbana, atšbe oveshënga sëndababuanÿeshanayeca. ¹⁶ Atše

inÿe oveshënga sëndábamna, pero chënga ndoñe quem luariñe oveshënga quemátmëna. Atše šontsemna chëngnaca moye junatsana. Chëngnaca atšbe oyebuambnayana mochanjouena, y muentša oveshëngaftaca cánÿiñe mochántsemna, y atšna nÿetsca chë oveshëngbiama chë abujénÿa chántsemna.

¹⁷ “Atše siempre sëndëtseprontana jóbana, chora jtayenama. Chíyeca chë Taitá šondbobonshana. ¹⁸ Ndocná

atsbe vida quešochatsbojuána, pero chënga sëndababuanÿeshánayeca sempre sëndétseprontana jóbana, cach atše chca sëndbošeyeca. Derecho sëndétsóbonñe chëngbiana jóbana, y chora jtayenama. Chca endmëna ntšamo atšbe Taitá šonjamandacá ca” —Jesús tojánayana.

¹⁹ Chë soyënga chë judiënga tmojanuena ora, cachiñe banga Jesusbe contra y ínÿengna Jesusbe pavor imojtsemna. ²⁰ Banga imojtsichamo: —Chana bacna bayëjbe juabna uambayá y corente juicio ndbomná entsemna. Y as ¿ndáyeca cha mochjátsyeunana ca?

²¹ Pero ínÿengna imojtsanichamo: —Ndocna bacna bayëjbe juabna uambayá ntsoberenana chca jóyebuambayama. ¿Canÿe bayëja nantsobena jamama canÿe jtaná chabotsabinÿyana ca?

Chë judiënga ndoñe imontsošbuáchiye Jesús Bëngbe Bëtsabe Uaquiná bëtsemnana

²² Canÿe uaftena tempo inamna, y Jerusalenentše canÿe fiesta imojtsebomna. Chë fiesta inamna cada uata, Bëngbe Bëtsabe bëts yebna tempo cachiñe tmojtanjebuama entšanga jtenójuaboyama. ²³ Jesús Bëngbe Bëtsabe bëts yebnocá yojétsana, canÿe amashjuana otsbojebniñe, Salomonbe Amashjuana ca uabáinentše. ²⁴ Chora, chë judiënga tmojanóbobuashcona, y tmojantjá: —¿Buetaytentscuana bënga fchjéftsemna acbiana ndegombre soye ntsetatšëmbcá? Aca chë Cristo cojtsemnëse, chama lempe tšabá šmanÿanÿé ca.

²⁵ As Jesús tojanéjua: —Ya tcbonjáuyana y tšëngaftanga átšbeñe ndoñe ntsošbuáchiyana. Chë atše sëndama soyënga, atšbe Taitá Bëngbe Bëtsabe obenánaca, cmontsinÿanÿná nda atše bëtsemnana. ²⁶ Pero tšëngaftanga átšbeñe ndoñe quešmatošbuaché, er

tšëngaftanga atše ndoñe quešmatéstoná, ntšamo chë oveshënga chë tšabe abuañéñya mondbetsëstoncá. ²⁷ Chë atše šmondústonënga, atše šmondbóyeunaye y šmondbëuasto. Atše chënga sëndëubuatma. ²⁸ Atše chanjama, quem entšanga chë nÿetsca tescama yomna tšabe vida chamotsebomnana; chënga ndocna te pochocánënga quemochátsmëna, y ndocná quenátobena átšbentšana chënga jefcana. ²⁹ Atšbe Taitá Bëngbe Bëtsá, chë entšanga atše chašmuastama tojamá, nÿetscangbiana más bëtsá endmëna, chíyeca ndocná quenátobena chábsentšana chënga jefcana. ³⁰ Chë Taitá y atše canÿa fsëndmëna ca —Jesús tojánayana.

³¹ Chora, chë judiënga cachiñe ndëtšbënga tmojanájaca Jesús jtsatëchénganjama. ³² Pero Jesús tojanéyana: —Atše tšëngaftangbeñe, ba bëts soyënga sënjama atšbe Taitá Bëngbe Bëtsabe obenánaca. ¿Ndëmua chentša soyama atše šmochtsatëchénganja ca?

³³ Chora chë judiënga tmojanjúa: —Ni canÿe quem bëts soyëngama bënga queftsátšboše aca jtsatëchénganjama. Aca Bëngbe Bëtsabiana ndoñe tšabá quecátichamo; mo chábioye cuafjoyenguangcá entsemna. Aca nÿe canÿe entšá condmëna, pero acna contsichamo cach aca Bëngbe Bëtsá comna ca; chíyeca bënga fsëntseboše ndëtšbëngaca aca jtsatëchénganjama ca —chënga tmojanayana.

³⁴ Chora Jesús tojanéyana: —Bëngbe Bëtsabe uabemana palabreñguinë mëntšá endayana: “Atše sënjayana tšëngaftanga diosënga šmomna ca.” ³⁵ Bëngbe Bëtsá chca tojánayana chë chabe palábraca y cha chamotseservënama tojánamandangiama; ndocná quenátobena jinÿanÿiyana ni mo canÿe soye Bëngbe Bëtsabe uabemana palabreñguinë, ndoñe ndegombre

soye yomnama. ³⁶Y atšbiama, Bëngbe Bëtsabiacá uabuayaná y quem luare ichmoná, ¿ntšamo tšëngaftanga šmojtsobena jayanama, “aca Bëngbe Bëtsabiana ndoñe tšabá quecátichamo ca”, chë Bëngbe Bëtsabe Uaquiñá sëndmëna ca atše tijayanama? ³⁷Ntšamo atšbe Taitá endamcá atše ndoñe séntsamëse, tšëngaftanga átšbeñe ndoñe šmattsošbuáchiye. ³⁸Pero, ntšamo atšbe Taitá endamcá atše añe stsamëse, masque ndoñe átšbeñe šmontsošbuaché, nÿe chë Taitabe obenánaca soyënga tijamama šmochtsošbuáchiye. As, canÿe ora chašmotsetátšëmbo y chacmësertá, chë Taitá átšbeñe yomnama y atše chábeñe tsmënama ca —Jesús tojanéyana.

³⁹Chora chënga cachiñe tmoján-bošena Jesús jishachama, pero cha chëngbentsana tojanotsbocá.

⁴⁰Chentsana, Jesús Jordán béjaye chenguana tojesaná y choca tojtsanoquedañe. Chentše Juan tempo entsanga yojanébáyana. ⁴¹Ba entsanga tmojána Jesús jinÿama, y mëntšá imojtsichamo: “Ndegombre, masque Juan ni mo canÿe bëts soye Bëngbe Bëtsabe obenánaca tonjëftsema, lempe ntšamo quem boyabásabiama tonjanoyebuambacá, ndegombre yojamna ca.” ⁴²Y chentše, ba entsanga Jesúsbeñe imojtsanošbuaché.

Lázaro tojanóbana

11 Inamna canÿe boyabása šocá, Lázaro ca uabainá. Cha inoyena canÿe pueblo Betania ca uabáinentše, Marta y Maríaftaca, chabe uabénata. ²Quem María inamna nda Bëngbe Utabná Jesusbe shecuatšine botamana uanguëtiye tbojanáshecbuešcja, y chabe stjënashaca tbojtanshecbojó cha. ³Chë uta uabénatna ínÿenga tmojanichamó Jesús

jauenayama: —Bëngbe Utabná, chë aca condbobonshaná šocá entsemna ca.

⁴Jesús chca tojanuena ora, tojánayana: —Quem šocana ndoñe quenátsmëna Lázaro chaóbanama. Pero añe entsemna Bëngbe Bëtsabe obenana entsanga jinÿanÿiyama, y Bëngbe Bëtsabe Uaquiñá chamuatschuama ca.

⁵Jesús corente yojánabuanÿeshana Marta, María y chatbe uaftše Lázaro. ⁶Masque chcasna, Lázaro šocá yojtsemna ca Jesús tmojanianya ora, cabá uta te más cha yojtsemna luarentše tojtsanoquedañe. ⁷Chentšana, chabe uatsjëndayënga tojanéyana: —Judeoye cachiñe cuajna ca.

⁸As chë uatsjëndayënga tmojanianya: —Buatëmbayá, baseftayté entsemna chë luaroca judiënga cmonjanbuachetá ndëtsbéngaca jtsóbama; y mora, ¿cabá choye jtésama cojtseboše ca?

⁹⁻¹⁰Chora Jesús tojanéyana: —Bnëtsana uta hora bnëtë endmëna. Nda bnëtë tojtsana, ndoñe ntjojéstjiana, binÿniñe bëtsemnayeca. Cachcá átšeftaca endmëna, tondaye quenátopodena átšeftaca jopásana, atše jóbanama cabá ndoñe tonjobuache ora. Pero ibeta tojtsanëse, cha jtjojéstjiana, ndoñe binÿniñe causa. Cachcá, bënga šontsamna yojtsësháchenëntscuana jatrabájana. Atšbe jóbanama tempo chaojóshjango ora, ya ndoñe queochátëshachena jatrabájama ca —tojánayana.

¹¹Chentsana tojanéyana: —Bëngbe amigo Lázaro tojtsomaná, pero atše choye chanjá jetsešenama ca.

¹²Chora chë uatsjëndayënga tmojan-juá: —Bëngbe Utabná, tojtsomanase yojtsayana chana tšabá yochtsatsmëna ca.

¹³Pero Jesús yojtsanëtsëtsná ndayá Lázaro tojtsanóbana ca, y chabe uatsjëndayëngna imojtsejuabnaye Lázaro ndegombre yojtsomáñama. ¹⁴As Jesús tšabá tojanéyana: —Lázaro tontsóbana. ¹⁵At-

še sêntsoyejuá choca atše ndoñe tsmë-nama, tšêngaftangbe tšabiamana chaot-semnama; chca, tšêngaftanga más átšbeñe chašmotsošbuáchema. Pero cuajna cha jinýama ca.

¹⁶ Chora Tomás, chë Gemelo ca uabobainá, chë inýe uatsjéndayënga tojanéyana: “Bëngnaca cuajna, cháftaca mochjóbana ca.”

**Jesús iuama entšanga
chámuatayenama y chë nýetsca
tescama yomna tšabe vida
chamotsebomnama**

¹⁷ Jesús chë béconana tojánashjango ora, tojántatšëmbona Lázaro ya canta te uatbontsána yojtsemnama. ¹⁸ Betania pueblo yojamna Jerusalén béconana, mo unga kilómetroca. ¹⁹ Ba judiënga tmojána Marta y María jautsëtsayama y jatjëmbambayama ndoñe tša ngménaca chabondëtsemnama, chatbe uaftše tojanóbana causa. ²⁰ Jesús yojtsashjauanama Marta tojántatšëmbona ora, tojánbocna cha jajëbenguama, pero María cach yebnentše tojanoquedá.

²¹ Chora Marta Jesúsbioye tbojaniana: —Bëngbe Utabná, aca muentše macmënëse, atšbe uaftše ndoñe matënjóbana. ²² Pero atše séntsetatšëmbo, masque ndayánaca mora Bëngbe Bëtsá chacojotjañe, y cha lempe chca cmochjátšëta ca.

²³ Y Jesús tbojanjuá: —Acbe uaftše echántayena ca.

²⁴ Chora Marta tbojaniana: —Aíñe, atše sëndétatšëmbo cha yochtayenama, pero quem luare jopochócama te, nýetsca obanënga mochtayena ora ca.

²⁵ As Jesús tbojaniana: —Atše sëndmëna chë entšanga chámuatayenama y chë nýetsca tescama yomna tšabe vida chamotsebomnama endamá. Nda átšbeñe tojtsošbuaché, masque chaóbana, echántayena. ²⁶ Y nda cabá

ainá totsomñe y átšbeñe tojtsošbuaché, ndocna te queochatóbana. ¿Chë cbontsatsá soyiñe quecojtsošbuaché ca? —Jesús tbojantjá.

²⁷ Chora Marta tbojaniana: —Aíñe, Bëngbe Utabná, atše áceñe sêntsošbuaché, aca chë Cristo, chë Bëngbe Bëtsabe Uaquiñá y chë quem luaroye jabamá comnama ca.

**Jesús, Lázaro yojtsátbontsana
cuevëshentše yojenóbošachna**

²⁸ Chca tojánayanentšana, Marta tojtaná chabe quenata María jachembuama, y iytcana tbojaniana: “Bu-atëmbayá tonjashjango y entseboše aca jinýama ca.”

²⁹ María chca tojanuena y cachora tojéftsanbocna y tojána Jesús jinýama.

³⁰ Jesús cabá ndoñe chë pueblöye tonjánamashëngo; yojtsemna

Marta tbojanjébingo luarentše.

³¹ Chë yebnentše imojtsemna judiënga, María tša ngménaca ndoñe chaondëtsemnama tjëmbambayënga, tmojánbocana María juastama; er chë tojéftsantsbaná y tojéftsanbocna ora, chë judiënga imojtsejuabnaye, Lázaro yojtsátbontsana luaroye María yojtsaye, choca jošachnama ca.

³² Jesús yojtsemnentše María tojánashjango ora, chárentše tojanoshamentšé y tbojaniana: —Bëngbe Utabná, aca muentše macmënëse, atšbe uaftše ndoñe matënjóbana ca.

³³ María y cháftaca tmojánashjajna judiënga, nýetscanga imojtsetenóbošachiye; y Jesús chca tojáninýe ora, corente tbojancochtsetšëna y puerte ngménaca yojtsemna. ³⁴ Chora Jesús tojanatjá: —¿Ndayentše cha šmojuatbontsá ca?

Y chënga tmojanjuá: —Bëngbe Utabná, mabo y cochjinýe ca.

³⁵ Chora Jesús tojánenobošachna.

³⁶ As chë judiënga tmojánayana: —¡Minyënga, tša ibnabobonshana ca!

³⁷ Pero inyë judiënga imojtsichamo: —Chë jtaná chabuabínýnama tojamá, ¿tondaye tonjobená jamama, Lázaro ndoñe chaondóbanama ca?

Lázaro tojtanayena

³⁸ Jesús, cachiñe puerte cochtsetšenaná, chë uatbontsánoye tojanobeconá. Chë luarna cuevëshe inamna, y amashjuanentse canyë bëts ndëtsbéca vojtsatámena. ³⁹ Chora Jesús tojanéyana: —Chë ndëtsbé mojuánanga ca.

Chora Marta, chë obanabe uabena tbojanayana: —Bëngbe Utabná, mora ya bacá vojtsonguëtšé, er ya canta te entsemna cha tontsóbana ca.

⁴⁰ Y Jesús tbojanjuá: —Ndegombre, ya tcbonjauyana, aínne átsbeñe tcojtsosbuáchese, cochjinýe Bëngbe Bëtsá puerte obená y bëtsá bëtsemnama ca.

⁴¹ Chora chë ndëtsbé tmojanjuaná; Jesús celoye vojontješiye y Bëngbe Bëtsábioye tbojanayana: “Taita, cbatschuá atšbe opresido tcojouenama.

⁴² Atše sëndétatsëmbo aca sempre šcondbétseyeunanama; atše chca tcbonjauyana, muentše montsemna entšangbe tšabiama, chca, aca atše šcojichmoma, chënga chamotsošbuáchema ca.”

⁴³ Chca tojánayanentšana, jabuache tojánayana: “¡Lázaro, chentšana matsbocna ca!”

⁴⁴ Y cachora chë obaná tojtanbocna, cucuatšënga y shecuatšënga entšëjuaca batsëcná, y chabe jubiá base entšëjuaca uamochëcyaná. As Jesús tojanéyana: “Motsejafjoná y jama chaotsobena ca.”

Chë judiëngbe amëndayënga tmojanenoyeuná Jesúsbioye jóbama

(Mt 26.1-5; Mc 14.1-2; Lc 22.1-2)

⁴⁵ Chë soyëngama, banga chë judiënguentšana, María jatjëmbambayama tmojánanga, y ntšamo Jesús tojanmca tmojáninýënga, Jesúsbeñe imojtsosbuaché. ⁴⁶ Pero inyë judiënga fariseúngbioye tmojána, ntšamo Jesús tojanmama chënga jacúntama. ⁴⁷ As, chë fariseunga y chë bachnangbe amëndayënga tmojánenefjna inyë judiëngbe amëndayëngaftaca, y tmojánayana: —¿Ndayá mochjobenaye cháftaca jamama? Quem boyabása bëts soyënga entsama. ⁴⁸ Nýe cachcá chamojonýase, nýetsca entšanga chábeñe mochantsošbuáchiye; chë romanëngbe amëndayënga mochanjabo y lempe mochantsepochoá, Bëngbe Bëtsabe bëts yebna y bëngbe luare Israel ca —chënga imojtsichamo.

⁴⁹ Pero canya chënguentšá, Caifás ca uabainá, chë uata chë bachnangbe más uámana amëndayá inamná, tojanéyana: —Tšëngaftanga tondaye quešmátstatsëmbo. ⁵⁰ Y ndoñe quešmatsjuabná, tšëngaftangbiamá más tšabá vojtssemna nýe canyë boyabása Israeloca entšangbiamá chaóbana, y ndoñe nýets bëngbe luare chamotsepochoá ca —cha tojanéyana.

⁵¹ Pero Caifás chë soye nýe cachabe juábnaca ndoñe chca tonjánayana. Cha, chë uata chë bachnangbe más uámana amëndayá inámnayeca, Bëngbe Bëtsabe Espíritbe obenánaca tojánayana Jesús ibojamna Israeloca entšangbiamá jóbana ca. ⁵² Y ndoñe nýe Israeloca entšangbiamá, sinó chë inyë luarënguñe Bëngbe Bëtsabe básenga tmojanáshanënga chamuatábama, as chca, nýetscanga nýe canyë luarentša entšanga chamotsemnama. ⁵³ Chcasna,

cach tescana judiëngbe amëndayënga tmojanenoyeuná Jesús jóbama.

⁵⁴ Chíyeca Jesús entsángbeñe, Judea luariñe ya ndoñe yontsana. Chë luar-entsána tojéftsanbocna y canye luaroye tojtsanoñe, entsanga ndoyeniñe béconana, canye pueblo Efraín ca uabáinoye. Y chentše chabe uatsjëndayëngaftaca tojtsanoquedañe.

⁵⁵ Judiëngbe Bashco fiestama batšá yojtsájamna, y ba entsanga pueblënguentsána Jerusalenoye imojtsajna, soyënga choca jamama ntšamo tempo inamncá, chca, Bëngbe Bëtsabe bominyama tsábenga jtsemnama, chë Bashco fiesta cabá ndobuache ora. ⁵⁶ Chocna, judiënga Jesús imojtsenguaye, y Bëngbe Bëtsabe bëts yebnentše imojtsentjanaye: “¿Ntšamo šmojtsejuabná, cha tayochjabo o ndoñe quem fiestama ca?”

⁵⁷ Chë fariseunga y chë bachnangbe amëndayënga tmojanmandá, nderado nda Jesús ndayentše tojtsemnama tojtsetatšëmbësna, chaobuambá ca, as Jesús jishachama.

María, botamana uanguëtsiye Jesúsbeñe tbojanáshecbuešcja

(Mt 26.6-13; Mc 14.3-9)

12 Chnénguana te chë Bashco fiestama yojtsájamna ora, Jesús Betania puebloye tojtaná. Lázaro, chë Jesús tbojtanyená cha, choca inoyena. ² Chentšna bëts saná Jesusbiana tmojanábua. Marta tojanëjuatšé, y Lázaro yojtsemna chë Jesúseftaca juasama meséshañe imojtsetbiámanënguentsë. ³ As María canye jarrëtema tojanaca; chiñe yojanaftsuamna canye botamana uanguëtsiye, bëtscá uámaniye, ena nárdoca pormániye. Chë uanguëtsiye, María, Jesusbe shecuatšënguini tbojanáshecbuešcja, y cachabe stjënashaca tbojtanshecbojó. Chora,

chë yebnentše ena nardiyana yojtsonguëtsiye.

⁴ Chora, canya Jesusbe uatsjëndayënguentsá, Judas Iscariote, chë Jesús uayayëngbe cucuatšini yochjanayentšbashejuaná, tojánayana: ⁵ —Quem botamana uanguëtsiye unga patse denario crocénana enduámama. ¿Ndáyeca ndoñe šmonjuiye y ndbomnjëmënga chë crocénana mašmëntsatsatá ca?

⁶ Pero Judas chca tojánayana, chë ndbomnjëmëngbeñe ntsejuabnycá, sinó cha atbëbaná inamna causa. Judas chëngbe crocénana shecnëšini yojánatbëna, y ba soye, chë shecnëšoye imojanatsuáma crocénantsána cha yojánatbëbana.

⁷ As Jesús tbojanjuá: —Cachcá monyá. María méntscoñe chë botamana uanguëtsiye iuabofjájona, cha jobenayama átsbeñe jabuéšcjama, er ndoñe bën y atše šmochanjaitëme. ⁸ Chë ndbomnjëmëngna tsëngaftangbeñe sempre mochanjesomñe, pero atše ndoñe ca —tojánayana.

Judiënga tmojanenoyeuná Lázaro jóbama

⁹ Ba judiënga tmojántatšëmbona Jesús Betanioca yojtsemnama, y choye tmojána, ndoñe nye Jesús jinýama, sinó Lázarnaca, chë Jesús tbojtanyená cha. ¹⁰ As chë bachnangbe amëndayënga tmojanenoyeuná Lázarnaca jóbama. ¹¹ Chabe causa, ba judiënga chëngbiyoe cachcá tmojesanénya y Jesúsbeñe imojtsošbuaché.

Jesús Jerusalenoye tojánashjango

(Mt 21.1-11; Mc 11.1-11; Lc 19.28-40)

¹² Chë yëfsana, mallajta entsanga, Jerusalenoca fiestama tmojánashjajnënga, tmojántatšëmbona Jesús choye yochjánashjanguama. ¹³ As chëngna palma betiye buacuafjenga

tmojanatétsetše, y Jesús jajébenguama tmojánbocana, y mēntšá imojtsáye-buache: “¡Bēngbe Bētsá matschuanga! ¡Corente bendición bomná chē Bēngbe Utabnabe obenánaca tojabá! ¡Corente bendición bomná chē Israeloquēngbe Rey ca!”

¹⁴ Jesús canye burrotema tbojáninyena y chábeñe tojanenoyayé. Ntšamo Bēngbe Bētsabe uabemana palabrenguine iuayancá, cachcá tojanopasá. Chiñe mēntšá endayana Jerusalenoca entšangbiama:

¹⁵ Sión bēts puebloca oyenēnga, ndoñe matauatjēngana.

Minyēnga, tšēngaftangbe Rey burrotēmiñe enjaquená entsabó ca.

¹⁶ Chca orna, Jesusbe uatsjēndayēnga chē soyēngama ndoñe tonjanēsertá; pero chentšana, Jesús corente bētsá yomnama Bēngbe Bētsá tojaninyanýé ora, chē uatsjēndayēnga chama tmojanenoyuabó, lempe ntšamo Bēngbe Bētsabe uabemana palabrenguine iuayancá y cachcá Jesúsēftaca tojanopasama.

¹⁷ Chē Jesúsēftaca imojtsemna entšanga, Lázariobioye uatbontsánoye tbojanchembo ora y chentšana tbojtanyená ora, ntšamo tmojáninyama chora imojtsecuēntaye. ¹⁸ Chíyeca, ba entšanga tmojánbocana Jesús jajébenguama, chē bēts soye Bēngbe Bētsabe obenánaca cha tojanmama tmojanuénayeca. ¹⁹ Pero chē fariseunga imojtsenatsētsnaye: “Tšēngaftanga šmontsonýá bēnga tondaye jamama quemuátobenama y más, ¡nyētscanga cha montséstona ca!”

Básefta Grecia luaroca entšanga Jesús tmojánguango

²⁰ Bashco fiestama, chē Bēngbe Bētsá jadórama Jerusalenoye tmojánangbeñe, básefta griego entšángnaca imojtsemna.

²¹ Chēngna, Felipe chē Galilea luarocá,

chē Betsaida pueblocabioye, tmojanobecóna y tmojanimpadá: “Señor, bēnga fsēntseboše Jesús jinýama ca.”

²² Chora Felipe tojána Andrés jauyanama, y chē útatna Jesúsbioye tbojána, chē grieguēngbiama jauenayama. ²³ Jesús chata tojanéyana: “Chē Bēngbe Bētsá Entšá tbojanbemá corente bētsá yomnama jinýanyiyama te ya tojobuache. ²⁴ Ndegombre šcuayana: Canye trigo jénaye ndoñe fshantsiñe tmonjuatbontsá y ndoñe tonjóbanēse, nye cach canye trigo jénaye jesomñana. Pero tmojuatbontsá y tojóbanase, bētscá jashájonana. ²⁵ Cachcá, nda nye cachá tojtsenóbobonshana, cha chabe vida echanjéftsobuetše. Pero nda nye cachá ndoñe tontsenóbobonshana y ntšamo atše stsemandacá, quem luariñe vida tojtsebomnēntscuana cha tojtsamēse, chē nyētsca tescama yomna tšabe vida echántsebomna. ²⁶ Nda ntšamo stsemandacá jamama tojtseboše, atše chašotséstona. Chca, ndayentše atše chaitsemna, chánaca, chē atše oservená, chentše chaotsemna. Atše šojtseservénabiama, atšbe Taitá Bēngbe Bētsá echanjínýanyiyē bētsá yomnama ca” —Jesús tojánayana.

Jesús tojánayana cha yochjanóbanama

²⁷ Y más Jesús tojánayana: “¡Mora tša cochtsetšenaná sēntsemna! ¿Atše chjayana: ‘Taita, chē átseftaca echanjopása soyēnga šmotsebojuaná ca?’ Ndoñe; er más chama atše quem luaroye tijabo. ²⁸ Taita, šminýanýé aca puerta bētsá y obená comnama ca.”

Y cachora, celocana canye oyebuambnayana tojanóbocna mēntšá: “Ya tcbonjinyanýé atše puerta bētsá y obená tsmēnama, y mora cachiñe cachcá chanjama ca.”

²⁹Entšanga chca tmojanuena ora, ínŷenga imojtsichamo nŷe tojanjuésase ca; pero ínŷengna imojtsichamo: —Canŷe ángel chábioye tbonjuatsésá ca.

³⁰Chora Jesús tojanéyana: —Ntsámo šmonjouecá, atšbíama ndoñe quenátsmèna, sinó tšèngaftangbiama. ³¹Mora chë tempo entsemna, chë quem luare entšanga tmojëftsema bacna soyènga jinŷanŷiyama y chèngbe castiguama jayanama. Y mora, chë nŷetsca bacna soyènga mandayá, quem luarentšana mochántabocna. ³²Pero atše fshantocana atsbananá chaitsemna ora, nŷetsca entšanga átšbioye chanjúbuaja ca —Jesús tojánayana.

³³Chca cha yojtsichamo, ana jinŷanŷiyama ntšamo jóbanama ibojamnama. ³⁴Chora chë entšanga tmojanjuá: —Bèngbe Bètsabe uabemana palabrènguine endayana, y chíyeca bènga fséndétatšëmbo chë Cristo nŷetsca tescama vida yochtsebomna ca. As, ¿ndáyeca cojtsichamo, Bèngbe Bètsá Entšá tbojanbemá chamuatsbanama yojtsemna ca? ¿Nda yojtsemna Bèngbe Bètsá Entšá tbojanbemá ca? —chènga imojtsichamo.

³⁵Y Jesús tojanéyana: —Nŷe baseftatescama chë entsangbe juabnènga binŷnayá tšèngaftangbeñe entsemna. Chë binŷnayá cabá tšèngaftangbeñe yojtsemnèntscuana, cháftaca šmochtsajna. Chca, mo ibetiñcá ndoñe quešmochátajna. Nda ndoñe binŷniñe tojtsana, cha ndoñe ntsetatšëmbuana ndëmuajana yojtsana. ³⁶Chë binŷnayá cabá tšèngaftangftaca endétsemnèntscuana, chábeñe šmochtsošbuáchiye; as, tšèngaftangbe juabnènga binŷniñe echántsemna ca —Jesús tojánayana.

Chë soyènga tojánayanentšana, Jesús tojtsanoñe y entsangbiama yojetsóitana.

Ndáyeca chë judiènga Jesúsbeñe ndoñe montsanošbuaché

³⁷Masque Jesús, judièngbe delante ba bèts soyènga Bèngbe Bètsabe obenánaca tojëftsema, chènga ndoñe chábeñe ntsošbuáchiyana, ³⁸ntšamo Bèngbe Bètsabe juabna oyebuambnayá Isaías tojanabemcá, cachcá chaotsemnama. Isaías mèntšá tojánayana:

Bèngbe Utabná, ¿nda bèngbe buayenana soyiñe yojtsošbuaché?

Y ¿nda tbojostertá, acbe obenana tcojinŷinŷé ora ca?

³⁹Chíyeca chènga ndoñe montsobena Jesúsbeñe jtsošbuáchiyama, er Isaías mèntšánaca tojëftsanabema:

⁴⁰Bèngbe Bètsá tojama chènga chabe soyèngama ndoñe botamana chamondètsejuabnama

y chabe soyènga ainaniñe ndoñe chamondóyèngacñama,

as ndoñe chaondètsësertánama ca.

Y Bèngbe Bètsá entsichamo: “Chca entsemna, chènga atšbe benache ndoñe chamondishachama,

y atše ndoñe ntjátsebacama;

y chca, chènga mochántsemna mo ndèšnana entsangcá ca.”

⁴¹Isaías chca tojánayana, er tojáninŷe Jesús puerte bètsá y obená yojamnama, y chca chë uabemaniñe Jesusbiana yojanoyebuambná.

⁴²Pero masque chca iuábemanèse, ba judiènga imojtsanošbuaché, y banga judièngbe amëndayéngnaca Jesúsbeñe imojtsanošbuaché. Pero chèngna, Jesúsbeñe imojtsošbuáchema entsángbeñe ndoñe montsichamo. Chca imojánama chë fariseungbiama auatja causa, chë judièngbe enefjuana yebnènguentšana ndoñe chamondètëbuacnama. ⁴³Chèngbiama más yojanámana, entsanga chèngbiama chamotsichamo tša uámanènga

imojamna ca, y ndoñe, Bëngbe Bëtsá chca chaotsamama.

**Jesube palabréngaca
yochtsótatšëmbo entsanga tšabá o
ndoñe tšabá tmonjamama**

⁴⁴ Chora Jesús mēntšá jabuache tojánayana: “Nda átšbeñe tojtsošbuaché, ndoñe n̄ye átšbeñe ntsošbuáchiyana; chē nda šojichmó chábeñnaca cha jtsošbuáchiyana. ⁴⁵ Cachca, nda atše šojtsonyá, chē šojichmó chábioynaca cha jtsonyayana. ⁴⁶ Atše quem luaroye tijabo entsangbe juabnēnga jabobínynama, chca, nda átšbeñe tojtsošbuaché, mo ibetiñcá ndoñe chaondētsemnana. ⁴⁷ Pero nda atšbe soyēngama tojouena, pero ntšamo sēntsichamcá ndoñe tontsama, atše chabiamana ndocá quichátayana tšabá o ndoñe tšabá tonjama ca. Atše ndoñe chiyátabo, ntšamo quem luarentša entsanga tmojamama tšabá o ndoñe tšabá yontsemna ca jatichámuama; quem luaroye sēnjabo ndayá chēnga jabátsebacama. ⁴⁸ Nda atše šojtsaboté y atšbe palabréngama ndoñe šonjoyeuná, ya entsebomna nda chabiamana yochjayana bēts castigo jtsebomnana ibojtsemna ca. Atše tijanoyebuambá palabréngaca, quem luare jopochócama te chabiamana chca echántsayana. ⁴⁹ Er atše ndoñe n̄ye atšbe juábnaca quetsatoyebuambná. Chē Taitá, chē šonjichmó cha, šonjamandá ntšamo jayanana y ndayá jabuátambana. ⁵⁰ Atše sēndétatšëmbo, atšbe Taitá tojamandá orna, cha jamándana entsanga chē n̄yetsca tescama yomna tšabe vida chamotsebomnana. Chíyeca, ndayá sēntsichamcá, endmēna ntšamo atšbe Taitá Bëngbe Bëtsá šojamandacá ca” —Jesús tojánayana.

**Jesús chabe uatsjéndayēnga
tojanashecjabebé**

13 Bashco fiesta cabá ndobuache ora, Jesús yojtsetátšëmbo chabe tempo tojanóshjanguama, quem luarentšana jēftsebocnama y chabe Taitábioye jtama. Ntšamo Jesús chábinga yojanababuan̄yeshancá, chē quem luare imojamnēnga, chórna yojtseboše chē bēts bonshánana puerte más jin̄yan̄iyana.

² Pero Satanás, Júdasbe ainaniñe bacna juabnēnga tojanajó, uayayēngbe cucuatšine Jesús jayentšbáshejuanama. Judas Iscariote, Simonbe uaquiñá.

³ Jesús yojtsetátšëmbo chabe Taitá Bëngbe Bëtsá n̄yets obenana tbojánatšetama. Cachcá, Jesús yojtsetátšëmbo, Bëngbe Bëtsábioyana cha tojánabama y cachábioye jtama ibojtsemnana. ⁴ Chcasna, chē ibeta jasama tmojanpochocá ora, meséshentsana tojantsbaná, chabe juatsboye uichētjoníya tojanenátsejca y can̄ye tualléjua tojanenasná.

⁵ Chentsana, can̄ye bachešine búyeshe tojanbuešcja y tojanontsé chabe uatsjéndayēnga jushecjabebiyana y jtéshecbojuana cha yojtsasnana tualléjuaca.

⁶ Pero, Simón Pedro tbojanobuache ora, Jesúsbioye tbojaniyana: —Atšbe Utabná, ¿aca šcochjuashecjabiá ca?

⁷ Chora Jesús tbojanjuá: —Atše sēntsama soye mora ndoñe quecmátēsertana; pero más chcoye aīñe cmochanjósérta ca.

⁸ As Pedro tbojaniyana: —¡Ndocna te šcatjuashecjabiá ca!

Pero Jesús tbojaniyana: —Ndoñe chacbonjuáshecjabese, atšbia ndoñe quecchátsmēna ca.

⁹ Y Simón Pedro tbojaniyana: —¡Atšbe Utabná, as n̄ye atšbe shecuatšēnga

ndoñe, ndayá atšbe cucuatšënga y best-šášnaca ca!

¹⁰ Pero Jesús tbojanjuá: —Nda bebená tojtsemna, nÿe shecuaťše jtsashecjabi-ama jtsajabótana, ndoñe nÿetšá cachiñe. Nda tojtsobebé, ndoñe tsengá ntsemnana. Cachcá, mo bebënga cuenta tšëngaftanga šmontsemna; pero canÿa muentše entsemna, y cha mo bebenacá ndoñe quenátsmëna.

¹¹ Jesús yojtsetátšëmbo nda chë uayayëngbe cucuatšinë boshjuaná yochtsanmënema, chíyeca tojánayana: “Tšëngaftanguentšá canÿa entsemna, cha mo bebenacá ndoñe quenátsmëna ca”.

¹² Jushecjabebyama tojanpochocá ora, chabe juatsboye uichëtjoníya tojtaničhëtjo, y meséshentše tojtanoťbema. Chora tojanéyana: —¿Chë tcbonjábíama soyama quecmojtsésertana ca?

¹³ Tšëngaftanga atše šmondbauyana Buatëmbayá y Bëngbe Utabná ca; tšabá chca šmonsichamo, er atše ndegombre chca sëndmëna.

¹⁴ Atše, tšëngaftangbe Buatëmbayá y Utabná, tcbonjushecjabebé; chcasna, tšëngaftángnaca cmontsamna jenáshecjabebyana. ¹⁵ Ntšamo quem sóyeca tcbonjanÿanÿecá, tšëngaftanga cachcá šmochtsama. ¹⁶ Ndegombre šcuayana, chë oservená chabe nduiñbiamá ndoñe más uamaná ntsemnana. Cachcá, chë ichmoná chë tbojichmobíama ndoñe más uamaná quenátsmëna. ¹⁷ Quem soyënga chašmojuatsjinÿe y chca chašmojamëse, tšëngaftanga puerte oyejuayënga vida šmochanjéftsebmna.

¹⁸ “Atše sëndétatšëmbo chë tijábacacangbíama, chíyeca atše nÿetscangbíama ndoñe chca quetsatoyebuambná. Y ntšamo Bëngbe Bëtsabe uabemana palabrënguñe endayancá cachcá chaotsemnana, chë ‘canÿa átšeftaca tandëse tonjasá,

atšbe contra echántsemna ca’, cachcá echanjopása. ¹⁹ Mora, cabá ndoñe chca tonjopasá ora, lempe chë soyënga séntsichamo. As, chca chaojopasá ora, átšbeñe šmochantsošbuáchiye, y as šmochántsetatšëmbo atše tsmëna chë nda sëndmëná. ²⁰ Ndegombre šcuayana: Nda atše tijichmóbioye tbojofja, cha atše šochanjofja; y nda atše šojofja, cha chë nda šojichmóbioye bochanjofja ca” —Jesús tojánayana.

**Jesús tojánayana uayayëngbe
cucuatšinë Judas
bochjánboshjonama**

(Mt 26.20-25; Mc 14.17-21; Lc 22.21-23)

²¹ Chë soyënga tojánayanentšana, Jesús corente cochtsetšenaná yojtsemna, y tojánayana: —Ndegombre šcuayana, canÿa tšëngaftanguentšá uayayëngbe cucuatšinë šochanjáboshjona ca.

²² Chora, chabe uatsjëndayënga tmojanontšë enonÿinÿayana, y ndoñe montsetátšëmbo ndabíama Jesús chca tojánayanama. ²³ Canÿe uatsjëndayá, chë Jesús puerte ibnabobonshaná, Jesusbe juachaca inatbemana. ²⁴ As, Simón Pedro chábíoye tbojánefjatšëmbo, ndabíama Jesús chca tojánayanama Jesúsbioye chabotjama. ²⁵ Chë puerte bonshana uatsjëndayá, Jesúsbioye batšatema más tojanosjoná y tbojantjá: —Bëngbe Utabná, ¿nda cha yojtsemna ca?

²⁶ Chora Jesús tbojanjuá: —Atše canÿe base tandëtema chanjafchécucacuaye y ndábíoye chajoyé, cha entsemna ca.

As Jesús canÿe base tandëtema tojanfchecuacuá, y Judas, Simón Iscariote uaquiñábíoye, tbojanoyé. ²⁷ Tandëse tojanóyëngacñe y cach ora, Satanás Júdasbe ainaniñe bacna juabnënga tboján-cochëngo. As Jesús tbojaníyana: “Chë cochanjama soye, cam ora moma ca.”

²⁸ Pero ni canÿa chë jasama imojtsetbiamanënguentšá tbojanësertá,

ndayama Júdasbioye chca tbojanianama. ²⁹ Judas inamna chëngbe crocénana shecnëšiñe uambayá; chíyeca ínÿenga tmojanjuabó Jesús chca iboijtsatsaye, ana ndayá yojtseita soye chë fiestama chauabuámiyama, o ndbomñejëmenga ndayánaca chauatšatama ca.

³⁰ Júdasna chë base tandëtema tojanóÿengacñe, y cachora chentšana tojéjtsanbocna. Chora ya ibeta yojtsemna.

Chë tsëm mando

³¹ Judas tojéjtsanbocnentšana, Jesús tojánayana: —Ora tocjobuache, Bëngbe Bëtsá Entšá tbojanbemá corente bëtsá y obená yomnama jinÿanÿiyama; y mua echanjínÿanÿiye Bëngbe Bëtsá corente bëtsá y obená yomnama. ³² Cha echanjínÿanÿiye Bëngbe Bëtsá chca yomnama, chíyeca Bëngbe Bëtsánaca echanjínÿanÿiye corente bëtsá y obená yomnama, y mora entsemna chë ndaye ora Bëngbe Bëtsá chca chabiana yochjínÿanÿiye. ³³ Atšbe básenga, baseftatescama tšëngaftangaftaca séntsemna. Chora šmochántseguaye, pero ntšamo judiënga sënjayancá, mora cachcá tšëngaftanga cbëyana: Chë chanjá luaroye, tšëngaftanga ndoñe quešmátobena jama ca. ³⁴ Canÿe tsëm soye cbetsamëndá: Nÿetscanga šmochtsenbobonshana. Ntšamo atše tšëngaftanga cbondábabuanÿeshana, cachcá tšëngaftanga šmochtsenbobonshana. ³⁵ Tšëngaftanga šmojtsenbobonshánëse, nÿetsca entšanga mochántsetatšëmbo, tšëngaftanga atšbe uatsjëndayënga šmomnama ca —Jesús tojanéyana.

Jesús tojánayana, chábioye ndoñe bonjanabuátma ca Pedro yochjánayana

(Mt 26.31-35; Mc 14.27-31; Lc 22.31-34)

³⁶ Chora Simón Pedro tbojantjá: —Bëngbe Utabná, ¿ndémoye cochjá ca?

As Jesús tbojanjuá: —Atše séntśá luaroye, mora aca ndoñe quecátobena atše juastana, pero más chcoye añe šcochanjuasto ca.

³⁷ As Pedro tbojaniana: —Atšbe Utabná, ¿ndáyeca ndoñe séntsobena mora aca juastama? ¿Atše séntseprontana acbiana jóbanama ca!

³⁸ Chora Jesús tbojaniana: —¿Ndegombre cojtseprontana atšbiana jóbanama? Ndegombre cbëyana, cabá ngallo ndécanta ora, aca unga soye atšbiana cochanjayana: “Cha ndoñe quetsatabuatma ca”.

Jesús beyeca entšanga jobenayana Bëngbe Bëtsábioye jama

14 Mëntšánaca Jesús tojánayana: —Ndoñe ainana tsetšanënga matsmënana. Tšëngaftanga Bëngbe Bëtsábeñe šmondošbuaché; átšbeñnaca šmochtsošbuáchiye. ² Atšbe Taitá Bëngbe Bëtsá endmënoca, ba luarënga joyënanama endmëna. Ndoñe chca tontsemnëse, atše chca matcbënjáuyana. Morna, cha endmënoye atše chanjá tšëngaftangbiana canÿe luare joyënanama jabuáprontama. ³ Atše chajjá y chë luare chacbojabuaprontá ora, cachñe moye chanjésabo, tšëngaftanga átšeftaca junatsama. As, atše chaitsemnoye, tšëngaftangnaca chašmotsá joyënanama. ⁴ Atše chanjá choye ntšamo jama y jashjanguama ya šmontsetátšëmbo ca —Jesús tojánayana.

⁵ Chora Tomás Jesúsbioye tbojaniana: —Bëngbe Utabná, ndémoye cochjama ndoñe queftátstatšëmbo. As,

¿ntšamo bēnga fchtsetátšēmbo ntšamo choye jama ca?

⁶ Chca tbojaniana ora, Jesús tbojanjuá: —Atše sēndmēna benachcá; chē-jana tcojtsase, pronto jashjanguana. Atše sēndmēna ntšamo ndegombre yomncá sempre oyebuambnayá, y entsānga chē nyetsca tescama yomna tšabe vida chamotsebomnama endamá. Nye átšbeyeca endopodena ndayējana jama, y atšbe Taitá Bēngbe Bētsábioca jashjanguama. ⁷ Tšēngaftanga atše šmojtsábutmēse, atšbe Taitánaca šmattsábutma. Morscana ya cha šmontsábutma y cha šmontsonjā ca —tbojaniana.

⁸ Pero Felipe tbojaniana: —Atšbe Utabná, nye chē Taitá šmanjanjé, ndayama más ca.

⁹ Chora Jesús tbojaniana: —Chēfta te tšēngaftangaftaca sēntsemna, y ¿cabá ndoñe atše šcontsábutma, Felipe? Nda atše šojinye, chē Taitá Bēngbe Bētsábiodynaca jinjana. As, ¿ntšamo atše šcojtsatsá, chē Taitá šmanjanjé ca? ¹⁰ ¿Ndoñe condošbuaché, atšbe Taitá átšbeñe y átšnaca chábeñe nye canjácá ftsmēnama? Chē cbontsētsētná soyēnga, ndoñe nye atšbe juábnaca chca quetsatoyebuambná. Atšbe Taitá, chē átšbeñe vida endbomná jtsamana lempe ntšamo stsamcá.

¹¹ Muñe šmochtsošbuáchiye: Atšbe Taitá átšbeñe endmēna, y átšnaca chábeñe mo nye canjácá sēndmēna. Chama ndoñe šmontsošbuachese, as nye chē tijama soyēngámna átšbeñe šmochtsošbuáchiye. ¹² Ndegombre šcuayana, nda átšbeñe tojtsóšbuaché, ntšamo atše tijamcá y cachcá cha echántsama. Atšbe Taitá entsemnoye atše chanjá, chíyeca, chē átšbeñe ošbuachiyá, chama más bēts soyēnga echanjama. ¹³ Tšēngaftanga ndaye sóynaca Bēngbe Bētsábioye šmojtjañe, y chca šmojama atše jótšēmbonēse, átšbeñe šmošbuachéyeca, lempe

šmochanjójyēngacñe; chca, chē Uaquiñá echanjñyanjīye chē Taitá corente bētsá y obená yomnama. ¹⁴ Tšēngaftanga ndaye sóynaca atše šmojtjañe, y chca šmojama atše jótšēmbonēse, átšbeñe šmošbuachéyeca, atše chē soye chanjama ca —Jesús tojánayana.

Jesús tojanašebuachená chē Uámana Espíritu jíchmuama

¹⁵ Mēntšánaca Jesús tojánayana: “Tšēngaftanga atše šmojtsebobonshánēse, ntšamo cbontsamēndacá cachcá šmochanjama. ¹⁶ Chca chašmojamēse, atšbe Taitá Bēngbe Bētsá tšēngaftangbiama chanjaimpáda, tšēngaftanga jabújabuachama y jabáñemuayama inya cha chabuichmoma, chē Uajabuachaná nyetsca tescama tšēngaftangaftaca chauétsemnama. ¹⁷ Cha, chē Uámana Espíritu endmēna chē nyetsca soyēnguñe ntšamo ndegombre yomncá oyebuambnayá. Chē nye quem luarama enójuabnaye entsānga, chē átšbeñe ndošbuáchiyēnga ndoñe quematonjā, ni quemátábutma. Chíyeca chēnga ndoñe quemátobena cha jójyēngacñana. Pero tšēngaftanga añe cha šmontsábutma. Cha tšēngaftangaftaca entsemna, y tšēngaftangbe ainaniñe sempre echanjēftsiyena.

¹⁸ “Atše ndoñe quebocháisabashejuana, mo uajchonga cuenta chašmotsemnama. Tšēngaftangbiyoe chanjésabo. ¹⁹ Muentsana basefaytese, chē nye quem luarama enójuabnaye entsānga ndoñe más quešmochá-tonjaye; pero tšēngaftangna añe, atše cachiñe šmochántinye. Atše ainá chántsemna, chíyeca tšēngaftanga átšeftaca tšabe vida šmochántsebomna. ²⁰ Chē Uámana Espíritu tšēngaftangbe ainaniñe chašmojójyēngacñe ora, tšēngaftanga šmochántsetatšēmbo, atše atšbe Taitábeñe nye canjácá

tsmënama; cachcá, tšëngaftanga šmochántsetatšëmbo, tšëngaftanga átšeftaca cachcá nÿe canÿacá šmomnana y átšnaca tšëngaftangaftaca. ²¹Nda totátšëmbo ntšamo atše tijamandacá y sempre chca tojtsama, cha ndegombe šojtsebobonshana. Nda átšbioye šojtsebobonshana, chábioye atše Taitánaca bochántsebobonshana. Atšnaca cha chántsebobonshana, y nda atše tsmënama cha chanjinÿinÿiye ca” —Jesús tojánayana.

²²Chora, inÿe Judas, ndoñe Judas chë Iscariote, Jesúsbioye tbojaniana: —Bëngbe Utabná, çntšamo chca yojtsemna, nÿe bënga šcochjínÿanÿiye ntšamo cach aca comnana, y nÿetsca quem luarentšëngbioye ndoñe ca?

²³Chora Jesús tbojanjá: —Nda atše šojtsebobonshana, ntšamo atše sëntsoyebuambnacá echanjama. Atše Taitánaca chábioye bochántsebobonshana, y bëndata chábioye fchanjabo y chábeñe vida fchantsebmna. ²⁴Nda ndoñe šontsebobonshana, ndoñe queochátama ntšamo sëntsoyebuambnacá. Ntšamo sëntsoyebuambnacá ndoñe nÿe atše juábnaca quenátšmëna, sinó chë Taitá, chë šonjichmó chabe juábnaca.

²⁵“Atše cabá tšëngaftangaftaca sëntsemnëntscuana, lempe quem soyëngama sëntsoyebuambná. ²⁶Chë Uajabuachaná, chë Uámana Espíritu, atše impadanánaca atše Taitá bochanjíchmua. Cha lempe cmochántsabuatambaye, y echanjama nÿetsca chë tcbonjáuyana soyëngama chašmuatenójuaboma.

²⁷“Chë atše ainaniñe puerte tšabe ebionana tšëngaftangbiama šcuétseboshjona, cbetsatšatá. Chë nÿe quem luarama enójuabnaye entsanga cmondbétsatšatnaye soyëngcá ndoñe quenátšmëna, chë atše cbontsatšatná ainaniñe puerte tšabe ebionana. Ainana

tsetšanënga ndoñe matsmënana, ni matauatjëngana. ²⁸Ya šmonjouena ntšamo tcbonjáuyancá: ‘chanjá y tšëngaftangbioye chanjésabo’. Tšëngaftanga atše šmojtsebobonshánëse, šmattsóyejuaye atše chë Taitábioye jama šojtsemnana, er chë Taitá atšbiana más bëtsá endmëna. ²⁹Quem soyënga tcbonjáuyana, cabá ndoñe chca tonjopasá ora; as, chca chaojopasá ora, chiñe jenójuaboyëse átšbeñe chašmotsóšbuáchemana.

³⁰“Chë quem luarentša bacna soyënga mandayá endabó; chíyeca atše ya ndoñe bëtscá tšëngaftangaftaca quichaisóyebuambaye. Pero cha tondaye quenátobena atše jabórlana. ³¹Masque cha chca endmëna, chca entsemna, atše chë Taitábioye tsbobonshánama quem luarentša entsanga chamotsetatšëmbuama. Ntšamo atše Taitá šojamandacá, atše cachcá tsámama chamotsetatšëmbuama.

“Motsbananga. Muentšana cuajna ca” —Jesús tojanéyana.

Jesús yomna mo chë tšabe uvas betiycá

15 Mëntšánaca Jesús tojánayana: “Atše sëndmëna mo chë tšabe uvas betiycá, y atše Taitá Bëngbe Bëtsá chë tšabe uvas betiye inÿenacá. ²Chë inÿená, chë uvas betiyentša buacuafjënga ndëshajuanëfjënga jtsebuácuëtsetšana; pero chë uvas betiyentša buacuafjënga shajuanëfjënga jtsobolímpiana, bëtscá chaotseshájuanana. Nda ndoñe tontsama ntšamo Bëngbe Bëtsá tojtsebošcá, jtsemnana mo chë ndëshajuana buacuafjëngcá; y chë causa, chë Taitá chábioye corente bochantsecastíga. ³Tšëngaftanga šmonjouena ntšamo tijayancá; bëtscá chca šmontsama. Chíyeca mora tšëngaftanga šmontsemna mo chë limpiana y shajuana buacuafjëngcá. ⁴Atšeftaca cánÿiñe mo canÿacá šmochtsemna

y atše tšëngaftangaftácnaca. Chë buacuafja uvas betiyentsana juanánëfja ndoñe ntobenanana nÿe cachabe ponto jashájonana. Cachcá, tšëngaftanga átšeftaca ndoñe cánÿiñe mo canÿacá šmontsemnëse, ndoñe šmattsobena Bëngbe Bëtsabiana bëtscá soyënga jamama.

⁵“Atše chë tšabe uvas betiycá sëndmëna y tšëngaftanga chë buacuafjëngcá. Nda átšeftaca cánÿiñe mo canÿacá tojtsemna y atše cháftacnaca, cha Bëngbe Bëtsabiana bëtscá soyënga echanjama, mo canÿe buacuafja becá tojtseshajuancá. Er, tšëngaftanga atšbe uajabuáchenana ndoñe šmontsebmënëse, átšeftaca cánÿiñe mo canÿacá ndoñe šmontsemna causa, tondaye šmattsobena jamama. ⁶Canÿa átšeftaca cánÿiñe mo canÿacá ndoñe tontsemnëse, cha jtsemnana mo canÿe buacuetëtšëna buacuafja, utšëñëfja y buashánëfjácá. Chca buacuafjënga, entšanga jtsatbanana, íñeshoye jtsëtšënanana y chentšë jtsejuinÿiyana. Cachcá, nda ndoñe átšeftaca cánÿiñe mo canÿacá tontsemna, ndoservená jtsemnana y luaroca cha mochantsesegóra.

⁷“Tšëngaftanga átšeftaca cánÿiñe mo canÿacá šmojtsemna y ntšamo atše tijayancá šmojtsamëse, lempe ntšamo šmojtsebošcá šmochjotjañe, y lempe šmochanjóyëngacñe. ⁸Chë shajuana buacuafjëngcá tšëngaftanga chašmojtsemna ora, šmochanjínÿanyïye atšbe Taitá corente bëtsá y obená yomnama. Y chca, tšëngaftanga atšbe ndegombre uatsjëndayënga šmochántsemna. ⁹Ntšamo chë Taitá šondbobonshancá, átšnaca cachcá tšëngaftanga cbondábabuanÿeshana. Chíyeca, šmochtsiyena atšbe bonshánama jtsejuabnayëse. ¹⁰Atše sëndama ntšamo atšbe Taitá šondëmandacá. Chíyeca atše sëndoyena

chabe bonshánama jtsejuabnayëse. Cachcá tšëngaftángnaca, ntšamo atše cbontsamëndacá šmojtsamëse, atšbe bonshánama jtsejuabnayëse šmochantsiyena.

¹¹“Atše chca cbontsëtsëtsná, chë atše séntsebmoma oyejuayana tšëngaftángnaca chašmotsebmomna, y tšëngaftanga puerte chašmotsóyejuama. ¹²Mëntšá cbetsamëndá: Ntšamo atše cbondababuanÿeshancá, cachcá šmochtsenbobonshana. ¹³Chë chabe amiguëngbiana tojóbanabiana, ndocna quenátobena chabiana más bonshánana jtsebmomna. ¹⁴Ntšamo atše tijamandacá tšëngaftanga šmojtsamëse, atšbe amiguënga šmochántsemna. ¹⁵Chë oservená ndoñe ntsetatšëmbuana ndayá chabe nduiño tojtsamama. Chíyeca atše tšëngaftanga oservëngca ca ndoñe quecbatëtšëtsná. Morscana mëntšá cbontsëtsëtsná: ‘Tšëngaftangna atšbe amiguënga šmontsemna ca’, er lempe ntšamo atšbe Taitábentsana tijuatsjinÿcá, tšëngaftanga tcbonjinÿanyé. ¹⁶Tšëngaftanga ndoñe atše chešmatábuayana, pero atše afñe tšëngaftanga tcbonjabacacá y tcbonjubuáyana, Bëngbe Bëtsabe trabajo jamama; y chca, mo canÿe betiye sempre tojtseshajuana y chë shajuana ndocna te tontsopochocacá, tšëngaftanga chašmotsebmoma. Chca, lempe ntšamo atšbe Taitá šmojtjañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátataye. ¹⁷Mëntšá atše cbetsamëndá: Šmochtsenbobonshana ca” —Jesús tojanéyana.

Jesús y chabe entšanga, chë nÿe quem luarama enójuabnayëngbiana uaboyénjanënga

¹⁸Mëntšánaca Jesús tojánayana: “Pero chë nÿe quem luarama enójuabnaye entšanga tcmojtsëbuayënjëse,

šmochjenójuaboye, natsana chënga atše šmonjanáboyënjama. ¹⁹Tšëngaftanga, chë nÿe quem luarama enójuabnaye entsanguentsána šmojtsemnëse, chënga cmattsababuánÿeshana cachëngbengbioycá. Pero tšëngaftanga ndoñe chë nÿe quem luarama enójuabnaye entsanguentsána quešmátsmëna, y atšna, chë quem luare oyenënguentsána tšëngaftanga tcbonjabacacá. Chíyeca chë nÿe quem luarama enójuabnaye entsanga tšëngaftanga cmontsébuayënja. ²⁰Šmochjenójuaboye ntšamo tcbonjáuyanama: ‘Chë oservená chabe nduinbiana ndoñe más uamaná quenátsmëna ca’. Chënga monjánama atše chaisufrima; tšëngaftángnaca chašmotsesufrínama mochántsama. Entšanga ntšamo atše tijayanentsána ntsachetšá tmojtsamcá, cachcá chënga mochántsama ntšamo tšëngaftanga chašmojtsëtsëtsná chentsána. ²¹Chë chacmojtsébuayënjënga, chë šojichmó cha ndoñe quematábuatma. Chíyeca chënga lempe chca cmochanjáborlaye, atšbe causa.

²²“Atše ndoñe matijabo y chënga ndoñe matijáuyanëse, ndegombre ndoñe bacna soye mattsebmoma. Pero mora, chëngbe bacna soyëngama chënga ndoñe quemátobena jayanana, ‘¡Chca fsënjama ntsetatšëmbcá ca!’ ²³Nda atše šojtsáboyënja, atšbe Taitábioynaca jtsáboyënjana. ²⁴Atše chë bëts soyënga Bëngbe Bëtsabe obenánaca chëngbeñe ndoñe matijamëse, ndegombre chënga ndoñe bacna soyënga mattsebmoma. Pero mora, masque ntšamo sënjamcá tmonjinÿëse, chënga atše šmontsáboyënja y atšbe Taitábioynaca. ²⁵Chca chënga montsama, ntšamo chëngbe leyënguïñe enduabemancá cachcá chaopasama. Chiñe mëntšá

endayana: ‘Nÿe tondayama chënga šmonjanáboyënja ca.’

²⁶“Atše, atšbe Taitábentsána chë Uajabuachaná y añemuayá tšëngaftangbioye chanjíchmuá. Cha chë Uámana Espíritu endmëna, chë nÿetsca soyënguïñe ntšamo ndegombre yomncá oyebuambnayá. Cha endmëna chë Taitábentsána ichmoná; y cha lempe atšbe tšabe soyënga cmochantsëtsëtsnaye. ²⁷Chorscana, tšëngaftángnaca atšbiana entsanga šmochantsëtsëtsnaye, er tšëngaftanga átšeftaca šmondëtsemna, entsanga jábuayenama atše sënjanbojatsé orscana ca” —Jesús tojánayana.

16 Mëntšánaca Jesús tojánayana: “Atše quem soyënga cbontsëtsëtsná, tšëngaftanga átšbeñe ošbuáchiyana ndoñe chašmondájbanama, atšbe causa chašmojtsesufrina ora. ²Chëngna, chë judiëngbe enefjuana yebnënguentsána cmochantébuacana. Chca tempo chaojobuache ora, chë tšëngaftanga chacmojtsébáyënga mëntšá mochántsejuabnaye: ‘Bënga tšabá tmonjama ca. Ntšamo Bëngbe Bëtsá yojtsebošcá, cachcá bënga tmonjama ca.’ ³Chënga, chë Taitá Bëngbe Bëtsá ndoñe quematábuatma, y átšbioye cach ndoñe. Chíyeca, chca cmochanjáborlaye. ⁴Atše chca tšëngaftanga cbontsëtsëtsná, ntšamo tcbonjáuyanama chašmuenójuaboma, chca tempo chaojobuache ora ca” —Jesús tojánayana.

Ndayá chë Uámana Espíritu inétsama

Mëntšánaca tojánayana: “Entšanga jábuayenama sënjanbojatsé orscana, chë echanjopása soyëngama ndoñe quecbënjatanëtsëtsná, er atše tšëngaftangaftaca sënjëtsemna. ⁵Pero morna, chë šojichmó cha yomnoye chantá; y tšëngaftanguentsá ndocná šochanjatjaye, ‘¿ndëmoye cojtsá ca?’

⁶ Mora, tsëngaftangbe ainana ngménaca entsemna, atše chca tcbonjáuyana causa. ⁷ Pero ndegombre sçuayana: Atše chanjá y chca tsëngaftangbe tsabiama echántsemna. Atše ndoñe quetsjase, chë Uajabuachaná y añemuayá ndoñe tsëngaftangbioye queochátabo. Pero añe chanjá, y chora cha tsëngaftangbioye chanjíchmu. ⁸ Cha chaojáhjango ora, echanjama quem luarentša entsanga corente chamotsetátšëmbo ndayá ndegombre yomna bacna soyënga jtsamana, ndayá ndegombre yomna chë Bëngbe Bëtsabe bominyiñe tsabia jtsemnana, y ndayá yomna chë Bëngbe Bëtsá entsangbiama jayanana tsabá o ndoñe tsabá tmonjamama. ⁹ Entsanga átsbeñe ndoñe quematošbuaché. Chíyeca chë Uajabuachaná echanjama chënga corente chamotsetátšëmbo ndayá ndegombre yomna chë bacna soyënga jtsamana. ¹⁰ Chë Taitábioye chanjá y atše ndoñe más quešmochátinye. Chíyeca chë Uajabuachaná echanjama chënga corente chamotsetátšëmbo ndayá ndegombre yomna Bëngbe Bëtsabe bominyiñe tsabia jtsemnana. ¹¹ Quem luarentša bacna soyënga mándayabiama Bëngbe Bëtsá ya tonjayana, ntšamo cha tojamama ndoñe tsabá yontsemna ca y nyetsca tescama castiganá chaotsemna ca. Chíyeca chë Uajabuachaná echanjama entsanga corente chamotsetátšëmbo, ndayá ndegombre yomna chë Bëngbe Bëtsá entsangbiama jayanana tsabá o ndoñe tsabá tmonjamama.

¹² “Atše cabá ba soyënga séntsebonna tsëngaftanga jáuyanama. Masque chcasna, mora tsëngaftanga ndoñe quešmátobena chë soyëngama josértana. ¹³ Pero chë Uámana Espíritu, chë nyetsca soyënguñe ntšamo ndegombre yomncá oyebuambnayá, chaojáhjango ora, lempe ntšamo nde-

gombre yomncá cmochanjabuatambá. Cha ndoñe nýe cachabe juábnaca queochátoyebuambnaye. Ntšamo chë Taitá chábioye tbojayuancá, tsëngaftanga cachcá cmochanjáuyana, y cha cmochanjábuayenaye ntšamo yochjopásama. ¹⁴ Atšbe soyënguentšana cha echanjójyëngacñe, y cach soyëngama cmochanjabuatambá. Chcase cha cmochanjínýanýiye atše bëtsá y obená bëtsemnana. ¹⁵ Lempe ntšamo chë Taitá endbomncá, atšbe soyëngnaca endmëna. Chíyeca atše tcbonjáuyana, chë Uámana Espíritu atšbe soyënguentšana yochjójyëngacñe y cach soyëngama cmochjabuatambá ca.”

¹⁶ “Baseftayté y atše ndoñe más quešmochátinye. Inýe baseftayté y cachiñe šmochantétinye ca” —Jesús tojanéyana.

**“Tsëngaftangbe ngménana,
oyejuayana echanjóbema”**

¹⁷ Chora Jesusbe básefta uatsjëndayënga imojtsentjanaye: —¿Ntšamo yojsentsáyaná, chë “baseftayté y atše ndoñe más quešmochátinye, y inýe baseftayté y cachiñe atše šmochantétinye, er atše chë Taitábioye chanjá ca”? ¹⁸ ¿Ntšamo yojsentsáyaná, chë “baseftayté ca”? Ndoñe quemuátstatšëmbo ntšamo yojsentsáyanama ca —chënga imojtsichamo.

¹⁹ Jesús yojsentátšëmbo chënga chca jatjayama imojtsebošama, y tojanéyana: —Atše tcbonjáuyana: “Baseftayté y atše ya ndoñe más quešmochátinye, y inýe baseftayté y cachiñe atše šmochantétinye ca.” ¿Chë soyëngama šmojsentjaná ntšamo stsentšáyanama? ²⁰ Ndegombre sçuayana: Tsëngaftanga šmochanjenóbošachna y puerte ngménënga šmochántsemna, pero chë nýe quem luarama enójuabnaye entsanga corente oyejuayënga mochántsemna. Masque

tša ngménënga šmochántsemna, chentšana tšëngaftangbe ngménana, oyejuayana echanjóbema. ²¹ Canÿe shembása tbojontšabuache šešona jónÿnama ora, tša ngménaca cha jésemnana, puerte tbojtsetsetše causa. Chë šešona ya tojonÿná ora, cha ndoñe ntsenójuabnayana chë tša ibuántsetšama. Canÿe šešona quem luaroye cháuashjanguama chë shembása tojámayeca, chora cha tšabá y oyejuayá jtsemnana. ²² Ndegombre, tšëngaftangnaca cachcá, chora tša ngménaca šmochántsemna. Pero atše tšëngaftangbioye chaijésabo ora, atše šmochantétinÿe y corente oyejuayënga šmochántsatsemna. Y ndocná queochatobenaye chë oyejuayana jabuajuánana.

²³ “Chë te chaojóshjango ora, tšëngaftanga ndocá atše quešmochatstjaye. Ndegombre šcuayana, lempe ntšamo atšbe Taitá šmojtotañcá, y chca šmojama atše jótšëmbonëse, átšbeñe šmošbuachéyeca, cha lempe cmochanjátšataye. ²⁴ Méntscóñama, atšbe Taitá tondaye chešmatotjañe atše jótšëmbonëse. Cha motjañënga y šmochanjóyëngacñe, y chca, bëtscá oyejuayana šmochántse-bomna ca” —Jesús tojanéyana.

Jesucristo, quem luarentše mandayábioye yëñjanayá

²⁵ Mëntšánaca Jesús tojánayana: “Chë soyëngama lempe cuentëngaca tšëngaftanga tcbonjáuyana; pero tempo echanjobuache, chora atše ya ndoñe más cuentëngaca quebochátëtšëtsnaye; chë cuentna, puerte botamana lempe atšbe Taitabiama cbochanjáuyana. ²⁶ Chë tena, atše jótšëmbonëse, átšbeñe šmošbuachéyeca, atšbe Taitábioye šmochanjotjañe. Y atše cbéyana; chca, chë te ndoñe quešochatájaboto tšëngaftangbiama atšbe Taitá jatsimpadánana. ²⁷ Atše

ndoñe quichatsimpadana, er cach Taitá tšëngaftanga cmondábabuanÿeshana. Tšëngaftanga atše šmondobonshánama, y Bëngbe Bëtsábocana atše tijabama šmojtsošbuáchema, chë Taitá cmondábabuanÿeshana. ²⁸ Atše chë Taitábocana sënjabocna y quem luaroye sënjabo. Pero mora quem luare chanjëftsebhjona atšbe Taitábioye jtama ca” —Jesús tojánayana.

²⁹ Chora chabe uatsjëndayënga tmojanianyana: —Mora ya ndoñe cuentëngaca quecatoyebuambná, chíyeca lempe paselo josértama bëngbiana entsemna. ³⁰ Mora fsëntsetatšëmbo aca nyetsca soyëngama cotatšëmbuama, y ndoñe quenátšiyta ndocná aca chacmátstjanama, er aca chëngbe juabnënga jtsabuatomana, chënga cabá aca ndëtjaye ora. Chíyeca bënga fsëntsošbuaché aca Bëngbe Bëtsábocana tcojabama ca —chënga tmojanianyana.

³¹ As Jesús tojanéyana: —¿Mora chiñe šmojtsošbuaché ca? ³² Ya tempo toçjobuache y cam ora entsemna, tšëngaftanga nyetsquénache šmochanjuáshana y atše nÿe canÿa šmochanjësebhjona. Pero atše ndoñe nÿe canÿa quichátsemna, chë Taitá átšeftaca entsëmnyayeca. ³³ Atše lempe quem soyënga cbontšëtsëtsná, tšëngaftangbe ainaniñe tšabe ebionana chašmotsebonnama, átšeftaca cánÿiñe mo canÿacá jtsemnëse. Quem luarentše šmochanjasufrina; pero añemo šmochtsebonna, atše ya chë quem luarentša mandayá sënjayëñjaná ca —Jesús tojánayana.

Jesús chabe uatsjëndayëngbiana Bëngbe Bëtsábioye tbojanimpadá

17 Jesús chë soyënga tojánayana nentšana, celoye tojanontjësë y Bëngbe Bëtsábioye tbojanianyana: “Taita, atšbe te ya toçjobuache. Minÿanÿë,

atše acbe Uaquiñá, corente bêtsá y obená bétsemnama. As, atše acbe Uaquiñá, aca corente bêtsá y obená comnama chainyanýema. ²Mora aca nýets obenana šconjatšetá nýetsca entsángbeñe, nýetscanga chë atšbiana tcojábacacanga chë nýetsca tescama yomna tšabe vida chamotsebonnama atše chaimama. ³Chë nýetsca tescama yomna tšabe vida jtsebonnana endmëna aca, chë nýe canýe y ndegombre Bëngbe Bêtsá jtsabuatumana, y atše Jesucristo, acbe ichmoná.

⁴“Lempe ntšamo šconjamandacá atše sënjapochocá, y chca quem luariñe sënjama aca corente bêtsá y obená comnama jinyanýiyama. ⁵Taita, quem luare cabá ndoñe quenjatsmëna ora, aca tconjaninyanýé atše corente bêtsá y obená ácaftaca bétsemnama. Mora moma atše cachcá ácaftaca chaitsemnama.

⁶“Aca quem luarentša entsanguentsana quem boyabásenga tconjabacacá y atšbiana šconjinýinýé. Atše chënga sënjanyanýé ntšamo ndegombre aca comnama. Chënga acbe entsanga mondmëna; y acna, chë atšbiana chënga šconjinýinýiyá. Chënga acbe palabra tmonjouena y tšabá tmonjoyeuná. ⁷Chíyeca chënga mondétatšëmbo, lempe ntšamo atše tsbomncá ácbentsana tijóyëngacñama. ⁸Atše chënga sënjáuyana ntšamo aca šcojauyancá, y chënga montsošbuaché chë atše sënjauyaniñe. Chíyeca, chënga ndegombre mondétatšëmbo atše acbiocana tijabama, y montsošbuaché aca chë atše šcojichmó cha comnama.

⁹“Atše chëngbiana cbontseimpadana. Chë nýe quem luarama enójuabnaye entsangbiana ndoñe quecbátsimpadana, pero aíñe chë atšbiana šcojinýinýiyëngbiana, er chënga acbe entsanga mondmëna. ¹⁰Lempe ntšamo atše tsbomncá, acbiámnaca endmëna; y cachcá, lempe ntšamo cobomncá,

atšbiámnaca endmëna. Acbengbe vidëngaca aca tcojinyanýé atše corente bêtsá y obená bétsemnama.

¹¹“Atše ndoñe quem luarentše quešocháisetotona, pero chënga aíñe cabá camuentše mochanjéftsemna. Atše chantá ácaftaca jtsatsmëna. Uámána Taitá, chë atšbiana šconjinýinýiyënga acbe obenánaca cochtsanyëna. Chca ntšamo bëndata mo canýacá bondmëna, chëngnaca cachcá chamotsebonnama. ¹²Atše chëngaftaca séntsemnëntscuana, chënga séntsanýena, aca šconjatšetá obenánaca. Atše chënga sëndánýena, y ni canýa queochátsmëna infiernoca pochocaná, nýe chë infiernoca pochocaná jtsemnama ibomná chana aíñe, ntšamo acbe uabemana palabrenguñe endayancá, cachcá chaotsebonnama.

¹³“Morna chë aca condmënoye chantá; pero atše cabá quem luariñe séntsemnëntscuana chca chënga séntsetsëtsná, chca, chë atše séntsebonna puerte bëtscá oyejuayana chëngnaca chamotsebonnama. ¹⁴Atše chënga sënjáuyana ntšamo aca šconjauyancá. Ntšamo atše ndoñe quetsátsmëna chë nýe quem luarama enójuabnaye entsanguentsá, cachcá, chënga cach ndoñe quemátsmëna. Chíyeca, chë nýe quem luarama enójuabnaye entsanga chënga montsëbuayënja. ¹⁵Atše ndoñe quecbátsimpadana, chënga quem luarentšana chacúbuacanama; pero aíñe, nýetsca bacna soyënguentšana chacuatsebacama. ¹⁶Ntšamo atše ndoñe quetsátsmëna chë nýe quem luarama enójuabnaye entsanguentsá, cachcá, chënga cach ndoñe quemátsmëna. ¹⁷Cochjama chënga acbe entsanga chamuétsemnama, y chca, nýe acbiana vida chamotsebonna. Chca cochjama, ntšamo ndegombre yomncá chënga imoyenama. Ntšamo aca condbetsichamcá, ndegombre

endmëna. ¹⁸Ntšamo aca quem luaroye šconjanichmocá, cachcá átsnaca chënga sëntsachamná, quem luare entsanga jábuayenama. ¹⁹Chëngbiana atše cachiñe mëntšá cbëyana: Atše nÿe acbiana sëndmëna. Y chca, chëngnaca, ntšamo acbiana ndegombre yomncá jtsóyebuambnayëse acbe entsanga chamotsemna, y chca, nÿe acbiana vida chamuëtsebomna, ntšamo ndegombre yomncá chënga imoyenama.

²⁰“Pero nÿe chëngbiana ndoñe quecbátsimpadana, sinó chë átsbeñe mochtsošbuáchiyëngbiamnaca, chë atšbiana šconjínÿinÿiyënga, chëngbioye atšbiana ínÿenga chamojtsabuayiná ora; ²¹as chënga nÿetscanga cánÿiñe mo canÿacá chamotsemnama. Ntšamo aca, Taita, átšeftaca cánÿiñe mo canÿacá bondmëna y átsnaca ácaftaca, cachcá chëngnaca cánÿiñe mo canÿacá bëndátaftaca chamotsemnama cbontseimpadana. Y chca, quem luarentša nÿetsca entsanga, atše šcojichmoma chamotsošbuáchema. ²²Ntšamo chë obenana y uámanana šconjatsetacá, cachcá átsnaca chënga sënjatšatá. As, ntšamo bëndata cánÿiñe mo canÿacá bondmëna, chëngnaca cachcá cánÿiñe mo canÿacá chamotsemnama. ²³Atše chëngbe ainaniñe sëntsemna, y aca átšeftaca cánÿiñe mo canÿacá bondmëna; as, chëngnaca nÿetsca soyënguñe cánÿiñe mo canÿacá chamotsemnama. Y chca, quem luarentša entsanga chamotsetátšëmbo aca šcojichmoma, y chamotsetátšëmbo ntšamo atše šcondbobonshancá, chëngnaca cachcá condábabuanÿeshanama.

²⁴“Taita, atšbiana chënga šconjínÿinÿiye. Atše mëntšá sëntseboše: chë atše chántsemnoca, chëngnaca chamotsemna, y chentše, chë šconjatsetá obenana y uámanana chënga chámuinÿe. Quem luare

cabá ndoñe quenjatsmëna orscana, šconjánbobonshana; chíyeca, cachora tconjaninÿanÿé atše corente bëtsá y obená bëtsemnama. ²⁵Taita, nÿetsca soyënguñe tšabá amá, masque chë nÿe quem luarama enójuabnaye entsanga ndoñe quecmatábuatma, atše añe cbonduábuatma, y quem boyabásenga montsetátšëmbo, aca comna chë šcojichmó cha. ²⁶Atše chënga sënjinÿanÿé ntšamo ndegombre aca comnama, y más chanjínÿanÿiye; chca, ntšamo šcondbobonshancá, chëngnaca cachcá chamotsenbobonshánama y atše chëngbe ainaniñe chaitsemnama ca” —Jesús tojánayana.

Uayayënga Jesús tmojánishache

(Mt 26.47-56; Mc 14.43-50; Lc 22.47-53)

18 Chë soyënga Jesús tojëft-sanayanentsana, chabe uatsjëndayëngaftaca tojëftsanbocna, chë binche bëjaye Cedrón ca uabániye chenguana jama. Chentše inamna canÿe tjashetema; y Jesús chabe uatsjëndayëngaftaca choye tojánamengo. ²Y Judas, chë Jesús uayayëngbe cucuatšñe boshjuaná, tšabá chë luare yojanábuatma, er Jesús y chabe uatsjëndayënga ba soye chentše imojánenefjuana. ³Chora Judas tojánashjango, y cháftaca ba soldadënga y básefta Bëngbe Bëtsabe bëts yebnoca josticiënga; chënga imojamna chë bachnangbe amëndayënga y fariseungbe ichmónënga; nÿetscanga uajuinÿanëshangaca, lamparëshangaca y espadéjangaca uajátënga.

⁴Jesúsna yojtsetátšëmbo lempe ntšamo cha yochjanpásama; chíyeca, natsanoye tojánbocna y chë entsanga tojanéyana: —¿Nda šmojtsenguá ca?

⁵Y chënga tmojanjuá: —Jesús, chë Nazaretocá fsëntsenguá ca.

As Jesús tojanéjua: —Atše cha sëndmëna ca.

Y Judas, chë boshjuaná, chánaca chë entsángaftaca yojtsemna. ⁶ Jesús tojanéyana: “Atše cha sëndmëna ca”, y chora chë entsanga tmojtanostëtšánanga y fshantsoye tmojánshajaye.

⁷ Chora Jesús cachiñe tojanatjá: —¿Nda šmojtsenguá ca?

Y chënga tmojanjuá: —Jesús, chë Nazaretocá ca.

⁸ As Jesús tojanéyana: —Ya tcbonjáuyana: “Atše cha sëndmëna ca.” Atše šmojtsenguasna, mënga cachcá šmochjónyaye chamotsónengama ca.

⁹ Chca tojanopasá, ana ntšamo Jesús tojanayancá cachcá chaotsemnama, chë “Atšbe Taitá Bëngbe Bëtsá, chë šconjínjinyiye entsanguentsana ni canya pochocaná queochátsmëna ca”.

¹⁰ Simón Pedro canye espadëja inasëngbuájonýana; asna, tojanenosëngbotëntšena y chë bachnangbe más uamana amëndayabe canye oservenábioye catsbioica matscuasë tbojtsanéstjango. Chë oservená Malco ca inauabaina. ¹¹ As Jesús, Pédrëbioye tbojanianyana: “Acbe espadëja matosëngbuajonýá. Ntšamo atšbe Taitá Bëngbe Bëtsá tojanmandacá, chë atše puerte ngménana jtsebomnama, ¿ndoñe chca chaondëtsemna ca?”

Jesús, Anasbe yebnoca

(Mt 26.57-58; Mc 14.53-54; Lc 22.54)

¹² Chentšana chë soldadënga, chëngbe amëndayá y Bëngbe Bëtsabe bëts yebnoca josticiënga Jesús tmojánishache y tmojanëcuébatšëca. ¹³ Natsanëna, Anás, Caifasbe uambén taitábioye Jesús tmojanánatse. Caifás chë uata inamna chë bachnangbe más uamana amëndayá. ¹⁴ Caifás yojamna nda judiënga tojanéyana: “Tšëngaftangiama más tšabá entsemna canye boyabása Israeloca entsangiama chaóbana ca.”

Pedro tojánayana Jesúsbioye ndoñe bonjanabuátma ca

(Mt 26.69-70; Mc 14.66-68; Lc 22.55-57)

¹⁵ Simón Pedro y inye uatsjendayá Anasbe yebnoye Jesús imojtséstona. Chë inye uatsjendayábioyna, chë bachnangbe más uamana amëndayá ibnauábuatma; chíyeca, cha tojanobená Jesúseftaca chabe chashjóntscoñe jashjanguana. ¹⁶ Pero Pédrëna nye shjoca, amashjuanentše tojanoquedá. Chcasna, chë inye uatsjendayá tojánbocna y chë bëšáša ebtajfuaana shembásaftaca tojanoyebuambá. Chora Pedro tbojanémashëngo. ¹⁷ As chë shembása Pédrëbioye tbojanianyana: —¿Acnaca ndoñe chë boyabásabe uatsjendayá condmëna ca?

Y Pedro tbojanjuá: —Ndoñe; atše cha ndoñe quetsatabuatma ca.

¹⁸ Tša yojtsesësna causna, chë oservënënga y chë josticiënga shjoca tmojanniñe y chentše imojtósboniye. Y Pédrënaca chëngaftaca yojtsëšbonena.

Ntšamo chë bachnangbe más uamana pasado amëndayá, Jesúsbioye tbojantjá

(Mt 26.59-66; Mc 14.55-64; Lc 22.66-71)

¹⁹ Chora, chë bachnangbe más uamana pasado amëndayá tojanontšë Jesús jatjayama chabe uatsjëndayëngbiama y ndayá cha entsanga yojánabuatambamnaca. ²⁰ Y Jesús tbojanjuá: —Atše nyetsca entsangbe delante sënjoyebuambá. Sempre chë entsangbe enefjuana yebnënguenache sëndabuatambá, y Bëngbe Bëtsabe bëts yebnócnaca, nyetsca judiënga mondbétsenefjuanentše; y chca, iytëmencá tondaye chiyatoyebuambá. ²¹ ¿Ndáyeca chca šcojtsetjaná? Atšbe palabra tmojouenënga mátjaye, as chënga chacmëyana ntšamo atše tijáuyana. Chënga mondtétšëmbo

ntšamo atše tijayancá ca —Jesús tbojanjuá.

²² Jesús chë soyënga tojánayana ora, canyë josticio chentše yojtsemná, Jesús-bioye tbojanjuebjantšetá y tbojaniana: —¿Chca chë bachnangbe más uámana amëndayá cuanjojuá ca?

²³ Y Jesús tbojanjuá: —Ndoñe tšabá tijayanëсна, šmëyana ndayentše chë podesca palabra yojtsemná; y tšabá tijóyebuambasna, ¿ndáyeca šcojajuebjantšetá ca?

²⁴ Chentšana, Anás tojanmandá, chë bachnangbe más uámana amëndayá Caifasbe yebnoye, Jesús batsëcná chamuánatsama.

Pedro cachiñe tojánayana
Jesúsbioye ndoñe bonjanabuátma ca
(Mt 26.71-75; Mc 14.69-72; Lc 22.58-62)

²⁵ Chëntscuana, Pedro yojtsešbonena, tsanana chë ñe juachaca. Chora chë entšanga tmojantjá: —¿Aca ndoñe chabe uatsjendayënguentsá condmëna ca?

Y Pedro ndoñe ca tojánayana: —Atše ndoñe quetsásmëna ca —cha tojánayana.

²⁶ Chora, chë bachnangbe más uámana amëndayabe canyë oservená Pédrëbioye tbojaniana: —¿Atše ndoñe cháftaca chë tjšahetémoca tcbonjinýe ca?

Chë oservená inamna chë Pedro tbojt-sanmatstëtšabe pamillo.

²⁷ Y Pédrëna cachiñe ndoñe ca tojánayana, y cachora canyë ngallo yojacánta.

Jesús Pilatbe delante
(Mt 27.1-2, 11-14; Mc 15.1-5; Lc 23.1-5)

²⁸ Chentšana, Caifasbe yebnentšana Jesús tmojanánatse chë romano mandadbe yebnoye. Ya yojtsebínýana, y chë bëts yebnoye chë judiënga ndoñe tmonjámashjna, er chënga imojtseboše chë Bashco saná jasama. Judiënga ndoñe

imonjobena Bashco saná jasana, chca tempo canyë ndoñe judiëbe yebnoye nda tojámashënguse. ²⁹ Chíyeca Pilato toján-bocna y chënga tojanéyana: —¿Ndayá quem boyabásabe contra šmochjayana ca?

³⁰ Chora chë entšanga tmojanjuá: —Bacá uamaná ndoñe tontsemñese, ndoñe matifjuánatse ca.

³¹ As Pilato tojanéyana: —Tšëngaftanga matánatse, y ntšamo cach tšëngaftangbe leyíne iuayancá muabiama šmochjayana tšabá o ndoñe tšabá tonjamama ca.

Y chë judiënga tmojanjuá: —Bënga derecho queftsátsbomna ndocná jóbama ca.

³² Chca tojanopasá, ana ntšamo Jesús cachá jóbanama tojanayancá cachá chaotsemnama. ³³ As Pilato cach yebnoye tojtanamáshëngo, Jesús tbojanchembo y tbojantjá: —¿Aca chë judiëngbe Rey cojtsemna ca?

³⁴ Y Jesús tbojanjuá: —¿Ntšamo šconjatjacá, cach aca chca cojtsejuabnáyeca chca yojtsemna o ínýenga atšbiana tcmojacuentáyeca ca?

³⁵ Chora Pilato tbojaniana: —¿Mo atše judío quetsmëna? Cach ácbioca entšanga y chë bachnangbe amëndayënga muentše tcmonjújshjango. ¿Ndayá tcojama ca?

³⁶ Chora Jesús tbojanjuá: —Atšbe jamándama luare ndoñe quem luarentše quenátsmëna. Aíne tojtsemñëсна, atšbe ústonënga muantsatsejaye atše chë judiëngbe cucuatšíne ndoñe chašmondobshjonama. Pero atšbe jamándama luare ndoñe quem luarentše quenátsmëna ca —Jesús tbojanjuá.

³⁷ As Pilato tbojaniana: —¿As aca rey cojtsemna ca?

Y Jesús tbojanjuá: —Tšabá tcjayana; atše rey sëndmëna. Chama atše tionjóná y quem luaroye tijabo; y atše sënjabo ndegombre soyëngama jabóye-

buambayama. Y chca soyënga jtsamëse tmojenënga, atše jtseyeunanana ca.

³⁸Chora Pilato tbojaniana: —¿Y ndayase chë ndegombre soye yomna ca?

Jesusbiana tmojánayana chaóbana ca

(Mt 27.15-31; Mc 15.6-20; Lc 23.13-25)

Chca tbojantjá chentšana, Pilato cachiñe tojánbocna judiëngaftaca jóyebuambayama, y tojanéyana: —Atše ni mo canye soye chiyátinýena, quem boyabása castiganá chaotsemna ca jayanama. ³⁹Pero tšëngaftanga šmondétatšëmbo, Bashco fiestama atše canye utamená cachcá jëtsboshjonama. ¿Šmojtseboše chë judiëngbe Rey chjëtsboshjona ca?

⁴⁰Chorna nyetsca entšanga cachiñe tmojanáyebuachena: —¡Ndoñe, cha ndoñe! ¡Barrabás matsboshjona ca!

Barrabasa canye bacá uamana entšá inamna.

19 Chora Pilato, Jesús tbojanánatse y tojanmandá chamotsetjanjama. ²Y canye coronésha uchmašëfjangaca chë soldadënga tmojanapormá y Jesús tmojanabestšajó; y canye shbuenda uafjatsenga entšayá mo reycá tmojanichëtjo. ³Chorna chënga imojtsóbobecnaye y jtsafchayama imojtsatsësnaye: “¡Bayté judiëngbe Rey cochtsemna ca!” Y imojtsejuebantšetaye.

⁴Pilato cachiñe tojánbocna y entšanga tojanéyana: —Šmochjouena; cha chanjuábocna, chë boyabása castiganá chaotsemna ca jayanama atše ni mo canye soye ndoñe sënjinýenama chašmotsetatšëmbuama ca.

⁵As Jesús tojánbocna chë uchmašëfjangaca coronésha uabestšajoná y chë shbuenda uafjatsenga entšayá mo reycá uichëtjoná. Y Pilato tojanéyana: —¡Muentše chë boyabása entsemna ca!

⁶Chë bachnangbe amëndayënga y chëngbe josticiënga cha tmojáninýe ora, tmojanontšé uayebuáchana: —¡Motsecrucificá! ¡Motsecrucificá ca!

Chora Pilato tojanéyana: —Cach tšëngaftanga mánatse y šmochjacrucifica; atše ni mo canye soye chiyátinýena quem boyabása castiganá chaotsemna ca jayanama ca.

⁷Chora chë judiënga tmojanjuá: —Bëngna canye ley fsëndbomna, ntšamo chiñe endayancana, quem boyabása jóbanama bontsemna, Bëngbe Bëtsabe Uaquiñá entsenobianná causa ca.

⁸Pilato chca tojanuena ora, más yojtsauatja. ⁹Cachiñe chabe yebnoye tojtanamáshëngo y Jesús tbojantjá: —¿Ndëmocá aca cmëna ca?

Pero Jesús ndocá tbojanjuá. ¹⁰Chora Pilato tbojaniana: —¿Ndoñe šcochanjujú ca? ¿Ndoñe condétatšëmbo, aca jacrucificama o jëtsboshjonama atše tsobenama ca?

¹¹As Jesús tbojanjuá: —Acbe obenana Bëngbe Bëtsá ndoñe macmënjánatšetase, tondaye cattsobena átšeftaca jamama; chíyeca, acbe cucuatšinë šonjaboshjoná, acbiana más bëts bacna soye tonjama ca.

¹²Cach orscana Pilato yojtsenguaye ntšamo jamana, jobenayama Jesús jëtsboshjonama; pero chë judiënga imotsáyebuache: —¡Chacojëtsboshjonëсна, Césarbe amigo ndoñe condmëna! ¡Nda rey tojtsenobianná chana, Césarbe uayayá jtsemnana ca!

¹³Pilato chë soyënga tojanuena ora, chashjoye Jesús tbojanábocna. Pilato tojanótbema chabe puestentše tribunaloca. Chë tribunaloca chashjañna hebreo biyañe Gabata ca inauabaina, y endayana “ndëtšbëngaca pormániñe ca”. ¹⁴Bashco fiestama canye te yojtsájamna, y mo nyetsto ora yojtsemna. Chora Pilato chë judiënga

tojanéyana: —¡Muentše tšëngaftangbe rey entsemna ca!

¹⁵ Pero chënga tmojanáyebuachena: —¡Chaóbana! ¡Chaóbana! ¡Motsecrucificá ca!

As Pilato tojanatjá: —¿Tšëngaftangbe rey atše chjacrucificá ca?

Y chë bachnangbe amëndayënga tmojanjá: —Bëngbe rey nÿe César endmëna, ndocná más ca.

¹⁶ Chentšana Pilato, chëngbe cucuatšinë Jesús tbojánboshjona chamocrucificama y chë judiënga cha tmojanánatse.

Jesús tmojanrucificá

(Mt 27.32-44; Mc 15.21-32; Lc 23.26-43)

¹⁷ Jesús tojánbocna chabe cruz tantšajónana y tmojanánatse canÿe luaroye, “Obanabe Bestšashe ca” uabáinoe (hebreo biyañe Gólgota ca inauabaina). ¹⁸ Chentše cha tmojanrucificá y inÿe útatnaca cátaoica tmojanrucificá; Jesusna tsëntsaca. ¹⁹ Pilato tojanmandá canÿe uabemana soye chë cruciñe chamuanjuama. Chiñe yojetsábemana: JESÚS NAZARETOCÁ, JUDIËNGBE REY ca. ²⁰ Y ba judiënga chë uabemana soye tmojanalía, er chë Jesús tmojanrucificá luare Jerusalenó béconana inamna, hebreo, latín y griego biyañe yojetsábemana. ²¹ Chca juabemama tojanmandáyeca, chë bachnangbe amëndayënga Pilato tmojaníyana: —Ndoñe matabiamnana “Judiëngbe Rey” sinó ntšamo cachá tojayancá, “Judiëngbe Rey atše sëndmëna ca”.

²² Pero Pilato tojanéjua: —Ntšamo ti-juábema cachá chaotsábemana ca.

²³ Chë soldadënga Jesús tmojanrucificá chentšana, chabe entšayangá tmojanájaca y cántañe tmojanajatá, nÿetsca canta soldadëngbiama. Chabe cmešéjua tmojanaca; chéjuana yojanamna nduajonanéjua, nÿetséjua uabianánéjua. ²⁴ As chë soldadënga

tmojáneniyana: “Ndoñe matjuátanëca; más tšabana tsbanánoye mochjútšëna, ndabiama yochjuáquedama chaotsotatšëmbuama ca.”

Chca tojanopasá ana ntšamo Bëngbe Bëtsabe uabemana palabrenguñe endayancá cachá chaotsemnana, chë “Atšbe entšayangá tmojanátataye; atšbe cmešéjuamna tsbanánoye tmonjanétsëna, ndabiama jauquédama jtso-
tatšëmbuama ca.” Y lempe chca chë soldadënga tmojanma.

²⁵ Jesusbe cruz juachaca imojtsemna chabe mamá; chë mamabe quenata María, Cleofasbe shema; y María Magdalena. ²⁶ Jesús chabe mamábioye tbojáninÿe, y chabe juachacna chë Jesusbe bonshana uatsjendayá yojtsemna. Chora chabe mamá tbojaníyana: “Mama, chentše acbe uaqiñá entsemna ca.”

²⁷ Y chë bonshana uatsjendayá tbojaníyana: “Chentše acbe mamá entsemna ca.”

Cach orscana, chë uatsjendayá chabe yebnentše Jesusbe mamábioye tbojanofja.

Jesús tojanóbana

(Mt 27.45-56; Mc 15.33-41; Lc 23.44-49)

²⁸ Jesús yojtsetatšëmbo ya lempe tojanchnënguama, chíyeca chentšana y ntšamo Bëngbe Bëtsabe uabemana palabrenguñe endayancá cachá chaotsemnana, tojánayana: “Šontsajuendá ca.”

²⁹ Chentše inamna canÿe matbaja buajútjena untja vínoyeca. As, chë soldadënga canÿe esponjëshe chë vínoyeca tmojanfchecuacuá, canÿe hisopo niñëfjiñe tmojananguësëtjo y játsbanase, Jesusbe uayásoye tmojanbeconá. ³⁰ Chë untja vínoye Jesús tojanofsé ora, tojánayana: “Ya lempe tojochnëngo ca.”

Tojanotsejbé y tojanóbana.

Canÿe soldado chabe lanzésaca costillaca Jesúsbioye tbojanashacuá

³¹ Bashco fiestama canÿe te yojtsájamna, y chë judiënga ndoñe imontseboše chë crucificánënga cachentše chë ochnayté chamotsemnama, chë te puerte uámana te bétsemnayeca. As Pilato tmojanimpadá chë crucificánënga shecuatšënga jetsatcacayama y chë cuerpënga chentšana jtsejuánama chaomandama. ³² As chë soldadënga tmojána y shecuatšënga imojtsatcacaye, natsana canÿa y chentšana chë inÿa, Jesúsfeftaca yojtsecrucificaná. ³³ Pero Jesúsbioye tmojanobeconá ora, ya obaná tmojáninÿe; chíyeca chabe shecuatšënga ndoñe tmonjanatcacá. ³⁴ Masque chca, canÿe soldado Jesúsbioye costillaca canÿe lanzésaca tbojanashacuá. Y cachora buiñe y búyeshe chentšana tonjanóbocna. ³⁵ Chë mentsá cuentayá chentše enjamna y tonjáninÿe, y ndegombre entsichamo; cha endétatšëmbo ndegombre yojtsichámuama, chca, tšëngaftángnaca chiñe chašmotsošbuáchema. ³⁶ Chë soyënga chca tojanopasá, ntšamo Bëngbe Bëtsabe uabemana palabrenguñe endayancá cachcá chaotsemnama. Chiñe endayana: “Ni mo canÿe betaše cha quemochatsëntšátca ca.” ³⁷ Y inÿoca, Bëngbe Bëtsabe uabemana palabrenguñe endayana: “Chë tmojenachentšá bominÿe mochanjabuájua ca.”

Jesús tmojanatbontsá

(Mt 27.57-61; Mc 15.42-47; Lc 23.50-56)

³⁸ Chë soyënga tojanopasá chentšana, José Arimateocá, Pilátbioye tbojanimpadá Jesusbe cuerpo jesocñama chabolesenciama. José inamna Jesusbe canÿe ustoná, masque nÿe iytëcana, chë judiëngbiama auatja causa. Pilato añe

tbojanlesenciá; as José tojána y Jesusbe cuerpo yojtsámbañe. ³⁹ Nicodemo, chë ibeta Jesúsbioye tbojanbuachá, chánaca tojánashjango y tojanëyamba unga bnétsana kilo mirra y áloe enájua bnana. ⁴⁰ As José y Nicodemo Jesusbe cuerpo tbojanca y tmojanandmaná chë botamana uanguëtše soyëngaca unétjona entšëjuangaca. Judiënga chca innauamana, obaná juatbontsama ora. ⁴¹ Jesús tmojanrucificá luarentše canÿe base jajañe inamna, y chiñe canÿe tsëm cuevëshe, entšangbe pormánëshe, obanëngbiama; chëshiñe cabá ndocna obaná mondëjajo. ⁴² Asna, nÿe chentše Jesusbe cuerpo tmojansegorá, chë Bashco fiestama canÿe te yojtsájamna causa, y chë cuevëshe chë béconana inámnayeca.

Jesús tojtanayena

(Mt 28.1-10; Mc 16.1-8; Lc 24.1-12)

20 Chë inÿe semana bojatšenté, cabá cachëse, cabá ndëbinÿna ora, María Magdalena chë cuevëshoye tojána y tojáninÿe inÿoca yojtsemna chë cuevëshoye amashjuantša ndëtšbé. ² Asna, tojëftsantótjajo y tojána chë Simón Pedro y chë inÿe uatsjendayá, ndábioye Jesús tša ibnabobonshana ibojtsemnoye. Chora tojanëyana: “Bëngbe Utabnabe cuerpo chë cuevëshentšana tmojtsámbañe y ndayentše tmojtsejájoma ndoñe queftsátstatšëmbo ca.”

³ Chora Pedro y chë inÿe uatsjendayá chentšana tbojëftsanbocna y chë cuevëshoye tbojánata. ⁴ Nÿets útata ibojtsëchamana, pero chë inÿe uatsjendayá Pédrëbiama más betscotojanótjajo y natsana chë cuevëshoye tojánashjango. ⁵ Tojanotsejbé y chë chentše tmojanacjá entšëjuangá tojáninÿe, pero choye ndoñe tonjánamashëngo. ⁶ Chentšana, Simón Pedro chabe ústonoye tojánashjango

y chë cuevëshoye tojánamashëngo, y tojáninÿe chë chentše tmojanacjá entsëjuangá. ⁷Y chë Jesús juabestšentsacjuama tojanaservé entsëjuana ndoñe chë inÿájuangaca yontsamna, sinó inÿoca botamana uandmanánëjua. ⁸Chora chë inÿe uatsjendayá, chë cuevëshoye natsana tojanashjanguá, choye tojánamashëngo. Tojáninÿe y Jesús tojtanayenama yojtsanošbuachë. ⁹Chëntscõe chë útata cabá ndoñe yontsósertana ntšamo Bëngbe Bëtsabe uabemana palabrenguiñe endayancá, chë Jesús obanënguentšana jtayenama ibojamnama. ¹⁰Chentšana chë uatsjéndayata chatbe oyenoye tbojtaná.

**Jesús, María Magdalénbioye
tbojánebëbocna**

(Mc 16.9-11)

¹¹ Pero María chentše tojanoquedá, chë cuevëshe juachaca šachénaca; yojtsošachentscuana tojanotsejbé cuevëshoye jarrepárama. ¹²Y tojáninÿe uta angelotémata uafjantsëjua uichëtjonata, Jesusbe cuerpo yojëftsejajónentše ibojtsetbemana. Canÿa tsëntšénëšhoica y chë inÿana matséscoica. ¹³Chora chata tmojanianyana: —Shembása, ¿ndayama cošaché ca?

As cha tojanjuá: —Atšbe Utabná tmojtsámabáne, y ndayentše tmojtsejájoma ndoñe quetsátstatšëmbo ca.

¹⁴ Chca tojánayana ora, tojanostëšantješé y tojáninÿe chentše Jesús yojtsemna, pero María ndoñe yontsetátšëmbo cha Jesús bëtsemnama.

¹⁵ Chora Jesús tbojanianyana: —Shembása ¿ndayama cošaché? ¿Nda congúá ca?

María yojtsejuabnaye chë boyabásana yojtsemna chentša base jajañe uaishanjá ca; chíyeca tbojantjá: —Bacó, aca tcojuambësna, šmëyana ndayentše cojtsejájó, as atše cha jesocñama ca.

¹⁶ As Jesús tbojanianyana: —¡María ca!

Chora María chábioye tojanontješé y tbojanianyana: —¡Rabuni ca! (hebreo biyañe chca endayana “Buatëmbayá ca”).)

¹⁷ Chora Jesús tbojanianyana: —Ndoñe šcatábojajo, er atše cabá ndoñe atšbe Taitábioye quetstëtstsjua. Pero motsa atšbe catsátangbioye y cochjáuyana, atše stsetsjuá atše y tsëngaftangbe Bëtšábioye, atše y tsëngaftangbe Taitábioye ca.

¹⁸ As María Magdalena tojána y Jesusbe uatsjéndayënga tojanéyana cha chë Utabnábioye tbojáninÿe ca y cha chë palabrenga tojánayana ca.

**Jesús chabe uatsjéndayënga
tojánebëbuacna**

(Mt 28.16-20; Mc 16.14-18; Lc 24.36-49)

¹⁹ Tojanibétata ora, cach semana bojatsënté, chë uatsjéndayënga tmojánenefjna canÿe luarentše, pero lempe tmojtjanatame, chë judiëngbiamana auatja causa. Chora Jesús tojánamashëngo, chëngbe tsentsaca tojantsá y mëntšá tojanacheuá: “Chë atšbe ainaniñe tšabe ebionana tsëngaftangaftaca chaotsema ca.”

²⁰ Y chca tojanéyana ora, chabe cucuatšënga y costillaca tojaninÿanyé. Chora chë uatsjéndayënga oyejuayënga imojtsemna, chëngbe Utabná tmojáninÿama. ²¹ As Jesús cachiñe tojanéyana: “Chë atšbe ainaniñe tšabe ebionana tsëngaftangaftaca chaotsema. Ntšamo atšbe Taitá Bëngbe Bëtsá šojichmocá, átšnaca cachcá tsëngaftanga cbontšachamná ca.”

²² Chca tojánayana ora, chëngbioye tojangouo y tojanéyana: “Chë Uámána Espíritu šmochjójyëngacñe. ²³ Ndëmuanÿenga chëngbe bacna soyëngama chašmojáperdonanga, perdonánënga mochántsmëna; y ndoñe chašmonjáperdonasna, ndëperdonánënga mochántsemna ca.”

Tomás, Bëngbe Utabnábioye ainá tbojáninye

²⁴ Pero Tomás, chë Gemelo ca uabobainá, canya chë bnétsana uta uatsjendayënguentsá, chë uatsjédayëngaftaca ndoñe yontsemna, Jesús tojánashjango ora.

²⁵ Chíyeca, “bënga chë Utabná fsënjinye ca”, chë inye uatsjédayënga tmojaniana ora, Tomás tojanéjua: “Atše chabe cucuatšine chë uajabonjana uinyniñe ndoñe sënjinnye, y chiñe atšbe ntšabuafja ndoñe sënjajué y atšbe cucuatše chabe costillaca ndoñe, ndoñe quichátošbuachiye ca.”

²⁶ Canye semana tojanochñengo ora, chë uatsjédayënga cachiñe canye luarentše tmojánenefjna. Y Tomásnaca chëngaftaca yojtsemna. Masque chentše atámeniñe yojtsemna, Jesús tojánamashëngo, chëngbe tsëntsaca tojantsá y tojanéyana: —Atšbe ainaniñe tšabe ebionana tšëngaftangaftaca chaotsemna ca.

²⁷ Chora Tomásbioye tbojaniana: —Acbe ntšabuafja muentše mojué y atšbe cucuatše minye; acbe cucuatše miyëbo y atšbe costillaca mojué. Y ndošbuachiyá ndoñe matsmënana, sinó atše tijtayanama cochtsošbuáchiye ca.

²⁸ As Tomás tbojaniana: —¡Atšbe Utabná y atšbe Bëtsá ca!

²⁹ Chora Jesús tbojaniana: —Tomás, nye šconjinyeyeca cojtsošbuaché. ¡Bëngbe Bëtsá chaoma puerte oyejuayënga chamotsemna chë nye ntjinycá tmojošbuachenga ca!

Ndayama quem librëša tmojanábema

³⁰ Jesús, chabe uatsjédayëngbe delante inye bëts soyënga Bëngbe Bëtsabe obenánaca tonjëftsema, pero quem librëšañe ndoñe quenatábemana. ³¹ Y quem librëšañe soyëngna, entsábemana tšëngaftanga

chašmotsošbuáchema, Jesús, chë Cristo y Bëngbe Bëtsabe Uaquiñá bëtsemnama; y chcase, chábeñe chašmotsošbuachese, chábeyeca chë nyetsca tescama yomna tšabe vida chašmotsebomnama.

Jesús, canyëšfta chabe uatsjédayënga tojánëbëbuacna

21 Chca tojanopasá chentšana, Jesús inye soye chabe uatsjédayënga tojánëbëbuacna, Tiberias mar béjaye tsachañe. Chora mëntšá tojanopasá: ² Cányëntše imojtsemna Simón Pedro; Tomás, chë Gemelo ca uabobainá; Natanael, chë Galilea luarocá, Caná pueblócá; Zebedeobe uaquiñata y Jesusbe inye uta uatsjédayata. ³ Simón Pedro chënga tojanéyana: —Sëntsá beonga jashebuáyama ca.

As chënga tmojanjuá: —Bëngnaca ácaftaca fchanjá ca.

As tmojána y canye barquëshoye tmojánamashjna; pero chë ibeta tondaye tmonjáninýena. ⁴ Ya yojtsebinyana orna, Jesús chë tsachoca yojtsemna, pero chë uatsjédayënga ndoñe imontsetátšëmbo cha Jesús yojamnama. ⁵ Chora Jesús tojanatjá: —Básenga, ¿tondaye šmonjashbuá ca?

Y chënga tmojanjuá: —Tondaye ca.

⁶ As Jesús tojanéyana: —Barquëshaca catšbioica chë atarraiësha métsena y beonga šmochanjáshebuaye ca.

As chënga chca tmojanma, y chora chësha jtabocnama ndoñe imontsobena, nyetsá beonga tmojánishëche causa. ⁷ As chë Jesusbe bonshana uatsjendayá, Pédrëbioye tbojaniana: “¡Bëngbe Utabná entsemna ca!”

Simón Pedro chca soye tojanuena y cachora entsáyá tojtánichëtjo, er nduichëtjoná yojtsemna, y chë béjayoye tojanoshbuetsë. ⁸ Chë inye uatsjédayëngna chë barquëshañe tmojána,

y chë atarraiésha jútjena beóngaca imojtsásjaye, er chë tsachocama bécoñe imojtsemna, nÿe canÿe patse metroca. ⁹Fshantsoye tmojánastjajna ora, chënga tmojáninÿena canÿe chebániñe pormániñe, y chentsna canÿe beona y tandéshnaca yojtsesegorana. ¹⁰Chora Jesús tojanéyana: “Chë šmonjáshebuaye beonguentšana báseftanga miyëbo ca.”

¹¹Simón Pedro chë barquëshoye tojánamashëngo, y chë atarraiésha jútjena bëts beóngaca, uasjoónana tsachóntsoñe tojanëyamba. Mo canÿe patse y shachna bnétsana y unga beóngaca; pero masque nÿetsá beonga, chë atarraiésha ndoñe ntjuatanécanana.

¹²Chora Jesús tojanéyana: “Mabënga, šmochjase ca.”

Chë uatsjéndayënguentšana ni canÿa yontsenñemua cha jatjayama nda cha yojamnama, er nÿetscanga imojtsetátšëmbo cha chë Utabná bétsemnama. ¹³Chora Jesús tojanobeconá, chë tandëse tojanca y chënga tojanatšatá, y chë beónacnaca cachá tojanma.

¹⁴Chóracna, Jesús ya unga soyama chabe uatsjéndayënga yojtsanebëbuacana, obanënguentšana tojtayanentšana.

Jesús, Simón Pédroftaca tojanoyebuambá

¹⁵Jasama tmojanpochocá ora, Jesús, Simón Pédrëbioye tbojantjá: —Simón, Juanbe uaqiñá, ¿quemëngbiana más quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshatemëngcá imomnënga, cochtsanÿena ca.

¹⁶Chora cachiñe tbojantjá: —Simón, Juanbe uaqiñá, ¿quešcbobonshana ca?

Y Pedro tbojanjuá: —Atšbe Utabná, aíñe. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanÿena ca.

¹⁷Y unga soyama tbojtëtantjá: —Simón, Juanbe uaqiñá, ¿quešcbobonshana ca?

Pedro puerte tbojanongmé, ya unga soyama “quešcbobonshana ca” tbonjantjá causa; y tbojanjuá: —Atšbe Utabná, aca lempe condétatšëmbo. Aca condétatšëmbo atše aíñe cbondbobonshánama ca.

As Jesús tbojaniyana: —Atšbe entšanga, mo oveshëngcá imomnënga, cochtsanÿena. ¹⁸Ndegombre cbëyana: Más bobontse conjamna ora, conjanamana cach aca jtichëtjuana y ndémoye jama cojtseboše choye jtsoñana; pero tanguá chacojtsemna orna, buacuatsënga cochanjatsbaná, y inÿa cmochantichëtjo y ndémoye jama ndoñe chacontseboše choye cmochanjuánatse ca —Jesús tbojaniyana.

¹⁹Chca tojánayana, ana jtsotatšëmbuama ntšamo Pedro jóbanama ibojamnama, y chë chca jóbanëse, Bëngbe Bëtsá corente bëtsá y obená bétsemnama Pedro yochjáninÿanÿiyama. Y chca tojánayanentšana, Pédrëbioye tbojaniyana: —Šmasto ca.

Jesube bonshana uatsjendayá

²⁰Pedro tojesanenostëtšantjješé y tojáninÿe, Jesube bonshana uatsjendayá ústonoye yojtsaye. Cha enjamna chë monjansá ora, Jesús cabá ndóbana ora, chë Jesúsbioye más tonjanosjoná y tbonjantjá: “Bëngbe Utabná, ¿nda chë boshjuaná yochtsemna ca?” ²¹Pedro chábioye tbojáninÿe ora, Jesúsbioye tbojantjá: —Atšbe Utabná, y cháftaca, ¿ntšamo yochjopása ca?

²²Chora Jesús tbojanjuá: —Atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? Acna n̄ye šmasto ca.

²³Chíyeca, chentšana, Jesucristbeñe ošbuáchiyěngbenache n̄yetscanga imojánichamo, chě uatsjendayá ndoñe yochanjanóbana ca. Pero Jesusna ndoñe chca tonjánayana, sinó “atše quem luaroye jesabáměntscuana cha ainá chauesomñama atše stsebošěse, ¿aca ndayá chama cmatjátsěntšamna? ca”.

²⁴Mua endmēna chě uatsjendayá; cha entsichamo quem soyěnga ndegombre yojamnama, y camuá quem libřěšañe lempe tonjuábema. Y bēnga mondětatsēmbo cha ndegombre soye endóyebuambnama.

²⁵Jesús in̄ye ba soyěnga tonjěftsema; tša bětscá soyěnga endmēna, nderado lempe cada can̄ye soye tcojuábema y libřěšangá tcojuapormá, atše sěntsejuabná, n̄yetsca chěšangá quem luar-entše ndoñe nanjuába.

Hechos

Jesús tojanašebuachená chë Uámana Espíritu jíchmuama

1 Teófilo, atšbe natsana librésaňe tcbonjuábobema lempe ntšamo Jesús tojanmama y tojánabuatambama, chca tojanbojatsé orscana, ²y Bëngbe Bëtsá celoye tbojtanatsbanantscuana. Cabá celoye ndëta orna, chë chabe ichmonëngcá tojanabacacá boyabásengna Jesús tojéftsanamëndá, chë Uámana Espíritbiajana, ndayá jamama yojánamnama. ³Jesús cruciňe tojanóbana y tojtanayenentsana, ba soye chë ichmónënga yojánebëbuacana, chca, chënga jinňanyiyama cha ndegombre tojtanayenama. Canta bnëtsana tentscuana cha yojánebëbuacana y Bëngbe Bëtsabe amëndayama chënga yojanabuatambá.

⁴Canŷe, Jesús chabe ichmónëngaftaca yojétsemna ora, mëntšá tojanamëndá: —Jerusalenentsana ndoňe šmatjábocana. Camuentšë šmochjobátma, ntšamo atšbe Taitá tcmonjanašebuachenacá chaóshjanguentscuana, ndayama atšbe tcbonjáuyana. ⁵Ndegombre, Juan entsanga béjayeca tonjanëbaye; pero ndoňe baytesna, Bëngbe Bëtsá chë Uámana Espíritu bochanjíchmuá, tšëngaftangbe ainaniňe jtsemándayama cháuamashënguama ca.

Jesús celoye tojtantsjuá

⁶Canŷe, chë ichmónënga Jesúseftaca cányiňe imojtsemna ora, chënga tmojantjá: —¿César y chë Romoquëngbe amëndayentsana tašcochjatsebacá, y mora bënga, Israeloca entsanga, canŷe Rey quemochtsatsbomna ca?

⁷As Jesús tojanéyana: —Tšëngaftanga ndoňe quecmátamna chë soyëngama

jtsetatšëmbuana. Nŷe atšbe Taitá aňe; y cha, chabe obenánaca echanjamánda mocna ora y ndayté chca chaopasama. ⁸Chë Uámana Espíritu tšëngaftangbe ainaniňe jtsemándayama chaojabo ora, tšëngaftanga obenana šmochanjóyëngacňe. Chentšana,

ntšamo atšbiana šmotatšëmbcá, chë tcbonjabuatambá soyënga, entsanga šmochjáuyana Jerusalenentšë, nŷets Judea luariňe, Samarioca y quem luarentša nŷets luarënguenáchnaca ca.

⁹Chë soyënga tojánayanentsana y chabe uatsjëndayënga imojtsonŷaye ora, Bëngbe Bëtsá, Jesúsbioyë tbojtanatsbaná y canŷe jantšëtëshe chábioyë ibojútsbotse y ndoňe más tmonjanobená cha jinŷama.

¹⁰Jesús celoye yojtsetsjuama chënga bën imojtserreparánentscuana, nŷe ndeolpe, uta boyabásata uafjantse entsayaca bopormánata chëngbe juachaca tbojabántsaye, ¹¹y chëngbioyë tmojanéyana: “Galileoca entsanga, ¿ndáyeca celoye šmojtsantješana? Jesús, chë tšëngaftangaftaca enjamná celoye tontá y ntšamo mora šmonjinŷcá cha celoye jtama, cachcá quem luaroye cha echanjésabo ca.”

Júdasbe cuenta Matías tmojanábuayana

¹²Jesúsbe ichmónënga chë Olivos tjashocana Jerusalenoye tmojtaná. Chë tjocana Jerusalenóntscoňna bécoňe inamna, ndayéntscooca canŷe ochnayté jama yojanlesenciana nŷetsá.

¹³Jerusalenoye tmojtanashajjna orna, chë yebnentša tsbanánoca tsoye tmojtanášëngo. Chentšë yojánatana Pedro, Juan, Santiago, Andrés, Felipe, Tomás, Bartolomé, Mateo, Santiago chë Alfeobe uaquiňá, Simón chë Celote ca uabobainá, y Judas, chë Santiagbe uaquiňá. ¹⁴Chënga sempre imojanamana jtenefnana Bëngbe

Bëtsáftaca jencuéntama básefta shembásengaftaca, María Jesusbe mamá y Jesusbe catsátangaftaca.

¹⁵ Chë tempo tmojánenefjna canÿe patse y uta bnétsana Jesucristbeñe ošbuáchiyënga, y canÿe, Pedro tojantsá y tojanéyana: ¹⁶ “Jesucristbeyeca atšbe catsátanga, endánëyta ntšamo Bëngbe Bëtsabe uabemana palabrënguine iuabemancá chochnënguama, y tempo, David chë Uámana Espiritbeyeca chiñe tojanábema ntšamo Júdaseftaca yochjanopásama; chcasna, Judas uayayënga tojanëntse Jesús chamuishachama.

¹⁷ Júdasnaca bëngbe enutá enjamna y Jesús chábioynaca tbonjanábuayana bëngcá chabe trabajuine jtsoservénama.

¹⁸ Tšëngaftanga šmondétatšëmbo, chë Judas bacna soye tojanmama tmojtanabuená crocenánacna fshantse tmojánbuamema. Chentsana cha tojtsanótsatše y chabe bestšaše tsentsaca tbojtsanashtétšëna y chabe uafsbentsana nÿetsca chabe chunchullëjuangá tojtsanáshana.

¹⁹ Jerusalenentše oyenënga chë soyama tmojántatšëmbona ora, chë fshantse chëngbe biyañe Acéldama ca tmojanabaye. Acéldama endayana ‘Buiñe Luare ca’. ²⁰ Salmos librëšañe, Jesucristo uayayëngbe cucuatšine boshjuanabiama mëntsá enduábemana: Chabe yebna éñañe chaotsemna y ndocná chentše chaondëtsiyena ca.

Y mëntsánaca endayana:

Chabe cuenta inÿa chabe trabajo chaoma ca.

²¹ “Chcasna, mora muentše montsemna taitanga béngaftaca mondenutënga, Bëngbe Utabná Jesús béngaftaca enjamnëntscuana, ²² Juan Jesúsbioye tbonjanabaye orscana y Bëngbe Bëtsá Jesúsbioye béngbentsana celoye tbonanatsbanantscuana. Y mora šontsamna canÿa mënguentšá juabuáyanama, Jesús tojtanayenama

entšángbioye béngaftaca jábuayenama ca.”

²³ As chora útata tmojanabocacá: José, nda Barsabás ca imojanábobuatma y ínÿengna Justo ca; y chentsana Matías. ²⁴ Chora Bëngbe Bëtsáftaca mëntsá tmojanencuentá: “Bëngbe Utabná, aca nÿetscangbe ainana icuabuatma; chcasna, šminÿanyé nda quem útatentšana cochjuábuayanana, ²⁵ canÿe ichmonacá Júdasbe cuenta chaotrabajama. Judas ya ndoñe canÿe ichmoná quenátsmëna, bacna soye tojama causa, y cha mora yojtsemna chë ndayentše jtsemnama ibomna luaroca ca” —chënga tmojánayana.

²⁶ Y nda chë ichmoná yochtsemnama jtsotatšëmbuamna tsbanánoye tmojanétšëna y Matías tbojanobuache; as cach orscana, Jesucristbeñe ošbuáchiyënga chabiamá imojanjuabná mo canÿe Jesusbe ustonacá, cachcá ntšamo chë bnétsana canÿe uatsjëndayëngbiama chënga imojanjuabnacá.

Chë Uámana Espiritu ošbuachiÿëngbeñe tojánamashëngo

2 Pentecostés ca uabaina fiesta tojanobuache ora, chë jaja sananga tmojanobuátbanama fiesta te, Jesucristbeñe ošbuáchiyënga nÿetscanga cánÿine canÿe luarentše imojtsemna. ² Ndeolpe, celocana mo canÿe jabuache binÿiëcá yojtsaishauenana y chca, tša jabuache shauenanana tojanóshjango nÿets yebnentše, chënga imojtsetbiámanentše. ³ Y chora bichtajënga mo inëshcá yojónÿna y canÿányabeñe yojojátaye. ⁴ Chca chë Uámana Espiritu tojánamashëngo chëngbe ainaniñe jtsemándayama; chora nÿetscanga tmojanontsé inÿetšá biyangana, chënga tempo ndmabiyañe, ntšamo chë Uámana Espiritu yojtsamcá chënga inÿetšá chamotsebiyama.

⁵Chë tempo Jerusalemntše imojtsemna ba judiënga, Bëngbe Bëtsá puerte adórayënga, nyets luarëngocana áshjajnënga; chënga tmojánabo Bëngbe Bëtsá jëtschuayama.

⁶Entsanga chë shauenanana tmojanuena ora, tmojanójoto y ndoñe imontsetátšëmbo ntšamo jtsejuabnayana ndayá vojtsopasánama, er chë inye luarocana áshjajnënga imojtsuenana chë Jesucristbeñe ošbuáchiyënga inyetsá biyangana jtsóyebuambnayana, ntšamo cada ona chënga imojanbiyacá. ⁷Chë soyëngama entsanga puerte imojenjnaná y mëntsá imojtsenatsëtsnaye: “Chë chca montsóyebuambnanga Galileoquënga mondmëna. ⁸Chcase, ¿ntšámoyeca bënga imojtsobena chënga joyaunayana cach bënga mondëbiyacá ca?

⁹Muentše montsemna Partioquënga, Medioquënga, Elam, Mesopotamia y Judeoquënga, Capadocia, Ponto y Asia luaroquëgnaca, ¹⁰Frigioquënga, Panfilia, Egiptó y Libia, chë Cirene béconana luaroquënga. Báseftangna Romoquënga montsemna; ¹¹chéngbeñe nderado judiënga camuentše onýnánënga, pero ínýengna ndoñe, y chënga Bëngbe Bëtsá mondbëtsatschuanaye cach ntšamo chë judiënga monduamancá. Inyengna Cretocana y Arabiocánëncaca tmojabo. ¡Y bënga montsobena chë Galileoca judiënga joyaunayana Bëngbe Bëtsá bëts soyënga tojamama cach bënga mondëbiyacá ca!” —chë entsanga imojtsichamo.

¹²Chë causa nyetscanga imojtsenjanaye y ntšamo jtsejuabnayama ntsetatšëmbcá imojtsemna y imojtsentjanaye: “¿Ndayá chë soye vojtsayana ca?”

¹³Pero ínýengna, chë soyëngama chëngbioye imojtsëbayajuana y

imojtsichamo: “Chënga tëmiënga montsemna ca.”

Ntšamo Pedro chora tojanoyebuambá

¹⁴Chentsana, Pedro tojantsá chë inye bnëtsana canye ichmónëngaftaca y jabuache tojanontsé chë entsanga jáuyanana, mëntsá: “Atšbe entsanga judiënga y nyetscanga Jerusalemntše oyenënga, tšabá šmochjouena. Ntšamo tojopasama cbochanjábuaenaye, as chacmésertama. ¹⁵Tšëngaftanga šmontsejuabná atše y atšbe enutënga tëmiënga fstsemna ca, pero ndegombre, tëmiënga ndoñe queftsátsmëna; cabá cachëse, base mošenana ora ctsomñe. ¹⁶Pero ntšamo entsopasánamna, Bëngbe Bëtsabe juabna oyebuambnayá Joel mëntsá tojanábema:

¹⁷Bëngbe Bëtsá mëntsá tojánayana: ‘Quem luare jopochócama te chaojtsobeco ora, chë soyënga echanjochnëgo.

Atšbe chanjama, atšbe Espíritu nyetscangbe ainaniñe cháuamashënguama.

Chentsana, tšëngaftangbe uaquiñënga y bemianga atšbe soyëngama entsanga mochantsëtsëtsnaye;

tšëngaftangbe bobontsëngna, atšbe chanjama soyënga mochantsonyaye mo otjenayoquécá;

y tšëngaftangbe bëtsëjëmëngna atšbe soyënga mochantsotjënaye.

¹⁸Chca ora, atšbe chanjama nyetsca atšbe oservëngbiama, boyabásenga y shembásenga,

chëngbe ainaniñe atšbe Espíritu cháuamashënguama,

as chënga atšbe soyëngama entsanga mochantsëtsëtsnaye.

¹⁹Atšbe chanjama bëts soyënga celoca; y quem luariñe echántsemna buiñe, íñeshe y ngona mo jantšetëshcá, atšbe obenana jinýanýiyama.

²⁰ Cabá chë puerte uámana te, chë Bëngbe Utabná bëts soyënga jamama ndobuache ora, shinÿe ndoñe queochátsbuashinÿinÿana y juashcona buánganëtema mo buiñcá echántsemna.

²¹ Y as, ndánaca Bëngbe Utabná tbojtsot-sëmbuaná, cha bochanjatsbocá.’ Chca Joel tempo tojanábema ca” — Pedro tojánayana.

²² Chora Pedro tojatanéyana: “Israeloquënga, šmochjouena ntšamo cbochanjuayancá: Bëngbe Bëtsá ndegombre tcmónjaninÿanÿé, Jesúsbioye chabe trabajo biamnayá cha tbojánbemama. Chë soye Bëngbe Bëtsá tcmónjaninÿanÿé, Jesús chë Nazaretocáftaca cha tojanma bëts soyëngaca y ójnanana soyëngaca, Bëngbe Bëtsabe obenana jinÿanÿiyama. Cach tšëngaftanga chë soyëngama šmondétatšëmbo, Bëngbe Bëtsabe obenánaca chë soyënga tšëngaftangbeñe Jesús tonjánmayeca.

²³ Ndegombre tšëngaftangbe cucuatšinë Jesús tmonjánboshjona, pero cabá ndëboshjona ora, Bëngbe Bëtsá tojanjuabó ntšamo jopásana yojamnama; y ntšamo tšëngaftanga cháftaca šmochjanmámnaca cha inatátšëmbo. Tšëngaftangna Jesús šmonjanishache y šmonjanma cha chamóbama y chamocrucificama, bacna entšangbe cucuatšinë. ²⁴ Pero Bëngbe Bëtsá tojama cha cháuatayenama; y chë obanëngbe luarentšana tbojatsbocá, er ndoñe yonjopodena cha obaná chaoquedama ca” —cha tojánayana.

²⁵ Chora Pedro tojatanéyana: “Rey David tempo Jesusbiana mëntšá tojéftsanabema, ntšamo cha Bëngbe Bëtsábioye tbojanianama:

Atšbe Utabná, aca sempre átšeftaca condbétsemna, y sempre átšeftaca condboquedá atše juajabuáchama,

chíyeca ndocná queochatobenaye atše jauátjanama.

²⁶ Chíyeca atše corente oyejuayá séntsemna, y atšbe uayášaca cbontsatschuaná.

Atše masque chanjóbana, tšabá sëndé-tatšëmbo aca atšbe Bëtsá, atše chaitayenama cochjamama.

²⁷ Aca, Bëngbe Bëtsá, obanëngbe luarentše ndoñe queochátsboshjona, y ndoñe queochatsleséncia acbe uámana oservenabe cuerpo chaotsopochocama.

²⁸ Aca chë tšabe benache šconjaninÿinÿé, ntšamo tšabe vida jtsebomnama.

Aca átšeftaca condbétsemnama, atše puerte oyejuayá séntsemna ca — David tojéftsanabema ca.”

²⁹ Chentsana Pedro tojatanéyana: “Baconga y batanga, šontsemna ndegombre tšëngaftanga jábuayenana tšabá chacmésertama. Bëngbe tempsca bëts taitá David tojanóbana y tmojanatbontsá, y bënga montsemna cha tmojanatbontsá luare béconana.

³⁰ Cach David canÿe Bëngbe Bëtsabe juabna oyebuambnayá inamna. Cha tšabá inatátšëmbo Bëngbe Bëtsá bëtscá tbojanšbuáchenama, Davidbe entšanguentsšana canÿa, Cristo, cach Davidcá rey jabemama.

³¹ David inatátšëmbo chë Uámana Uabuayaná, chë Cristo, cháuatayenama Bëngbe Bëtsá yochjanmama. Chama cha tojánayana y tojéftsanabema, obanëngbe luarentše Cristo ndoñe ntjéftseboshjonana y Bëngbe Bëtsá ndoñe ntjalesénciana chabe cuerpo chaotsopochocama ca. ³² Bëngbe Bëtsá tojama Jesús cháuatayenama y bënga cha fsënjinÿe. Chíyeca bënga fséntsetatšëmbo chca ndegombre bétsemnama. ³³ Bëngbe Bëtsá, Jesús celoye tbontanatsbaná chabe catšbioica jtsatsmënama jtsemándayama, y

Bëngbe Bëtsá chë Uámana Espíritu Jesúsbioye tbojanëntšabuaché ntšamo chë Taitá tbojanšbuachenacá. Ntšamo tšëngaftanga šmontsonýá y šmontsuenancá entsemna, Jesucrístoftaca chë Uámana Espíritu bëngbe ainaniñe cháumashënguama Bëngbe Bëtsá tojámayeca. ³⁴David ndoñe Jesuscá celoye tonjána, pero mëntšá tojéftsanábema:

Bëngbe Bëtsá atšbe Utabná Crístbioye tbonjaníyana:

‘Atšbe catšbioica cochtsetbemana,

³⁵ acbe uayayënga acbe cucuatšíñe chamoquedama atšbe obenánaca chjamëntscuana ca.”

³⁶ Chora Pedro tojatanéyana: “Tšëngaftanga nyets Israeloquënga šmochtsetátšëmbo, atše ndegombre cach Jesusbiamá sentsóyebuambnama. Cha tšëngaftanga šmonjanrucificá, pero Bëngbe Bëtsá chábioye tbonjábema Bëngbe Utabná y chabe Uámana Uabuayaná, chë Cristo ca.”

³⁷ Chë soyënga tmojanuena ora, entšanga cochtsetšenánënga imojtsemna, y Pedro y chë inýe ichmónëngbioye tmojanéyana: —Baconga, ¿ndayá mora jamama šojtsamna ca?

³⁸ As Pedro tojanéjua: —Ngménaca šmochtenójuaboye bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache. Chca chašmojama ora, cbochanjubaye mo chábeñe ošbuachiyëngcá, Jesucristo atše jótšëmbonëse. Chcase, Bëngbe Bëtsá tšëngaftangbe bacna soyëngama cmochanjáperdonaye y echanjama chë Uámana Espíritu tšëngaftangbe ainaniñe jtsemándayama cháumashënguama. ³⁹ Bëngbe Bëtsá chë soyënga tcmonjanašebuachená tšëngaftangbiama, tšëngaftangbe básengbiama y nyets chë bën luarënguenache imomna entšangbiama,

nyetscanga chë Bëngbe Utabná Bëngbe Bëtsá chábioye jabama chaojubuáyanënga ca.

⁴⁰ Inýe palabréngnaca Pedro tojatanéyana y bëtscá tojanabuayená mëntšá: “¡Bëngbe Bëtsá chë Israeloca bacna entšanga echanjácastigaye. Chašmótsbocamna, chëngbentšana šmochtsojuánañe ca!”

⁴¹ Ba entšanga imojtsanošbuaché ntšamo Pedro tojanéyanama y tmojánenabaye. Cach te mo unga uaranga entšanga nyetsá tmojanoboté, Jesucrístbeñe ošbuachiyënga jtsemnama. ⁴² Chënga corente imojtseboše jtsamama chë Jesusbe ichmónënga imojtsabatambá soyënga. Tšabá yojtsacochebiona nyetscanga cánýiñe jtsemnama y imojanamana mo chë Jesucrístbeñe ošbuachiyëngcá cánýiñe jtsesayana y cánýiñe Bëngbe Bëtsáftaca jtsencuéntayana.

Ntšamo chë natsana Crístbeñe ošbuachiyënga vida innabomna

⁴³ Nyetscanga imojtsenjanaye, chë ichmónënga bëts soyënga y inýe soyënga chabe obenana jinýanýiyama chamomama Bëngbe Bëtsá tojánmayeca. ⁴⁴ Nyetsca chë Jesucrístbeñe ošbuachiyënga sempre cánýiñe mo canýacá imojtsemna y nyetsca chëngbe bomna soyënga nyetscangbiama yojtsemna. ⁴⁵ Chënga imojanamana fshantsënga jtsatobuíyana y chë imojánbomna soyëngnaca, y chë crocénana jujátayana ntšamo chë ínýenga tojtsëjbotcá. ⁴⁶ Cada te imojanamana Bëngbe Bëtsabe bëts yebnentšë jénefnana cha jëtschuayama, y yebnënguenache cánýiñe imojtsesaye oyejuayënga y ndoñe ojëndayënga. ⁴⁷ Chënga imojanamana Bëngbe Bëtsá jtsatschuanayana, y nyetsca entšanga imojtsejuabnaye chë Jesucrístbeñe ošbuachiyëngbiama tšabe entšanga

imojamna ca. Y cada te Bëngbe Bëtsá yojtsama más ošbuáchiyënga chamóbotema, chë ndëmuanÿënga cha yojtsatsebacyënga.

Pedro canÿe coshétbioye tbojanshná

3 Canÿe te, Pedro y Juan Bëngbe Bëtsabe bëts yebnoye tbojánata bëts mošenana ora. Chca ora entšanga imojanamana Bëngbe Bëtsáftaca jtsencuén-tayana. ²Bëngbe Bëtsabe bëts yebnentše canÿe cosheto yojtsemna; tojanonÿná orscana chca šocá inamna. Entšanga imojanamana cada te cha juanatsana canÿe luaroye, Bëngbe Bëtsabe bëts yebnoca, Botamana Amashjuana ca uabáinoye, chë tmojtsachnëjuanënga lemošna chaótejañama. ³Pedro y Juan Bëngbe Bëtsabe bëts yebnoye jamashënguama chë cosheto tojánanÿe ora, canÿe lemošna chátbioye yojótejañe. ⁴Chatna chë šocá imojtsonÿaye, y Pedro tbojanianyana: “Šcochtsënÿaye ca.”

⁵As cha yojtsënÿaye y yojtsejuabnaye ndayá chjójëngacñe ca. ⁶Chora Pedro tbojanianyana: “Quetsátsbomna ni crocé-nana, ni castellano aca jatšëtayama, pero atše chanjama Jesucristbe obenánaca ndayá acbiama jamama atše stsobencá: Jesús chë Nazaretocá obenana end-bomna; chíyeca atše cbëyana chabe mándoca, matëtsbaná y cochtsana ca.”

⁷Pedro chca tbojanianyana ora, tbojanábuacueshache catšbióicatše y tbojtanatšbaná, y cachora chë cosheto shecuatšinë y shëmiabeñe añemo yojtsatsbomna. ⁸As chë cosheto, canÿe jontsenÿëse tšabá tojtantsá y tojanontšé tšabá jtsanana, y Bëngbe Bëtsabe bëts yebnoye Juan y Pédroftaca tojánamashëngo; yojtsayontsenÿnaye y Bëngbe Bëtsá ibojtsatschuanaye, tbojanshnama. ⁹Chë Bëngbe Bëtsabe bëts yebnentše imojétsemnënga nÿetscanga cha tmojáninÿe tšabá jtsanana y Bëngbe Bëtsá jtsatschuanayana. ¹⁰Chënga imnatát-

šëmbo cha chë cosheto yojamnama, chë nda yojanamana Bëngbe Bëtsabe bëts yebnoca, chë Botamana Amashjuanentše jótbemana, entšanga lemošna jotejañama. Cha tšabá yojtsatsmënamna entšanga ojnanánënga imojtsemna.

Ntšamo Pedro tojanoyebuambá Salomonbe Amashjuana ca uabáinentše

¹¹Chë cosheto ya shnaná ora, ndoñe yontseboše Juan y Pédrëbentsana joluárana. As, nÿetsca entšanga ojnanánënga tmojanótjajo chë amashjuana otsbojebniñe, Salomonbe Amashjuana ca uabáinoye, chë Juan, Pedro y chë cosheto shnaná imojétsemnoye. ¹²Pedro chë entšanga tojánanÿe ora, tojanéyana: “Taitanga y mamanga, Israeloquënga, ¿ndáyeca chë soyëngama ojnanánënga šmojtsemna? ¿Ndáyeca nÿe šcojtsëbuáutja? ¿Šmojtsejuabná nÿe bëndatbe obenánaca quem boyabása tifjashná ca? ¿O šmojtsejuabná quem boyabása tifjashná bëndata Bëngbe Bëtsá puerte tšabá ftsadoránayeca? ¹³Bëngbe Bëtsá, ndábeñe Abraham, Isaac y Jacob imojanošbuaché y ndábeñe bëngbe bëts taitanga imojanošbuaché, cha tonjinÿanÿé chabe oservená Jesús chë más uamaná yomnama. Cha tšëngaftanga chë mándayëngbe cucuatšinë šmonjánboshjona chamóbama. Pilato enjëtseboše Jesús jëtšboshjonama, pero tšëngaftanga Pilatbe delante šmonjánayana chca ndoñe šmontsanboše ca, y chíyeca Pilato ndoñe tbontanboshjona. ¹⁴Jesús uamaná y nÿetsca soyënguiñe tšabá amá enjamna, pero tšëngaftangna cha šmontsanaboté y Pilato šmonjanimpadá chabe cuenta canÿe boyabása, entšá obanayá, chabuatsboshjonama. ¹⁵Y chca, chë ndegombre tšabe vida chašmotsebomnama amábioye

tšëngaftanga šmonjanóba. Pero Bëngbe Bëtsá tojanma cha cháuatayenama y bënga chë soye fsënjáninÿe y chama fsëndétatsëmbo. ¹⁶ Jesús puerte obená endménayeca, quem cosheto añémoca entsatsmëna. Ntšamo šmonjinÿe y šmonjatatsëmboncá ndegombre tonjopasá Jesúsbeñe betsošbuáchema. Chë Jesúsbeñe jtsošbuáchiyana tonjama cha tšabá tšëngaftangbeñe chaotsatsmënama.

¹⁷ “Taitanga y mamanga, atšë sëndétatsëmbo tšëngaftangbe causa y tšëngaftangbe amëndayëngbe causa Jesús tojanóbanama. Pero tšëngaftanga chca šmojanma, ndayá šmojétsamama ntsetatsëmbcá. ¹⁸ Tempo, Bëngbe Bëtsá chë chabe juabna oyebuambnayënga tojanamëndá entsanga jábuayenama, chë Bëngbe Bëtsabe Uámana Uabuayaná puerte ngménana yochtsanbomnama. Morna, ntšamo Bëngbe Bëtsá tojanayancá ya tonjochnëngo. ¹⁹ Chcasna, ngménaca menójuabonga bacna soyënga šmojtsamama, chca amana šmochtsajbaná y Bëngbe Bëtsabe benache šmochtishache, chca, tšëngaftangbe bacna soyënga cha chacmabuajuánama. Chca chašmojamëse, Bëngbe Bëtsá echanjama tšëngaftangbe ainaniñe oyejuayana chašmotsóbomñama, ²⁰ y tšëngaftangbioye bochanjíchmuá Jesús, chë tempo chabe Uámana Uabuayaná Bëngbe Bëtsá tbojanbemá. ²¹ Canÿe te echanjóshjango, Bëngbe Bëtsá lempe tsmëmácá jëtsbemama. Chë tentscuana Jesús bontsemna celoca joquédana. Chca echanjochnëngo ntšamo Bëngbe Bëtsá chabe juabna oyebuambnayëngbiajana entsanga tojanabuayenacá. ²² Moisés bëngbe bëts taitanga tojanabuayená: ‘Chë Utabná Bëngbe Bëtsá canÿe chabe juabna oyebuambnayá ntšamo atšë sëndmëncá, cmochanjayentšíchmuá.

Cha tšëngaftangbentsana echanjábocna y tšëngaftanga cmontsamna ntšamo chacmojtsëtsëtsnacá cha jtseyeanana. ²³ Ndánaca chábioye ndoñe chabonjoyeuná, cha bontsemna chë Bëngbe Bëtsabe entsángbentsana luaroca jtsemnama y chamotseepochocama ca’ —cha tojánayana.

²⁴ “Y nÿetsca chë Bëngbe Bëtsabe juabna oyebuambnayëngnaca Samuel orscana, entsanga tmojanabuayená ndayá quem tempo yochjanchnënguama, ntšamo mora montsonÿacá. ²⁵ Chabe juabna oyebuambnayëngaftaca Bëngbe Bëtsá tojanašebuachená bëts soyënga tšëngaftangbiama, y tšëngaftangbe bëts taitangaftaca canÿe trato tojábema; chë soyënga cabá tšëngaftangbiama entsemna. Bëngbe Bëtsá Abrahámioye mëntšá tbojaniyana: ‘Chë ácbentsana entsángbeyeca tšabe bendicionënga chanjama nÿetsca quem luarentša entsangbiama ca.’ ²⁶ Bëngbe Bëtsá tojama chabe oservená cháuatayenama y natsana tšëngaftangbioye tbojanichmó, bacna soyënga amana chašmotsajbanama. Y chca, Bëngbe Bëtsá jamama tšëngaftangbeñe tšabe bendicionënga chaotsemnama ca” —Pedro tojánayana.

Pedro y Juan Jerusalenentša mandadëngbe delante

4 Pedro y Juan cabá entsanga imojtsëtsëtsnaye; chorna chë chata ibojtsemnoye tmojánashjajna judiëngbe bachnanga, Bëngbe Bëtsabe bëts yebnentša soldadëngbe amëndayá y saduceo ca uabaina judiëngbe amëndayënga. ² Chatna entsángbioye imojtsabuátambaye Jesús tojtanayenama y chë soye yojánayana obanënga ndegombre mochtayena ca. Chë causa, chë tmojánashjajna amëndayënga tojãnetëna. ³ As, Pedro y Juan tmojánishëche y ya jetiñe

yojtsemna causa, cárceloye tojanètame yěfsanèntscuana. ⁴Masque chca, banga entšanguentšana, ntšamo Pedro y Juan tbojanayancá tmojanuenënga, aïñe Jesucristbeñe imojtsošbuáchiye. Chë tentscuana shachna uaranga Jesucristbeñe ošbuáchiyënga imojtsemna, nÿe boyabásenga jacuéntase.

⁵Yěfsana, chë judiëngbe amëndayënga, judiëngbeñe bëtsëjemëngcá amëndayënga y ley abuatambayënga Jerusalenentšë tmojánenefjna. ⁶Chéntš-naca imojtsemna, chë bachnangbe más uámana amëndayá Anás ca uabainá, Caifás, Juan, Alejandro y chë bachnangbe más uámana amëndayëngbe nÿetsca pamíllangnaca. ⁷Chora chënga tmojanmandá Pedro y Juan junatsama, y chëngbe tsèntsaca tojanatsá y mëntšá tmojanatjá: —¿Ndabe obenánaca chë soyënga šojtsama, o, nda derecho tcmënjatšatá chë soyënga chašotsamama ca?

⁸As Pedro, chë Uámana Espiritu chabe ainaniñe corente jtsemándayëse, mëntšá tojanéjua: —Israeloca mándayënga y bëtsëjémënga, ⁹mënté šconjatjá chë jama ndobenáftaca tsabe soye tifjamama y ntšamo cha mora jama yojtsatobenama. ¹⁰Chcasna, ntšamo tojopasama cbochanjabuayená, chca, tšëngaftanga y nÿetsca Israeloca entšanga chë soyënga chašmotsetatšëmbuama. Quem boyabása, chë tšëngaftangbe tsèntsaca entsemná, Jesucristo chë Nazaretocabe bëts obenánaca chca tsábá entsatsmëna. Y Jesús endmëna nda tšëngaftanga šmonjancrucificá y ndabiamá Bëngbe Bëtsá tojanma cháuatayenama. ¹¹Jesusbiamá Bëngbe Bëtsabe uabemana palabrenguñe mëntšá endayana: “Chë yebna jebuanënga tmontsanaboté ndëtšbé, mora chë más bëts uashacuanëšentšë entsejájona

ca”. Tšëngaftanga šmondmëna mo chë yebna jebuanëngcá, er Jesúsbiyoe šmontsanaboté y mora cha chë más uamaná entsemna. ¹²Nÿe cha yobena tšëngaftanga játsebacama. Bëngbe Bëtsá ndocna inÿe entšábiyoe tbonjatšetá chabe obenana chca jamama; chíyeca quem luarentšë ndocná más quenátobena bënga játsebacama. Nÿe Jesucristbe obenánaca aïñe ca —Pedro tojánayana.

¹³Chënga imojenjnaná Pedro y Juan tša añémoca ibojtsóyebuambnana tmojáninÿe ora, y chata tempo nduatsjínÿenata y librëša nduabuatmata bëtsemnana tmojántatšëmbona ora. Chca chë mándayënga tmojántatšëmbona chata Jesúsëftaca bayté ibojamnama. ¹⁴Y entšanga imojtsonÿaye chë tmojanshná cha chentšë chátaftaca yojtsemnama; chë causa, chënga ndocá más tmonjanobená chatbe contra jatichámuana. ¹⁵As chora tmojanamëndá chentšana chábuaisebocnama y chentšë tmojanoquedangna chë soyama imojtsenatsëtsnaye. ¹⁶Chënga imojtsentjanaye: “¿Ndayá chátaftaca mochjama ca? Jerusalenentšë oyenënga montsetátšëmbo chata chë bëts soye Bëngbe Bëtsabe obenánaca tbojamama; chë causa, bënga ndoñe quemuátobena jayanana chata chca ndoñe tbonjama ca. ¹⁷Pero entšanga chama ndoñe más chamondëtsencuéntamna, chata mochjáuyana: ‘Ndoñe más entšangbeñe Jesús šmattsebáyana; y ndoñe chašmonjoudenëse, jabuache castigo šochántsebomna ca.’”

¹⁸As chë mándayënga cachiñe chata tmojánachembo y tmojanamëndá ndoñe más Jesús jtsebáyanana, ni chabiamá entšangbeñe jtsabuátambayana. ¹⁹Pero Pedro y Juan tbojánayana: “¿Ntšamo tšëngaftanga šmatjayana ntšamo fchanjayanama ca? Ndegombre,

Bèngbe Bètsabe bominiñe ndoñe tšabá quenátsmèna tšèngaftangbioye añe joyaunayana y chábioye ndoñe. ²⁰ Er bènga queftsátobena jtsajbanana oyebuambnayana chë tiffinje y tifjouena soyèngama ca.”

²¹ Chë mandayèngna chátbioye tojtsanautatjá, pero chentšana tmojtan-abáshejuana. Njetsca entsanga Bèngbe Bètsá imojtsatschuanaye ntšamo tojanopasama; chíyeca, chë mándayènga ndoñe tmonjanobená tondaye ntjinjeyana ntšamo chata jácastigama. ²² Chë boyabása, ndáftaca chata chë bèts soye Bèngbe Bètsabe obenánaca tbojanma, inabomna canta bnétsana uatama más.

**Jesucristbeñe ošbuáchiyènga
Bèngbe Bètsá tmojanimpadá
más añemo chauatšatama**

²³ Pedro y Juan ya tmojtan-abáshejuana ora, tbojánata chë inje ošbuáchiyèngaftaca jateninjenama y lempe ntšamo chë bachnangbe améndayènga y bètsèjemèngcá mándayènga chátbioye tmojanéyancá, chéngbioye tmojanacuntá. ²⁴ Chènga chca tmojanuentšana, njetscanga cánjiñe tmojanontsé Bèngbe Bètsáftaca mèntšá jencuéntama: “Bèngbe Utabná, aca chë nda tojama celoca, fshantse, njetsca béjayènga y lempe ntšamo chenache yomncá, ²⁵ chë Uámana Espíritbiajana tcojánayana y acbe oservená David, ntšamo tcojanayancá tojanábema, mèntšá:

¿Ndáyeca entsanga yapa imojtsetsátjaye ca?

¿Ndáyeca imojtsejuabná nye bonamentiama soyènga jamana?

²⁶ Quem luarentša reyènga y améndayènga imoprontánènga,

njetscanga tmojenoyeuná Bèngbe Bètsá y chabe Uámana Uabuayaná chë Cristbe contra jtsemnama ca —cha tojanábema.

²⁷ “Ndegombre chca tonjopasá. Rey Herodes y Poncio Pilato, quem bèts pueblentse, ndoñe judièngaftaca y israeliténgaftaca tmonjánenefjna, jenóyeunayama ntšamo jamana, Jesús chë acbe uámana oservená y chë Uámana Uabuayaná tcojabemábioye jóbama. ²⁸ Tempo, Bèngbe Bètsá, acbe obenánaca y ntšamo icnabošcá tcojanmandá ntšamo mora chaotsemnama, y chènga chca Jesúseftaca tmonjama. ²⁹ Morna Bèngbe Bètsá, mouena ntšamo chènga montsichamo, bènga jasúfriama cašojtsamna ca; chcasna, cochjama bènga fchayobená Jesusbe tšabe noticiènga bèts añémoca entsángbeñe jtsóyebuambnayama, ³⁰ y cochjama acbe obenánaca šoquènga tšabá chamotsatsmènama y cochjama bènga fchayobená bèts soyènga jamama, Jesús chë uámana oservenabe obenánaca y cha jótšèmbonèse ca” —chènga tmojánayana.

³¹ Bèngbe Bètsáftaca jencuéntama tmojanpochocá orna, chë tmojánenefjntse tojanangmèmana; y njetscangbe ainaniñe chë Uámana Espiritu tojanontsé más jtsemándayana, y chènga tmojanontsé más añémoca Bèngbe Bètsabe soyèngama entsanga jábuayenama.

**Njetsca bomna soyènga
njetscangbiama yojtsemna**

³² Jesucristbeñe ošbuáchiyènga, njetscanga canje juabna imojtsebomna y ainaniñe cach canje ebionana. Ndocná ntjatichamuana chabe soyènga nye chabiama yojtsemna ca, pero añe imojtsichamo, “atše sèndbomna soyènga njetscangbiama entsemna ca”.

³³ Chë Jesusbe ichmónèngna puerte obenánaca mèntšá imojtsichamo: “Fsènjinye y fsèntsetatšèmbó Bèngbe Utabná Jesús obanènguentšana tojtayenama ca.” Y Bèngbe Bètsá

yojtsama chë ichmónënga bëtsca tšabe bendicionënga chamotsebomnama. ³⁴Jesucristbeñe ošbuachiyëngbeñe ndocná yonjamna ndayánaca uajabotá, er nyëtscanga fshantse o yebna bomnënga imoanamana jtsatobuíyana, y chë crocénana ³⁵chë ichmónëngbiöye jayentšbuáchiyana, ntšamo tojtsë-jabotcá nyëtscanga jujátayama. ³⁶Chca tojanma canya Bëngbe Bëtsabe bëts yebnocá trabajayá, José ca uabainá; cha chë ichmónënga imoanábobuatma Bernabé ca (y chca iuayana “Añemuayá ca”). Bernabé yojamna Chipre luarocá. ³⁷Chana, fshantse yojtsatobuiye, y chë crocénana Jesusbe ichmónëngbiöye yojáyentšbuachiye, chë uajabótëngbiamá chaoservema.

Ntšamo Ananías y Safíraftaca tojanopasá

5 Inamna canye bacó, Ananías ca uabainá, y chabe shemna, Safira ca. Chatna canye fshantse tojáníye. ²Ananías y Safirna tojanenóyeunata; chcasna, batšá crocénana cachatbiamá tojanobuajó y chë tojanójama crocénana ichmónëngbiöye Ananías tojanamba, pero tojanéyana chana canjamna nyëts crocénana ntsachetšá chë fshantsama tojanosháchiñe ca. ³As Pedro tojaniyana: “Ananías, ¿ndáyeca tcojalesenciá Satanás acbe ainaniñe bacna juabnënga chacmócochënguama, Uámána Espíritu chë crocénánama jabuambayama ca? Acna chë fshantsama tcmojtabuená crocénánentšana cach acbiamá batšá tcontábojama. ⁴Cabá ntsatobuiye ora, chë fshantse ácbeshe endánmëna y tcojtsatobuíyentšana chë crocénana acbiana y chánaca condánobena ntšamo tcojtsebošcá jamama. ¿Ndáyeca acbe ainaniñe tcojajuabó chë crocénánama chca jobostérama? Chca jamëse, ndoñe nyë entšángbiöye quecatabuambná,

sinó Bëngbe Bëtsánaca ca” —Pedro tojaniyana.

⁵Ananías chë palabrënga tojanuena ora, obaná tojánshajaye. Y nyëtscanga chama tmojántatšëmbonënga corente imojtsauatja. ⁶Chentšana, básefta bobontsënga tmojánashjajna y Ananíasbe cuerpo entšëjuaca tmojanandmaná y jauábontsama tmojanamba.

⁷Mo unga horëntscose, Ananíasbe shema Safira tojánashjango, pero ndoñe yontsetátšëmbo ntšamo chabe boyáf-taca tojanopasama. ⁸Chora Pedro tojantjá: —Ndegombre šmëyana, ¿chë š-monjayana nyëtsnama chë fshantse šmojiye ca?

As chë shema tojanjuá: —Añe, nyëtsnama fsëñjiye ca.

⁹Pedro tojaniyana: —¿Ndáyeca tsëndata šojenoyeuná Bëngbe Utabnabe Espíritu jabuambayama, y cabá castigo jtsebomnama ndoñe šontsobatmana ca? Acbe boyá jauábontsama tmonjuambënga muentšë bësocá montsemna y mora ácnaca cmochanjuamba ca.

¹⁰Cachora Safira Pédrëbe shecuatšentšë obaná tojánshajaye. Chë bobontsënga tmojtanamáshjna ora, obaná Safira tmojáninýena; asna, chentšana tmojanamba y cachabe boyabe juachaca tmojanatbontsá. ¹¹Y nyëtsca Jesucristbeñe ošbuáchiyënga chentšë imojtsemnënga y nyëtscanga chë soye tmojántatšëmbonënga, corente imojtsauatja.

Ba bëts soyënga chë ichmónënga tmojanma, Bëngbe Bëtsabe obenana jinýanýiyama

¹²Chë Jesucristbe ichmónëngaftaca ba bëts soyënga entšángbeñe yojtsebinýna Bëngbe Bëtsabe obenana jinýanýiyama; y nyëtsca Jesucristbeñe ošbuáchiyënga imoanamana Bëngbe Bëtsabe bëts yebnocá jénefnana,

Salomonbe Amashjuana otsbojebnentše.
¹³ Chë ínÿenga, chë Jesucristbeñe
 ndošbuáchiyënga, imojtsauatja
 Jesucristbeñe ošbuáchiyëngaftaca
 jtsenutana; pero entsangna
 chë ošbuáchiyëngbiama tšabá
 imojtsencuéntaye. ¹⁴ Bëngbe
 Utabnábeñe ošbuáchiyënga más
 imojtsóbotena, bëtscá boyabásenga y
 shembásengnaca. ¹⁵ Tša bëts soyënga
 chë ichmónëngaftaca yojtsebinÿna;
 chíyeca entsanga imojanamana
 jutsnëshangañe y tjuashënguñe
 tsáshenoye šoquënga jubuacnana,
 chca, Pedro chëjana tojtsachnëjuana
 ora, nÿe mo chabe sómbrenaca
 chëngbe cuerpëjana chaochnënguama,
 shnánënga jtsatsmënana. ¹⁶ Jerusalén
 chábuañe pueblënguentsana ba
 entsanga imojanamana jabana, y
 šoquënga y bacna bayëjbe juabna
 uambayënga imojtsëyabó; y nyetscanga
 shnánënga imojtsatsmëna.

**Bëngbe Bëtsá tojanma Pedro y chë
 inÿe ichmónënga cárcelocana
 natjëmbana chámuaisebocnama**

¹⁷ Chë ichmónënga tša tšabá
 imojtsamama, chë judío bachnangbe
 más uámana amëndayá y chabe
 ústonënga, chë saduceunga, puerta
 envidia imojtsebomna. ¹⁸ As chë
 ichmónëngbioye tmojánishëche y chë
 bëts pueblentsá cárceloye tojtsanëtame.
¹⁹ Pero ibetna, Bëngbe Utabná canÿe
 ángel tbojanichmó y chë utámenentsá
 bëšašangá cha tojánatëfjo, chënga
 tojtanebuacna y mëntsá tojanéyana:
²⁰ “Motsajna, Bëngbe Bëtsabe bëts
 yebnentše šmochjámashjna, y entsanga
 šmochjabuayená ntšamo cuanjama chë
 nyetsca tescama yomna tšabe vida
 jtsebomnama, Jesucristoftaca canÿiñe
 mo canÿacá jtsemnëse ca.” ²¹ Ntšamo
 tmojanuencá, yëfsana cabá cachëse

Bëngbe Bëtsabe bëts yebnoye tmojána y
 tmojanontsé entsanga jabuátambana.

Chëntscuana, chë bachnangbe
 más uámana amëndayá y chabe
 ústonënga, chë Israeloca bëtsëjemëngcá
 mándayënga y inÿe chentšá
 amëndayënga tmojánachemo
 jénefnama y jenóyeunayama; as chora
 chënga tmojanmandá chë utámenocana
 chë ichmónënga jobiatšama. ²² Pero
 chë soldadënga chë utámenoye
 tmojánashajna ora, chënga chentše
 ndoñe tmonjánanÿena. Chcasna,
 chënga tmojtaná chë mándayënga chca
 jaúnayama. ²³ Y tmojánayana: “Chë
 utámenoca fsënjínÿena lempe tšabá
 endëtsëtameñe y soldadëngna nyetsca
 bëšašangá monduabojanÿanga; pero
 fsënjatëfjo y tsoye fsënjámashjna orna
 ndocná chibiátinÿena ca.”

²⁴ Chë bachnangbe amëndayënga y
 chë Bëngbe Bëtsabe bëts yebnentša
 soldadëngbe amëndayá chca
 tmojanuena ora, yojtsëtëmnana y
 imojtsentjanaye ndayá chentšana
 yochjanopásama. ²⁵ Chorna, chënga
 imojtsemnentše canÿe boyabása
 tojánashjango y mëntsá tojanéyana:
 “Chë šmojutámiënga mora Bëngbe
 Bëtsabe bëts yebnoca montsemna,
 entsanga montsabuatambá ca.”

²⁶ Chë soldadëngbe amëndayá
 tojána soldadëngaca, chë Jesusbe
 ichmónënga junatsama; pero nÿe
 tšabá tmojanënatse, er chënga
 entsangbiama imojtsauatja, nderado
 cachëngbioye ndëtsbéngaca
 muantsëbaye.

²⁷ Chëngbioca
 tmojanéshejajna ora, mandayëngbioye
 tmojanënatse; chora chë bachnangbe
 más uámana amëndayá mëntsá
 tojanéyana: ²⁸—Bënga jabuachana
 tcbontsëuyaná y tcbonjáuyana ndoñe
 šmontselesenciana jtsóyebuambnayama
 chë boyabása Jesús tojánayana
 yojtsemna jabuátambama soyëngama

ca. Masque chcasna, mora tšengaftanga nyetsca chë Jerusalemntša oyenënga chabe soyëngama šmojtsabuatambá y šmojtseboše, cha tojanóbanama castigo bëngbeñe chaotsemnama ca.

²⁹ Chorna, Pedro y chë inyë ichmónënga tmojánayana: —Bënga šontsamna natsana Bëngbe Bëtsá joyeunayana y chentšana entšangbioye.

³⁰ Chë Taitá, nda bëngbe bëts taitanga monjánadorana, cha tojama Jesús cháuatayenama, chë nda tšengaftanga šmonjanóba canyë cruciñe juajabonjëse.

³¹ Bëngbe Bëtsá tbontatsbaná y chabe catsbioica tbojëtstbema, jtsamëndayama, y tbojábema entšangbe Unachayá y Atsebacyá, chca, Israeloca entšanga ngménaca chamuenójuaboma bacna soyënga imojtsamama y chca amana chamotsajbanama, y chëngbe bacna soyëngama perdonánënga chamotsemnama. ³² Bënga fséntsichamo ndayá bënga ndegombre tifjinjë Bëngbe Bëtsá chca jtsamana ca; chë Uámana Espíritnaca chë soyëngama endbëtsoyebuambnaye. Bëngbe Bëtsá endbëtsama chë Uámana Espíritu cháuamashëngo chë tmojtseyeunanëngbe ainaniñe jtsemándayama ca —chënga tmojánayana.

³³ Chë mándayënga chca tmojanuena ora, puerte tmojanotjayaná y tmojánbošena chë ichmónënga jtsébáyama.

³⁴ Pero chë mándayënguentše yojtsemna canyë fariseo, Gamaliel ca uabainá. Chana canyë ley abuatambayá inamna y entšanga puerte innarrespetana. As cha tojantsá y tojanmandá chë ichmónënga ratotema chentšana jubuacnama.

³⁵ Chentšana chë inyë mándayënga tojanéyana: “Israeloca taitanga, puerte cuedado šmochtsebmoma ntšamo quem boyabásengaftaca šmochjamama.

³⁶ Quem soyama šmochjenójuaboje: Ndoñe bayté quenátsmëna, Teudas tonjánbocna y cha enjánichamo canyë

uámana entšá canjamna ca, y mo canta patse entšanga cha tmojanasto. Pero chora inyënga cha tmontsanóba y chabe ústonënga tmontsanáshana, y chca lempe tontsanopochocá.

³⁷ Chentšana, chë entšanga jenábemama enjamna ora, Judas chë Galileocá tonjánbocna y tonjanma báseftanga cha chamuastama; pero chánaca inyënga tmontsanóba y nyetsca chabe ústonënga tmontsanáshana.

³⁸ Chíyeca atše cbéyana, quem boyabásenga matabáshejuana y ndocá mataborlánana. Ntšamo chënga montsamancá, nyë entšangbe juabna y nyë chëngbe trabajo tojtsemnëse, betesco echanjopochocá.

³⁹ Pero chca Bëngbe Bëtsabe soye tomnëse, tšengaftanga ndoñe quešmochatobenaye jáyëjanama. Cuedado šmochtsebmoma, nderado mo Bëngbe Bëtsabe uayayënga šmuatjanenobiama ca” —cha tojanéyana.

Y as chënga Gamaliel tmojanoyeuná.

⁴⁰ Chcasna, chë ichmónëngbioye tmojánachembo, tmojtsanachebuánganja y tmojanéyana Jesusbe uabáinaca entšangbeñe ndoñe chamondëtsoyebuambná ca; y chentšana tmojtanabáshejuana.

⁴¹ Chora chë ichmónënga chë amëndayëngbentšana puerte oyejuayënga tmojésanbocna, er Bëngbe Bëtsá tojanalesenciá jasúfriama, chënga Jesusbiamma oservënënga bëtsemnayeca. ⁴² Chentšana, chënga cada te imojanabuatambá y Jesús, chë Uámana Uabuayaná, chë Cristo bëtsemnama entšangbioye imojanabuayiyiná, Bëngbe Bëtsabe bëts yebnentše y yebnënguenáchnaca.

Chë ichmónëngbiamma ujabuáchanënga tmojanëbuáyana

6 Chë tempo, Jesucristbeñe ošbuáchiyënga betesco imojt-sóbotena. Chora chë Jesucristbeñe

oşbuachiyéngbentşe, chë judiënga griego biyanga batśá imojtsetsátjaye y chë judiënga hebreo biyangbiana mëntśá tmojanayana: “Chë griego biyangbe viudángbioye ndoñe cachcá quemnatëjabuáchana ntśamo chë hebreo biyangbe viudángbioye cada te montsëjabuachancá ca.”

²Asna, chë bnëšana uta ichmónënga nyetsca chë Jesucristbeñe oşbuáchiyënga tmojanëbuaja y tmojanéyana: “Ndoñe tśabá quenátsmëna, bënga jtsajbanana Bëngbe Bëtsabe palabra oyebuambnayana nÿe chë viudanga jtsanÿenama chë tojtsëjamoto soyënguine. ³Chcasna, baconga y batanga, tşëngaftanguentsana canÿsëftanga mëbuáyana, tśabá mandbomnëngcá şmëbuátmënga, chamotsemna osertánënga y chë Uámana Espiritu chëngbe ainaniñe chaotsemánda, as chënga chë ujabótënga jtsëjabuáchanama trabajo fchanjábanÿiye. ⁴Y bëngna şontsamna nÿets tempo Bëngbe Bëtsáftaca jtsencuëntayana y Bëngbe Bëtsabe palabra entsanga jtsabuayiynayana ca” —chënga tmojanayana.

⁵Nÿetscanga tojanogusetá ntśamo chë ichmónënga tmojanayancá; as, Esteban tmojanábuayana; canÿe boyabása puerte oşbuachiyá cha inamna y chë Uámana Espiritu chabe ainaniñe yojanmánda. Chentšana tmojanëbuáyana Felipe, Prócoro, Nicanor, Timón, Parmenas y Nicolás (cha inamna ndoñe judío entsá, Antioquía bëts pueblócá, y cha yojanamana Bëngbe Bëtsá jtsadoránana mo cach judiëngcá). ⁶Chentšana chënga tmojanënatse Jesucristbe ichmónënga imojtsemnoye; chocna, chë Jesusbe ichmónënga Bëngbe Bëtsá tmojanimpadá chë ichmónëngbe trabajënguine chë ubuáyanënga

chaújabuachama, chëngbe cucuatşënga chëngbe bestśaentşe jajájuase.

⁷Más banga Bëngbe Bëtsabe palabra imojtsuenana, y chca, Jesucristbeñe oşbuáchiyënga más imojtsóbotena, y Jerusalemëntşe más oşbuáchiyënga betscó imojtsóbotena. Y ba judiëngbe bachnángnaca tmojanontşé Jesucristbeñe jtsóşbuáchiyana, ntśamo chë ínÿenga imojtsanoşbuachecá.

Esteban tmojanishache

⁸Esteban, Bëngbe Bëtsabe obenana y chábentšana tśabe bendicionënga yojtsebomnëse, entsángbeñe bëts soyënga yojtsama. ⁹Báseftanga “Ya Cachcá Atabashejuana Oservénënga ca” uabainëngna tmojanontşé Estébanoftaca enatsëtsnayana. Chënga imojamna judiënga Cirenoquënga, Alejandroquënga, Cilicia y Asioquëgnaca, y chëngbe enefjuana luare yojanabaina “Ya Cachcá Atabashejuana Oservëngbe Yebna ca”. ¹⁰Pero chë Uámana Espiritu tojanma Esteban chaóyebuambama bëtscá osertanacá, y chíyeca chënga ndoñe imontsobena ntśamo cha jojuana. ¹¹As chënga báseftanga tmojanëbuénaye Estébanbe contra podesca soye chamuayanama, mëntśá: “Cha fsënjoyeuná Moisesbiana y Bëngbe Bëtsabiama ndoñe tśabá jtsóye-buambnayana, mo cuafjoyanguangcá ca.” ¹²Chcase chënga tmojanma entsanga, bëtsëjemëngcá mándayënga y ley abuátambayënga Estébanbe contra chamóntşa enbouenanana; y as, Esteban tmojanotbá y chë mándayënga imojtsemnoye imojúichëmo. ¹³Y tmojanënatse básefta entsanga, uayátsenaye soyënga y podesca soyënga Estébanbe contra chamuayanama; as chënga mëntśá tmojanayana: “Mua bacna soyënga entsichamo chë Bëngbe Bëtsá jtsadoránama bëts

yebnama y Moisesbe leyëngama. ¹⁴Y fsënjoyeuná cha jayanana, Jesús Nazaretocá Bëngbe Bëtsabe bëts yebna caochtsepochoa y caochjama bënga nÿe chabe mandëngaca mandánënga chamotsiyenama y ndoñe ntšamo Moisés bëngbe bëts taitanga tojëftsananuatambacá ca.”

¹⁵Chë mándayënga y nÿetscanga chentšë imojëtsetbiamanënga Esteban tmojanonÿinÿé ora, tmojáninÿe chabe jubíá yojtsebuashinÿinÿana mo canÿe ángelbe jubiacá.

Ntšamo Esteban tojanenëuyaná

7 Chora chë bachnangbe más uámana amëndayá, Estëbanbioye tbojantjá: —¿Ntšamo acbiana montsichamcá ndegombre yojtsemna ca?

²As Esteban tojanëjua: —Taitanga y baconga, mouenënga. Bëngbe Bëtsá, chë corente uamaná endmëná, Abrahámbioye tbojánëbëbocna, cha Mesopotamioca yojaniyena ora; tbojánëbëbocna, Harán bëts puebloca joyënanama cabá nda ora, ³y Bëngbe Bëtsá tbojaniyana: “Metseboshjona acbe fshantse y acbe pamíllanga y cbochanjinÿinÿiye luaroye cochjá ca.”

⁴As Abraham chabe luare Caldea tojëftsanboshjona y tojána Haránoca joyënanama. Chabe taitá tojanóbantšana, Bëngbe Bëtsá Abrahámbioye chë luaroye tbojanánatse, chë mora tšëngaftanga šmontsiyentšë. ⁵Pero quem luaríne ni mo base fshantse ndoñe tbonjëftsanatšëta, ni mo ndayentšë jtsiyenama. Pero aíne Abrahámbioye tbojanšbuachená chë fshantse jatšëtayama, chabíama y chabe básëngbiamá, Abraham tojóbanentšana. Chca tbojanšbuachená ora, Abraham ni canÿe šëšona bonjánbomna. ⁶Y Bëngbe Bëtsá mëntšá tbojaniyana: “Chë ácbentšana entšanga, inÿëngbe luaroca áshjajnënga

mochántsemna, y choca oyenënga chëngbe oservënënga chëngbioye mochanjábiama y canta patse uatëntscuana jabuache mochanjasufrina ca.” ⁷Y mëntšánaca tbojaniyana: “Pero atšë chanjácastigaye chca oservënënga chacmojábiama luarentša entšanga; y as, chentšana chë ácbentšana entšanga mochanjësebocana y mora bontsemna luaroye mochanjésabo y muentšë atšë šmochántšadorana ca.” ⁸Bëngbe Bëtsá Abrahámbioye tbojanšbuachená nÿe cha y chabe básëngbe Taitá cha jtsemnama y jamama tšabe bendicionënga chëngbeñe chaotsemnama, y chama, chaotsinÿnamna tbojanmandá chabe šëšona, boyabásetema tojonÿná ora, base bobachtema chë más delicadentšë jatëtšana. Chíyeca, chabe uaquiñá Isaac tojanonÿná ora, posufta tianoye Abraham base bobachtema chë más delicadentšë tbojantëtšë. Isaac cachcá tojanma chabe uaquiñá Jacóboftaca y Jacob cachcá tojanma chë chabe bnëtsana uta uaquiñëngaftaca. Chënga monjamna chë Israéloca bnëtsana uta bëts pamíllangbe taitanga.

⁹“Quem uaquiñënga bëngbe bëts taitanga monjamna. Chëngna, chëngbe uabentsá Josëbioye envidia imnabomna y tmojtsatanobuiye, Egiptoye canÿe oservenacá chamotsánatseñama. Pero Bëngbe Bëtsá Josëbioye nÿets tempo ibnauájabuachana, ¹⁰chíyeca nÿetsca chabe ngmenënguentsana tbojanatsbocá y Bëngbe Bëtsá tojanma cha chaotsetatšëmbuama tšabá jóyëbuambayama chë Egiptoca réybentšë, Faraón ca uabainá. Bëngbe Bëtsá tojanma chë Faraón chaoyëjuá ntšamo José yojamnama; chíyeca Faraón Josëbioye tbojánbema Egiptoca mandado y chabe yebnënguentšë oyenëngbiámnaca.

¹¹“Chë tempo, Egiptó y Canaán luariñe bëts shëntsana tojanóshjango y puerte ngménana yojtsemna y bëngbe bëts taitanga ndoñe imontsobena saná jónyënama. ¹²Pero Jacob tojántatsëmbona Egiptoca saná yojtsemnama; asna, chabe uaqiñënga, chë bëngbe bëts taitanga choye tojanichamó. Chora yojamna chë natsanama chënga Egiptoye jama. ¹³Uta soyama chënga tmojtësaná ora, José chabe catsátanga tojanéyana: ‘Atse José sëndmëna, tsëngaftangbe uabentsá ca.’ Chca chë Faraón Josebe pamíllangbiana tojántatsëmbona. ¹⁴Chentsana, José tojanmandá chabe taitá Jacob y nyetsca pamíllanga Egiptoye chamotsama. Canyësëfta bnëtsana shachnënga imojamna chë Egiptoye tmojánanga. ¹⁵Chcasna, Jacob Egiptoye tojána choca joyéanama. Choca cha tojanóbana y chë inyë bëngbe bëts taitángnaca. ¹⁶Jacob y chabe básenga, ntšamo imojtsobancá, chëngbe cuerpo Siquem bëts puebløye imojtsatambaye y tmojanëtebuantsá, Abraham tojëftsanbuamé cuevëshënguinië. Abraham canyë crocenánama Hamorbe uaqiñëngbiøye, chëshënga yojtëyentsbuamiñe Siquem puebløca.

¹⁷“Ntšamo Bëngbe Bëtsá Abrahámbyøye tbojanšbuachenacá jamama yojtsobeco ora, Egiptoca corente tmojanoboté Israeløca entsanga y banga chënga imojtsemna. ¹⁸Cabana, Egiptoca inyë rey tojanøjayé y cha Josébyøye ndoñe tbonjanabuátmana. ¹⁹Chë reyna, bëngbe entsanga, chë bëngbe bëts taitángbyøye tojanaingñe y tojanma chënga puerte chamosufrima; tojanamëndá, chë tmojtsónyña šëšonatémënga cachcá jtsënyayana chamotsóbanama. ²⁰Chë tempo canyë básetema tojanonýná y cha Moisés ca tmojanabayë. Bëngbe Bëtsá Moisésbiana oyejuayá yojtsemna

y chabe bëtsëtsata cach yebnentšë tmojanboché unga ishinjëntscuana. ²¹Cachcá jonýayama yojtsamna orna, Faraonbe bembe tbojanocñe y mo cachabe uaqiñá cuenta tbojanboché. ²²Chca, chë Egiptoquënga imnatátšëmbo soyënga Moisés tmojanbuatëmbá y canyë uámana entsá tojánboçna jøyebuambayama y ndayánaca jamama.

²³“Canta bnëtsana uata tojánashjache ora, tojanenøjuabó jama jtsëtatšëmbuama ntšamo chë Israeløquënga, chabe entsanga imojtsemnama. ²⁴Canyë, Moisés tojáninyë canyë Egiptocá canyë Israeløcábbyøye ibojtsejantšetaye ora; as Moisés tbojanoboguiyaná y chë Egiptocábbyøye tbojtsanóba. ²⁵Moisés yojtsanjuabnaye chë Israeløquënga yojtsósertana, Bëngbe Bëtsá yochjanma cach Moisesbe obenánaca chë Egiptoca mandentsana chëngbyøye játsebacama ca. Pero chë Israeløquënga ndoñe yontšësertana. ²⁶Yëfsana, Moisés tojánanyëna útata, cach Israeløcata, ibojtsentsjanaye; chora cha betscø tojána jetsëuyayama y tojanéyana: ‘Tsëndata catsáta šøndmëna, ¿ndáyeca šojtsentsjanata ca?’ ²⁷As, chë ínbyabyøye ibojtsentsjanayá Moisésbyøye tbojtsanajuatsëntšë y tbojanianyana: ‘¿Nda bëngbeñe tcmënjajayé mandado y chë tšabá o ndoñe tšabá ftsamama chacuayanama ca? ²⁸¿Cojtsebošë átšnaca jóbama, ntšamo tonjopasá yëfse chë Egiptocábbyøye tconjobacá ca?’ ²⁹Moisés chca tojanuena ora, Madián luaroye tojtsanachá y choca yøjoyena inyë luarocana ashjangonacá. Chentšë uta uaqiñata yojjëftsabamna. ³⁰“Chentsana canta bnëtsana uatëse, entsanga ndoyena luariñe, Sinaí tjañe béconana, canyë ángel tbojánëbëboçna zarzësha yojtsángbototjuanentšë. ³¹Moisés yojenjananá ndayá yojtsonýyama y tšabá

jinÿyama tojanobeconá ora, tojanuena Bëngbe Bëtsá mëntšá iboÿtsatsëtsnaye: ³²‘Atše acbe bëts taitangbe Bëtsá sëndmëna, Abraham, Isaac y Jacobëbe Bëtsá ca.’ Moisés chama tojanëuatjaná, iboÿtsengmëmnyaye y añemo ndoñe yontsebmna choye jontješiyama. ³³As Bëngbe Utabná tbojaniyana: ‘Motsenóshecbotsca, er aca contsemntëse nÿe atšbiana luare endmëna, er átšnaca chentšë séntsemna. ³⁴Ndegombre sënjinÿe ntšamo atšbe entšanga Egiptoca montsesufrina y sënjouena chëngbe oyabouyana, y atše sënjabo chënga jabátsebacama. Chcasna, mabouena, Egiptoye cbochanjíchmuca ca’ —Bëngbe Bëtsá tbojaniyana.”

³⁵Chentšana Esteban tojanéyana: “Quem Moisés entšanga tmoÿtsanaboté y tmojaniyana: ‘¿Nda bëngbeñe tcmënjajayé mandado y chë tšabá o ndoñe tšabá fstsamama chacuayanama ca?’ Masque chca, Bëngbe Bëtsá mo mandayacá y atsebacayacá tbojesanichmó, chë zarzëshentšë tojanobinÿná ángeloftaca. ³⁶As Moisés, bëngbe bëts taitanga Egiptocana tojésanébuacna y bëts soyënga tojanma, y inÿe soyënga Bëngbe Bëtsabe obenana jinÿanÿiyama Egiptentšë, chë Buángana ca uabaina mar béjayentšë y entšanga ndoyena luarentšë, canta bnëtsana uatëntscuana. ³⁷Cach Moisés Israeloca entšanga mëntšá tojanéyana: ‘Bëngbe Bëtsá tšëngaftanguentšana canÿa bochanjábema atšcá Bëngbe Bëtsabe juabna oyebuambnayá ca.’ ³⁸Moisés Israeloca entšángaftaca yojéftsemna chë entšanga ndoyena luaroca. Choca chë entšanga tmojánenefjna Siná tjañe béconana. Chentšna canÿe ángel Moisésoftaca tojanoyebuambá, bëngbe bëts taitángbioye chë buayenana soye Moisés chaoyebuambama, chë entšanga tšabe vida jónÿenama palabrenga; y

Moisés chca tojanma, bëngnaca chë palabrenga jouenama jobenayama.

³⁹“Pero bëngbe bëts taitanga ndoñe tmonjánbošena joyeunayama, masna nÿe tmoÿtsanaboté y Egiptoye jeshšëconama imoÿtsaiseboše.

⁴⁰Moisés cabá chë tja tsjuanoca chë ángeloftaca yojtsemna ora, chëngbe bachnangbe más uámana amëndayá Aarónbioye mëntšá tmojaniyana: ‘Bëngbe Bëtsabe cuenta šmayentšpormá canÿe buashinÿinÿana soye jadórama, bënga chašúnatsama. Er bënga quemátstatšëmbo ndayá yojtsopasana Moisés, chë Egiptocana šonjëftšëbuacnáftaca ca.’ ⁴¹As tmojanma canÿe buashinÿinÿana soye mo canÿe uacnabecá y cha jadórama ba bayënga tmojanëbaye, y tmojanóboyejuanga cachënga chë soye tmojanpormáyeca. ⁴²Chë causa, Bëngbe Bëtsá chëngbentšana tojtsanojuánañe y cachcá tojesanénÿaye chëngbe bacna soyënga causa, estrellatëmënga chamotsadoránama. Chca jochnënguama, Bëngbe Bëtsabe juabna oyebuambayëngbe libréšañe mëntšá endayana, ntšamo Bëngbe Bëtsá tojanayancá:

Israeloca entšanga,

¿Atše jëtschuayama bayënga chešmënjanëbaye y chë soyënga chešmënjanátšëmbona, chë canta bnëtsana uata entšanga ndoyena luarentšë tšëngaftanga šmonjëftsemna ora?

⁴³Atše jadóra cuentna, chë Molocbiana jebna soye šmonjanacutsá y cha šmonjánadorana, y chë Refánbe estréllacnaca cachcá šmonjánama.

Chë soyënga mo Bëngbe Bëtsá cuenta šmonjánbomna y cach tšëngaftanga šmonjanobopormá jadórama.

Mora chë causa atše chanjama, Babilonientšana más chcoye

tšëngaftanga chacmotsénatsama ca” —chiñe endayana.

⁴⁴ “Bëngbe tempasca bëts taitanga entsanga ndoyena luaroca, chë jatsjacama opodena yebna imnabomna; chë yebnentšë Bëngbe Bëtsá chëngaftaca tojanoyebuambá. Inajebna ntšamo Bëngbe Bëtsá Moisésbioye tbojanmandacá, y cha tojanma ntšamo chaojebuama Bëngbe Bëtsá tbojaninýinyecá. ⁴⁵ Bëngbe bëts taitangna chëngbe taitángbentšana chë jatsjacama opodena yebna chëngbiana tmojanóyëngacñe, y chënga chë Canaán luaroye Josuéftaca, chë inýe luaroquëngaftaca jéntsjava tmojána ora, chë jebna soye tmojanamba y chocna, Bëngbe Bëtsábeyeca chentša entsángbioye Israeloquëngbentšana tmojtanebuacna; y chë jebna soyna chë tmojanayëñaná luarentšë tojanoquedá, rey David yojéftsiyenëntscuana. ⁴⁶ David tšabá mandbomná inamna, chíyeca Bëngbe Bëtsá cháftaca puerte yotsóyejuaye. David chábioye lesencia tbojanotjañe jajebuama, Bëngbe Bëtsá chë Jacob tbojanadorá cha, chentšë chaotsiyenama. ⁴⁷ Pero Salomón inamna nda chë Bëngbe Bëtsabe bëts yebna tojanjebuá. ⁴⁸ Masque chë celoca Bëngbe Bëtsá, entsangbe jebna yebniñe ndoñe quenatiyena. Ntšamo Bëngbe Bëtsabe juabna oyebuambnayá tojanabemcá, ndayá Bëngbe Bëtsá tojanayancá:

⁴⁹ ‘Celoca endmëna chë luare ndayentšana atšë tsmánda, y quem luare endmëna nýe mo canýe tšënetemcá ndayentšë atšbe shecu-atšënga chjacjaye.

As, ¿ntšamo atšbiana jebna yebna šmochjajebo ca?’ —chë Utabná jayanana—;

‘o ¿ndaye yebnentšë atšë jóchnama chjobenaye,

⁵⁰ ndegombre cach atšë nýetsca chë soyënga tijamëse ca?’”

⁵¹ Esteban mëntsánaca tojanéyana: “Tšëngaftanga nýets tempo josértama ndëbošënga šmondmëna; šmondbomna ainana mo chë Bëngbe Bëtsábeñe ndošbuáchiyëngbe ainancá, y Bëngbe Bëtsabe soyëngama nduauenanënga šmondmëna. Tšëngaftanga ndocna te quešmátsboše chë Uámana Espiritu joyeunayana. Ntšamo tšëngaftangbe bëts taitanga monjaniyencá, tšëngaftángnaca cachcá. ⁵² ¿Bëngbe Bëtsabe juabna oyebuambnayënguentšana, ndábioye tšëngaftangbe bëts taitanga ndoñe monjanacmena? Chë Bëngbe Bëtsá tojanichamó entsanga chënga tmojtšanëbaye, y mëngna entsángbioye imojanabuayiyiná Cristo, chë ntšamo Bëngbe Bëtsá yobošcá amá yochánabama. Pero morna, uayayëngbe cucuatšine cha šmojábošjona y šmojóba. ⁵³ Bëngbe Bëtsabe mandënga angelëngaftaca tšëngaftanga šmonjanóyëngacñe, pero chë soyënga ndoñe quešmátsyeunana ca” —cha tojanéyana.

Esteban ndëtšbëngaca tmojanóba

⁵⁴ Chentša mándayënga chca tmojanuena ora, Estëbanoftaca tmojanotjyaná y tmojanenaftëšbonzentsé, rábiaca imojtsemnama. ⁵⁵ Pero chë Uámana Espiritu Estëbanbe ainaniñe corente yojtsemándaye. Celoye yojontješiyey y Bëngbe Bëtsabe buashinýinýanana yojinýe, y Jesús, Bëngbe Bëtsabe catšbioica yojtsatsana. ⁵⁶ As, Esteban tojányana: “¡Mouenënga, sëntsonýá celoca entsatëfjna y Bëngbe Bëtsá Entšá tbojanbemá Bëngbe Bëtsabe catšbioica entsemna jtsamëndayama ca!”

⁵⁷ Chora chënga jabuache imojtseyoye, imojtsenamatsachto ndoñe más ntsuenanama y Estëbanbioye tmojanontšënja. ⁵⁸ Chentšana, chënga

chë pueblentsana tmojtsanáocna y ndëtsbéngaca tmojtsanatéchénganja. Chë Estébanbioye mal tmojanquedangna entsayangá tmojtsanenátsejca y canÿe bobontse, Saulo ca uabainá, tmojtsanábonÿiñe chaotsinÿenama.

⁵⁹Ndëtsbéngaca imojtsé-nanantscuana, Esteban Bëngbe Bëtsaftaca ibojtsencuéntaye y mëntsá tojánayana: “Bëngbe Utabná Jesús, atšbe espíritu šmóyëngaca ca.”

⁶⁰Chentšana Esteban to-janoshamentšé y jabuache tojánayana: “¡Bëngbe Utabná, chëngbe bacna soye motsaperdoná ca!” Y chca tojánayana ora, tojanóbana.

8 Saulo chentše yojtsemna y tšabá imojtsama ca yojtsejuabnaye, Esteban tmojanóbama.

Saulo yojánama chë Crístbeñe ošbuáchiyënga chamotsesufrínama

Cach te, inÿenga tmojanontšé Jesucristbeñe ošbuáchiyënga Jerusale-
nentše ucamenana y jtsamana puerta chamotsesufrínama; chcasna, chënga tmojtsanacheta y Samarioye y Judeoye tmojanáshana. Nÿe chë Jesucristbe
²Íchmónënga ndócnoye tmonjánacheta. ²Básefta boyabásenga, Bëngbe Bëtsá adórayëngna, Esteban tmojanamba jauátbontsama y chabiama puerta tmojánenobošachna. ³Chëntsacuana, Saulo yojtsentsëna Jesucristbeñe ošbuáchiyënga jtsapochócama y yebnënguenache yojánamashjuana boyabásenga y shembásenga sjojónana ubuacana jutámia.

Felipe Samaria luaroca tšabe noticiëngama yojanabuayiyná

⁴Y Jesucristbeñe ošbuáchiyënga tmojanáshanëngna nÿetsquénache imojánabuayiynaye Jesusbe tšabe noticiënga. ⁵Chca, Felipe Samarioye tojána y tojanontšé chë Bëngbe Bëtsabe

Uámana Uabuayaná, Cristbiana, chentša entsanga jábuayenama. ⁶Entsanga imojánenefjuana Felipe joyeunayama y tmojáninÿe bëts soyënga cha jtsamana, Bëngbe Bëtsabe obenana jinÿanÿiyama. Chënga nÿetscanga ntšamo Felipe yojtsichamcá tšabá imojtseyeunana. ⁷Banga bayëjbe juabna uambayënga tšabá imojtsatsmëna y chë bacna bayëjënga jabuache jtsaiyoyëse chëngbentsana imojtsaisebocana; y banga jama ndobenënga y coshetënga tšabá imojtsatsmëna. ⁸Chë soyama chë pueblentsa oyenënga corente imojtsóyejuaye.

⁹Pero canÿe pueblentše Samarioca inamna canÿe boyabása, Simón ca uabainá; cha tempo inamna canÿe bocjuaná y chë Samarioca entsanga chabe soyëngama imojánenjnanaye. Cha yojánichamo cha canÿe uámana entšá canjamna ca. ¹⁰Y chábioye corente inmayerunana nÿetscanga, uámanënga y nduámanëngnaca. Entsanga imojánichamo: “Mua entsemna chë Bëngbe Bëtsabe bëts obenana inÿanÿnayá ca.”

¹¹Y ndegombre chënga corente inmayerunana, er cha chë bocjuanana soyëngaca bayté chë entsanga ingñëngna y ojnanánënga yojtsabamna. ¹²Pero chë luarentša entsangna, Felipe tmojanoyeuná chë cha yojtsëtsësná tšabe noticiënga Bëngbe Bëtsabe amëndayama y chë Jesucristbiana tšabe soyënga. Chorna chënga Jesucristbeñe imojtsošbuáchiye, y boyabásenga y shembásenga tmojánenabayë. ¹³Y cach Simónëncaca Jesucristbeñe yojtsošbuáchiye y tojanenábaye, y chentšana cada te Felípeftaca cha yojtsanmëna. Cha tojáninÿe Felipe chë bëts soyënga Bëngbe Bëtsabe obenánaca jamana, y chama ojnananá yojtsemna.

¹⁴Chë Jerusalenoca imojtsemna ichmónënga tmojánatšëmbona Samarioca entsanga Bëngbe Bëtsabe palabra tmojanóyeunama; as, chora Pedro y Juan choye tmojanichamó. ¹⁵Pedro y Juan Samarioye tbojánashjango ora, chentšë Jesucristbeñe ošbuáchiyëngbiana Bëngbe Bëtsá tmojanimpadá, as chë Uámana Espíritu chëngbeñe cháumashënguama jtsemándayama. ¹⁶Er cabá ni mo cánýabeñe chë Uámana Espíritu tonjánamashëngo; chënga tmojánenabaye Bëngbe Utabná Jesús jótšëmbonëse, chábeñe ošbuáchiyënga jtsemnama imojtsebóseyeca. ¹⁷As Pedro y Juan chëngbe bestšašëñe cucuatšënga tbojancjá, y chca, chë Uámana Espíritu tojánamashëngo chëngbe ainaniñe jtsemándayama.

¹⁸Simón tojáninýe, chë ichmónënga entsángbeñe cucuatšënga tmojacjá ora, chë Uámana Espíritu chëngbeñe jamashënguana. As chora Simón chë ichmónënga tojanéyana: —Quem crocé-nana mosháchiñe, ¹⁹y átšnaca chë obenana šmatšetá, y ndábeñnaca cucuatšënga chajajajó ora, chábeñnaca chë Uámana Espíritu cháumashëngo ca.

²⁰As Pedro tbojaniyana: —¡Acbe crocénana infiernoye chaotsá y ácnaca, chë Bëngbe Bëtsabe tšetana soye crocénanaca jobuámiñama yopodena ca tcojajuabó causa! ²¹Ndegombre, aca béngaftaca ndoñe quecátsmëna, ni bëngbe trabajo acbiana quenátsmëna, Bëngbe Bëtsabe delante acbe ainaniñe tšabe juabñënga ndoñe quecátšbomna causa. ²²Ngmënaca cochjenójuaboye quem bacna soye tcojamama y chca amana cochtsajbaná y Bëngbe Bëtsá cochjaimpáda, aca chca tcojájuaboma nderádose cmatjaperdóna. ²³Atšë séntsetatšëmbo, acbe ainaniñe tša bacna juabñënga ínýëngbiana yojtsemnama;

y bacna soyënga amana jtsajbanama ndoñe quecátobena causa, aca mo canýe ntsacjuanacá contsemna ca —Pedro tbojaniyana.

²⁴As chora Simón tojanéyana: —Bëngbe Utabná atšbiama šochjaimpáda, ntšamo šmonjauyancá ndoñe chandëpasama ca.

²⁵Pedro y Juan, ntšamo Bëngbe Utabná Jesucristbiana tbojaninýcá y ibnatatšëmbcá entsanga imojtsétsësnaye. Chentšana, Jerusalenoye tbojésanata y tbojánachnëngo ba Samarioca pueblënguëjana, tšabe noticiënga entsanga abuayiynaye.

Felipe y chë Etiopía luaroca reinabe uajabuachaná

²⁶Chentšana, Bëngbe Utabnabe canýe ángel Felípbioye tbojaniyana: “Moprontá y tsmána luarëngoye motsa, Jerusalenentšana Gaza ca uabaina bëts puebloye benachëjana ca.” Chë benachna entsanga ndoyena luarëjana yojanachnëngona. ²⁷As Felipe yojëftsëtsbaná y tojána. Benachiñe tbojáneninýena canýa Etiopía luarocáftaca. Etiopía luaroca canýe reiná inamna y chë boyabásana chabe uajabuachaná y chabe crocénana bojanýá inamna. Chana Jerusalenoye tojánabo Bëngbe Bëtsá jadórama. ²⁸Chora Etiopía luaroye yojtsataye, chabe cochéshañe inayésenotbemañe, y chë Bëngbe Bëtsabe juabna oyebuambnayá Isaíasbe uabemana libréša yojtsaiualíaye.

²⁹Chora chë Uámana Espíritu Felípbioye tbojaniyana: “Mobeconá y chë cochésha juachaca cochtsaye ca.” ³⁰As Felipe betesco yojobeconá. Chora yojouena chë Etiopía luarocá, Isaíasbe uabemana libréša yojtsaiualíaye; as tbojantjá: —¿Chë contsalía soye quecmojt-sosertana ca?

³¹ Y chë Etiopía luarocá tbojanjuá: —¿Ntšamo sochjosérta, ndocná šonjabuayenase ca?

Y Felípbioye tbojanianya: —Diosmanda, atšbe cochéshoye máséngo y atšbe juachaca mabótbemaca.

³² Isaíasbe uabemana librésañe mēntšá yojsaláye:

Cha tmojanánatse mo canye oveshá jóbama cuafjuanatscá; y chë mo canye oveshá tmojtsētsbotjná ora, cha iytēca jtsemnana, chánaca cachcá, chacá tondaye chenátanayana.

³³ Entšanga tmonjanma cha puerte chaosufrima, mo cha canye nduamaná cuaftsemncá y ntšamo ndoñe betsomerecencá cháf-taca tmonjanma.

Ndocná nanjobenaye chabe báseng-biama jacuéntana, quem luarentša chabe vida tmontsanbo-juaná causa ca.

³⁴ Chora chë Etiopía luaroca uajabuachaná Felípbioye tbojanianya: —Diosmanda, šmobuayená, ¿ndabiama Bēngbe Bētsabe juabna oyebuambnayá chca yojsichamo, cachabiama o inyabiama ca?

³⁵ As Felipe tojanontšé, chë Isaíasbe librésañe yojsayana sóyeca, Jesusbe tšabe noticiēnga jábuayenama.

³⁶ Chentša bēñese, canye bėjaye obējniñe juachañe ibojsachñejuana. Chora chë uajabuachaná tojánayana: —Muentše bėjaye entsemna. ¿Ndayeca ndoñe nanjopódia atše muentše uabainá jtsemnama ca? Diosmanda, šmabaye ca.

³⁷ As Felipe tbojanianya: —Jesucristbeñe nyets acbe ainánaca tcojtsošbuáchese, añe echanjopódia juabáyama ca.

Y chë boyabása tbojanjuá: —Añe, sēntsošbuaché Jesucristo Bēngbe Bētsabe Uaquiñá yomnama ca.

³⁸ As chë Etiopiocá tojanmandá chë cochésha chauátotonama. Chentšana, nyets útata chë bėjayoye tbojanashēbēbuástjango y Felipe, chë Etiopioica uajabuachanábioye tbojanabaye.

³⁹ Chë bėjayentsana tbojtambocna ora, chë Uámana Espiritu Felipe ibojsánatseñe y chë uajabuachaná ya ndoñe más Felípbioye ibontsonyaye, pero corente oyejuayá yojsatoñe.

⁴⁰ Felipe tojántatšēmbona Azoto bēts pueblaca yojtsemnama, y chentšana tojána nyetsca pueblēnguenache chë tšabe noticiēnga abuayinyaye, Cesarea pueblolye jashjanguētscuana.

Ntšamo Saulo Crístbeñe ošbuachiyá tojanóbema

(Hch 22.6-16; 26.12-18)

9 Saulo chēntscuana cabá Bēngbe Utabnábeñe ošbuáchiyēnga yojanautatjná jtsēbáyama. Chama cha tojána chë bachnangbe más uámana amēndayábioye, ²uabemana tsbuanachangá jauátjañama, as chéchangaca jobenayama chë Damascoca judiēngbe enefjuana yebnēngoye jama, y chocna, chë Jesucristo tojaninñanyé Benache ustoniñe, boyabásenga o shembásenga tojánñenēse, jótabayama y Jerusalenoye junatsama. Y chca jamama tojánbocna. ³Pero ya Damasco béconana yojsaye orna, nye ndeolpe chabe juachañe celocana canye bēts tcuinye tojanbuashinñyēna. ⁴Chora Saulo fshantsoye tojánshajaye y canye oyebuambnayana tojanuena, mēntšá: —Saulo, Saulo, ¿ndáyeca chca šcojtsacmena ca?

⁵As Saulo tbojantjá: —¿Nda comna, Bēngbe Utabná ca?

Y chë oyebuambnayana tbojanjuá: —Atše sēndmēna Jesús y aca condama atšbe entšanga chamotsesufrínama. ⁶Pero matētsbaná y Damascoye mamáshēngo;

chentše canya cmochanjabuayená ndayá jamama cmojtsemnama ca.

⁷Chë Sáuloftaca imojánajna boyabásenga tša auatjanánenga imojtsemna y chíyeca ndoñe imontsobena jóyebuambayana; er nýe chë oyebuambnayana tmojanuena, pero ndocná tmonjáninýe. ⁸As Saulo fshantsentšana tojtantsbaná y tojtanobuchatéfjona ora, tondaye yontsobena jinýana. Chcasna, chë ínýenga tmojëftsanobuacueténtsé y chca, Damascoye tmojanánatse. ⁹Chentše yojéftsemna unga te, jinýama ntsoencá, ni ntjascá y tondaye ntjofsiyá.

¹⁰Damascoca Jesucristbeñe canýe osbuachiyá inoyena, Ananías ca uabainá. Cha Bëngbe Utabnábioye mo otjenayoquécá tbojáninýe y Bëngbe Bëtsá tbojaniana: —Ananías ca.

As cha tbojanjá: —Bëngbe Utabná, ¿ndayá chjama ca?

¹¹Y Bëngbe Utabná tbojaniana: —Moprontá y motsa chë “Ndericho tsáshenañe ca” uabáinoe, y Júdasbe yebnentše cochjanotícia canýe boyabásabiama, Saulo ca uabainábiama, Tarso pueblócá; cha mora Bëngbe Bëtsáftaca bentsencuénta.

¹²Saulo ya tonjinýe mo otjenayoquécá, canýe entšá Ananías ca uabainá entsamashjuana y chabe cucuatšenga chabe bestšašínne entsejájua, chca, cha chabuatabínýnama ca.

¹³Ananías chca tojanuena ora, tojánayana: —Bëngbe Utabná, banga ba soyenga chabiamá šmonjacuentá; Jerusalemoca tša bacá acbe entsanga imomnënga tojáborye. ¹⁴Y mora entsebmoma mando chë bachnangbe amëndayëngbentšana, muentše aca otšëmbuanënga jótabayama ca.

¹⁵As Bëngbe Utabná tbojaniana: —Motsa, er atše cha sënjuábuayana atšbiama chaotrabajama; chaóyebuam-

bama ndoñe judiëngbeñe, reyëngbeñe y Israeloca entsángbeñnaca, y chca, chënga atšbiama chamotatsšëmbonama. ¹⁶Atše cha chanjinýinýie ntsachetšá ibojtsemna átšbeyeca jasúfriama ca.

¹⁷As Ananías tojána Saulo yojtsanmëna yebnoye. Tojánamashëngo ora, Saulëbe bestšašínne chabe cucuatšenga tojanjájó y tbojaniana: “Jesucristbeyeca atšbe catšata, Saulo, Bëngbe Utabná Jesús, chë benachëjana conjanabó ora cmonjanebëbocná, šonjichmó aca chacmatabínýnama y chë Uámana Espíritu acbe ainaniñe jtsemándayama cháumashënguama ca.”

¹⁸Cachora, Sálulëbe bominýentšana mo beonbe bobachëshëngcá tojantquécjana, y chca, ibojtsatabinýna; chora tojantsbaná y tojanenábaye.

¹⁹Chentšana, Saulo tojanse y añemo yojtsatsbomna y baseftayté chë Jesucristbeñe ošbuáchiyëngaftaca tbojántotona, Damascoca.

Damasco puebloca Saulo entšanga yojanabuayinýa

²⁰Saulo cachorscana tojanontsé jábuayenama judiëngbe enefjuana yebnënguenache, Jesús Bëngbe Bëtsabe Uaquiñá bëtsemnama. ²¹Chë imojtsuenanënga nyëtscanga imojtsenjanaye y mëntšá imojtsichamo: “Mua entsemna chë Jerusalemoca Jesúsbioye otšëmbuanënga endanëbanayá, y mora camuá Damascoye tojabo, Jesucristbeñe ošbuáchiyënga jabótabayama y chë bachnangbe amëndayëngbe cucuatšínne jabáshejuanama.”

²²Pero Saulo cada ora más añémoca yojtsóyebuambnaye y puerte tšabá yojaninýanýná Jesús Bëngbe Bëtsabe Uámana Uabuayaná bëtsemnama. Chíyeca chë Damascoca judiënga ndoñe imontsobena ntšamo cha jojuana.

Ntšamo Saulo judiëngbentsana tojtsanachá

²³ Bayté tojanochnëngo ora, judiënga tmojanenoyeuná ntšamo jamëse Saulo jóbama, ²⁴ pero Saulo chë soye tojántatsëmbona. Bnëtë y ibeta, chë bëts pueblentša bëšašanguenache chënga chabiama imojananyá, jtsóbama; ²⁵ pero chë Jesucristbeñe ošbuáchiyënga, ibeta, cha canye bëts sbarëcuiñe tmojtsanatsuamá, y chë pueblentša shëconana tapiëšëjana tmojtsanëštjango. Chca cha tojanotsbocá.

Saulo Jerusalenoca

²⁶ Saulo Jerusalenoye tojánashjango ora, yojtseboše chë Jesucristbe ichmónëngaftaca jenútanama, pero nyetscanga imojtsebiauatja y ndoñe imontsošbuaché Saulo Jesucristbe ustoná yojtsemnama. ²⁷ Chcasna, Bernabé Sálulëbioye tbojëftsanbetše y chë Jesucristbe ichmónëngbioye tbojanánatse, y tojanacuntá Saulo benachiñe Bëngbe Utabnábioye tbojáninýama, ntšamo Bëngbe Utabná tbojaniyanama y ntšamo cha Damascoca tša añémoca Jesusbiamá entšanga tojánabuayenama. ²⁸ As Saulo Jerusalentše tojanototoná y chë Jesucristbe ichmónëngaftaca yojánana. Bëngbe Utabnabiamá bëts añémoca entšanga yojanabuayiná y ²⁹ yojanoyebuambná y imojanenatsëtsná chë griego biyá judiëngaftaca; pero chëngna imojtsenëyeunana Saulo jtsóbama. ³⁰ Jesucristbeñe ošbuáchiyënga chca tmojántatsëmbona ora, Saulo Cesarea luaroye tmojanánatse, y chentšana Tarso puebloye tmojanichmó.

³¹ Y chca, Jesucristbeñe ošbuáchiyënga Judeoca, Galilea y Samaria luarentše chora ya ndoñe más montsansufrina y natjémbana

imojtsemna, y nyetscanga más ošbuáchiyana imojtsebomna. Ntšamo Bëngbe Bëtsá yojanbošcá, imojtsaniyena cha jtsatschuanayëse; y chë Uámama Espíritbe uajabuáchenanaca, Jesucristbeñe ošbuáchiyënga más tmojanoboté.

Pedro Enéasbioye tbojanshná

³² Pedro yojánabuache nyetsca chë Jesucristbeñe ošbuáchiyëngbenache. Y chca, Lida puebloca Bëngbe Bëtsabe entšanga jabuachámna tojána. ³³ Lida pueblentše canya tbojáninýena, Eneas ca uabainá. Cha jama ndobená inamna y posufta uata jutsnéshañe chca inajájona. ³⁴ Pedro tbojaniyana: “Eneas, Jesucristo tcmojashná. Matëtsbaná y acbe tjuashe motsejacaná ca.” Y cachora chë jama ndobená tojtantsbaná.

³⁵ Nyetscanga chë Lida pueblentše y Saronoca oyenënga chë entšá shnaná tmojáninýe. Y as, chënga bacna soyënga amana tmojtsanajbaná y cach orscana tmojanontsé Bëngbe Utabnábeñe ošbuáchiyana.

Pedro tojanma Dorcas cháuatayenama

³⁶ Chë tempo, Jope puebloca yojaniyena canye shembása Jesucristbeñe ošbuachiyá, Tabita ca uabainá, o griego biyañna Dorcas ca. Cha nyets tempo tšabe soyënga yojánama y yojanamana chë tojtsëjabetënga jujabuáchana. ³⁷ Pero chora, šocana tbojanshache y tojtsanóbana. Tmojtsanbebé chentšana, canye tsoye tsbanana tsañoca chabe cuerpo tmojtanajajó. ³⁸ Jope inamna Lida béconana, y Lidentše Pedro yojtsemna; y chë Jope pueblentše Jesucristbeñe ošbuáchiyënga tmojántatsëmbona Pedro choca yojtsemnama. Asna, uta boyabásata tmojanichamó Pedro jauyanama:

“Diosmanda, betsko Jope puebloye mabo ca.”

³⁹As Pedro tojéftsantsbaná y chë uta boyabásaftaca tojána. Choye tmojánashajna ora, tmojánatse chë Dórcasbe cuerpo yojtsemnoye, tsbanánoca; chorna, nÿetsca viudanga šachénaca Pédrëbioye tmojanóbobuashcona y imojtsinÿinÿnaye chë Dorcas yojuajonaná entsayangá y cmešëjuangá, cabá chéngaftaca yojéftsemna ora.

⁴⁰Pedro tojanmandá nÿetscanga chentšana chamotsebocanama; chora Pedro yojoshëntsamentšiyey y Bëngbe Bëtsáftaca ibojencuentá. Chentšana, Pedro chë obanábioye tbojanonÿinÿé y tbojaniana: “Tabita, matëtsbaná ca.”

As Dorcas tojtanobuchatëfjona y Pédrëbioye tbojáninÿe ora, tojanótbema. ⁴¹Chora Pedro tbojánabuacushache y tbojtanatsbaná. As Pedro tojánachembo nÿetsca chë Jesucristbeñe ošbuáchiyënga, chë viudanga y chë inÿenga, y Dorcas ainá tojtaninÿanyé. ⁴²Chë soye nÿets Jope pueblentšë tojanótatšëmbona y banga Bëngbe Utabnábeñe imojtsošbuáchiye. ⁴³Y Pedro bayté Jope pueblentšë tojanoquedá, Simón chë bobáchëshiñe trabajayabe yebnentšë.

Pedro y Cornelio

10 Cesarea pueblentšë inamna canÿe boyabása Cornelio ca uabainá; cha inamna chë Italiano ca uabaina soldadëngbe amëndayá. ²Cornelio Bëngbe Bëtsábioye ibnarrespetana y nÿetsca chabe yebnentšä oyenëngaftaca Bëngbe Bëtsá puerte imojánadorana. Becá crocénana inaquëcnayey chë judiënga ndbomnjëmënga jujabuáchama y sempre Bëngbe Bëtsáftaca ibnëncuentayey.

³Canÿe te, mo bëts mošenana ora, cha botamana tojáninÿe mo otjenayoquécá,

mëntšá: Bëngbe Bëtsabe canÿe ángel Cornelio yojtsemnoye yojtsamashjuana y tbojaniana: —¡Cornelio ca!

⁴Cornelio chë ángelbioyey ibojtsonÿayey y auatjananá tbojaniana: —Taita, ¿ndayá yojtsemna ca?

Y chë ángel tbojaniana: —Bëngbe Bëtsá condbëtseimpadanama y chë ujabótënga condbëtsëjabuachanama, Bëngbe Bëtsá ácaftaca entsoyejua y lempe cmochanjóyeunayey. ⁵Chcasna, mora básefta boyabásenga Jope bëts puebloye michamó y Simón, chë Pedro ca monduabobuatmá, moyey chamuánatse. ⁶Cha posada entsebomna inÿey Simónbentšë, chë bobáchëshiñe trabajayabe yebnentšë. Chabe yebna mar bëjaye tsachañey endmëna. Cha cmochanjauyana ndayá jamama cmojtsemna ca.

⁷Chë Cornéliëbioyey ibojuatsëtsayey ángel tojtsatanoñey ora, Cornelio chabe oservenënguentšana útata tojánachembo y canÿey soldádnaca, chabe uajabuachaná, Bëngbe Bëtsá adorayá; ⁸lempe ntšamo yojopasacá chënga tojanacuntá y chentšana Jope puebloyey tojanichamó.

⁹Yëfsana mo nÿetsto ora, chënga benachiñey Jope béconana imojtsajnëntscuana, Pedro yebnentšä tsbanánoyey tojánašëngo, Bëngbe Bëtsáftaca jencuëntama. ¹⁰Becá tbojánishëntsena y jasama yojtsebošey; pero imojtsebopróntantscuana, Pedro mo otjenayoquécá mëntšá tojáninÿey: ¹¹Celoca yojtsatëfjna y mo canÿey bëts entsayëjuacá yojtsabá y nÿets canta sibientšana yojtsëjonÿana. ¹²Chë entsayëjuañey imojtsemna nÿetscna bayënga, ósjojnayey bayënga y nÿetscna shloftšëngnaca. ¹³Y tojanuena canÿey oyebuambnayana mëntšá: —Motsbaná, Pedro; mobayey y quem bayënga mose ca.

¹⁴ Chora Pedro tojánayana: —Ndoñe, atšbe Utabná. Atše ndocna te chiyáisesse Moisesbe leyíne ndoñe yondëlesenciana jasama bayënga y chë jasama ndoñe tšabá imomna bayënga ca.

¹⁵ Y cachiñe tojtétanuena chë oye-buambnayana mëntšá: —Bëngbe Bëtsá tojalesencia y canyë bayá tšabá jasama yomna ca tojayanëse, aca ndoñe matsjuabnana chë bayá jasama ndoñe tšabá yontsemna ca.

¹⁶ Chë soye unga soyama chca tojanopasá chentšana, chë entšayéjua celoye tojtanátsjua. ¹⁷ Pero Pedro ndoñe yontsetátšëmbo ntšamo tojaninýcá ndayá chabiana yojsayanama. Chëntscuana, chë Cornéliëbe ichmónënga noticiánana Simónbe yebnoca tmojánashhajna y shjoca bëšoca imojtsobátmana. ¹⁸ Tmojanchembo ora, tmojanënoticiá Simón, chë Pedro ca uabobainá, chentše taibojatanama.

¹⁹ Pedro, ndayá tojáninýyama chabosertama yojsenójuabnantscuana, chë Uámana Espíritu tbojanianyana: “Mouena, muentše mora unga boyabásenga cmontsenguá. ²⁰ Motsbaná, mocana matastjango y yapa ntjatenouabnanycá chëngaftaca cochjá, er atše chënga sënjichamó ca”.

²¹ As Pedro tojtanastjango y chë tmojánashhajnjënga tojanéyana: —Atše sëndmëna chë šmontsenguá cha. ¿Ndáyeca moye šmojabo ca?

²² Chora chënga tmojanjúá: —Cornelio šonjichamó. Cha endmëna chë soldadëngbe amëndayá, canyë tšabá mándbomna entšá y Bëngbe Bëtsábioye adorayá, y nyetsca judiënga chabiana tšabá mondbëtsoyebuambnaye. Bëngbe Bëtsabe canyë ángel chábioye tbojabuayená ntšamo jamana aca chábioye chacotsama, as chë ndayá cha jauanama cojtsebomncá cha joudenama ca.

²³ As chënga tojanémashengo y posada tojanéyentsame. Yëfsana Pedro chë unga boyabásengaftaca tojána. Básefta Jesucrístbeñe ošbuáchiyënga Jope pueblentsënga Pedro tmojantjëmbambá.

²⁴ Chë inyë yëfsana Cesarea puebloye tmojánashhajna. Chentše Cornelio Pédrëbiana yojsobatmana, y Cornelio tojanébuaja pamillanga y tšabe amiguéngnaca chentše imojtsemna. ²⁵ Pedro tojánashjango ora, Cornelio tojánbocna jajëbenguama y chabe shecuatšentše yoJoshëntsamentšiyë cha jadórama. ²⁶ Pero Pédrëna tbojtanatsbaná y mëntšá tbojanianyana: —Matëtsbaná, atše cach aquëcá nyë canyë entšá sëndmëna ca.

²⁷ Pedro Cornélioftaca encuëntaye chë yebnentše tojánamashëngo y ba entšanga tojánanyëna, chentše tmojanójotënga. ²⁸ Chora Pedro tojanéyana: —Cach tšëngaftanga šmondétatšëmbo chë judiëngbe leyënguñe endayana ndoñe yondopodena canyë judío ndoñe judío entšángaftaca jenútanama y ni mo chëngbe yebnënguenache jábuachama ca. Pero Bëngbe Bëtsá šonjinýinýé atše ndocna te šondmëna ínñabiana jatsjuabnayana cháftaca jenútanama ndoñe tšabá yondmëna ca. ²⁹ Chíyeca, šmonjobetše ora, ndocá ntjatichamcá nyë sënjabo ca.

Chora tojanatjá: —¿Ndáyeca šmojobetše ca?

³⁰ As Cornelio tojánayana: —Canta te entsemna, camëntša ora, muentše sëndánmëna Bëngbe Bëtsáftaca encuëntaye y ndeolpe sënjinýe atšbe delante canyë boyabása uabuash-inýinýyana entšayaca bopormaná. ³¹ Cha šonjauyana: “Cornelio, Bëngbe Bëtsá condbëtseimpadanama y chë ujabótënga condbëtsejebuachanama, Bëngbe Bëtsá ácaftaca entsoyejúá y lempe cmochanjóyeyunaye ca. ³² Básefta

boyabásenga Jope bêts puebloye michamó y Simón chë Pedro ca monduabobuatmá moye chamuánatse ca. Cha posada entsebomna inÿe Simónbentše, chë bobáchëshiñe trabajayabe yebnentše, y chabe yebna mar béjaye tsachañe endmëna. Cha cmochanjauyana ndayá jamama cmojtsemna ca.”³³ Chcasna, cachora sënjichamó aca jobetšama, y aslëpaye jabama tcojóyaunama. Y as morna, nÿetscanga Bëngbe Utabnabe delante fséntseprontana jouenama lempe ntšamo Bëngbe Bëtsá tcmojamandacá ca —cha tojánayana.

Ntšamo Pedro tojanoyebuambá Cornéliëbe yebnentše

³⁴ Pedro chora tojanontšé mëntšá jóyebuambayama: —Mora atše šontsosertana, ndegombre Bëngbe Bëtsabiana nÿetscanga cachcá uámanënga imomnama.³⁵ Nÿets luarënguenache Bëngbe Bëtsá júbuajana cha tmojtsatschuaná y tšabe soyënga tmojtsamënga.³⁶ Tšëngaftanga šmondétatšëmbo, Bëngbe Bëtsá Israeloca entšanga tojánabuayenama, tšabe noticiënga jtsóyebuambnayëse, chënga nÿetscanga ainaniñe tšabe ebionana chamotsebomnama, Jesucristbeyeca; y cha endmëna nÿetsca entšangbe Utabná.³⁷ Tšëngaftanga šmondétatšëmbo ntšamo nÿets Judeoca tonjanopasama. Chë soye Galilea luaroca tojanobojaťsé, Juan entšanga yojanabuayiná orscana, chënga bacna soyënga amana chamotsajbanama y chamuenábayama.³⁸ Šmondétatšëmbo ntšamo Bëngbe Bëtsá, Jesús Nazaretocábioye tbojanábuayanama y tojanma chë Uámana Espiritu chabe ainaniñe cháúamashënguama, y tojanma Jesús corente obená chaotsemnama; y šmondétatšëmbo ntšamo Jesús enjánana entšangbiana

tšabe soyënga amiñe y nÿetscanga chë Satanás yojánama chamosufrimënga áshnaye, er Bëngbe Bëtsá cháftaca yojtsemna.

³⁹ “Bënga fsënjáninÿe y fsëndé-tatšëmbo lempe ntšamo Jesús tojanmcá Jerusalenoca y nÿets Judea luariñe; y cha tmonjánoba, canÿe cruciñe jacrucíficase.⁴⁰ Pero Bëngbe Bëtsá tonjanma unga tianoye cha cháuatayenama y bëngbeñe chaonÿnama.⁴¹ Cha nÿetsca entšangbe delante ndoñe chenátanbocna, pero añe bëngbeñe, chë tempo Bëngbe Bëtsá šojanëbuáyanënga, Jesús tojtanayenama chamuinÿama. Y tojtanayenentsana bënga cháftaca fsënjanse y fsënjanofsé.⁴² Cha šonjichamó entšanga jábuayenama y jayanama ndegombre cha yomna chë Bëngbe Bëtsabe uabuayaná, chë nda obanëngbiana y ainëngbiana yochjayana tšabá o ndoñe tšabá tmonjamama.⁴³ Bëngbe Bëtsabe juabna oyebuambnayënga nÿetscanga cach Jesusbiana tmojánayana, nda Jesúsbeñe tojtsosbuaché, chábioye Bëngbe Bëtsá chabe bacna soyëngama bochanjaperdóna, Jesusbe obenánaca ca.”

Ndoñe judiënga chë Uámana Espiritu tmojanóyëngacñe

⁴⁴ Pedro chë palabrënga cabá yojtsóyebuambnantscuana, chë Uámana Espiritu tojánamashëngo nÿetsca chë imojtsuenanëngbe ainaniñe jtsemándayama.⁴⁵ Chë judiënga Jesucristbeñe ošbuáchiyënga Pédroftaca tmojánabënga imojenjnaná, chë Uámana Espiritu ndoñe judiëngbeñnaca cháúamashënguama Bëngbe Bëtsá tojanmama.⁴⁶ Chënga imojtsuenana chënga inÿetšá jtsebiayangana, chënga tempo ndmabiyañe y jtsichámuana Bëngbe Bëtsá bêts soyënga tojanmama.

⁴⁷ Chora Pedro tojánayana: “Pero mængna chë Uámana Espíritu tmonjóyëngacñë ntšamo bënga tmonjoyëngacñëcá. Chcasna, ndocná queochatobenaye jamana chënga uabáinënga ndoñe chamondétsemnama ca.” ⁴⁸ As Pedro tojanamëndá chënga jubáyama, Jesucristo jótšëmbonëse. Chentšana chënga tmojanimpadá baseftayté chëngaftaca chaoquedama.

Ntšamo Pedro chë Jerusalemoca imojánenefjuana ošbuachiyëngbioye tojanéyana

11 Jesucristbe ichmónënga y chë Judeoca Jesucristbeñe ošbuáchiyënga tmojántatšëmbona, chë ndoñe judiëngnaca Bëngbe Bëtsabe palabriñe imojtsošbuáchema. ² Pero Pedro Jerusalemoye tojesaná ora, báseftanga chabiamana ndoñe tšabá tmonjánayana. Chënga imojamna chë juabnayënga, chë ndoñe judiënga ošbuáchiyënga boyabásënga canjánamna chë más delicadentšë base bobachtema tétšënénga jtsemnama ca, ntšamo chë judiënga imojanamancá, as chënga jobenayama chë judiënga ošbuáchiyëngaftaca jenútanama ca. ³ As Pedro tmojantjá: —¿Ndáyeca tcojá chë ndoñe judiënga jábuachama y chëngaftaca tcojase ca?

⁴ Chora Pedro lempe chënga tojanacuntá ntšamo chë ndoñe judiëngbioye cha tojána orscana tojanopasama. Cha tojanéyana: ⁵—Atšë Jope pueblaca sënjamna y Bëngbe Bëtsáftaca sënjencuénta ora, mo otjenayoquécá sënjáninýe celocana mo canýe bëts entšëjuacá átšbioye enjétsabeconaye y nýets canta sibiocana enjétsëjonýana. ⁶ Y botamana sënjanrrepará ndayá chë tsoye bétsemnama y sënjáninýe choye monjésemna uamna y tjoca bayënga, ósjojnaye bayënga y nýetscna

shloftšëngnaca. ⁷ Y sënjanuena canýe oyebuambnayana mëntšá: “Motsbaná, Pedro; mobaye y quem bayënga mose ca.” ⁸ Chora atšë sënjánayana: “Bëngbe Utabná, ndoñe; atšë ndocna te chiyáise chë Moisesbe leyinë ndoñe yondëlesenciana jasama bayënga y jasama ndoñe tšabá imomnënga ca.” ⁹ Chentšana cachiñe sëntëtanuena chë celocana oyebuambnayana mëntšá: “Bëngbe Bëtsá tojalesenciá y canýe bayá tšabá jasama yomna ca tojanayëse, ndoñe matsjuabnana chë bayá jasama ndoñe tšabá yontsemna ca.” ¹⁰ Chë soye unga soyama chca tonjanopasá y chentšana chë entšëjua celoye tontanátsjua. ¹¹ Y cachora unga boyabásënga Cesarea pueblacana ichmónënga, chë posada sëndbomnentšë tmonjánashjajna, atšë janguanguama. ¹² Y chë Uámana Espíritu šonjanmandá atšë yapa ntjatenojwabnaycá chëngaftaca jama; y quem chnénguana Jesucristbeñe ošbuachiyëngnaca átšëftaca tmonjána. Nýetscanga canýe entšá Cornelio ca uabainabe yebnoye fsënjánamashjna; ¹³ y chana bënga šonjanacuntá ntšamo tojáninýe, cachabe yebnentšë canýe ángel ibojtsebiatsana y mëntšá tbojaniana: “Básefta boyabásënga Jope bëts puebloye michamó y moye chamuánatse Simón, chë Pedro ca monduabobuatmá, ¹⁴ y cha cmochanjabuayená ntšamo aca y acbe yebnentšá oyenënga šmochjotsbocá ca.” ¹⁵ As, atšë jóyebuambayama sënjanbojatšë orna, chë Uámana Espíritu tonjánamashëngo chëngbe ainaniñe jtsemándayama, ntšamo bëngbeñe natsana tonjanamashëngcá.

¹⁶ “Chora sënjanenojuabó ntšamo Bëngbe Utabná tonjánayanama: ‘Ndegombre, Juan entšanga bėjayeca tonjanëbaye; pero Bëngbe Bëtsá chë Uámana Espíritu bochanjíchmuá,

tšëngaftangbe ainaniñe jtsemándayama cháúamashënguama ca.’¹⁷ Chcasna, chëngnaca Bëngbe Bëtsá chë Uámana Espíritu tonjatsatá, ntšamo bënga, chë Utabná Jesucristbeñe ošbuáchiyënga, šonjanatsatacá. Y chca, atše ndoñe quetsátsmëna canye tša uamaná, Bëngbe Bëtsá jauyanama ntšamo cha yobošcá ndoñe chaondëtsemna ca.”

¹⁸ Jerusalenoca Jesucristbeñe ošbuáchiyënga chë soyënga tmojanuena ora, ndocá más tmonjantjá y Bëngbe Bëtsá tmojtanchuá, mëntšá: —¡Asna, Bëngbe Bëtsá chë ndoñe judiëngnaca tojalesenciá chëngbe bacna soyëngama ngmënaca chamuatenójuaboma y chca amana chamotsajbanama, chë nyetsca tescama yomna tšabe vida chamotsebomnama ca!

**Ntšamo Antioquía pueblaca
tojanobjatšë, entšanga
Jesucristbeñe ošbuáchiyana**

¹⁹ Esteban tmojanóba chentšana, tmojanontšë chë Jesucristbeñe inye ošbuachiyëngnaca jatëcamiyama. As chentšana báseftanga yojtsamna bën luarëngoye jtsachetëngana Fenicioye, Chipre y Antioquía luarëngoye, y chenache chënga Jesucristbe soyëngama imojanoyebuambná, pero nye judiëngbiama.²⁰ Pero báseftanga imojamna Chipre y Cirene luaroquënga, y chënga Antioquía bëts puebløye tmojánashajna orna, chë ndoñe judiëngbeñnaca tmojanoyebuambá, Jesús, chë Utabnabe soyëngama jabuayenase.²¹ Bëngbe Utabnabe obenana chëngaftaca yojtsemna, y chca, ba entšanga tmojanajbaná bacna soyënga amana y tmojanontšë Bëngbe Utabnábeñe jtsošbuáchiyana.

²² Jerusalenoca Jesucristbeñe ošbuáchiyënga chë soye tmojántatšëmbona ora, Antioquía luaroye Bernabé

tmojanichmó.²³ Bernabé choye tojánashjango orna, tojáninye ntšamo Bëngbe Bëtsá tšabe bendicionënga chëngbeñe tojanmama y chama corente tojanoyejuá. Nyetscanga tojanabuayená chamotsiyena nyets ainánaca Bëngbe Utabnábeñe jtsošbuáchiyëse.²⁴ Bernabé inamna canye entšá tšabe soyënga amá, chë Uámana Espíritu chabe ainaniñe yojtsemándaye y bëtscá ošbuachiyá inamna. Y banga tmojanontšë Bëngbe Utabnábeñe jtsošbuáchiyana.

²⁵ Chentšana, Bernabé Tarso puebløye tojána Saulo janguanguama,²⁶ y tbojáninýena ora, Antioquía luaroye tbojëftsanbetše. Antioquía luarentšna canye uata nyetsá Jesucristbeñe ošbuáchiyëngaftaca cánýiñe ibojëftsemna y ba entšanga tmojanabuatambá. Antioquioca inamna chë ndayentšë natsanama Jesucristbeñe ošbuáchiyënga Cristbe ústonënga ca imojtsëbuatma.

²⁷ Chë tempo, básefta Bëngbe Bëtsabe juabna oyebuambnayënga Jerusalenocana Antioquía luaroye tmojána.²⁸ Chënguentšana canya Agabo ca uabainá tojantsá y chë Uámana Espíritbeyeca tojánayana, mëntšá: “Nyets luariñe entšanga oyeniñe bëts shëntsana echanjóshjango ca.” Y ndegombre chca tojanopasá, Claudio Romoca bëts mandado inamna ora.²⁹ Chcasna, chë Antioquía bëts pueblentša Jesucristbeñe ošbuáchiyënga imojenóyeunaye ntsachetšá crocënanëncaca juíchmuana, ntšamo cada ona tojobenacá, Judeoca Jesucristbeñe ošbuáchiyënga jujabuáchama.³⁰ Chca tmojanma, y Bernabé y Sáuloftaca chë crocënanca tmojanichmó chë Judeoca Jesucristbeñe ošbuáchiyënguentšë bëtsëjemëngcá amëndayëngbioye.

**Santiago tmojanóba;
Pedro tmojanëtame**

12 Chë tempo, rey Herodes básefta Jesucrístbeñe ošbuáchiyënga tojánishëche jutámíama y játssetšenama. ²Tojanmandá espadéjaca chamóbama Santiago, Juanbe catsáta; ³y Herodes tojántatsëmbona judiënga chë soye tojanogúsetama; as, cha tojanmandá Pédrënaca chamutámíama. Chca tojanopasá chë levadúraca ndëpormana tandëşe sayté, Bashco fiesta ora. ⁴Pedro tmojánishache orna, Herodes tojanmandá chamutámíama, y chë cárceloca soldadënga cantátanga tmojanenojátá cántentşe cha chamotsebojanýama. Herodes yojétsejuabnaye, Bashco fiesta tojochnëngo ora Pedro juabocnama, entsangbe delante jayanama cha chaóbanama. ⁵Chcasna, Pedro yojtsétáména y chë soldadëngna corente imojtsebojanýá. Pero Jesucrístbeñe ošbuáchiyëngna bëtsá Bëngbe Bëtsá imojtseimpadana Pédrëbiamá.

**Bëngbe Bëtsá tojanma Pedro
natjémbana cárcelocana
cháuissebocnama**

⁶Canýe te yojtsájamna Herodes entsangbe delante Pedro juabocnama. Chë te ibetna, Pedro yojtsomañe y cátaoica canýe soldado yojtsemna; uta cadenëjuaca yojtsabatsëcna y inýe soldadëngna bëšócana chë utáméniñe imojtsebojanýá. ⁷Ndeolpe, Bëngbe Utabnabe canýe ángel tojánbocna, y lempe chë utáméniñe yojtsebuashinýinýana. Chora chë ángel tëchañe Pédrëbioye tbojánbojajo, tbojanfšená y tbojaníyana: “Betsco motsbaná ca.” Y cachora chë cadenëjuangá Pédrëbe buacuatsënguentsána tojanatquécjana, ⁸y chë ángel tbojaníyana: “Matichëtjo y matóshecohëtjo ca.” Pedro tojanma ntšamo chë ángel tbojaníyancá, y chora

chë ángel tbojátaníyana: “Mataquëfsayé y šmasto ca.”

⁹Pedro utáménocana chë ángel ibojtséstoná, pero ndoñe yontsetátšëmbo añe ndegombre o ndoñe bentsemna chë ángel yojtsama cha chocana cháuissebocnama; masna, ibojtsinýana mo canýe otjénayoca cuaftsemncá ca. ¹⁰Y útentşe chë soldadënga imojtsebojanýajana chata tbojánachnëngo y yerëša bëšásoye tbojánashjango, chë ndayéša yojanamna tsáshenoye jabocnama; y chë bëšášana nýe cachabe ponto yojotëfjo. Chentsána tbojétsanbocna ora, canýe tsáshenëjana ibojtsaye, y nýe ndeolpe chë ángel Pédrëbentsána yojtsojuánañe.

¹¹Nýa chora Pedro tbojanosertá y tojánayana: “Mora tšabá šjosertá, ndegombre Bëngbe Utabná chabe ángel tbojichmó atşe jatsbocama Heródesbe cucuatsëntšana y lempe ntšamo judiënga átšeftaca jamama imojuabnámñaca ca.”

¹²Pedro chë soyama juicio tojanca ora, tojána María, Juanbe mamabe yebnoye; Juan, Marcos ca imojanábobaina. Y chë yebnentşe banga cánýiñe imojtsemna, Bëngbe Bëtsáftaca encuéntaye. ¹³Pedro chë tsashenoica bëšášoca tojanchembo ora, canýe oservená, Rode ca uabainá, tojánbocna jarrepárama. ¹⁴Chë oservená Pédrëbioye tbojanoyatëmbá ora, corente oyejuayá yojtsemna y cha, jebiatëfjo cuentna, cach tsoye tojesaná chë tšabe noticia jaúnayama, Pedro bëšoca yojtsemna ca. ¹⁵Chë tsoca imojtsemnëngna chora tmojaníyana: “¿Opá chectsebocna ca?”

Pero chë oservená yojtsichamo ndegombre ca. Y chënga tmojaníyana: “¡Chabe ángel ctsemna ca!”

¹⁶Chëntscuana Pedro cabá yojtsechembuana; tmojánebiatëfjo y tmojáninýe ora, chënga puerte imojenjananá. ¹⁷Pero Pedro tojánëfjatsëmbó iytëca chamobiamama y tojanacuntá

ntšamo Bëngbe Utabná utámenocana tbojánatsbocama. Chentšana tojanéyana: “Ntšamo tonjopasama Santiago y chë Jesucristbeñe inÿe ošbuáchiyënga šmochjaúnaye ca.”

Chora Pedro chë yebnentšana tojtáise-bocna y inÿoye yojáta.

¹⁸Tojanbinÿna ora, chë soldadënga puerte imojóntša enbouenanana, ntšamo Pédroftaca tojanopasama ndoñe imontsetátšëmbo causa. ¹⁹As Herodes tojanmandá Pedro chamotsenguaguama; pero jtsinÿenama ndoñe imonjobenaye orna, Herodes chë soldadënga tojanatjá ndayá Pédroftaca tojanopasana y chentšana tojanmandá chë cha imojoanbojanÿá soldadënga jtsébáyama. Chë soyënga tojanochñëngo chentšana, Herodes Judea luarentšana tojéftsanbocna y Cesarea luaroye tojtsanoñe, y choca tojtsanoquedañe.

Herodes tojanóbana

²⁰Herodes corente yojtsetsátjaye Tiro y Sidonoquëngaftaca; as chënga tmojanenoyeuná Heródesbioye jama. Canÿe uámana uajabuachaná, Blasto ca uabainábioye tmojanayeumaná, y chana tojanašebuachená Herodes jauanama ndoñe más entjayánanënga chamondétsemnama, er Tiro y Sidonoca entšanga vida imnabomna Heródesbe luaroca sanángaca. ²¹Chcasna, rey Herodes inÿe tescama tojánachembo. Chë tena, jóyebuambayama Herodes uámana entšayaca yojtopórma y yojótbema chabe mándaye tbemanentše; chentšana tojanonguamé. ²²Chora entšanga tmojanontsé mëntšá uayebuáchana: “¡Chë entsoyebuambná cha entšá ndoñe quenátsmëna! ¡Chana canÿe dios entsemna ca!” ²³Cachora, Bëngbe Bëtsabe canÿe ángel tojanma Herodes šocana chaboshachama, chabe cuenta Bëngbe Bëtsá chamuatschuama

entšanga ndoñe yonjáuyana causa. Herodes tojanóbana mamángaca sasná.

²⁴Pero chë tempo más bëtscá entšanga Bëngbe Bëtsabe palabra imojtsuenana y Jesucristbeñe imojtsošbuáchiye.

²⁵Bernabé y Saulo chatbe trabajo tbojéftsanma ora, Jerusalenocana Antioquía luaroye tbojésanata y Juan, chë Marcos ca uabobuatmá, chátaftaca tmojéftsanbetše.

Bernabé y Saulo tbojanbojatšë Bëngbe Bëtsabe trabajo jamama

13 Antioquía luaroca Jesucristbeñe ošbuáchiyënguentše imojtsemna Bëngbe Bëtsabe juabna oyebuambnayënga y ošbuachiyëngbioye abuatambayënga. Chënga imojoanabaina Bernabé, Simón (chë Šibeté ca uabobuatmá), Lucio Cirenocá, Manaén (nda tojanoboché cánÿiñe Herodes, chë Galileoca réyefata) y Saulo. ²Canÿe te, Bëngbe Utabná imojtsatschuanaye y chama tondaye ntjascá imojtsemna ora, chë Uámana Espíritu tojánayana: “Mora šmochjaleséncia Bernabé y Saulo tšëngaftangbentšana chabuétsebocnama; chatna canÿe trabajuama sënjabacacá ca.”

³Bëngbe Bëtsá jëtshuayama tondaye ntjascá imojtsemnëntscuana y cháftaca imojtsencuéntantscuana, chëngbe cucuatšënga chatbe bestšaše juatsboica tmojancjá, chatbe trabajuñe chaújabuachama Bëngbe Bëtsá jtseimpadánëse. Y chentšana chátbioye tmojtanadiošoftá.

Bernabé y Saulo Chipre luaroca

⁴As Bernabé y Saulo, chë Uámana Espíritbeyeca ichmónata, Seleucia ca uabáinoye tbojánata y chentšana bejaycá, Chipre luaroye. ⁵Salamina bëts puebloye tbojánashjango ora, tbojanontsé Bëngbe Bëtsabe palabrama entšanga jábuayenama, chentšá

judiëngbe enefjuana yebnënguenache. Juan Marcos mo chatbe uajabuachanacá ibojtsebomna.

⁶Nÿets chë luarëjana tmojánachnëngo orna, Pafos puebloye tmojánashjajna; y chentše tmojáninÿena canÿe judío tatšëmbuá, Barjesús ca uabainá. Cha yojánichamo cha canjamna canÿe Bëngbe Bëtsabe juabna oyebuambnayá ca, pero ndoñe chca yonjamna. ⁷Chë tatšëmbuá inatrabájaye chë Chipre luaroca mandadbiama, Sergio Paulo ca uabainá; y chë mandadna corente osertaná inamna. Cha yojtseboše Bëngbe Bëtsabe palabra jouenama; as tojanmandá Bernabé y Saulo jobiatšana. ⁸Pero chë tatšëmbuá, grieguiñe Elimas ca uabainá, Saulo y Bernabebe contra yojtsemna y yojtsama chë mandado ndoñe chaondëtsošbuáchema, ntšamo chë Jesucristbeñe ošbuáchiyënga imojanošbuachecá. ⁹Chora, Saulo chë Pablo ca imojanábobuatmabe ainaniñe chë Uámana Espíritu corente yojtsemándaye; as chë tatšëmbuábioye yejuana ibojonÿinÿiye, ¹⁰y tbojaniyana: “¡Abuambnayá, puerte bacna entšá, Satanasbe uaquiñá y tsabe soyënga ndoñe chaondëtsebíñyñama trabajayá! Bëngbe Utabnabe nÿetsca ndegombre soyëngama aca contsichamo uayátse-naye soyënga yojtsemna ca. ¹¹Mora, Bëngbe Bëtsá cmochanjacastíga, jtaná cochanjoquéda y baseftayté jinÿama quecochatobenaye ca.”

Cachora Elimas mo ibetiñcá yojoquéda y ibojtsonguaye canÿa buacuetëntšnana chabuánatsama, jtaná yojtsemna causa. ¹²Chë mandado chca tojáninÿe ora, Jesucristbeñe yojtsošbuaché y yojenjnaná Bëngbe Utabnabe soyënga tojanatsjinÿyama.

Pablo y Bernabé Antioquía pueblentše, Pisidia luaroca

¹³Pablo y chabe enutënga, Páfosocana, bejaycá Perge puebloye tmojátananga, Panfilia luaroca. Pero Juan tojésanabashejuana y Jerusalenoye tojésanshëcona. ¹⁴Pergentšana Antioquía puebloye tbojátanata; chë pueblo inamna Pisidia luare béconana. Chentšna, ochnayté, chë judiëngbe enefjuana yebnoye tbojánamashëngo y tbojanótbema. ¹⁵Moisesbe leyiñe y Bëngbe Bëtsabe juabna oyebuambnayëngbe uabemana libréšangañe tmojanalía orna, chë enefjuana yebnentša mándayënga canÿa tmojanichmó chënga jáuyanama: —Israeloquënga, bënga fsëntseboše entšanga chašmabuayená, nderado ndayá jayanama šmojtsebom-nëse, muentša entšanga añemo chamotsebomnama ca.

¹⁶As Pablo tojantsá y entšángbioye cucuátšeca tojánefjatsëmbo iytëca chamobiamama, y tojánayana: —Šmochjouena Israeloquënga y ndoñe judiënga Bëngbe Bëtsá adórayënga. ¹⁷Israeloca entšanga mondadorana Bëtsá, Bëngbe Bëtsá, bëngbe bëts taitanga tojanëbuáyana, y tojanma chënga corente bëtscanga chamotsemnama, chënga Egiptoca inÿe luarocana ashjajnëngcá imojoyena ora. Y chentšana, cachabe obenánaca chë luarocana chënga tojésanëbuacana. ¹⁸Canta bnëtsana uata nÿetsá, Bëngbe Bëtsá entšanga ndoyena luaroca chënga yojanëuantana, ¹⁹y cha tojanma chë Canaán luaroca canÿsëftentša entšanga chamopochocama y bëngbe bëts taitanga chëngbe fshantsënga nduiñënga tojánabiamama. ²⁰Chë tempo, chë Bëngbe Bëtsá Abrahámioye quem fshantse jatšetayama tbojanšbuachená orscana, y chë tempo, chë bëngbe bëts taitanga

chë fshantse tmojanóyëngacñëntscuana, canta patse y shachna bnëtsana uata tojanochnëngo.

“Chentsana, Bëngbe Bëtsá chëngbiana mandadënga tojánabiana, Bëngbe Bëtsabe juabna oyebuambnayá Samuel chëngbe mandayá yojéftsemna tempëntscuana.

²¹ Chentsana, Israeloquënga Samuel tmojanimpadá canye rey chabojayé chaotsamëndama; as Bëngbe Bëtsá Saúlbioye chëngbe rey tbojánbema, canta bnëtsana uatëscama. Saúl inamna Cisbe uaquiñá y Benjaminbe bëts pamillanguentsá.

²² Más chcoyna, Bëngbe Bëtsá Saúlbioye chë mandayentsana tbojtsanjuaná, y chentsana Davídbioye mo chëngbe reycá tbojánbema. Chabiana Bëngbe Bëtsá tojánayana: ‘Atse sëndétatšëmbo, David, Isaíbe uaquiñá, canye tšabe entsá yomnama y chama atse sëndoyejuá, y cha sempre endëprontana ntšamo atse stsebošcá jtsamama ca.’

²³ Davídbentsana canye entsá Jesús enjamna, nda Bëngbe Bëtsá tbojanichmó Israeloca entsanga jabátsebacama, ntšamo cach Bëngbe Bëtsá chëngbe bëts taitanga tojanašebuachenacá. ²⁴ Cabá Jesús ndëbocna ora, Juan nyetsca Israeloquënga tojanabuayená bacna soyënga amana chamotsajbanama y chamuenábayama.

²⁵ Juanbe trabajo jopochócama yojtsobeco ora, cha tojánayana: ‘¿Nda atse tsmënama tšëngaftanga šmojuabná ca? Chë tšëngaftanga šmontsejuabná atse tsmëna ca cha, atse ndoñe quetsátsmëna. Pero átšbentsana echanjabo canya, y atse merecido taitatsobuajoñe ni mo jotsejbiyama chabe shecöchëtjonëshentsá corriëja jajafjonama ca.’

²⁶ “Chcase morna, Abrahámbentsana entsanga y ndoñe judiënga Bëngbe Bëtsá adórayënga; bëngbiana entsemna quem buayenana soye, chë

Bëngbe Bëtsá entsanga játsebacana.

²⁷ Masque cada ochnayté, Bëngbe Bëtsabe juabna oyebuambnayëngbe uabemana palabra monjanalía chëngbe enefjuana yebnentse, Jerusalemntša oyenënga y chentsá mandayënga ndoñe quenjátanësertana nda Jesús bëtsemnama, y chë tmojtsalía soyëngama cach ndoñe. Y chca, chënga Jesús chamóbama tmojánboshjona ora, chë chca amënga tmojanma ntšamo Bëngbe Bëtsabe juabna oyebuambnayëngbe librésangañe iuabemancá. ²⁸ Y masque ndocna bacna soye tmonjáninýena Jesús jóbana chabotsemnama, Pilato tmojanimpadá chaomandá chábioye jóbama.

²⁹ Chentsana, lempe ntšamo Bëngbe Bëtsabe uabemana palabrénguñe iuayancá Jesús eftaca tojanochnëngo ora, chabe ústonënga chë cruzocana tmojtanéštjango y tmojanatbontsá.

³⁰ Pero Bëngbe Bëtsá tojanma Jesús cháuatayenama. ³¹ Chë Galileocana Jerusalemoye cháftaca tmojánanga, baytentscuana Jesús yojánebebuacana; y morna, lempe ntšamo Jesusbiana tmojaninýcá, chënga entsángbeñe montsoyeuambná.

³² “Y chca, mora bënga chë tšabe noticiënga cbontsëtsëtsná. Ntšamo Bëngbe Bëtsá bëngbe bëts taitanga tojanašebuachenacá, ³³ cha tonjama, bënga chë chëngbe entsanguentšëngbiana, chca chaotsemnama. Y Bëngbe Bëtsá chca tojama, Jesús cháuatayenama cha jamëse. Rey David, Bëngbe Bëtsabe uabemana palabrénguñe, segundo salmentšë mëntšá tojanábema, ntšamo Bëngbe Bëtsá Jesusbioye tbojaniyanama: Aca atšbe uaquiñá condmëna.

Mënté entsanga sënjinýanyé aca atšbe Uaquiñá comnama ca.

³⁴ Y tempo Bëngbe Bëtsá chabe uabemana palabrénguñe tojaninýanyé cachá jamama Jesús cháuatayenama y ndoñe

cachiñe chaondóbanama, mēntšá tojá-nayana ora:

Chē ndegombre soyēnga y chē tšabe bendicionēnga ntšamo David sēnjanšbuachenacá,

tšēngaftanga cbochanjátšataye ca.

³⁵ Inyoca Bēngbe Bētsabe uabemana palabrēnguñe, Salmos librēša uabiamnayá, mēntšá tojanábema ntšamo Jesús Bēngbe Bētsábioye tbojanianama:

Aca ndoñe quecochatsleséncia atšbe cuerpo,

chē acbe Uámana oservenabe cuerpo chaotsopochocama ca.

³⁶ David, chabe tempo imojoyenēng-biama tojanma, ndayá cha chaomama Bēngbe Bētsá tojanjuabocá. Cha tojanóbana y tmojanatbontsá chē chabe bēts taitángbioye tmojanētabuantsá lu-arentše, y chabe cuerpo tojanopochocá.

³⁷ Pero chē Bēngbe Bētsá tojanma chauatayenamabe cuerpna, ndoñe tonjanopochocá.

³⁸⁻³⁹ “Asna, baconga y batanga, atše sēntseboše tšēngaftanga quem soye chašmotsetátšēmo: Ndayá Jesús tojanmama, entšanga chēngbe bacna soyēngama perdonánēnga montsemna. Jesúsbeyeca, nyetsca chábeñe tmojtsošbuáchenga, bacna soyēngama perdonánēnga mochántsemna. Ntšamo Moisesbe leyíñe iuayancá tmojanmama, chēnga ndoñe tmonjanobená chca perdonánēnga jtsemnama; nyē Jesúsbeñe jtsošbuáchiyēse chēnga perdonánēnga jtsemnana. ⁴⁰ Cuedado šmochtsebomna, ntšamo Bēngbe Bētsabe juabna oyebuambnayēnga tmojanayancá, tšēngaftangaftaca ndoñe chaondochnēnguama. ⁴¹ Bēngbe Bētsá mēntšá tojánayana:

Šmochjouena. Tšēngaftanga chē ntšamo atše tijayancá šmojtšábotenga, ojanánēnga šmochántsemna y šmochanjóbana.

Tšēngaftanga cabá vida šmobom-nēntscuana, atše bēts soyēnga chanjéftsema,

y masque ndánaca chē soyēngama chacmojtsacúnta,

tšēngaftanga chiñe ndoñe queš-mochatošbuáchiye ca” —Pablo tojanoyebuambá.

⁴² Pablo y chabe enutēnga chē judiēngbe enefjuana yebnentsana tmojéftsanbocna ora, chē ndoñe judiēnga chēngbioye tmojanaimpadá, chē inyē ochnaytescama chē soyēngama más jábuayenama. ⁴³ Chentše chē te jénefjnama tempo tojanopochocá ora, ba judiēnga y ndoñe judiēnga, chē Bēngbe Bētsábioye imojánadorana mo chē judiēngcá, Pablo y Bernabé tmojanéseto. Y chatna chēnga tmojanabuayená nyets tempo chamotsejuabnama, Bēngbe Bētsá chēngbiama tšabe soyēnga yojtsamama.

⁴⁴ Chē inyē semana, chē ochnaytena, nya mo nyetsca chē pueblentše oyenēnga tmojanobeconá Bēngbe Bētsabe palabra jouenama. ⁴⁵ Pero ba entšanga choye jouenama tmojánama chē judiēnga tmojáninye ora, tmojanotjayaná, ba entšanga Pablo imojtseyeunanama; as chēnga tmojanontsé mocá ichámuana ndayá cha yojtsóyebuambnama, y chábioye oyenguayana. ⁴⁶ As Pablo y Bernabé más añémoca mēntšá tojánayana: “Endánēyta, natsana tšēngaftanga, chē judiēnga šmognēnga, Bēngbe Bētsabe palabra jshabuayenana. Pero tšēngaftangna chē palabra šmontsaboté, y šmontsejuabná tšēngaftangbiama ndoñe tšabá yontsemna chē nyetsca tescama yomna tšabe vida jtsebomnana ca; chē causa, bēnga fchantsoñe chē ndoñe judiēngbeñe Bēngbe Bētsabe palabra jóyebuambayama. ⁴⁷ Er Bēngbe Bētsá chama šjanichamó, mēntšá jauyanēse:

Aca tcbonjuábuayana chë ndoñe judiëngbioye tšabe noticiënga jábuayenama, chaósertama.

Y chca, aca chëngbiama cochántsemna mo canye binÿnayacá.

Chca, ácbeyeca nÿets luarënguenache entšanga atše chanjatsebacá ca.”

⁴⁸Chë ndoñe judiënga chca tmojanuena ora, puerta imojtsóyejuaye y tmojanontšë mëntšá ichámuana: “Bëngbe Utabnabe palabra tšabá bëngbiama entsemna ca.” Y chora, chë nÿetsca tescama yomna tšabe vida jtsebomnama Bëngbe Bëtsá tempo tojánabacacanga, tmojanontšë Jesúsbeñe jtsošbuáchiyana. ⁴⁹Y chca, nÿets chë luariñe más entšanga Bëngbe Bëtsabe palabra imojtsuenana. ⁵⁰Pero chë judiënga tmojanoyebuambá, shembásengaftaca Bëngbe Bëtsá adórayënga y uámanënga, y chë pueblentša uámana taitángaftaca, jamama Pablo y Bernabé chabosufrioma y chë luarentšana jtëbuacnama. ⁵¹As, Pablo y Bernabé tbojésanshecstëtonata, judiënga jinÿanÿiyama chënga ndoñe tšabá tmojanmama; y chentšana, Iconio puebløye tbojtsanoñe. ⁵²Pero Jesucristbeñe ošbuáchiyënga corente oyejuayënga imojtsemna, y chë Uámana Espíritu chëngbe ainaniñe corente yojtsemádaye.

Pablo y Bernabé Iconio puebløca

14 Iconioca, Pablo y Bernabé cánÿiñe tbojánamashëngo chë judiëngbe enefjuana yebnentše y corente obenánaca Bëngbe Bëtsabe palabra tbojanoyebuambá. Chíyeca, ba judiënga y ndoñe judiënga Jesucristbeñe imojtsošbuaché. ²Pero chë judiënga Jesucristbeñe ndošbuáchiyënga, chë ndoñe judiëngbioye tmojanayëñaná, Pablo y Bernabebiama podesca chamotsejuabnama. ³Chíyeca, Pablo y Bernabé bayté chentše tbojanototoná

y ndauatjcá Bëngbe Utabná Jesucristbiama tbojanoyebuambá. Bëngbe Utabná obenana chata tojanatšatá bëts soyënga jtsamama, y chë soyëngaca Bëngbe Utabná entšanga tojaninÿanÿé, ndayá chë ichmónata ibojtsoyebuambnacá ndegombre bëtsemnama, chë Bëngbe Bëtsá nÿetscanga iuababuáñëshanana. ⁴Pero nÿetsca chë pueblentša entšanga ndoñe cachcá imontsejuabnaye; ínÿenga chë judiëngaftaca imojtsemna, y ínÿengna chë Jesucristbe ichmonátaftaca. ⁵As, chë judiënga y ndoñe judiënga chentša mandayëngaftaca tmojanenoyeuná chata jtsatsetšenama y ndëtšbëngaca jtsëbáyama. ⁶Pero Pablo y Bernabé chama tbojántatšëmbona orna, tbojtsanëchañe Listra y Derbe puebløye, Licaonia luarøca, y choca chábuañe luarëngoye; ⁷y chë luarënguenáchnaca, chata Jesucristbe tšabe noticiënga entšanga tmojanabuayená.

Listra puebløca, ndëtšbëngaca Pablo tmojtsanatëchënganja jtsóbama

⁸Listra puebløca inamna canye boyabása jama ndobená. Ndocna te yondobena jana, chca cosheto inónÿna causa. Chë boyabásana yojtsetbemana ⁹ouenana ntšamo Pablo yojtsichamcá. Y Pablo chábioye tbojanonÿinÿé ora, tojántatšëmbona chë šocá tša yojtsošbuáchema, shnaná jtsatsmënama; ¹⁰as Pablo, juayebuáchenëse tbojanianyana: “¡Motsbaná y acbe shecuatšëngaca tšabá motsa ca!”

Chora chë boyabása, canye jontsënjëse tojantsá y yojóntša anana. ¹¹As chë entšanga, ndayá Pablo tojanmcá tmojáninÿe ora, tmojanontšë uayebuáchna chë Licaonia luarentša biyañe, mëntšá: “¡Bëngbe diosënga bëngbioye tbojátsuma mo entšatcá ca!”

¹² Bernabé imojtsábobuatma Zeus ca, mo chë chëngbe diosënga amënday-acá; y Páblëna Hermes ca, mo chë inye diosëngbiama oyebuambnayacá. Páblëbioye chca imojtsábobuatma, er cha más yotsoyeuambná. ¹³ Zeusbiama chentša bachna inabomna canye yebna chë pueblo chaboca, chábioye jadórama. Chë bachna, uacnënga tojanénatse y uantšëfjushangá tojanëyamba chë Zeus jadórama yebnentša amashjuanoye; y cha y chë entsänga imojtseboše chë uacnënga jashebuáyana y jajuinüyiana, chca, chë ichmonátbioye jadórama.

¹⁴ Bernabé y Pablo chama tbojántatšëmbona ora, entsáyá tbojtsanenántšajatanëca, entsänga jinýanüyiyama, ntšamo chënga imojtsamcá chata tondaye yonjógusetama, y tbojéftsanotjajo entsangbe tsëntsajana y mëntšá ibojtsaychembumbuana:

¹⁵ “Baconga y batanga, ¿ndáyeca chca šmojtsama ca? Bëndata cach tsëngaftangcá entsata fsëndmëna. Muentšë bëndata fsëntsemna nye jábuayenama Bëngbe Utabná Jesucristbe tsäbe noticiënga, tsëngaftanga chë quem ndoservenä soyënga, vida ndbomna soyënga adórayana chašmotsajbanama, y Bëngbe Bëtsá Ainabe benache chašmatishachama. Ndegombre, cha tojanma celoca, fshantse, nyetsca béjayënga y lempe ntšamo chenache yobinýncá. ¹⁶ Masque tempo, Bëngbe Bëtsá entsänga tojanalesenciá cada ona chaoma ntšamo tojtsejuabnacá, tsabá cachëngbiama yojtsëmnayeca, ¹⁷ Bëngbe Bëtsá ndocna te ntjájbanana tsëngaftanga jtsinýanüyayana, cachá tojama tsäbe soyëngaca, mocna Bëtsá cha yomnana. Cha endama tsëngaftangbiama chauaftema y chë matënga botamana chaoshájonama, y becá saná cmondatsatná; y cha endama tsëngaftangbe ainanië corente

oyejuayana chašmotsebomnama ca” —chata tbojánayana.

¹⁸ Masque chë soyënga tbojánayana, nye batšatema más bën y ya ndoñe matbënjanoenata chë entsänga jtsëuyanana uacnënga jashebuáyama, chca, chátbioye jadórama.

¹⁹ Chca ora, básefta judiënga tmojánashajna Pisidioca, Antioquócana y Iconiocana, y chentša entsängbioye tmojanayëñaná, Jesucristbe ichmonatbe contra chamotsemnama. Chcasna, Pablo ndëtšbëngaca imojtsënanaye y chabe cuerpo chë pueblo chaboye tmojtsansjojó, er chënga imojtsejuabnaye Pablo ya obaná yojtsemna ca. ²⁰ Pero Jesucristbeñe ošbuáchiyënga Pablo tmojanóbobuashcona orna, cha tojtantsbaná y cachiñe chë puebloye tojtesaná; y chë yëfsana, Bernabéftaca Derbe puebloye tojána.

²¹ Derbe puebloca Jesucristbe tsäbe noticiënga entsänga tmojanabuayená, y chca, entsänga Jesucristbeñe imojtsošbuáchiye. Chentšana chata tbojésanshëcona Listra, Iconio y Pisidioca Antioquiye. ²² Chë luarënguenache chata ibojánana chë Jesucristbe ustonëngbioye atañëmuaye, cada te chábeñe más chamotsošbuáchemä. Y entsängbioye tmojanéyana: “Bëngbe Bëtsabe amëndayoye jamashëngamna, bënga šontsamna quem luarentšë bëtscá jëftsepadecénana ca.” ²³ Nyetsca ošbuachiyëngcá enefjuanenache, bëtšëjemëngcá mándayënga tmojanabacacá, chentša Jesucristbeñe ošbuáchiyënguentšana, cachënga chentša ošbuachiyëngbioye jtsamëndayama. Bëngbe Bëtsá jëtschuayama tondaye ntjascá imojtsemna y cháftaca imojtsencuënta ora, cha tmojanimpadá, chë ošbuáchiyënga Bëngbe Utabnabe

cucuatšiñe chamotsemnama, ndábeñe chënga imojtsošbuaché.

**Pablo y Bernabé, Siroica
Antioquía pueblöye tbojtánata**

²⁴ Pisidia luarējana tbojánachnëngo ora, Panfilia luaröye tbojánashjango.

²⁵ Perge pueblentše Jesucristbe tšabe noticiënga entšángbioye tmojanabuayená, y chentsana Atalia pueblöye tbojánata. ²⁶ Chentsana, Bernabé y Pablo, bejaycá tbojtánata Siroica Antioquía pueblöye. Chentsa entšanga Bëngbe Bëtsá tmojanimpadá chata chabe cucuatšiñe chabotsemnama, chë trabajuñe chaotsanjenama; y chorna, chë trabajo ya tbojanpochocá.

²⁷ Choye tbojtánashjango ora, nyetsca Jesucristbeñe ošbuachiyëngbioye tmojánachembo, y tmojanacuntá ntšamo Bëngbe Bëtsá tšabe soyënga chátaftaca tojanmama, y ntšamo Bëngbe Bëtsá tojaninjanýé, chë ndoñe judiëgnaca chamotsobenama Jesucristbeñe jtsošbuachiyama. ²⁸ Y Pablo y Bernabé bayté chentše tbojanototoná Jesucristbeñe ošbuachiyëngtaftaca.

**Ichmónënga y bëtsëjemëngcá
mándayënga Jerusalenoca
tmojánenefjna jencuéntama**

15 Chë tempo, báseftanga Judeocana áshjajnënga tmojanontsé, Antioquía pueblentše, chentsa Jesucristbeñe ošbuachiyënga mëntšá jabuátambana: “Base bobachtema chë más delicadentše ndoñe šmonjenotëtšëse, ntšamo Moisesbe leyñe endayancá, ndoñe quenátopodena tšëngtaftanga atsebácanënga jtsemnama ca.”

² Chíyeca, Pablo y Bernabé jabuachana chca buatëmbayëngtaftaca imojánenat-sëtsnaye. Cabana, tmojanëbuáyana Pablo, Bernabé y inyënga Jerusalenöye chamotsama, choca chë Jesucristbe

ichmónëngtaftaca y chë chentše Jesucristbeñe ošbuachiyëngbeñe bëtsëjemëngcá mandayëngtaftaca chama chamencuentama.

³ Chcasna, chë Antioquioca imojánenefjuana Jesucristbeñe ošbuachiyënga Jerusalenöye chënga tmojanichamó. Fenicia y Samaria luarējana imojtsachñëjuana ora, chënga tmojanacuntá ntšamo chë ndoñe judiënga chëngbe tempsca soyënguñe ošbuachiyana tmojtšanajbanama y chora Bëngbe Bëtsábeñe imojtsošbuachema. Jesucristbeñe chentsa ošbuachiyënga chca tmojanuena ora, puerte oyejuayënga imojtsemna.

⁴ Pablo y chë inyënga Jerusalenöye tmojánashjajna ora, chentsa Jesucristbeñe ošbuachiyënga, Jesucristbe ichmónënga y bëtsëjemëngcá mándayënga chëngbioye tmojanëbuaja. Chentsana, Pablo y Bernabé tbojanacuntá lempe ntšamo Bëngbe Bëtsá chátaftaca yojamcá. ⁵ Pero básefta fariseunga, chora ya Jesucristbeñe ošbuachiyënga, tmojantsá y mëntšá tmojánayana: “Chë ndoñe judiënga entsamna chë más delicadentše base bobachtema tëtšënenënga jtsemnana, bënga judiëngcá; y tšëngtaftanga cmontsamna chënga jáuyanana, ntšamo Moisesbe leyënguñe iuayancá chamotsamama ca.”

⁶ As, chë Jesucristbe ichmónënga y bëtsëjemëngcá mándayënga tmojánenefjna jencuéntama, chë ndoñe judiënga añe o ndoñe yonjánamnama chë más delicadentše base bobachtema tëtšënenënga jtsemnana, ntšamo chë judiënga imojanamancá. ⁷ Bën y bëtscá chënga tmojanencuentá chentsana, Pedro tojantsbaná y mëntšá tojanéyana: “Jesucristbeyeca catsátanga, tšëngtaftanga šmondétatšëmbo, ya bayté entsemna Bëngbe Bëtsá tšëngtaftangbentsana

atše šonjanábuayana, Jesucristbe tšabe noticiénga chë ndoñe judiénga jábuayenama, chca, chënga Bëngbe Utabnábeñe chamotsošbuáchema. ⁸Bëngbe Bëtsá jsetatšëmbuana lempe ntšamo entšanga tmojtsejuabnacá. Y cha šonjaninñanýé, chë ndoñe judiéngnaca imnobena chabe entšanga jtsemnama, chábeñe tmojtsošbuáchese, chë Uámana Espiritu chëngbe ainaniñe cháumashënguama cha tojanma ora, ntšamo cha bëngbe ainaniñe tojanmcá. ⁹Y chca, Bëngbe Bëtsabiana nyetscanga cachcá monduámana, judiénga y ndoñe judiéngnaca; y cha tojama chë ndoñe judiéngnaca chëngbe bacna soyëngama perdonánënga chamotsemnama y ainaniñe tšabe juabna chamotsebonnama, Bëngbe Bëtsabe palabriñe jtsošbuáchiyëse. ¹⁰Y mora, ¿ndáyeca tšëngaftanga ndoñe šmontseboše ntšamo Bëngbe Bëtsá tojamcá? Pero tšëngaftanga šmontseboše, chë ndoñe judiénga Jesucristbeñe ošbuáchiyënga lempe chë leyentša mandënga chamotsocumplínama, mo nda inýabioye uauta uasmanésha cuaftsasmëmnacá; pero lempe chë mandënga, ni bëngbe bëts taitanga ni bënga ntsobenana jocúmpliana. ¹¹Y chca ndoñe chaondëtsemna. Bënga mondošbuaché bënga atsebácanënga imomnama Bëngbe Utabná Jesús chabe tšabe juabna šonjaninñanýéyeca, y Bëngbe Bëtsá cachcá chë ndoñe judiéngnaca tojatsebacá ca” —cha tojanéyana.

¹²Chorna, chentše imojtsemna entšanga nyetscanga iytëca tmojanobiama, y tmojanuena Bernabé y Pablo jtsóyebuambnayana, chë bëts soyëngama, Bëngbe Bëtsabe obenana entšanga jinñanýiyama, y inýe soyëngama chabe obenánaca, ntšamo chë ndoñe judiéngbeñe Bëngbe Bëtsá chátaftaca tojanmcá.

¹³Chë útata jóyebuambayama tbojanpochocá ora, Santiago mëntšá tojanayana:

“Jesucristbeyeca catsátanga, šmochjouena: ¹⁴Simón šonjabuayená ntšamo Bëngbe Bëtsá natsana tojaninñanýé, chë ndoñe judiéngnaca cha iuanýenama, y chíyeca cha chënguentšana banga tojubuáyana chabe entšanga chamotsemnama. ¹⁵Ntšamo Simón šonjabuayenacá entsemna cachcá ntšamo chë Bëngbe Bëtsabe juabna oyeubuambnayënga tmojanayancá, ntšamo yochjanopásama y ntšamo Bëngbe Bëtsabe uabemana palabrenguñe endayancá, mëntšá:

¹⁶Chentsána atše chanjésabo y chë Rey Davidbe pamíllanga cachiñe uámanënga chantabiamá; mo nda canýe uáshajayena yebna tojëtsebcá, atše, Davidbe pamíllanga cachiñe uámanënga chantabiamá;

¹⁷chca, chë inýe entšanga chamonguango ndayá jamana atše, tšëngaftangbe Utabná, más chašmotsábuatmama,

nyetsca ndoñe judiénga, chë atšbe entšanga chamotsemnama atše tijábacacanga.

¹⁸Chca atše, tšëngaftangbe Utabná séntsiçhamo, nda ya bayté entsemna tonjanma entšanga chë soyënga chamotsetatšëmbuama ca —chiñe endayana.”

¹⁹Chentsána Santiago mëntšá tojanéyana: “Chíyeca atše séntsejuabná, bënga ndoñe šontsamna chë ndoñe judiéngbiama jamana más totcá chaotsemnama Jesucristo jtséstonama.

²⁰Chamna, šontsamna chënga juabuábiamana y jáuyanana ndoñe chamondëtsetsá, sananga chë ndaye soyënga entšanga tmojuabná diosënga yomna ca jadórama tmojuiyëbana; bacna soyënga shembásënga o boyabásëngaftaca ndoñe chamondëtssama

y ndoñe chamondëtsesá tsešana bayëngbe mëntsëna, y buiñe cach ndoñe ca. ²¹ Er chë natsana tempënga orscana, nyetsca pueblënguenache mondmëna chë Moisés tojëftsanayana soyënga entsángbioye abuaiynayënga; y chabe leyënga, nyetsca ochnayté mondbetsalíaye chë bënga judiëngbe eñejuana yebnënguenache ca” —cha tojanéyana

Chë Jerusalenoca ichmónënga y bëtsëjemëngcá mándayënga canyë tsbuanácha tmojanichmó chë ndoñe judiëngbiana

²² Chentsana, chë Jesucristbe ichmónënga y bëtsëjemëngcá mándayënga, nyetsca chë Jesucristbeñe ošbuáchiyëngaftaca tmojanenoyeuná chënguentšana báseftanga jabacacayama, Pablo y Bernabéftaca Antioquía puebloye jíchamuama. Chcasna, tmojanëbuáyana Judas, chë Barsabás ca uabobuatmá, y Silas; chata ibnamna uámanata chë Jesucristbeñe ošbuáchiyënguentše. ²³ Y chëngaftaca canyë tsbuanácha tmojanichmó, y chiñe mëntsá yojétsayana:

Bënga chë Jesucristbe ichmónënga y chë bëtsëjemëngcá mándayënga, cach tšëngaftangcá Jesucristbeñe ošbuáchiyënga, fséntseboše Bëngbe Bëtsá salúdoca chacmotsábouamna, tšëngaftanga chë ndoñe judiënga, Jesucristbeñe ošbuáchiyënga, Antioquía puebloca y Siria y Cilicia luarëngoca oyenënga.

²⁴ Bënga fséntsetatšëmbo béngbentsšana báseftanga choye tmojángama, bënga ntjamëndacá, y fséntsetatšëmbo mocna soyënga cmojtsabuátambama y chë causa, tšëngaftanga ndoñe šmontsetatšëmbo ntšamo jtsejuabnayana ndayá jamama

yomnana, Jesucristbe canyë ndegombre ustóná jtsemnama. ²⁵ Chcasna, bënga fsënjenoyeuná y šonjúnynana tšabá yojtsemna báseftanga bënguentšana jabacacayana tšëngaftangbioye jontješiyama chamotsama, y Pablo y Bernabé, chë Jesucristbeyeca bëngbe bonshana catšátataftaca, choye chamotsama. ²⁶ Chë útatna ba soye tbojotsbocá vida jáshbiana, Bëngbe Utabná Jesucristbiana oserveniñe. ²⁷ Chátaftaca

Judas y Silas fsënjichamó; y chatna cach tšëngaftangaftaca bochanjóyebuambaye ntšamo quem tsbuanáchañe yojtsábemanama.

²⁸ Chë Uámana Espíritu y bënga cachcá fsëntsejuabná, bënga ndoñe šontsamna tšëngaftanga jamëndana bëtscá jabuache mandënga Moisesbe leyënguiñe chašmotsocumplínama. Nye quem uámana soyënga chiñe añe cmontsamna jtsobedecënaná:

²⁹ Ndoñe šmattsesaye mëntsëna, chë ndaye soyënga entsánga tmojuabná diosënga yomna ca jadórama tmojóba bayëngbiana; ndoñe šmatjofšiyë buiñe, ni šmatjase tsešana bayëngbe mëntsëna; y shembásënga y boyabásëngaftaca bacna soyënga ndoñe šmattsama. Chë soyënga ntšamcá, tšabá šmochanjama.

Bëngbe Bëtsá salúdoca chacmotsábouamna ca —chiñe yojétsayana.

³⁰ Chcasna, chë quem Jerusalenocana ichmónënga tmojésanodiošfantenšana, Antioquía puebloye tmojána; y chocna, nyetsca chë Jesucristbeñe ošbuachiyëngbioye tmojanëbuaja y chë tsbuanácha tmojanayentšbuaché ³¹ Chë Antioquía pueblentsá Jesucristbeñe ošbuáchiyënga ntšamo chë tsbuanáchañe yojtsábemancá tmojanalía ora,

bëts añemo tmojtanca y corente imojtsóyejuaye. ³² Judas y Silas Bëngbe Bëtsabe juabna oyebuambnayata ibnamna; as, chátnaca chë chentša Jesucristbeñe ošbuachiyéngbiye ba soyënga tmojanéyana, chënga añemo chamotsatsbomnama y Jesucristbeñe corente chamotsošbuáchema. ³³ Chentšana baseftaytese, chentša Jesucristbeñe ošbuachiyënga chëngbiye tmojtanadiošoftá, chë ndëmuanýënga tmojanichamóngbiye jtama. ³⁴ Pero Silasna tsábá ibojtsinýana cachentše más jëftsajétanama. ³⁵ Pablo y Bernabé baseftayshinýe Antioquia pueblentše tbojanototóná y ba ínýengaftaca Bëngbe Utabná Jesucristbe tsábe noticiënga entsanga tmojanabuatambá y tmojanabuayená.

**Pablo cachiñe inýe
luarëngoye tojána, Bëngbe
Bëtsabe trabajo jamama**

³⁶ Chentšana baseftaytese, Pablo Bernabébiye tbojanianyana: “Bëngbe Utabnabe palabra tbonjanabuayená luarëngoye bochjésa, choca Jesucristbeñe ošbuachiyënga jábuachama y jányama ntšamo imojtsemnama ca.”

³⁷ Bernabé yojtseboše, Juan chë Marcos ca uabobuatmábíoye chátaftaca jëftsbetšama. ³⁸ Pero Páblëna ndoñe tsábá ibontsinýana cha jëftsbetšana, er Juan chátbentšana tojtsanojuánañe Panfilia luarocana, y ndoñe tonjanatjëmbambá, Bëngbe Bëtsabe trabajo japochócantscuana. ³⁹ Y chë palabrama tondaye tbonjanenóyeunata causna, Pablo y Bernabé cachcá tbojesanenonýaye. Y chca, Bernabé, Marcos tbojéftsanbetše, y bejaycá Chipre luaroye tbojánata; ⁴⁰ y Páblëna, Silas tbojanábuayana jëftsbetšama. Chë Antioquia pueblentša Jesucristbeñe ošbuachiyënga Bëngbe Bëtsá tmojanimpadá Pablo y

Silas Bëngbe Utabnabe cucuatšiñe chabotsemnama, chatbe trabajuíñe chaotsanýënama. Chentšana, Pablo Silaseftaca tbojánbocna y ⁴¹ Siria, Cilicia luarënguëjana tojánachnëngo entsanga añemo atšatnaye, chë luarenache enefjuana ošbuachiyënga Jesucristbeñe más chamotsošbuáchema.

Pablo Timotéobíoye tbojáninýena

16 Chentšana Pablo tojánashjango Derbe y Listra luaroye, y chentše tbojáninýena canýe Jesucristbeñe ošbuachiyá, Timoteo ca uabainá; cha inamna canýe judiá Jesucristbeñe ošbuachiyabe uaquiñá y chabe taitana griego entsá inamna. ² Chë Listra y Iconioca Jesucristbeñe ošbuachiyënga Timoteobíama tsábá imojanoyebuambná. ³ Pablo tojánbošena Timoteo jëftsbetšama; pero cabá ndetsbetše orna, Pablo base bobachtema chë más delicadentše tbojantëtše, ntšamo judiënga imojanamancá. Cha chca tojanma, jobenayama chë judiënga imojoyena luarëngoye cháftaca jama, er nýetsca judiënga imnatátšëmbo Timoteobe taitá griego inamnama. ⁴ Chë ibojtsachnëjuana pueblënguenache chata ibojtsana Jesucristbeñe ošbuachiyéngbiye abuayinaye, ntšamo Jerusalenoca Jesusbe ichmónënga y bëtsëjemëngcá mándayënga tmojanamëndacá, ndayá chë Jesucristbeñe ošbuachiyënga ndoñe judiënga jamama yojtsamncá. ⁵ Nýets luarenache enefjuana ošbuachiyënga, Jesucristbeñe más imojtsošbuachiye, y cada te Jesucristbeñe ošbuachiyënga más imojtsóbotena.

**Pablo mo otjenayoquécá canýe
Macedonioca entsábíoye tbojáninýe**

⁶ Chë Uámana Espíritu, Pablo y Silasbiye tojaninýanýé, chata ndoñe yontsanamna Asia luaroca

Bëngbe Bëtsabe palabra entsanga jábuayenana; asna, tbojánachnëngo Frigia y Galacia luarëjana. ⁷Y Misia luaroca enajëbanoye tbojánashjango ora, tmojanjuabó tsjuana jana, Bitinia luaroye; pero chë Uámana Espíritu tojanabuayená choye ndoñe chabondétsama. ⁸Misia luarëjana tmojánachnëngo ora, Troas luaroye chënga tmojána. ⁹Chë te ibeta, Pablo mo otjenayoquécá tojáninÿe canÿe Macedonioca boyabása ibojtsebiatsana y mëntšá ibojtseimpadana: “Diosmanda Macedonioye mabo y šmabëjabuache ca.” ¹⁰Pablo chca tojáninÿe y cachora lempe tmonjanprontá Macedonioye jama. Atšnaca, chë quem soyënga uabiamnayá, chënga sënjëtsetjembambnaye. Bënga fsënjëtsetjuabnaye ndegombre Bëngbe Bëtsá šojtsanachembuana choye jama ca, Jesucristbe tšabe noticiënga choca entsanga jábuayenama.

Pablo y Silas Filipos puebloca

¹¹As, Troasentsana bejaycá fsënjána Samotracia luaroye, y yëfsana Neápolis puebloye, ¹²y chentšana Filíposoye. Filipos enjamna canÿe uámana bëts pueblo Macedonioca y bëtscá romanënga oyeninë. Chë luarentše baseftayté fsënjanouedanga. ¹³Canÿe ochnaytena, chë pueblentšana fsënjëttsanbocna y chë fshájaye tsachoye fsënjána. Fsënjanuena chentše canjamna canÿe luare Bëngbe Bëtsáftaca jencuéntama ca, y fsënjána janguanguama. Fsënjáninÿena ora, chentše fsënjanotbiama y Bëngbe Bëtsabe palabra fsënjanoyebuambá chentše tmojanóoto shembásengbiama. ¹⁴Enjamna canÿe shembása, Lidia ca uabainá, Tiatira pueblócá, y cha enjamna uámana uabuángana uafjatsenga entsáyá uená. Cha inamna Bëngbe Bëtsábioye adorayá y chentše

Páblëbioye ibotseyeunana. Bëngbe Bëtsá tojanma cha chabosertá lempe ntšamo Pablo yojtsoyebuambnacá, Jesucristbeñe chaotsošbuáchema. ¹⁵Cha y chabe yebnentše oyenënga tmonjánenabaye ora, Lidia mëntšá šonjanaimpadá: “Tšëngaftanga šmonjayana atše Jesucristbeñe ndegombre stsošbuaché ca; chcasna, mabënga yebnoye, átšbentše chašmoquedama ca.”

Y šonjanëtarié bënga chentše joquédama.

¹⁶Canÿe te, chë Bëngbe Bëtsáftaca encuéntaye luaroye fsënjëtsetajna orna, šonjanëbiatše canÿe tobiáše, oservená, bacna bayëjbe juabna uambayá; chë causa cha malisiayá inamna. Chabe nduiñënga becá crocénana imojanójacañe, chë tobiáše yojanmalísiaye soyëngama. ¹⁷Chë tobiáše tonjanontsé Pablo y bënga usetonana y mëntšá enjëtsetchembumbuana: “¡Quem boyabásenga montsemna chë celoca Bëngbe Bëtsabe oservënënga y tšëngaftanga cmontsabuayiyná ntšamo Bëngbe Bëtsá yobena tšëngaftanga játsebacama ca!”

¹⁸Y bayté chca enjanchembumbuana; chë causa, Pablo bonjëtsetana y cabana, tonjanobuértana y chë bacna bayëjbioye mëntšá tbonjaniyana: “¡Jesucristbe obenánaca y cha jótšëmbonëse, cbontsemánda chë tobiášbentšana chacuaisebocnama ca!”

Y cachora chë bacna bayëja chë tobiášbentšana tojésanbocna.

¹⁹Pero, chë bayëjbe juabna chábentšana tojésanbocnama y chëngbiama más crocénana jabemama chora chë tobiáše ndoñe yontsobenama, chë tobiáše nduiñënga tmojáninÿe ora, Pablo y Sílasbioye tmojánishëche y tmojtšanasojoye plazoye, mandayëngbioye.

²⁰ Chë mandayëngbioye tmojanënatse ora, chënga mëntśá imojtsichamo: “Quem boyabásata judío entsata bondmëna, y muatbe causa bëngbe pueblentśa entsanga montsenbouenana, ²¹ y bontsabatambá soyënga jamama ntśamo chë judiënga imuamancá y bëngbe leyënguïne chë soyënga jamama ndoñe quenátslesenciana. Bënga ndoñe queśnátamna ni jouenana, ni jamana chë soyënga, romanënga bëtsemnayeca ca” —chënga imojtsichamo.

²² Chora chë entsanga tmojanontśé uayebuáchana; as, chë mándayënga tmojanamëndá chata entsáyá jtsëtsejquëcana y niñëfjëngaca jtsachebuánganjana. ²³ Jabuache tmojanachebuánganjentsana, cárceloye tmojanautame y chë utámenënga shanjá tmojanmandá yejuana chaotsabuajënyama. ²⁴ Chca tmojanmandá ora, chë utamianá chata tojanënatse chë más tsoye utámenoye y shecuatśentsana tsbuanëšiine tojanatsebuá.

²⁵ Pero tséntseto orna, Pablo y Silas ibnétsocantañe Bëngbe Bëtsá jëtschuayama, y cháftaca ibnéncuentaye; y chë inye utámenëngna chca imojtsuenana. ²⁶ Ndeolpe, corente jabuache yojtsëbánjua y chë utámena yebna fshantsocana yojtsábobjnaye. Cachora, nyetsca chë utámenentśa bëśaśangá tojantëfjo y nyetsca utámenënga chë cadenëjuangá yojtsayentśjafjona. ²⁷ Pero chë utámenënga shanjá tojanofśená y chë utámenentśa bëśaśangá yojtsatëfjnama tojáninye ora, cha tojanjuabó nyetsca utámenënga tmojtsanacheta ca; chë causa, chabe espadëja yojenosëngbotëntśena jtsenóitanama. ²⁸ Pero Pablo tbojánbochembo: —¡Acbe cuerpo ndocá matenábomana; nyetscanga camuentśe fsëndëtsomñe ca!

²⁹ Asna, chë utámenentśa shanjá canye uajuinyanëshá tojanëyá y chë utámenoye ochamanana tojánamashëngo y auatja causa ngmëmnyáy Pablo y Sílasbe shecuatśentśe yojoshëntsamentśiye. ³⁰ Chentśana tojtanëbuacna y tojanëyana: —Señórata, ¿ndayá šojtsemna jamama atśe atsbocaná jtsemnama ca?

³¹ Y chata tbojanjuá: —Bëngbe Utabná Jesúsbeñe cochtsośbuáchiye, y chca, Bëngbe Bëtsá aca cmochanjatsbocá y acbe yebnentśe oyenëngnaca ca.

³² Y cha y nyetscanga chë yebnentśe imojtsemnënga, Bëngbe Utabnabe palabra tmojanabuayená. ³³ Cach ora chë ibeta, chë utamianá chata tojanënatse chë lisianënguïne jetsajabiama. Chentśana, cha y chabe pamíllanga tmojánenabayé. ³⁴ Chentśana, chë utamianá chata tojanënatse chabe yebnoye y saná tojanacaredadó. Cha y nyetscanga chë yebnentśe oyenënga oyejuayënga imojtsemna, Bëngbe Bëtsábeñe imojtsośbuáchema.

³⁵ Yëfsana cachëse, chë mandayëngna soldadënga tmojanichamó, chë utamianá jamándama Pablo y Silas chauatabáshejuanama. ³⁶ Chë utamianá Páblëbioye tbojanianyana: —Chë mándayënga šmonjamandá tsëndata jtabáshejuanama. Chcasna, šontsobena natjëmbana jtsatoñana ca.

³⁷ Pero Pablo chë soldadënga tojanëyana: —Bëndátnaca fsëndmëna mo Romoca onýnanatcá derecho bomnata y šonjáchebuanganja entsangbe delante, bacna soyënga aíñe o ndoñe tatifjamama cabá ndinýanýiye ora, y cárceloye šmonjautame. ¿Y mora imojtseboše iytëcana jtabáshejuanama? Chca ndocna te chaondëtsemna; cach mándayënga chamuabo jabátëbuacnama ca —cha tojánayana.

³⁸Chentshana, chë soldadëngna chë mandayëngbeñe tmojanobuambá ntšamo Pablo y Silas tbojanayancá; chca chënga tmojántatšëmbona chatna mo Romoca onýnanatcá derecho bomnata ibnamnama; chë causa, chë mándayënga puerte imojtsauatja. ³⁹Chcasna, cach mándayënga tmojána chata perdón jatétejañama; chentshana tmojanëbuacna y tmojanéyana: “Diosmanda, muentšana inye luaroye motsoñata ca.” ⁴⁰As chata chë utámenentshana tbojéftsanbocna y Lídiëbe yebnoye tbojéftsanata. Chentsna, Jesucristbeñe ošbuáchiyëngaftaca tmojanenefjna y chata tbojánayana soyëngaca chëngbioye tmojanañemó. Y chentshana, chata ínjoye tbojtsanoñe.

**Tesalónica puebloca, Pablo
y Silasbioye ndoñe
tšabá tmojanëbuaja**

17 Pablo y Silas inye luaroye ibojtsaye ora, Anfípolis y Apolonia bëts pueblënguëjana tbojánachnëngo y canyë bëts pueblo, Tesalónica ca uabáinoye tbojánashjango. Chentše, chë judiënga canyë yebna inmabomna chënga jénefnama. ²Páblëna, ntšamo enjanamancá, cada ochnayté chë jénefnama yebnoye yojánaye, unga semanëntscuana, y chentše chë judiëngaftaca yojanoyebuambná y imojánëtsësnaye. Bëngbe Bëtsabe uabemana palabrënguëña iuayana soyëngaca, ³chënga yojanabuayiná y ndegombre yojaninyäná, Bëngbe Bëtsabe Uámana Uabuayaná jóbanama y chentshana jtayenama ibojamnama. Y mëntšá yojanëtsësná: “Chë Cristo, Jesús endmëna, ndabiama atše cbontsabuayiná ca.”

⁴Judiënguentšana báseftanga chiñe imojtsošbuáchiye y Pablo y Silas tmojanéseto más jouenama. Ba grieguënga, Bëngbe Bëtsá adórayënga,

Jesucristbeñe imojtsošbuáchiye y ba uámana shembásëngnaca. ⁵Pero chë judiënga ndošbuáchiyënga chca tmojáninye ora, puerte envidia imojtsebomna. Asna, chënga tmojánachembo banga, tondaye amënga y bacna entšanga, y chënga tmojanenutaná jamama nyetsca chë pueblentša entšanga chamotsenbouënanama; y canyë entšá, Jasón ca uabainabe yebna chënga tmojtsanabuache, Pablo y Silas jtsanguanguama, chentshana jesëbuacnama y entšangbe cucuatšinë jabáshejuanama. ⁶Pero chentše ndocná tmojáninýena; as chë entšanga Jasón imojtsesjojoye y chentša mándayënga imojétsemnoye tmojanánatse y Jesucristbeñe inye ošbuachiyëngnaca choye tmojanënatse, y mëntšá imojtsáyebuache: “¡Chë boyabásata, chë ndëmuanyata ibojtsama nyetsca luarentša entšanga chamuenbouënanama, quem luaróynaca tbojabo, ⁷y Jasón chabe yebnentše chata tojúbuaja ca! ¡Chënga montsama ntšamo chë Romoca bëts mandadbe mandënguëña ndoñe quenatslesenciancá, er chënga montsichamo inye rey canmëna, Jesús ca, y cha, César chë Romoca mandadbe cuenta nyetscángbeñe yojtsemánda ca!” —chënga imojtsáyebuache.

⁸Chë entšanga y chë pueblentša mándayënga chca tmojanuena ora, corente imojenbouënanana. ⁹Pero Jasón y chë ínýenga, cháftaca imojtsemnënga, crocénana tmojtanjajó, y as tmojtanabáshejuana.

Pablo y Silas Berea Puebloca

¹⁰Ya ibeta yojtsemna orna, chë Jesucristbeñe ošbuáchiyënga tmojanma cachora Pablo y Silas Berea bëts puebloye chabuëtsebocnama. Y chata choye tbojánashjango ora, chë judiëngbe enefjuana luaroye tbojánata. ¹¹Chentshá judiënga imojamna más tšabe

ainana bomnënga chë Tesalonicoca judiëngbiama; chcasna, oyejuayënga chë buayenana soye Jesucristbiama tmojanóyëngacñe, y cada te Bëngbe Bëtsabe uabemana palabra imojanalía, jtsetatšëmbuama, ntšamo Pablo y Silas ibojtsëtsësnacá afñe o ndoñe ndegobre yojtsemnana.¹² Y chca, ba chentša judiënga chatbe palábraca Jesucristbeñe imojtsošbuáchiye, y Grecia luaroca ba uámana shembásenga y boyabásengnaca.¹³ Pero, Pablo Bereoca chë Bëngbe Bëtsabe buayenana soyama entšanga yojtsabuayiynama chë Tesalonicoca judiënga tmojántatšëmbona ora, chënga choye tmojána y tmojanma chentša entšanga chamuenbouéanama.¹⁴ Chcasna, banga Jesucristbeñe ošbuáchiyënga tmojanma cachora Pablo chentšana chauétebocnama y béjaye tsachoye chaotsoñama; chëntscuana, Silas y Timoteo Bereoca tbojanoquedá.¹⁵ Pablo tmojantjëmbambá entšangna, Atenas ca uabaina bëts pueblóntscóne cháftaca tmojána. Chentšana, Pablo chënga tojanabuayená chamuaišshéconama Silas y Timoteo jaúnayama betscó jtsayana, Pábloftaca jateninñenama.

Pablo Atenas puebloca

¹⁶ Pablo Atenas bëts puebloca Silas y Timoteo yojtsëbatmanëntscuana, puerte tbojanongmé, er cha tojáninñe chentša entšanga imojtsadorana bëts cá cachëngbe pormana soyënga, ndayama chënga imojanjuabná diosënga yojamna ca.¹⁷ Chíyeca, chë judiëngbe enefjuana yebnentše, judiënga y ndoñe judiënga Bëngbe Bëtsá adorayëngaftaca imojánenatsëtsnaye, y cada te chentša plazoca chë ndëmuanñyënga chentše imojanashjauanëngaftácnaca.¹⁸ Y báseftanga, ntšamo jtsejuabnayama entšanga abuatambayënga, epicureunga y estoiquënga ca uabainëngnaca

Pábloftaca imojánenatsëtsnaye. Inyënga imojtsichamo: “¿Ndayama quem bostero yojtsoyebuambná ca?” Y inñyënga: “Chana inñe luarëngoca entšangbe diosëngbiama muentše entsabóyebuambnaye ca.”

Chënga chca imojtsichamo, er Páblëna Jesusbiama y chë obanënga jtayenama yojanoyebuambná.¹⁹ Asna, chentša entšanga cha tmojanánatse canñe luaroye, entšanga jénefnama y oyebuambnayënga joyaunayama luare, Areópago ca uabáinoye. Chentše imojanamana uamanënga jénefnana, nderado ndabiama jayanama tsábá o ndoñe tsábá tonjamama. Chora Pablo tmojantjá: —¿Chë aca contsabuatambá soyënga ndayá bëtsayanana bënga quefstobena jtsetatšëmbuama ca?²⁰ Aca tsëm soyënga šcontsëtsëtsná y bënga fsëntseboše jtsetatšëmbuana ndayá chë soyënga bëtsayanana.

²¹ Er nñyetscanga Atenasentša oyenënga y inñe luarëngocana áshjajnëngna, corente yojanogúsetana chë tojtsopasana tsëm soyëngama jtsuenanana y jtsencuëntayana.

²² As Pablo tojantsá chëngbe tsëntsaca chë Areópago ca uabáinentše y tojánayana: —Atenasentša entšanga: ntšamo bominñe sënjjajjá, atše sëntsetatšëmbo tsëngaftanga ba diosënga puerte šmayaunana y šmadoránama.²³ Atše sëndánrreparana tsëngaftangbe diosënga šmétsadorana luarënguenache y sënjinñyena canñe altar y chentše mëntšá iuábemana: “Chë Bëtsá nduabuatmabiama ca”. Y morna, chë Bëtsá chë nda ntsabuatmcá šmadoránabiama, atše cbontsabuyiyná.

²⁴ “Chë Bëtsá quem luare y lempe ntšamo chentše yomncá tojanma; cha endmëna quem luarentše y celoca Utabná, y cha ndoñe quenatiyena cha jadórama entšangbe jebna yebnënguñe,

²⁵ ni quebnatájaboto ndocná chabiamá tondaye chaondétsama, er cha endmëna nda inétsama bënga vida chamotsebomnama y jtseshachnayama chamotsobenama, y cha nyetsca soyënga šnetsátšatnaye.

²⁶ “Cha nÿe canÿe boyabás-abentšana nÿets luarënguentsa entsänga tojánabiamá, nÿets quem luarentše chamotsiyenama; y cha quem soyënga cabá ndëma ora, tojanjuabó mocna ora y ndayentše entsänga chamuetsiyenama; ²⁷ chca, Bëngbe Bëtsá chamonguanguama, masque chabiamá ndoñe corente tmontsetátšëmbo, y chamuinÿena y chábeñe chamotsošbuáchema; pero ndegombre, Bëngbe Bëtsá bëngbentše cada cánÿabentšana ndoñe bënoca quenátšmëna. ²⁸ Ntšamo canÿa tojanayancá: ‘Bënga Bëngbe Bëtsáftaca cánÿiñe mo canÿacá mondmëna; chábeyeca bënga vida mondbomna, jobónjuama mondobena y ainënga mondmëna ca’. Ntšamo tšëngaftanguentsa báseftanga bëts soyëngama uabiamnayëngnaca tmojanayancá: ‘Bënga nÿetscanga Bëngbe Bëtsabe básenga mondmëna ca’. ²⁹ Y chcasna, Bëngbe Bëtsabe pamíllanga bënga tmomñese, ndoñe quešnátamna jtsejuabnayana Bëngbe Bëtsá yomna mo cach entsangbe castellano, midio o chë ndëtsbeca pormana soyëngcá ca, er chë soyëngna nÿe ntšamo entsänga tmojajuabocá y tmojtsobencá japórmana. ³⁰ Pero Bëngbe Bëtsá tojanjuabó ndoñe ntjatonyáyana chë entsangbe tempasca ndosertánana, y morna, nÿetsca luarënguentsa entsänga entsamënda, ndaye bacna soyënga tmojtsamama ngmënacá chamuenojuabó, chca amama chamotsajbaná y Bëngbe Bëtsabe benache chamuatishache ca. ³¹ Bëngbe Bëtsá canÿe te tojuinÿaná, y chë tena,

ndocnábioye ínÿabiamá más tšabá ntjatonyáyacá, cha echanjayana entsänga tšabá o ndoñe tšabá tmonjamama; lempe chca cha echanjama canÿa cachá tbojabocacá entsáftaca, Jesús; y chca yochtsemnamna, Bëngbe Bëtsá entsänga tojinÿanÿé, chë bocacaná Jesús cháuatayenama cachá tojánmayeca ca” —Pablo tojánayana.

³² Chë obanënga mochtayenama ichámuana chë entsänga tmojanuena ora, báseftanga Pablo imojtsáboyejuana, y ínÿengna mëntšá imojtsichamo: —Bënga fsëntseboše chë contsichamo soyënga más chcoye cachiñe jatuenama ca.

³³ As Pablo chëngbentšana tojésanbocna. ³⁴ Pero báseftanga aíñe Jesucristbeñe imojtsošbuáchiye y Pablo tmojanasto más jatuenama; chënguentsa imojamna Dionisio, canÿa chë Areopagoca tbiamanënguentsá; canÿe shembásanaca, Dámaris ca uabaina, y ínÿengna.

Pablo Corinto puebloca

18 Chë soyënga to-janochnënguentsana, Pablo Aténasentšana Corinto bëts puebloye tojána. ² Chocna, canÿe judío Ponto luaroca onÿnanáftaca tbojáneninÿena, Aquila ca uabainá. Cha y chabe shema Priscila, cabá chora cuenta Italia luarocana tbojánabo, nÿetsca judiënga Romocana chamuáisebocanama choca bëts mandado Claudio tojanmandá causa. Pablo tojána chata jautsëtsayama, ³ y ntšamo chata jamama Páblënacá jamama inatátšëmboyecna, chátaftaca yojtsoquedañe y cánÿiñe chënga imnatrabájaye; chënga imnatátšëmbo mo tambotemëngcá entsëjuaca japórmana. ⁴ Y nÿetsca ochnayté, Pablo yojanamana chentša judío entsangbe enefjuana yebnoye jana, Bëngbe

Bëtsabe soyëngama jóyebuambayama, y puerte yojtsentsëna judiënga y ndoñe judiënga chamotsošbuáchema, ntšamo cha yojtsanëtsësnacá ndegombre bëtsemnama.

⁵Silas y Timoteo Macedoniocana choye tbojánashjango ora, Pablo nyets tempo Bëngbe Bëtsabe soyëngama entsãnga yojtsabuayiynaye y puerte tšabá chë judiënga yojaninyãná, Jesús ndegombre Bëngbe Bëtsabe Uámana Uabuayaná bëtsemnama.

⁶Pero chë judiënga Páblëbe contra imojtsemna y tmojanontsé podesca chabiamana ichámuana. Asna, Pablo chabe uichëtjonyangá yojtsenántšas-jajaye, chënga jinyanjyiyama chënga ndoñe tšabá tmonjãnhjanguama, y tojanéyana: “Tšëngaftanga ndatsebãcanënga chašmojóbanëse, cach tšëngaftanga šmochtsótatšëmbñe; atšna ndoñe. Mëntescana chë ndoñe judiënga jábuayenama chantsoñe ca.”

⁷Chorna, chë judiëngbe enefjuana yebnentšana tojéftsanbocna y canyë boyabása, Ticio Justo ca uabainábioye tojtsanoñe. Cha Bëngbe Bëtsábioye ibojánadorana y chë enefjuana yebnentša juachaca inoyena. ⁸Y Crispo, canyë chë enefjuana yebnentša mandayá, Bëngbe Utabná Jesucristbeñe yojtsošbuáchiye y nyetsca chabe pamíllangnaca; y banga chë Corintentsëngnaca Jesucristbeñe imojtsošbuáchiye, Pablo yojtsoyebuambná ora; y chënga tmojánenabaye. ⁹Canyë ibeta, Bëngbe Bëtsá Páblëbioye mo canyë otjenayoquécá tbojanianaya: “Ndoñe matauatjana; nyë cochtsana atšbe soyëngama oyeuambnaye y ndoñe iytëca cattsemana. ¹⁰Er atšë ácaftaca sëntsemna y ndocná quecmochátsbojajo ntšãmnaca jáborlama; atšë bëtscá entsãnga quem pueblentšë sëndábamna ca.” ¹¹Chcasna, Pablo Corintentsë canyë uata y chnénguana shinjyë

tojanototoná, Bëngbe Bëtsabe palabra entsãnga abuátambaye.

¹²Pero, Galión chë Acaya luarentša mandado inamna orna, chë judiënga imojenóyeunaye Páblëbe contra; cha tmojánishache y chë tribunaloye tmojanánatse. ¹³Chocna, chë mandado tmojanianaya: —Mua entsãnga entsëtsësná y entsama chënga Bëngbe Bëtsá chamot-sadorana, pero ndoñe ntšamo bëngbe leyënguñe endayancá ca.

¹⁴Pablo jóyebuambayama uatajanóntša orna, Galión chë judiënga tojanéyana: —Quem entsá nderado inyábioye matbënjóba o ndayánaca chca matënjobuachjanguá, as cocayé atšë matijótbema tšëngaftanga judiënga yejuana joyaunayama; ¹⁵pero ntšamo šmotsichamcá entsemna nyë बातëmbana soyëngama, nyë tšëngaftanga šmëbuatma entsãngbiamana y cach tšëngaftangbe leyëngama; chcasna, cach tšëngaftanga cmontsamna jenóyeunayana y jamana ntšamo chašmojenoyeunacá. Atšë quem base soyëngama ndoñe quetsátsbošë ngoberna jtsemnana ca.

¹⁶As Galión tojanamëndá chë tribunal luarentšana chë judiënga jtëbuacnama.

¹⁷Chorna, chë entsãnga tmojánishache chë judiëngbe enefjuana yebnentša mandayá, Sóstenes ca uabainá, y Galionbe delante imojtsejantšetaye. Pero Galión chë soye tondayana ibontsentšamna.

**Pablo Antioquiyoje tojtaná
y chentšana cachiñe inyë
luarëngoye tojána, Bëngbe
Bëtsabe trabajo jamama**

¹⁸Pablo cabá bayté Corintentsë tbojántotona. Chentšana, Jesucristbeñe ošbuachiyëngbentšana tojesanodiošoftá y bejaycá Siria luaroye tojána, Priscila y Aquílaftaca. Cabá Sirioyenda ora, Cencrea puebloca nyets stjénashe yojtsenántšotje, Bëngbe

Bëtsábioye jinjinyiyama canye soye tbojanšbuáchenama. ¹⁹ Efeso pueblöye tmojánashjajna ora, Páblëna Priscila y Aquila tojésanabashejuana. Chentšana, cha tojána chë chentša judiëngbe enefjuana yebnoye y chentše chë judiëngaftaca yojanoyebuambná y imojánenatsëtsnaye. ²⁰ Báseftanga Pablo tmojanimpadá inye baseftayté chentše chauesomñama, pero chana ndoñe tonjanoyauná; ²¹ chentšana, chëngbentšana tojesanodiošoftá, mëntšá jëftsëyanëse: “Nderádose cachiñe chantésabo tšëngaftanga jabábuachama, Bëngbe Bëtsá šojalesenciase ca.”

Chora, Pablo bejaycá Efesocana tojëftsanbocna. ²² Cesarea pueblöye tojánashjango ora, tojána jacheuayama Jesucristbeñe ošbuáchiyënga Jerusalemoca; y chentšana Antioquiöye tojána. ²³ Chentše baseftayté yojëftsemna; y chentšana, Pablo tojesaná Galacia y Frigia luarënguenache, Jesucristbeñe ošbuáchiyënga añemo atšatnaye.

Apolos, Efeso puebloca Bëngbe Bëtsabe soyëngama yojanabuayiná

²⁴ Cach tempo, Efesoye tojánashjango canye judío, Apolos ca uabainá, Alejandría bëts pueblócá; cha puerte obená inamna jonguamiyama y corente inatátšëmbo Bëngbe Bëtsabe uabemana palabrengama. ²⁵ Bëtscá tojánatsjinye chë Bëngbe Utabná tojaninnyané benachama; añémoca yojanoyebuambná y Jesusbe soyëngama botamana yojanabatambá, masque cha nye ntšamo Juan entšanga tojánabatambama y tojanëbáyama inatátšëmbo. ²⁶ Ndauatjá Apolos tojanontšë jóyebuambayama chë judiëngbe enefjuana yebnentše. Pero Priscila y Aquila cha imojóyeunaye ora, barie tmojanchembo y más botamana tmojanbuayená, ntšamo

Bëngbe Bëtsabe injinyëna benache bëtsemnama. ²⁷ Apolos Acaya luaroye jama yojtseboše orna, Jesucristbeñe ošbuáchiyënga bëtscá tmojanañemó y choca Jesucristbeñe ošbuáchiyëngbiama canye tsbuanácha tmojanichmó, chca, Apolos choca tšabá chamofjama. Acaya luaroye tojánashjango ora, Jesucristbeñe ošbuáchiyënga bëtscá tojanëjabuache. Bëngbe Bëtsá chëngbe tšabiama yojanjuabnáyeca, chënga Jesucristbeñe corente imojtsošbuáchiye. ²⁸ Entšangbe delante chë judiëngaftaca jabuachana imojánenatsëtsnaye y nyetscanga tojaninnyané, ntšamo ndoñe tšabá inamncá chë judiënga imnatatšëmbuama; y Bëngbe Bëtsabe uabemana palabrengaca chënga tojaninnyané, Jesús Bëngbe Bëtsabe Uámana Uabuayaná bëtsemnama.

Pablo Efeso puebloca

19 Apolos Corintoca yojtsemnëntscuana, Páblëna chë tjañe luarënguëjana tojánachnëngo y Efesoye tojánashjango; chentše básefta ošbuáchiyënga tojánanyëna, pero chëngna nye ntšamo Juan chë Ubayaná tojanabatambacá imnatátšëmbo. ² Pablo chënga tojanatjá: —¿Uámana Espiritu chenjánabo tšëngaftangbe ainaniñe jtsemándayama, Jesucristbeñe ošbuáchiyënga šmojanóbiama ora ca?

Chora chënga tmojanjuá: —Ni mo queftsátstatšëmbo chë Uámana Espiritu yomnama ca.

³ Y Pablo tojanéyana: —As, ¿ntšamo šmojánenabaye ca?

Y chënga tmojanjuá: —Fsënjánenabaye ntšamo Juan entšanga yojanëbayancá ca.

⁴ As Pablo tojanéyana: —Juan tojanëbaye chë bacna soyënga amama ngménaca tmojanenojuabó, chca amana tmojanajbaná y chë Bëngbe Bëtsabe benache tmojánishachënga,

y entsanga yojanëtsëtná chë chábensana yochjanashjanguábeñe chamotsošbuaché ca; y cha Jesús endmëna ca —Pablo tojánayana.

⁵Chca tmojanuena ora, chënga tmojánenabaye Bëngbe Utabná Jesús jótšëmbonëse, chábeñe imojtsošbuáchema. ⁶Pablo chëngbe bestšašinë chabe cucuatšënga tojanajó ora, Uámana Espíritu chëngbe ainaniñe tojánamashëngo jtsemándayama; tmojanontšë inyetšá biyangana, chënga tempo ndmabiyañe, y Bëngbe Bëtsabe juabna imojtsoyebuambná. ⁷Chentšë imojtsemna bnëtsana uta entsanga.

⁸Unga shinjëntscuana Pablo yojánaye chë judiëngbe enefjuana yebnoye y ndauatjá Jesucristbe soyëngama yojanoyebuambná; entsángaftaca imojánenatsëtsnaye y entsanga yojanëtsëtná Bëngbe Bëtsabe améndayama, chënga chábeñe chamotsošbuáchema. ⁹Pero ba nduauenanënga ndoñe imontsošbuaché y Bëngbe Utabná tojaninÿanyé Benachama entsángbeñe bacna soyënga imojtsichamo. Chcasna, Pablo chëngbentsana tojtsanojuánañe y nÿe chë Jesucristbeñe ošbuáchiyënga tojanëbuaja canÿe scueloye, canÿe entšá Tirano ca uabainabe yebnoye. Chentšë cada te chë ouenanëngaftaca yojanoyebuambná, ¹⁰y chca yojánama uta uatëntscuana; y chca, nÿetscanga Asia luaroca oyenënga Bëngbe Utabnabe palabra tmojanuena, judiënga y ndoñe judiëngnaca. ¹¹Y Bëngbe Bëtsá puerte bëts soyënga Pábloftaca yojtsama. ¹²Tša bëts soyënga tojanma; chífyeca, nÿetsca chë Pablo tojuabojajo entsáyá y pañuelëjuangá, entsanga imojanamana šoquëngbioye juyambana, y chca tmojama orna, chë šocanënga juenatjëmbana y chë bacna bayëjënga entsángbentsana jësebocanana.

¹³Pero básefta judiënga tsáshenañe bacna bayëjënga entsángbentsana imojtanëbuacana. Chë judiënga imojtseboše chë bayëjënga jtëbuacnana, Bëngbe Utabná Jesús jótšëmbonëse. As, chë bacna bayëjëngbioye mëntšá imojtsët-sëtsnaye: “Bëngbe Utabná Jesús, Pablo bondbetsebayaná jótšëmbonëse y chabe obenánaca cbontsamënda muabentsana chašmuaisebocnama ca.”

¹⁴Chca imojánama chë judío Esceva ca uabainabe canÿsëfta uaquiñënga. Esceva inamna bachnangbe amëndayá. ¹⁵Pero canÿe, Escëvébe uaquiñënga chca tmojánayana orna, chë bacna bayëja mëntšá tojanëjua: “Atšë Jesús sënduábuatma y sëndétatšëmbo nda Pablo yomnana; pero tšëngaftanga, ¿ndëmuanyënga šmomna ca?”

¹⁶As, cachora chë bacna bayëjbe juabna uambayá chëngbioye tojanontsënja y tša añemo bomná bëtsemnayeca chënga tojtsanayëñaná, jabuache jtsajantšëtaÿëse; chë causa, chënga chë yebnentsana tmojtsanacheta enašënga y lisiánënga. ¹⁷Nÿetscanga Efesoca oyenënga, judiënga y ndoñe judiënga, chca tmojántatšëmbona y corente imojtsanauatja. Y chca, Bëngbe Utabná Jesús entsanga más imojtsatschuanaye.

¹⁸Jesucristbeñe imojtsošbuachiyënguentšana, banga imojánashjajuana y entsangbe delante imojtsecompšaye, tempo bacna soyënga tmojanmama; ¹⁹bangá, chë bocjuanana soyënga jamama imojanëntšënënga, chëngbe bocjuanana librëšangá tmojaniyëbo y entsanga imojtsantješna ora, chëšangá imojtsajuinÿiye. Tmojanjuabó ntsachetšá chë librëšangá betsámanama y tojanóbocna shachna bnëtsana uaranga crocënaná nÿetšá. ²⁰Y chca, Bëngbe Utabnabe palabra más ba entsanga imojtsuenana y chiñe

imojtsošbuáchiye y Bëngbe Bëtsá chabe obenana entsángbeñe yojtsinýinýnaye.

²¹ Chca tojanochñëngüentšana, Pablo tojanjuabó Macedonia y Acaya luarënguëjana jachñënguse, Jerusalemoye jésama. Y yojtsejuabnaye cha ibojtsemna Jerusalementsana Romoye jama ca. ²² Asna, chabe uajabuachanënguentšana útata, Timoteo y Erasto, Macedoniaoye cha tojanichamó. Chëntscuana Pablo baseftayté más Asia luarentše tbojanjétana.

Efesoca entsánga tmojánenbouenana

²³ Chë tempo, Efesoca entsánga corente tmojánenbouenana, chë Bëngbe Utabná yojtsinýanýná Benache imojtsisháchichanëngbe causa. ²⁴ Chë entsánga chca tmojanma, er canýe entsá mídioca soyënga pormayá, Demetrio ca uabainá, chënga tojanayëñaná chca jamama. Cha yojanamana binche soyetëmënga japórmana y chëtëmënga yojáninýna mo chë Efeso puebloquëngbe diosá Artemisa jadórama bëts yebncá. Demétrioftaca imojantrabájangna bëts cá crocénana imojanójacañe chë soyetëmënga eniñe. ²⁵ Demetrio tojanébuaja cháftaca imojantrabájangna y ínýenga cach mídioca soyënga pórmayënga, y mëntšá tojanéyana: “Baconga, tsëngaftanga šmondétatšëmbo, bënga bëts cá crocénana jtsebomnamna quem trabajuentsana chca jopódiana. ²⁶ Pero tsëngaftanga šmontsonýá y šmontsuenana ntšamo chë Pablo ca uabainá yojtsichamcá. Cha entsichamo, chë entsángbe pormana soyënga ndoñe yontsemna jtsadoránana ca; y chca ba entsánga tojabuayená y chënga aíne montseyeunana. Chë soyna ndoñe nýe muentše Efesentše chca quenátapasana; nýets Asia luaríñnaca chca entsopasana. ²⁷ Resjo entsemna; chca causa,

entsánga bëngbe trabajuama ndoñe tšabá quemochátichamo y chë uámana Artemisa jadórama bëts yebnama mochántsi chamo uámana yebna ndoñe yondmëna ca. Y chca, Artemisbe obenana entsánga mochantsábotena y Artemisa ndoñe bañe quemochátatuatma, nda Asientše y nýets luaríñnaca mondadorana ca.”

²⁸ Chca tmojanuena ora, chca pórmayënga puerte tojánëtëna y tmojanáyebuachena: “¡Efesoquëngbe Artemisa corente bëtsá endmëna ca!”

²⁹ Y chca, nýetsca chë pueblentša entsánga tmojánenbouenana. Tmojanotabá Gayo y Aristarquëbioye, Macedonioca boyabásata, Páblëbe tjëmbambnayata; y sjojónana tmojanënatse chëngbe enefjuana yebnóntscóñe. ³⁰ Pablo tojánbošena choye jamashënguama chë entsángaftaca jóyebuambayama, pero Jesucristbeñe ošbuáchiyënga ndoñe tmonjanlesenciá. ³¹ Chë Asioca mándayëngbentše báseftanga imnamna Páblëbe amiguënga, y chënga Páblëbioye palabra tmojanafja chë jénéfjnama yebnoye ndoñe chaondámashënguama.

³² Chëntscuana, entsánga imojtsejotonocna, ínýenga imojtsechembumbuana canýe soye y ínýengna inýe soye, chënga corente imojtsenbouenana causa, y banga chentše imojtsemnënga ndoñe imontsetátšëmbo ndayama choye tmojanobéconama. ³³ Pero básefta judiënga, canýe entsá, Alejandro ca uabainá, chë entsángbe natsanoye tmojanajuatsëntše, y báseftanga cha tmojanbuayená ntšamo yojtsopasánama. Asna, Alejandro tojánëfjatšëmbo cucuatšëca iytëca chamobiamama, er cha yojtseboše entsángbe delante chë judiënga jobuauyanama. ³⁴ Pero, Alejandro judío bemnama chë entsánga tmojántatšëmbona ora, nýetscanga

tmojanáyebuachena uta horéntsuaana, mēntśá: “¡Efesoquēngbe Artemisa corente bētsá endmēna ca!”

³⁵ Chē pueblentśa mándayēngbe uajabuachaná, entśanga iytēca jábiamama tojanobená ora, tojanéyana: “Efesoquēnga, n̄yets luariñe endótatśēmo, quem pueblentśe oyenēnga iuamna jtsin̄yenana chē Artemisa jadórama bēts yebna y chē cha jadórama celocana otsatśena ndētśbé. ³⁶ Ndocná quenátobena chama jayanama ndoñe ndegombre yondmēna ca. Chcasna, natjēmbana motsomñēnga y tondaye matamēngana corente tśabá ntjshajuabocá. ³⁷ Tśēngaftanga quem boyabásenga moye šmojunatse, masque Artemisbe yebnentśe tondaye tmonjatbēba y bēngbe Artemisbiana ndoñe podesca tmonjoyebuambá. ³⁸ Demetrio y cháftaca šmotrabájanga, nderado ndabiama ndaye demanda šmojtsebomnēsna, cabildoca endatēfjna y chentśe mándayēnga montsemna chē demandēnga jouenama, y chēngbentśe cada ona šmochjēftsendemánda. ³⁹ Y tśēngaftanga in̄ye soye šmojtsenguasna, cmontsamna ntśamo bēngbe leyēnguñe yomandancá, n̄yetsca quem pueblentśe oyenēngaftaca jenóyeunayana. ⁴⁰ Ndayá mēnté tojopasá causa, resjo entsemna bēngbiana chamuayana, ntśamo leyēnguñe yomncá bēnga ndoñe montsama ca; y bēnga ndoñe quemúatobena ndayá jojuana, ndáyeca quem enbouenanana tojopasá ca šojátjayēse ca” —cha tojanéyana. ⁴¹ Y chca jayanēse, chē entśanga tojtanichamó.

Pablo, Macedonia y Grecia luaroye tojána

20 Chē enbouenanana tojanochnēngo ora, Pablo chē Jesucristbeñe ošbuachiyēngbioye tojanébuaja jábuayenama, añemo

chamotsatsbomnama; tojesanodiošoftá y Macedonioye tojéftsanbocna. ² Chē luarēnguējana cha tojánachnēngo Jesucristbeñe ošbuáchiyēnga becá añemo atatśatnaye, ba chabe palabréngaca; chentśana, Grecia luaroye tojánashjango, ³ y chentśe unga ishin̄ye tojanoquedá. Barquēshañe Sirioye játama Pablo yojtseprontana orna, tojántatśēmbona chē judiēnga cha jtsóbama tmojanenóyeunama. Asna, tojanenouabó jeshéconama, cach Macedonia luarējana jésachnēnguse. ⁴ Pablo quem boyabásenga tmojan-tjēmbambá: Sópater, chē Bereocá, Pirrbe uaquiñá; Aristarco y Segundo, Tesalónicocata; Gayo, Derbe pueblócá; Timoteo; y Tíquico y Trófinnaca, Asia luarocata. ⁵ Chēnga tmonjanonatsé y šonjanēbatma Troasoca. ⁶ Chē levadúraca ndēpormana tandēse saye fi-estentśana, Filíposentśana barquēshañe fsēnjéftsanbocna y shachna tianoye, Troasoca chē tmonjanonatsenga fsēntanishēche, y chentśe can̄ye semana fsēnjanoquedanga.

Ntśamo tojanopasá Troas puebloca

⁷ Chē in̄ye semana jobojátśama te, fsēnjánenefjna Jesucristbeñe ošbuachiyēngcá tandēse jajátayama, cán̄yiñe jasama; y Pablo entśanga enjétsētsēsnaye. Cha bonjamna yēfsana chentśana jéftsebocnana; chē causa, más bēn chēngaftaca tonjanoyebuambá, tsēntsetēntscuana. ⁸ Fsēnjamna can̄ye tsoye tśbanana tsañoca y chentśe ba uajuin̄yanēshangá enjanamna; ⁹ y can̄ye bobontse, Eutico ca uabainá, ventanentśe enjántbemana. Pablo bēn enjanoyebuambná causa, chē bobontse ocayana tbojanábuache. Cabana, corente tojtsanomaná ora, chē unga tsañocana tontsanótsatśe y obaná chora tmontanatsbaná. ¹⁰ As, Pablo tonjánastjango, chē bobóntsiyoye

tbonjanotsbuajó y tbonjanotsejcuá. Y chë entsanga tonjanéyana: “Ndoñe nyetsá matauatjéngana; ainá cha entsatsmëna ca.”

¹¹ Chentsana Pablo cach tsbanánoye tonjesaná y tandëse tonjanjatá, jtenójuaboyama ndayá Jesús jóbánese tojanmama. Chora Pablo chë entsángaftaca tonjanse y tontëtanontsé oyebuambnayana, jabinýnëntscuana. Chora Pablo chentsana tontsanofie. ¹² Y chë otsatsëna bobontsna ainá imojtsatánatseñe, y chama chë entsanga corente oyejuayénga imojtsemna.

Pablo Troasentsana Mileto puebloye tojána

¹³ Bëngna fsënjanonatsé y barquëshañe fsënjána Aso pueblóntsoñe, chentsana Pablo jtesbetsama, ntšamo fsënjanenoyeunacá, er Pablo tonjánbošena fshantscá choye jana. ¹⁴ Asoca Pábloftaca fséntaneninýena ora, bëngaftaca barquëshañe cha tonjána Mitilene puebloye. ¹⁵ Chentsana fsënjéftsanbocna y yëfsana Quó luaréjána fsënjánachnëngo, y chë inýe yëfsana Samos luaroye fsënjánashjajna. Chentsana fsënjána y yëfsana Mileto puebloye fsënjánashjajna. ¹⁶ Chca tonjanochnëngo er Pablo ndoñe chenátanbošena Efesoye jama, Asia luaríne ndoñe yapa ndétsemnana. Chca tojánbošena er cha enjéteboše betscó Jerusalenoca jtsatsmënana, tojopodesna chë judiëngbe fiesta, Pentecostés ca uabaina fiestama.

Ntšamo Pablo chë Efesoca ošbuachiyéngbeñe bëtsëjemëngcá mándayénga tojanéyana

¹⁷ Miletocana Pablo tonjanmandá chë Efesoca ošbuachiyéngbeñe bëtsëjemëngcá mándayénga jobiatšana. ¹⁸ Chënga tmonjánashjajna ora, Pablo tonjanéyana: “Tšëngaftanga

šmondétatšëmbo ntšamo atše quem Asia luaroye sënjabánashjango orscana tšëngaftangbeñe snetsamana. ¹⁹ Nyets tempo Bëngbe Utabná sëndëserveda y cach atše uamaná ndoñe quetsatenobiamná. Corente shëchbuiye tijëftsoperdé y ba soyënguiñe tijasufrí, chë judiënga atše jóbama mondboše causa. ²⁰ Y lempe ntšamo tšëngaftangbe tšabiana yomncá tcbonjabuayená; tondaye ntjatsbuetamencá. Nyetscangbe delante sënjabuatambá y tšëngaftangbe yebnënguenáchnaca. ²¹ Judiënga y ndoñe judiënga Bëngbe Bëtsabe soyëngama sënjabuayená, bacna soyënga amama ngmënaca chamuenójuaboma y chca amana chamotsajbanama, Bëngbe Bëtsabe benache chamuishachama y Bëngbe Utabná Jesúsbeñe chamotsosbuáchema. ²² Y mora Jerusalenoye chanjá; Uámana Espíritu chca šontsemánda y ndayá choca chjapásamna ndoñe quetsátstatšëmbo. ²³ Nyë mëntsá añe sëndétatšëmbo: Nyetsca bëts pueblënguenache ndayëjana atše chandbëtsana, Uámana Espíritu šondbëtsebuayinyaye entsanga cašmochjutame y puerte chaisufrima camochjama ca. ²⁴ Atšbe vida cach atšbiana ndoñe yapa quenatámana, chaitsaina o chayóbana. Pero atšbiana iuámanana endmëna ndayá atše jobenayana atšbe trabajo jëftsepochócana, ndayá Bëngbe Utabná Jesús šojanmandá jamama, chë tšabe noticiënga Bëngbe Bëtsá entsángaftaca tšabia yomnana jábuayenama.

²⁵ “Y mora atše ndegombre sëntsetatšëmbo, tšëngaftangbentsana, chë ndëmuanýëngbentše Bëngbe Bëtsabe amëndayama sënjabuayená, ndocná atše más quešmochátinýe. ²⁶ Chíyeca, atše ndegombre mënté cbetséyana: Atše tondaye quetsátstatšëmbo nderado nda ndatsbocaná chaojóbanabiana,

²⁷ er atše ntšamo Bëngbe Bëtsá jamama yojuabnacá lempe tcbonjabuayená, tondaye ntsebueta menciá. ²⁸ Chcasna, cach tsëngaftangbiama šmochtsantješna y nyetscanga muentše Jesucristbeñe ošbuachiyëngbiámnaca. Chëngbeñe mo chëngbe abujënyangcá Uámana Espíritu tcmónjayayé, Bëngbe Bëtsabe entšanga chašmotsanýenama, chënga Bëngbe Bëtsá chá benga tojábiama, chabe Uaquiñabe buiñe juabuáshanése y jóbanése, mo bëtscá cuafjopagacá. ²⁹ Atše séntsetatšëmbo, atše chaitsoñe orna, banga mochanjabo y chënga mochántsemna mo corente tsátjaye tjañe quešëngcá, Jesucristbeñe ošbuáchiyënga chábeñe ošbuáchiyana chamotsajbanama chënga jamama. ³⁰ Y tsëngaftangbentšánënaca báseftanga mochanjábocana y entšángbioye uayátsenaye soyënga mochanjabuatambá, chca, báseftanga Jesucristbeñe ošbuáchiyënga chë ínýëngbentšana chamotsoluarema y nyë chë abuátambayëngbioye chamotsésetonama. ³¹ Chcasna, sempre šmochtsantješna; ndoñe chacmondéb-nëjtjomba, atše unga uatëntscuana, bnëté y ibeta, tsëngaftanga cada ona cbondétsabuayiyinama y chama atše puerte tijasufri.

³² “Y morna, Jesucristbeyeca catšátanga, Bëngbe Bëtsabe cucuatšiniñe cbétsabashejuana y ntšamo tsëngaftangbiama chabe tsabe juabna yomnama palabréngaca, tsabá chašmuesomñe. Cha endobena jamama tsëngaftangbe ainaniñe más chašmotsošbuáchema, y endobena tsabe soyënga tsëngaftanga jatšatayama, ndayá jatšatayama tojanašebuachenacá mo tsëngaftangcá entšángbioye, ndëmuanýënga cha tojáchembo chabe entšanga chamotsemnama. ³³ Atše ndocnabe crocénana, o castellano o entšayá atšbiama quetsatántšaboše;

³⁴ más inýetsá, y tsëngaftanga lempe šmondétatšëmbo, atše cach atšbe cucuatšëca tijëftsetrabajama, atšbiama y átšëftaca imojamnëngbiama opresido enjamna soyënga janguanguama. ³⁵ Atše nyets tempo sëndinýanýná entšá chca ibomnana, chë jabuache jatrabájana y chë ujabótënga jujabuáchana, quem Bëngbe Utabná Jesusbe palabréngama sempre jtsejuabnyése: ‘Canýe entšá más oyejuayá jtsemnana ndayánaca ínýabioye tbojtsatšëtná ora, y ínýabioye tbojtseyëngacá ora ndoñe nýa nyetsá ca’” —Pablo tonjanoyebuambá.

³⁶ Pablo chë soyënga tonjánayanentšana, tonjanoshamentšé y nyetscanga chentše monjëtsemnëngaftaca Bëngbe Bëtsá tmonjanótšëmbona. ³⁷ Nyetscanga tmonjánenobošachna y Pablo tmontanotsejcuá y tmontanámocho. ³⁸ Y entšanga corente ngménaca monjëtsemna, chënga ndocna te más cha mochántinýe ca Pablo tojanéyana causa. Chentšana, chënga chë barquëshá enjetsamnëntscoñe cha tmonjantjëmbambá.

Pablo Jerusalenoye tojána

21 Chë Jesucristbeñe ošbuáchiyënga fsënjëftsanabashejuana ora, barquëshañe fsënjanojoyayé y ndericho Cos luaroye fsënjána; chë yëfsana Rodasoye y chentšana Pátara pueblöye. ² Pátara pueblentše canýe barquëshá fsënjáninýena, Fenicioye enjétsaye; asna, chëshañe fsënjanojoyayé y chentšana fsënjëftsanböcna. ³ Fsëntsanachnëjuana ora, fsënjáninýe Chipre luare; Chipre bëngbe uañicuayoica tonjanoquedá y bëngna Sirioye fsënjétsaye. Tiro pueblentše chë barquëshentša uasmanëshangá jëftšáboshjonama yojámnayeca, chë pueblöye bënga fsënjëftšana-

mashjna. ⁴Chentšna, Jesucristbeñe ošbuáchiyënga fsënjánanyëna y canÿsëfta te chéngaftaca fsënjanoquedá. Chënga Pablo tmonjaniyana cha ndoñe ibonjamna Jerusalenoye jtsayana ca, er chë Uámana Espiritu tojanabuayená ndayá choca cháftaca jopásama. ⁵Chë canÿsëfta te tonjanochñëngo ora, chentšana fsënjéftsanbocna y nyëtsçanga parejo chëngbe shémangaftaca y básengaftaca šonjanatjëmbambá chë pueblo chabóntscoñe; y chentšë, chë chënyañe fsënjanoshamentšë y Bëngbe Bëtsá fsënjanimpadá. ⁶Chentšana, fsënjesanodiošoftá y chë barquëshoye fsëntanášëngo; chentšana chë ošbuáchiyënga cachëngbe yebnëngoye tmontaná.

⁷Tiretšana fsënjéftsanbocna y Tolemaida puebloye fsënjánashajna; y chentšë tonjanopochocá bëngbiama bejaycá chë te ayana. Tolemaidentšë Jesucristbeñe ošbuáchiyënga fsënjanacheuá y chéngaftaca canÿe te fsënjanoquedanga. ⁸Yëfsana, bënga chentšana fsënjéftsanbocna y Cesarea luaroye fsënjánashajna. Chocna, bënga fsënjána Felipe chë Jesucristbiama tšabe noticiënga abuayiynayabe yebnoye y cháftaca fsënjanoquedanga. Felipe enjamna canÿa chë Jesucristbe ichmónëngbioye ujabuachañënguentšá, Jerusalenoca ubuáyanënga. ⁹Felipe enjánabamna canta ndëbouamna bemianga y chënga monjamna Bëngbe Bëtsabe juabna oyebuambnayënga. ¹⁰Ya bayté chentšë fsënjëtsemna orna, Judeocana tonjánashjango canÿa Bëngbe Bëtsabe juabna oyebuambnayá, Agabo ca uabainá. ¹¹Agabo bëngbioye tonjánashjango ora, Páblëbe uasnanëja tonjanca y cucuatšënga y shecuatšënga cachá tonjanenabatsëca y mëntšá tonjánayana: “Uámana Espiritu entsichamo, Jerusalenoca quem

uasnanëja nduñbioye chë judiënga mëntšá camochjama y ndoñe judiëngbe cucuatšëne camochjáboshjona ca.”

¹²Chca fsënjanuena ora, bënga y chentša entšanga Pablo fsënjanimpadá Jerusalenoye ndoñe chaondëtsama. ¹³Chora Pablo tonjánayana: —¿Ndáyeca šmojtsošaché y šmojtsama atšbe ainaniñe puerte ngmëna chaotsemnama ca? Atšë séntseprontana y ndoñe nyë chašmobatsëcama; Jerusalenoca jobanámnaca séntseprontana, Bëngbe Utabná Jesusbiamca —cha tonjánayana.

¹⁴Jáyënjana ndoñe chibiatanobená ora, ndoñe más chibiatanimpadá; nyë mëntšá fsënjaniyana: —Ntšamo Bëngbe Utabná yojtsebošcá chaotsemna ca.

¹⁵Chë soyënga tonjanochñëngüentšana, fsënjanoprontá y Jerusalenoye fsënjána. ¹⁶Cesareoca, básefta Jesucristbeñe ošbuáchiyënga choye šonjanatjëmbambá y chocna, chënga šonjanënatse canÿe Chipre luaroca entšabe yebnoye, Mnasón ca uabainá, ndábentšë bënga joquédama. Mnasón tempscana inamna Jesucristbeñe ošbuachiyá.

Pablo tojána Santiago jauatsëtsayama

¹⁷Jerusalenoye fsënjánashajna orna, chentša Jesucristbeñe ošbuáchiyënga oyejuayënga šonjanébuaja. ¹⁸Yëfsana, Pablo bëngaftaca tonjána Santiago jábuachama, y chentšë, nyëtsca chë ošbuachiyëngbeñe bëtsëjemëngcá mandayëngnaca monjëtsemna. ¹⁹Pablo tonjanacheuá y chentšana tonjanacuntá lempe ntšamo Bëngbe Bëtsá Páblëbe trabájoca chë ndoñe judiëngbeñe tojanmama.

²⁰Chca tmonjanuena ora, Bëngbe Bëtsá tmontanchuá y Pablo mëntšá tmonjaniyana: “Morna, Jesucristbeyeca bëngbe catsata, contsonÿá ntšamo

ba uaranga judiënga Jesucristbeñe imojtsošbuáchema, y chënga nyetscanga montsantješna nyetsca Jesucristbeñe ošbuáchiyënga chë Moisesbe leyentša nyetsca mandënga chamotsocumplínama. ²¹ Y entšanga chëngbiöye noticia tmojatšatá, aca chë inye luarënguenache moyena judiënga cojtsabuatambá, Moisés tojanmandá soyënga ndoñe ntseyeunanama y basetëmënga base bobachtema chë más delicadentše ndoñe ntjatëtšama, ntšamo bënga judiënga fsënduamancá, y ntšamo bënga fsëndëtatšëmbcá ndoñe chamondëtsamana ca. ²² Y morna, ¿ntšamo chë soyëngama cochtsemana? Ndegombre, chënga mochanjátatšëmbona aca moye tcojabama. ²³ Chcasna, ntšamo cbochanjabuayenacá cochjama: Bëngbentše canta boyabásenga montsemna y chënga entsamna Bëngbe Bëtsabíama canye šbuachenana soye jamama. ²⁴ Acaftaca cochjunatse, chëngaftaca cochtsemna y chëngcá cochtsama Bëngbe Bëtsabe delante tšábënga jtsatsmënama ntšamo chamojtsama ora, y ntsachetšá jëtsjájuama chaojtsamncá, aca cochjëtšájua, as chënga chamobená nyets stjénashe jtsenátšbotjía, jinýanýiyama, ntšamo Bëngbe Bëtsábíoye tmojašbuachenacá ya tmojamama. Y chca, nyetsca judiënga mochanjinýe ndoñe ndegombre yontsemna chë ntšamo chëngbiöye acbíama tmojacuntacá; masna, chënga mochanjátatšëmbona aca ndegombre ntšamo Moisesbe leyíne yomandancá icuamama. ²⁵ Y chë ndoñe judiënga Jesucristbeñe imojtsošbuachengbiamna, bënga ya fsënjubúábíama y fsënjáuyana ndayá jtsocumplínama chënga yojtsamnama, mëntšá: ‘Ndoñe chamondëtšesá mëntšëna, chë entšanga tmojtsejuabná diosënga imomna

soyënga jadórama tmojiyëbana; ni buíne, ni tsešana bayëngbe mëntšëna; y ndoñe chamondëtšama bacna soyënga shembásënga y boyabásëngaftaca ca” —chënga tmojánayana.

Bëngbe Bëtsabe bëts yebnentše judiënga Pablo tmojánishache

²⁶ As Pablo, yëfsana chë cántanga tonjanënatse y chëngaftaca tonjanma soyënga Bëngbe Bëtsabe delante tšábënga jtsatsmënama. Chentšana, Pablo Bëngbe Bëtsabe bëts yebnoye tonjánamashëngo chë bachnanga júnayama, ndayténtscoñe yojamna chë cantangbíama soyënga jtsamama, Bëngbe Bëtsabe delante tšábënga jtsatsmënama, y jayanama ndayté chëngbíama yojtsemna ndaye ora cada ona ibojtsemna ndayánaca Bëngbe Bëtsabe bëts yebnoye juambana, Bëngbe Bëtsabíama juatšëmbonama.

²⁷ Chënga tmojanenoyeuná y tmojánayana canýsëfta tentscuana chca jamana ca. Chë canýsëfta te ya jochnënguama yojtsemna orna, básefta judiënga Asioquënga Pablo tmojáninýe Bëngbe Bëtsabe bëts yebnoca y tmojanma entšanga chamuenbouënanama. Y cha tmojánishache, ²⁸ mëntšá jtsayebuáchëse: “¡Israeloca entšanga, šmabëtsëjabuache ca! Quem boyabása entsemna chë nyets luarënguenache iuana abuátambaye soyënga bëngbe entšangbe contra, y ntšamo bëngbe leyënguíne endayanama contra, y quem Bëngbe Bëtsabe bëts yebnama ndoñe tšabá yontsoyebuambná. Y cabana quem Bëngbe Bëtsabe bëts yebnoye grieguënga tojúmashëngo, y chca cha tonjama chë Bëngbe Bëtsabe bëts yebna Bëngbe Bëtsabe bominiýine ndoñe tšabá chaondëtsemnama ca” —chënga imojtsichamo.

²⁹ Chca imojtsichamo, er entšanga Pablo tmojáninýe chë bëts pueblentše

Tróximo Efesocáftaca; y imojétsejuabnaye chábioye Bèngbe Bètsabe bèts yebnoye Pablo tbojanánatse ca.

³⁰Nyetsca chë pueblentša entsanga tmojánenbouenana, y ochamanana chë Pablo yojtsemnoye tmojánashajna. Pablo tmojánishache y Bèngbe Bètsabe bèts yebnentsana shjoye tmojtsansjojó, y cachora chentša bēšašangá tmojanatame. ³¹Jtsóbama ya imojtsebuachéta ora, chë Romoca soldadèngbe mandayá tojántatšëmbona nyetsca chë bèts pueblentša entsanga imojtsenbouenanama. ³²Asna, chë mandayá chabe soldadènga y inye chentša amèndayènga tojánachembo y cányiñe chë entsanga imojtsemnoye tmojétsanótjajo. Entšanga, chë mandayá y chë soldadèngbioye tmojánanye ora, tmojtsanajbaná Pablo jantšetayana.

³³Chorna, chë soldadèngbe amèndayá tojanobeconá, Páblëbioye tbojánishache y tojanmandá uta cadenējuaca cha chamotsebátsécama y tojanatjá: “¿Nda mua yomna y ndayá tojama ca?”

³⁴Pero chë entsángbeñe, ínÿenga canye soye imojtsáyebuache y ínÿengna inye soye; y chca, ntšamo ndegombre tojanopasama jtsatšëmbuama chë mandayá ndoñe tonjanobená; chcasna, cha tojanmandá Pablo chë soldadèngbe oyenoye chamuánatsama. ³⁵Chë soldadèngbe oyenoca grádasbengoye tmojánashajna ora, chë soldadènga tojanotocá Pablo cutsnana juambama, chë entsanga tša rábiaca imojtsemna causa, ³⁶er chënga ústonoye imojétsaye y “¡Chaóbana ca!” imojtsaiuáyebuache.

Ntšamo Pablo entsangbe delante tojanenëuyaná

³⁷Chë soldadèngbe oyenoye ya jamashènguama imojtsemna orna, Pablo chë soldadèngbe amèndayábioye tbojan-

tjá: —¿Tašcatjaleséncia ratotema ácafataca jóyebuambayama ca?

Y chë mandayá tbojanjuá: —¡Aca icobena griego biyañe jóyebuambayama! ³⁸As, ¿aca ndoñe condmëna chë Egiptocá, chë ndoñe bayté quenátsmëna entsanga yojanètsësná chë mándayèngbe contra chamotsemnama y chë canta uaranga podesca uamana entsanga puñálaca uajaténgaftaca, entsanga ndoyena luaroye tojanbochná ca?

³⁹Chora Pablo tbojanjuá: —Atše judío sèndmëna, Tarso pueblota onñnaná, canye uamana pueblentše Cilicia luaroca; Diosmanda šmoleseñciá entsanga jáuyanama ca.

⁴⁰As, chë soldadèngbe amèndayá chca tbojanleseñciá. Páblëna chë gradasbenguiñe tojantsá y cucuatše tojanatsbaná entsanga iytëca chamobiamama. Nyetscanga iytëca imojtsemna orna, Pablo hebreo biyañe mentsá entsanga tojanéyana:

22 “Baconga y taitanga, mora šmochjouena atše jenéuyanama ntšamo chjayancá ca.”

²Pablo cachèngbe biyañe, hebreo biyañe yojtsóyebuambnana entsanga tmojanuena ora, más iytëca tmojanobiana. As Pablo tojanéyana: ³“Atše judío sèndmëna. Tarso pueblentše, Cilicia luaroca sënjanonñná, pero muentše Jerusalemntše sënjanoboché y sèndétatšëmbo soyèngna Gamaliélbeyeca chca botamana sënjanatsjinÿe. Cha corente tšabá šonjanbuatëmbá bèngbe bèts taitangbe leyènga; nyets atše ainánaca Bèngbe Bètsá sèndëserveda, ntšamo nyetsca tšëngaftanga mora šmontsamancá. ⁴Atše sënjánama chë Jesucristo tojaninñanyé Benache ústonènga chamosufrima y chamóbanama; boyabásenga y shembásenga sënjanëtabaye y cárceloye

sënjanautame. ⁵Chë judío bachnangbe más uamana amëndayá, nyetsca chë judiëngbeñe bëtsëjemëngcá mándayënga y inye muentša mándayënga mondobena jayanana ntšamo sentsichamcá ndegombre yomnama. Chënga uabemana tsbuanachangá šmonjaniyé, bëngbe catšátanga judiënga chamotsetatšëmbuama atše mando stsanbomnama, Jesucristbeñe ošbuáchiyënga jótabayama; y Damascoye sënjána choca Jesucristbeñe ošbuáchiyënga jótabayama, moye Jerusalenoye junatsama jacastígayama.”

**Pablo tojanacuntá
ntšamo Jesucristbeñe
ošbuachiya tojanóbema**

(Hch 9.1-19; 26.12-18)

⁶“Pero canye te benachiñe Damasco béconana sënjetsaye orna, mo nyetsto ora, nye ndeolpe atšbe juachañe canye bëts tcuinye celocana tonjanbuashinýñyena. ⁷Y fshantsoye sënjetseshajaye y canye oyebuambnayana sënjanuena mëntšá: ‘Saulo, Saulo, ¿ndáyeca šcojtsacmena ca?’ ⁸Atše sënjantjá: ‘¿Nda comna, Bëngbe Utabná ca?’ Y chë oyebuambnayana šonjanjuá: ‘Atše sëndmëna Jesús Nazaretocá, y aca condama atšbe entšanga chamotsesufrínama ca.’ ⁹Chë átšeftaca monjánajnënga chë bëts tcuinye tmojáninye y tmojanouatjananga, pero chë oyebuambnayana ndoñe tmonjanuena. ¹⁰Chora atše sënjantjá: ‘¿Bëngbe Utabná, ndayá jamama šojtsemna ca?’ Y cha šonjaniyana: ‘Matëtsbaná y mëtëtontšë Damascoye jama. Chentše canya cmochanjabuayená ndayá jamama cmojtsemnama ca.’ ¹¹Chë tcuinye yapa tonjanbuashinýñyena causa, atše jtaná sënjanouedá. Chcasna, chë

ínýenga šmontanobuacuetëntšë y chca, Damascoye sënjánashjango.

¹²“Chentše enjamna canye bacó Ananías ca uabainá; cha inoyena ntšamo Bëngbe Bëtsá yobošcá y yojánama ntšamo bëngbe leyënguñe iuayancá, y nyetsca chentša judiënga monjanamana chabiama tšabá jtsóyebuambnayana. ¹³Cha tonjánabo atše jinýama y tonjánashjango ora, šonjaniyana: ‘Jesucristbeyeca atšbe catšata, Saulo, chacmotsatabinýna ca.’ Cachora y cha sënjáninye.

¹⁴“Chentšana cha tonjánayana: ‘Bëngbe bëts taitangbe Bëtsá aca tmojuábuayana, ntšamo cha acbiamá yobošcá chacotsetatšëmbuama, chë nyetsca soyënguñe Tšabá Amá chacuinýama y cachabe uayášentsšana chacóyeunama. ¹⁵Bëngbe Bëtsá chca tojama, aca chë chabe buayenana soyëngama entšángbeñe chacóyebuambama, y chamna nyets luarentša entšángbeñe cochjacuénta, ntšamo tcojinýe y tcojouencá. ¹⁶Y mora, ¡ndoñe más matobátmanana! Motsbaná y cochjenábaye Jesucristo jótšëmbonëse, chca, acbe bacna soyëngama perdonaná chacotsemnama ca’” —cha šonjaniyana.

**Pablo tojanacuntá ntšamo chë ndoñe
judiëngbiyoe tmojánichmoma**

¹⁷“Jerusalenoye sëntaná ora, Bëngbe Bëtsabe bëts yebnoye sënjána cháftaca jencuéntama, y ndeolpe atše mo otjenayoquëcá sënjanouedá. ¹⁸Chca orna, Bëngbe Utabná sënjáninye y cha mëntšá šonjaniyana: ‘Betsco motsa y cam ora Jerusalenentsšana métsebozna; quemuentša entšanga ndoñe quemochatóyeunaye ntšamo atšbiamá condétatšëmbo y contsëtsëtsnacá ca.’ ¹⁹Atše sënjanjuá: ‘Bëngbe Utabná, chënga mondétatšëmbo atše sënjánana nyetsca chëngbe

enefjuana yebnënguenache y chë ábeñe ošbuáchiyënga sënjanëtámiana y sënjánatsetšenaye; ²⁰y acbiama ndegombre oyebuambnayá Esteban tmonjanóba ora, átšnaca chentše sënjamna y tšabá imojtsama ca chama sënjëtsejuabnaye, y cabá chë monjanóbanangbe entšayëjuangá atše chora sënjanabojanjá ca' —atše sënjanjuá. ²¹Pero chca sënjánayana ora, Bëngbe Utabná šonjaniyana: 'Motsa; atše bën luarëngoye, ndoñe judiëngbioye cbochanjíchmuca ca.'"

Pablo y chë soldadëngbe amëndayá

²²Chë entsanga chéntscõe tmojanuena; pero chë ndoñe judiëngbiama tojanoyebuambá orna, chënga tmojanontšé uayebuáchana: "¡Ndoñe tšabá quenátsmëna cha vídaca chaotsemnama! ¡Motsóba ca!" ²³Y chënga más imojtsáyebuache; puerte rábiaca chëngbe uichëtjonëjuangá tsbanánoye imojtsébëntaye y tsbanánoye polvëshe imojtsëtšana; ²⁴chë causa, chë mandayá tojánayana chë soldadëngbe oyenoye Pablo chamotsémashëngo ca, y tojanmandá chamotsetjanja chaobuambama ndáyeca entsanga chca chabe contra imojtsáyebuache. ²⁵Pero jtsetjanjama ya tmojanbatsëca orna, chentše imojtsemna soldadëngbe amëndayábioye Pablo tbojantjá: —¿Tšëngaftanga šmobena canye entšá derecho bomná mo canya Romoca onýnanacá jatjanjana, ndegombre tšabá o ndoñe tšabá tonjamama cabá ndayana ora ca?

²⁶Chë básefta soldadëngbe mandayá chë soye tojanuena ora, tojána y nyetsca soldadëngbe amëndayábioye chama ibojunenaye, mëntšá: —¿Ndayá cochjama? Chë entšá derecho bomna mo canya Romoca onýnanacá canmëna ca.

²⁷As chë amëndayá tojána Pablo yojtsemnoye y tbojaniyana: —Šmëyana,

¿aca derecho bomná mo canya Romoca onýnanacá comna ca?

Y cha tbojanjuá: —Arseñor ca.

²⁸Chora chë amëndayá tojánayana: —Atše becá crocénana sënjëtšajó mo canya Romoca onýnanacá derecho jtse-bomnama ca.

As Pablo tbojanjuá: —Y atšna derecho bomná mo canya Romoca onýnanacá sëndmëna atše tijanonyá orscana, er atšbe taitá chca derecho bomná inamna ca.

²⁹Chcasna, chë jatjanjama imojtse-prontanënga, Páblëbentsana tmojanjuaná; y chë mandayánaca tojanjuaná y yojtsauatja, Pablo derecho bomná mo canya Romoca onýnanacá yojamnama tojántatšëmbona ora, er cha tojanmandá Pablo chamotsebátsëcama.

Pablo, Jerusalenentša uámana mandayëngbe delante

³⁰Chë soldadëngbe amëndayá yojtseboše ndegombre jtsetatšëmbuama ndaye soyama judiënga Páblëbe contra imojtsichámuama; asna, yëfsana tojanmandá cadenëjuangá jtsajafjonana y chë bachnangbe amëndayënga y nyetsca chë judiëngbe amëndayënga chamobëconama. Chentšana, Pablo tbojanábocna y chëngbe delante tbojanatsá.

23 Chora Pablo, nyetsca chë mandayëngbioye tojanënyanyé y tojanéyana: —Taitanga, atše mënténtscoñe tsiyena jtsamëse ntšamo Bëngbe Bëtsá yobošcá y chabe delante atšbe ainana natjëmbana endëtsomñe ca.

²As, Ananías, chë bachnangbe más uámana amëndayá, tojanmandá Páblëbe béconana imojtsemnënga cha chamot-sáyejantšetama. ³Pero chora Pablo Ananíasbioye tbojanjuá: —¡Bëngbe Bëtsá ácnaca cmochanjëtšantšetá, bacna entšá, ntšamo ndegombre tcojuabnacá ndinýinýnayá! Aca chentše

contsetbemana tšabá o ndoñe tšabá tijamama jayanama, ntšamo Moisesbe leyíne yomandancá; as, ¿ndáyeca cojtsemánda chašmojantšetama? Chca chë leyíne ndoñe quenátslesenciana ca.

⁴As, chabe béconana imojtsemna entšanga tmojánayana: —¿Chca chë Bëngbe Bëtsabe bachnangbe más uámana amëndayábioye cochjójenguango ca?

⁵Chora Pablo tojánayana: —Taitanga, atše ndoñe quetsátstatsëmbo cha chë bachnangbe más uámana amëndayá yomnana. Er Bëngbe Bëtsabe uabemana palabrenguíne mëntšá endayana: “Entšangbe mandayabe contra ndoñe catjayana ca.”

⁶Pablo tojáninye chë mán-dayënguentše báseftanga saduceunga y ínÿengna fariseunga imojtsemnama; as, mëntšá tojánáyebuachena: —Taitanga, atše fariseo sëndmëna; atšbe bëtšétsanga fariseunga mondmëna. Atše, jtsošbuáchiyëse chë obanënga mochtayenama tsobatmana causa, atše ndoñe tšabá séntsama ca tšëngaftanga šmochjayana ca.

⁷Pablo chca tojánayana ora, chë fariseunga y saduceunga tmojanontšé enatsétsnayana, y chë causa nÿetsca entšanga ndoñe cachcá imontsejuabnaye. ⁸Er chë saduceunga jtsichámuana chë obanënga ndoñe ntayenana ca, y ni angelënga, ni espíritënga ndoñe mondmëna ca; pero chë fariseunga aíne chë soyënguíne jtsošbuáchiyana. ⁹Y nÿetscanga tša imojtsáyebuache; asna, básefta fariseunga ley abuátambayënga tmojantsbaná y jabuachana mëntšá imojtsáyebuache: “Quem boyabása ndocna bacna soye tonjama. Nderado mo Bëngbe Bëtsabe canÿe ángel o espíritu muábioye ndegombre tbojayana ca.”

¹⁰Entšanga más imojtsáyebuache y chë soldadëngbe amëndayá

yojtsauatja nderado entšanga Pablo muantsatcacaye; as, cha tojanmandá soldadënga chamua Pablo chë entšángbentšana jaisábocnama y chë soldadëngbe oyenoye cachiñe jesánatsama.

¹¹Yëfsana ibeta, Bëngbe Utabná Páblëbioye tbojánëbëocna y tbojaniyana: “Pablo, ainaniñe añemo cochtsebmna. Ntšamo aca atšbiana condétatsëmbo y muentše Jerusalenentše condoyebuambnacá, cachcá cmontsemna Romoca jamama ca.”

Judiënga tmojanenoyeuná Pablo jtsóbama

¹²Chë inÿe yëfsana, judiënguentšana báseftanga tmojanenoyeuná Pablo jtsóbama, y tmojanjurá tondaye ntjasana, ni ntjofsiyana, cha jóbantscuana.

¹³Chca jamama tmojanjuabó entšanga imojamna canta bnëtsanëngama más.

¹⁴Chënga tmojána chë bachnangbe amëndayënga y judiëngbeñe bëtšëjemëngcá mandayëngbioye y mëntšá tmojánayana: “Bënga Bëngbe Bëtsá mëntšá fsënjašbuachená y bacna soyënga bëngbeñe chaotsemna chca ndoñe fsënjocumplise: Tondaye ntjasana, ni ntjofsiyana, Pablo jóbantscuana. ¹⁵Morna, tšëngaftanga y chë inÿe muentša mandayëngaftaca chë soldadëngbe amëndayá šmochjaimpáda Pablo moye chabuánatsama; y šmochjayana chca yojtsemna ana chë ndayá yojtsopasánama más botamana cha jatjayama ca; y bëngna fchtseprontana cha jtsóbama, cabá moye ndáshjango ora ca.”

¹⁶Pero, Páblëbe uabenbe uaquiñá chë soye tojántatsëmbona; asna, tojána chë soldadëngbe oyenoye, chama Pablo jauenayama. ¹⁷Chorna, Pablo canÿe básefta soldadëngbe mandayábioye tbojanchembo y tbojaniyana: “Diosmanda

quem basa mánatse chë nyetsca soldadëngbe amëndayábioye; canýe soye entsebmoma chábioye juenayama ca.”

¹⁸As, cha chë bobontse tbojëftsanbetše, chë nyetsca soldadëngbe amëndayábioye tbojanánatse y tbojanianyana: “Chë utamená Pablo šonjachembo y šonjaimpadá quem bobontse ácbioye juanatsana; mua caojtsebmoma canýe soye aca jauyanama ca.”

¹⁹Chë soldadëngbe amëndayá chë bobóntsbioye tbojëftsanobuácuetëntsiye, luaroye tbojanánatse y tbojantjá: —¿Ndayá cojtsebmoma atše jauyanama ca?

²⁰As chë bobontse tbojanianyana: —Judiënga tmojenoyeuná taitá jaimpádama, yëfse chëngbe amëndayëngbioye Pablo chacuánatsama, y chënga cmochanjauyana chca yojtsemna ana chë ndayá yojtsopasánama más botamana cha jatjayama ca. ²¹Pero ndoñe catjóyaunaye; chënguentšana canta bnétsanëngama más entsanga iytémenënga Pablëbiamá montsanýá. Chënga tmojajurá, bacna soye chëngbeñe chaotsemna ndoñe tmonjocumplise, tondaye ntjasana, ni ntjofsiyana, Pablo jóbantscuana. Mora chënga montseprontana y montsobátmana ntšamo aca chë soyama cochjáuyanama ca —chë bobontse tbojanianyana.

²²Chentsšana, chë soldadëngbe amëndayá chë bobóntsbioye tbojanmandá, ndayá ibojuenayama ndocnábeñe ntseuéntayana, y chentsšana tbojtanichmó.

**Pablo tmojanánatse Félix,
chë Cesareoca mandádbioye**

²³Chentsšana, chë soldadëngbe amëndayá tojánachembo útata chë inýe soldadëngbioye mándayënguentšana, y tojanamëndá chamoprontama uta patse soldadënga, inýe canýsëfta bnétsanënga couayënguiñe y inýe uta

patse lanzëšangaca, Cesarea puebloye ibeta, las nueve ora jabocanama; ²⁴y tojanamëndá couayënga chamoprontá Pablo chauenójayema. Y tojanmandá tšabá y ndocá ntjapasacá Pablo chamuánatsama, Félix chë Cesareoca mandádbioye. ²⁵Y canýe tsbuanácha chëngaftaca tojanichmó y chëchañe mëntšá yojtsábemana:

²⁶Claudio Lisias, chë bëts uámána mandado Felixbiamá: Salud bomná chacotsomñe.

²⁷Judiënga quem boyabása tmojishache y montseboše jtsóbama; pero cha mo canýa Romoca onýnanacá derecho bomná yomnama sënjátatšëmbona ora, atšbe soldadëngaftaca sënjá y chëngbe cucuatšentsšana cha sënjatsbocá. ²⁸Atše sëntseboše jtsatšëmbuana ndaye soyama chënga chabe contra imojtsichámuama; as, cha sënjuánatse nyetsca chë judiëngbe amëndayënga montsemnoye; ²⁹y chentsšana, atše sënjátatšëmbona chënga chabe contra imojtsichamo ana cachëngbe leyentša soyëngama, pero cha tondaye tonjobuachjanguá, cha jóbama bënga chašotsamnama, ni mo cárceloye jutámiamá. ³⁰Pero atše sënjátatšëmbona chë judiënga tmojenoyeuná cha jtsóbama; chíyeca, cam ora cha ácbioye sentsichamná, y chabe contra ichámëngna sënjáuyanama, ndayá muabe contra jayanama imojtsebmocá acbe delante chamuayana ca.

³¹Chentsšana, chë soldadënga tmojanma ntšamo tmojanamëndacá, ibeta Pablo tmojëftsanbetše y Antípatris puebloye tmojanánatse. ³²Yëfsana, chë shecuátšeca tmojána soldadëngna cach soldadëngbe oyenoye tmojésanshëcuana, y chë couayinë

enjaquenënga Pábloftaca tmojána. ³³Cesareoye chënga tmojánashjajna ora, chë tsbuanácha chë mandádbioye tmojanantsabuaché, y Páblënaca chabe cucuatšiñe tmojánboshjona. ³⁴As chë mandado chë tsbuanácha tojanalía; chentšana, cha tojanënoticiá ndaye luarocá Pablo inamnama, y Cilicia luarocá cha inamnama cha tojántatsëmbona ora, ³⁵tbojaniyana: “Acbe contra ichámënga chamobeconá ora, ácbioye oído cbochjabuájua ca.”

Chentšana, cha tojanmandá Rey Heródesbe bëts yebnocá Pablo chamotsebojanýama.

Ntšamo Pablo chë mandado Félixbe delante tojanenëuyaná

24 Shachna tianoye, Ananías, chë bachnangbe más uámana amëndayá, Cesareoye tojána báseftangaftaca chë judiëngbeñe bëtsëjemëngcá mándayënguentšana y canýa entšanga obuauyayáftaca, Tértulo ca uabainá; y chë mandádbioye chënga tmojána Páblëbe contra jayanama.

²Pablo tmojanábocna ora, Tértulo tojanontsé chabe contra jayanama y Félixbioye tbojaniyana: “Aslëpaye, taita mandado, ácbeyeca bënga natjëmbana fsëndoyena y aca puerte obiashjachá cómnayeca ba tšabe soyënga quem luarentša entšangbiana yojtsebinýna. ³Nýets tempo y nýetsquénache chë soyënga fsëndóyëngacañe, bëts uámana mandado, y bënga chama corente cbondetsechuaná. ⁴Pero ndoñe yapa bën jatenbiamnayamna, Diosmanda ratotema šmotsoyauná. ⁵Bënga fsëntsetatsëmbo quem boyabása entšanguentše entsemna mo bacna shacuancá, nýets luarënguenache yojtsana y yojtsama chë judiënga nýetscanga cachca soye ndoñe chamondëtsejuabnama, y cha yojtsemna chë Nazaretocabe ustonëngbe uanatsaná. ⁶Y tonjábošena

jamama Bëngbe Bëtsabe bëts yebna, Bëngbe Bëtsabe bominyiñe ndoñe tšabá chaondëtsemnama; chíyeca bënga cha fsënjotbá. Bënga fsënjábošena chabiana jayanana tšabá o ndoñe tšabá tonjamama, ntšamo bëngbe leyënguñe endayancá; ⁷pero chë soldadëngbe amëndayá Lisias tonjontremeté y jabuachana bëngbe cucuatšëntšana tbojtsánatseñe, ⁸y tonjayana chë chabe contra ichámënga caojtsamna ácbioye chama jabana ca. Cach taitá chacojatjá ora, ndegombre soyënga cochántsetatsëmbo ndáyeca bënga muabe contra fstsichámuama ca” —cha tojánayana.

⁹Y chë judiënga chentše imojëtsemnëngna imojtsanichamo añe chca tojanopasá y lempe ndegombre yojtsemna ca.

¹⁰Chentšana, chë mandado Páblëbioye tbojánëfjatsëmbo chaóyebuambama; as Pablo tojánayana: “Atše sëndétatsëmbo aca ba uatama comna muentša entšangbiana tšabá o ndoñe tšabá tmonjamama ichamuá; chcasna, tondayama ntsauatjca y puerte oyejuayá acbe delante šcuenëuyaná.

¹¹Ntšamo cach aca jtsetatsëmbuama contsobencá, cabá bnëtsana uta te entsemna atše Jerusalenoye sënjá, Bëngbe Bëtsá jadórama. ¹²Y quemënga ndoñe chešmátinýena nderado ndáftaca jabuachana enatsëtsnayıñe, ni entšanga chamuenbouéнанama amiñe, Bëngbe Bëtsabe bëts yebnocá, ni chëngbe enefjuana yebnënguenache, ni inýe luarënguenache chë bëts pueblentše. ¹³Quem entšanga tondaye quemátsbomna ntšamo jayanama, atšbe contra montsichamo soyënga ndegombre yojtsemna ca. ¹⁴Pero ndegombre endmëna y chanjayana, atše bëngbe taitangbe Bëtsá sëndëserveda, jtsiyenëse ntšamo Bëngbe Bëtsá šonjaninýanyé benache yomncá; y quem

entsanga montsichamo, básefta soyenga ntšamo bēnga quem Tsēm Benache ústonēnga fstošbuachecá, ndoñe ndegombre yondmēna ca. Pero atšna nyetsca chē Moisesbe leyiñe y Bēngbe Bētsabe juabna oyebuambnayēngbe uabemana librēšanguentša soyēnguñe sēndošbuaché; ¹⁵ y atše cach chēngcá, puerte jtsošbuáchiyēse Bēngbe Bētsabeñe sēndobátmana cha yochjama chē mochjóbānēnga chámuatayenama, nyetsca entsanga, lempe tšabá amēnga y chē ndoñe tšabá amēngnaca.

¹⁶ Chíyeca, atše nyets tempo puerte tšabá sēndama, tondayama ntjatenócochinjenama y atšbe ainana natjēmbana chaotsomñama, Bēngbe Bētsabe delante y entsangbe delántnaca.

¹⁷ “Básefta uatama inye luarēngue-nache atše sēndánana; ndoñe bayté quenátsmēna cach atšbe luaroye sēntashjango, chentša ndbomnjēmēnga jujabuáchama ndayánaca jatšatayama y bayēnga jobáyama, Bēngbe Bētsá jētschuyama. ¹⁸ Atše sēnjama soyēnga Bēngbe Bētsabe delante tšabá jtsatsmēnama; chentšana, básefta Asioca judiēnga Bēngbe Bētsabe bēts yebnentše šmonjínjēna, pero ndoñe chešmátinjēna ni ba entsángaftaca, ni enbouenaniñe. ¹⁹ Chē šmonjinjēnēnga entsamna ácbioye jabana y acbe delante atšbe contra chamuayana, nderado ndayá tmojtsebomñese.

²⁰ O ndóñesna, cach quemēnga, muentše montsemnēnga chamuayana, chē judiēngbe amēndayēngbioye atše šmonjuánatse ora, atše ndayá tijobuáchjanguama chešmēnjínjēna, atše castiganá jtsemnana šojtsemna ca chēnga chamuayanama; ²¹ o nderado nántsemna chē atše chēngbentše séntsemna ora, mēntšá tijuáyebuachenama: ‘Atše chē obanēnga mochtayenama puerte jtsošbuáchiyēse

sēndobátmana causa, tšēngaftanga atšbe contra šmochjayana ca.’”

²² Félix bētscá inatátšēmbo Bēngbe Utabná tojaninjinyé Benache ústonēnga imojanošbuaché soyēngama; as, Pablo chca yojtsoyebuambná ora, cha tojan-mandá ndoñe más chē soyama chē te jatóyebuambnayana, y chē entsanga tojanjēyana: “Chē soldadēngbe amēndayá Lisias chaojášhango ora, chanjayana ntšamo quem tšēngaftangbe sóyeca jamama ca.”

²³ Y chentša soldadēngbe amēndayábioye tbojanmandá Pablo jtsebojanjama, pero nyē utamená ndoñe chaondētsemna ca; y tojanmandá, Páblēbe amiguēnga jalesénciayana ntšamo tmojtsebošcá cha chamuauájabuachama.

²⁴ Chentšana baseftaytese, chē mandado Félix Cesareoye tojtanashjango, chabe shema Drusílaftaca, canye judiá. Chorna, cha tojanmandá Pablo jachembuana y tojanuena ntšamo Pablo yojtsichamo, ntšamo canya nanjobenaye Jesucristbeñe ošbuachiyá jtsemnana. ²⁵ Pero, nyetsca soyēnguñe tšabá jtsamama, cachá jenomándama jtsobenama y ntšamo tmojamama nyetsca entsangbiama Bēngbe Bētsá yochjayanama Pablo tojanoyebuambá ora, Félix tojanēuatjaná y Páblēbioye tbojanijana: “Mora, mata; luare quétstsebomna ora, cbochjachembo ca.”

²⁶ Jētsboshjonama Pablo crocénana chabuatabuenámnaca Félix inobátmana; y chca, ba soye ibojanófjajana cháftaca jencuéntama. ²⁷ Y chca uta uata tojanochnēngo; chentšana, Félix ya ndoñe más chē mandado yontsemna y chabe cuentna Porcio Festo mandacá tmojántbema. Félix yojtseboše chē judiēngbe delante tšabá joquédama, chíyeca utamená Pablo tbojéftsanboshjona.

Pablo Festbe delante

25 Festo chë luaroye tojánashjango y unga tianoye, Cesarea pueblentsana Jerusalenoye cha tojána. ²Chocna, chë bachnangbe améndayënga y chë más uámana judiënga Féstbioye tmojána Páblëbe contra jayanama. ³Y tmojanimpadá, mo chëngbiana canÿe bëts pavor cuenta, cha chaomandá Pablo Jerusalenoye chamuánatsama. Chëngna imojétsejuabnaye Pablo benachiñe chamotsóbama. ⁴Pero Festo tojanéyana, Páblëna Cesareoca utamená yojtsemna y baseftaytese cha choye jtama ca. ⁵Y tojanéyana: “Chamna, tsëngaftangbe améndayënga átseftaca Cesareoye chamua y chë boyabása ndaye bëts soye tojobuáchjanguase, choca chabe contra šmochjayana ca.”

⁶Festo Jerusalenentše posufta o bnët-sana te más chëngaftaca tbojëftsanjétana y chentšana Cesareoye tojtaná. Yëfsana, cha tojanótbema chabe puestentše tribunaloca y tojanmandá Pablo choye chamuánatsama. ⁷Pablo choye tojánashjango ora, Jerusalenocana tmojánashjajna judiënga tmojanobobconá y ba uabouana soyënga chabe contra imojtsichamo, pero ni canÿe chë soyëngama tmonjanobená jinÿanÿiyana chca ndegombre bëtsemnama.

⁸Y Pablo, cachá jenéuyanama mëntšá yojtsichamo: —Atše tondaye chiyatobuachjanguá, ni judiëngbe leyëngama, ni Bëngbe Bëtsabe bëts yebnama, ni Romoca bëts mandadbe contra ca.

⁹Festo yojtseboše chë judiëngaftaca tšabá joquédama; as Páblëbioye tbojantjá: —¿Tacatjábošena Jerusalenoye jama, choca atše quem acbe soyama jayanama ca?

¹⁰As Pablo tojánayana: —Atše sëntsemna chë Romoca bëts mandado tojichamó améndayëngbe delante

y chënga entsamna jayanama atše tšabá o ndoñe tšabá sënjamama. Ntšamo ndegombre contsetatsëmbcá, judiëngbe contra atše ndocna bacna soye chiyatsma. ¹¹Nderado atše ndaye bëts soye tijobuachjanguá y chama atše jóbanama šojtsemnëse, atše tondaye quichátayana atše ndoñe chayóbanama; pero atšbe contra montsichamo soyëngama tondaye ndegombre tontsemnëse, ndocná queochatobenaye chëngbe cucuatšinë atše jaboshjonana. Chíyeca, Diosmanda chë Romoca bëts mandado cháuyana tšabá o ndoñe tšabá sënjama ca —Pablo tojánayana.

¹²As Festo, chë soyama chabe buayiyayënga tojanatjá y chentšana tojánayana: —Chë Romoca bëts mandado quem soyama cháuyanama tcojábošenësna, chábioye cochjá ca.

Festo, Rey Agrípaftaca tbojanencuentá ntšamo Pábloftaca jamama

¹³Chentšana baseftayté tojanochnëngo ora, Rey Agripa y Berenice Cesareoye tbojána, Festo jauatsësayama. ¹⁴Bayté chata chentše tojanajétana; y chca, Festo chë réybioye tbojancuentá Páblëbe soyama. Cha mëntšá tbojaniana: —Muentše endmëna canÿe entšá, Pablo ca uabainá; Félix utamená tbonjëftseboshjona, atše mandadca sënjontsé ora. ¹⁵Jerusalenoca sëndánmëna ora, chë bachnangbe améndayënga y chë judiëngbeñe bëtsëjemëngcá mándayënga Páblëbe contra demanda tmonjajajó y šmonjaimpadá cha jóbanama ibojtsemna ca atše jayanama. ¹⁶Y atše sënjáuyana: “Chë romanënga ndoñe quematamana ndocnabiana jayanana cha jóbanama ibojtsemna ca, chabe contra ichámënga chabe delante ndoñe tmontsemnëse, chca, chama jenéuyanama cha chaobenama ca.”

¹⁷ Chíyeca, chënga moye tmonjabo ora, ndoñe yapa bën ntjatenobiamnycá cach yëfsana atšbe puestentše tribunaloca sëntótbema y sënjamandá chë boyabása jobetšana. ¹⁸ Pero chabe contra ichámënga, ntšamo atše sëndanjuabnacá chënga mochjayanamna ni mó canye bëts soye chabe contra chemátayana, chënga jóyebuambayama tonjóyentsbuache ora. ¹⁹ Chënga chabe contra montsichamo, nýe cachëngbe Dios ntšamo jadórama yomnana y canya Jesús ca uabainábiamá; cha tojanóbana, pero Pablo entsichamo cha ainá yotsomñe ca.

²⁰ “Chora atše ndoñe quetstétsetatšëmbo ntšamo chë soyiñe jamana; asna, Pablo sënjanjtá Jerusalenoye jama tayojétseboše ca, choca atše jayanama tšabá o ndoñe tšabá cha tonjanmama. ²¹ Pero cha šonjaimpadá camuentše jaboshjonana, cach Romoca bëts uámana mandado chë soyama tojayanëntscuana ca. Chcasna, atše sënjamandá cha chamotsebojanýama, chë mandádbioye jíchmuama atše jobenayëntscuana ca” — Festo tbojancuentá.

²² Chca tbojanencuentá ora, Agripa Féstbioye tbojaniana: —Atšnaca sëntseboše chë boyabása joyeunayama ca.

Y Festo tbojanjá: —Cach yëfse oído chábioye cochanjabuájua ca.

²³ Chë yëfsana, Agripa y Berenice corente uachuanentše chë tribunaloye tbojánamashjna y chátaftaca tmojánamashjna chë soldadëngbe amëndayënga y chë pueblentša uámana taitanga. Chentsana Festo tojanmandá Pablo jobetšana; ²⁴ y chora cha tojánayana: “Rey Agripa y nýetsca taitanga béngaftaca šmojtsemnënga: Chentše entsemna chë boyabása. Nýetsca judiënga chabe contra

átšbentše montsabíchamo, Jerusalenoca y quem Cesarea pueblétnaca, y nýa jtsayebuáchëse tša šmontseimpadana cha chaóbanama; ²⁵ pero atše sëntsejuabná quem boyabása tondaye tonjama, jóbanama chabotsemnama ca. Y más, cachá šonjaimpadá chë Romoca bëts uámana mandado César chabe soyama cháuyanama; chcasna, chca chanjama, chábioye cha chanjíchmu. ²⁶ Pero atše, atšbe bëts uámana mandádbioye quem boyabásabiamá juábobemama ndocna serto soye quetsátsbomna causa, tšëngaftangbe delante cha tijatsá, y masna, acbe delante, bëts rey Agripa; chca, lempe chacojatjá chentsana, ndayá juabemama atše chaitsebomnama. ²⁷ Er atše sëntsejuabná ndoñe corente juabnayabe soye yomna, canye utamená jíchmuana y ndayama chabe contra tmojtsichámuama ndoñe lempe ntjuabemana ca” —cha tojánayana.

Pablo tojanontsé rey Agripbe delante jóyebuambayama

26 Chentsana, Agripa Páblëbioye tbojaniana: —Jóyebuambayama contselesenciana, cach aca chacuenéuyanama ca.

As Pablo, chë réybioye jachuayama cucuatše tojanatsbaná y jenéuyanama tojanontsé mëntšá jayanama: ²—Atše ndegombre sëntsoyejuá mora chjobenaye acbe delante jóyebuambayama, uámana rey Agripa, chca, atše jenéuyanama nýetsca soyëngama ntšamo judiënga atšbe contra montsichámuama; ³ y más sëntsoyejuá, taitá conduábuatmama lempe ntšamo judiënga monduamancá y condétatšëmbo chë judiënga ndayama imuenoboyebuambnama. Chcasna, Diosmanda uantádoca šmotsoyeuná.

**Pablo tojanacuntá ntšamo
cha tempo inamnama**

⁴“Nÿetsca judiënga mondétatšëmbo ntšamo atše tempšana chéngbeñe tsiyenama, bobontse sënjamna oršana, atše sënjanonÿná luarentše y Jerusalenentše. ⁵Chéngnaca mondétatšëmbo y montsobena jayanana, chënga tmojtsebošëse, chca ndegombre yomnama; atše nÿets tempo fariseucá vida sëndbomna, y chë fariseunga mondoyena más soyënga jtsamëse chë judiëngbe leyëngaca chë inÿe judiëngbiam. ⁶Y mora, ntšamo Bëngbe Bëtsá bëngbe bëts taitanga tojanašebuachenacá, chë obanënga jtayenama cha yochjamama puerte jtsošbuáchiyëse atše obatmana causa, šmojuánatse atšbe contra jayanama. ⁷Bëngbe bnëtsana uta Israeloca bëts pamíllanga mondobátmana chë šbuachenana soye chëngbiam chaóshjanguama y chíyeca, cada te bnëté y ibeta chënga Bëngbe Bëtsá mondadorana y mondëserveda. Y atše cach soyama obatmana causa, bëts rey Agripa, judiënga mora atšbe contra montsabíchamo. ⁸¿Ndáyeca tsëngaftanga judiënga šmojtsichamo, chë obanënga chámuatayenama Bëngbe Bëtsá yochjamama jtsošbuáchiyama ndoñe šmontsobena ca?

**Pablo tojanacuntá, ntšamo
tempo cha Jesucristbeñe
ošbuáchiyënga yojanaborlánama**

⁹“Y cach átsnaca sënjanjuabná atše šojamna lempe ntšamo stjobenacá jama, Jesús chë Nazaretocábeñe ošbuáchiyënga corente chamosufrima, ¹⁰y chca Jerusalenentše atše sënjanma. Chë bachnangbe amëndayënga mando šmonjanatšëtá, y chca, banga Jesucristbeñe ošbuáchiyënga cárceloye sënjanë-tame; y jtsébáyama ca chëngbiam

montsanichamo ora, átsnaca aíñe chca chamoma ca sënjánichamo. ¹¹Y ba soye, chë judiëngbe enefjuana yebnëngue-nache jabuache chënga sënjanatsetšená, chënga Jesucristo ústonana chamot-sajbanama, y chëngaftaca tša etonaná sënjëtsemna causa, chë inÿe luarëngoca bëts pueblënguenáchnaca chënga sënjanëcamena.”

**Pablo tojanacuntá ntšamo
cha Jesucristbeñe
ošbuachiyá tojanóbema**

(Hch 9.1-19; 22.6-16)

¹²“Y cachcá jamama canÿe te Damascoye sënjëtseye; chë bachnangbe amëndayënga uabemanëchangá šmonjanëtsabuaché chca jamama y, cachënga choye šmonjanichmó. ¹³Pero, uámana rey, chë benachëjana mo nÿetsto ora, sënjáninÿe canÿe bëts tcuinÿe celocana, shinÿama corente más enjëtsebinÿnaye, y atše y chë átšeftaca ajnëngbe shéconana corente enjëtsebuashinÿinÿana. ¹⁴Nÿetscanga fsënjánshajaye y atše sënjanuena canÿe oyebuambnayana, hebreo biyañe, mëntšá šonjëtsetsaye: ‘Saulo, Saulo, ¿ndáyeca chca šcojtsacmena ca? Cach aca bacá contsenabomá, atšbe entšanga chamosufrima tcojtsama ora, mo uacná ngmëche niñëfjiñe cha tojtsosocunjá orcá, cachá jenótsetšenana ca.’ ¹⁵As atše sënjánayana: ‘¿Nda comna, Bëngbe Utabná ca?’ Y chë Utabná šonjanjuá: ‘Atše sëndmëna Jesús, y aca condama atšbe entšanga chamosufrima ca. ¹⁶Pero matëtsbaná y matëtsá. Atše cbonjébëbocna jinÿinÿiyama aca tcojuábuayanama atše šcochjasérviam, y chacotsetatšëmbuama y entšanga chacuacuntama, mora tconjinÿe soyama y más chcoye atšbiam cbochanjinÿinÿiye soyëngámna. ¹⁷Atše chanjama judiënga y ndoñe judiënga tondaye

chacmondëborlama; y morna, ndoñe judiëngbioye cbontsichamná, ¹⁸ chënga atšbe soyëngama josértama aca chacomama. Chca, chënga bacna juabnënga ndoñe chamondëtsebomna, mo ibetiñe cuaftsemnëngcá, sinó mo binÿniñcá chamotsemna átšeftaca, atše chë entšangbe juabnënga binÿnayá. Satanasbe cucuatšifne ndoñe chamondëtsemnama, sinó Bëngbe Bëtsabe obenánaca chamotsiyenama; chënga átšbeñe chamotsošbuáchema, y chca, chëngbe bacna soyëngama perdonánënga chamotsemnama y chënga chamotsebomnama canÿe luare entšángaftaca, chë ndémuanÿengbioye Bëngbe Bëtsá tšabe entšanga y chabe entšanga tojábiamá, chënga átšbeñe betsošbuáchiyama ca” —cha šonjaniyana.

Pablo tojanma ntšamo chë mo otjenayoquécá tojaninÿcá

¹⁹ “Chcasna, bëts rey Agripa, atše sënjanma chë mo otjenayoquécá sënjaninÿe ora ntšamo Cristo šonjaniyancá; ²⁰ y natsana, Damascoca entšanga chë tšabe noticiëngama sënjanabuayená; chentšana, Jerusaleñoquënga y nÿetsca chë Judea luaroquënga y ndoñe judiëngnaca; chënga sënjánaimpadana bacna soyënga amama ngménaca chamuatenójuaboma, chca amana chamuajbaná y Bëngbe Bëtsabe benache chámuatishachama, y soyënga chamotsama jinÿinÿiyama chca ndegombre tmojanmama. ²¹ Chca sënjánama causa, judiënga Bëngbe Bëtsabe bëts yebnoça šmonjanishache y tmonjánbošena atše jtsóbana. ²² Pero Bëngbe Bëtsá sempre šonduájabuachana, y chca, cada te méntsoñama, nÿetscanga Bëngbe Bëtsabiamá sëndabuayiná, uámanëngbioye y nduámanëngbioy-naca; nÿe ntšamo Moisés y Bëngbe

Bëtsabe juabna oyebuambnayënga tmojanayancá, ntšamo yochjopásama atše sëndoyebuambná; inÿetšá ndoñe. ²³ Chënga tmonjánayana: ‘Bëngbe Bëtsabe Uámana Uabuayaná, Cristo jóbanama bontsemna; pero chaojóbanentšana, cha chë natsaná echántsemna obanënguentšana jtayenama, y cha judiëngbioye y ndoñe judiëngbioye echanjabuayená, y chca, chënga mochántsetatšëmbo nÿetscanga chábeñe tmojtsošbuáchenga atsebácanënga mochtsemnama ca.”

Pablo tojanma rey Agrípbioye jáyëjanama, Jesucristbeñe ošbuachiyá chaóbemama

²⁴ Pablo, cachá jenéuyanama chë soyënga tojánayana ora, Festo méntšá tojanáyebuachena: —¡Pablo, opá cojtsóbema! Yapa ualáye causa, opá tcojtsóbema ca.

²⁵ Pero Pablo tbojanjuá: —Opá ndoñe quetsásmëna, bëts uámana Festo; inÿetšá entsemna; atše sëntsoyebuambná nÿets juábna, y ndegombre soyënga. ²⁶ Chentše rey Agripa entsuenana, y cha puerte tšabá chë soyëngama endëtatsëmbo, chíyeca, tondayama ntjatauatjca, atše chabe delante sëntsoyebuambná; atše corente sëndëtatsëmbo chánaca chë soyëngama yotatsëmbuama, er ndayá Jesús tojanmcá, ndoñe tonjopasá ndaye iytémena chaboye. ²⁷ Bëts rey Agripa, ¿Bëngbe Bëtsabe juabna oyebuambnayënga tmojánayana soyënguñe aca quecošbuaché? Atše sëntsetatšëmbo añe chiñe cošbuáchema ca —Pablo tbojanianá.

²⁸ Chora Agripa tbojanjuá: —Batšatema más y mašcjayëñaná Jesucristbe ustoná atše jóbemama ca.

²⁹ As Pablo tojánayana: —Nÿe batšatema más o bëtsicama más, atše Bëngbe Bëtsá sëntseimpadana, ndoñe

nÿe bëndatbe barie, sinó nÿetscanga chë mora šmojtsuenanënga, atšcá Cristbe ústonënga chašmobiamama, pero utámenënga ndoñe chamondétsemna, ntšamo mora atše sëntsemncá ca.

³⁰Chorna, chë rey, chë mandado, Berenice y chë chëngaftaca imojantbiámánënga tmojantsbaná, ³¹y luaroye tmojána chë soyama jencuéntama. Mëntšá imojtsichamo: —Quem boyabása ndocna bacna soye tonjama jóbanama chabotsemnana, ni mo utamená jtsemnana ndoñe quebnátsmëna ca.

³²Y Agripa Féstbioye tbojaniana: —Chë Romoca bëts mandado, quem chabe soyama cháuyanama cachá ndoñe matënjábošenëse, bënga matmënjobená quem boyabása jëtsboshjonama ca.

Roma bëts puebloye Pablo tmojanichmó

27 Italia ca uabaina luaroye Pablo jíchmuama tmojanenoyeuná ora, atše, quem librëša uabiamnayá, cháftaca sënjána. Chora Pablo y chë inÿe utámenënga Julio ca uabainabe cucuatšinë tmonjánabashejuana. Julio enjamna canÿa chë Romoca bëts mandadbe soldadënguentša mandayá. ²Asna, fsënjánašëngo canÿe Adramitio puebloca barcuinë; ya chë Asioca bëts pueblëngoye juama enjëtsamna. Cesarea pueblentsana fsënjánbocna y Aristárnaca bëngaftaca enjëtsamna; cha enjamna Tesalónica bëts puebloca, Macedonia luaroca.

³Chë inÿe yëfsana, Sidón puebloye fsënjánashajna. Chentše Julio, tšabá mandbomná Pábloftaca enjëtsamna; tbonjanlesenciá chabe amiguëngbioye chauabuáchama, chënga chamofjama y chamóbocuedama. ⁴Sidonocana fsënjëtsanbocnentšana, bëngbe contra corente enjëtsëbinÿiaye. Chíyeca,

Chipre fshantsënga catšbioicajana, ndoñe yapa quentëtsebinÿiayëjana bënga fsënjána. ⁵Cilicia y Panfilia luarënga béconana mar bejaycá fsënjánachnëngo, y Mira bëts puebloye fsënjánashajna, Licia luaroca.

⁶Chë soldadëngbe amëndayá, canÿe Alejandría puebloca barco chentše tonjáninÿena, Italia luaroye vojétsaye; asna, šonjanamëndá chë barcuinë jenójayiyana. ⁷Baseftaytentscuana uenana fsënjánana y pordonto fsënjanobená Gnido pueblentsa ndirichiñe jashjanguana. Cabá bëngbe contra enjëtsëbinÿiaye causa, Salmón luarëjana fsënjánachnëjna, Creta fshantsënga béconana, ndoñe yapa quentëtsebinÿiayëjana. ⁸Y chca, pordonto bejaycá fsënjánana, fshantsënga béconana; chentšana, canÿe pueblo, Tšabe Puertënga ca uabáinentše fsënjánashajna, Lasea ca uabaina pueblo béconana.

⁹Chca, bayté tonjanochnëngo y chora chë bejaycá jama puerta resjo enjëtsëmna, er ya chë judiënga bayënga jobáyama te tonjanochnëngo, Bëngbe Bëtsá chëngbe bacna soyëngama cháuaperdonama, y chora chë uaftena tempo joshjanguama ya enjëtsobeco.

¹⁰Chíyeca Pablo chë entsanga mëntšá tonjanabuayená: “Baconga, atše šontsinÿana mora puerta resjo entsemna bejaycá játama, y ndoñe tšabá queochátsmëna, ni chë uasmanëshangama, ni chë barcuama y bëngbiana cach ndoñe, mo nderado muanjanóbana ca.”

¹¹Pero chë soldadëngbe amëndayá Páblëbioye ndoñe ntjoyeunayana; más, chë barcuentsa mandayá y chë barco nduñëbioye añe. ¹²Ndoñe tšabá yonjamna, chë barco chora enjëtsëmmentše chë uaftena tempëntscuana jëftsemnana; chë causa, nÿa mo nÿetscanga tmonjanenoyeuná

cachiñe bejaycá chentshana játama, nderado cuanjobenaye Fenice puebløye jashjanguama y chentše jéftsemnama chë uaftena tempo tojopochocantscuana. Chë pueblo Creta luaroca enjamna; y choye jamashënguamna enjamna shinÿe endbetsenatjëmbambana juachoica tsjuanoicajana y tsmanoicajana.

Mar béjayañe puerte uaftena y binÿia tojanóshjango

¹³ Chentshana tonjanontsé tsmanoicana batśá binÿiayana, chíyeca chë entsanga tmonjanjuabó ya yojtsanopodena jtétóntśana jama ca. As, chentshana fsënjéftsanbocna y bejaycá fsënjána, Creta fshantsënga beconanëjana. ¹⁴ Pero baseftayté chentshana, chë fshantsëngocana tonjanontsé corente jabuache binÿiayana y chë barquëshoye enjétsoshjajuana. Chë binÿia yojanabaina Nordeste binÿia ca. ¹⁵ Chë barcna nÿe chë bínÿiëbe ponto tonjanontsé uayana; chë binÿia enjétsobayëjana jama ndoñe quentétsopodena causa, šonjanotocá nÿe ntśamo tojtsebinÿiacá chaśúyambama. ¹⁶ Chentshana fsënjánachnějna Cauda ca uabaina stëtsoicajana, base fshantsënga mar béjayoca; chiñe ya ndoñe tśa jabuache quentésebinÿiaye y pordonto fsënjanobená buyeshoicana jtabocnana chë barco enjanasjá canouše, ndoñe chaondétsóndbemama. ¹⁷ Ya chë barquëshoye fsëntanëšëngo orna, chë entsanga lazéjangaca chë barquëshasha tmontsanabatsécaca, más uamorochëshasha chaotsamnama. Pero chënga monjétsauatja nderado chë barco chë Sirte ca uabaina cascajuentše nanjetsánjua; asna, chë barcuentsá ancla tmonjanashëbëútsëna, chë barco ndoñe betscø chaondétsábonjnama, y ntśamo enjetsanbinÿiaycá fsënjána. ¹⁸ Chë inÿe yëfsana y chë binÿiayana

cabá jabuache enjésemna causa, chënga tmonjanontsé chë barcuentsá uasmanëshangá jtsëshbuétsëtsana; ¹⁹ y unga tianoye béngnaca šonjanotocá, cach bëngbe cucuátseca, chë barcuentsá soyënga buyeshoye jtsétsanana. ²⁰ Baytentscuana bënga ndoñe chibiatanobená jinÿana ni shinÿe, ni estrellatëmënga, tśa tonjétsëibetata causa; y tśa jabuache enjétsëbinÿiaye causa, bënga ya ndoñe quefstétsanobatmana chentshana jótsbocana.

²¹ Ya bayté enjésemna y chëntscuana tondaye saná ntjascá fsënjésemna. Chentshana, Pablo bëngbe tsëntsaca tonjantsá y tonjánayana: “Baconga, tśabá manjamna atše mašmënjanoyeuná y Creta luarocana ndoñe matmënjéftsanbocna; chca mora ndoñe mal mamojtsepasá y ndoñe nÿa nÿetsá matmënjobuetše. ²² Pero mora ngménaca ndoñe matsmënëngana; masque chë barco echantsenatjëmbe, tšëngaftanguentsá ndocná queochatóbana. ²³ Ibeta canÿe ángel šonjébëbocna; Bëngbe Bëtsá, ndabia atše sëndmëna y nda sëndëserveda, cha tbojichmó; ²⁴ y chë ángel mëntśá šonjauyana: ‘Pablo, ndoñe matauatjana; entseyta aca chë Romoca bëts mandádbioye chacotsama, y aca Bëngbe Bëtsábia cómnayeca, nÿetsca quem barcuñe ajnënga jobanámentsana cha echanjatsebacá ca.’ ²⁵ Chcasna, baconga, ndoñe matauatjëngana, er atše Bëngbe Bëtsábeñe corente sëntsošbuaché y lempe ntśamo chë ángel šonjauyancá echanjóbcna. ²⁶ Pero mora entseyta canÿe fshantse mar béjayañe chaśúshejanguama ca” —cha tonjanëyana.

²⁷ Canÿe ibeta, uta semana fsënjánana chentshana chë Adriático ca uabaina mar béjayañe fsënjésemna, y nÿe ínÿoye y ínÿoye chë binÿia šonjétsëyambaye.

Y mo tséntseto yojétsemna orna, chë barcuentsá trabájayënga tmojanjuabó ya fshantse béconana imojétsemna ca. ²⁸As chënga tmonjanmedidá ntsachetšá chë býeshe buatjoye inamnana y tonjanóbocna unga bnétsana y chnénguana metro; más choye cachiñe tmonjanmedidá y uta bnétsana canýsëfta metro tonjanóbocna. ²⁹Chënga monjétsautja nderado bëts ndëtšbëngaca nanjetsántšëtjama; asna, chë barco stëtsoicajana canta ancla buyeshoye tmonjanashëbëütšena, chë barco ndoñe más chaondëtšabonjnana, y tša monjétseboše betscó chaobínynama. ³⁰Chëntscuana, chë barcuentsá trabájayënga tmojánbošena chentšana jtsachetana; chamna, chënga tmojanontsé chë canoušë buyeshoye justjanguana, pero chca imojétsama, mo chë anlënga chë barco natsanoica cuaftšëstjajuancá. ³¹Pero Pablo chë soye tojáninje, y chë soldadëngbe amëndayábioye y chë soldadëngbioye tonjanená y mëntšá tonjanéyana: “Chë barcuentsá trabájayënga cach quem barcuentsë ndoñe chamonjoquedase, tsëngaftanga ndoñe quešmochatobenaye muentšana jótsbocama ca.”

³²As, chë soldadënga tmonjána y chë canoušentša lazëjënga tmontsantëtsetšë y buyeshoye chëše tmontsantsatšë.

³³Enjëtsebinýana ora, Pablo nýetscanga tonjanaimpadá ndayánaca chamosëngama, mëntšá jáuyanëse: “Ya uta semana entsemna y tsëngaftanga ni mo batšatema chešmatamaná, y tondaye chešmatsbmuananga. ³⁴Diosmanda, masque nýe mo batšatëmnaca šmochjase. Chca cmontsamna jamana ndoñe chašmondóbanama, er ndocná ndocá queochatspása ca.”

³⁵Pablo, chca tonjánayanentšana, canýe tandëše tonjanca y nýetscangbe delante Bëngbe Bëtsábioye

tbontanchuá. Chorna, tonjanjatá y tonjanontsé jasama. ³⁶Chentšana nýetscanga tmonjaneniñemó y chëngnaca tmonjanse. ³⁷(Chë barcuentsë nýetscanga fsënjamna uta patse y canýsëfta bnétsana y chnénguanënga.) ³⁸Ntsamo inmabošca tmonjansentšana, buyeshoye trigo tmontsanashaná, chca, chë barco ndoñe yapa chaondëtšautama.

Chë barco tojtsanenanatjëmba

³⁹Ya tonjanbinýna ora, chë barcuentsá trabájayënga ndoñe quemëntëtsetatšëmbo ndaye fshantse chentšë bëtsemnana, pero tmonjáninje chë fshantsentšë canýe luare jachañe, chë béjaye chë luaroye omashjuantšë, y chiñe canýe chënyañe enjamna; as chënga tmonjanjuabó jarrepáрана nderado cuanjobenaye chëjana chë barco chë fshantsoye juyambana.

⁴⁰Asna, chë anlentsá lazëjënga tmontsantëtsetšë y chë anlënga buyeshoye tmontsanboshjuana, y chë timón, chë barco juyambama oservena soyentsá uabatsëcnjëngnaca tmontsanjafjoná. Chorna, chë barcuentsá natsanoica niñëšiñe entšëjua tsbanánoye tmontanëšëngo, y chë binýia tonjanma chë barco chaontsé chë chënyoye juabëconama.

⁴¹Pero chë barco canýe luaroye tonjánashjango, y chentšë chë béjaye catatoicajana enjetsobuá y chë barco cánýentšë, bëtsca cascajo buyeshiñe binýnentšë tontsanajo. Chë barcuentsá natsanoica lado chë cascajuiñe entsanajuena, ndócnoye juabónjuama ntsopodencá, y chë stëtsoica lado puerta entsanashatiyyná y lempe entsanandbiamná, yapa binýia causa y býeshe chentšë enjëtsojantšëta causa.

⁴²Chora, chë soldadënga tmonjanjuabó chë utámenënga

jtsëbáyana, jachbabëse chënga ndoñe chamondétsachetama. ⁴³Pero chë soldadëngbe amëndayá inaboše Pablo jatsbocama, y chíyeca chë soldadëngbiöye ndoñe chenatanalesenciá chca jamana; y tojanmandá nyetscanga chë jachbabama obenëngna natsana chë buyeshoye joshbuetšana tsachoye chamuashjanguama, ⁴⁴y chë ínÿengna tablëshënguine o chë barcuentsha pedazënguine chamoshbuetšama. Y chca, nyetscanga fsëñjanobená tšabá y ndocá ntjapasacá fshantsoye jashjanguama.

Pablo Malta luaroca

28 Ya nyetscanga fshantsoca tšabá fsëñjëtsemna ora; fsëñjántatšëmbona chë luare Malta ca yojanabaina. ²Chë luarentša entsanga béngaftaca corente tšabá mándbomnënga monjëtsemna; canÿe íñeshe tmonjanangbotjó y šonjanëbuaja choca bënga jatóšboniyama, er tša enjëtsoftena y yapa enjëtsešesna. ³Pablo tojanatbaná básefta buashana chamesëfjënga y chë íñeshoye enjëtsešhacjnaye ora, canÿe mëtsçuaye tojánbocna y enjetsachaye, chentšë yapa obonÿaye causa, y Páblëbe cucuatšinë tontsanonjýá. ⁴Chë luarentša entsanga, chë mëtsçuaye Páblëbe cucuatšinë yojtsajonÿanama tmonjáninÿe ora, monjëtseñatsëtsnaye: “Quem boyabása ndegombre inÿa obanayá cuanmëna; mar béjayoca jobanámentšana tojtsbocá, pero chca uamana causa, diosá Justicia ndoñe quebnatslesencia cha vida chaotsebomnana ca.”

⁵Pero Pablo tontsanenacuestëtoná y íñeshoye chë mëtsçuaye tbontsantsatšë y Pablo ndocá chenatanpasá. ⁶Chë entsanga imojëtsejuabnaye chábiöye bochtsacuefshachá y nyë ndeolpe obaná yochjashajaye

ca. Pero bën tonjanochnëngo y ndocá chenátanopasama chënga tmonjáninÿe ora, ya ndoñe cachcá quemëntétsanjuabnaye y tmonjanontšë ichámuana Pablo canÿe dios inamna ca.

⁷Chentša béconana inamna chë luarentša mandayabe fshantsënga. Cha šonjanëbuaja y corente tšabá šonjanacuedá, unga tentscuana. Chë taitana Publio ca inauabaina. ⁸Chë tempo, Públiëbe taitá šocá jutsnëšhañe inajájona, calentóraca y buñëca buamachnëjuanánaca. Pablo tonjána cha jinÿama y tonjánamashëngo; Bëngbe Bëtsáböyöe tbonjanimpadá y chë šocábeñe chabe cucuatšënga tonjanajjó, y chca, cha shnaná enjëtsešsmëna. ⁹Chca tonjanopasá chentšana, chë luarentša inÿe šoquënga Páblëbiöyöe monjánajna y cha enjánashnaye. ¹⁰Bëtscá tšabe soyënga chentšë bëngbiama tmonjanma, y cachiñe játama ya chë barcuine fsëntanenojayenga orna, lempe ntšamo bejaycá jama šonjanëjbotcá chënga šonjanatšatá.

Pablo Romoye tojánashjango

¹¹Chë fshantsentšë mar béjayoca unga ishinÿe fsëñjëtsemna, y chentšana canÿe Alejandriocana yojanabá barcuine fsëñjanenojayé; chë barco nyets uaftena tempo chë luarentšë yojëftsamna y enjanabaina Cástor y Pólux ca, mo chë romanëngbe uta diosata catsatcá. ¹²Chentšana, Siracusa bëts pueblöyöe fsëñjánashjajna y chentšë unga te fsëñjëtsemna; ¹³y chentšana fshantse béconana bejaycá fsëñjána, Regio pueblöyöe jashjanguëntscuana. Yëfsana, tsmánoicana tsjuanoye enjëtsebinÿiaye, y chca, chë inÿe yëfsana Puteoli pueblöyöe fsëñjánashjajna. ¹⁴Chentšë básefta Jesucrístbeñe ošbuáchiyënga fsëñjánanÿena, y šonjanëbuaja chëngaftaca canÿe

semana chentše jěftsajétanama; y chentšana Romoye fsěnjěftsanbocna. ¹⁵Romoca Jesucristbeñe ošbuáchiyěnga ya imojétsetatsěmbo běnga choye fchjanashjajnama; chcasna, chěnga tmonjánbocna běnga jajébenguama canye luare Foro del Apio y Unga Taberněnga ca uabainóntsoñe. Pablo chěnga tonjánanye ora, Běngbe Bětsá tbontančuá y puerte añémoca enjětsemna. ¹⁶Romoye fsěnjánashjajna ora, soldaděngbe aměndayá Páblěbioye tbonjalesenciá cányabe yebnentše chaotsiyenama, y tonjanmandá canye soldado chabotsebojanýama.

Ndayá Pablo Romoca tojanma

¹⁷Choye fsěnjánashjajnentšana unga tianoye, Pablo tonjanmandá chentše imnoyena judiěnga más uámaněnga chamobéconama; y nyetscanga ya tmojánenefjna ora, cha tojanéyana: —Catsátanga judiěnga, masque atše tondaye chiyatsma běnga judiěnga mondbětsama soyěngama contra, ni běngbe běts taitanga imojanamana soyěngama contra, judiěnga Jerusalemoca šmonjanishache y romaněngbe cucuatšine šmonjánboshjona. ¹⁸Chě romaněnga lempe šmonjantjá chentšana, monjětseboše atše jětsboshjonana, er ndocna bacna soye chemátaninyena atše jóbanama chašotsemnama. ¹⁹Pero chě judiěnga ndoñe quemtětseboše atše chašmuatsboshjonama; chíyeca, šonjanotocá jáimpadana cach Romoca běts uámana mandado cháuyana atše tšabá o ndoñe tijanmama, masque atše tondaye quetsátsbomna, cach atšbe luarentša entšanga, judiěngbe contra jayanama. ²⁰Chíyeca, atše tcbonjúbuaja jányama y jáuyanama, er ndayama chě Israeloca entšanga puerte jtsošbuáchiyěse mondobátmanama, chě

obaněnga mochtayenama, atše mora utamená sěntsemna ca —tojanéyana.

²¹Chora chěnga tmojanianyana: —Běnga ni mo canye tsbuanácha Judeocana fchiyatáyěngaca acbiama noticiěngaca, y ni canye catsáta judío, chocana moye ashjajněnguentšá, ndocna bacna soye acbiama chešnatacuntá. ²²Běnga fsěntseboše jouenana ntšamo aca cojuabnama, er ntšamo Jesucristbe ustoněngbiama fstsětatsěmbcá, entsemna ana nyets luarenache chěngbe contra entšanga imojtsichamo ca.

²³Asna, canye tescama Pablo tmojanianyana chca chaotsemnama; y chě tena, ba entšanga chě Pablo posada inabomnoye tmojanobeconá. Y cachěscana tojanjétaněntscuana, Pablo entšanga yojanětsětsná Běngbe Bětsabe aměndayama, ndayama cha ininye y inatátšěmbo; y yojtsentšana chěnga jáyějanama Jesúsbeñe chamotsošbuáchema, Moisesbe leyěnguentša soyěngaca y Běngbe Bětsabe juabna oyebuambnayěngbe uabemana librěšangañe soyěngaca.

²⁴Báseftanga añe imojtssošbuáchiye ntšamo Pablo yojtsanětsětsnacá ndegombre bětsemnama, pero inyengna ndoñe. ²⁵Nyetscanga ndoñe cachcá montsanjuabnaye causa, tmojanontšě chentšana jésecocanana. As Pablo tojanéyana: “Nyets razónaca chě Uámana Espiritu tšěngaftangbe taitanga tojanéyana, Běngbe Bětsabe juabna oyebuambnayá Isaiásbiajana, měntšá:

²⁶Motsa chě entšanga jauyanama: ‘Bětscá šmochantsuenana, pero tondaye quemochátěsertana; tša šmochantsafšna, pero tondaye quemochátinye.

²⁷Muentša entšanga ainánaca josértama ndoñe quemátsboše causa, chěnga nduauenaněnga montsemna y nduabinýněngnaca;

chënga bomínjeca ndoñe
 chamondobená jinñama,
 ni chëngbe matscuašeca jouenama,
 ni chëngbe ainánaca josértama ndoñe
 chamondobená,
 chca, atšbe benache ndoñe
 chamondishachama,
 atše ndoñe ntjátsebacama ca.”

²⁸ Pablo chora mëntšá tojanéyana:
 “Ndegombre šmochtsetátšëmbo, cach
 quem Bëngbe Bëtsabe buayenana
 soyënga entšanga bacna soyënguentšana
 játsebacama, chë ndoñe judiëngbioye
 mochanjábuayenaye, y ndegombre
 chënga cocayé añe mochanjóyeunaye

ca.” ²⁹ (Pablo chca tojánayana ora, chë
 judiënga chentšana imojésebocana y tša
 imojtsenatsëtsnaye.)

³⁰ Pablo uta uata chentše
 tonjanoquedá canñe uántšamena
 yebnentše; y nñetscanga cha
 jauatsëtsayama monjánajnënga cha
 enjanëbuájajana. ³¹ Nñetscangbe
 delante puerte añémoca entšanga
 enjanabuayiyná Bëngbe Bëtsabe
 amëndayama, y enjanabuatambá
 soyënga Bëngbe Utabná Jesucristbiamá,
 y ndocna Romoca mandayá
 quebënjatanauyá chca jtsamama.

Romanos

Pablo Romoca ošbuáchiyënga jacheuyama

1 Atše Pablo, Jesucristbe oservená, quem tsbuanácha séntsabiamná. Bëngbe Bëtsá šonjanchembo Jesucristbe ichmoná jtsemnama, y šonjanbocacá chabe tšabe noticiëngama entšanga chayábuayenama.

²Ya bayté entsemna, Bëngbe Bëtsá chabe juabna oyebuambnayéngaftaca chë tšabe noticiënga entšanga tojanašebuachená, y chënga chca tmojëtsanábema Bëngbe Bëtsabe uabemana palabrenguine. ³⁻⁴Chë tšabe noticiëngna, chabe Uaquiñá Bëngbe Utabná Jesucristbiamna jtsóye-buambnayana. Entšá quetsomñecana, tojanonýná canye rey Davídbentša entšábentšana; pero chabe espíritu sempre uamanáyecna, Bëngbe Bëtsá chabe obenánaca entšanga tojaninýanyé Jesucristo chabe Uaquiñá bëtsemnama. Cha chca tojaninýanyé chë Uaquiñá cháuatayenama cha tojanma ora.

⁵Chábeyeca, Bëngbe Bëtsá atše canye bëts soyama šojanábuayana, Jesucristbe ichmoná jtsemnama, chabe soyëngama entšanga jábuayenama, y nyets luarënguenache Jesucristbeñe ošbuáchiyënga chamotsemnama, y chca, ntšamo cha yomandacá chënga chamotseyeunanama. ⁶⁻⁷Tšëngaftángnaca chëngbeñe šmontsemna, tšëngaftanga chë Romoca šmoyenënga, ndëmuanýënga Bëngbe Bëtsá tcmojáchembo Jesucristbenga chašmotsemnama. Atše tšëngaftangbiamna séntsabiamná, tšëngaftanga Bëngbe Bëtsabe bonshánënga y chabe entšanga chašmotsemnama chëmbonënga. Atše séntsaimpadana Bëngbe Bëtsá Bëngbe

Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y chaboma tšëngaftanga ainaniñe tšabe ebionana chašmotsebmnama.

Pablo tša inaboše Roma bëts puebloye jama

⁸Jabojátšamna, Bëngbe Bëtsá, Jesucristbiamna šcuatschuá, cada ona tšëngaftanguentsabiamna, er nyets quem luariñe entšanga tša monjesoyebuambná tšëngaftanga Jesucristbeñe bëtscá šmojtsošbuáchema. ⁹Bëngbe Bëtsá, nda nyets ainánaca sëndëserveda, tšabe noticiënga chabe Uaquiñabiamna abuayinayiniñe, endétatšëmbo atše nyets tempo Bëngbe Bëtsáftaca stsencuénta ora, tšëngaftangbiamna sëndétseimpadanama; ¹⁰y mora Bëngbe Bëtsá séntseimpadana, nýa mora y cha tojtsebošëse, chašolesenciá jama tšëngaftanga jautsëtsayama. ¹¹Er atše tša sënjëseboše tšëngaftanga jányama, chca, atše chayobená jamama chë Uámana Espíritbentšana yóbocana tšabe soyënga tšëngaftanga chašmotsebmnama; y chca, tšëngaftanga ainaniñe bëts añemo chašmotsebmnama, y Jesucristbeñe corente chašmotsošbuáchema; ¹²o más tšabá jayanamna, tšëngaftanga y átšeftaca mochjenájabuache ainaniñe bëts añemo jtsebmnama, tšëngaftanga y átšnaca Jesucristbeñe tša imošbuachéyeca.

¹³Y morna, Jesucristbeyeca catsátanga, séntseboše tšëngaftanga chašmotsetátšëmbo atše ba soye jama tijájuaboma, tšëngaftanga jautsëtsayama, pero méntsoñama ndoñe tsjobenaye. Atše séntseboše ndayá chayobená jamana ínýënga tšëngaftangbioca Jesucristbeñe chamotsošbuáchema, ntšamo ínýëngbeñe ndoñe judiéngbeñe tonjopasacá. ¹⁴Atše Jesucristbiamna canye

oservená sëndmëna, y chíyeca nyetscán-
gaftaca obligaciúnaca séntsemna, chë
publënguine oyenëngaftaca y bën tjoye
oyenëngaftaca, chë uatsjinÿenëngaftaca
y ndoñe chcangaftácnaca. ¹⁵Chíyeca at-
še tša séntseboše tsëngaftanga chë Ro-
moca šmoyenëgnaca chë tšabe noti-
ciënga jábuayenama.

Chë tšabe noticiënga Bëngbe Bëtsabe obenana jtsinÿanÿayana

¹⁶Atše ndoñe quetsátëuatja chë
tšabe noticiënga jtsabuayinayama,
er chë noticiënga jtsinÿanÿayana
Bëngbe Bëtsabe obenana; y chë
obenánaca, nyetscanga Jesucristbeñe
ošbuáchiyënga jtsobenana atsebá-
canënga jtsemnama, natsana chë
judiënga chca ošbuáchiyënga, pero chë
ndoñe judiégnaca. ¹⁷Er chë tšabe
noticiënga jtsinÿanÿayana ntšamo
Bëngbe Bëtsá inétsama entšanga chabe
bominÿiñe tšábenga chamotsemnama.
Y entšanga chabe bominÿiñe tšábenga
jábiamana, chënga Jesucristbeñe
tmojtsošbuáchema. Ntšamo Bëngbe
Bëtsabe uabemana palabrenguine
endayancá: “Nÿe ndabiama Bëngbe
Bëtsá tojama chabe bominÿiñe tšabia
chaotsemnama, cha Bëngbe Bëtsábeñe
betsošbuáchema, cha ndegombre chë
nyetsca tescama yomna tšabe vida
echántsebomna ca.”

Bëngbe Bëtsabe delante nyetscanga culpa bomnënga mondmëna

¹⁸Bëngbe Bëtsá celocana tojinÿanÿé,
chë uabouana castigo, tša tbojetnama
entšangbiama chaotsemnama, ainaniñe
bacna juabnënga bomnëngbiama y
chë bacna soyënga amëngbiama y
ndëmuanÿengbiama, masque Bëngbe
Bëtsabe ndegombre soyënga jtsotatšëm-
bñana, tša bacna soyënga tmojtsama
causa, ndoñe ntjalesénciana cachënga
jtsiyenama ntšamo ndegombre yomncá.

¹⁹Bëngbe Bëtsá echanjácastigaye, er
ntšamo entšanga imobencá Bëngbe
Bëtsabiama jtsetatšëmbuama soye,
chëngaftaca sempre endëtsemna.
Y chca endmëna, Bëngbe Bëtsá
chë soye tojinÿanÿéyeca. ²⁰Bëngbe
Bëtsá quem luare tojanma orscana,
entšanga mondetsobena botamana
josértana, Bëngbe Bëtsabe obenana
ndocna te yochjëftopochócama
y cha ndegombre Bëngbe Bëtsá
yomnama. Chë soyënga Bëngbe
Bëtsabiama entšanga quemúatobena
jinÿana; nÿe jtsetatšëmbuamna añe.
Entšanga mondobena chë soyënga
Bëngbe Bëtsabiama jtsetatšëmbuana,
cachá tojanma soyëngaca. Chcasna,
chënga ndoñe quemátobena
jayanana bacna soye tmojama, cha
nduabuatma causa ca. ²¹Chënga
Bëngbe Bëtsabiama mondétatšëmbo,
pero ndoñe ntsebošana chábioye
jadórana, “aca ndegombre Bëngbe
Bëtsá condmëna ca” jtsichámëse, ni
cha ntsatschuanayana. Pero, ntšamo
chënga tmojtsejuabnacá tondaye
ntsámanana; ndoservena juabnëngaca
y bacna juabnëngaca montsiyena, y
chca, chënga montsiyena, jtsamëse
ntšamo cachëngbe juabnënga yomncá,
mo ibetiñe cuaftsajncá. ²²Chënga
jtsichámuana corente osertánënga
imomna ca, pero ndegombrna juabna
ndbomnënga mondmëna. ²³Chënga
ndoñe ntsadoránana Bëngbe Bëtsá,
chë ndocna te yochjëftsobaná; chë
cuenta, soyënga tmojobopormá mo
entšangcá, y chëngna añe jóbanana;
o soyënga shloftšëngcá o bayëngcá,
o osjojnayëngcá, y chënga diosënga
imomna ca jtsejuabnayëse jtsadoránana.
²⁴Chíyeca, Bëngbe Bëtsá cachcá
tojónÿa, cachëngbe ainaniñe puerte
bacna juabnëngaca mandánënga
chamotsiyenama, y chca, bacna
soyëngnaca ínÿengaftaca imojtsama;

chë soyëngamna jtsëuatjana chënga entsamna. ²⁵Chënga chca jtsemnana, er ndoñe tmonjábošena Bëngbe Bëtsabe ndegombre soyënguine jtsošbuáchiyana, pero chë ndoñe ndegombre soyënguine cocayé jtsošbuáchiyana; chënga jtsadoránana y jtseservénana, Bëngbe Bëtsá quem luarentše tojama soyënga; pero ndoñe ntsadoránana, ni ntseservénana cach Bëngbe Bëtsá, chë nyetsca chë soyënga tojanmá. Entšanga nyets tempo cha chamotsatschuaná. Chca chaotsemna.

²⁶Entšanga chca ndoñe tšabá tmonjámayeca, Bëngbe Bëtsá cachcá tojónya, chënga ínÿengaftaca bacna soyënga jtsamama chamotsebošama; chë soyëngamna jtsëuatjana chënga entsamna. Y chca, chë shembásengnaca tmojtsajbaná boyabásengaftaca jtsamana ntšamo tšabá yomncá, inÿe shembásengaftaca bacna soyënga jtsamama. ²⁷Cachcá, boyabásenga tmojtsajbaná shembásengaftaca jtsamana ntšamo tšabá yomncá; y tša imojtseboše inÿe boyabásengaftaca bacna soyënga jtsamama. Chënga chë inÿe boyabásengaftaca bacna soyënga imojtsama causa, entsamna jtsëuatjana, y chë soyëngama castigánënga mochántsemna, cachëngbe cuerpënguine jasúfriase, ntšamo chëngbe bacna soyëngama yojtsëmerecená.

²⁸Chënga ndoñe tmonjábošena jtsiyenana jtsejuabnayëse, ntšamo entšanga Bëngbe Bëtsabiana imotatsëmbcá ndegombre bëtsemnana. Chíyeca Bëngbe Bëtsá cachcá tojónya, cachëngbe ndbémana juábnaca chamotsiyenama; y chca, chënga ba soyënga jtsamana, jamama ndoñe yontsamncá. ²⁹Chënga nyetscna bacna soye jtsamana: ainaniñe nyetscna bacna juabna jtsebošnana, nyë cachëngbiana bëtscá soyënga

jtsebošnana tša jésebošana, y ínÿengbioye ntšámnaca jáborlama jtsebošana; chënga nyë játsbošana inÿa tojtsebošna soyënga jtsebošnana, ínÿenga jtsébánayana. Mondmëna penzentserënga, ínÿenga áingñayënga, puerte bacna soyënga ínÿengbiana bošënga, y uayátsenayënga.

³⁰Chënga ínÿengbiana podesca jtsóyebuambnayana, Bëngbe Bëtsá jtsáyayana, ínÿenga jtsóyanguayana, nyë cachëngbe soyënga más iuámna ca jésejuabnayana, tša jtšenábotamnayana, jésejuabnayana ntšamo muanjobenaye más bacna soyënga jamana; chëngbe bëtšétsangbioye ndoñe ntsayaunanana.

³¹Chënga ndoñe ntsebošana chë tšabe soyëngama chaósertama, tondayama palabra ndbomnënga, ndocnábioye ntsebobonshánana y ndocnabiana ntjóngmiana. ³²Y chënga corente mondétatsëmbo chca soyënga amëngbiana, Bëngbe Bëtsá chabe leyine tojayana jóbanama yojtsëmerecena ca; pero masque chca, chënga nyets tempo chca jtsamana, y oyejuayënga jtsénÿayana ínÿenga cachcá tmojtsama ora.

Bëngbe Bëtsá echanjama chë ndoñe tšabe soye amënga bëtscá castigo chamotsebošnana

2 Chcasna tšëngaftanga, chë ínÿenga ndoñe tšabá montsama ca šmojtsichámënga, ndoñe quešmátobena jayanana ndáyeca chca cach tšëngaftanga šmojama soyëngama. Tšëngaftanga chca ínÿengbiana šmojtsichamo ora, jtsinÿanÿnayana cach tšëngaftángnaca ndoñe tšabá šmonjamama, y castigánënga jtsemnana cmontsamna, er tšëngaftanga cachëngcá šmojtsiyena. ²Bënga mondétatsëmbo, Bëngbe Bëtsá ntšamo ndegombre yomncá inétsamama, chë chca amëngbiana ndoñe tšabá tmonjama ca

y castigánënga jtsemnama yojtsamna ca cha tojayana ora. ³Y tšëngaftanga, chë ñyënga ndoñe tšabá montsama ca šmojtsichámënga, y cachca soyënga šmojtsama, ¿šmojatsjuabná Bëngbe Bëtsabe castigüentsana šmochjotsbocá ca? ⁴Bëngbe Bëtsá tšëngaftangbiama corente tšabe juabna endbomna; mora ndoñe quecmátacastigaye, y tšëngaftangaftacna puerte uantado ñye chca endétsemna. ¿Chama tšëngaftanga cha šmojtsábotena? ¿Ndoñe šmondétatšëmbo Bëngbe Bëtsá chca corente jtsababuányëshanëse cmojtsénya, tšëngaftanga juabna chašmotrocama y chabe benache chašmuishachama cha yobóseyeca? ⁵Er tšëngaftanga ndoñe quešmátsboše chacmotsësertánama, y bacna soyënga amama jtsajbanama ndoñe quešmátsboše causa, šmontsama más bëts castigo chašmotsebomnama, chë ndayté Bëngbe Bëtsá ntšamo entsanga tmojamcá tšabá o ndoñe tšabá bétsemnama yochjayana ora; chë te, Bëngbe Bëtsá echanjamánda chë ndoñe tšabe soye amënga bëts castigo chamotsebomnama, y chë tšabe soye amëngna, uacanana soye; y chca echanjama ntšamo ndegombre yomncá, y echanjñyanýie cha tša tbojetna, entsanga ndoñe tšabá tmonjamama. ⁶Chca, chë te, ntšamo cada ona tojéftsemama, Bëngbe Bëtsábentsana echanjóyëngacñe. ⁷Ndëmuanýënga nyëts tempo tšabá jtsamëse imoyena, y chca imonguá Bëngbe Bëtsá más uámanënga chauabiama, cha chëngbiama tšabá chaotsoyebuambná y tšabe vida jtsebomnama chaoma; chë te chëngbiama Bëngbe Bëtsá echanjama, chë nyëtsca tescama yomna tšabe vida chamotsebomnama. ⁸Ñyënga imoyena, ñye cachëngbe juabnéngaca cachënga tšabá jtsomñama; y ntšamo ndegombre tšabá yomncá tmojtsaboté,

ntšamo ndoñe tšabá yomncá jtsamama. Y Bëngbe Bëtsá chë te, ndoñe tšabá tmonjéftsobuachjanguamna puerte etonaná echanjayana nyëtsca tescama castigánënga jtsemnana chënga yojtsamna ca. ⁹Bëngbe Bëtsá echanjama, chca amëngna puerte chamosufrima y lastemcá chëngbiama chaotsemnama, er yapa tsetšëmana chëngbiama echanjéftsemna; chca echántsemna chë hcángbeñe judiënga imomnëngbiama natsana, y ndoñe judiëngbiámna. ¹⁰Pero chë te, Bëngbe Bëtsá echanjama, ntšamo tšabá yomncá amëngna puerte uámanënga chamotsemnama, chëngbiama corente tšabá echanjóyebuambaye, y echanjama chënga cháftaca tšabá tempcá chamotsatsmënama; y chca echántsemna chë hcángbeñe judiënga imomnëngbiama natsana, pero ndoñe judiëngbiámna.

¹¹Er Bëngbe Bëtsabiama nyëtscanga cachcá monduámana. ¹²Chë Moisesbe ley ndoñe monduábomnënga, bacna soye tmojamamna castigo mochántsebomna, masque leyënga ndoñe tmonduábomnëse, ndayá yojtsamna jamama chaúyanama; y chë Moisesbe leyënga imuabomnëngbiamna, bacna soye tmojamama, Bëngbe Bëtsá echanjayana chënga ndoñe tšabá tmonjama ca y castigo chamotsebomna ca, chë leyënguñe iuayana soyëngaca. ¹³Chca endmëna, er Bëngbe Bëtsá ndoñe queonýbatsma entsanga chabe bominyñe tšábënga chamotsemnama, ñye ntšamo chë leyñe iuayancá tmojtsuenanama, sinó ntšamo leyënguñe iuayancá, ndayá jamama yojtsamncá tmojtsamëse. ¹⁴Chë ndoñe judiënga chca leyënga ndoñe quematábomna, pero chëngbe ainanentša juabnénga tojtsëtsësná ndayánaca jamana, y ndayá chamotsamama ntšamo chë leyënguñe

tomandancá chënga tmojamëse, chënga jtsinÿanÿnayana tšabá imotátšëmbo ndayá aíñe o ndoñe inétsamna jamama, masque leyënga ndoñe tmonduábomnëse, ndayá yojtsamna jamama chaúyanama. ¹⁵Ntšamo tmojtsiyencá chënga jtsinÿanÿnayana, ndayá leyíñe yomandánama chënga ainaniñe cachcá imojuabnama. Ntšamo chënga ainaniñe imotátšëmbo y imojuabnacá ndayá cachënga tmojamama, jtsinÿanÿnayana chënga ntšamo chë leyíñe yomandánama cachcá imojuabnama. Inÿe ora, chëngbe juabnënga echantsétsësnaye aíñe o ndoñe tšabá tmonjama ca; y ndayté, Bëngbe Bëtsá nÿetscangbiama ntšamo tmojamama yochjayana ora, cachëngbe ainaniñe tmojajuabó soyëngaca, cha echanjínÿanÿiye ndayá tšabá o ndoñe tšabá tmonjamama. ¹⁶Chë te, Bëngbe Bëtsá nÿetscangbiama echanjayana chëngbe juabnëngama y ntšamo tmojamama, ndayá entsanga tempo ndoñe tmonjáninÿama; cha chca echanjama Jesucristoftaca; y chë atše sëndabuayiyná tšabe noticiënga entsichamo ndegombre chca yochtsemnama.

Judiënga y Moisesbe ley

¹⁷Y mora tšëngaftangbiama, chë judiënga šmomna ca ichámënga, y tša šmojtsejuabná Moisesbe léyeca tšëngaftanga tšabe vida jtsebomnama, y jtsenábotamnyana Bëngbe Bëtsabe ubuáyana entsanga šmomna ca; ¹⁸tšëngaftanga chë ntšamo Bëngbe Bëtsá yobošcá tšëngaftanga chašmotsamama tatšëmbënga, y chë leyentšana šmojuatsjinÿe jobocacayana ndayá más tšabá jamama tojtsemncá. ¹⁹Tšëngaftanga tša jésejuabnayana, šmobena ínÿenga chë ntšamo tšëngaftanga cmësertancá ndosertánënga jujabuáchama ca, mo jtanënga

unachayënga cwaftsemnëngcá, o mo chë ndoñe binÿniñcá oyenëngbe juabnënga binÿnayëngcá; ²⁰tšëngaftanga jtsejuabnayana chë ntšamo tšabá yomncá ndosertánëngbiama abuayiynayënga šmomna ca, y mo chë basengcá tondaye nduatsjínÿenëngbiama abuátambayënga ca. Tšëngaftanga tša jésejuabnayana chë ley šmobomnama, lempe šmotátšëmbo ca y ntšamo šmojtsichamcá ndegombre yojtsemna ca. ²¹Y chcasna, tšëngaftanga chë ínÿenga abuátambayënga, ¿ndáyeca ndoñe cach tšëngaftanga šmondëtsánatsana? Tšëngaftanga ínÿengbioye jtsabuayiynayana ndoñe chamondëtsatbëbanama; as, ¿ndáyeca cach tšëngaftanga šmnëtsatbëbana? ²²Tšëngaftanga jtsichámuana, acbe shema o boyábioye ndoñe ínÿaftaca cattseíngñaye ca; as, ¿ndáyeca tšëngaftanga cachcá šmnëtsama? Tšëngaftanga jtsáboyënjana soyënga chë ndayama ínÿenga tmojtsichamo diosënga yomna ca y jtsadórayana; as, ¿ndáyeca chë soyënga chënga jadórama yebnënguentsana uámana soyënga šmnëtsatbëbana? ²³Tšëngaftanga tša jtsenábotamnyana chë ley šmobomnama; as, ¿ndáyeca šmonÿbëtsama ínÿenga Bëngbe Bëtsabiama podësca chamotsóyebuambnama, tšëngaftanga chë leyentša mandënga jobedësama ndocna te ntsebošana causa? ²⁴Chama, Bëngbe Bëtsabe uabemana palabrenguñe mëntšá endayana: “Tšëngaftanga judiëngbe causa, ndoñe judiëngbeñe Bëngbe Bëtsabiama ndoñe tšabá quematoyebuambná ca.” ²⁵Tšëngaftanga ntšamo leyíñe yomandancá šmojtsamëse, Bëngbe Bëtsábënga šmomnama jinÿanÿiyama, chë más delicadentše base bobachtema tëtšënënga jtsemnana tšabá nántsemna; pero ntšamo chiñe tomandancá ndoñe šmontsamëse, chca tëtšënënga

jtsemnana, tondayama ntoservénana, y chca, tsëngaftanga jtsemnana mo chë más delicadentše base bobachtema ndëtëtšenëngcá. ²⁶ Y chë ndoñe judiënga chë más delicadentše base bobachtema tëtšenënga, judiëngcá ndoñe quemátsmëna; pero chënga ntšamo leyinë yomandancá tmojtsamëse, ndegombre Bëngbe Bëtsá chënga echanjúbuaja mo cachabe entsangcá. ²⁷ Y chca, tsëngaftanga judiëngbiama Bëngbe Bëtsá echanjayana ndoñe tsábá šmonjama ca, ntšamo leyinë yomandancá ndoñe šmontsama causa. Cha chca echanjama, er bëtscá ndoñe judiënga mondmëna y chënga ntšamo leyinë yomandancá mondocumplina, pero chënga ndoñe quemátsmëna tsëngaftangcá tëtšenënga, jtsinýnama Bëngbe Bëtsábenga šmomnama. Tsëngaftanga, masque Bëngbe Bëtsabe uabemana ley šmonduábomna y chë más delicadentše base bobachtema tëtšenënga šmondmëna, cabá ndoñe šmontsama ntšamo leyinë iuayancá, ndayá jamama cmojtsamnama.

²⁸ Chcasna, nda chë más delicadentše base bobachtema tmojatëtše ora, chábioye chë soye ndoñe ntjábemana canýe ndegombre judío. Y canýe entsá ndoñe Bëngbe Bëtsábia ntsemnana nýe ínýenga chë más delicadentše base bobachtema tmojatëtšama. ²⁹ Y canýe entsá ndegombre judío jtsemnana, ntšamo chabe ainaniñe tomncá, cha Bëngbe Bëtsabe entsá yomnama tojtsinýanýnase. Y chca, canýe ndegombre judío, Bëngbe Bëtsabe entsá yomnama chaotsinýnamna ndoñe quenátsmëna chë más delicadentše base bobachtema jtsetëtšenana, sinó ntšamo Bëngbe Bëtsá tojamcá chabe ainaniñe chaotsebínýnama. Bëngbe Bëtsabe Espiritu jamana entsá chca ainana chaotsebomnama, ndayá inétsinýanýnaye cha canýe ndegombre

judío yomnama; y chë uabemana ley ndoñe quenátobena chca jamana. Bëngbe Bëtsá endmëna chë tsabe soye entsabiama ichamuá; entsanga ndoñe.

3 ¿Chcase, ndánaca šuatjatjaye, as ¿Bëngbe Bëtsabe entsá jtsemnana jëftsasháchama, más tsábá yojtsemna canýe judío jtsemnana ca? ¿Base bobachtema chë más delicadentše tëtšená jtsemnana becá yojtsámama ca? ² Añe, chca jtsemnana corente enduámama y nýetsca soyënguñe; natsana chjayana, Bëngbe Bëtsá, judiënga chabe palabra tojanabanýé, nýetscangbiama chamotsinýenama. ³ Y morna, ¿ndayá yochjopása nderado judiënguentše báseftanga ya ndoñe chca tmontsentšëne? Y chë causa, ¿Bëngbe Bëtsánaca yochtsajbaná ntšamo tojašebuachenacá amana? ⁴ ¿Ndoñe, ndegombre ndoñe! Chca ndoñe cha queochatsma; tsëngaftanga šmondétatšëmbo Bëngbe Bëtsá sempre endbëtsama ndayá jamama tojašebuachenacá, masque nýetsca entsanga bosterënga chamotsomñe. Er Bëngbe Bëtsabe uabemana palabrënguñe Bëngbe Bëtsabiama mëntšá endayana:

Aca ntšamo chacojayana ora, nýetscanga mochanjinýe aca ntšamo ndegombre yomncá cnétsamama;

y chacojtsenëuyaná ora, sempre cochanjínýanýiye acbe contra tmojtsoyebuambnángbioye, chënga ndoñe tsábá montsamama ca.

⁵ Pero bënga ndoñe tsabe soye montsama ca báseftanga tmojayana ora, Bëngbe Bëtsá sempre tsábá inétsamama entsanga más tsábá jinýama tmojtsobenëse, ¿ntšamo bënga mochjayana? ¿Bënga imojtsobena jayanana Bëngbe Bëtsá ndoñe tsábá tonjama ca, bëngbiama castigo chaotsemna ca cha tojayana ora?

(Morna atše sēntsoyebuambná ntšamo entšanga jóyebuambayama monduamancá.) ⁶ ¡Ndoñe, ndegombre ndoñe! Ndoñe quemuátobena chca jayanama. Bēngbe Bētsá nyēts tempo ntšamo ndegombre yomncá ndoñe tontsamēse, ndegombre cha ndoñe nanjobenaye jayanama nyētsca quem luarentša entšangbiama, ntšamo tmojamcá tšabá o ndoñe tšabá bētsemnana.

⁷ Nderado nda tojayana: “Atše ndaye bacna soye stjama y ndoñe ntšamo ndegombre yomncá tojtsemna, y chē soye tojoservé Bēngbe Bētsá puerte uamaná y bētsá yomnana jinñanyiyama, y Bēngbe Bētsá sempre ntšamo ndegombre yomncá tojtsamama jinñama entšanga tmojtsobenēse, ¿ndáyeca Bēngbe Bētsá cabá iuichamo ntšamo atše tijamcá ndoñe tšabá yontsemna ca y atše canñe bacna soye amá stsemna ca?” ⁸ Y chcase, ndánaca mēntšá nanjátayana: “Ntšamo ndoñe tšabá yondmēncá mochjama, chca, entšanga chámuinye Bēngbe Bētsá puerte tšabia yomnana ca.” Ndegombre, atše mal jaquédama báseftanga tmojayana atše chca stsabuatambá ca; Bēngbe Bētsá chca abuatambayēnga echanjácastigaye, ntšamo castigánēnga jtsemnana imomerecencá.

**Ntšamo entšá tojtsamama,
Bēngbe Bētsabe bominyiñe
ndocná tšabia ntsemnana**

⁹ Y asna, ¿Bēngbe Bētsá bēnga judiēnga ínñengbiama más tšabá šonña? ¡Ndoñe, ndegombre ndoñe! Atše ya sēnjinñinýe judiēnga y ndoñe judiēngnaca, chē bacna soyēnga jamama juabnēngaca mandánēnga imomnana. ¹⁰ Er Bēngbe Bētsabe uabemana palabreñguñe mēntšá endayana:

Ntšamo entšá tojtsamama, ndocná Bēngbe Bētsabe bominyiñe tšabia quenátsmēna.

¡Ndoñe, ndegombre ndoñe, ni mo canña chca quenátsmēna!

¹¹ Ndocná quenátsmēna ntšamo ndegombre yomncá chabotsosertánama;

¡Ndocná quenátsmēna nda chaotseboše Bēngbe Bētsáftaca jtsemnana!

¹² Nyētscanga ndoñe tšabe benache tmojishache y chiñe montsajna.

Chēnga nyētscanga Bēngbe Bētsabe bominyiñe tondayama quemátoserverna.

Ndocná quenátsmēna ntšamo tšabá yomncá chaotsamama, ¡ni canña ndoñe!

¹³ Ntšamo tmojtsichamcá puerte bēts bacna soye jtsemnana, mo canñe obanabe cuevēshe atēfñēshe puerte bacá tojtsonguētsecá.

Chēnga tmojtsoyebuambná soyēngaca ínñengbiyoe jtsaíngñayana.

Chē tmojtsichamo soyēngaca puerte bacna soye ínñengbiama jtsamana, mo canñe mētšcuaye tbojtseftētše orcá, chē veneno canñe entšábioyoe jóbana.

¹⁴ Chēnga, nyēts tempo ínñengbiama podessa jtsichámuana, y siempre jtsóyebuambnayana chē ínñenga ntšámnaca jáborlama.

¹⁵ Siempre jtseprontánana ínñengbiyoe ntšámnaca jáborlama y jobáyama.

¹⁶ Chēnga siempre jtsiyenana ínñenga chamotseusufrínama jtsamēse, y nýe ntšámnaca jtsaborlánana.

¹⁷ Chēnga ndocna te tondaye ntjamana nyētscanga natjēmbana chamotsiyenama;

¹⁸ Chēnga ndoñe ntsiyenana Bēngbe Bētsabiama jtsejuabnayēse, cha chē más bētsá nyētscangbiama yomnana ca —chiñe endayana.

¹⁹ Er bēnga mondétatšēmo, lempe ntšamo leyīne iuabemancá, chē leyēngaca mandánēnga imoyenēngbiama yomnama. Chcasna, chē ley endmēna, Bēngbe Bētsabe delante ndocná chaondobená jayanama, cha ndoñe tšabá tonjama, chama ndoñe yonjátatšēmo causa ca; y endmēna jinŷanŷiyama, ntšamo tmojamcá tšabá o ndoñe tšabá bētsemnama Bēngbe Bētsá nŷetscangbiama yochjayana ora, nŷetscanga yojtšamna chabe delante jayanama, ndáyeca ntšamo tšabá yomncá ndoñe tmonjama ca. ²⁰ Er, Bēngbe Bētsá ndoñe queochatsma ndocná chabe bominŷiñe tšabia chaotsemna, ntšamo leyīne yomandancá cha tojamama; chē ley bēngbiama jamana, nŷe bēnga bacna soye tmojamama chamotsetatšēmbuama.

**Ntšamo Bēngbe Bētsá inama
entšanga chabe bominŷiñe
tšábenga chamotsemnama**

²¹ Pero mora, Bēngbe Bētsá tonjinŷanŷé ntšamo cha inama entšanga tšábenga chabe bominŷiñe chamotsemnama; y Bēngbe Bētsá ndoñe ntjamana canŷa chabe bominŷiñe tšabia chaotsemnama, ntšamo ibomncá cha tojtsamama, ntšamo chē leyēnguiñe y mandēnguiñe yomncá. Pero masque mora chca, Bēngbe Bētsá tonjinŷanŷé, Moisesbe leyīne y Bēngbe Bētsabe juabna oyebuambnayēngbe libréšangañe yopodena jinŷenana chca yochtsemnama. ²² Bēngbe Bētsá jamana entšanga chabe bominŷiñe tšábenga chamotsemnama, chēnga Jesucristbeñe tmojtsošbuáchema. Bēngbe Bētsá nŷetscanga Crístbeñe ošbuáchiyēngbiama chca jamana, y chabiama nŷetscanga cachcá monduámama; ²³ er nŷetscanga bacna soye tmojama, y chē causa, ndocna entšá tonjobená jashjáchana ndocna

bacna soye ndbomná jtsemnama y puerte bētsá jtsemnama, ntšamo Bēngbe Bētsá tojanjuabocá entšanga chamotsemnama. ²⁴ Pero Bēngbe Bētsá chēngbiama corente tšabe juabna bómnyeca, mo ndayá cuafjatšatacá, cha jamana chēnga chabe bominŷiñe tšábenga chamotsemnama. Bēngbe Bētsá chca tojanma, Cristo Jesúsbeñe, entšanga atsebácanēnga chamotsemnama y ya ndoñe más bacna soyēnga jamama juabnéngaca mandánēnga chamondétsemnama cha tojanma ora. ²⁵ Bēngbe Bētsá cha tbojanábuayana, chabe buiñe juabuáshanēse y jóbanēse, cha chaotsemna ndábeyeca Bēngbe Bētsá entšanga bacna soyēngama jáperdonama; Jesucristbeñe jtsošbuáchiyēse entšanga jobenayana perdonánēnga jtsemnama. Bēngbe Bētsá chca tojanma, jinŷanŷiyama cha inétsama entšanga tšábenga chabe bominŷiñe chamotsemnama, chē entšanga bacna soyēnga tmojanmama chē tempo ntjatonŷaycá, er cha chē tempo corente uantado chēngaftaca yojtsemna y chēngbe bacna soyēngama ndoñe yonjánacastigaye. ²⁶ Cha lempe chca tojanma, jinŷanŷiyama cha sempre ntšamo ndegombre yomncá inétsamama, y nŷetscanga Jesucristbeñe ošbuáchiyēnga chabe bominŷiñe tšábenga chamotsemnama inétsamama. ²⁷ Chcáyeca, entšá ndoñe ntsobenana tondayama ntsenábotamnayana. Chca endmēna, er Bēngbe Bētsá tšabia chabe bominŷiñe jabemana, ndoñe ntšamo leyīne tomandancá cha tojtsamama, sinó nŷe Jesucristbeñe tojtsošbuáchema. ²⁸ Y chca jayanēse, mora bēnga tšabá montsetátšēmo, Bēngbe Bētsá inétsama canŷe entšá tšabia chabe bominŷiñe chaotsemnama, nŷe Jesucristbeñe tojtsošbuáchema, y ndoñe ntšamo leyīne yomandancá cha tojtsamama.

²⁹¿O Bèngbe Bètsá nÿe judièngbe Bètsá yomna? ¿Ndoñe judièngbe Bètsánaca cha ndoñe yondmèna? Aíñe, chèngbe Bètsánaca cha endmèna; ³⁰er nÿe canÿe Bètsá nÿetscangbiama endmèna, y cha echanjama chë más delicadentše base bobachtema tètšenènga imomnèngbiama y ndoñe chcangbiámnaca, chabe bominÿiñe tšábenga chamotsemnana, Jesucristbeñe tmojtsošbuáchema. ³¹Chcasna, Bèngbe Bètsá jamana entšanga chabe bominÿiñe tšábenga chamotsemnana, Jesucristbeñe tmojtsošbuáchema; ¿chca yojt sayana chë ley nÿe tondayama yondoservena ca? ¡Ndoñe, ndegombre ndoñe! Inÿetšá, chca jamana chë ley más chaotsámanama.

Ntšamo Abrahánof taca tojanopasá

4 Morna Abrahambiana mochjóyebuambaye, bèngbe tempsca bèts taitá, y mochjinÿe ndayá tojánatsjinÿe Bèngbe Bètsábeñe ošbuáchiyana bomnentsana. ²Abraham chabe bominÿiñe tšabia chaotsemnana, ndayá cha tojanmama Bèngbe Bètsá matènjannmèse, cha matènjano bená entšángbeñe ndayama jtsenábotamnayana, pero Bèngbe Bètsabe delante ndoñe; ³er Bèngbe Bètsabe uabemana palabrenguñe mentsá endayana: “Abraham, Bèngbe Bètsábeñe yojtsošbuáchiye, y chýeca Bèngbe Bètsá tonjánayana cha chabe bominÿiñe tšabia yojamna ca.”

⁴Canÿe entšá trabajayá, crocénana josháchiñana ndayá tojamama, pero chë crocénana ndoñe nÿe tsetánana ntsemnana, sinó chana jtsemnana ntšamo cha tojtsomerecencá. ⁵Er menójuabonga, nda tondaye tontsama Bèngbe Bètsá cháuyanama cha chabe bominÿiñe tšabia yomna ca, pero aíñe tojtsošbuaché Bèngbe

Bètsábeñe, nda endbáyana chë bacna soye tmojamènga mora mo ndoñe chca cuafjamcá chamotsemna ca, chabiana Bèngbe Bètsá echanjama chabe bominÿiñe tšabia chaotsemnana, chabe ošbuáchiyama. ⁶Rey David cachcá chabe librèšañe tojánayana, chë ndabiana Bèngbe Bètsá jayanana chabe bominÿiñe tšabia chaotsemna ca, masque chabiana chca cháuyanama tondaye tonjamèse. David chca entšabiana tojánayana, cha puerte echantsoyejuaye ca. ⁷Chabe librèšañe mentsá tojanábema:

¡Tša oyejuayènga jtsemnana chë Bèngbe Bètsá chèngbe bacna soyènga tojáperdonanga, chë Bèngbe Bètsá chèngbe bacna soyènga tojabujuánanga!

⁸¡Puerte oyejuayá jtsemnana chë Bèngbe Bètsá mo ndoñe bacna soye cuafjama cuenta tbojtsonyá cha ca!

⁹¿David tojánayana nÿe chë más delicadentše base bobachtema tètšenènga imomnèngbiama oyejuayana yomna ca? Ndoñe; ndoñe chca mondmènèngbiámnaca. Y muentše tmonjayana, Abraham Bèngbe Bètsábeñe yojtsošbuachéyeca, Bèngbe Bètsá tojánayana cha chabe bominÿiñe tšabia yojamna ca. ¹⁰Y ¿ntseco chca tojanopasá? ¿Abraham ya chë más delicadentše base bobachtema tètšená yojtsemna ora, o cabá ndoñe chca yontsemna ora? Ndegombre, Abraham cabá ndoñe chca tètšená yontsemna ora. ¹¹Y cabá chentsana, Abraham base bobachtema chë más delicadentše tètšená yojtsemna; y chca yojamna jinÿanÿiyama, Bèngbe Bètsá tempo ya chabiana tojánayana cha chabe bominÿiñe tšabia yojamna ca, cha Bèngbe Bètsábeñe yojtsošbuáchema. Lempe chca tojanopasá, jinÿanÿiyama Abraham mo taitacá yomnama Bèngbe Bètsábeñe imošbuachéngbiama,

masque ndoñe base bobachtema chë más delicadentse tétšenenga mondmëna. Y cachcá Bëngbe Bëtsá chë ošbuáchiyëngbiana tojánayana, chënga chabe bominiñe tšábenga imomna ca. ¹²Y Abrahámnaca endmëna mo chë taitacá, chë más delicadentse base bobachtema tétšenenga imomnëngbiana, pero añe Bëngbe Bëtsábeñe corente jtsošbuáchiyëse imoyenëngbiana, cachcá ntšamo bëngbe bëts taitá Abraham Bëngbe Bëtsábeñe yojtsošbuachecá. Y cha cabá chë más delicadentse base bobachtema ntsetétšena ora, ya chca yojtsošbuáchiye.

**Jtsošbuáchiyëse,
ntšamo Bëngbe Bëtsá
tojašebuachenacá jóshjanguana**

¹³Bëngbe Bëtsá tojanašebuachená Abrahambiana y chábensana entsangbiana, quem luare chëngbiana yochjéftsemna ca. Y chca tojanašebuachená, ndoñe Abraham ntšamo leyine yomandancá betsobedecénama, sinó cha Bëngbe Bëtsábeñe yojtsanošbuáchema, y chíyeca Bëngbe Bëtsá tojánayana cha chabe bominiñe tšabia yojamna ca. ¹⁴Pero, ntšamo Bëngbe Bëtsá tojanašebuachenacá, bënga ntšamo chë leyine yomandancá tmojtsamëngbiana yojtsemna ca tmojayanëse, Bëngbe Bëtsábeñe jtsošbuáchiyana tondayama nantsošservena, y ntšamo Bëngbe Bëtsá tojanašebuachenacá tondaye ntsámanana. ¹⁵Chë ley juabocnana, Bëngbe Bëtsá puerte etonaná entsanga cháuacastigama, chënga ntšamo chiñe iuayancá ndoñe tmontsamama; pero ndocna mandënga tontsemnëse, ndocná ntsobenana chë ndoñe tontsayancá ndoñe ntjamana.

¹⁶Y chca, Bëngbe Bëtsá Abrahámbioye tbojanšbuachená, cha

yojtsanošbuachéyeca, ntšamo Bëngbe Bëtsá tojanašebuachenacá, ndegombre chaotsemnana chë Bëngbe Bëtsábeñe imošbuáchema mo Abrahámbentsana entsangcá imomnëngbiana; y Bëngbe Bëtsá chca tojanašebuachená, cha chëngbe tšabiama iuantjéšnayeca. Chë mo Abrahámbentsana entsangcá imomnëngbeñe, ndoñe quemnatsmëna nye chë ntšamo ley yomandancá imnëtsamënga, sinó nyetscanga chë ntšamo Abraham tojanošbuachecá Bëngbe Bëtsábeñe imošbuachëngnaca. Y Abraham nyetscanga bëngbiana, Bëngbe Bëtsábeñe ošbuáchiyënga, mo taitacá endmëna. ¹⁷Ntšamo Bëngbe Bëtsabe uabemana palabrenguine endayancá, Bëngbe Bëtsá Abrahámbioye ibojtsatsësnayea ora: “Atše sënjama aca ba luariñe entsangbiana atšbe bominiñe taitá chacotsemnana ca.” Chë ntšamo tojanašebuachenacá ndegombre tšabe soye endmëna, er Bëngbe Bëtsá chca Abrahambiana yojanjuabná; y Bëngbe Bëtsá endmëna ndábeñe Abraham yojtsanošbuaché, y nda inétsama entsanga chámuatayenama, y nda inamánda y entsanga jobenayana jinýama ndayá ndocna te tmonjaninýca.

¹⁸Abraham Bëngbe Bëtsábeñe yojtsošbuáchiye y yojtsobatmana ntšamo tbojanšbuachenacá chaotsemnana, masque entšabe juabniñe ndoñe chca ntjátsjuabnayana; y chca, cabana cha tojánashjache jtsemnana “ba luariñe entsangbe taitá”, ntšamo Bëngbe Bëtsá tbojanianýca: “Acbentsana entsanga tša mallajta mochántsemna, ndocná queochatobenaye jacúntana ca”. ¹⁹Abraham yojanobatmanëntscuana, cha puerte chábeñe yojtsanošbuaché, ntšamo tbojanšbuachenacá jóyëngacñama, masque Abraham yojtsonýyae ya bëtsanánëjema yojtsemnana, er ya mo patse uata yojtsebomna, y chabe

shema, Sara, ndoñe yonjobena šesonga jtsabamnana. ²⁰ Abraham ndocna te tonjanajbaná Běngbe Bětsábeñe ošbuáchiyana, y ni mo canye ndoñe yonjanjuaboje chě ntšamo Běngbe Bětsá tbojanšbuachenacá ndoñe joparéjana ca; sinó más corente chábeñe yojtsanošbuaché, y chca Běngbe Bětsábioye ibojtsatschuanaye, ²¹ er cha tšabá inatátšěmbo, ntšamo tbojanšbuachenacá jamama, ndegombre Běngbe Bětsá obená inamnana. ²² Chíyeca, Běngbe Bětsá tojánayana cha chabe bominiñiñe tšabia yojamna ca.

²³ Pero, chabe bominiñiñe tšabia yojamna ca Běngbe Bětsá tojánayana ora, ndoñe nye Abrahambiana chca ntsóyebuambnayana; ²⁴ ndayá bėngbiámna, ndėmuanjėngbiama Běngbe Bětsá yochjayana chabe bominiñiñe tšábenga imomna ca, bėnga Běngbe Bětsábeñe imošbuachėyeca; Běngbe Bětsá, nda tojanma Běngbe Utabná Jesús cháuatayenama. ²⁵ Běngbe Bětsá tojanalesenciá entsanga Jesús chamóbama, bėnga bacna soyėnga tmojanma causa, y Běngbe Bětsá tojanma cha cháuatayenama. Běngbe Bětsá chca tojanma jobenayama, bėnga chabe bominiñiñe tšábenga jábiamama.

Mora bėnga Běngbe Bětsabe bominiñiñe tšábenga montsemna

5 Er Běngbe Bětsá tojama bėnga chabe bominiñiñe tšábenga chamotsemnana, bėnga chábeñe imošbuachėyeca; mora tempcá tšabá Běngbe Bětsáftaca bėnga montsatsmėna, Běngbe Utabná Jesucrístbeyeca. ² Bėnga Crístbeñe mondošbuáchema, cha tojama bėnga chamotsetatšėmbuama Běngbe Bětsá tša tšabia yomnana, y Běngbe Bětsábiocana tšabe soyėnga jtsebomněse mora chamotsiyenama. Bėnga tša oyejuayėnga jėsemnana,

er Běngbe Bětsábeñe jtsošbuáchiyėse mondobátmana cha puerte uámanėnga y bėtsėtsanga šochjábiamama, batšá ntšamo cachá yomncá. ³ Y ndoñe nye chama bėnga oyejuayėnga jėsemnana, ndayá bėnga tmojtseufrina y padecena soyėnguiñe tmojtšana órnaca. Chca mondbama, er bėnga mondėtatšėmbo bėnga tmojtseufrina orna, bėnga juatsjínjyana ntšamo uantadėnga jtsemnana padecena soyėnguiñe tmojtsemna ora, Běngbe Bětsábeñe jtsošbuáchiyėse. ⁴ Bėnga padecena soyėnguiñe tmojtsemna ora, más tšabá uantadėnga jtsemnana mondobėnayeca, Běngbe Bětsá oyejuayá bėngaftaca jtsemnana, padecena soyėnguentšana ndegombre tšabá tmojachnėngo ora. Běngbe Bětsá oyejuayá bėngaftaca chaotsemnana bėnga tmojama ora, bėnga jtsobenana más jtsobátmanana, ntšamo šojašebuachenacá cha yochjamama. ⁵ Bėnga chca tmojtsobátmanėse, ndocna te nye bonamente quemochatobátmana, er Běngbe Bětsá šojinjyanjé tša bėtscá cha šuababuánjėshanama. Běngbe Bětsá chca tojama chě Uámana Espíritbeyeca, y cha endmėna nda Běngbe Bětsá tbojanichmó bėngbe ainaniñe chaotsemnana jtsemándayama.

⁶ Tempo bėnga tondaye chemuatanobená jamana Běngbe Bětsabe bominiñiñe tšábenga jtsemnana, y chora Cristo tojanóbana bėnga chě bacna soyėnga tmojamėngbe tšabiana, nya chama tempo yojamna ora. ⁷ Ndoñe paselo quenátsmėna jajuaboyana, ndáyeca canya nantseprontana jóbanama canya ntšamo chě leyiñe yomandancá jamama tojtsamanabiama; pero, canya bėtscá jtsababuánjėshanėse tšabe soyėnga ínjėngbiama tojtsamabiama, nderádose chabiana jóbanama cuantseprontana. ⁸ Pero Běngbe Bětsá bėnga šojanjyanjé

tša šuababuánjeshanama, er bēnga cabá bacna soyēnga ntsamcá imojoyena ora, Cristo bēngbiama tojanóbana.

⁹Cristo, chabe buiñe juabuáshanēse bēngbiama tojanóbanayeca, Bēngbe Bētsá tojanma bēnga chabe bominjiñe tšábenga jtsemnama. Y chca endmēnayeca, ndegombre Cristo šochanjátsebacaye, entšanga ndoñe tšabá tmonjama ca y castigo chēngbiama chaotsemna ca Bēngbe Bētsá chaojayana ora. ¹⁰Bēnga tempo Bēngbe Bētsá imojanáya; pero cha tojanma bēnga cháftaca tempcá tšabá chamotsatsmēnama, chabe Uaquiñá tojanóbanayeca. Y mora, bēnga natjēmbana cháftaca chamotsemnama ya tojama ora, ndegombre atsebácanēnga mochántsemna, chabe Uaquiñá ainá yómnayeca. ¹¹Y ndoñe nje chca, ndayá bēnga cháftaca puerta oyejuayēnga chamotsemnámna Bēngbe Bētsá jamana, ndayá Bēngbe Utabná Jesucristo bēngbiama tojánmayeca. Y mora, chábeyeca Bēngbe Bētsá tojama bēnga cháftaca tempcá tšabá chamotsatsmēnama.

Adán y Cristo

¹²Canje entšá bacna soye tojanma causa, nyetsca entšanga bacna soyēnga amēnga tmojábocana; y cha tojanóbana, bacna soyēnga tojanma causa. Y chca, nyetsca entšanga entsamna jóbanama, er nyetscanga bacna soyēnga tmojama. ¹³Bēngbe Bētsá Moisésbiyoe chē leyēnga cabá nduántšaboshjona ora, entšanga quem luarentse bacna soyēnga tmojanma. Pero ndocna ley tontsemna ora, Bēngbe Bētsá ndoñe ntjatonjáyana entšanga bacna soyēnga tmojamama. ¹⁴Nyetsca entšanga, Adánbentšana Moisésbentscoñe, nyetscanga yójanamna jóbanama, ntsamo cach Adán tojanmcá ndoñe tmonjanméngnaca, ntsamo cha

ndoñe chaondēmama Bēngbe Bētsá tbojanmandacá cha tojanma ora. Y Adánbeñe entšanga mondobena jinýama, ntsamo chē jabama ibojamná canje soyēnguiñe yochtsanmēna.

¹⁵Pero ntsamo chē útata tbojanmcá ndoñe cachca soye quenátsmēna; er Bēngbe Bētsá entšangbe tšabiama jtsejuabnayēse tšabe soyēnga chēngbiama tojanma ora, ndoñe yonjamna mo ntsamo Bēngbe Bētsá tbojanmandacá ndoñe chaondēmama Adán tojanma orcá. Tšēngaftanga šmondétatšēmba, nje canje entšá canje bacna soye tojanma causa, cha tojanma nyetsca entšanga jóbanama chaotsamnama, pero Bēngbe Bētsá entšangbe tšabiama yojuabnáyeca, más bēts soyēnga jamana, chē Adanbe bacna soye entšangbiama bacna soyēnga tojanmama. Chca, Bēngbe Bētsá tojanma ba entšanga bētsccá tšabe soyēnga chamotsebomnama; y chca tojama, nje canje entšá, Jesucristo, tšabe soyēnga tojánmayeca. ¹⁶Chē ba entšanga bētsccá tšabe soyēnga chamotsebomnama Bēngbe Bētsá tojamentšana endóbocana soye, puerta inyetšá comna, chē entšá Adán, canje bacna soye tojanmentšana tojanóbocna soyama. Adán bacna soye tojanmentšana, Bēngbe Bētsá tojánayana chana bacna soye tojanma y castigo jtsebomnama ibojtsemna ca, y nyetsca entšángnaca chē causa; pero masque nyetscanga bacna soyēnga tmojama, Bēngbe Bētsá entšangbe tšabiama ndoñe bēndětsebnatjēmbayeyeca, tojanma entšanga chabe bominjiñe tšábenga chamotsemnama y chē bacna soyēngama castigánēnga ndoñe chamondétsemnama. ¹⁷Ndegombre endmēna, canje entšá bacna soye tojanma causa, nyetsca entšanga jóbanama yojtsamna. Pero puerta más, canje entšá Jesucristo tojanma.

Ndëmuanÿengbiama Bëngbe Bëtsá tojama bëtská tšabe soyënga chamotsebomnama, ndëmuanÿengbiama Bëngbe Bëtsá tojama chabe bominÿiñe tšábenga chamotsemnama, y Bëngbe Bëtsábiocana chca tmojóyëngacñënga, chënga nÿetscanga mochantsiyena bacna soyënga jtseyëñjanayëse y nÿetsca tescama mo bëtsëtsangcá; y chca echántsemna ndayá Cristo tojánmayeca.

¹⁸Y chca, ntšamo canÿe entšá, Adán, canÿe bacna soye tojanmama, Bëngbe Bëtsá tojánayana nÿetscanga bacna soye tmojanma y castigánënga chamotsemna ca; cachcá ntšamo canÿe entšá, Cristo, puerte tšabe soye tojánmayeca, Bëngbe Bëtsá jayanana nÿetscanga imojtsobena chabe bominÿiñe tšábenga jtsemnama y chë nÿetsca tescama yomna tšabe vida jtsebomnama ca. ¹⁹Y ntšamo Bëngbe Bëtsá tbojanmandacá ndoñe chaondëmama canÿe entšá tojanma causa, nÿetsca entsanga bacna soye amënga tmojanobiama; cachcá, ntšamo Bëngbe Bëtsá tbojanmandacá canÿe entšá, Jesucristo, tojánmayeca, Bëngbe Bëtsá tojanma bëtská entsanga chabe bominÿiñe tšábenga chamotsemnama.

²⁰Chë ley entsangbe cucuatšinë tmojanáboshjona, jinÿanÿiyama ntšamo ndegombre yomna bacna soyënga jtsamana; pero entsanga más bacna soyënga imojtsama ora, Bëngbe Bëtsá cabá más chëngbe tšabiama yojtsanjuabnaye y más tšabe soyënga chëngbiama yojtsama. ²¹Chcasna, mora mochjayana, entsanga bacna soyëngaca puerte mandánënga imojamna, y chca, nÿetscanga jóbanama yojamna ca. Pero mora, ya ndoñe chca quenátsmëna, er Bëngbe Bëtsá tojama entsanga chabe bominÿiñe tšábenga chamotsemnama, Bëngbe Utabná Jesucristbeyeca chë nÿetsca tescama yomna tšabe vida chamotsebomnama; chíyeca mora

bënga montsobena jtsiyenama, Bëngbe Bëtsá šojatsatá tšabe soyënga lempe bëngaftaca jtsemnëse.

Cristbeyeca bënga tšabe vida jtsebomnana

6 Y asna, ÿntšamo mochjayana? ¹Šojtsamna jtsiyenana sempre bacna soyënga jtsamëse, chca, Bëngbe Bëtsá šuababuánÿeshanama más chašotsinÿanÿnama, cha más bacna soyënga bënga jtsaperdónayëse? ²ñNdoñe, ndegombre ndoñe! Tempo bënga monjaniiyena bacna soyënga jamama juabnëngaca mandánënga, pero mora bënga montsobena jtsiyenana chë juabnënga tondaye bëngbioye ntsamcá, y chca, bënga montsobena mo obanëngcá chë soyëngama jtsemnana; y as, ÿndáyeca bënga muatjásjuabnaye ntšamo ndoñe tšabá tontsemncá jatiyenana? ³Er ndegombre tšëngaftanga šmondétatšëmbo, bënga uabáinënga tmojanouedá ora, tmonjaninÿanÿé bënga Cristo Jesúseftaca cánÿiñe mo canÿacá bëtsemnama; y bënga uabáinënga tmonjanouedá ora, enjamna mo bënga cuafjobancá, ntšamo Cristo tojanobancá. ⁴Bënga uabáinënga tmonjanouedá ora, enjamna mo bëngnaca cháftaca cuafjobancá, y cháftaca uatabuantsanëngcá. Chca yojamna, bënga chamotsobenama mo tsëm entsangcá jtsiyenama, ntšamo Crísoftaca tojanopasacá, cha cháuatayenama Bëngbe Bëtsá tojanma ora, chabe puerte bëts obenánaca.

⁵Bënga Crísoftaca cánÿiñe mo canÿacá jtsemnëse, cha tojanóbana ora mo bëngnaca cháftaca cuafjobancá enjámnayeca, ndegombre bënga cánÿiñe mo canÿacá cháftaca mochántsemna, bënga cachiñe vida nÿetsca tescama chamotsatsbomnama Bëngbe Bëtsá jtsamëse, ntšamo Cristo

cháuatayenama cha tojanmcá. ⁶Y bēnga mondétatšēmo, chē ntšamo bēngbe vida enjamncá, bacna juabnéngaca mandánēnga, Jesucristbeñe cabá ntsošbuáchiye ora, mora ya ndoñe chca yontsemnana; y chca entsemna mo chē tempsca vida chaóbanama cuafjamcá, Cristo tmojancrucificá ora. Chca yojamna, Bēngbe Bētsá jobenayama chē bacna soyēnga jamama bēngbe juabnénga jtsepochoćama; y chca, ya ndoñe más chē bacna soyéngaca mandánēnga chamondétsemnana, mo nyets tempo nye ínñabiana oservenēngcá. ⁷Er canye entsá tojóbana ora, chē bacna soyēnga chábioye ya ndoñe más ntsemándayana. ⁸Er Cristo tojanóbana ora, mo bēngnaca cháftaca cuafjobancá endménayeca, cháftaca jtseyenámncaca bēnga montsošbuaché. ⁹Bēnga mondétatšēmo Cristo cháuatayenama y ndocna te cha cachiñe jatóbanama Bēngbe Bētsá tojanmama; y ndocna obenana queochatsma cha cachiñe chauatóbanama. ¹⁰Cha tojanóbana, y chē bacna soye jamama juabnénga ndocna te ntjobenayana chábioye jamándana, y ínñyēnga ndoñe imontsobena ntšamo cha jabórlana; y ntšamo mora cha yoyencá, Bēngbe Bētsá jtseservénama yomna. ¹¹Cachcá, tšēngaftanga cmontsamna jtsejuabnayana, chē ya ndoñe más bacna soyéngaca mandánēnga šmojtsemnana, pero vida šmobomna lempe jtsamēse Bēngbe Bētsá tšēngaftangaftaca oyejuayá chaotsemnana, Cristo Jesúsēftaca cányiñe mo canyácá jtsemnēse.

¹²Tšēngaftanga cmontsamna, chē bacna soyēnga jamama ainantšē šmobomna juabnéngaca ndoñe más mandánēnga ntsemnana, chca, tšēngaftanga ndoñe chašmondétsamama juabnéngaca nye cach tšēngaftanga, tšēngaftangbe cuerpiñe tšabá

jtsomñama. ¹³Tšēngaftanga ndoñe quecmátamna jalesénciana ndaye tšēngaftangbe cuerpentša soye, bacna soyēnga jamama chaoservema. Chamna, tšēngaftanga cmontsamna Bēngbe Bētsá jauyanana, lempe ntšamo tšēngaftanga šmomncá, cha jaserviama chaotsemna ca, tšēngaftanga chē šmomna mo ya ndoñe más obanēngcá Bēngbe Bētsabiana, y tojanma tšabe vida chašmotsebomnana; y jauyanana nyetsca tšēngaftangbe cuerpentša soyēngna Bēngbe Bētsá jaserviama yojtsemna ca. ¹⁴Ndoñe quecmátamna bacna soyéngaca mandánēnga jtsemnana, er tšēngaftanga ndoñe quešmátiyena leyiñe iuayana soyéngaca mandánēnga, y šmondoyena Bēngbe Bētsá tšēngaftangbiana tšabá jtsejuabnayēse.

Ošbuachiyá obligaciónaca jtsemnana ntšamo tšabá yomncá jamama

¹⁵Y asna, ¿bēnga imojtsobena bacna soyēnga jamana, chē leyiñe iuayana soyéngaca ndemandánēnga imomnana, y Bēngbe Bētsá bēngbiana tšabá jtsejuabnayēse bēnga imoyenama? ¡Ndoñe, ndegombre ndoñe!

¹⁶Tšēngaftanga tšabá šmondétatšēmo, ínñabe cucuatšīñe mo nyets tempo nye ínñabiana oservenēngcá šmojoquedá ora, cha jtsobedecénama, ndegombre tšēngaftanga chē nduiñbiana nyets tempo oservénēnga jtsemnana. Chcasna, cachcá jtsemnana, chē tšēngaftanga šmojabocacá bacna soyéngaca mandánēnga jtsemnana, y chca jtsemnana mo Bēngbe Bētsabe bominñiñe tšēngaftanga nyetsca tescama obanēnga cuaftsemncá, o Bēngbe Bētsá jtsobedecénama, y chca, chabe bominñiñe tšábēnga jabocanana. ¹⁷Pero šontsamna Bēngbe Bētsá jtsatschuanayana, er tempo tšēngaftanga mo nye ínñabiana

oservenéngcá šmojamna, bacna soyénga jamama juabnéngaca mandánénga; pero mora nyets ainánaca šmojoyeuná, ntšamo chë tcmojanabuatambá soyénguiñe šmojoyéngacñécá. ¹⁸ Bëngbe Bëtsá tšéngaftanga cmojatsebacá, bacna soyéngaca ndëmandánénga chašmotsemnana, y morna mo Bëngbe Bëtsabiama oservenéngcá šmojábcna, ntšamo tšabá yomncá jtsamama. ¹⁹ Muentše sënjoyebuambá ntšamo entšanga mondbetsichamcá, er tšéngaftanga ndoñe corente juabna quešmátsbomna toto palabrénga chacmósertama. Tempo, tšéngaftanga šmonjanamana jalesénciana, lempe ntšamo šmojamncá mandánénga jtsemnana, bacna soyénga shembásaftaca o boyabásaftaca jamama juabnéngaca, y nye ndaye bacna soyénga jamama juabnéngaca. Cachcá, mora tšéngaftanga cmontsamna jalesénciana tšéngaftanga chašmotsemnana juabnéngaca mandánénga tšabe soyénga jtsamama, chca, ndegombre Bëngbe Bëtsabe entšanga chašmotsemnana.

²⁰ Tšéngaftanga, cabá bacna soyénga jamama juabnéngaca mandánénga šmonjamna ora, tšéngaftanga ndoñe obligacionaca quešmënjatsmëna ntšamo Bëngbe Bëtsabiama tšabá yomncá játamama. ²¹ ¿Ndaye tšabe soye tšéngaftanga šmojosháchiñe chë tempo šmojánama soyénga amiñe? Tondaye; y mora chë soyéngama šmojtsëuatja. Chca soyénga tcojamentšana jóbcnana, entšá nyetsca tescama castiganá chaotsemnana, mo Bëngbe Bëtsabe bominýiñe nyetsca tescama obaná cuaftsemncá. ²² Pero mora, ndoñe quešmátsmëna bacna soyénga jamama juabnéngaca mandánénga, y mora bëtscá šmojtsentšëna Bëngbe Bëtsá jtseyeunanana y jtseservénana. Chca jtsamana, tšéngaftangbiama puerte

tšabá entsemna, er chca, Bëngbe Bëtsabe entšanga šmochántsemna, y cabana, chë nyetsca tescama yomna tšabe vida šmochántsebomna. ²³ Bacna soyénga tcojtsamentšana jóbcnana entšá nyetsca tescama castiganá chaotsemnana, mo Bëngbe Bëtsabe bominýiñe nyetsca tescama obanënga cuaftsemncá; pero, Bëngbe Bëtsá šojtsatšatná soyénguentšana, jóbcnana chë nyetsca tescama yomna tšabe vida jtsebomnana, Cristo Jesús Bëngbe Utabnáftaca cánýiñe mo canýacá jtsemnëse.

Chë bouamnátbentšana ndayá bëngbiama mochjuatsjinýe

7 Jesucristbeyeca catšátanga, tšéngaftanga šmotátšëmbo ntšamo chë leyénga entšangbiama inétsemnana; tšéngaftanga šmotátšëmbo, ntšamo chë leyiñe tojtsayancá canýe entšá chaotsamamna, nye chë entšá tojtsainëntscuana chábioye jtsemándayana. ² Chcasna, canýe bouamna shembása, ntšamo chë leyiñe endayancá bontsemna chabe boyáftaca jëftsemnana, chë boyá tuainëntscuana; pero chë boyá tojtsóbanëna, chë leyiñe endayana, chë shemna canýa jtoquédana, chë boyabiama ndëmandaná ca. ³ Y chca, chë shema inýe boyabásaftaca chabe boyábioye tbojaingñé, chë boyá cabá vida totsóbomñe ora, chë shemna jtsabáinana chabe boyábioye ínýaftaca ingñayá ca. Pero chabe boyá tojtsóbanëse, chë leyiñe endayana chë shemna canýa jtoquédana, chë boyabiama ndëmandaná ca, y cha jtsobenana ínýaftaca jtoubouamayana; y chca tojama ora, boyábioye ínýaftaca ingñayana ndoñe ntsemnana.

⁴ Tšéngaftanga chë ošbuachiyëngaftacnaca cachcá endmëna; ya ndoñe más chë léyeca mandánénga

quešmátsmëna, er Cristo tojanóbana ora šmojánbocna, mo chë soyëngama obanënga cuafjoquedangcá, ínÿabe entšanga jtsemnama, Crístbënga, ndabiama Bëngbe Bëtsá tojanma cháuatayenama; y chca jtsemnëse, bënga bëtscá soyënga ntšamo tšabá yomncá chamotsamama, Bëngbe Bëtsá jaserviama. ⁵Bënga chë nÿe ntšamo cabënga imnabošcá monjaniyena ora, chë ley enjanoserverna bëngbe ainaniñe chamotsebomnama bacna soyënga jamama puerte bëtš juabnënga, nÿe bënga tšabá jtšomñama. Ba bacna soyënga tmonjanma, y chë causa bënga šonjánamna nÿetsca tescama castigánënga jtsemnama, mo Bëngbe Bëtsabe bominÿiñe nÿetsca tescama obanënga cuaftsemncá. ⁶Pero mora Bëngbe Bëtsá šojatsebacá chë léyeca ndëmandánënga chamotsemnama; chë ley tempo enjamna bëngbiama mo canÿe amëndayacá. Pero mora bënga chë leyama mo obanëngcá montsemna; chca, bënga ndoñe chamondëtsiyenama ntšamo tempo enjamncá, chë uabemana leyëngaca mandánënga, y añe tsmëcá chamotsiyenama, ntšamo chë Uámana Espíritu iuamcá bënga vida chamotsebomnama.

**Bacna soye jamama juabna
tcojtsebomnëse, chë ley jamana
entšá bacna soye chaomama**

⁷Báseftanga muanjayana cach ley bacna soye yomna ca; ndegombre, chë ley ndoñe chca quenátsmëna. Chë léyeca atše tšabá sëndétatšëmbo ndayá yomna bacna soye jamana. Atše ndocna te matjántatšëmbona ndayá yomna chë “ínÿabioye jtsántšabošana”, “ínÿabioye ndoñe cattsantšaboše ca” chë leyiñe ndoñe matmëñjanábemëse. ⁸Pero bacna soyënga jamama juabnënga atše bomna causa tonjanma, atše puerte chaitsebošama

chë ndoñe šonjamna jtsebošana soyënga; y chca chë juabnëngaca tonjanopasá, atše chë leyënguñe ndayá iuayanama jtsejuabnayëse. Er ndocna ley tondmëna ora, entšá ndoñe ntsetatšëmbuana ndayá yomna bacna soye jtsamana. ⁹Canÿe tempo enjamna, chora atše sënjaniyena leyëngama ntsetatšëmbcá, pero ntšamo leyiñe iuayancá sënjanabuátmana ora, ndayá jamama ndoñe yonjamnama, atše sënjanontšë chë bacna soyënga jamama juabnëngaca mandaná jtsemnama; ¹⁰y chora atše sënjántatšëmbona, chë causa šojtsanmëna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá. Bëngbe Bëtsá chë mando tojanma, atše chë nÿetsca tescama yomna tšabe vida jtsebomnama chayobenama, chë ley jtseyeunanëse; pero ndoñe chiyatanobedecé causa, chë mando tonjanma atše chašotsemna nÿetsca tescama castiganá jtsemnama. ¹¹Chë leyentšá mandíñe inÿe soyënga ndoñe šonjëtsemna jamama ca vojtsayánayeca, chë bacna soyënga jamama juabnënga átšbeñe, šmonjaningñë bacna soyënga jamama; y chë mando bëtsemnama, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá.

¹²Pero bënga mëntšá mochjayana: chë ley na tšabe soye endmëna, er Bëngbe Bëtsábíocana tojanóbocna, y chë mandëgnaca Bëngbe Bëtsábíocana tojanóbocna ca; chiñe endayana ndayá tšabá yomna jamana y chca tšabá jtsemnana. ¹³Y asna, ¿quem tšabe soye tojanma atše chašotsemna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá? ¡Ndoñe,

ndegombre ndoñe! Chë bacna soyënga jamama juabnënga atše bomna causa, chca átšeftaca tonjanopasá. Chë tšabá yomna sóyeca, chë bacna soyënga jamama juabnënga tmonjanma atše chašotsemna nÿetsca tescama castiganá jtsemnama. Chca chë juabnëngaca tonjanopasá, entšanga jobenayama jtsetatšëmbuama ndayá yomna bacna soye jamana; y chë mando, bacna soye jamama ndoñe yondmëna ca jtsichámuana causa, nÿetsca entšanga mondobena jinÿana canÿe bacna soye, mo canÿe puerte bëts bacna soyca.

¹⁴Bënga mondétatšëmbo chë ley Bëngbe Bëtsabe ley yomnama, pero atšna nÿe canÿe entšá sëndmëna, canÿa nÿets tempo nÿe bacna soyënga jamama juabnëngaca mandaná. ¹⁵Ndegombre ndoñe quešnátsertana ntšamo sentsamcá, er ndoñe ntsamana ndayá jamama stsebošcá, pero añe jtsamana ndayá jamama ndoñe šontsogustancá. ¹⁶Pero chë atšbe ainaniñe stsejuabná ndoñe tšabá tontsemna soye stsamëse, ndayama leyñe iuayana ndoñe candmëna ntsamana ca, chca atše jtsinÿanÿayana chë ley ndegombre tšabe soye yomnama. ¹⁷Chcasna, atše ya ndoñe ntsemnana chë chca tojtsamá, ndayá chë bacna soye jamama atšbe ainaniñe yomna juabnënga jtsamana atše chca jamama. ¹⁸Atše sëndétatšëmbo, atšbe ainaniñe tondaye yontsemna ntšamo tšabá yomncá atše jamama. Masque sëntseboše ntšamo tšabá yomncá jamama, ndoñe quetsátobena chca jamama. ¹⁹Atše ndoñe quetsátama chë tšabe soye ndayá jamama sëndbošcá, pero añe séntsama chë bacna soye ndayá jamama ndoñe sëndbošcá. ²⁰Chë ndayá ndoñe jamama sëntsebošcá stsamëse, chca jtsayanana, atše ya ndoñe stsemna chë chca yojtsamá, sinó chë bacna soye jamama

atšbe ainaniñe yomna juabnënga chca yojtsama.

²¹Chca, atše tijátatšëmbona ndayá átšeftaca yojtsopasánana; masque, ntšamo tšabá yomncá jamama stseboše, bacna juabnënga sempre jtsemándayana atše bacna soye chaimama. ²²Atšbe ainanoca puerte sëntsoyejuá, Bëngbe Bëtsábio-cana yóbocana mandëngama. ²³Pero atše sënjinÿena nÿe soye átšeftaca yojtsopasánama; chë bacna soye jamama atšbe ainaniñe yomna juabnënga yojtsama atše ndoñe ntjamama ntšamo atšbe juabnoca yomna mo ndegombre soyca, mo chë bacna soyëngaca mandaná cuaftsemncá.

²⁴¡Tša lastema atšbiamá! Chë bacna soye jamama juabnënga átšbeñe entsemánda, y entsama atše chašotsemna nÿetsca tescama castiganá jtsemnama, mo Bëngbe Bëtsabe bominÿiñe nÿetsca tescama obaná cuaftsemncá. ¿Nda nanjobenaye chentšana atše jatsbocama? ²⁵Nÿe Bëngbe Bëtsá endmëna nda yobena atše jatsbocama, Bëngbe Utabná Jesucristbeyeca. Chábioye chama mochatschuanaye. Atšbe ainanoca atše añe sëntsejuabná chë ley puerte tšabe soye yomna ca, y jobedésama sëntseboše; pero chë bacna soye jamama átšbeñe yomna juabnëngaca, atše bacna soyënga séntsama, ntšamo chë juabnënga šontsemandacá.

Ntšamo Bëngbe Bëtsabe Espiritu yomandacá jtsiyenana

8 Y chca, Bëngbe Bëtsá ndoñe nt-jayanana, Cristo Jesúseftaca cánÿiñe mo canÿacá imomnënga, chëngbe bacna soyëngama nÿetsca tescama castigánënga jtsemnama yojtsamna ca. ²Er, chë Uámama Espiritoftaca mandánënga mondmënayeca, Bëngbe Bëtsá šojatsebacá, bënga chë bacna soye jamama juabnëngaca mandánënga

ndétsemnana, y nÿetsca tescama castigánënga ndétsemnana, mo Bëngbe Bëtsabe bominiÿië nÿetsca tescama obanënga cuaftsemncá. Chë Uámana Espíritu jamana bënga ndegombre tšabe vida chamotsebomnana, cánÿië mo canÿacá Cristo Jesúseftaca jtsemnëse. ³Bëngbe Bëtsá tojanma ndayá Moisesbe ley ndoÿe tonjanobenacá, er entšanga mondoyena nÿe ntšamo cachënga imobošcá, y nÿe cánÿenga ndoÿe ntšobenana jamana ntšamo tojtsamncá. Bëngbe Bëtsá tojánayana entšángbeÿe bacna juabnëngbe mando jtsepochócama ca, y chama chabe Uaquiná tbojanichmó. Cha quem luaroye mo canÿe entšacá tojánabo, canÿe ainánaca, mo chë entšanga bacna soye amëngbe ainancá, pero ndocna te ni mo canÿe bacna soye ndoÿe tonjëftsema; y tojánabo, chábeyeca entšanga bacna soyëngama perdonánënga chamotsemnana. ⁴Bëngbe Bëtsá chca tojanma, bënga chë mora oyenënga jtsamëse ntšamo chë Uámana Espíritu ainaniÿe yomandacá y ndoÿe nÿe ntšamo bënga entšanga tmojtsebošcá, chamobenama tšabá jamana ntšamo chë leyiÿe yomandancá, ntšamo šojtsamncá.

⁵Chë nÿe cachënga tšabá jtsomñama cachëngbe juabnëngaca imoyenënga, nÿe sempre jësejuabnayana bacna soyënga jtsamama, chca bacna juabnëngaca mandánënga; pero ntšamo chë Uámana Espíritu ainaniÿe iuamëndacá oyenëngna, sempre jësejuabnayana tšabe soyënga jamama, ntšamo chë Uámana Espíritu yobošcá. ⁶Ntšamo chë nÿe cachá tšabá jtsomñama juabnëngaca mandaná oyenentšana jóbocnana entšá nÿetsca tescama castiganá chaotsemnana, mo Bëngbe Bëtsabe bominiÿië nÿetsca tescama obaná cuaftsemncá; y ntšamo chë Uámana Espíritu tojtsemandacá

oyenentšana jóbocnana chë nÿetsca tescama yomna tšabe vida jtsebomnana y ainaniÿe tšabe ebionana. ⁷Chë nÿets tempo oyenënga nÿe ntšamo tmojtsebošcá nÿe cachënga tšabá jtsomñama jtsejuabnayëse, Bëngbe Bëtsabe uayayënga jtsemnana, er chënga ndoÿe ntsamana ntšamo cha tojtsamëndacá, y chca jamama ndoÿe ntšobenana; ⁸y chca, chë nÿe chca bacna juabnëngaca oyenënga, ndoÿe ntšobenana jamana ntšamo Bëngbe Bëtsá tšabá tbojtsinÿancá.

⁹Pero tšëngaftanga ndoÿe quešmátiyena nÿe cach tšëngaftanga tšabá jtsomñama cach tšëngaftangbe juabnëngaca, sinó šmojtsiyena ntšamo chë Uámana Espíritu tšëngaftangbe ainaniÿe cmamëndacá, er chë Uámana Espíritu sempre tšëngaftangbe ainaniÿe iuétsemna. Nda ndoÿe quem Cristbe Espíritu tondbomná, ndoÿe Cristbia ntsemnana. ¹⁰Pero Cristo sempre tšëngaftangbe ainanentše vida totsóbomñëse, masque tšëngaftangbe cuerpënga yochjopochóca, quem luarentše entšanga bacna soyënga jtsamana causa, tšëngaftangbe espíritu nÿets tempo vida echanjesóbomñe, er Bëngbe Bëtsá tojama tšëngaftanga chabe bominiÿië tšábënga chašmotsemnana. ¹¹Y Bëngbe Bëtsabe Espíritu, Jesús cháuatayenama tojamabe Espíritu, sempre tšëngaftangbe ainaniÿe tojtsemnëse, Bëngbe Bëtsá, chë Cristo cháuatayenama tojamá, echanjama chë tšëngaftangbe yochjóbona cuerpo, cachiÿe vida chaotsatsbomnana. Cha chca echanjama chabe Espíritoftaca, y mua sempre tšëngaftangbe ainaniÿe iuétsemna.

¹²Chcasna, Jesucristbeyeca catsátanga, šontsamna jtsiyenana ntšamo chë Uámana Espíritu ainaniÿe šuamëndacá; ndoÿe quešnátamna jtsiyenana nÿe bënga tšabá jtsomñama

cabëngbe bacna juabnéngaca; ¹³er nÿe bënga tšabá jtsomñâma cabëngbe bacna juabnéngaca šmojtsiyenëse, castigánënga šmochántsemna, mo Bëngbe Bëtsabe bominyiñe obanënga cuaftsemncá; pero Uámana Espíritbeyeca, chca juabnéngaca nyetsca bacna soyënga jtsamana jtsajbanama šmojobenase, chë nyetsca tescama yomna tšabe vida šmochántsebmna.

¹⁴Ntšamo chë Uámana Espiritu yomandacá tmojtsamëngna, Bëngbe Bëtsabe básenga jtsemnana. ¹⁵Er Bëngbe Bëtsá ndoñe tonjama bënga ainaniñe canÿe espíritu chamotsebmnama, mo nÿe ínÿabiama nyets tempo oservenëngcá chašotsaméndama, y chca cha chaoma bënga cachiñe chamotsëuatjama; sinó chë Bëngbe Bëtsá tojama bënga chamotsebmnama Espiritu jamana bënga Bëngbe Bëtsabe básenga chamotsebmnama, y chë Espiritu endama “Atšbe Taitá ca” bënga Bëngbe Bëtsá chamotsechembuanama. ¹⁶Y chë Uámana Espiritu y bëngbe espíritu canÿe ora jayanana bënga Bëngbe Bëtsabe básenga imomna ca. ¹⁷Y Bëngbe Bëtsabe básenga mondménayeca, béngnaca mochanjójyëngacñe ndayá cha chabe básenga jatšatayama tojašebuachenacá; bënga y Cristo cánÿiñe chë soyënga mochanjójyëngacñe, er bënga inÿe soyënguñe tmojasufrí cachcá ntšamo Cristo tojansufricá, Bëngbe Bëtsá uámanënga y bëtsétsanga chášuibiamama, ntšamo cach Cristo yomncá.

Bëngbe Bëtsá bëtsétsanga y uámanënga šochjábiana

¹⁸Atše ndegombre sëndétatšëmbo, ntšamo quem tempo bënga imosufrincá, puerte batšatema yomna chë bëngbe tšabiama uámanana y

buashinÿinÿanana Bëngbe Bëtsá šochjínÿanÿiyama. ¹⁹Lempe ntšamo Bëngbe Bëtsá tojamcá endmëna mo tša cuaftsobatmancá, chaobuache chë Bëngbe Bëtsá ntšamo chabe básenga imomnama jinÿanÿiyama ora. ²⁰Er lempe ntšamo Bëngbe Bëtsá tojamcá, mora ndoñe yontsoservena ntšamo chaotsebmnama cha tojanjuabocá. Chca tojanopasá, ndoñe chë lempe ntšamo cha tojamcá chca chaotsebmnama tojánbošenayeca, ndayá cabá chë soyënga tojanmentšana, Adán bacna soye tojanmentšana, Bëngbe Bëtsá tojanjuabó ntšamo cha tojanmcá joserviama ndoñe ndayama ntšamo cha tempo tojanjuabocá. Pero lempe ntšamo Bëngbe Bëtsá tojanmcá entsemna mo cuaftsobatmancá canÿe te, ndëmua ora chë soyënga chaoservema cha yochjamama jtsetatšëmbëse, ntšamo quem luare jobojátšama ora chama cha yojanjuabnacá; ²¹Bëngbe Bëtsá canÿe te yochjama lempe ya ndoñe más chaondetsopochocama. Y chora, ntšamo Bëngbe Bëtsá yochjamcá chabe básenga chamotsebmnama, lempe ntšamo cha yojanjuabnacá, chabe uámanana y buashinÿinÿanana jtsebmnama, cachcá yochjama lempe chë cha tojanma soyëngaca.

²²Er bënga mondetatšëmbo lempe ntšamo Bëngbe Bëtsá tojanmcá méntsoñama yomna mo canÿe shembása šëšona jtsebmnama ora tbojtsetsetšama tojtsobësnacá; er lempe ntšamo cha tojanmcá entsemna mo tša cuaftsebošcá Bëngbe Bëtsá chaomama, chë soyënga chaoservema ndayama cha tempo tojanjuabocá. ²³Pero ndoñe nÿe chë lempe ntšamo Bëngbe Bëtsá tojanmcá yojtsemna mo chë shembasacá, sinó béngnaca; y bënga ainaniñe mondbomna chë Uámana Espiritu, y chë soye endmëna ndayá natsana bënga tmojanójyëngacñe, chë

Bëngbe Bëtsá bëtsá soyënga šochját-šatayentsana; bënga bëngbe ainanoca tša jesobësnayana, bënga chabe básenga chamotsemnana Bëngbe Bëtsá chaomama mondobátmanëntscuana, y chca, Bëngbe Bëtsá chaoma bënga ndocna te ndopochócama cuerpënga chamotsebmomna.
²⁴ Bënga, Bëngbe Bëtsábeñe jtsosbuáchiyëse monjobátmana ntšamo cha tojanayancá chaomama, y chíyeca cha bënga šojatsebacá; pero ndayama tmobatmancá, ya tojtsëchnëjuanama bënga tmojtsonyase, chora chama ya ndoñe ntjätobatmanëngana. Er ndocná jatobatmanana chë ndayá jinýama ya tojobenacá. ²⁵ Pero ndayama bënga tmobatmancá, cabá ndoñe jinýama tmontsobena soye tojtsemnëse, bënga jtsamnana Bëngbe Bëtsábeñe jtsobátmanana, uantadënga jtsemnëse, ntšamo tojayancá Bëngbe Bëtsá chaomëntscuana.

²⁶ Uámana Espíritnaca bënga šochandbëtsëjabuachana, er bënga ainaniñe ndoñe corente ntsošbuáchiyana. Bënga ndoñe quemuátstatsëmbo Bëngbe Bëtsáftaca jencuëntana ntšamo ndegombre tšabá yomncá; pero cach Espíritu Bëngbe Bëtsábioye bëngbiama jtsotjanañana, mo chca ora chabe ainanoca tša cuaftsobësnacá; y ndayá chca ora tbojtsotjanañamna, bënga ndoñe ntjobenayana bëngbe palábraca chama jóyebuambayama. ²⁷ Y Bëngbe Bëtsana, ntšamo entšanga ainanoca tmojtsebošcá yonýá, y ntšamo chë Espíritu jayanama tojtsebošcá yotátšëmbo, er chë Espíritu chabe entšangbiama ibotjanañe, ntšamo Bëngbe Bëtsá yobošcá.

Bënga ayénjanayëngama más tmojábocana

²⁸ Y bënga mondetátšëmbo, Bëngbe Bëtsá nyetsca soyënguñe inétsama

cha imobobonshánëngbe tšabiama, ndëmuanyënga cha tojáchembo chabe entšanga chamotsemnana, ntšamo cha jamama yojanjuabnacá. ²⁹ Jesucrístbeñe imošbuachëngbiama, Bëngbe Bëtsá quem luare tojanma orscana yojanjuabná y chënga tojanabacá chca chamotsemnana, y chë tempšana tojaninýnaná chënga chabe Uaquiñacá chamotsemnana; chca, chabe Uaquiñá chë bëtscá catšátangbeñe chë natsaná chaotsemnana. ³⁰ Y chë Bëngbe Bëtsá chca tojánabacacangnaca, tojánachembo chabe entšanga chamotsemnana; chëngbiama tojanma chabe bominýiñe tšábënga chamotsemnana, y chëngbiámna yochjama chabe uámanana y obenanentsana chamotsebmomna.

³¹ Y asna, ¿chë soyëngama ntšamo mochjayana? Co Bëngbe Bëtsá bën-gaftaca tojtsemnëse, bënga jáyënjanama ndocná queochatobenaye ca. ³² Cha tondaye tonjanma chabe Uaquiñá jasúfriama ndoñe chabondëtsemnana, sinó tojanalesenciá entšanga chamóba, nyetsca bëngbe tšabiama. Bëngbe Bëtsá chabe Uaquiñáftaca chca tojanmëse, ndegombre Bëngbe Bëtsá lempe šochanjátšataye. ³³ ¿Nda nanjobenaye jayanama chë Bëngbe Bëtsá tojábacacanga bacna soyënga tmojama y castigánënga chamotsemna ca? Ndocná; er cach Bëngbe Bëtsá endmëna nda tojayana bënga chabe bominýiñe tšábënga imomna ca. ³⁴ Y asna, ¿nda nanjobenaye jayanama bënga castigánënga jtsemnana šojtsamna ca? ¿Cristo Jesús cha yojtsemna? Ndoñe. Cristo, nda bëngbiama tojanóbana, pero cabá más, ndabiama Bëngbe Bëtsá tojanma cháuatayenama, y mora Bëngbe Bëtsabe catsbioica yojtsetbemana, jamándama y puerta bëtsá chentše jtsemnana; y choca, chánaca bëngbiama Bëngbe

Bëtsábioye ibotjanañe. ³⁵¿Ndayá nanjobenaye Crístbentsana, chë tša šondababuanÿeshanábentsana bënga jtsajuánayana? ¿Padecena soyënguine jtsemnana, tša jtsetsetsana, bënga chamosufrima ínÿenga tmojtsama ora, tondaye saná shëntsana ora, tondaye entšayá tmonsátbomna ora, o resjo bëngbiamá tojtsemna ora, o bënga jtsëbáyama ínÿenga tmojtseboše ora? ³⁶Ntšamo Bëngbe Bëtsabe uabemana palabrenguine endayancá, canÿe entšá Bëngbe Bëtsábioye ibojauyana ora:

Acbe causa entšanga cada te šontsëtsët-sná bënga jtsëbáyama ca;

entšanga bëngbioye nÿe ntšámnaca jtsaborlánana;

bëngaftaca jamana mo chë jobáyama oveshëngaftaca mondbetsamcá ca.

³⁷Pero ndoñe; nÿetsca chë soyënguentsana bëngna ayén-janayëngama más tmonjábocana, cha bënga šuababuánÿeshanayeca.

³⁸Er atše tšabá sëndétatšëmbo tondaye yondobena, bënga Bëngbe Bëtsábentsana, chë tša šondababuanÿeshanábentsana jtsajuánayana: masque ainënga o obanënga tmojtsemna; ni angelënga, ni amëndayënga chca jamama quemátobena; ni chë mora yojtsëchnëjuana soyënga, ni chë más chcoye yochjopása soyënga; ni ndocna obenana cach ndoñe; ³⁹ndocna quem luarentša tsbanánoca soye, ni quem luarentša tajsoica soye; ni ndocna inÿe soye ntšamo Bëngbe Bëtsá tojamcá, quenátobena chca bënga jtsajuánayama. ¡Ndocna soye quenátobena bënga Bëngbe Bëtsábentsana, chë bënga šondababuanÿeshanábentsana

jtsajuánayana, chë Cristo Jesús Bëngbe Utabnáftaca Bëngbe Bëtsá šojanÿanÿé bonshánentsana!

Bëngbe Bëtsá Israeloca entšanga tojabacacá, uámanënga chamotsemnana

9 Atše, Crísoftaca cánÿiñe mo canÿacá quetsomñecana, ntšamo sëntsichamcá ndegombre endmëna; atše ndoñe quetsátsbostero. Atšbe ainanoca juabnënga, Uámana Espíritbeyeca jtsemandánëse, chë šmonybëuyana tšabá o ndoñe tšabá tijamama, šmonsatsëtsná atše ndoñe stsebosterama. ²Ndegombre, atše puerte ngménaca atšbe entšangbiamá, chë Israeloquëngbiamá séntsemna y atšbe ainana tša šontsetsetše, chënga Jesucristbeñe jtsošbuáchiyama ndoñe quemátsboše causa. ³Tšabá tojtsemnëse, atše stjobenaye jtsebošana cach atše Bëngbe Bëtsábeyeca nÿetsca tescama castiganá y Crístbentsana luaroca jtsemnana, atšbe entšanga, chë cach atšcá buiñe bomna entšanga jujabuáchama. ⁴Chënga mondmëna chë Israeloca entšanga, chë Bëngbe Bëtsabe bocacana entšanga. Bëngbe Bëtsá chënga chabe basengcá tojánabiamá y chë tša bëtsá y uamaná cha yomnama chënga tojaninÿanÿé. Bëngbe Bëtsá ba soye chënga tojanabuayená ndayá cha chëngbiamá yojánboše y ndayá chëngbiamá jamama, y chë ley chëngbe cucuatšinë tojanáboshjona. Chënga monjántatšëmbo ntšamo Bëngbe Bëtsábioye ndegombre jadórana, y chënga mondbomna chë Bëngbe Bëtsabe šbuachenánana: chënga cha játsebacana. ⁵Chënga mondmëna chë bëngbe tempsca uámana bëts taitangbentsánënga, y Crístnaca mo canÿe entšacá, mo canÿe Israeloca entšangbentsacá tojánabo; y cha endmëna Bëngbe Bëtsá, nÿetsca soyënguine mandayá. Nÿetsca entšanga nÿets tempo cha chamotsatschuaná. Chca chaotsemna.

⁶Atše ndoñe quetsátichamo, ndayá jamama tojanašebuachenacá ndoñe Bëngbe Bëtsá tonjama ca; er, nyetsca Israeloca entsangbentsënga ndoñe Bëngbe Bëtsabe ndegombre entsanga quemátsmëna. ⁷Ni nyetsca Abrahámbentsána entsanga, ndoñe chabe ndegombre básenga quemátsmëna; er Bëngbe Bëtsá Abrahámbioye tbojaniana: “Chë ácbentsána entsanga nye Isaacbentsána mochanjabo ca.” ⁸Chca entsayana, bëngna ndoñe šontsamna jtsejuabnayana Abrahámbentsána nyetsca entsangbiana mo Bëngbe Bëtsabe basengcá; inyetsá, nye chë Bëngbe Bëtsá tbojanšbuachenáyeca Abraham yojánabamna básengbiana cocayé entsemna jtsejuabnayana, Abrahámbentsána ndegombre entsanga bëtsemnama. ⁹Er mëntšá endmëna ntšamo Bëngbe Bëtsá tojánayana, Abrahámbioye tbojanšbuachená ora: “Camëntša tempo entsba uata chanjésabo, y Sara canye šešona bochántsebomna ca.”

¹⁰Pero nye nyetsá ndoñe quenátsmëna. Chë Rebecbe uta básatna canye taitá ibnabomna, bëngbe tempsca bëts taitá Isaac. ¹¹⁻¹²Bëngbe Bëtsá, Rebécbioye tbojaniana: “Acbe mayor uaquiñá, acbe ngomënche uaquiñábioye bochanjasérvia ca.” Cha chca tojánayana jinýinyiyama chë básatbentsána canya cha tbojánbocacama, Jacob, y ndoñe chë inye basa, Esaú, chca jamama tempo cha tojanjuabóyeca. Rebécbioye chca tbojaniana chë básata cabá ndonyna ora, y ni canye basa cabá ndocna soye ndama ora. Y chca, ntšamo tojanopasacana, tojanopasá chë básatbentsána canya y ndoñe chë inya chca chaotsemnama Bëngbe Bëtsá tbojanábuayanayeca, y ndoñe ndayá chata tbojanmama. ¹³Ntšamo Bëngbe

Bëtsá chabe uabemana palabrenguine tojanayancá: “Jacob sënjánbobonshana, y Esaú sënjanáboyënja ca.”

¹⁴Y asna, ¿ntšamo mochjayana? ¿Bëngbe Bëtsá ndoñe cachcá nyetscángaftaca endëtsemna ca? ¡Ndoñe, ndegombre ndoñe! ¹⁵Er Bëngbe Bëtsá Moisésbioye tbojaniana: Atše šochanjóngmia nda chaitsebošabiana, y nda chaitsebošá chanjalastéma ca.

¹⁶Y chca, Bëngbe Bëtsá canye entsá jabocacayana, ndoñe ndayá chë entsá tojtsebošama o tojamama, ndayá Bëngbe Bëtsá tbojalastemama. ¹⁷Er Bëngbe Bëtsabe uabemana palabrenguine, Faraón chë Egiptoca réybioye cha tbojaniana: “Atše rey tcbonjábema, tša bëtscá atšbe obenana yomnama nyetscanga ácheñe chay-inýanyema, y nyets luarentša entsanga atšbiana chamotatsëmbonama ca.” ¹⁸Y chca, Bëngbe Bëtsá jalastémama nda tojtsebošábioye, y nda tojtsebošábioye jalesénciana chabiana nduauenaná chaotsomñama.

¹⁹Pero ndánaca tsëngaftanguentsá šuatjatjaye: “Bëngbe Bëtsá chca tojtsamëse, ¿ntšamo cha nantsobena jayanana canye entsá bacna soye tojama ca? ¿Nda nanjobenaye chë ndayá Bëngbe Bëtsá tojtsebošama corente contra jtsemnana?” ²⁰Pero, nye entsá quecotsemñecá, ¿ntšamo catjobenaye tša uamaná comna ca jtsejuabnayana, Bëngbe Bëtsá jatstjanayama ndáyeca canye soye chca yojtsama ca? ¿Chë pormana soye chë chca tojamábioye buanjauyana: “¿ndáyeca chca šcojama ca?” ²¹Chë fshantse soyënga pormayá jtsoobenana canye fshantsentsána jamana, canye matbaja uamana tescama, y inýajna cada te chaotsosevénama. Cachcá, Bëngbe Bëtsá jtsoobenana jamana

ntšamo cha tojtsebošcá, ndayá cha tojama sóyeca.

²² Bëngbe Bëtsá yojáboše jinýanýiyama entšángaftaca tbojánetnama, chëngbe bacna soyëngama; y yojáboše cha puerte obená yomnama jinýanýiyama. Chíyeca, chënga tša yojanëuantana, chënga chë ndëmuanýengbiana Bëngbe Bëtsá yochjánayana chëngbe bacna soyëngama castigánënga jtsemnama yojánamna ca, chë ndëmuanýenga jtsapochócama Bëngbe Bëtsá yojtsanprontana. ²³ Y chánaca yojáboše jinýanýiyama cha puerte uamaná y bëtsá yomnama. Cha tojama, bënga chë ndëmuanýenga cha šojanalastemá, chabe obenanentšana y uámananentšana chamotsebomnama; y cha tempo chca tojanjuabó bënga uámanënga y bëtsétsanga jábiamama. ²⁴ Bënga mondmëna chë ndëmuanýenga Bëngbe Bëtsá chama šojánachembo, ínýengna judío entšanguentšana, y ínýengna ndoñe judiëngbentsana. ²⁵ Ntšamo chabe

uabemana palabrënguñe, Oséasbe librëšana Bëngbe Bëtsá tojanayancá:

Entšanga ndoñe átsbenga mondmënënga, chënga “atšbe entšanga ca” chantsébobuatma;

y canýe luarentša entšanga ndoñe sënjánababuanýeshanënga, chëngna “atšbe bonshánënga ca” chantsébobuatma.

²⁶ Y cach luare ndayentše Bëngbe Bëtsá tojánayana: “Tšëngaftanga atšbe entšanga ndoñe quešmátsmëna ca”, cachentše Bëngbe Bëtsá ainá chënga echanjáuyana “atšbe básenga ca”.

²⁷ Israeloca entšangbiana, Isaías jabuachana tojánayana:

Masque Israeloca entšanga puerte banga chamotsemna, nýa mo chë mar béjayoca chënyañe casajcá,

Bëngbe Bëtsá nýe báseftanga chentšana echanjátsebacaye;

²⁸ er, ndoñe bën y Bëngbe Utabná canýe y nýetsca tescama echanjayana, nýets quem luarentša entšangbiana ndayá chënga tojamama tšabá o ndoñe tšabá bëtsemnama, y chëngaftaca echanjama ntšamo chaojayancá ca —cha tojánayana.

²⁹ Ntšamo Isaías tojanayancá, Bëngbe Bëtsá Israeloca entšángaftaca ntšamo jamama tojanoyebuambá ora:

Bëngbe Utabná, nýets obenana bomná, ínýenga bënga jtsapochócama cha tojanalesenciá ora,

báseftanga bëngbe entšanguentšënga ainënga chamotsomñama ndoñe matënjanmëse,

bënga mora pochocánënga mamojtsemna, mo chë Sodoma y Gomorra pueblëngoca entšangcá ca,

cha nýetscanga y nýetsca tescama tojt-sanapochócaye ca.

Israeloca entšanga y chë tšabe noticiënga

³⁰ Chcasna, mora mëntšá mochjayana: ndoñe judiënga tondaye monjánama Bëngbe Bëtsabe bominyiñe tšábenga jtsemnama, pero cha tojanma chënga chabe bominyiñe tšábenga chamotsemnama, chënga chábeñe imojtsošbuáchiyama. ³¹ Pero, Israeloca entšanga imojánboše Bëngbe Bëtsabe bominyiñe tšábenga jtsemnama, ntšamo chë leyiñe iuayancá jtsamëse; pero ndoñe chca tmonjanobená. ³² ¿Y ndáyeca chca? Co chë Bëngbe Bëtsabe bominyiñe tšábenga jtsemnama, chábeñe jtsošbuáchiyëse, chënga tondaye monjánama causa chca, sinó chca jtsemnama imojánboše nýe ntšamo leyiñe iuayancá jtsamëse. Y chca, chëngna Jesús tmojtсанaboté, ntšamo chë Bëngbe Bëtsabe uabemana palabrënguñe chë

tmojtsanábotengbiama endayancá, chëngbiama cha yomna mo chë ndëtsbé ndayiñe chënga jtsojestjamcá ca. ³³Bëngbe Bëtsabe uabemana palabrënguñe cha chca tojánayana:

Šmochjinÿe, atše sënjama Jerusale-
nentše canÿa chaotsemna, y cha
endmëna mo ndëtsbecá ndayentše
chënga mochjosteste,

y canÿe peñëscá ndayëše yochjama
chënga chamotsótsatšama;

pero nda chábeñe tojtsošbuachë, ndocna
te nÿe bonamente queochátobat-
mana ca.

10 Jesucristbeyeca catsátanga,
atše nÿets ainánaca séntseboše
y Bëngbe Bëtsá séntseimpadana, cha
Israeloca entšanga cháuatsebacama.
²Atše sëndétatšëmbo y séntsobena
chëngbiama jayanama, chënga puerte
mondboše Bëngbe Bëtsá jaserviama,
pero ntšamo chënga vojtsësertancá,
ntšamo Bëngbe Bëtsá jaserviama
vojtsamnamna, ndoñe quenátsmëna
ntšamo ndegombre yomncá. ³Chënga
ndoñe tonjanësertá ntšamo Bëngbe
Bëtsá inétsama entšanga chabe
bominÿiñe tšábenga chamotsemnama, y
cachënga tmojáanguango ntšamo jamëse
jobenayama Bëngbe Bëtsabe bominiÿiñe
tšábenga jtsemnama; pero ndoñe chca
tmonjanobená, chë entšanga chabe
bominÿiñe tšábenga chamotsemnama
ntšamo Bëngbe Bëtsá inetsamcá
ainánaca ntjoyëngacñëcá. ⁴Er Cristo
tojama entšanga ndoñe chamondëtsama
ntšamo leyiñe iuayancá, Bëngbe Bëtsabe
bominÿiñe tšábenga jtsemnama, chca,
chënga chamobenama chabe bominiÿiñe
tšábenga jtsemnama, Crístbeñe
jtsošbuáchiyëse.

⁵Chë Bëngbe Bëtsabe bominiÿiñe
tšábenga jtsemnama bošëngbiama,
ntšamo leyiñe iuayancá jtsamëse,
Moisés mëntšá tojánayana, chëngbiama
tojanábema ora: “Nda tojtsama

nÿetsca mandënga ntšamo leyënguñe
endayancá, tšabe vida echántsebomna,
nÿets tempo chë leyëngaca mandaná
ca.” ⁶Mëntšá endmëna ntšamo Bëngbe
Bëtsabe uabemana palabrënguñe
iuayana, entšanga chabe bominiÿiñe
tšábenga chamotsemnama ntšamo
cha inétsamama, Jesucristbeñe
jtsošbuáchiyëse: “Ndoñe cattsetjanaye:
‘¿Nda celoye yochjátšjua ca?’ (chca
endmëna ndayá Cristo quem luaroye
chaotsmama); ⁷o, ‘¿Chë obanënga
imomna luaroye yochjátšma ca?’ (chca
endmëna ndayá Cristo chë obanënga
imomna luarentšana chaotsjuama).”

⁸Ntšamo Bëngbe Bëtsabe uabemana
palabrënguñe iuayancá mëntšá
endmëna: “Tšëngaftanga paselo
šmontsobena ntšamo Bëngbe Bëtsá
tojabuayenacá jouenama, tšëngaftanga
ya chama palabrëngaca šmojoyebuambá
y tšëngaftangbe ainaniñe chama
šmojtsejuabná.” Chë buayenánana
endmëna ndayá bënga ftsabuayiynacá,
y chiñe endayana Jesucristbeñe
jtsošbuáchiyama šojtsamna ca. ⁹Chë
buayenana soyënguñe endayana, Jesús
ndegombre Bëngbe Utabná yomna ca
aca tcojayanëse, y Jesucristo cháu-
atayenama Bëngbe Bëtsá tojanmama,
nÿets ainánaca tcojtsošbuáchese,
Bëngbe Bëtsá cmochjatsbocá ca.
¹⁰Er ainanoca bënga Jesucristbeñe
jtsošbuáchiyana y Bëngbe Bëtsá
jamana cachabe bominiÿiñe tšábenga
chamotsemnama; palabrëngaca bënga
jinÿanÿiyana ndegombre Jesucristbeñe
imojtsošbuáchema, y Bëngbe Bëtsá
bënga játsebacana.

¹¹Er Bëngbe Bëtsabe uabemana
palabrënguñe mëntšá endayana:
“Nda Bëngbe Bëtsabeñe tojtsošbuachë,
ndocna te nÿe bonamente queochá-
tobatmana ca.” ¹²Judiënga y ndoñe
judiënga atsebácanënga mondmëna
cach sóyeca, er canÿe Utabná

njetscangbe Utabná endmäna, y cha tmojtsošëmbuanëngbiama, cha bëtská jtsamana. ¹³ Er Bëngbe Bëtsabe uabemana palabrënguïne mëntšá endayana: “Ndánaca Bëngbe Utabná tbojtsotsëmbuanábioye, cha bochanjatsbocá ca.” ¹⁴ Pero, ¿ntšamo cha mochjótšëmbona, chábeñe ndoñe tmonsošbuáchese? ¿Y ntšamo chábeñe mochtsošbuáchiye, chabiamá jóyebuambayama ndoñe tmonjounëse? ¿Y ntšamo chabiamá mochjouena, chabe buayenana soyënga chënga jáuyanama ndocná tontsemnëse? ¹⁵ ¿Y ntšamo chabe buayenánana mochtسابuátambaye, chëngbiöye jíchamuama ndocná tontsemnëse? Ntšamo Bëngbe Bëtsabe uabemana palabrënguïne endayancá: “¡Tša tšabá chë buayenánana abuátambayënga tmojáshjajna ora ca!”

¹⁶ Pero njetscanga chë tšabe noticiënga ndoñe ntjoeunayana. Cach Isaías mëntšá tojánayana: “Utabná, ¿nda chë mondabuayiyná soyënguïne yojtsošbuaché ca?” ¹⁷ Chcasna, chë tšabe noticiënga jounëse, entšanga jobenayana Jesucristbeñe jtsošbuáchiyana; y nda Cristbiamá tojtsabuayiynase, entšanga chabe buayenánana jounëna.

¹⁸ Pero atše šcotjá: ¿ndegombre nandmäna judiënga chë buayenánana ndoñe tmonjanuena ca? ¡Aíñe, chënga aíñe tmonjanuena! Ntšamo Bëngbe Bëtsabe uabemana palabrënguïne endayancá, chë Bëngbe Bëtsabe buayenana soyëngama oyebuambayëngbiama:

Chëngbe oyebuambayana njets quem luariñe tojóshjango, y chëngbe palabrënga njets luarënguentsá entsangbenache tojuáshana ca.

¹⁹ Pero cachiñe šcotjá: ¿Israeloca entšanga chë buayenánana ndoñe tonjanësertá ca? Natsana, Moisés

mëntšá tojánayana, chë ndoñe judiënga Jesucristbeñe tmojtsošbuaché ora, ntšamo chë judiënga mocht-sanjuabnayama tojanoyebuambá ora:

Atše, Bëngbe Bëtsá, chanjama, ndayá chë ndoñe judiënga chamojashjache soyëngama tšëngaftanga chašmot-siyentsbuášama, chënga chë ndoñe monjamna mo tšëngaftangcá atšbe entsänga.

Atše chca chanjama chëngaftaca, chënga chë tempo Bëngbe Bëtsabe soyëngama ndoñe tonjanësertá ca.

²⁰ Isaíasnaca, Bëngbe Bëtsabiamá tojanoyebuambá ora, puerte añémoca tojánayana:

Chë atše ndoñe šmondënguanga, šmonjínjena;

y chë atšbiamá ndoñe mondënoticiang-bioye sënjenonjínjé ca.

²¹ Pero Israeloca entsangbiama mëntšá tojánayana:

Njets tempo atše tša sënjánama, chënga átšeftaca tšabá tempcá chamotsatsmënama,

pero chënga ndoñe chemátanbošëna jounëna, y atšbe contra monjëtsemna ca.

Bëngbe Bëtsá, Israeloca entsangbiama tšabe juabna yobomnama tojinjanjé

11 Y as mora šcotjá: ¿Bëngbe Bëtsá chabe entsänga tojtsanëbaté? ¡Ndoñe, ndegombre ndoñe! Cach atše canye Israelocá sëndmäna, Abrahámëntšana entšá y Benjaminbe bëts pamillentsana entšá. ² Bëngbe Bëtsá chabe entsänga ndoñe tonjubaté, chë tempscana tojánabacacanga. Tšëngaftanga šmondëtatšëmbo ntšamo Bëngbe Bëtsabe uabemana palabrënguïne endayancá, Bëngbe Bëtsabe juabna oyebuambayá Elías, Israeloca entsangbe contra Bëngbe

Bëtsábioye cha ibojanatsëtsná ora: ³“Bëngbe Utabná, acbe juabna oyebuambnayënga tmojtsëbaye y acbiama pormana altarënga tmojtsepochochá; nÿe atse vídacá tijoquedá, y chënga montseboşe átsnaca jóbama ca.” ⁴Y mëntsá Bëngbe Bëtsá tbojanjúá: “Atse canÿsëfta uaranga boyabásenga atšbiama sënjacuedá, Baal ndoñe tmonjadoranga, ndayá entšanga tmojobopormá y imojtsejuabná canÿe dios yomna ca.” ⁵Mórnaca cachcá entsemna, judiënguentšë báseftanga monduájamna Jesucristbeñe ošbuáchiyënga, ndëmuanÿyënga Bëngbe Bëtsá tojabacacá, cha chëngbiama tšabe juabna bómnyeyca. ⁶Bëngbe Bëtsá entšanga jabacacayana chëngbiama tšabe juabna bómnyeyca; y ndoñe chca ntjamana ndayá entšanga tmojamama. Er ndayá tmojamama Bëngbe Bëtsá entšanga tojabacacase, cha nanjínÿanÿiye cha chca inétsama, ndoñe nÿe chëngbiama tšabe juabna bómnyeyca.

⁷¿Y asna? Israeloca entšanga ndoñe chemátaninÿena ntšamo Bëngbe Bëtsabe bominiñe tšábenga jtsemnana, pero chënguentšënga básefta bocacánëngna aíñe tmojanobená. Bëngbe Bëtsá tojanalesenciá chë ínÿyënga Israeloquënguentšana chabe buayenana soyënga ainaniñe ndoñe chamondóyëngacñama; ⁸ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama chënga chabe soyëngama jósertama ndoñe chamondëtsobenama, y mëntscoñama chënga ndoñe quemátobena chabe soyëngama ni jinÿyana ni josértana, mo nduabínÿnënga o nduauenanënga cuaftsemnëngcá ca.” ⁹Davídnaca chëngbiama mëntsá tojánayana:

Mo chë entšanga canÿe fiestentšë oboye-juayënga, chëngbe uayayëngbeyeca nÿe ndeolpe ishëchenëngcá, y mo chë bayëngbiama uachmaniñe ishëchenëngcá, chënga mal chamopasama chaomama Bëngbe Bëtsá séntseimpadana, mo nda ndëtsbeñe cuaftsojestjácá.

Chca Bëngbe Bëtsá chaoma, chëngbe bacna soyëngama;

y cha cháuyana chënga puerte castigánënga jtsemnana yojsamna ca, bacna soyënga tmojama causa;

¹⁰Bëngbe Bëtsá chaoma ntšamo moch-japásama chënga ndoñe chamondobená jtsetatšëmbuana,

y chaoma puerte chamosufrima, nÿets tempo padecena soyënguiñe jtsiyenëse ca —cha tojánayana.

Bëngbe Bëtsá ndoñe judiënga tojatsebacá

¹¹As mora šcotjá: ¿Israeloca entšanga Bëngbe Bëtsá ndoñe tmonjanoyeuná ora, cha tojánayana chënga nÿetsca tescama castigánënga jtsemnana yojsamna ca, ndocna inÿe soye chëngbiama ntsemncá? ¿Chëngbiama yojamna mo chë ndëtsbeñe jojéstjiana y jtëtsbanama ndoñe más ntjobenayancá? ¡Ndoñe, ndegombre ndoñe! Chca ndoñe quenátsmëna. Chënga Bëngbe Bëtsá ndoñe chematanoyeuná causa, ndoñe judiënga tmonjántatšëmbona ndayá bëtsemnana Bëngbe Bëtsábeyeca atsbočaná jtsemnana; y chë causa, mora, judiënga, ndayá chë ndoñe judiënga Bëngbe Bëtsábentšana tmojoshachiñcá montsíyentšbuáše. ¹²Judiënga bacna soyënga tmojanma causa, inÿe entšanga quem luarentšë tmojobená ba tšabe soyënga jtsebomnama. Chë judiënga tmonjanorrebajá causa, chë ndoñe judiënga ba tšabe bendicionënga Bëngbe Bëtsábentšana tmojoshachiñe. Y chca, chë bëtscá judiënga Bëngbe Bëtsá

játsebacama, chënga atsebácanënga chamojtsemna ora, más bëtscá tšabe bendicionënga Bëngbe Bëtsábentšana nyetsca entšangbiama echántsemna.

¹³Ntšamo mora chanjayancá, tšëngaftanga ndoñe judiëngbiama entsemna. Bëngbe Bëtsá šojichmó chabe soyëngama chë ndoñe judiënga jábuayenama; atše sëntsejuabná puerte uámana trabajo stsebmna ca. ¹⁴Atše sëntsobátmana, quem trabájoca atše jobenayana jamama chë cach atšcá buiñe bomna entšanguentšënga, ndayá chë ndoñe judiënga Bëngbe Bëtsábentšana tmojoshachiñcá chamotsiyentšbuáše, y chca, ndayá tijamama, Bëngbe Bëtsá chënguentsana báseftanga cháuatsebacama. ¹⁵Er chë judiënga Bëngbe Bëtsá tojtanëbaté ora, cha tojanma inye entšanga quem luarentše cháftaca tempcá tšabá chamotsatsmënama; y chënga cha chamojoyeuná ora, corente tšabá echántsemna, nya chënga mo obanënga cuabmëncá y cuafstayanëngcá. ¹⁶Nda canye arninýentšana chë natsana tandëse Bëngbe Bëtsabiama joserviama yojtsemna ca tojyanëse, jtsemnana mo nyetsana chabiama cuafstsemncá. Canye betiyentša tbëtëjënga Bëngbe Bëtsabiama yojtsemna ca canya tojyanëse, nyetsca chë betiyentša buacuafjëgnaca Bëngbe Bëtsabiama jtsemnana.

¹⁷Chë judiënguentše báseftanga Jesucristbeñe ndoñe montsanošbuaché ora, tšëngaftanga chë ndoñe judiënga šmonjanobená chábeñe jtsošbuáchiyana. Y chca, judiënga monjamna mo canye jena olivo betiyentšana entšanga tmojatëtse buacuafjëngcá, y tšëngaftangna mo tjoca olivo betiyentša buacuafjënga, chë jena olivo betiyeshiñe jenëfjëngcá. Mora tšëngaftanga Bëngbe Bëtsábentšana cachca tšabe soyënga chë judiëngaftaca šmontsebmna, mo

chë jena buacuafjënga y cachentša buacuafjënga cach tbëtëjëntšana lempe cuafstoyëngacañcá. ¹⁸Ndoñe šmattsenábotamnaye, tšëngaftanga Bëngbe Bëtsabe tšabe soyënga šmojtsebmnama, chë Jesucristbeñe ndoñe montsanošbuaché judiëngbiama yojamna soyënga. Šmochtsejuabnaye, buacuafjëngna chë tbëtëjëngayeca vida jtsebmna, y ndoñe tbëtëjënga chë buacuafjëngayeca; cachcá, tšëngaftanga nye Bëngbe Bëtsábeyeca chë tšabe soyënga šmojtsebmna.

¹⁹Pero tšëngaftanga šmuatjayana: “Aíñe, pero Bëngbe Bëtsá básefta judiënga tojanëbaté, Jesucristbeñe ndoñe montsanošbuaché causa; chíyeca bënga fsënjanobená mo buacuafjënga betiyiñe jenëfjëngcá chca tšabe bendicionënga Bëngbe Bëtsábentšana jýëngacñana ca.”

²⁰Ndegombre, chënga Jesucristbeñe ndoñe montsanošbuaché causa, mo buacuetëtšënjëngcá tmonjanoquedá, pero Jesucristbeñe šmojtsošbuáchema, tšëngaftanga šmojoquedá Bëngbe Bëtsábentšana tšabe bendicionënga jtsoyëngacañcá. Chcasna, chama ndoñe šmattsenábotamnaye; más tšabana cuedado jtsebmna. ²¹Er Bëngbe Bëtsá, chë Jesucristbeñe ndoñe montsanošbuaché judiënga, ndoñe tonjanaperdoná, y chënga chabe entšanga bëtsemnamna, monjamna mo cach betiyentša buacuafjëngcá; tšëngaftanga, chë mo betiyiñe jena buacuafjëngcá šmomnënga, cha cach ndoñe quecmochátaperdonaye, chábeñe ošbuáchiyana šmojtšajbanase.

²²Bëtscá šmochtsejuabnaye Bëngbe Bëtsá puerte tšabia yomnama, pero cha tšatjayá yomnámna šmochtsejuabnaye; tšatjayá endmëna chë bacna soyënga tmojtsamëngaftaca, pero tšëngaftangaftacna puerte tšabia. Cha tšëngaftangaftaca chca

echántsemna, tšëngaftanga chca chašmojtšomerecénentscuana; pero ndóñesna, Bëngbe Bëtsá echanjama tšëngaftángnaca mo buacuetët-šenëfjèngcá chašmoquedama, chë tšabe bendicionënga Bëngbe Bëtsábentsana ntsoyëngacañá. ²³Y ntšamo mora imojtsejuabnacá chë judiënga tmojatrocá y tmojontšé Jesucristbeñe jtošbuáchiyana, chéngnaca cachiñe chë tšabe bendicionënga Bëngbe Bëtsábentsana mochanjójyëngacñe, y mochántsemna mo betiyiñe jena buacuafjèngcá, er Bëngbe Bëtsá beca obenana endbomna jamama ntšamo chë judiënga tempo imojobomncá cachiñe chamotsatsbomnana. ²⁴Chcasna, más paselo jtsemnana canye jena olivo betiyentša buacuatëtšëñëfja cach betiyiñe jétsjena, y ndoñe, chë tjoca olivos betiyentša buacuafja canye jena olivos betiyiñe chaójuama jájena. Cachcá, más paselo jtsemnana chë Jesucristbeñe ndoñe montsošbuaché judiëngbiama, jóntšana jtošbuáchiyana y tšabe bendicionënga Bëngbe Bëtsábentsana jójyëngacñana, tšëngaftanga ndoñe judiënga chë tempo Bëngbe Bëtsá ndoñe šmonjanábuatmëngbiama.

Bëngbe Bëtsá nyetscángaftaca puerte tšabia endmëna

²⁵Jesucristbeyeca catšátanga, atše séntseboše tšëngaftanga chašmotsetátšëmbo chë tempo Bëngbe Bëtsá entsanga ndoñe tonjaninyanjé soyëngama. Atše séntseboše tšëngaftanga quem soyëngama chašmotsetátšëmbo, chca, tšëngaftanga ndoñe judiënga chë judiëngbiama más uámanënga šmomna ca ndoñe chašmondëtsejuabnana. Ndayá Bëngbe Bëtsá tempo entsanga ndoñe tonjaninyanjécá, quem soye endmëna: Bëngbe Bëtsá tojalesenciá, nye baseftatescama banga Israeloquënga

Bëngbe Bëtsabe soyënga ainaniñe ndoñe chamondójyëngacñama; pero chca echántsemna, chë ndoñe judiënguentše atsebácanënga jtsamnama imomnënga, atsebácanënga chamojtsemnëntsçuana.

²⁶Chca chaojopasá ora, nyetsca Israelentša entsanga atsebácanënga mochántsemna; ntšamo Bëngbe Bëtsabe uabemana palabrenguñe endayancá:

Entšangbe atsebacayá Israelocana echanjabo,

y echanjama nyetsca Jacobëbentsana entsanga ndoñe más vida chamondëtsebmna, bacna soyënga jtsamëse ca.

²⁷Y mëntšá endmëna ntšamo chëngbiama chjašebuachená:

chënga játsebacana, chëngbe bacna soyëngama chajaperdónaye ora ca —chiñe endayana.

²⁸Chë tšabe noticiënga tmojtsanaboté causa, judiënga Bëngbe Bëtsabe uayayënga mondmëna, chca, tšëngaftangbe tšabiama chaotsemnana. Pero Bëngbe Bëtsá tojánabacacayeca, chéngnaca Bëngbe Bëtsabe bonshánënga mondmëna, er Bëngbe Bëtsá chëngbe tempsca uámana bëts taitanga chca tojanašebuachená. ²⁹Chca endmëna, er Bëngbe Bëtsá ndocna te juabna ntjatrócana; nyetscanga chabe entsanga chamotsemnana tojáchembënga, nyets tempo cha echántsababuanjeshana, y echanjama chéngbeñe tšabe bendicionënga chaotsemnana. ³⁰Tšëngaftanga ndoñe judiënga tempo ndoñe šmonjánama ntšamo Bëngbe Bëtsá inabošcá; y mora, Bëngbe Bëtsá tcmojalastemá, judiënga Bëngbe Bëtsá ndoñe tmonjoyeuná causa. ³¹Cachcá, Bëngbe Bëtsá tšëngaftanga tcmojalastemama, judiënga montsemna chë Bëngbe Bëtsá ndoñe montsobedecëñënga, chca, Bëngbe Bëtsá chéngnaca cháualastemama. ³²Er Bëngbe Bëtsá

tojinñanjé, cha ndoñe ntjoyeunayama juabnéngaca nyetscanga mandánenga imomnama, chca, nyetscanga jálastemama cha jobenayama.

³³ ¡Ndegombre, Bèngbe Bètsá nyetscangbiana puerte tšabia endmèna, puerte osertaná y puerte obiashjachá! Ndocná quenátobena ínÿenga jábuayenama ndayá Bèngbe Bètsá jamana inetsejuabnycá, y ndocná quenátobena corente josértana ntšamo cha inetsamcá. ³⁴ Ntšamo Bèngbe Bètsabe uabemana palabreñguine endayancá:

Ndocná quenátstatšëmbo ntšamo Bèngbe Bètsá inetsejuabnycá; ndocná quenátobena cha jábuayenama ndayá jamana ibomnama.

³⁵ Ndocná quenátobena ndayánaca cha natsana jshatšetayana, chë tbojatšetabiana ndebená cha jatsmènama, y chë ndebénama ndayánaca jtoiyama chabotsemnama ca.

³⁶ Er lempe cha tojama, lempe cha iútabna, y lempe chabiana yomna. ¡Nyetscanga nyetsca tescama cha chamotsatschuaná! Chca chaotsemna.

Ntšamo jtsiyenëse Bèngbe Bètsá jtseservénama

12 Chcasna, Jesucristbeyeca catšátanga, Bèngbe Bètsá bènga ba soye šojalastemáyeca, puerte cbontsaimpadana, tšèngaftanga Bèngbe Bètsá chašmèyana tša šmojtseboše lempe jamana chábioye jadórana ca, Bèngbe Bètsá jadórana mo ndayá cuafjobacá y cuafjuatšëmboncá, mo cabá ainá cuafsomñcá. Šmochjauyana tšèngaftanga sempre šmochtsentšena cha servénana y jtsamëse cha tšabá bèngaftaca chaotsemnama. As, chca chašmojtsama ora, ndegombre oyejuayá Bèngbe Bètsá šmochántsebiamnaye. ² Ndoñe šmattsiyena jtsamëse

ntšamo chë nÿe quem luarama enójuabnaye entšanga monduamancá, y šmochjaleséncia Bèngbe Bètsá mo tsëm entšangcá chácmbiamama, tšèngaftangbe ainana y juabna mo tsëmccá chaomëse. Chca, tšèngaftanga šmochanjobenaye jtsejuabnayana y šmochántsetatšëmbo ntšamo Bèngbe Bètsá yobošcá: ndayá tšabá yomna, chë ndayá cha oyejuayá ibnabema, y ndayá ya ndoñe yondopodena más tšabá jtsemnama.

³ Ndayá Bèngbe Bètsá atšbiana tšabá jtsejuabnayëse šojatšetama, nyetsca tšèngaftanga cbochjáuyana, ndocná cachabiana chaondëtsejuabná más uamaná yomna ca, nÿe ntsachetšá jtsenójuabnayana ibomna nyetšá. Más tšabá, cada ona cachabiana tšabá chaotsenojuabná, y chca chaotsenojuabná ntšamo chabe ošbuáchiyana yomncá, chca, chë Bèngbe Bètsá tbojatšetá ošbuáchiyana chabiana chaotsetrabájama. ⁴ Er, ntšamo bènga cada ona mondbomna canÿe cuerpo y chë cuerpiñe ba soyènga jtsebomnana, y nyetsca soyènga ndoñe cach soyama cuerpiñe ntsoservénana, ⁵ cachcá bènga ošbuáchiyènga, masque bètscanga imomna, Crístoftaca cánÿiñe mo canÿacá mondménayeca, bènga mondmèna mo chabe cuerpo cuaftsemncá, y cada ona cánÿiñe mo canÿacá nyetscángaftaca.

⁶ Bèngbe Bètsá tojama bènga cada ona chamotsebomnama ndoñe cachca chabe tšetana obenana, ntšamo Bèngbe Bètsá cada ona bèngbe tšabiana inajuabnycá. Y chabe juábnaca bènga jtsóyebuambnayama jtsobenama Bèngbe Bètsá tojamëse, chca mochtsama ntsachetšá chábeñe bèngbe ošbuáchiyana yomncá. ⁷ Ošbuáchiyènga bètscá jaserviama bènga chamotsobenama Bèngbe Bètsá tojamëse, chca mochtsama.

Tšabá jtsabuátambayama bēnga chamotsobenama Bēngbe Bētsá tojamēse, chca mochtsama. ⁸Inyēnga jañēmuama bēnga chamotsobenama Bēngbe Bētsá tojamēse, chca šontsamna. Lempē ntšamo bēnga tmobomncá inyēngbiámnaca chaotsemnama bēnga jamama chamotsobenama Bēngbe Bētsá tojamēse, n̄yets ainánaca chca šontsamna. Améndayēnga jtsemnama bēnga chamotsobenama Bēngbe Bētsá tojamēse, šontsamna bētsá jamana tšabá jtsaméndayama. Inyēnga jálastemama bēnga chamotsobenama Bēngbe Bētsá tojamēse, šontsamna oyejuayēnga chca jamana.

**Ntšamo bēnga Jesucristbeñe
ošbuáchiyēnga jtsamana šojtsamna**

⁹Inyá chašmojtsebobonshana ora, n̄yets ainánaca chca šmochtsama. Ndayá yomna ndoñe tšabe soye šmochtsaboté y chentšana šmochtsojuánañe; šmochtsentšena ntšamo tšabá yomncá jtsamama. ¹⁰Cmontsamna n̄yetscanga puerte jtsenbobonshánana, Jesucristbeyeca catsátanga quetsomñecá, chē inyēnga bēngbiama más uámanēnga imomna ca jtsejuabnayēse.

¹¹Ndoñe oyēnjayēnga šmattsemna, ndayá bētsá Bēngbe Utabnabiama šmochtsetrabájaye; ainaniñe corente añemo jtsebonñese, Bēngbe Utabná sempre šmochtseservena.

¹²Tšēngaftanga Bēngbe Bētsábeñe jtsošbuáchiyēse, chábeñe šmobatmánayeca, puerte oyejuayēnga šmochtsemna; padecena soyēnguñe chašmojtsachñējuana ora, puerte uantadēnga šmochtsemna, y sempre Bēngbe Bētsáftaca šmochtsencuéntaye.

¹³Bēngbe Bētsabe entšanga opresido bomnēnga šmochjújabuache, y šmochtseprontana tšēngaftangbe yebnentše posada inyēnga júyentšamiama.

¹⁴Bēngbe Bētsá šmochtseimpadana, chē tšēngaftanga chašmosufrima amēngbiama tšabe bendicionēnga cha chaotsamama; aĩñe, cha šmochjaimpáda tšabe bendicionēnga chēngbiama chaotsamama, bacna soyēnga ndoñe.

¹⁵Oyejuayēnga inyēngaftaca šmochtsemna, chēnga oyejuayēnga chamojtsemna ora; ngmēnaca šmochtsemna, inyēnga ngmēniñe chamojtsemna ora.

¹⁶Šmochtsiyena n̄yetscanga jtsenēyeanēse. Nye cach tšēngaftanga uámanēnga ndoñe šmattsenobiamnaye, sinó chē nduámanēnga imomnēngaftaca tšabá mándbomnēnga šmochtsemna. Ndoñe šmattsejuabnaye yapa osertánēnga šmomna ca.

¹⁷Inyēnga bacá chacmojtsaborlana ora, ndoñe šmattsatēchénguaye; corente šmochtsentšena ntšamo n̄yetsca entšangbiama tšabá yomncá jtsamama. ¹⁸Ntsachetšá šmojobenacá, lempē šmochtsama natjémbana n̄yetsca entšāngaftaca jtsiyenama.

¹⁹Atšbe bonshánēnga, inyēnga bacá chacmojtsaborlana ora, ndoñe šmatjama chēnga chē causa chamotsesufrínama, ndayá Bēngbe Bētsá šmochjaleséncia chēnga cháucastigama; er Bēngbe Bētsabe uabemana palabrenguñe cha tojánayana: “Atše chanjama chēnga chamosufrima, inyēnga chamosufrima tmojama causa; y chēnga chanjácastigaye, inyēngbioye bacá tmojaborlá causa ca.” ²⁰Chca játamamna, mēntšá šmochjama, ntšamo cachánaca tojanayancá:

Acbe uayayá tbojtseshēntsane, saná cochjacaredáda,

y tbojtsajuendase, cochjuáfiye.

Chca chacojamēse, cochanjama cha puerte chaotséuatja ntšamo tcmojaborlama,

y ainana corente chabotsetšena, mo chebana iñbēnga chabe bestšaĩñe cuafjacjacá ca.

²¹Ndoñe šmatjaleséncia, ntšamo ndoñe tšabá tontsemncá tšëngaftanga chacmayénjanama. Chamna, ntšamo tšabá yomncá jtsamése, chë ndoñe tšabe soye šmochjayénjaná.

13 Nyetsca entsanga entsamna jtsamana ntšamo chë améndayënga tmojtsamëndacá, er ndocná obenana ntsebmomnana, Bëngbe Bëtsá ndoñe chca tbonjalesenciase, y nÿe Bëngbe Bëtsá tojama améndayënga obenana chamotsebmomnana. ²Chca, chë améndayëngbe contra tmojtsemnëngna, ntšamo chaotsemnana Bëngbe Bëtsá tojayancá contra chënga jtsemnana; y chca contra tmojtsemnëngna, castigánënga mochántsemna; ³er ntšamo tšabá yomncá amënga, ndoñe quenátamna ndayama chë améndayënga jatebéuatjana, nÿe chë bacna soye amëngna aíñe. Tšëngaftanga šmojtseboše jtsiyenama chë améndayëngbioye ntjatebéuatjca; chcasna, ntšamo tšabá yomncá šmochtsama, y chë améndayëngna tšabe bomínÿeca mochantsonÿaye ntšamo chašmojtsamcá; ⁴er chë améndayëngna Bëngbe Bëtsabe trabajo amënga mondmëna, tšëngaftangbe tšabiama. Pero bacna soyënga šmojtsamëšna, cmontsamna jtsiyenana chë améndayënga jtsebéuatjëse, er chënga jacistigama obenana mondbomna, y chca mondbëtsama. Chënga, Bëngbe Bëtsabe mándoca jayanana chë bacna soye amënga ndoñe tšabá tmonjama ca, y jamana chënga chamosufrima. ⁵Chíyeca, jtseytana ntšamo chë améndayënga tmojtsichamcá jtsamana, pero ndoñe nÿe chë castigo ndoñe chašmondëtsebmomnana, ndoñe chca šmontsama causa, sinó chë ainanentša tšabe juabnënga ntšamo tbojtsëtsësnacá joyeunayama yómnyeca. ⁶Cachca soyëngama, améndayëngbiama impuesto

tšëngaftanga jtsatsquécjnayana; er chë améndayënga Bëngbe Bëtsabe oservénënga mondmëna, ntšamo chiñe jtsamama tojtsamncá corente tmojtsentšëna ora.

⁷Chcasna, tšëngaftanga šmochjáyentsbuachiye ntšamo chënga jtsebmomnana tojtsamncá. Chë crocënana entsanga ayëngacayéngbioye, ndaye impuëštnaca šmochtëbuënyaye; chëngna šmochtsarrespetana ntšamo yomncá, y chënga uámanënga chamotsemnana šmochtsejuabnyaye.

⁸Crocënana inÿa jëtsëntšabuáchiyama chacmojtsamnëse, nÿe ntoyicá ndoñe šmatjoquéda, nÿets tempo ndebénënga; nÿe quem soye sempre šmochtsama: nÿetscanga šmochtsenbobonshana; er nda ndëmua entsábioye tbojtsebobonshana, ya tojama ntšamo leyíñe yomandancá. ⁹Quem mandënga, “acbe shema ínÿaftaca ndoñe cattseíngñaye, inÿa ndoñe catjóba, ndoñe catjatbëba, inÿa tojtsebmomna soye ndoñe nÿe acbiama cattseboše”, y chë inÿe mandënga leyíñe lempe quem mandíñe entsemna: “Ndëmua entsánaca cochtsebobonshana ntšamo cach aca cuenobobonshancá”. ¹⁰Nda ndëmua entsábioye tbojtsebobonshana, chábioye ndoñe bacá ntjabórlana; chca, ndánaca jtsebobonshánëse, entsá jamana lempe ntšamo leyíñe yomandancá.

¹¹Chë soyënga cmontsamna jtsamana, er bënga mondetatšëmbo ya chë uámana tempiñe imojtsiyenama, chë mocna ora šojtsamna prontánënga jtsemnana, mo ocnayentšana cuafjofšëngancá, Jesucristo jaserviama jtsentšëñëse. Chca cmontsamna jamana, er chë Bëngbe Bëtsá bënga játsebacama te, mora ya más bécoñe entsemna, ntšamo chë Jesucristbeñe jtsošbuáchiyama tmonjanontsé ora enjamnana. ¹²Mora bënga mondoyena canÿe luarentšë bëtscá bacna soyëngaca

y ngmenánaca, y chca jtsemnana mo bēnga nyēts tempo ibetiñe cuaftsajncá. Pero ya entsobeco chē Bēngbe Bētsá bēnga játsebacama te, mo chē ibetiñe ya jtsopochócama y binýñiñe ya jontšamcá. Chíyeca mochtsajbaná bacna soyēnga amana, y mochtsiyena tšabe soyēnga jtsamēse, Satanás játsjama y jáyēñjanama bēnga jtseprontánēse, mo canýe soldado jenéuyanama y inýa jáyēñjanama ba soyēnga tojenocjacá. ¹³Ntšamo šojtsamncá mochtsiyena, ntšamo entšanga ndaye tšabe sóynaca jamama monduamancá, ínýengbiamama lempe chaotsinýñese. Chcasna, ndoñe quešnátamna yapa tmoyēnga ntsemnana, ndoñe fiestēnguenache ndoñe tšabe soyēnga ntsamama, ndoñe bacna soye boyabása o shembásaftaca ntsamama y jenomándama ntsobencá chca soyēnga ndoñe ntsamama, nyētscanga ndoñe cachcá ntsejuabnayama ndoñe ntsamama y ndoñe ínýenga yapa ntsíyentšbuašana. ¹⁴Chca játamamna, šmochtsiyena jtsamēse ntšamo Bēngbe Utabná Jesucristo endbetsamcá, y ndoñe nyē šmatjésejuabnaye jtsamama nyē cach tšēngaftanga tšabá jtsomñama juabnēngaca, ndayá tšēngaftanga chašmotsamama chē juabnēnguñe tojtsemncá.

**Ndoñe šmattsóyebuambnaye
inýe ošbuáchiyēngbe contra**

14 Chē Jesucristbeñe nyē batsatema ošbuáchiyēnga tšabá šmochjúbuaja, y chēngaftaca ndoñe šmattsenatsētsnaye ndayá añe o ndoñe jamana yontsamnama. ²Er básefta ošbuáchiyēnga corente imotátšēmo chēnga nyē ndayánaca jasama imobenama, pero chē Jesucristbeñe nyē batsatema ošbuáchiyēngna, ndocna mēntšena ntsesayana, er chēnga jtsejuabnayana añe jasana

canýe bacna soye nántsemna ca. ³Chē nyētsca saná sayēnga ndoñe chamondētsejuabná chē inýe soyēnga ndoñe mondētsesayēngbiamama, chē causa chēnga más batšá uámanēnga imomna ca; y chē ndaye soyēnga ndoñe mondētsesayēngna, chē nyētsca saná sayēngbe contra ndoñe chamondētsoyebuambná, er Bēngbe Bētsá chēnga tojúbuaja mo chabe entšangcá. ⁴Tšēngaftanga ndoñe quecmátamna chē ínýabe oservená ndoñe tšabá tonjama ca jatichámuana. Cachabe nduiño jtsemnana nda yochjayana cha tšabá o ndoñe tšabá tonjamama. Y chē oservená jamana ntšamo tbojtsemncá, er Bēngbe Utabná obenana endbomna cha chca chaotsamama.

⁵Báseftanga mondmēna, chēnga jtsejuabnayana canýe te inýe tescama más uámana te yomna ca; pero ínýengna jtsejuabnayana cada te cachcá iuámama ca. Y entsemna ndayá cada ona corente tšabá chaotsetátšēmo, ntšamo yojuabnacá ndáyeca chca ca. ⁶Nda tojtsejuabná canýe te inýe tescama más uámana te yomna ca, chca jamana Bēngbe Utabnábiama jtenójuaboyama. Y nda nyētsca saná tojtšesá, chca jamana Bēngbe Utabnábiama jtenójuaboyama, er cha Bēngbe Bētsábioye chē sanama jētschuayana; y nda tojtsejuabná sananga yomna y ošbuáchiyēnga chcana chamotsesama Bēngbe Bētsá ndoñe yondboše ca, cha chē soyēnga ndoñe ntjasana, Bēngbe Utabnabiama jtenójuaboyama, y chá-naca Bēngbe Bētsábioye chē sanama jētschuayana.

⁷Bēnga ošbuáchiyēnguentšana ndocná ainá ntsemnana nyē cachabiamama, ni jóbanana nyē cachabiamama. ⁸Bēnga tmojtšiyenēse, Bēngbe Utabnabiama jtsiyenana; y tmojóbanēsna, Bēngbe Utabnabiama jóbanana. Chca, masque ainēnga o

obanënga, bënga Bëngbe Utabnábenga jtsemnana. ⁹Chama Cristo tojanóbana y Bëngbe Bëtsá tojanma cha cháuatayenama, cha Bëngbe Utabná chaotsemnana, ainéngbeñe y chë ya tmojóbanëngbeñe chaotsemándama.

¹⁰As, ¿ndáyeca tsëngaftanguentše báseftanga, catsátangbe contra jtsóyebuambnayana, ndayá chënga tmojtsamama? ¿Y ndáyeca ínÿenga tsëngaftanguentše jtsichámuana, catsátanga ndoñe uámanënga montsemna ca, ndayá chënga tmojtsamama? Er nÿetscanga šontsamna Bëngbe Bëtsabe delante jashjanguana, ntšamo cada ona tojëftsemcá tsábá o ndoñe tsábá bétsemnana cha cháuyanama.

¹¹Er Bëngbe Bëtsabe uabemana palabrënguñe Bëngbe Utabná mëntšá tojánayana:

Ndegombre atše ainá sëndëtsomñe, y
chíyeca atše šcojurá,
nÿetscanga atšbe delante
mochanjoshëntsaméntšá atše
jadórama,

y nÿetscanga šmochanjauyana, “ndegombre aca Bëngbe Bëtsá condmëna ca”.

¹²Chcasna, cada ona bënga šontsamna Bëngbe Bëtsá jauyanana ntšamo tmojamama ndáyeca chca ca.

Ndoñe šmatjama inÿe ošbuáchiyënga bacna benachiñe chamótsatšama

¹³Chíyeca, ya ndoñe quešnátamna ínÿengbe contra jtsóyebuambnayana. Chca játamamna, šmochtsejuabnaye y yejuana šmochtsantješna ndocna te tondaye ntjamana, ndayá chaoma Jesucrístbeyeca acbe catsáta, chaojuabó y bacna soyënga chaoma. ¹⁴Atše sëndétatšëmbo, mo canÿa Bëngbe Utabnáftaca cánÿiñe mo canÿacá quetsomñecá, ndocna soye yondmëna, nÿe cachabe ponto chaotsemna ndoñe tsábe soye. Pero canÿe entšá

tojtsejuabná ndayánaca ndoñe tsábe soye yondmëna ca, ni jasama, ni jabojuama, chabiama cocayé chë soye nÿets tempo jëftsemnana ndoñe tsábe soye. ¹⁵Tšëngaftanga inÿa becá šmojtsatsëtsná, inÿe soyënga tsábá endmëna jasama ca, y cha tojtsejuabná, chca soyënga jasama ndoñe tsábá yondmëna ca, pero tsëngaftanga tša šmojtsatsá causa, cha chca soyënga tojase, y chentšana tbojtsebiona puerta bacna soye tojamama, chca, tsëngaftanga jtsinÿanÿnayana ndoñe šmondoyena jtsamëse chë ínÿenga jtsababuánÿeshanëse. Nÿe tsëngaftanga inÿe soyënga šmétsesayama ndoñe šmatjaleséncia chë soye chaoma inÿa, ndabiama Cristo tojanóbana, chë ndoñe ndegombre benachiñe chaoquedama. ¹⁶Ndoñe šmatjaleséncia ndayá tsëngaftanga tsábá šmétsamama, ínÿenga ndoñe tsábá tsëngaftangbiama chamotsóyebuambnama. Chca šmochanjobenaye, ntšamo šmojtsamcá jtsajbanase, ínÿenga ndoñe tsábá tmontsoyebuambná ora. ¹⁷Bëngbe Bëtsabe amëndayana bëngbeñe ndoñe quenátsmëna inÿe soyënga añe jasana o inÿe soyënga ndoñe, canÿe soye añe jofšiyana o inÿe soye ndoñe. Pero chabe amëndayana bëngbeñe añe endmëna jtsamana soyënga ndayama Bëngbe Bëtsá tojayana añe tsábá jamama yomna ca, cháftaca tempcá tsábá jtsatsmënana y ainaniñe oyejuayana jtsebomnana; y Uámana Espíritbeyeca bënga jobenayana chca jamana. ¹⁸Y nda Crístbioye chca tbojtseservena, jamana Bëngbe Bëtsá cháftaca oyejuayá chaotsemnana, y entsangbe bominiñe tsábía jtsemnana.

¹⁹Sempre šontsamna tsábe soyënga jtsamana y chë soyëngaca chaopodé jamana nÿetscanga natjëmbana chamotsiyenama, y ndaye sóynaca šmochtsama, ndayá ínÿenga

chaújabuache Jesucristbeñe corente jtsošbuáchiyama y ainaniñe bëtská añemo jtsebomnama. ²⁰Tšëngaftanga ndaye sanánaca jasama šmobénayeca, ndoñe šmatjama chaotsopochocama ndayá Bëngbe Bëtsá ainaniñe tojamcá. Ndegombre, nyetsca sananga tšabá jasama endmëna; pero ndayá tšëngaftanga šmojasama, inya bacna benachiñe chaótsatšama šmojamëse, chë soye cocayé ndoñe tšabá ntsemnana. ²¹Tšabá endmëna mëntšena ndoñe ntjasana, vínoye ndoñe ntjofsiyana o ndayánaca ndoñe ntjamana, pero chë soye aïne tcojama ora, Jesucristbeyeca canye catšata chaojuaboma y bacna soye chaomama tojoservese.

²²Asna, ntšamo tšëngaftanga chë soyëngama ndegombre šmošbuachecá, nye Bëngbe Bëtsá y tšëngaftangaftaca chaotsemna. Canye entšá ndegombre oyejuayá jtsemnana, canye soye jamama tšabá yomna ca tojtsejuabnase, y chë soye tojamentšana, ndoñe tšabá chca yonjamna ca juabnënga ainaniñe ndoñe tontsebomnëse. ²³Pero canye entšá ndayá tojamentšana tojayana, bacna soye tojama ca chë ndayá tojasama o tojamama, as Bëngbe Bëtsánaca echanjayana cha ndoñe tšabá tonjama ca, er ntšamo tojamcá ndoñe tonjama chë soye aïne tšabá yomnama jtsošbuáchiyëse; y ndayánaca chca ora tojtsamëse, chca jamana bacna soye jtsemnana.

**Ntšamo ínÿengbiamá tšabá
tojtsemncá mochtsama,
ndoñe nye bëngbiamá**

15 Bënga, chë Jesucristbeñe corente ošbuáchiyënga, šontsamna chë nye batsatema ošbuáchiyënga jujabuáchana, chënga bacna soyënga tmojtsama ora, nye batšá

ošbuáchiyana bomna causa; y ndoñe nye jatsënguayana nye ndaye soyëngaca yopodena bënga tšabá jtsemnana. ²Cada ona bënga šontsamna jamana ntšamo cach bëngcá Jesucristbeñe ošbuachiyabiamá tšabá tojtsemncá, y ndayá cha oyejuayá chaotsemnana tojama soye. Chca šontsamna, cha más bëtská Jesucristbeñe chaotsóšbuáchema, y ainaniñe más añemo chaotsebomnama. ³Er Cristo, ntšamo tojanmca cach ndoñe tonjanma nye cha oyejuayá jtsemnana. Inÿetšá, cháftaca tojanopasá ntšamo Bëngbe Bëtsabe uabemana palabrénguñe endayancá, mo Cristo Bëngbe Bëtsáftaca cuaftsoyebuambnacá: “Ntšamo entšanga montsichamcá aca joyenguanguama, atše šmontsatsëtsná ca.” ⁴Er lempe ntšamo tempo Bëngbe Bëtsabe uabemana palabrénguñe tmojanabemcá, bënga jabuátambama endmëna. Ndayá bënga chiñe tmojuatsjnyama, bënga jtsoobenana padecena soyënguñe tmojtsachnëjuana ora uantadënga jtsemnana, y ainaniñe más añemo jtsebomnama; y chíyeca bënga montsobena, chábeñe jtsošbuáchiyëse, chábeñe jobátmana, ntšamo tojanayancá chaomama. ⁵Atše, Bëngbe Bëtsá sëntseimpadana, nda inétsama bënga padecena soyënguñe uantadënga chamotsemnana, y nda inétsama bënga ainaniñe más añemo chamotsebomnama, cha chaoma nyetscanga canye juabna chašmotsebomnama, ntšamo Cristo Jesús yojanjuabnacá tšëngaftanga jtsejuabnayëse; ⁶cha chca chaoma, nyetsca tšëngaftanga mo cányiñe cuaftsemncá, y mo nyetscanga canye ora cuafjayancá, Bëngbe Bëtsá, Bëngbe Utabná Jesucristbe Taitá, puerte bëtsá y uamaná yomnama chašmuinÿanyëma.

**Chë ndoñe judiëngbiámnaca chë
tšabe noticiënga jtsemnana**

⁷Njëtscanga oyejuayënga šmochjenofja, ntšamo Crístnaca tšëngaftanga tcmojanëbuajcá, chca, entšanga chamuinñanyé Bëngbe Bëtsá puerte bëtsá y obená yomnama. ⁸Atše séntseboše ndayá jayanana, Cristo tojánabo judiënga jabáserviama ca, chca, jinñanyiyama Bëngbe Bëtsá sempre inétsamama ntšamo tojašebuachenacá; tojánabo ntšamo Bëngbe Bëtsá bëngbe tempsca uámana bëts taitanga tojanašebuachenacá chaocumplima; ⁹y Bëngbe Bëtsá puerte bëtsá yomna ca chë ndoñe judiëngnaca chamuayanámnaca, cha chënga inétsalastemanama, ntšamo Bëngbe Bëtsabe uabemana palabrenguiñe endayancá, y chca tojanocumplí: Chíyeca, atše chë ndoñe judiëngbeñe chaitsemna ora, aca cbochantsatschuanaye, Bëngbe Bëtsá;

y jacántase chanjayana aca puerte bëtsá y uamaná comna ca.

¹⁰Inyoca mëntšá endayana:

Puerte oyejuayënga chë ndoñe judiënga šmochtsemna, Bëngbe Bëtsabe bocacana entšangaftaca cánñiñe ca.

¹¹Y inyoca mëntšá endayana:

Bëngbe Utabná šmochtsatschuanaye tšëngaftanga ndoñe judiënga, y cha šmochtsatschuanaye njëtscá tšëngaftanga njëts luarënguenache entšanga ca.

¹²Y Isaiásnaca Bëngbe Bëtsabe uabemana palabrenguiñe mëntšá tojanábema: Canya Isáiñe entšanguentšana echanjabo,

y Bëngbe Bëtsá chábioye uamaná bochanjábema, njëts luarënguenache entšanga chaotsamëndama,

y chënga chábeñe jtsošbuáchiyëse, chábeñe mochantsobátmana tšabe soyënga chëngbiama chaotsamama ca.

¹³Atše, Bëngbe Bëtsá séntseimpadana, nda inétsama bënga chábeñe chamotsobátmanama tšabe soyënga bëngbiama chaomama, cha chaoma tšëngaftanga ainaniñe puerte oyejuayënga chašmotsemnana y ainaniñe tšabe ebionana chašmotsebomnama, chábeñe jtsošbuáchiyëse; y Bëngbe Bëtsá chca tšëngaftangbiama chaoma, tšëngaftanga cada te más chábeñe chašmotsobátmanama, chë Uámana Espíritbe obenánaca.

¹⁴Jesucristbeyeca atšbe catšátanga, atše corente sëndétatšëmbo tšëngaftanga puerte tšábenga šmomnama, ndayá cmamnama corente šmotatšëmbuama, y jtsebuaiynayama šmobenámnaca.

¹⁵⁻¹⁶Quem tsbuanáchañe básefta soyëngama sënjuábema, ntšamo šmatjátsjuabnayama atše ntjatauajcá; chca sënjama, básefta soyëngama chašmuatenójuaboma; y chca séntsobena juabemana, er Bëngbe Bëtsá tojama atše chaitsebomna chë uámana trabajo, Cristo jtsešervénana, chë ndoñe judiënga jtsejabuáchanëse. Atše bachnécá séntsoserverna, Cristo stseserverna ora, entšanga tšabe noticiëngama jtsebuaiynayëse; atše chca sëndama chë ndoñe judiënga Jesucristbeñe chamotsošbuáchema, y ndayánaca chamotsamama Bëngbe Bëtsá oyejuayá chëngaftaca chaotsemnana, mo chabiama canyë uatšëmbonancá. Chcánaca atše sëndama, ndoñe judiënga ndegombre Bëngbe Bëtsábenga chamotsemnana, chë Uámana Espíritbeyeca.

¹⁷Chca, atše Cristo Jesúseftaca cánñiñe mo canyácá quetsomñecá, ndegombre séntsobena jtsejuabnayana

ntšamo Cristo jaserviama atše sëndamcá, puerte uámana soye yomnama. ¹⁸ Atše añemo séntsebomna nýe chë ndayá Cristo átseftaca tojamama jóyebuambayama, ndoñe judiënga Bëngbe Bëtsá chamóyeunama. Chca tonjopasá, ndayá tijayanama y tijamama, ¹⁹ chë Bëngbe Bëtsabe obenana jinñanyiyama bëts soyëngama, chë chabe obenánaca tojopasá tšabe soyëngama, y chë Uámana Espíritu bëts obenánaca tojama soyëngama. Y chca, Jerusalenocana jabojátšase, nýetsca luarënguëjana Iliria luaróntscoñe, Cristbe tšabe noticiëngama nýets luarënguenache entsänga tijabuayená. ²⁰ Atše sempre canýe soye inýe soyëngama más sënjánboše, y enjamna chë tšabe noticiëngama jábuayenana, entsänga ndocna te Cristbiamama oyebuambnayana tmonjanuena luarënguenache; y chca sënjanma, atše ndoñe játamama inýa tojanbojatsé trabajo, mo inýabe bojatsëna yebnentše jajebuama cuafjatontsecá. ²¹ Ntšamo Bëngbe Bëtsabe uabemana palabrenguine endayancá, chë tempo Cristbiamama ndoñe tmonjanuenëngbiama: Chë ndëmuanýenga tempo ndocná chabiamama tonjanabuayená, chënga tšabá mochanjinýe ntšamo cha yomnana; y chë ndocna te chabiamama tmonjouenënga, chabe soyëngama echanjósertaye ca.

Pablo yojanjuabná Roma bëts puebloye jama

²² Y nýa chë causa, atše ndoñe chiyjobená tšëngaftangbioye jama tšëngaftanga jányama, masque ba soye tsjenojuabná choye jama. ²³ Pero mora atšbe trabajo quem luarënguine sënjapochocá y tempscana tšëngaftanga jányama tša sëndánbošeyeca, ²⁴ séntse-

juabná mora añe chjobenaye choye jama, tšëngaftanga jautsësayama, chëjana chajjachnëngo ora, España luaroye chaitsá ora. Y baseftayté tšëngaftangaftaca chjëftsemna, cbochjánýama tšëngaftangaftaca oyejuayá; chentšana Diosmanda šmochjuájabuache, y lempe ntšamo chašojtsajabotcá šmochjátšetaye jobenayama España ayana jtëtóntšama. ²⁵ Morna Jerusalenoye chanjá, choca entsänga Bëngbe Bëtsábenga imomnënga jaujabuáchama; ²⁶ er Jesucristbeñe ošbuáchiyënga Macedonia y Acaya luarentšënga, tmonjajuabó tšabá yojtsemna crocénana jájuabana chë Jerusalenoca entsänga, Bëngbe Bëtsábenga imomnënga y ndbomnejëmënga imomnënga jujabuáchama; y oyejuayënga chca tmonjama. ²⁷ Cachënga chca tmonjajuabó, y chca jamana tšabá endmëna, er judiënga tmonjanma, chë Bëngbe Bëtsábíocana tmojanóyëngacñe soyënga ndoñe judiëngnaca chamotsebomnama; chíyeca ndoñe judiënga entsamna chë Jerusalenoca judiënga ošbuáchiyënga jujabuáchana, ndaye soyënga jatsatayëse, chënga vida jtsebomnama chamotsobenama. ²⁸ Y chca, quem trabajo chajjapochocá ora, y chë ndoñe judiënga ošbuáchiyënga lempe tmojátbanana chajjäftsayentsbuachiye ora, chanjontsé España y jama, y tšëngaftangbiajana chanjachnëngo tšëngaftanga jáftsanýama, tšëngaftangaftaca baseftayté jëftsemnama. ²⁹ Atše corente séntsetatšëmbo tšëngaftangbioye chajjá ora, chjášhango y chjama tšëngaftanga bëtscá tšabe bendicionënga Crísbentšana chašmotsebomnama, tondaye chacondëtsabuáshebenëntscuana. ³⁰ Jesucristbeyeca catšátanga, Bëngbe Utabná Jesucristbeñe ošbuáchiyënga quetsomñecá, y bënga bonshánana chamotsebomnama

chë Uámana Espíritu inétsamayeca, tšëngaftanga cbontsaimpadana, bëtscá chašmotsentsëna Bëngbe Bëtscá nyëts ainánaca jtseimpadánama, ntšamo atše sëndbetseimpadancá, cha atše chašotsinýënama. ³¹Cha šmochtseimpadana chë Judea luaroca ndošbuáchiyënga ndocá chašmondëborlama, y chë Jerusalem-quënga Bëngbe Bëtscábënga, tšabá chamóyëngacñama ndayá chënga jujabuáchama chajáftsayentšbuachiye ora. ³²Y chentsana, y Bëngbe Bëtscá chca chaojábošenëse, atše chayobená bëtscá oyejuayá tšëngaftangbioca jashjanguana tšëngaftanga jányama, y tšëngaftangaftaca chaitsemna ora, batšá jóchnama chayobená. ³³Atše, Bëngbe Bëtscá séntseimpadana, nda inétsama bënga ainaniñe tšabe ebionana chamotsebomnama, nyëtsca tšëngaftangaftaca chaotsemnama. Chca chaotsemna.

Ubuátmënga jacheuayama

16 Atše séntseboše tšëngaftanga jáuyanana Febe, Jesucristbeyeca bëngbe uabena, canye tšabe entšá endmënama; cha chë Cencrea pueblaca enefjuana ošbuáchiyënga endújabuachana. ²Tšabá cha šmochjofja, mo canya Bëngbe Utabnábia quetsomñecá, ntšamo Bëngbe Bëtscabe entšanga entsamncá ínýëngaftaca jenofjana. Šmochjuájabuache ntšamo tbojtsajabotcá, er cha banga tonjújabuache; átšbioynaca.

³Atšbe cuenta Prisca y Aquila šmochjacheuaye, chë átšeftaca tbonjatrabajata, Cristo Jesusbiamá oservéniñe. ⁴Jobanámnaca bonjanprontana, atše jatsbocama, ndoñe chašmondóbama. Atše chama chata séntsatacheuaná; y ndoñe nyë atše, sinó nyëts luarenache enefjuana ndoñe judiënga ošbuachiyëngnaca

chca. ⁵Chë ošbuáchiyënga, chë Bëngbe Bëtscá jëtšchuayama chatbe yebnentšë jénefnama imuamanéngnaca, šmochjacheuaye. Atšbe bonshana Epeneto šmochjachuaye; cha endmëna chë natsaná Asia luaroca Jesucristbeñe jtsošbuáchiyama. ⁶María šmochjachuaye; cha tšëngaftangbeñe bëtscá tojatrabajá. ⁷Chë cach atšcá judeocata Andrónico y Junias šmochjacheuaye. Chata canye ora átšeftaca cárceloye bonjanëtámëna, y Jesucristbe ichmónëngbiamá chata puerte uámanata bonjamna, y atšbiamá más natsana tbojanontšë Jesucristbeñe jtsošbuáchiyama.

⁸Ampliato šmochjachuaye, atšbe bonshaná, er atšcá cha Bëngbe Utabnáftaca cánýiñe mo canýacá bondmëna. ⁹Urbano šmochjachuaye, chë bëngaftaca Cristbiamá oservéniñe trabajayá; y atšbe bonshana Estáquisnaca šmochjachuaye. ¹⁰Apeles šmochjachuaye; cha ba soye tonjinýanýé Jesucristbeñe puerte yošbuáchema; y Aristóbulbe yebnentšëngnaca šmochjacheuaye.

¹¹Chë cach atšcá judeocá Herodión šmochjachuaye, y chë Narcisbe pamillentsana Bëngbe Utabnábeñe ošbuachiyëngnaca. ¹²Trifena y Trifosa šmochjacheuaye; chata Bëngbe Utabnabiamá puerte bondëtrabája; y bëngbe bonshaná Pérsidnaca šmochjachuaye; cha bëtscá endëtrabája, Bëngbe Utabnabiamá oservéniñe. ¹³Rufo, chë Bëngbe Utabnabiamá uámana trabajayá, šmochjachuaye, y chabe mamánaca; cha mo atšbe mamacá endmëna. ¹⁴Asíncrito,

Flegonte, Hermes, Patrobas y Hermas šmochjacheuaye, y chë ínýënga Jesucristbeñe ošbuáchiyënga chëngaftaca inmënutanangnaca. ¹⁵Filólogo y Julia, Nereo y chabe uabena, Olimpas y nyëtsca Bëngbe

Bëtsabe entsanga chéngaftaca imménutanangnaca šmochjácheuaye.

¹⁶Njetscanga mo Jesucristbeyeca catšatangcá šmochjenchuaye, jtenámochëse, ntšamo cach tšëngaftangbe pamíllanga puerte bonshanánaca šmondetsacheuanaycá. Njets luarenache enefjuana Crístbeñe ošbuáchiyënga cmontsacheuaná.

¹⁷Jesucristbeyeca catšátanga, atše cbontsaimpadana tšabá šmochjuáfšna y cuedado šmochtsebomna chë cányënga ínÿengaftaca contra chamotsemnana y ínÿënga Jesucristbeñe ošbuáchiyana chamotsajbanama immétsamëngbiama; chëngna, chë tšëngaftanga ndaye šmojóyëngacñe buatëmbana soyëngama contra jtsóyebuambnayana. ¹⁸Er chca amënga, ndoñe ntsentšénana Cristo Bëngbe Utabná jtseservénana, sinó jtsamana ndayá cachënga tmojtsebošcá, nÿe cachëngbe cuerpama tšabá tojtsemncá; y tšabe y botamana palabréngaca chë paselo jáingñama yomna entsanga jáingñana, chëngbe ainaniñe chëngcá chamotsejuabnama.

¹⁹Njetsca entsanga tmojouena, chë Bëngbe Bëtsabe soyëngama ntšamo ínÿënga tmojabuatambacá, tšëngaftanga corente šmnétsayaunanama, y chíyeca atše puerte oyejuayá tšëngaftangaftaca séntsemna. Atše séntseboše, tšëngaftanga tšabá chašmotsetátšëmbo jtsamana ntšamo tšabá yomncá, y ntšamo bacna soyënga jamanna chašmotsemna mo ndoñe cuaftsetatšëmbcá. ²⁰Y Bëngbe Bëtsá, nda inétsama bënga ainaniñe tšabe ebionana chamotsebomnana, ndoñe bën y echanjama tšëngaftanga Satanás chašmoyénjanama, mo cha tšëngaftangbe cucuatšinë cuafjaboshjoncá. Atše séntseimpadana Bëngbe Utabná Jesús, chaoma tšabe bendicionënga tšëngaftangbeñe chaotsemnana.

²¹Timoteo, chë átšeftaca trabajayá, tšëngaftanga cmontsacheuaná; y Lucio, Jasón y Sosípater, cach atšcá Judeoquënga, chëngnaca tšëngaftanga cmontsacheuaná.

²²Atšnaca Tercio, chë Páblëbe cuenta quem tsbuanácha uabiamnayá, tšëngaftanga cbontsacheuaná, tšëngaftanga y átšnaca Bëngbe Utabnáftaca cánÿiñe mo canÿacá quetsomñëcá.

²³Gayo cmontsacheuaná; atše Pablo chabe yebnentše posada séntsebomna, y cha enduamana njetsca chë muentša ošbuáchiyënga tšabá júbuajana. Erasto, chë quem pueblentša crocénana bojanÿá, tšëngaftanga cmontsacheuaná, y Jesucristbeyeca bëngbe catšata Cuártënaca.

²⁴Atše, Bëngbe Utabná Jesucristo séntseimpadana, cha chaoma tšëngaftangbeñe tšabe bendicionënga chaotsemnana. Chca chaotsemna.

Quem tsbuanácha juapochócama, Pablo Bëngbe Bëtsábioye tbojtanchuá

²⁵Bënga sempre mochtsinÿanÿnaye Bëngbe Bëtsá puerte uamaná yomnana. Cha endobena jamama tšëngaftanga puerte chašmotsošbuáchemá; y chca, cha echanjama ntšamo chë bënga fsëndabuayiyiná tšabe noticiënguiñe yomncá, ntšamo chë Jesucristbe buayenana soyënga yomncá, y ntšamo chë Bëngbe Bëtsá šojinÿanÿé ndegombre soyënga yomncá. Njets tempo méntscóñama, Bëngbe Bëtsá chë soyënga entsanga ndoñe tonjinÿanÿé, y chë causa chënga chë soye ndoñe ntsetatšëmbuana. ²⁶Pero morna, ntšamo Bëngbe Bëtsabe juabna oyeambuambnayënga tmojanabemcá, tojama bëtscá entsanga chë ndegombre soyëngama chamotsetatšëmbuama; Bëngbe Bëtsá, chë njets tempo vida bomná, tojanmandá entsanga njets luarënguenache chë ndegombre

soyëngama chamotsetatšëmbuama,
chënga chábeñe chamotsošbuáchema y
ntšamo cha yobošcá chamotsamama.

²⁷Nýe canýe Bëngbe Bëtsá endmëna,
y cha nýets osertánana endbomna.

¡Nýetscanga chamotsinýanýná cha
puerte bëtsá y uamaná yomnama,
ndayá Jesucristo tojanmama! Chca
chaotsemna.

1 Corintios

Pablo chënga jacheuayama

1 Atše Pablo, ndábioye Bëngbe Bëtsá tbojanchembo Jesucristbe ichmoná jtsemnama, Bëngbe Bëtsá chca yojánbošeyeca, cánýiñe chë Jesucristbeyeca catšata Sósteneseftaca, ²quem tsbuanácha séntsabiamná tšëngaftanga chë Corinto bëts pueblaca Jesucristbeñe ošbuáchiyëngbiam; ndëmuanýenga Cristo Jesúseftaca Bëngbe Bëtsá tojábiama chabe entšanga nýe chábioye oservénënga, ndëmuanýenga Bëngbe Bëtsá tojáchembo chabe entšanga chašmotsemnama, chë nýe quem luarama enójuabnaye entšanguentsana luarénënga, Bëngbe Utabná Jesucristbioye tmojtšëmbonëngaftaca, Jesucristo nda yomna Bëngbe Utabná y chëngbe Utabná. ³Atše séntsaïmpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnama, y tšëngaftangbe ainaniñe tšabe ebionana chašmotsebonnama.

Bëngbe Bëtsá Jesucristbeyeca tojama tšëngaftanga ba tšabe bendicionënga chašmotsebonnama

⁴Bëngbe Bëtsá tšëngaftangbiama sempre sëndbétsatschuanaye, er tšëngaftanga cánýiñe mo canýacá Cristo Jesúseftaca šmómnyeyeca, Bëngbe Bëtsá tšëngaftangbeñe tojajuabó, tšëngaftangbe tšabiama. ⁵Chca Crístoftaca šmómnyeyeca, Bëngbe Bëtsá tojama tšëngaftanga chašmotsebonnama chábentšana nýetsca tšabe soyënga, tšëngaftanga obenana chašmotsebonnama cha jamëse, Bëngbe Bëtsabe soyëngama jóyebuambayama y chë soyëngama

chacmésertama. ⁶Chca, ntšamo cbonjanabuayiyenacá mo Jesucristbe ndegombre soyëngcá, tšëngaftángnaca ínýëngbioye tšabá šmojinýanýé ndegombre soyënga bétsemnama, chë ntšamo jtšiyenama. ⁷Y chca, Bëngbe Bëtsá chabe entšanga inétsatšatnaye tšabe soyënguentšana tondaye quecmochatabuáshebena, Bëngbe Utabná Jesucristo quem luarentše yochtonýna tescama Bëngbe Bëtsábeñe jtšošbuáchiyëse chašmojt-sobátmanëntscuana. ⁸Cha echanjama tšëngaftanga chábeñe corente chašmotsošbuáchema y ainaniñe bëts añemo chašmotsebonnama, ndayá tšëngaftangaftaca jamama cha yojuabnacá chaojapochocantscuana; chca, chë Bëngbe Utabná Jesucristo nýetsca entšangbiama tšabá o ndoñe tšabá tmonjamama yochjayana te, ndocná chaondobená jayanana tšëngaftanga ndoñe tšabá šmonjama ca. ⁹Bëngbe Bëtsá nýets tempo jtšamana ntšamo tojašebuachenacá, y cha endmëna nda tcmojánachembo cánýiñe mo canýacá chašmotsemnama chabe Uaquiniá Jesucristoftaca, Bëngbe Utabná.

Choca ošbuachiyëngbeñe nýetscanga ndoñe cachcá montsanjuabná

¹⁰Jesucristbeyeca atšbe catšátanga, tša cbontsaïmpadana, chë ndayá Bëngbe Utabná Jesucristo nýetsca bëngbiama yomnama, tšëngaftanga nýetscanga cachcá chašmotsejuabnama, y tšëngaftangbeñe ndoñe más báseftanga canýe soye y ínýënga inýe soye chamuatsjuabná. Y añe šmochtsiyena mo canýacá, nýetscanga cachcá jtsejuabnayëse y cachcá jamama jtsebošëse. ¹¹Jesucristbeyeca atšbe catšátanga, atše chca sënjayana, er Cloebe yebnentšënga šmonjabëuenaye, tšëngaftangbeñe šmojtšenpen-

zentserama. ¹²Ntšamo sentsichamcá entsemna ndayá tšengaftangbentše báseftanga šmojtsichamo: “Atše Páblēbe ustoná sēndmēna ca”; ínŷengna imojtsichamo: “Atšna Apólosbe ustoná sēndmēna ca”; ínŷenga: “Atšna Pédrēbe ustoná sēndmēna ca”, y ínŷengna: “Atšna Cristbe ustoná sēndmēna ca” imojtsichamo. ¹³Chca šmojtsamama, jtsóbocanana mo cada básefta ošbuáchiyēnga canŷe Cristo tmojtsebmncá. ¿Pablo yojamna nda tmojancrucificá tšengaftangbe tšabiama? ¿O tšengaftanga uabáinēnga šmomna, atše jótšēmbonēse, tšengaftanga atšbe ústonēnga bétsemnama? ¹⁴¿Bēngbe Bētsá sēndbētsatschuanaye atše ndocná tšengaftanguentšá tijanábayama; nŷe Crispo y Gáybioye aínē! ¹⁵Chca, ndocná quenátobena jayanana, atše jótšēmbonēse uabainá cha tojanoquedá ca, mo átšbeñe ošbuáchiyēnga cuaftsemncá. ¹⁶Estéfanasbe pamillentségnaca sēnjanēbaye, pero ndoñe quetsatabouínŷna inŷa tijanábayama. ¹⁷Er Cristo ndoñe chešnatanichmó ínŷenga jubáyama, ndayá chē chabe tšabe noticiēngama entšanga jábuayenama. Ndoñe chešnatanichmó chē soyēnga jayanama, corente osertana entšangbe soyēnga jtsichámēse; chca, entšanga Crístbeñe chamotsošbuáchema, ndoñe chē atšbe osertánantšana palabrengama, sinó nŷe chē buayénana, Cristo cruzoca bēngbiana tojanóbanama.

**Crístbeñe yomna Bēngbe
Bētsabe obenana y osertánana**

¹⁸Quem buayénana, Cristo entšangbiana cruzoca tojanóbanama, chē pochocánēnga jtsemnama tmojtsajnēngbioye jtsinŷanana mo ndoñe corente juabna bomnēngbe soycá; pero bēngbiana, chē Bēngbe Bētsá nŷetsca

tescama šochjátsebacangbiamna, quem buayénana jtsinŷanŷayana Bēngbe Bētsabe obenana. ¹⁹Ntšamo Bēngbe Bētsá chabe uabemana palabrenguñe tojanayancá:

Atše chanjama chē tša osertánēngbe osertánana tondayama chaondētsoservénama; y chanjama chē ba soyēngama osertánēngbe osertánana tondayama chaondētsámanama.

²⁰¿Ntsachetšá yojsámama chē tša osertaná y chē puerte uatsjinŷená tbojayana soyēnga? ¿Ntsachetšá yojsámama chē tša tšabá chē soyēngama juabnayá, morscá, y ínŷengaftaca enatsētsnaye ora chēngbe ayēnjanayá tojayana soyēnga? Ndegombre Bēngbe Bētsá tojinŷanŷé, chē quem luarentša bēts osertánana tmojayana soyēnga tondaye yonduámanama. ²¹Bēngbe Bētsá, nŷets osertánana bomná quetsomñecá y puerte tšabá jtsejuabnayēse, ndoñe tonjanalesenciá quem luarentša entšanga cha chamotsábuatmama, chē quem luarentšēnga tša osertánēnga tmojánayana soyēngama. Chamna, cha tšabá tbojanínŷnana chábeñe ošbuáchiyēnga játsebacana chē bēnga fsēndabuayiyná soyēngama, masque ínŷēngbioyna mo ndoñe corente juabna bomnabe soycá jtsinŷanana.

²²Judiēnga tša jtsebošana y Bēngbe Bētsábioye jtsotjanañana bēts soyēnga chaomama, chabe obenana jinŷanŷiyama; y ndoñe judiēngna tša jtsenguayana chē puerte osertánēngbe soyēnga jtsetatšēmbuama. ²³Pero bēngna Cristbiana entšanga fsēndabuayiyná, chē ínŷenga tmojancrucificabiana. Quem buayénana chē judiēnga ndoñe tšabá ntjēuēnanana. Y ndoñe judiēnga mondbētsejuabnaye chca yomna mo canŷe ndoñe corente

juabna bomnabe soyca ca; ²⁴ pero bēngbiama, nyetscanga Bēngbe Bētsá chabe entsānga chamotsemnana šojáchembēngbiamna, masque judiēnga o ndoñe judiēnga, Crístbeñe endmēna nyets Bēngbe Bētsabe obenana y osertánana; ²⁵ er ndayá Bēngbe Bētsá tojanmcá, Crísto cruzoca chaóbanama jalesénciase, banga jtsinyanana mo canye ndoñe corente juabna bomnabe soyca, pero ndegombre endmēna canye puerte más osertaná tojama soye, lempe ntšamo entsānga imotatsēmbuama. Y ndayá cha tojamcá masque bāngbioye jtsinyanana mo canye tondaye obenabe soyca, ndegombre chē soye jtsinyanānyayana Bēngbe Bētsá puerte más obenana yobomnana, nyets obenana ntšamo entsānga imobomnana. ²⁶ Jesucristbeyeca atsbe catsátanga, šmochtsejuabnaye ntšamo yojamnama, Bēngbe Bētsá chabe entsānga chašmotsemnana tcmojánachembo ora. Tšēngaftangbentše nye bāseftanga tša osertánēnga šmojamna, ntšamo chē osertánana bomnēnga imomnana entsānga mondbetsejuabnaycá; y bāseftanga šmojamna becá mando atšetanēnga o uámana pamillentsēnga. ²⁷ Pero Bēngbe Bētsá, quem luarentše ndoñe tša osertánēnga tojanabacacá, chca, cha jamama chē quem luarentša soyēngama tša osertánēnga chamotsēuatjama; y cha, quem luarentše ndobenēnga tojanabacacá, chca, chē obenana bomnēnga chamotsēuatjama. ²⁸ Bēngbe Bētsá quem luarentšana tojanbocacá ndayá tondaye yonduamancá y ndayá ínյenga imuabotencá; tojanbocacá ndayá tondaye yonduamancá, chca, ndayá quem luarentše tša iuamancá tondaye chaondētsámanama. ²⁹ Y chca, Bēngbe Bētsabe delante ndocná quenátobena jayanana tša bētsá cha yomna ca. ³⁰ Bēngbe

Bētsá tojama bēnga Crístoftaca cānyīñe mo canycá jtsemñese chamotsiyenama, y chábeyeca tojama bēnga chamóyēngacñama chabe osertánana bomna soyēnga; chábeyeca tojama bēnga tšábēnga chabe bominyīñe chamotsemnana, chabe entsānga jtsemnana chamobenama, puerte tšábēnga cach Bēngbe Bētsacá, y atsebácanēnga chamotsemnana. ³¹ Y chca, ntšamo Bēngbe Bētsabe uabemana palabrēnguiñe endayancá: “Nda tojtseboše jayanama cha canye uamaná yomna ca, chamna más tšabá cha bontsemna jayanama Bēngbe Utabná puerte uamaná yomna ca.”

**Ntšamo Pablo Crísto
crucificanábiamna
chēnga tojanabuayená**

2 Pero, Jesucristbeyeca atsbe catsátanga, Bēngbe Bētsabe ndegombre soyēngama tšēngaftanga jábuayenama sēnjána ora, chca sēnjanma ndoñe chē uámanēngbe palabrēngaca, ni chē tša osertánēngbe palabrēngaca. ² Y tšēngaftangaftaca sēnjamna ora, ndoñe quetstétseboše nye ndayíñnaca jatsjuabnayana, ndayá nye Jesucristbeñe, nda bēngbe tšabiamna tmojancrucificá. ³ Atše tšēngaftangbeñe sēnjamna, mo canya ba soyēnga jamama ndobenacá, y mo canya puerte auatjacá y tbojtsengmēmnacá, chabe trabajo jamama ndoñe jobenayama juabnaye causa. ⁴ Ntšamo cbonjanētsēnsná y cbonjanabuayinacá atše sēnjanoyebuambá ndoñe chē tša osertánēngbe palabrēngaca, tšēngaftanga jáyēnjanama chiñe chašmotsošbuáchemá; pero aīñe tcbonjanayēnjaná, Bēngbe Bētsabe Espíritu y chabe obenana tšēngaftanga jinyanāyiyese, ⁵ chca, tšēngaftanga Bēngbe Bētsabeñe chašmotsošbuáchemá, ndoñe nye

entsangbe osertánaca, sinó Bèngbe Bètsabe obenanama.

**Uámana Espíritbeyeca, Bèngbe
Bètsá jamana entsanga cha
chamotsábuatmama**

⁶ Pero, chë ya tmojashjáchënga Bèngbe Bètsábeñe puerte jtsošbuáchiyama y chabe soyëngama corente jtsosertánama, chéngbeñe bënga fchandóyeuambaye beca osertánana bomna soyënga. Pero ndoñe quenátmëna quem luarentša entsanga quem tempo mondbétsichamo soyënga, ni mora quem luarentše amëndayëngbe soyënga, ndëmuanyënga ndoñe bën y ndocna obenana bomnënga mochanjëftsoquëda. ⁷ Y aíñe, chë bënga fsëndoyebuambná osertánana bomna soyënga endmëna chë Bèngbe Bètsá quem luarentša entsángbioye baytentscuana ndoñe tonjaninyanýé soyënga, y chca, entsanga baytentscuana chë soyënga ndoñe tmonjanábuatmana. Cha yojanjuabná chë soyënga chca yochtsanmënama, quem luare cabá cha ndëma ora, y yojanjuabná, chë soyëngaca bënga mochtsanobena puerte bëtsétsanga y uámanënga jtsemnana, cháftaca chë nyetsca tescama yomna tsabe vida jtsebomnama. ⁸ Quem Bèngbe Bètsabe puerte osertánana bomna soyënga endmëna canye soye ndayá quem luarentša amëndayënga ndoñe ntsësertánana, er chënga aíñe matënjanësértase, Bèngbe Utabnábioye chënga ndoñe matmënjancrucificá, Bèngbe Utabná nda puerte bëtsá y uamaná yomna. ⁹ Bèngbe Bètsabe uabemana palabrënguñe quem Bèngbe Bètsabe puerte osertánana bomna soyëngama mëntšá endayana: Cha imobobonshánëngbiama Bèngbe Bètsá tojaprontá soyënga,

ndocná tonjinýe, ni tonjouena y ni mo tonjajuabó ca.

¹⁰ Pero Bèngbe Bètsá quem soyënga chabe Espíritoftaca bënga šojanyanýé, er chë Espíritu lempe jtsetatsëmbuana, chë Bèngbe Bètsabe soyëngama puerte totcá josértama yomna soyëngámna.

¹¹ Entsángbeñe ndocná quenátobena jtsetatsëmbuana ndayá entsábe ainaniñe tomnana, sinó nýe chë entsábe espíritu, chë chábeñe yomná. Cachcá, nýe Bèngbe Bètsabe Espíritu jtsetatsëmbuana ndayá Bèngbe Bètsá tojuabnacá. ¹² Y bëngna, Bèngbe Bètsábiocana Espíritu tmojóyëngacñe, ndoñe canye quem luarentša espíritu, chca, bënga chašosertama chë Bèngbe Bètsá tojama bënga chamotsebomna soyëngama, bëngbe tsabiama cha jtsejuabnayëse. ¹³ Bënga chë soyëngama fsëndoyebuambná, ndoñe chë quem luarentša entsángbentsana tifjuatsjinýe osertánana bomna palabrëngaca, sinó chë Bèngbe Bètsabe Espíritu šojabuatambá palabrëngaca. Chca, Bèngbe Bètsábiocana soyëngama bënga fsëndabuayiyá, Bèngbe Bètsabe Espíritbentsana yóbocana palabrëngaca, chë Uámana Espíritu ainaniñe imobomnéngbioye.

¹⁴ Bèngbe Bètsabe Espíritu ndoñe tondbomná, chabe ainaniñe ndoñe ntjóyëngacñana chë Bèngbe Bètsabe Espíritbiocana yóbocana soyënga, er chë entsabiama chë soyënga jtsemnana mo canye ndoñe corente juabna bomnabe soyëngcá, y chabosertama cach ndoñe ntsobenana. Chca endmëna, er entsá jobenayana quem soyëngama jtsetatsëmbuama y josértama, nýe chabe ainaniñe chë Uámana Espíritu tbojtsájabuachanëse. ¹⁵ Pero nda aíñe chë Espíritu tbojtsebomna jtsoobenana nyetsca soyënga tsábá jinýama chabosertama, y ndocná chë Espíritu ndoñe tbondbomná ntsobenana josértana ntšamo chë Espíritu bomná yomnama. ¹⁶ Er Bèngbe Bètsabe

uabemana palabrënguine mëntšá endayana: “Ndocná quenátabuata Bëngbe Utabnabe juabna, chábioye jabuátëmbama chaotsobenama ca.” Pero bënga, chë ošbuáchiyënga, mondobena jajuaboyana ntšamo Cristo yujuabnacá.

Jatrabájama enutanánënga Bëngbe Bëtsá jasérvia

3 Pero, Jesucristbeyeca atšbe catšátanga, atše ndoñe chiyatanobená jóyebuambayama, mo tšëngaftanga chë Uámana Espíritoftaca mandánënga šmojatsmëncá, sinó nye cachënga tšabá jtsomñama juabnënga bomna entšangbioycá, mo basetemëngbioycá, Cristbe soyëngama josértama ndobenënga. ²Mo canye bebmacá, chabe basetémbioye nye létšiyë jafsiyana y paselo jabmuánama sananga, chë básetema chcana jasama cabá ndoñe ntobenana causa, cachcá, atše cbonjanabuatambá Bëngbe Bëtsabiama nye chë más paselo josértama soyëngama, y ndoñe inye soyënga más totcá josértama soyënga, er tšëngaftanga ndoñe quešmënjatobena chca soyëngama josértana. Y ni mora, tšëngaftanga quešmátobena Bëngbe Bëtsabe soyëngama josértana, chë josértama más totcá yomna soyëngama; ³er tšëngaftanga cabá šmojtsama, nye ntšamo cach tšëngaftanga tšabá jtsomñama tšëngaftangbe juabnënga yomncá. Y tšëngaftanga inyëngaftaca cabá yapa šmojtsenántšaboše y nye inyëngbioye jayénjanama soyënga šmojtsamëntscuana, tšëngaftanga šmojtsama nye ntšamo cach tšëngaftanga tšabá jtsomñama tšëngaftangbe juabnënga yomncá, y chca, tšëngaftanga šmojtsiyena mo chë nye quem luarama enójuabnaye entsangcá. ⁴Er canya: “Atše Páblëbe ustoná sëndmëna ca”, y inyana: “Atše

Apólosbe ustoná sëndmëna ca” tojayana ora, chca jtsamana mo chë nye quem luarama enójuabnaye entsangcá.

⁵Tšëngaftanga chca šmojamama, atše šontsemna tšëngaftanga jájtayana: ¿Ndayá Apolos yomna? ¿Ndayá Pablo? Chatna co nye Bëngbe Bëtsábioye oservénata bondmëna, ndátbeyeca tšëngaftanga Jesucristbeñe šmojtsosbuaché, y bëndata cada ona fsënjama chë Bëngbe Bëtsá šojanjanýe trabajo. ⁶Atšna, mo nda jajañe jénaye cuafjuatbontsacá, tšëngaftangbeñe sënjanbojatsé chë trabajo, Bëngbe Bëtsabe soyëngama jábuayenama; y Apolos, mo nda chë jajañe matënguine béjaye cuaftsebuešcñnacá, enjantrabája cach atše sënjanbojatsé chiñe; pero Bëngbe Bëtsá, ntšamo matatëmënga chauájuaama endbetsamcá, tojama banga tšëngaftanguentše Jesucristbeñe chamotsošbuáchema. ⁷Ntšamo,

chë jená y chë matënguine béjaye buešcñnayá ndoñe yapa ntsámanana chiñe shajuanënga chaóboचना, nye Bëngbe Bëtsá añe, cachcá, nda Bëngbe Bëtsabiama entšanga jábuayenama trabajo tojabojatsé y nda chentšana tojáshjango cach trabajuiñe jontšama, ndoñe ntjamana entšanga Jesucristbeñe chamotsošbuáchema; nye Bëngbe Bëtsá chca jamana. ⁸Chë jená y chë matiñe béjaye buešcñnayá cach trabajuiñe jtsentšënanana, y chatna mo trabajayatcá jtsámanana; y cada ona juacánana ntšamo chabe trabajo tomncá.

⁹Bëndata fsëndmëna trabájayata Bëngbe Bëtsabiama oservéniñe, y tšëngaftanga šmondmëna mo Bëngbe Bëtsabe jajañcá, ndayentše cha yojtseboše tšabe jaja saná chaóboचना, y šmondmëna mo chë cha yojtsejebuana bëts yebncá. ¹⁰Er Bëngbe Bëtsá atšbe tšabiama jtsejuabnayëse, chë trabajo šojabonýe, y atše mo canye puerte tšabe jebuanacá, canye yebna ndayiñe

chaotsécuatjonama tojapormacá, sēnjanbojatsé chē trabajo, Bēngbe Bētsabe soyēngama tšēngaftangbeñe jábuayenama. Chentšana inya, mo chē inye yebna jebuaná tojabojatsé jajebuama chiñe más jatsjebuama nda tojatontšecá, cach atše sēnjanbojatsé trabajuñe tojanontšé. Pero cada ona botamana chaotsantješna ntšamo chē trabajo yojtsamama. ¹¹ Mo chē cānyabentšana inye trabajayacá, ndoñe ntsobenana chē yebna jajebuama tojanbojatsé cha chē yebna chaotsécuatjonama tojanpormañe inye soye cachcá chaoservema jatspórmana, cachcá, ndocná chaondětsabatambá inye soyēnga, nye ntšamo Jesucristbe soyēnga yomncá añe, chē ntšamo atše natsana sēnjanabatambacá. ¹² Chē Jesucristbiama más uámana soyēnga buatēmbayá jtsemnana mo chē castellano, midio y inye uámana soyēngaca yebna jebuanacá; y chē Jesucristbiama nye nduámana soyēnga buatēmbayana mo chē niñebenga, butsjáshsha y tēshenjñesheca yebna jebuanacá. ¹³ Y Cristo chaojésabo te, Bēngbe Bētsá echanjínyanñiye ntšamo cada cānyabe trabajo yomnama. Cha chē te ñeshheca chca echanjínyanñiye, y chē ñeshheca, Bēngbe Bētsá echanjinñe y echanjínyanñiye ndaye trabajo cada ona tojamama. ¹⁴ Ntšamo cada cānyabe trabajo yojtsámanama jtsetatšēmbuama Bēngbe Bētsá chaojinñe ora, cha chabe trabajo añe yojtsámama ca queojayanese, chē tšabe trabajayá Bēngbe Bētsábiocana canye uacanana soye echanjójyēngacñe, er cha jtsemnana mo canye entšacá, nda canye yebna tojtsejebuana jtsejuinjama ndoñe paselo tondmēna soyēngaca. ¹⁵ Pero chē te cānyabe trabajo nye batšá yojtsámanama Bēngbe Bētsá ñeshheca chaojinñanñese, chora chabe trabajo echántsemna mo chē jtsejuinjama

paselo tomna soyēngaca jebuanabe soyēngcá, chentšana nyets yebna jtsejuinjama. Chē jebuaná jtsachana, pero chabe trabajo lempe jobuētšana. Cachcá, chē Bēngbe Bētsabiama trabajo tojtsamá, nye batšá oservena trabajo, cha echanjobenaye atsbocaná jtsemnana, masque lempe ntšamo tojamcá tondaye queochaisoquēda.

¹⁶ ¿O tšēngaftanga ndoñe šmondétatšēmbo nyetscanga cānyñe Jesucristbeñe ošbuachiyēngcá, mo chē Bēngbe Bētsabe bēts yebncá šmommama, y tšēngaftanguentše Bēngbe Bētsabe Espiritu yomnama? ¹⁷ Nderado nda tojama, tšēngaftanga nyetscanga cānyñe Jesucristbeñe ošbuachiyēngcá jtsemnana chaotsopochocama, Bēngbe Bētsá chábioye bochantsepochóca, er chē Jesucristbeñe ošbuachiyēngcá cānyñe imomnēnga, jtsemnana mo chē Bēngbe Bētsabe bēts yebncá, chabe entšanga nye chábioye jaserviama; y tšēngaftanga chca šmondmēna.

¹⁸ Ndocná cachá chaondětsenoingña. Nderado nda tšēngaftanguentšá tojtsejuabná cha tša osertaná yomna ca, ntšamo quem luarentša entšanga mond-bětsejuabnaye ntšamo canye puerta osertaná inētsemnana, cha bontsemna jóbemama mo canya ndabiama quem luarentša entšanga chamuayana cha corente juabna ndbomná yomna ca, chca, ndegombre corente osertaná jtsemnana chaobenama. ¹⁹ Er chē quem luarentša entšanga tša osertánēnga imotátšēmbo soyēnga, Bēngbe Bētsabe bominñiñe yomna mo chē corente juabna ndbomnabe soycá. Bēngbe Bētsabe uabemana palabrenguñe mēntšá endayana: “Bēngbe Bētsá chē tša osertánēnga jáyēnjanana, ndayá cachēnga ínñēnga jáingñama tša osertánánaca tmojtsama soyēngaca ca.” ²⁰ Y mēntšánaca endayana: “Bēngbe Utabná endétatšēmbo

chë tša osertánëngbe juabnënga tondayama yondoservënama ca.”²¹ Chíyeca, ndocná chaondétsichamo corente uamaná yomna ca, ndaye entšabe ustoná tomnama, er lempe ntšamo šmobomncá, Crístbeñe ošbuáchiyënga bétsemnama, tšëngaftangbe tšabiama endmëna, y nyëtscanga chë tcmojujabuachëngnaca cachá. ²²Lempe tšëngaftangbe soye endëtsoñe: ndayá Páblëbeyeca yomncá, Apólosbeyeca, Pédrëbeyeca, ndayá quem luarentše yomncá, ndayá yomncá ainá tcojtsemna ora, tcojóšana ora, ndayá mora yomncá y chë más chcoye yochtsemncánaca. ²³Y tšëngaftanga Crístbënga šmondmëna, y Cristna Bëngbe Bëtsábia.

Jesucristbe ichmónëngbe trabajo

4 Entšanga entsamna bëngbiama jtsejuabnayana bënga fstsemna Cristbe uajabuáchanënga y Bëngbe Bëtsabe soyëngama jtsabuátambayama trabajo bomnënga, chë Bëngbe Bëtsá baytentscuana entšángbioye ndoñe tonjaninyañé, pero mora añe tojininyañé soyënga jtsabuátambayama trabajo bomnënga. ²Chca, nda canye trabajo tojtsebojanýabiamna, chabe mandayá jtsobátmanana cha añe tšabe palabra bomná chaotsemnama. ³Atšbe bariëna, tondaye quenátamana, ntšamo tijamcá šmojinýe y ndoñe tšabá tijama ca šmojoyanëse, o inýe entšanga cachá tmojoyanëse mo canye tribunaliñcá. Ni cach atše ndoñe chca quetsátama, jtsetatšëmbuana ntšamo atšbe trabajuama tijayancá ndegombre tayojtsemnama. ⁴Atšbe ainaniñe ndocna juabna quetsátsbomna atše chašuyanama bacna soye tijama ca, pero chca ndoñe quenátayana, ndegombre Bëngbe Bëtsabe delante ndocna bacna soye ndbomná atše stsemna ca. Er Bëngbe Utabná endmëna

nda atšbe trabajo yonýa y nda ndegombre yobena jayanama atše tšabá o ndoñe tšabá tijamama. ⁵Chíyeca, tšëngaftanga ndoñe quecmátamna jinýana y jayanana ínýenga ndoñe tšabá tmonjama ca, chë nýa chama tempo cabá ndóshjanguëntscuana, Bëngbe Utabná chama chaójésabo ora. Cha chaójésabo ora, puerta tšabá echanjñyanýiye chë iytëmcá yomna soyëngama, mo ibetiñe cuaftsemncá, y botamana echanjñyanýiye, mo binýniñcá, ndayá jamama nýe chëngbe ainanoca entšanga tmojajuabocá. Y chora Bëngbe Bëtsá cada entšabiama echanjayana tšabe soyënga, ntšamo tbojtsomerecencá.

⁶Jesucristbeyeca atšbe catšátanga, chë soyëngama tšabá jábuayenamna, atše sënjama ntšamo Apolos y atše tifjatrabájama botamana chašminýama, y chca sënjama tšëngaftangbe tšabiama, ntšamo bëndata tifjamentšana chašmuatsjínýama jtsiyenana nýe ntšamo Bëngbe Bëtsabe uabemana palabrënguiñe iuayancá, y ndocná tšëngaftanguentsá canye entšabiama chaotsenábotamnaye, y ínýabiamna ndoñe tšabá chauátoyebuambnama. ⁷Er, ¿nda chë ínýengbiama más uámanënga tšëngaftanga cmojtsabi-amná? ¿Y ndayá šmobomna, Bëngbe Bëtsá ndoñe tcmonjatšatá soye? Y tšëngaftanga chca chašmotsebomnama cha tojanmëse, ¿ndáyeca šmojtsebotamná mo Bëngbe Bëtsabe tšetana soyënga ndoñe tontsemncá, y nýe cach tšëngaftangbeyeca šmojonýencá?

⁸Tšëngaftanga šmojtsejuabná ya lempe ntšamo cmëjbotcá Bëngbe Bëtsábíocana šmojtsebotamna ca, y lempe ntšamo jtsebošama šmojtsebotamncá ca. Mo reyënga cuaftsemnëngcá cmojtsabiona, béngbentsana tondaye ntsëjbotcá. Malaye tšëngaftanga mo reyëngcá šmojtsemna, Crístoftaca

cányiñe jtsemándayëse; chca, béngnaca tsëngaftangaftaca jtsemnama, cányiñe jtsemándayëse. ⁹Atše šontsinýana, bënga chë Cristbe ichmónënga Bëngbe Bëtsá šojábiana mo chë nyetscangbiana más nduamanëngcá, mo chë jóbana mo vojtsamna entsangcá. Nyetscanga chë Bëngbe Bëtsá tojábiamënga béngbioye jtsénýana mo ndoñe cachca entsanga fstsemncá; angelënga y entsángnaca cachcá béngaftaca montsama. ¹⁰Bënga, Cristbiana oservena causa, quem luarentša entsangbiana fsëntsinýna mo corente juabna ndbomnëngcá; chë cuenta, tsëngaftanga šmojtsejuabná Cristbe soyëngama corente osertánënga šmomna ca. Bënga fsëndmëna chë entsangbe bominiñe ndocna obenana ndbomnënga; y tsëngaftangna šmojtsejuabná puerte obenana bomnënga šmomna ca. Tsëngaftangbioye ínýenga puerte uámanënga y bëtsétsanga jtsabiamnayana, pero chënga béngbioye jtsébuayënjana. ¹¹Y méntscoñama, bënga šontsabuashëbebiana saná, ndayá jofšiyama y entsáyá. Entšanga béngbioye bacá jtsaborlánana, y tondaye yebna queftsátsbomna. ¹²Y bënga puerte jabuache fsëndëtrabája cach bëngbe cucuatšëngaca. Entšanga šojóyanguango ora, Bëngbe Bëtsá fchandbëtseimpadana cha chaoma chënga tsabe bendicionënga chamotsebomnama. Bënga chamosufrima ínýenga tmojtsama ora, bënga chë soye fchandbëtsoboyaye. ¹³Inýenga bëngbiana bacá tmojtsoyebuambná ora, jtsababuánýeshanëse fsënduamana jtëjuana. Quem luarentša entsangbe bominiñe bënga jtsemnana chë puerte nduámanënga, mo chë quem luarentša basurëshëngcá, chë quem luarentša entsanga tondayama ndoservënënga, mo chë quem luarentša tsengacá; y chca endmëna méntscoñama.

¹⁴Quem soyënga ndoñe quecbatëbuabiamná tsëngaftanga chašmotsëuatjama, sinó ndayá jábuayenama mo cach atšbe basengbioycá, atšbe bonshánënga. ¹⁵Er masque tsëngaftanga mallajta abuátambayënga chašmotsóbomñe, jacúntama ntjobenaycá, Cristbiana chacmotsabuátambama, ndoñe banga quešmátabamna tsëngaftangbiana mo taitangcá, Cristo Jesúsbeñe jtsošbuáchiyama tcmojanëjabuachama. Nýe atše sëndmëna mo taitacá tsëngaftangbiana, mo ošbuachiyëngcá, er atše natsana tcbonjanabuayená chë tsabe noticiënga Jesucristbiana, y tsëngaftanga chiñe šmontsanošbuachë. ¹⁶Chíyëcna, cbontsaimpadana ntšamo atše tijamcá chašmotsamama.

¹⁷Chama Timoteo tsëngaftangbioye sentsichamná, atšbe bonshaná, canýe añe tsabe palabra bomná; Bëngbe Utabnábeñe tojanošbuachéyëca, atše Cristbiana sënjanbuayiyiná ora, mo atšbe uaquiñacánaca cha endmëna, ntšamo chabe ošbuáchiyana yomnama. Cha echanjama tsëngaftanga chašmuatenójuaboma ntšamo atše tsëngaftangbeñe tsjoyenama, Cristbeñe ošbuachiyacá, ndayama atše nyets tempo ošbuáchiyënga sëndbetsabatambaycá nyets luare ošbuáchiyënga enefjuanenache. ¹⁸Tsëngaftanguentšë báseftanga ya šmojatsjuabná puerte uámanënga šmojtsemna ca, er šmojtsejuabná atše stsauatja tsëngaftangbioye jama jányama ca. ¹⁹Pero Bëngbe Bëtsá chašojalesenciase, sëntsobátmana betesco tsëngaftangbioye jama jányama. As chjinýe ntsache obenana imobomna chë Bëngbe Bëtsabe entsangcá jtsiyenama tsá uámanënga imomna ca juabnayënga, y ndoñe nýe ntšamo jayanama imobencá. ²⁰Er Bëngbe Bëtsá canýe ošbuachiyabe ainaniñe

tojtsemánda ora, chca jtsinýnana ndoñe nýe ntšamo tojtsichámuama, ndayá Bèngbe Bètsabe obenana chábeñe tojtsemnama. ²¹ ¿Tšèngaftanga ndayá más šmattseboše: atše chayá tšèngaftangbioye jaucácanama, o chayá tšèngaftangbioye jányama puerte bonshanánaca y ntsetšatjaycá tšèngaftanga jauyanama?

Ndayá cuanjama canýe boyabása shembásaftaca bacna soye amáftaca

5 Ndegombre nýets luaríñe entsótatšëmbo tšèngaftanguentše yojtsemna canýa, shembásaftaca bacna soye amá, y ntšamo cha yojtsamcá puerte bacna soye yojtsemna; ni chë Bèngbe Bètsábioye nduabuátmènga chca ntsamana: canýe entsá cachabe mamamnáftaca bacna soye yojtsama. ²Y tšèngaftanga cabá šmojatsjuabná corente tšábenga šmomna ca, masque chca tšèngaftangbeñe yojtsopasánese. Tšèngaftanga cmontsamna puerte ngménaca jtsemnana, tša uabouana soye cha yojtsama causa. Canýe entsá chca tojamáftacna, tšèngaftanga cmontsamna jamana cha ndoñe más tšèngaftangaftaca chaondenútanama mo ošbuachiyacá. ³Y atšna, masque tšèngaftangaftaca choca ndoñe quetsátmèna, atšbe juabna choca tšèngaftangaftaca entsemna; y chca atšbe espíritoca séntsemnayeca, Bèngbe Utabná šojéftsanatšetá mándoca, sènjajuabó y séntsetatšëmbo ntšamo tšèngaftanga cmojtsamnama, chë entsá chca tojamáftaca. ⁴Tšèngaftanga chašmojënefna ora, chentše atšbe espíritoca tšèngaftangaftaca atše chántsemna, y atšbe espíritu chentše echántsemna Bèngbe Utabná Jesusbe obenánaca. ⁵Y chora tšèngaftanga cmontsamna jamándana chë entsá ya ndoñe más tšèngaftangaftaca mo ošbuachiyacá chaondenútanama,

mo Satanasbe cucuatšíñe cha cuafjaboshjoncá, chca, chë quem entsá nýe cachá tšabá jtsomñama juabnènga chaotsopochocama, y chca, Bèngbe Utabná cachiñe chaojésabo ora, chabe espíritu atsbočaná chaotsemnama.

⁶Tšèngaftanga šmojtsejuabná puerte tšábenga y uámanènga šmomna ca, pero šmojtseleséncia canýa tšèngaftanguentše chca chaotsamama. Chca ndoñe tšabá quenátsmèna. Tšèngaftanga ya šmondétatšëmbo, ntšamo chë nýe batšá levadura endbama, nýets arninýa chauábochema; cachcá, tšèngaftanguentše canýa tša bacna soye chca tojama ora, nýetscangbiama ndoñe tšabe soyènga jóbocnana. ⁷Chíyeca, tšèngaftanga cmontsamna, chca uabouana bacna soye tojamá jtabocnana, cha ya ndoñe más tšèngaftangaftaca mo ošbuachiyacá chaondenútanama; y chora tšèngaftanga šmochántsemna mo tsèm arninýacá, ndocna levadúraca, chë bacna juabnéngaca ya ndèmandánènga šmojtsémnayeca.

Ndegombre tšèngaftanga chca šmondmèna, er Bèngbe Bètsá tojama tšèngaftanga tsèm vida chašmotsebomnama. Bashco fiesta ora, oveshá tmojanóba, Israeloca entsanga perdonánènga chamotsemnama. Cachcá Cristo, mo chë oveshacá, tojanóbana bacna soyènguentšana bènga játsebacama. ⁸Ntšamo chë judiènga chë fiesta ora mondbamcá, nýets levadura ojamnana cachcá jonýayana, cachcá, bènga šontsamna jtsajbanana oyenana bacna soyènga ínýengbiama jamama jtsebošese, y ndaye bacna soye jtsamese, ntšamo tempo imojanamcá. Ntšamo chë judiènga chë fiestiñe nýe levadúraca ndèpormana tandèše mondbetsesaycá, cachcá, bènga šontsamna jtsiyenana nýetsca soyènga ainaniñe ndocna

bacna juábnaca jtsamëse, y ndegombre yomncá jtsóyebuambnayëse y jtsamëse.

⁹Chë inye atšbe tsbuanáchañe tcbon-jáuyana, chë boyabása o shembásaftaca bacna soye améngaftaca tondayama chašmondëtsencuénta ca. ¹⁰Y chca ndoñe quetstétseboše jáuyanana nya tondayama chašmondëtsoyebuambná nyetsca chë quem luarentšënga boyabása o shembásaftaca bacna soye améngaftaca, chë nye cachëngbiama bëtscá soyënga jtsebmnama tša bošëngaftaca y atbëbanéngaftaca, y chë cachëngbe pormana soyënga diosënga yomnama jtsejuabnayëse adorayéngaftaca ca; er nya chca jamamna, tšëngaftanga cmattsamna quem luarentšana jéftsebocanana.

¹¹Ntšamo chora sënjanayancá endmëna ndayá tondayama ntscuéntayana, chë Crístbeñe ošbuachiyá yomna ca tojayanáftaca, y boyabása o shembásaftaca bacna soye tojtsama, o nda nye cachabiama bëtscá soyënga jtsebmnama tša tojtseboše, o chë cachabe pormana soyënga diosënga yomnama jtsejuabnayëse tojtsadorana, o yapa tojtsayatsená, o yapa tojtsetmó, o tojtsatbëbana. Chca entšángaftacna, ni mo šmuatjót'bema chéngaftaca cányiñe jasama. ¹²⁻¹³Atše ndoñe quešnátsmëna jayanana chë ndošbuáchiyënga, chë bëngaftaca ndoñe mondbénutananga, añe o ndoñe tšabá tmonjamama. Bëngbe Bëtsá echántsemna nda chëngbiama yochjayana ntšamo tmojamcá tšabá o ndoñe tšabá bëtsemnama, tšëngaftanga ndoñe. Ndegombre nye chë ošbuáchiyënga tšëngaftangftaca inménutanangbiama cmontsamna chca jayanana. Chcasna, šmochjama ntšamo Bëngbe Bëtsabe uabemana palabrënguiñe endayancá: “Tšëngaftanga cmontsamna, chca bacna soye amá tšëngaftangbentšana jtabocnana ca.”

Ošbuáchiyënga jendemándama tojtsemna ora

6 Canye tšëngaftanguentša ošbuachiyá inye ošbuachiyabiama canye demanda tojtsebmna ora, ¿cha nanjá chë ndošbuáchiyënga mandadéngbioye chë soye chamojandmanama? ¿Ndáyeca chca nanjama, y ndoñe chë Bëngbe Bëtsabe entšángbioye nanjá chabe demanda chamouenama? ²Tšëngaftanga ndegombre šmondétatšëmbo, Bëngbe Bëtsabe entšanga mochjayanama quem luarentša entšangbiama tšabá o ndoñe tšabá tmonjamama. Y chënga quem luarentša entšangbiama chca jayanama tmojtsobenëse, ¿ndoñe montsobena más base soyëngama chca jayanama? ³Tšëngaftanga ndegombre šmondétatšëmbo chë angelëngbiámnaca tšabá o ndoñe tšabá tmonjamama bënga mochjayanama. Chcasna, bënga más jtsobenana chë quem luarentše jéftsiyenama soyëngama chca játayanana. ⁴Y chcase, tšëngaftangbeñe chca demandënga chë quem luarentše jéftsiyenama soyëngama tojtsemna ora, ¿ndáyeca šmatjátëbuayana chë ošbuáchiyëngbiama tondaye tmontsámama entšanga, chë soyënga chamojandmanama? ⁵Chca sënjayana tšëngaftanga chašmotsëuatjama: ¿O tšëngaftanguentše ni mo canya yondmëna corente osertaná, ošbuachiyëngbeñe demandënga chaojandmanama? ⁶Pero ndoñe chca: ošbuachiyëngbeñe demandënga tojtsemna ora, mandadéngbioye jana chë soyënga chamojandmanama. Y chca jamana ndošbuáchiyënga mandadéngaftaca.

⁷Y tšëngaftangbeñe nye demandënga jájandmanama tojtsemna ora, tšëngaftangbiama ya canye puerte bacna soye jtsemnana. ¿Ndáyeca

ndoñe šmattsóboyaye ínÿenga bacá cmojtsaborlana ora? ¿Ndáyeca ndoñe cachcá šmatjonÿaye ínÿenga cmojtsabiatbēbanana ora? ⁸ Pero cach tšēngaftangacna ínÿetsá copasana, ínÿēngbioye bacá jtsaborlánana y jtsabiatbēbanana, y tšēngaftangcá Crístbeñe ošbuachiyēngbioynaca.

⁹ ¿Tšēngaftanga ndoñe šmondétatšēmo, chē bacna soye amēnga Bēngbe Bētsabe amēndayoye ndoñe mochanjámashēnguama? Ndoñe matenoingñana. Ni chē boyabása o shembásaftaca bacna soye amēnga, ni chē cachēngbe pormana soyēnga diosēnga yomna ca jtsejuabnayēse adórayēnga, ni cachēngbe boyá o shema ínÿaftaca ingñayēnga, ni chē boyabásenga mo shembasengcá jtsinÿnama bošēnga, ni chē boyabásenga ínÿe boyabásengaftaca bacna soye amēnga, ¹⁰ ni chē atbēbanēnga, ni chē ñÿe cachēngbiama bētscá soyēnga jtsebomnama tša bošēnga, ni chē tša tmoyēnga, ni chē uayátsenayēnga, ni chē ínÿēngbiama bacna soye jtsamēse imnétsatbēbanēnga, chēnga ñÿetscanga ndoñe quemochatobenaye Bēngbe Bētsabe amēndayoye jamashjnama. ¹¹ Y tempo báseftanga tšēngaftanguentšēnga chca šmojamna, pero Bēngbe Bētsá tšēngaftangbe bacna soyēngama tcmojaperdoná, y chca entsemna mo bebēnēnga cuaftsemncá; cha tojama tšēngaftanga chabe entšanga chašmotsemnama, ñÿe cha chašmotseservénama, y tojama tšēngaftanga mo tšabengcá chabe bominÿiñe chašmotsemnama. Lempe chca Bēngbe Bētsá, tojama ndayá Bēngbe Utabná Jesucristo tojanmama y ndayá Bēngbe Bētsabe Espiritu tojamama.

Bēngbe cuerpo chaotsemna Bēngbe Utabná jtseservénama

¹² Mondbētsichamo: “Atšbiama entselesenciana ndayánaca jamama, ndayama Bēngbe Bētsá ndocá tonjayana ca.” Pero básefta soyēnga jtsamana ndoñe atšbe tšabiama ntsemnana. “Atšbiama entselesenciana ndayánaca jamama ca”, pero ndoñe quichatslesencia ndaye sóyecna ñÿets tempo mandaná jatsmēnana. ¹³ Mēntšánaca mondbētsichamo: “Saná uafsbiama y uafsbiá saná chaóyēngacñama ca.” Pero Bēngbe Bētsá canÿe te echanjama chē uta soye chaotsopochocama. Bēngbe Bētsá entšabiama cuerpo ndoñe tonjanma, boyabása o shembásaftaca bacna soye cha chaotsamama, sinó chē cuérpoca Bēngbe Utabná bēnga chamoservema, y Bēngbe Utabná bēngbiama tšabe bendicionēnga chaotsamama. ¹⁴ Y Bēngbe Bētsá, nda tojama Bēngbe Utabná cháuatayenama, bēngbiámna chabe obenánaca echanjama chámuatayenama.

¹⁵ ¿Tšēngaftanga ndoñe šmondétatšēmo, Crístoftaca cánÿiñe mo canÿacá šmomnama yomna mo tšēngaftangbe cuerpo chabe cuerpentša soye cuaftsemncá? Tšēngaftangbe cuerpo Crístbioye jaserviama endménayeca, tšēngaftangbe cuerpo jtsemnana mo Cristbe cuerpentša soycá. ¿Ntšamo atše chjátobena atšbe cuérpoca, chē ndayá yomna mo Cristbe cuerpentša soycá, canÿe bacna vida bomna shembásaftaca bacna soye jamana, y chca atšbe cuerpo jabe mana mo chē shembásabe cuerpentša soye cuaftsemncá? ¡Ndoñe, ndegombre ndoñe! ¹⁶ ¿O tšēngaftanga ndoñe šmondétatšēmo, canÿe entšá canÿe bacna vida bomna shembásaftaca tbojéninÿena ora, chē útata jóbemana mo canÿacá? Er Bēngbe Bētsabe uabem-

ana palabrënguine boyabása y shembása tbojéninyenama mëntśá endayana: “Chë útata mo canýacá bochantsema ca.”¹⁷ Pero canýe entśá Bëngbe Utabnáf-taca cánýiñe mo canýacá tojtsemna ora, jtsemnana mo chë útata cach canýe espíritu tbojtsebmncá.

¹⁸Nya ndocna te canýe boyabása o shembásaftaca bacna soyënga šmattsama. Nderado ndaye inýe bacna sóynaca nda tojama ora, sempre jamana ndayánaca chabe cuerpentšana shjoye; pero boyabása o shembásaftaca bacna soye jamamna, lempe jamana nýe cachabe cuérpoca, y chë causa, chca jamëse, cachabe cuerpama más bacna soyënga jtsamana.¹⁹ ¿Tšëngaftanga ndoñe šmondétatšëmbo tšëngaftangbe cuerpo yomna mo canýe yebncá Uámana Espíritbiana, cha tšëngaftangbe ainaniñe chaotsiyenama Bëngbe Bëtsá tojánmayeca? Ndegombre tšëngaftangbe cuerpo ndoñe tšëngaftangbe soye quenátsmëna, sinó Bëngbe Bëtsabe soye.²⁰ Chca endmëna, er Cristo bënga játsebacama tojanóbana ora, yojamna mo cha bëtsćá cuafjopagacá tšëngaftanga Bëngbe Bëtsábenga chašmotsemnana. Chíyeca, chë tšëngaftangbe cuerpëngaca chašmojt sama soyëngaca šmochtsinýanýnaye Bëngbe Bëtsá puerte uamaná y bëtsá bëtsemnana.

Jobouamayama jábuayenama

7 Mora chanjóyebuambaye ndayá tšëngaftanga átšbioye šmojuábobemama. Ndegombre, canýe boyabásabiama más tšabá endmëna ndoñe chaondobouamá.² Pero choca banga boyabása o shembásaftaca bacna soye amënga imojtsemna causa, tšabá entsemna cada boyabása chabe shema chabotsóbomñe, y cada shembása chabe boyá.³ Boyábioye bontsemna jamana

chabe shembiana lempe ntšamo jamama ibomncá, boyá bëtsemnana; y chabe shëmnaca cachćá chabe boyabiama chaoma.⁴ Chë shembe cuerpo ndoñe nýe cha cánýabiama ntsemnana, sinó chabe boyabiámncana. Cachćá, chë boyabe cuerpo ndoñe nýe cha cánýabiama ntsemnana, sinó chabe shembíámncana.⁵ Ni boyá, ni shema ndoñe chabondëtsejuabná jtsebiátšbuana. Añie chca copodena, pero nýe chë útata chca básefta tescama tbojenóyeunase, Bëngbe Bëtsáf-taca jencuéntama jtsentšënama. Pero chentšana chë útata entsamna cachiñe cánýiñe jtëtsmënana, chca, Satanás ndoñe chaondobená jamama bacna soye chaócochënguama, cachënga jenomándama ndoñe tmontsobena causa.

⁶ Atše chca séntšichamo, tšëngaftanga jábuayenama, ndayá jamama šmojtselesenciana, y chca ndoñe chašmondët-samama jamëndama.⁷ Y atšbe bar-iëna, atšbe juabna entsemna malaye nyetscanga chë soyënguine mo atšćá šmattsemna. Pero Bëngbe Bëtsá cada ona obenana tbojatšetá tšabe soyënga jamama, Crístbeñe ošbuáchiyënga ju-jabuáchama, ínýenga canýe soyama, ínýengna inýe soyama.

⁸ Chë cabá ndbouamnënga y viudanga séntšëtsëtsná, chëngbiana tšabá yojtsemna ntjobouamayćá joquédana, atšćá.⁹ Pero chca jtsemnana cachënga jenomándama ndoñe tmontsobenëse, chënga entsamna jtsóbouamayana, er más tšabá endmëna jtsóbouamayana, y ndoñe nýe boyabásabiama o shembásabiama tša nyets tempo jésejuabnayana.

¹⁰ Pero chë bouamnënga séntšamëndana shema chabe boyábioye ndoñe cachćá chabondetsonýá. Chca ndoñe nýe atše quetsatamëndana, ndayá cach Bëngbe Utabná.¹¹ Pero, shema cachćá chabe

boyábioye tbojesonÿase, cha bontsemna ntjobouamaycá jtsomñana o chabe boyáftaca cachiñe jtenútanana. Y cachcá, chë boyá ndoñe quebnátsmëna chabe shema cachcá jesonÿayana.

¹²Chë ínÿenga chjáuyana, atšbe juabncá y ndoñe Bëngbe Utabnabe soycá, nderado canÿe ošbuachiyá tbojtsebomna canÿe shema Crístbeñe ndošbuachiyá, pero chë shema tojtseboše cháftaca joquédana jtsiyenama, cha chë shémbioye ndoñe cachcá chabondetsonÿá. ¹³Nderado canÿe ošbuachiyá tbojtsebomna canÿe boyá Crístbeñe ndošbuachiyá, pero chë boyá tojtseboše cháftaca joquédana jtsiyenama, chë shema ndoñe chaondëtsejuabná cha cachcá jesonÿayana. ¹⁴Er Bëngbe Bëtsá tojama, canÿe shembása ošbuachiyá chabe entšá chaotsemnana, nÿe chábioye chabotseservénama, y chca, chánaca jtsejuabnayana chë shembásabe boyá Crístbeñe ndošbuáchiyabiamama mo chabiamama oservena entšacá, cha chéngbeñe mo canÿe pamillécá jatrabájama tojtseboše ora; y cachcá, chë boyá ošbuachiyábeyeca Bëngbe Bëtsá jtsejuabnayana chabe shema Crístbeñe ndošbuáchiyabiamama mo chabiamama oservena entšacá, cha chéngbeñe mo canÿe pamillécá jatrabájama tojtseboše ora. Er chca ndoñe tontsemnëse, chë básenga muántsemna ndošbuachiyatbe básenga, Bëngbe Bëtsáftaca tondaye ndbomnënga. Ndoñe chca yondménayeca, canÿa o nÿets uta bëtsétsatbe ošbuáchiyama, Bëngbe Bëtsá jtsejuabnayana chë básengbiama mo chabe entšangcá. ¹⁵Pero chë boyá o shema Crístbeñe ndošbuachiyá cachcá jtsenónÿayama tša tojtsebošëse, chca chaboma. Chora, chë ošbuachiyá ndoñe ntsotocánana chë ínÿaftaca cachiñe jtëtenútanama, er Bëngbe Bëtsá tcmojáchembo natjémbana

chašmotsiyenama. ¹⁶Chca šmochjama, er aca shema ŷntšamo cattsetátšëmbo, tacuatjobenaye acbe boyá jayénjanana Crístbeñe chaotsošbuáchemama, y chca, atsbočaná chaotsemnana? o aca boyá ŷntšamo cattsetátšëmbo, tacuatjobenaye acbe shema jayénjanana Crístbeñe chaotsošbuáchemama, y chca, atsbočaná chaotsemnana?

¹⁷Masque ntšámnaca, cada ona chaotsiyena jtsamëse ntšamo chë Bëngbe Utabná tbojatšetá obenana yomncá, cada ona ndayá jamama Bëngbe Bëtsá tbojachembcá. Chca atše nÿets luare ošbuáchiyënga enefjuanenache sëndbëtsamëndaye.

¹⁸Nderado Bëngbe Bëtsá cánÿabioye tbojachembo, y cha ínÿengbeyeca chë más delicadentšë base bobachtema tëtšená tojtsemna, ntšamo chë judiënga monduamancá, cha ndoñe chaondëtšenobiamná mo ndoñe judío cuafjatsmëncá; y nderado Bëngbe Bëtsá cánÿabioye tbojachembo, y cha ndoñe chca tëtšená tontsemnëse, cha ndoñe chaondëtsejuabná tëtšená jatsmënanama, ntšamo chë judiënga monduamancá. ¹⁹Er ndayá iuámama, ndoñe quenátsmëna chca tëtšená jtsemnana o ndoñe, ndayá ntšamo Bëngbe Bëtsá yomandacá jtsamana. ²⁰Cada ona bontsemna jtsiyenana, ntšamo vojjoyencá, chabe entšá chaotsemnana Bëngbe Bëtsá tbojanchembo ora. ²¹Bëngbe Bëtsá tcmojanchembo ora, nÿets tempo ínÿabiamama oservená cojamnëse, chama ndoñe cattsenócochinÿena. Pero nderado tojtsemna ntšámose jashjáchama ndoñe más chca ntsemnana, cach acbiama jatrabájama, as chca cochjama. ²²Er chë nÿe ínÿabiamama nÿets tempo oservená yojamná, Bëngbe Bëtsá chabe entšá chaotsemnana tbojanchembo ora, cha mora ošbuachiyacá, jtsemnana canÿa

ya ndoñe más bacna soyënga jamama juabnéngaca mandaná, sinó Bëngbe Utabnabiama oservená. Cachcá, chë nÿe cachabiama trabajayá yojamná, Bëngbe Bëtsá tbojanchembo ora, mora cha nÿets tempo Cristbe oservená jtsemnana. ²³Cristo bëngbiama tojanóbana ora, yojamna mo cha bëtscá cuafjopagacá, bënga Bëngbe Bëtsabe entsànga chamotsemnana. Ndoñe šmatjaleséncia nÿe entsàngbe juabnéngaca nÿets tempo mandánënga chašmotsemnana, y Bëngbe Bëtsabiama chacmotsebnétjomba. ²⁴Chcasna, Jesucristbeyeca atšbe catsátanga, cada ona bontsemna Bëngbe Bëtsáftaca jtšiyenana, ntšamo yojoyencá Bëngbe Bëtsá tbojanchembo ora.

²⁵Y chë ndébouamna shembásengbiama, chënga aïñe o ndoñe yontsamna jobouamayamna, atše chama ndoñe Bëngbe Utabnabe canÿe mando quetsátsbomna, pero chanjayana ntšamo atše tsjuabnacá. Bëngbe Bëtsá atšbe tšabiama tojanjuabóyeca, entsànga montsobena jtsejuabnayana aïñe tšabe palabra bomná chiñe atše tsmënana. ²⁶Atše šontsinÿana, entsá ibojtsemna jtšomñana nÿe ntšamo mora yotsomñcá, er bënga mora montsiyena puerte padecena soyënguïñe. ²⁷Shema tcobomñese, ndoñe cachcá catjëftsonÿaye; y ndoñe tcondbomñesna, ndoñe catjatsënguaye. ²⁸Tcojobouamase, bacna soye ndoñe quecátama; y nderado canÿe tobiaše tojobouamase, cach bacna soye ndoñe quenátama. Pero chë tmojt-soubouamangna padecena soyënguïñe mochanjoyena quem luarentše chamojëftsemnëntscuana, y atše séntseboše chënga jujabuáchama chca jtšiyenana ndoñe chaondétsamnana.

²⁹Jesucristbeyeca atšbe catsátanga, ntšamo séntseboše jayanamna mëntšá entsemna: Cristo quem luaroye

yochjésabo orscama ya nÿe batšá entsájamna. Chíyeca, morscana y nÿets tempo más chcoye, chë bouamnënga entsamna jtšiyenana mo ndoñe bouamnënga tmontsemncá, o mëntšá, entsamna jtšentsénana Bëngbe Bëtsabe soyënguïñe, y ndoñe nÿe chë bouamná bëtsemnana tbojtsemna soyënguïñe. ³⁰Cachcá, chë puerte ngménaca tša ošachiÿine imomnënga, entsamna jtšiyenana mo ndoñe chca tmontsemncá; y chë puerte oyejuayënga, chamotsiyena mo ndoñe chca tmontsemncá; chë soyënga buamnayënga chamotsiyena mo tondaye chëngbe soye tontsemncá. ³¹Chë quem luarentša soyëngaca jtšiyenama imojtšentsénënga entsamna jtšiyenana mo ndoñe chca tmontsamcá, er quem luare ntšamo bënga mora monduabuatmcá, pronto echanjochnëngo.

³²Atše séntseboše tšëngaftanga ndoñe chašmondétsenocochinÿenama. Canÿe entsá ndoñe bouamná tontsemna ora, jtšobenana jtšentsénana Bëngbe Utabnabe soyëngama jtsejuabnayama, y ntšamo oyejuayá cha jabemama; ³³pero chë bouamná nÿets tempo jtšenócochinÿenana quem luarentša soyëngama, jtšiyenama, y ntšamo chabe shema oyejuayá jtšebomnana; ³⁴y chca, cha uta soyiñe canÿe ora jtšentsénana. Chë ndébouamna shembása y chë tobiaše bontsobena jtšentsénana Bëngbe Utabnabe soyënguïñe sempre jtsejuabnayama. Chënga mondobena jtšentsénana Bëngbe Bëtsá jaserviama, ndayá chëngbe cuérpoca y chëngbe espíritoca tmojamama. Pero inÿetšá, chë bouamna shembásana, nÿets tempo jesenócochinÿenana quem luarentše vida jtšebomnana soyëngama, y ntšamo chabe boyá oyejuayá jtšebomnana.

³⁵Atše chca cbontsëtsëtsná tšëngaftangbe tšabiama, y ndoñe

jaméndama ba soyënga jamama ndoñe chašmondëtsofenama, ndayá ntšamo tšabá yomncá chašmotsiyenama, y nye Bëngbe Utabná jtseservénama chašmotsentšénama.

³⁶ Nderado nda tojtsejuabná chabe uatsëtsnaye tobiášeftaca jtsobouamayama ibojtsemna ca, chca jamama chë tobiáše ya bëtsá tojtsemnayeca, y chca jamama tša tšabá yojtsemna ca tojtsejuabnase, cha bontsemna jamana ntšamo tojtsebošcá. Chaotsobouamá. Chca tojama ora bacna soye ndoñe ntsamana. ³⁷ Pero nderado inya, tondaye obligacionaca tontsemna y lempe ntšamo tojtsebošcá cha tojtsobena jamama, cha tšabá tojajuabó y chabe ainaniñe corente tojtsetátšëmbo, ndoñe ntsobouamayana tšabá yomna ca, cha tšabá chca jtsamana. ³⁸ Chcasna, chë tobiášeftaca tojtsobouamá chana, canye tšabe soye jamana; pero chë ndoñe cháftaca tonjobouamá chana, canye más tšabe soye jamana.

³⁹ Chë shembása bouamná jtsotocánana chabe boyáftaca sempre jéftsiyenana, chë boyá vida tojtsebošnëtscuana; pero chë boyá tojóbanëse, cha jtsobenana cachiñe jtbouamayana, nda cha tojtsebošáftaca, pero chca chaoma mo canya Bëngbe Utabnáftaca cányiñe mo canyacá quetsomñecá. ⁴⁰ Pero atše jayanamna, cha más oyejuayá nántsemna ndoñe tontóbouamase; y sëntsejuabná, átsnaca tsbomna chë Bëngbe Bëtsabe Espiritu chašotsebuayiyinama.

Uátšëmbona saná entšangbe pormana soyëngama

8 Mora chanjóyebuambaye ndayá tšëngaftanga atše šmojatjama, ndayá jtsesayama, chë tempo ínÿenga cachëngbe pormana soyënga, diosënga

yomna ca jtsejuabnayëse jadórama tmojanátšëmbona soyëngama. Bënga mondétatšëmbo bënga nÿetscanga osertánënga imomnama. Canya tbojtsosertana ora, cha nderado nanjájuaboye, chca bëtsemnama puete uamaná cha yojtsemna ca, pero canya, ínÿenga tojtsababuánÿeshana ora, cha jtsobenana chënga becá jujabuáchana. ² Nderado nda tojtsejuabná ndegombre canye soye yotátšëmbo ca, cabá ndoñe yontsetátšëmbo ndayá jtsetatšëmbuama ibojtsemncá. ³ Pero nderado nda Bëngbe Bëtsábioye tbojtsebobonshana, Bëngbe Bëtsá chábioye jtsabuatmana mo chabe entšacá.

⁴ Y chë tempo ínÿenga cachëngbe pormana soyënga, diosënga yomna ca jtsejuabnayëse jadórama uátšëmbona soyëngamna, atše šcuayana: bënga corente mondétatšëmbo chë chënga inmëtsadorana soyënga, diosënga yomna ca jtsejuabnayëse, ndegombre ndoñe dios quemátsmëna y nye canya Bëngbe Bëtsá endmëna. ⁵ Pero masque celoca y quem luarentše chamomna entšangbiama “diosënga ca” uabáinënga (ntšamo ndegombre endmëncá, banga quem luarentša tsbanánoca obenánaca mondmëna, entšangbiama diosënga ca ubuátmënga, y banga bëts mándoca entšangbiama “utabnënga ca” uabáinënga), ⁶ bënga chë ošbuáchiyëngbiamna nye canya Bëngbe Bëtsá endmëna, Bëngbe Taitá, ndábentšana nÿetsca soyënga yóbocana, y nye nda jtseservénama bënga imoyena. Y nye canye Utabnánaca endmëna, Jesucristo, ndábeyeca nÿetsca soyënga yomna, y cach béngnaca imomna.

⁷ Pero nÿetsca ošbuáchiyënga ndoñe chca quemátstatsëmbo. Básefta entšanga, Crístbeñe cabá ntsošbuáchiye ora, imojanamana ndaye sanánaca juatšëmbonana, chë chënga imojan-

juabná diosënga yojamna ca soyënga jadórama; chënga, chca uatšëmbonana tmojttesá ora, jtsejuabnayana chca uatšëmbonana bëtsemnama, y ainaniñe juabnënga jtsebmomnana ndoñe tšabá tmonjamama, chana tmojase causa. Chënga, ndayá tempo imojánamama, ndoñe quemátobena tšëngaftangcá jtsejuabnayana, chcana jasana bacna soye ndoñe yondmëna ca. ⁸Ndegombre, ndayá bënga tmojttesacá ndoñe ntjamana bënga Bëngbe Bëtsábioye más chamuatobéconama. Bënga Bëngbe Bëtsabe bominiñe ndoñe quemochátsmëna más tšábenga aíne tmojttesama; ni ndoñe chcanga, ndoñe tmontsesá causa.

⁹Pero cuedado šmochtsebmomna, ndayá jamana yolesenciánama tšëngaftanga corente tšabá šmotatšëmbuama, ndayánaca jatsmana, y chca causa ínÿenga, chë soyënguine más batšá ošbuáchiyënga y osertánënga, ntšamo tšëngaftanga šmojttsamcá chamuatmmama, y chentšana, chëngbe ainaniñe juabnënga chamotsebmomna y chëngbioye chaotsëtsësná ndoñe tšabá tmonjama ca. ¹⁰Er, aca chë soyëngama tatšëmbuá, nderado tcojót'bema jasama canye luarentse, canye soye ndayama entšanga dios yomna ca jtsejuabnayëse adórayentse, y canye Crístbeñe ošbuachiyá tojtsebmomna ainaniñe juabnënga ndoñe tšabá tonjamama, chca tojáseyeca, aquécá chë soyëngama ndoñe yondétatšëmbo causa, y cha nderado chentse cojttesama tcmojinÿëse, chë soye nanjobenaye chábioynaca jañémuana chë saná jasana, chë tempo chë soyëngama tmojanátšëmbona saná. ¹¹Y chca aca, chë soyëngama ntšamo betatšëmbuama tcojamama, catjama chë Jesucristbeyeca acbe catšata, chë ndoñe corente ošbuachiyá, y ndoñe aquécá chë soyëngama corente tatšëmbuá, cha

pochocaná chaotsemnama, er chabe ainanentse echántsemna juabnënga canye bacna soye tojamama, chë saná tojasama. Chca nderado cánÿabioye catjama, ndabiama Cristo tojanóbana, cha jatsbocama. ¹²Jesucristbeyeca acbe catšatbiama chca bacna soye tcojama ora, chca causa cha canye soye tojama, ndayama chabe juabnënga ainaniñe chabotsatsëtsná ndoñe chca chaondëtsama ca; y chca, chentšana tša tojesejuabná cha canye bacna soye tojamama, acna canye bacna soye jamana, ndoñe ñe chë catšatbiama, ndayá cach Cristbiámnaca. ¹³Chíyeca, nderado ndayá atse stsesama, atse tsjama Jesucristbeyeca atšbe catšata chaoma canye soye y chca jamama chabiama canye bacna soye tojtsemnëse, más tšabá nántsemna ndocna te chë soye atse ntjasana, chca, atse ndoñe jatsmama cha canye bacna soyiñe chaótsatsama.

Jesucristbe ichmónëngbe derecho

9Ndegombre endmëna, atse ndayánaca jamana stselesenciánama y Moisesbe leyëngaca ndoñe más mandaná séntsemnama. Cach ndegombre endmëna, atse canye Jesucristbe ichmoná tsmënama y Jesús Bëngbe Utabná tijinÿama; y cach tšëngaftanga mora ošbuáchiyënga jtsemnëse, šmondmëna ndayá tojóbocna Bëngbe Utabnabiama atšbe trabajuentšana. ²Masque ínÿenga atšbiama ndoñe quematsjuabná atse canye Jesucristbe ichmoná tsmëna ca, tšëngaftangbiamna aíne chca endmëna; er tšëngaftanga Crístbeñe ošbuáchiyënga šmondmënama y Bëngbe Utabnáftaca cánÿiñe mo canÿacá šmondmënama, puerte tšabá šmontsinÿanÿná atse Jesucristbe canye ichmoná tsmënama.

³Měntśá chanjayana chě atše ndoñe tśabá tijama ca imojtsicháměngbiama: ⁴Ndegombre bēnga n̄yets derecho fsēndětsóbm̄ne jtsobátmanama tšēngaftangbentśana, chě tbojujabuáchēngbentśana, bēngbe trabajuama saná o ndayá jofśiyama chašcuacaredadama. ⁵Y bēngnaca derecho fsēndětsóbm̄ne can̄ye shema ośbuachiyá jtsebm̄nama y bēngaftaca cha jěftsbetśama in̄ye luaroye fstsajna ora, ntśamo chě Jesucristbe in̄ye ichmónēnga, Bēngbe Utabnabe catśátanga y Pédrēnaca mondbetsamcá. ⁶¿O n̄ye Bernabé y atše šojtsětocana cabēndatbe cucuátśeca jatrabájana vida jtsebm̄nama, y ndoñe derecho fsēntsebm̄na ośbuáchiyēnga chašotsacuédanama, Bēngbe Bětsabiana trabájayama? ⁷¿Ndēmua mo can̄ye soldadcá tojtsoservená, ndayá tbojtsájabotama cachá nantsatopagana, vida jtsebm̄nama? Ndocná can̄ye jajañe uvas betiyēnga ntjájena, chentśa uvasēšangá ndoñe ntjuasama. Ndocná oveshēnga ntsan̄yēnana, chě tojabuatēba létśiyentsana ndoñe ntjofśiyama. ⁸Ntśamo atše muentśe sēntsichamcá ndoñe n̄ye entśangbe juabna quenátśmēna; y Moisesbe leyífnaca cachcá endayana, ⁹er chabe leyíñe mēntśá endayana: “Aca can̄ye toróftaca shajuana tmojtsatbaná luariñe chacojtsetrabája ora, ndoñe catjuanguētsenaye ca.” Y chca ndoñe quenátayana Bēngbe Bětsá n̄ye toronga inētsan̄yēna ca, ¹⁰sinó in̄ye más bēts soye; chca endayana ndayá ndegombre bēnga, chě Bēngbe Bětsabiana soyēngama abuyayinayíñe trabájayēnga cha šnetsan̄yēna ca. Chca tmojanábema bēngbiama, er chě fshantse arayá y chě meshēnga atbanayá, entsamna chca jamana jtsobátmanēse, chě tmojátabe shajuanentśana batśá jójēngacñama. ¹¹Y chca, bēnga chě tśabe noticiēngama

tbojábuaenase, y chca, Bēngbe Bětsábíocana tśabe bendicionēnga chašmotsebm̄nama bēnga tijama, ndoñe yapa tanandátśmēna tšēngaftanga jótjañana, chě šmobomna soyēnguentśana bēnga jěftsiyēnama chašcuatśatama. ¹²In̄yēnga derecho tmojtsēbm̄na tšēngaftanga jótjañana chě šmobomnentśana chašmuacaredadama, tšēngaftangbeñe chēngbe trabajuama, as bēnga más derecho fstsebm̄na chca jamama.

Pero bēnga tondaye checbatamēndá, bēnga chě derecho bětsebm̄nayeca. Chca játamamna, bēnga lempe fsēntsoyá, chca, bēnga tondaye ntjátamama, y chě causa entśanga ndoñe chašondětsayaunana, bēnga chě tśabe noticiēnga fstsabuayiyná ora. ¹³Tšēngaftanga šmondětatsēmbō, Bēngbe Bětsabe bēts yebnoca trabájayēnga Bēngbe Bětsabiana oservéniñe, mondbóyēngacñe chēnga jasama, ndayá entśanga Bēngbe Bětsá jadórama chabe bēts yebnoye tmojjiyēbo sananguentśana. Y chě Bēngbe Bětsá jadórama soyēnga amēnga, altaroca, chě juatśēmbonama luarentśe, chēnga jasana ndayá chentśe tmojuátśēmbona soyēnguentśana. ¹⁴Cachcá, Bēngbe Bětsá tojamandá, chě tśabe noticiēnga abuyayinayēngna, vida jtsebm̄namna lempe ntśamo tojtsējabotcá chamóyēngacñe ca, chě tśabe noticiēnga abuyayinayama. ¹⁵Pero atše ndocna te chiyaisemandá in̄yēnga chca chašmotsecuedánama, atše chě tśabe noticiēnga abuyayinayá bětsemnama chca derecho tsbóm-nayeca, y cach ndoñe mora quem soye quecbatēbuabiamná, tšēngaftanga ndayánaca atše chašmuatśetama. Atśbiana más tśabá nántsemna jóbana, y ndoñe ntjaleséciana in̄ya chaoma atše cach atśbiana oyejuayá

ndoñe ntjátsmënama, ínÿengbentsana soyënga stjójëngacñe causa.

¹⁶ Atše ndoñe quetsatsjuabná atše canÿe bëts soye stsama ca, chë tšabe noticiënga stsabuayiyinama, er atše obligaciönaca sëntsemna chca jtsamama, Bëngbe Bëtsá chama šojanchémboyeca. ¡Tša lastemcá atšbiana nántsemna, chë tšabe noticiënga ndoñe sëntsabuyayinase! ¹⁷ Chýyeca, atše chë tšabe noticiënga stsabuayiyiná nÿe atše chca jamama stsebóseyeca, atšbe uacanana soye ya stsebomna; pero atše chca stjama, y ndoñe tontsemna nÿe atše chca jamama stsebóseyeca, masque chca, atše stsama, ndayá jtsamama Bëngbe Bëtsá šojanbonÿecá. ¹⁸ Y chca, atšbe uacanana soye endmëna atše oyejuayá jtsemnana chë tšabe noticiënga abuayiyayama, ošbuachiyëngbentsana atše vida jtsebomnama tondaye ntjatoyëngacñécá; chca, atše tondaye quetsátama chë tšabe noticiënga abuayiyayama tsbomna deréchoca, chë atšbe trabajuentsana vida jtsebomnama.

¹⁹ Atše, masque ndocna entsábeyeca nÿets tempo mandaná quetsátsmëna, puerte nduamaná sënjóbema, mo canÿa nÿets tempo ínÿabeyeca mandanacá, nÿetscanga jaserviama, chca, atše chca jtsamëse, jobenayama becá entsanga, ntšamo tojopodecá, jayénjanama Crístbeñe chamotsošbuáchema. ²⁰ Chë judiëngbiamna atše sënjama chaitsiyena mo chëngcá jtsamëse y jtsejuabnayëse, chca, atše jobenayama chënga jáyënjana Crístbeñe chamotsošbuáchema. Y chë Moisesbe léyeca mandánënga imoyenëngbiamna, atše chëngcá sënjóbema, masque ndegombre chë Moisesbe léyeca mandaná ndoñe quetsátiyena; chca sëndbama chënga jáyënjana Crístbeñe chamotsošbuáchema. ²¹ Pero

chë Moisesbe léyeca ndëmandánënga oyenëngbiamna, atše chëngcá sënjóbema, chënga jáyënjana Crístbeñe chamotsošbuáchema, masque ndegombre endmëna, atše šontsemna jamana ntšamo Bëngbe Bëtsá šomandacá y ntšamo Crísto šomandacá. ²² Chë nÿe batšatema ošbuachiyëngbiana y Bëngbe Bëtsabe soyëngama nÿe batšatema osertánëngbiana, atše sënjama chaitsiyena mo chëngcá jtsamëse y jtsejuabnayëse, chca, atše jobenayama jamama chënga sempre Crístbeñe chamotsošbuáchema. Y lempe chca, chë atše jamana ntšamo nÿetscanga imonncá atše chaitsemnana, endmëna atše jobenayama báseftanga jáyënjana Crístbeñe chamotsošbuáchema.

²³ Atše lempe chca sëndama, bëtscá entsanga chë tšabe noticiënguñe chamotsošbuáchema, y chca, atše atsbocaná chaitsemnana y chëngcá atše chayóyëngacñama, chë atsebácanënga Bëngbe Bëtsá yochjatsataye tšabe soyënga.

²⁴ Tšëngaftanga šmondétatsëmbo, canÿe luaroye jashjanguama entsanga tmojótjajo orna, banga jotjajuana, pero nÿe canÿa chë uacanana soye jójëngacñana. Chcasna, mo chë uacanana soye jójëngacñama tmojótjajëngcá, tšëngaftanga cmontsamna jtsiyenana, chë Bëngbe Bëtsábicana uacanana soye josháchiñama. ²⁵ Nÿetscanga chë tmojótjajënga ínÿenga jáyënjana, chënga jopróntana nÿetsca soyënguñe jtse nomándayëse, chca, canÿe uacanana soye, tsbuanachëngaca uapormana coronésha juayëngacñama; y chësha betesco jtsanctana. Pero bënga ndoñe; bënga mondoyena Crístbiana soyënga jtsamëse, Bëngbe Bëtsábicana ba tšabe soyënga mo uacanancá jójëngacñama, y chë soyënga nÿetsca tescama bënga mochanjëftsebomna. ²⁶ Y atšna, atšbe

bariëna sëndëntšena Bëngbe Bëtsá jtseservénama, ndoñe mo canya ínÿengbioye jáyëñjanama tojtjajuacá, chë ndémoye jashjanguama yomnama ntsetatšëmbcá; y cach ndoñe mo nda tojtsepelíá orcá, chora, cha nÿe ínÿoye chabe buacuatšënga tojtsëtšana y chë ínÿabe cuerpoye ndoñe. ²⁷ Mo canye tšabe peliyacá, chabe cuerpo játsetšenana y chca chë cuerpo corente jtsemándayana, atše ndoñe quetsatsleséncia chë atše tšabá jtsomñama atšbe ainantšja juabnënga chašotsemándama; y chca, Crístbioye jtseservénëse chamotsiyenama ínÿengbioye stjabuayená chentšana, Bëngbe Bëtsá chašotsaboté chabe uacanana soye josháchiñama, cha ndoñe tšabá tijaservé causa.

**Cach entšangbe pormana soyënga
ndoñe chamondëtsadoránama
jábuayenama**

10 Jesucrístbeyeca atšbe catšátanga, atše séntseboše tšëngaftanga chašmotsetátšëmbo bëngbe tempsca bëts taitanga judiënga, chënga nÿetscanga Bëngbe Bëtsá canye jantšetësheca benache yojaninÿanÿná, y chënga nÿetscanga, chë Buángana ca uabaina mar bejayëjana tmojánachnëjna, chiñe mo bojojuiñe cuafsomñcá. ² Chë jantšetësheca Moisés imojanéstonama, y chë mar bejayëjana tmojánama, chënga tmojanóbema Moisesbe ústonënga. ³ Chënga nÿetscanga tmojanse cachca saná, chë Bëngbe Bëtsá celocana tojanichmó saná; ⁴ y nÿetscanga tmojanofsé chë Bëngbe Bëtsá tojanma chë peñëšentšana chaóbcna béjaye. Cristo chëngaftaca yojtsemna jtsanÿenama chënga imojtsajnëntscuana, y ntšamo chë peñëšentšë chëngaftaca tojanopasacá, yojaninÿanÿná Cristo chënga

yojtsanÿenama. ⁵ Masque chca, banga chënguentsënga ntšamo tmojanmama Bëngbe Bëtsá ndoñe yontsoyejuaye; y chë causa, Bëngbe Bëtsá tojanma chënga chamóbanama chë entšanga ndoyenentšë.

⁶ Lempe chca tojanopasá bënga jinÿanÿiyama y jábuayenama ntšamo inopása entšanga bacna soyënga jamama tmojtseboše ora, bënga chca jamama ndoñe chamondëtsebošama.

⁷ Chíyeca, tšëngaftanga ndoñe šmattsadorana entšangbe pormana soyënga, ndayama ínÿengna jtsejuabnayana diosënga yomna ca, ntšamo báseftanga israeloquënga tmojanmcá. Ntšamo Bëngbe Bëtsabe uabemana palabrenguiñe chëngbiama endayancá, chënga canye ternerá castellánoca tmojanpormá ora, mo dios cuaftsemncá jadórama: “Entšanga tmojanotbiama jasama y jatmuama, y chentšana tmojantsbaná joboyeuama ca”. ⁸ Boyabása o shembásaftaca bacna soyënga ndoñe šmattsama, ntšamo báseftanga chënguentsënga tmojanmcá, y chë causa, nÿe canye te, uta bnëtsana y unga uaranga entšanga tmojanóbana ⁹ Bacna soyënga ndoñe šmattsama, jinÿyama buetatescama Bëngbe Utabná uantado yochjéftsemnana y ndoñe šochanjacastígayama. Báseftanga chënguentsënga chca tmojanma, y chë causa tmojanóbana mëtšcuayéngaca ftëtšëngna. ¹⁰ Bëngbe Bëtsabe contra ndoñe šmattsóyebuambnaye, ntšamo báseftanga chënguentsënga tmojanmcá, y chë causa, chë ángel obanayá tojanma chënga chamóbanama.

¹¹ Lempe chca bëngbe tempsca bëts taitángaftaca tojanopasá, bënga jinÿanÿiyama ntšamo jtsiyenana šojtsamnama, y Moisés, Bëngbe Bëtsabe uabemana palabrenguiñe chca tojéftsanboshjona bënga jabuátambama, bënga, chë Jesucrístto yochjésabo

orscama ya batsatema yojtsájamna ora oyenngbiama. ¹² Chcasna, nda tojtsejuabná Bëngbe Utabnabiama tšabá yojtsama ca y bacna soyënga ndocna te yochanjama ca, cuedado chaotsebomna, bacna soyënga amiñe ndoñe chaondótsatsama. ¹³ Ndocna entšá jatócochënguana bacna soyënga jamama, ntšamo tempo ínÿenga ndoñe tonjanocochëngcá cachca bacna soyëngama, pero tšëngaftanga corente šmondétatsëmbo Bëngbe Bëtsá sempre cmochtséjabuachanama chë padecena soyënguñe, y cha ndoñe yochanjalesénciama bacna soyënga jamama chacmócochënguama, tšëngaftanga chca soyënga jamama jtsóboyayama obenana ntsebomncá; pero chë padecena soyënguñe chašmojtsemna ora, cha cmochanjínÿanÿiye ntšamo chë bacna soyënga ora tšabá jabocanama, y chca, jtsóboyayama chašmotsobenama.

¹⁴ Chíyeca, atšbe bonshánënga, ndocna te šmattsadorana cach entšangbe pormana soyënga, ndayama ínÿenga jtsejuabnayana diosënga yomna ca. ¹⁵ Atše sëntsoyebuambná mo tšëngaftanga corente osertánënga cuaftsemncá. Cach tšëngaftanga šmochjenójuaboye y šmochjayana, ntšamo cbojtsëtsësnacá añe o ndoñe tšabá bétsemnana. ¹⁶ Ntšamo Jesús chë coptema vinoyama Bëngbe Bëtsábioye tbojtanchuacá, béngnaca cachcá Bëngbe Bëtsá chama fsëndbëtsatschuanaye. Bënga chca tmojama ora, ndegombre, jtsinÿanÿayana bënga Crístoftaca cánÿiñe mo canÿacá imomnama, chabe buiñe juabuáshanëse bëngbiama tojanóbanayeca. Y chë mondbajataye tandëse tmojase ora, jtsinÿanÿayana bënga Crístoftaca cánÿiñe mo canÿacá imomnama, cha bëngbiama tojanóbanayeca. ¹⁷ Bënga ošbuáchiyënga masque banga mondmëna, chca orna nÿetscanga cach tandësentšana bënga

jasana, y chíyeca bënga jtsemnana mo canÿacá, mo Cristbe cuerpcá.

¹⁸ Tšëngaftanga šmochtsejuabnaye ndayá chë Israeloca bachnanga monduamanama: chënga chë altaroca tmojóba y tmojuátšëmbona bayënguentsana jasana, y chca chënga chora jtsinÿanÿayana chënga cánÿiñe mo canÿacá imojtsemnana Bëngbe Bëtsáftaca, chë chca tmojtsadoranáftaca. ¹⁹ Y chca, atše ndoñe quetsátsboše jayanama chë entšangbe pormana soyënga mo diosënga cuaftsemncá, uámana soyënga yomna ca. Ni chë cach entšangbe pormana soyënga diosënga yomna ca jtsejuabnayëse jadórama uátšëmbona saná inÿe sanama más iuámana ca. ²⁰ Pero añe, entšanga cach entšangbe pormana soyëngama mo diosënga cuaftsemncá, chca tmojuátšëmbona ora, ndegombre chënga Satanás y chabe uajabuachanëngbiye jtsadoránana, y ndoñe Bëngbe Bëtsábioye. Y atše ndoñe quetsátsboše, tšëngaftanga chca uatšëmbonana šmojasama, cánÿiñe mo canÿacá chë bayëjéngaftaca chašmotsemnana. ²¹ Tšëngaftanga ndoñe quešmátobena chë vínoye coptémentšana jofšiyana, ntšamo chë ošbuáchiyënga bétsemnana mondbetsamcá, y chentšana chë cach entšangbe pormana soyënga, mo diosënga cuaftsemncá jadórama vínoye coptémentšánënaca. Chca šmojama ora jtsemnana mo chë diablëngaftaca cuaftsesangcá. Y cach ndoñe quešmátobena vínoye jofšiyana y tandëse jasana, ntšamo ošbuáchiyënga bétsemnana mondbetsamcá, y chentšana cach entšangbe pormana soyënga mo diosënga cuaftsemncá jadórama fiestentšana sanánaca jasana, y chca chë bayëjéngbiye jtsadoránana.

²² Bënga chca tmojtsamama, bënga mochanjama Bëngbe Utabná puerte eto-

naná bəngaftaca chaotsemnama, er chë bayějəngaftaca bənga chca jtsamana. ¿O imojtsejuabná bənga chabiana más obe-nana bomnənga imomna ca?

**Lempe šmochjama Bəngbe
Bətsá puerte bətsá y uamaná
yomnama jinjanjyama**

²³ Mondbėtsichamo: “Entselesenciana ndayánaca jamana, ndayama Bəngbe Bətsá ndocá tonjayana ca”, pero básefta soyənga atše stjama ora ndoñe njetścangbe tšabiana ntsemnana. “Entselesenciana ndayánaca jamama ca”, pero njetšca soyənga ntšamo bənga tmojamcá, ošbuachiyəngbiöye ndoñe ntjujabuáchana Jesucristbeñe más chamotšošbuáchema, y ainaniñe más añemo chamotsebomnama. ²⁴ Ndocná chaondėtsama lempe ntšamo tojobenacá nje cachabe tšabiana, ndayá más chaotsama chë ínjengebe tšabiana.

²⁵ Lempe mercadoca tmojtsena soyənguentšana šmochjase, ntjatstjanaycá chë mēntšana aiñe o ndoñe tmonjuátšəmbona chë cach entsangbe pormana soyənga, mo diosənga cuaftsemncá jadórama ca. Ndoñe chca šmattsetjanaye, ntšamo tšəngaftangbe ainaniñe juabnənga šmojtsebomnama; ²⁶ er ntšamo Bəngbe Bətsabe uabemana palabrenguñe endayancá: “Quem luare Bəngbe Utabnabe soye endmėna, y lempe ntšamo chiñe yomncánaca ca.”

²⁷ Nderado canye ndošbuachiyá tcmojúbuaja chábioaca jasama, y tšəngaftanga choye jama tša šmojtsebošese, lempe ntšamo cha chacmojonanjacá šmochjase, ndayentšana chë saná tojóbcnama ndocá ntjatstjanaycá, ntšamo tšəngaftangbe ainaniñe juabnənga šmojtsebomnama. ²⁸ Pero nderado nda tcmojáuyana: “Quem mēntšana cach entsangbe pormana

soyənga mo diosəngcá jadórama tmonjanátšəmbona ca”, as ndoñe chana šmatjase, er canya chca tcmojáuyana, y ainantše šmojtsebomna juabnənga, chë chca jamama ndoñe tšabá bėtsemnama. ²⁹ Atše sēntsoyebuabná ndayá chë chca tcmojauyanabe ainaniñe juabnəngama, chë soye jasana ndoñe tšabá yondmėnema, ndoñe chë tšəngaftangbe ainantša juabnəngama.

Pero tšəngaftanga šmatjatjaye: “¿Ndáyeca atše šojtsemna jayanana ndayá atše stsobena jamama, ošbuachiyá bėtsemnama, ntšamo chë ínəabe ainaniñe juabna yobomnama ca? ³⁰ Y atše chë ndayá stsesama Bəngbe Bətsá tijətschuase, ¿ndáyeca inya šochjauyana atše ndoñe tšabá tijama ca, chë soye tijasama, chë ndayama Bəngbe Bətsá tijətschuá ca?” ³¹ Masque ntšamnaca, cachcá, chašmojtsesá, o chašmojtsofšəšná, o ndaye inje soye chašmojtsama, ndayama Bəngbe Bətsá ndocá tonjayana, lempe šmochtsama Bəngbe Bətsá puerte bətsá y uamaná yomnama jtsinjanynayama. ³² Tondaye šmatjama ndayá chaobená jamana, ínjenge Cristo chamotsábotema. Ndoñe chca šmatjama, ni judiəngbiama, ni ndoñe judiəngbiama, ni chë Bəngbe Bətsábeñe ošbuachiyəngcá enefjuanəngbiama. ³³ Šmochtsama

ntšamo atše sēndėntšencá, njetścanga njetšca soyənguñe oyejuayənga jtsabamnama, lempe ntšamo stjobenacá jtsamėse, ndoñe nje atšbe tšabiana, ndayá masna chë ínjengebe tšabiana, chənga chamotsobenama chəngbe bacna soyənguentšana atsebácanənga jtsemnama.

11 Tšəngaftanga šmochtsiyena ntšamo atše sēndamcá jtsamėse, cach ntšamo atše sēndoyencá, ntšamo Cristo inetsamcá jtsamėse.

**Ntšamo yomna shembásenga tšabá
jtsemnama, ošbuachiyëngcá
tmojénefjna ora**

²Atše séntseboše tšëngaftanga jáuyanana tšabá šmojama ca, tšëngaftanga nyetsca soyënguiñe atšbiamá šmnëtsenujubnama, y tšëngaftanga šmojtsabuátambama y šmojtsamama ntšamo tbonjanabuatambacá, cachcá ntšamo atše sënjëftsanboshjoncá. ³Pero atše séntseboše tšëngaftanga chacmësertá: nda nyetsca entsãnga iuaménda cha, Cristo endmëna; y nda shémbioye ibománda cha, boyá endmëna; y nda Crístbioye ibománda chana, Bëngbe Bëtsá endmëna. ⁴Nderado canye boyabása chabe bestšáše tojtsenátstbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana cachá chaotsëuatjama, chabe bestšášeca chca tojama causa. ⁵Pero nderado canye shembása chabe bestšáše ndoñe tontsenátstbotse, inye ošbuáchiyëngaftaca cányiñe Bëngbe Bëtsáftaca tbojtsencuénta ora o Bëngbe Bëtsabe juabna tojtsoyebuambná ora, cha jamana chama cachá chaotsëuatjama; jtsëuatjana mo cha lempe jshetëtšená cuaftsemncá. ⁶Er, nderado canye shembása ndocna te tontseboše chabe bestšáše jtsenátstbotsana, chabiamá más tšabá nántsemna lempe chaotsenójshetëtše. Pero tojtsejuabná utsbotjená o chca lempe jshetëtšená jtsemnama cha yochtsëuatja ca, as chabe bestšáše chaotsenátstbotse. ⁷Boyabása ndoñe quebnátsmëna chabe bestšáše jtsenátstbotsana, er Bëngbe Bëtsá tojanma ntšamo cachá yomncá cha chaotsemnama, y chë boyabása chca jtsemnëse, y jtsinyanñayana Bëngbe Bëtsá chabe

mandayá yomnama. Pero ntšamo chë shembása yomncá, jtsinyanñayana chë boyabása chabe mandayá yomnama; ⁸er Bëngbe Bëtsá, boyabása ndoñe tbonjanma shembásabentšana, ndayá shembása boyabásabentšana. ⁹Y Bëngbe Bëtsá, boyabása ndoñe tbonjanma shembásabeyeca, ndayá shembása boyabásabeyeca. ¹⁰Chíyeca, y chca jamama angelënga tšabá jtsinyanánayeca, shembása jtsemnana chabe bestšáše chaotsenátstbotsama, chca, chaotsinñyama inya chábeñe yomándama. ¹¹Pero, Bëngbe Utanábëñe ošbuachiyëngcá jtsiyenamna, boyabásenga y shembásenga cachcá jtseytëtanana. ¹²Er masque Bëngbe Bëtsá, shembása boyabásabentšana tbojanma, mora, shembásabentšana boyabása jóbocnana; y lempe Bëngbe Bëtsábíocana endóbocana.

¹³Cach tšëngaftanga, yejuana chama šmochtsejuabnaye y šmochjayana tšabá o ndoñe tšabá yontsemna, canye shembásabiamá Bëngbe Bëtsáftaca jencuéntana, bestšáše ntsenatsbotscá. ¹⁴Ntšamo entsãnga sempre mondbetsejuabnaycá, ndayá tšabá bëtsemnama, bëngbioye jtsabuátambayana, boyabása bën stjënëšha chabuájuama tojalesenciase, cha jamana cachá chama chaotsëuatjama. ¹⁵Pero shembásabiamna, chë bën stjënëšha jtsinyanñayana chabe botamanana y uámanana, er Bëngbe Bëtsá tojanma shembása bën stjënëšha chaotsábomnama, chca, cha chaotsebomna ndáyeca chabe bestšáše jtsenátstbotsama. ¹⁶Masque ntšámnaca, ndánaca tojtseboše quem soyama más jatóyebuambayama, cha bontsemna jtsetatšëmbuana, ni bënga, ni Bëngbe Bëtsábeñe ošbuachiyëngcá enefjuanënga queftsatslesencia chca ndoñe chaondëtsemnama.

Bëngbe Utabnabiamama
jtenójuaboyama jasama ora, chënga
ndoñe tšabá imonjánama

¹⁷ Mora cbochanjaménda soyënguine atše ndoñe quetsátobena tšëngaftanga jáuyanana tšabá šmojama ca, er tšëngaftanga Crístbeñe ošbuachiyëngcá šmojénefjna ora, Bëngbe Bëtsá jadórama, atše šontsinýana chë soye yojtsoservena tšëngaftanga más bacá chašmotsemnama, y ndoñe tšëngaftangbe tšabiamama. ¹⁸ Natsana cbochjáuyana, atše sënjouena tšëngaftanga ošbuachiyëngcá šmojénefjna ora, báseftanga canýe soye immétsejuabnaye y ínýengna inýetšá ca, y atše sëntsejuabná batšana ndegombre chca yojtsemna ca. ¹⁹ Ndegombre jtseytana tšëngaftangbeñe chamotsemna báseftanga canýe soye juabnayënga y ínýengna inýetšá, chca, nyëtscanga chamotsetatšëmbuama ndëmuanýenga imojtsemna chë Bëngbe Bëtsá tojayana chënga tšabá tmojama ca. ²⁰ Tšëngaftanga tandëse jasama y vínoye jofsiyama šmojénefjna ora, ntšamo bënga fsënduamancá, Bëngbe Utabná bëngbiamama tojanóbanama jtenójuaboyama, ndayá chora tšëngaftanga šmnetamcá, ndoñe quenátsmëna ntšamo ndegombre cmojtamcá, chë Bëngbe Utabnabiamama jtenójuaboyama jasama ora; ²¹ er chë jasama tojobuache ora, cada ona inóntša jasama ndayá tojiyëbcá, y ndoñe ntjatóbátmanana nyëtscanga ndayánaca jasama chamotsebomnëntscuana; báseftanga shëntseca joquédana, y ínýengna tša jëftsesana y jofsiyana jëftsótmenantscuana. ²² ¿Tšëngaftanga ndoñe yebna šmondpomna ndayentšë jasama y jofsiyama? ¿Ndáyeca tšëngaftanga šmojtsejuabná chë imménefjna ošbuachiyënga nduámanënga imomna ca, y šmojama

chë chentšë tmojtsemnënga, tondaye ndbomnënga, chamotsëuatjama? ¿Tšëngaftanga šmojtsejuabná atše cbochjáuyana tšabá šmojama ca, chë Bëngbe Utabnabiamama jasama ora chca šmojamama? ¡Ndegombre ndoñe!

Bëngbe Utabnabiamama
jtenójuaboyama saná

(Mt 26.26-29; Mc 14.22-25; Lc 22.14-20)

²³ Er atše cach Bëngbe Utabnántšëntšana ntšamo cbontsabuatëmbacá sënjanóyëngacñe: Bëngbe Utabná cach uayayëngbe cucuatšinë tmojánboshjona íbeta, tandëse tojanca, ²⁴ Bëngbe Bëtsábioye tbojtanchuá chentšëntšana, tojanjatá y tojánayana: “Quem tandëse atšbe cuerpo entsemna; tšëngaftangbe tšabiamama chanjóbanama. Ntšamo mora montsamcá šmochtsama, atšbiamama jtenójuaboyama ca.” ²⁵ Cachcá, chë saná tmojansentšëntšana, coptema tojanaca y tojánayana: “Quem coptema vínoye atšbe buiñe entsemna. Atšbe buiñe echanjuábuashana tšëngaftanga chašmotsetatšëmbuama, ntšamo Bëngbe Bëtsá entšanga tojanašëbuachenacá pronto yochtsemnama. Cada vínoye chašmojtsofsëšná ora, chca šmochjama atšbiamama jtenójuaboyama ca.” ²⁶ Er tšëngaftanga cada quemëntša tandëse chašmojtšesá ora y quem coptementšaycá chašmojtsofsëšná ora, Bëngbe Utabná chaojésabëntscuana tšëngaftanga šmochántsinýanýnaye cha entšangbiamama tojanóbanama.

Ntšamo yomna jamana,
Bëngbe Utabnabiamama
jtenójuaboyama jasama ora

²⁷ Chcasna, Bëngbe Utabnabiamama jtenójuaboyama jasama ora, ndánaca tandëšëntšëntšana tojase y coptëmentšëntšana tojofšë, ndoñe chë ntšamo chaotsemnana Bëngbe Utabná yojanjuabnacá, chabiamama Bëngbe Bëtsá jayanana cha

puerte bacna soye tojama ca. Chë entsá chca tojama ora, cha jtsinÿanÿnayana, Bëngbe Utabnabe cuerpo y buiñe chabiamá tondaye yonduámanama. ²⁸ Chíyeca, entsemna cada ona corente chauenojuabó jtsetatšëmbuama aĩñe o ndoñe yontseprontana chca jasama y jofšiyama, cabá ndëse y ndofšé ora. ²⁹ Er nderado nda tojase y tojofšé, chë Bëngbe Utabnabiamá jtenójuaboyama jasama ora, cach Bëngbe Utabnabe cuerpo yomnama ntjajuaboycá, cha chë sóyeca jamana Bëngbe Bëtsá chabotsecastigama. ³⁰ Chíyeca, banga tsëngaftanguentsënga šoquënga šmojtsemna, ínÿenga añemo ndbomnënga, y ínÿengna ndoñe nÿe báseftanga tmojóbana. ³¹ Pero bënga corente tmojajuabó jtsetatšëmbuama aĩñe o ndoñe montseprontana ntšamo šuamncá jasama y jofšiyama, cabá ndëse y ndofšé ora; chca, Bëngbe Bëtsá ndoñe buántsemna bënga játacastigana, ntšamo tsábá yomncá ndoñe tmonjase causa. ³² Pero, Bëngbe Utabná castígoca chca šojabuayená ora, jtsemnana bënga más tsábá jtsamama chamuatsjínÿama, y chca, bayté chentšana, Bëngbe Bëtsá ndoñe chabondétsemna játayanana bënga šojtsamna nÿetsca tescama castigánënga jtsemnana ca, cánÿiñe chë nÿe quem luarama enójuabnaye entsángaftaca.

³³ Chca, Jesucristbeyeca atšbe catsátanga, tsëngaftanga chë Bëngbe Utabnabiamá saná jasama chašmojënefjna ora, cánÿiñe nÿetscanga šmochjabojátša. ³⁴ Y nderado nda tbojtseshëntsana, cachabe yebnoca chauétse, chca, Bëngbe Bëtsá ndoñe chabondétsemna tsëngaftanga jácastigana chora ndoñe tsábá šmonjama causa. Chë inÿe soyëngama ndayama tsëngaftanga šmonjatjá, chamna chanjamánda tsëngaftanga jáñÿama chajjá ora.

Bëngbe Bëtsabe tšetana obenana, tsábe soyënga jamama

12 Jesucristbeyeca atšbe catsátanga, atše séntseboše tsëngaftanga chašmotsetátšëmbo Bëngbe Bëtsabe tšetana obenanama tsábe soyënga jamama, Cristbeñe ošbuáchiyënga jujabuáchama.

² Tsëngaftanga šmondétatšëmbo, tsëngaftanga Cristbeñe ndošbuáchiyënga šmonjamna ora, ínÿenga cmonjanabatambá soyënga, y chora tsëngaftanga šmonjamna ínÿabeyeca uasjanëngcá, cach entsangbe pormana soyënga mo diosënga cuaftsemncá jadórama; y chë soyëngna ni mo jóyebuambayama ntsoobenana.

³ Chíyeca, atše mora séntseboše tsëngaftanga chašmotsetátšëmbo, ndocná ntsoobenana jayanana: “Jesús ndoñe chë Cristo quenátsmëna, ni Bëngbe Utabná ca”, chë Bëngbe Bëtsabe Espíritbe obenánaca cha tojtsóyebuambnase. Y cach ndocná ntsoobenana jayanana: “Jesús Bëngbe Utabná endmëna ca”, chë Bëngbe Bëtsabe Espíritbe obenánaca cha ndoñe tontsóyebuambnase.

⁴ Espíritu jamana bënga ndoñe chamondétsebomnana cachca tšetana obenana tsábe soyënga jamama, pero lempe jobayana cach canÿe Espíritbeyeca. ⁵ Bënga, Bëngbe Bëtsá mondëserveda, nÿetsca soyënguñe jtsetrabájayëse, pero cach Utabná nÿets chë trabajënga šojabanÿé. ⁶ Nÿetsca soyënga Bëngbe Bëtsabe obenánaca fsëndbëtsama, pero cach Bëngbe Bëtsá endmëna nda inétsama bënga chë soyënga jamama obenana chamotsebomnana. ⁷ Bëngbe Bëtsá inétsama cada ošbuachiyá chaotsebomnana canÿe tšetana obenana tsábe soyënga jamama, y chë soye jtsinÿanÿnayana Bëngbe Bëtsabe

Espíritu chabe ainaniñe yomnama; y chë tsetana obenana jtsemnana nyetscangbe tšabiama. ⁸Bëngbe Bëtsá, Espíritbeyeca, canya obenana jatštayana puerte osertanánaca chaóyebuambama, y ínñana obenana cach Espíritbeyeca ndayámnaca corente jtsetatšëmbëse chaóyebuambama; ⁹ínñana cach Espíritbeyeca, obenana Crístbeñe puerte chaotsóšbuáchema, y ínñabiamna, cach nye canye Espíritbeyeca, obenana jatštayana šoquënga jáshnama; ¹⁰ínñana, obenana tšabe soyënga Bëngbe Bëtsabe obenánaca jamama, y ínñana, obenana Bëngbe Bëtsabe juabna jóyebuambayama. Inñana, obenana corente jajuaboyama y jtsetatšëmbuama ntšamo tmojayancá Bëngbe Bëtsabe Espíritbeyeca o bacna espiritëngbeyeca tojtsemnana, y ínñana, obenana chë tempo ndmabiyáñnaca chaóyebuambama, y ínñana, obenana josértama ntšamo chë ndaye biyáñnaca jóyebuambayama obenana bomná tojtsichamcá, y ínñengna chama jábuayenama. ¹¹Pero cach Espiritu, chë nye canye Espiritu lempe chca jamana, ntšamo tšabá bëtsemnana cha tojtsejuabnacá cada entšábioye jatštayëse.

Njetsca ošbuáchiyënga cányiñe, mo Crístbe cuerpcá jtsemnana

¹²Cuerpo nye canye soye endmëna y chë cuerpna ba soyënga jtsebomnana; masque chë cuerpo ba soyënga jtsebomnana, nye canye cuerpo jtsemnana. Bëngaftácnaca cachcá. Bënga banga mondmëna nyetscanga Crístbeñe ošbuáchiyënga, pero Crístbeyeca, bënga cányiñe mo canyacá jtsemnana. ¹³Er bënga nyetscanga, judiënga o ndoñe judiënga, nye ínñabiamna nyets tempo oservënënga o cachëngbiamna trabá-jayënga šojanëbaye, Crísoftaca cányiñe mo canyacá, jtsemnana mo chabe

cuerpcá, y chca yomna cach Espiritbeyeca; y Bëngbe Bëtsá tojama cach Espiritu nyetscangbe ainanoye cháumashënguama, bënga jtsamëndayama.

¹⁴Cachcá, canye cuerpo ndoñe nye canye soye ntsebomnana, ndayá ba soyënga. ¹⁵Nderado shecuatše tojyana: “Cucuatše ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, shecuatše mo chë cuerpentša soye ndoñe cuaftsemncá ndoñe ntjátsmënana. ¹⁶Nderado matscuaše tojyana: “Bominye ndoñe quetsátsmëna causa, atše cuerpentša soye ndoñe quetsátsmëna ca”. Chca tojayanamna, matscuaše chë cuerpentša soye ndoñe cuaftsemncá ndoñe ntjátsmënana. ¹⁷Nyets cuerpo bominye tojtsemnëse, bënga ndoñe muantsobena jouenama. Y nyets cuerpo matscuaše tojtsemnëse, bënga ndoñe muanjobenaye jonguétsetšiyana. ¹⁸Pero ndegombre endmëna, Bëngbe Bëtsá nyetsca soye cuerpentše tojancjá ndayentše cha tojánbošenentše. ¹⁹Nyetsca cuerpentša soyënga nye canye soye tojtsemnëse, ndoñe canye cuerpo nántsemna. ²⁰Pero ndegombre endmëna, masque ba soyënga cuerpentše yomna, nye canye cuerpo jtsemnana.

²¹Bominye quenátobena cucuatše jauyanana: “Ndoñe quecátsiyta ca”; y cachcá, bestšaše quenátobena shecuatše jauyanana: “Ndoñe quecátsiyta ca”. ²²Inyetsá, chë cuerpentša soyënga, chë tojtsinñana mo obenana ndbomna y nduámana soyëngcá, jtsemnana chë cuerpama más iyta soyënga. ²³Chë cuerpentša soyëngama, ndayama bënga tmojtsejuabná más nduámana soyënga yomna ca, bënga jamana más chaotsámanama, chiñe entšayaca jtichëtjëse. Y chë cuerpentša soyënga, ndayama bënga jtsëuatjana ínñenga

chamotsonyama, benga jamana inyenga ndoñe chamondetsonyama, chiñe entsayaca jtichetjese. ²⁴ Pero chë cuerpentša soyengaca, chë nyetscanga jtsonyayana y botamana jin'yama jtsemnana soyengacna, ndoñe ntseytana chca jatamana. Benge Betsá cuerpo tojama, ntšamo benga chamotsamama chentša más nduámana soyenga, más chaotsámanama, ntšamo chë soyenga benga tmojtsin'yenama. ²⁵ Cha chca tojanma, cuerpentša nyetsca soyenga chë cuerpama trabajo canyiñe chamotsamama, y chca, cada soye chaotsama trabajo chë cuerpentša nyetsca soyengbe tsabiama. ²⁶ Nderado canye cuerpentša soyama bacna soye tojopasá, chora nyetsca chë cuerpentša soyengámnaca chca ndoñe tsabe soye jtsebínynana; pero canye cuerpentša soyama tcojama más uámana soye chaotsemnana o ndaye tsabe soye tojopasase, chora nyetsca chë cuerpentša soyengámnaca chca tsabe soye jtsebínynana.

²⁷ Cachcá, tsengaftanga Crístbeñe ošbuachiyenga, cháftaca canyiñe mo canyáca jtsemnase, mo chabe cuerpcá jtsemnana, y cada ona tsengaftanguentsá mo chë cuerpentša soyengcá, jtsemnana mo chabe cuerpentša soyengcá. ²⁸ Ntšamo Benge Betsá cuerpentše soyenga tojancjá ndayentše inabošcá, cachcá, ošbuachiyengcá enefjuanéngbeñe Benge Betsá tojubuáyana, natsana báseftanga mo Jesucristbe ichmonéngcá, chorna Benge Betsabe juabna oyebuambnayenga, chorna Benge Betsabiama abuátambayenga, chorna chë bets soyenga Benge Betsabe obenánaca jamama obenana bomnenga, chë šoquenga jáshnama obenana bomnenga, chë inyengbioye puerte ujabuáchanenga, chë inye ošbuachiyéngbioye améndayenga,

y chë nyetsca biyañe jtsóyebuambnayama obenana bomnenga, tempo ndmabiyañe. ²⁹ Ndegombre, ošbuachiyengcá enefjuanéngbeñe nyetscanga ndoñe Jesucristbe ichmónenga ntsemnana, nyetscanga ndoñe Benge Betsabe juabna oyebuambnayenga, nyetscanga ndoñe abuátambayenga, nyetscanga ndoñe Benge Betsabe obenana bomnenga, bets soyenga jamama. ³⁰ Nyetscanga ndoñe šoquenga jáshnama obenana bomnenga; nyetscanga ndoñe nyetsca biyañe jtsóyebuambnayama obenana bomnenga, tempo ndmabiyañe; ni nyetscanga ndoñe obenana bomnenga quemátsmëna, chë tempo ndmabiyañe nyetsca biyañe jtsóyebuambnayama obenana bomnenga ntšamo tmojtsichamcá josértama y inyengbioye chama jtsabuayiynayama. ³¹ Pero tsengaftangna puerte šmochtseboše, lempe ntšamo chašmojobenacá šmochjama, chë Benge Betsabe más uámana tsetana obenana jéftsashjáchama.

Bonshánana jtsebomnana

Y inye soye más, atše cbochanjínyan'iye ntšamo šmojtsobena cabá más tsabá jtsiyenana, Benge Betsá jtseservénese.

13 Nderado atše stjóyebuambaye entsangbe biyañe y angeléngbe biyañe, pero inyengbioye ndoñe sentsababuán'yeshanése, atše stsemna canya tondayama uamaná, mo nye canye metaléshe tojtsenancá, o mo nye canye platillëshcá ndoñe tsabá tontsenanéshe. ² Y atše obenana stsebomna Benge Betsabe juabna jóyebuambayama y nyetsca soyengama, y chë Benge Betsá tempo entsanga ndoñe tonjanin'yan'yé soyenga šojtsesertana, y Benge Betsabe nyetsca soyengama stsetátšëmbo, y

Crístbeñe puerte stjesošbuáchiye, chca betsošbuáchema n̄ya mo chē t̄jashēnga chamobonjoma jamama, pero ín̄yenga ndoñe sēntsababuán̄yeshanēsna, at̄še tondaye sēntsemna. ³Y at̄še lempe nt̄samo stsebomncá ndbomn̄jémēnga stsējátaye, y ín̄yēngbioye st̄jenontréga at̄šbe cuerpo chamojuin̄yema, pero ín̄yēngbioye ndoñe sēntsababuán̄yeshanēse, at̄še ndocna uámana soye nt̄jashjáchana.

⁴Can̄ye ent̄sá ín̄yenga ababuan̄yeshaná, uantado jtsemnana masque padecena soyēnguñe t̄mojtsemna órnaca, y ín̄yēngaftaca t̄sabe ainánaca mando jtsebomnana. In̄yenga ababuan̄yeshaná ndoñe nt̄sánt̄sabošana nt̄samo in̄ya tojatsbomncá, ni nt̄senábotamnayana, ni cachá chē ín̄yēngbiama más uamaná nt̄játēnobiamnayana; ⁵ndoñe bacá mandbomná ín̄yēngaftaca ntsemnana, ni n̄yets tempo nt̄sebošana y lempe jtsamana n̄ye chabiamna t̄sabe soye jón̄yēnama; cha n̄ye ndayám̄naca ndoñe nt̄jetnana, nt̄samo ín̄yenga t̄mojaborlá ora jtsaperdónayana. ⁶In̄yenga ababuan̄yeshaná ndoñe nt̄jóyejuayana chē ndoñe t̄sabá yondmēna soyēngama; chē ndegombre yomna soyēngamna añe. ⁷In̄yenga ababuan̄yeshaná, ainaniñe añemo jtsebomnana n̄yetsca padecena soyēnguñe, lempe nt̄samo más t̄sabá yomna soyēnguñe jtsošbuáchiyana, n̄yetsca más t̄sabá yomna soyēngama jtsobátmanana, y jtsóboyayana n̄yetsca toto soyēnga.

⁸Bonshánana n̄yetsca tescama jēftsemnana. Can̄ye te echántsemna, chora chē Uámana Espíritu ndoñe más queochátama ent̄sanga Bēngbe Bētsabe juabna chamotsóyebuambnama, ni chē ndocna te ndmabiyañe chamotsóyebuambnama, ni chē puerte jt̄setat̄sēmbēse jóyebuambayama obenama chamotsebomnana; ⁹er nt̄samo

mora bēnga imotatsēmbcá y Bēngbe Bētsabe juábnaca jóyebuambayēse t̄mojayana soyēnga, n̄ye bat̄satema bēngbioye jt̄sin̄yan̄nayana Bēngbe Bētsabe soyēngama, ndoñe lempe; ¹⁰pero Jesucristo chaojésabo ora, y chaojama bēnga chamotsemna lempe nt̄samo Bēngbe Bētsá bēngbiama yojanjuabnacá, quem soyēnga, chē n̄ye bat̄satema bēngbioye jt̄sin̄yan̄nayana Bēngbe Bētsabe soyēngama, ya ndoñe más queochát̄sin̄yana.

¹¹At̄še básetema ora, sēnjanoyebuambná, sēnjanjuabná, y soyēngama t̄sabá jt̄setat̄sēmbuamna sēnjanjuabná mo can̄ye basetemcá; pero bētsá sēnjanóbema orna, sēnt̄sanajbaná lempe amana mo can̄ye basetemcá. ¹²Cachcá, mora bēnga quem luarent̄še n̄ye bat̄satema Bēngbe Bētsabe soyēngama jt̄setat̄sēmbuana, mo can̄ye espejuñe t̄mojt̄son̄yacá, pero ndoñe n̄ya corente t̄sabá. Pero can̄ye te bēnga mochánt̄setat̄sēmbō lempe n̄yetsca soyēngama, bēnga Bēngbe Bētsabe delante chamojt̄semna ora. Mora at̄še sēnt̄setat̄sēmbō n̄ye bat̄satema Bēngbe Bētsabe soyēngama, pero chora lempe chanjuábuatmana, nt̄samo Bēngbe Bētsá corente šuabuamcá.

¹³Pero morna, Bēngbe Bētsábeñe jt̄sošbuáchiyana, chábeñe jtsobátmanana, y chábioye y ín̄yēngbioye jtsababuán̄yeshanana, chē soyēngna n̄yetsca tescama jēftsemnana; pero chent̄šana chē más uámana soye endmēna ín̄yenga jtsababuán̄yeshanana.

Ndmabiyañe obenana Bēngbe Bētsabe t̄setánana

14 Bētscá šmochtsama n̄yetscanga jtsababuán̄yeshanēse chašmot-siyenama, y puerte šmochtseboše jtsebomnana chē Bēngbe Bētsabe t̄setana obenana t̄sabe soyēnga jamama; pero chent̄šana masna, chē Bēngbe

Bëtsabe juabna jóyebuambayama obenana. ²Er chë tempo ndmabiyañe mora jóyebuambayama obenana bomná, Bëngbe Bëtsábioye jtsatsëtsnayana y ndoñe entšángbioye, er ndegombre entšanguentše ntšamo cha tojsoyebuambnacá ndocná ntjosértana; chana chabe espíritoftaca jtsóyebuambnayana y ndoñe nýe chabe juábnaca, chë tempo Bëngbe Bëtsá ndocna entšábioye tbonjaninýinýe soyëngama. ³Pero chë Bëngbe Bëtsabe juabna oyeuambnayana entšanga jtsëtsëtsnayana, chënga más chamotsošbuáchema y ainaniñe añemo chamotsebomnama, Bëngbe Bëtsabe soyëngama jábuayenama, y jamama padecena soyënguine tmojtsemna órnaca añemo chamotsebomnama. ⁴Chë tempo ndmabiyañe mora jóyebuambayama obenana bomná, jtsamana nýe cha más jtsošbuáchiyama y ainaniñe añemo jtsebomnama; pero chë Bëngbe Bëtsabe juabna oyeuambnayana jtsamana chë ošbuachiyëngcá enefjuanënga chca soyënga chamotsebomnama.

⁵Atše séntseboše nyetsca tšëngaftanga chë tempo ndoñe šmonjanbiyañe mora jóyebuambayama obenana chašmotsebomnama, pero chama atše más séntseboše tšëngaftanga chë Bëngbe Bëtsabe juábnaca soyënga chašmotsóyebuambnama. Chë Bëngbe Bëtsabe juábnaca soyënga oyeuambnayá más uamaná jtsemnana chë inýe biyañe oyeuambnayabiama; chca ndoñe nántsemna, ntšamo canýe biyañe tojayancá chë biyañe oyeuambnayá tbojtsësertánëse y chë ošbuachiyëngcá enefjuanënga tojábuyenase, y chca, chë soyënga tmojouenama, chënga chamotsobena más jtsošbuáchiyama y añemo jtsebomnama. ⁶Y mora, Jesucristbeyeca atšbe catšátanga, atše nderado tcojóabuache y nýe inýe biyañe tcojóuyanëse, ¿chca

ntšamo cbatjújabuache? Atše jtsobenana jujabuáchana, nýe ntšamo chë biyañe tijayancá átsnaca šojtsësertánëse, y ndayá Bëngbe Bëtsá šojinýinýecá entšanga jábuayenama stjobenase, chë Bëngbe Bëtsá tojama atše jtsetatšëmbuama soye, chë Bëngbe Bëtsabe juábnaca stsoyebuambná soye o chë tšëngaftanga jabuá-tambama cha yoboše soye.

⁷Entšanga monduamana ndayánaca juénanana, mo flautëfja o arpa, vida ndbomna soyënga; cada sóyeca inýetšá juénanama ndoñe tontsopodénëse, ndocná nantsobena jtsetatšëmbuama ndayá canýa chë soyëngaca yojtsënanama. ⁸Y nderado nda trompetëfjua tojuájatëta ora, soldadënga japéliama chamoprontama, chë uajatëtaná inýetšá, nýa chama ndoñe tonjuájatëtëse, ndocná buanjoserá y jenpéliama ndoñe nanjopróna. ⁹Tšëngaftangaftácnaca cachcá jtsopasánana. Inýenga paselo josértama jobenaycnana tšëngaftanga ndoñe šmonjóyebuambase, ndocná queochátstatšëmbo ntšamo šmojtsichamcá. Nántsemna mo nýe cánýenga cuaftsoyebuambnacá. ¹⁰Atše séntsejuabná, ndegombre quem luarentše ba inýe biyañe entšanga imnétsoyebuambnayana, y ndaye biyáñnaca tmojoyebuambá ora, sempre jtsemnana inýenga ntšamo chënga tmojtsichamcá osertánënga. ¹¹Pero ntšamo inýa chabe biyañe šojauyancá atše ndoñe šontsësertánëse, atše stsemna canýe chabiama ndosertana biyañe oyeuambnayá, y chánaca cachcá atšbiama. ¹²Chcasna, chë Uámána Espíritu šondinýanýná obenana jtsebomnama tšëngaftanga puerte šmobóšeyeca, lempe ntšamo šmojobenacá šmochtsama chca tšetana obenana jóyëngacñama, chë ošbuáchiyënga más jtsošbuáchiyama y añemo jtsebomnama inétsama obenana.

¹³ Chíyeca, chë tempo ndmabiyañe mora jóyebuambayama obenana tojtsebomná, Bëngbe Bëtsá chabotseimpadana, cha chaoma ntšamo chë inye biyañe tojayancá chabosertama y ošbuachiyënga jábuayenama obenana chaotsebomnama. ¹⁴ Pero atše Bëngbe Bëtsáftaca stjencuénta, chë ndmabiyañe jóyebuambayama cha obenana šojanatšetacá jtsóyebuambayëse, atše espíritu cháftaca nantsóyebuambnaye, pero atšbe juabna ndoñe ntsetatšëmbuana ntšamo chë espíritu tojtsoyebuambnacá.

¹⁵ Y asna, ¿ntšamo atše chtsemana? Bëngbe Bëtsáftaca chanjencuénta atšbe espíritoca, pero ntšamo stsichámuama jtsejuabnayësnaca. Bëngbe Bëtsá jëtschuayama chanjavérsia atšbe espíritoca, pero chca chanjama chíñnaca jtsejuabnayëse. ¹⁶ Nderado aca Bëngbe Bëtsá cojtsatschuaná nje espíritoca, y canya quem Bëngbe Bëtsabe tšetana obenanama ndosertaná tcmojóyeunase, cha ndoñe ntšobenana jayanana “chca chaotsemna ca”, cach aquécá cha yojtsejuabnama jinjinyiyama, er ntšamo cojtsichamcá cha ndoñe ntšesertánana. ¹⁷ Aca jtsobenana chca puerte tšabá Bëngbe Bëtsá jëtschuayana, pero ntšamo tcojtsamcá ndoñe ntjamana inya ndaye tšabe soye chaotsebomnama. ¹⁸ Atše, Bëngbe Bëtsá sentsatschuaná inye biyañe jóyebuambayama tšëngaftangbiama más tsobenama; ¹⁹ pero Cristbeñe ošbuachiyëngcá tmojënefjna ora, atše más sëndbétseboše nje mo shachna palabratémnaca jóyebuambayana, chënga añe catafjosertacá, chca, inyënga jabuátambama, y ndoñe bnétsana uaranga palabrenga jatóyebuambnayana inye biyañe, chënga chaósertama ndoñe tontsopodénese.

²⁰ Jesucristbeyeca atšbe catsátanga, šmochtsajbaná basetemëngcá

juabnayana. Mo šešonatemëngcá šmochtsemna, bacna soyënga jamama ntsetatšëmbcá; pero mo bëtsetsangcá tšabá šmochtsejuabnaye. ²¹ Bëngbe Bëtsabe uabemana palabrenguñe, Bëngbe Utabná mëntšá tojánayana: Atše quem entšangbioye chanjáuyana, inyënga inye luarëngocana ashjajnëngaftaca, chëngbiama canye ndosertana biyañe oyebuambnayënga; y chanjáuyana ndayá chëngbe biyañe chamojtsichamo soyëngaca; pero ni chca, chënga ndoñe quešmochatóyeunaye ca.

²² Chcasna, inye biyañe jóyebuambayama obenana jtsebomnana endmëna, Bëngbe Bëtsá ndayánaca chë chábeñe ndošbuachiyëngbioye jinjanyiyama, y chábeñe ošbuachiyëngbioyna ndoñe. Pero, Bëngbe Bëtsabe juabna jóyebuambayama obenana jtsebomnana endmëna, Bëngbe Bëtsá ndayánaca chábeñe ošbuachiyëngbioye jinjanyiyama, y chábeñe ndošbuachiyëngbioyna ndoñe. ²³ Er tšëngaftanga nyetscanga ošbuachiyëngcá šmojënefjna ora, nyetscanga ba biyañe šmojtsoyebuambná, y choye tojámashëngo canya chca Bëngbe Bëtsabe tšetana obenanama ndosertaná o chábeñe ndošbuachiyá, cha nanjájuaboye tšëngaftanga opënga šmojtsóbema ca. ²⁴ Pero nyetscanga tmojtsichamo, Bëngbe Bëtsabe juábncaca jtsóyebuambnaye, y choye tojámashëngo canya Bëngbe Bëtsabeñe ndošbuachiyá o canya chca Bëngbe Bëtsabe tšetana obenanama ndosertaná, ntšamo chašmojtsichamcá cha bochanjosérta; y chë soye cha bochanjayëñjana cha bacna soyënga tojamama, y ndayá cha tojamiñe corente echántsejuabnaye, ntšamo nyetscanga tmojtsichámuama. ²⁵ Y Bëngbe Bëtsá chábioye bochanjinjinyiye ntšamo cha

ainaniñe tojajuabó y tojabošencá, ndayá ndocnábioye tbonjinñiyecá, y cha echanjoshéntsamentsiye Bèngbe Bètsá jadórama, y tsèngaftangbe delante echanjayana Bèngbe Bètsá ndegombre tsèngaftangbeñe yojtsemna ca.

**Ošbuachiyèngcá šmojénefjna
ora, ntšamo tšabá yomncá
lempe šmochtsama**

²⁶ Chcasna, Jesucristbeyeca atšbe catšátanga, šmojénefjna ora, cada ona ndayánaca jtsebomnana nyetscangbiama: ín्यengna jtsobenana javérsiama, Bèngbe Bètsá jètschuayama, ín्यengna jtsobenana jabuátambana o jábuayenama ndayá Bèngbe Bètsá tojinñanyecá, o tempo ndmabiyañe chora jtsóyeuambnayana, o entsanga jábuayenana ntšamo inya inye biyañe tojayancá. Pero lempe šmochjama, ošbuachiyènga más chamotsošbuáchema y más añemo chamotsebomnana Cristo jaserviama. ²⁷ Nderado inye biyañe jóyeuambayama tojtsemnèse, útata o nya másese únganga chca chamoyeuambá, y canyánya; y jtseytana ndánaca ntšamo tmojttsichamcá chabosertá y nyetscanga chama chauabuayená. ²⁸ Y chca chabosertama y nyetscanga jábuayenama ošbuachiyèngbeñe ndocná tontsemnèse, as ošbuachiyèngcá chamojénefjna ora chë chca oyeuambnayá bontsemna ndoñe chca biyañe ntsoyeuambnayana, sinó nye canya tojtsemna ora cha jtsobenana chca Bèngbe Bètsáftaca jencuéntana. ²⁹ Utata o únganga entsamna jayanana soyènga, Bèngbe Bètsabe juábnaca jtsóyeuambnayèse; y chë ín्यenga jtsamnana botamana jajuaboyana y jayanana ntšamo chënga tmojayancá aña o ndoñe Bèngbe Bètsábíocana tayojsóbocanama. ³⁰ Pero canya Bèngbe Bètsabe juabna

tojtsóyeuambnantscuana, inya chentše ouenana tbemanábioye Bèngbe Bètsá tbojinñinyé ndayánaca yojtsebomna jayanama, as chë natsana oyeuambnayá iytëca chaóbema, y chabolesenciá chë inya chaóyeuambama. ³¹ Chca, nyetscanga, canyánya jtsobenana jayanana soyènga, Bèngbe Bètsabe juábnaca jtsóyeuambnayèse, nyetscanga chamuatsjñyama y nyetscanga añemo jatšatayama. ³² Chë Bèngbe Bètsabe juabna oyeuambnayá endobena jtsemándayana ntšamo tojttsichamcá, cha cachabe espíritoca tojtsoyeuambná ora; ³³ er Bèngbe Bètsá endmèna nda inétsama bënga natjémbana chamotsiyenama, y ndoñe chë bënga nyetscanga cachcá ndoñe chamondètsejuabnama, y nye ntšamo cada ona tojtsebošcá chaotsamama.

Ntšamo nyets luarènguenache, chë ošbuáchiyènga, chë Bèngbe Bètsabe entsanga mondbénefjna luarènguenache endbetsemncá, ³⁴ tsèngaftangbéntšnaca, shembásenga entsamna iytëca jobiamèngana, ošbuachiyèngcá šmojénefjna ora, er ndoñe quenátslesenciana chënga chora chamuátoyeuambnama, y aña chënga entsamna chëngbe boyanga jtsayaunanana, ntšamo Moisesbe leyiñe endayancá. ³⁵ Chënga ndayánaca jtsetatšëmbuama tmojtsebošëse, cachèngbe boyángbioye yebnoca chamotjanga; er ndoñe corente tšabá ntsemnana canye shembása jtsóyeuambnayana tsèngaftanga ošbuachiyèngcá šmojénefjna ora.

³⁶ ¿Tsèngaftanga šmojatsjuabná, Bèngbe Bètsabe tšabe noticiènga tsèngaftangbeñe tojanobojaťsé ca, o nye tsèngaftanga chë soyènga šmojanóyèngacñe ca? Ndegombre ndoñe chca; chíyeca tsèngaftanga nye canyènga ndoñe ntsobenana jayanama ndayá jamama cmojtsamnana. ³⁷ Nda

tojtsejuabná cha Bëngbe Bëtsabe juabna oyebuambnayá yomna ca, o chabe ainaniñe chë Espíritu jtsemándayama yojtsebomna ca, cha bontsemna tšabá jsetatšëmbuana, ntšamo Bëngbe Utabná šojamandacá atše stsabiamnama. ³⁸ Pero cha ndoñe chca tontsetátšëmbo y chca ndoñe yondmëna ca tojayanëse, ndayá cha tojayaná ndoñe šmatjójëngacñe.

³⁹ Chcasna, Jesucristbeyeca atšbe catsátanga, puerte šmochtseboše Bëngbe Bëtsabe juábnaca soyënga jtsóyebuambnayama obenana jtsebomnama, y ndoñe šmattsama chë tempo ndmabiyañe ínÿenga ndoñe chamondëtsóyebuambnama; ⁴⁰ pero lempe šmochjama ntšamo jamama yomncá, y ndoñe nÿe ntšamo cada ona tojatsjuabnacá.

Cristo tojtanayenama

15 Morna, Jesucristbeyeca atšbe catsátanga, atše séntseboše tšëngaftanga chašmuatenójuaboma atše tcbonjanabuayená tšabe noticiënguñe, ndayá tšëngaftanga šmonjanóyëngacñe, chë ndáyeca tšëngaftanga Jesucristbeñe šmojtsošbuaché y cha jtseservënëse šmojtsiyena. ² Chca šmobómnayeca, tšëngaftanga atsebácanënga šmojtsemna, pero tšëngaftanga sempre chiñe šmojtsošbuachese, ntšamo cbonjanabuayinacá; chca ndóñesna, nÿe ndoñe corente tšabá ntjajuaboycá chë buayenana soyënguñe šmojtsanošbuaché.

³ Er atše tšëngaftangbeñe sënjéftsanboshjona, Bëngbe Bëtsábíocana atše tjanóyëngacñe más uámána buatëmbana soyënga. Atše tcbonjabuatambá: Cristo tojanóbana bënga bacna soyënga tmojamama, ntšamo Bëngbe Bëtsabe uabemana palabrenguñe chabe juabna oyebuambnayënga chama tmojanayancá;

⁴ chë Cristo tmojanatbontsá y unga tianoye cha cháuatayenama Bëngbe Bëtsá tojanmama, ntšamo Bëngbe Bëtsabe uabemana palabrenguñe chabe juabna oyebuambnayënga chama tmojanayancá; ⁵ chë Pédrëbioye tbojánëbëbocnama, y chentšana chë bnëtsana útata ca uabobáinëngbioynaca. ⁶ Chentšana mo shachna patsama más chábeñe ošbuáchiyënga tojánëbëbuacna, chënga cánÿentše imojtsemna ora; chënguentšanga banga cabá vida imotsóbonñe, masque báseftanga ya tmojóbana. ⁷ Chentšana Santiágbioye tbojánëbëbocna, y chentšana nÿetsca chabe ichmónëngbioye.

⁸ Y chentšana átsnaca šonjánëbëbocna. Mo canÿe šešona cabá shbená tojonýnacá, Cristo chabe ichmoná šonjánbema, chë tempo chama jopróntama ntsebomncá, ndayëntscuana ínÿenga cha tojanabuatambá. ⁹ Er atše sëndmëna chë más batšá uamaná Jesucristbe ichmónëngbeñe; y ni merecido taitsatobuajoñe “chabe ichmoná ca” chašmotsábobuatmama, er atše tša sënjánama Jesucristbeñe ošbuáchiyënga chamotsesufrínama. ¹⁰ Pero Bëngbe Bëtsá atšbe tšabiamna yojanjuabná, y chíyeca atše mora tsmëna ntšamo sëndmëncá, y chabe tšabe juábnaca atšbiamna jtsamana, ndoñe nÿe bonamente quenátsmëna. Er atše más sënjatrabajá, chë inÿe Jesucristbe ichmónëngbiama; pero ndegombre atše ndoñe nÿe canÿa chca chiyatsma, sinó masna Bëngbe Bëtsá chë trabajo tojama, tšabe juabna atšbiamna jtsebomnëse. ¹¹ Ndayá más yojtsámána ndoñe quenátsmëna, atše o chënga, Jesucristbe soyëngama abuayinayinñe más tojatrabajá, sinó ndayá chë soyënga bëngbe buayenana soye yojtsemna, y tšëngaftanga chiñe šmojtsošbuaché.

Chë obanënga cachiñe vida mochtsatsbomnama

¹² Pero bëngbe buayenana soye endmëna, Bëngbe Bëtsá tojanma Cristo cháuatayenama; as ¿ndáyeca básefta tsëngaftanga šmnëtsichamo Bëngbe Bëtsá ndoñe yochanjama chë mora obanënga chámuatayenama ca? ¹³ Pero chca tojtsemna, chë obanënga ndoñe mochántayenasna, Cristo cach ndoñe tontanayena; ¹⁴ y Cristo ndoñe matenjésayenëse, bënga nÿe bonamente chabiamas ftsabuayiyiná, y tsëngaftanga nÿe bonamente chábeñe šmojtsošbuaché. ¹⁵ Y canÿe más bëts soye: chca tojtsemnësna, bënga muanjábocna mo chë Bëngbe Bëtsabiama soyënga tmojinÿe ca ichamëngcá, pero ndoñe ndegombre chca tontsemna; er bënga fsëndbëtsichamo, Cristo cháuatayenama Bëngbe Bëtsá tojanma ca. Pero chë obanënga ndoñe mochántayenasna, Bëngbe Bëtsá ndoñe tonjanma Cristo cháuatayenama. ¹⁶ Pero chë obanënga ndoñe mochántayenasna, Cristo cach ndoñe tontanayena. ¹⁷ Y Cristo cháuatayenama Bëngbe Bëtsá ndoñe matënjänmëse, tsëngaftanga nÿe tondayama chábeñe šmojtsošbuaché; tsëngaftanga chë bacna soyëngama cabá ndoñe perdonánënga šmontsemna. ¹⁸ Y chca, chë tmojanóbanënga, Crístbeñe ošbuáchiyënga, chënga cach ndoñe chëngbe bacna soyënguentšana atsebácanënga quemochátsmëna, sinó nÿetsca tescama castigánënga. ¹⁹ Bënga tmojtsobátmana Cristo bëngbiama tsábe soyënga chaotsamama, pero chca nÿe quem luarentše bënga vida tmojtsebomnëntscuana, as bënga nÿetscangbiama más muantsomerecena, nÿetscanga bëngbiama chaotsangmënama.

²⁰ Pero chca ndoñe ndegombre quenátsmëna, er ndegombre Bëngbe

Bëtsá tojanma Cristo cháuatayenama. Mo chë uanatsena shajuancá, jtsinÿanÿnayana más shajuanënga chentšana yochjóbcnama, cachcá, Cristo tojtanayena ora, cha tojaninÿanÿé Bëngbe Bëtsá yochjanma ínÿenga chábeñe ošbuáchiyënga chámuatayenama vida chamotsatsbomnama.

²¹ Chca, ndayá canÿe entšá, Adán, tojanmama, nÿetscanga jóbanama yojtsamna, cachcá, ntšamo inÿe entšá, Cristo, tojanmama, Bëngbe Bëtsá yochjama entšanga chámuatayenama.

²² Er ntšamo, Adánbentšana entšanga bëtsemnayeca jóbanama jtsamnana, cachcá, Crístbeñe ošbuáchiyënga bëtsemnayeca, Bëngbe Bëtsá jamana chë nÿetsca tescama yomna tsábe vida chënga chamotsebomnama.

²³ Pero Bëngbe Bëtsá jamana cada ona cháuatayenama nÿa chama tempo tojtsemna ora. Natsana Cristo, y chentšana, Cristo cachiñe quem luaroye chaojésabo ora, nÿetscanga chë Crístbe entšanga imomnënga.

²⁴ Y chentšana, Bëngbe Bëtsá chë Taitábioye, Cristo chabe amëndayana chabojantšabuaché ora, nÿetsca mandadënga, mando y obenana bomnënga corente jtsayëñjanayëse.

²⁵ Er Cristo bontsemna ínÿenga mo reycá jtsamëndayana, chabe uayayënga chabe cucuatšinë chamoquedama Bëngbe Bëtsá tojamëntscuana.

²⁶ Canÿe uayayá inëtsama entšanga jóbanama; pero Cristo último echanjama chabe obenana pronto chaotsopochocama.

²⁷ Er ntšamo Bëngbe Bëtsabe uabemana palabrenguiñe endayancá: “Bëngbe Bëtsá tojama Cristo nÿetsca soyënguiñe chaotsemándama ca.” Pero “tojama Cristo nÿetsca soyënguiñe chaotsemándama ca” tojayana ora, jtsopodénana puerta tsábá jinÿama, chca ndoñe yontsayana, Bëngbe Bëtsá Crístbeyeca mandaná yojtsemna ca; Bëngbe Bëtsá

nda tojanma Cristo nyetsca soyënguine chaotsemándama. ²⁸Y Cristo nyetsca soyënguine chaojtsemánda ora, cach Cristo, chë Uaquiñá, echántsemna Bëngbe Bëtsábeyeca mandaná, Bëngbe Bëtsá chë Cristo nyetsca soyënguine chaotsemándama tojanmá. Y chca, Bëngbe Bëtsá lempe echántsemna, lempe ntšamo quem luarentše yobínynië.

²⁹Inyetsánaca, báseftanga cachië uabáinënga imojtsemna, chë ošbuáchiyënga nduabáinënga obanëngbe cuenta. Chca chënga jamana mo chë obanënga uabáinënga chamotsemnana cuafjamcá. Chë obanënga chámuatayenama ndoñe tontsemnëse, ¿ndáyeca entsanga chëngbe cuenta muantenábaye? ³⁰Obanënga chámuatayenama Bëngbe Bëtsá ndoñe tonjamëse, ¿ndáyeca bënga muántseprontana nyets tempo resjuië jtsajnama, Cristbiana oservena causa? ³¹Atšbiana cada te resjo endmëna jóbanama. Jesucristbeyeca atšbe catsátanga, atše séntsiçhamo, chca ndegombre yómnyeyeca, atše oyejuayá stsemna ca, mo Cristo Jesús Bëngbe Utabnabe canyë oservenacá, tsëngaftanga chábeñe šmojtsošbuáçhema. ³²Mo canya tsátjaye bayëngaca tojtsentsjaná orcá, atšbiana puerte resjo enjamna jóbanama, Efeso puebloca; pero nye chë entsanga mondbëtsejuabnaye jëftsashjáçhama soyënga jtsebošëse chca matsjamnëse, ¿ndaye tsábe soye matëñjanóbocna, chca atšbiana resjo jóbanama enjamna ora? Obanënga ndoñe mochántayenësna, mochtsama ntšamo entsanga jayanana monduamancá: “¡Mochjase y mochjofsiye, nderado yëfse muatjóbana ca!”

³³Ndoñe matenoíngñana. Ntšamo canya tojanayancá: “Nderado nda bacna amiguëngaftaca tojtsenutaná,

cha jtsajbanana chë tsábe soyënga, ntšamo jtsamëse yojoyena.” ³⁴Tšabá šmochtenójuaboye, y juabna ndbomnacá ndoñe; y šmochtsajbaná bacna soyënga amana, chë obanënga ndoñe mochántayena ca juabnaye causa, er báseftanga tsëngaftanguentše Bëngbe Bëtsabe soyënga ndoñe quešmatábuatma. Atše chca séntsiçhamo tsëngaftanga chašmotsëuatjama.

Ntšamo chë obanënga mochtayena

³⁵Pero nderado nda nanjatjaye: “¿Ntšamo chë obanënga mochtayena ca? ¿Mocna cuerpo mochtsebomna ca?” ³⁶¡Juabna ndbomna entsá! Ndayá tcojajé orna, jtseytana chë jénaye chaóbanama, chë matatema vida chaotsebomnana. ³⁷Ndayá tcojajecá ndoñe ntsemnana chë juábocnama matatema, ndayá nye chë meshe, trigo meshe o ndaye mata méshnaca jtsemnana. ³⁸Pero Bëngbe Bëtsá jamana chë jénayentsana mata chauábocnama, ntšamo jamama cha tojajuabocá; y cha jamana cada jénayentsana canyë mata chauábocnama, ntšamo chë jénayentsana chauábocnama tojtsemncá. ³⁹Nyetsca cuerpënga ndoñe cachcá ntsemnana. Entsanga canyë cuerpo mondbomna, bayënga inyë cuerpo, shloftënga inyë cuerpo, y beongna inyë cuerpo. ⁴⁰Chë celoca vida bomnënga inyetsá jtsinynana, y chë quem luarentše vida bomnëngna inyetsá. Pero chë buashinjinanana y botamanana ntšamo celoca vida bomnënga jtsinynancá, ndoñe cachcá ntsemnana chë quem luarentše vida bomnëngbe botamanancá. ⁴¹Cachcá, shinye ndoñe quenátsbomna cachca buashinjinana juashconcá, ni estrellëngcá; y estrellënguentše cach ndoñe cachcá ntsebuashinjinanana.

⁴²Cachcá, chë obanënga chámuatayenama Bëngbe Bëtsá chaojama

ora chamojtse bomna cuerpo, ndoñe queochátsmëna cachcá ntšamo quem luarentše imojaniyena ora imojéjtse bomna cuerpcá. Ntšamo chë jénaye tcojuatbontsá ora chiye jóbanana, cachcá, quem luarentše bënga mondbomna cuerpo jóbanana, ínÿenga juatbontsana y jtsopochócana; pero bënga chámuatayenama Bëngbe Bëtsá chaojama ora, bënga tsëm cuerpo mochántsats bomna y ndocna te queochatopochóca. ⁴³ Chë óbana cuerpo tmojuatbontsá ora, chë cuerpo tondaye ntsámanana; pero chë obanënga chámuatayenama Bëngbe Bëtsá chaojama ora, chë tsëm cuerpo puerte echántsebuashinÿinÿana y echantsámána. Bënga quem luarentše imoyenëntscuana imobomna cuerpo, nÿe batšá obenana jtse bomnana; pero chë Bëngbe Bëtsá šochjatsataye tsëm cuerpo, puerte obenana bomna cuerpo echántsemna. ⁴⁴ Quem luarentše imobomna cuerpo endmëna cam luarentše vida chaotse bomnana; pero bënga chámuatayenama chaojama ora, chë bënga mochtse bomna tsëm cuerpo, puerte chë Espíritbeyeca echántseman-dana. Canÿe cuerpo quem luarentše vida chaotse bomnana yómnyeyeca, canÿe cuérpënaca, jtsemnana celoca vida chaotse bomnana.

⁴⁵ Chca Bëngbe Bëtsabe uabemana palabrenguine endayana: “Bëngbe Bëtsá, chë natsana entšá tbojanma chaotsainama ca.” Adánbentsána nÿetsca entšanga jabocanana, pero Crístbeyeca, Bëngbe Bëtsá tojama banga mo tsmëna entšangcá chamotsemnana; chca, Cristo jtsemnana mo chë ústonoye Adancá; pero Crístna canÿe espíritu endmëna, y chë espíritu jamana entšanga chë nÿetsca tescama yomna tšabe vida chamotse bomnana. ⁴⁶ Pero chë celoca nÿetsca tescama vida jtse bomnana cuerpnana ndoñe natsana

ntjóbcnana, ndayá chë quem luarentše vida jtse bomnana cuerpo; chentsána chë celoca vida jtse bomnana cuerpo. ⁴⁷ Bëngbe Bëtsá, chë natsana entšá tbojanma fshántseca, y chca, cha fshantsentsána tojánbocna; Crístna, mo entšangbentsána chë natsaná tsmacá bemanacá, celocana tojánbocna. ⁴⁸ Adánbentsána, chë natsana entšá, chë fshántseca tmojanmábentsána tmojábocanënga, ntšamo cha yojamncá jtsemnana. Cachcá, chë mo tsmëmangcá tojábiamëngna, Crístcá jtsemnana; Cristo nda celocana tojánabo.

⁴⁹ Ntšamo bënga jtšinÿnana chë Bëngbe Bëtsá fshántseca tbojánbema entšacá, cachcá béngnaca mochtsinÿna ntšamo chë celocá yomnacá.

⁵⁰ Jesucrístbeyeca atšbe catšátanga, atše cbochjáuyana, nÿe quem luarentše vida jtse bomnana cuerpëngaca, bënga ndoñe ntso benana Bëngbe Bëtsabe amëndayoye jamashënguana; ni ndayá yochjopochóca soye, ntso benana ndayá ndoñe yochanjopochóca soye jtse bomnana. ⁵¹ Šmochjouena, atše canÿe soye cbochanjáuyana, y chë soye Bëngbe Bëtsá entšanga tempo ndoñe tonjaninÿanÿé: Bënga ošbuáchiyënga nÿetscanga ndoñe quemochatóbana, pero Bëngbe Bëtsá šochanjátrocaye mo tsmëmangcá. ⁵² Nÿe betesco, mo tcojofshetá y cachora tcojtafšnacá, quem luare ya jopochócama ora, canÿe ángel trompeté fjua chaojuátatëta ora, er chora trompeté fjua echanjuénana, Bëngbe Bëtsá echanjama obanënga chámuatayenama, nÿetsca tescama vida jtse bomnana; y bënga, chë ainënga mochtse mnëngna, cha šochanjátrocaye mo tsmëmangcá jtsemnana; ⁵³ er jtseytana Bëngbe Bëtsá chaotrocá chë béngbeñe jopochócama yomna soye, ndocna te yochanjopochóca soyiñe; y ndayá béngbeñe yochjóbana soye, ndocna te yochanjóbana soyiñe.

⁵⁴Bëngbe Bëtsá chca béngaftaca chaojama ora, chë cha jatrócana ndayá béngbeñe yochjopochocacá, ndocna te yochanjopochóca soyiñe, y ndayá béngbeñe yochjobancá, ndocna te yochanjóbana soyiñe, chora echanjochnëgo ntšamo Bëngbe Bëtsabe uabemana palabreñguine chama endayanacá:

Bëngbe Bëtsá tojajëñaná chë entsanga chamóbanama endbëtsama obenana; entsanga ndoñe más quemochatóbana ca.

⁵⁵¡Mora entsanga chamuatóbanama chaotsama obenana ya ndoñe quenátsmëna;

Bëngbe Bëtsá chë obenana nyetsca tescama tojajëñaná ca!

⁵⁶Entsanga bacna soyënga tmojama causa, obenana endmëna entsanga jóbana chaotsamnama. Ndayá leyiñe iuayanama, entsá jtsetatsëmbuana ndayá yomna bacna soyënga jamana, y chca tátšëmbo causa, chca bacna soyënga jamama juabnéngaca mandaná jtsemnana, y cabana, jóbana jtsemnana. ⁵⁷¡Pero Bëngbe Bëtsá mochtsatschuanaye, bënga mo ayëñanayëngcá cha šojábiamama, er ya ndoñe šontsamna chca jtsemnana, chë Bëngbe Utabná Jesucristo bëngbiana tojanma sóyeca!

⁵⁸Chíyeca, Jesucristbeyeca atšbe catšátanga, atšbe bonshánënga, Jesucristbeñe sempre puerte šmochtsosbuáchiye y ndocna te šmatjalesëncia ndocná ni tondaye chaotsama chábeñe ošbuáchiyana chašmotsajbanama. Sempre šmochtsentšena bëtscá jtsamana Bëngbe Utabnabiana trabájayiñe, er tšëngaftanga šmondétatsëmbo, Bëngbe Utabnabiana trabájayiñe ndayá šmojamcá, ndocna te nyë bonamente ntsemnana.

Jerusalenoca ošbuáchiyëngbiana crocenánama

16 Mora chanjóyebuambaye chë Jerusalenoca Bëngbe Bëtsabe entsanga ndbomnějëmëngbiana tšëngaftanga šmochjuíchmua crocenánama. Atšë sëntseboše tšëngaftanga chca chašmoma ntšamo chë Galacia luaroca ošbuachiyëngcá enefjuanenache chama atšë sënjanabuayenacá. ²Cada tmengo, cmontsamna batšá crocénana jaluárana ntšamo chë semaniñe šmojonycá, y šmochtsejuabaye; chca atšë choye chajjá ora, ndoñe chacmondëtsamna quem uajabótama chora crocénana játatbanayana. ³Y atšë choye chajjáshjango ora, Jerusalenoye chjichamuá chë tšëngaftanga mo tšabengcá šmojubuáyana entsanga, chë Jerusalenoca ošbuachiyëngbiyoe tšëngaftangbe crocénana chámuayentšbuachema, y tsbuanachangá chanjúyentšbuachiye ndayá imojtsamama chënga jábuayenama. ⁴Y nderado, átsnaca chëngaftaca jama tšabá tojtsemnëse, chënga átšëftaca chamua.

Ntšamo Pablo yojanjuabná chë luarëngoye jama

⁵Atšë sëntsejuabná tšëngaftangbiyoe jama jautsëtsayama, Macedonia luarëjana chajjachnëngüentšana, chentšä ošbuáchiyënga jaftsanyëse, er atšë sëntsejuabná natsana Macedonia luaroye jéftsana. ⁶Nderado baseftayté tšëngaftangbeñe chašuetsetjana, o nderádose nyets uaftena tempo; as tšëngaftanga inyë luaroye játama chašmuájabuachama, ndëmoye jama chašojtsemnoye. ⁷Atšë ndoñe quetsátsboše nyë betscó tšëngaftanga jáftsanyana, er atšë sëntsobátmana más bayté tšëngaftangbeñe jaftsemnana, Bëngbe Utabná chca šojalesenciase.

⁸ Pero Efesoca šochanjajétana Pentecostés fiesta chaojobuáchèntscuana. ⁹ Er Bèngbe Bètsá tojama atše jobenayama muentše chë tšabe noticièngama banga jábuayenama, y chíyeca banga Crístbeñe montsošbuaché; pero bángnaca atše contra montsemna.

¹⁰ Timoteo tšèngaftangbioye chaojase, yejuana šmochtsantješna cha tondayama chaondètsauatjama, tšèngaftangbeñe tojtsemnèntscuana, er cha Bèngbe Utabnabiamia endètrabája, ntšamo atše sèndamcá. ¹¹ Chcasna, ndocná chábioye chabondètsáboyènja. Bètscá šmochjama cha natjémbana átšbioye chauatábama, er atše cha sèntsobátmana, chë ínÿenga muentše Crístbeñe ošbuáchiyèngaftaca.

¹² Y Jesucrístbeyeca bèngbe catšata Apólosna, atše bètscá cha sènjaimpadá, chë Jesucrístbeyeca catšátanga tšèngaftanga jányama mochjángaftaca chaotsama, pero cha ndoñe chenátsošena choye mora jama. Cha choye caochjá, chaojobená ora ca.

Pablo chènga jtadióšoftanama

¹³ Sempre šmochtsenocuedana chë Bèngbe Utabná ndoñe chašmondètseservenama tojtsama soyèngama. Nÿets tempo, Crístbeñe y chabe soyènguífínaca šmochtsošbuáchíye. Ainaniñe puerte añemo šmochtsebomna, y bètscá šmochtsama Bèngbe Bètsabe obenánaca. ¹⁴ Y nÿetsca soyènga ntšamo chašmojtsamcá, bonshanánaca šmochtsama.

¹⁵ Jesucrístbeyeca atšbe catšátanga, tšèngaftanga šmondétatšèmba, Estéfanos y chabe pamíllanga chë natsanènga monjamnama Jesucrístbeñe jtsošbuáchiyama, Acaya luaroca, y bètscá imojtsentšena Bèngbe Utabnabiamia jtsetrabájayana, chabe entšanga jtsèjabuáchanese. ¹⁶ Atše cbaimpadá, tšèngaftanga lempe

šmochtsama ntšamo cmojtsamèndacá, chca entšanga mo tšèngaftangbe uanatsanèngcá, y ntšamo nÿetsca chë ínÿenga mo bèngcá quemuiñe uajabuáchanese trabájayènga cmojtsamèndacá.

¹⁷ Atše tša oyejuayá sèntsemna tšèngaftangbe pueblentšana Estéfanos, Fortunato y Acaico moye tmojášhjajnama, er atše sèntsobena oyejuayá chéngaftaca jtsemnana, tšèngaftangaftaca choca jtsemnana cabá ndoñe sèntsobenèntscuana. ¹⁸ Er chènga átšbioye tmonjabo y tšèngaftangbiamia šmonjauyana, y chca chènga tmonjama, atše y tšèngaftanga natjémbana ainánaca chamotsomñama. Chènga šmochtsétabna mo puerte uámama entšangcá.

¹⁹ Asia luaroca ošbuachiyèngcá enefjuanènga cmontsachuaná. Aquila y Prisca y chatbe yebnentše mondbètsenefjuana ošbuáchiyènga cmontsachuaná, Bèngbe Utabnábeñe ošbuachiyèngcá, tšèngaftangcá bétsemnayeca.

²⁰ Muentša ošbuáchiyènga nÿetscanga cmontsachuaná. Nÿetscanga šmochjenchuaye mo Jesucrístbeyeca catšatangcá, jtenámochese, ntšamo cach tšèngaftangbe pamíllanga puerte bonshanánaca šmondètsachuanaycá.

²¹ Quem palabrenga tšèngaftanga jacheuayama cach atšbe cucuátseca sèntsabiamná.

²² Nderado nda Bèngbe Utabnábioye ndoñe tbonsebobonshana, Bèngbe Bètsá nÿetsca tescama chabocastigá. ¡Bèngbe Utabná cachiñe cochjésabo!

²³ Atše, Bèngbe Bètsá sèntseimpadana, Bèngbe Utabná Jesús chaoma tšèngaftangbeñe tšabe bendicionènga chaotsemnana. ²⁴ Atše, nÿetsca tšèngaftanga cbondábabuanÿeshana, canÿa mo tšèngaftangcá, Cristo Jesúseftaca cánÿiñe mo canÿacá jtsemnese.

2 Corintios

Jacheuayama

1 Atše Pablo, Jesucristbe canÿe ichmoná, Bëngbe Bëtsá atše chca jtsemnama yojánbošeyeca, Jesucristbeyeca bëngbe catsata Timotéoftaca quem tsbuanácha sentsabiamná, Corinto puebloca Bëngbe Bëtsábeñe ošbuachiyëncá enefjuanëngbiamá, y nÿets Acaya luarentše Bëngbe Bëtsabe nÿetsca entsangbiámna. ²Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnama y ainaniñe tsabe ebionana chašmotsebomnama.

Ntšamo Pablo tojansufrí

³Bënga mochtsatschuanaye Bëngbe Bëtsá, chë Bëngbe Utabná Jesucristbe Taitá, bëngbe Taitá, chë bëngbiamá lastemado yomná, y ndaye padecena soyënguñe tmojtsemna ora, bënga šondbetsañemuayá. ⁴Cha bënga jtsañëmuayana padecena soyënguñe tmojtsemna ora, chca, bënga chamotsobenama chë tmojtseufrinënga jañëmuayama, ntšamo Bëngbe Bëtsá šojujabuachcá chënga jujabuáchëse. ⁵Er ntšamo Cristo tojansufricá, bënga tša fsëndësufrina chabiamá oservéniñe; cachcá, Cristbeyécna Bëngbe Bëtsá jamana bënga puerte añemo ainaniñe fchaitsebomnama. ⁶Er bënga tmojtseufrinëse, jtsemnana bënga jobenayama tsëngaftanga jañëmuayama chë šmojtseufrina ora, y atsebácanënga chašmotsemnama, Bëngbe Bëtsabe soyëngama jouenëse. Chë padecena soyënguñe tmojtsemna ora Bëngbe Bëtsá šojáñemose, jtsemnana bënga fchayobenama

tsëngaftanga jañëmuayama, padecena soyënguñe šmojtsemna ora. Chca, bënga jobenayana tsëngaftanga jujabuáchana, Bëngbe Bëtsábeñe chašmotsobátmanama, chábeñe jtsošbuáchiyëse, y lempe jtsóboyayama, ntšamo bënga fsënjasufricá šmojtseufrina ora. ⁷Bënga sempre fsëndobátmana y tsábá fsëndétatšëmbo chë padecena soyënguñëšana tsábá šmochjábocanama, er bënga fsëndétatšëmbo, chë ntšamo bënga fsënjasufricá tsëngaftanga šmojasufrima; y cachcá, Bëngbe Bëtsá yochjama tsëngaftanga ainaniñe puerte añemo chašmotsebomnama, ntšamo bënga fchaitsebomnama cha tojamcá.

⁸Jesucristbeyeca atšbe catsátanga, bënga fsëntseboše tsëngaftanga chašmotsetátšëmbo ntšamo bënga Asia luaroca tša fsënjansufrinama. Bënga puerte padecena soyënguñe fsënjanियena, nÿa ndoñe más jauantacá, chentsana vídaca jabocanama ntjatobatmancá. ⁹Bënga šontsanénana mo jóbanama cuafsamncá. Pero chë soye tonjanoservé, bënga jtsošbuáchiyama Bëngbe Bëtsábeñe, nda inétsama obanënga chámuatayenama, y ndoñe cabëngbeñe ntsošbuáchiyana. ¹⁰Cha šojatsebacá bënga jóbanama puerte resjo enjamñëšana, y cachcá šochjátsebacaye bëngbiamá cachiñe cachcá tša resjuñe chamojtsemna ora. Bënga puerte chábeñe fsëndobátmana, puerte padecena soyënguñe bënga chamojtsemna ora, cha cachiñe šochjátsebacama. ¹¹Tsëngaftangnaca cmontsamna bënga jujabuáchana, bëngbiamá Bëngbe Bëtsá jaimpádase; chca, ba entsanga Bëngbe Bëtsá mochanjëtschuaye, er cha tojama bënga chábenšana tsabe bendicionënga fchayóyëngacñama, cha jamëse ntšamo chënga bëngbiamá tmojanimpadacá.

**Ndayeca Pablo Corinto
pueblöye ndoñe tonjána**

¹² Canÿe soye endmëna ndayá oyejuayënga šojtsabiamná: bënga bëngbe ainanentša juabnéngaca jtsetatšëmbuana puerte tšabá jtsamëse fstsiyena ca, ntšamo chë Bëngbe Bëtsabe entšanga endbetsamncá, nÿetsca quem luarentša entšangbeñe, y más tšëngaftangbeñe, y bënga jtsetatšëmbuana ntšamo tšabá tifjamcá nÿets ainánaca tifjamama. Bënga tondaye chibiatsma quem luarentša entšangbe osertanánaca, ndayá Bëngbe Bëtsá tša tšabia béngaftaca bëtsemnayeca, šojújabuache chca chamotsiyenama.

¹³ Er ntšamo fsëntsabiamnamna ndoñe queftsátsboše, ntšamo tšëngaftanga šmojtsalía y cmojtsësertánentšana inÿetšá játayanana, y sëntsobátmana puerte tšabá lempe chacmósertama.

¹⁴ Mora ndayá atše stsamama ndoñe lempe quecmátësertana. Pero atše sëntseboše tšëngaftanga chama corente chacmósertama; chca, Bëngbe Utabná quem luaroye chaojésabo ora, tšëngaftanga bëngbiama oyejuayënga chašmotsemnama, ntšamo béngnaca tšëngaftangbiama oyejuayënga fchantsemncá.

¹⁵ Chca ndegombre yomnama atše sëndétatšëmboyeca, atše sënjanjuabná tšëngaftangbiöye jshétsana jáñyama, y chca, chë tšabe soye tšëngaftangbiama uta soye jamana, tšëngaftangbiöye uta soye jáñyëse. ¹⁶ Atše sënjanjuabná tšëngaftanga jshaftsanyana, Macedoniöye ayiñe chëjana matijánachnëngo ora; y chentšana, ya camoye ataboye ora, tšëngaftanga cachiñe jáftsanyana. Chca, tšëngaftanga mašmëñjanobená atše juajabuáchana Judea luaroye játama.

¹⁷ Atše chca jamama tsjanjuabná ora, ¿chca tijanma ndoñe corente tšabá ntjenöjuaböycá? ¿Tšëngaftanga

šmatjájuaboye, ntšamo nÿe quem luarama enöjuabnaye entšanga monduamancá, cachora canÿe soyama “aíñe” y “ndoñe ca” jayanëse, atše ndayánaca jamama snëtsejuabnaye ca?

¹⁸ Canÿe soye ndegombre endmëna: Bëngbe Bëtsá sempre endbama ntšamo tojayancá, y chca puerte ndegombre endmënayeca, atše ndayánaca chjama ca stjayana ora, chca ndoñe questsbatayana chentšana atšbe juabna jatstrócama, mo canÿa cachora canÿe soyama “aíñe” y “ndoñe ca” cuafjatichamcá. ¹⁹ Er Cristo Jesús, Bëngbe Bëtsabe Uaquiñá, ndabiama Silvano, Timoteo y atše tšëngaftangbeñe fsënjanabuayiná, ndoñe ntsejuabnayana canÿe soye jamama y chentšana jatsjuabnayana inÿetšá jatsmama, mo canÿe entšá cachora canÿe soyama “aíñe” y “ndoñe ca” cuafjatichamcá, ndayá chana nÿets tempo ntšamo tojtsejuabnacá jayanana y jamana ntšamo ndegombre yomncá, chentšana ntjatstrocaycá.

²⁰ Er ndayá cha tojamiñe, lempe ntšamo Bëngbe Bëtsá tojašëbuachenacá jocúmpliana, mo chë lempe ntšamo Bëngbe Bëtsá tojášëbuachenama cha “aíñe ca” cuafstichamcá. Chíyeca, Bëngbe Bëtsá bënga tmojtsatschuaná ora, Cristo Jesúsbeyeca bënga jayanana “chca chaotsemna ca”. ²¹ Pero Bëngbe Bëtsá endmëna nda inétsama bënga y tšëngaftanga puerte Crístbeñe chamotsošbuáchema, cháftaca cánÿiñe mo canÿacá jtsemnëse; y Bëngbe Bëtsánaca endmëna nda bënga šöjabacacá chabe entšanga chamotsemnama. ²² Cha tojama chë Uámama Espíritu bëngbe ainaniñe cháúamashënguama jtsemándayama, y chë soye jtsinÿanyñayana bënga Bëngbe Bëtsabe entšanga imomnama. Y bëngbe ainaniñe chë Espíritu imobómnayeca, bënga corente jtsetatšëmbuana bënga

mochjójyèngacñama lempe ntšamo Bèngbe Bètsá bènga jatšatayama šojašebuachenacá.

²³Bèngbe Bètsá entsonýá atše ndegombre stichámuama. Atše Corinto puebloye cabá ndoñe chiyjá, er atše ndoñe quetsátsboše tšèngaftanga jašèchnana, chè bacna soyènga šmojamama, tcbójauacánèse. ²⁴Bènga ndoñe queftsátsboše tšèngaftanga jaméndana ndayíne cmojtsamna jtsošbuáchiyana; er tša šmojtsošbuachéyeca, ndoñe quešmochatajbaná Crístbeñe jtsošbuáchiyana. Bèngbe fséntseboše ndayá tšèngaftanga jujabuáchana, corente oyejuayènga chašmotsemnana.

2 Chíyeca atše ndoñe chiyjá jautsètsayama, er atše sènjanjuabó y sènjánéniyana choye ndoñe jama ca, bacna soyènga šmojtsanmama jábuayenama, y chca, ngménènga játabiamana, ntšamo chanýe sènjamcá. ²Tšèngaftanga ngménaca chašmotsemnana atše stjámèse, ɔnda yochjama atše oyejuayá chaitsemnana, sinó nýe tšèngaftanga, chè atše ngménènga tijábiamènga?

³Chíyeca tcbonjanèbuábiamana chè ntšamo šmojualiácá, chca, atše choye stjáshjango ora, tšèngaftanga átšbioye ndoñe ngmená chašmondébemama. Chca játamamna, tšèngaftangbiama más tšabá endmèna oyejuayá atše chašmobema. Atše tšabá sènjántatšèmbo ndayá átšbioye oyejuayá šojabemcá, tšèngaftángnaca chca mašmènjánbošena y oyejuayènga chè soye matcmènjánabiama. Chíyeca atše ndoñe chiyataná, nýetscanga oyejuayènga jtsemnana ndoñe quenjatopodena ora. ⁴Pero chè tsbuanácha tcbonjanèbuábiamana ora, atše corente šonjanongmé y ainana šonjántsetšena chca jabuache soyènga tšèngaftanga jubuábiamama, y chca jamama shèchbuíynaca sènjanooperdé.

Pero atše ndoñe checbátanèbuabiama atše jatsmama tšèngaftanga puerte ngménaca chašmotsemnana, ndayá chašmotsetatšèmhuama atše tša cbababuánýeshanama.

Perdón chè bacna soye amabiama

⁵Y mora, chè tšèngaftangbeñe puerte ngménana chaotsemnana tojama boyabásabiamna, cha átšbioye ndoñe ngmená chešnátšbema, ntsachetšá tšèngaftanga tcbójabiamcá, ínýengbioye ínýengbiama más. Chca séntšichamo, er atše ndoñe quetsátsboše jayanama ntsachetšá tojamama cha más bacna soye tojama ca. ⁶Banga tšèngaftanguentšènga ntšamo šmojamcá, chè entšabiama ya bèts castigo entsemna. Nýe nýetšá ponto. ⁷Chamna, ndayá mora cmojtsamna jamamna entsemna, cha jtseperdónana y jañèmuana, chca, ndocna tšabe soye jamama ndobená ndoñe chaondétsemnana, chè castiguama puerte ngménaca bétsemna causa. ⁸Chíyeca, tšèngaftanga cbaimpadá cachiñe tšabá chašminýinýé chábioye corente šmobobonshánama. ⁹Tempo ya chama tcbonjanèbuábiamana, atše jinýama tšèngaftanga aínè o ndoñe šmontsanprontánama, lempe ntšamo tcbonjanamèndacá jamama. ¹⁰Chcasna, ndánaca ndayánaca tšèngaftanga chašmojaperdoná ora, átšnaca cha chantseperdóna. Y atše cha chantseperdóna, ndayá japerdónama ndegombre tojtsemnèse. Y chca chanjama tšèngaftangbe tšabiama y Crístbe delante. ¹¹Atše tšèngaftangcá, quem entsábioye šcoperdoná chè bèngbiama tojama bacna soye; chca, Satanás ndoñe chaondobenama bènga jáingñama, er bènga mondétatšèmbo cha inétseboše ndaye bacna soye entšá chaotsamama.

**Ndáyeca Pablo ndoñe natjémbana
Troas puebloca tontsanoquedañe**

¹² Atše Troas puebloca sën-jánashjango ora, Cristbe tšabe noticiënga jábuayenama, atše sënjáninýe Bëngbe Utabná tojanma chentše banga chë buayenana soye chamouenama y chëngbe ainaniñe chana chamóyëngacñama. ¹³ Masque chca enjamna, atše ndoñe quetstétsobena natjémbana ainana jtsebomnana, er atše sënjanjuabná Jesucristbeyeca bëngbe catšata Tito chentše jinýenana, pero ndoñe chca. Chíyeca, Troas pueblentša entsanga sëntanadiošoftaná, y Macedonia luaroye sënjána.

**Cristoftaca cánýiñe mo canýacá
jtsemñese, bënga mo
ayëñjanayëngcá jtsemnana**

¹⁴ Atše Bëngbe Bëtsábioye sëndbëtsatschuanaye, bënga bacna soyënga jamama juabnënga cha tojanëýñjanama, tempo šojanaménda juabnënga; y chë mora bënga Cristoftaca cánýiñe mo canýacá jtsemñese, nýets tempo cha šnetsë-nachayama, mo canýe ayëñjanayacá, y chë nýets luarenache entsanga Cristbiana soyënga chamotsábuatmama bëngaftaca cha yojsamama, mo nda canýe botamana uanguëtše soye nýets luarënguenache chauáshanama cuaftsamcá. ¹⁵ Er chë incienso tojtsejuinýñyana ora, entsábioye tšabá juanguëtšenana; cachcá Cristbe tšabe noticiënga fstsabuayiná ora, Bëngbe Bëtsabiana bënga jtsemnana chë ndëmuanýenga tmojtsama cha oyejuayá chaotsemnana. Incienso tcojtsejuinýná ora, nýetscángbioye juanguëtšenana. Cachcá, Bëngbe Bëtsabe palabra fstsoyebuambná ora nýetscanga jouenana, Cristo

yojtsatsebacanga y chë pochocánënga jtsemnana imojtsajnéngnaca.

¹⁶ Chë pochocánënga jtsemnana imojtsajnéngna, pochocánënga mochanjábocana, er ntšamo bënga fsëndabuayinacá y tmojouencá chënga tmojtsaboté; y chca, chëngbiana chë tšabe noticiënga jtsemnana mo canýe obanabe uanguëtšancá. Pero chë Cristo yochjátsebacangna, tšabe noticiënga tmojóyëngacñeyeca, mochanjobenaye tšabe vida nýets tempo jtsebomnana; y chca, chëngbiana chë tšabe noticiënga jtsemnana mo canýe puerte botamana uanguëtšancá. Y asna, ¿nda obenana yojtsebomna chë tšabe noticiënga jábuayenama trabajo jtsemnana?

¹⁷ Bënga chë tšabe noticiënga ndoñe queftsatabuayiná, ntšamo ba entsanga imojtsamcá, mo nýe batšá uamana soyënga cuaftsemncá, y ndayánaca juácanama, mo nda ndaye nduámama soyënga cuaftsencá. Banga chca mondama; bënga ndoñe. Bënga, Cristoftaca cánýiñe mo canýacá jtsemñese, fsëndabuayiná mo Bëngbe Bëtsabe delante cuaftsemnëngcá, ndegombre nýe ntšamo tšabá yomncá nýets ainánaca jtsebošese, y mo Bëngbe Bëtsabe ichmonëngcá.

**Chë Bëngbe Bëtsabe tsëm
tratama buayenana soye**

3 Chca bëngbiana fstsajyana ora, tsëngaftanga cmojtsinýana ¿bënga cachñe tiftëtontsé cabënga bëtsétsanga enobiamnayana? ¿O bënga šojtsamna, mo inýengcá, tsëngaftanga juyentsbuáchiyana o juátjañana tsbuanachangá, bënga tšabá ftsamama chëchangaca jinýañiyama? ² Bënga bëngbe ainaniñe puerte tšabá fsëndétatsëmbo, nýetsca entsanga, ntšamo tsëngaftanga jtsemñese šmoyencá tmojinýe ora, tsëngaftanga jtšinýañnyana bënga

ndegombre ntšamo tšabá yomncá fstsamama. Chca, tšëngaftanga jtsemnana mo canye tsbuanachacá, nyetscanga jtsabuatmana y jtsobenana jualiana, bënga tšabá fstsamama. ³Nyetscanga tšabá mondétatšëmbo Cristo tojanma tšëngaftanga chábeñe chašmotsošbuáchema, y bëngaftaca cha chca tojanmámnaca. Chca, tšëngaftanga šmondmëna mo Cristbe canye tsbuanachacá, ndayécha quem luarentša entsángbiroye tojuyentsbuaché bëngaftaca. Tšëngaftanga ndoñe chešmatanobená Crístbeñe ošbuáchiyënga jtsemnana entsangbe trabájoca, er Crístbeñe šmonjanošbuaché chë Bëngbe Bëtsá Ainabe Espíritbeyeca; y chca, tšëngaftanga šmondmëna mo canye tsbuanácha cháftaca uabemanéchacá, y ndoñe mo entsángbeyeca uabemana tsbuanachacá. Bëngbe Bëtsá chë mandënga ndëtsbé tablëbenguinë tojanábema, entsanga chamotsobedecënana, pero tšëngaftangna Cristbe buayenana soye tšëngaftangbe ainaniñe šmojóyëngacñe.

⁴Crístbeyeca Bëngbe Bëtsábeñe jtsošbuáchiyëse, bënga corente fsëndétatšëmbo chca ndegombre bëtsemnana. ⁵Ndoñe quenátsmëna, nye bënga cányënga quem trabajo jamama ftsobena y játayanana bëngbe soye chë trabajo yojtsemna ca, er bënga jtsobenana chca jamama, nye Bëngbe Bëtsabe ujabuáchenanaca; ⁶er cha tojama bënga fchayobenama quem trabajo jamama, chë entsanga jábuayenana Bëngbe Bëtsá chabe entsángbiroye tojanašebuachená soyëngama, ndayá Cristo tojanma sóyeca, mo canye tsëm tratcá, Bëngbe Bëtsá y chabe entsángaftaca. Quem soye ndoñe quenátsmëna mo chë Bëngbe Bëtsá tempo Israeloca entsángbiroye léyeca tojanašebuachená soyëngcá. Inyetsá; entsanga mondama

Bëngbe Bëtsabe tsëm trato, Uámana Espíritbeyeca. Chë natsana trato, chë uabemana ley, ntšamo chiñe iuabemancá ndoñe tconjama causa, entsá jóbana jtsemnana; pero Cristbe tšabe noticiënga, chë tsëm trato, entsanga ainaniñe tmojóyëngacñe ora, chë Uámana Espíritu jamana, chë nyetsca tescama yomna tšabe vida chënga chamotsebomnana.

⁷Quem Moisesbe ley, chë ndoñe tmonjobedecema entsanga jóbana jtsamnana, ndëtsbé tablëbenguinë letrëngaca tmojanábema, y Bëngbe Bëtsá Moisésbiroye tbojanantšabuaché ora, cha tša buashinyinñaniñe tojánabo. Chë causa entsanga ndoñe imontsobena ni mo jinñana Moisesbe jubiá, er tša ibojtsanjuebëbuashinyinñana, Bëngbe Bëtsáftaca tbojánencuententsana tojtana ora. Pero betesco tojanéjbana chë jubiá chca buashinyinñana. Chë ley, chë natsana trato, Bëngbe Bëtsá tojanayentsbuaché ora, tša buashinyinñanáca cha tojanmëse; ⁸ndegombre, más bën y uámana tempo entsemna chë Bëngbe Bëtsá bënga šojanašebuachená tsëm soyënga yojsama ora, chë Uámana Espiritu bëngbe ainaniñe cháumashënguama Bëngbe Bëtsá tojama ora. ⁹Bëngbe Bëtsá chë ley tojanayentsbuaché ora, chë ndáyeca entsanga jóbana yojánamna, ntšamo chiñe betsayancá ndoñe tmonjama causa, chora cha chca tojanma puerte chabe buashinyinñana jinñanyiyëse; ndegombre más bën y uámana tempo entsemna chë mocna ora Bëngbe Bëtsá yojsama entsanga chabe bominyinë tšábënga chamotsemnana. ¹⁰Er chë Bëngbe Bëtsá ley tojanayentsbuaché ora tojaninyanñé buashinyinñana, mora jtsinyanana mo ya tondaye cuabndëtsemncá, chë Bëngbe Bëtsá entsángbiama tsëm soyënga

tojtsamama tcojtsonjá ora, chë tša buashinÿinÿanana yojtsemna ora. ¹¹Er chë leyama tempo, chë ya jochnënguama tempo entsemna ora, Bëngbe Bëtsá chabe buashinÿinÿanana y uámanana tojinÿanÿese; ndegombre chë Bëngbe Bëtsá tsëm soyënga entsãngbiamama jamama ora, chë ndocna te yochanjochnëngo tempo ora, Bëngbe Bëtsá más chabe buashinÿinÿanana y uámanana echãntsinÿanÿnaye.

¹²Y chca, Bëngbe Bëtsá chca bëts soyënga yochjamama fsëndobatmánayeca, bënga fsëntsobena jóyebuambayama, nÿetsca soyëngama jayanëse, tondayama ntjatauãtjá.

¹³Y chca, bënga ndoñe Moisescá queftsátama, chë chabe jubíã chaobuashinÿinÿenama Bëngbe Bëtsá tojanma ora, canÿe entsëjuaca yojtsenamochécjua; cha chca tojanma, chë Israeloca entsãnga ndoñe chamondobená jinÿama chë jubíã buashinÿinÿanana ya yojtsëchnëjuana ora. ¹⁴Pero Bëngbe Bëtsá tojanma chënga ndoñe chaondósertama ntšamo Moisesbiajana cha tojanayancá. Y cabá quem tempo, ntšamo Bëngbe Bëtsá Moisesbioye tbojanšbuachenacá chëngbiamama jamama, Israeloca entsãnga tmojtsalíã ora, ndoñe ntsësertánana Bëngbe Bëtsabe ndegombre soyënga, mo chëngbiamama iytëmena soyënga cuaftsemncá, mo chë Moisés yojtsenamochécjua entsëjuacá. Y chca endmëna, er nÿe Crísoftaca cánÿiñe mo canÿacá jtsemnëse, chënga jtsobenana chë soyëngama jósertana, y iytëmená ya ndoñe ntsemnana. ¹⁵Y méntscoñama, Moisesbe librëšangá chënga tmojtsalíã ora, ndoñe ntsësertánana Bëngbe Bëtsabe ndegombre soyëngama, ntšamo chiñe tojtsayancá jamama ndoñe montseboše causa. ¹⁶Pero canÿe entsá chë Bëngbe Utabnabe benache

tojishache ora, cha jtsobenana chë soyëngama jósertana. ¹⁷Y Bëngbe Utabná y Espíritu canÿa bondmëna, y Bëngbe Bëtsabe Espíritu tojtsemnëntšë, chë bacna soyënga jamama juabnënga, ni chë ley ndoñe ntsemándayana. ¹⁸Moisés chabe jubiañe Bëngbe Bëtsabe buashinÿinÿanana y uámanana tojaninÿanÿé, y chíyeca, canÿe entsëjuaca yojtsenamochécjua, chca, chënga ndoñe chamondinÿama. Pero bënga ošbuáchiyënga nÿetscanga jtsinÿanÿnayana Bëngbe Utabnabe buashinÿinÿanana y uámanana, mo canÿe espejo canÿe soye tojtsinÿanÿnacá, y ndoñe queftsátboše ntšãmnaca jamëse chë soye jatsëytamianana. Cha béngaftaca yojtsama cada te más chë ntšamo cha yomncá bënga chamotsemnama, cada te más bëtsésanga chë ntšamo cha yomncá jtsemnëse. Chca endmëna ntšamo Bëngbe Utabná yojtsama; y Bëngbe Utabná y Espíritu canÿa bondmëna.

4 Y chca, Bëngbe Bëtsá bëngbiamama lastemado yómnyayeca, quem trabajo šojabanÿé, jtsabuayinÿayama chë Crísoftaca tojašebuachená soyënga; y chíyeca bënga ndocna te ntjájbanana ainaniñe añemo bomnana. ²Bënga fsëntsaboté chë ínÿenga iytëmená inmëtsama soyënga, chë ínÿenga tmojinÿe ora chama jtsëuatjana, y chë ínÿenga entsãnga jáingñama inmëtsama soyëngnaca, y Bëngbe Bëtsabe buayenana soye ndoñe queftsatstróca ndoñe ndegombre soyëngaca. Chamna, bënga sempre nÿe chë ntšamo ndegombre yomncá fsëndbëtsoyebuambnaye, mo Bëngbe Bëtsabe delante cuaftsemnëngcá jtsamëse; y chca, bënga fsëndbëtsama cada entsabe ainanentsã juabnënga chamuayanama, bënga ndegombre soyënga fstsoyebuambná ca. ³Y nderado bënga chë tšabe noticiënga

fstsabuayiná ora, báseftanga chë soyënga chaósertama ndoñe tontsopodénese, nÿe chë pochocánënga jtsemnama tmojtsajnëngbiama chca jtsemnana. ⁴Chëngbiama, chë Crístbeñe ndošbuáchiyëngbiama, chë quem luarentşe mora mandayá, Satanás, tojama chë buayenana soye ndoñe chaondëtsësértánama; chca, chënga ndoñe chamondinÿama chë tşabe noticiënguentsana puerte bëts y tşabe soyënga, chë Cristo puerte bëtsá y obená yomnama ínÿanÿnaye soyënga, nda nÿetsca soyënguine Bëngbe Bëtsacá yomna. ⁵Bënga ndoñe nÿe cabëngbe soyama queftsatabuayiná, ndayá Jesucristbiama mo Bëngbe Utabnacá. Bënga bëngbiama fsëndbáyana mo oservenëngcá fstsmëna ca, tşëngaftanga jujabuáchama; y chca fsëndbétsama Jesús jaserviama. ⁶Er Bëngbe Bëtsá, nda quem luare jobojátşama ora tojanmandá binÿniñe ibetentsana chaóboconama, chánaca tojama bënga ainaniñe tşabá chabe soyëngama chaşotsësértánama, chca bënga fchayobená juabuátmanana chë Bëngbe Bëtsabe uámanana y obenanentsana inétsobocana osertánana, ndayá Crístbeñe bënga mondonÿá.

Bënga fsëndoyena Crístbeñe jtsoşbuáchiyëse

⁷Pero chë puerte tşabe y bëts soye, chë Crístbe buayenana soye, bënga mondbomna cuerpiñe, bëngbe ainaniñe; y chë cuerpënga jtsemnana nÿe mo matbajëngcá, ndoñe yapa obenana ntsebomnana, chca, jinÿanÿiyama tşa bëts obenana Bëngbe Bëtsábocana yóbocanama, y ndoñe bëngbentsana. ⁸Y chca, bënga nÿetsca padecena soyënguine vida fsëndbomna, pero ndoñe queftsátsmëna ndobenënga chë padecena soyënguentsana tşabá jabocanama; ndoñe queftsátstatşëmbo

ndayá jamama şojtsamna, pero ndoñe queftsátsmëna ntsobencá jtsobátmanama quem padecena soyënguentsana tşabá jabocnama. ⁹Inÿënga montsama bënga puerte fchaisufrima, pero Bëngbe Bëtsá ndoñe nÿe cachcá şontsabashejuana; mo nda ínÿabioye cuafjutşencá tmojtsentsjaná ora, ya jóbama jtseprontánana, uayayënga bënga jtsébáyama imojtsejuabnangbe cucuatşinë fsëntsemna, pero cabá ndoñe ntjobáyana. ¹⁰Inÿënga sempre jtsamana bënga bëngbe cuerpiñe puerte fchaisufrima, y jobanámna resjo jtsemnana, ntşamo Jesúseftaca tmojanmcá, cha chaosufrima y chaóbanama. Chca bëngaftaca endopasana, chca, ínÿënga chamobená jinÿama Jesús bëngbeñe vida yobomnama. ¹¹Er bënga vida fchabomnëntscuana, sempre puerte resjo bëngbiama jëftsemnana jóbana, Jesúsbioye servena causa; y chca endmëna, ínÿënga chamobená jinÿama Jesús vida yobomnama bëngbe cuerpiñe, chë canÿe te yochjopochóca cuerpo. ¹²Y chca, bënga tşa fsëndësufrina y jobanámna resjo endmëna; y tşëngaftanga tşabe noticiënga şmojóyëngacñayeca, Bëngbe Bëtsá tojama chë nÿetsca tescama yomna tşabe vida chaşmotsebomnama.

¹³Bëngbe Bëtsabe uabemana palabrenguine endayana: “Atşe sentsanoşbuaché y chíyeca sënjanoyebuambá ca.” Bënga cachca oşbuáchiyana fsëndbomna chë chca tojanayanacá, y chíyeca bëngnaca Bëngbe Bëtsábeñe fsëntsoşbuaché y chabiamna fsëntsoyebuambná. ¹⁴Er bënga fsëndétatşëmbo, Bëngbe Bëtsá, nda tojanma Bëngbe Utabná Jesús cháuatayenama, chánaca yochjama bënga Crísoftaca cánÿiñe mo canÿacá jtsemnëse, bënga chámuatayenama, y tşëngaftangaftaca cánÿiñe cha

yochtsemnoye šochjúshejango.

¹⁵Lempe ntšamo bēnga fstsama y fstsufincá tšēngatange tšabiama endmēna; chca, más becá entšanga chábeñe chamojtošbuaché ora, ba tšabe bendicionēga Bēngbe Bētsá entšangbiana jtsamēse, más becá entšāngnaca chábioye chamotsatschuaná, ndayá chēngbiana cha yochjamama; y lempe chca, Bēngbe Bētsá puerte uamaná y obená yomnama nyetsca entšanga chamotsichámuama.

¹⁶Chíyeca bēnga ndoñe ntjájbanana ainaniñe añemo bomnana. Masque quem luarentša bēngbe cuerpo cada te jtsopochócyana, Bēngbe Bētsá jamana chē bēngbentsana nyets tempo vida yochtsebomna soye, cada te más obenana chaotsebomnama; y chca, bēnga jtsemnana mo tsmēma entšangcá.

¹⁷Ntšamo bēnga mora fsēndēsufincá endmēna nyē quem luarentše vida tmojtsebomnēntscuana, y chca, chē soye jtsemnana mo canye nduámana soycá; pero ntšamo bēnga fsēndēsufincá joserviana bēnga jtsebomnama chē Bēngbe Bētsá šochjatsataye puerte bēts uámanana y obenana, cháftaca nyets tempo vida jtsebomnama, chē ndayá yomna nyetsca soyēngama más bēts y uámana soye. ¹⁸Er bēnga nyē chē tojtsopodena jinýama soyēnguiñe ndoñe nyets tempo queftsatsjuabná, ndayá chē ndoñe yondopodena jinýama soyēnguiñe; er chē bēnga imobena jinýama soyēnga ndoñe nyetsca tescama ntsemnana; pero chē bēnga ndoñe mondobena jinýama soyēnga cocayé nyetsca tescama jtsemnana.

5 Bēnga mora mondbomna canye cuerpo quem luarentše vida jtsebomnama. Quem cuerpo yomna mo chē jtsatsjacama yopodena yebncá, cánýentše ndoñe nyets tempo ntjéftsemnana. Bēnga mondetatšēmo, quem cuerpo canye te tojtsopochocase,

Bēngbe Bētsá yochjama bēnga tsmēma cuerpēga chamotsatsbomnama, celoca nyetsca tescama vida jtsebomnama, Bēngbe Bētsabe pormana cuerpēga y ndoñe entšangbe pormana cuerpēga.

²Chíyeca, bēnga quem luarentše chca vida tmojtsebomnēntscuana, yapa tmojtsesufrina causa, bēnga tša jtsebošana betesco Bēngbe Bētsá celoye chašúyambama, y bēnga nyets tempo celoca jtsiyenama tsēm cuerpo jtsebomnama cha chaomama; ³chca, Cristo yochjésabo ora, bēnga chē tsēm cuérpoca chamotsemnana, y ndoñe nyē espíritu ndocna cuérpoca.

⁴Bēnga quem cuerpiñe, chē quem luarentše vida jtsebomnama cuerpiñe chamojtsiyenēntscuana, yapa padecena soyēnguiñe sufrina causa, bēnga jabuache mochanjášachna; chca echántsemna ndoñe nyē chē espíritu ndocna cuérpoca jtsemnana bēnga imojtsebóseyeca, ndayá masna, bēnga chē tsēm cuerpo chamotsebomnama Bēngbe Bētsá chaomama imojtsebóseyeca. Bēnga fsēntseboše chē bēngbeñe jopochócama yomna soye Bēngbe Bētsá lempe chaotrocama, chca, bēnga chamotsobenama celoca nyetsca tescama vida jtsebomnama. ⁵Y Bēngbe Bētsá endmēna nda tojama bēnga chamotseprontánama chē tsēm cuerpo jtsebomnama, y nda tojama Espiritu bēngbe ainaniñe cháumashēnguama, chca bēngbioye jinýanýiyama, bēnga ndegombre mochjójyēngacñe ndayá Bēngbe Bētsá tojašebuachenacá.

⁶Y chca, bēnga sempre ainaniñe bēts añemo fchandbétsebomna. Bēnga fsēndétatšēmo, quem cuerpiñe cabá vida bēnga mochjéftsebomnēntscuana, bēnga ndoñe mochántsemna Bēngbe Utabná yojtsemnentše. ⁷Er mora bēnga fsēndoyena jtsamēse, ntšamo Crístbeñe bēnga imošbuachecá, y ndoñe nyē ndayá jinýama tmojtsobenama.

⁸Bëngbe fséntsemna ainaniñe bëts añémoca, y más fséntseboşe jájbanana quem cuerpiñe vida jtsebomnana, jama Bëngbe Utabnáftaca nyetsca tescama vida jtsebomnana. ⁹Chíyeca bënga bëtsca fsëndéntsena Bëngbe Utabná sempre oyejuayá jabemama, masque bënga quem luarentşe quem cuérpoca tmojtsiyena, o ya ndoñe. ¹⁰Er nyetscanga şontsamna jashjanguana Cristbe puestoca tribunalentşe, cada ona ntşamo yomerecencá chaóyëngacñama, ntşamo tşabá o ndoñe tşabá quem luarentşe chabe cuerpiñe vida yojëftsebomnëntscuana tojëftsemcá.

Jábuayenama ntşamo Bëngbe Bëtsá inama entşanga tempcá tşabá cháftaca chamotsatsmënama

¹¹Chcasna, Bëngbe Utabná nyetscangiama chë más bëtsá yomnama jtsejuabnayëşe, bënga bëtsca fsëndama entşanga jáyëñjanama, bënga tşabá fstsamama chamotsejuabnama. Pero Bëngbe Bëtsá ya endétatşembo ntşamo bënga fstsmënama, y atşe sëntsobátmana tşëngaftángnaca chca tşabá chaşmotsetátşembo, tşëngaftangbe ainanentşa juabnéngaca, chë bëngbiama aíñe ca cmojtsëtsëtsná juabnénga. ¹²Bënga ndoñe cachíñe cabëngbiama queftsatoyebuambná; chca fséntsichamo ndayá tşëngaftanga oyejuayënga bëngbiama chaşmotsemnama, chca, tşëngaftanga jojuama chaşmobenama, chë uámama soyënga tmojtsebiamnángbioye ndayá entşanga canye entşábeñe tmojtsonyáca y ndoñe chca chë entşabe ainaniñe tomna soyëngaca. ¹³Er bënga mo chë ndoñe corente juabna ndbomnéngcá fstsamëşe, ntşamo bášeftanga mondbetsichamcá, jtsemnana Bëngbe Bëtsá jaserviama; y bënga corente juabna bomnéngcá fstsamëşe, jtsemnana tşëngaftangbe tşabiama. ¹⁴Bënga chca fsëndmëna,

Cristo şondábabuanyëshanayeca, y chë soye endama bënga nye cha fchaitseservénama, er bënga fsëndenojuabná y puerte tşabá fsëndétatşembo, canya, Cristo, nyetscangiama tojanóbanama; y cha nyetscangiama tojanóbanayeca, endmëna mo cha tojanóbana ora, nyetscanga cháftaca cuafjobancá. ¹⁵Y Cristo nyetscangiama tojanóbana, chë quem luarentşe vida bomnénga ndoñe más nye cachëngbiama chamondëtsiyenama, sinó chabiama, nda chëngbiama tojanóbana y tojtanayena. ¹⁶Chíyeca, bënga ya ndoñe ndocnabiama queftsatsjuabná ntşamo entşanga quem luarentşe jtsejuabnayama monduamancá; masque ndegombre bënga chca Cristbiama fsënjanjuabná, mora ya ndoñe chca chabiama queftsatsjuabná. ¹⁷Chcasna, nderado nda Crísoftaca cányiñe mo canyáca tojtsemna, Bëngbe Bëtsá tojama cha mo canye tsëm entşacá chaotsemnana. Ntşamo chë Crístbioye cabá nduabuátmana ora cha yojamncá, mora ya ndoñe quenátsmëna. Morna cha jtsejuabnayana y jtsamana inye soyënga y tsëm soyënga.

¹⁸Bëngbe Bëtsá endmëna nda chca inétsama, entşanga mo tsëm entşangcá jábiamama; y cha Crísoftaca tojama bënga tempcá tşabá cháftaca chamotsatsmënama. Y cha bënga canye trabajo şonjanabanýé, bënga entşanga jábuayenama, Bëngbe Bëtsá inétsama entşanga tempcá tşabá cháftaca chamotsatsmënama, y entşanga jujabuáchama chca chamotsemnana. ¹⁹O mëntşá, Cristo tojanma sóyeca Bëngbe Bëtsá yojtsama entşanga chamotsobenama tempcá tşabá cháftaca jtsatsmënama, y chca, chënga chamotsobena chëngbe bacna soyëngama perdonánënga jtsemnana, y chë soyëngama nyetsca

tescama castigánënga jtsemnama ndoñe chaondétsamnama. Y bënga šonjanabanjë chë trabajo, entsànga jtsabuayiynayama ntšamo Bëngbe Bëtsá inama entsànga tempcá tšabá cháftaca chamotsatsmënama. ²⁰Y chca, bënga jtsemnana Cristbe cuenta oyebuambnayënga y amënga, mo cach Bëngbe Bëtsá bëngaftaca cmojtsaimpadancá. Cristbe cuenta cbaimpadá, bëtscá šmochtsentšëna Bëngbe Bëtsáftaca tempcá tšabá jtsatsmënama. ²¹Cristo ndocna bacna soye tonjanma, pero bëngbe bacna soyënga jabuajuánamna, Bëngbe Bëtsá cháftaca tojanma mo cha canjë bacna soyënga amá cuaftsemncá, chca, bënga Crísoftaca cánjëiñe mo canýacá jtsemnëse, Bëngbe Bëtsabe bominyiñe tšábënga jtsemnama chamotsobenama.

6 Chcáyeca, bënga Bëngbe Bëtsáftaca cánjëiñe trabájayënga quetsomñëcana, cbontsaimpadana ndoñe nýe bonamente chašmondóyëngacñe chë Bëngbe Bëtsá yojtsama soyënga, tšëngaftangbiana tšabe juabna jtsebmñëse. ²Er Bëngbe Bëtsá chabe uabemana palabrëngüiñe mëntšá tojánayana:

Chë tšabe soye jamama tšabá šonjaninýana ora, atšë tcbonjanoyeuná; chë ácbioye jatsbocama te, tcbonjanájabuache ca.

Šmochjinýe. Mora entsemna chë mocna ora Bëngbe Bëtsá tšabá ibojtsinýana tšabe soye jamama; mora entsemna chë mocna ora Bëngbe Bëtsá yojtseboše aca jatsbocama.

³Bënga ndocna bacna soye queftsátama, ndayá chaoma entsànga chë tšabe noticiënga chamotsábotema, chca, ndocná podesca chaondétsóyebuambnama bëngbe trabajuama, Cristbiana. ⁴Inýetsá, bëngna nýetsca soyëngüiñe fsënjaniiyena mo Bëngbe Bëtsabe oservenëngcá; Bëngbe Bëtsábeñe

obatmancá puerte uantadënga jtsemnëse, fstsesufrina ora; puerte padecena soyëngüiñe bëtsemna causa, ndayá jamama ndoñe fsëntsetatšëmbo ora; y ainaniñe puerte ngménaca fstsemna ora; ⁵ínýënga šojtsatsetšëná ora; cárceloye šojautame ora; entsànga bëngbe contra tmojtsebmñëna ora; jabuache trabájayiiñe puerte uamëntšnayënga fstsemna ora; bayté ntsamanacá fstsemna ora; y jasama tondaye fsëntsebmna ora. ⁶Bëngnaca fsëntsinýanýná Bëngbe Bëtsabe oservénënga fstsmënama, puerte tšabe vídaca, ndocna bacna soye ntjamcá jtsiyenëse; Bëngbe Bëtsabe soyëngama corente jtsetatšëmbëse; ínýënga ntšamo šojáborlaye ora puerte uantadënga jtsemnëse; ínýëngbioye puerte bonshanánaca jtsëñyayëse; Uámána Espíritu bëngbe ainaniñe jtsebmñëse; y ndegombre nýets ainánaca nýetscanga jtsababuánýeshanëse; ⁷ntšamo Bëngbe Bëtsabiama ndegombre yomncá jtsabuayiynayëse; Bëngbe Bëtsabe obenánaca ba soyënga jtsamëse; y mo chë soldadëngcá, uayayënga jáyëñjanama y chëngbiana jenéuyanama soyënga jtsebmñëna, chë Satanásbioye jayëñjanama y chabiana jenéuyanama ndayá Bëngbe Bëtsá šojatsatacá jtsebmñëse; y Bëngbe Bëtsá chca tojama, er cha tojama bënga chabe bominyiñe tšábënga chamotsemnama. ⁸Bënga fsëntsinýanýná Bëngbe Bëtsabe oservénënga fstsmënama, ínýënga bëngbiana tšabe soyënga tmojtsejuabná ora y bënga nduámanënga jtsemnama chënga tmojtsama ora; ínýënga tšabe soyënga bëngbiana tmojtsoyebuambná ora y chënga bëngbiana podesca tmojtsichamo ora; bënga áingñayënga fstsmëna ca báseftanga tmojtsejuabná ora, pero bënga ntšamo ndegombre yomncá jtsóyebuambnayëse. ⁹Mo nduamanëngcá bënga entsángbeñe

jtsén̄yayana, pero banga corente tšabá bēnga šondéubuatma; bēngbiama sempre resjo endmēna jóbana, pero šmochjin̄yē, bēnga sempre vídaca chentsana jatóbocanána; bēnga juatsjín̄yama jobenayama, Bēngbe Bēt-sábeyeca castigánēnga fchandbétsemna, pero n̄ya jóbana ndoñe.¹⁰ Masque ngmēnēnga fstsemna, ainaniñe sempre oyejuayēnga fchandbétsoniñe; masque ndbomnjēmēngcá, pero fchandbétsama banga Bēngbe Bēt-sábicana bétscá chamotsebonnama; quem luarentša soyēnga tondaye queftsátsbomna, pero Bēngbe Bēt-sabe entšanga quetsomñecana, ndegombre lempe fsēndétsóbomiñe.

¹¹ Tšēngaftangbiama, Corintoca entšanga, lempe fsēnjayana, tondaye ntjaitēm̄cá; n̄yets ainánaca, corente cbondábabuan̄yeshana.

¹² Bēnga puerte cbondábabuan̄yeshana, pero tšēngaftangna ndoñe yapa queścátbabuan̄yeshana.¹³ Atše cbontsaïmpadana, mo can̄yē taitá chabe básēnga cuaftsaïmpadancá, atše puerte chašmotsebobonshánama, er atše corente cbondábabuan̄yeshana.

Bēnga mondmēna mo Bēngbe Bēt-sabe bēt-s yebncá

¹⁴ Crístbeñe ndošbuáchiyēngaftaca ndoñe šmatjenutaná ndayánaca jamama, er chca, chēngaftaca šmatjábocana mo chē jaárama uacnata ndoñe cachénchechata tfontsemncá. Ndegombre, chē tšabe soyēnga amá y Bēngbe Bēt-sabe bominiñe tšabia mēná, n̄ya tondayama cachcá ntsejuabnayana, chē Bēngbe Bēt-sá tojamandacá ndoñe tontsamacá y bacna soyēnga amacá. Ndegombre, chē entšangbe juabna bin̄ynayáftaca vida bomná, n̄ya tondaye ntsebonmana chē n̄yē mo ibetiñcá juabnayáftaca.¹⁵ Crísto y Satanás, Belial cánaca uabainá, ndocna te tondayama

cachcá ntsejuabnayana; y cachcá copasana, Crístbeñe ošbuachiyá y chábeñe ndošbuachiyáftaca.¹⁶ Ndocna soyiñe cachcá ntsemnana, Bēngbe Bēt-sabe bēt-s yebna, chē n̄yē can̄yē Bēngbe Bēt-sábioye jadórana yebna, y chē entšangbe pormana soyēnga, mo diosēnga cuafsemncá jtsadoránana soyēnga; chca endmēna, er bēnga, n̄yetscanga cán̄yiñe Jesucrístbeñe ošbuachiyēngcá, mondmēna mo Bēngbe Bēt-sá Ainabe bēt-s yebncá, ntšamo Bēngbe Bēt-sá chabe uabemana palabrenguñe chabe entšangbiama tojanayancá:

Chēngbeñe vida chántsebonna y chēngbenache chántšana; atše chēngbe Bēt-sá chántsemna y chēngna atšbe entšanga ca.

¹⁷ Chíyeca mēntšánaca Bēngbe Utabná chabe entšanga tojanéyana:

“Chē bacna soye amēngbentšana šmochjésebocana, y chēngbentšana šmochtsojuánañe;

tondaye šmattsebana, ni šmattsama ndayá Bēngbe Bēt-sabe entšangbiama ndoñe tšabá tontsemncá.

As cbochanjúbua,ja,

¹⁸ y chántsemna mo can̄yē taitacá tšēngaftangbiama,

y tšēngaftangna mo atšbe uaqiñēnga y bemiāngcá.

Chca séntichamo atše, tšēngaftangbe Utabná, n̄yets obenana bomná ca” —chiñe enduábemana.

7 Chcasna, atšbe bonshánēnga, chca endmēna ntšamo Bēngbe Bēt-sá šojašebuachenacá. Chíyeca šontsamna, Bēngbe Bēt-sabe delante n̄yetsca soyēnguñe tšábēnga jtsemnana, bēngbe cuerpama o espíritbiama bacna soye ndoñe más ntsamcá; y Bēngbe Bēt-sá n̄yetscangbiama más uamaná yomna ca mondjējuabnáyeca, lempe ntšamo tmojobenacá mochtsiyena mo chabe

entsāngcá, nyetsca soyēnguiñe puerte tsábenga jtsemñese.

**Ntsāmo chē Corintoca entsānga
juabna tmojantrocá**

²Bēngbiana šmochtsenójuabnaye tsēngaftangbe ainaniñe puerte bonshanánaca. Bēnga ndocnabiana bacna soye chibiatsma, ndocnabiana chibiatsma más bacna entsá chaotsemnama, y ndocnábioye chibiatsingñé. ³Atše chca ndoñe quetsátichamo, ndoñe tsábá šmonjama ca tsēngaftangbiana jayanama, er ntšamo ya tcbonjauyancá, atše tsēngaftangbiana sempre ainaniñe puerte bonshanánaca sēndbétseñojuabnaye; y chca, mo átšeftaca canyiñcá šmochántsemna, masque chayóbana o cabá vida chaitsóbonñese. ⁴Atše puerte tsábá sēndétatšēmbó, ntšamo tsábá yomncá šmochtsamama; y tsēngaftangbiana puerte oyejuayá sēntsemna. Lempe ntšamo tsēsufriñcá tsiyename, atšbe ainaniñe bēts añemo sēndétsóbonñe y corente sēntsoyejuá.

⁵Macedonia luaroye fsēnjánashjajna orscana, ndoñe luare queftsátsbomna jóchnama, sinó nyetsca soyēnguiñe fsēndēpadecena: chē bēngbe buayenana soyama contra tmojtsemnēngaftaca jabuachana enatsētsnayēse, y bēngbe ainaniñe jtsauatjēse. ⁶Pero Bēngbe Bētsá, chē yapa añemo ndbomnēngbioye endbetsañemuayá, tojanma bēnga ainaniñe más añemo fchaitsebomnama, Tito moye tonjánashjango ora. ⁷Y cha tonjánabo ora, bēnga ndoñe más añemo quefstétsbomna nyē cha tojánashjanguama, sinó tsēngaftanga šmojanájabuachama y ainaniñe añemo chaotsebomnama šmojanmama. Cha šonjanéyana tsēngaftanga tša šmojánboše bēnga jányama ca, y šonjanacuntá ntšamo tsēngaftanga ngménaca šmojamna, atšbiana ndoñe

tsábá šmonjanma causa, y ntšamo tsēngaftangbiana atšbe tsábiana puerte iuámanana; y quem chabe noticiēngaca, cabá más sēntsoyejuá.

⁸Er masque tsēngaftanga tša ngménaca šmojamna chē tcbonjanēbuábiana tsbuanáchama, mora ndoñe quetsatsjuabná más tsábá yojamna chca ndoñe jatēbuabiamana ca; masque tempo atše chca sēnjanjuabná, er atše sēntsetatšēmbó chē tsbuanácha básefta tescama ngménēnga tcmojánabiana, ⁹mora atše puerte oyejuayá sēntsemna, ndoñe tsēngaftanga ngménēnga šmojanmama, ndayá chē šmojánbomna ngménana tojanmama tsēngaftanga chašmuenójuaboma ndoñe tsábá šmontsamama, y chca amana chašmotsajbanama, tsēngaftangbe juabnēnga jatrócase. Chca enjamna, er tsēngaftanga ngménana šmojánbomna ntšamo Bēngbe Bētsá inabošcá; chíyeca, bēnga ndocna bacna soye tsēngaftangbiana chibiatsma. ¹⁰Ntšamo Bēngbe Bētsá tojtsebošcá ngménana bomnentsana, jóbocnana chē bacna soyēnga tcojamama jenójuaboyana y juabnēnga jatrócana; y juabna jatrócana entsábioye juanatsana atsbocaná chaotsemnama, y cha ndocna te ntjátsjuabnayana más tsábá yojamna ndoñe chca ntjatstrócana ca. Pero ntšamo chē nyē quem luarama enójuabnaye entsānga mondbetsebomncá ngménana bomnentsana, ndoñe ntjóbcnana juabna jatrócana; chentsana jóbocnana nyē nyetsca tescama castiganá jtsemnana, mo nyetsca tescama cuafjobancá. ¹¹Šmochjinjē ndayá tojóbcna, ntšamo Bēngbe Bētsá inabošcá ngménana bomnentsana: tojanma chē šmojanma soyiñe puerte chašmuenójuaboma; y ntšamo jájandmanana bētscá chašmonguanguama; tojanma tsēngaftanga chacmetonama chē bacna

soye tojanmáftaca; y castigánenga jtsemnama jtsauatjámna. Chentšana, tšengaftanga tša šmojtšanboše atše jinýama; y šmojtšanprontana lempe jamama chca bacna soye ndoñe más chaondétsemnama y chca tojanmábioye jacastígama. Nýetsca chë soyënguine tšengaftanga šmonjinýanýé chca bacna soye ndoñe šmonjanmama; y chca, mora tondaye quenátsmëna tšengaftanga castigo jtsebmnama chacmotsamnama. ¹²Y chca, atše chë tsbuanácha tcbonjanëbuábiana ora, ndoñe checbátanëbuábiana chë puerte bacna soye tojanmábeyeca, ní chë bacna soye tojanoyëngacñábeyeca; ndayá tšengaftanga, mo Bëngbe Bëtsabe delante cuaftsemnëngcá, chë šmojanma soyiñe bëtscá chašmuenójuaboma, y chca, cha chašminýanýé tšengaftanga bëngbe tšabiana puerte šmenójuabnama. ¹³Chíyeca bënga más añemo ainaniñe fséntsebmna.

Pero ntsachetšá añemo fstsbmnama, masna puerte oyejuayënga fséntsemna, er bënga fsënjinýe Tito tša oyejuayá, er chabe ainaniñe lempe natjëmbana yojtsemna nýetsca tšengaftangbiana. ¹⁴Tito tšengaftanga jányama cabá nda ora, atše cha sënjanianyana tšengaftanga šmochjanóyeunaye chë atše tcbonjanëbuaja palabra ca; y tšengaftanga ndoñe chešmatsma atše chaitsëuatjama chca tijánayanama. Inýetšá, lempe ntšamo tcboujayuncá ndegombre endmëna; cachcá, ntšamo bënga Títbioye fsënjanianyancá ndegombre entsemna, chë tšengaftangbiana fstsóyejuama. ¹⁵Y mora Tito más cmontsababuánýeshana, ntšamo cha tcmojanamëndacá ndayá tšengaftanga šmojanmama, y ntšamo puerte respétoya y mo uamaná cuaftsemncá chabiana jtsejuabnayëse šmojanofjama tojtenojuabó ora. ¹⁶Atše puerte oyejuayá séntsemna, er atše sëndétatšëmbo tšën-

gaftanga ntšamo tšabá yomncá nýetsca soyënguine šmochtsamama.

Chënga jañëmuayama, inýe ošbuachiyëngbioye nýets ainánaca jujabuáchama

8 Y mora, Jesucristbeyeca catšátanga, bënga fséntseboše tšengaftanga chašmotetátšëmbo ntšamo Bëngbe Bëtsá bëtscá tšabe bendicionënga tojama Macedonia luarentše ošbuachiyëngcá enefjuanëngbiana. ²Chënga puerte tmojasufri, y chora chca, chënga tmojinýanýé becá imošbuáchema y tša imoyeuama; y masque puerte ndbomnjëmënga, chënga nýets ainánaca bëtscá tmojanacaredadó Jerusalemntša ošbuáchiyënga ndbomnjëmëngbiana. ³Atše sëndétatšëmbo y sëntsobena jayanama chënga ndegombre tmojatšatá ntšamo tmojobenacá, y ntsachetšá imobenentsana cabá más, chënga chca imobóseyeca. ⁴Tša šonjánaimpadana chëngbioye jálesenciama ndayánaca jamama, Jerusalemoca ošbuachiyëngbioye jujabuáchama. ⁵Bënga ftsjanobatmanama cabá más chënga tmonjanma; natsana, chënga Bëngbe Utabná tmojanianyana lempe ntšamo cha tojtsebošcá chënga jamama imojtseboše ca, y chentšana bëngaftácnaca cachcá tmonjanma; y lempe enjamna ntšamo Bëngbe Bëtsá inabošcá. ⁶Ndayá Macedonioca ošbuáchiyënga tmojanmama bënga añemo fsënjanoyëngacñeyeca, bënga Tito fsënjaimpadá chë tšabe trabajo chaopochocama, chë tšengaftangbeñe crocénana játbana, Jerusalemoca ošbuáchiyënga jujabuáchama, ndayá cha jamama tojanbojatšecá. ⁷Y morna, ntšamo tšengaftanga nýetsca soyënguine tša šmomncá —puerte ošbuáchiyënga, becá obenënga Bëngbe Bëtsabe soyëngama jóyebuambayama,

puerte osertánenga Bëngbe Bëtsabe soyëngama, corente juabnayënga bëtscá jamama Cristo jaserviama y bëngbioye corente ababuányeshanënga —cachcá, mórna bëtscá šmochjama quem trabajuíne chë ošbuáchiyënga ndbomnjëmëngbiama, tšëngaftangbe bonshánana jtsinýanýnayëse.

⁸Chca ndoñe quecbatëtsëtsná mo canye mandcá; atse sëntseboše ndayá nye tšëngaftanga jáuyanana ntšamo ínýenga bëtscá tmojatrabajá chë ndbomnjëmëngbiama, tšëngaftángnaca cachcá chašmotsamama; y chca, chašminýanýema chë tšëngaftanga šmobomna bonshánana ndegombre bëtsemnama. ⁹Er tšëngaftanga šmondétatšëmbo ntšamo Bëngbe Utabná Jesucristo puerte tšabe soyënga bëngbiama tojamama, bëngbioye puerte jtsababuányeshanëse. Celoca, cha cabá quem luaroye ndabo ora, cha bëtscá inabomna; pero tšëngaftanga ababuányeshanayeca, mo canye puerte nduamanacá tojanóbema. Y mora, Cristo mo canye nduamanacá tojobemayeca, Bëngbe Bëtsá puerte tšabe soyënga šojatšatá.

¹⁰Tšëngaftangbe tšabiama mëntšá cbabuayená, ntšamo quem soyíne šmochjamama. Chë inye uata tšëngaftanga šmonjanbojatšé, ndoñe nye chë ndbomnjëmëngbiama jacjayama, ndayá chca jamama jtsebošámnaca. ¹¹Morna, chë ndbomnjëmëngbiama trabajo šmochjapochóca; chca, ntšamo tšëngaftanga becá šmonjanprontana y jujabuáchama tša šmonjanbošcá, mórna cachcá chašmomama chë trabajo japochócama, ntšamo šmojobenacá jacjayëse. ¹²Er canye entšá, jatštayama ndegombre tojtsebošëse, ndayá cha tojatštacá Bëngbe Bëtsábioye oyejuayá jabemana, ntšamo cha tojtsobencá, y ndoñe ntšamo cha ndoñe tontsobencá.

¹³Ndoñe quenátsmëna, tšëngaftanga puerte ujabótënga chašmoquedá, ínýengbioye atšatnaye causa, chënga ndoñe yapa ujabótënga chamondétsemnama.

¹⁴Atše séntsichamo ndayá nyëtscanga chamotsenajabuachana, chca tojtséjaboto ora ca. Mora, chë bëtscá šmobomnentšana šmotsobena chënga jujabuáchana, ndayá tojtsabuáshebencá jatšatayëse; y inye orna, chënga entsamna tšëngaftanga jujabuáchana chë cmojtsabuáshebena soyëngaca. Chca, nyëtscanga jóyëngacñana ndayá tojtséjaboto ora. ¹⁵Ntšamo Bëngbe Bëtsabe uabemana palabrenguíne endayancá:

Chë tša bomnábioye ndoñe chebatanójama; y chë nye batšá bomnábioye, ndoñe quebënjatanbuáshbena ca.

Tito y chabe enutënga

¹⁶Bëngbe Bëtsá šcuatschuá, tšëngaftanga jtsanyënama Tito ainaniñe juabnënga chaotsebomnama cha tojanmama, cachcá ntšamo bënga fsëndbomncá. ¹⁷Er tšëngaftangbioye chaotsama bënga fsënjanimpadá ora, cha oyejuayá aífne ca tonjánayana choye jama; y chabiama puerte enduámama tšëngaftangbe tšabiana; chíyeca mora echanjá tšëngaftanga jányama, chca jamama cachá yobóšeyeca.

¹⁸Títóftaca, canya Jesucristbeyeca bëngbe catsata fsëntsichamná; chabiama puerte tšabá ošbuachiyëngcá enefjuanéngbenache mondoyebuambná, chabe trabajuama chë tšabe noticiënga abuyiynayama. ¹⁹Y ndoñe nye chë soye, sinó quem luarentše ošbuachiyëngcá enefjuanënga cha tmonjuábuayana bëngaftaca Jerusalenoye jama, y jujabuáchama chë ndbomnjëmëngbiama trabajuíne; chë trabajo endmëna bonshánana

jinñanñiyama; chca fséntsama, Bëngbe Utabná jtsatschuanayama y jinñanñiyama bënga chca jujabuáchama tša fstsbošama. ²⁰Títóftaca cha fséntsichamná, chca, ndocná chaondét-sichamo bënga ndoñe tšabá tifjama ca, ntšamo játbanama cmojtsamniñe, chë beca juabónana játbanama, ndbomñejémënga jujabuáchama; ²¹er bënga fsëndama lempe ntšamo fstsobencá, ndoñe ñe ntšamo Bëngbe Bëtsabe bominiñe tšabá yomncá jamama, ndayá ntšamo entsangbe bominiñe tšabá yomncánaca.

²²Chátaftaca inña Jesucristbeyeca bëngbe catsátnaca fséntsichamná; cha bënga ba soyiñe šonjinñanyé cha yojtseboše bëtská jamama, Cristo jaserviama, y mora más, er cha puerte bëtská entsejuabná tšëngaftanga puerte tšabá šmochjamama. ²³Y Titbiamna, cha quem trabajuñe atšbe enutá endmëna, y atscá tšëngaftangbiana endëtrabája; y chë inñata Jesucristbeyeca bëngbe catsatatbiamna, chata bontsemna quemuentša ošbuachiyëngcá enefjuanëngbe ichmónata, chëngbiana chabóyebuambama; y chë bontsama sóyecna, chata Crístbioye corente jt-satschuanayana. ²⁴Chíyeca, chëngbioca ošbuachiyëngcá enefjuanënga chca chamotsetatšëmbuama, chë ichmona boyabásëngbioye šmochjínñanyie tšëngaftanga ndegombre chënga šmojtsababuánñeshanama, y bënga razón ftsebomnana tšëngaftangbiana oyejuayënga jtsemnana.

Chë inñe ošbuáchiyëngbiana crocéna játbanama

9 Chë Jerusalenoca Bëngbe Bëtsabe entsangbiana crocéna játbanamna ndoñe quenátsiya tšëngaftangbioye jatëbuabiamnayama, ²er atše ndegombre séntsetatšëmbo tšëngaftanga tša šmojtseboše

chca jujabuáchama. Macedonioca entsanga puerte oyejuayá sempre sëndbëtsëtsësnaye, Acaya luaroquënga chë inñe uatscana quem trabajuñe jujabuáchama šmoprontánama; y chë jujabuáchama tšëngaftangbe bëtská juabnënga tmojama banga quem luarentšënga bëtská añemo chamot-sebomnana, chëngnaca chë trabajo jamama. ³Pero Jesucristbeyeca quem catsátanga séntsichamná, ntšamo bënga oyejuayënga tifjayancá tšëngaftanga chašmotsamama, chë tšëngaftanga quem trabajuñe bëtská šmochjama ca; chca, ntšamo tijanayancá ndoñe ñe bonamente chaondëtsemnana, y ntšamo sënjanayancá tšëngaftanga chašmotseprontánama; ⁴er nderado báseftanga Macedonioquënga átšeftaca tmojá y choca ndëprontánënga tcmojánñena chë ndbomñejémëng-biana ujabuáchënanaca, chë soye nanjama bënga fchaitšëuatjama, er ba soye fsënjayana bënga ndegombre fstsëtátšëmbo tšëngaftanga prontánënga šmochtsemna ca; y ndegombre, tšëngaftangbiana cabá más ouatjcá nántsemna. ⁵Chíyeca, tšabá šonjuínñana Jesucristbeyeca quem catsátanga jáimpadana chënga atšbe natsana chamotsama tšëngaftanga jányama, y chacmëjabuachama chë juabónana játbanama, ndayá tšëngaftanga tempo šmonjanašëbuachenacá. Chca, atše choca chaijáshjango ora, tšëngaftangbe juabónana chaotseprontana. Chca, tšëngaftanga šmochanjínñanyie ndbomñejémëngbiana šmojacjá, chca jamama tša šmobóseyeca, y ndoñe ñe batšatema jatšatayama y tšëngaftangbiana bëtská jobuájuaama šmojtseboše.

⁶Quemuñe šmochtsenójuabnaye: Nda ñe batšá tojajé, cach batšá chentšana josháchiñana; y nda bëtská tojajé, cach bëtská chentšana

josháchiñana. ⁷Cada ona bontsemna jajájuana ntšamo chabe ainaniñe tojajuabocá; ndoñe ngménaca o ñye ínÿenga chca jamama tmojtsemándayeca. Chca chaotsemna, er nda oyejuayá tojajajóbiye, Bëngbe Bëtsá jtsebobonshánana. ⁸Bëngbe Bëtsá endobena jamana chábensána nyetsca tšabe bendicionënga y bëtscá soyënga tšëngaftanga chašmotsebonnama; chca, ntšamo nyetsca soyënguñe cmojtsëjabotcá sempre chašmotsóbonñama, y cabá más bëtscá chašmotsebonnama, nyetsca tšabe obrënguñe ínÿenga chašméjabuachama. ⁹Bëngbe Bëtsabe uabemana palabrënguñe, mëntšá endayana chë bëtscá tojacjabiana: Cha nyets ainánaca ndbomnjémënga bëtscá jatsatayana; y chë tšabe soyënga ntšamo cha tojt-samcá nyets tempo jëftsemnana.

¹⁰Bëngbe Bëtsá, nda endbama chaotsemna jénaye jájema y sananga jasama, cmochanjátsataye lempe ntšamo cmojtsëjabotcá, y echanjama, tšëngaftanga cabá más tšabe soyënga chašmotsamama. ¹¹Bëngbe Bëtsá echanjama tšëngaftanga nyetsca tšabe soyënga chašmotsebonnama, chca, tšëngaftanga nyets ainánaca puerte ínÿengbiye chašmatšatama, y bëngbeyeca, chë mochjójyëngacñënga Bëngbe Bëtsá chamotsatschuanama; ¹²er chë ujabuáchenana Bëngbe Bëtsabe entsanga tcojatsatá ora, ndoñe ñye ndayá tojtsëjabotcá jatsatayana, ndayá chënga Bëngbe Bëtsá chamot-satschuanámnaca jamana. ¹³Chënga Bëngbe Bëtsá mochántsatschuanaye, er chë ujabuáchenanaca chëngbiye jinÿanÿiyana, ntšamo Cristbe tšabe noticiënguñe iuayancá tšëngaftanga šmobedecénama, y ntšamo tšëngaftanga tšabá jamëse, nyets ainánaca bëtscá soyënga chënga y nyetscanga

šmojátsatama. ¹⁴Y chënga tša mochántseboše tšëngaftanga jányama y tšëngaftangbiama Bëngbe Bëtsá mochántseimpadana, er cha bëtscá tšabe soyënga tšëngaftangbiama tojama. ¹⁵¡Bëngbe Bëtsá šcuatschuá ndayá cha šojátsatama, canÿe puerte uámana soye, ndocná jobenayana tšabá jayanama ntšamo chë soye bëtsemnana!

Ntšamo Pablo tojánayana ínÿenga chabe contra imojtsichamo ora

10 Y mora, atše Pablo, cbochan-jáimpada, tšëngaftangbiye puerte bonshanánaca jtsénÿayëse, y tšëngaftangbiama tšabá jamama jtseprontánëse, ntšamo cach Cristo endbetsamcá. Báseftanga tšëngaftangbioquënga imojtsichamo atše puerte nduamaná tsenóbema atše tšëngaftangaftaca stsemna ora, pero corente añemo bomná tsenóbema jabuache soyënga jayanama tšëngaftangbentsána bënoca stsemna ora ca. ²Tšëngaftanga cbontsaimpadana, tšëngaftanga jányama chajá ora, atše ndoñe chašondëtsemna puerte añemo bomná jtsemnana, jabuache soyënga tšëngaftanga jáuyanama, ndoñe ntšamo atše puerte tšabá sëntsetatšëmbcá ndayá báseftangaftaca jamama šojtsotocana, chë ndëmuanyënga imojtsejuabná, ñye bënga tšabá jtsomñama juabnéngaca bënga fstsiyena ca. ³Ndegombre bënga quem luarentše fsëndoyena, pero ndoñe queftsátspelia Cristbiana, ntšamo quem luarentša entsanga monduamancá; ⁴er chë ndaye sóyeca bënga Cristbe soyëngama fsëndépelia, ndoñe quenátsmëna mo chë ndaye sóyeca chë ñye quem luarama enójuabnaye entsanga japéliama monduamancá, ntšamo ñye chënga tšabá jtsomñama juabnénga yomncá. Inÿetšá, chë ndaye soyëngaca bënga fsëndépelia, Bëngbe Bëtsá jtsinÿanana puerte

obenana bomna soyënga yomna ca; y endmëna chë Satanás tojtsemánda soyënga jayëñjanama, puerte jabuache soyënga jayëñjanama. Mo nda canyë uayayábioye jtsepochoacá, chë Bëngbe Bëtsabe osertánana ndoñe yonduámána ca jinñanñiyama soyënga ichámëngbiama, ⁵y Bëngbe Bëtsabe osertánana jtsabotema juabnënga bomnëngbiama, bënga fsëndama ntšamo chënga tmojtsichamcá tondaye chaondëtsámanama. Y chë japéliama fsëndbomna soyëngaca, bënga fsëndbëtsama chca juabnayana chamotsajbanama, y chamotsobena ntšamo Cristo yomandacá jtsamana. ⁶Bënga fsëntseprontana chë Cristbiana nduauenanënga jácastigama, lempe ntšamo Cristo cmojtsamëndacá tsëngaftanga chašmojtsama ora.

⁷Tsëngaftanga ndayánaca jtsonñayana nñe ntšamo tbojtsabinñecá. Nderado nda becá tojtsejuabná Cristbia yomna ca, cha bontsemna jtsejuabnayana béngnaca Crístbenga fstsmënama, ntšamo cha yomncá. ⁸Er atše masque tša sëndbëtsoyebuambnaye chë Bëngbe Utabná šojatšatá mandama, chë ndáyeca bënga jamama tsëngaftanga puerte chašmotsošbuáchema y ainaniñe bëts añemo chašmotsebomnama, y ndoñe tsëngaftanga ntjapochócama, chama atše ndoñe quetsátëuatja. ⁹Atše ndoñe quetsátsoše tsëngaftanga chacmotsinñana, tsëngaftanga jaútatjayama atše stseboše ca, ndayá atšbe tsbuanáchangañe tijuábemama. ¹⁰Er báseftanga mëntšá atšbiana imojtsichamo: “Chabe tsbuanáchangañe cha šontsaménda bëtscá soyënga jamama, y tša obenacá cha jtsóyebuambnayana; pero cha béngaftaca tojtsemna ora, cha jtsóyebuambnayana mo canyë ndocna obenana ndbomnacá, y ntšamo tojtsichamcá tondaye

ntsámanana ca.” ¹¹Chca entšanga entsamna jtsetatšëmbuana, ntšamo bënga fstsichamcá, tsbuanachangá juíchmuase, tsëngaftangaftaca cabá ndoñe fsëntsemna ora, tsëngaftangaftaca fchaitsemna órnaca, bënga chca fchjamama.

¹²Ndegombre bënga ndoñe tša añemo queftsátsoyebuambnaye jayanama nñetsá uámanënga fstsmëna ca, mo chë cachënga jtsenábotamnyana uamanëngcá. Chënga jtsejuabnayana y jtsichámuana tsábenga imomna ca, nñe ntšamo cachëngbeñe ínñyenga imomnama jtsonñayëse; y chca tmojtsama ora, chënga juabna ndbomnënga jtsemnana. ¹³Bënga ndoñe yapa quifchatóyebuambaye cabëngbiama, chca, tša tsábenga bënga imomna ca jtsenábotamnyama; fchanjóyebuambaye ndayá chë bënga tifjama tsábe trabajuama, ndayá Bëngbe Bëtsá šojabanñecá, y chíñnaca entsemna ntšamo tsëngaftangbeñe Corintoca tifjamcá. ¹⁴Chíyeca, bënga ndoñe queftsatoyebuambná chë bënga ndoñe derecho fsëntsebomnama, ntšamo ndegombre nántsemna bënga tempo tsëngaftangaftaca ndoñe maf-sëñjamnëse; er bënga chë natsanënga fsëñjamna tsëngaftangbioye jama, Cristbiana tsábe noticiënga jábuayenama. ¹⁵Y ndoñe quifchatóyebuambaye tša tsábá bëngbe trabajo yomna ca, chë ndayama ndoñe šontsamna chca jatichámuana, chë trabajo ndoñe bëngbe soye, sinó ínñyengbe soye yómnyayeca. Chamna, bënga fsëntsobátmana tsëngaftanga Crístbeñe más chašmotsošbuáchema, y chca chaajtsemna ora, bënga fchayobená ba luariñe entšanga jábuayenana, ntšamo tsëngaftangbeñe fsëntsamcá. ¹⁶Chca, fsëntsobátmana bënga jobenayama tsábe noticiëngama jábuayenama, chë tsëngaftangbentšana más chcoye

imoyena entšangbioye; chca, bēnga ndoñe yapa quifchatóyebuambaye ín̄yengbe trabajuama, Cristbe soyēnga jábuayenama, mo chē soye bēngbe trabajo cuafjatsmēncá.

¹⁷ Ntšamo Bēngbe Bētsabe uabemana palabrenguiñe endayanca: “Nda tojtseboše jayanama cha can̄ye uamana entšá yomna ca, más tšabá cha cháuyana Bēngbe Utabná puerte uamaná endmēna ca.” ¹⁸ Er Bēngbe Bētsá jayanana can̄ye entšá ndegombre tšabá tojama ca, ndoñe n̄ye cachá tojtsenábotamnabiama, ndayá Bēngbe Bētsá chca ndegombre tojama ca Bēngbe Bētsá tojtsejuabnabiama.

**Pablo y chē ndoñe
ndegombre ichmónēnga**

11 Malaye atše šmēntjēuánta, atše básefta soyēnga mo can̄ye opá tojtsoyebuambnacá stsihámēntscuana, cach atše stsenabotamná ora. Masque ntšámnaca šmochtsēuánta. ² Bēngbe Bētsábeyeca atše tša cbondábabuan̄yeshana y cbondán̄yena, tšēngaftanga n̄ye cha chašmotsēstonama y ndoñe ín̄yengbioye. Er atše Cristo sēnjašbuachená tšēngaftanga sempre cha šmochtsēstonama, y sēntseboše, cha quem luaroye yochjésabo ora, chábioye tšēngaftanga júshejanguana, mo n̄ye chábioye sempre ustonēngcá, ntšamo can̄ye taitá chabe bembe ndocna boyabása nduabuatmá n̄ye can̄ye boyabásaftaca chaóbuamama jushjanguancá. ³ Mētšcuaye Evábioye tbojaningñé, y cha tbojanín̄ynana puerte osertanabe soyēnga cuafatsatsēsnacá, pero ndegombre ndoñe chca yonjamna. Atše sēntsauatja nderado cachá ín̄yenga tšēngaftangaftaca muanjama y tšēngaftangbe juabna chašmotrocá, y chca, tšēngaftanga chašmotsajbaná sempre jtsejuabnayana n̄ye Cristo n̄yetsca soyēnguiñe jtseservénama.

⁴ Atše chama sēntsauatja, er ndánaca jashjanguana y Jesusbiamatojtsabuayiyná, mo cha ín̄ye entšá cuafsemncá, ndoñe ntšamo bēnga Jesusbiamafsēndabuayiynacá, y tojtsama tšēngaftanga chašmobená can̄ye espíritu jtsebmōnana, pero ndoñe ntšamo chē Bēngbe Bētsá tojama tšēngaftangbe ainaniñe cháumashēnguama espiritcá, chē Uámána Espiritu, tšēngaftanga tšabá cha jtsēuántana. Y atše sēntsauatja, tšēngaftangbe ainaniñe ín̄ye buayenana chašmóyēngacñama ndánaca tojtsamama, ndoñe cachcá chē tšabe noticiēnga ntšamo ya bēngbentsana šmonjouencá, y chora tšēngaftanga chábioye becá tšabá jtsēuántana. ⁵ Pero atše sēntsejuabná tondayiñe más batšá uamaná tsmēna ca, chē Jesucristbe puerte uámána ichmónēnga imomna ca juabnayēngbiama. ⁶ Atše ndoñe sēnjuatsjin̄ye ntšamo corente tšabá entšangaftaca jóyebuambayama; pero atše puerte tšabá sēndétatšēmo ntšamo stsihámūama. Bēnga puerte tšabá n̄yetsca soyēnguiñe tšēngaftanga tcbonjan̄yan̄yé, ndegombre chca osertánana ftsbomnama.

⁷ ¿O atše ndoñe tšabá sēnjama, tšabe noticiēnga cbonjanabuayiyná ora, tšēngaftangbentsana atšbiama tondaye ntjotjañcá, nduamanacá jenóbemēse; chca, tšēngaftanga puerte uámanēnga chašmotsemnana Bēngbe Bētsá chaomama? ⁸ Mo ín̄yēnache ošbuachiyēngcá enefjuanēnga crocénana cuafjabaquēcá, crocénana sēnjanóyēngacñe chē ošbuachiyēngbentsana, tšēngaftanga jujabuáchama jobenayama. ⁹ Y tšēngaftangaftaca sēnjamna ora y ndayánaca šojanájoboto ora, atše ndoñe checbátantjañe atšbe opresidama, chca, tšēngaftangbiama totcá ndoñe chaondētsemnana; er chē Jesucristbeyeca catšátanga Macedoniocana

tmonjánashjajnënga, šmonjanatšeta ntšamo šojanbuashbencá. Chca, atše sënjanma, atšbe causa tšëngaftangbiana totcá ndoñe chaondétsemnana; y sempre chca chántsama. ¹⁰ Serto, Cristbe ndegombre soyënga atšbe ainaniñe séntsebotna; chíyeca, atše corente séntsetatšëmbo ndocná Acaya luarentše yochjama atše chayajbaná puerte oyejuayá jtsóyebuambnayama, chë tšabe noticiënga stabuayiyná ora; y chca chanjama atšbe opresidama chašmoyema ínÿenga ntamncá. ¹¹ ¿Y ndáyeca chca stsama? ¿Yojtsemna ndoñe cbondábabuanÿeshana causa? Ndoñe. Bëngbe Bëtsá endétatšëmbo tša cbondábabuanÿeshanama.

¹² Pero atše sempre chántsama ntšamo sëndamcá, chca, chë ínÿenga, chë Jesucristbe puerte uámana ichmónënga imomna ca juabnayënga ndoñe chamondétsebotna ndáyeca jatenábotam-nayama, ntšamo bënga fstsamcá chënga imojtsetrabája ca. ¹³ Er chënga ndoñe quemátsmëna Jesucristbe ndegombre ichmónënga, mondmëna chë ínÿenga jáingñama imotrabájanga, y mondana entšanga chaotsinÿanama chënga mo Jesucristbe ndegombre ichmónënga cuaftsemncá. ¹⁴ Y chama ndoñe šmatjenjaná, er cach Satanásnaca endbét-sama mo canÿe buashinÿinÿana angelcá jtsinÿanama; ¹⁵ chíyeca, ndoñe muatjenjaná, chabe oservenëngnaca tmojt-samama mo tšabe entšangcá jtsinÿanama. Pero chënga mochanjopochóca, ntšamo tmojtsomerecencá, ndayá tmojamama.

Ntšamo Pablo tojansufrí, Cristbe ichmoná bétsemna causa

¹⁶ Cachiñe cbochtëtëyana: ndocná chaondétsejuabná atše opá stsemna ca, cach atše stsenabotamná ora; pero chca šmojtsejuabnase, mo canÿe opabioycá šmochtsëuánta, chca, átsnaca jtsenábotamnyama

jobenayama. ¹⁷ Chca jayanëse, ndoñe quenátsmëna ntšamo Bëngbe Utabná endbetsamcá, ndayá canÿe opá inetsamcá; atše tšabá jtsetatšëmbëse ndegombre stsebotna ndáyeca jobenayama jtsenábotamnyana. ¹⁸ Banga mondmëna, cachënga jtsenábotamnyana ndayá quem luarentše chënga tmojamama, as átsnaca chantsenábotamnaye. ¹⁹ Tšëngaftanga chë tša osertánënga, oyejuayënga opéngbioye jtsëuantánana. ²⁰ Atše sëndétatšëmbo tšëngaftanga chë opéngbioye šmnetšëuantánama, er tšëngaftanga šmondbétšëuantana chë nÿets tempo tšëngaftanga mo chëngbe oservenëngcá tcmojtsamëndayënga, o chë tšëngaftanga bëtscá tcmojtsabacanga, o tcmojtsaíngñanga, o chë uámanënga tmojtšenobiamnanga tšëngaftanga mo nduamanëngcá jtsamëndayama, o chë tcmojtsajuebiantšëtaçyënga.

²¹ Atše chca séntsichamo masque séntsëuatja chca jayanama. Bënga fsënjamna corente obenana ndbom-nënga, ntšamo tšëngaftanga bëngbiana šmojayancá, tšëngaftangaftaca chca jamama.

Inÿenga, chë tšëngaftangbeñe imotrabájanga, ndayama jtsenábotamnyama tmojtsebotnëse, puerte uámana ichmónënga imomna ca jtsichámëse, átsnaca añemo séntsebotna chama jtsenábotamnyama; chca stjayana ora, mo canÿe opá tojtsoyebuambnacá séntsoyebuambná. ²² Chënga jtsenábotamnyana hebreunga imomnama. Atšnaca hebreo sëndmëna. Chënga jtsenábotamnyana Israeloquënga imomnama. Atšnaca Israelocá sëndmëna. Chënga jtsenábotamnyana Abrahábentšana entšanga imomnama. Atšnaca Abrahábentšana entšá sëndmëna. ²³ Chënga jtsichámuana Cristo imoservenana ca. Atše chëngbiana cabá más tšabe oservená sëndmëna.

Chca stjaryana ora, mo canye opá tojtsoyebuambnacá séntsoyebuambná. Atše chëngbiama más tijatrabajá, más šmojutame, más šmojatsetšená y ba soye atšbiama resjo endmëna jóbana. ²⁴Shachna soye judiënga šmonjantsetšená chë unga bnëtsana y esconëfta soye jasachënjëse, ntšamo chënga jacastígana monduamancá. ²⁵Unga soye niñëbëngaca šmonjanétsjanganja, y ndëtšbëngaca canye šmonjanatëchénganja. Unga soye chë atše sënjänenjaquena barco tontsanenatjëmba, y chca ora, canye šonjanotocá, chë mar béjayoca tsachocana bënoca canye ibeta jëftsebobínynana y canye te jëftsejétanana. ²⁶Atše becá sënjänana, y chca atšbiama resjo enjamna bëts fshajayënguine y uacucuatšënga chašmuebiatbëbama; resjo cach atsbe entsángbentse, judiënga y ndoñe judiëngbentse; resjo bëts publënguëntse, entsanga ndoyenentse y mar béjayoca. Atšbiámna resjo enjamna chë Jesucristbeyeca atšbiama catšátanga imomna ca jtsichámuana, pero ndegombre chca ndoñe mondmënéngbeñe. ²⁷Atše bëtsca tijatrabajá empás uamëntšnáy joquédantscuana; ba soye tijachnëngo ibeta ntsamanacá y ba soye tijachnëngo shëntseca y uajuendayá; ba soye ndayá jasama ntsebmncá; tijasufri sësna y tondaye entsayama.

²⁸Quem soyëngama y inye ndoñe chiyátayana soyëngama más, atše cada te natjëmbana ainánaca ndoñe queschatstëmna, er ndoñe quetsátstatšëmbo ntšamo nyetsca ošbuachiyëngcá enefjuanënga imojtsiyenana. ²⁹Ndánaca tšabe soye jamama tondaye añemo tontsebmna ora, atše chabiamá šochandbóngmia, mo átšnacá cach tondaye añémoca cuabndëtsemncá. Nderado inyënga

tmojama ndánaca bacna soyiñe chaótsatsama, atše ndegombre puerte ngménaca chandbëtsesufrina. ³⁰Nderado nya tojátsiyta atše ndayama jatenábotamnyama, as chë atše tondaye obenana ndbomná tsmënama inyanynaye soyëngama chtsenábotamnaye. ³¹Bëngbe Bëtsá y Bëngbe Utabná Jesucristbe Taitá, ndábioye nyetscanga nyetsca tescama jtsatschuanayama entsamna, cha endëtatsëmbo atše ndegombre stsichámuama chë sëntsoyebuambná soyënguine. ³²Atše Damasco bëts pueblaca sënjamna ora, chë rey Aretasbe uabuáyana mandado tojanmandá chë puebløye amashjuaniñe soldadënga chamotsebojanýama, atše chašmishachama chëjana stsebecana ora; ³³pero básefta enutënga, canye sbarëcuiñe šmontsanëstjango chë pueblentša shëconana tapiëšiñe canye atëfjnëjana, y chca atše sënjanobená chëngbe cucuatšëntsana jótsbocana.

**Ndayá Pablo mo otjenayoquëcá
tojáninye y ndayá Satanás
tojanma, Pablo chaosufrima**

12 Atše šontsemna más jtsenábotamnyana, masque chca tcojamentšana ndocna tšabe soye ntjóbcnana. Mora chanjóyebuambaye, chë mo otjenayoquëcá sënjinye Bëngbe Bëtsabe soyëngama y Bëngbe Utabná šojinýinyé soyëngama. ²Atše canye entsá sënduábuatma, cha Crístoftaca cányñe mo canyacá endmëna y nda bnëtsana canta uata entsemna, Bëngbe Bëtsá tbojanánatse, chë celoca más tsbanánoye, Bëngbe Bëtsá yomnoye. Atše ndoñe quetsátstatšëmbo Bëngbe Bëtsá cha tbojanánatse chabe cuérpoca o nye chabe espiritiñe. ¡Nye Bëngbe Bëtsá chama yotátšëmbo! ³⁻⁴Atše sëndëtatsëmbo Bëngbe Bëtsá chë entsábioye cloye tbojanánatsama,

nÿetscanga oyejuayënga imomnoye (atše ndoñe quetsátstatsëmbo Bëngbe Bëtsá tbojanánatse chabe cuérpoca o nÿe chabe espiritiñe; nÿe Bëngbe Bëtsá chama yotátšëmbo), y chentše cha tojanuena palabrënga, ndocná bontsemna jayanama palabrënga, chë ndayama entsångbiana ndoñe yontselesenciana jatichámuana. ⁵Atše chë entsá sëndmëna. Canÿe entsá ndáftaca chca tojopasabiana, tšabá nántsemna chama jtsenábotamnayana; pero cach atšbiana jtsenábotamnayana ndoñe tšabá ntsemnana, ndayá nÿe chë atše mo obenana ndbomnacá tsmënama inÿinÿnaye soyëngama chantsenábotamnaye. ⁶Y nderado jtsenábotamnayama atše stseboše, chca ora atše ndoñe stsama mo canÿe opá tojtsoyebuambnacá, er ntšamo ndegombre yomncá atše stsichamo. Pero chca ndoñe quetsátama, chca, ndocná chaondëtsejuabná ntšamo atšbiana tbojtsinÿanama o ntšamo atšbiana cha tojouenama atše más tsmëna ca. ⁷Chíyeca, tša uamaná tsjamna ca atše ntjátsjuabnayama, atše chë Bëngbe Bëtsá tša bëts soyënga tbojaninÿinÿé entsá bëtsemnayeca, Bëngbe Bëtsá tojanma atše chaitsebomna ndáyeca puerte chaisufrima, mo canÿe bëts uchmašëfja atšbe cuerpiñe tojtsashacuancá, mo Satanasbe ichmona soycá, atše chaisufrima chaomama. ⁸Unga soye Bëngbe Utabná sënjamipadá chca sufrínana chašotsebojuánama; ⁹pero Bëngbe Utabná šonjauyana: “Nÿe atšbe bonshánana endmëna lempe ntšamo cmojtsajabotcá; nÿetscanga atšbe obenana más tšabá jinÿana, chë obenana ndbomna entsångbeñe atšbe obenana stjínÿanÿiye ora ca.” Chcasna, atše puerte oyejuayá chanjóyebuambaye chë atše mo obenana ndbomnacá tsmënama

inÿinÿnaye soyëngama, Cristbe obenana átšbeñe sempre chaotsomñama. ¹⁰Chíyeca, Cristo jaserviama, oyejuayá chandbëtsemna atše mo obenana ndbomnacá stsemna ora, inÿenga šmojtsoyenguá ora, puerte padecena soyënga causa ndayá jamama ndoñe séntsetatšëmbo ora, atše puerte chaisufrima inÿenga tmojtsama ora y puerte tšetšena ainánaca stsemna ora; er chca soyënguñe stsemna ora, mo canÿa obenana ndbomnacá, chora Bëngbe Bëtsá jamana atše ainaniñe bëts añemo chaitsebomnama.

**Nderado ndayá Corintoca
ošbuachiyënga muanjamama
Pablo yojánauatja**

¹¹Atše chca chë soyëngama séntsenabotamná ora sënjoyebuambá mo canÿe opá tojtsoyebuambnacá, pero ndegombre tšëngaftanga šmonjama atše chca chaimama. Er tšëngaftanga šmondmëna ndëmuanÿenga vojtsamna atšbiana puerte tšabá jtsichámuana, atše chca jtsenábotamnayama ndoñe chašondëtsemnana. Ndegombre, atše tondayiñe más batšá uamaná quetsátsmëna, chë Jesucristbe puerte uámana ichmónënga imomna ca juabnayëngbiana, masque atše šontsebiona mo atše tondaye cwaftsamancá. ¹²Canÿa Jesucristbe ndegombre ichmoná bëtsemnama inÿinÿnaye soyënga, tšëngaftangbeñe tonjanopasá atše choca sënjamna ora. Chca, chë Bëngbe Bëtsabe obenana inÿinÿnaye soyënga y chë tšabe soyënga ntšamo chora tonjanopasacá, puerte tšabá jtsinÿanÿnayana atše canÿe ndegombre ichmoná tsmënama; y atše chca sënjanma, padecena soyënguñe puerte uantado jtsemnëse. ¹³¿Ndayá tšëngaftanga ndoñe cachcá šmonjanóyëngacñe chë inÿe luarenache ošbuachiyëngcá enefjuanëngbiana?

Canÿe soye aínë, er tšëngaftangbiöye tondaye ntjotjañcá, atše ndoñe chiyatslesenciá tšëngaftanga atšbe opresidama chašmuájabuachama, ntšamo inÿe ošbuáchiyënga aínë sënjalesenciácá. Šmochtseperdóna chca bacna soye tšëngaftangbiamá tijamama.

¹⁴ Atše ya sëntseprontana, móracna unga soyama jama tšëngaftanga jányama, y mora atše cach ndoñe quebochataimpáda atšbe opresidama chašmuatájabuachama. Atše ndoñe quetsátšboše chë tšëngaftanga šmobomna soye jatsbomnana, ndayá puerte sëntseboše tšëngaftanga Cristo sempre chašmotseservénama. Atše chca jamama sëntseboše, er atše tšëngaftangbiamá mo canÿe taitacá, Crístbeñe šmotsanošbuachéyeca, atše chabiamá tcbonjanabuayená ora; sëntsejuabná chë taitanga inétsamna crocénana jájuabana básenga jtsanÿenama, y ndoñe básenga chë taitangbiamá. ¹⁵ Y atše corente oyejuayá lempe ntšamo tsbomncá chanjátsataye, y atše jopochócantscuanënaca, tšëngaftangbe tšabiamá. Atše cada te más cbojtsababuánÿeshanëse, ¿tšëngaftanga más batšá atše šmochtsebobonshana?

¹⁶ Ndoñe; tšëngaftanga tšabá šmondé-tatšëmbo, atše uajabotá sënjamna ora, atše tondaye tcbonjanótjañama. Masque chca, báseftanga imojtsichamo ntšamo ínÿenga ndayínnaca jáingñama atše tstátšëmbo ca, chéngbentšana crocénana josháchiñama; y atše catijama, ínÿenga jáingñase, nÿe ntšamo atše tsbošcá chamotsamama ca. ¹⁷ ¿O nderado atše tcbøjaingné, canÿa chë tšëngaftangbiöye sënjichamó chentšáftaca? ¹⁸ Tito sënjanimpadá tšëngaftanga jányama chaotsama, y cháftaca sënjanichmó chë inÿa bëngcá Crístbeyeca bëngbe catsata. ¿Nderado Tito tcmøjaingné? ¿Ndoñe ndegombre

yondmëna, Tito y atše cachcá fstsjuabná y fstsboše y cachca soyënga jtsamëse fstsiyena? Ndegombre chca endmëna.

¹⁹ Nderado tšëngaftanga šmo-jatsjuabná bënga jenéuyanama chca cbojtsëtsëtsná ca; pero ndoñe chca quenátšmëna. Inÿetsá, bënga Crísoftaca cánÿiñe mo canÿacá entsangcá, Bëngbe Bëtsabe delante fsëntsoyebuambná, y lempe ntšamo tijayancá, Jesucrístbeyeca atšbe bonshana catsátanga, tšëngaftangbe tšabiamá tijayana, Crístbeñe corente chašmotsošbuáchema y ainaniñe bëts añemo chašmotsebomnana. ²⁰ Er atše sëntsauatja, atše jányama chajjá ora, ndoñe chacbondánÿena ntšamo tsbošcá, y tšëngaftanga atše ndoñe chašmondínÿena ntšamo šmojtsebošcá. Sëntsauatja nderado bacna soyënga šmattsama: jtsenpenzentserana, ínÿengaftaca yapa jtsenántšabošana, ndayánaca rábiaca jtsamana, nÿe tšëngaftangbiamá tšabe soyënga jtsebomnana jtsebošana, ínÿengbiamá podesca ichámuana, uayátsenayënga jtsemnana, ínÿengbiamá cachënga más uámanënga jtsenobiamnayana, y nÿetscanga ndoñe cachcá ntsejuabnayana. Chca chacbojánÿenëse, tšëngaftanga ndoñe quešmochátšbošena jóyëngacñana ntšamo tšëngaftanga jucácanama atše šochtsemncá. ²¹ Atše sëntsauatja, cachiñe jányama chajjá ora, atšbe Bëtsá chaoma atše chaitsëuatja chca šmojtsamama, y chašotsemna puerte ngménaca jošachnama ba tšëngaftangbiamá, ndëmuanÿenga ya bayté bacna soyënga imojtsama y chca juabnayana ndoñe tmonjatrocá, y ndoñe tmonjajbaná chë bacna soyënga boyabása o shembásaftaca jtsamama juabnayana, y chca soyënga jtsamana y nÿetsca bacna soyënga jtsamana, jenomándama ntsobercá.

**Inye soyengama
jábuayenama y jádiošoftama**

13 Móraca ya unga soyama tšengaftanga jányama chanjá. Atše chajáshjango ora, tojtseytése chanjayana ntšamo báseftanga tmojamcá tšabá o ndoñe tšabá bétsemnana. Nda bacna soye ntšamo Moisesbe leyini endemandancá tojama ora, atše chanjayana cha ndoñe tšabá tonjama ca; pero útata o únganga tmojtsemnëse, chënga chamuayanama cha ndegombre chca tojamama. ²Atše tempo sënjanabuayená, chë tšengaftanguentsënga bacna soye tmojánamënga y chë ínÿenga, atše šojtsanmëna jácastigana, chca soyënga amana ndoñe tmonjájbananga. Mora, tšengaftangbentshana bënoca séntsemna ora, cachiñe cachcá cbëtëtabuayená, ntšamo sënjanamcá chë tšengaftangaftaca uta soyama sënjamna ora: atše cachiñe jányama chajjase, ndoñe quichatsleséncia bacna soyënga chašmotsamama y chama ntjacastigacá jatabáshejuanana. ³Atše chca chanjama, er tšengaftanga šmontsenguá ndayánaca tšabá chacminÿanÿema Cristo atšbiajana yoyebuambnama. Cristo ndoñe quenátsmëna mo canÿa obenana ndbomnacá, ntšamo tšengaftangaftaca cha tojamama; ndayá chabe bëtš obenana tšengaftangbeñe bëtscá jtsinÿanÿayana. ⁴Er cha tmojanrucificá mo canÿa obenana ndbomnacá; pero mora, Bëngbe Bëtsá puerte obená betsómñeyeca, cha tojtayena. Cachcá béngnaca, cháftaca cánÿiñe mo canÿacá jtsemnëse, mo obenana ndbomnëngcá jtsemnana; pero cháftaca mochantsiyena, Bëngbe Bëtsá puerte obená betsómñeyeca, tšengaftanga jtsaservënama.

⁵Tšengaftanga cada ona šmochjšhénojuaboye, tšabá jtsetatšëm-

buama mocna entšanga bétsemnana, jtsetatšëmbuama aiñe o ndoñe sempre Crístbeñe puerte tašmuetsošbuáchema. Šmochjšhénojuaboye chca šmošbuáchema ntšamo šmojtsemnana y tšabá ínÿenga šmochjínÿanÿiye. ¿Ndoñe šmondétatšëmbo Jesucristo tšengaftangbe ainaniñe yoyenama? Ndoñesna, tšengaftanga ndegombre ndoñe Crístbeñe ošbuáchiyënga šmontsemna. ⁶Pero atše séntsobátmana tšengaftanga ndegombre chašmotsejuabnama bënga Jesucristbe ndegombre ichmónënga ftsmënana. ⁷Y Bëngbe Bëtsá fséntseimpadana bacna soye ndoñe chašmondétsamama, ndoñe chë Jesucristbe ndegombre ichmónënga ftsmënana tšengaftanga jinÿanÿiyama, ndayá ntšamo tšabá yomncá chašmotsamama. Nÿetscanga chca tmojtsamëse, nántsinÿna mo Crístbe ndegombre ichmónënga bënga ndoñe cuabndmëncá, er chca ndoñe tašuatátëjaboto jinÿanÿiyana ntšamo bënga bëngbe mándoca ftsmënana mo ichmonëngcá, tšengaftanga jábuayenama. Pero chë soye tondayana šattsentsamna, ⁸er bënga queftsátobena tondaye jamana Bëngbe Bëtsabe ndegombre soyëngama contra; nÿe ntšamo chabe ndegombre soyënga yomncá aiñe. ⁹Bënga fséntseboše ntšamo tšabá yomncá tšengaftanga chašmotsamama, er bënga oyejuayënga fchandbétsemna, bënga mo chë obenana ndbomnëngcá ftssemna ora, bëngbe mando jácastigama ntjatinÿanÿaycá, y tšengaftanga ainaniñe bëtš añémoca šmojtsemna ora y puerte tšabá šmojtsemománda ora. Bënga Bëngbe Bëtsá fchandbétseimpadana, chca bacna soyënga amana jtsajbanase, chašmobená jtsemnana nÿetsca soyënguñe tšábënga, y lempe ntšamo tšengaftanga chašmotsemnana Bëngbe Bëtsá yobošcá. ¹⁰Quem tsbuanácha

cbontsëbuabiamná tšëngaftangaftaca cabá ndoñe séntsemna ora; chca, atše choye chajjá ora ndoñe chašondétsemna jabuache jucácanana, mo canya puerte mandayacá, ntšamo Bëngbe Utabná šojanbemcá, tšëngaftanga jujabuáchama chábeñe corente chašmotsošbuáchema y ainaniñe bëts añemo chašmotsebomnama, y ndoñe tšëngaftanga jatapochócama.

¹¹ Morna, Jesucristbeyeca atšbe catšátanga, tšabá chašmotsomñe, šmochtsajbaná chca bacna soyënga amana y šmochtsemna lempe ntšamo Bëngbe Bëtsá yobošcá. Šmochjouena ntšamo tcbonjabuayenacá, nyetscanga cachcá šmochtsejuabnaye, nyetscán-gaftaca natjëmbana šmochtsiyena, y Bëngbe Bëtsá, chë cmondababuanye-

shaná y tšëngaftangbe ainaniñe tšabe ebionana chašmotsebomnama endamá, tšëngaftangaftaca echántsemna. ¹² Nyetscanga šmochjenchuaye mo Jesucristbeyeca catšatangcá, jtenámochëse, ntšamo cach tšëngaftangbe pamíllanga puerte bonshánana cšmondbetsacheuanaycá. ¹³ Nyetsca quem luaroca ošbuáchiyënga cmontsacheuaná.

¹⁴ Atše, Bëngbe Bëtsá séntseimpadana, Bëngbe Utabná Jesucristo chaoma, nyetsca tšëngaftangbeñe tšabe bendicionënga chaotsemnama. Bëngbe Bëtsabe bonshánana sempre chašmotsóbomñe, y Uámana Espíritu sempre chašmotsóbomñe, y chë Uámana Espíritoftaca cányiñe mo canyácá chašmotsomñe.

Gálatas

Pablo Galacia luaroca ošbuáchiyënga jacheuayama

1¹⁻² Atše Pablo, quem tsbuanácha sentsabiamná Jesucristbeñe ošbuáchiyëngbiama, chë Galacia luaroca ošbuáchiyëngcá enefjuanëngbiama. Jesucristo y Bëngbe Bëtsá, chë Taitá, nda tojanma Jesucristo cháuatayenama, chata šmonjanchembo chatbe ichmoná jtsemnama. Ndocna entšá chešnátanabuayana atše Cristbe ichmoná jtsemnama; ni Jesucristo, ni Bëngbe Bëtsá ndocna entšá tbonjanichmó atše chatbe ichmonacá jabuábuayanama. Atše y chë ínÿenga Jesucristbeñe ošbuáchiyënga átšeftaca montsemnënga, tšëngaftanga cbontsacheuaná. ³ Atše sëntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšabe bendicionënga tšëngaftangbeñe chaotsemnama, y chaboma tšëngaftangbe ainaniñe tšabe ebionana chašmotsebomnama. ⁴ Cristo chabe derecho vida jtsobomñama cachcá tojanonýá y tojanóbana, bëngbe bacna soyënguentšana játsebacama, y bënga chamotsobena jtsiyenama ndoñe ntšamo quem tempo entšanga imoyencá, puerte bacna soyënga imojtsama ora. Cristo tojanóbana ora, tojanma ntšamo Bëngbe Bëtsá, Bëngbe Taitá endmëná yojanbošcá. ⁵ Nÿetscanga nÿetsca tescama Bëngbe Bëtsá chamotsatschuaná. Chca chaotsemna.

Nÿe canÿe ndegombre buayenana soyënga Cristbiamna endmëna

⁶ Atšbe ainanoca inÿetšá šontsebiona, er nda nanjouena, tšëngaftanga nÿe

baseftayshinÿe y ya juabna šmojatstrocá y Bëngbe Bëtsá stëtšoye šmojtsequedá, nda tšëngaftanga tcmojáchembo chabe entšanga chašmotsemnama. Cha chca tojanma Crístbeyeca, er mua puerte tšabia tšëngaftangaftaca enjamna. Tšëngaftanga Bëngbe Bëtsá stëtšoye šmojtsequedá, ínÿengbe buayenana soye jouenama, y chë ínÿenga jtsichámuana chë buayenana soyënga chë tšabe noticiënga canmëna ca. ⁷ Ndegombre, ndoñe quenátsmëna inÿe ndegombre buayenánana. Ntšamo entsopasancá mëntšá entsemna: báseftanga montsama tšëngaftanga ndoñe natjëmbana ainánaca chašmotsiyenama, y becá montsama chë Cristbiamna tšabe noticiënguentše, ba ndegombre soyënga jtsejuánama, inÿe soyënga jacjayama. ⁸ Nderado bënga o canÿe celoca ángel soyënga cmojtsabuayiyná, y ndoñe tontsemna mo chë tšabe noticiënga bënga tempo tbonjanabuayenacá, as chë chca tojtsamabiamna ¡Bëngbe Bëtsá chaoma infernoca becá chaosufrima! ⁹ Tempo ya chca sënjánayana; mora cachiñe šcutétayana: Nderado nda soyënga cmojtsabuayiyná, y ndoñe tontsemna mo chë tšabe noticiënga, ntšamo tempo šmonjanoyëngacñëcá, ¡Bëngbe Bëtsá chabiamna chaoma infernoca puerte chaosufrima!

¹⁰ Atše chca stjayana ora, ¿tšëngaftanga cmojtsinÿana atše soyënga stsama entšanga oyejuayënga átšeftaca chamotsemnama? Ndoñe chca quenátsmëna. Atše sëndboše ndayá Bëngbe Bëtsá átšeftaca oyejuayá chaotsemnama. Entšanga oyejuayënga chamotsemnama, atše cabá soyënga stsamëse, atše ya ndoñe Cristbe canÿe oservená stsemna.

**Ntšamo Bëngbe Bëtsá Páblëbioye
tbojanchembo, Jesucristbe
ichmoná jtsemnama**

¹¹ Atše séntseboše tšëngaftanga, Jesucristbeyeca atšbe catšátanga, chašmotsetátšëmbo chë tšabe noticiënga ntšamo sëndabuayiynacá quem luarëntša entsangbe juabnentsana ndoñe yondóbocanama. ¹² Ndocna entšá chë tšabe noticiënga chešnatanbuayená, ni chešnatanbuatëmbá, ndayá cach Jesucristo šonjaninÿinÿé.

¹³ Tšëngaftanga šmojátatšëmbona ntšamo atše tempo tsjanamana jtsiyenana, ntšamo judiënga Bëngbe Bëtsá mondadorancá atše cha sënjanadorana ora, ntšamo atše becacá tsjánamama chë ošbuachiyëngcá enefjuanënga puerte chamosufrima, y ntšamo atše becacá tsjánamama ndocná Jesucristbeñe chaondëtsošbuáchema. ¹⁴ Atše inÿe judiënga cach atšcá uata bomnëngbiama más sënjánama Bëngbe Bëtsá adórayiñe, ntšamo judiënga cha jadórama monduamancá, y atše nÿets añémoca tša sënjantšena jtsamama ntšamo bëngbe bëts taitanga básenga jabuátambama monjanamancá. ¹⁵ Pero Bëngbe Bëtsá atšbe tšabiamama yojanjuabná, y chíyeca, atše cabá ndonÿna ora, canÿe bëts soyama cha šoanbocacá. ¹⁶ Y cha tojánbošena ora, šonjaninÿinÿé ntšamo ndegombre chabe Uaquiñá yomnana, y šonjanchembo. Cha chca tojanma, atše chë tšabe noticiënga ndoñe judiëngbeñe chayábuayenama. Y atše ndocnábioye chiyataná ndayá jamama šojtsanmënema chašobuayenama; ¹⁷ y Jerusalenoye cach ndoñe chiyataná chë atšbiama más natsana Jesucristbe ichmónënga imojamnëngaftaca jencuëntama. Chamna, cachora Arabia uabaina luaroye sentsanoñe,

y chentšana Damasco bëts puebloye sëntaná.

¹⁸ Jesucristbeñe jtsošbuáchiyama sënjanóntša orscana, unga uatëse Jerusalenoye sënjánama Pédroftaca jencuëntama, y cháftaca nÿe uta semana sënjëftsemna. ¹⁹ Y ndocna chë Jesucristbe inÿe ichmónënga chiyáisananÿe; nÿe Santiago añe, Bëngbe Utanabe catšata. ²⁰ Bëngbe Bëtsá šontsonÿá, ntšamo tšëngaftanga cbontsëtsësnacá ndegombre bëtsemnama.

²¹ Jerusalenocana sënjëftsanbocnentsana, Siria y Cilicia luarëngoye sënjánama. ²² Pero chë tempo, chë Jesucristbeñe ošbuachiyënga Judea luaríñe bomínÿeca ndoñe quešmënjatanábuatma. ²³ Nÿe inÿengbiome imojtsayaunana: “Nda tempo bënga puerte chamotsesufrínama enjanamá, mora entsanga entsabuayiyná, Jesucristbeñe jtsošbuáchiyama caojtsamna ca. Y tempo cha tša enjánboše jamama entsanga Jesucristbeñe ndoñe chamondëtsošbuáchema ca” —chënga imojtsichamo. ²⁴ Y entsanga Bëngbe Bëtsá imojtsatschuanaye, ndayá cha atšbiajana tojanmama.

**Chë inÿe ichmónënga tmojánayana
Pablo añe tšabá yojsama ca**

2 Jerusalenoye sënjánama orscana bnëtsana canta uatëse, cachiñe choye sënjesaná. Bernabé šonjantjëmbambá, y Tito bëndátaftaca fsënjëftsanbetše. ² Choye sënjánama, choye jama šojamnama Bëngbe Bëtsá šonjaninÿanÿeyeyeca. Atše nÿe chë Jesucristbeñe ošbuachiyëngbiama uámanënga imojamnëngaftaca sënjanencuentá, inÿengraftaca ndoñe; y chë tšabe noticiëngama chë ndoñe judiëngbeñe sëndabuayiynama chënga sënjanacuntá. Chca sënjanma atše jtsetatšëmbuama, ntšamo

tijanma y sënjëftsamcá ndoñe nÿe bonamente yonjamnama. ³ Pero chënga tmonjánayana atse aíñe tšabá tijanma ca, y Tito, chë átšeftaca enjamná, masque Grecia luarocá enjamna, chënga ndoñe chematanmandá base bobachtema chë más delicadentše tëtšená chaotsemnama, ntšamo judiënga monduamancá, Bëngbe Bëtsábenga imomnama chaotsinÿnama. ⁴ Chca tonjanopasá, masque inÿyenga monjánboše Tito base bobachtema chë más delicadentše tëtšená chaotsemnama. Chënga tmonjánayana bëngcá Jesucristbeñe ošbuáchiyënga imojamna ca, pero ndoñe chca quemënjatsmëna. Chënga chë Jesucristbeñe ošbuáchiyëngaftaca tmojanenutaná, ndayá vojtsanopasánama chë ošbuáchiyënga ntsetatšëmbcá, mo chë ošbuáchiyëngbiama bacna soyënga jamama cuafseitëmena cuenta. Chënga tmojánabo jtsetatšëmbuama ntšamo Jesucristo bënga atsebácanënga šojánabiamama, chë judiëngbe leyëngaca ndëmandánënga, cháftaca cánÿiñe mo canÿacá jtsemnëse. Chënga chca tmojanma, er chënga imojtsanboše jamana, bënga chë judiëngbe leyëngaca nÿets tempo mandánënga chamotsiyenama. ⁵ Pero bënga ndocna ora fchiyátanayana aíñe ca chë ntšamo chënga monjánichamo bënga šojánamna jamama soyëngama, er bënga becá fsënjánboše tšëngaftanga nÿets tempo Jesucristbe ndegombre tšabe noticiënga chašmotsóbomñama.

⁶ Pero chë ndëmuanÿengbiama entšanga monjánichamo chë uánatsanënga imojamna ca (ndayá chënga tempo imojamna atšbiama ndoñe quenatámama; Bëngbe Bëtsabiama nÿetscanga cachcá monduámama), chëngna tondaye chešmatanbuayená, ntšamo tempo tijanmama inÿetšá chaimama. ⁷ Masna,

chënga tmonjántatšëmbona, Bëngbe Bëtsá chë tšabe noticiënga ndoñe judiënga jábuayenama trabajo atse jamama šojanëntsabuáchema, ntšamo judiënga jábuayenama cachcá Pédrëbioye tbojanëntsabuachecá. ⁸ Er Bëngbe Bëtsá atse chabe ichmoná šonjábema, ndoñe judiënga chabiama jábuayenama, ntšamo cachá Pédrëbioye chabe ichmoná tbojanbemcá, judiënga chabiama jábuayenama.

⁹ Santiago, Pedro y Juan, chë ošbuachiyënguentša uánatsanënga, atse canÿe bëtš trabajo chaitsebomnama Bëngbe Bëtsá tojanmama tmonjántatšëmbona ora, cucuatše šontanatšataye atse y Bernabëbioye, jinÿinÿiyama chënga šojanënbuajama mo cachëngbe trabajo amatcá. Y fsënjanenoyeuná bëndata jama, masna ndoñe judiënga jtsabuayiynayama trabajo jamama, y chëngna judiëngbeñe. ¹⁰ Chënga nÿe šonjanaimpádaye chë ošbuáchiyënga ndbomnjëmënga Jerusaleñoquëngbiama jtšenójuabnayama; y atse bëtšcá séntsama chënga jujabuáchama.

Pablo Antioquioca Pédrëbiama tojánayana cha ndoñe tšabá tojanma ca

¹¹ Pero Pedro Antioquía bëtš pueblöye tonjánabo ora, chabe delante sënjánayana cha ndoñe tšabá tonjanma ca, er ntšamo enjanamcá ndoñe tšabá quenjatsmëna. ¹² Mëntšá tonjanopasá: Santiago básefta entšanga Antioquiöye tojanichmó, pero chënga cabá choca ndáshjajna ora, Pedro yojanamana chë ndoñe judiënga ošbuáchiyëngaftaca jtsesayana. Pero chë entšanga tmojánashjajnentšana, Pedro tojtsanajbaná chëngaftaca sayana y encuéntayana. Cha chca tojanma, ntšamo chë ndoñe judiënga ošbuáchiyënga, chë base bobachtema chë más delicadentše

tétšenënga jtsemnama yojánamna ca tmojánayanënga, chabiamana muanjájuaboyama yojtsauatja causa. ¹³Chë inÿe judiënga ošbuachiyëgnaca tmojanontšë amana cachá ntšamo Pedro yojtsamcá, jtsamëse ntšamo chënga imojántatšëmbo chca jamana ndoñe yonjanamncá. Y Bernabënaca, ntšamo chënga imojtsamcá jtsonyayëse, chëngcá yojtsama, jtsamëse ntšamo cha yojántatšëmbo chca jamana ndoñe ibonjamncá. ¹⁴Chënga ndoñe quemënjátaniyena jtsamëse ntšamo yojanamncá, ntšamo chë Jesucristbe tšabe noticiënguentša ndegombre soyënga endmëncá. Chca sënjáninÿe ora, Pédrëbioye nyëtscá ošbuachiyëngbe delante sënjaniyana: “Aca canÿe judío, mo ndoñe judío bendmëncá cojtsiyena, y ndoñe ntšamo chë judiënga jamama monduamancá; chcasna, ¿ntšamo catjobenaye jamana chë ndoñe judiënga ošbuachiyënga mo chë judiëngcá chamotsiyenama ca?”

**Bëngbe Bëtsá judiënga y
ndoñe judiënga jätsebacana,
Jesucristbeñe tmojtsošbuáchema**

¹⁵Bënga judiënga fsëndmëna, bëngbe bëtsëtšanga judiënga monjámnayeca, y ntšamo judiënga chë ndoñe judiëngbioye mondubobuatmcá, chë “bacna soye amënga ca”, ndoñe queftsátsmëna. ¹⁶Y bënga mondëtatšëmbo, canÿe entšá Jesucristbeñe tojtsošbuáchema, Bëngbe Bëtsá jamana cha chabe bominiÿiñe tšabia chaotsemnama, y Bëngbe Bëtsá ndoñe chca ntjamana, ntšamo chë judiëngbe leyënguñiñe jamama yomna ca iuayancá chë entšá tojamama. Y bëngnaca Jesucristbeñe imojtsošbuaché, Bëngbe Bëtsá chaomama bënga chabe bominiÿiñe tšábenga chamotsemnama, pero ndoñe ntšamo chë judiëngbe leyënguñiñe jamama yomna ca iuayancá bënga tmojamama. Er Bëngbe Bëtsá

ndocna ora ntjamana canÿe entšá chabe bominiÿiñe tšabia chaotsemnama, ntšamo chë judiëngbe leyënguñiñe iuayancá jamama ibomna ca cha tojamama.

¹⁷Pero, bënga bëtscá mondënguá, Bëngbe Bëtsá chaomama bënga chabe bominiÿiñe tšábenga chamotsemnama, bënga Crísoftaca cánÿiñe mo canÿacá jtsemnëse, chábeñe imošbuáchema. Chca mondošbuaché, bënga chë bacna soyëngama perdonánënga chamotsemnama. Pero inÿe entšanga jtsichámuana bënga bacna soyënga amënga imomna ca, ntšamo chë Moisesbe leyiñe iuayancá ndoñe montsama causa. ¿Y chca, Cristo bacna soye amënga šuabiamná ca nántsayana? ¡Ndoñe, ndegombre ndoñe! ¹⁸Atšë, ntšamo Bëngbe Bëtsá šojaninÿinÿecá, chë šojtsemna jájbanama soyënga, cachiñe jajuaboyama y jamama stëtontšese, mo chë Moisesbe ley jtsocumplánana perdonánënga jtsemnama, atšë stsemna mo nda ndayá cachá tojtsendbema y cachiñe tojtëtsjebuanacá; y ndegombre, atšë stsemna canÿa ntšamo ndoñe tšabá yondmëncá amá. ¹⁹Chë judiëngbe leyëngaca atšë sëndëtatšëmbo, ntšamo chë leyënguñiñe iuayancá stsamëse, Bëngbe Bëtsá ndoñe yochanjama atšë chabe bominiÿiñe tšabia chaitsemnama; y chca, atšë jtsemnana mo obanacá chë castígoca, er chë leyentša mandënga stsamëse, ndoñe quetsátobena atsbočaná jtsemnama. Chë léyeca ndoñe más mandaná ntsemnama jtsebošëse, atšë cachcá chë ley sënjanonÿá, Jesucristbeñe jtsošbuachiyama; y chca, atšë chaitsobena jtsiyenana Bëngbe Bëtsá jtseservënëse. Atšë Crísoftaca cánÿiñe mo canÿacá sëndmënayeca, Cristo cruciñe tojanóbana ora enjamna mo átsnaca cuafjobancá; ²⁰y mora entsemna mo nÿe atšë ya ndoñe

cuafsiyencá, Cristo beca vida atšbe ainaniñe entsebómnyeca. Y ntšamo mora atše vida séntsebomncá, entsemna atše chë Bëngbe Bëtsabe Uaquiñabeñe betsošbuáchiyama, nda šojánbobonshana, y chabe derecho vida jtsobomñama cachcá tojanonýa y atšbe tšabiama tojanóbana. ²¹ Atše ndoñe quetsatábotena ntšamo Bëngbe Bëtsá entšangbe tšabiama juabna yobomncá. Nderado Bëngbe Bëtsá tojama canye entšá chabe bominiñe tšabia chaotsemnana, ntšamo chë leyiñe jamama yomna ca iuayancá cha tojtsamama, as Cristo nye tondayama maténjanóbana.

Ley jtsobedecénese o Jesucristbeñe jtsošbuáchiyese

3 ¡Tšëngaftanga Galacientša entšanga, yapa ndenójuabnayënga! Entsemna mo nda tcmojtsabocjuanacá, tšëngaftangbe juabna tojtsetrocá. Ndoñe quešnátësertana ntšamo chca nanjopása, er cach atše botamana cbonjanabuayiyná, Jesucristo cruciñe tojanóbana. ² Atše séntseboše nye canye soye atše chašmëyana: ¿Uámana Espíritu tšëngaftangbe ainaniñe tojánamashëngo jtsemándayama, tšëngaftanga ntšamo chë leyiñe jamama yomna ca iuayancá šmojamama, o tšëngaftanga chë tšabe noticiënga šmojanuena y chiñe šmojtsošbuáchemá? ³ ¿Ndáyeca tša ndenójuabnayënga šmomna? Bëngbe Bëtsabe Espíritbeyeca tšëngaftanga šmonjanontsé mo tsmëma entšangcá jtsemnana. ¿Y mora šmojtseboše tšëngaftangbe vidënga jachnënguama nye entšangbe juabnéngaca jtsiyenese? ⁴ ¿Nyetsca soyënga ndayëjana tšëngaftanga šmojachnëjna, tondayama tonjoservé? Ndegombre chca ndoñe taiuatsmëna. ⁵ Bëngbe Bëtsá, chë Uámana Espíritu tšëngaftangbe

ainaniñe cháumashënguama tojanma ora, y tšëngaftangbeñe bëts soyënga chaopasama tojama ora, ¿ndáyeca chca nanjama? ¿Tšëngaftanga ntšamo chë leyiñe jamama yomna ca iuayancá šmojtsamama, o tšëngaftanga Jesucristbe tšabe noticiënga šmojanuena y chiñe šmojtsošbuáchemá?

⁶ Menójuabonga ntšamo Abraham tojanpasama. Bëngbe Bëtsabe uabemana palabrënguñe mëntšá endayana: “Cha Bëngbe Bëtsábeñe yojtsošbuáchiye, y chíyeca Bëngbe Bëtsá tonjánayana cha chabe bominiñe tšabia yojamna ca.”

⁷ Chíyeca tšëngaftanga cmontsamna jtsetatšëmbuana, Bëngbe Bëtsábeñe ošbuáchiyënga mondmëna mo Abrahámbentšana entšangcá, cachcá ošbuáchiyana bëtsebomnana, chë chámbentšana ndegombre entšangbiama más. ⁸ Bëngbe Bëtsabe uabemana palabrënguñe endopodena jualíama, Bëngbe Bëtsá yochjanma chë ndoñe judiënga chabe bominiñe tšábenga chamotsemnana, chábeñe tmojtsošbuáchemá ca. Y Bëngbe Bëtsabe uabemana palabrënguñe, cabá chca ndëma ora, Bëngbe Bëtsá Abrahámbioye quem tšabe noticiënga tbojanbuayená: “Acbeyeca, atše chanjama nyetsca quem luarentša entšanga tšabe bendicionënga chamotsebomnana ca.” ⁹ Bëngbe Bëtsá tojanma Abraham ba tšabe bendicionënga chaotsebomnana, cha chábeñe yojtsošbuáchemá. Chca, Bëngbe Bëtsá, chábeñe ošbuachiyëngbiámnaca ba tšabe soyënga jamana, cachcá ntšamo Abrahambiamá tšabe soyënga tojanmcá.

¹⁰ Chë Bëngbe Bëtsá chabe bominiñe tšábenga yochjábiama ca juabnayënga, ntšamo leyiñe jamama yomna ca iuayancá lempe tmojtsobedecënana, chënga nyets tempo jtsiyenana jtsetatšëmbëse Bëngbe Bëtsá nyetsca tescama chënga yochjácastigayama.

Er Bëngbe Bëtsabe uabemana palabrenguine mëntšá endayana: “Bëngbe Bëtsá jayanana nyetsca tescama castigo chaotsebomna ca, nda nyets tempo ndoñe tontsama nyetsca mandënga ntšamo chë leyënguine iuabemancá ca.”¹¹ Ndegombre, puerte tšabá entsinÿinÿena, Bëngbe Bëtsá ndoñe yochanjama ndocná chabe bominyiñe tšabia chaotsemnama, ntšamo chë leyiñe jamama ibomna ca iuayancá tojtsoebedecënëse. Chca ndegombre endmëna, er Bëngbe Bëtsabe uabemana palabrenguine mëntšá endayana: “Nÿe ndabiamá Bëngbe Bëtsá tojama chabe bominyiñe tšabia chaotsemnama, cha Bëngbe Bëtsábeñe betsošbuáchema, cha ndegombre chë nyetsca tescama yomna tšabe vida echántsebomna ca.”¹² Jtsamana ntšamo chë leyënguine jamama yomna ca iuayancá, ndoñe quenátsmëna mo Bëngbe Bëtsábeñe cuaftsošbuachecá. Ntšamo Bëngbe Bëtsabe uabemana palabrenguine endayancá: “Nda tojtsama nyetsca mandënga ntšamo chë leyënguine endayancá, tšabe vida echántsebomna, nyets tempo chë leyëngaca mandaná ca.”

¹³ Pero, Cristo jóbanama ibojamna ca tmojánayanama, y cha bëngbe causa chca chamomama chënga tojanalesénciayeyeca, Cristo tojama bënga nyetsca tescama castigánënga ndoñe chamondëtsemnama, ntšamo chë leyiñe iuayancá ndoñe tmonsama causa. Ntšamo Bëngbe Bëtsabe uabemana palabrenguine endayancá: “Nyetsca tescama castigo chaotsebomna, nda canÿe niñëšiñe tmojajonÿá chaóbanama cha ca.”¹⁴ Chca tojopasá, Bëngbe Bëtsá chaomama, chë tšabe bendicionënga ntšamo cha Abrahámbioye tbojanšbuachenacá, ndoñe judiëngnaca chamotsebomnama,

Cristo Jesúsbeyeca; y Jesucristbeñe ošbuachiyánaca, Bëngbe Bëtsá chaomama chë Uámana Espiritu bëngbe ainaniñe cháuumashëngo jtsemándayama, ntšamo Bëngbe Bëtsá tojanašebuachenacá.

Ndocna ley quenátobena Bëngbe Bëtsabe šbuachenana soye jatrócama

¹⁵ Jesucristbeyeca catšátanga, chë ndayá sentsichamcá endmëna ntšamo nyets tempo entsángbeñe endbetsopasancá. Uta entsáta tbojenoeyená canÿe trato jënbemama, y ntšamo tbojenšbuachenacá chaotsinÿinama chatbe uabaina tsbuanáchañe tbojuábemëse, ndocná inÿa más ntsoebenana jayanana ntšamo tbojentratacá ndoñe yontsoservena ca; y inÿe soyënga chiñe jacjayama cach ndoñe.¹⁶ Chcasna, Bëngbe Bëtsá ba soye Abrahámbioye tbojanšbuachená puerte tšabe bendicionënga chabiamá jamama, y chabe entsanguentšana canÿabiám-naca. Y Bëngbe Bëtsabe uabemana palabrenguine ndoñe quenátayana: “chabe entsanguentšëngbiámnaca ca”, mo Bëngbe Bëtsá ba entsángbiamá cuaftsichamcá; sinó mëntšá endayana: “acbe entsanguentšana canÿabiamá ca”. Y chca entsayana, nÿe canÿe entsá ca; y cha endmëna Cristo.¹⁷ Atše ndayá mëntšá cbontsëtsëtsná: Natsana, Bëngbe Bëtsá Abrahánoftaca canÿe trato tojábema, y tbojaniyana “aíñe ca”, ntšamo tbojanšbuachenacá jamama. Chentsána canta patse y unga bnëtsana uatëse, Bëngbe Bëtsá Moisesbe cucuatšinë chë leyënga tbojanántšaboshjona; chíyeca, chë leyënga ndoñe ntsoebenana jamana chë Bëngbe Bëtsá Abrahánoftaca tojábema trato ndoñe chaondëtsosevënama, ni jamana ndayá Bëngbe Bëtsá tojanšbuachenacá ndoñe chaondëtsosevënama.¹⁸ Er ndayá Bëngbe Bëtsá

chabe entsanga tojatsatacá, tojtsemna chënga ntšamo chë leyĩne jamama yomna ca iuayancá tmojtsamama, chca, chë tšetana soyënga ya ndoñe nantsóbocana ndayá Bëngbe Bëtsá jamama tojanašebuáchenantsana. Pero ba tšabe bendicionënga Abrahambiana jamama, Bëngbe Bëtsá tbojanšbuachenáyeca, Bëngbe Bëtsá chë soyënga Abrahambiana tojanma.

¹⁹ Asna, ¿ndayama chë Moisesbe ley nantsoserverna? Bëngbe Bëtsá chë leyënga tojanáboshjona, ba tšabe soyënga jamama Abrahámioye tbojanšbuáchenantsana baytese. Bëngbe Bëtsá yojanjuabná chë ley chaoservé entsanga jinñanyiyama ndayá tšabá o ndoñe tšabá jamama bëtsemnama, chë Abrahámbentsana Uámana Entšá jashjanguentscuana, ndabiama Bëngbe Bëtsá Abrahámioye tbojanšbuachená ba tšabe bendicionënga jamama. Bëngbe Bëtsá angeléngaftaca chë ley Moisesbe cucuatšĩne tbojanántšaboshjona, y chë entšá Moisés enjamna chë oyebuambnayá Bëngbe Bëtsáftaca y entsángaftaca. ²⁰ Uta entšata canye trato jénbema, jtseytana inye entšá chë uta entsátaftaca chaóyeuambama; pero Bëngbe Bëtsá Abrahámioye ba tšabe soyënga jamama tbojanšbuachená ora, nye canya chca tojanma, y ndoñe bonjanájoboto inya chabiama Abrahánofaca chaóyeuambama.

Ndayama chë ley yomna

²¹ ¿Chca nántsayana, ntšamo Moisesbe leyĩne iuayancá, chë Bëngbe Bëtsá tojanšbuachená soyëngama contra yomna ca? ¡Ndoñe, ndegombre ndoñe! Bëngbe Bëtsá entsangbe cucuatšĩne canye ley tojanáboshjona, y chë ley tojtsobena jamana entsanga ndegombre tšabe vida chamotsebmoma, as Bëngbe Bëtsá nanjama entsanga chabe bominyiñe tšábenga chamotsebmoma,

ntšamo chë leyĩne jamama yomna ca iuayancá tmojtsamama. ²² Pero Bëngbe Bëtsabe uabemana palabrenguiñe endayana, nyetsca quem luarentša entsanga cachëngbe bacna soyënga jamama juabnéngaca mandánënga imomna ca, chca, Jesucristbeñe ošbuáchiyënga chamobenama ndayá Bëngbe Bëtsá tojašbuachenacá jóyëngacñama. Y chënga, Jesucristbeñe imojtsošbuáchemama imojtsebmoma ndayá Bëngbe Bëtsá tojanašebuachenacá.

²³ Jesucristbeñe jtsošbuáchiyama entsanga chamobenama tempo joshjanguentscuana, bënga monjamna corente mandánënga chë léyeca, y chca enjamna mo presënga cuaftsemncá, cárceloca utámenënga. Chë ley chca enjamna, ntšamo entsanga Jesucristbeñe muanjobenaye jtsošbuáchiyama Bëngbe Bëtsá jinñanyiyama tempo joshjanguentscuana. ²⁴ Cristo jabama tempo tonjanoshjanguentscuana, chë ley bëngbiama enjamna mo canye pamillentša oservenacá, cha jtsamana chentša básënga chamotsamama ntšamo tšabá tojtsemncá. Chë ley chca yojamna, bënga Cristbeñe jtsošbuáchiyama chamobenama, y chca, Bëngbe Bëtsá chaoma bënga chabe bominyiñe tšábënga chamotsebmoma. ²⁵ Pero Jesucristbeñe jtsošbuáchiyama bënga chamotsobenama mora ya tonjóshjangoyeca, chë ley ya ndoñe más quenátsmëna mo canye entsacá, ndayá tšabá yomncá bënga chamotsamama cuaftsamcá. ²⁶ Cristo Jesúsbeñe šmojtsošbuáchemama, nyetsca tšëngaftanga šmojobená Bëngbe Bëtsabe básënga jtsebmoma, Cristo Jesúsëftaca cányiñe mo canyacá jtsebmëne. ²⁷ Tšëngaftanga tcmónjanëbaye, y chca, Crístoftaca cányiñe mo canyacá šmontsemna. Y mora šmojobená mo cach Crístcá jtsebmoma. ²⁸ Chíyeca, ndayá Bëngbe Bëtsá tojamama,

judiënga y ndoñe judiënga cachcanga mondmëna; nyëts tempo nyë ínÿabiama oservëngë y chë nyë cachëngbiama trabájayënga cachcanga, y boyabásënga y shembásëngnaca. Nyëtsca tsëngaftanga mo canÿacá šmondmëna, Cristo Jesúseftaca canÿiñe mo canÿacá jtsemnëse. ²⁹Tšëngaftanga Cristbe entšanga šmondmënyëca, šmontsemna mo Abrahámbeñšana entšanga cuaftsemncá; y chca, ntšamo Bëngbe Bëtsá Abrahámbyoye tbojašbuachenacá, tsëngaftanga šmochanjóyëngacñe.

4 Atšnaca séntseboše jayanama, chë uaquiñá nda yochjóyëngacñe ntšamo tbojtsotocancá, ntšamo chabe taitá jatšëtayama tbojašbuachenacá, cha cabá mo canÿe basacá tojtsemnëntscuana, ndocna derecho chë soyënguñe ntsebošnana; y chca, cha jtsemnana mo canÿa nyëts tempo nyë ínÿabiama oservenacá, masque lempe ntšamo chabe taitá tbojašbuachenacá chë uaquiñabiama tojtsemna. ²Chë uaquiñá tojtsobóchantscuana, entšanga jtsemnana ndëmuanyënga ntšamo cha tbojtsajabotcá jtsoinayana, y ínÿënga jtsejuabnayana ndayá chë taitabe soyëngaca jamama, chë uaquiñá otocana soyëngaca. Y chca jtsemnana, chë taitá tojayana tempëntscuana. ³Mo cachcá cuaftsemncá, bënga chë ndegombre soyëngama cabá ndosértaye ora, béngnaca mandánënga monjamna mo nyëts tempo nyë ínÿabiama oservëngëcá, quem luarentšë imománda espiritëngaca. ⁴Pero Bëngbe Bëtsá chabe Uaquiñá quem luaroye tbojanichmó, nÿa chama tempo tojanóshjango ora; cha mo nyëtsca entšangcá, canÿe shembásabentšana tojanonÿná, y yojoyena jtsamëse ntšamo judiëngbe leyñe jamama ibojamna ca yojanayancá jtsamëse. ⁵Quem luaroye chca tojánabo bënga jabátsebacama, y chamotsobenama Bëngbe Bëtsabe

basëngcá jtsemnama, bënga chë tempo šonjánamna chë ley jtsobedecënana. ⁶Y chca, tsëngaftanga ya chabe básënga šmojtsemnama jinÿanÿiyama, Bëngbe Bëtsá chabe Uaquiñabe Espiritu tbojanichmó, nyëtscangbe ainaniñe cháumashënguama, y chë Espiritu endama bënga Bëngbe Bëtsá chamochembo, “Atšbe Taita ca”. ⁷Mëntšá, cada ona tsëngaftanguentšá ya ndoñe quenátsmëna mo chë nyëts tempo nyë ínÿabiama oservëngëcá, quem luarentšë imománda espiritëngaca mandánënga, y añe Bëngbe Bëtsabe basa tojoquedá. Y chabe basa tojoquedáyëca, lempe ntšamo Bëngbe Bëtsá chabe básënga jatšëtayama tojašbuachenacá cha echanjóyëngacñe.

Pablo, Galacia luaroquëngbiama ngmëncaca yojtsanjuabnaye

⁸Tempo, Bëngbe Bëtsá ndoñe šmonjanábuatma ora, tsëngaftanga šmojamna mo nyëts tempo nyë ínÿabiama oservëngëcá, ndoñe ndegombre diosënga mondmëna espiritëngaca mandánënga. ⁹Pero mora, Bëngbe Bëtsábyoye šmontsábuatma ora, o tšabá jayanama, Bëngbe Bëtsá cmojtsëbuatma ora, ¿ntšámoyëca tsëngaftanga cachiñe chë quem luarentšë imománda espiritëngaca šmojtsayaunana? Chënga ndocna obenana quemátšbomna, y nduámanënga mondmëna. ¿Ndáyëca tsëngaftanga šmojtseboše cachiñe jtsemnana mo chë nyëts tempo nyë ínÿabiama oservëngëcá, chë espiritëngaca mandánënga? ¹⁰Tšëngaftanga tša jtsejuabnayana diënguñe, shinÿënguñe, canÿe uatentšá tempënguñe y uatënguñe, mo uámana tempëngcá Bëngbe Bëtsá tšabá jadórama, y chama bëtš fiestënga jtsebošnana. ¹¹Atšë corente šontsëngmena, nderado atšbe trabajo tsëngaftangbeñe tondayama tonjoservé.

¹²Jesucristbeyeca atšbe catšátanga, bētscá cbontsaimpadana, šmochtsiyena jtsamēse ntšamo atše sēndamcá, er átšnaca sēnjóbema ntšamo tšēngaftanga ndoñe judiēnga šmondmēncá. Tšēngaftanga ndocna bacna soye atše chešatsborlá. ¹³Tšēngaftanga šmondétatšēmo, atše sēnjanobená chē natsana soyama tšēngaftanga chē tšabe noticiēnga jábuayenama, canye šocana šonjanontšáshjango causa. ¹⁴Atše canye šocana sēnjánbomna causa, tšēngaftangbiama ndoñe paselo quenjatsmēna tšēngaftangbeñe atše jofjana; pero masque chca, tšēngaftanga ndoñe chešmatanaboté, ni quešmatanáboyēnja; masna, tšēngaftangbeñe tšabá šmonjanofja; šmonjanofja mo canye ángel Bēngbe Bētsabe ichmoná šmojofjá, o cach Jesucristbioycá. ¹⁵Ndayá chora tšēngaftangaftaca enjanopasancá, puerte oyejuayēnga tcmónjábiamana. ¿Y mora ndayá tojopasá? Ndegombre, atše sēndétatšēmo y sēntsobena jayanama, tšēngaftanga ndaye sóynaca atšbiamana mašmēnjanmama. Chē más uámana šmojánbomna soyēnga atšbe cucuatšīne mašmēnjánboshjona, y nya mo chē bominyēngnaca masmēnjá-nenobuchjatsēca atše jatšetayama. ¹⁶Y morna, ¿ntšamo ndegombre yomncá cbojtsētsēsnama, atšbiamana šmojtsejuabná mo tšēngaftangbe uayayá cuaftsemncá ca?

¹⁷Chē ndoñe ndegombre soyēnga buátēmbayēnga montsinjīnyná mo tšēngaftangbiama ndegombre tšabá chašmotsiyenama cuaftsebošcá, pero chca ndoñe quenátsmēna; ndayá jamama imojtsebošcá, tšēngaftangbiama ndoñe tšabá quenátsmēna. Chēnga montseboše atšbe contra y atšbe buátēmbana soyēngama contra chašmotsemnana, chentšana tšēngaftanga chēngaftaca

jtsēmnama chašmotsebošama y chēnga chašmotsababuánjēshanama. ¹⁸Puerte tšabá endmēna atše y ínēnga chafstseboše tšēngaftangaftaca amiguēnga jtsēmnama, canye tšabe soye jamama tojtsemnēse; y sempre chca chauétsemna, tšabiamana tojtsemnēse, y ndoñe nye atše chentše tšēngaftangaftaca stēmna ora. ¹⁹Tšēngaftanga, chē atšbiamana mo atšbe basengcá šmondmēnēnga, Jesucristbeñe chašmošbuáchemana tčbonjanējabuácheyeca; atše cachiñe sēntsesufrina tšēngaftangbe causa, ntšamo canye šešona jtsēbomnana ora canye shembása jtsesufrinancá; y atše chca chanjéftsesentina, ntšamo Cristo endmēncá tšēngaftangbe vidiñe ndegombre chaojtsebínjēntscuana. ²⁰Malaye atše, mora tšēngaftangaftaca stēmna, atše jobenayama jinjanjīyama, cach tšēngaftanga jáuyanēse, ntšamo ndegombre atše tšēngaftangbiama tsēsēntínana. Atše tša šontsecochēngmena tšēngaftangbiama.

Ntšamo Agar y Sáraftaca tojanopasá

²¹Canye soye šmochjauyana, tšēngaftanga chē Moisesbe léyeca mandánēnga jtsēmnama šmojtsebošēnga. ¿Ntšamo chē leyīne endayancá tacmojtsēsertana? ²²Chiñe endayana, Abraham uta uaqiñata yojánabamna ca; cányana Agárbeñe, canya chabe shembiamana nyets tempo oservená; y chē ínñana, cachabe shēmbēne, Sara, y mua ndocnabiamana nyets tempo oservená yonjamna. ²³Chē chabe shembiamana nyets tempo oservenabe šešona, tojanonjyná nye Abraham y Agar chca chaotsemnana tbojánbošenayeca; y cachabe shembe šešona tojanonjyná, Bēngbe Bētsá chē soye jamama Abrahámbyoye tbojanšbuachenáyeca.

²⁴Ntšamo Agar y Sara, y chatbe šešónataftaca tojanopasacá, bēnga

canje uamana soye šontsabuatambá. Ndayá chë uta shembásataftaca tojanopasacá, uta trato entsinÿinÿiná: chë shembása Agar, chë nyets tempo nye ínÿabiama oservená yojamná, entsinÿinÿiná chë trato Bëngbe Bëtsá y Israeloca entsángaftaca, chë Moisésoftaca Bëngbe Bëtsá leyénga entsángbe cucuatšíne tojanáboshjona ora. Agar básenga yojtsabamna ora, chëngnaca tmojanonÿiná nye ínÿabiama nyets tempo oservenénga jtsemnama, y chë tratentša leyíne soyéngaca mandánënga jtsemnama tmojtsebošéngnaca jtsemnana mo nye ínÿabiama nyets tempo oservenéngcá. ²⁵Ndayá Agáraftaca tojanopasacá entsinÿinÿiná chë Sinaí batsjoca tmojánbema trato, Arabia luaroca; y chë morsca bëts pueblo Jerusalénënaca entsinÿinÿiná, er chentša entsanga montsemna chë leyéngaca mandánënga. Ntšamo Agar y chabe básenga nye ínÿabiama nyets tempo oservenénga monjamncá, Jerusale-
nentša entsángnaca cachcá chëngcá mondmëna, chë leyéngaca nyets tempo mandánënga bëtsemnayeca. ²⁶Ndayá Sáraftaca tojanopasacá, chë nye cachabiama trabájaye shembása, entsinÿinÿiná chë trato, chë tšabe bendicionënga Abrahambiana jamama chábioye tbojanšbuachená ora. Chánaca entsinÿinÿiná chë Bëngbe Bëtsabe bëts pueblo celoca, Jerusalén ca uabaina pueblo, er chë chentše mochjoyénananga, mora ndoñe quemuátiyena chë leyéngaca mandánënga. Chë Crístbeñe ošbuáchiyënga mondmëna chë celoca bëts pueblo Jerusalenentše joyénanama, y chca, ndegombre chënga mondmëna celocama entsanga. ²⁷Chë celoca Jerusalén endmëna chë ndegombre bëts pueblo chë Jesucrístbeñe ošbuáchiyëngbiama, y chca endmëna

mo canje shembása šešonga ndabamná y aíñe chaotsabamna Bëngbe Bëtsá cuafjamcá. Quem luarentša Jerusalén endmëna chë uamana luare chë léyeca mandánënga imomnëngbiama, y chca endmëna mo canje shembása aíñe boyaftaquécá, er Bëngbe Bëtsabe uabemana palabrenguiñe chë shembásatbiama mëntšá endayana:

Shembása šešonga ndabamná, y ndocna te tsetšanënga ndbomná šešona jtsebmnama,

moyejuá y moyó oyejuayá cojtsemnama. Chca moma, er aca, chë shembása chabe boyabiama utšená, chë shembása boyá bomnabiama más básenga cochántsabamna ca.

²⁸Chcasna, Jesucrístbeyeca atšbe catšátanga, ntšamo Isaac Abrahambe uaquiñá tojanobemcá, Bëngbe Bëtsá chca Abrahámioye tbojanšbuachenáyeca; cachcá, tšëngaftángnaca šmojobená Bëngbe Bëtsabe básenga jtsemnama, Bëngbe Bëtsá chca tojanšbuachenáyeca. ²⁹Ntšamo chë tempo tojanopasacá, chë Isaac chaosufrima Ismael tojanmcá (Ismael, Abrahambe uaquiñá Agárbeñe, chë nye chata chca tbojánbošenayeca onÿnaná; Isaac, chë Bëngbe Bëtsabe Espíritbeyeca onÿnaná), mórnaca cachcá entsopasana: chë ndoñe ndegombre soyënga buátëmbayënga judiënga montsama bënga chamosufrima, ntšamo Isaac chaosufrima Ismael yojanamcá. ³⁰Pero, ¿ndayá Bëngbe Bëtsabe uabemana palabrenguiñe Abrahambe básatbiama iuayana? Mëntšá endayana: “Moma, chë nyets tempo nye ínÿabiama oservená y chabe basa acbe yebnentšana chábuaisebocnama, er chë nyets tempo nye ínÿabiama oservenabe šešona ndoñe quenátobena chabe taitabe soyënga jtsebmnama. Nye chë propio shembe šešona aíñe, er chë shemna ndoñe nye ínÿabiama nyets tempo

oservená quenátsmëna.” ³¹ Chcasna, Jesucristbeyeca atšbe catšátanga, bënga ndoñe quemuátsmëna mo canya nye inyabiamana nyets tempo oservenabe básenga cuaftsemncá, er mora ya ndoñe más quemuátsmëna chë léyeca nyets tempo mandánënga. Y aña montsemna mo canye shema ndoñe nye inyabiamana nyets tempo oservenabe básenga cuaftsemncá, er Bëngbe Bëtsabe básenga bënga mondmëna.

Cristo bënga šojatsebacá

5 Cristo bënga šojatsebacá, ndoñe más mo chë nyets tempo nye inyabiamana oservenëngcá chamondëtsiyenama, chë léyeca mandánënga. Nya šmochtsentsëna nyets tempo chca atsebácanënga chašmoquedama, y ndoñe šmatjalesencia tšëngaftanga cachiñe chë léyeca mandánënga inyënga chácmbiamama.

²Tšabá šmochjouena. Atše Pablo cbéyana: Nderado tšëngaftanga ndoñe judiënga, šmojalesenciá inyënga chë tšëngaftangbe más delicadentše base bobachtema chamotëtšama, ntšamo judiënga monduamancá, asna, ndayá Cristo tšëngaftangbiamana tojanmcá tondayama nantsoservena. ³Ndë-muanye entsánaca, nda tojalesenciá inyënga chabe más delicadentše base bobachtema chamotëtšama, cachiñe cha šcobuayená: Mora aca cmontsemna nyetsca chë judiëngbe leyentša mandënga jtsobedecénana. ⁴Ndëmuanyënga tšëngaftangbentšana šmojtsenguá, Bëngbe Bëtsabe bominyiñe tšábënga jtsemnama, ntšamo leyiñe jamama yomna ca iuayancá jtsamëse, tšëngaftanga chca šmojtsamama, šmojama Crísoftaca cányiñe mo canyacá ndoñe chašmondëtsemnama; Bëngbe Bëtsábentšanënaca šmojtsoluaré, y chca, šmontsinyanýná tšëngaftanga

ndoñe šmontseboše, Bëngbe Bëtsá tšëngaftangbe tšabiamana jtsejuabnayëse, chácmatsebacana. ⁵Pero bënga, Bëngbe Bëtsábeñe jtsošbuáchiyëse, mondobátmana cha yochjama bënga chabe bominyiñe tšábënga nyets tempo chamotsemnama. Y bënga chca mondobátmana, Jesucristbeñe ošbuáchiyana bómnyeca, y chë ošbuáchiyana chë Uámama Espíritbiajana bëngbioye endobá. ⁶Er Crísoftaca cányiñe mo canyacá tmojtsemna ora, aña base bobachtema tëtšenënga tmojtsemna o ndoñe, tondaye ntsámanana; ndayá puerte enduámama endmëna chë Jesucristbeñe bënga mondbomna ošbuáchiyana, y chca bëtsebomnamna bënga montsinyanýná inyënga jtsababuánýeshanëse.

⁷Tšëngaftanga tšabá šmonjánama, chë jtsiyenana ntšamo Bëngbe Bëtsabe ndegombre soyënga yomncá jtsamëse. Y mora, ¿nda tojama tšëngaftanga chašmotsajbanama chë Bëngbe Bëtsabe ndegombre soyënga jtsuenanama? ⁸Ndegombre, Bëngbe Bëtsá ndoñe quenátsmëna, er cha tšëngaftanga tcmojáchembo chabe entsanga chašmotsemnama. ⁹Ntšamo entsanga mondëntšayancá: “Nye base levadura jamana nyetsana chauabochama ca”; cachcá, tšëngaftanga chë judiëngbe básefta leyëngaca mandánënga jtsemnama šmojabojátšese, šmuatjábocna nyetsca leyëngaca mandánënga. ¹⁰Bënga Bëngbe Utabnáftaca cányiñe mo canyacá bëtsemnayeca, atše corente séntsetatšëmbo, ntšamo atšbe juabna yomncá tšëngaftangnaca cachcá šmochtsejuabnayama; y átšnaca corente séntsetatšëmbo Bëngbe Bëtsá puerte bochjacastíga, nda tšëngaftanga natjémbana ainánaca ndoñe chašmondëtsiyenama tojtsamábioye, masque ndánaca cha chaotsomñe.

¹¹ Y atšbiana chanjayana, Jesucristbeyeca atšbe catsátanga, Jesucristbeñe ošbuáchiyenga base bobachtema chëngbe más delicadentše tétšenenga chamotsemnana entsanga cabá stsbuayiynase, entsanga ya ndoñe muantsama atše chaitsesufrínama. Atše chca stsamëse, Cristo cruciñe tojanóbanama ntšamo iuayancá entsanga stsbuayiyná ora, chënga ya ndoñe átšeftaca nanjósentiaye. ¹² Pero chë natjémbana ainánaca ndoñe chašmondëtsiyenama imojtsamëngna, jmalaye cachënga muanjenocbóna!

¹³ Pero tsëngaftanga, Jesucristbeyeca atšbe catsátanga, Bëngbe Bëtsá tcmojáchembo chë judiëngbe léyeca ndëmandánënga chašmotsemnana. Pero chca bëtsemnana, mora ndoñe šmatjátsjuabnaye šmojtsobena jalesén-ciana, nye tsëngaftangbe cuerpënga tšabá chamotsemnana juabnéngaca mandánënga jatiyenama. Chamna, tsëngaftanga šmuenbobonshánayeca, nyetscanga šmochtsenájabuachana.

¹⁴ Er ntšamo Moisesbe leyentša nyetsca mandënguiñe endayancá, nye canye mandíñe lempe chca entsayana. Y chë mando endmëna: “Ndëmua entsánaca cochtsebbonshana ntšamo cach aca cuenobobonshancá.” ¹⁵ Pero ínÿenga chamotsesufrínama jtsamëse tsëngaftanga šmojtsiyenëse, mo tšátjaye bayënga tmojtsenashantsná y tmojtsenobanacá, cuedado šmochtsebomna. Ndoñese, nyetscanga šmatjānenpochocaye.

Ntšamo chë Bëngbe Bëtsabe Espíritbeyeca vida jtsebomnana

¹⁶ Chíyeca cbochjáuyana: Nyets tempo šmochtsiyena ntšamo chë Uámana Espíritu cmojtsamëndacá, y chca, tsëngaftanga ndoñe quešmochátama soyënga, nye cach tsëngaftanga tšabá jtsomñama juabnéngaca. ¹⁷ Er ndayá

bënga, nye entsangbe juábnaca jamama mondbošcá, jtsemnana ndayá chë Uámana Espíritu bënga chamomama yobošcá contra; y ndayá chë Uámana Espíritu bënga chamomama yobošcá, jtsemnana ndayá bënga, nye entsangbe juábnaca jamama imobošcá contra. Chca endmënyeca, ntšamo chë Uámana Espíritu chašmomama yobošcá šmojtsamëse, ndoñe quešmátobena jamana, ndayá cach tsëngaftanga, nye entsangbe juábnaca jamama šmojatsbošcá. ¹⁸ Tsëngaftanga, ntšamo chë Uámana Espíritu cmojtsamëndacá šmojtsamëse, ndoñe quecmátamna ntšamo chë leyíñe iuayancá játamama.

¹⁹ Ntšamo entsanga, nye entsangbe juábnaca tmojtsamcá, nyetscanga paselo jtsonjyana: chënga bacna soye boyabása o shembásaftaca jtsamana, nye chca soyëngama jësejuabnayana, y ndoñe ntšobenana cachënga jenomándama, chca soyënga jtsamëse.

²⁰ Ba uabouana soyënga jtsamana, diosënga yomna ca tmojtsejuabná soyënga jadórama, jtsencjuanayana, ínÿengaftaca jtsenáyayana, nyetscanga ndoñe cachcá chamondëtsejuabnana jtsamana, ínÿengaftaca yapa jtsenántšabošana, soyënga nye rábiaca jtsamana, ínÿengaftaca tša jesenaleganana, y cánÿenga ínÿengaftaca contra chamotsemnana jtsamana. ²¹ Nye jtsebošana ntšamo inÿa tojatashjhcá jtsebomnana, yapa tmoyënga jtsemnana, fiestënguiñe ndoñe tšabe soyënga jtsamana, y inÿe soyëgnaca mo chë soyëngcá jtsamana. Y mora atše cbaruayená, cach ntšamo tempo sënjanmcá: chca soyënga jtsamëse oyenënga, Bëngbe Bëtsabe amëndayoca ndoñe luare quemochátsbomna.

²² Pero, Uámana Espíritu ainaniñe tojtsemánda ora, quem soyënga chentsána jóbocnana: nyetscanga

jtsababuánjeshanana, jtsóyejuayana, natjémbana ínÿengaftaca jtsiyenana, puerte uantado nyetsca padecéniñe jtsemnana, nyetscanga corente bonshananaca jtsénÿayana, tšabe ainana jtsebomnana, y nyetscañe tšabe palabra bomnënga jtsemnana, ²³jtsējuabnayana chë ínÿenga mo chabiana más uámanënga cuaftsemncá, y cachá nyetsca soyënguñe jenomándama jtsoberenana. Y ndocna ley quenátsmëna, chca soyënga tmojtsama entšangbiana contra cháuyanama. ²⁴Jesucrístbenga imomnënga tmojama, chënga chë nye entšangbe juabnéngaca mandánënga ndoñe ntsemnana; ya ndoñe más, chë nye cachënga tšabá jtsomñama bacna juabnéngaca mandánënga quemátsmëna, y chë nye cachëngbiana soyënga jamama bëtská juabnéngaca cach ndoñe. ²⁵Bënga ndegombre tšabe vida chamotsebomnana Uámana Espíritu vojtsámayeca, bënga mochtsiyena jtsamëse lempe ntšamo Uámana Espíritu šojtsamëndacá. ²⁶Ndoñe šmattsenábotamnaye, uámanënga jatenobiamnayëse, ndoñe soyënga mattsama ínÿenga bëngaftaca chaoséntiyama, y ndoñe nye mochjátsboše ntšamo inÿa tojatashjachcá jatsbomnana.

Nyetscanga šmochtsenájabuachana

6 Jesucrístbeyeca atšbe catšátanga, nderado ndánaca bacna soye tojamama šmojinÿe, tšëngaftangbentše ntšamo chë Bëngbe Bëtsabe Espíritu tojtsemandacá tmojtsamënga cmontsamna cha juajabuáchana, chë ndoñe tšabe soye amana chaotsajbanama; pero chca šmochjama becá bonshananaca jtsonÿayëse. Cuedado šmochtsebomna, er ndoñese, tšëngaftángnaca cmatjócochëngo cachcá soye jamama. ²Chë soyënguñe chašmojtsepadecena ora,

šmochtsenájabuachana, mo chë uauta uasmanëshangá šmojtsëyambá ora, juyambama šmojtsenajabuachancá. Y chca chašmojtsama ora, ntšamo Cristo tojanmandacá šmochantsocumplina.

³Nderado nda tojtsejuabná, cha canÿe uámana entšá yomna ca, pero ndoñe chca cha tondmënëse, cachá jtseñoingñayana. ⁴Cada ona chauenojuabó, ntšamo tojamcá tšabá o ndoñe tšabá bëtsemnana. Ntšamo tojamcá tšabá tojtsemnëse, chca tojamama oyejuayá chaotsemna; pero cha ndoñe quebnátsmëna jayanana ntšamo tojamcá tšabá yojtsemna ca, chë ndayá ínÿenga tmojamama más tšabá yojtsemna ca jatichámëse. ⁵Er cada ona bontsemna jtseñojuabnayana, jtsetatšëmbuama ntšamo tojamcá tšabá o ndoñe tšabá bëtsemnana.

⁶Nda Bëngbe Bëtsabe soyëngama tojtsatsjendá, cha bontsemna chabe buatëmbayáftaca nyetsca tšabe soyënga jenájatayana.

⁷Ndoñe matenoingñana; ndoñe šmattsejuabnaye tšëngaftanga šmojtsobena ntšamo Bëngbe Bëtsá tojamandacá ndoñe ntjamana, castigo ntjoyëngacñécá, er ndocná quenátobena Bëngbe Bëtsá jaingñana. Ntšamo entšanga mondëntšayancá: “Ndayá tcojajé y cachcá josháchiñana ca.”

⁸Mo nda ndoñe tšabe fshantsiñe tojajecá, tšabe shajuana ndoñe ntjoshachiñana, cachcá, nda tojtsiyena nye cachá tšabá jtsomñama bacna juabnéngaca, cha echanjábocna jabuache castiganá nyetsca tescama. Pero mo nda uaba fshantsiñe tojajecá, tšabe shajuana josháchiñana, cachcá nda tojtsiyena ntšamo chë Uámana Espíritu tojtsemandacá jtsamëse, chë nyetsca tescama yomna tšabe vida echántsebomna. ⁹Chcasna, ndoñe chašondëmantsé tšabe soye jtsamama; er masque šojtsëmantsnasna,

pero chë tšabe soyënga jtsamama ndoñe tmonjajbanase, canÿe bëts te echanjóshjango, bënga bëts cá tšabe soyënga josháchiñama, mo tša tšabe shajuanënga tmojashaquécá. ¹⁰ Chíyeca, tmojtsobena ora, nÿetscangbiama tšabe soyënga mochjama, pero masna chë Jesucristbeñe ošbuáchiyana bómnayeca, bëng cá Bëngbe Bëtsabe básenga imomnëngbiama.

Quem tsbuanácha juapochócama cach Pablo tojanábema

¹¹ ¡Šmochjinÿe, tša bëts letréngaca cach atšbe cucuátšeca mora cbontsëbuabiamná!

¹² Ndëmuanÿenga imojtseboše, tšëngaftanga chë ndoñe judiënga jamëndama tšëngaftangbe más delicadentše base bobachtema tétšenënga chašmotsemnama, ntšamo judiënga monduamancá, chënga chca jtsamana nÿe chë judiëngaftaca tšabá joquédama. Y chca jtsamëndayana, chënga chamosufrima ínÿenga chamotsamama ndoñe mondbóseyeca; er judiënga muanjama chënga chamosufrima, Cristo cruzoca jóbanana entšangbiama puerte iuámana ca chënga tmojtsabuayinase. ¹³ Pero ni mo chë más delicadentše base bobachtema tétšenënga imomnënga, ndoñe quemátama lempe ntšamo chë leyinë iuayancá. Pero chënga jtsebošana tšëngaftanga chca tétšenënga chašmotsemna, chënga jtsenábotamnayama jobenayama, ínÿenga base bobachtema chacmatëtšama tšëngaftanga šmojalesenciama. ¹⁴ Atšeftacna ndocna

te chca chaondopasá. Atše nÿets tempo y becá chanjëftsóyebuambnaye ndayá atšbiama Bëngbe Utabná Jesucristo tojanmama, cha cruzoca tojanóbana ora; er ndayá choca tojanma sóyeca, atšbiama tondaye quenatámana ntšamo entšanga quem luarentše imojuabnacá y chëngbiama puerte iuámana; y ndayá atšbiama puerte iuámana, entšangbiama tondaye quenatámana; y chë causa, atše chëngbiama mo obanacá sëndmëna. ¹⁵ Chë más delicadentše base bobachtema aínë tétšená o ndoñe, tondaye quenatámana. Ndayá puerte iuámana endmëna, Bëngbe Bëtsá mo tsmëma entšang cá bënga šojábiana, Uámana Espiritu bëngbe ainaniñe jtsemándayëse.

¹⁶ Chë quem buatëmbana sóyeca jtsamëse šmoyenëngbiama, atše, Bëngbe Bëtsá sëntseimpadana, cha chaoma tšëngaftangbe ainana natjëmbana chašmotsebomnama y becá chacmotsalastemánama; y ndoñe nÿe chëngbiama chca quetsatsimpadana, ndayá nÿetscanga Bëngbe Bëtsabe entšanga imomnëngbiámna.

¹⁷ Y mora, nÿe canÿe soye cbochjáuyana: morskana ndocná chaondétsama atše jasúfriama chašotsemnama; er atšbe cuerpiñe endëtinÿna ntšamo atše tijasufri, Jesusbe oservená bëtsemnama.

¹⁸ Jesucristbeyeca atšbe catšátanga, atše sëntseimpadana Bëngbe Utabná Jesucristo chaoma tšabe bendicionënga tšëngaftangbeñe chaotsemnama. Chca chaotsemna.

Efesios

Jacheuayama

1 Atše Pablo, Jesucristbe ichmoná Bëngbe Bëtsá chca yobóseyeca, quem tsbuanácha sentsabiamná Efeso puebloca Bëngbe Bëtsabe entšanga y Cristo Jesúsbeñe ošbuáchiyënga imomnëngbiama. ²Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tšëngaftangbeñe tšabe bendicionënga chaotsemnana, y chata chaboma tšëngaftangbe ainaniñe tšabe ebionana chašmotsebomnana.

**Cristoftaca cánýiñe mo canýacá
jtsemnëse, bënga mochántsebomna
nyetsca tšabe soyënga,
ntšamo celoca yobinýncá**

³Bëngbe Bëtsá y Bëngbe Utabná Jesucristbe Taitábioye mochjëtšchuaye, er bënga Cristoftaca cánýiñe mo canýacá mondménayeca, Bëngbe Bëtsá tojama bënga nyetsca tšabe soyënga chamotsebomnana, ntšamo celoca yobinýncá. ⁴Bëngbe Bëtsá bënga šojanabacacá Cristoftaca cánýiñe mo canýacá chamotsemnana, cabá quem luare cha ndama orscana, bënga chabe delante chamotsemnana chabe entšanga, bacna soyëngama perdonánënga y chabe oservénënga, y bënga ainaniñe bacna soye ndbomnënga imomna ca cha cháuyanama. ⁵Bëngbe Bëtsá šuababuánýeshanayeca, tempo cha tojanjuabó y tojánbošena bënga mo cachabe basengcá jábiamama, chë Jesucristo yochjanma sóyeca. ⁶Chíyeca bënga Bëngbe Bëtsábioye sempre jtsatschuanayana, cha bëngbe tšabiama juabna yobómnayeca, ndayá chabe Bonshana Uaquiñáftaca bëngbe tšabiama cha tojamama. ⁷Bëngbe Bëtsá

puerte bonshanánaca bëngbe tšabiama bëtscá yojuabnáyeca, cha bëngbe bacna soyëngama šojtsaperdoná y šojatsebacá, er Jesús bëngbiama tojanóbana, chabe buiñe juabuáshanëse. ⁸Bëngbe Bëtsá tojama bënga nyets osertánana y becá juabna chamotsebomnana, cha becá bonshanánaca bëngbe tšabiama juabna yobómnayeca, ⁹y tojama bënga chamotsetatšëmbuama ndayá jamama cha yobošcá, ndayá cachá tempscana yojanjuabná jamama, pero entšanga chca ndoñe tonjaninýanyé. Ndayá jamama Bëngbe Bëtsá tempo yojanjuabnacá, ndayá cha tojama bënga chamotsetatšëmbuama, cachá yojanjuabná chca jamama. ¹⁰Ndayá jamama Bëngbe Bëtsá yojuabnacá, lempe echanjochnëngo nýa chama tempo chaojóshjango ora, y quem Bëngbe Bëtsabe juabna endmëna jamana, lempe ntšamo cha tojamcá celoca y quem luarentše, Cristo chamotsebomna nyetsca chë soyënguñe mo chë mandayacá.

¹¹Bëngbe Bëtsá sempre jamana nyetsca soyënga ntšamo tojtsejuabnacá y tojtsebošcá. Y Bëngbe Bëtsá bënga šojabacacá, ntšamo cabá chca ndama ora yojanjuabnacá; chca, bënga Cristoftaca cánýiñe mo canýacá jtsemnëse, bënga chamóyëngacñama ndayá Bëngbe Bëtsá chabe entšanga jatšatayama tojašebuachená, mo chëngbe otocana soycá. ¹²Y Bëngbe Bëtsá chca tojama, bënga chë Crístbeñe natsana imojtsanošbuachenga, cha bënga šochjánatsebacama, tšabe soyënga jtsamëse chamotsiyenama, chca, chë inýe entšanga Bëngbe Bëtsabe obenanama cha chamotsatschuanama. ¹³Y tšëngaftángnaca, chë ndegombre buayenánana šmojanuena ora, chë Bëngbe Bëtsá bënga játsebacama buayenánana, y Crístbeñe šmojtsanošbuaché ora, Bëngbe Bëtsá

tojanma tšëngaftanga Crísoftaca cãnyĩne mo canyácá chašmotsemnama y tcmojanainyñaná tšëngaftanga chabe entšanga bétsemnama. Bëngbe Bëtsá chca tojanma, Uámana Espíritu tšëngaftangbe ainaniñe cháuamashënguama tojanma ora, ntšamo tempo cha tojanašebuachenacá. ¹⁴Bënga chë Uámana Espíritu bëngbe ainaniñe mondbómnyeca, corente mondetátšëmbo ndayá Bëngbe Bëtsá chabe entšanga tojašebuachenacá bënga mochjójyengacñama. Uámana Espíritbeyeca bënga montsobena chca puerte tšabá jtsetatšëmbuama, chë Bëngbe Bëtsá chabe entšanga nyetsca tescama jätsebacama y ntšamo tojašebuachenacá jatšatayama tempo chaóshjanguëntscuana; y lempe ntšamo cha bëngbiamá inétsamama, nyetscanga cha mochántatschuanaye, cha bëtsá y obená bétsemnama.

**Pablo Bëngbe Bëtsábioye
tbojanimpadá, ošbuáchiyënga
osertánana chamotsebomnama.**

¹⁵⁻¹⁶Chcáyeca, atšna, Bëngbe Bëtsá tšëngaftangbiamá steimpadana ora, sempre cha sëndbëtsatschuanaye, er atše sënjätatšëmbona ntšamo tšëngaftanga Bëngbe Utabná Jesúsbeñe tša šmojtsošbuáchema, y ntšamo tšëngaftanga nyetsca chë Bëngbe Bëtsábenga imomnënga šmababuányëshanama. ¹⁷Bëngbe Bëtsá, Bëngbe Utabná Jesucristbe Taitá, nda corente iuámana, sëntseimpadana cha chaoma Uámana Espíritu chacmé-jabuachama, corente osertánënga chašmotsemnama, y chacminyãnyé nda Bëngbe Bëtsá yomnana, chca, más tšabá cha chašmotsábuatmama. ¹⁸Atše, Bëngbe Bëtsá sëntseimpadana, cha chaoma tšëngaftanga Bëngbe Bëtsabe soyënguĩne corente osertánana chašmotsebomnama, tšëngaftanga

chašmotsetatšëmbuama, ndayá Bëngbe Bëtsábeñe jtsošbuáchiyëse tšëngaftanga šmojtsobatmancá cha cmochjätšatayama. Bëngbe Bëtsá tcmojáchembo chábeñe chca chašmotsobátmanama. Atše cha sëntseimpadana, chaoma tšëngaftángnaca chašmotsetátšëmbo tša bëtscá y bëts soyënga yomna ndayá chabe entšanga cha tojašebuachenacá; ¹⁹y chašmotsetátšëmbo tša bëts soye y ndocna te ntjëftsoepochócama chabe obenana yomnana, chë ndayá bëngbe ainaniñe tšabe soyënga yojtsama, bënga chë Crístbeñe ošbuachiyëngbeñe. Cach quem puerte bëts obenana endmëna, ²⁰ndáyeca Bëngbe Bëtsá tojanma Cristo cháuatayenama, y chabe catšbioica celoca tbojtantbema chaotsemándama. ²¹Choca Cristo nyetsca soyënguĩne yojtsemándá, y más bëtscá obenana y mando yojtsebomna nyetsca mándayëngbiamá, chë mando y obenana bomnëngbiamá, y cha yomna más uamaná y bëtsá nyetsca chë entšangbiamá mo bëtsetsangcá utabnëngbiamá, chëngbe uabaina respétoca jtsichámëse. Cristo puerte bëtsá endmëna lempe ntšamo quem luarentše yobínynama y Cristo yochjésabentsana yochtsebinýnámna. ²²Bëngbe Bëtsá tojama Cristo nyetsca soyënguĩne chaotsemándama, y tbojanábuayana nyetsca soyënguĩne chaotsemándama, chábeñe ošbuáchiyëngbe tšabiamá. ²³Cha endmëna nyetsca chábeñe ošbuáchiyëngbe mandayá, y chënga mondmëna mo cachabe cuerpo cuaftsemncá. Chëngbe ainaniñe cha endoyena y nyetsca luarënguĩnnaca, y lempe cha endëmándá.

**Atsebácanënga mondmëna, Bëngbe
Bëtsá šuababuányëshanayeca**

2Tempo tšëngaftanga Bëngbe Bëtsabiamá mo obanëngcá šmonjamna, er tšëngaftanga

šmonjaniyena, ntšamo Běngbe Bětsá yomandacá ntsamcá, y bětscá bacna soyěnga šmojánama. ²Chca, tšěngaftanga šmonjánama mo chě nyě quem luarama enójuabnyěnga monduamancá, y šmonjaněyeunana Satanás, chě bacna espíritěnga obenana bomněnga y quem luarentša tsbanánoca imomněngbe aměndayá, chě Běngbe Bětsábioye nděyeunaněngbe ainaniñe yománda espíritu. ³Tempo běnga nyětscanga fsěnjaniyena ntšamo tšěngaftanga šmonjaniyencá. Běnga soyěnga fsěnjánama, nyě ntšamo ftsjanbošcá nyě běngbe cuerpěngbe tšabiama, y nyě ntšamo běngbe juabna enjamncá bacna soyěnga jamama. Běnga fsěnjaniyena soyěnga jtsaměse mo chě Běngbe Bětsábioye nduabuatma entšanga mondbetsamcá; chě causa běnga fsěnjanomerecena jtsebomnana chě Běngbe Bětsabe uabouana castigo, cachcá chě Běngbe Bětsábioye nduabuatměngcá. ⁴Pero Běngbe Bětsá sempre tša lastemado entšangbiama endměna y sempre corente běnga šondábabuaněshana; ⁵y chíyeca, běnga cabá mo obaněngcá chabiama fsěnjamna ora, bacna soyěnga fsěnjánama causa, chora cha tojanma běnga tšabe vida chamotsebomnama y Crístoftaca cányiñe mo canyácá chamotsemnama. Běngbe Bětsá tšěngaftangbe tšabiama juabna bómnyayeca, bacna soyěnguentšana tcmojatsebacá. ⁶Běnga Jesucrítoftaca cányiñe mo canyácá bětsemnayeca, Cristo Jesús cháuatayenama Běngbe Bětsá tojanma ora y celoca tbojtantbema ora, enjamna mo bėgnaca chámuatayenama Běngbe Bětsá cuafjamcá y Cristo Jesúseftaca celoca cuafatbiamcá. ⁷Chca enjamna, Běngbe Bětsá entšanga cháuinyaněyema nyětsca joshjanguama tempěnguiñe, ntšamo cha běngbe tšabiama bětscá juabna bětsebomnama, cha Cristo

Jesúseftaca bėngbioye tšabe juábnaca šojánaněye ora. ⁸Er Běngbe Bětsá tšěngaftangbiama tšabe juabna yojánbomnayeca, tcmojatsebacá, Jesucrístbeñe šmojtsanošbuáchema; pero atsebácaněnga šmondměna, ndoñe cach tšěngaftanga ndayá šmojánmayeca, ndayá atsbocaná jtsemnana endměna Běngbe Bětsabe caněye tšetana soye. ⁹Atsebácaněnga šmondměna, ndoñe cach tšěngaftanga ndayá šmojánmayeca; chíyeca ndocná quenátobena jtšenábotamnayana atsbocaná yojtsemnama. ¹⁰Běngbe Bětsá šojtabiama ntšamo běnga mondměncá, y Cristo Jesúseftaca cányiñe mo canyácá bětsemnayeca, Běngbe Bětsá mo tsměma entšangcá cuaftsatsměncá šojtabiama, tšabe soyěnga jtsaměse jtsiyenama. Y ndayá běnga tšabá mondamcá, Běngbe Bětsá tempo tojanprontá běnga chamotsamama.

Crístbeyeca tempcá tšabá

Běngbe Bětsáftaca jtsatsměnana

¹¹Tšěngaftanga ndoñe judiěnga, nděmuaněyenga judiěnga cmondubuatma “chě más delicadentše base bobachtema ndětětšeněnga ca”, chěngcá uinynanáněnga ndoñe šmondměnama; chěnga cachěnga jtšenábobuatmana “chě más delicadentše base bobachtema tětšeněnga ca”, y cachěngbe cuerpěnguiñe chca jtsamana. Měntšá, tšěngaftanga chě ndoñe judiěnga, ¹²šmochjenójuaboye ntšamo tempo šmojamnama, Crístbeñe cabá ndošbuáchiye ora. Chora, tšěngaftanga Cristo ndoñe šmonjánbomna, Israeloca entšangbiama stětšoye šmonjanquedana, y ndoñe šmonjantátšěmbo lempe ntšamo Běngbe Bětsá chabe entšanga tojanašebuachenacá. Tšěngaftanga quem luarentše šmonjaniyena

ndocnábeñe ntsobatmancá y Bèngbe Bètsá ntsabuatmcá. ¹³Pero mora tšèngaftanga Cristo Jesúseftaca cánýiñe mo canýacá šmontsemna, chë tempo Bèngbe Bètsá ndoñe šmonjanábuatmènga, y cha tojama chábioye chašmotsábuatmama; y chca yomna, er Jesús, chabe buiñe juabuáshanése, tšèngaftangbiam tojanóbana. ¹⁴Cach Cristo yojtsama bènga tempcá tšabá Bèngbe Bètsáftaca chamotsemnama. Cha tojama judiènga y ndoñe judiènga nyetscanga mo cachca entšangcá chamotsemnama, mo nda canýe tapièše tojtsendbemcá, chë ndayèšeca canýe luarentša entšanga tmojtsenjáta, chènga enáyaye causa. ¹⁵Cristo chènga mo cachca entšangcá tojábiam, judièngbe leyènga y mandènga ndocna obenana chamondétsebomnama jamése. Chca tojama, cha jóbanése, chë útoica entšanga mo nýe canýe tsmèma entšangcá jábiamama, cháftaca cánýiñe mo canýacá jtsemnèse. Cha chca tojanma chènga nyetscanga tšabá chamotsiyenama; ¹⁶y Cristo cruciñe tojanóbanayeca, cha tojanma chë útoica entšanga enáyayana chamotsajbanama, y tojanma chë útoica entšanga mo canýe entšangcá chamotsemnama, chènga tempcá tšabá Bèngbe Bètsáftaca chamotsatsmènama.

¹⁷Cristo quem luaroye tojánabo tšabe noticiènga jabábuayenama, tempcá tšabá Bèngbe Bètsáftaca jtsatsmènama. Cha quem tšabe noticiènga tojanabuayená tšèngaftanga chë ndoñe judièngbioye, chë Bèngbe Bètsá ndoñe šmonjanábuatmènga, y chë judièngbiyonaca, chë Bèngbe Bètsá imojanábuatmènga. ¹⁸Er chábeyeca, canýánýenga y ínýenga montsobena chë Taitábioye jobéconana, er bènga nyetscanga cachca espíritu bèngbe

ainaniñe mondbomna, chë Uámana Espíritu. ¹⁹Chíyeca tšèngaftanga, Bèngbe Bètsabe entsanguentše ndoñe quešmátsmèna mo inýe luarocana ashjajnèngcá, y ni mo cachèngbe yebnentše ndoyenèngcá, tondayama derecho ndbomnènga. Inýetsá endmèna; tšèngaftanga derecho šmondbomna cachcá ntšamo Bèngbe Bètsabe entšanga mondbomncá, y Bèngbe Bètsabe básenga šmondmèna. ²⁰Jesucristo y chabe entšanga mondmèna mo canýe jebna yebncá. Jesucristbe ichmónènga y chë Bèngbe Bètsabe juabna oyeuambnayènga mondmèna mo chë ndètsbenga ndayíñe chë yebna tojtsècuatjoncá; tšèngaftanga ošbuáchiyènga šmondmèna chë jebna yebnentša soyèngcá, y cach Jesucristo mo chë más uámana luarentše uashacuana ndètsbecá. ²¹Quem más uámana luarentše uashacuana ndètsbeñe, nyetsca chë bèts yebnentša soyènga jtsècuatjonana, y tsbanánoye más tmojatsjebèše, chë bèts yebnentše tsèm jebna sóynaca chiñe jtsècuatjonana. Cachcá Cristo, mo chë más uámana luarentše uashacuana ndètsbecá, jtsamana nyetsca chábeñe ošbuáchiyènga cháftaca cánýiñe mo canýacá chamotsemnama, y ínýengnaca cachcá chamotsemnama. Y nyetsca ošbuáchiyènga Cristoftaca cánýiñe mo canýacá tmojtsemna ora, chènga jtsemnana mo Bèngbe Utabnabiam canýe bèts yebna jebncá, chábioye jtsatschuanayama. ²²Y tšèngaftanga Efesoca ošbuachiyèngbiámna Cristo entsama, chë inýe chábeñe ošbuáchiyèngaftaca mo canýe entšangcá chašmotsemnama. Y chë Uámana Espíritu bèngbe ainaniñe yojtsiyénayeca, bènga nyetscanga cánýiñe mondmèna, mo canýe bèts yebncá ndayentše Bèngbe Bètsá yoyena.

**Pablo Jesucristbe trabajo
yojanbonýena, chë ndoñe
judiëngbeñe jamama**

3 Chca, atše Pablo utamená séntsemna, Cristo Jesusbiana soyënga entšanga abuayiyenaye causa, tšëngaftanga chë ndoñe judiëngbe tšabiama. ²Er tšëngaftanga ya cmontsamna jtsetatšëmbuama, Bëngbe Bëtsá tšëngaftangbe tšabiama juabna yobomnama; y chca, chë trabajo atše šojabonyé, tšëngaftangbe tšabiama jamama. ³Tšëngaftángnaca cmontsamna jtsetatšëmbuama ndayá Bëngbe Bëtsá šojinýinýé, ntšamo cha jamama tempo tojanjuabocá, pero entšanga chca ndoñe tonjaninýanýé, y chë soyama ya batšatema tcbonjubuábiana. ⁴Chašmojualiá ora, šmochanjátatšëmbona Cristbe soyënga šosertánama, chë tempo ndocná yonjanábuatma soyënga, ⁵chë tempo Bëngbe Bëtsá ndocnábioye tbonjaninýinýé soyënga; pero mora cha tojinýanýé, Jesucristbe ichmónënga nýe Bëngbe Bëtsabiama oservénëngbioye y Bëngbe Bëtsabe juabna oyebuambnayëngbioye; y cha chca tojama chabe Uámana Espíritoftaca. ⁶Ndayá tempo Bëngbe Bëtsá ndoñe tonjaninýanýecá mëntšá endmëna: chë ndoñe judiënga Jesucristbe tšabe noticiënguñe chamojtsošbuaché ora, cachcá ntšamo chë judiënga ošbuáchiyënga Bëngbe Bëtsábíocana mochjoshachiñcá, chëngnaca chábiocana mo otocancá chë soye mochanjójyëngacñe. Chënga mo cach judiënga ošbuachiyëngcá, Cristo mondbomna mo chëngbe mandayacá. Y chca Cristo endmëna mo bestšašcá y chënga nýetscanga mondmëna mo cachabe cuerpentša soyëngcá. Chë ndoñe judiënga ošbuáchiyënga mochanjójyëngacñe lempe ntšamo

Bëngbe Bëtsá chë judiënga ošbuáchiyënga tojašebuachenacá. Chca echántsemna chë ndoñe judiëngaftaca, chënga Cristo Jesúsëftaca cánýiñe mo canýacá bëtsemnayeca.

⁷Masque ndoñe šonjanomerecena, mo ndayá cuafjatšetacá, Bëngbe Bëtsá šonjanábuayana cha jtseservénama, tšabe noticiënga entšanga jtsabuayinayëse; y cha átšëftaca chca tojanma chabe obenánaca. ⁸Atše nýetsca chë Bëngbe Bëtsabe entšanguentše sëndmëna chë más nduamaná; pero Bëngbe Bëtsá bëtš pavor šontsebema, šonjalesenciá chë Cristbe bëtšcá tšabe soyënga chë ndoñe judiënga jábuayenama. Chë Cristbe soyënga tša bëtšcá endmëna, y chca, quenátopodena chë soyënguentšana lempe jtsabuatmana. ⁹Y chë trabajo šonjabonyé jamama, nýetscanga botamana jinýama chamotsobenama ndayá Bëngbe Bëtsá yochjama, ndayá cachá, chë nýetsca soyënga tojamá, tempscana yojanjuabnacá. Mëntšcoñama Bëngbe Bëtsá chë soye ndocnábioye tbonjinýinýé, pero mora aiñe. ¹⁰Chca, Cristbeñe ošbuachiyëngbeyeca, mora chë celoca mándayënga y obenana bomnënga, chamobená juabuátmanana nýets osertánana ntšamo Bëngbe Bëtsá yobomncá. ¹¹Bëngbe Bëtsá chca tojama, ntšamo cachá yojanjuabnacá nýetsca tescama jamama, y chca cha tojama Jesucristoftaca, Bëngbe Utabná. ¹²Bënga Cristoftaca cánýiñe mo canýacá mondmëna, y chábeñe mondošbuachéyeca, bënga montsobena Bëngbe Bëtsábíoye jobéconama tondayama ntjatauatjácá, y corente jtsetatšëmbëse cha ndoñe chašondubatema. ¹³Chýeyca atše cbontsaïmpadana ndoñe chašmondëtsajbaná ainaniñe añemo bomnana, atše séntsesufrina causa, er chë tšëngaftangbe tšabiama

tsësufrintësana, tšëngaftangbiamana
tšabe soyënga endóbobana.

Cristbe bonshánana

14-15 Y chca, Bëngbe Bëtsá, chë
Taitá, ndábentsana nyetsca pamíllanga
celoca y quem luarentše uabaina
imóyëngacañe, chabe delante
joshaméntšase, ¹⁶ sëntseimpadana,
chabe bëtscá uámana bomnánana
chaoma, tšëngaftanga ainaniñe obenana
y bëts añemo chašmotsebonnana,
chabe Espíritbeyeca, ¹⁷ y tšëngaftanga
Cristbeñe jtsošbuáchiyëse, mua
tšëngaftangbe ainaniñe chaotsiyenama.
Bëngbe Bëtsánana sëntseimpadana,
cha y ínÿenga nyets ainánana
jtsababuánÿeshanëse, ¹⁸ tšëngaftanga
y nyetsca Bëngbe Bëtsabe entšágnaca
tšëngaftangaftaca, chašmotsobena
josértama Cristbe bonshánana
bëngbiamana tša bëtscá yomnana.
Nderado nda tojontsé chabe
bonshánana jatsëmbonana mo canÿe
soye cuaftsemncá, cha ndocna te
nanjobenaye jtsetatšëmbuana tëntsoye
ndayéntscoca yomna y nÿanëjoye
ndayéntscoca, jashenoye ndayéntsoñe
y tsbanánoye ndayéntsoñe yomna.
¹⁹ Atše sëntseimpadana tšëngaftanga
chašmobená chë bonshánana
juabuátmanana (chë bonshánana puerte
bëtscá endmëna causa, bënga ndocna
te quemochatobenaye josértama
ntšamo chë soye lempe yomnana). Pero
sëntseboše, tšëngaftangbe ainaniñe nÿe
Bëngbe Bëtsabe soyënga chaotsemna y
tšëngaftanga chašmotsiyena jtsamëse,
ntšamo tšëngaftanga chašmotsamama
Bëngbe Bëtsá yojuabnacá.

²⁰ Y mora, nyetscanga Bëngbe
Bëtsá chamotsatschuaná. Cha
obenana yobomna ntšamo bënga
tmojtsotjanañe o tmojtsejuabnana más
soyënga jamama, chabe puerte bëts
obenánana; y chë obenana bëngbe

ainaniñe yojtsemánana y yojtsama
bënga ainaniñe sempre ošbuáchiyana
chamotsebonnana. ²¹ ¡Entšanga
Bëngbe Bëtsá chamotsatschuaná nyets
tempo y nyetsca tescama, ndayá
Cristbeñe ošbuáchiyënga tmojtsamama
y cach Cristo tojamánana! Chca
chaotsemna.

Uámana Espíritbeyeca bënga cánÿiñe mo canÿacá jtsemnana

4 As, atše chë cárceleye utamená,
Bëngbe Utabnabiamana trabájaye
causa, tšëngaftanga cbontsaimpadana,
ndëmuanÿenga Bëngbe Bëtsá
tcmojáchembo chabe entšanga chašmot-
semnana, siempre chašmotsiyena mo
chë entšangcá ndëmuanÿenga Bëngbe
Bëtsá cach soyama tojánachembo
y chca imomerecena. ² Cada ona
chamotsenajuabná mo chë ínÿenga
chabiamana más uámanënga tmojtsemncá,
y nyetscángbioye puerte bonshánana
šmochtsobátmana, y bëtscá bonshánana
jtsebonnëse šmochtsenëuantana;
³ siempre šmochtsejuabnaye y
šmochtsentšena tšëngaftanga
nyets tempo cánÿiñe mo canÿacá
chašmotsemnana, nyetsca tšëngaftanga
natjémbana jtsemnëse. Y tšëngaftanga
šmotsobena cánÿiñe mo canÿacá
jtsemnana chë Uámana Espíritbeyeca.
⁴ Bënga Jesucristbeñe ošbuáchiyënga
bëtsemnayeca mondmëna mo cach
cuerpentšëngcá, chë Cristbe cuerpo,
y cachca Espiritu bënga nyetscanga
ainaniñe mondbomna. Bëngbe
Bëtsá šojáchembo, bënga chábeñe
jtsošbuáchiyëse, nyetscanga cachcá
šochjátšatayama chamotsobátmanama.
⁵ Bënga nyetscanga cach Utabná
mondbomna, cachca ošbuáchiyana
Jesucristbeñe mondbomna, y bënga
nyetscanga uabáinënga mondmëna
chca betsošbuáchiyama. ⁶ Bënga
ošbuáchiyënga nyetscangbiamana cach

Bëngbe Bëtsá y Taitá endmëna. Cha bëngbe amëndayá endmëna, chabe obenana nyëtscángbeñe jtsinýnana, y nyëtscá bëngbe ainaniñe chabe Espíritu endmëna.

⁷Pero bënga, cada ona tšetana obenana tojóyëngacñe, tšabe soyënga jamama, ntšamo Cristo jatšatayama tojanbošencá, chábeñe ošbuáchiyënga jujabuáchama. ⁸Chíyeca, Bëngbe Bëtsabe uabemana palabreñguine Jesucristbiana mëntšá endayana:

Cha celoye tontantsjuá, y cháftaca tonjanéyamba nyëtscá chabe uayayënga, chë tojánayëñjananga, y chabe entšángbioye obenana tonjanatšatá, tšabe soyënga jamama ca.

⁹¿Y ndayá yojtsayana chë “cha tontantsjuá ca”? Chca entsayana co Cristo natsana, quem luaroye tojánastjango ca. ¹⁰Y Cristo, chë tojanastjanguá, cachá endmëna nda celoca chë más tsbanánoye tojtantsjuá; chca, canye ora nyëtscañe cha chaotsemnama. ¹¹Y cachá, chë tšabe soyënga jamama obenana tojanatšatá ora, tojanma chábeñe ošbuáchiyënguentšë chamotsemna ínÿengna chabe ichmónënga, ínÿengna Bëngbe Bëtsabe juabna oyebuambnayënga, ínÿengna tšabe noticiënga Cristbiana abuyayinayënga, y ínÿengna ošbuáchiyënga anÿenënga y Bëngbe Bëtsabe soyëngama abuátambayënga. ¹²Cristo tojan-abacacangna chabe entšángbioye mochjanëjabuache, cha tojanabanýé trabajo chënga chamotsamama, y nyëtscá ošbuáchiyënga, chë nyëtscanga cánÿiñe mondmëna mo Cristbe cuerpcá, cada te más ošbuáchiyana y bonshánana chamotsebomnama, ¹³bënga nyëtscanga chamobenantscuana cachca ošbuáchiyana Jesucristbeñe jtsebomnama, y Bëngbe Bëtsabe Uaquiñabiana nyëtscanga lempe

cachcá jtsetatšëmbuama. Chca, bënga mochanjashjache jtsemnama lempe ntšamo Cristo yomncá, mo bëtsétsanga bëtscá juabna bomnëngcá, ¹⁴y ndoñe ñye mo basengcá, Bëngbe Bëtsabe soyëngama jtsetatšëmbuama. Chë soyënguine ya ndoñe más ñye mo basengcá quemochátmëna, ndëmuanyënga paselo jáingñama yomna. Mo canye barquësha ñye ndaye bínÿiacnaca tojtsëyambancá, básefta entšanga ñye ndaye buatëmbana soye tmojatuenca jatsyeunanana; bënga ndoñe chca quemochátmëna, ya ndoñe más bëngbe juabna quemochatstróca, ñye ndaye tmojatuenta tsëm sóyeca, ínÿengbioye áingñayënga. Chënga becá montsetátšëmbo ntšamo entšanga jáingñana, y montsebošë chë montsabuatambá bostero soyënga bënga jtseyeunanama. ¹⁵Chamna, chë Bëngbe Bëtsabe ndegombre soyëngama bonshanánaca jtsóyebuambnayëse, šontsamna jashjáchana jtsemnama lempe ntšamo Cristo yomncá. Cha bëngbe amëndayá endmëna, cachcá ntšamo bestšašë chë cuerpentša soyënga jtsemadayancá. ¹⁶Mo canye bestšašcá, chëse jamana nyëtscá chë cuerpentša soyënga ndayentšë chamueneñnama y chiñe jobónjuama chamotsobenama, chë cuerpo saná chaotsebomnama jtsamëse, chca, nyëtscá cuerpo tšabá chaóbochema, cachcá Cristo, chë nyëtscá ošbuáchiyëngbe amëndayá, chabe obenánaca jamana chënga cada te más ošbuáchiyana y bonshánana chamotsebomnama. Cada cuerpentša soye tojtsama ntšamo chë soye chaotsamama tomncá, as nyëtscá cuerpo tšabá jobóchana; cachcá, ošbuáchiyënguentšë cada ona tojtsama ntšamo jamama tbojtsemncá, as nyëtscá ošbuáchiyënga cada te más ošbuáchiyana mochántsebomna, puerte jtsebobonshánëse.

**Cristoftaca cánÿiñe mo canÿacá
jtsemnëse tsëm vida šmochtsebomna**

¹⁷ Měntšá entsemna ntšamo cbontsětsěsnacá, y Běngbe Utabná endmēna nda tojama atše mando chaitsebomnama tšěngaftanga chca jáuyanama: Ndoñe más šmattsiyena bacna soyěnga jtsamēse, mo chě Běngbe Bětsábioye nduabuátměnga mondbetsamcá; chěnga jtsiyenana jtsamēse ntšamo cachěngbe ndoservena juabněnga tojtsaměndacá. ¹⁸ Chěngbe juabnoća obenana mondbomna nÿe ndoñe ndegombre soyěngama josěrtama. Chěnga ndoñe quemátsbomna chě Běngbe Bětsábioćana yóbocana tšabe vida, er chěnga ndoñe quematslesěncia chě Běngbe Bětsabe soyěnga chěngbe ainaniñe chaómashěnguama; y chca endmēna, er chěnga tmojajuabó y tmojama chě Běngbe Bětsabe buayenana soye chěngbe ainaniñe tondaye chaondómashěnguama. ¹⁹ Chěnga bacna soyěnga tmojtsama ora, tondayama ntsenócochinÿenana; chěnga nÿets tempo jesentsěnanana nÿetsca bacna soyěnga amana, y chca jtsamana tondayama ntjatenojuabnaycá.

²⁰ Pero chca ndoñe quenjatsmēna ntšamo tšěngaftanga Cristbe soyěngama šmojanatsjinÿe y ntšamo chábioye šmojanabuatmancá. ²¹ Ndegombre tšěngaftanga chabiamana šmojanuena y inÿenga tmojanabuatambá mo chábeñe ošbuachiyěngcá y ntšamo chě ndegombre soyěnga Jesucristbeñe endbinÿncá. ²² Chcasna, ntšamo tšěngaftanga šmojanjuabná, šmojansentina y šmojanamcá Jesucristbeñe cabá ndošbuachená ora, mora lempe stětsoye šmochjaquéda; ntšamo tempo tšěngaftanga šmojanjuabná, šmojansentina y šmojanamcá, canÿe ondbiamnaye juabnentsšana yojóbocana,

tšěngaftanga bacna soyěngama juabněngaca mandáněnga jtsemnëse, y chě juabněnga tšěngaftangbioye cmojáanaingñaye. ²³ Tšěngaftanga cmontsamna tšěngaftangbe juabniñe tsëm y tšabe juabněnga jtsebomnana. ²⁴ Tšěngaftanga cmontsamna jashjáchana mo tsmēma entšangcá jtsemnana, y chě ntšamo tempo šmojanamcá mora ndoñe cachcá chašmondětsamama. Chca, tšěngaftanga šmochanjashjache jtsemnana ntšamo Běngbe Bětsá yomncá. Běngbe Bětsá chca tsmēma entšangcá tcmojábiamana, tšěngaftanga chašmotsiyenama jtsamēse Běngbe Bětsabe bominÿiñe tšabá yomna soyěnga y chábioye jadórana soyěnga, chě ndegombre soyěnguentšana óbocana soyěnga.

²⁵ Chcasna, ya ndoñe más šmattsebos-tero, ndayá cada ona cháuyayana ndegombre soyěnga cachacá Jesucristbeñe ošbuachiyáftaca, er nÿetscanga cánÿiñe mondmēna mo nÿe canÿe entšangcá. ²⁶ Nderado chacmojetěna, tcmojetěna causa ndaye bacna soye ndoñe šmatjama. Pero ndoñe šmatjalesěncia bēnama chacmetěna y ndoñe nÿets te chacmondetěna. ²⁷ Ndoñe šmatjalesěncia Satanás ndayánaca tšěngaftangaftaca chaomama.

²⁸ Chě yojanatbēbaná chauajbaná atbēbanama y jatrabájama chaontšě; cachabe cucuátseca tšabe trabajo chaotsóboma, chca, ndayánaca cha chaotsebomnama chě ujabótěnga jatšatayama.

²⁹ Bacna palabrěnga ndoñe šmattsichamo, pero añe tšabe palabrěnga y nÿa chorsca ujabótama palabrěnga, chě inÿe entšangbioye jujabuáchama más Cristcá chamotsemnana, chěnga Běngbe Bětsábioćana tšabe bendicioněnga chamóyěngacñama, chě ndayá chašmojtsětsěsná sóyeca. ³⁰ Ndoñe šmattsama soyěnga,

Bèngbe Bètsabe Uámana Espíritu chabongmema. Bèngbe Bètsá tojama Uámana Espíritu tšèngaftangbe ainaniñe cháumashènguama, y chca, tcmojanainýnaná chabe entsànga bétsemnayeca, chë yochjóshjango tescama, Bèngbe Bètsá chabe entsànga nyetsca tescama yochjatsebacaye orscama.

³¹Inyèngbiana bacna juabnènga ainaniñe ndoñe chašmondétsebomna, etonánènga ndoñe chašmondétsemna, ni ínýengaftaca ndoñe chacmondetèna. Inyèngbioye ndoñe chašmondétsabuachembuana, ínýengbioye ndoñe šmatjovýanguango y ndaye bacna sóynaca ndoñe šmattsama.

³²Nyetscángaftaca tšábènga šmochtssemna, nyetscanga šmochtsenlastemana y šmochjenperdóna, ntšamo Bèngbe Bètsá, Crístbeyeca tcmojaperdonacá.

Ntšamo yomna Bèngbe Bètsabe básènga chamotsiyenama

5 Tšèngaftanga, Bèngbe Bètsabe bonshana básènga quetsomñecá, nýa šmochtsentšèna cachacá jtsemnama. ²Šmochtsiyena nyetsca soyènga bonshanánaca jtsamèse, ntšamo Cristo šojanababuanýeshancá; chca, cha chabe derecho vida jtsobomñama cachcá tojanonýa y bèngbiana tojanóbana. Y ntšamo Cristo tojanmcá, yojamna Bèngbe Bètsábioye jètschuayama, y chabe bominiñe tša tšabá yojtsemna, mo ndaye ora Bèngbe Bètsá oyejuayá jóyèngacñana ndayá tcojóba y altaroca tcojajuinyese, y chë soye botamana jtsonguètsiyana.

³Tšèngaftanga, Bèngbe Bètsábènga šmomnènga, ndoñe quecmátamna shembása o boyabásaftaca bacna soyènga jtsamana, ni chca játamama jtsejuabnayana y jtsebošana, y chë nýe yapa jésebošana más soyènga ínýèngbiana jtsebomnama cach

ndoñe. Ni chë soyèngama ndoñe šmattsóyebuambnaye. ⁴Bacna soye ndoñe šmattsóyebuambnaye, ni corente ntjenojuaboycá, ni nýe ntšámnaca bacna soye jenbotatšèmbonana cach ndoñe, er chë soyènga tšèngaftangbiana ndoñe tšabá ntsemnana. Chca játamamna, más tšabá, Bèngbe Bètsá šmochtsatschuanaye. ⁵Er tšèngaftanga ya šmondétatšèmbo, ndocna chë shembása o boyabásaftaca bacna soye amá, ndocna chë nýe chabe bacna juabnèngaca soyènga jtsamama oyená, o chë nýe más soyènga ínýèngbiana jtsebomnama bošá y amá (chca jtsayanana chabiana más iuámana soyènga jtsebomnana, Bèngbe Bètsábioye jatsbobonshánama), chca amènguentšana ndocná tondaye queochatóyèngacñe ndayá Bèngbe Bètsá chabe entsàngbioye jatšatayama tojašebuachenantšana, Cristo y Bèngbe Bètsabe améndayoca. ⁶Ndocná chacmondaingñé ndoñe ndegombre tondmèna palabrèngaca, bacna soyènga chašmotsamama, er chë causa chë uabouana castigo echanjobaye, ndáyeca Bèngbe Bètsá chábioye ndýeunanènga yochjácastigaye. ⁷Chíyeca, chca amèngbe soyènga tondaye šmattsama.

⁸Tempo tšèngaftanga šmojaniiyena bacna juabnènga jtsebomnèse y bacna soyènga jtsamèse, mo ibetiñe cuaftsiyencá, pero mora Bèngbe Utabnáftaca cánýiñe mo canýacá bétsemnayeca, chabe soyènga šmontsetátšèmbo y sempre šmondétsemna cháftaca, chë entsàngbe juabnènga binýnayáftaca. Šmochtsiyena jtsamèse mo chë binýnayabe entsàngcá. ⁹Chë binýnayábeyeca entsànga tšabe soyènga jtsamana, chë Bèngbe Bètsabe bominiñe tšabá yomna soyènga, y ndegombre soyèngnaca. ¹⁰Nýa šmochtsentšèna soyènga jamama, Bèngbe Bètsá oyejuayá chaotsemnama.

¹¹ Chë mo ibetiñe cuaftsiyencá oyenëngbe bacna soyënga tondayama ntoservénana, y tšëngaftanga chca ndoñe šmattsama. Chamna, chëngbiöye šmochjññyanýiye chënga ndoñe tšabá tmonjamama. ¹² Ndegombre, nýe chë ndayá chënga mo iytëmencá tmojamama jóyebuambayama ya cuantsëuatja; ¹³ pero nýetsca soyënga binýniñe tmojacá ora jtsopodénana tšabá jinýama ntšamo ndegombre tomncá. Cachcá, ntšamo entšanga tmojamcá chë binýnayá chaojinýanjé ora, echantsopodena jtsotatsëmbuama ntšamo chë soyënga yomnana; ¹⁴ er ndayánaca binýniñe tojtsinýinjéna, jtsopodénana jinýama ntšamo ndegombre chë soye tomncá. Cachcá, ntšamo entšanga iytëmencá tmojtsamcá chë binýnayá chaojinýanjé ora, chënga mochántsetatsëmbo bacna soyënga imojtsamama. Chíyeca mëntšá jtsichámuana:

Botamana cochjájuaboye, aca ndoñe quecátobena jenomándana, mo canya cuaftsomañcá;

chë bacna soyënga ama causa, Bëngbe Bëtsabe bominýiñe mo obanëngcá imomnënguentšana šmochtsojuánañe, y Cristo acbe juabnënga echantsebíný-naye ca.

¹⁵ Chcasna, šmochtsantješna ntšamo tšabá yomncá jtsamëse chašmotsiyenama. Ndoñe šmattsiyena jtsamëse, mo chë Bëngbe Bëtsabe soyëngama ndosertanëngcá, pero aíñe chë chca soyëngama osertanëngcá. ¹⁶ Lempe ntšamo chašmojobenacá nýets tempo tšabe soyënga šmochtsama, er quem tempo entšanga yapa bacna soyënga montsama. ¹⁷ Ntjenojuaboycá ndoñe šmattsama, mo chë ndosertanëngcá. Pero aíñe bëtscá šmochtsentšëna ndayá Bëngbe Utabná jamama yobošcá chacmósertama. ¹⁸ Ndoñe

šmattsótmenaye, er chë soye entšábioye juanatsana jenomándama ndoñe chaondëtsobenama; chamna, šmochjama Uámama Espiritu sempre y bëtscá tšëngaftangbe ainaniñe chaotsemándama. ¹⁹ Šmochjenatsëtsaye Salmos librëšañe enduábemana cantënga jacántase, Jesucristbe soyëngama cantëngaca y chë Bëngbe Bëtsabe Espiritu inétsama tšëngaftanga chašmotsobena jacántama soyëngaca; chca, nýets ainánaca Bëngbe Utabnabiamama šmochjacántaye y cha šmochtsatschuanaye. ²⁰ Nýets tempo y lempe ntšamo cha tojamama Bëngbe Bëtscá chë Taitá šmochtsatschuanaye, Bëngbe Utabná Jesucristbiajana.

Ntšamo yomna canýe yebnentšënga chamotsemnama

²¹ Nýetscanga šmochtsenýeyunana, tšëngaftanga Crístbioye puerte šmorrespetánayeca.

²² Shémanga, šmochtsatšëmbo tšëngaftangbe boyanga chë yebnentša mandayënga imomnana; y nýets tempo chca šmochtsama, Bëngbe Utabná chašmotsobedecénama. ²³ Er boyá endmëna shembe mandayá y inýená, ntšamo Cristo chë ošbuáchiyëngbe mandayá y inýená endmëncá. Cha chënga tojatsebácá y mora cha chënga entsamënda, mo chë bestšaše nýets cuerpo jtsemandayancá; ²⁴ y chca, ntšamo chë ošbuáchiyënga, Cristo chëngbe amëndayá yomnana imotatsëmbcá y chca jtsamana, cachcá, chë shemángnaca entsamna jtsemnana nýetsca soyënguñe chëngbe boyángaftaca.

²⁵ Boyanga, tšëngaftangbe shémanga šmochtsababuánýeshana, ntšamo Cristo chábeñe ošbuáchiyënga yojanababuanýeshancá, y chca, chabe derecho vida jtsobomñama cachcá tojanonýá y chëngbiamama tojanóbana. ²⁶ Chca tojanma, chënga chabe entšanga

y puerte tsábenga jábiamama; y chénga tmojánenabaye ora, tmojaninýanýé Bèngbe Bètsá chéngbe bacna soyénga tojánabuajuanama, y chabe delante tsábenga chamotsemnana cha tojanmama. Cha chca tojanma, er chénga chábeñe imojtsanošbuaché, chabiamabuayenana soyénga tmojanuena ora. ²⁷Cha chca lempe tojanma, ché ošbuáchiyénga japróntayama corente tsábenga y uámanénga cachabiamachamotsemnana, ndocna bacna soye ndobomnénga, ni ndocna entśá chaondobená jayanama chénga imomna ché ndoñe tsábá tmonjaméngaca, ni ndocna inye cachca sóyeca. ²⁸Ntsámo canye boyá cachabe cuerpo endbetsebobonshancá, cachcá cha bontsemna chabe shémbioye jtsebobonshánana. Nda chabe shémbioye tbojtsebobonshana, cachábioye jtsenobobonshánana, er chata cánýiñe jtsemnana mo nye canye entśá cuenta. ²⁹Er ndocná cachabe cuerpo jtsáboyénjana, ndayá saná janguangoñana y jtsinýenana, ntsámo Cristo benga ché ošbuáchiyéngaftaca endbetsamcá; ³⁰er benga nyetscanga cánýiñe mondména mo chabe cuerpo cuaftsemncá, y benga mo chabe cuerpentśa soyénga cuaftsemncá. ³¹Ntsámo Bèngbe Bètsabe uabemana palabrenguñe endayancá: “Chíyeca, boyabása chabe taitá y chabe mamá echanjésabashejuana chabe shémaftaca jenútanama, y ché útata mo canýacá bochántsemna ca.” ³²Ché soyénga josértama puerte totcá comna, pero atśe šcuayana, ché soye entsoyebuambná ntsámo Cristo chábeñe ošbuáchiyéngaftaca yomnana. ³³Pero morna, tséngaftanga cada ona cachabe shémbioye chabotsebobonshana, ntsámo cachá iuenobobonshancá, y shema boyábioye ndoñe stétsoye chabondéquedá.

6 Básenga, Bèngbe Utabnáftaca cánýiñe mo canýacá bétsemnayeca, tséngaftangbe bétsetsangbioye šmochtsayaunana, er chca jamana tsábá endména. ²Moisesbe leyiñe canye mando endména, y chentśe endména ché Bèngbe Bètsabe natsana mando, ndayentśe cha tojašbuachená tsabe bendicionénga jamama: “Acbe taitá y acbe mamá ndoñe stétsoye catjétsaquédaye, ³tsabe vida chacuetsobomñama y quem luarentśe bayté chacuetsiyenama.”

⁴Taitanga, ndoñe šmattsama tséngaftangbe básenga chaueténama; más tsabana, chénga šmochtsabéchaye jtsabuátambayése y jucacánese, ntsámo Bèngbe Utabná endbetsabuatambaycá.

⁵Tséngaftanga, ché nyets tempo nye ínýabiamama oservénénga, tséngaftangbe nduiñénga šmochtsayaunana; chca šmochtsama puerte respétoca, bétscá cuedádoca y nyets ainaniñe tsabe juabnéngaca, mo cach Crístbioye cuaftseservencá. ⁶Y chca ché nduiñéngbioye šmochtsaservena, ndoñe nye chénga chacmojtśénýa ora, mo nda nye entśangbe delante tsábá joquédama cuaftsebošcá, ndayá Cristbe oservenéngcá, chénga nyets ainánaca jtsamana ntsámo Bèngbe Bètsá tojtsebošcá. ⁷Nyetsca trabajotéménga šmochtsama nyets tséngaftangbe añémoca, mo Bèngbe Utabnabiamama cuaftsetrabajacá, y ndoñe nye entśangbiama. ⁸Er tséngaftanga ya šmondétatśémbo, cada ona, nyets tempo nye ínýabiamama trabajayá o nye cachabiamama trabajayá tomna, ntsámo tsabe soyénga tojamcá Bèngbe Utabnábiocana yochjóyéngacñe.

⁹Y tséngaftanga, ndémuanýengbiama ínýenga nyets tempo imoservena, cachcá tsábá chéngaftaca šmochjamna, tondayama ntsaúatjñayése. Šmochtsenójuabnaye, Bèngbe Utabná

chë celoca endmëná, tšëngaftanga y chëngbe mandayá yomnama, y chabiama nyetscanga cachcá monduámana.

Ndayá Bëngbe Bëtsá entsanga tojatsatá Satanasbiama jenéuyanama

¹⁰Y morna, Bëngbe Utabnáftaca cányiñe mo canýacá jtsemnëse, ainaniñe bëts añemo šmochtsebomna, chë Bëngbe Utabnabe bëts obenanentsšana óbocana añemo. ¹¹Mo canýe soldadcá, ba soyënga jtochëtjuana chë tmojtsentsjananga ora uayayëngbiama jenéuyanama, tšëngaftángnaca cachcá, nyetsca chë Bëngbe Bëtsá cmojatsatá soyëngaca šmochtseprontana jenéuyanama, tšëngaftanga jáingñama Satanás ntšámnaca tojtsama ora, ndoñe chacmondáyëjanama. ¹²Er bënga ndoñe quemuatenojuerzana cach quem luarentša entsángaftaca jenëýëjanama, ndayá bacna espíritënga mando bomnéngaftaca; bacna espíritënga obenana bomnéngaftaca; y quem luarentša entsanga, chë bacna juabna bomna causa y Bëngbe Bëtsabe soyënga nduabuatma causa, mo ibetiñe cuaftsoyencá oyena entsángbioye amëndaye espiritëngaftaca; y chë tsbanánoca luarënguñe imomna y bacna soyënga chaotsebínýnama ama espiritëngaftácnaca. ¹³Chíyeca, lempe ntšamo Bëngbe Bëtsá cmojatsatácá šmochjójýëngacñe y chë soyënga jtsamëse šmochtsiyena jtseprontánama, mo canýe soldado jenéuyanama y jáyëjanama bëtscá soyënga tojtochëtjácá. Chca šmochjama, chë uayayá Satanás tšëngaftangbioye jáingñama chaojtsama ora ndoñe chacmondáyëjanama, y jenéuyanama lempe jtsamëse, chašmobená cha jáyëjanama.

¹⁴Mo canýe soldadcá, jabuache jtsanayana y cochaca canýe morocho

soye jenácochjatsana jtsevalentiana y ndoñe chamondëýëjanama, tšëngaftángnaca cachcá, ntšamo ndegombre yomncá jtsamëse šmochtsiyena, mo chë jabuache cuaftsnacá, y chë Bëngbe Bëtsabe bominýiñe tšabá yomna soyënga jtsamëse, mo chë morocho soye cochaca cuafjenacochjatscá, chca, Satanás tšëngaftangaftaca tondaye chaondobená jamama. ¹⁵Mo canýe soldadcá jtoshecochëtjuana betesco jobónjuama jtseprontánama, tšëngaftángnaca cachcá, Bëngbe Bëtsabe obenánaca sempre šmochtseprontana jtsabuayiynayama ntšamo Bëngbe Bëtsá inétsama entsanga tempcá tšabá cháftaca chamotsatsmënama.

¹⁶Canýe soldado escudo jtsebomnana chë uayayabe uajuinýinýana flechëjuangá chabe cuerpiñe ndoñe chaonduámashënguama. Cachcá, tšëngaftanga cmontsamna Jesucristbeñe puerte jtsošbuáchiyana, mo escudo cuaftsebomncá, chca, chë bacna soyënga mandayá Satanás tšëngaftangaftaca tondaye chaondobená jamama, tšëngaftangbe ošbuáchiyana jabuajuánama cha tojtsama ora.

¹⁷Mo chë soldadcá, canýe morocho buchtsanëse tojtabuchëtsëse chabe bestšaše jenéuyanama, tšëngaftángnaca cachcá, sempre šmochjésejuabnaye Bëngbe Bëtsá cmojätsebacama, y chë juabna cmochanjújabuache, mo canýe morocho buchtsanëse cuaftsabuchëtsancá. Mo canýe soldadcá, chë uayayábioye jáyëjanana, chabe espadéjaca japéliase, cachcá tšëngaftanga, Bëngbe Bëtsabe palabra šmochtsóyebuambnaye Satanás jáyëjanama. Uámana Espiritu jtsamana, tšëngaftanga Bëngbe Bëtsabe palabra chašmotsebomnana.

¹⁸Nyets tempo chë Uámana Espiritbe uajabuáchenanaca Bëngbe Bëtsáftaca šmochtsencuëntaye, lempe ntšamo

Bëngbe Bëtsáftaca jencuéntama yomncá y chábioye jtseimpadánese. Yejuana šmochtsenójuabnaye ntšamo šmojtsichámuama, Bëngbe Bëtsáftaca chašmojtsencuénta ora, y chca šmochjama Bëngbe Bëtsábeñe sempre jtsobátmanëse, y Jesucristbeñe ošbuachiyëngbiana nyetscangbiana cha šmochtseimpadana.

¹⁹ Atšbiámnaca Bëngbe Bëtsá šmochtseimpadana, atše jóyebuambayama chajontsé ora, cha chë buayenana soye chašúyanama; y atše chayobená tondayama ntjatauajcá jóyebuambayana, y chca, entšanga chayinýanýé Jesucristbiana tšabe noticiënga, ndayá chënga tempo ndoñe monjántatšëmbo. ²⁰ Bëngbe Bëtsá šojichmó mo canya chabe cuenta oyebuambayacá, chë buayenánama entšángbeñe jóyebuambayama, y chca bétsamama, mora atše utamená séntsemna. Atšbiana Bëngbe Bëtsá šmochtseimpadana, atše chayobenama Cristbe buayenánama tondayama ntjatauajcá jóyebuambayana, ntšamo atše jamama šojtsemncá.

Pablo chënga jtadióšoftanama

²¹ Tíquico, Jesucristbeyeca bëngbe bonshana catsata y canye entšá tšabe palabra bomná, Bëngbe Utabnabe trabajo jamama oservéniñe, ntšamo atše stsemnama y ndayá stsamama tšëngaftanga chašmotsetatšëmbuama, lempe cmochanjácuntaye. ²² Chama cha tšëngaftangbioye sënjichmó, ntšamo muentše fstsemnama chacméyanama, y tšëngaftanga ainaniñe añemo chašmotsebonnama chaomama.

²³ Atše séntseimpadana Bëngbe Bëtsá chë Taitá y Bëngbe Utabná Jesucristo, chaboma chë Jesucristbeyeca catsátangbe ainaniñe tšabe ebionana chašmotsebonnama, y Bëngbe Bëtsábioye y ínýengbioye puerte chašmotsababuánýeshanama, Jesucristbeñe tšëngaftangbe ošbuachiyánaca; ²⁴ y chaboma, chë Bëngbe Utabná Jesucristbioye bëts bonshanánaca imobobonshanéngbeñe tšabe bendicionënga chaotsemnama, canye ndocná yondobena jatrócama bonshanánaca.

Filipenses

Jacheuayama

1 Pablo y Timoteo, Jesucristbiana oservénata, quem tsbuanácha fsèntsabiamná Filipos bëts puebloca Bëngbe Bëtsabe entsànga imomnënga, y Jesucristoftaca cânÿiñe mo canÿacá imomnëngbiana. Fsèntsabiamná nÿetsca chë Jesucristbeñe osbuáchiyëngbiana, nÿetsca chentša uanatsanéngaftaca y chë inÿe osbuáchiyënga ujabuáchaníne trabajayëngaftaca. ²Atše séntseimpadana Bëngbe Bëtsá Bëngbe Taitá y Bëngbe Utabná Jesucristo, chaboma tsëngaftangbeñe tsabe bendicionënga chaotsemnana, y chaboma tsëngaftanga ainaniñe tsabe ebionana chašmotsebmnama.

Pablo Bëngbe Bëtsábioye tbojtanchuá osbuáchiyëngbiana

³Cada tsëngaftangbiana stenojuabó ora, Bëngbe Bëtsá tsëngaftangbiana sëndbëtsatschuanaye; ⁴y Bëngbe Bëtsá tsëngaftangbe tsabiama stseimpadana ora, atše corente oyejuayá chca sëndbëtsama, ⁵ntšamo tsëngaftanga atše šmojuájabuachama, tsabe noticiënga Jesucristbiana entsànga abuayinayíne, tsëngaftanga Jesucristbeñe jtsošbuáchiyama šmonjanbojatsé orscana y méntscoñama. ⁶Atše corente séntsetatsëmbo, Bëngbe Bëtsá tojanbojatsé tsëngaftangbe ainaniñe tsabe soyënga jtsamama, y más tsabe soyënga yochtsamama. Y chca yochtsama, lempe ntšamo tsëngaftangbiana cha yojtsejuabnacá chaochnënguëntscuana, y chca, Cristo Jesús yochjésabëntscuana.

⁷Atše tsëngaftangbiana sempre ainaniñe sëndbëtsenojuabnaye, chíyeca atsbiana puerte tsabá entsemna chca tsëngaftangbiana jtsejuabnayana. Tsëngaftanga nÿetscanga atše šmonjuájabuache jamama chë Bëngbe Bëtsá tša tsabia bëtsemnayeca šonjanëntsabuaché trabajo. Atše chë Bëngbe Bëtsabe trabajo sëndbomna jamama, mora séntsétámena ora o natjëmbana shjoca stsana ora, nÿetscángbioye tsabá inÿinÿayíne chë tsabe noticiënga ndegombre soyënga bëtsemnana, y bëtscá amiñe entsànga chë soyënguiñe corente chamotsošbuáchema. ⁸Bëngbe Bëtsá yotátšëmbo ntšamo séntsichamcá ndegombre bëtsemnana. Atše tša séntseboše tsëngaftanga jányama y cbontsabuanÿeshana cachcá ntšamo Cristo Jesús atše šondbobonshancá. ⁹Atše, Bëngbe Bëtsá séntseimpadana tsëngaftanga cada te más cha chašmotsebobonshánama y chë inÿyengbioynaca, chca, osertánana chašmotsebmnama ndayá chë ndegombre soye bëtsemnana jtsetatsëmbuama, y chašmotsetatsëmbo ndayá tsabá o ndayá ndoñe tsabá tondmënana; ¹⁰y chca, chašmotsobena sempre jabocacayama chë puerte tsabá yojtsemna jamama soye. Chca, Cristo yochjésabo ora, tsëngaftanga puerte tsabe vida šmochántsebmna, bacna soyëngaca ndëmandánënga; y tondaye quešmochátama, chora chë entsànga chca ndoñe tsabá quenátsmëna ca chamuátichamuama. ¹¹Y lempe ntšamo chašmojtsamcá ndegombre tsabá echántsemna, y nÿe Jesucristo endobena jamama entsànga chca chamotsamama. Nÿetsca chë tsabe soyënga echántsemna, Bëngbe Bëtsá puerte bëtsá y uamaná bëtsemnana jinÿanÿiyama.

Atšbe vida endmëna Cristo jtseservënama

¹² Jesucristbeyeca atšbe catsátanga, atšbe séntseboše tšëngaftanga chašmotsetátšëmbo, ntšamo atšbe tijapasama, más bëtscá entsànga Jesucristbiana tšabe noticiënguine chamotsošbuáchema tojoservema. ¹³ Chca, nÿetsca chë romanëngbe mandadbe bëts yebna bojanÿá soldadënga y chë inÿe entsànga quem luarentšë montsetátšëmbo atšbe utamená stsemna, atšbe Cristbiana tstrabája causa. ¹⁴ Atšbe utamená séntsemnayeca, ošbuáchiyënguentšana banga ainaniñe más añemo montsebmna, y chíyeca chënga Bëngbe Bëtsabe palabra más y más añémoca y tondayama ntjatauatjca entsàngbioye montsabuayiná.

¹⁵ Ndegombre entsemna, báseftanga Cristbiana entsàngbioye imojtsabuayiná, pero chëngna nÿe ntšamo tijashjachcá šmojtsántšabošama chca, y chënga imojtseboše, bëtscá jtsamëse, atšbe chayotjáyanama; chíyeca chca imojtsama. Pero inÿengna, entsàngbioye montsabuayiná tšabe soyënga inÿengbiana jamama ndegombre imojtsebóseyeca. ¹⁶ Mënga chca montsama, atšbe šmondobonshánayeca y Bëngbe Bëtsá chë trabajo šojanëntšabuáchema mondétatšëmboyeca, Jesucristbiana tšabe noticiënga ndegombre bëtsemnana entsànga jtsinÿanÿayana; ¹⁷ pero chë inÿengna chca imojtsama, ndoñe tšabe soyënga inÿengbiana imojtsebóseyeca, ndoñe chënga chë inÿengbiana tšabe soyënga imojtsebóseyeca. Chënga Jesucristbiana imojtsoyebuambná nÿe entsànga chënga chamotsarrespetánama, y nÿe cachëngbiana tšabe soyënga jtsebomnana imojtsebóseyeca. Chënga jtsejuabnayana mochjobenaye

jamama atšbe más chašotsengménama ca, muentšë utamená chjëftsemnëntscuana, chënga entsàngbioye chca tmojtsabuatambá ora. ¹⁸ Pero ¿ndayase chë soye atšbiana? Masque ntšamnaca, tšabe soyënga inÿengbiana tmojtseboše o ndoñe, Cristbiana montsoyebuambná, y Cristbiana chënga montsoyebuambnama atšbe oyejuayá séntsemna.

Y cabá más chanjóyejuaye, ¹⁹ er atšbe séntsetatšëmbo quem utámenentšana atšbe chjësebocnama. Atšbe séntsetatšëmbo muentšana chjësebocnama, tšëngaftanga Bëngbe Bëtsá šmoimpadánayeca y Jesucristbe Uámana Espiritu šujabuachánayeca. ²⁰ Atšbe corente jtsošbuáchiyëse Bëngbe Bëtsábeñe sëndobátmana, atšbe ndocna te tondaye chanjëftsema y chama chjaisëuatjama, pero aínë nÿetscangbe delante becá añémoca chayoyebuambá, y nÿets tempo pero más mora, lempe ntšamo stsamama y stsihámuaama, atšbe chaima entsànga chaminÿanÿema Cristo puerta bëtsá y uamaná bëtsemnana, y chca chántsama masque ainá o obaná chaitsemnëse. ²¹ Chca entsemna, er atšbe vida Cristo jtseservënama endmëna, y nderado atšbe chajjóbanëse, nÿetscanga puerta bëts soye mochanjëftsashjache. ²² Pero atšbe ainá stsemnëse, chanjobenaye más uámana trabajo Cristbiana jëftsemama. Chíyeca, atšbe ndoñe corente quetsátstatšëmbo ntšamo mora jobuáyanana, ainá jtsemnana o ndoñe. ²³ Ndegombre mora puerta šontsëtëmnana ntšamo jobuáyanana: atšbe tša séndboše ndoñe más quem luarentšë ntjëftsemnana, Crístoftaca jtsatsmënama, y ndegombre chca atšbiana puerta tšabá nántsemna; ²⁴ pero, inÿoicana tšëngaftangbiana šontsemna ainá jëftsemnana. ²⁵ Atšbe corente séntsetatšëmbo

chca ndegombre yochtsemnama, y chíyeca séntsetatšēmo atše cabá ainá chjéftsemnama, tšēngaftanga jujabuáchama más Jesucristbeñe chašmotsošbuáchema, y chiñe bētscá oyejuayana chašmotsebmoma.

²⁶ Chca, atše tšēngaftanga jutsētsayama choye chajá ora, chašmobená inye soyama más Cristo Jesús jētschuayama.

²⁷ Morna, chē más uámana soye entsemna, tšēngaftanga chašmotsama ntšamo jtsiyenama ntšamo chē Cristbiana tšabe noticiēnguīne endayancá. Y mēntšá, cachcá, jutsētsayama chajá o ndoñe, atše chántsetatšēmo tšēngaftanga Jesucristbeñe ošbuáchiyama ndoñe šmotsajbanama, y aīñe becá osbuáchiyana chábeñe šmotsobomñama; nyetscanga cachcá šmojtsejuabnáyeca y nyetscanga cach soye šmojtsebóšeyeca, cányiñe nyetscanga enutanánēnga jtsenojuerzánese, ndocná chē tšabe noticiēnguīne tšēngaftanga šmobomna ošbuáchiyana chacmondábuajuanama.

²⁸ Tšēngaftangbe uayayēngbiana tondayama šmattsauatja, sempre bētscá añemo šmochtsebmoma. Chca tšēngaftanga šmochanjínyanīye chēnga pochocánēnga mochtsemnama, y tšēngaftangna atsebácanēnga šmochtsemnama. Y chē soye Bēngbe Bētsá tšēngaftangbiana echántsama, Cristbeñe šmošbuachéyeca. ²⁹ Chca echanjopása, er Bēngbe Bētsá tšēngaftangftaca puerte tšabia endmēna, Cristbiana oservénēnga Bēngbe Bētsá tcmojábiana, pero ndoñe nye chábeñe chašmotsošbuáchema, ndayá chabiana chašmosufrímnaca. ³⁰ Tšēngaftanga y atše cachca soyama montsenojuerzana. Tšēngaftanga ya šmonjinīye ntšamo atše sēnjánenojuerzana, entšanga jinīyanīyama chē tšabe noticiēnga ndegombre soyēnga bētsemnama. Y mora, tšēngaftanga noticiēnga

šmochanjýēngacñe ntšamo atše cach soyama cachcá stsamama.

**Ndoñe uámanēnga
šmattsenobiamnaye, ntšamo
Cristo ndoñe tonjanmcá**

2 Tšēngaftanga, Crístofaca cányiñe mo canyáca jtsemñese, ainaniñe bētscá añemo šmontsebmoma. Cristo cmondábabuanýeshana, y chē soye tšēngaftanga cmontséjabuachana nyetsca trabajēnguentšana tšabá jabocanama. Y tšēngaftanga Cristbe Espíroftaca cányiñe mo canyáca šmontsemna; tšēngaftanga nyetscanga šmondénbobonshana y nyetscangbiana jóngmiana šmonduamana. ² Tšēngaftanga lempe chca šmobómnyeca, atše corente oyejuayá šmojhábema, er tšēngaftanga nyetscanga cachcá cányiñe šmondējuabná, cachcá nyetscanga šmondénbobonshana, nyetscanga mo canye ainancá šmondobomna, y nyetscanga cachca soye šmondboše. ³ Tondaye šmattsama nye ínýenga chē sóyeca chamotjáyana, o nye tšēngaftanga tša bēts soyēnga amēnga šmomna ca entšanga chamotsejuabnama; pero ndoñe yapa uámanēnga šmojtsemna ca šmochtsejuabnaye, y cada ona chaotsejuabná chē ínýenga bēngbiana más uámanēnga imomnama. ⁴ Y ndocná tondaye chaondétsama, nye chabiana tšabe soyēnga jónýenama, sinó ndayánaca chaotsama nyetscangbiámncaca tšabe soyēnga jónýenama.

⁵ Tšēngaftanga cmontsamna jtsemnana ntšamo cach Cristo Jesús yojanjuabná y yojanamcá:

⁶ Cha nyets tempo yomna cach Bēngbe Bētsacá y uamaná cach Bēngbe Bētsacá, pero masque chca, ndocna te yonjanjuabná:

“Atše séntseboše nÿetsca entsanga nÿets tempo atše chašmotserrespetana, ntšamo atšbe Taitá Bëngbe Bëtsá mondërrespetancá ca.”

⁷ Pero cha mo nduamanacá tonjanóbema, nÿetsca chabe bomna soyënga jéftsebošjonëse, y ndegombre, mo canÿe oservenacá tojanóbema.

Cha canÿe entsacá tojanonÿná, y entsanga canÿe ndegombre entsacá tmojáninÿe.

⁸ Cachá tojanlesenciá nduamaná jtsemnana, y sempre Bëngbe Bëtsábioye ibnayeunana, y jobanámna, cruciñe jóbanëse.

⁹ Ndayá cha tonjanmama, Bëngbe Bëtsá, chë celoca más uámana luare tbojaninÿinÿé

y chë más uámana uabaina, chë más bët-sétsangbe uabainënguentša uabaina tbojabuajo;

¹⁰ y chca, celoca imomnënga, y quem luarentše y fshantse jashenoye imomnégnaca nÿetscanga chamóshamentšema,

Jesúsbioye jëtschuayama, chabe uámana uabaina jayanëse;

¹¹ y chca, nÿetscanga chamuayana Jesucristo chëngbe Utabná yomna ca, chca, Bëngbe Bëtsá chë Taitá nÿetscanga chamotsatschuanama.

**Cristbeñe ošbuáchiyënga
entsamna mo buashinÿinÿana
estrellëngá jtsemnana**

¹² Chcasna, atšbe bonshana catsátanga, ntšamo atše tšëngaftangaftaca sënjamna ora, atše sempre šmonjanëyeunancá, mora más šmochtsatënëyeunana, mora atše tšëngaftangbiamama bënoca stsemna ora. Bëtsétsanga ntjatenobiamnycá y Bëngbe Bëtsá jtserrespetanëse šmochtsama soyënga, chca, tšën-

gaftangbe tšabe videntše, Jesucristbeñe ošbuáchiyënga quetsomñecá, tondaye chacmondëtsabuáshebenama; ¹³ er Bëngbe Bëtsá nÿets tempo tšëngaftangbe ainaniñe inétsama tšëngaftanga ndayánaca chašmotsebošama y chašmotsamama, ntšamo cha yojuabná y yobošcá chaotsemnana.

¹⁴ Ndayánaca jamama chacmojt-séjaboto ora, chë soye šmochjama, chca jamama yapa totcá comna ca ntjatichamcá y ínÿëngaftaca jabuachana ntjatenatsëtsnycá. ¹⁵ Chca cmontsamna, chca, tšëngaftanga šmojtsama soyënguñe ndocná ndocna bacna soye chaondinÿenama, y puerte tšabe vida chašmotsebomnana. Bëngbe Bëtsabe puerte tšabe basengcá šmochtsiyena, tšëngaftanga chë šmojtsemnënga canÿe luarentše puerte bacna entsángbeñe y sempre bëtscá bacna soyënga jtsamana uamanëngbeñe. Chíyecna, tšëngaftanga šmochtsiyena puerte tšabe soyënga jtsamëse, y chca tšëngaftanga šmochántsemna mo canÿe ibetiñe luarentše buashinÿinÿana estrellëngcá. ¹⁶ Chë tšabe soyëngaca entsángbioye chauinÿanÿé ntšamo muanjobenaye tšabe vida jtsebomnana. Chca chašmojamëse, Cristo cachiñe yochjésabo ora, atše chantsobena tšëngaftangbeyeca puerte oyejuayá jtsemnana, er ntšamo chašmojamcá echanÿinÿanÿiye atše ndoñe nÿe bonamente jabuache tijatrabajá. Chca atše chántsemna mo nda bëtscá tojoprontá, y chentšana ínÿëngaftaca tojótjajo ora, chëngbioye tojtsayënjancá. ¹⁷ Mo chë altaroca canÿe bachna buiñe tojuabuashanacá, Bëngbe Bëtsá jëtschuayama tmojóba ovesháftaca, cachcá nderado echántsemna atšbe buiñe, atše šmojóbase, chca, Bëngbe Bëtsábioye oyejuayá jabemama. Tšëngaftanga bëtscá šmojalemošná, Cristbeñe tša

šmošbuachéyeca, y tšëngaftangbe ošbuachiyánëna endmëna Bëngbe Bëtsábioye oyejuayá jabemama. Chë uta soye echántsemna mo chë buiñe y chë oveshacá, Bëngbe Bëtsábioye oyejuayá jabemama. Atše chca stjobanëse, puerte oyejuayá stsemna, y stjama tšëngaftángnaca cachcá chašmotsóyejuama. ¹⁸ Chca, tšëngaftanga cmontsamna oyejuayënga jtsemnana, y šmochjama átsnaca oyejuayá tšëngaftangaftaca chaitsemnana.

Timoteo y Epafrodito

¹⁹ Atše becá ošbuachiyánaca Bëngbe Utabná Jesúsbeñe jtsobátmanëse, sëntsejuabná pronto chjobenaye Timoteo tšëngaftangbioye jíchmuama, tšëngaftangbiama chašuabocuéntama, y chca, atše más añemo chaitatsbomnana. ²⁰ Er ñe cha endmëna canya cach atšcá ainaniñe juabnayá, y cha ndegombre puerte entseboše tšëngaftanga tšabá chašmuetsiyenama; ²¹ chë ínÿengna ñyetscanga ñe cachëngbe tšabiama ndayánaca jamama jtsejuabnayana, y tondaye ntsebošana Jesucristbiama jamama. ²² Pero cach tšëngaftanga ya šmondétatšëmbo, ntšamo Timoteo chë padecena soyënguentšana tšabá tonjétsobocñama, y ntšamo Timoteo y atše, mo canye uaquiñá chabe taitábioye cuaftsajabuachancá, cánÿiñe fsëñjantrabája, más bëtscá entsanga chë tšabe noticiënga chamóyëngacñama. ²³ Chcasna, atše sëntsobátmana cha jíchmuana, ntšamo átseftaca jopásama chaitsetátšëmbo y cachora; ²⁴ pero bëtscá ošbuachiyánaca sëntsobatmánayeca, sëntsejuabná, Bëngbe Utabná chašojtábocnëse, pronto átsnaca chjobenaye choye jama.

²⁵ Atše sëntsejuabná yojtsemna, Jesucristbeyeca bëngbe catšata Epafrodít-naca choye jíchmuana, nda átseftaca

cánÿiñe endëtrabája y chë tšabe noticiënga ndegombre soyënga bëtsemnana jinÿanÿiyama endenojuerzana, nda tšëngaftanga šmojanichmó atše chašuabëuájabuachama. ²⁶ Cha chanjíchmuá; cha puerte entseboše tšëngaftanga jáñyama, y yapa ngménaca entsemna, cha šocá enjamnana šmojátatšëmbonama. ²⁷ Y ndegombre cha šocá enjamna, y enjétsinÿna mo jtsobanamá; pero Bëngbe Bëtsá tbonjalastemá, y ndoñe ñe chábioye sinó átsbioynaca, atše ndoñe más ngmenanënga chayátsbomnana, ntšamo mora sëntsebomnana. ²⁸ Chíyeca atše más sëntseboše cha pronto jíchmuana, as tšëngaftanga cha chašmojtinÿe ora, puerte oyejuayënga chašmotsemnana, y atše ndoñe yapa chašondët-sengmenama. ²⁹ Šmochjofja ñyets oyejuayánaca, Bëngbe Utabnábeyeca catšátanga quetsomñecá; y ñyets tempo chacá amëngbioye mo bëtsëtsangcá šmocht-sétabna, ³⁰ er batšatema más y matënjétsobana, Cristbiama trabajayinë uajabuachaniñe. Cha chë trabajo tonjanma atše juajabuáchama, ntšamo cach tšëngaftanga ndoñe chešmatanobenacá, atše juajabuáchama.

Ndayá Pablëbiama ndegombre corente yojanámana

3 Y morna, atšbe catšátanga, ndayá Bëngbe Utabná tojamama móyejuanga. Ndoñe bacá quešnatámama, ntšamo chë inÿe tsbuanáchañe tcbonjanëbuabiamcá cachcá cachiñe jtëtëyanama; y chë soye bëtscá cmochanjújabuache ndoñe resjuinë chašmondëtsemnana. ² Cuedado šmochtsebomna chë ndoñe tšabe entsangbiama, mo quešëngcá imomnënga, chë puerte bacna soyënga mondbëtsamënga, y entsangbe más delicadentse base bobachtema jatëtšana uamanënga; ³ er bënga mondmëna y ndoñe ínÿenga, chë ndegombre

uinŷnanánana bomnēnga, bēnga Bēngbe Bētsabe entšanguentšēnga bētsemnama, bēnga chē Uámana Espíritbe uajabuáchenanaca Bēngbe Bētsá mondadoránama, bēnga chē Cristo Jesúseftaca cánŷiñe mo canŷacá bētsemnama mondbétsoyejuama, y bēnga chē ntšamo ínŷenga monduamancá bēngbe cuerpiñe jamama tondayama yondoservénama mondbétsejuabnayama.

⁴Masque atše razón sēndētsóbonñe, ndayá atšbe cuerpiñe tmojanca ndegombre iuámanama jtsejuabnayama; nderado nda tojtsejuabná razón yojtsebomna chē soyēnga yoservena ca jtsejuabnayama, ndegombre atše chabiamama más razón chama stsóbonñe.

⁵Sēnjanonŷná y posufta tianoye base bobachtema chē más delicadentše šmojanťētše; atšbe nŷets uta bētsétsata Israeloca entšanguentšata bonjamna, y atšna Benjaminbe bēts pamillentšá sēndmēna; atšbe tempsca bēts taitanga nŷetscanga hebreunga imnamna. Atšna fariseo sēnjamna. Atše sēnjánama, lempe ntšamo judiēngbe leyēnguñe endayancá, ndayá jamama šojanmēncá.

⁶Atše tša sēnjánboše Bēngbe Bētsá jtse servénama, chíyeca Jesúsbeñe ošbuáchiyēnga bētsca sēnjanécamena; y ndayá canŷe entšá ibnētsemna jtsamama, Bēngbe Bētsabe bominiñe tšabia jtsemnama, judiēngbe ley jtsocumplínese, chama ndocná tondaye quenjátsbomna jayanama, atše ndoñe tšabá sēntsanama ca.

⁷Pero lempe chca ntšamo atše sēnjamnama y ndayá sēnjánamama, puerte sēnjanjuabná atšbiamama puerte yojanámana ca; pero mora, Cristo atšbe ainaniñe tonjámashēngoyeca, chē soyēnga atšbiamama ya ndoñe quenatámana. ⁸Y cabá más, tondaye atšbiamama quenatámana, chē bēts soye jtsonŷayēse, Cristo Jesús, Bēngbe

Utabná jtsabuatmana. Chábeyeca, lempe chē nŷe quem luarentša soyēnga sēnjéseboshjona, y lempe chē soyēnga atšbiamama tondayama quenátoservena; y chca entsemna, chē bēts soye jēftsashjáchama, Cristo jtsabuatmama, ⁹y cháftaca cánŷiñe mo canŷacá jtsemnama. Atše ya ndoñe quetsatsnguá Bēngbe Bētsabe bominiñe tšabia jtsemnama, nŷe ntšamo atše tijamama chē judiēngbe ley jtsocumplínese, pero Crístbeñe jtsošbuáchiyēse añe; Bēngbe Bētsá entsama atše chabe bominiñe tšabia chaitsemnama, atšbe bacna soyēngama jtseperdónase, y lempe chca entsemna atše Crístbeñe sēndošbuachéyeca. ¹⁰Atše sēntseboše ndayá cha jtsabuatmana, chē obanēnguentšana tojtananayenama cha tojaninŷanŷé obenana atše chaitsebomnama, atše cháftaca cánŷiñe mo canŷacá chaitsemna ora; y ntšamo bēnga játsebacama ora cach Cristo tojansufricá, átšnaca cachcá chaisufrima. Y cha tojanóbana orcá atše chaitsemnama; ¹¹y ntšámncaca, atše jēftsashjáchama Bēngbe Bētsá chaoma atše chaitayenama.

**Yejuana jtsentšēnese,
Bēngbe Bētsábicacana
uacanámana josháchiñama**

¹²Pero atše ndoñe quetsátichamo lempe chca ya tijashjache ca, o atše ndocna bacna soye ndamá y puerte tšabia Bēngbe Bētsabe bominiñe stsemna ca, pero sempre natsanoye sēntsá, mo nda canŷe luaroye jashjanguama cuaftsēchamancá; y puerte jtsošbuáchiyēse sēntsobátmana atše chjobenaye jtsemnama, chē ndayama Cristo šojanchembo, er Cristo Jesús ya tonjama atše chabiamama chaitsemnama. ¹³Atšbe catšátanga, atše ndoñe quetsátichamo chca ya tijashjache ca. Pero chama canŷe soye

séntsama: chë tempo atše sënjánbomna y sënjánama soyënga, mora lempe stëtsoye sënjaquedá, y bëtscá séntsama jobenayama chë jashjanguama yojtsemnoye jashjanguama, ¹⁴ chë ndémoca yojtsemna jashjanguama luaroye jobenayama jashjanguama, mo nda canye luaroye jashjanguama ndayánaca juácánama bëtscá jenojuérzase cuaftséchamancá. Cachcá, átsnaca séntá chë Bëngbe Bëtsá šojtsachembuana uacanánana josháchiñama, Cristo Jesúsbeyeca; y chë uacanánana entsemna chë nyetsca tescama yomna tšabe vida jtsebomnana.

¹⁵ Chca bënga šontsamna jtsejuabnayana, chë Jesucristbeñe puerte ošbuáchiyana y nyets tempo cha ústonënga; y nderado tšëngaftanga ndayíñnaca inyetsá šmojatsjuabná ora, Bëngbe Bëtsá chë sóynaca tšabá cmochanjínñanyie. ¹⁶ Pero morna šontsamna jtsiyenana ntšamo méntscóñama Bëngbe Bëtsabe soyëngama šojosertacá.

¹⁷ Jesucristbeyeca catsátanga, ntšamo atše sëndmencá tšëngaftanga šmochtsemna, y chë ntšamo jtsiyenama tcbonjaninñanyecá imojtsiyenëngbioye šmochtsénñyaye.

¹⁸ Ntšamo cbochanjauyancá, ya ba soye tcbonjáuyana y mora cachiñe chca chanjayana, pero chca jayanamna atše puerte ngménaca sëndbëtsemna. Banga mondmëna, y chënga ntšamo vida imojtsebomnana montsinñinñná, lempe ntšamo Cristo chë cruciñe jóbanëse bëngbiana iuayancá contra chënga imojtsemnana, ¹⁹ y chëngbioye nyetsca tescama infiernoca mochántsapochocaye. Chëngbiana chë más uámana soye yojtsemna jtsamana ntšamo cachënga tmojtsebošcá, nye cachëngbe cuerpiñe tšabá jtsomñama. Chënga nya mo bëts soye cuafjamcá jtsemnana chë soyënga tmojtsama ora,

pero ndegombre chënga entsamna cach soyëngama jtsëuatjama; y chënga sempre jësejuabnayana chë nye quem luarama enójuabnayëngbe soyëngama. ²⁰ Chë cuenta bëngna, ndegombre celocama entšanga mondmëna, y mora montsobátmana, chë luarocana chauabo bëngbe atsebacayá, Bëngbe Utabná Jesucristo. ²¹ Cha bëngbe cuerpënga, chë pronto jopochócama cuerpënga echanjátrocaye, jtsemnana mo chabe cuerpcá, chë obanënguentšana tojtayenabe cuerpcá; y cha chca echanjama, cha puerte obenana lempe jtsemándayama bómnyeyeca.

**Bëngbe Utabnáftaca cánñiñe
mo canñacá jtsemnëse
oyejuayana jtsebomnana**

4 Chcasna, Jesucristbeyeca atše catsátanga, Bëngbe Utabnábeñe ošbuáchiyana ntjajbanacá, y puerte chábeñe jtsošbuáchiyëse, cháftaca cánñiñe mo canñacá šmochtsemna. Corente cbondábabuanyëshana y tša séntseboše tšëngaftanga jánñyama. Tšëngaftangbeyeca atše puerte oyejuayá séntsemna, y atše corente sëndbëtsoyejuaye tšëngaftangbiana inñyëngbioye jáuyanama.

² Evodia séntseimpadana y Síntique-naca, chata chabuatenoeyunama, mo Bëngbe Utabnábeñe ošbuachiyata quetsomñecá. ³ Y ácnaca, nda puerte tšabá átseftaca tconjatrabajá, cbontseimpadana chama chë shembásata chacújabuachama, er chata bëtscá átseftaca tbonjatrabajá tšabe noticiënga entšanga abuayinñayíñe. Clemente y inñe entšanga átseftaca tmonjatrabajá cach soye amiñe. Nyetsca chëngbe uabaina entsábemana chë libréšañe, ndayentse yojtsábemana chë tšabe vida mochjónñyëngbe entšangbe uabaina.

⁴ Sempre oyejuayënga šmochtsemna, Bëngbe Utabnáftaca cánýiñe mo canýacá jtsemnëse, y cachiñe šcutétayana: ¡Móyejuanga! ⁵ Nýetscanga chamotsetátšëmbo, tšëngaftanga tšabe juabna bomnënga šmomnama. Bëngbe Utabná jésabama tempo ya entsobeco.

⁶ Tondayama šmattsenócochinýena, pero cada Bëngbe Bëtsáftaca chašmojtseñcuénta ora, ndayá cmojtšéjbotama cha šmochjaimpáda. Y chca chašmojtsama ora, chánaca šochtsatschuanaye. ⁷ Chca, Bëngbe Bëtsá echanjama chë chabe ainaniñe tšabe ebionana tšëngaftanga chašmotse-bomnama; chë tšabe ebionana puerte bëtscá endmëna, y bënga entsãnga quetsomñecá ndoñe ntsobenana chama jósertana; y chca tšabe ebionánaca, tšëngaftangbe juabnënguñe y ainaniñe tondayama quešmochátenocochinýena, er tšëngaftanga cánýiñe mo canýacá Cristo Jesúseftaca šmondmëna.

Lempe ntšamo tšabá yomncá soyëngama jtsejuabnayana

⁸ Cabana, atšbe catšátanga, lempe ntšamo ndegombre yomncá soyënguñe šmochtsejuabnaye, lempe chë respeto yomerecëniñe, nýetsca soyënguñe entsãngbe bominýiñe tšabá yomniñe, nýets tempo corente tšabá yomniñe, nýetsca soyënga entsãnga yogusetániñe, y lempe chë ndayama entsãnga tmojtsejuabná tša iuámana ca soyënguñe. Lempe chë tšabá yomna soyënguñe y jtsatschuanayama yomna soyënguñe šmochtsejuabnaye.

⁹ Sempre šmochtsama chë átsbentšana šmojuábouinýe soyënga, chë atšbiajana šmojóyëngacñe soyënga, chë atšë šmojoyeuná soyënga y ntšamo šmojinýcá atšë jtsamana. Chca šmochtsama y Bëngbe Bëtsá, chë bënga ainaniñe tšabe ebionana chamotsebomnama amá, tšëngaftangaftaca echántsemna.

Pablo tojtanacheuá tmojanájabuachama

¹⁰ Atšë corente sëndoyejuá Bëngbe Utabnáftaca cánýiñe mo canýacá tsmënama, er tšëngaftanga ba ishinýe chentšana, cachiñe šmojatobená atšë jatinýinýiyana ntsachetšá atšbe tšabiana tšëngaftangbiana iuámanana. Chca, atšë ndoñe quetsátichamo tšëngaftanga atšbiana cmojtsanebnétjomba ca, ndayá ntšamo tšëngaftanga tšabá šmojuabnacá atšë jinýinýiyama ndoñe yonjanopodena ca. ¹¹ Atšë chca, ndoñe quetsátichamo uajabotá stsemna ca, er atšë sënjuatsjinýe sempre oyejuayá jëftsemnana, nýe ndaye soyiñe masque batšatëmnaca stsebomnëse. ¹² Atšë sëndétatšëmbo ntšamo yomna jtsiyenana chë vida jtsebomnama uajaboto soyënga tojtsashbenëse, y ntšamo yomna jtsiyenana chë tcuajabótama más bëtscá jtsebomnëse. Atšë tijuatsjinýe oyejuayá jtsemnana masque nýe ndaye soyënguñnaca stsemna ora, jasama bëtscá stsebomna ora o masque nýe shëntseca jtsemnama šojtsemna ora, atšë jtsiyenama bëtscá soyënga stsebomnëse o masque ndóñnaca. ¹³ Atšë lempe chca sëndobena, atšë obenana jtsebomnama Cristo endbétsamayeca. ¹⁴ Masque chcasna, tšëngaftanga tšabá šmonjama, atšë padecena soyënguñe sënjamna ora atšë juajabuáchana.

¹⁵ Tšëngaftanga, chë Filipos pueblaca Jesucristbeñe ošbuáchiyënga, corente šmondétatšëmbo, Macedonia luarentšana sënjëftsanbocna ora, nýe tšëngaftanga atšë šmonjanájabuachama; inýe ošbuáchiyënga ndoñe. Chora enjamna atšbe bojatšena tempo tšëngaftangbe luarentšë chë tšabe noticiënga entsãnga abuayinayañe; y nýe tšëngaftanga atšë šmonjanájabuache. ¹⁶ Ba soye atšë Tesalónica pueblaca

sēnjamna ora, y chašmuájabuachama šonjanájaboto ora, tšēngaftanga atšbe opresidēngama crocénana šmonjanafja. ¹⁷ Chca ndoñe quenátayana atše tsjuabná n̄ye tšēngaftangbentsana ndayánaca jójēngacñana ca; chē sóyeca atše sēntseboše ndayá tšēngaftanga más tšabe soyēnga chašmotsamama, Bēngbe Bētsá tšēngaftangbiamama más chaotsóyejuama. ¹⁸ Er atše ya lempe sēnjóyēngacñe, y chē šuajabótama cabá más sēntsebošna. Atše chē ntšamo šjuajabotcá lempe sēntsebošna, chē tšēngaftanga Epafrodítóftaca šmonjanichmó soyēngaca. Ndayá atše šmojanichmocá, Bēngbe Bētsabe bominiñe puerte tšabá entsemna, mo juatšēmbonama ndayá tcojóba y altaroca tcojajuin̄yé y botamana tojtsonguētšecá, chora cha oyejuayá chca jójēngacñana. ¹⁹ Atšbe Bētsá, chabe bētscá uámana y bēts bomnánaca,

echanjama tšēngaftanga lempe ntšamo cmējabotcá Cristo Jesusbiajana chašmóyēngacñana. ²⁰ Entšanga n̄yets tempo chamotsin̄yan̄ná Bēngbe Bētsá y Bēngbe Taitá puerte uamaná bētsemnama. Chca chaotsemna.

Chēnga jtadióšoftanama

²¹ Atšbe cuenta, n̄yetscanga chē Jesucristbeyeca Bēngbe Bētsábenga imonnēnga šmochjácheuaye. Atšeftaca montsemna Jesucristbeyeca catšátangnaca cmontsacheuaná. ²² N̄yetscanga chē muentše Bēngbe Bētsábenga imonnēnga, y más chē romanēngbe mandadbe bēts yebnoca oyenēnga, cmontsacheuaná.

²³ Atše sēntseimpadana Bēngbe Utabná Jesucristo, chaoma tšēngaftangbeñe tšabe bendicionēnga chaotsemnama.

Colosenses

Jacheuayama

1 Atše Pablo, Jesucristbe ichmoná Běngbe Bětsá chca yobóseyeca, y Jesucristbeyeca běngbe catšata Timotéoftaca, ²quem tsbuanácha sěntsabiamná chě Colosas puebloca Běngbe Bětsábenga imomněngbiana. Tšěngaftanga běngcá Jesucristbeñe ošbuáchiyěnga šmondměna, y chca, Jesucristbeyeca běngbe catšátanga. Atše sěntseimpadana Běngbe Bětsá Běngbe Taitá, chaoma tšabe bendicioněnga tšěngaftangbeñe chaotsemnana, y chaoma tšěngaftangbe ainaniñe tšabe ebionana chašmotsebonnana.

Pablo, Běngbe Bětsábioye tbojanimpadá Colosas puebloca ošbuáchiyěngbiana

³Běngbe Bětsá, Běngbe Utabná Jesucristbe Taitá tšěngaftangbiana fstseimpadana ora, cha sempre fchandbětsatschuanaye, ⁴er běnga fsěnjátatsěmbona ntšamo tšěngaftanga Cristo Jesúsbeñe tša šmojtsošbuáchema, y ntšamo tšěngaftanga njętscanga chě Běngbe Bětsábenga imomněnga šmababuánjěshanama. ⁵Natsanama, chě ndegombre buayenánama, chě tšabe noticiěnga, tšěngaftanga tcmojanabuatambá ora, tšěngaftanga botamana šmojanuena ntšamo chě buayenániñe bejtsayancá, chě tšěngaftanga šmojtsobena tšabe soyama jobátmana, Běngbe Bětsábeñe jtsošbuáchiyěse. Chě šmontsobatmana soye entsama tšěngaftanga Jesucristbeñe puerte chašmotsošbuáchema y njętscanga chašmotsababuánjěshanama. Běngbe Bětsá celoca enduaquěcná chě tšěngaftanga šmojtsobatmana tšabe soye.

⁶Chě tšěngaftanga tcmojanabuayená tšabe noticiěnga más bětscá entsanga montsuenana; y chca, njęts quem luarentše entsanga montsiyena más tšabe soyěnga jtsaměse. Chca entsemna ntšamo tšěngaftangbentše tojopasacá, chě natsana te chě tšěngaftanga Běngbe Bětsabe tšabiánama šmojanuena orscana, y ntšamo Běngbe Bětsá puerte bonshanánaca y tšabiánaca běngbioye šuanjěnama ndegombre cmojanosérta orscana. ⁷Y chca Epafras tšěngaftanga tcmojanabuatambá, Běngbe Bětsabe bonshánama y tšabiánama. Epafras endměna canya běngaftaca Cristbiana oservená, y cha běnga fsěndbobonshana; cha Cristbiana endětrabája běngbe cuenta tšěngaftangbentše. ⁸Cha šonjáyana ntšamo chě Uámána Espíritu yojsama, njętscanga Jesucristbeñe ošbuachiyeñgbioye chašmotsababuánjěshanama.

⁹Lempe ntšamo tšěngaftangaftaca tojopasama, chě natsana te tšěngaftangbiana fsěnjajuena orscana y méntscoñama, Běngbe Bětsá sempre tšěngaftangbiana fchandbětseimpadana, cháftaca ftsencuěnta ora. Běngbe Bětsá fsěnděimpadana, chabe Espíritu chaoma tšěngaftanga chašmotsobena jtsetatsěmbuana y jtsosertánana, chca, ntšamo Běngbe Bětsá yobošcá chašmotsamama, tšěngaftanga tšabá chašmotsetatsěmbuama. ¹⁰Y chca, tšěngaftanga šmochantsobena jtsiyenana jtsaměse ntšamo Běngbe Utabná yobošcá, y sempre šmochántsama ntšamo chabiana tšabá yomncá. Ntšamo tšěngaftanga chašmojtsiyencá tšabe soyěnga jtsaměse, chentšana njętsca tšabe soyěnga echanjóbocna, y tšěngaftanga más tšabá Běngbe Bětsá šmochantsábuatma. ¹¹Atše, Běngbe Bětsá sěntseimpadana,

chabe puerte bĕtscá obenánaca cha chaoma tšĕngaftangbe ainaniĕ bĕts añemo chašmotsebomnama; y chca, tšĕngaftanga chĕ padecena soyĕnguiĕ chašmojtsemna ora, puerte uantadĕnga chašmotsemnama, y ainaniĕ añémoca Bĕngbe Bĕtsábeĕ becá chašmotsobátmanama. ¹²Y puerte oyejuayĕnga Bĕngbe Taitá šmochántsatschuanaye, nda iuama bĕnga chamotsobena ntšamo cha chabe entšanga jatšatayama tojašebuachenacá jtsebomnama. Tšĕngaftanga šmochanjóyĕngacĕ ntšamo cmojtsĕtocancá celoca, chĕ corente buashinjĕyana luarentšĕ. ¹³Bĕngbe Bĕtsá bĕnga šojatsebacá, Satanás, chĕ ibetiĕ luarentša mandayabe cucuatšĕntšana, y tojama chĕ chabe bonshana Uaquiĕabe amĕndayana bĕngbe ainaniĕ chamotsebomnama; ¹⁴chábeyeca Bĕngbe Bĕtsá Satanasbe cucuatšĕntšana šojatsebacá; o mĕntšá, chábeyeca Bĕngbe Bĕtsá bĕngbe bacna soyĕnga šojtsaperdoná.

**Cristo tojanóbanayeca,
entšanga Bĕngbe Bĕtsáftaca
tšabá jtsatsmĕnana**

¹⁵Cristo tmonjáninĕ ora, bĕnga tmojántatšĕmbona ntšamo Bĕngbe Bĕtsá yomnana; entšanga imojobena cha jinĕyama, pero Bĕngbe Bĕtsábioye ndoĕ. Cha, chĕ Bĕngbe Bĕtsabe Uaquiĕá, ya natsana yojtsemna lempe chĕ Bĕngbe Bĕtsá tojanma soyĕngama; y cha lempe chĕ soyĕngama más uamaná endmĕna. ¹⁶Chábeyeca Bĕngbe Bĕtsá tojama lempe ntšamo celoca y quem luarentšĕ yobinĕncá, lempe ntšamo chĕ entšanga imobena o ndoĕ mondobena jinĕyama soyĕnga, y chĕ espírítĕngnaca chĕ imobena ínĕyĕngbioye jtsamĕndayana y obenana imobomna. Bĕngbe Bĕtsá, chábeyeca y chabiana tojama, lempe ntšamo

quem luarentšĕ yobinĕncá. ¹⁷Bĕngbe Bĕtsá cabá nĕtsca soyĕnga ndama ora, Cristo ya yojtsemna; y chábeyeca mora yomna, lempe ntšamo quem luarentšĕ chaotsemnama yojamncá. ¹⁸Cha endmĕna nda nĕtscanga Bĕngbe Utabnábeĕ ošbuáchiyĕnga iuamĕnda, ntšamo chĕ bestšaĕ nĕtsca chĕ cuerpentša soyĕnga jtsemandayancá. Cha endmĕna nda iuama ošbuáchiyĕnga tsĕm tšabe vida chamotsebomnama, y cha endmĕna chĕ Bĕngbe Bĕtsabe más bĕts Uaquiĕá. Bĕngbe Bĕtsá tojanma, chĕ cachiĕ ainĕnga mochtsatsmĕnĕnguentšana, cha chĕ natsaná chaotsemnama; nĕ cha canĕa chĕ más uámama luare chaotsebomnama, nĕtscaĕ chaotsemándayama. ¹⁹Er Bĕngbe Bĕtsá yojanjuabná cachabiana tšabá yojamna, lempe ntšamo cha yomncá, chabe Uaquiĕábeĕnaca chaotsemnama, ²⁰y Bĕngbe Bĕtsá tojánbošena, Crístbeyeca nĕtsca soyĕnga quem luarentšĕ y celoca, cháftaca tempcá tšabá chaotsatsmĕnana. Bĕngbe Bĕtsá chĕ soye tojanma, chabe Uaquiĕá cruciĕ tojanóbana ora y chabe buiĕ tojanábuashana ora; y chca, Bĕngbe Bĕtsá tojanma nĕtsca soyĕnga quem luarentšĕ y celoca, cháftaca tempcá tšabá chaotsatsmĕnana.

²¹Tempo, tšĕngaftanga Bĕngbe Bĕtsá stĕtšoye šmojanquedá y chábioye uayayĕnga šmojamna, bacna soyĕnga šmojanjuabná y šmojánama causa; ²²pero mora chabe Uaquiĕáftaca, cha mo canĕ entšacá jóbanĕse, Bĕngbe Bĕtsá tojama tšĕngaftanga tempcá tšabá cháftaca chašmotsatsmĕnana; y chca tojama, tšĕngaftanga chabe delante nĕts tempo chašmotsemnama; chora tšĕngaftanga, chabe entšanga, ainaniĕ ndocna bacna soye ndbomnĕnga chašmotsemnama, y ndocná chaodayana ntšamo

šmojamcá ndoñe tšabá yontsemna ca.
²³ Pero tšëngaftanga cmontsamna chë
 bëtscá ošbuáchiyana šmondobmnana
 nyëts tempo jtsebomnana, Bëngbe
 Utabnábeñe jtsošbuáchiyama ndocna
 te ntjajbanacá. Nyëts tempo chë tšabe
 noticiënguñe šmochtsošbuáchiye, y
 ndoñe šmatjaleséncia ndocná tšëngaftangbe
 ošbuáchiyana chaotrocama; y
 nye chca puerte jtsošbuáchiyëse
 Bëngbe Bëtsábeñe šmochtsobátmana,
 ntšamo tšëngaftanga šmojanmcá,
 Jesucristbiamá buayenánama
 šmojanuena ora. Chë buayenánana
 endmëna ntšamo ba entšanga
 nyëtsca quem luarentša entšángbioye
 tmojabuayenacá, y atšbe trabajo
 endmëna cach tšabe noticiëngama
 entšanga jtsabuayiyayana.

**Pablo, ošbuáchiyënga jasérviamá
 trabajo tmojanbonjë**

²⁴ Atšë corente sënjesoyejua
 mora tšëngaftangbiamá jasúfriama
 stsobenama. Ba entšanga entsamna
 jasúfrianá Cristo jasérviamá, y atšë
 séntsesufrina ntšamo Cristo tojansufricá,
 mora atšë jtsesufrinëse chabe cuenta,
 ntšamo jasúfriama yomncá. Y ntšamo
 séntsesufrincá entsemna Crístbeñe
 ošbuáchiyëngbe tšabiamá, chë
 chabe cuerpchá imomnënga, chënga
 Crístbënga bëtsemnama. ²⁵ Bëngbe
 Bëtsá atšë šojábema chë Jesucrístbeñe
 ošbuáchiyëngbe canye ujabuachaná.
 Cachá chë trabajuama šojanábuayana,
 chca jamëse, tšëngaftangbe tšabiamá
 chaotsemnama. Chë trabajo endmëna,
 lempe ntšamo cha tojayancá entšanga
 jábuayenana. ²⁶ Bëngbe Bëtsá nyëtsca
 entšanga ndoñe tonjanalesenciá,
 quem luare jobojátšama orscana
 y nyëts tempo chë buayenánama
 chamotsetatšëmbuama; pero mora,
 chábënga imomnënga chë soye cha
 tojinñanyé. ²⁷ Bëngbe Bëtsá yoboše,

chabe entšanga imomnënga chamot-
 sábuatmama ndayá tempo chënga
 ndoñe tonjaninñanyécá; y yoboše
 chë ndoñe judiënga jinñanyiyama
 tša bëts y tšabe soye yomna chë
 ndegombre buayenánana, ndayá tempo
 inyënga ndoñe tonjaninñanyécá.
 Chë tempo ndoñe yonjanótatšëmbó
 buayenánana entsemna, Cristo
 tšëngaftangbe ainaniñe yojtsiyena,
 y chábeñe puerte jtsošbuáchiyëse
 šmojtsoyena jtsošbátmanana, Bëngbe
 Bëtsá puerte bëtsétsanga y uámanënga
 chácmbiamama, batšá ntšamo cachá
 yomncá. ²⁸ Bënga nyëtscángbioye
 Jesucristbiamá fchandbëtsabuayiyayana;
 fchandbëtsétsétsnaye ndayá chënga
 ndoñe yontsamna jtsamana, y fsënd-
 bëtsabuatambaye nyëts osertanánaca
 ndayá chënga aíñe yojtsamna jtsamana,
 y chca, nyëtscángbioye Bëngbe
 Bëtsabe delante junatsama, puerte
 ošbuáchiyënga y osertánënga Bëngbe
 Bëtsabe soyënguñe, chënga Crístoftaca
 cányiñe mo canyácá jtsemnëse.
²⁹ Chca chaotsemnama, atšë bëtscá
 sëndëtrabája; y chca séntšama, chë
 Cristo yojtsama atšë chaitsebomnama
 bëts obenánaca.

2 Atšë séntseboše tšëngaftanga
 chašmotsetatšëmbó, Bëngbe Bëtsá
 becá tsimpadánama, tšëngaftangbioye
 jujabuáchama, chë Laodicea
 puebloquënga Jesucrístbeñe
 ošbuáchiyënga y nyëtscanga chë ndocna
 te atšë šmonjinñe ošbuachiyëngnaca.
² Atšë chca sëndama, tšëngaftanga
 y chënga ainaniñe bëts añemo
 chašmotsebomnama, y cányiñe mo
 canyácá chašmotsemanama, nyëtscanga
 jtsenbobonshánëse. Chca, nyëts osertá-
 nana tšëngaftanga chašmotsebomnama,
 y chë tempo Bëngbe Bëtsá entšanga
 ndoñe tonjaninñanyé buayenánama
 chašmotsetatšëmbuama, y chë
 buayenánana Cristbe soye entsemna.

³ Mo canÿe bëtsá bomnana iytémëna soycá pero mora ya uínÿenana, cachcá Crístbeñe entsemna nÿets osertánana y obenana Bëngbe Bëtsá jtsabuutmama. Chë soye tempo Bëngbe Bëtsá entsànga ndoñe tonjaninÿanÿé, pero mora Cristo yoÿtsama bënga chë uámana soyënga chamotsebomnama. ⁴ Atše chca séntsichamo, botamana palabrëngaca ndocná chacmondáingñema. ⁵ Er masque choca tšëngaftangaftaca atše ndoñe quetsátmëna, atšbe ainana añe choca tšëngaftangaftaca entsemna; y atše puerte sëntsoyejuá tšëngaftanga šmatenÿeunanama y nÿets tempo Bëngbe Bëtsábeñe šmojtsošbuáchema.

**Crístoftaca cánÿiñe mo canÿacá
jtsemnëse, entsànga ndegombre
tšabe vida jtsebomnana**

⁶ Tšëngaftanga Jesucrístbeñe ošbuáchiyënga šmojanóbïama ora, šmojanayana: “Cristo Jesús, Bëngbe Utabná entsemna ca”. Chcasna, tšëngaftanga cmontsamna jtsiyenana soyënga jtsamëse mo chë cháftaca cánÿiñe mo canÿacá tojtsemnacá. ⁷ Chca šmontsobena jamana, cháftaca cánÿiñe mo canÿacá nÿets tempo jtsemnëse. Šmochtsiyena jtsamëse ntšamo cha tojabuatëmbacá y cada te más chca. Cabá más šmochtssošbuáchiye chë Crístbiama buayenana soyëngama, ntšamo tcmojabuatambacá; y Bëngbe Bëtsá sempre šmochtsatschuanaye.

⁸ Cuedado šmochtsebomna, ndoñe šmatjaleséncia ndocná chaondétsamama tšëngaftanga jtsajbanama Crístbeñe ošbuáchiyana jtsebomnana. Chca entsànga montseboše juabnéngaca tšëngaftanga jáingñama, nÿe básefta entsàngbe juabnënga y tondayama ndoservena juabnënga. Chë juabnënga jtsóbocanana ntšamo bëts taitanga básengbioye mondbetsabuátambayentšana y chë

espíritëngbentsána, ndëmuanyëngbiama entsànga jtsejuabnayana chënga nÿetsca soyënguñe imománda ca; pero Crístbentsána chë juabnënga ndoñe ntsóbocanana.

⁹ Cristo endmëna cachcá ntšamo Bëngbe Bëtsá yomncá, masque mo canÿe entsácá quem luarentše yoÿéftsiyena; ¹⁰ y Bëngbe Bëtsá tojama tšëngaftanga ndegombre tšabe vida chašmotsebomnama, Crístoftaca cánÿiñe mo canÿacá bëtsemnayeca; y Cristo, nÿetsca chë mándayënga y obenana bomnëngbiama más uamaná endmëna. ¹¹ Tšëngaftanga Crístoftaca cánÿiñe mo canÿacá bëtsemnayeca, mo uinÿnananëngcá šmontsemna, tšëngaftanga Bëngbe Bëtsabe entsànga šmomnana. Quem uinÿnanánana ndoñe quenátsmëna mo chë más delicadentše base bobachtema tmojatëtšcá, cach entsàngbeyeca ntšamo judiënga monduamancá, pero añe entsemna cach Cristo nda tcmojauinÿnaná; y chë uinÿnanánana entsemna, tšëngaftangbe ainantšana Cristo bacna juabnënga jabuajuánayana. ¹² Tšëngaftanga šmojánenabaye ora, enjamna mo ntšamo cach Cristo tmojanatbontsacá tšëngaftanga utebuantsánënga cuaftsemncá, er tšëngaftanga šmojanajbaná jtsamana chë tempo šmojánama bacna soyënga; y ntšamo Cristo cháuatayenama Bëngbe Bëtsá tojamcá, cachcá, tšëngaftanga šmojánenabaye ora, enjamna mo tšëngaftanga chašmatayenama Bëngbe Bëtsá cuafjamcá, er mora tšëngaftanga mo tsmëma entsàngcá šmondoyena. Chca tojanopasá, Bëngbe Bëtsá obená bëtsemnama tšëngaftanga šmojtsošbuáchema, y chë obenana tojama Cristo cháuatayenama.

¹³ Inÿe tempo tšëngaftanga Bëngbe Bëtsabiama mo obanëngcá šmojamna, yapa bacna soyënga jtsamama

šmojanamana causa y uinŷananánēnga mo Bēngbe Bētsabe entšangcá ndoñe šmonjámnyeca, pero aīne šmojanamana bacna soyēnga jtsamana nŷe ntšamo šmojanbošcá. Morna Bēngbe Bētsá tojama tšēngaftanga tšabe vida chašmotsebomnama, Crístoftaca cánŷiñe mo canŷacá jtsemnēse, y Bēngbe Bētsá bēngbe nŷetsca bacna soyēnga šojtsaperdoná. ¹⁴ Mo nda ba ndebénēnga tojtsabamna y chama tsbuanachangá tojtsamna y chiñe tojtsayana chēnga obligacónaca imojsemna chē ndebénana pronto jtobocana ca, pero chē entšá chēchangá tojtsandbiama chē entšanga cha ndoñe más chamondētsendebénama, Bēngbe Bētsá cachcá tojama, bacna soyēngama bēnga šojtsaperdoná ora. Jesús bēngbe bacna soyēngama cruciñe tojanóbana ora, enjamna mo Bēngbe Bētsá bēngbe ndebénana tojtsanpochocá cuenta. ¹⁵ Jesucristo cruciñe tojanóbanayeca, Bēngbe Bētsá tojanayēnjaná Satanás y chabe bacna espíritēnga obenana bomnēnga y ínŷēngbioye amēndayēnga; y nŷetsca entšangbe delante tojaninŷanŷé cha chēnga jtsamēndayama yobenama, mo canŷe reycá chē ínŷēnga tojayēnjaná ora, chabe entšangaftaca natsana jtsayana y chē ayēnjanánēngna ústonoye.

**Ainaniñe beca jtsebošana chē
ošbuáchiyēngbiama
celoca yomna soyēnga**

¹⁶ Ndoñe caso šmattsabiamnaye, ndoñe tšabá šmontsama ca ínŷēnga tšēngaftangbiama tmojtsichamo ora, ndayá tšēngaftanga šmētsesaye o šmētsofšēšnayama, o ndayá aīne o ndoñe šmondbētsamama Bēngbe Bētsá jadórama fiestēnga ora o shbojueta fiesta ora, o jóchnama tese. ¹⁷ Bayté entsemna, Bēngbe Bētsá

entšangbe cucuatšīne chē mandēnga tojánboshjona, chē soyēngama bēnga jabuátambama. Chē mandēngaca Bēngbe Bētsá yojaninŷanŷnaye ndayá más chcoye jopásama; entšángbioye yojaninŷanŷnaye ndayá Cristo yochjanmama. ¹⁸ Báseftanga mondmēna y chēnga mo nduamanēngcá entšángbeñe jtsebínŷnana, pero tsoye cachēnga corente uámanēnga jtsenobiamnayana y angelēnga jtsadórayana, mo Bēngbe Bētsá cuaftsemncá. Ndoñe caso šmattsabiamnaye, tšēngaftanga ndoñe tšabá šmontsama ca chēnga tmojtsichamo ora, ntšamo chēnga tmojtsichamcá tšēngaftanga ndoñe šmontsámayeca. Chēnga jtsichámuana bēts soyēnga mo otjenayoquécá tmojinŷe ca, y nŷe cachēnga puerte jtsenábotamnayana, pero chca chamotsamama razón ndoñe quemátsbomna, er nŷe ntšamo inŷe entšanga imnetsejuabnaycá chēngnaca cachcá jtsejuabnayana. ¹⁹ Chēnga Jesucristoftaca cánŷiñe ndoñe tmonjoquedanga, y Cristo endmēna chē nŷetsca ošbuáchiyēngbe amēndayá, mo chē bestšaše nŷets cuerpo jtsemandayancá. Canŷe cuerpiñe chē bestšaše jtsamana nŷets cuerpo chaóbochema, ntšamo Bēngbe Bētsá tojtsebošcá, chē cuerpo ndayá jasama chaotsebomnama jtsamēse, y nŷetsca chē cuerpentša soyēnga chamenefjnanama jtsamēse. Cachcá, Cristo jtsamana nŷetsca ošbuáchiyēnga cánŷiñe mo canŷacá cháftaca chamotsemnana, y cada te más tšabá cha chašmotsábuatmama. ²⁰ Cristo tojanóbana ora enjamna mo tšēngaftángnaca cuafjobancá, y Bēngbe Bētsá tšēngaftanga cmojatsebacá chē quem luarentše imománda espíritēngbe cucuatšentšana. As, ¿tšēngaftanga ndáyeca šmojtsiyena jtsamēse mo chē nŷe quem luarama enojuabnayēngcá?

¿Ndáyeca tšëngaftanga cabá šmobedecena chca mandënga, mo: ²¹“Chë soye ndoñe matsbanana, chca soye ndoñe catjase, o chë soye acbe cucuátšëca ndoñe catjaca ca?” ²²Lempe chë mandënga, chë ndayá canya ndoñe bontsemna jamana, nye soyëngama jtsayanana, y tempo tojochnëngo ora, chë soyënga jtsopochócana y chora tondaye ntsámanana. Chë mandënga jtsemnana nye ntšamo entsãnga mondbetsamcá y ínÿengbiöye mondbetsabatambaycá. ²³Ndegombre, ba entsãnga jtsejuabnayana chë mandënga tmojamëngbiama, puerte osertanánaca chca tmojama ca, pero ndegombre chca ndoñe quenátšmëna; er chënga jtsichámuana, ntšamo Bëngbe Bëtsá jadórana yomncá imojtsabatambá ca, jtsabuátambayana entsá cabnmëna uamaná ndoñe ntsenobiamnayana ca, y jabuache cachabe cuérpoca jtsamana ca. Pero chë mandënga tondaye ntsámanana, er chë mandënga entsãngbe ainanentsãna ndoñe ntjajuánana chë bacna soyënga jtsamama juabnënga.

3 Cristo cháuatayenama Bëngbe Bëtsá tojanma ora, enjamna mo tšëngaftángnaca Crístbeñe ošbuáchiyënga, chašmatayenama cha cuafjamcá. Chíyeca, tšëngaftangbe ainaniñe puerte šmochtseboše ndayá Bëngbe Bëtsá celoca tšëngaftangbiama yobomncá; y choca, Cristo uámana puestentšë endëtbemana, Bëngbe Bëtsabe catšbioica. Y šmochtsinÿinÿnaye chca šmojtsebošama, ntšamo jtsamëse mora šmojtšiyenama. ²Tšëngaftanga nÿets tempo chë celoca soyëngama šmochtsejuabnaye, ndoñe chë nye quem luarentšë yomna soyëngama. ³Tšëngaftanga Crístoftaca cánÿiñe mo canÿacá jtsemnëse, jtsemnana mo tšëngaftanga ya cuafjobancá, er mora ya ndoñe quešmátiyena tempcá

jtsamëse. Cristo, Bëngbe Bëtsáftaca cánÿiñe mo canÿacá endmëna, y Cristo endmëna nda mora tšëngaftangbe vida yojtšinyëna. ⁴Ndegombre, Cristo endmëna nda endama tšëngaftanga tšabe vida chašmotsebošnama; y quem luarentšë cha cachiñe chaojtonÿná ora, tšëngaftángnaca chentšë cháftaca šmochántsemna, y chora ntšamo Cristo corente uamaná y bëtsá yomnama Bëngbe Bëtsá yochjinÿanÿiyacá, tšëngaftangbiámncaca echanjínÿanÿiyeye más bëtsétsanga y uamanënga šmojtsemnana.

Tempscá vida y morsca vida

⁵Tšëngaftanga, ntšamo chë nye quem luarama enójuabnayënga mondbetsebošcá bošana lempe šmochtsajbaná. Ndocná chaondëtseboše ndaye bacna soye boyabása o shembásaftaca jtsamana, ni chca soyënguñe ndoñe chaondëtsejuabná; ndoñe chaondëtšiyena nye ínÿengbiama bacna juabnënga jtsebošnëse, y ndoñe chaondëtseboše nye bëtscá soyënga ínÿengbiama más jtsebošnama, er chca jtsamana jtsayanana, chabiama más yojtšámana soyënga jtsebošnana, Bëngbe Bëtsá jatsbobonshánama. ⁶Er entsãnga mondmëna y chënga chca soyënga jtsamama jtsebošana, y Bëngbe Bëtsá ndoñe ntseyëunanana. Chca entsãngaftaca Bëngbe Bëtsá puerte bochanjetna, y echanjamánda chë uabouana castigo chëngbeñe chaotsemnana. ⁷Y tempo, tšëngaftanga šmojanienya jtsamëse, sempre nye chca bacna juabnëngaca, ⁸pero mora tšëngaftanga cmontsamna lempe quem soyënga stëtšoye jaquédana: ínÿengaftaca jetnana, ínÿengaftaca rábiaca jtsemnana, ínÿabiöye ntšamo jáborlama jtsebošana, ínÿengbiöye joyánguanguana, y ndoñe tšabe palabrénga jtsóyebuambnayana.

⁹Ndoñe šmattsenbuambnaye, er ntšamo tempo šmojamncá mora tšéngaftanga ya ndoñe cachá quešmátsmëna, y mora ndoñe quešmátiyena jtsamëse ntšamo tempo šmojanamcá. ¹⁰Y mora tšéngaftanga šmojashjache jtsemnama mo tsmëma entšangcá, y ntšamo tempo šmojanamcá ndoñe cachá quešmátama. Bëngbe Bëtsá chca tsmëma entšangcá tcmojábiamia; y cha nyëts tempo yojtsama, tšéngaftanga cada te más ntšamo cha yomncá chašmotsemnama, chca, corente tšabá cha chašmuábuatmanama. ¹¹Chíyeca, ndayá Bëngbe Bëtsá tojamama, ndoñe judiënga y judiënga cachcanga mondmëna; chë más delicadentše base bobachtema tétšenënga ndoñe más uámanënga quemátsmëna chë ndoñe chca mondmënëngbiamia; chë inye luarëngocana áshjajnënga, bën tjoye oyenënga, chë nye ínÿabiamia nyëts tempo oservënënga y chë cachëngbiamia trabájayënga, nyëtscanga cachcanga mondmëna. Chë nye ndayá iuámana endmëna Cristbeñe jtsošbuáchiyana y nyëtsca ošbuáchiyëngbe ainaniñe cha yojtsemna jtsemándayama.

¹²Tšéngaftanga Bëngbe Bëtsábenga šmondmëna. Cha cmondábabuanÿeshana y tcmojabacacá chabe entšanga chašmotsemnama; chíyeca, tšéngaftanga cmontsamna ínÿenga jtsinÿanÿnayana nyëtscangbiamia jóngmiamia šmuamanama, tšabe juabna ínÿengbiamia sempre šmnétsebomnama, cada ona chë ínÿenga chabiamia más uámanënga cuaftsemncá inmétsejuabnayama, nyëtscanga puerte bonshanánaca šmnétšënÿayama, y nyëtsca padecena soyënguñe corente uantadënga šmomnama. ¹³Nyëtscanga šmochsenëuantana y šmochjenperdóna, nderado ntšamo nda ínÿabioye tbojaborlá y chama cha tbojtsatsëtsná ora. Ntšamo Bëngbe

Bëtsá tšéngaftanga tcmojaperdonacá, tšéngaftángnaca cachá ínÿenga šmochjáperdonaye. ¹⁴Lempe chë soyëngama más enduámana nyëtscanga jtisenbobonshánana. Nyëtscanga šmojtsenbobonshánëse, tšéngaftanga šmochantsobena sempre lempe chë inye soyënga corente tšabá jtsamana, ntšamo ndegombre chë soyënga jamama yomncá. ¹⁵Cristo endama tšéngaftangbe ainaniñe tšabe ebionana chašmotsebomnama. Chë tšéngaftangbe ainaniñe tšabe ebionánaca šmochtsiyena nyëtscanga natjémbana, Jesucristbeñe ošbuáchiyënga quetsomñecá. Bëngbe Bëtsá tcmojáchembo tšéngaftanga nyëtscanga cánÿiñe mo canÿe cuerpcá chašmotsemnama, y chca, natjémbana chašmotsiyenama. Bëngbe Bëtsá sempre šmochtsatschuanaye.

¹⁶Chë Cristbe puerte tšabe buayenana soyënga tšéngaftangbe ainaniñe nyëts tempo šmochtsambaye. Nyëts osertanánaca šmochtsenbuátëmbaye y šmochtsenbuayiyenaye. Nyëts ainánaca šmochjacánta chë Salmos libréšañe uabemana cantënga, chë Jesucristbe soyëngama cantënga, y chë Bëngbe Bëtsabe Espíritu iuama tšéngaftanga chašmotsobena jacántama soyënga; chca šmochjama Bëngbe Bëtsá jëtschuayama. ¹⁷Y lempe ntšamo chašmojtsama o chašmotsichamcá, Bëngbe Utabná Jesúsbeñe ošbuáchiyënga quetsomñecá chca šmochjama, siempre Bëngbe Bëtsá Bëngbe Taitábioye, chábeyeca jtsatschuanayëse.

Ntšamo ínÿengaftaca jtsiyenama

¹⁸Shémanga, šmochtsetátšëmbo tšéngaftangbe boyanga chë yebnentša mándayënga imomnama, y nyëts tempo chca jtsejuabnayëse šmochtsiyena, er tšéngaftanga Bëngbe Utabnábeñe ošbuáchiyënga quetsomñecá,

ndayá bēngaftaca yojsopasana, y cha chacmañémuayama. ⁹Cháftaca Onésimo echanjá, Jesucristbeyeca bēngbe bonshana catsáta; cha canýe tsábe palabra bomná endmēna, nda tsēngaftangbiocana tonjánabo. Chata tsēngaftanga cmochanjácuntaye lempe ntšamo muiñe yojsopasancá.

¹⁰Aristarco, muentše átšeftaca cárceloye utamená, cmontsacheuaná. Y Marcos, Bernabebe primo, chánaca cmontsacheuaná. Tsēngaftanga ya buayenánēnga šmontsemna ndayá jamama cmojsamnana, Marcos tsábá jofjama, cha tsēngaftanga jautsētsayama tojase. ¹¹Jesús, chē Justo cánaca uabainá, chánaca cmontsacheuaná. Quem pueblentša nýetsca judiēnga ošbuáchiyēnguentšana, nýe chē unga átšeftaca mondētrabája, Bēngbe Bētsabe amēndayana entšángbioye chaóshjanguama, y chēnga mondama atše ainaniñe bēts añemo chaitsebomnama. ¹²Epáfrasnaca cmontsacheuaná, inýe tsēngaftangbiocá y cha Cristo Jesusbiana jatrabájama endoservena. Cha nýets tempo tsēngaftangbiama Bēngbe Bētsábioye tša bochandbētseimpadana, tsēngaftanga Bēngbe Utabnábeñe ošbuáchiyana ndocna te chašmondájbanama, y nýets tempo chašmotsiyena lempe jtsamēse, ntšamo chē Jesucristbeñe corente ošbuáchiyēnga jtsiyenana yojsamncá; y chca, tsēngaftanga corente šmochántsetatšēmo ntšamo

šmojsamcá ndegombre yomna ntšamo Bēngbe Bētsá yobošcá. ¹³Cach atše sēnjinye y sēntsobena jayanama ntšamo cha jabuache yotrabájama, tsēngaftanga jujabuáchama, chē Laodicea puebloquēnga y Hierápolis puebloca oyenéngnaca. ¹⁴Lucas, bēngbe bonshana ashnayá, cmontsacheuaná; y Démasnaca.

¹⁵Chē Laodiceoca Jesucristbeyeca catsátanga bēngbe cuenta šmochjácheuaye. Ninfábioynaca šmochjachuaye, y nýetsca ošbuáchiyēnga chē Bēngbe Bētsá jētschuayama chabe yebnentše jénefnama imuamanéngnaca. ¹⁶Quem tsbuanácha chašmojualiá chentšana, Laodiceoca ošbuachiyéngbioye šmochjuíchmua, chócnaca mēcha chamualiamá; y tsēngaftángnaca šmochjualiá chē Laodiceoca ošbuachiyéngbioye tmonjanichmó tsbuanácha, chēcha tsēngaftangbioye chaojuáshjango ora.

¹⁷Arquipo šmochjauyana yejuana chaotsantješna chē Bēngbe Bētsá tbojabonýé trabajo sempre tsábá chaotsocumplínama.

¹⁸Atše Pablo, nýe quem palabrēnga tsēngaftanga jacheuayama cach atšbe cucuátšeca sēntsabiamná. Šmochtsenójuabnaye atše utamená stsemnama. Atše, Bēngbe Bētsá sēntseimpadana, cha chaoma tsábe bendicionēnga tsēngaftangbeñe chaotsemnama.

1 Tesalonicenses

Jacheuayama

1 Atše Pablo, Silvano y Timotéoftaca, quem tsbuanácha sentsabiamná tsëngaftangbiana, chë Tesalónica bëts pueblota Jesucristbeñe ošbuáchiyëngbiana, tsëngaftanga chë Bëngbe Bëtsá chë Taitá y Bëngbe Utabná Jesucristoftaca cányíne mo canyáca šmomnënga. Atše séntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnama, y tsëngaftanga ainaniñe tsabe ebionana chašmotsebmnama.

Pablo Bëngbe Bëtsábioye tbojtanchuá chë Tesalónica pueblentša entsangbe ošbuáchiyama

²Bënga sempre Bëngbe Bëtsá fsëndëtschuaná tsëngaftangbiana, y bënga cháftaca ftsencuénta ora, tsëngaftangbiana fchandbétseimpadana.

³Bënga, Bëngbe Bëtsá chë Taitáftaca ftsencuénta ora, fsëndbétsenojuabnaye ntšamo tsëngaftanga šmotrabájama, Jesucristbeñe ošbuáchiyana šmobómnyeca; ntšamo tsëngaftanga tša ínÿenga šmëjabuáchana, Jesucristo šmobobonshánayeca; y ntšamo tsëngaftanga, ndocna te ntjajbanacá, jtsošbuáchiyëse Bëngbe Utabná Jesucristbeñe šmobátmanama.

⁴Jesucristbeyeca catsátanga, bënga fsëndétatšëmbo Bëngbe Bëtsá cmababuánÿeshanama, y cha tcmojábacacama chábënga chašmotsemnama. ⁵Bënga chë tsabe noticiënga Jesucristbiana tcbonjanabuayená ora, ndoñe nÿe bënga jóyebuambayëse chca quenjatsmëna, ndayá chë Uámána Espiritbe obenanácna, y bënga corente jtsejuabnayëse

chë buayenánana ndegombre soye bétsemnama. Tsëngaftanga corente šmondétatšëmbo ntšamo bënga ftsjamna tsëngaftangftaca fsënjamna ora, tsabe soyënga tsëngaftangbiana nguayíne.

⁶Chora, ntšamo bënga fsënjamná y ntšamo Bëngbe Utabná enjaninyencá, tsëngaftanga šmonjanontsé amana; y chë buayenánana šmonjanóyëngacñe chë Uámána Espiritu tcmojanatšatá oyejuayánaca, masque ínÿenga tmojamna tsëngaftanga puerta chašmosufrima. ⁷Mëntšá, tsëngaftanga uánatsanënga šmonjanobiana ntšamo ndegombre jtseyenama, nÿetsca Macedonia y Acaya luarentša Jesucristbeñe ošbuáchiyëngbiana.

⁸Tsëngaftanga šmojoyebuambá Bëngbe Utabná Jesucristbe palabrama. Mora, ndoñe nÿe Macedonia y Acaya luarentše entsanga chama quemátstatšëmbo —nÿets luarenache entságnaca montsetátšëmbo ntšamo tsëngaftanga Bëngbe Bëtsábeñe šmojtsošbuáchema —y chca, bënga tondaye más quešnátë-jaboto tsëngaftangbiana jatichámuama.

⁹Cach entsanga montsoyebuambná chë bënga tcbonjánabuache ora tša tsabá tsëngaftanga šcojanébuajama. Chëngnaca montsichamo ntšamo tsëngaftanga šmojtsajbaná chë šmojanjuabná diosënga yojamna soyënga adórayana y šmojanontsé chë tsabe benache jtishachama, y chë Bëngbe Bëtsá ndegombrá y ainá jaserviama, ¹⁰y chca, chabe Uaquiñá Jesús jobátmama; mua celocana echanjésabo; chabiana Bëngbe Bëtsá tojanma obanënguentšana cháuatayenama, y cha šochanjátsebacaye chë uabouana castigüentšana, Bëngbe Bëtsá entsangbe bacna soyëngama chëngbiana yobomnentšana.

Ntšamo Pablo yojantrabája Tesalónica puebloca

2 Cach tšengaftanga, Jesucristbeyeca catšátanga, šmondétatšëmbo bēnga tčbonjánabuache ora ndoñe n̄ye bonamente quenjatsmēnama. ²Tšengaftanga šmondétatšëmbo, bēnga cabá tšengaftangbioye nda ora, Filiposoca šonjanēyánguango y bacá šonjánaborlama; y masque tšengaftangbioca bēngbe contra entšanga monjamna, Bēngbe Bētsá tonjanma bēnga fchayobená chē tšabe noticiēnga bētsca añémoca jabuátambama. ³Er bēnga entšangbioye bostero soyēnga ndoñe queftsjatanabuayiná, tšengaftangbiama bacna soyēnga ndoñe queftsjátanboše, y entšanga jáingñama ndoñe queftsjatanoyebuambná. ⁴Bēngna in̄yetsá; Bēngbe Bētsá yojanjuabná bēnga chabe trabajo jamama obenēnga ftsjamna ca, y chca, šonjanēbuáyana chabe tšabe noticiēnga entšanga jabuátambama, y chca bēnga fsēndoyebuambná; chíyeca bēnga ndoñe n̄ye entšangbe bominiñe tšabá chaotsin̄yama queftsátama, ndayá n̄ye Bēngbe Bētsabiama, nda chē ndayá bēngbe ainaniñe yomnama yotátšëmbo. ⁵Ntšamo tšengaftanga corente šmondétatšëmbcá, bēnga ndocna te tšengaftangbiama tšabe soyēnga tifjánayana, tšengaftanga bēngaftaca oyejuayēnga chašmotsemnama; y ntšamo tšengaftanga cbonjanētsētsnacá ndoñe quenjatsmēna n̄ye tšengaftangbentšana ba soyēnga bēngbiama josháchiñama. Bēngbe Bētsá chama yotátšëmbo. ⁶Ndocna te bēnga queftsatsnguá entšanga más uamanēngcá bēnga chašotsabi-amnama, ni tšengaftangbentšana, ni in̄yengbentšana.

⁷Masque bēnga, Cristbe ichmónēnga bētsemnama, matifjanobená tšēn-

gaftanga n̄ye sempre jtsaméndayana, bēnga ndoñe chca chibiátanma; bēnga corente jtsababuán̄yeshanēse cbonjánan̄yena, ntšamo can̄ye mamá chabe básēnga jtsabéchayana y corente bonshanánaca jtsan̄yēnana. ⁸Tša cbonjánababuan̄yeshanayeca, bēnga ndoñe n̄ye chē Bēngbe Bētsabe tšabe noticiēnga checbēnjatanabuayená, tšengaftanga chiñe chašmotsošbuáchemana ntšamo bēnga fsēndošbuachecá, ndayá bēngbe vidēnga jáshbiannaca fsēnjanprontana tšengaftangbe tšabiama. ¡Tša cbondábabuan̄yeshana! ⁹Jesucristbeyeca bēngbe catšátanga, tšengaftanga šmenabuoin̄yana ntšamo bēnga bētsca y jabuache fsēnjantrabajama, Bēngbe Bētsabe tšabe noticiēnga abuayin̄yayin̄e y bēngbe vida onguayin̄e, chca, tšengaftanga ndoñe chacmondétsamnama bēngbe uajabótama bēnga jatátšatnayama.

¹⁰Cach tšengaftanga šmondétatšëmbo y Bēngbe Bētsánaca, ntšamo bēnga ftsjamna tšengaftanga chē ošbuáchiyēngaftaca fsēnjamna ora; fsēnjaniyena ntšamo Bēngbe Bētsá tšabá tbojtsin̄yancá, n̄yetscángaftaca fsēnjánama ntšamo jamama šojanamncá, y ndocná quenátobena jatichámuana ntšamo fsēnjanamcá ndoñe tšabá yonjamna ca. ¹¹⁻¹²Tšengaftanga šmondétatšëmbo, bēnga bētsca jóyebuambayēse cada ona tšengaftanguentšá cbonjanéjabuachanama y cbonjánan̄emuama, ntšamo can̄ye taitá chabe básēngaftaca endbetsamcá. Bēnga bētsca cbonjanētsētsná ntšamo Bēngbe Bētsá tšabá tbojtsin̄yancá chašmotsiyenama; y Bēngbe Bētsá cmontsēbuájajana chabe améndayoye jamashēnguama y chabe obenana y buashin̄yinanana jin̄yama.

¹³Bēnga, Bēngbe Bētsabe tšabe soyēnga cbonjanabuayiná ora, ntšamo tčbonjanēyancá tšengaftanga

šmonjanuena y šmonsanošbuaché mo Bëngbe Bëtsábíocana buayenanancá, y ndoñe nÿe entsangbe oyebuambnayanancá. Y ndegombre Bëngbe Bëtsabe buayenánana endmëna, y chë palábraca, tsëngaftanga chë chábeñe ošbuachiyëngbeñe Bëngbe Bëtsá bëtscá soyënga yoÿtsama. Chama sempre Bëngbe Bëtsá fsëndëtschuaná.

¹⁴ Jesucristbeyeca catšátanga, cach tsëngaftangbe luarentša entsanga cmonjanëcamena ora y šmonjansufrina, šmonjanpasá ntšamo chë Judeoca Bëngbe Bëtsábeñe ošbuachiyëngcá enefjuanënga tmonjanpasacá, y chëngna Cristo Jesusbe entsanga mondmëna. Chënga tmonjansufrí cach luarentša entsanga, chë judiënga, chëngbiyoye monjanëcamena ora.

¹⁵ Chë judiëngbe bëts taitanga, Bëngbe Bëtsabe juabna oyebuambnayëngbiyoye tmoÿtsanëbaye, y ntšamo chëngbe bëts taitanga tmoÿjanmcá, chëngnaca Bëngbe Utabná Jesúsbiyoye tmoÿjanóba, y chënga mondamana bënga chaftsesufrínama. Chënga ndoñe tsábënga Bëngbe Bëtsabe bominyiñe quemátsmëna, y nyetsca entsangbe contra montsemna.

¹⁶ Chë ndoñe judiëngbiyoye, Bëngbe Bëtsá cháuatsebacama jábuayenama fstsebošë ora, chë judiënga bëtscá jtsamana bënga ndoñe fchandobenama chca jamama. Judiënga nyets tempo bacna soyënga monjánama; pero chë entsanga jábuayenama bënga ndoñe fchandobenama jtsamana, entsemna chë último bacna soye ntšamo chë judiënga jamama imoÿtsobencá, más ya ndoñe; y mora, cabana, Bëngbe Bëtsá ya puerte chëngaftaca tboÿetna y echanjácastigaye.

**Pablo tša yoÿánbošë, Tesalónica
pueblaca entsanga jányama**

¹⁷ Jesucristbeyeca catšátanga, bënga tsëngaftangbentšana baseftayté

jëftseboचना šonjanotocá ora, masque ndoñe choca tsëngaftangftaca queftsjátanmëna, sempre tsëngaftangbiama fsënjanenojuabná, y tša fsënjánbošë tsëngaftangbiyoye jtësana jautsëtsayama.

¹⁸ Bënga fsënjánbošë tsëngaftangbiyoye jësana; chíyeca cach atšë Pablo, ba soye sënjanóshenguënja jobenayama choye jësama, pero Satanás yoÿantrabája bënga ndoñe fchandobenama chca jamama.

¹⁹ Atšë séntsanbošë tsëngaftanga jautsëtsayama, er tsëngaftangbeyeca Bëngbe Utabná Jesusbe delante, cha yochjésabo ora, ntšamo tsëngaftanga šmoyenama, bënga puerte jtošbuáchiyëse fchantsobátmana, corente oyejuayënga fchtsemnana y más bëtsëtsanga fchtsemnana.

²⁰ Aíñe, ndegombre, ntšamo tsëngaftanga šmoyenama, bënga bëtscá añémoca ntšamo tsëngaftangbeñe tifjamama fsëndbëtsoyebuambnaye, y tša oyejuayënga fsëntsemna.

3 Chíyeca ya ndoñe chibiatanobená más jatobátmanana tsëngaftanga jautsëtsayama; as fsënjanjuabó nÿe bëndata Atenas bëts pueblentšë joquédana, ²y jíchmuana Jesucristbeyeca bëngbe catšata Timoteo, chë bëngaftaca trabajayá, Bëngbe Bëtsábiyoye oservëniñe, tsabe noticiënga Cristbiama entsanga abuayiyñayañe. Fsënjanichmó chacmañëmuayama y chaotsamama tsëngaftanga Jesucristbeñe más chašmotsóšbuáchemana; ³y chca, ndocná Jesucristbeñe ošbuáchiyana chaondáÿbanama, masque tsëngaftanga Jesúsbeñe ošbuáchiyënga bëtsemnana, ínÿënga imoÿtsama chašmotsesufrínama. Er cach tsëngaftanga šmondëtatšëmbo bënga šoÿtsamna chca quem luarentšë jëftsepadécënanana. ⁴Y cabá tsëngaftangftaca fsënjëftsemna ora, tcbonjanéyana bënga šojánamna jasúfriana; y ndegombre chca tonjopasá, ntšamo tsëngaftanga

ya šmondětatsëmbcá. ⁵As y chë tšëngaftangbiama jtsetatsëmbuama más jatobátmanana ndoñe quetstët-sobenayeca, sënjanjuabó šojétsemna Timoteo jíchmuana. Sënjanichmó atše jtsetatsëmbuama añe bëtscá o ndoñe tšëngaftangbe ošbuáchiyana Jesucristbeñe tayojamnana, er atše yapa sënjanjuabná nderado Satanás tojanma tšëngaftanga bacna soyënga chašmotsamama, y chca, bëngbe trabajo tondayama chaondëtsošservénama.

⁶Pero mora, Timoteo tšëngaftangbiocana tontashjango y tonjúshjango noticiënga, y bënga chama oyejuayënga fsëntsemna, ntšamo tšëngaftanga bëtscá Jesucristbeñe šmojtsošbuáchema y nyëtscanga šmenbobonshánama. Cha šonjacuntá ntšamo tšëngaftanga corente oyejuayënga bëngbiama šmuatenouabnama, y ntšamo tšëngaftanga tša šmojtseboše bënga jányama, cachcá ntšamo bënga tšëngaftanga jányama tša fsëntsebošcá. ⁷Quem sóyeca, Jesucristbeyeca catšátanga, y mora chë bënga nyëtscá chë padecena soyënga ftsëbomna ora y ínýenga bënga jasúfriama imojtsama ora, bëtš añemo fsëntsebomna, ntšamo tšëngaftanga tša Jesucristbeñe šmojtsošbuáchema jtsetatsëmbëse. ⁸Jtsetatsëmbuana tšëngaftanga sempre puerte tšabá Bëngbe Utabnáftaca šmoyenama, entsama bënga más añémoca chaftsiyenama. ⁹Mora fchantsobena Bëngbe Bëtšá jtsatschuanayana tšëngaftangbiama, y chë tšëngaftangbeyeca chabe delante bënga oyejuayana ftsbomnámnaca. ¹⁰Cada te, bnëté y ibeta, tša Bëngbe Bëtšá fsëndétseimpadana jobenayama tšëngaftanga jautsëtsayama chašualesenciama, Bëngbe Bëtšabe palabra tšabá chašmobedecema, chë buayenánana ntšamo yojtšashbencá jabuátambama.

¹¹Bënga, Bëngbe Bëtšá fsëntseimpadana, cachá y Bëngbe Utabná Jesús, chašújabuache bënga fchayobenama tšëngaftangbiocyte jama jautsëtsayama. ¹²Y Bëngbe Utabná chaoma más bëtscá chašmotsenbobonshánama, y cachcá corente nyëtscángaftaca, ntšamo bënga cbondababuanýeshancá. ¹³Chca, tšëngaftangbe ainaniñe bëtscá añemo šmochántsebomna; y Bëngbe Utabná Jesús cachábengaftaca chaójésabo ora, Bëngbe Bëtšá Bëngbe Taitabe delante ndocná chaundayana, ntšamo tšëngaftanga šmojamcá ndoñe tšabá yontsemna ca, er tšëngaftanga šmondmëna Bëngbe Bëtšábenga, nye cha jtseservénama.

Ntšamo jtsiyenama, Bëngbe Bëtšá oyejuayá chaotsemnama

4 Y mora inye palabra šmoch-jatspasencia. Jesucristbeyeca bëngbe catšátanga, tšëngaftanga bëngbentšana šmonjanatsjinýe ntšamo jtsiyenana cmojánamna, ntšamo Bëngbe Bëtšábioyte oyejuayá jabemama yomncá, y ndegombre chca tšëngaftanga šmondoyena. Y mora Bëngbe Utabná Jesusbe cuenta, cbontsaïmpadana y becá cbontsëtsëtsná más chca chašmotsamama.

²Tšëngaftanga šmondětatsëmbo ndayá tifjánayana ntšamo tšëngaftanga chašmotsiyenama, y chca fsënjanma Bëngbe Utabná Jesús chca jamama šonjanamëndáyeca. ³Bëngbe Bëtšá endboše tšëngaftanga chašmotsiyenama mo Bëngbe Bëtšabengcá, ndocná bacna soyënga boyabása o shembásaftaca chaondëtšamama, ⁴y nyëtscanga chamotsobena ntšamo canýe shema jonguanguana, chë ntšamo canýa Bëngbe Bëtšábia yomná jamama ibomncá, y ntšamo entšangbe bominýiñe tšabá yomncá, ⁵y ndoñe chabondónguango nye cháftaca

bacna soyënga chëngbe cuérpoca jamama, ntšamo chë Bëngbe Bëtsábioye nduabuátmënga mondbetsamcá.

⁶Chë palabriñe ndocná chabe catsátbioye chabondëingñé, chë catsatbe shémaftaca bacna soye jamëse, er chca amëngbioye Bëngbe Utabná corente echanjácastigaye. Chíyeca bënga ya bëtscá chama tcbonjabuayená. ⁷Er Bëngbe Bëtsá ndoñe šonjánachembo bacna soyënga boyabása o shembásaftaca jtsamama, ndayá ntšamo tšabá yomncá jtsamama, ntšamo chabe entšanga mondbetsamcá. ⁸Mëntšá, nda quem buatëmbana soyënga tojtsábotena, cha ndoñe nÿe entšanga jtsëbátenana, ndayá Bëngbe Bëtsábioye, nda tšëngaftangbe ainaniñe Uámana Espíritu cháuumashënguama tojama.

⁹Atše ndoñe quešnátsmëna juabuábiamana ntšamo cmojtsamna ínÿenga Jesucristbeñe ošbuáchiyënga jtsababuánÿeshanama, er cach Bëngbe Bëtsá tcmonjabuatambá nÿetscanga chašmotsenbobonshánama. ¹⁰Y ndegombre, tšëngaftanga chca šmondama nÿetsca Macedonia luarentše Jesucristbeñe ošbuáchiyëngaftaca. Pero cbontsaimpadana, Jesucristbeñe catsátanga, más chca chašmotsamama.

¹¹Nÿa sempre quem soyënguñe šmochtsentšëna: natjëmbana jtsiyenana, ínÿengbe soyënguñe ndoñe ntson-tremeténana, y ndoñe ntjatobátmanana nÿe ínÿenga tšëngaftangbiama chamotsetrabájama, ntšamo tcbonjanëyancá tšëngaftangftaca fsëñjamna ora; ¹²chca šmochtsama, chë ínÿenga Jesucristbeñe ndošbuáchiyënga chacmotsarrespetánama, y ndocnábeñe ntjatobatmancá šmochantsobena jtsiyenana.

Bëngbe Utabná quem luaroye yochjésabo ora

¹³Bëngbe catsátanga, bënga fsëntseboše tšëngaftanga ndegombre chašmotsetátšëmbo ntšamo chë obanëngaftaca yochjopásama, y chca, tšëngaftanga ndoñe ngmenánaca chašmondëtsemnoma, mo chë inÿengcá, chë tcojóbantšana ndoñe yontsemna jtayenama ca juabnayëngcá. ¹⁴Bënga fsëndošbuaché Jesús tojanóbana y tojtanyenama, y cachcá bënga fsëndošbuaché chë tmojóbanënga y Jesúsbeñe tmojtsošbuachese, Bëngbe Bëtsá chëngbiama yochjama chë nÿetsca tescama yomna tšabe vida Jesucristoftaca chamotsebomnama, y quem luaroye cháftaca chamuatábama.

¹⁵Chë soyama bënga cbontsëtsëtsná ntšamo cach Bëngbe Utabná tojëftsananabatambacá: Bëngbe Utabná chaojésabo ora, chë ošbuáchiyënga chë te cabá ainënga chamojtsemnënga, chábioye ndoñe quemochátinÿena tsbanánoca, más natsana chë ya obanënga chë te mochtayenëngbiama.

¹⁶Er entšanga mochanjouena canÿe mando juayebuáchenana, chë angelëngbe amëndayabe oyebuambnayana y chë Bëngbe Bëtsabe trompetëfjua juajatëtámna, y chora cach Bëngbe Utabná celocana echanjástjango. Y chë tmojóbanënga, Crístbeñe imojanošbuachenga, natsana mochántayena; ¹⁷chentsana, chë ainënga chamojtsemnënga chëngaftaca cánÿiñe Bëngbe Bëtsá šochanjúyamba, Bëngbe Utabná yochtsemnoca jash-janguama, chë celoca jantšëtëshënga endmënoca; as chentsana nÿetsca tescama cháftaca bënga mochántsemna. ¹⁸Quem palabréngaca nÿetscanga ndoñe más ngménana ainaniñe chašmondëtsebomna.

5 Jesucristbeyeca catsátanga, ndoñe quenátsiyta atse jubuábiamana mocna ora chë soyënga yochjopásama. ²Cach tsëngaftanga corente šmondétatšëmbo, Bëngbe Utabná yochjésabo chama ndocná chaondétsejuabná ora, mo canye atbëbanacá jashjanguana ibeta ndocná chama tonjatsjuabná ora. ³Entšanga chamojayana: “Lempe tsábá endëtsomñe y tondayama quešnátamna játuatjana ca”, chora nye ndeolpe chë entsangbiana tša jasúfriama echanjóshjango, mo canye shembása šešona jtsebmnama ora nye ndeolpe jasúfriama jóntšancá; y ndegombre, entsanga chca jasúfriama quemochatotsbocá. ⁴Pero tsëngaftanga catsátanga, ndoñe quešmátiyena mo ibetiñcá, bacna soyënga jtsejuabnayëse y jtsamëse; y chca, Bëngbe Utabná chaojésabo ora, tsëngaftanga ndoñe auatjanánënga quešmochátsmëna, mo ndábioye canye atbëbaná tbojotbá ora, chábioye cuaftsauatjanacá. ⁵Nyetsca tsëngaftanga šmondmëna entsangbe juabna binñayabe básenga, y mo binñiniñcá šmondoyena. Bënga ndoñe chë ibetiñe mandayabe básenga quemuátsmëna, y mo ibetiñcá ndoñe quemuátiyena; ⁶chíyeca bënga ndoñe quešnátamna jtsemnana mo chë cachëngbe cuerpo jenomándama ndobenëngcá, chë mo cuaftsemangcá oyenënga. Pero añe šontsamna mo chë fšnëngcá jtseyenana, bëngbe cuerpo jtsemándayëse y nyets tempo jtseprontánëse. ⁷Ibeta ora entsanga jtsemangana, y cach ibeta tojtsemna ora entsanga jotmenangana; ⁸pero bënga, chë binñentšëngna, šontsamna sempre bëngbe cuerpo jtsemándayana. Šontsamna Bëngbe Bëtsábeñe jtsošbuáchiyana y cha jtsebobonshánana, chë uayaná Satanasbiana jenéuyanama y cha jayénjanama, mo canye soldadcá, canye

morocho soye cochaca jenácochjatsana jtsevalentiana y ndoñe chamondëyëñjanama. Y chë castigüentsana Bëngbe Bëtsá šochjátsebacamnaca puerte jtsošbuáchiyëse jtsobátmanana; y chca, bënga mochántsemna mo canye soldadcá, cha canye casquëse juabuchëtsana jenéuyanama. ⁹Er Bëngbe Bëtsá ndoñe šonjáchembo bënga chašotsamnama chë nyetsca tescama castigo jtsebmnama. Ndayá Bëngbe Bëtsá šojabacacá, Bëngbe Utabná Jesucristbeyeca bënga chamótsbocama. ¹⁰Cha bëngbiana tojanóbana, bënga cháftaca cányiñe jtseyenama chamotsobenama, masque ainënga o obanënga chamojtsemnëse, cha chaojésabo ora. ¹¹Chíyeca, nyetscanga šmochtsenañémuaye y šmochtsenájabuachana más jtsošbuáchiyama, ntšamo tsëngaftanga mora ya šmontsamcá.

Pablo choca ošbuáchiyënga jábuayenama

¹²Jesucristbeyeca catsátanga, cbontsaïmpadana chašmotsar-respetana chë Bëngbe Bëtsabiana tsëngaftangbeñe trabajayëngbiyey, y chë Bëngbe Utabná tsëngaftanguentše tojábacacanga uánatsanënga chamotsemnana y ntšamo jtseyenama cmojtsamnama chácmbuayenama. ¹³Cmontsamna chënga jtsarrespetánana y jtsababuánjeshanana, ndaye trabajo chënga imojtsamama. Natjëmbana nyetscángaftaca šmochtsiyena.

¹⁴Quem soyënga chašmotsamánaca cbontsaïmpadana: jatrabájama ndoñe tmontsebošëngbiyey šmochjucá-cana, añemo ndbomnéngbiyey šmochjáñémuaye, bëtscá ošbuáchiyana ndbomnéngbiyey šmochjújabuache, y uantadënga nyetscángaftaca šmochtsemna.

¹⁵ Cuedado šmochtsebmna, nderado nda bacna soye tbojaborlase, ndocná ndoñe cachcá chabondétachnënguama. Masna, nÿe šmochtsentsëna nÿets tempo tšabe soyënga jtsamama cach tšëngaftanguentšëngaftaca y nÿetsca entšangaftácnaca.

¹⁶ Nÿets tempo oyejuayënga chašmotsemna. ¹⁷ Sempre Bëngbe Bëtsáftaca šmochtsencuëntaye. ¹⁸ Nÿetsca soyënguinië Bëngbe Bëtsá šmochtsatschuanaye; er chca entsemna ndayá cha yojtseboše, bënga Cristo Jesúsbeñe osbuachiyëncá chamotsamama.

¹⁹ Ndoñe šmattsama ntšamo chë Uámana Espiritu tšëngaftangbeñe yojtsamcá chaotsopochocama. ²⁰ Ndoñe šmattsábotena chë Bëngbe Bëtsabe juabna oyebuambnayëngbe buayenana soye. ²¹ Yeuana šmochjajúaboje y šmochjayana, chë Bëngbe Bëtsabe juabna oyebuambnayá yomna ca tojtsichamuabe buayenánama ndegombre Bëngbe Bëtsábiocana tayóbocanama, y chentša tšabe soyënga šmochjobuajo y sempre chca šmochtsama. ²² Nÿetsca bacna soyënguentsana šmochtojuánañe.

²³ Cach Bëngbe Bëtsá, chë bëngbe ainaniñe tšabe ebionana chamotsebmnama endamá, nÿetsca

soyiñe tšábenga chacá chacmabiamana, y nÿets tšëngaftangbe espíritu, ainana y cuerpo chaotsinÿena, Bëngbe Utabná Jesucristo chaojésabo orscama; y chora, ntšamo tšëngaftanga šmojamama bacna soyënga yojtsemna ca ndocná chaondayanama. ²⁴ Nda tcmojúbuaja chábenga chašmotsemnama, cha sempre jtsamana ntšamo tojayancá, y lempe cha echanjama.

Inÿe rueguënga chëngbiamana y jtadiósoftanama

²⁵ Jesucristbeyeca catšátanga, Diosmanda, bëngbiámnaca Bëngbe Bëtsá šmochtseimpadana.

²⁶ Nÿetscángbioje mo Jesucristbeyeca catšatangcá šmochjácheuaye, jtenámochëse, ntšamo cach tšëngaftangbe pamíllanga puerte bonshanánaca šmondbetsacheuanaycá.

²⁷ Cbontsaménda quem tsbuanácha nÿetsca Jesucristbeñe ošbuáchiyënga chašmëbuáliama, y chca séntsama, Bëngbe Utabná chca jamama šoanmandáyeca.

²⁸ Atše séntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

2 Tesalonicenses

Jacheuayama

1 Atše Pablo, Silvano y Timotéofaca, quem tsbuanácha sentsabiamná tsëngaftangbiama, chë Tesalónica bëts puebloca Jesucristbeñe ošbuáchiyëngbiama, tsëngaftanga Bëngbe Bëtsá chë Taitá y Bëngbe Utabná Jesucristofaca cánýiñe mo canýacá šmommënga. ²Atše sëntseimpadana Bëngbe Bëtsá, chaoma tsabe bendicionënga tsëngaftangbeñe chaotsemnana, y tsëngaftangbe ainaniñe tsabe ebionana chašmotseboamna.

Cristo chaojésabo ora, ntšamo entšanga tmojamama Bëngbe Bëtsá echanjajana

³Jesucristbeyeca bëngbe catsátanga, šontsamna nyets tempo Bëngbe Bëtsá tsëngaftangbiama jtsatschuanayana, ntšamo tsëngaftangbiama jamama šojtsëtocancá, er tsëngaftanga cada te más ošbuáchiyana šmontseboamna, y ntšamo tsëngaftanga nyetscanga šmojtsenbobonshana, tempscama más yojtsemna. ⁴Tsëngaftangbe osbuáchiyama y bonshánama, bënga nyets tempo oyejuayënga fchandbëtsemna, chë ínÿenache Bëngbe Bëtsábeñe ošbuachiyëngcá enefjuanëngbeñe tsëngaftangbiama jóyebuambayama. Bënga fchandbëtsoyebuambnaye ntšamo tsëngaftanga inÿetšá ntjatsjuabnaycá Jesucristo šmëstonama, y ntšamo tsëngaftanga chábeñe tša šmošbuachémnaca, masque ínÿenga tša cmécamena y chašmosufrima bëtscá imojtsama, tsëngaftanga Jesucristbeñe ošbuáchiyënga bëtsemnana. ⁵Tsëngaftanga chca Cristo šmëstonayeca, corente entsinÿinÿena Bëngbe Bëtsá nyetsca

soyënguñe tsábá amá yomnama, y entšanga ntšamo tmojamama tsábá o ndoñe tsábá bëtsemnana jayanama ora, cha chca echanjayana ntšamo entšanga tmojtsomerecencá. Y chca entsayana tsëngaftanga aíñe merecido šmotsobuájoñe chabe amëndayoye jamashënguama ca; y mora, tsëngaftanga choye jobenayama jashjanguama šmojtsamama, ínÿenga imojtsama chašmotsesufrinana.

⁶Bëngbe Bëtsá echanjama ntšamo jamama ibomncá; echanjama chë tsëngaftanga chašmosufrima imojtsamënga bëtscá chamosufrima; ⁷y echanjama tsëngaftanga y bënga chë mondësuftrinëngbiama, ndoñe más chamondëtsesufrinana. Cha quem soyënga echanjama, Bëngbe Utabná celoca chaojábobocna ora. Cha chabe puerte obenana bomna angelëngaftaca echanjabo, y chora bëtscá inëtsënga echántsemna. ⁸Cha echanjabo chë Bëngbe Bëtsábioye jtsabuatmama ndoñe montsebošënga jabácastigayama, y chë tsabe noticiënga Bëngbe Utabná Jesusbiana ndoñe montsuananëngbioynaca. ⁹Chënga Bëngbe Bëtsá echanjácastigaye, nyetsca tescama jtsapochócase; y Bëngbe Utabná bëntšana bënoca mochantsemnënga, y ndocna te quemochatobenaye jinÿama Bëngbe Utabná tša bëtsá y obená bëtsemnana. ¹⁰Quem puerte uamana te, Bëngbe Utabná chaojésabo ora, nyetsca chabe entšanga, nyetsca chábeñe osbuáchiyënga cha mochántatschuanaye y mochántichamo: “¡Tša obená cha yomna ca!” Y tsëngaftanga chëngaftaca šmochántsemna, er tsëngaftanga šmontsanosbuaché bënga ndegombre fsënjántatšëmbo soyënguñe, chë bënga tcbonjanabuayená soyënguñe.

¹¹Chíyeca, chca chaotsemnana, nyets tempo Bëngbe Bëtsábioye

tšëngaftangbiana fsëndëimpadana mercedo bomnënga chácmabiamama, chë vida chašmotsebomnama, ndayama cha tcmojúbuaja, y chabe obenánaca bëtscá chaoma tšëngaftanga chašmobená nÿetsca tšabe soyënga ntšamo šmojtsejuabnacá jamama, y chašmobená jamama ndaye soyënga ntšamo šmojtsamcá, Jesucristbeñe šmojtsošbuáchemá. ¹²Chca jtsamëse, tšëngaftanga šmochanjínÿanÿiye Bëngbe Utabná puerte bëtšá y uamaná bëtsemnama, y cha echanjama tšëngaftanga más uámanënga chašmotsemnama. Chca echanjopása, er Bëngbe Bëtšá y Bëngbe Utabná Jesucristo tšëngaftangbiana tšabe juabna ibobomna.

Chë Bëngbe Bëtšabe contra yomná

2¹⁻²Mora atšë séntseboše Bëngbe Utabná Jesucristo jésabama orscama jáuyanama, chë bënga cháftaca tsbanánoca jteninÿenama ora. Básefta entšanga imojtsichamo chë bëtš uámana te, chë Bëngbe Utabná jésabama te, ya tojóshjango ca; pero cbontsaimpadana, Jesucristbeyeca catšátanga, bëtscá šmochtsentšëna chënga ndoñe chamondobená jamana tšëngaftanga inÿetšá juabna tšëngaftangbe ainaniñe chašmátsbomnama. Ndoñe šmatjóyeunaye nderado nda mëntšá chacmojtšëtsësná ora: “Canÿe Bëngbe Bëtšabe juabna oyebuambnayá šonjáuyana chë Bëngbe Bëtšabe uámana te ya tojóshjango ca” o “canÿa chca šonjabuayená ca” o “Páblëbiocana tsbuanácha fsenjushache y chiñe entsayana chë te ya tojóshjango ca”. ³Bëtscá šmochtsentšëna ndocná tondáyeca chacmondáingñema. Er chë Bëngbe Utabnabe uámana te cabá ndóshjango ora, mallajta entšanga Bëngbe Bëtšabe amëndayama contra mochántsemna, y chë Bëngbe Bëtšabe

contra yomná echanjábocna. Y cha entsemna nda ibojtsemna infiernoca pochocaná jtsemnama. ⁴Cha Bëngbe Bëtšabe contra echanjóyeubambye, chë ndëmuanÿengbiana y ndaye soyëngama entšanga imojuabná diosënga imomnama contra echanjóyeubambye. Chentšana cha echanjayana chëngbiana más obená yomna ca. Y Bëngbe Bëtšabe bëtš yebnóynaca cha echanjámeshëngo, choca echanjótbema y entšanga echantsétsësnaye ndegombre cha Bëngbe Bëtšá yojtsemna ca.

⁵¿Chë soyama tšëngaftanga ndoñe šmondenabouínÿna? Atšë cabá tšëngaftangaftaca sënjamna ora, chama sënjanoyebuambná. ⁶Y tšëngaftanga šmondétatšëmbo, nda mora yojtsama chë Bëngbe Bëtšabe contra yomná ndoñe chaondonÿnama, cabá chë tempo chca jopásama ndóshjango ora. ⁷Mora ya mallajta entšanga puerte bacna soyënga tmojontsé amana, ndoñe ntšamo Bëngbe Bëtšá tojayancá chënga jamama yojtsamna ca, y bënga chë soyënga josértama ndoñe quemuátobena, ndayá nÿe Bëngbe Bëtšá chca šojinÿanÿese; pero ntšamo tcbonjauyancá chë Bëngbe Bëtšabe contra yomnabiana ndoñe queochatëchnëngo, nÿa nda chë soyënga ndoñe chaondëtsemnama yojtsamábioye Bëngbe Bëtšá chabojtsejuaná ora aíñe. ⁸Chora chë Bëngbe Bëtšabe contra yomná echanjábocna; pero Bëngbe Utabná yochjésabo ora, echanjángouo y echanjama cha chaóbanama; y tša buashinÿinÿanánaca y obenánaca echanjábocnama, chábioye bochantsepochóca. ⁹Chë Bëngbe Bëtšabe contra yomná, Satanasbe obenánaca echanjabe, y entšanga bëtš obenana echanjínÿanÿiye, y chë bëtš soyëngaca entšanga ingñénënga mochántsemna. ¹⁰Cha ba bacna

soyënga echanjama ntšamo Bëngbe Bëtsá ndoñe yondbošcá, chca, ba entsángbioye nyetsca soyënguine jáingñama. Y chënga ndegombre pochocánënga mochántsemna; Bëngbe Bëtsá chca echanjama, chënga chë ndegombre soyënga Jesucristbiana chëngbe ainaniñe ndoñe tmonjanóyëngacñe causa, y chë soyëngama mo uámana soyëngcá ndoñe tmonjanjuabó causa, chca, atsebácanënga jtsemnama. ¹¹ Chca causa, Bëngbe Bëtsá entseleséncia entsanga ingñénënga chamotsemnama, y chë ndoñe ndegombre soyënguine chamotsóbuáchema. ¹² Bëngbe Bëtsá chca echanjama, nyetscanga chë ndegombre soyënguine Jesucristbiana ndoñe tmontsošbuáchenga, chë bacna soyënga amama oyejuayënga tmojtsemnënga, chë nyetsca tescama castigo chamotsebomnama jayanama.

Bëngbe Bëtsá šojabacá atsebácanënga jtsemnama

¹³ Pero bënga šontsamna nyets tempo Bëngbe Bëtsá jtsatschuanayana tšëngaftangbiana, Jesucristbeyeca catsátanga, Bëngbe Utabnabe bonshánënga. Bënga, Bëngbe Bëtsá fsëndëtschuaná cha quem luare cabá ndobojátša ora, atsebácanënga chašmotsemnama tcmojánabacacama. Bëngbe Bëtsá tcmojatsebaca er chë Uámana Espíritu Bëngbe Bëtsabe entsanga tcmojábiana, y tšëngaftanga chë ndegombre soyënguine šmojtsošbuaché. ¹⁴ Chë tšabe noticiënga bënga cbondábuayiy-nayeca, Bëngbe Bëtsá tcmojúbuaja chábënga chašmotsemnama. Cha tcmojúbuaja Bëngbe Utabná Jesucristbe obenana y buashinýinýanánëncaca chašmotsebomnama.

¹⁵ Chcasna, ndocna te šmattsajbaná ošbuáchiyana chë ndegombre

soyënguine ntšamo tconjabuatambacá, cach tšëngaftangbeñe jóyebuambayëse y tsbuanácha jubuábiamëse, y ndocna te inýetšá šmatjátsjuabnaye. ¹⁶ Bëngbe Bëtsá puerte tšabia endménayeca, cha šuababuánýeshana y tojama bënga sempre añemo ainaniñe chamotsebom-nama y chë mochjóyëngacñe tšabe soyëngama corente jtsóšbuáchiyëse chamotsobátmanama. Chábioye y Bëngbe Utabná Jesucristbioye fsëntseimpadana, ¹⁷ chata chaboma tšëngaftanga bëtscá añemo ainaniñe chašmotsebomnama, y tšëngaftanga nyets tempo chašmotsobena ntšamo tšabá yomncá jtsichámuama y jtsamama.

Bëngbiana Bëngbe Bëtsá šmochtseimpadana

3 Y morna, Jesucristbeyeca bëngbe catsátanga, Diosmanda bëngbiana Bëngbe Bëtsá šmochtseimpadana, nyetsca luarenache más ba entsanga chamotsobenama Bëngbe Bëtsabe buayenánana jouenama, y chënga chë soye chamóyëngacñama, y puerte chamotserrespetánama, ntšamo tšëngaftanga šmonjanmcá. ² Bëngbe Bëtsánaca šmochtseimpadana cha chašotsëbuáuyayama, y chë puerte bacna entsanga ndoñe chamondobenama jamama bënga fchaisufrima, er nyetscanga ndoñe quemochatošbuáchiye chë fsëndbuayiyná palabriñe. ³ Pero Bëngbe Utabná sempre jtsamana ntšamo tojayancá, y cha echanjama tšëngaftanga más chábeñe chašmotsošbuáchema, y ndoñe nye cachcá quecmatënýa chë bacna soyënga mandayá nye ntšámnaca ndoñe chacondáborlama. ⁴ Y Bëngbe Utabná entsama bënga ndegombre ainaniñe fchaitsejuabnama, ntšamo bënga tbojanamëndacá mora šmojtšamama y cachcá sempre šmochtsamámncaca.

⁵ Bënga, Bëngbe Bëtsá fséntseimpadana, Bëngbe Utabná benache chacmanyanjé bonshánana jtsebomnama ntšamo Bëngbe Bëtsá endbomncá, y chašmojtseufrina ora, corente añemo chašmotsebomnama, ntšamo Cristo tojansufrí ora yojanbomncá.

Njëtscanga entsamna jtsetrabájayama

⁶ Jesucristbeyeca catšátanga, Bëngbe Utabná Jesucristbe mándoca cbontsaménda, ndëmua Jesucristbeñe ošbuachiyá jatrabájama ndoñe tontseboše y ndoñe tontsiyena ntšamo bënga tcbonjabuatambacá, cháftaca ndoñe šmattsóyebuambnaye. ⁷ Cach tšëngaftanga tšabá šmondétatšëmbo ntšamo cmojtamna jtšiyenana, ntšamo bënga fsënjoyencá: bënga tšëngaftangbeñe fsënjaniiyena ora, nje ntjatrabajacá oyënjayënga ndoñe queftsjatsmäna, ⁸ni ndocnabe saná chibiáisese, tondaye ntabuenaycá. Injëtšá enjamna; cada te bnété y ibeta jabuache fsënjantrabája, chca, tšëngaftanga ndoñe chacmondétsamnama bëngbe uajabótama bënga jatatšatnayama. ⁹Y ndegombre, bënga derecho fsënjánbomna tšëngaftanga jaméndama chašcújabuachama; pero masque chca, bënga jabuache fsënjantrabája tšëngaftanga chašmotsetatšëmbuama ntšamo yomna jtšiyenama, y chca chašmotsamama. ¹⁰Bënga tšëngaftangaftaca fsënjamna ora, mëntšá tcbonjanamëndá: Nda ndoñe tontseboše jatrabájama, cha cach ndoñe chaondëtsesá. ¹¹Chca fséntsichamo, er bënga fsënjátatšëmbona, báseftanga

tšëngaftanguentsënga imojtsiyena tondaye ntsamcá, pero tša chë ínjëngbe soyënguiñe jtsontremeténese. ¹²Chca oyena entsángbioye fséntsabuayiná y fséntsaménda Bëngbe Utabná Jesucristbe mándoca, natjëmbana cachëngbe vida onguayiiñe chamotsotrabájayama.

¹³Jesucristbeyeca catšátanga, ndoñe chacmondëumantšé tšabe soyënga amana. ¹⁴Nderado nda ntšamo quem tsbuanáchañe fsënjayancá ndoñe tontsuenana, šmochjarrepára nda cha yojtsemna y cháftaca ndoñe šmattsencuëntaye, chca, cha chaotsëuatjama. ¹⁵Mo canye uayayacá ndoñe šmattsonyaye; šmochjabuayená mo canye catšatcá, chca ndoñe chaondétsamama.

Jtadiósoftanama

¹⁶Bëngbe Utabná fséntseimpadana, cha, chë entsanga tšabe ebionana ainaniñe chamotsebomna iuamá, chaoma tšëngaftanga njëtsc tempo y njëtsc tescama chca chašmotsebomnama. Bëngbe Utabná tšëngaftangaftaca chaotsemna.

¹⁷Nje quem palabrënga tšëngaftanga jacheuayama cach atšbe cucuátšeca sentsabiamná. Atše chca sëndbauapoc-hóca atšbe tsbuanachangá juabemama; ntšamo muentše entsabemancá entsinjinyná quem tsbuanácha atšbiácha iuamnama.

¹⁸Atše, Bëngbe Bëtsá sëntseimpadana, Bëngbe Utabná Jesucristo chaoma tšabe bendicionënga tšëngaftangbeñe chaotsemnama.

1 Timoteo

Jachuyama

1 Atše Pablo, Jesucristbe ichmoná sëndmëna. Bëngbe Bëtsá bëngbe atsebacayá endmëna y Bëngbe Utabná Jesucristo endmëna ndábeñe bënga, puerte jtsošbuáchiyëse mondobátmana ba soyënga bëngbiana cha yochjamama. Atše Jesucristbe ichmoná sëndmëna, er chata tbojanmandá atše chca jtsemnama. ²Timoteo, atše quem tsbuanácha cbontsabobiamná. Atše Bëngbe Bëtsabe soyëngama entšanga sënjanabuayiyiná ora, aca Jesucristbeñe tconjanošbuaché, y chca, aca mo atšbe ndegombre uaqüñacá tconjanóbema. Atše séntseimpadana, Bëngbe Bëtsá Bëngbe Taitá, y Cristo Jesús Bëngbe Utabná, chaboma aca tšabe bendicionënga chacotsebomnama, chata chacmolastemama y ainaniñe tšabiana ebionana chacotsebomnama.

Pablo chë ndoñe ndegombre soyënga abuátambayëngbiana chënga tojanabuayená

³Ntšamo chë Macedonia luaroye chocana sënjëftsanbozna ora tcbonjanimpadacá, mora cachiñe cbochtëtsimpáda. Efeso puebloca cochjoquéda, básefta entšanga chácua mëndama chë ndoñe ndegombre soyënga ndoñe chamondëtsabatambama, ⁴ni nyets tempo ndoñe nye chamondetsejuabná anteungbe cuentëngama, ni chë ba uabemana uabáinënga chë tempsca bëts taitangbiana. Er nye chca yapa jesejuabnayanentšana, jóbocnana nye ínÿengaftaca jabuachana enatsëtsnayıñe, y chca chëngbiyoye tondayama ntjujabuáchana ntšamo Bëngbe Bëtsá jamama yojuabnacá

chaósertama. Chë soyna nye chábeñe jtsošbuáchiyëse jobenayana josértana.

⁵Chca mando entsemna nyetscanga chamotsenbobonshánama, y chë bonshánana endóbocana nda chabe ainantëse ndocna bacna soyënga tondbomná bentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšëmbuábentšana, y Jesucristbeñe ndegombre ošbuachiyábentšana. ⁶Báseftanga tmojtsajbaná chca jtsemnana y inÿe soyëngama tmojontsé juabnayana; chífyeca chënga mora imojtsentšena nye ndayámna ndoservena soyëngama enatsëtsnayana. ⁷Chënga jtsebošana Bëngbe Bëtsabe ley abuátambayënga jtsemnama, pero chënga ndoñe yontsósertana ni ntšamo imojtsabatambacá, ni mo ndayánaca ntšamo chënga tmojtsichamcá, mo chë soyënga ndegombre cuaftsemncá.

⁸Pero bënga mondétatšëmbo chë leyënga tšabá yomnama; tšabá endmëna, chë ndayama chë leyënga tmojuamcá entšá chë leyëngaca tojtsamëse. ⁹Bëngnaca mondétatšëmbo, chë leyënga ndoñe tmonjuama chë nyetsca soyënguñe tšabá amëngbiana. Chë leyënga tmonjuama quemëntša entšanga jácastigama: ntšamo leyënguñe ndoñe tontselesenciancá amënga y ntšamo Bëngbe Bëtsá yobošcá ndámënga, chë Bëngbe Bëtsá ndoñe imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obánayënga y ndëmuanÿënga imomna entšanga obánayënga, ¹⁰boyabásaftaca o shembásaftaca bacna soye amënga y boyabásënga cach boyabásëngaftaca bacna soye amënga, entšanga enënga nye ínÿabiama nyets tempo chamotseservënama,

bosterënga y chë nÿe bonamente Bëngbe Bëtsabiana júrayënga; chca entsayana, chë leyënga yomna jácastigama nÿetscanga ndëmuanyënga ndoñe tmontsama ntšamo chë ndegombre buatëmbana soyënguine iuayancá. ¹¹Ntšamo muentše chë leyëngama tijayancá, entsebuatëmbana chë Bëngbe Bëtsabiocana puerte tšabe noticiënguine, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entsanga jabuatambama.

**Pablo Bëngbe Bëtsábioye
tbojtanchuá, tbojanlastemama**

¹²Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjëtseprontanama, y chíyeca šojanábuayana atše chabiana chaitrabajama; y cha endmëna nda inétsama atše obenana chaitsebomnama chë trabajo jamama. ¹³Cha chca átšeftaca tonjanma, masque tempo atše chabe contra ba soyënga sënjanichamo, chabe ústonënga sënjanécamena, y chabiana tondaye respeto ntsebomncá sënjanenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatšëmbo ndayá tsjánamama. ¹⁴Y chca, Bëngbe Utabná ba tšabe bendicionënga atšbiana tonjanma, y chábeñe ošbuachiyá šonjánbema, y tonjanma atše cha chaitsebobonshánama y ínÿengbioynaca. Cha chca bëngbiana tojama, bënga cánÿiñe mo canÿacá Cristo Jesúseftaca bëtsemnayeca.

¹⁵Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo

Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna. ¹⁶Chíyeca, Bëngbe Bëtsá šonjanlastemá, jinÿanÿiyama cha puerte uantado entsángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachëngbioye; chca tonjaninÿinÿé cachá átšeftaca uantado jtsemnëse, atše nÿetscangbiana chë más bëts bacna soye amá jtsemnëse. ¹⁷Entsanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entsanga ndoñe ntsoobenana jinÿamá y chë nÿe canÿe Bëngbe Bëtsá yomná. Chca chaotsemna.

¹⁸⁻¹⁹Timoteo, aca mo atšbe uaquinácá condmëna. Atše tcbonjaimpadá, ntšamo tcbonjauyancá entsanga chacúyanama, ntšamo báseftanga Bëngbe Bëtsabe juabna oyebuambnayënga acbiana tmojanayancá, y chiñe jtsejuabnayëse chë Jesucristbe soyëngama chacopeliá y nÿets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatšëmbëse. Báseftanga, chënga ndoñe tšabá imonjëtsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguine ošbuáchiyana tmojtsanajbananga y tmojanontšé inÿe buatëmbana soyënguine jtsošbuáchiyana. ²⁰Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinÿe Bëngbe Bëtsabiana ndoñe bacá ntsoyebuambnayana.

**Pablo tojanabuayená ntšamo
Bèngbe Bètsá jtsadoránama**

2 Njetsca soyama más cbontsaimpadana ndayá chë Jesucristbeñe ošbuáchiyënga Bèngbe Bètsáftaca chamojtsencuénta ora, njetsca soyëngama ntšamo tojtsëjbotcá cha chamotseimpadana, njetsca entšangbiama, y cha sempre chamotsatschuaná. ²Entsemna, njetscangbe tšabiama Bèngbe Bètsá jtseimpadánama, pero masna quem luarentša reyëngbiama y inye mándayëngbiama, chca, njetscanga puerta natjémbana jtsiyenama chamuetsobenama, y njetsca soyënguine tšabá jtsamëse, Bèngbe Bètsá jtsatschuanayama, y entšangbe juabniñe tšabá chamotsemnana. ³Chca jtsamana tšabá endmëna, y Bèngbe Bètsá, bèngbe Atsebacayá, chama jtsóyejuayana; ⁴y chca jtsóyejuayana, er cha endboše njetsca entšanga atsebácanënga chamotsemnana y chë ndegombre buayenánana chamotsábuatmama. ⁵Chca njetsca entšangbiama endmëna, er nye canye Bèngbe Bètsá njetscangbiama endmëna, y nye canya endmëna nda yobena jamama entšanga tempcá tšabá Bèngbe Bètsáftaca chamotsemnana; cha endmëna Jesucristo, cach entšá. ⁶Er Jesucristo, mo canya inyënga játsebacama cuaftopagacá, chabe derecho vida jtsobomñama cachcá tojanonyá y tojanóbana, chca, njetsca entšanga chamotsobenama atsebácanënga jtsemnana. Chë soye cha tonjaninyanjé, nya chama tempo yojtsemna ora, chë Bèngbe Bètsá njetsca entšanga atsebácanënga chamotsemnana yobóšama. ⁷Bèngbe Bètsá chca njetsca entšangbiama yobóšeyeca, Jesucristo šojanábuayana chabe ichmoná jtsemnana, chabe

soyënga entšanga jtsabuayiynayama; ndegombre soye séntsoyebuambná, ndoñe quetsátsbostero. Šonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

⁸Ntšamo sënjayancá, atše séntseboše njetsca chë Jesucristbeñe ošbuachiyëngcá nefjuana luarëngue-nache, boyabásenga Bèngbe Bètsáftaca chamotsencuénta, y chora celoye, Bèngbe Bètsábioye cucuatše chamatsbaná; pero chamna, ainaniñe bacna soyënga ntsebmncá, inyëngaftaca ntjatentjayanaycá, y inyëngaftaca jabuachana ntjatenatsëtsnaycá chënga chamotsemna.

⁹Y atše séntseboše shembásenga entšayangá chamuatíchëtjo, mo chë tšabe shembásenga mondbetsichëtjoncá, ndoñe nye entšanga chamotsëbuáuatjama y ntšamo tmojtsichëtjonama chëngna uámanënga imomna ca entšanga chamotsejuabnana. Ndoñe quenátamna jtšenóbotamnayana, nya mo chca chquëcnënga jtsemnëse, ni castellano soyëngaca o uamana fjantse ndëtsbéngaca, o yapa uamana entšayangaca, chca, nye entšanga jinýama tšabá jtsemnana. ¹⁰Pero añe mo chë Bèngbe Bètsá adóraye shembásenga mondbetsamcá jtsamëse, chë tšabe soyënga jtsamana.

¹¹Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayaunana. ¹²Atše ndoñe quichatsleséncia, canye shembása boyabásenga chaotsabuatambá, ni chaotsaménda. Canye boyabása tojtsabuatambá o tojtsaménda ora, shembása ndocá chaondëtsichamo. ¹³Chca chaotsemna, er Bèngbe Bètsá natsana Adán tbojanpormá, y chentšana Eva; ¹⁴y er Satanás Adánbioye ndoñe tbonjaningñé, ndayá chë shëmbioye;

y chca tbojaningñe ora, chë shema tojanma ntšamo Bëngbe Bëtsá ndoñe tbonjanlesenciaca. ¹⁵ Pero shembása ats bocaná echántsemna, básenga quem luaroye endbaúshejangoyeca, pero chamna, aíñe nyets tempo Bëngbe Bëtsábeñe tojtsosbuáchese, nyetscanga tojtsababuánýeshanése, cachá nyetsca soyënguñe jenomándama tojtsobenése, y nyets tempo tšabe soyënga tojtsamése, ntšamo Bëngbe Bëtsabe entšanga mondbetsamcá.

**Ntšamo ibojtsemna
chë ošbuachiyëngcá
enefjuanëñgbeñe mandayá**

3 Mëntšá ndegombre endmëna: nderado nda tojtseboše canýe trabajo jtsebomnama, cánýentše ošbuachiyëngcá enefjuanentše chë inýe ošbuachiyënga jtsamëndayama, cha ndegombre yojtseboše canýe puerta tšabe trabajo. ² Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamése, chca, cha ndoñe tšabá yontsama ca ndocná chaondétsichamuama. Y mëntsánaca cha bontsemna jtsemnama: nye canýe shembásabe boyá; ntšamo jtsiyenama tšabá juabnayá chaotsemna, cachá nyetsca soyënguñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentsamiama, y chaotsobena botamana abuatambayá jtsemnama. ³ Ndoñe yapa tmoyá o penzentero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná nye crocénana jésebomnama. ⁴ Chaotsetátšëmbo ntšamo nyetsca chabe yebnentša entšanga botamana jtsamëndayama, y chaoma chabe

básenga chë ntšamo cha tojayancá chamotsamama, ndocna te stëtsoye chamondëquedama; ⁵ er, nda cachabe yebnentša entšanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanýenama? ⁶ Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnése, nderado nye cachá uamana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga. ⁷ Chánaca bontsemna jtsiyenana jtsamése, y chca chaojtsama ora, chë Jesucristbeñe ndošbuachiyënga tšabá chabiamna chamotsichamo. Chë entšá ndoñe chca tontsamése, chënga chabiamna mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

**Ntšamo ibojtsemna
chë ošbuachiyëngcá
enefjuanënga ujabuachaná**

⁸ Cachcá, chë mándayëngbe ujabuachanënga mëntsá entsamna: uamana entšangcá nyetscanga chamot-sétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebomnama. ⁹ Chënga entsamna ndegombre jtsošbuachiyana chë Bëngbe Bëtsá tojinýanýe soyënguñe, chë ndayíñe bënga mondošbuaché, chëngbe ainaniñe inýetsá juabnënga ntjatsbomncá. ¹⁰ Natsana, chëngbiamna botamana šmochjšhauarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe ujabuachanëngcá joserviama. Chënga nyetsca soyënguñe tšabá

tmojtsemnëse, šmochjálesenciaye chiñe chamoservema. ¹¹ Cachcá, chë shémanga mëntšá entsamna: nyetscangbiana mo uámana entsangcá utabnënga, ndoñe uayátsenayënga, cachënga nyetsca soyënguine jenomándama obenënga, y nyëtscañe tšabe palabra bomnënga. ¹² Canyë uajabuachaná chaotsemna nye canyë shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana. ¹³ Chë uajabuáchanënga tšabá chiñe tmoservëñese, canyë uámana puesto mochanjashjache, y chënga mochantsobena bëts añémoca jtsóyebuambnayama ntšamo Cristo Jesúsbeñe tmošbuáchema.

**Ndayá Bëngbe Bëtsá bënga
šojinyanýecá, canyë bëts
buatëmbana soye endmëna**

¹⁴ Atše sentsobátmana pronto chjobenaye jama aca jauatsëtsayama; pero chca cbontsabobiamná, ¹⁵ nderado atše betesco jama ndoñe sënjobenase, chacotsetátšëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë Jesucristbeñe ošbuáchiyënga, chë Bëngbe Bëtsá Ainabe básënga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšëna chama ínýengbioye jáyëñanama. ¹⁶ Nyä ndegombre endmëna, Bëngbe Bëtsá soyënga šojinyanýé, y chë soyëngaca bënga montsobena jtsiyenana, chë Bëngbe Bëtsabe entsanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntšá endmëna: Cristo quem luarentše cach entsacá entsángbioye tojánëbëbuacna.

Chë Uámana Espiritu tonjinyanýé cha nyetsca soyënguine tšabá amá yomnama.

Angelënga cha tmojáninýe, y chabiama ba luarënguentsa entsángbioye tmojanabuayená.

Ba entsanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinyanýiyëse.

**Báseftanga chë tšabe
benachentsana mochtsojuánañe**

4 Uámana Espiritu, nyetscanga catafjosertaycá tojayana, quem luare jopochócama tempo chaojtsobeco ora, básefta entsanga camochtsajbaná ošbuáchiyana chë ndayinë bënga Jesucristbiana mondošbuaché soyënguine ca. Chëngna, espíritënga entsanga áingñayënga mochántsayaunana, y chë ndoñe ndegombre soyënga chë bacna bayëjënga entsángbioye mochtسابuátambaye soyënguínaca. ² Chca buatëmbana soye jtsóboconana chë bacna entsanga ntšamo ndegombre tmojuabnacá ndinýinýnayëngbentsana y chë bosterëngbentsana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nye chca chëngbe ainaniñe jésejuabnayana. ³ Quem entsanga ndoñe ntjaleséciana ínýënga chamotsobouamama, y jtsëmándayana básefta sananga entsanga ndoñe chamondétsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse. ⁴ Er lempe

ntšamo Bëngbe Bëtsá entsanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëttschuase; ⁵er chca saná Bëngbe Bëtsábioye tšabá jtsinñnana, cachá chca tojayánayeca, y bënga chë sanama cha mondbatschuayama.

Jesucristbiana trabájayinë canye tšabe oservená

⁶Aca, chë soyënga ošbuachiyëngbioye chacojtsabuátambase, aca Jesucristbiana trabájayinë canye tšabe oservená cochántsemna. Y mo nda bëtscá añemo jtsebomnama botamana tojtsesacá, cachcá, ácnaca puerte ošbuáchiyana y ainaniñe bëtš añemo cochántsebonna; chca echántsemna, chë bënga mondošbuaché buayenana soye aca icuatsjendá y icoyeunánayeca, y ntšamo chë tšabe buatëmbana soyënguiñe endayancá sempre icuámayeca.

⁷Pero ndoñe nñe quem luarentša entsangbe cuentënga y ndoservena cuentënga cattsuenana. Ba soyënga cochjama aca bëtš añemo ainaniñe chacotsebonnama, mo nda bëtš añemo jtsebonnama cachabe cuérpoca ba soyënga cuaftsamcá, ntšamo Bëngbe Bëtsá jadórana yomncá jtsiyenama jtsamëse; ⁸cachabe cuérpoca ba soyënga jamana más añemo jtsebonnama, añe batsatema endoservena; pero jtsiyenana Bëngbe Bëtsábioye jadórana yomncá jtsamëse, puerte enduámama y juajabuáchana nñetsca soyënga tšabá chaotsemnama; chca jtsamana puerte tšabá endmëna cachabe vidama quem luarentše, y chë inye vidócnaca. ⁹Ntšamo tijayancá ndegombre entsemna, y nñetscanga entsamna jtsejuabnayana chca ndegombre bëtsemnama. ¹⁰Y chë

soyama bënga puerte mondëtrabája y mondësufrina, er chë Bëngbe Bëtsá Ainábeñe puerte mondošbuachéyeca, bënga mondobátmana cha yochjama soyënga bëngbe tšabiana. Cha endmëna chë nñetsca entsangbe atsebacayá, pero ndegombre masna, chábeñe ošbuáchiyëngbe atsebacayá cha endmëna.

¹¹Ntšamo quem soyëngama tcbonjauyancá entsanga cochtsamëndaye y cochtsabuátambaye. ¹²Ndoñe catjaleséncia, aca bobontse comnama, ndánaca chacmotsáboyënjama. Pero añe bëtscá cochtsama, chënga puerte chacmotsesrespetánama, chca jtsamëse icoyenama jtsonyáyese, cachcá chamotsamama: botamana jtsóyebuambnayëse, nñets tempo tšabe soyënga jtsamëse, nñetscanga jtsababuánjeshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná. ¹³Atše choca chaijashjanguëntscuana, cochtsentšena chë Bëngbe Bëtsabe uabemana palabrénga entsángbeñe jtsalfayama, y chënga jtsabuátambayama y jtsabuayinyayama. ¹⁴Acbioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiana tmojanoyebuambá ora, y chë ošbuachiyënguentša bëtšëjmënga chëngbe cucuatšënga ácbeñe tmonjancjá y Bëngbe Bëtsá acbiana tmonjanimpadá ora, chca tšetana obenana tcojanóyëngacñe. Chë soye sempre cochtsinñena.

¹⁵As, aca cmontsemna siempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entsanga chamobená jinñyama, aca cada te más tšabá lempe cojtsamama. ¹⁶Botamana

cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínÿenga cojtsabuátambama. Cada te chca cochtsama, y chca, cach aca cochanjenájabuache ats bocaná jtsemnama y chë ácbioye ouenanëngnaca játsebacama.

Ntšamo Timoteo ibojtsemna chë inÿe ošbuáchiyëngaftaca jtsemnana

5 Bëtsëjëmënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catsátanga cuaftsemncá. ²Chë bëtsanana shembásëngaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabëంగా cuaftsemncá; chëngaftaca cmontsemna puerte tšabia jtsemnana, chëngbiana ndocna bacna juabnënga ainaniñe ntsebmncá.

Ošbuáchiyëngbenache viudanga tmojtsemna ora

³Chë ndegombre viudanga, chë ndocná mondbomna chaújabuachama, chënga cochtsarrespetana y cochtsëjabuachana. ⁴Pero canÿe viudá nderado básënga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanÿenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana. ⁵Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochuájabuachama jtsobátmanana, y nÿets tempo jtseimpadánana, bnëté y ibeta, cha chabuájabuachama. ⁶Pero canÿe viudá, nÿe quem

luarentša entsángaftaca oyejuayá jtsemnana soyënga tojtsamëse, cha masque ainá tojtsemna, Bëngbe Bëtsabe bominÿiñe mo canÿe obanacá jtsemnana, er chábioye ndoñe ntseservénana. ⁷Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebmnama. ⁸Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

⁹Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nÿe canÿe boyá ibnabomná. ¹⁰Entsanga cha chamotsábuatma mo canÿe tšabe soyënga amacá: chabe básënga botamana tojabëché, áshjajnënga chabe yebnentše posada júyentsámiana prontaná, Bëngbe Bëtsabe entsanga imomnënga tojushecjabebé, chë imosufrínënga tojújabuache; jayanana, nda sempre nÿetsca tšabe soyënga jamama yontšená.

¹¹Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nÿe cachënga tšabá jtsemnana juabnënga jtsebmnnana y soyënga jtsamana. Chcase, chënga Jesucrístbioye ya ndoñe ntseservénana, y chora jtsebošana cachiñe jtëtóbouamayama; ¹²y chca, ínÿenga chëngbiana mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama. ¹³Y cabá más,

tondaye ntsamcá tmojtsemna ora, chënga juabouinÿana oyënjayënga jtssemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguïñe jtseyentšbëtsjuanëse, y ndoñe yontsemna jayanama soyënga jtsichámëse. ¹⁴ Chíyeca, atše séntseboše, chë viudanga cabá tobiašëngna chamu-atobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondétsama, chca, béngbioye uayayënga chamuayana, chënga chca ndoñe tšabá montsama ca. ¹⁵ Atše chca séntsichamo, er básefta viudanga cabá tobiašënga tmojtsajbaná Jesucristo obedecénana, y tmojontšé Satanás joyeunayana.

¹⁶ Canÿe shembása, Jesucristbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondétsamna chëngbiana játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnéngbioye jujabuáchama.

**Ntšamo cuantsemna
chë ošbuachiyëngbeñe
amëndayëngaftaca**

¹⁷ Chë bëtsëjëmënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bétsamama, y más, chë sempre entšanga jtsabuayiyayama y jtsabuátambayama imontšënéngbioye. ¹⁸ Er Bëngbe Bëtsabe uabemana palabrënguïñe endayana, mëntšá: “Aca canÿe toróftaca shajuana tmojtsatbaná luariñe chacojtsetrabája ora, ndoñe catjuanguëtšenaye ca”; ínÿoca: “Chë trabajayá merecido jtsebuájonana

juácanama ca”. Chíyeca, chë bëtsë-jëmëngcá amëndayënga jtsomerecénana entšanga chamotsarrespetánama.

¹⁹ Nderado nda tmojáuyana canÿe bëtsëjëma bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjëma mal quedayá ndegombre soye yojtsichamo ca ndoñe tmonjayana, ndoñe catjóyeunaye.

Inÿe soyëngama jábuayenama

²⁰ Chë bëtsëjëmënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebonnama.

²¹ Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canÿe bëtsëjëma tšabá o ndoñe tšabá tonjama ca, cabá ndoñe lempe botamana ndabonÿe ora, ni canÿe entšá ínÿengbiana más tšabá ntjatabacacnycá. ²² Ndocnabe bestšašiniñe cucuatšënga catjajájua, Bëngbe Bëtsábioye chabiana jaimpádama, jinÿinÿiyama cha mo canÿe bëtsëjëma amëndayacá joserviama yojtsobenama, nÿe betscó, juabuáyanama botamana ntjeno-juaboycá. Pero nÿe ntjenouaboycá chca tcojamëse, y cha canÿe bacna soye amá tomñësa, ácnaca cochántsemna mo chabe bacna soyënga cuafjamcá. Cochantsantješna ndocna bacna soyënga ainaniñe chacondëtsebonnama.

²³ Aca ba soye uafsbiaca condbëtsešoca causa, ndoñe más nÿe ena búyeshe cattseftmana, sinó base vínoynaca.

²⁴ Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana

ntjátjaye ora; pero ínÿengbe bacna soyëngama, nÿe tcojátjayentsana entsãnga chama jtsetatšëmbuana. ²⁵ Cachcá, báseftanga entsãngbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínÿenga mochanjátatšëmbona.

6 Chë nÿets tempo entsa nÿe ínÿabiana oservënënga entsamna, chëngbe nduiñëngbiana jtsejuabnayana, chënga uámana entsãnga imomnana y nÿets respeto jtsebmomnana imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y entsãnga mondbëtsabuatambaye, ínÿenga podesca ndoñe chamondët-sóyebuambnana. ²Y chë imobomna Jesucristbeñe ošbuáchiyënga nduiñënga, chëngbiyoye nÿe batsá ndoñe chamondësarrespetana, er chënga Jesucristbeyeca chëngbe catšátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entsãnga jtsabuátambayana, y becá jtsëtsësnayana chca chacmóyaunama: ³Nderado nda inÿe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábiyoye jadórama yomna soyënga jtsamëse, ndoñe cachcá bëngcá tontsejuabnase, ⁴cha nÿe cachá puerte uámana entšá

yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrëngama jabuachana jtsenatsësnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebmomnana, nÿetscanga ndoñe cachcá chamondëtsejuabnana jtsamana, ínÿengbiyoye joyánguanguama jtsebošana, bacna soyënga ndoñe ndegombre soyënga ínÿengbiana jtsejuabnayana, ⁵y ínÿengaftaca nÿe sempre jtsenpenzëntsiayana, er chëngbe juabniñe nÿe bacna soyënga jtsebmomnana, chë ndegombre soyënga quematábuatma, y jtsejuabnayana chë soyënga Bëngbe Bëtsá jadórama jtsamana, nÿe más soyënga jóyëngacñama yoservena ca. ⁶Ndegombre canÿe entšá bëtscá tšabiana jëftsashjáchana, cha tojtsiyena Bëngbe Bëtsábiyoye jadórama soyënga jtsamëse, y siempre oyejuayá nÿe chë tojtsebmomna soyëngaca tojtsemnëse. ⁷Er bënga tmojanonÿná ora, quem luaroye bëngaftaca tondaye tmonjániyëbo, y quem luarentšana cach tondaye quemochatobenaye jëftsoçñama. ⁸As, bënga ndayá jasama y ndayá jtichëtjuama tmojtsebmomnëse, chë soyëngaca oyejuayënga mochtsemna. ⁹Pero chë bomnënga jtsemnana tmojtsebošënga, bacna soyënga jamama tojócochëngo ora, ndoñe ntsemorochana y pronto chiñe jotsatsána, mo bayá uachmaniñe cuafjotsatscá, chë entsãnga Satanasbe cucuatšinë ndeolpe jotsatsána; chora chënga jtsamana soyënga mo chë juabna ndbomnëngcá, y chë cachëngbiana ndoñe tšabe soyënga tmojtsamëngbe juabnëngaca. Y mo chë uándbemana barco, bëts búyeshe asentoye tojtsenatjëmbcá, cachcá, chë bacna juabnënga bomnana, chëngbiyoye mochántsapochocaye y nÿetsca tescama

mochántsacastigaye. ¹⁰Crocénana jtsebomnama yapa jtsebošana, jamana entšabe ainantšana nyetsca bacna juabnënga y soyënga chaóbcnana; y básefta entšanga, crocénana jtsebomnama yapa jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiana tmojama puerte chamosufrima y bëts ngménana jtsebomnama.

Chë tšabe soyama jtsenojuerzánama, ošbuáchiyana sempre chaotsemnama

¹¹Pero aca, Bëngbe Bëtsabiana oservená, chca benachentšana cochtsojuánañe. Nya cochtsentšena, chë Bëngbe Bëtsabe bominyiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuányeshanama, Bëngbe Bëtsábeñe jtsobátmanëse puerte uantado padecena soyënguiñe jtsemnama, y corente jtsababuányeshanëse nyetscanga chacotsënyayama. ¹²Chë tšabe soyama, ošbuáchiyana joboguiyanama cochtsenojuerzana. Chë nyetsca tescama yomna tšabe vida cochjashjache; chama Bëngbe Bëtsá tmojanchembo y bëtská entšangbe delante tconjánayana tšabe soyënga Jesucristbiana, ndayiñe aca icošbuaché. ¹³Y mora, Bëngbe Bëtsabe delante, nda endbama lempe ntšamo quem luarentše yobinýncá vida chaotsebomnama, y Jesucristbe delante, ntšamo cachabiana ndegombre bemncá Poncio Pilatbe delante lempe tojanayaná, chatbe delante cbontsemánda, ¹⁴lempe cochjama ntšamo tcbonjauyancá, ndocna soye chacmondëntšashbe jamama, y cochtseyena, ntšamo ndocná tondaye chaondëtsebomna jayanama aca bacna soye tcojama ca. Y chca

cochtsama Bëngbe Utabná Jesucristo quem luaroye yochjésabëntscuana. ¹⁵Y nýa chë soyama chë tempo chaojóshjango ora, Bëngbe Bëtsá chca echanjínýanýiye, er cha endmëna chë corente bendición bomná y chë nýe canýe Mandado. Cha nyetsca reyëngbiana, chë más uamana Rey, y nyetsca amëndayëngbiana, chë más uamana Utabná. ¹⁶Nýe cha ndoñe bondmëna ndocna te ntjóbanana, y cha canýe bëts buashinýinýana luarentše endoyena y choye ndocná yondobena jobéconana. Cha ndocná tbonjinýe y ndocná yondobena jinýana. ¡Entšanga nyets tempo chamotsinýanýná cha puerte bëtsá y obená bëtsemnama! Chca chaotsemna.

¹⁷Chë quem luarentša soyëngaca bomnënga imomnënga, cochjámëndaye enábotamnayënga ndoñe chamondëtsemnama, ni lempe tšabá yochjóbcnana, bëtská soyënga bëtsebomnama ndoñe chamondëtsobátmana, er chë tcobomna soyëngama ndoñe ntsótatšëmbuana ndayëntsoñama chca mochtsebomnama; pero añe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtská soyënga šnetsatšatnayá; y chca, cha jamana bënga chamotsobena nyetsca chë soyëngaca oyejuayënga jtsemnama. ¹⁸Ntšamo tšabá yomncá chënga chamotsama, ba tšabe soyënga chamotsama, y siempre tšabe ainánaca chamotseprontana entšanga ba soyënga jatšatayama, y ndaye tmobomna soye entšángaftaca jenájatayama. ¹⁹Mo nda bëtská shajuana tojtsábuajo y jtsetatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtská tšabe bendicionënga más chcoye mochtsebomnama. Y chënga

chë soyënga tmojtsamëse, chënga chë ndegombre vida, chë nÿetsca tescama yomna tšabe vida mochanjëftsashjache.

Inÿe soye Timotéobioye tbojanbonÿé

²⁰ Timoteo, ndayá Bëngbe Bëtsá tcmojabonÿecá, botamana cochtsinÿena. Entšanga nÿe quem luarentša soyëngama encuëntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana

becá osertánanentsšana chca yóbocana ca, pero ndegombre chca ndoñe ntsemnana. ²¹ Atše chca séntsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá séntseimpadana, ácbeñe tšabe bendicionënga chaotsemnana.

2 Timoteo

Jachuayama

1 Atše Pablo, Jesucristbe ichmoná sëndmëna, Bëngbe Bëtsá chca yobóseyeca. Jesucristo šonjichmó entšanga jábuayenama Bëngbe Bëtsabe šbuachenánama, ntšamo cha inët-samama entšanga chë nyetsca tescama yomna tšabe vida chamotsebomnana; y chca vida monte bomna Cristo Jesús eftaca cányiñe mo canýacá bëtsemnayeca. ²Atše quem tsbuanácha cbontsabobiamná, acbiama Timoteo, aca mo atšbe bonshana uaquiñacá, Crístbeñe condošbuachema. Atše séntseimpadana, Bëngbe Bëtsá, Bëngbe Taitá, y Jesucristo, Bëngbe Utabná, chaboma ácbeñe tšabe bendicionënga chaotsemnana, chata ácbioye chacmolastemama, y acbe ainaniñe tšabe ebionana chacotsebomnana.

Ndoñe ntsëuatjana entsángbeñe Jesucristbiana jóyebuambayama

³Sempre Bëngbe Bëtsáftaca stsen-cuénta ora, acbiama sëndbëtsenojuabnaye, y acbiama sëndbëtsatschuanaye bnëté y ibeta; y Bëngbe Bëtsá endmëna nda atše sëndëserveda, ainánaca jtse-juabnaye y jtsetatšëmbëse, ntšamo atše stsamcá tšabá bëtsemnana, cachcá ntšamo atšbe bëtš taitanga tmojanmcá. ⁴Atše sëndbëtétenojuaboye ntšamo aca, chocana atše séntanabo ora shëchbuiye tconjanoperdema, y chíyeca atše tša séntseboše aca jtétinýama, atše puerte oyejuayá chaitsemnana. ⁵Bëngbe Bëtsá acbiama sëndbatschuaye, er atše sëndbátenuojuaboye aca Jesucristbeñe ndegombre ošbuáchiyana condbomnana. Natsana, acbe bëtš mamá Loida, y chentšana acbe mamá Eunice chábeñe

bontsanošbuáchiye, y ácnaca cachcá tcojamama atše puerte sëndétatšëmbo.

⁶Chíyeca sempre cochtsantješna quem uámana soyama: Mo nda canýe shinýañe tojtsajuinýinýnacá, chentše sempre chaotsoiñama, cachcá aca, chë Bëngbe Bëtsá tcmojatšëta obenana tšabe soyënga jamama, sempre cochtsinýena. Chë obenana aca conjanóyëngacñe, atšbe cucuatšënga acbe bestšašñe sënjanjájó y Bëngbe Bëtsá acbiama sënjanimpadá ora. ⁷Er Bëngbe Bëtsá tonjama bëngbe ainaniñe Uámana Espíritu chaotsemándama, uatjana ndoñe ntsebomnana, ndayá obenana bënga chamotsebomnana, bonshánana Bëngbe Bëtsabiama y nyetscangbiama chamotsebomnana, y cabënga jenomándama chamotsobenama.

⁸Chíyeca, ndoñe cattšëuatja entšanga jáuyanama, ntšamo tcojinýe y cojtsetatšëmbcá Bëngbe Utabnabiama ndegombre bëtsemnana; ni atšbiama ndoñe cattšëuatja, atše cárceloye sëndutámenama, chabiama oserveda causa. Chamna, chë Bëngbe Bëtsá cmochanjátsetaye obenánaca, sempre cochtseprontana jasúfriama, átšeftaca y ínýëngaftaca, entšanga tšabe noticiënga abuayinýaye causa. ⁹Bëngbe Bëtsá endmëna nda bënga šojatšëbacá, y šojáchembo jtsiyenama mo chábënga imomnëngcá jtsamëse. Y cha chca tojama, ndoñe nderado bënga ndaye tšabe soye tmojamama, ndayá cachá chca chaotsemnana inabóseyeca y bëngbe tšabiama juabna bómnyeca. Cha chca inajuabnaye, cabá quem luare ndmëna orscana; y chca jamama Bëngbe Bëtsá inajuabnaye, chë ndayá Cristo Jesús bëngbiama jamama sóyeca. ¹⁰Y mora, Bëngbe Atšëbacayá Jesucristo tojáboyeca, Bëngbe Bëtsá šojinýanjé cha bëngbe tšabiama juabna yobomnana. Jesucristo tonjama, entšanga nyetsca tescama obanënga

ndoñe chamondétsemnama, y tonjama bēnga chamotsetatsēmbuama, chē tšabe noticiēnga chabiamana jounēse y joyeunayēse, bēnga chē n̄yetsca tescama yomna tšabe vida mochjábomnama, ndoñe n̄ye jopochócama cuerpēnguiñe.

¹¹Bēngbe Bētsá šojanábuayana tšabe noticiēnga entšanga jábuayenama, Jesucristbe ichmoná jtsemnama y entšanga jabuátambama. ¹²Chē causa, atše mora cárceloca quem soyēnga séntsesufrina; pero chama atše ndoñe quetsátēuatja, er atše sēndétatsēmbo ndábeñe atše stošbuáchema, y corente sēndétatsēmbo cha yobena jtsin̄yenanana ndayá šojabonyecá, chē ndayté cha yochjésabēntscuana.

¹³N̄yets tempo, chē ndegombre buayenánana, ndayá átšbentšana tconjanuencá, entšanga cochtsabuayinyaye, entšanga jtsin̄yan̄nyayēse aca Jesucristbeñe icošbuáchema, y Bēngbe Bētsá y n̄yetscanga icuababuán̄yeshanama, y chca yomna aca Cristo Jesúsēftaca cán̄yine mo can̄yacá bétsemnayeca. ¹⁴Chē Uámana EspírITU, chē bēngbe ainaniñe endoyenabe uajabuáchenanaca, ntšamo Bēngbe Bētsá tmojabonyecá sempre cochtsin̄yena.

¹⁵Ntšamo ya condétatsēmbcá, n̄yetsca ošbuáchiyēnga Asia luaroquēnga cachcá šmonjeson̄yá, y chentše bontsemna Figelo y Hermógenes. ¹⁶Pero Bēngbe Utabná Onesíforbe pamíllanga chaotsalastemana, er cha ba soye šonjanañemó, y atše cárceloye utámenama cha ndoñe quenjatēuatja. ¹⁷Masna, Romoye tojabánashjango ora, cha botamana šojánguango y šonjánin̄yena. ¹⁸Bēngbe Utabná lastemado cháftaca chaotsemna, ntšamo n̄yetscanga tmojamcá tšabá o ndoñe tšabá yontsemnama cha yochjayana ora. Aca corente condétatsēmbo

ntsachetšá Onesíforo Efeso puebloca šonjanéjabuachama.

Jesucristbiamana can̄ye tšabe soldado

2 Y aca, atšbe uaqiñá, chē Cristo Jesús acbiamana tšabe juabna yobomnentšana, bētsca añemo ainaniñe cochtsebmna. ²Ntšamo ba entšangbe delante šconjoyeunacá, cach buayenánana, boyabásenga n̄yetscañe tšabe palabra bomnēnga cochjában̄yie, y chamotsobena ín̄yēnga cachcá jabuátambama.

³Aca, chē bēnga fséndbomna padecena soyēngama jasúfriana chacmojtsemna ora, Jesucristbe soyēngama entšanga abuayinyaye causa, ainaniñe bēts añemo cochtsebmna, mo can̄ye tšabe soldadcá, cha chabe mándayabiamana jasúfriana. ⁴Ndocna soldado ntjátanana shjoca soyēnguiñe vida jtsebmnama o crocénana juacánama. Soldado chca jtsamana, chabe mandayá, chca chaotsemnama tbojabocacá cha, oyejuayá chaotsemnama. ⁵Y can̄ye travisiayá, ín̄yēnga jáyēnjanama, can̄ye soye juacánama; pero ntšamo chē uacanánana jocñama tomncá ndoñe tonjatravisiase, cha chē soye ndoñe ntjosháchiñama. Cachcá, acbe trabajo cochjama ntšamo cmojtsemncá. ⁶Chē jajañe trabajayá derecho jtsebmnanana chē natsaná jtsemnama, chē tmojatbaná sananguentšana ndayánaca jtsebmnama. Acaftaca cachcá echanjopása, chē trabajo tšabá chacojamēse. ⁷Chē cbontsatsētsnañe cochtsenójuabnaye, y Bēngbe Utabná echanjama lempe chacmósertama.

⁸Sempre cochtsenójuabnaye Jesucristbiamana, ndabiamana Bēngbe Bētsá tojanma cháuatayenama y enjamna can̄ya rey Davídbentšana entšá, ntšamo atše chabiamana sēndabuayin̄yá tšabe noticiēnguiñe endmēncá. ⁹Chca abuayinyaye causa, atše séntsesufrina,

n̄ya caden̄juangácna utsbuaná, mo can̄ye b̄ets bacna soye ochjajnayacá. Pero masque at̄se chca s̄éntsemna, ch̄e B̄engbe B̄etsabe soȳngama buayenánana ín̄yenga ent̄sángbioye montsabatambá.¹⁰ Ch̄íyeca at̄se n̄yetsca padecena soȳngaca s̄end̄tsóboyana, B̄engbe B̄etsabe bocacán̄ngbe t̄sabiama, ch̄éngnaca atsebácán̄genga chamotsemnama, Crístbeñe j̄tsošbuáchiȳese; y Cristo Jesús b̄ets̄etsanga cháubiamama, y cháftaca n̄yetsca tescama chamotsiyenama.

¹¹ M̄ent̄sá ndegombre endm̄ena:

Cristo Jesús tojanóbana ora, enjamna mo b̄éngnaca cuafjobancá, er b̄enga t̄montsajbaná oyenana nt̄samo tempo monjanियencá y Jesucrístbeñe montsošbuaché; y chca, b̄éngnaca cháftaca mochantsiyena;

¹² b̄enga ch̄e padecena soȳngaca t̄mojt-sesufrina ora, t̄mojtsemoroch̄ese, b̄éngnaca Jesucrístoftaca mochántsemandaye. B̄enga t̄mojayana, cha ndoñe mondu-abuatma ca, as cha b̄éngbiám̄naca cachcá echanjajana;

¹³ b̄enga ch̄ábeñe ndoñe t̄montsošbuáchese, masque chca, cha cabá echanjama nt̄samo t̄bojašebuachenacá, er cha lempe jamana, nt̄samo sempre iuetsemncá j̄tsin̄yan̄yaȳese.

Can̄ye trabajayá, ndáftaca

B̄engbe B̄etsá j̄tsóyejuayana

¹⁴ Ch̄e t̄bonjauyana soȳngama, cochjama ch̄e ent̄sanga chamot-senójuabnama, y B̄engbe B̄etsabe delante cochjábuyanaye ch̄énga ndoñe yontsamna n̄ye palabréngama jabuachana enats̄snayana; er chca, ndocna t̄sabe soye nt̄jamana, y chca t̄mojt-senats̄sná ora, jamana ch̄e

soye ouenan̄nga más bat̄sá chamot-sošbuáchema, y jujabuáchana ch̄éngbe t̄sabe juabn̄nga j̄tsondbiamama.¹⁵ Lempe nt̄samo icobencá cochtsama, aca chacotsemnama mo can̄ye ent̄sá ndabiamama B̄engbe B̄etsá cháuyana n̄yetsca soȳnguiñe t̄sabá amá yomna ca; aca chacotsemnama mo can̄ye trabajayacá, nda tondaye tontsebonna ndayama jat̄euatjama; y chacotsemnama ch̄e ndegombre buayenánana corente t̄sabá buat̄mbayá.¹⁶ Ent̄sanga n̄ye quem luarent̄sa soȳngama, ndoserverna palabrénga t̄mojt-sencuénta ora, ch̄e soye ndoñe catt̄suenana; er ch̄e soye jamana ent̄sanga puerta in̄yetsá chamobocanama, nt̄samo B̄engbe B̄etsá ndoñe yondm̄encá, in̄yetsá j̄tsejuabnaȳese y j̄tsam̄ese.¹⁷ Ch̄éngbe buat̄mbana soȳngaca puerta bacá ín̄yengbioye jáborlana, n̄ya mo can̄ye uabouana šocana chamotsebonnama cuafjamcá. Chca buat̄mbaȳenguent̄se Himeneo y Fileto bontsemna.¹⁸ Chata ch̄e ndegombre benachents̄ana t̄bojtsojuánañe, y ibojt̄sichamo ch̄e oban̄nga chámuatayenama B̄engbe B̄etsá ya cat̄enjama ca, y Jesús chaojésabo ora, n̄yetscanga chámuatayenama B̄engbe B̄etsá ndoñe yochanjama ca. Ch̄e causa, chata bontsama básefta ent̄sanga ch̄e nt̄samo Jesucrístbeñe imojanošbuachecá, mora ya ndoñe chamond̄tsošbuáchema.¹⁹ Pero B̄engbe B̄etsabe ndegombre buayenánana n̄yets tempo cachcá endesomñe, y ndocná quenátobena ch̄e soye jatrócama. Chca endm̄ena mo ch̄e nd̄ets̄benga ndaȳiñe can̄ye b̄ets yebna tojebncá, ndaȳiñe m̄ent̄sá yojsábemana: “B̄engbe Utabná end̄ebuatma ch̄e ch̄ábenga imomn̄nga”, y “N̄yetscanga ch̄e B̄engbe Utabná b̄enga imomn̄nga ca t̄mojt̄sichám̄enga, chamuajbaná n̄yetsca bacna soȳnga amana ca”.

²⁰ Canÿe uámana entšabe yebnentše, tsafjoca soyënga ndoñe nÿe castellano o midio soyënga ntsemnana, ndayá niñëše y fshantse soyëgnaca; chë natsana soyënga uámana tescama jtsebuájonana, pero chë inÿe soyëngna, nÿe nÿets tempo chauetsoservénama. ²¹ Chca endmëna chë Jesucristbeñe imojtsošbuachëngbeñe, ndoñe nÿetscanga tmontsajbaná bacna soyënga juabnayana y amana, ni chë chca tmojtsama entšángbentšana ndoñe tmontsojuaná. Pero, chca jtsojuánañama tojtsebošá, echántsemna canÿa Bëngbe Utabnabiana tšabe trabajayá; y chca, mo chë tsafjoca castellano y midio soyëngcá, canÿe uámana trabajuñe echanjosérvia, y cha sempre echántseprontana ndaye tšabe soye jamama.

²² Chíyeca, ntšamo básefta bobontsënga bacna soyënga jamama mondbošcá, ndoñe cattsama; pero añe cochtsiyena ntšamo Bëngbe Bëtsabe bominjñe tšabá yomncá jtsamëse, Jesucristbeñe puerte cochtsošbuáchiye, Bëngbe Bëtsá y inÿenga cochtsababuánÿeshana y nÿetscángaftaca natjëmbana cocht-somñe, chë chaújabuachama Bëngbe Utabná mondbetsotsëmbuanëngaftaca cánÿiñe, ndocna bacna soye ainaniñe ntsebomncá. ²³ Ndoservena soyëngama palabrenga y ndosertánentšana óbocana soyëngama ndoñe cattsuenana; aca corente condétatšëmbo chë soyënguentšana entšanga nÿe jbuachana enatsëtsnayñe jabocanana. ²⁴ Pero chë Bëngbe Utabnabiana oser-vená ndoñe quebnátsmëna inÿengaftaca jbuachana ntsenatsëtsnayana; chamna, cha bontsemna jtsababuánÿeshanëse nÿetscanga jtsëñÿayana, jtsemnana tšabe buatëmbayá y inÿengaftaca uantadá. ²⁵ Cha bontsemna, chë chabe contra y chabe buayenánama

contra imomnënga, chë ndegombre soyënga jabuátambama, pero ndoñe ntjatenabotamnaycá. Chca bontsemna, nderado Bëngbe Bëtsá nanjama chca juabnayana chamotrocama, y chca, chënga chë ndegombre soyëngama chamotsetatšëmbuama; ²⁶ chënga botamana chamuatsjuaboma, y Bëngbe Bëtsá, Satanasbe cucuatšënguentšana cháuatsebacama. Satanás chënga tojanëtabá ntšamo cha tojtsebošcá jamama, mo bayënga canÿe uachmaniñcá.

Ntšamo entšanga mochtsemna, Cristo jésabama chaojtsobeco ora

3 Pero aca cmontsemna jtsetat-šëmbuana, Cristo jésabama tempo chaojtsobeco ora, entšanga echántsamna puerte padecena soyënguiñe jtsiyenana. ² Chca echántsemna, er entšanga, cada ona nÿe cachabe tšabiana echanjésenojuabnaye, crocénana jtsebomnama tša mochántseboše, mochántsemna enábotamnayënga y inÿengbioye mo nduamanëngcá mochantsëñÿaye. Bëngbe Bëtsabiana y inÿengbiana bacá mochantsóyebuambnaye, chëngbe bëtsëtsangbioye ndoñe quemochátayaunana, ni chëngbiana tšabe soyënga tmojtsamëngbioye quemochtëtacheuanaye, y Bëngbe Bëtsabiana y chabe soyëngama ndoñe respeto quemochátsbomna, ³ ni cachëngbe pamíllangbioye quemochátatabuanÿeshana, mochántseboše ndoñe natjëmbana jtsiyenama, uayátsenayënga mochántsemna, cachënga jenomán-dama ndoñe quemochátobena, mo ainana ndbomnëngcá mochántsemna, y nÿetsca tšabe soyënga uabotëñënga. ⁴ Chënga, uayayëngbe cucuatšñe entšanga ayentsbáshejuanënga mochántsemna, mochántsama

soyënga tondayama ntjatsrreparánëse, y cachënga uámana entsangcá mochántsenobiamnaye; chënga Bëngbe Bëtsá jatsbobonshana cuenta, cachëngbe cuerpiñe tšabá jtsomñama soyënga mochántseboše. ⁵ Inyënga echantsinýana mo ndegombre Bëngbe Bëtsá adórayënga chënga cuaftsemncá, pero chë mochántsama soyëngaca mochanjínýanyiye, Bëngbe Bëtsá obená bétsemnana chënga ndoñe mondošbuáchema.

Nýa tondayama chëngaftaca cattsen-cuéntaye. ⁶ Chënguentše báseftanga mondmëna, y chëngna botamana palabréngaca yebnënguenache jamashnana, y chenache, chë paselo yomna jáingñama shembásenga jtsaíngñayana, chëngbe buatëmbana soyënguñe chamotsošbuáchema. Chë shembásenga bëtscá bacna soyënga tmojama, y chë causa ndoñe corente natjëmbana montsiyena, y ba ndoñe tšabe soyënga imojtsama nýe cachënga tšabá jtsemnana, ntšamo tmojtsebošcá. ⁷ Chënga nýets tempo nýe ndaye tsëm soye jatóntšana jatatsjínýana, pero ndocna te ntjobenayana Bëngbe Bëtsabe ndegombre soyënga josértama. ⁸ Ntšamo Janes y Jambres Moisesbe contra ibojamncá, cachcá, chë inyënga jáingñama abuátambayënga nýetsca ndegombre soyëngama contra jtsemnana. Chë entsanga chëngbe juabniñe nýe bacna soyënga jtsebmomnana, y Bëngbe Bëtsá chënga tojtsëbaté, chënga chë ndegombre soyënguñe ndoñe ntsošbuáchiyana causa. ⁹ Pero chënga ndoñe quemochatobenaye bëtscá entsanga jáyëñjanama, er nýetsca entsanga mochanjátatšëmbona chënga nýe bacna soyënga juabnayënga imomnana, mo chë Israeloca entsanga tmojantatšëmboncá Janes y Jambres nýe chca juabnayata bétsemnana.

Inýe soye Timotéobioye tbojanbonýë

¹⁰ Pero acna, puerte tšabá condétatšëmbo ntšamo atše tijabuatambacá, ntšamo jtsamëse atše tsiyena, ndayá jamama tsjuabná, ntšamo atše Jesucrístbeñe puerte tsošbuaché, ntšamo inyëngaftaca uantado tsmëna; ntšamo atše, Bëngbe Bëtsá y inyëngbioye tsababuánýeshana; ntšamo atše, Bëngbe Bëtsábeñe jtsobátmanëse, ¹¹ inyënga šmonjanacmena ora; y sënjansufrina ora, padecena soyënguñe bëtš añemo tsjánbomna. Acnaca condétatšëmbo ntšamo atše chama Antioquía, Iconio y Listra bëtš pueblëngoca tsjansufrínama. Pero masque entsanga tša šmonjanacmena, atše lempe sënjánauantana, Bëngbe Bëtsábeñe jtsobátmanëse, y cada ora, Bëngbe Utabná chëngbentsana šonjanatsbocá. ¹² Ndegombre endmëna, nýetscanga chë Bëngbe Bëtsá jadórama soyënga jtsamëse jtsiyenama bošënga, y Cristo Jesúsëftaca cánýiñe mo canýacá imomnënga, puerte mochanjasúfria, chca bétsemnana, chënga chamosufrima inyënga chamojtsama ora; ¹³ pero chë bacna entsanga y chë inyënga áingñayënga, cada te más bacna entsanga mochántsemna, más bacna soyënga jtsamëse; chënga inyëngbioye mochántsaingñaye, pero cachëngnaca ingñénënga mochántsemna.

¹⁴ Pero aca, nýets tempo cochtsejuabnaye y cochtsama lempe ntšamo tcojuatsjinýcá, chë ndegombre soyëngcá cojtssošbuácheñe, er aca tšabá condëubuatma chë tcmojan-buatëmbanga; ¹⁵ y aca, cabá básetema conjamna orscana, chë Bëngbe Bëtsabe uabemana palabréngama condétatšëmbo, chë ndaye sóyeca aca contsobena juatsjínýana, Bëngbe Bëtsá chacmatsbocama, Cristo Jesúsbeñe

jtsošbuáchiyëse. ¹⁶ Bëngbe Bëtsá, Uámana Espíritbeyeca tonjama, lempe ntšamo Bëngbe Bëtsabe uabemana palabrënguñe yobinýncá entsãnga chamuábemama. Chë uabemana palabra endoservena, bëngbioye chë ndegombre soyënga jabuátambama; nderado ndaye soye ndoñe tšabá tmonjamama bënga chamotsetátšëmbuama, jinýanýiyama ntšamo más tšabá chë soyënga muanjobenaye jamama; y bëngbioye jabuátambama ntšamo jtšiyenama chë Bëngbe Bëtsabe bominiñe tšabá yomna soyënga jtsamëse; ¹⁷ chca, canye entšá Bëngbe Bëtsabiana oservená y obená chaotsemnana, tšabá chaotsetátšëmbo y sempre chaotseprontana nyetsca tšabe soyënga jtsamama.

4 Bëngbe Bëtsabe delante y Cristo Jesús, nda echanjabo mo reycá jabomándama y jabáyanama chë ainëngbiana y chë ya mochjóbanëngbiana, ntšamo chëngbe vidënguñe tmojëftsemcá tšabá o ndoñe tšabá bëtsemnana, chatbe delante cbomandá, ² Bëngbe Bëtsabe palabra entsãnga chacotsabuayiyayama; siempre chca jamama cochtseprontana, masque entsãnga añe o ndoñe jouenama tmojtsebošëse. Cochjama, ínýenga bacna soyënga tmojtsamama chamotsetátšëmbo, chca tmojtsamama cochjucácana y cochjábuayenaye ndayá jamama yojtsamnana. Sempre chca cochtsabuátambaye, chca ora puerte uantado jtsemnëse. ³ Chca cochtsama, er canye tempo echanjóshjango y chora entsãnga chë ndegombre buatëmbana soye ndoñe quemochátuenana; chamna, nye chë último tsëm soyënga jtsetátšëmbuama boše causa, ba abuátambayënga mochanjuánguango, y chënga mochántsi chamo soyënga nye ntšamo cach entsãnga jouenama tmojtsebošcá. ⁴ Chënga chë ndegombre

soyënga ndoñe quemochátuenana, y nye ndaye cuentënga mochántseyeunana. ⁵ Pero aca, sempre botamana cochtsejuabnaye; chë padecena soyëngama chacojtsesufrina ora, añemo cochtsebmoma; chë Jesucristbiana tšabe noticiënga entsãnga abuayiyayabe trabajo cochtsama; y nya cochtsentšena ndayá Bëngbe Bëtsá tcmojabonýecá tšabá jtsamama.

⁶ Er mo Bëngbe Bëtsábioye jëtschuayama, canye bayá obanáftaca tcojabuešcja vínoye jtsopochocancá, cachcá atšbe vídnaca ya jopochócama entsemna. Atše jóbanama bécoñe entsemna; chanjóbana ora echántsemna Bëngbe Bëtsá oyejuayá chaotsemnana. ⁷ Cristo Jesusbe soyëngama corente sënjenojuerzá. Mo canye travisiayacá, chë jashjanguama yomna luaroye ya tojashjangcá, átšnaca ya, ntšamo Bëngbe Bëtsá yobošcá atše jtsamëse, atšbe trabajo ya tijapochocá. Atše nyets tempo Jesucristbeñe sëndošbuachë. ⁸ Chcasna, atšbiana canye uacanana soye echántsemna, er Bëngbe Bëtsá tojama atše chabe bominiñe tšabia chaitsemnana. Bëngbe Utabná endmëna chë ndegombre tšabá ichamuá entsãnga añe o ndoñe tšabá tmonjamama, y cha chë uacanana soye šochántatšëtaye, entsãnga ntšamo tmojamama cha chaojabáyana ora. Pero cha nye atše ndoñe chë uacanana soye quešochtétatšëtaye, ndayá nyetscángbioye chca, ndëmuanýenga puerte imoboše cha cachiñe cháuesabama, cha imobobonshánayeca.

Inye soyënga Timoteobiana

⁹ Lempe ntšamo tcojobenacá cochjama betesco jabama atše jabínýama; ¹⁰ er Demas, cha yapa nye quem luar-entša entsãngbe soyënga bošá enjamna, cha cachcá šonjesonýá y Tesalónica puebloye tojtsoñe. Crescente Galacia

luaroye tonjá y Tito Dalmacia luaroye. ¹¹Nýe Lucas, chë šmonjanájabuachanënguentšana, mora átseftaca entsemna. Marcos cochjatsenguango y ácaftaca cochjëtšbetše, er cha atšbe trabajuama puerte oservená endmëna. ¹²Tíquico, Efesoye sënjichmó. ¹³Chacobjabo ora, uabonjanía šcochjesacñe, atšbe Troas bëts pueblaca, Carpbe yebnoca tijésaboshjona; chë librëšangánaca, pero chë uámana uabemana tsbuanachangá ndoñe chacmondëtsebnatjëmba.

¹⁴Alejandro, chë cobre soyënga pormayá, puerte bacá šonjaborlá. Bëngbe Utabná bochanjacastíga, ntšamo atšbe šonjaborlama. ¹⁵Chabiamana cuedado cochtsebomna; cha tojobenase ntšámnaca cmatjabórla, er cha chë bënga mondabuayiyiná soyëngama contra entsemna.

¹⁶Chë natsana soyama, mándayëngbe delante šonjanotocá jenéuyanama ora, atšbe ndocná chešnátanajabuache; nýetscanga cachcá šmonjésönýaye. Pero atšbe séntsobátmana, Bëngbe Bëtsá chama chënga chaotsaperdoná. ¹⁷Pero Bëngbe Utabná aíñe šonjanájabuache y tonjanma atšbe bëts añemo jtsebomnama, y chcase, atšbe sënjanobená Jesucristbiamana nýetsca chabe tšabe

noticiënga entsanga jábuayenama, y chë luarentša ndoñe judiënga tmonjanobená chë soye jouenama. Mëntšá, Bëngbe Utabná canýe uabouana resjuentšana šonjanatsbocá, mo canýe león jtsosañámentšana ndábioye cuafjatsbocacá, ¹⁸y Bëngbe Utabná šochanjatsbocá, bacna soye ndocná chašondëborlama; y sempre jtsinýenëse, celoye, chë ndayentšbe cha yomána luaroye šochanjetsbetše. ¡Nýetscanga nýetsca tescama cha chamotsatschuaná! Chca chaotsemna.

Pablo Timotéobioye jadiósoftanama

¹⁹Atšbe cuenta cochjácheuaye Prisca y Aquila, y Onesíforbe pamílnaca. ²⁰Erasto, Corinto pueblaca tontsoquedañe, y Trófimo Mileto pueblaca šocá sënjëtšeboshjona. ²¹Lempe cochjama, uaftena tempo chaondóshjango ora moye jabama. Acnaca cmontsechuaná Eubulo, Pudente, Lino, Claudia y nýetscanga muentšbe Jesucristbeñe ošbuáchiyënga.

²²Atšbe séntseimpadana, Bëngbe Utabná Jesucristo ácaftaca chaotsemna, y Bëngbe Bëtsá tšëngaftangbeñe tšabe bendicionënga chaotsemnama chaoma.

Tito

Jachuayama

1 Atše Pablo, Bëngbe Bëtsabe oservená sëndmëna y Jesucristbe ichmoná entsanga jábuayenama, chë Bëngbe Bëtsá chabe entsanga chamotsemnana tojábacacanga, Jesucristbeñe chamotsošbuáchema y chë ndegombre soyëngama chamotsetatšëmbuama; chë soyënga endmëna ntšamo bënga, Bëngbe Bëtsabe básenga bëtsemnana, mondoyena jtsamëse. ²Lempe chca sëndama, er Bëngbe Bëtsábeñe jtsošbuáchiyëse, atše sëntsobátmana chë nyetsca tescama yomna tšabe vida jtsebomnana. Bëngbe Bëtsá, chë ndocna te obosterayá, quem luare cabá ndmëna orscana tojanašebuachená entsanga chca vida jtsebomnana; ³y nÿa chama tempo tojóshjango ora, chë entsanga jábuayenama, soyëngaca Bëngbe Bëtsá chabe palabra šojinÿanyé, ndayá Jesucristo entsangbiana yochjanmama; y chca jábuayenama atše palabra šmonjabonÿé, Bëngbe Bëtsá, bëngbe Atsebacayabe mándoca. ⁴Tito, quem tsbuanácha cbontsabobiamná. Atše Jesucristbe soyëngama entsanga sënjanabuayiyná ora, aca chábeñe contsanošbuaché y nyets útata cachca ošbuáchiyana Jesucristbeñe bondbomna, y chca, aca mo atšbe ndegombre uaquinacá condmëna. Atše sëntseimpadana, Bëngbe Bëtsá Bëngbe Taitá y Jesucristo Bëngbe Atsebacayá, ácbeñe tšabe bendicionënga chaotsemnana chata chaboma, y chaboma aca ainaniñe tšabe ebionana chacotsebomnana.

Titbe trabajo Creta luaroca

⁵Atše Creta luaroca tcbonjëftsanboshjona, ntšamo chentše jamama

enjetsashbencá chacomama, y nyetsca pueblënguenache chë ošbuachiyëngcá enefjuanëngbeñe bëtsejemëngcá amëndayënga jtsemnana chacubuáyanama, ntšamo tcbonjëftsemnadacá. ⁶Canÿa bëtsejëmama uabuayaná mëntsá bontsemna: chaotsiyena ntšamo chabiana ndocná chaondëtsichamo ndoñe tšabá yontsama ca; nÿe canÿe shembásabe boyá; chabe básengna, Jesucristbeñe ošbuáchiyënga chamotsemna, y chamotsiyena, ntšamo ndocná chaodayana chënga nÿe jenomándama ntsobencá y nÿe ntšamo tmojtsebošcá imojtsiyena ca, o chënga chëngbe bëtseýtanga o mándayënga ndoñe montsayaunana ca. ⁷Er cánÿentše ošbuachiyëngcá enefjuanëngbe mandayá, Bëngbe Bëtsabe trabajo jamama tmojabonÿeyeca, cha bontsemna jtsiyenana, ntšamo ndocná chaodayana cha ndoñe tšabá yontsama ca; ntjajuaboycá, nÿe ntšamo cha tojtsebošcá ndoñe chaondëtsama; ndoñe chaondëtsiyena nÿe rábiaca jtsemnana; ndoñe chaondëtsetmó; penzentsero ndoñe chaondëtsemna; y ndoñe chaondëtseboše nÿe paselo becá crocénana jtsebomnana. ⁸Pero chabe yebnentše posada entsanga júyentšamiama sempre chaotseprontana, tšabe soyënga chaotsebínÿnana sempre chaotsentšena, botamana juabnayá chaotsemna, ntšamo Bëngbe Bëtsabe bominÿiñe tšabá yomncá chaotsiyena, nyets tempo Bëngbe Bëtsábioye chabotsadorana, y cachá nyetsca soyënguñe jenomándama chaotsobena. ⁹Cha bontsemna nyets tempo jtsošbuáchiyana y jtsobedecénana chë ndegombre buayenana soye, ntšamo tmojabuatëmbacá, chca, chë ndegombre buatëmbana soyëngaca ínÿenga añemo chaotsatšatnana, y chë soyama contra

tmojtsemnënga jáyëñjanama, ndoñe tšabá montsamama.

¹⁰Cha chca bontsemna, banga nÿe ndëmandánënga jtsiyenama bošënga mondmëna causa, y chënga mondmëna, nÿe ndaye ndoservena soyëngama yapa oyebuambnayënga y ínÿenga áingñayënga, y chcanga más mondmëna chë nÿetsca ošbuáchiyënga base bobachtema chë más delicadentšë tétsënënga jtsemnana yojtsamna ca mondbëtsichamënguentšë. ¹¹Y entseyta chëngbioye jtayáchetana, er chënga jamana ba pamíllanguentšë nÿetscanga Jesucristbeñe ošbuáchiyana chamotsajbanama. Chënga chca mondbëtsama, chë ndoñe yontsamna jtsabuátambayama soyënga jtsabuátambayëse, nÿe paselo crocénana jongánama.

¹²Enjamna canÿa, ndabiama entšanga jtsichámuana cach Creta luarentša diosëngbiama oyebuambnayá canjamna ca, y cha cachabe luarentša oyenëngbiama mëntšá tonjánayana: “Creta luarentšë oyenënga, nÿets tempo bosterënga mondmëna, ainana ndbomnënga y oyëñjayënga nÿe becá jasama bošënga ca.” ¹³Y chca ndegombre cha tonjánayana; chíyeca chënga jabuache cochjucácana, chca, chënga Jesucristbeñe chamotsošbuáchema y chamotsobedecena chë buatëmbana soyënga, chë ndayiñe bënga mondošbuaché; ¹⁴y cach judiëngbe cuentënga ndoñe chamondëtsuenana, ni chë ndegombre soyënga uabotenëngbe mandënga.

¹⁵Chë ainaniñe bacna juabnënga ndbomnënga y chca juabnëngaca ndëmandánënga, nÿetsca soyëngama jtsejuabnayana mo ndegombre tšabe soyënga cuaftsemncá; pero chë bacna soyëngaca mandánënga y Jesucristbeñe ndošbuáchiyënga, nÿe ndayámnaca jtsejuabnayana mo bacna

soye cuaftsemncá. Chca entsemna, er chëngbe juabnoca nÿe ena bacna soyënga jésebomnana, y ndaye bacna soye tmojama ora, chëngbe ainaniñe juabnënga ndoñe ntsebomnana, bacna soye tmojamama chaúyanama. ¹⁶Chënga jtsichámuana Bëngbe Bëtsá imuábuatma ca, pero ntšamo tmojtsama soyëngaca jtsinÿinÿayana chca ndoñe ndegombre yondmënama. Chënga Bëngbe Bëtsabe bominiñe puerte bacna entšanga mondmëna, y ntšamo cha tomandacá ndoñe ntsamana; chë causa chënga ndoñe ntsobenana ndaye tšabe soye jamama.

Soyënga ntšamo chë ndegombre buatëmbánana endmëncá

2 Ntšamo chacojtsoyebuambnacá sempre chaotsemna ntšamo chë ndegombre buatëmbánana endmëncá. ²Cochjayana chë bëtsëjëmëngna chamotsemna cachënga nÿetsca soyënguñe jenomándama obenënga, nÿetscangbiama mo uámana entšangcá utabnënga, ntšamo jtsiyenama tšabá juabnayënga, nÿets tempo chë ndegombre soyënguñe chamotsošbuaché, Bëngbe Bëtsá y nÿetscanga chamotsababuánÿeshana, y padecena soyënguñe puerte uantadënga chamotsemna.

³Cachcá, chë bëtsanana shembásenga chamotsiyena mo Bëngbe Bëtsábioye adorayëngcá, uayátsenayënga ndoñe chamondëtsemna, ni tmoyënga. Entsamna chamotsiyena tšabe soyënga jtsamëse; ⁴chë tobiasënga chamotsinÿanÿná y chamotsabuatambá ntšamo chëngbe boyanga y básenga jtsababuánÿeshanana, ⁵ntšamo cachënga jenomándama jtsobenana, ainaniñe ndocna bacna soye ntsebomnana, yebnentša soyënga jtsamama jtsentsënana, nÿetscángaftaca tšábenga jtsemnana, cachëngbe

boyángbioye jtsayaunanana, chca, ndocná chaondëtsobena Bëngbe Bëtsabe palabrama bacá jatóyebuambnayana, ntšamo chë tobiasënga tmojamama.

⁶Cachcá, chë bobontsënga añemo cochtsatsatnaye cachënga jenomándama chamotsobenama, ⁷y chënga cochjínÿanÿiye ntšamo yomna jtsiyenana, cach aca nÿetsca soyënguñe tšabá jtsamëse. Chca chacojtsabatambá ora, nÿe chë ndegombre buayanánana cochtsabuátambaye y corente respëtoca chca cochtsama, ⁸chë ndegombre soyënga jtsóyebuambnayëse; chca, ndocná chaondobená jayanana aca ndoñe tšabá tconjayana ca, y chca, chë acbe contra ichámënga chamotsëuatja, er ndocna bacna soye quemochatobenaye bëngbiana jayanama.

⁹Chë nÿets tempo nÿe ínÿabiana oservënënga cochjábuaenaye, chëngbe nduiñëngbioye chamotsobedecénama, soyënga chamotsama chënga chamotsóyejuama, y yajuatsanënga ndoñe chamondëtsemnana. ¹⁰Ndoñe chamondëtsatbëbana, pero añe nÿetscañe tšabe palabra bomnënga chamotsemna. Chënga chca entsamna, chca, ínÿenga chámuiñe y chamojuabó tša botamana chë buatëmbana soyënga, Bëngbe Bëtsá bëngbe Atsebacayabiana yomna ca.

¹¹Er Bëngbe Bëtsá bënga šonjinÿanÿé cha bëngbe tšabiana juabnënga yobomnana, y chca, cha tojama nÿetsca entsanga chamotsobena atsebacánënga jtsemnana. ¹²Chë Bëngbe Bëtsabe juabna bëngbe tšabiana, šontsabuatambá jtsajbanama oyenana soyënga jtsamëse mo chë Bëngbe Bëtsá ndoñe mondadoranëngcá, quem luarentša bacna soyënga bošana jtsajbanama; y ntšamo mora quem luarentšë jtsiyenámncá šontsabuatambá, cabënga jenomándama jtsobenëse,

ntšamo Bëngbe Bëtsabe bominiñe tšabá yomncá y cha jadórama soyënga jtsamëse. ¹³Y chca jtsamëse, y Bëngbe Bëtsábeñe ošbuachiyánaca jtsiyenëse, jtsobátmanana chë puerte oyejuayana jtsebomnana te, Bëngbe Bëtsá obená y Atsebacayá Jesucristo, buashinÿinÿaniñe y canÿe corente uamanacá yochjésabo ora. ¹⁴Cha chabe derecho vida jtsobomñama cachcá tojanonÿá y bëngbiana tojanóbana, chë ntšamo Bëngbe Bëtsá bemandacá ndoñe yondmëncá jtsamëse oyenentsana bënga játsebacama, ainaniñe ndocna bacna soye ndbomnënga jábiamama, bënga chábenga chamotsemnana, sempre prontánënga ntšamo tšabá yomncá jtsamama.

¹⁵Chca cmontsemna jtsabuátambayana, chënga becá añemo jtsatsatnayëse, y jtsinÿanÿayëse chënga bacna soye tmojamama, chë nÿets condbomna mándoca jucacánëse. Ndoñe catjaleséncia ndocná chaodayana aca mando ndoñe condbomna ca.

Ndayá Jesucristbeñe ošbuáchiyënga yojsamna jamana

3 Cochtsama chënga chamuatenójuaboma chë mandadënga y inÿe mándayënga chamotsayaunanama, chamotsobedecénama, y tšabá yomncá jamama sempre chamotseprontánama. ²Ndocnabiana ndocna bacna soye chamondëtsoyebuambná, penzentserënga ndoñe chamondëtsemna, ndayá nÿetscángaftaca natjëmbana jtsiyenama bošënga, tšabá mándbomnënga, nÿetscanga tšabe ainánaca imojsénÿama entsanga jtsinÿanÿayëse.

³Er béngnaca tempo monjamna Bëngbe Bëtsabe soyëngama ndosertánënga, ntšamo Bëngbe Bëtsá endëmandacá ndoñe quemjatanama,

ingñénenga y mandánenga monjamna nyetsca bacna soyenga jamama juabnéngaca y nye quem luarentse tsabá jtsemnama juabnéngaca. Bënga monjanienya nye bacna soyënguine juabnaye, inyenga uantšaboše. Inyenga bënga šonjanëbuayënja y bënga nyetscanga monjanenáboyënja. ⁴ Pero Bëngbe Bëtsá, bëngbe Atsebacayá, bëngbe tsabiama juabna yobónayeca y tša šuababuánýeshanama šonjan-inyanýé ora, ⁵ cha šonjanatsebacá, pero ndoñe nderado bënga ndaye tsabe soye tmojanmama, ndayá cha bëngbiamama tbojanongméyeca. Cha šonjanatsebacá, bëngbe bacna soyenga jabuajuánase, y chë Uámana Espiritu jujabuáchëse, bënga mo tsmëma entsangcá chamotsemnama, ntšamo tempo yojamncá ntjatsjuabnycá y ntjatamcá. ⁶ Bëngbe Atsebacayá Jesucristbeyeca, Bëngbe Bëtsá tojanma Uámana Espiritu bëngbe ainaniñe nyets tempo chaotsemándama y bënga chašotsëjabuachanama, ⁷ chca bënga, Bëngbe Bëtsá bacna soyëngama šojaperdónanga y bëngbe tsabiama juabna bómnyeca tojayana chabe bominýiñe tsábenga imomnénga, chamotsobena cha yobomna soyënguentšana bënga mo ndayá cuaftsëtocancá jýëngacñama, y chca, chábeñe jtsošbuáchiyëse, chë nyetsca tescama yomna tsabe vida chamotsobátmanama.

⁸ Chca, lempe ntšamo tijayancá nýa ndegombre endmëna, y atše séntseboše chë soyëngama bëtscá chacotsabuatambá, chca, chë Bëngbe Bëtsábeñe tmošbuachenga chamotsentšena chë tsabe soyënga jtsamama. Chë buatëmbánana puerte tsabá endmëna y nyetscangbiamama bëtscá endoservena. ⁹ Inyenga nye ndoservena soyëngama jabuachana tmojtseatsëtsná ora, y anteungbe

cuentëngama chamojtsoyebuambná ora, ndoñe cattsonremetena; ndoñe cattsama cach tsëngaftanga ndoñe tsabá jtseñeyunanamcá, y judiëngbe leyëngama ndoñe inyëngaftaca cattsenpéliaye. Chca jtsamana tondayama ntsoservëna, y nye bonamente chca jtsamana.

¹⁰ Nderado nda tojtsama entsanga ndoñe cachcá nyetscanga chamondëtsejuabnama y chamotsenpéliama, canýe o uta soye cochjabuayená ndoñe tsabá tonjamama; pero cha ndoñe tcmojóyeunase, chentsana cháftaca ndoñe más cattsóyebuambnaye. ¹¹ Chca cochjama, er aca cochanjátatsëmbona canýa chca tojtsemná, chabe juabna tojatrocá bacna soyënga jtsejuabnayama. Chë soye y chë inýe bacna soyënga ntšamo cha tojt-samcá, jtsinýanýnayana cha ibojtsemna castiganá chama jtsemnama.

Inýe soyënga Titbiamama

¹² Atše, Artemas o Tíquico ácbioye chajichmó y choca chaojáshjango ora, ndayánaca cochjama Nicópolis puebloye aca jama atše jinýama, er atše sënjajuabó chentše chë uaftenëntscuana jëftsemnana. ¹³ Lempe ntšamo chacojobenacá, cochjuájabuache chë inýenga obuauyayá Zenas, y Apólosnaca; lempe ntšamo chata ibojtsëjabotcá cochjátataye, inýoye jama jatóntšama chamobenama y benachëjana tondaye chaondëtsabuáshebenama. ¹⁴ Atše séntseboše, bëngbe entsanga, chë bëngcá Jesucristbeñe ošbuáchiyënga, chamotsentšena chë tsabe soyënga jtsamama y chë puerte ujabótënga jtsëjabuáchanama, chca, chënga tondayama ndoservena vidënga ndoñe chamondëtsebomnama.

Pablo Títbioye jadiósoftanamama

¹⁵ Nyetscanga chë átšeftaca montsemnéngnaca cmontsechuaná. Atšbe cuenta

cochjácheuaye n̄yetscanga chē bēnga bómnayeca. Atše, Bēngbe Bētsá
imuababuan̄yeshan̄ngbioye, cach séntseimpadana, cha chaoma ácbeñe
bēngcá Jesucrístbeñe ošbuáchiyana tšabe bendicionēnga chaotsemnama.

Filemón

Jachuyama

1 Atše Pablo, mora utamená Cristo Jesusbiamá oservena causa, quem tsbuanácha séntsabiamná, Jesucristbeyeca bēngbe catsata Timotéoftaca, acbiamá Filemón, bēngbe bonshaná y nda bēngaftaca condētrabája Jesucristo jasérviama. ²Atše séntsacheuaná, Jesucristbeyeca bēngbe uabena Apia y Arquípnaca, nda bēngaftaca cánýiñe Jesucristbe soyēngama endenojuerzana; y nyētsca ošbuachiyēngnaca, ndēmuanýenga imuamana acbe yebnentše jénefnama Bēngbe Bētsá jētschuyama. ³Atše séntseimpadana Bēngbe Bētsá Bēngbe Taitá y Bēngbe Utabná Jesucristo, chata chaboma tsabe bendicionēnga tsēngaftangbeñe chaotsemnana, y chaboma tsēngaftangbe ainaniñe tsabe ebionana chašmotsebomnana.

Filemonbe bonshánana y ošbuáchiyana

⁴Bēngbe Bētsáftaca stsencuēnta ora, acbiamá sēndbētsenojuabnaye, y sempre acbiamá Bēngbe Bētsá sēndbētsatschuanaye, ⁵er atše sēnjátatsēmbona ntšamo aca nyētsca chē Bēngbe Bētsábenga imomnēnga icuababuánýeshanama, y ntšamo aca Bēngbe Utabná Jesúsbeñe tša icošbuáchema. ⁶Bēnga, Jesucristbeñe ošbuachiyēnga quetsomñecá, ácaftaca mo canýacá fsēndmēna. Chca endmēnayeca atše Bēngbe Bētsá séntseimpadana, tsēngaftanga chašmobená más botamana josértana nyētsca chē Bēngbe Bētsábicana tmojóyēngacñe tsabe bendicionēnga, bēnga Cristo Jesúseftaca cánýiñe mo canýacá bētsemnayeca. ⁷Jesu-

cristbeyeca atšbe bonshana catsata, aca chē Jesucristbeñe ošbuachiyēnga tša condábabuanýeshanama, atše corento oyejuayá séntsemna y bēts añemo séntsebomna. Y aca tcojama, nyētscanga chē Bēngbe Bētsábenga imomnēnga chēngbe ainaniñe ngmēnaca ndoñe chamondétsemnana, chēnga jujabuáchese.

Pablo, Filemónbioye Onésimbiamá tbojanimpadá

⁸Y chca, atše Cristbe ichmoná quetsomñecá séntsobena, aca nyē jamándana ntšamo yomncá chacotsamama, pero atše chca ndoñe quichatsma. ⁹Y cbondbobonshánayeca, chca játamamna, aca cbochanjaimpáda. Atše Pablo, Jesucristbe cuenta ichmoná jóyebuambayama y mora utamená, chabiamá oservena causa, ¹⁰canýe ruego cbochanjábema, Onésimo chacuájabuachama. Atše utamená tsmēnēntscuana, Jesucristbe soyēngama cha sēnjanbuayiyná. Cha Crístbeñe tonjanošbuachéyeca, cha mo atšbe uaquiñacá tonjanóbema.

¹¹Tempo, cha ácbioye tondayama quecmēnjátanservena, pero mora cha becá entsámama, acbiamá y atšbiamá. ¹²Mora ácbioye séntsatichamná, y atše sempre chabiamá sēndbētsenojuabnaye y sēndbobonshana. ¹³Atšbiamá puerte tsabá manmēna cha átseftaca matēnjoquedase, acbe cuenta atše chašoservema, cárceloye utamená séntsemnēntscuana, chē tsabe noticiēnga entšanga abuayiynaye causa. ¹⁴Pero atše ndoñe chiyatsma cha chaoquedama atše chašúájabuachama, er atše ndoñe quetsátsboše aca obligaciōnaca chacotsemnana, atše jujabuáchama ndayánaca chacomama; y séntseboše aca ndayánaca chacoma, cach aca chca jamama puerte tcojtsebošese. Chcasna, tondaye quichatsma,

chë soye chca chaotsemnama aca cabá ndocá ntjayaná. ¹⁵Atše séntsejuabná nderado Onésimo ácbentšana básefta tescama tojanoluaré, mora ácaftaca nyets tempo jtsatsmënama ca, ¹⁶y ndoñe nye acbiana mo nyets tempo canye oservenacá, ndayá chama más uamanacá, mo Jesucristbeyeca canye bonshana catšatcá. Atše puerte Onésimo séndbobonshana, y acna cmontsemna más cha jtsebobonshánana, er cha mora ndoñe quenátsmëna canya nye acbiana nyets tempo oservená, ndayá Bëngbe Utabnábeyeca canye catšata, ntšamo cach aca condmëncá.

¹⁷Chca, aca atšbiana condëjuabná mo ácaftaca cányiñe Bëngbe Utabnabiama trabajayacá; chíyecna cmontsemna cha jtofjana, mo atše šcojofjá.

¹⁸Nderado ntšamo cha tcmojanborlá o ndayánaca tcmondebena, atše chama cbochjëséntšabuachiye. ¹⁹Atše Pablo, cach atšbe cucuátšeca quem soye séntsabiamná. Atše chama cbochanjëséntšabuachiye. Ndegombre, ndoñe quenátšiyta atše chacbëyana becá šcondebena ca, ntšamo atsbočaná jtsemnama atše tbojánbuayenama.

²⁰Chcasna, Jesucristbeyeca atšbe catšata, Bëngbe Utabnáftaca cányiñe

mo canyácá quetsomñecá, Diosmanda chë pavor šcochtsebema. Diosmanda cochjama atšbe ainana ngmënaca ndoñe chaondëtsemnama.

²¹Atše chca cbontsabobiamná, er atše tšabá séndétatsëmbo, ntšamo cbontseimpadancá cochjamama, y cabá más chama cochjatsmama. ²²Y mora inye soye, Diosmanda posada šcochjaboprónta, atše jányama chajjábocna orscama, er atše puerte jtsošbuáchiyëse Bëngbe Bëtsábeñe séndobátmána, cha tšëngaftangbiana yochjama lempe ntšamo atšbiana chašmojotjañcá, y chca, cha šochjaleséncia atše tšëngaftangbioye jésama.

Pablo Filemónbioye jadiósoftanama

²³Epafras, muentše átšeftaca cárceloye utamená, Cristo Jesusbiana entšanga abuayiynaye causa, chánaca cmontsechuaná. ²⁴Y Marcos, Aristarco, Demas y Lucas, chë béngaftaca mondëtrabájanga Cristo jaserviama, chéngnaca cmontsechuaná.

²⁵Atše séntseimpadana Bëngbe Utabná Jesucristo, chaoma tšabe bendicionënga tšëngaftangbeñe chaotsemnama.

Hebreos

Bëngbe Bëtsá bëngaftaca tojoyebuambá, chabe Uaquiñáftaca

1 Tempo, Bëngbe Bëtsá ba soye y ba soyéngaca bëngbe bëts taitángbioye tojanéyana, chë chabe juabna oyebuambnayéngaftaca. ²Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chaśúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnana, y chábeyeca Bëngbe Bëtsá quem luare y nyetsca inye luarënga tojama. ³Cha endinñanñá Bëngbe Bëtsabe corente buashinñinñanana y uámanana, y cha endmëna cach Bëngbe Bëtsacá, y chábeñe bënga mondobena jinñama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinñncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentsana Bëngbe Bëtsá tojaninñanñé cha puerte bëtsá y uamaná bëtsemnana, celoca játbemëse, Bëngbe Bëtsabe catsbioica, nyetscanga jtsamëndayama.

Bëngbe Bëtsabe Uaquiñá chë angelëngbiama más bëtsá yomna

⁴Y chca, Bëngbe Bëtsá tbojánbema chë angelëngbiama más uamaná y obená, er Bëngbe Bëtsá tbojanbuajó canye más uámana uabaina y chë angelëngbiama canye más uámana trabajo tbojanbonyé. ⁵Ndegombre chca endmëna, er Bëngbe Bëtsá ndocna te ndocna ángelbioye mëntśá tbonjaniyana, ntšamo chabe Uaquiñábioye tbojaniyancá: Aca atšbe Uaquiñá condmëna.

Mënté entšanga sënjinñanñé aca atšbe Uaquiñá comnana ca.

Ni ndocna angelbiama mëntśá tojánayana, ntšamo chabe Uaquiñabiama tojanayancá:

Atšbe canye taitá chabiama chántsemna, y cha canye Uaquiñá atšbiama ca.

⁶Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháuashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷Y chabe angelëngbiama, mëntśá tojánayana:

Atšbe sëndama atšbe angelënga, chë atšbe buayinñayënga, mo binñiëngcá chamotsemnana, y chënga, atšbe oservëngënga, mo inñëngcá ca.

⁸Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbëtsemandaye, ntšamo tšabá yomncá jtsamëse.

⁹Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero nña tondayama cmondogustana bacna soyënga jtsamana, chë ndayá Bëngbe Bëtsá ndoñe yondboše soye;

chíyeca Bëngbe Bëtsá tcmojabocacá, y tojama aca puerte oyejuayá chacotsemnana,

chë inñëngbiama más oyejuayá ca — Bëngbe Bëtsá tojánayana.

¹⁰Bëngbe Bëtsá mëntśánaca chabiama tojánayana:

Utabná, quem luare jobojátšama ora, aca quem luare tconjanma,

y lempe chë celoca yomna soyëngnaca.

¹¹Lempe chë soyënga nyets tempo ndoñe queochátsmëna;

aca nÿetsca tescama cochántsemna.
Lempe chë soyënga echanjopochóca, mo
tojuatanguaná entšayacá.

¹² Aca chë luarënga cochanjátrocaye, mo
tsmécá cuafjabiamcá.

Chca, chë luarëngaca cochanjama,
mo entšayá tcojtenëjonëtse y
tcojenotrocacá.

Pero aca nÿets tempo cach aca
cochandesomñe,
y nÿets tempo vida cochandesóbomñe ca
—cha tojánayana.

¹³ Bëngbe Bëtsá ndocna te ndocna án-
gelbioye mëntšá tbojanianyana, ntšamo
chabe Uaquiñábioye tbojaniancá:

Atšbe catšbioica cochtsetbemana,
acbe uayayënga acbe cucuatšinë
chamoquedama atšbe obenánaca
chjamëntscuana ca.

¹⁴ Ndegombre, nÿetsca angelënga
espíritënga mondmëna Bëngbe Bëtsá
jaserviama, ndëmuanÿenga cha
tojanichamó bënga jabújabuachama,
chë atsebácanënga mochtsemnëngbe
tšabiamana.

Canÿe bëts soye endmëna atsebácanënga jtsemnana

2 Chíyeca, bënga šontsamna
sempre Bëngbe Bëtsabe soyënga
jtsuenanana, chë bënga tmonjouena
soyënga, chë tšabe benachentšana
ndoñe chamondojuánama. ² Ndayá
Bëngbe Bëtsá tempo angelëngaca
entšanga tojanamëndacá, canÿe
ndegombre soye endmëna, y entšanga
entsamna chca jtsobedecénana; y chë
bacna soye tmojanmënga y ntšamo
Bëngbe Bëtsá tojanmandacá ndoñe
tmonjanmënga castigo tojanatšatá, chca
tmojanma causa; y chca, ³ bënga chca
bacna soyënga tmojtsamëse, ¿ntšamo
mochjobenaye jtsejuabnayana Bëngbe
Bëtsá chama ndoñe šochanjacastígaye
ca? Ndegombre cha chca echanjama,
bënga chábeñe ndoñe tmontsošbuách-

ese, chë bëts soye jëftsashjáchama,
atsebácanënga jtsemnana. Bëngbe
Utabná chë natsaná yojtsemna nda
entšanga tojanabuayená Bëngbe
Bëtsá entšanga yochjánatsebacama; y
ínÿenga bënga šonjanabuayená cachcá
ntšamo chábioye tmojanoyeunacá.
⁴ Y Bëngbe Bëtsánaca tonjaninÿanÿé,
ndayá chënga tmojanabuayenacá
ndegombre bëtsemnana, chabe
obenana jinÿanÿiyama soyëngaca,
entšanga chamenjnaná soyëngaca, bëts
soyëngaca, y entšanga chë Uámana
Espíritu ainaniñe chamotsebomnana
cha jtsamëse. Chca jamëse, cada ona
chaotsobena jamama ntšamo Bëngbe
Bëtsá yobošcá.

Bëngbe Bëtsá tojanma Jesucristo entšangcá chaotsemnana

⁵ Bëngbe Bëtsá angelënga ndoñe
tonjubuáyana chamotsemándama ndayá
quem luarentse yochtsemniñe, lempe
mo tsmécá chaotsemnana Bëngbe
Bëtsá chaojama ora, chë ndayama mora
bënga montsoyebuambná. ⁶ Chamna,
ínÿoca Bëngbe Bëtsabe uabemana
palabrënguine mëntšá endayana,
ntšamo chábioye canÿa tbojaniancá
tojánayana:

Entšanga ndoñe yapa uámanënga
quemátsmëna, as ¿ndáyeca tša
chéngbeñe cuanjésejuabnaye?

Chënga entšanga mondmëna. ¿Ndáyeca
tša chënga cuanjésanÿena?

⁷ Aca tcojama entšá puerte uamaná
chaotsemnana, y chë angelëngna
nÿe batšatema chabiamana más uá-
manënga mondmëna.

Aca tcojama cha puerte uamaná
y respeto merecido bomná
chaotsemnana,

⁸ y cha chaotsemándama nÿetsca chë
inÿe soyënguine, chë quem luar-
entse aca tcojamiñe —chiñe canÿa
tojánayana.

Entsá lempe chaotsemándama Bèngbe Bètsá tojanma ora, tondaye tonjánboshjona entsáftaca ndèmandana soye ca. Pero méntsoñama ndoñe n'ya chca quemèntin'ye, chë entsá lempe ntšamo quem luarentše yomncá jtsemándayana. ⁹ Pero bènga mondétatšëmbo y corente mondon'ya Jesús aínè chca tojanmama. Bèngbe Bètsá tojanma cha nduamaná chaotsemnama, mo can'ye entsácá, baseftayté chë angelèngbiamama más batšá uamaná. Bèngbe Bètsá, entsàngbe tšabiamama jtsejuabnayèse, yojánboše Jesús chaóbanama, corente jasúfriase; Bèngbe Bètsá yojánboše cha chca chaomama, n'yets luarentša entsàngbe tšabiamama. Y Jesús ya chca tojánmayeca, Bèngbe Bètsá ya tojin'yan'yé cha puerte bètsá y uamaná bétsemnama.

¹⁰ N'yetsca soyènga yobin'ya Bèngbe Bètsabiamama y chábeyeca. Tšabá enjamna, Bèngbe Bètsá jamana Jesucristo chaotsemnama lempe ntšamo entsànga tmojtsajabotcá, nda chèngbe bacna soyènguentšana cháuatsebacama. Bèngbe Bètsá chca tojanma, Jesús, chë entsànga atsebácanènga jtsemnama unachayá, chaosufrima jamèse, chca, ba entsànga celoca, mo chabe basengcá, cháftaca bétšétsànga chamotsemnama. ¹¹ Er Bèngbe Bètsá cach Taitá n'yetscangbiamama endmèna: Jesús, chë entsànga Bèngbe Bètsábenga chamotsemnama iuamabiamama, y chë entsànga chca chamojtsemnèngbiámnaca. Chíyeca Jesús, Bèngbe Bètsabe Uaquiñá, ndoñe ntsèuatjana chéngbioye catsátanga ca jtsachembuanama. ¹² Bèngbe Bètsabe uabemana palabrenguine Bèngbe Bètsábioye cha méntšá tbojanianama: Atšbe uabentséngbeñe acbiamama chanjójeyebuambaye, y jacántase cbochanjètschuaye, ácbioye adórayènguentše ca.

¹³ Y méntšánaca cha Bèngbe Bètsabiamama tojánayana:

Atšbe atšbe Bètsábeñe chantsošbuáchiye ca.

Y más chcoye méntšá tojánayana:

Muentše Bèngbe Bètsabe básengaftaca séntsemna, chë atšbe cucuatšínè to-jábashejuanènga, atšbe jtsan'yenama ca.

¹⁴ Quem Bèngbe Bètsabe básenga n'yetsca entsàngcá mondménayeca, Jesúsna can'ye entsá chéngcá tojanóbemama. Cha chca tojanma, jóbanèse, chë entsànga jóbanamama chaotsamnamama obenana bomná Satanás, jayénjanama. ¹⁵ Y chca, cha tojama chë jóbanamama y ndayá chentšana yochjopásama auatjènga ndoñe chamondétsauatjama; chénga n'yets tempo corente ngménaca imnoyena, jóbanamama auatja causa. ¹⁶ Er ndegombre, cha ndoñe tonjánabo chë angelènga jabújabuachama, ndayá chë Abrahámbentšana entsàngbioye. ¹⁷ Y chama cha ibojamna jtsemnana n'yetsca soyènguiñe cachcá mo chabe uabentséngcá, chë entsànga, chca, jobenayamama jtsemnama chéngbiamama mo bachnangbe can'ye más uámana amèndayacá, Bèngbe Bètsá jtseimpadánamama chéngbioye chéngbe bacna soyèngama cháuaperdonama, puerte lastemado méná y sempre ntšamo Bèngbe Bètsá tbojauyancá amá. Chca, cha jóbanèse jamama entsànga chamobenamama perdonánènga jtsemnama, y chca, jobenayamama Bèngbe Bètsáftaca tšabá tempcá jtsemnèngama. ¹⁸ Y mora cha entsobena, ndèmuanyènga bacna soye jamama tojócochenguènga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentšena ora.

Cristo Moisesbiana más uamaná endmëna

3 Chíyeca, Jesucrístbeyeca catátanga, Bëngbe Bëtsábenga, ndëmuanÿenga Bëngbe Bëtsá tojáchembo chabe entsanga chamotsemnana, corente Jesucrístbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uamana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguine y chë mondbáyana ndegombre yomna ca soyënguine. ²Er Jesús nÿets tempo tojanma ndayá chaotsamama Bëngbe Bëtsá tbojaniyancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entsángbioye cháuaservema. ³Canÿe yebna jebuaná chë yebnama más uamaná jtsemnana; cachcá Jesús, nda inétsama entsanga Bëngbe Bëtsábenga chamotsemnana, más jtsomerecénana Bëngbe Bëtsá cha puerte bëtsá y uamaná bétsemnana cháuinÿanÿema, nÿe ntšamo Moisés, canÿa Bëngbe Bëtsabe entsanguentsá yojanomerecénama. ⁴Ndëmuanÿe yëbnënaca canÿe jebuaná jtsebmomnana, pero Bëngbe Bëtsá endmëna nda tojanma lempe ntšamo yobinÿncá. ⁵Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nÿetsca Bëngbe Bëtsabe entsángbeñe, y yojamna canÿa corente tatsëmbuá ndayá más chcoye yochjanopásama, ndayá Bëngbe Bëtsá yochjánayanama. ⁶Pero Cristo, ndayá Bëngbe Bëtsá tobošcá jamana, chë Bëngbe Bëtsabe entsángbeñe Uaquiñacá

jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentsëngcá. Bënga chë pamillentsá entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiana yochjamama tmojtsobátmanëse, y bënga chca jtsebmomnana puerte oyejuayënga tmojtsemnëse.

Chë jóchnama uamana luare Bëngbe Bëtsabe entsángbiana

⁷Chcasna, ntšamo chë Uamana Es-píritu Bëngbe Bëtsabe uabemana palabrenguine tojanayancá:

Mënté tsëngaftanga ndayá Bëngbe Bëtsá tojtsichamcá šmojouenëse,

⁸ndoñe šmattsama, Bëngbe Bëtsabe buayenana soyënga tsëngaftangbe ainaniñe ndoñe chaondómashënguama,

mo chë entsanga ndoyena luaroca Moisésoftaca imojëftsemnëngcá, Bëngbe Bëtsabe contra nÿetsca soyënguine imojtsemna.

Chënga bëtscá bacna soyënga tmojanma, mo ndayá cuafsamcá jinÿama ntsachetsá más muanjobenaye jamana y Bëngbe Bëtsá cabá uantado chëngaftaca tayojtsemnana.

⁹Bëngbe Bëtsá tojánayana: “Chentše, tsëngaftangbe bëts taitanga bëtscá monjánama jinÿama ndayéntscoñe atše uantado chëngaftaca tsjamnana;

chca chënga tmonjanma, masque canta bnétsana uatëntscuana chënga chentše tmonjáninÿe chë atše sënjánama bëts soyënga.

¹⁰Chíyeca, atše chorsca entsángaftaca šonjánetna y sënjánayana:

‘Tšëngaftanga mora átšeftaca ndoñe quešmátajna, mo chë otšëñënga tmojtsemnëngcá, y ndoñe šmonjábošëna jtsiyenana ntšamo atše tsbošcá jtsamëse.’

¹¹ Chýyeca, atše chëngaftaca etonaná sënjánayana, mo nda cuafjajuracá, chënga ndocna te mochjéftsashjache chë átšeftaca jóchnama uámana luaroye jashjanguama ca” —cha tojánayana.

¹² Jesucristbeyeca catšátanga, yejuana šmochtsantješna ndocná tšëngaftanguentšá chaondétsebomna canýe ainana bëtscá bacna juabnëngaca, y chë causa chaotsemna Bëngbe Bëtsábeñe ndošbuachiyá, y Bëngbe Bëtsábentšana, chë sempre iuetsemnábentšana chaotsojuánañe. ¹³ Chamna, nyetscanga añemo šmochtsatenatšetnaye cada te, chë bënga imobena Bëngbe Bëtsá joyeunayama tempo imoyenëntscuana, chë Bëngbe Bëtsabe uabemana palabreñguñe “mënté ca” uabaina tempo. Chca cmontsamna, ndocná tšëngaftanguentšá chaondétšamama, Bëngbe Bëtsabe buayenana soyënga ainaniñe ndoñe más chaondómashënguama, bacna soyënga jamama juabnëngaca ingñená. ¹⁴ Er, ndayá Jesús chabe amëndayoca yobomnentšana bënga chamóyëngacñamna, bënga šontsamna sempre ainaniñe corente jtsetatšëmbuana Jesusbe soyënga ndegombre soyënga bëtsemnama, ntšamo bënga chábeñe jtsošbuáchiyama tmonjanontsé ora monjanamcá.

¹⁵ Ntšamo Bëngbe Bëtsabe uabemana palabreñguñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama, mo chë entšanga ndoyena luaroca Moisésoftaca imojéftsemnëngcá,

Bëngbe Bëtsabe contra nyetsca soyënguñe imojtsemna ca.

¹⁶ ¿Y ndëmuanýënga imojamna, chë Bëngbe Bëtsá tojanéyancá tmojanuenentšana, nyetsca soyënguñe chabe contra imojtsanmëna? Co chë Moisésbeyeca Egiptocana tmojánbo-canënga. ¹⁷ ¿Y ndëmuanýëngaftaca Bëngbe Bëtsá etonaná canta bñëtsana uatëntscuana yojtsemna? Co chë bacna soyënga tmojanmëngaftaca, ndëmuanýënga entšanga ndoyena luaroca tmojanóbana y chëngbe cuerpo chentšë tojanoquedá. ¹⁸ ¿Y ndëmuanýënga tojanéyana, mo nda cuafjajuracá, chënga ndocna te mochjéftsashjache chë cháftaca jóchnama uámana luaroye jashjanguama ca? Co chë ndëmuanýënga ntšamo cha tojanmandacá ndoñe tmonjanmënga. ¹⁹ Y ndegombre, bënga montsobena jinýama chënga ndoñe tmonjéftsashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4 Chýyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašëbuachenacá cachcá méntscóñama iuétsemna, puerte cuedado mochtsebomna, nderado ndánaca tšëngaftanguentšá ndoñe nanjobenaye chca jashjáchama. ² Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabreñguñe ndoñe montsanošbuaché. ³ Pero bënga, chë Jesucristbeñe tmojošbuachengna, mochanjobenaye chë jóchnama uámana

luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntšá tojánayana ora:

Chíyeca, atše chéngaftaca etonaná, sën-jánayana mo nda cuafajuracá, ndegombre chënga ndoñe mochjéftsashjache chë jóchnama uámana luaroye jashjanguama ca.

Pero cha chabe trabajo tojanpochocá, quem luare tojanma ora; ⁴er Bëngbe Bëtsabe uabemana palabrenguine cánÿentše mëntšá endayana, chë canÿsëfta tianoye ndayá cha tojanmama:

Bëngbe Bëtsá nÿetsca trabajëngama ton-janochná chë canÿsëfta tianoye ca.

⁵Y cachentše Bëngbe Bëtsabe uabemana palabrenguine endayana, chë tempo chábioye chca tmojtsanábotengbiama:

Chënga ndocna te quemocháisashjache chë átseftaca jóchnama uámana luaroye jashjanguama ca.

⁶Chë entsanga monjamna chë natsanënga chë tsabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjéftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguine tmojtsošbuáchenga, mochjéftsashjache chë Bëngbe Bëtsáftaca jóchnama uámana luaroye jashjanguama.

⁷Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canÿe tempo tojuinÿnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguine mëntšá tojánayana ora:

Mënté tsëngaftanga, ndayá Bëngbe Bëtsá tojtsichamcá šmojouenëse, ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama ca.

⁸Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebmnama cha choca matënjammëse, Bëngbe Bëtsá bayté chentšana, David yojéftsiyena ora, inÿe tempuama ndoñe matënjanoyebuambá, chë ndaye ora entsanga muanjobenaye chë cháftaca jóchnama uámana luare jashjáchama. ⁹Y chca, cabá endmëna canÿe uámana luare ndayentše Bëngbe Bëtsabe entsanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora;

¹⁰er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora.

¹¹Chíyeca, šontsamna lempe ntšamo tmojobenacá jamana chë jóchnama uámana luare jéftsashjáchama, ntšamo chë Bëngbe Bëtsábioye ndoñe tmonjanoyeunangcá ndocná chaondëtsamama, y chë causa chënga chë soye ndoñe tmonjéftsashjache.

¹²Er Bëngbe Bëtsabe palabra endmëna mo canÿe aina soyecá, nÿets tempo entsángbioye ndayánaca jtsabuá-tambayana, y bëtscá jamana corente obenánaca, y ndocna te nÿe bonamente chë palabra jóyebuambayana. Mo chë nÿets utoicajana más eššana espadëjaquécá, jobenayana puerta jashenoye jatëtsana canÿe cuerpo tcojatëtse ora, cachcá y cabá puerta más Bëngbe Bëtsabe palábraca, cha bënga jinÿanÿiyana ntšamo bënga

nÿe bēngbe ainaniñe tmojtsejuabná y tmojtsebošcá, y chē ndocnábioye tmonjinÿinÿé sóynaca; y chē palábraca cha endobena jáuyanana ntšamo bēnga tmojajuabó y tmojabošencá aiñe o ndoñe tšabá bētsemnana. ¹³Ntšamo Bēngbe Bētsá tojamentšana tondaye quenátopodena chabiamá iytēmenana jtsemnana. Bēngbe Bētsá lempe bominÿe iuetsequēcná, y nÿetsca soyēngama y nÿetscangbiamá lempe yotátšēmbó; Bēngbe Bētsá, ndábioye šojtsamna sempre jojuana ndáyeca canÿe soye chca tmojamama.

**Jesús endmēna chē más uámana
bachnangbe bēts amēndayá**

¹⁴Jesús, Bēngbe Bētsabe Uaquiñá celoye tojámashēngo, y mora cha endmēna nda chabe delante sempre bēngbiamá ibuétseimpadana, mo chē bachnangbe canÿe más uámana amēndayacá. Cháyeca, bēnga šontsamna sempre chábeñe jtsošbuáchiyana, ntšamo bēngbe ndegombre ošbuáchiyana yomncá, chē ndayama bēnga nÿetsca entšángbeñe tmojayana. ¹⁵Er chē bēngbiamá impadaná, mo bachnangbe canÿe más uámana bēngbe amēndayacá, Jesús, yobena bēngbiamá jóngmiana, bēnga inÿe ora ndoñe yapa obenana tmontsebomna ora, tšabe soye o ndaye sóynaca jamama. Chca endmēna, er Satanás tša yojtsentšena Jesúsbioye ba juabnēnga chabotsontšáshjajuanama, jayénjanama bacna soye chaomama, nÿetsca juabnēnga ntšamo bēngnaca mondbetsebomncá, pero Jesús ndocna te ndocna bacna soye tonjéftsema. ¹⁶As, ndauatjácá Bēngbe Bētsá mochjótšēmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bēts reycá; chca mochjama, bēnga chášualastemama, y bēngbiamá tšabe

juabna jtsebomnēse, chašújabuachama bēnga chca chašojtséjaboto ora.

5 Ndēmanÿe bachnangbe más uámana amēndayánaca jtsemnana entšanguentšana bocacaná, y uabuayaná chēngbe cuenta Bēngbe Bētsá jasérviamá, chábioye juatšēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuperdonama. ²Chē bachna jtsobenana jóngmiana, chē bacna soyēnga amēngbiamá chama ntsetatšēmbcá, y chē bacna soyēnga jamama ingñēnēnga imomnēnga, mo otšenēngcá imomnēngbiamá, er cachánaca inÿe ora ndoñe yapa obenana ntsebomnana, chē bacna soyēnga jamama juabnēngama jtocochbuáchama. ³Y cháyeca cha jtsemnana bayēnga jobáyama Bēngbe Bētsá juatšēmbonama, ndoñe nÿe entšángbioye bacna soyēngama cháuperdonama, ndayá chábioye chaboperdonámnaca. ⁴Ndocná quenátobena cachá quem uámana trabajo jentšetayana, bachnangbe más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá. ⁵Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiamá impadaná, mo bachnangbe canÿe más uámana amēndayacá, ndayá Bēngbe Bētsá tbojanábuayana chē uámana trabajo jtsebomnana. Cha endmēna nda Jesúsbioye mēntšá tbojaniyana:

Aca atšbe Uaquiñá condmēna.

Mēnté entšanga sēnjinyanÿé aca atšbe Uaquiñá comnama ca.

⁶Y ínÿocnaca, Bēngbe Bētsabe uabemana palabrēnguiñe mēntšá tbojaniyana:

Aca n̄yetsca tescama can̄ye bachna condm̄ena, can̄ye b̄ets bachna nt̄samo Melquisedec yojamncá ca.

⁷ Jesús quem luarent̄se yoj̄eft-siyen̄tscuana, cha juayebuách̄ese y sh̄echbuíyeca B̄engbe B̄etsáftaca ibn̄écuentaye y ibn̄aimpadana, cha ch̄e jobanám̄t̄šana jatsbocama yojanobená; y Jesús nt̄samo B̄engbe B̄etsá yojanbošcá tojánmayeca y t̄ša respeto chabiama b̄ómnayeca, chábioye tbojanoyeuná. ⁸ Chca, Cristo masque B̄engbe B̄etsabe Uaquiñá inamna, jasúfriase tojanábouin̄ye nt̄samo jamana ndayá B̄engbe B̄etsá tojtsebošcá. ⁹ Chca, B̄engbe B̄etsá chábioye tbojánbema lempe nt̄samo ents̄anga tmojtsajabotcá, nda ch̄engbe bacna soȳengama cháuatsebacama; chent̄šana cha, Cristo, tojanma lempe nt̄samo yojaniytcá, n̄yetscanga ch̄e ents̄anga chábioye imoján̄yeunan̄enga chamotsobenama n̄yetsca tescama atsebácan̄enga jtsemnama; ¹⁰ y B̄engbe B̄etsá tbojanábuayana, ch̄e chabe delante sempre b̄engbiama impadaná, mo bachnangbe can̄ye más uámana am̄endayacá chaotsemnama, can̄ye b̄ets bachna nt̄samo Melquisedec yojamncá.

Resjo endm̄ena, ošbuáchiyana jtsajbanana

¹¹ B̄etscá entsemna quem palabrama jóyebuambayama, pero ch̄e soȳenga jayanama nt̄samo t̄š̄engaftanga catafjosertaycá, ndoñe paselo quenátsm̄ena, er t̄š̄engaftangna n̄ya uenana B̄engbe B̄etsabe soȳengama jósertana. ¹² T̄š̄engaftanga ya bayté Jesucristbe soȳengama šmotát̄š̄emboyeca, t̄š̄engaftanga cmontsamna ya jtsobenana ín̄yengbiye ch̄e soȳenga jtsabuátambayana; pero t̄š̄engaftanga cmonts̄ejaboto ndánaca B̄engbe B̄etsabe soȳengama

cachiñe chacm̄ēt̄etabuayená, ch̄e jtsošbuáchiyama šmojont̄sé ora natsana jshauatsjín̄yana soȳengama. Y chca, t̄š̄engaftanga šmojobiama mo š̄ešonatem̄ngcá, jts̄ejabótana lét̄siye jof̄siyana y ndoñe jobenayana jasana ch̄e jabmuánama ndoñe paselo tontsemna soȳenga. ¹³ Ch̄e n̄yetsca soȳenguiñe nt̄samo t̄šabá yomncá jtsamama buat̄embana soȳenga ndoñe tontsabuatmá cha, jtsemnana mo can̄ye š̄ešonatemcá, nda vida jtsebomnana n̄ye lét̄siye jtseftman̄ese. ¹⁴ Pero ch̄e tmojtsobena jajuaboyana y jtsetat̄š̄embuana ndayá t̄šabá yomna o ndayá ndoñe t̄šabá jamama, chca jtsam̄ese tmoyenamna, ch̄enga jtsemnana mo b̄ets̄etsangcá, nd̄emuan̄yenga ndayánaca jasana, ch̄e ndoñe paselo jabmuánama soȳengnaca.

6 Chcasna, b̄enga šontsamna jtsajbanana n̄ye j̄esebošana jtsatsj̄endayana Cristbe buat̄embana soȳenga, ch̄e b̄enga ch̄abeñe jtsošbuáchiyama tmojanont̄sé ora tmojanatsjin̄ye soȳenga, y šontsamna jtsatsj̄endayana chabiama n̄yetsca soȳenga, más totcá josértama yomna soȳenga. Chca, b̄enga mochántsemna mo ch̄e b̄ets̄etsangcá, ndayánaca jtsesayana. Ndoñe más n̄ye ch̄e natsana buat̄embana soȳengama mattsatsj̄endaye, mo ch̄e ndayá yomna bacna soȳenga jtsamana y ch̄e b̄enga ndoñe vida ntsebomnana junatsana soȳenga amana jtsajbanana, y ch̄e t̄šabe benache jtishachana; o nt̄samo B̄engbe B̄etsábeñe jtsošbuáchiyana; ² ch̄e juabáyana ndayá yomna; ch̄e ín̄yabe best̄šaš̄iñe cucuat̄s̄enga jac̄ayana B̄engbe B̄etsábioye chabiama jaimpádama; ch̄e oban̄enga jtayenama B̄engbe B̄etsá yochjamama; y mocna ora nt̄samo ents̄anga tmojamama B̄engbe B̄etsá yochjayanama, ch̄enga ch̄e n̄yetsca tescama yomna t̄šabe

vida chamotsebomnama o nÿetsca tescama castigánënga chamotsemnama. ³Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašo jálesenciase.

⁴Ndëmuanyënga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábenga bëtsemnama, y chë Uámana Espíritu chëngbe ainaniñe chaotsemándama imobomna, ⁵y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanyënga tmojáninÿe Cristo jtsamana bëtš soyënga chabe bëtš obenánaca, chë ndaye obenánaca cha puerta bëtš soyënga yochjama cha quem luaroye yochjésabo ora, ⁶chënga Jesucrístbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe Bëtsabe Uaquiñá chca stëtšoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuafjamcá. ⁷Šmochjinÿe: fshantse jamana chë ba uafténënga chiñe chaómashënguama, y chë chiñe trabájayëngbiamama bëtscá jaja sananga tojóboecnëse, Bëngbe Bëtsá jamana, chë fshantsentšana bëtscá tšabe soyënga entšangbiamama chaotsebínÿinama. ⁸Pero nÿe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama

⁹Pero masque chca montsoyebuambná, atšbe bonshánënga, bënga tšabá fsëndétatsëmbo tšëngaftangbeñe chë más tšabe soyënga echántsemna, chë atsbocaná jtsemnama tojtsá cha yobomna soyënga. ¹⁰Er Bëngbe Bëtsá sempre ntšamo tšabá yomncá nÿetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamama šmojinÿinÿé bonshánama, chabe entšangbioye jtsëjabuáchanëse, ntšamo mórnaca šmojtsama. ¹¹Pero bënga fsëntseboše, cada ona tšëngaftanguentšá, nÿets tempo y Jesús chaojésabëntscuana chaotsinÿanÿná corente yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiamama cha chaomama. ¹²Ndoñe queftsátšboše tšëngaftanga oyënjayënga chašmotsobiamama chë Bëngbe Bëtsá tcmojabanÿé trabajo jtsamama, ndayá Jesucrístbeñe ošbuáchiyana bomnëngcá y padecena soyënguiñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnama.

¹³Bëngbe Bëtsá Abrahámbioye tbojanšbuachená ora, chca tbojanianama cachabe uabaina jayanëse, er inÿa chabiamama más uamaná ndoñe yontsemna ndabiamama jajúrama, ntšamo tbojanšbuachenacá ndegombre chaotsemnama; ¹⁴cha mëntšá tbojanšbuachená: “Aíñe, atše chanjama aca bëtscá tšabe bendicionënga chacotsebomnama, y chanjama acbentša pamillentsana mallajta entšanga chamotsemnama

ca.”¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanóbátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiam canye puerte más uámanabe uabaina jayanëse, y chca chëngbiam más uamanabiam tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenát-sëtsnayana. ¹⁷ Y chca, Bëngbe Bëtsá tojánbošena botamana jinyanñiyana, ntšamo cha tojanašebuachenacá mochjanoyëngacñéngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninñanyé cha chca yochjanmana, cachabiam jajúrase, chë ntšamo tojanašebuachenacá yochjanmama ndegombre bëtsemnama. ¹⁸ Bëngbe Bëtsabe šbuachenana soye y chama jinyanñiyama ntšamo tojanayancá, ntšamo tojanašebuachenacá ndegombre yochjanmama, chë uta soye ndocná ntsoberenana jatrócama; y chca tojayana ora, ndoñe ntsopeđenana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanñenama, mo canye bëtš resjuentsana tmojtsachetëngcá, ntšamo chentšana atsebácanënga jtsemnama cuaftsenguacá. Bëngbe Bëtsá šojáuyana bënga imojtsobena chábeñe jtsošbuáchiyëse, cha yejuana šochtsanñenama mondobátmana. ¹⁹ Mo ntšamo chë bėjaye asentoca cuedádoca tcojajajo anclama, chë barcuñe

enjaquenënga tšabá jtsetatšëmbuana chë barco ndoñe yochántšashatiyiy-nama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámarshëngo y chabe delante entsemna mo chë bachnangbe más uámana amëndayacá. Chana jamashënguana chë Bëngbe Bëtsabe bëtš yebnoca, “chë más uámana ca” uabaina luaroye, entšëjua ujonñana stëtsoica, Bëngbe Bëtsabe delante jtsemnama, ²⁰ ndayentšë Jesús celoca, Bëngbe Bëtsabe delante tojámarshëngo bëngbe tšabiam soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nñetsca tescama, canye bëtš bachna ntšamo Melquisedec yojamncá.

Jesús, canye bëtš bachna ntšamo Melquisedec yojamncá

7 Quem Melquisedec yojamna Salem puebloca rey y bachna chë celoca Bëngbe Bëtsabiam; Bëngbe Bëtsá, chë nñetscangbiam más uamaná. Abraham chë reyënga y chëngbe soldadëngaftaca imojentsjaná y tojanayënjaná chentšana yojsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebonnama chaomama. ² Chora Abraham chábioye tbojanatšetá, chë reyëngaftaca imojentsjaná ora, lempe tojanosháchiñentšana, bnëtsanentšana canye soye. Chë palabra Melquisedec endayana “nñetsca soyënguñe tšabá ama rey ca”; y chána yojamna Salem puebloca rey, y chca endayana “nñetscanga natjëmbana chamotsiyenama ama rey ca”. ³ Chabe pamíllangbiam tondaye que-

natótatsëmbo; chca cha endmëna mo ni taitá ni mamá ndoñe endbomnacá, ni bëts taitanga. Tondaye quenátótatsëmbo ntseco tojanonýnama, ni ntseco tojanóbanama; chca, inýe soyënguine cha yojamna mo Bëngbe Bëtsabe Uaquinacá, y endmëna mo nýetsca tescama bachna cuafsemncá.

⁴Y mora, šmochjájuaboje tša uamaná Melquisedec inamnana, er bëngbe telpasca uámana bëts taitá Abraham chábioje tbojanatšetá, chë reyëngaftaca imojentsjaná ora lempe tojanosháchiñentsana bnétsanentsana canýe soye. ⁵Ntsámo Moisesbe leyinë endëmandacá, chë bachnangbe más uámana amëndayá Leví, Aarónënaca ca uabainabe pamillentsana tmomna bachnanga, jtsamnana chë Israeloca entsángbioje nýetsca chë tmobomna soyënguentsana bnétsanentsana canýe soye jtsayëngacayana; y chca jtsamnana masque chë entsanga cachëngbe pamillentsënga tmomna y Abrahábentsana pamillentsëngnaca. ⁶Peró Melquisedec, masque Aaronbe pamillentsá ndoñe yonjamna, Abraham, chë ntsámo Bëngbe Bëtsá tbojanšbuachenacá tojanóyëngacñabentsana, cha tojanóyëngacñe nýetsca soyënguentsana bnétsanentsana canýe soye, y Bëngbe Bëtsábioje tbojanimpadá, Abraham bëtscá tšabe bendicionënga chaotsebomnama chaomama. ⁷Y ndocná quenátobena jayanama ndoñe ndegombre yondmëna ca, chë Bëngbe Bëtsábioje impadaná ínýabiama tšabe soyënga chaomama, más uamaná inésemna chë chca tojóyëngacñabiama, inýa chabiama Bëngbe Bëtsábioje tbojaimpadá ora. ⁸Quem tempo, bachnanga mochjóbanënga, entsángbioje jtsayëngacayana nýetsca chë tmobomna soyënguentsana bnétsanentsana canýe soye, pero chë Bëngbe Bëtsabe

uabemana palabra, Melquisedecbiama endoyebuambná cha mo canýa cabá ainá totsomñcá. ⁹Y bënga montsobena jayanama, Abraham Melquisedécbioje chë nýetsca soyënguentsana bnétsanentsana canýe soye tbojanoyé ora, yojamna mo Leví, chë nýetscángbioje nýetsca soyënguentsana bnétsanentsana canýe soye ayëngacayá, Melquisedécbioje chca cuaftopagacá; ¹⁰er cha Abrahambe pamillentsá inamna. Melquisedec yojsabó ora y chábioje chë lempe tojanosháchiñentsana bnétsanentsana canýe soye Abraham tbojanatšetá ora, yojamna mo nýetscanga, chë Abrahábentsana entsanga más chcoye mochtsaniyenënga, chëngnaca chë bnétsanentsana canýe soye cuafjajocá, masque Abraham chca tojanma ora, Leví y chë Abrahábentsana inýe entsanga cabá ndoñe tmonjanonýná.

¹¹Israeloca entsanga Moisesbe ley tmojanáyëngaca, chë bëts taitá Levibe pamillentsënga bachnanga imojamnënga Bëngbe Bëtsá imojtseservena ora, y chënga monjamna Aarónbentsana entsanga. Ntsámo chë leyinë yomandancá imojánamënga perdonánënga jtsemnana y Bëngbe Bëtsabe bominýiñe tšábënga jtsemnana quem bachnanga jamama matmëñanobenase, ndoñe manjanëyta Bëngbe Bëtsá inýe bachna chabuatschembuama, nda ndoñe yonjamna mo chë bëts bachna Aaroncá, ndayá ntsámo chë bëts bachna Melquisedec yojamncá. ¹²Er, canýe bachnanga Bëngbe Bëtsábioje jtseservénama tmojajbaná y inýe bachnanga chábioje jaserviama tmojatontsé ora, jtseytana chë natsana bachnanga imojanoservena ora mán-daye leyëngnaca jtsetrócama. ¹³Bëngbe Utabná, ndabiama quem soyënga jtsóyëbuambnayana, ndoñe Aaronbe

pamillentšá quenjatsmäna, ndayá inye pamillentšá, y quem pamillentša entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca. ¹⁴Er nyetscanga mondétatšëmbo Bëngbe Utabná Judabe pamillentšana bëtsemnama, y chë pamillama Moisés ndocá tonjánayana, Bëngbe Bëtsá mo bachnangcá chënga jtseeservénama.

¹⁵Y ntšamo tmojanancá montsobena más tšabá josértana, er chë tsëm bachna Cristo yojamna canya mo Melquisedec yojamncá. ¹⁶Cha bachna yojamna, ndoñe chë bachnanga chabe pamillentšana jabocanama yojánamnama canye ley tojánayanayeca, ndayá nyetsca tescama jëftsiyenama cha inobénayeca. ¹⁷Er mëntšá endmäna, ndayá Bëngbe Bëtsá chabiamana tojánayana: Aca bachna nyetsca tescama condmäna, canye bëts bachna ntšamo Melquisedec yojamncá ca.

¹⁸Cha tojánabo ora, Bëngbe Bëtsá tojanma chë nda bachna jtsemnama y ntšamo joserviama mandënga chaotsopochocama, er chë mandënga ndoñe ntjobenayana entsanga jujabuáchama atsebácanënga jtsemnama, y chca, chëngbiamana ndoñe bëtscá yonjanoservena. ¹⁹Er Moisesbe léyeca, entsanga ndoñe tmonjanobená Bëngbe Bëtsabe bominyiñe tšábenga jtsemnama, pero mora chama canye corente más uámana soye montsebonna: Jesucristbeñe jtsošbuáchiyëse, chábeñe montsobátmana Bëngbe Bëtsáftaca tšábenga chášubiamama, y chca, Bëngbe Bëtsábíoye bënga jtobéconama.

²⁰Y Bëngbe Bëtsá lempe chca tojanma, cachabiamana jajúrase, lempe ntšamo cha tojanayancá ndegombre chaotsemnama. Chë inye bachnanga, chë Aaronbe pamillentšëngbíoye

tmojanëbuáyana ora, Bëngbe Bëtsá ndoñe chca tonjánayana, ²¹pero mo bachnëcá chaoservema Bëngbe Utabnábíoye tbojanábuayana ora añe; cach Bëngbe Bëtsabiamana jajúrase, Bëngbe Utabná canye bachna yochtsemna ca tojánayana. Ntšamo Bëngbe Bëtsabe uabemana palabrënguñe endayancá:

Bëngbe Utabná Bëngbe Bëtsá, Jesucristbíoye tbojaníyana, cachabiamana jajúrase, ntšamo tojanayancá ndegombre chaotsemnama, y juabna ndoñe ntjatrócama:

“Aca bachna nyetsca tescama condmäna ca.”

²²Bëngbe Bëtsá chca tojánayanama, Jesúsbeyeca bënga corente mondétatšëmbo, ndayá Bëngbe Bëtsá bëngbiamana jamama tojanašebuachenacá, chë Jesúsbíoye bëngbe bachna chaotsemnama juabuáyanana, más tšabá yojtsemna chë ndayá tempo cha chabe entsangbiamana tojanašebuachená soyama. ²³Chë inye bachnanga banga imojamna, er ndocná yonjanobena Bëngbe Bëtsábíoye nyetsca tescama chca jtseeservénana; cada ona básefta uatëngama tojëftsanoservé, tojanóbana y inyábíoye chë trabajo jatontšabuáchana. ²⁴Pero Jesús ndocna te ntjobanámayecna, cha mo bachnëcá Bëngbe Bëtsábíoye nyetsca tescama bochjëftseservena, y ndocna te chabe trabajo inyábíoye bochanjëftsinyiñiye, chë inya cachcá jtsamama chauatontšema. ²⁵Chíyeca, cha yobena nyetsca tescama jätsebacana ndëmuanyënga chábeyeca Bëngbe Bëtsábíoye tmojobeconá, er nyetsca tescama cha echanjëftsiyena Bëngbe Bëtsábíoye chëngbiamana jtseimpadánama.

²⁶Chcasna, Jesús ndegombre endmäna lempe ntšamo bënga imuajabotcá nda Bëngbe Bëtsábíoye bëngbiamana chabotseimpadánama, mo

chë bēngbe bachnangbe más uámana amēndayacá. Cha sempre uamaná endmēna, ndocna te ni mo canyē juabna ín̄yabe contra yonjábomna, ainaniñe ndocna bacna juabna yonjábomna, chë bacna soyēnga amēnguentšana luaroca mēná, y Bēngbe Bētsá tojanma celoca más bētsá y obená n̄yetscangbiama cha chaotsemnama. ²⁷Cha ndoñe bonjanájaboto canyē te y inyē te bayēnga jtsebánayana, Bēngbe Bētsá chabe bacna soyēngama chaboperdonama y chë bacna soyēnga entsānga tmojanmám̄naca, mo chë inyē bachnangbe más uámana amēndayēnga mondbetsamcá, cachēngbiama y chë judiēngbiám̄naca. Cha tojanma lempe ntšamo yojaniytcá canyē soye y n̄yetsca tescama, entsānga bacna soyēnga tmojanmama perdonánēnga chamotsemnama. Cha chca tojanma, chabe derecho vida jtsobomñama cachcá tojanon̄ná ora; y tojanóbana entsānga chamotsobenama perdonánēnga jtsemnama. ²⁸Ntšamo Moisesbe leyiñe yojanmandacá, chēngbiama mo chë bachnangbe más uámana amēndayēngcá tmojanēbuáyana entsānga inyē ora bacna soye amēnga; pero Bēngbe Bētsá cabá chë ley entsāngbe cucuatšifñe tojanáboshjonentšana baytese, cha chabe Uaquiñábioye chë bachnangbe más uámana amēndayacá tbojanábuayana, cachabiama jajúrase, ntšamo tojanayancá ndegombre chaotsemnama. Bēngbe Bētsá tojanma chë Uaquiñá chaotsemnama lempe ntšamo entsānga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnēnga ndbomná.

**Cristo, nda jóbanēse tojanma
entsānga Bēngbe Bētsáftaca mo
canyácá chamotsemnama**

8 Chë más uámana soye ndayama bēnga montsichamo, chë Cristo mo bachnēcá yomnama montsoyebuambná ora, entsemna: Bēnga chábeñe imojtsebomna canyā n̄yetsca tescama Bēngbe Bētsabe delante bēngbiama impadaná, mo chë bēngbe bachnangbe más uámana amēndayacá, Bēngbe Bētsabe catšbioica yojtsetbemana jtsemándayama, y Bēngbe Bētsá chë más uámana tbe-manentse. ²Chë inyē bachnanga Bēngbe Bētsabe bēts yebnentse tmojánamashjna chë “más uámana ca” uabaina lu-aroje, Bēngbe Bētsabe delante jtsemnama; pero chë luare celoca ndayentse n̄yets tempo Cristo mo chë bachnangbe más uámana amēndayacá yoservena, entsānga ndoñe chca tmonjanpormá, ndayá Bēngbe Bētsá.

³N̄yetscanga chë bachnangbe más uámana amēndayēnga tmojanēbuáyana, entsāngbiama soyēnga y tmojóba bayēnga Bēngbe Bētsábioye juatšēmbonama, chēngbe bacna soyēngama perdonánēnga chamotsemnama; chíyeca, jtseytana Jesucristo ndayánaca chaotsebomnama, Bēngbe Bētsábioye juatšēmbonama. ⁴Cha quem luarentse tojtsetrabájase, cha ni mo bachna ndoñe nántsemna, er muentše ba bachnanga mondmēna, y chēnga ba soyēnga jamana Bēngbe Bētsábioye jētschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama. ⁵Chë inyē bachnanga imobomna luarēnga Bēngbe Bētsá jadórama, y ndaye soyēngaca chēnga Bēngbe Bētsá imoservena, ndoñe cachcá yontsemna chë ndayentse Jesucristo celoca yoservena luarcá, ni ntšamo cha yoservencá; n̄yē batšatema

béngbioye šuinýanýná ntšamo chë celoca luare yomnama, ndayentše Cristo mo bachnëcá yoserverna. Y bënga mondétatsëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojaníyana: “Cuedado cochtsebmna chë atšbiana yebniñe nyetsca soyënga jamama, ntšamo tcbonjaninýinýecá chacomama, chë tjoca bonjamna ora ca.”⁶ Pero bëngbe bachnangbe más uámana amëndayá Cristo, tojashjache canýe más bëts trabajo jtsebomnama, ntšamo chë inýe bachnanga imobomna trabajuama; cachcá, ndayá Bëngbe Bëtsá tojayancá Crístoftaca bëngbiana jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

⁷Chë Bëngbe Bëtsá natsana tojanašebuachená soyëngaca matënjano podé entšanga chamotsamama ntšamo yojanamncá, ntšamo tojanašebuachenacá jýyëngacñama, as ndoñe manjanëyta Bëngbe Bëtsá cachiñe canýe trato chauátsbemama entšangbiana. ⁸Pero Bëngbe Bëtsá tojáninýe ntšamo yojanamncá entšanga ndoñe tmonjanmama, ntšamo cha tojanašebuachenacá jýyëngacñama, y Bëngbe Utabná Bëngbe Bëtsá chëngbiana mëntšá tojánayana:

Canýe tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená, chënga átseftaca tempcá tšabá jtsemnama chamotsobenama.

⁹Chë chanjašebuachená soye ndoñe queochátsmëna cachcá ntšamo chë chëngbe bëts taitanga sënjanašebuachená soye enjamncá,

atše chënga sënjanënatse ora, Egiptó luarocana sënjesanëbuacna ora;

pero chëngna, ntšamo jamama enjanamncá, chë sënjanašebuachená soye jýyëngacñama ndoñe chemátanma causa,

atše cachcá chënga sënjesanënyaye ca, Bëngbe Utabná tojánayana.

¹⁰Chë Israeloca entšangbiana ndayá jamama canýe tempo chentšana chanjašebuachená soye,

mëntšá entsemna ca, Bëngbe Utabná tojánayana:

Atše chanjama chë chëngbe juabniñe chaitsemánda soyama chënga chamotsejuabnama,

y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entšanga.

¹¹Chë tempo ndoñe queochátsiyta cánýenga ínýenga chamotsabuátambama,

cachabe luariñe oyenábioye o cachabe pamillentša entšábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga, corente tšabá atšbe šmochantsábuatma.

¹²Chënga chanjálastemaye y chëngbe bacna soyëngama chanjáperdonaye, y ndocna te más chë bacna soyënga chënga tmojamama quichátsjuabnaye ca —cha tojánayana.

¹³Bëngbe Bëtsá, chë entšangbiana mora jamama tojášebuachenama tojtsichamo ora, chca jtsemnana, er cha tojama chë tempo entšangbiana jamama tojanašebuachená soye, mora ya ndoñe chaondëtoservënama; ndayá mo tanguá

soycá tojtsemna y ya ndoñe tontsoser-
vena, chë soyna nÿe batšatema más y ya
jtsopochócana.

**Bëngbe Bëtsá jadórama muentša
luare y chë celoca luare**

9 Y morna, ndayá Bëngbe Bëtsá
tojanašebuachenama y tojanmandá
soyama, mandënga yojamna ntšamo
cha jtsadoránama, y nÿa chabiama
pormana yebnentše quem luarentše.
²Chíyeca, Bëngbe Bëtsá tojanmandá
chaotsemna canÿe jatsjacama opodena
yebna chábioye jadórama, mëntša:
Chë natsana tsañe quem Bëngbe
Bëtsabiama yebnentše inauabaina “chë
uámana luare ca”; chentše inamna chë
canÿsëfta quinÿenëfjuangá castellano
candelerëšiñe, y canÿe mesésha ndayíñe
yojacjana chë luarentše Bëngbe Bëtsá
bétsemnama inÿinÿnaye tandëšënga.

³Inÿe ujonÿana entséjua chentšana,
inÿe luare inamna; inauabaina “chë más
uámana luare ca”. ⁴Chentše inamna chë
castellano altar, incienso jajuinÿiyama,
y chë cajontema nÿetsiñe castellanoca
pormánëtema. Quem cajontema
yojaninÿanÿná ntšamo Bëngbe Bëtsá
tojanašebuachenacá, chë Israeloca
entsanga chabe uámana entsanga
yochjánabiamama, y inauabaina
“Bëngbe Bëtsabe šbuachenana soye
inÿinÿnaye cajontema ca”; y chë
tsoye quem soyënga inabomna:
canÿe castellano jarrëtema, maná
ca uabaina tandëšëca, chë Bëngbe
Bëtsá tojanma celocana chabe
entsangbiama chaótsatšama saná;
Aaronbe varëfja, chë tojanantšëfjonëfja;
y chë ndëtsbé tablëbënga ndayíñe
Bëngbe Bëtsá tojanábëma chë
bnëtsana uámana mandënga. ⁵Chë
cajontema juatsboca inamna chë
juatëngmiáša uabomnënga, mo
angelëngcá, “querubinënga ca”
uabáinënga, y chënga imojaninÿanÿná

chë Bëngbe Bëtsabe buashinÿinÿanana
chéntšnaca bétsemnama. Chënga, chë
juatëngmiášhangaca chë cajontémentša
nÿets ústonëtema imojanëtsbotsana;
chë ústonëtema inauabaina “entsanga
bacna soyënga tmojamama Bëngbe
Bëtsá perdonaye luare ca”, er
chentše, chë cajontema juatsboca chë
bachnangbe más uámana amëndayá
jtsamanana buiñe jabuëšcjana, chë
Bëngbe Bëtsábioye cha ibnaimpadana
te, entsanga cháuperdonama. Pero
mora ndoñe quenátšiyta chë soyëngama
lempe jatóyëbuambnayama.

⁶Lempe chca tmojanprontantšana,
chë bachnanga sempre chë natsana
luaroye imojánamashjuana, jamama
ntšamo Bëngbe Bëtsá tojanamëndacá,
chábioye jadórama. ⁷Pero nÿe chë
bachnangbe más uámana amëndayá
yojobena chë inÿe luaroye jamashën-
guana, y nÿe canÿe cada uata. Choye
jamashënguama orna, cha ibojamna
bayëngbe buiñe juabuyambana, Bëngbe
Bëtsábioye juatsëmbonama, chca, chë
bachnangbe más uámana amëndayá
tojanma bacna soyënga Bëngbe Bëtsá
chaboperdonama, y chë ntsetatšëmbcá
entsanga tmojanma bacna soyëngnaca.

⁸Chca, chë Uámana Espíritu jamana
bënga chašósertama, chë natsana
luare cabá tojtsemnëntscuana y chë
bachnanga cabá chë soyënga chentše
tmojtsamëntscuana, nÿetscanga cabá
ndoñe tmonjanobená chë inÿe luaroye
jamashjnama, chë “más uámana
luaroye”. ⁹Chë soyëngaca jtsopodénana
béngbioye jinÿanÿiyana, chë tempo, chë
Bëngbe Bëtsábioye jadórama yebnentše
entsanga uta luare imojábomna ora,
ndoñe yonjopodena Bëngbe Bëtsabe
delante nÿetscanga jatsmënana, mo chë
bachnangbe más uámana amëndayacá.
Y chë soyëngnaca jtsayanana, chë
Bëngbe Bëtsabiama uátšëmbona
soyëngaca y bachnanga tmojanóba

bayéngaca, ndoñe tonjanopodé jamana canya Bèngbe Bètsábioye adorayá, Bèngbe Bètsáftaca tempcá tšabá chaotsatsmënana y Bèngbe Bètsá chabe bacna soyéngama tbojaperdonama ainaniñe corente chaotsetatšëmbuama. ¹⁰Chënga, chë uátšëmbona soyéngaca y tmojanóba bayéngaca tmojanma nyë ntšamo Moisesbe leyíñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabejana mo tšabe entšangcá Bèngbe Bètsabe delante jtsatsmënana; nyëtsca mandënga nyë cuerpama, pero ainanama tondaye ntjamana. Pero chë entšanga chca yojánamna jtsamana, nyë Bèngbe Bètsá inye soyënga, más tšabe soyënga jamama tojamandantscuana, chë tsëm trato tojábema ora.

¹¹Pero Cristo ya tojánabo, y cha yomna chë Bèngbe Bètsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnana chë tšabe soyënga ntšamo mochjoyëngacñécá. Chë luare celoca ndayentše cha Bèngbe Bètsabe delante mo bachncá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bèngbe Bètsá entšangbiana jamama inajuabnycá. Chë luare ndoñe entšangbe cucuátšëca yondëpormana, y chca jtsayanana, quem luarentša soye ndoñe yondmëna ca. ¹²Cha, canye y nyëtsca tescama chë luaroye Bèngbe Bètsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbaniñe, chabe buiñe juabuáshanëse, cha tojanma entšanga atsebácanënga jtsemnana chamotsobenama; y chca tojanmëse, cha tojanobená chë luaroye Bèngbe Bètsabe delante

jamashënguama. Y Cristo chca choye tojanamashënguëse, tojanma bënga chë nyëtsca tescama yomna tšabe vida jtsebomnana chamotsobenama.

¹³Ndëmuanyënga ndayámna chë leyama tmojanoquedá mo chë Bèngbe Bètsabe delante ndoñe tšabengcá, chë bachnanga imojuamana chëngbïoye toronga y chivëngbe buiñe jabuéscacjana, y chë altaroca tcojajuinýe ternerbe jatinyá chëngbïoye jatbótotana, chca, chënga jábiamama Bèngbe Bètsabe delante mo tšabengcá. Chca tmojamentšana, chë bachnanga tmojánayana chënga imojtsobena chë inyëngaftaca jabama, Bèngbe Bètsá jadórana, y cachiñe mo tšabengcá Bèngbe Bètsabe delante imojtsatsmëna ca. ¹⁴Ndayá bachnanga tmojanmcá yojanámana entšanga cachiñe mo tšabengcá Bèngbe Bètsabe delante imojtsatsmëna ca jayanama; y chca, chë inyëngaftaca Bèngbe Bètsábïoye jadórana tmojanobenase, jntsachetšá más yojsámama Cristbe buiñe, ndëmuanyëye tojanábuashana bëngbiana cha tojanóbana ora! Chë nyëts tempo vida bomná Espiritbe obenánaca, Cristo, chabe derecho vida jtsobomñama cachcá tojanonyá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canye bayá tondaye ndbemaná chë bachnanga cuafjocabá juatšëmbonama, entšangbe bacna soyéngama; cachcá Cristo, chë ndocna bacna soye ndbomná, bëngbe bacna soyéngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetatšëmbo, bacna soyënga bënga tmojamama, chë ndoñe vida jtsebomnana bënga junatsana soyënga, chama bënga perdonánënga imojtsemnana, y chca, bënga montsobena jtsiyenana, Bèngbe

Bëtsá, chë ndegombre ainá yomná, jtseervénese.

¹⁵ Chíyeca, Cristo jóbanëse tojama entsanga Bëngbe Bëtsáftaca cánýiñe mo canýacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entsanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentsá ley jtsoemplínama inamna ora imojyenëntscuana bacna soyënga tmojanmama; y chéngnaca chamotsobenama chë nyetsca tescama mochtsebomna soyënga jóyëngacñama, ntšamo Bëngbe Bëtsá chabe entsanga tojanašebuachenacá.

¹⁶ Ntšamo canýe testamentiñe tojtsayancá chaopasamna, jtseytana chaotsótatsëmbo chë chca jamama tojašbuachená cha tojóbanama.

¹⁷ Canýe testamento tondaye ntsámanana, chë chca jamama tojašbuachená cha cabá ainá totsomñëntscuana; nýa cha tojóbana orna aiñe. ¹⁸ Chíyeca chë Bëngbe Bëtsabe natsana trato, entsángbeñe tojanobojatšé, chora tmojanóba bayëngbe buiñe jabuéscjese. ¹⁹ Moisés chë leyentsá nyetsca mandënga nyetsca entsanga tojánabuayenantšana, tojanca buángana boboshëshe y hisopo betiyentsá buacuafja, chë ternerënga y chivëngbe buiñe búyeshëca enajuabnëyiñe tojanfchecuacuá, y chora chë leyënga librésañe tojanbuéscacja, y nyetsca entsángbeñnaca. ²⁰ Y mëntsá tojánayana: “Quem buiñe entsinýinýná, ntšamo Bëngbe Bëtsá tojamandacá ndegombre yochtsemnama, y tsëngaftangbiamu puerte yochtsámanama ca.” ²¹ Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama yojanoservena.

²² Er ntšamo leyiñe iuayancá, yojtsemna nýa mo nyetsca soyënguiñe buiñe jabuéscacjana, Bëngbe Bëtsábioye jadórama tsábá chaoservema; y buiñe ndoñe tonjuábuashanësna, ndoñe ntsopodénana entsanga bacna soyëngama perdonánënga chamotsemnama.

Cristo jasúfriase y jóbanëse, tojanma entsanga bacna soyëngama perdonánënga chamotsemnama

²³ Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tsábá chaoservema, chë Bëngbe Bëtsábioye jëtschuayama tmojóba bayëngbe buiñeca. Chë soyënga batšatema jtsinýanýnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tsábá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama. ²⁴ Er Cristo ndoñe tonjánamashëngo canýe luarentše Bëngbe Bëtsá jadórama nýe entsángbe pormánentše, ndaye luare nýe batšatema jtsinýanýnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiamu jtseimpadánama. ²⁵ Chë bachnangbe más uámana amëndayana chë “más uámana luaroye” jamashënguana canýe cada uata, bayëngbe buiñeca, ndoñe cachabe buiñeca, chca, ndayánaca jamama entsanga bacna soyënga tmojamama perdonánënga chamotsemnama. Pero Cristo chë

luaroye celoca ndoñe tonjánamashëngo, chentšana jtésebcnana, y chabe buiñe juabuáshanëse cachiñe jatóbanama, y ba soye cachcá chauétsemnana.²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinýe quem luarentša entšanga bacna soyënga jabuajuánama, chëngbiana jóbanëse, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá.²⁷ Cachcá, ntšamo nyetsca entšanga jtsamnana nye canye jóbanama, y chentšana Bëngbe Bëtsá chëngbiana jayanana chë imojéftsiyenëntscuana ntšamo tmojanmcá tšabá o ndoñe tšabá bétsemnana, y chéngaftaca jamana ntšamo chora tojajuabocá,²⁸ cachcá, Crístnaca, nye canye chabe derecho vida jtsobomñama cachcá tojanonýá, chabe buiñe juabuáshanëse jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

10 Chë Moisesbe leyentša mandënga, ntšamo chë bachnanga yojánamnana Bëngbe Bëtsá jadórama tmojóba bayëngaca y inye soyëngaca, ndoñe ntsinýanýayana lempe chë Bëngbe Bëtsá chabe entšanga jatšatayana puerte tšabe soyënga, pero añe batšatema jtsinýanýayana ntšamo chë soyënga yochtsemnana. Chýyeca chë mandënga, chë uatšëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga,

chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnana.² Er ndayá tcojtsamama Bëngbe Bëtsabiana uatšëmbona soyëngaca y chábioye jëtschuayama tmojóba bayëngaca, entšanga Bëngbe Bëtsábioye adórayënga, chabe delante tšábënga jtssemnana matmënjnanobenase, chënga chë bacna soyënga tmojanmama ainaniñe ngmënaca ya ndoñe mamënjtsemna, y matmëntsana jbaná soyënga amana chë tmojóba bayëngaca.³ Pero juatšëmbonama entšanga bayënga tmojóba ora, josérviana entšanga bacna soyënga tmojamama cada uata chamuatenójuaboma; ⁴ er chë toronga y chivënga tmojóbanëngbe buiñeca ndoñe ntsopodénana entšangbioye bacna soyënga jabuajuánama.

⁵ Chýyeca, Cristo quem luaroye tojánabo ora, Bëngbe Bëtsábioye mëntšá tbojaniana:

Ndoñe tconjábosena entšanga chacmátšëmbona soyënga, ni tmojobaye bayënga, pero añe tcojama atše canye entšacá chaitsemnana.

⁶ Ndoñe tšabá quecmátinýana chë tmojóba y tmojajuinýe bayënga, entšanga bacna soyëngama chacotsaperdonama.

⁷ As atše Bëngbe Bëtsá sënjaniana: “Bëngbe Bëtsá, muentše sëntsemna, ntšamo aca icobošcá atše chaimama, ntšamo acbe uabemana palabrénguñe atšbiana endayancá, chë ndayá atše chjanmama ca.”

⁸ Natsana, Cristo tojánayana, Bëngbe Bëtsá ndoñe tonjánbošëna, ni tšabá tbonjanínýnana entšanga chamuatšëmbona soyënga, ni Bëngbe Bëtsábioye jëtschuayama tmojóba bayënga, ni tmojóba ni tmojajuinýe

bayënga, entšanga bacna soyëngama cha chaotsaperdonama ca, masque chënga chë Bëngbe Bëtsábioye jadórana soyëngaca jamana, ntšamo leyinë iuayancá ndayá chënga jamama yojtsamna. ⁹Y chentšana, Cristo Bëngbe Bëtsábioye tbojátaniyana: “Muentše sënjabo, chë ntšamo aca icobošcá atše chaimama ca.” Chca, Cristo tojinýanýé chë jtsamana soyënga tmojóba bayëngaca, tondaye yonduámana entšanga bacna soyënga jabuajuánama, y entšangbe bacna soyëngama jóbánëse tojaninýanýé chë ntšamo Bëngbe Bëtsá yobošcá jtsamana, más iuámana chë inýe soyënga játamama. ¹⁰Bëngbe Bëtsá tojama, bënga chabe entšanga y chabe delante tšábenga chamotsemnana, ntšamo Bëngbe Bëtsá yobošcá Jesucristo tojánmayeca, chabe derecho vida jtsobomñama cachcá jonýayëse y entšangbe bacna soyëngama jóbánëse, canýe y nyetsca tescama.

¹¹Judiëngbe nyetsca bachnanga nyets tempo ba soye altarentša natsanoica Bëngbe Bëtsá jtseservénana, y ba soye cachcá jtsamana tmojóba bayëngaca, pero chë soyëngaca ndocna te ntjopódiana entšanga bacna soyënga jabuajuánama. ¹²Pero Jesucristo entšangbe bacna soyëngama tojanóbana ora, yojamna mo canýe tmojóba bayacá, Bëngbe Bëtsá entšanga bacna soyëngama cháuaperdonama; nýe canýe y nyetsca tescama chca tojanma, y chentšana Bëngbe Bëtsabe catšbioica tojtánótbema, canýe uámana puestentše, jtsemándayama. ¹³Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšinë chamoquedama yochjamëntscuana. ¹⁴Er nýe canýe, entšangbe bacna soyëngama cruzoca jóbánëse, Jesucristo lempe tojama, entšanga chë Bëngbe Bëtsábenga jtsemnana chëmbonënga, chabe

delante nyetsca tescama tšabengcá chamotsemnana. ¹⁵Y Uámana Espíritnaca, Bëngbe Bëtsabe uabenana palabrenguiñe šontsinýanýná chca ndegombre bëtsemnana, mëntšá tojánayana ora:

¹⁶Ndayá entšangbiana chjama, canýe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtsamana ndayá chëngbe ainaniñe chaitsemánda soye,

y chamotsejuabnama chë chëngbe juabniñe chaitsemánda soyama ca.

¹⁷Y chentšana mëntšá tojánayana:

Ndocna te más quichátjuabnaye chënga bacna soyënga tmojamama, y ntšamo atše stsebošcá contra soyënga chënga tmojamama ca.

¹⁸Chcasna, Bëngbe Bëtsá nyetsca tescama entšanga bacna soyëngama tojaperdoná ora, ya ndoñe ntjátsiytana inýe soyënga más játamama, mo bayënga cuafjobaycá, entšanga bacna soyëngama perdonánënga chamotsemnana.

Šontsamna Bëngbe Bëtsábioye jtobëconana

¹⁹Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, tondayama ntjatauatjácá Bëngbe Bëtsabe delante jamashënguama. ²⁰Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyetsca tescama yomna tšabe vida chamotsebomnana. Mo chë quem luarentše chë bachnangbe más uámana amëndayacá, chë ujonýana entšéjuajana jamashënguana chë “más uámana ca” uabaina luaroye, Bëngbe Bëtsabe delante jtsemnana, cachcá,

Cristo bəngbe bacna soyəngama mo entšacá tojanóbanayeca, béngnaca montsobena Bəngbe Bətsabe delante luaroye jamashənguama. ²¹ Bənga mondbomna canye bəts bachnangbe más uamana aməndayá, Bəngbe Bətsabe entšangbeñe jtsemándayama, y cha endmēna Jesús. ²² Chíyeca, Bəngbe Bətsá jaserviama ndegombre ainaniñe corente jtsebošese, y chábeñe puerte jtsošbuáchiyese, šontsamna Bəngbe Bətsábioye jobéconana. Ntšamo chē bachnángbioye buñeca tmojanabuešcaccjá, Bəngbe Bətsabe delante tšabengcá chamotsemnana cha jaserviama, cachcá, Cristbe buñe juabuáshanese y bəngbiana jobanese, bənga ainaniñe corente montsetátšəmbo Bəngbe Bətsá nyetsca tescama bəngbe bacna soyəngama šojtsaperdonama. Y bənga bəjayeca uabainəngnaca mondmēna; chíyeca bənga jtsoberenana Bəngbe Bətsábioye chca jobéconana.

²³ Bənga šontsamna nyets tempo Bəngbe Bətsábeñe puerte jtsošbuáchiyana, y ndocna te nye ndayamnaca jatajbanana entšangbeñe ichámuana, chē Bəngbe Bətsábeñe jtsošbuáchiyese bənga imobatmana soyənga cha yochjamama, er chē soyənga šojašebuachená cha, sempre jamana ntšamo tojayancá. ²⁴ Bənga šontsamna janguanguana ntšamo muatjobenaye añemo jenatšetayana, nyetscanga jtsebobonshánana, y ntšamo tšabá yomncá jtsamana; ²⁵ pero ndoñe quešnátamna jatajbanana, Bəngbe Bətsábioye jadórana enefjuanana mo Crístbeñe ošbuáchiyenga quetsomñecá, ntšamo báseftanga imojtsamcá. Chamna, nyetscanga añemo mochtšenatšetnaye Cristo nyets tempo jtsešervénama, y más mora, chē ndayá imojtsonyama, Bəngbe Utabná yochjésabama ya yojtsobecuama montsetátšəmbo ora.

²⁶ Er chē ndegombre soyəngama tšabá tmojátatšəmbontšana y chē soyənga tmojoyeuná chentšana, bacna soyənga jtsamese tmojtseyena, nye chca jamama tmojtseboše causa, muattsaboté ndayá Cristo bəngbiana tojanmcá, bəngbe bacna soyəngama cha tojanóbana ora, y ya tondaye nántsemna ntšamo Bəngbe Bətsá bənga jtsaperdónama. ²⁷ Y chca, ndayá bənga muattsobena jobátmana soye nántsemna nye chē Bəngbe Bətsábioyeca castigo, chē ndayama šojtsamna uatjana jtsebonmana; y nye jobátmana chē tempo, ndaye ora Bəngbe Bətsá puerte etonaná chabe uayayənga bətscá íñeshca yochtsapochóca. ²⁸ Ndánaca chē Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chənga tmojayanese, jtsemnana chē entšábioye jtsóbana, tondaye ntjalastemacá. ²⁹ Canya, nyets ainánaca Bəngbe Bətsabe Uaquiñábioye tbojtsaboté; y tojayana Cristbe buñe, chē ndémuanyeye tojanábuashana bəngbiana tojanóbana ora, tondaye yonduámana ca, ndayá nye ndaye entšabe buñcá ca, chē buñe chē ndémuanyeye šojtsinyanyná ndayá Bəngbe Bətsá tbojašebuachenacá bəngbiana jamama, y ndáyeca Bəngbe Bətsá chabe entšanga šojábiana, cha jaserviama; chē entšá Uamana Espíritbioye tbojóyenguango, nda inétsama bənga tšabe soyənga chamotsebonmana; y canya chca amá, çtšəngaftanga ndoñe šmontsejuabná cha ibojtsomerecena Bəngbe Bətsábioyeca canye puerte más uabouana castigo, chē Moisesbe leyama tondaye yondovalena ca tojayanabiama? ³⁰ Bənga nyetscanga mondetátšəmbo Bəngbe Bətsá mēntšá tojánayanama: “Atše chanjama chənga chamosufrima, ínənga chamosufrima tmojama causa; y chənga

chanjácastigaye, ínÿengbioye bacá tmojaborlá causa ca.” Y mēntśánaca tojánayana: “Bēngbe Utabná chabe entśangbiama echanjayana ntśamo tmojëftsemcá tśabá o ndoñe tśabá bētsemnama, y chéngaftaca echanjama ntśamo chora chaojajuabocá ca.”³¹ ¡Tśa uabouana, Bēngbe Bētsá chē nÿets tempo ainabe cucuatśiñe joquédana, castigana jtsemnama!

³² Pero ntśamo tempo yojamnama śmochtsenójuabnaye, chē ndegombre soyēnga Jesucristbiama cabá chora śmonjanábuatmana ora, y chora tśa jenujuérsana cmonjanotocá padecena soyēnguñe, y chē causa tśa śmojansufrí.³³ Báseftanga tśēngaftanguentśēngbioye entśangbe delante tmojanoyánguango, y ínÿenga tmojanma puerte chaśmotsesufrínama; y ínÿenga tśēngaftanguentśēnga chca imojansufrínēngaftaca śmojanama, chēnga jujabuáchama.³⁴ Tśēngaftanga śmojánalastemana chē chēnguentsēnga cárceloye imojanétamenēnga; y oyejuayēnga śmojanlesenciá ntśamo śmojanbomncá ínÿenga chacmotsabacama, er tśēngaftanga śmojátatśēmbona Bēngbe Bētsábiocana más tśabe soyēnga śmojtsebomnama, chē nÿetsca tescama śmochtsebomna soyēnga.³⁵ Chcasna, ndoñe śmatjajbaná ainaniñe bētscá añemo jtsebomnana, ni Bēngbe Bētsábeñe sempre jtsobatmanana; er chca śmobatmánayeca, Bēngbe Bētsá echanjama tśēngaftanga bētscá uacanana soyēnga chábicana chaśmotsebomnama.³⁶ Tśēngaftanga cmontsamna corente uantadēnga jtsemnana, padecēniñe chaśmojtsachnējuana ora, chca, ntśamo Bēngbe Bētsá yoboścá tśēngaftanga chaśmotsamama, y ndayá Bēngbe Bētsá tojanaśebuachenacá chaśmóyēngacñama.³⁷ Er Bēngbe Bētsabe uabemana palabrenguiñe cha mēntśá tojánayana:

Betsco, ndoñe bēn, y chē jabama ibomná echanjabo.

Ndoñe bēn quebochatóbema.

³⁸ Nÿe chē ndabiama atśe chaijama atśbe bominÿiñe tśabia chaotsemnama, átśbeñe cha betsośbuáchema, cha ndegombre chē nÿetsca tescama yomna tśabe vida echántsebomna; pero uatjana causa, átśbeñe ośbuáchiyana tojtsajbanase, atśe cháftaca ndoñe quichátoyeuaye ca —cha tojánayana.

³⁹ Pero bēnga ndoñe quemátsmēna chē uatjana causa Bēngbe Bētsábeñe osbuáchiyana tmojtsajbananga, y chca, nÿetsca tescama pochocánēnga jtsemnama imojtsajnēnga; pero añe mondēna chē Bēngbe Bētsábeñe ndegombre ośbuáchiyēnga, y chca, chē atsebácanēnga jtsemnama mochjashjáchēnga.

Bēngbe Bētsábeñe ośbuáchiyana jtsebomnana

11 Ośbuáchiyana jtsebomnana endmēna corente jtsetatśēmbuana, ndayá tmojtsobatmancá ndegombre chca yochjopásama; endmēna ainaniñe corente jtsetatśēmbuana, ndayá bēnga mora ndoñe tmontsonÿacá ndegombre chca yomnama.² Bēngbe Bētsá tojánayana bēngbe bēts taitanga tśabá imojánama ca, chēnga chábeñe imojtsośbuachéyeca.

³ Bēnga, Bēngbe Bētsábeñe mondośbuachéyeca, mondétatśēmbo cha quem luare y nÿetsca luarēnga tojanmama, chca chaotsemnama cha tojanmandá ora; chcasna, chē ndayá mora bēnga jinÿama imobencá, cha tojanma bēnga ndoñe mondobena jinÿama soyēnguentsána.

⁴ Abel Bēngbe Bētsábeñe yojanośbuachéyeca, oveshatēmēnga chábioye tbojanátśēmbona, y chē soye Bēngbe Bētsabiama más tśabá yojtsemna, chē ndayá Caín, chabe

catsata, Bèngbe Bètsá jètschuayama tbojanátšëmbonama. Chíyeca, Bèngbe Bètsá tojánayana Abel chabe bominiñe tšabia yojtsemna ca, ndayá Abel chábioye jètschuayama tojanmcá oyejuayá tojanóyèngacñeyeca. Ntšamo Abel Bèngbe Bètsábeñe yojanošbuachecá, masque cha ya obaná yojtsemna, chë soye cabá bènga šontsabuatambá.

⁵Enoc Bèngbe Bètsábeñe puerte yojanošbuachéyeca, Bèngbe Bètsá celoye tbojesanbètšëñe, ntjobancá. Chentšana ndocná tonjanobená cha jtsinñenana, Bèngbe Bètsá tbojesanbètšëñe causa. Y Bèngbe Bètsabe uabemana palabrenguine endayana, Bèngbe Bètsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojt-sanámbañe. ⁶Pero Bèngbe Bètsábeñe ntsošbuachiyá, ndoñe quenátopodena cha oyejuayá bèngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bétsemnama, y cha inétsamama chë cha jtsabuatamama tša tmobošèngbiama bètscá tšabe soyènga chamotsebomnama, mo chábioyana uacanana soyèngcá.

⁷Bèngbe Bètsá Noébioye tbojanbuayená uabouana soyènga yochjanopásama, cachora ndopodena jinýama soyènga, y cha Bèngbe Bètsábeñe yojanošbuachéyeca, tojanma ntšamo Bèngbe Bètsá tbojanmandacá y barquëshá tojanapormá chabe pamillanga játsebacama. Cha chca tojanma ora, ošbuáchiyana bómnyeyeca, cha tojaninñanyé entšanga tša bacna soyènga tmojanmama y chë causa castigánènga jtsemnana yojtsamnama. Chabe ošbuachiyanámnaca Noé tojánashjache Bèngbe Bètsabe bominiñe tšabia jtsemnana, y

chca entšá jashjáchana, nýe Bèngbe Bètsábeñe jtsošbuáchiyëse.

⁸Bèngbe Bètsá Abrahámbioye tbojanchembo, inýe luaroye cháuama; Abraham Bèngbe Bètsábeñe yojanošbuachéyeca, tojanma ntšamo Bèngbe Bètsá tbojanmandacá, y tojánocna chë luaroye jama, chë Bèngbe Bètsá tbojanšbuachená jatšetayama luaroye, masque Abraham ndoñe yontsetátšëmbo ndémoye yochjánama. ⁹Bèngbe Bètsábeñe yojanošbuachéyeca, yojobena mo inýe luarocana ashjanganocá jtsiyenana, cachabe luarentse ndoyená, chë Bèngbe Bètsá tbojanšbuachená luarentse. Entšéjuaca pormana tambènguine yojoyena, cachcá ntšamo chë chábentšana básenga Isaac y Jacob ibojéftsiyencá; y chátnaca Abrahamcá ibojanobátmana jóyèngacñama ntšamo Bèngbe Bètsá Abrahámbioye tbojanšbuachenacá. ¹⁰Er Abraham corente uantadá yojanobátmana chë canýe luaroye celoca jamashènguama tempo; chë luare inamna canýe bëtš pueblo, puerte tšabe ucuatjoniñe pormana pueblo, canýe luare chë ndayentšama Bèngbe Bètsá tojanjuabó ntšamo chaotsemnana, y cachabe pormana luare inamna.

¹¹Sara, Bèngbe Bètsábeñe yojanošbuachéyeca, Bèngbe Bètsá tojanma cha canýe šësona chabotsebomnama, masque chora ya bëtšanánèjema yojtsemna, šësona jtsebomnama. Bèngbe Bètsá chca tojanma, er Sara corente yojanjuabná, cha chë canýe šësona yochtsanbomnama tbojanšbuachená cha, nýets tempo ntšamo tojayancá amá yojamna ca. ¹²Y chca, quem entšá Abraham, chë šësonga jtsabamnama ya ndobenábentšana, ba básenga tmojanonýná, tša mallajta mo chë celoca estrellèngcá, y tša chéftanga mo chë mar bėjayoca

chēnyānēntša cascajá, ndocná jacúntama ntjobenayana.

¹³Nyetsca quem entsānga imojéftsiyena jtsamēse ntšamo chēngbe ošbuáchiyana yojamncá, y chca tmojanóbana, masque cabá ndoñe tmonjanóyēngacñe chē Bēngbe Bētsá tojanašebuachená soyēnga. Pero chēngbe ošbuachiyánama corente imojtsetátšēmo, Bēngbe Bētsá chentšana baytēse ntšamo tojanašebuachenacá yochjánatšatayama y chē soyēnga ndegombre yochtsemnana, y chama oyejuayēnga chēnga imojtsemna. Chēnga tmojánayana quem luarentšē chēnga imojoyena mo cachēngbe luarentšē ndoyenēngcá, y quem luarējana mo nye achñējuanēngcá ca.

¹⁴Y chca tmojtsichámēngna, puerte jtsinýanýnayana chēnga tša imojtseboše inye luaroca joyéanama, canye luare cachēngbiama. ¹⁵Chēnga nye chē ndayentšana tmojéftsanbocna luarama manjánjuabnase, matmēnjanobená tšabá cachoye jesshéconama. ¹⁶Pero chēngna canye más tšabe luare imnaboše, canye luare celoca. Chíyeca Bēngbe Bētsá ndoñe yonjanéuatja, chēngbe Bētsá ca chēnga chamotsechembuanama, er celoca canye bēts luare, mo canye bēts públēcá chēngbiama tojanprontá.

¹⁷Bēngbe Bētsá Abrahámbioye jinýama, ndegombre añe o ndoñe Bēngbe Bētsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jētschuayama, ntšamo Abraham chē tojóba bayēngaftaca jamama yojanamancá. Cha Bēngbe Bētsábeñe yojanošbuachéyeca, yojtseprontana chē nye canye uaquiñá ibnabomná jóbama, Bēngbe Bētsábioye jētschuayama, masque Bēngbe Bētsá mēntšá tbojanšbuachená: ¹⁸“Chē ácbentšana entsānga nye

Isaacbiajana mochanjabo ca.”

¹⁹Abraham corente yojanjuabná y yojátatšēmo, Bēngbe Bētsá ndegombre obenana bomná bētsemnana, chē obanēnga chámuatayenama jamama. Chíyeca, Bēngbe Bētsá Abrahámbioye tbojtsanauyaná Isaac jóbama ora, yojamna mo Abraham obanēnguentšana chábioye cuaftoyēngacñēcá. Y chca, ntšamo Isaácraftaca tojanopasacá, batšá yojtsinýanýnaye ntšamo Jesucrístoftaca yochjanopasacá.

²⁰Isaac Bēngbe Bētsábeñe yojanošbuachéyeca, Bēngbe Bētsábioye tbojanimpadá chabe uaquiñátbiama, Jacob y Esaú, bētscá tšabe bendicionēnga chabotsebomnana, chē joshjanguama tempēnga ora.

²¹Jacob Bēngbe Bētsábeñe yojanošbuachéyeca, ya jóbana ora, tbojanimpadá cada ona chē Josebe básengbiama, Bēngbe Bētsá chaoma bētscá tšabe bendicionēnga chamotsebomnana. Cha chca tojanma, jotsejbénase Bēngbe Bētsábioye jadórama, y chabe jatjonēfjiñe tsbanánoca jojuáchase.

²²José Bēngbe Bētsábeñe yojanošbuachéyeca, ya jóbana ora, tojánayana más chcoye chē Israeloca entsānga Egiptó luarentšana mojhēftsanbocna ca, y tojēftsanmandá ndayá jamana chabe óbana cuérpoca.

²³Moisesbe bētsétsata Bēngbe Bētsábeñe ibojanošbuachéyeca, cha tojanonýná ora, unga shinýēntscuana cha tmojtsaniytēme, er chata tbojáninýe cha canye botamana básetema bētsemnana, y ndoñe tbonjanéuatjaná chē reybe mandama, chē nyetsca judiēngbe basetēmēnga boyabásetemēnga jtsēbáyana.

²⁴Moisés Bēngbe Bētsábeñe yojanošbuachéyeca, ya bētsá yojtsemna ora, ndoñe tonjánbošena chē Egiptoca reybe bembēbe uaquiñacá

chamotsábuatmama. ²⁵ Chamna, tojánbošena cha jasúfriama ínŷenga chamotsamama, cánŷiñe chë Bëngbe Bëtsabe entsángaftaca, y ndoñe nŷe baseftayté tšabá jatsmënana, bacna soyënga jtsamëse, ntšamo cachá tojtsejuabnacá, nŷe cachá tšabá jtsomñama. ²⁶ Chamna, cha yojanjuabná, chë padecena soyënguñe jasúfriana ntšamo Cristo tojansufricá, más tšabá yojamna chë Egiptoca uámana soyëngama, er cha Bëngbe Bëtsabeñe jtsošbuáchiyëse chábeñe yojanobátmana, ba tšabe soyënga mo canŷe uacanana soycá cha ibochjanatšetayama.

²⁷ Bëngbe Bëtsabeñe yojanošbuachéyeca, Moisés Egiptocana tojéftsanbocna, chë luarentša rey cháftaca chábuatnama ntjatauatjca. Cha ainaniñe nŷets tempo añemo yojtsebomna, y chca yojáninŷna mo chë ndocná jinŷama tondobenacá, Bëngbe Bëtsábioye cuaftsonŷacá. ²⁸ Bëngbe Bëtsabeñe yojanošbuachéyeca, ntšamo Bëngbe Bëtsá tbojanmandacá, Moisés chë judiënga tojanabuayená Bashco fiesta jamama, y chë Israeloca entsángaftaca yebnëngoye amashjuaniñe buñeñe tojanbuéscacja, chca, chë ángel obanayá, chë Israeloca pamíllangbeñe Egiptoca chë mayor uaquinënga ndocá chaondámama.

²⁹ Moisés y Israeloca entsanga Bëngbe Bëtsabeñe imojanošbuachéyeca, chë “Buángana ca” uabaina mar bejayëjana tmojánenachnëngo, mo chiñe bojojo fshantse cuaftsomñcá; chentšana, chë Egiptoca entsanga cachcá jamama tmojánbošena ora, nŷetscanga chiyiñe tojtsanatajo.

³⁰ Israeloca entsanga Bëngbe Bëtsabeñe imojanošbuachéyeca, chë Jericó bëts pueblentša tapiëšënga shéconana canŷsëfta tentscuama

chënga imojánajñentsana, chëšënga yojtšashajaye.

³¹ Rahab, chë pueblentša bacna vida bomna shembása, Bëngbe Bëtsabeñe yojanošbuachéyeca, ndoñe tonjanóbana chë ínŷengaftaca, chë bëts pueblentse oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entsanguentšana ichmónënga tšabá tojanébuaja, chë jarrepárama tmojánanga ntšámose chë luarentše oyenënga jáyëñjanama jobenayama.

³² Atše sentsobena bangbiana más jóyebuambayama, Bëngbe Bëtsabeñe ošbuáchiyëngbiana, pero luare šattsëshbe chchangbiana jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambayëngcá. ³³ Chënga Bëngbe Bëtsabeñe imojanošbuachéyeca ínŷengbe mandadëngbe entsángbioye tmojanayëñjaná, bëtscá imojánama nŷetsca entsángaftaca ntšamo tšabá yomncá jtsamama y nŷetscanga cachcá chamotsámanama, ndayá Bëngbe Bëtsá chënga tojanašëbuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama. ³⁴ Ošbuáchiyana bómnyeyeca, Bëngbe Bëtsá tojanma lempe chaotsefsanama, chëngbioye íñeshiñe tmojanacjá ora, chënga ndocá chamondëpasama; tmojanotsbocá espadéjaca jobanámentšana; ya tondaye añemo bëntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínŷenga jáyëñjanama, chëngaftaca imojtsentsjaná ora; y tmojanobená inŷe mandadënga y chëngbe soldadënga jáyëñjanama, chamotsachetama jamëse. ³⁵ Ošbuáchiyana bómnyeyeca,

básefta shembásenga chéngbe óbana pamíllangbioye cachiñe ainénga tmojtananýe, chénga ainénga chamotsatsmënama Bèngbe Bètsá tojanma ora.

Ošbuáchiyana bómnyeca, ínýenga tmojanma básefta ošbuáchiyënga, puerte chamosufrima, y jobanámna; er chénga más tmojánbošena jashjáchana chë nyetsca tescama yomna tšabe vida jtsebomnana, y ndoñe nye chë jótsbocana batšatema más vida jtsebomnana. ³⁶ Ošbuáchiyana bómnyeca, ínýenga corente tmojansufrí, ínýenga chéngbioye tmojanoyánguango ora y tmojanatsetšená ora; y ínýenga tmojansufrí y cárceloje cadenéjuangaca utámenënga joquédamnaca. ³⁷ Inýengbioye ndëtšbëngaca tmojtsanatëchénganja, serruchéshaca tmojtsanëjácacaye, espadéjaca tmojtsanëbaye. Inýenga imojánajna cánýentsana ínýecnoye nye oveshá y chivëbe bobáheca uichétjonënga, ujabótënga, ainana tsetšanënga, y ínýengbeyeca mocá borlánënga. ³⁸ Chë nye quem luarama enójuabnyënga ndoñe monjanomerecena chénga méngaftaca jtsiyenama, chénga chë vida imojábomna cánýentsana ínýecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguiñe.

³⁹ Nyetsca quem entšanga, ndëmuanýëngbiama muentšë tmonjoyebuambá, Bèngbe Bètsá tšabá chéngbiama tojánayana, ošbuáchiyana imojánbomna ca; pero ni canya chénguentšá tonjanóyëngacñe, ndayá Bèngbe Bètsá chéngbe entšanga jatšatayama tojanašebuachenacá, nyetsca tescama jtsebomnana. ⁴⁰ Bèngbe Bètsá, bëngbeñe jtsejuabnyëse, tojanjuabó canye más tšabe soye bëngbiama jamama, chca, Bèngbe Bètsá canye ora jamama, bënga nyetscanga, chénga

y bënga chamotsemnana lempe ntšamo Bèngbe Bètsá yobošcá, ntšamo Bèngbe Bètsá tojanašebuachenacá jóyëngacñe.

Bënga mochtsejuabnyeye ndayá Jesús tojanmama

12 Chíyeca, bënga mochtsejuabnyeye ba entšangbiama, chë bëngbiama más natsana imojaniyenënga, ndëmuanýënga puerte tšabá bënga jtsinýanýnayana ntšamo ndegombre yomnana Bèngbe Bètsábeñe ošbuáchiyana jtsebomnana, mo chénga ndayá bënga tmojtsamama cuaftsonýangcá. Chcasna, mo chë tmochamanëngcá, ínýëngaftaca jenëyëñjanama, chë jashjanguama tojtsemna luaroye natsana jashjanguama, chénga jotjajuamna, chë chorscama nduaserverna entšayá jtsenátsejcana, y lempe ndayá tojtsama más uenana chamotjajuama soyëngnaca jtsenójacana; bëngnaca cachcá, ndoñe matjaleséncia bënga Crístbioye ndoñe tšabá ndëtšoservënama, ni chë bacna soyënga jamama juabnënga, chë bëngbioye paselo jáyëñjanama juabnënga cachcá chamotsamama. Chamna, šontsamna sempre Bèngbe Bètsá jtseservënana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bèngbe Bètsá šojáchembo. ² Jesusbiama mochtsejuabnyeye, nda šuebënatsana bënga ošbuáchiyana chamotsebomnana, y šuinýanýná ntšamo nyets tempo nyetsca soyënguiñe Bèngbe Bètsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëtsoyejuayánama; y yojanjuabná, chë más bacá uamana entšangcá jóbanana, chabiama ndoñe canye uamana soye

yonjamna ca; y chentšana chë uámana puestentše tojtanótbema, Bëngbe Bëtsabe catšbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiamá oservéniñe ndoñe chacmondëumantšema, ni ainaniñe añemo jtsebmomnana ndoñe chašmondájbanama. ⁴ Tšëngaftanga padecena soyënguñe šmojachnëngo, entšanga bacna soyënga imojtsama causa, pero méntscóñama ndoñe cmontsamna jóbanama, Cristbe soyëngama enojuerzániñe; ⁵ y tcmojtsébnëjtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrenguñe méntšá endayana:

Atšbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,

chora ndoñe catjátsjuabnaye chiñe mo canye nduámana soye cuaftsemncá; y cha chacmojuácacana ora, ndoñe cattsajbaná ainaniñe añemo jtsebmomnana.

⁶ Er Bëngbe Utabná jábuayenana nda cha tbobobonshanábioye, y jacastígana chë mo chabe uaquiñacá tbojofjábioye ca —chiñe endayana.

⁷ Padecena soyënguñe chašmojt-sesufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama? ⁸ Nderado Bëngbe Bëtsá tšëngaftanga ndoñe

tcmonjabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga. ⁹ Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsebedecénana y más bëtš respeto jtsebmomnana celoca Bëngbe Taitabiamá, nda tojama entšanga espíritu chamotsebmomnana, y chca, bënga tšabe vida chamotsebmomnana. ¹⁰ Bëngbe bëtsétsanga quem luarentše, nye básefta tescama, bënga jëftsabuayiyayana, y chca jamana chënga tšabá tojtsinyana ora; pero Bëngbe Bëtsá bënga šojtsabuayiyiná ora, sempre chca jtsamana bëngbe tšabiamama, cachacá puerte tšábenga, ntšamo cha nyets tempo yomncá. ¹¹ Sempre bënga ndaye castigo tmojtsebmomna ora, chora bënga chama ndoñe oyejuayënga ntsemnana, pero añe cochtsetšenánënga. Pero bënga chë castigüentšana tmojuatsjinye ndayá Bëngbe Bëtsá chë sóyeca tbojtsabuayiyacá, as chentšana jóbocnana natjémbana oyenana, nyetsca soyënguñe ntšamo tšabá yomncá jtsamëse.

**Bëngbe Bëtsábioye
jtsabotena, entšangbiamá
ndoñe tšabá ntsemnana.**

¹² Mo nda puerte uamëntšnayacá, jatrabájama tondaye añemo ntjtsebmomncá, tsátšena buacuatséngaca y puerte uamëntšena ntsamiaséngaca, tšëngaftangbentše báseftanga ya uamëntšnayënga šmojtsemna Bëngbe Utabnabiamá trabájayíñe, y ainaniñe ndoñe añemo šmontsebmomna. Cachiñe bëtš añemo šmochtishache, y Bëngbe

Bëtsabe obenana cachiñe šmochtsats-bomna. ¹³Mo chë canye benache tšabá y ndericho chaotsemnama tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínjyama, y chë benachentsana ndoñe chamondët-sebocanama; cachcá tšëngaftanga, chë bëtsá ošbuáchiyana y Cristo jasérvia corente añemo šmobonnënga, chë nye batšatema ošbuáchiyana y chca jatrabájama nye tondaye añemo ndbomnënga šmochjújabuache; chë soye šmochjama, ntšamo Cristo tšabá jasérvia yomncá jinjanjyëse, y ntjalesenciácá ndocna soye chaotsama chë tšabe benachentsana tšëngaftanga chašmotsojuánañama.

¹⁴Lempe ntšamo chašmojobenacá šmochjama nyetscángaftaca natjëmbana jtsiyenama, y ntšamo Bëngbe Bëtsabe entsanga mondbetsamcá jtsamëse chašmotsiyenama, cha jtseservënëse; er chca ntjamcá, canya ndoñe ntsobenana Bëngbe Utabnábioye jinjyama. ¹⁵Yejuana šmochtsantješna, ndocná Crístbeñe ošbuáchiyana chaondëtsajbanama, y chca, chë Bëngbe Bëtsá chabe entsángbioye yochjatšataye tšabe soyënga chënga ndoñe chamondashjache. Šmochtsantješna, tšëngaftanguentše ndocná chaondëtsemna, mo canye untja tbëtëjácá, chë chcaja sayëngbioye jášocayana, nda chaotsama, ínënga natjëmbana ainana ndoñe chamondëtsebomnama y bacna soyënga jtsamëse chamotsiyenama. ¹⁶Yejuana šmochtsantješna ndocná tšëngaftanguentše shembása o boyabásaftaca bacna soye amá chaondëtsemnama, ni canya ndabiama Bëngbe Bëtsabe soyënga tondaye chaondëtsámana. Esaú chca tojanma, chë lempe yochjanashjachcá, mayor uaquiñá bëtsemnama, chabe uabentsábioye canye šcena sanama

tbojtaname ora. ¹⁷Y tšëngaftanga šmondëtatšëmbo, chca tojanopasá chentsana, Esaú tojánbošena chabe taitá Bëngbe Bëtsábioye chaboimpadama, chabiamá tšabe bendicionënga chaomama, chë mayor uaquiñá bëtsemnama yojanobena jtsebomnama soyënga; pero chora chabe taitá ndoñe tbonjanoyeuná, er masque Esaú chora juabna tojantrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

¹⁸Tšëngaftanga ndoñe chešmatobconá, mo chë entsanga Israeloca Siná ca uabaina tjoye tmojanobconacá, ndayá chënga imojobena jabojuama, y íñesheca yojtsángbototjuana, tondaye binjñiñe luare, tša ibetiñe y puerte jabuache binjñéngaca; ¹⁹ni chešmatuena chëngcá, canye trompetéjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama. ²⁰Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canye bayá chaotsomñe, entsemna chana ndëtsbéngaca chamotsatëchénjanga jtsóbama ca.” ²¹Ndegombre, ntšamo tmojaninjácá tša uabouana yojtsemna, cach Moisésnaca mëntšá tojánayana: “Tša šontsengmëmñá auatjananá séntsemna causa ca.”

²²Pero tšëngaftanga Bëngbe Bëtsábioye šmojobconá, y chca endmëna mo tšëngaftanga canye Sión ca uabaina tjoye celoca cuafjobconacá, chë Bëngbe Bëtsá nyets tempo vida bomnabe bëts puebløye, mo

celoca Jerusalén cuenta; y ba uaranga angeléngbioye šmojobeconá, cánýiñe oyejuayénga enefjuanénga imojtsemnéngbioye, Bèngbe Bètsá jtsatschuanayama. ²³ Endmèna mo tsèngaftanga chë Bèngbe Bètsabe entsángbioye cuafjobeconangcá, chentše enefjuanénga mo Bèngbe Bètsabe basengcá, chénga ndayá chë Taitá tojašebuachenacá jýyèngacñama, ndémuanýenga Bèngbe Bètsá chabe libréšañe tojúbiamá. Tšèngaftanga šmojobeconá Bèngbe Bètsábioye, ntšamo nýetsca entsánga tmojamcá tsabá o ndoñe tsabá bétsemnama yochjayanábioye. Endmèna mo tsèngaftanga cuafjobeconacá, chë entsánga mora ya obanénga y ntšamo tsabá yomncá jtsamése imojéftsiyenéngbe espiriténgbioye, chë entsánga ndémuanýengbiama Bèngbe Bètsá tojanma chamotsemnama lempe ntšamo chabe entsángbiama yojanjuabnacá, chca, cháftaca sempre vida jéftsebmnama. ²⁴ Tšèngaftanga Jesúsbioye šmojobeconá, chë jóbanése, entsánga Bèngbe Bètsáftaca mo canýacá chamotsemnama tojanmá, ntšamo Bèngbe Bètsabe tsèm trato yojamncá; y endmèna mo chë bèngbiama cha tojanóbana ora tojanábuashana buiñoje tsèngaftanga cuafjobeconacá; chca tojanábuashana, bèngbioye Bèngbe Bètsabe delante mo tsábengcá jábiamama, mo ntšamo entsángbeñe buiñe jabuéscacajama chë bachnanga imojuamancá. Caín chabe catšata Abélbioye tbojanóba ora, yojamna mo chë Abelbe uabuáshanana buiñe Bèngbe Bètsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bènga más tsábe soyènga jashjáchana;

Jesusbé buíñeca, bènga montsobena atsebácanénga jtsemnama.

²⁵ Cuedado šmochtsebmna, bèngbioye tojtsoyebuambná ora cha joyeunayama. Chë Israeloca entsánga ndoñe tmonjánbošena Bèngbe Bètsá joyeunayama, chë Sinaí tjoca quem luarentše tojanabuayená ora; chéngbioye cha tojanacastigá. Y mora más, Bèngbe Bètsá, chë celocana bènga abuayiyayá, ndoñe cachcá ndécastigánénga quešochátabashejuana, ntšamo cha šojtsètsètsnacá ndoñe tmontseyeunanése. ²⁶ Bèngbe Bètsá Sinaí tjoca chë entsángbioye tojanoyebuambá ora, chabe oyeambuambayánaca tojanma quem luare chauangmémanama, pero mora cha chabe uabemana palabrénguñe tojašebuachená: “Atše cachiñe chanjatsma chauangmémanama, ndoñe nýe quem luare, sinó celócnaca ca.” ²⁷ Bèngbe Bètsá “cachiñe ca” tojánayana ora, chë sóyeca yojtsichamo, chë ndayté lempe chaongmémanama cha cachiñe yochjama ora, chë quem luarentše tmojama soyènga y chë jatrócama yopodena soyènga yochtsejuána ca, chca, nýe chë nýetsca tescama yomna soyènga y ndoñe jatrócama soyènga chaoquedama. ²⁸ Chcasna, Bèngbe Bètsabe améndayoca, chë cha yochjama bènga chamuamashènguama luare, yomna cachcá nýetsca tescama y ndocna te ntjotrócana. Bèngbe Bètsá chama mochjètschuaye, y ntšamo cha tsabá tbojtsinýancá mochtsadorana, chabiamá bèts respeto jtsebmñese, y nýetscangbiama más bètsá cha yomnama jtsejuabnayése. ²⁹ Er Bèngbe Bètsá puerte etonaná chë chabiamá nduauenanénga jabuache echanjácastigaye, y chca, cha jtsemnama mo canýe íñeshe lempe jtsepochoamcá.

Ntšamo jtsiyenama, Bëngbe Bëtsá oyejuayá bëngaftaca chaotsemnana

13 Sempre nyetscanga šmochtsen-bobonshana, Jesucristbeyeca catšátanga quetsomñecá. ² Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentšë tmojanëbuaja.

³ Chë utámenëngbiana sempre šmochtsenójuabnaye, mo tšëngaftángnaca chëngaftaca utámenënga cuaftsemncá. Chë inyënga tmojtsama chamotsesufrinëngbiana šmochtsenójuabnaye, er tšëngaftángnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanensbuachenacá nyetscanga chamotserrespetana; y chë útata chabotsama nye ndayá y nye ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye inyáftaca ingñayëngnaca.

⁵ Ndoñe šmattsiyena jtsejuabnayëse nye mallajta crocénana jëftsebomnana. Nye chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.” ⁶ Y chca, bënga montsobena corente añémoca jayanama:

Bëngbe Utabná endmëna nda atšë šonduájabuachana; tondayama quichátatuatja.

¿Ndayá canÿe entšá nanjobenaye átšëftaca jamama ca?

⁷ Tšëngaftangbe amëndayëngbiana, chë Bëngbe Bëtsabe buayenana soyënga tcmojábuatambangbiana,

sempre šmochtsenójuabnaye. Sempre šmochtsenójuabnaye chë ntšamo chënga imojaniyenentsana tojanóbocna tšabe soyëngama, y šmochtsiyena jtsamëse ntšamo chënga imojanamcá, Jesucristbeñe ošbuáchiyënga bëtsemnana.

⁸ Jesucristo cachá nyets tempo iuëtsemna, tempo, mora y nyetsca tescama.

⁹ Ndoñe šmatjaleséncia inyënga chamotsamama tšëngaftanga chë benachentsana chašmotsojuánañama, ndayá chënga tmojtsabuátambama, y chë Cristo tojánabuataambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnyeyeca, y ndoñe chë sanama, chë ndayá añe o ndoñe šontsamna jtseyayana soyëngama mandënga tcojtsamëse. Chca mandënga ndocna te chë Israeloca entšangbiana tempo tonjanoservé.

¹⁰ Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnana. Bënga mondbomna chë Jesucristo bëngbiana tojanma soye, cruzoca tojanóbana ora, bëngbe bacna soyëngama; y chë nye tmojóba bayëngaca soyënga tmojtsama bachnanga ndoñe ntsebomnana, chë Cristo tojanóbana ora, ndayá tojanmentšana tojanóbocna tšabe soyënga. ¹¹ Er chë judiëngbe más uámana bachnangbe amëndayá, chë tmojóba bayëngbe buiñe chë “más uámana ca” uabaina luaroye juabuyambana, Bëngbe Bëtsá entšangbe bacna soyëngama cháuaperdonama, y chë bayëngbe cuerpënga jtsejuinÿiyana entšanga tmoyena luarentšana chaboca. ¹² Cachcá, Jesúsna tojansufrí y tojanóbana bëtš pueblentsana chaboca,

chabe buiñe tojanábuashana ora jóbaniñe, entšanga Bëngbe Bëtsábenga chamotsemnama, y chabe delante mo tšabengcá chamotsemnama. ¹³ Chíyeca bënga šontsamna Jesúsbioye jobéconana, nda entšanga tmojtsanaboté y bëts pueblentšana chaboca tojanóbana. Cha mochjuasto, y ntšamo cha tojansufricá bëngnaca mochjasúfria. ¹⁴ Er quem luarentše bënga ndoñe quemátsbomna canye bëts pueblo bëngbiana, nyets tempo chauesomñe bëts pueblo, ndayá bëngna tša mondboše y puerte mondobátmana bënga joyéanama chë celoca yochtsemna Bëngbe Bëtsabe bëts pueblentše. ¹⁵ Chíyeca, šontsamna sempre Bëngbe Bëtsábioye jtsatschuanayana, Jesucristbiajana. Bëngbe Bëtsá chca tmojtsadorana ora, jtsemnana mo chábioye jëtschuayama canye soye cuafjuatšëmboncá. Chcasna, jtsóyebuambnayëse cha mochtsadorana. ¹⁶ Sempre ntšamo tšabá yomncá šmochtsama, y chë šmobomncá inyëngbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiana tcojama ca, y jtsinynana bënga Bëngbe Bëtsá imojtsatschuanama, ndayá cha tojamama.

¹⁷ Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanynana, tšëngaftangbe tšabiama, ntšamo cmojánanynama Bëngbe Bëtsábioye jojuama yojtsamnama chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

¹⁸ Bëngbe Bëtsá bëngbiana šmochtseimpadana, er bënga ainaniñe corente fsëndétatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse. ¹⁹ Tšëngaftanga bëtscá cbontsaimpadana, Bëngbe Bëtsá chašmoimpadana, atše chašolesenciama tšëngaftangaftaca cachiñe jtsatsmënama.

Bëngbe Bëtsábioye chëngbiana jaimpádama y chënga jacheuayama

²⁰ Atše, Bëngbe Bëtsá sëntseimpadana, cha chë nda endbëtsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánynana mo oveshëngbe tšabe abujënyácá; y Bëngbe Bëtsá chca tojanma, Jesús, chabe buiñe juabuáshanëse tojanóbanayeca, chca, entšanga jinyanjyayama ndegombre bëtsemnama ntšamo Bëngbe Bëtsá chabe entšangbiana tojanašëbuachenacá nyetsca tescama jamama. ²¹ Cha sëntseimpadana chaoma tšëngaftanga chašmotsebomnama nyetsca tšabe soyënga ntšamo cmojtsëjabortcá, chca, lempe ntšamo cha yobošcá tšëngaftanga chašmotsamama; y cha Jesucristoftaca chaboma bëngaftaca ntšamo cha tšabá tbojtsinyncá. ¡Nyetscanga nyetsca tescama Cristo chamotsatschuaná! Chca chaotsemna.

²² Jesucristbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nye básefta palabréngaca chama tcbonjubuábiana. ²³ Atše sëntseboše tšëngaftanga chašmotsetátšëmbo, Timoteo Jesucristbeyeca bëngbe catšata, ya ndoñe utamená yontsemnama, y cha betesco átšbioye

chaojtabëse, átšeftaca chanjěftsbetše
tšëngaftanga jányama chajjá ora.

²⁴Tšëngaftanga ošbuachiyěngbeñe
nyetsca améndayěnga šmochjácheuaye,
y nyetsca Běngbe Bětsabe entšágnaca
choca. Chě Italia luaroquěnga

ošbuáchiyěnga
cmontsacheuaná.

²⁵Atše, Běngbe Bětsá sěntseimpadana,
cha chaoma tšabe bendicioněnga tšēn-
gaftangbeñe chaotsemnama.

tšëngaftanga

Santiago

Jacheuayama

1 Atše Santiago, Bëngbe Bëtsá y Bëngbe Utabná Jesucristbe canye oservená, tsëngaftanga cbontsëbuabiamná, tsëngaftanga chë bnétsana uta Israeloca bëts pamíllangbioye nyets luarëjana ujquëshenënga. Atše cbontsacheuaná.

Chë Bëngbe Bëtsábíocana osertánana

² Jesucristbeyeca atšbe catsátanga, tsëngaftanga ndaye padecena soyënguine chašmojtšiyena ora, chiñe šmochjájuaoye mo chca tsëngaftangbe tsabiama cuaftsemncá y šmochjóyejuaye; ³er tsëngaftanga šmondétatšëmbo, chcañe chašmojtsajna ora, šmochtsetátšëmbo cach tsëngaftanga Jesucristbeñe puerte šmošbuaché o ndoñe. Chca ora bëts ošbuáchiyana chašmojtsebomnëse, šmochanjobenaye, Bëngbe Bëtsábeñe jtsobátmanëse añémoca jtsemnana, masque padecena soyënguine chašmotsomñëse. ⁴ Pero chca chašmojtsemnëse, šmochtsentšena jashjáchama ntšamo canye entšá Bëngbe Bëtsabe soyëngama corente osertaná yomncá chašmotsemnama, ntšamo Bëngbe Bëtsá yobošcá chašmotsiyenama, chiñe ni mo canye soye jamama chacmondétsabuashebenëse.

⁵ Nderado nda tsëngaftanguentšana ndoñe tontsobena corente osertánana jtsebomnama, cha bontsemna Bëngbe Bëtsá jaimpádana cha chaoma añe chana jtsebomnama, y Bëngbe Bëtsá chana bochanjátšetaye; er Bëngbe Bëtsá nyetscanga bëtscá endbëtsatšatnaye y ndocnábioye jatáboyënjana. ⁶ Pero cha bontsemna, Bëngbe Bëtsábeñe puerte jtsošbuáchiyëse chama cha jaimpádana, y

cha nderado ndoñe bochanjóyeunayama ntjatatëmncá. Nda mëntšá tojtsamëse, inye ora añe Bëngbe Bëtsábeñe cuaftsošbuachecá y inye ora ndoñe, cha entsemna mo canye olëshcá, mar béjayoca binýia nye cáatoye jtsambayana. ⁷ Chca ama entšá ndoñe chaondëtsejuabná, Bëngbe Utabnábentšana ndayánaca jatóyëngacñama. ⁸ Cha jtsemnana canye entšá, mora canye soye juabnayá, pero chentšana inyetšá jatójuabnañana. Chca, cha jtsiyenana nyetsca soyëngama uta soye jtsejuabnayëse, y chca cha ndoñe ntsobenana tondaye puerte tsábá jamama.

⁹ Chë Jesucristbeñe ošbuachiyá, ndbomnjëma y ndoñe yapa uámana entšá tomná, corente oyejuayá chaotsemna, er Bëngbe Bëtsabe bominyiñe cha canye uámana entšá jtsemnana; ¹⁰ y chë bomnánaca puerte oyejuayá chaotsemna, Bëngbe Bëtsá chábioye nduámana entšá chabojábema ora, er mo chë shacuaníne uantšëfjushacá, cha ndoñe nyets tempo quem luarentse ntjëfšiyenana. ¹¹ Shinye tojábocna y becá tojojënýana ora, chë shácuaana jtsebuashana, chë uantšëfjúsha jtsátsatšana y chabe uabótamanana ya ndoñe más ntsebinýnana. Cachcá chë bomná, echanjóbana nye cachabiama más becá crocénana onguayíne chaotjsemna ora.

Bacna soye ocochënguentšana tsábá jabocnana

¹² Oyejuayá chaotsemna chë entšá chë padecena soyënguentšana tsábá tojëtsbocná, cabá Jesucristbeñe ošbuachiyá; chama Bëngbe Bëtsá chabiama oyejuayá echántsemna y echanjama chë nyetsca tescama yomna tsábe vida cha chaotsebomnama, mo uacananancá chabe ošbuáchiyama. Chë soye Bëngbe Bëtsá tojašebuachená nyetscanga cha imobobonshánëngbioye. ¹³ Nderado nda bacna soye jamama tbojócochëngo,

ndoñe chaondětsejuabná Bëngbe Bëtsá chca cháftaca yojtsama ca; er Bëngbe Bëtsá ndocna te bacna soye jamama jócochënguana, y cha ndoñe ntsamana ínÿenga bacna soye jamama chaócochënguama. ¹⁴Inÿetšá endmëna, canÿa bacna soye jamama jócochënguana, bacna juabnënga tojtsebomna ora; cha chiñe nÿe jésejuabnayana y chë soye jtsasjayana cha chca jamama. ¹⁵Nda yapa bacna soyënga tojtseboše, cabana cha pronto chë bacna soye jamana; y nda sempre bacna soyënga tojtsama, chama Bëngbe Bëtsá nÿetsca tescama bochanjacastiga.

¹⁶Atšbe bonshana catsátanga, ndoñe matenoíngñana, jtsejuabnayëse Bëngbe Bëtsá yojtsama tšëngaftanga bacna soyënga chašmotsamama ca. ¹⁷Nÿetsca tšabe soyënga y chë puerte tšabe soyënga tsbanánocana endobá, Bëngbe Bëtsá chë Taitábicana. Y cha chë shinÿe, juashcona, y nÿetsca chë celoca yobuashinÿinÿana soyënga tojamá, nÿets tempo nÿe cachá ivesomñe y ndoñe inÿa ntjátsmënana. ¹⁸Cachá jamama tojánbošenayeca, bënga chábenga šojánabiama, bënga chabe ndegombre palabrënga jouenëse. Cha chca tojama, lempe ntšamo Bëngbe Bëtsá quem luarentše tojamentšana, bënga chë natsanënga chábenga chamotsemnana.

Ntšamo ndegombre yomna Bëngbe Bëtsábioye tšabá jadórama

¹⁹Atšbe bonshana catsátanga, quem soyama šmochtsenójuabnaye: nÿetsca tšëngaftanga cmontsamna sempre jtseprontánana jouenama; pero jóyebuambayamna jobátmana y ínÿengaftaca jetnámnaca. ²⁰Inÿaftaca tbojetna ora, canÿe entšá ndoñe ntsamana ntšamo Bëngbe Bëtsá yobošcá, chë nÿetsca soyënguiñe tšabá jtsamana. ²¹Chcasna, šmochtsajbaná

bacna soyënga jtsamëse oyenana, y amana nÿetsca soyënga ndoñe ntšamo Bëngbe Bëtsá yomandacá; y chë Bëngbe Bëtsá tojama tšëngaftangbe ainaniñe chaómashënguama buayenánana, ntjatosoberbnaycá šmochjóyëngacñe. Chë buayenánana chašmojóyeyunase, echanjopódia tšëngaftanga atsebácanënga jtsemnana.

²²Ndoñe quecmátamna nÿe chë Bëngbe Bëtsabe buayenánana jouenana, ndayá ntšamo cha tojayancá añe jtsamana; ndoñe chca šmontsamëse, cach tšëngaftanga šmontsenoíngña. ²³Nda nÿe chë buayenánana tojouena, pero betesco tbojtsebnatjëmbe y ndoñe tontsama ntšamo chiñe tojtsayancá, cha jtsemnana mo canÿe entšá chabe jubiá espejuñe tojtsenonÿacá: ²⁴chana cachá jtsenónÿayana, pero chë espejo tojabuertaná ora, jtsebnatjëmbana ntšamo cha bëtsemnana. ²⁵Pero nda ntšamo tojouencá ndoñe tbonjebnatjëmbe, y sempre tojtsejuabná chë entšanga játsebacama Bëngbe Bëtsabe puerte tšabe mando chabosertama, y tojtsiyena ntšamo chë mandënguentše endayancá, lempe ntšamo chë entšá chaojtsamiñe oyejuayá Bëngbe Bëtsá bochanjábema.

²⁶Nderado nda tojtsejuabná Bëngbe Bëtsábioye ibojtsadorana ca y chë Bëngbe Bëtsábioye adorayá ntšamo ibomncá cha yojtsama ca, pero ndoñe tontsobena bacna soye oyebuambayana jtsajbanana, cachá yojtsenoíngña, y nÿetsca soyënga ntšamo tojtsamcá Bëngbe Bëtsá jadórama, chabiamana tondaye ntsámanana. ²⁷Bëngbe Bëtsá chë Taitabe bominiñe, chë puerte tšabe y ndegombre soyënga, ndayá entšá ibojtsemna jamana endmëna: chë uajchonga y viudanga corente ngmëñënga tmojtsemna ora jujabuáchana, y ndoñe bacna soyënga

játamana, mo chë nÿe quem luarama enójuabnayënga mondbetsamcá.

Nÿetscanga tšabá jtsatenonÿayëngana

2 Tšëngaftanga, Jesucrístbeyeca atšbe catšátanga, šmondošbuaché Bëngbe Utabná Jesucristo, chë puerte bëtsá y uamanábeñe; chíyeca tšëngaftanga cmontsamna nÿetsca entšanga cachcá jtsatenonÿayëngana.²⁻³ Nderado tšëngaftanga cánÿentše šmojénefjna, y chora canÿe bomna entšá tojášhango

castellano ntšabuchétjonéřjanganca y uámana entšayéjuanganca bopormaná, cha botamana šmojúmashëngo y mëntšá šmojayana: “Moca quëfseroca mabesótbema ca”. Pero cachca ora, canÿe ndbomñejema tojášhango uandocuenta entšayá uichétjoná, y cha šmojayana: “Acna choca tsanana cochtsemna o chafjoca mótbema ca”.

⁴ Chca tšëngaftanga ya šmontsama cach tšëngaftanguentše báseftanga más uámanënga ínÿëngbiama chamotsemnama, y chca šmojt sama, ana bacna juabnënga šmojtse bomna causa.

⁵ Atšbe bonshana catšátanga, quem soye šmochjouena: Bëngbe Bëtsá quem luarentše ndbomnënga imomnënga tojabacacá, chënga canÿe puerte uámana soye chamotse bomnama, Jesucrístbeñe puerte chamotsošbuáchema; y mo otocana soycá Bëngbe Bëtsabe amëndayama chamosháchiñama. Cha imobobonshánëngbioye chë soye jatšatayama tojašebuachená; ⁶ pero tšëngaftanga chë cuenta, mo ndoñe cach tšëngaftangcá entšanga bendmëncá chëngbioye jtsëñÿayana. Ndegombre, chë bomnënga mondmëna chë nÿe sempre cmondbëtsamëndayënga y chë sjojónana chë pueblentša mandadëngbioye cmondbáunatsënga. ⁷ Y cach bomnëngnaca mondmëna chë

Cristbiama podesca oyebuambnayënga, ndábenga tšëngaftanga šmondmëna, y chabe uabaina tšëngaftangbiama puerte enduámana.

⁸ Bëngbe Bëtsabe uabemana palabrenguiñe mëntšá endayana: “Ndëmua entšánaca cochtsebobonshana ntšamo cach aca cuenobobonshancá ca.” Tšëngaftanga ntšamo chë Bëngbe Utabnabe mandiñe endayancá ndegombre šmojt samëse, tšabá šmochántsama. ⁹ Pero tšëngaftanga ndoñe cachcá šmontsenonÿase, chcana bacna soye jtsamana y šmojama ntšamo Bëngbe Bëtsabe leyënguiñe ndoñe yondëlesenciancá. ¹⁰ Y mora, canÿe entšá nÿetsca chë leyentša mandënga tojt sobedecena, pero ndoñe tontsama ntšamo nÿe mo canÿe mando ntšamo iuayancá, cha Bëngbe Bëtsabiama jtsemnana canÿa ntšamo nÿetsca chë leyentša mandënguiñe ndoñe yondëlesenciancá amá. ¹¹ Cach Bëngbe Bëtsá, chë “acbe shema o boyábioye ínÿaftaca ndoñe cattseingñaye ca” tojanayaná, cachá mëntšánaca tojánayana, “ínÿabioye ndoñe catjóba ca”. Chca, nda cachabe shëmbioye ínÿaftaca ndoñe tbonjaingñé, pero añe ínÿabioye tbojóba, chca, Bëngbe Bëtsabiama cha jtsemnana canÿa nÿetsca chë leyentša mandënga ndocumpliná.

¹² Tšëngaftanga cmontsamna jtsóye-buambnayana y jtsamana ndayá Cristo šojanamëndacá, atsebacana entšangcá, er Bëngbe Bëtsá echanjayana ntšamo tmojamcá añe o ndoñe tšabá bëtsemnama. ¹³ Er chë ínÿëngbiama ndoñe ngmënana bomnëngbiama, Bëngbe Bëtsá ntjongmiacá echanjayana ntšamo tmojamcá añe o ndoñe tšabá bëtsemnama; pero chë ínÿëngbiama añe ngmënana bomnëngbiama, ntšamo tmojamcá añe o ndoñe tšabá bëtsemnama Bëngbe Bëtsá

chaojayana ora, chënga tšabá chentsana mochanjábocana.

**Chë ndegombre ošbuáchiyana,
soyëngaca jinÿanÿiyana**

¹⁴ Atšbe catšátanga, ¿ndayama cánÿabioye buanjóservia jayanana afñe Jesucristbeñe séntsošbuaché ca, pero cha ínÿengbiana tšabe soyënga ndoñe tontsama, y chca, ntšamo cha tojtsamcá ndoñe tontsinÿanÿná cha Jesucristbeñe yošbuáchema? Ndegombre, cha nÿe chca tojtsichámëse, ndoñe ntsopodénana cha atsbocaná chaotsemnama. ¹⁵ Nderado canÿe boyabása o shembása ošbuachiyá entšayá tbojtsabuáshbena y saná chë te jasámnaca tbojtsebuáshbena, ¹⁶ y canÿa tšëngaftanguentšá tbojauyana: “Diošoftá, sësnama ndoñe chacondétsepadecena y becá chacuatoshachá ca”, pero chca chaotsemnama chábioye tondaye tbonjatšetase, ¿ndayama nantsoservena chca jayanana? ¹⁷ Cachcá, nda tojayana Jesucristbeñe yošbuaché ca, pero ndocna tšabe soyënga tontsama, chë ošbuáchiyana bomnama jinÿanÿiyama, nÿe chca ošbuáchiyana jtsebomnana tondayama ntsoservénana.

¹⁸ Pero nderado ndánaca mëntšá echanjyana: “Aca Jesucristbeñe icošbuaché, pero atšna ínÿengbiana tšabe soyënga séntsama ca.” Chora atše stjojuá: “Šminÿinÿé ntšamo canÿa nantsobena Jesucristbeñe jtsošbuáchiyana, chca chaotsinÿinama tondaye ntsamcá, y chora, ndayá tijamama atšbe ošbuáchiyana cbochjinÿinÿiye ca.” ¹⁹ Aca condošbuaché nÿe canÿe Bëngbe Bëtsá yomnama y chca tšabá contsama; pero chë bacna bayëjégnaca chiñe jtsošbuáchiyana, y chë causa chënga uatjana jtsebomnana y jtsangmëm-nayana. ²⁰ Ndoñe obëjema cattsemna;

ndegombre cbochanjinÿinÿiye nderado nda Jesucristbeñe tojtssošbuaché, pero tondaye tontsama chca chaotsinÿinama, chabe ošbuáchiyana tondayama ntsoservénana. ²¹ Bëngbe Bëtsá tojánayana chabe bominÿiñe Abraham, bëngbe tempsca bëts taitá, tšabia yojamna ca; chca tojánayana, er Bëngbe Bëtsá tbojanmandá ora, yojtseprontana chabe uaquiná altariñe jóbama, cach Bëngbe Bëtsábioye jëtschuayama. ²² Aca contsobena Abrahámbeñe jinÿama, cha Bëngbe Bëtsábeñe yojanošbuáchema, y soyënga yojánama chca chaotsinÿinama; y ndayá cha tojanmama entsinÿinÿena, cha ndegombre puerte bëtscá yojanošbuáchema. ²³ Chca tojanopasá ntšamo Bëngbe Bëtsabe uabemana palabrenguiñe endayancá, mëntšá: “Abraham Bëngbe Bëtsábeñe yojtsošbuáchiye, y chama Bëngbe Bëtsá tojánayana chabe bominÿiñe cha tšabia yojamna ca.” Y Abraham entsanabaina Bëngbe Bëtsabe amigo ca.

²⁴ Y tšëngaftanga šmontsetátšëmbo, Bëngbe Bëtsá ináyana canÿe entšá chabe bominÿiñe tšabia yomna ca, chë entšá ndayá tojtsamama, chabe ošbuáchiyana chaotsinÿinama, y ndoñe nÿe ošbuáchiyana tojtsebomnana. ²⁵ Cachcá tojanopasá Rahab, chë bacna vida bomna shembásaftaca; Bëngbe Bëtsá tojánayana chabe bominÿiñe cha tšabia yojamna ca, er cha canÿe tšabe soye tojanma. Cha chë noticia uambaye judiënga posada tojanéyentsame, y chentsana tojanéjabuache inÿe benachëjana chamuáisebocanama, chë pueblentšá soldadëngbiana chamotsachetama. ²⁶ Lempe básefta palabrenguiñe jayanamna mëntšá entsemna: ntšamo canÿe cuerpo, espíritu ndbomna cuerpo, pronto jóbana, cachcá chë ošbuáchiyana, ndocna soyëngaca

tontsemna, chca chaotsinýnama, tondayama ntoservénana.

Bichtájaca tšabá jóyebuambayama endmëna

3 Jesucristbeyeca atšbe catsátanga, ndoñe yapa buátëmbayënga tšëngaftangbeñe chamondëtsemna; er tšëngaftanga ya šmondëtátšëmbo, bënga, chë entšanga abuátambayëngbiama, chë castigo más bëtscá yochtsemnana, Bëngbe Bëtsá ndoñe tmonjóyeunase, ntšamo entšanga tmojamama añe o ndoñe tšabá bëtsemnana cha chaojayana ora. ²Bënga nyetscanga nyetsca bacna soyënga mondbëtsama. Nderado nda oyebuambnayıñe ni mo canye bacna soye tonjama, chë entšá puerte tšabia jtsemnana, ntšamo Bëngbe Bëtsá yobošcá jtsiyenëse, y cha yojtsobera cachá sempre jtsemomándayama.

³Chë couayëngbiöye freno tmojuayashbé ora, ntšamo bënga tmojtsebošcá chënga mochántsama, y bënga cachora jtsoberana ntšamo nyets chëngbe cuérpoca tmojtšamcá jtsemándayana, y ndoñe nyë chëngbe bestšaše. ⁴Barquëshamnaca šmochjenójuaboye. Masque tša bëtsët-sacuemëngá y tša jabuache binýiënga chë barco jtsëjuatsëntšayana, chë uamanéjayënga chë barco juyambana ndayëjana tmojtsebošcá, y chca, nyë canye base soyetémaca, timón ca uabainëtémaca. ⁵Cachcá, chë bichtaja cuerpiñe canye base soyetema endmëna, pero chë bichtájaca entšanga jtšenábotamnayana bëts soyënga tmojamama. Šmochjouena, canye base ñeshe jtsoberana canye bëts tjañe juangbotjuama. ⁶Y chë bichtaja endmëna mo canye ñeshcá, mo canye luare ndayentšë puerte bacna soyënga

tobinýncá. Chë bichtaja jtsoberana bëngbe cuerpentšë puerte bacna soyënga bëngbiama jamama. Mo canye ñeshe becá tojtšendbiamnacá, chë bichtájaca tcojtšichamo ndoñe tšabe soye, jtsoberana bacna soyënga bëngbiama jamama nyets tempo quem luarentšë tmuetsiyenëntscuana; y mo nda ndayá tojtšangbotjuacá, Satanás jtsoberana chë bichtaja jtsemándayana, bacna soyënga chaotsamama.

⁷Entšá endobena jtšamëndayana nyetsca tjoica bayënga, shloftšënga, osjojnayënga y buyeshiñe oyena bayënga; y ndegombre mora entsamënda; ⁸pero ndocná tonjobená chë bichtaja jtsemándayana, chca, bacna soyënga amana chaotsajbanama. Chë bichtaja jtšamana bëtscá bacna soyënga cada te chauëtsebinýnama, y mo canye mëtšcuaycá veneno jtseboamnana jóbama, chë bichtájncá cachcá endmëna. ⁹Bichtájaca bënga puerte tšabá Bëngbe Bëtsá y Taitabiama jtsichámuana, y cach bichtájaca bënga puerte bacá entšangbiama mondbëtsichamo, masque Bëngbe Bëtsá cachacá enoparecëngë chënga tojábiana. ¹⁰Cach uayášëntšana jtsóbocanana Bëngbe Bëtsabiama tšabe palabrënga y entšangbiama bacna palabrënga. Jesucristbeyeca atšbe catsátanga, chca ndoñe chaondëtsemna. ¹¹Canye béjaye obocanentšana ndoñe ntšopodénana tšabe býyeshe chaóbocnama y cachentšana untja býyeshnaca. ¹²Ntšamo canye higo betiyentšana ndoñe ntšopodénana olivosëšënga jashacama, y canye uvas betiyentšana ndoñe ntšopodénana higuëbënga jashacama, cachcá, atšbe catsátanga, tamona býyeshentšana ndoñe ntšopodénana tšabe býyeshe chaóbocnama.

Bëngbe Bëtsábiocana óvocana osertánana

¹³ Nderado tšëngaftanguentšë tojtsemna canye puerte tatšëmbuá y osertaná, cha bontsemna, chca yomnama entšanga jinÿanÿiyana, tšabe soyënga amana jtsiyenëse y chë ntjatosoberbnaycá tojama soyëngaca; y cha chca jamana, puerte osertaná bëtsemnana. ¹⁴ Pero tšëngaftangbe ainaniñe yapa ínÿabioye šmojtšántšaboše y nye ínÿyenga chamotjáyanama soyënga šmojtsama, as ndoñe šmattsenábotamnaye osertánënga y tšábënga šmomnana, er ndegombre Bëngbe Bëtsabe osertánana tšëngaftanga ndoñe šmontsebomna. ¹⁵ Er chca osertánana, Bëngbe Bëtsábiocana ndoñe ntsóbocanana, ndayá nye quem luarama enójuabnayëngbentšana, nye entšangbe juabnentšana, y canye bacna bayéjbentšana. ¹⁶ Ndayentšë entšanga yapa tmojtšenántšaboše, y nye ínÿyenga chamotjáyanama soyënga tmojtsama, chentšë tondayama quemochátenëyeunana y nyetsca bacna soyënga mochántšama.

¹⁷ Pero chë Bëngbe Bëtsábiocana óvocana osertánana bomnënga, nyetsca soyamna, natsana puerte tšabe vídaca jtsiyenana, bacna soyëngaca ndëmandánënga; y chënga jtsemnana chë ínÿyenga ndoñe chamondétsentsjanama amënga, tšábënga y sempre jtseprontánana ínÿyenga joyaunayama. Y cach quemënga jtsemnana ínÿyengbiama ngménana bomnënga, sempre tšabe soyënga jtsamana, cachcá nyetsca entšángbioye jtsénÿayana, y ntšamo ndegombre tojtsemncá jtsichámuana y jtsamana. ¹⁸ Ntšamo canye jená, botamana shajuana jtsebomnana tšabe jénaye jájena, cachcá, sempre natjëmbana jtsiyenama bošëngna, natjëmbana ínÿyengaftaca jtsiyenana,

chca, nyetsca entšanga chamotsamama ntšamo Bëngbe Bëtsabe bominÿiñe tšabá yomncá.

Šmochtsiyena Bëngbe Bëtsá tšëngaftangbeñe jtsemándayëse

4 ¿Ndayentšana chë tšëngaftanga jtsentsjanayama y jtsepenzëntsiayama yóbocana? Endóbocana chë tšëngaftangbe bacna juabnënguentšana, nye cach tšëngaftanga tšabá jtsomñama; y chë soyënga tšëngaftangbe ainaniñe sempre chë tšabe juabnëngama contra jésemnana. ² Tšëngaftanga ndayánaca jtsebomnana šmojtseboše, pero chca jtsebomnana ndoñe šmontsobena, as jtseprontánana ínÿyengbioye jtsëbáyama. Inÿa ntšamo tobomncá tšëngaftanga tša jtsántšabošana, y chë soye jashjáchama ndoñe šmontsobena ora, ínÿyengaftaca jentjáyanangana y jtsepenzëntsiayana. Ntšamo šmojtsebošcá ndoñe ntjobenayana jtsebomnana, Bëngbe Bëtsá chama ndoñe šmondbotjañe causa; ³ y chë soye šmojtjañe ora, tšëngaftanga ndoñe ntjójyëngacñana, ndoñe botamana chë soye šmondbotjañe causa, er tšëngaftanga chë soye jtsebošana nye chaoservema oyejuayënga bacna soyënguñe jtsomñama.

⁴ ¿Tšëngaftanga, Bëngbe Bëtsá bobonshánana šmojtsajbananga! ¿Ndoñe šmondétatsëmbo, chë jtsebošana nye quem luarama enójuabnayëngbe amigo jtsemnana y nye quem luarentša soyënga jtsebomnana, chca, canye entšá Bëngbe Bëtsabe uayayá jtsemnana? Ndánaca tojajuabó nye quem luarama enójuabnayëngbe amigo jtsemnana, chca, canye Bëngbe Bëtsábioye uayayá jóbemana. ⁵ Ndoñe nye bonamente Bëngbe Bëtsabe uabemana palabrenguñe mëntšá endayana: “Chë Bëngbe Bëtsá tbojanichmó bëngbe ainaniñe

chaotsiyenama Uámana Espíritu, puerte entseboše nye Bèngbe Bètsá canya bèngbe amèndayá chaotsemnana ca.”

⁶ Pero Bèngbe Bètsá, bèngbe tšabiama jtsejuabnayèse bènga jtsèjabuáchanana, chíyeca Bèngbe Bètsabe uabemana palabrénguine mèntšá endayana:

Bèngbe Bètsá chë nye cachènga uámanènga tmojtsenobiamnangbe contra entsemna,

y chë ndoñe uámanènga montsenobiamnangbiamna, Bèngbe Bètsá más tšabe juabna entsebomna ca.

⁷ Asna, tšèngaftanga šmochtseprontana nye Bèngbe Bètsá chacmotsamèndama; ntšamo Satanás tcmojtsamèndacá ndoñe šmattsama, y cha cachora tšèngaftangbentšana echantsachá. ⁸ Bèngbe Bètsábioye šmochtobeconá, y cha echanjama tšèngaftanga ntšamo cha yomnana chacmotsèsertánama. Tšèngaftanga bacna soye amènga, cach tšèngaftangbe cucuatšéngaca tšabe soyènga šmochtsama, bacna soyènga ndoñe. Tšèngaftanga chë inye ora jtsejuabnayana Bèngbe Bètsá jtsebobonshánama, y inye orna, nye quem luarentša soyènga jtsebomnana, šmochtsajbaná bacna soyènga jamama bošana, chca, nye tšabe juabnènga tšèngaftangbe ainaniñe chašmotsebomnana. ⁹ Tšèngaftangbe bacna soyèngama ngménaca šmochtsemna, šmochjenóbošachna y cochtsetšenánènga šmochjòyebuambaye. Jatenbiajuayamna, šmochjenóbošachna; y joyejuayèngamna, ngménaca šmochtsemna.

¹⁰ Bèngbe Bètsabe delante bètsétsanga ndoñe šmattsenobiamnaye, y cha más uámanènga cmochanjábiana.

Inyèngbiana ndoñe ntsichámuana ndoñe tšabá tmonjama ca

¹¹ Jesucristbeyeca catšátanga, inyèngbiana bacna soyènga ndoñe šmattsóyebuambnaye. Nda cachabe catšatbiana bacna soye tojtsichamo o tojayana ntšamo cha tojamcá ndoñe tšabá yontsemna ca, cha chora chë leyentša mandènga ndoñe ntsocumplínana y jtsichámuana chë leyentša mandènga tondayama yontsoserverna ca. Y chë leyama chca tcojtsichámèse, cach ley jocúmplia cuenta, contsobiamná canye ichamuá chë ley aïne o ndoñe yondoservénama, y chca ndoñe quecmátsmèna jtsamana.

¹² Chë ley tojuapormá cha nye canya endmèna, Bèngbe Bètsá, y cachá endmèna ntšamo entšanga tmojamcá aïne o ndoñe tšabá bétsemnana ichamuá, y cachánaca entsobena entšanga játsebacama o nyetsca tescama jácastigama. Y acna, ¿ndase cmèna ndèmua entšabiámnaca jobenayama jatichámuama ntšamo tojamcá aïne o ndoñe tšabá bétsemnana?

Ndayá yèfse yochjatèchnènguama ndoñe ntsótatšèmbuana

¹³ Y mora quem soye šmochjouena, tšèngaftanga chë šmondbètsichamo: “Mènté o yèfse quemoye o chë inye bèts puebløye fchanjanga, y chentše canye uata fchanjéftsemna ba soyènguine trabájayinè, y ndegombre becá fchanjónyena ca.” ¹⁴ Pero ni mo ndayá yèfse tšèngaftangaftaca yochjochnènguama ndoñe quešmátstatšèmbo! Tšèngaftanga ndoñe quešmátstatšèmbo ndayèntscuana vida šmochjéftsebomna, y chca, tšèngaftanga šmondmèna mo canye jantsetèshcá, chèshe mora jónynana y nye ndeolpe jatenatjèmbana. Tšèngaftangaftaca cachá echanjopása. ¹⁵ Tšèngaftanga

mëntšá cmontsamna jayanama: “Bëngbe Bëtsá quešojalesenciase, ainënga fchántsemna y quem soye o chë soye fchanjama ca.”¹⁶ Pero chë cuenta, tsëngaftanga bëts soyënga šmochjama mama sempre jtsenábotamnayana, ndayá tsëngaftanga chašmomama Bëngbe Bëtsá yochjalesenciá ntsetatšëmbcá; y chca jtsamana ndoñe tsábá quenátsmëna.¹⁷ Nda tojtsobena ntšamo tsábá yomncá jamama, pero ndoñe chca tonjama, cha canye bacna soye jtsamana.

Chë bomnënga jábuayenama

5 ¡Quem soye šmochjouena, tsëngaftanga chë bomnënga! ¡Chë tsëngaftanga šmochtsesufrínama šmochjenóbošachna y uatjananënga šmochtseyoye!² Tsëngaftangbe bomnana buajónana janguánana entsemna, tondayama quenátoservena, y chë entšayëjuangá mejëjonga montsasá.³ Tsëngaftangbe castellano y midio tojtsengúsheshe; y chë ngúsheshna echántsinjínayey tsëngaftanga chë crocenánaca ndoñe šmonjanmama ntšamo ínÿenga ujabuáchama yojamncá; chë causa, nyetsca tescama cmochántsapochocaye, ntšamo chë íñeshe canye soye endbetsepochoacá. Tsëngaftanga quem tempo bomnana šmojtsejuabá, y mora quem luare jopochócama ya entsobeco.⁴ Tsëngaftanga chë tsëngaftangbe fshantsënguñe tmojtftsetrabajanga ndoñe šmontanëbuénaye, y mora šmochjouena, chënga chama cmontsachembuanama. Bëngbe Utabná nyets obenana bomná, chë trabajayëngbe chembuanana ya tojouena.⁵ Quem luarentše tsëngaftanga šmondoyena ba botamana soyëngaca y nÿe ntšamo cach tsëngaftanga šmobošcá jtsamëse. Ntšamo canye uacná jóbana, minÿicá tojtsemna ora,

cachcá tsëngaftangbiama entsobeco chë te, ndaye ora Bëngbe Bëtsá echanjama castigánënga chašmotsemnama, er puerte bacna soyënga šmojama. ¡Chë castigo jtsëbínÿenama tempo ya entsobeco!⁶ Tsëngaftanga, chë puerte tsábá amëngbiama šmojayana jóbanama yojtsamna ca y šmojtšëbaye, chca ndoñe chaondëtsemnama chënga ndocá jamama ntsobercá.

Chë uantado jtsemnana y chë Bëngbe Bëtsáftaca jencuéntama ora

⁷ Pero tsëngaftanga, catšátanga, uantádoca šmochjobátma Bëngbe Utabná yochjésabo orscama. Chë jajañe trabajayá tojtsobátmana bëtscá tsabe shajuanënga jobuátbanama, jtsotocánana natsana uantádoca jobátmana chë jajañama uaftena tempo chaóshjanguama.⁸ Tsëngaftángnaca uantadënga šmochtssemna, y tsëngaftangbe ainaniñe añemo chaotsemna, er Bëngbe Utabná mëntescana ndoñe bën y moye echanjésabo.

⁹ Jesucristbeyeca catšátanga, ntšamo ínÿenga tmojtsamama ndoñe nÿe šmattsoquejana, Bëngbe Bëtsá tsëngaftangbiama ndoñe chaodayanama, ntšamo šmojóyebuambama ndoñe tsábá šmonjama ca. Y nda yochjayana ntšamo entšanga tmojamcá aífie o ndoñe tsábá bëtsemnama, ya entsebeconá.¹⁰ Atšbe catšátanga, chë tempsquënga Bëngbe Bëtsabe juabna oyebuambnayënga, ndëmuanyënga entšanga tmonjanabuayená Bëngbe Utabná jótšëmbonëse, chënga béngbioye šonjëftsantinÿanÿiye ntšamo tmojansufrima, ntšamo šojtsamna uantadënga jtsemnana tmojttsesufrina ora; y chca tsëngaftanga cmontsamna jtsamana.¹¹ Bënga chëngbiama fsëndbëtsejuabnaye oyejuayënga imojamna ca, chë tmojansufrí ora Bëngbe Bëtsábeñe imojanobátmana ainaniñe añemo

jtsebomñese. Tšëngaftanga šmojouena ntšamo Job ainaniñe añémoca Bëngbe Bëtsábeñe yojanobátmana, puerte padecena soyënguñe yojasufrina ora; y šmondétatsëmbo ntšamo Bëngbe Bëtsá cabana chábioye tbojancuedama, y chca yojamna Bëngbe Utabná entsangbiama puerte ngmená yómñayeca.

¹² Pero masna, atšbe catšátanga, ndayá jamama chašmojašbuachená ora, chca ndoñe šmatjama jajúrase ni celocama, ni quem luarama, ni ndocna inye soyama. Tšëngaftanga añe ca jayanama šmojtsebošëse, nye añe ca šmochjayana, y ndoñe casna nye ndoñe; chca, Bëngbe Bëtsá ndoñe chaodayana ndoñe tšabá šmonjama ca júraye causa.

¹³ Nderado nda tšëngaftanguentsá puerte ngménaca tojtsemna, cha bontsemna Bëngbe Bëtsá chama jaimpádama. Y nderado nda oyejuayá tojtsemna, cha bontsemna jacántana Bëngbe Bëtsá jëtschuyama. ¹⁴ Nderado nda šocá tojtsemna, cha bontsemna chentša ošbuachiyëngcá enefjuanéngbeñe bëtsëjemëngcá amëndayënga jáchembuana, chënga Bëngbe Bëtsá chabiamama chamoimpadama, y Bëngbe Utabná jótšëmbonëse aceitiye chamuanëtjuama. ¹⁵ Y tšëngaftanga, puerte jtsošbuáchiyëse Bëngbe Bëtsá chašmojaimpádá ora, chë šocá salud echántinyena, y Bëngbe Utabná echanjama cha tšabá cachiñe chaotsatmënama; y

nderado cha bacna soyënga tojamëse, Bëngbe Bëtsá bochantseperdóna. ¹⁶ Chíyecna, chë bacna soyënga šmojtsamama šmochjobuambaye, y Bëngbe Bëtsá nyëtscangbiama šmochtseimpadana, chca, tšabá mo shnanëngcá chašmotsemnama. Canya ndabiamama Bëngbe Bëtsá tojayana chabe bominýiñe tšabia yomna ca, cháftaca tbojencuentá ora, chánaca ba tšabe soyënga jóyëngacñana, y jobenayana bëts soyënga jamama. ¹⁷ Bëngbe Bëtsabe juabna oyebuambnayá Elías, mo cach bëngcá canye entsá inamna, y puerte jtsošbuáchiyëse ndoñe chaonduaftema Bëngbe Bëtsábioye tbojanimpadá ora, quem luariñe mo unga uata y tséntsañe ndoñe tonjanafté. ¹⁸ Chentšana, Bëngbe Bëtsábioye cachiñe tbojtanimpádá ora, quem luariñe tojanafté y cachiñe chë jajañenache bëtscá saná yojtsatsbinýna.

¹⁹ Atšbe catšátanga, nderado nda tšëngaftanguentsá tojtsajbaná chë ndegombre soyënga jtsamana, pero inya chábioye tbojuájabuache cachiñe chë tšabe benache cháuatishachama, ²⁰ tšëngaftanga šmochtsetátšëmbo, ndánaca chë bacna soye amábioye tbojuájabuache chabe ndoñe tšabe videntšana cháuaisebocnama, cha chë nyetsca tescama castigüentsana chábioye jatsbocana, y jamana ba bacna soyëngama cha perdonaná chaotsemnama.

1 San Pedro

Jacheuayama

1 Atše Pedro, Jesucristbe ichmoná, quem tsbuanácha séntsabiamná chë cachëngbe luarentše ndoñe mondoyenëngbiana, chë Ponto, Galacia, Capadocia, Asia y Bitinia luarënguenache ujquëshenënga imoyenëngbiana. ²Séntsabiamná chë Bëngbe Bëtsá Bëngbe Taitá tojánabacacangiama, ntšamo cachá jamama yojanjuabnacá y ntšamo jopásama yojantatšëmbcá, cabá chca ndochnëngo ora; Uámana Espíritbeyeca, Bëngbe Bëtsá tojama tsëngaftanga chabe entšanga chašmotsemnama, Jesucristo chašmotseyeunanama y Bëngbe Bëtsabe delante tsábá chašmotsatsmënama, bacna soyënga abuajuánënga. Y Bëngbe Bëtsá chca tojanma, Jesucristbe buiñe juabuáshanëse, cha tojanóbanayeca. Atše bëtscá séntseimpadana Bëngbe Bëtsá, chaoma tsábe bendicionënga tsëngaftangbeñe chaotsemnama, y chaoma tsëngaftangbe ainaniñe tsábe ebionana chašmotsebomnama.

Bëngbe Bëtsábeñe jtsošbuáchiyëse vida jtsebomnana, atsebácanënga jtsemnama

³Bëngbe Bëtsá y Bëngbe Utabná Jesucristbe Taitábioye matschuanga; cha puerte lastemado ínÿengaftaca yómnyayeca, tojanma bënga tsëm juábnaca vida chamotsebomnama, béngbioye bacna soyënga jabua-juánase, Jesucristo cháuatayenama tonjánmayeca. Chíyeca bënga montsobena chábeñe jtsobátmanana sempre y nÿetsca tescama, ndayá cha šochjátšatayama. ⁴Ndayá bënga šochjátšataycá ndoñe quenátsmëna

jëftsoepochócama opodena soyënga, ndayá nÿets tempo tsábe soyënga. Y bënga mondobátmana jýyëngacñama ndayá Bëngbe Bëtsá chabe entšanga jatšatayama tojašebuachenacá, ndayá celoca bëngbiana cha yojtsinÿena. ⁵Chë soyënga tsëngaftangbiana entsemna; Bëngbe Bëtsábeñe šmošbuáchema; cha chabe obenánaca cmondánÿena, tsëngaftanga játsebacama. Cha chca jamama ya tojaprontá y echanjñyanÿiye, Cristo jésabama tempo chaojóshjango ora.

⁶Chíyeca tsëngaftanga tša oyejuayënga šmojtsemna, masque nderado jtseytana inÿe ora, nÿetsca padecena soyënguñe jasúfriase chašmuachnënguama. ⁷Mo chë castellanama jtsetatšëmbuama aíñe o ndoñe tsábe castellano tomnama iñiñe fjuchnëngcá, padecena soyënguñe tsábá chašmojachnënguse, Bëngbe Bëtsá echanjñyanÿiye tsëngaftanga ndegombre taišmošbuáchema. Chë castellano pronto endbetsopochóca, masque chca, chana puerte endbetsámana. Y tsëngaftangbe ošbuáchiyana chë castellanama puerte más enduámama. Tsëngaftanga padecena soyënguentšana bëts ošbuachiyánaca chašmojáboecnëse, Jesucristo chaojésabo ora, entšanga mochanjinÿe tsëngaftanga šmojtso merecena chacmotsatacheuana, más bëtsétsanga y obenënga chácmbiamama y uámanëngnaca.

⁸Tsëngaftanga Jesucristo šmondobonshana, y chábioye ndoñe chešmátaninÿe; masque mora cha ndoñe quešmatonÿá, tsëngaftanga chábeñe šmontsošbuaché, y šmontsebomna canÿe puerte tsábe oyejuayana, y ntsachetšá chana yomnana ndoñe quešmátobena jayanama, tša bëtscá causa. ⁹Chca oyejuayana tsëngaftanga šmontsebomna, er ndayá tsëngaftanga jtsošbuáchiyëse šmobatmancá, ya

šmojtsosháchichana, chë Bëngbe Bëtsá tšëngaftanga jtsatsebacyana.

¹⁰Bëngbe Bëtsabe juabna oyebuambnayënga ya imojanatsjendá y imojanguá jtsetatšëmbuama, ntšamo Bëngbe Bëtsá entsanga játsebacama, y tmojanoyebuambá ndayá Bëngbe Bëtsá tšëngaftanga jatsatayama, tšëngaftangiama tšabe juabna cha yobómnayeca. ¹¹Chëngbe ainaniñe yojtsemna Cristbe espíritu, y ntšamo tojanëyancá, cabá chca ndochñëngo ora, yojamna Cristo jasúfriama y ntšamo chentšana Bëngbe Bëtsá chábioye puerte bëtsá bochjánbemama, Bëngbe Bëtsabe juabna oyebuambnayënga imojanjuabná y imojanatsjendá jtsetatšëmbuama chë soyënga yochjanopása ora, ndaye tempo y ntšamo chë tempo yochtsemnama. ¹²Pero tempo Bëngbe Bëtsá chëngbioye tojaninñanyé, chca jtsamana ndoñe cachëngbe tšabiama yonjamnama, ndayá chca jtsamana yojamna tšëngaftangbe tšabiama. Chënga tmojanoyebuambá, ntšamo chë tšabe noticiënga oyebuambnayënga tšëngaftanga tcmojauyancá. Y chca tcmojáuyana chë Uámana Espíritbe obenánaca, nda Bëngbe Bëtsá celocana tbojichmó. Chë soyënga endmëna ndayá chë angelënga muantseboše tšabá jinýama, chënga chaósertama.

**Bëngbe Bëtsá entsanga
jtsachembuanana chabe
entsangcá chamotsiyenama**

¹³Chíyeca, botamana jtsejuabnayëse tšabá jatrabájama, y cach tšëngaftanga jenomándama jtsobenëse, yejuana šmochtsobátmana, Bëngbe Bëtsá soyënga cmochjatsatayama tšëngaftangbe tšabiama jtsejuabnayëse, Jesucristo quem luaroye yochjésabo ora. ¹⁴Tšëngaftanga Bëngbe Bëtsabe básenga uauenanënga quetsomñecá, ndoñe šmattsiyena ntšamo cach

tšëngaftangbe bacna juabnënga yomncá nýe tšabá jtsomñama, ntšamo Bëngbe Bëtsábioye cabá nduabuatma ora šmonjanbomncá. ¹⁵Chamna, šmochtsiyena mo chë Bëngbe Bëtsabe entsangcá, puerte tšabe entsangcá jtsamëse, er Bëngbe Bëtsá, nda tcmojáchembo chca chašmotsemnama, sempre uamaná endmëna. ¹⁶Er Bëngbe Bëtsabe uabemana palabrenguiñe mëntšá endayana: “Tšëngaftanga Bëngbe Bëtsabeñe uámanënga šmochtsemna, er atše uamaná sëndmëna ca.”

¹⁷Tšëngaftanga Bëngbe Bëtsábioye šmondbuyana “Taita ca”, šmondbótšëmbona ora. Bëngbe Bëtsabiama nýetscanga cachcá mondmëna. Chíyeca, ntšamo nýetscanga tmojamama tšabá o ndoñe tšabá yontsemna ca cha yochjayana ora, cha chca echanjama nýe ntšamo chënga tmojamcá jtsonýayëse. “Taita ca” chábioye šmondbuyánayeca, quem luarentše šmochtsiyenëntscuana sempre šmochtsejuabnaye cha nýetscangbiama más bëtsá yomnama, chë šmojtsama sóyeca chca jtsinñanyayëse.

¹⁸Tšëngaftanga šmondétatšëmbo, Jesucristo, mo nda ínýëngbioye játsebacama crocénana cuafjëtšajocá, tonjanóbana tšëngaftanga játsebacama, chë nýetsca soyënga nýe bonamente jtsamëse oyenentšana, ntšamo jtsiyenama tšëngaftangbe bëts taitángbentšana šmojanatsjinýcá. Cristo ndoñe checmatanatsebacá, yopodena jtsopochócama soyënga jëtšjájuaše, mo crocénana o castellanácá, ¹⁹ndayá cachá jóbanëse, chabe uámana buiñe juabuáshanëse. Cristo chë ndocna bacna soye ndbomná, tonjanóbana ora enjamna mo canýe oveshatemcá, tondaye ndbemaná, ni tsengana ndbomná, Bëngbe Bëtsábioye jëtšchuayama altaroca obaná. ²⁰Chama

Bëngbe Bëtsá Crístbeñe tojanjuabó y tbojanábuayana, cabá quem luare ndétsemna ora; pero quem tempo, Cristo entsángbeñe tonjábocna tšëngaftange tšabiama. ²¹ Crístbeyeca, tšëngaftanga šmondošbuaché Bëngbe Bëtsábeñe, nda tonjanma Cristo cháuatayenama y puerte uamaná tbonjánbema. Mëntšá, ndábeñe tšëngaftanga šmošbuaché y šmobátmana, Bëngbe Bëtsábeñe endmëna.

²² Tšëngaftanga šmojama ndocna bacna soyënga ainaniñe ntsebomnama, Jesucrístbeyeca catšátangbioye ndegombre jtsababuánñeshanama, er tšëngaftanga ntšamo ndegombre yomncá jtsamëse, Bëngbe Bëtsá šmoye-unana. Chcasna, sempre nñets ainánaca nñetscanga šmochtsenbobonshana. ²³ Bëngbe Bëtsá tojama tšëngaftanga tsëm vida chašmotsebomnama; pero tšëngaftanga tsëm vida šmontsebomna, ndoñe nñe quem luarentša entsanga ndayá tmojamama, sinó ndayá Bëngbe Bëtsá chë ndocna te jobanamá tojamama. Cha chca tojama cachabe palábraca, ndayá endoyebuambná ntšamo entsanga muantsobena tšabe vida jtsebomnama y chë palabra ndocna te queochaisopochóca. ²⁴ Ntšamo Bëngbe Bëtsabe uabemana palabrënguñe endayancá:

Nñetsca entsanga mondmëna mo shacuaná,
y chënga imobomna tšabe soyënga, endmëna mo chë shacuanentša uantšëfjushangacá.
Chë shácuana jtsanctana y chë uantšëfjushangá jtsatquécjanana;
entsanga cachcá, nñets tempo quem luarentše ndoñe quemochátiyena;
²⁵ pero Bëngbe Bëtsabe palabra nñets tempo echanjesomñe ca —chiñe endayana.

Y chë palabra endmëna chë Jesucristbe tšabe noticiënga, chë buayenánana ntšamo ínñenga tcmojabuayenacá.

2 Chcáyecna, nñetsca tescama šmochtsajbaná nñetsca bacna soyënga amana, ínñengbioye áingñayana, bacna entsanga chë ntšamo ndegombre šmojuabnacá ndinñinñayënga ntsemnana, ínñengbioye untšabošana, y ínñengbiamama uayátšenayana. ² Mo cabá mora onñnana šešoncá, tša jtsebošana chabe mamabe létšiyee, cachcá tšëngaftanga cmontsamna puerte jtsebošana nñets tempo Bëngbe Bëtsabe soyënga jtsebomnama, chë soyëngaca Jesucrístbeñe corente chašmotsošbuáchema, y chca, atsebácanënga chašmotsemnana; ³ ntšamo Bëngbe Bëtsabe uabemana palabrënguñe endayancá: “Tšëngaftanga šmojátatšëmbona Bëngbe Utabná puerte tšabia nñetscángaftaca yomnama ca.”

Cristo, chë mo aina ndëtšbecá endmëná

⁴ Bëngbe Utabnábioye šmochtobeconá, nda endmëna mo canñe aina ndëtšbecá, ndëmuanñëse tojtsama entsanga tšabe vida chamotsebomnama. Báseftanga cha tmojtsaboté, mo ntšamo chë ndëtšbéngaca canñe yebna tmojtsejebuana ora, luaroca tmojtsejajó ndëtšbecá; pero Bëngbe Bëtsá chábioye tbojuábuayana, y chabe bominñiñe cha puerte uamaná endmëna. ⁵ Chábioye šmochtobeconá, tšëngaftanga chë tšabe vida šmojóyëngacñënga, cánñiñe mo aina ndëtšbéngcá, Bëngbe Bëtsabiamama jajebuama canñe yebnentšama chašmotsemnana; mo Bëngbe Bëtsabiamama bachnangcá chašmotsemnana, nñe Bëngbe Bëtsábioye jtseservénama jtsentšëñëse, chábioye jtsatschuanayama. Ntšamo Bëngbe Bëtsábioye jtseservénama šmo-

jtsamcá, chábioye tšabá jtsinjanana, ndayá Jesucristo tojanmama. ⁶ Chca ndegombre endmëna, er Bëngbe Bëtsabe uabemana palabrënguine, Bëngbe Bëtsá Jesucristbiana mëntšá tojanayana:

Šmochjinÿe, atše sënjama Jerusalemtše canÿa chaotsemna, y cha endmëna mo chë canÿe yebna jajebuámentše chë más bëts uashacuanëšentše jajona ndëtšbecá. Cha atšbe Uabuayaná endmëna, y atšbiana puerte enduámana.

Nda chábeñe tojtsošbuaché, ndocna te nÿe bonamente chábeñe queochátobatmana ca.

⁷ Tšëngaftanga, chábeñe osbuáchiyëngbiana, nda endmëna mo chë yebna jajebuámentše más bëts uashacuanëšentše jajona ndëtšbecá, cha puerte enduámana; pero chábeñe ndošbuáchiyëngbiamna, entsopasana ntšamo Bëngbe Bëtsabe uabemana palabrënguine Cristbiana endayancá: Chë yebna jebuanënga tmontsanaboté ndëtšbé, mora chë más bëts uashacuanëšentše entsejájona ca.

⁸ Inÿoca, Bëngbe Bëtsabe uabemana palabrënguine mëntšánaca chabiana endayana:

Cha endmëna mo ndëtšbé ndayentše jtsojestjyamcá; y mo peñëscá yomna chënga chamotsót-satšama ca.

Chënga Jesucristo jtsabotena, chabe buayenánana ndoñe ntjoyeunaycá; Bëngbe Bëtsá cabá chca ndopása ora tojanjuabó chca chaotsemnama.

⁹ Pero tšëngaftanga šmondmëna Bëngbe Bëtsábeyeca bocacánënga, y mo canÿe rey tmojtseserverna bachnangcá, y šmondmëna Bëngbe Bëtsabe entsanga nÿe chabiana jtsetrabájayama, y chë nÿe Bëngbe Bëtsábënga šmognënga. Y chca endmëna, tšëngaftanga chë

bëts soyënga ntšamo Bëngbe Bëtsá tojamcá chašmotsabuayinama. Cha endmëna nda tcmojáchembo chašmotsajbanama oyenana mo ndoñe binÿniñcá jtsejuabnayëse y jtsamëse, cháftaca jtsemnama chašmotsobenama, chë tšëngaftangbe juabnënga puerte binÿnayáftaca. ¹⁰ Tempo tšëngaftanga ni mo cánÿentša entsangcá ndoñe quešmënjatsmëna, nÿe ujquëshenënga; pero mora, Bëngbe Bëtsabe entsanga šmontsemna; tempo šmonjamna entsanga ndocná tonjánalastemanga, pero mora, Bëngbe Bëtsá añe lastemado tšëngaftangaftaca entsemna.

Bëngbe Bëtsá

jtseservënama jtсийenana

¹¹ Atšbe bonshánënga, ndayentše tšëngaftangbe ndegombre luare yomna, celoca endmëna, y muentše quem luarentše, tšëngaftanga šmondmëna mo ínÿoicana ashjajnëngcá, y mo canÿe luarëjana nÿe achnëjuanëngcá, cach tšëngaftangbe luaroye átayiñe. Chíyeca cbontsaimpadana, ndoñe chašmondétsama soyënga ntšamo chë šmobomna bacna juabnënga tomncá, ainaniñe bacna soyënga bomna causa; chca juabnënga ainaniñe jtsepenzëntsiayana, chentše jtsemándayama y Uámana Espiritu ndoñe chaondëtsemándama. ¹² Chë Bëngbe Bëtsábioye nduabuamnéngbeñe sempre šmochtsiyena tšabá jtsamëse; chca chënga, masque mora tšëngaftangbe contra imojtsoyebuambná, tšëngaftanga mo bacá uamana entsanga cuaftsemnëngcá, chë tšabe soyënga ntšamo tšëngaftanga šmojtšamcá chamuinÿama, y chca, Bëngbe Bëtsá chëngbioye chaojenonÿinÿé te, chábioye chënga chamotsatschuanama.

¹³ Bëngbe Bëtsá šmoyeunanama, nÿetsca entsanga mando bomnéngbioye šmochtsobedecena; chë Romoca

bëts mandádbioye, cha chë quem luarentša más uámana puesto jtsemándayama endbómnyeca; ¹⁴y chë tšëngaftangbeñe mandadëngbióynaca, ndëmuanÿenga cha jíchamuana chë bacna soyënga amënga jácastigama, y chë tšabe soyënga amëngbiama tšabá imojtsama ca chamuayanama. ¹⁵Chë mando bomnëngbioye šmochtsobedecena, er Bëngbe Bëtsá endboše tšëngaftanga tšabe soyënga chašmotsamama, chca, chë ndosertánënga chë tšëngaftangbiama podescá ichámënga, ntšamo ndegombre yomncá ntsetatšëmbcá, tondaye chamondëtsebomna tšëngaftangbe contra jayanama.

¹⁶Šmochtsiyena tšabá jtsamëse, mo chë ya ndoñe más bacna soyëngaca y bacna juabnëngaca ndëmandanëngcá; pero chca šmojtsemnama ndoñe šmattsejuabnaye nÿe ndaye bacna soye jamama šmojt sobena ca, y nÿe chca šmochjátama. Más tšabá endmëna jtsiyenana, mo chë Bëngbe Bëtsá imoservenëngcá. ¹⁷Nÿetscangbiama respeto šmochtsebomna, chë Jesucristbeyeca catšátangbioye šmochtsababuánÿeshana, sempre šmochtsiyena Bëngbe Bëtsabiama jtsejuabnayëse cha chë más bëtsá yomnama, y chë Romoca bëts mandado šmochterrespetana.

Cristo chabe entšanga tojinÿanÿé ntšamo yomna jasúfriana

¹⁸Tšëngaftanga, chë nÿets tempo ínÿabiama canÿe yebnentše oservënënga, tšëngaftangbe nduiñëngbioye šmochtsayaunana, puerte respeto chëngbiama jtsebomnëse; y ndoñe nÿe chë tšábëngbioye y nÿe tšabá mandbomnëngbioye, ndayá chë bacá mandbomnëngbióynaca. ¹⁹Nderado nda, ntšamo Bëngbe Bëtsá yobošcá jamama bošama, tojoboyá chabe

nduiño cha chaosufrima tojtsama ora, masque chama jasúfriama ndoñe tbondmëna, chca jamëse, Bëngbe Bëtsá corente tšabá jtsinÿanana. ²⁰Er nderado tcmojtsacastigá ndaye bacna soye šmojama causa, y chora tša uantadënga chiñe šmojachnëngo, chë soye ndoñe yapa ntsámanana. Pero tšabe soyënga šmojtsama y chë causa šmojtsesufrina, y tša uantadënga chiñe šmojachnëngo, chë soye cocayé Bëngbe Bëtsá corente tšabá jtsinÿanana. ²¹Chca cmontsamna, er Bëngbe Bëtsá tcmojánachembo tšabe soyënga jamama y chca jasúfriama; chca ndegombre endmëna, er Cristo tšëngaftangbiama tonjansufrí, y chca cha tcmonjaninÿanÿé, ntšamo jamama cmojtsamna, tšëngaftanga chca chašmotsamama. ²²Cristo ndocna te ndocna bacna soye chenáisema, ni ndocnábioye chebnaisëingñé. ²³Chábioye tmojtsoyenguá ora, chëngbioye ndoñe ntëyánguanguana. Cha chaosufrima tmonjanma ora, cha ndocá ntjatëtšetsnayana jaútatjayama, ndayá Bëngbe Bëtsábeñe jtošbuáchiyëse, chábeñe yojanobátmana. Bëngbe Bëtsá ntšamo nÿetscanga tmojamama tšabá o ndoñe tšabá yonjamna ca yochjayana ora, chca echanjama nÿe ntšamo chënga tmojamcá jtsonÿayëse. ²⁴Cristo cruciñe tonjanóbana ora, cha tonjansufrí chë castigo, chë bëngbe bacna soyëngama cach bënga šojánamna jasúfriama castigo, bënga chë bacna soyënga jamama juabnëngaca ndoñe más mandánënga chamondëtsemnama, y bënga ntšamo Bëngbe Bëtsabe bominÿiñe tšabá yomncá jtsamëse chamotsiyenama. Er Crístbioye chënga tmonjanlisiá chaóbanama y tonjansufrí jobanëntscuana, y chca, bënga šonjanatsebacá. ²⁵Er tšëngaftanga, tempo Bëngbe Bëtsábentšana bënoca šmonjamna, mo ótsëna oveshëngcá; pero mora Cristbe benache

šmojtishache, y cha cmontsanjēna, mo oveshēngbe canjē abuajēnjacá, y cha entsantješna tšēngaftanga tšabá chašmotsemnana.

Ntšamo iuamna chē bouamnēngbiolye jtsiyenana

3 Cachcá mo chē oservenēngcá, tšēngaftāngnaca shēmanga, tšēngaftangbe boyāngbiolye šmocht-sayaunana, chca, chē Bēngbe Bētsabe buayenana soyēnguiñe ndošbuáchiye boyāngbiolye chašmobená jáyēnjanama, Jesucristbeñe chamotsošbuáchema, ntšamo tšēngaftanga šmojtsiyenama. Ndoñe queochátsiyta chē buayenánama chēnga jatētsētsnayana, ²er chēnga mochanjinjē tšēngaftanga šmojtsiyena, Bēngbe Bētsá nyetscangbiama más bētsá yomnana sempre jtsejuabnayēse, y ntšamo šmojtsamcá chca yojtsinjinjénayeca. ³Cach tšēngaftangbiama ndoñe mēntšá šmattsejuabnaye: “Entšanga atše botamaná tsmēna ca chamotsejuabnama atše nja mo chca chantenochquēca, chantenóbotamaye ba castellano soyēngaca o ba uámana entšayangá chantichētjo ca”; ⁴ndayá chca chaotsemna, ntšamo tšēngaftanga chē Uámana Espíritbeyeca mandánēnga jtsemnēse ainaniñe šmojuabnama, cmēbionama y šmobošama; ndocna te ndopochócaye botamanana jtsebomnana, ainaniñe nje cach tšēngaftanga uámanēnga jenobiamama juabnēnga ntsebomncá, pero añe ainaniñe tšabe ebionana jtsebomnēse. Chē soyēnga Bēngbe Bētsabe bominjñe puerta enduámana. ⁵Tempo chca, chē puerta tšabe shembásenga, chē Bēngbe Bētsabe bocacanēnguentšēnga, imojanamana jtenóbotamayana; chēnga Bēngbe Bētsábeñe imojtsanošbuaché y chábeñe imojanóbátmana, y nyetscanga chēngbe boyāngbiolye imojánayaunana. ⁶Chca yojamna Sara, Abrahámbyolye

ibnayeunana y chábioye “Taita ca” ibojanábobuatma. Tšēngaftanga Sarabe bemiāngcá jtsemnana, tšabe soyēnga šmojtsamēse, y tondayama uatjana šmotsebomnēse.

⁷Cachcá, tšēngaftanga boyanga, cada ona cachabe shēmaftaca chaotsiyena, tšabá jtseñeyeunanēse, y cha respeto buajoná chaotsemnana jtsemēse; pero chca, ndoñe nje cha acbiama más batšá obenana bomná bēsemnana, ndayá Bēngbe Bētsá chabiama tšabe juabna yobómnyeca, ntšamo cach aca tšabe vida tcmojašbuachenacá chábioynaca tbojašbuáchenama. Chca šmochtsama, Bēngbe Bētsáftaca jencuéntama totcá chaondētsemnana.

Chē tšabe soyēnga amama jasúfriama yojtsamnēnga

⁸Y morna, nyetsca tšēngaftanga cachcá šmochtsejuabnaye, ínjenaga šmochtsalastemana, chē Jesucristbeyeca catsátangbiolye šmochtsababuánjēshana, ínjenagiama chacmóngmiaye, y cada ona chaotsejuabná chē ínjenaga chabiama más uámanēnga imomna ca. ⁹Injenaga tšēngaftangbiama ntšamo tcmojaborlá ora, ndoñe šmattéchenanguaye; ni chacmojtseyanguá ora, chēngbiolye ndoñe šmattoyánguango. Chca játamama cuentna, Bēngbe Bētsá šmochjaimpáda, chēngbeñe tšabe bendicionēnga chaotsemnana cha chaomama, er Bēngbe Bētsá tcmojáchembo chca chašmotsamama, y Bēngbe Bētsábíocana tšabe bendicionēnga chašmoháchiñama. ¹⁰Ntšamo Bēngbe Bētsabe uabemana palabrenguiñe endayancá: Nda toboše tšabe vida jēftsebomnana y puerta oyejuayá tempēnga jtsebomnana, yejuana chaochsenojuabná bacna soyēngama ndoñe chaondētsóyebuambnana,

y ndoñe chaondétseboosterama.

¹¹ Bacna soyënguentsana chaotsojuánañe y tšabe soyënga chaotsama, natjémbana nyetscángaftaca jtsiyenama chaotseboše, y chca chaotsemnana sempre chaotsentšena.

¹² Chca bontsemna jamana, er Bëngbe Utabná, chabe bominýiñe tšabe soyënga amëngbioye jtsanyenana, chëngbiama sempre jtsantješëse; y sempre chëngbioye jtsayuanana, chábioye ndayámnaca tmojtsotjanañe ora; pero chë bacna soyënga jamana uamanëngbe contra cha jtsemnana ca —chiñe endayana.

¹³ ¿Nda nanjobenaye tšëngaftangbiama bacna soyënga jamama, tšëngaftanga chë tšabe soyënga jamama sempre šmojtsentšënëse? ¹⁴ Pero masque tšëngaftanga cmojtsamna jasúfriama tšabe soyënga šmojtsamama, Bëngbe Bëtsá chama tšabe soyënga cmochántatsataye. Chë tšëngaftanga chašmosufrima amëngbiama ndoñe matauatjëngana, ni ainana tsetšenánënga ndoñe matsmëngana, ¹⁵ ndayá ainaniñe sempre šmochtsejuabnaye Cristbiama mo Bëngbe Utabnacá y chabiama respeto šmochtsebozna; y sempre šmochtseprontana jojuama ndëmuanýënga tcmojtsatjaná ndáyeca tšëngaftanga Bëngbe Bëtsábeñe jtsošbuáchiyëse, chabiama ainaniñe šmobátmanama. ¹⁶ Pero chca šmochjama tšabe ainánaca jtsënyáyëse y Bëngbe Bëtsabiama respeto jtseboznëse. Šmochtsiyena tšabá jtsamëse, y chama ainaniñe ndoñe chašmondétsebozna juabnënga y chamuayana chca ndegombre ndoñe tšabá šmontsama ca, chca, ínýënga tšëngaftangbiama podesca chamojtsoyëbuambná ora, tšëngaftanga Crístbeñe ošbuáchiyënga quetsomñecá tšabe soyënga

šmojtsamama, chënga chamotsëuatja chca tmojtsóyëbuambnama.

¹⁷ Más tšabá endmëna jasúfriana tšabe soyënga tcojamama, nderado Bëngbe Bëtsá chca chaotsemnana tojtsebošëse, y ndoñe chë jasúfriana ndaye bacna soye tcojamama. ¹⁸ Er Cristo nýe canýe tonjanóbana bënga bacna soyëngama jáperdonama; chë nyetsca soyënguiñe tšabá amá, chë Bëngbe Bëtsabe bominýiñe ndoñe tšabá yondmëna soyënga amëngbiama, tšëngaftanga Bëngbe Bëtsáftaca chašmotsatsmënama. Entšacá, Cristo tonjanóbana, pero Bëngbe Bëtsá tonjanma, cha cachiñe vida chabe espiritiñe chaotsatsboznama. ¹⁹ Pero Cristo cháuatayenama Bëngbe Bëtsá cabá ndëma ora, chabe espiritiñe cha tojána chë ndoñe tšabe entšanga imonjamnëngbe espíritënga utámenënga imojamnoye, chëngbiama castigo tojtsemnëntscuana; y cha tojanayénjanama chënga tojanabuayená. ²⁰ Quem espíritënga bayté entsemna, Bëngbe Bëtsábioye ndoñe monjánëyeunana, Noebe yojëftsiyena ora, chë bacna soyënga amënga chca amama chamotsajbanama y tšabe benache chámuatishachama Bëngbe Bëtsá bën yojanobátmana ora, barquëshá canduapormantscuana. Chentšana chë barquëshañe báseftanga tmojanotsbocá, posufta entšanga, búyeshe juatsbuacá chë barquëshá yojtsámnyayeca. ²¹ Chë chënga chamótsbocama tojanéjabuache béjaye, enjamna mo chë mora jenábayama buyeshcá, chca, atsebácanënga bënga chamotsemnana. Pero tmojenábaye ora, bënga atsebácanënga jtsemnana, ndoñe chë cuerpentša tsengá tmojtšenóbolimpiama, ndayá bëngbe ainaniñe ndocna bacna juabnënga ntseboznama Bëngbe Bëtsá tmojtseimpadánama;

y bēnga atsebácanēnga mondmēna, Jesucristo cháuatayenama Bēngbe Bētsá tojánmayeca. ²²Cristo celoye tojtantsjuá y Bēngbe Bētsabe catsbioica yomna jamándama. Cha endmēna chē amēndayá angelēngbiama y espíritēnga mando y obenana bomnēngbiama.

Entsanga entsamna jtsiyenana ntšamo Bēngbe Bētsá yobošcá

4 Chcasna, ntšamo Cristo tojansufricá, chabe cuerpiñe mo entšacá játsetšenēse, tšēngaftāngnaca cmontsamna jtseprontánana chca jasúfriama. Er chē Crístbeñe ošbuachiyá nda chabe cuerpiñe tojasufrí, chē bacna soyēnga amentšana tojtsojuánañe, ²chca, chabe vidiñe, morscana y jobanēntscuana, jēftsiyenama ntšamo Bēngbe Bētsá yobošcá, y ndoñe nje entšangbe bacna juabnéngaca, nje quem luarentse tšabá jēftsemnama. ³Tempo, bayté enjamna, ndayēntscuana tšēngaftanga šmonjánama soyēnga, mo chē Bēngbe Bētsábioye nduabuátmēnga mondbetsamcá; nja ndoñe más. Chē tempo, tšēngaftanga šmonjaniyena nyetsca bacna soyēnga jtsamēse, jenomándama ntšobencá; tšēngaftanga šmonjánama soyēnga nje ntšamo šmojanbošcá, nje tšēngaftanga tšabá jtsomñama; šmonjanamana jotmenan-gana y ba fiestēnga jtsebomnana, y chora chē ófjanēnga tša jtsetmoyana y tša jtseyoyana, y ba uabouana soyēnga šmonjanamana jtsamana chē díosēnga yojamna ca šmojanjuabná soyēnga jadórama. ⁴Morna, chē Bēngbe Bētsábioye nduabuátmēnga montsenjnaná, tšēngaftanga ya ndoñe más bacna soyēnga jtsamēse šmojtsiyenama, ntšamo tempo šmonjaniyena, ntšamo chēnga jtsamēse mondoyena, jenomándama ntšobencá; y chē causa, chēnga bacna soyēnga tšēngaftangbiama jtsóyebuambnayana.

⁵Pero chēnga echanjótocaye jayanama ndáyeca chca tmojamama, chē entšangbiama, chē ainēnga y chē ya mochjóbanēngbiama, ntšamo tmojamama, añe o ndoñe tšabá bétsemnama jayanama entseprontanabe delante. ⁶Chíyeca, Crístbeñe ošbuáchiyēnga, chē mora obenēnga imojtsemnēnga, ainēnga monjamna ora, ínŷēnga chē tšabe noticiēngama chēngbioye monjanabuayiyná, chēnga chamobenama chē nyetsca tescama yomna tšabe vida chēngbe espíritoftaca jtsebomnama, ntšamo Bēngbe Bētsá yobomncá; masque mora quem luarentse, chēngbe cuerpo tojóbana, er Bēngbe Bētsá tojayana nyetsca entsanga yojtsamna jóbanama ca.

⁷Ndoñe bayté y nyetsca soyēnga echanjopochóca. Chíyeca, tšēngaftanga cmontsamna botamana jtsejuabnayana y jenomándama jtšobenana, Bēngbe Bētsáftaca jencuéntama chašmotsobenama. ⁸Nyetsca soyēngama, masna, sempre nyetscanga puerte šmochtsenbobonshana, er nda ínŷēnga puerte tojtsababuanŷeshaná, sempre jtseprontánana ínŷēnga jáperdonama, chēngbiama bacna soyēnga tmojamama. ⁹Nyetscanga šmochtsamana tšēngaftangbe yebniñe jenofjana, chca jamama totcá yojtsemna ntjatichamcá. ¹⁰Nyetsca tšēngaftanga Bēngbe Bētsá tcmojatšatá obenana tšabe soyēnga jamama; chca, chē obenánaca cmontsamna jtsamana soyēnga chē ínŷēngbe tšabiama, chē Bēngbe Bētsá cmojatšatá nyets obenánaca ínŷēngbioye jujabuáchama, nyets tempo tšabe soyēnga jtsamēse. ¹¹Nda tojtsabuayiyná, Bēngbe Bētsabe palabra chaotsabuayiyná mo Bēngbe Bētsá chabijana cuaftsoyebuambnacá; nda ínŷēnga tojtsaserverna, chca chaotsama chē Bēngbe Bētsá yojtsama cha chaotsebomnama obenánaca.

Njetsca soyënga ntšamo šmojtsamcá chaotsinýanýná Bëngbe Bëtsá puerte uamaná y obená bétsemnama, Jesucrístbeyeca. Chca šmochtsama, er Bëngbe Bëtsá puerte uamaná endmëna y obenana endbomna nyets tempo y nyetsca tescama. Chca chaotsemna.

**Puerte tšabá endmëna,
Cristbeñe tcošbuáchema,
jasúfriama tbojtsemnëse**

¹² Atšbe bonshana entšanga, ndoñe šmattsenjnanaye padecena soyënguine šmojtsesufrínama; chiñe jtsinýnana ntsachetšá ošbuáchiyana šmobomnama. Chca ora ndoñe šmattsejuabnaye, tšëngaftanga ndoñe cmondamna chca soyiñe jtsachñëjuanana ca; ¹³ chamna, šmochjóyejuaye chë ntšamo Cristo tojansufricá šmojtsesufrina ora, chca, Cristo corente obenánaca y uamanacá entšangbeñe chaojtonýná te, tšëngaftanga puerte chašmotsóyejuama. ¹⁴ Puerte šmochtsóyejuaye, nderado nda tcmojoyánguango Cristbiana bétsoSERVERAYECA, er Bëngbe Bëtsabe Espíritu, chë corente bëtšá endmëná, sempre tšëngaftangbe ainaniñe iuétsemna. ¹⁵ Tšëngaftanguentšë ndocná chabondétsemna jasúfriama inýa óbanaye causa, atbëbanama, bacna soyënga inýengbiama amama, o inýengbe soyënguine ontremetënama. ¹⁶ Pero Cristbe ustoná tomnama tojasufri, chama ndoñe chaondëtsëuatja; chamna, Bëngbe Bëtsábioye chabotsatschuaná, cha Cristbe ustoná bétsemnama.

¹⁷ Er chë tempo ya tojobuache, Bëngbe Bëtsá jayanama, cach Cristbeñe ošbuáchiyëngbiama, chabe entšangbiama, tšabá o ndoñe tšabá tmonjamama. Cha chca bëngbiama jayanama tojontšese, chë chabe palabra ndobedecenëngaftaca yochjanopasacá puerte uabouana echántsemna, cha

chëngbiama chca chaojayana ora. ¹⁸ Y chca, chë Bëngbe Bëtsabe bominiñe tšabá amabiama ndoñe paselo atsbočaná jtsemnama tontsemnëse, ħntšamo yochjopása chë Bëngbe Bëtsábioye ndoñe adórayënga y chë bacna soye amëngaftaca? ¹⁹ Chcasna, chë imosufrínëngaftaca Bëngbe Bëtsá chca yobóšeyeca, entsamna chë tšabe soyënga jtsamana y Bëngbe Bëtsabe cucuatšini chëngbe espíritu chamoboshjona cha chaotsinýenama, er cha chënga tojánabiama, y nyetsca soyënguine tšabe palabra bomná cha endmëna.

**Cristbeñe ošbuáchiyënga
jábuayenama**

5 Y mora, chë tšëngaftangbentšë ošbuachiyëngcá enefjuanëngbeñe bëtšëjemëngcá amëndayënga chanjabuayená, atšë cach tšëngaftangcá bëtšëjema, canýa ntšamo Cristo tonjansufricá tonjaninýá y chama inýenga tonjanéyana, y canýa ndábioye cach tšëngaftangcá Bëngbe Bëtsá bochjábema más uámana y bëtšá, Cristo entšangbeñe chaojtonýná ora; tšëngaftanga cbaruayená. ² Ošbuáchiyënga šmochtsanýena; chënga chašotsanýenama Bëngbe Bëtsá chca tcmojábiana. Chca, chentša ošbuachiyëngbeñe šmochtsama ntšamo canýe tšabe abuajénýa chabe ovehëngaftaca endbetsamcá. Bëngbe Bëtsabe trabajo ndoñe šmattsama, nyë cmojtšétocanama, ndayá chca jamama šmojtsebóšeyeca. Chca ndoñe šmatjama nyë paselo crocënaná juacánama, ndayá inýengbioye jujabuáchama tša šmobóšeyeca. ³ Chë cmojtsamna jtsanýenama ošbuachiyënga ndoñe nyë bëtscá šmattsamëndaye, mo chëngbe nduiñënga cuafjatsmëngcá, ndayá ntšamo tšëngaftanga šmojtsiyenama, chënga šmochjínýanýiye ntšamo

yojtsamna jtsiyenana. ⁴ Chca, chë bënga nÿetscanga, mo chë tšabe abujënyáca šuanÿená, quem luaroye yochjésabo ora, mo canÿe uabuashinÿinÿana coronésha ndocna te tontsandbemëshacá, tšëngaftanga canÿe bëts uacanana soye šmochanjóyëngacñe, y chë soye endmëna nÿetsca tescama; Bëngbe Bëtsá uámanënga y bëtsétsanga cmochanjábiana, cháftaca nÿets tempo oyejuayënga jtsemnëse.

⁵ Cachcá, tšëngaftanga chë bobontséngnaca cbabuayená, sempre šmochtsejuabnaye chë bëtsëjémënga tšëngaftangbe améndayënga imomnana, y chca šmochtsama. Cada ona tšëngaftanguentšá bontsemna jtsejuabnayana chë ínÿenga tšëngaftangbiana más uámanënga cuaftsemncá, ínÿengbioye šmojtsaserverna ora; er ntšamo Bëngbe Bëtsabe uabemana palabrenguine endayancá:

Bëngbe Bëtsá chë nÿe cachënga uámanënga tmojtsenobiamnangbe contra entsemna, y chë ndoñe uámanënga montsenobiamnangbiamna, Bëngbe Bëtsá más tšabe juabna entsebmna ca.

⁶ Sempre šmochtsejuabnaye Bëngbe Bëtsá chë más bëtsá nÿetscangbiana yomnana, y nÿets mando y obenana bomná yomnana, y chabe delante ndoñe uámanënga šmattsenobiamnaye, cha más uámanënga chácmbiamama, chama chë tempo chaojobuache ora. ⁷ Nÿetsca soyënga ndayama šmuenócochinÿenama Bëngbe Bëtsabe cucuatšinë šmochjáboshjona, er cha tšëngaftanga yejuana cmondánÿena.

⁸ Cach tšëngaftanga jenomándama chašmotsobena y sempre šmochtseprontana, er tšëngaftangbe uayayá Satanás, mo canÿe león tojtsejató, nda jtsósañama tojtsana orcá, chë diablo, sempre jtsebošana

jamama, tšëngaftanga Jesucristbeñe ošbuáchiyana chašmotsajbanama.

⁹ Puerte šmochtomorócha, Jesucristbeñe bëtscá jtsošbuáchiyëse, chë uayayá tondaye chaondobená tšëngaftangaftaca jamama, cach tšëngaftangcá Jesucristbeñe ošbuáchiyënga nÿets luarënguenache cachcá jasúfriama yojtsamnama jtsetatšëmbëse.

¹⁰ Pero tšëngaftanga baseftayté chašmojasufrí chentšana, Bëngbe Bëtsá cmochanjábiana nÿetsca soyënguine puerte tšábënga, puerte chašmotsemorochama, bëtscá ošbuáchiyana y bonshánana bomnënga jtsemnëse, y ainaniñe corente añemo bomnënga chašmotsemnana; Bëngbe Bëtsá, chë bëngbiana tšabe juabna bomná, bënga nÿetsca tšabe soyënga šonjatsatá, y nda bënga šojáchembo nÿetsca tescama bëtsétsanga jtsemnana, chca echanjama. ¹¹ Cha nÿets obenana nÿets tempo y nÿetsca tescama chaotsebmna. Chca chaotsemna.

Jtadiósoftanama

¹² Silvano, ndabiana sëndëjuabná atšbiana canÿe tšabe palabra bomná Jesucristbeyeca catšata yomnana, cháftaca quem base tsbuanácha tcbonjubuábiana. Atše sëntseboše tšëngaftanga añemo jatšatayana y jáuyanana, ndegombre ntšamo tcbonjubuabiamcá yojtsoyebuambná ntšamo Bëngbe Bëtsá tšabe bendicionënga cmatšatnama. Chíyeca, sempre šmochjëftsiyena jtsamëse ntšamo chabe tšabe juabna tšëngaftangbiana yomncá.

¹³ Ošbuáchiyënga muentše átšeftaca montsemnënga cmontsacheuaná. Chënga quem bëts pueblentše mondoyena bacá uamana entšangftaca, mo chë tempo, Babilonia bëts puebloca imojoyena entšangcá, pero Bëngbe Bëtsá muentša ošbuáchiyënga tojabacacá cach tšëngaftangbioycá. Marcos, chë

atšbiamá mo uaquiñacá endmēná, chá-
naca cmontsacheuaná. ¹⁴Njetscanga
Jesucrístbeyeca catšatangcá
šmochjenuaye, jtenámochēse tša
šmojtsenbobonshánama.

Atše, Bēngbe Bētsá séntseimpadana
cha chaoma tšēngaftanga chē Jesu-
crísoftaca cánjiñe mo canjácá šmom-
nēnga, njetscanga ainaniñe tšabe ebio-
nana chašmotsebonnama.

2 San Pedro

Jacheuayama

1 Atše Simón Pedro, Jesucristbe oservená y chabe ichmoná, quem tsbuanácha sentsabiamná tsëngaftangbiamá, ndëmuanyënga šmojashjache jtsebmnama canye ošbuáchiyana Jesucristbeñe, cach bëngbe ošbuachiyancá uámanana, er Bëngbe Bëtsá y Atsebacayá Jesucristo, jtsebošana ndánaca y nyetscanga chábeñe chamotsošbuáchema. ²Atše sëntseimpadana, tsëngaftanga Bëngbe Bëtsabiamá y Bëngbe Utabná Jesusbiamá cada te más jtsetatšëmbëse, Bëngbe Bëtsá chaoma tsabe bendicionënga tsëngaftangbeñe chaotsemnana y chaoma tsëngaftanga ainaniñe tsabe ebionana chašmotsebmnama.

Chë Jesucristbeñe ošbuáchiyëngbe tsabe soyënga

³Bëngbe Bëtsá chabe obenánaca tojama bënga chamobená jtsebmnama, lempe ntšamo tmojtšëjbotcá tsabe vida jtsebmnama y jtšiyenama, Bëngbe Bëtsá jadórama soyënga jtsamëse. Cha chca tojama bënga chábioye chamotsábuatmama tojanma ora. Cha bënga šojáchembo, cachá obená y uamaná bëtsemnana y bëts soyënga jamëse, chabe entšanga chamotsemnana. ⁴Chca, Bëngbe Bëtsá šojatšatá ntšamo bënga jatšatayama tojanašebuachenacá, bëts y uámána soyënga, chca, quem luarentša bacna soyënguentsána chašmotsojuánañama. Chë bacna soyënga quem luarentšë jtsebínynana, entšanga nye cachëngbe bacna juabnéngaca jtšiyenama yapa boše causa. Chánaca chë tsabe soyënga šojatšatá, tsëngaftanga cháftaca cánýiñe

mo canyáca chašmotsemnana, cachacá jtsemnana jashjáchëse. ⁵Chca, ndoñe quenátsmëna nye Jesucristbeñe ošbuáchiyana jtsebmnama; chiñe šmochjenobuáshjache, bëtscá tsabe soyënga jtsamëse; chora bëtscá šmochtsama Bëngbe Bëtsabe soyëngama chacmotsësertánama; ⁶chora bëtscá šmochtsama cach tsëngaftanga jenomándama chašmotsobenama; y chca, tsëngaftanga masque padecena soyënguñe chašmojtsachñëjuana, ainaniñe puerte añemo jtsebmñëse, puerte uantadënga chašmotsemnana; y chentsána bëtscá šmochtsama, tsëngaftanga Bëngbe Bëtsá šmojt-sadoránama jinyanýiyama; y ⁷chca, nyetsca tsëngaftanga ošbuáchiyënga chašmotsenbobonshana; y chca, nyetsca entšanga chašmotsababuányëshana.

⁸Tsëngaftanga lempe chë soyënga šmojtsebmna, y bëtscá chca šmojtsamëse, šmochantsiyena becá oservena soyënga jtsamëse, y chentsána puerte tsabe soyënga echantsóbocana, corente tsabá Bëngbe Utabná Jesucristo chašmotsábuatmama. ⁹Pero nda quem soyënga ndoñe tontsama, Bëngbe Bëtsabe soyëngama ndoñe ntsoertánana; y chca, cha mo canye jtaná o nduabinýnacá jtsemnana; cha tbojtsebnatjëmbe Bëngbe Bëtsá chabe tempsca bacna soyënga tbojtsebojuánama, y Bëngbe Bëtsabe delante cachiñe tsabá chaotsatsmënama tojamama. ¹⁰Chíyeca, Jesucristbeyeca atšbe catšátanga, nya šmochtsentsëna chca tsabe soyënga jtsamama, y chca, corente tsabá šmochanjátatšëmbona, Bëngbe Bëtsá chabe entšanga chašmotsemnana tcmojáchembuama y tcmojábacacama; y chca jtsamëse, Jesucristbeñe ošbuáchiyana ndocna te quešmochatajbaná. ¹¹Chca, Bëngbe Bëtsá oyejuayá tsëngaftangbiamá echanjama, Bëngbe Utabná y

Atsebacayá Jesucristbe améndayoye jamashënguama ndegombre chašmobenama.

¹² Chcáyecna, atše sëntsejuabná tšëngaftangbioye sempre chë soyëngama jtsabuayinyayana, masque chë soyëngama ya šmotátšëmbo, y tša šmojtsošbuaché Bëngbe Bëtsabe ndegombre soyënguiñe y chca šmojtseyena, chë mora šmojtsetátšëmbo soyënguiñe.

¹³ Sëntsejuabná, chajéftsainëntscuana tšabá yojtsemna jamana, ainaniñe bëtscá añemo chašmotsebomnama chë soyënga jtsamama, ntšamo tijayancá jtsabuayinyäse. ¹⁴ Atše sëntsetatšëmbo, ndoñe baytese y atšbe ainana Bëngbe Bëtsabioye yochtá, ntšamo Bëngbe Utabná Jesucristo šonjëftsanbuayenacá; ¹⁵ pero bëtscá chanjëftsema, atše chajóšana chentsánënaca tšëngaftanga nyets tempo chë soyëngama chašmotsenójuabnama.

Cristo corente uamaná y obená yojamnama tmojaninýe ora

¹⁶ Bëngbe Utabnabe obenanama y cha yochjésabama ntšamo tcbonjanabatambacá, ndoñe quenjatsmëna entšangbe osertanánaca pormana cuentëngaca, er cach bënga botamana fsënjáninýe chabe uámanana y obenana. ¹⁷ Bëngbe Bëtsá chë Taitá, Jesucristo puerte obenana bomná bëtsemnama y cha corente bëtscá y uamaná bëtsemnama tonjaninýinýe ora, bënga fsënjáninýe. Chca fsënjáninýe Bëngbe Bëtsá, chë puerte uámana y bëtscábiocana oyebuambnayana Jesúsbioye mëntšá tbonjanianya ora: “Mua atšbe bonshana Uaquiñá endmëna, atše chabiama sëntsoyejuá ca.” ¹⁸ Cach bënga chë oyebuambnayana fsënjauena, chë celocana tonjanóbocnana, er bënga

Bëngbe Utabnáftaca fsënjannëna, chë uámana tjoca.

¹⁹ Chë sóyeca bënga fsëntsobena corente jtsetatšëmbuana, ntšamo chë Bëngbe Bëtsabe juabna oyebuambnayënga tmojanayancá ndegombre bëtsemnama, y tšëngaftanga tšabá šmochántsama, ntšamo chënga tmojanayancá šmojtseyenanëse. Chca, chëngbe palabrëngaca entsopodena Bëngbe Bëtsabe soyëngama tšëngaftanga jinýanýiyana, y echántsemna mo canýe uajuinýanësha canýe ibetiñe luarentše tojtsebinýnacá. Chë soyënga šmochtsuenana Jesucristo yochjésabëntscuana; chora, cha nyetsca soyënga cmochanjínýanýiye, mo tšëngaftangbiana canýe tsëm te cuafjabinýncá, y chë jabínýnama ora bínýnaye estrella tojábocna tšëngaftanga jabuabinýnamcá.

²⁰ Pero natsana chacmësertá, ndocna palabra Bëngbe Bëtsabe uabemana palabrënguiñe tojayana canýe soye yochjopása ca, cabá chca ndopása ora, nýe cach Bëngbe Bëtsabe juabna oyebuambnayëngbe juabnentsana tojanóbocnama; ²¹ er Bëngbe Bëtsabe juabna oyebuambnayënga ndoñe monjanoyebuambná nýe chënga chca jamama innabóšeyeca, ndayá Bëngbe Bëtsabe cuenta tmojanoyebuambá, chë Uámana Espíritu chënga chca chamóyebuambama tojánmayeca.

Chë ndoñe ndegombre soyënga buátëmbayënga

(Jud 4-13)

2 Chë Bëngbe Bëtsabe juabna oyebuambnayëngbe tempo, Israeloca entšangbeñe baseftángnaca imojamna, ndëmuanýenga imojichamo chënga ndegombre chca juabna oyebuambnayënga imojamna ca, pero ndegombre ndoñe chcanga imonjamna; cachcá, tšëngaftangbeñe

abuátambayënga mochántsemna, y chënga ndoñe ndegombre soyënga mochántsubuatambaye, pero ndegombre soyëngaca cánÿiñe, chca, chënga chca imojtsabuátambama entsãnga ndoñe chamondétatšëmbonama. Chë buatëmbana soyënga echanjama, entsãnga ndoñe ndegombre soyënga y bacna soyënga chamotsamama. Ntšamo chënga mochántsama y mochántsubuatambaye soyëngaca, mochántsama Jesucristo ndoñe chëngbe Utabná chaondétsemnana, cha nda chënga tojatsebacá, mo nda ínÿenga játsebacama crocénana cuafjëtšajocá. Y chca, nÿe ndeolpe, chë Bëngbe Bëtsábíocana uabouana castigo nÿetsca tescama mochántsebmna. ²Banga chëngbioye mochantsésetona, nÿetscna bacna soye, jenomándama ntobencá jtsamëse; y chëngbe causa, ínÿenga ndoñe tšabá quemochátoyebuambnaye chë tšabe benachama, chë ndegombre soyëngaca benache jtishachama. ³Chënga bëtsá crocénana jtsebmnama yapa mochántseboše causa, ba bostero soyëngaca cmochántsaingñaye; pero Bëngbe Bëtsá tempo chëngbiana tojánayana, ndoñe tšabá imojtsamama y chëngbiana castigo nÿetsca tescama chaotsemnámna.

⁴Bëngbe Bëtsá chë bacna soyënga tmojanma angelëngbioye ndoñe tonjanaperdoná, ndayá infiernoye tojtsanatsatše y puerte ibetiñe tojtsanabáshejuana, chë uabouana tbocha chamoquedama, Bëngbe Bëtsá chëngbiana nÿetsca tescama castigo chamotsebmnama yochjayana orscama. ⁵Y cach ndoñe quem luarentša entsãngbioye tonjanaperdoná Noé yojëtsiyena ora, y chënga jácastigama aínë tojanma chë uabouana uaftena chëngbeñe chaotsemnana, chë nduauenana y bacna entsãnga jtsapochócama. Chentsãna, nÿe

Noébioye, tbojanatsbocá, nda entsãnga yojanabuayíyná ntšamo jtsiyenana, Bëngbe Bëtsabe bominiñe tšabá yomncá jtsamëse; cha y ínÿe canÿséftangnaca tojanatsebacá. ⁶Bayté entsemna, Bëngbe Bëtsánaca tojánayana chë Sodoma y Gomorra bëts pueblentsã entsãnga, yapa bacna entsãnga imojamnama, bëts castigo jtsebmnama yojanamnama; y íneshca tojtsanapochocá, chë pueblënga y chentsã entsãnga jatinyá jtsabiamëntscuana. Y chë sóyeca Bëngbe Bëtsá tojaninÿanyé ntšamo bacna entsãngaftaca yochjama, chë chentsãna mochtsiyena bacna entsãngbiana. ⁷Pero Bëngbe Bëtsá Lótbioye tbojanatsbocá, chë bëts pueblënga pochócayentsãna. Cha yojamna Bëngbe Bëtsabe bominiñe tšabá amá, y ntšamo chë luarentša entsãnga imojaniyenama, nÿetscna bacna soye jtsamëse, jenomándama ntobencá, cha puerte ngménana inabomna. ⁸Er quem tšabe entsá, chëngbeñe oyená, chë entsãnga imojtsama bacna soyënga cada te yojanonÿaye y yojanuenana ora, puerte chabe tšabe ainaniñe inasufrina.

⁹Chca, Bëngbe Utabná endobena chë Bëngbe Bëtsábíoye adórayënga játsebacana padecena soyënguentsãna y bacna soyënga jamama juabnënguentsãna, y chë bacna soyënga jamama uamanëngna castigánënga jtsabamnama, chë ntšamo chënga imojaniyenëntscuana imojanamcá ndoñe tšabá yonjamna ca Bëngbe Bëtsá yochjayana tescama, y chënga nÿetsca tescama chë bëts castigo chamotsebmnama jamándama. ¹⁰Chca ndegombre endmëna, y más chë ndëmuanÿënga nÿe cachëngbe cuerpëngama bacna juabnëngaca jtsamëse imoyenëngbiana, chënga chë Bëngbe Utabnabe mando jtsaboténana.

Chënga bacá buátseñanënga mondmëna y jtsebošana nÿe ntšamo cachënga tmojtsejuabnacá chaotsemnana, y ndoñe ntsauatjana chë espíritënga obenana bomnëngbiama puerte bacna soyënga jtsóyebuambnayama.¹¹ Chamna chë angelënga, masque más añemo y obenana bomnënga mondmëna, ndoñe jenñëmuana chë espíritënga obenana bomnëngbiama chca jayanama, chëngbiama ndoñe tšabe soyënga jtsóyebuambnayëse, Bëngbe Utabnabe delante.

¹² Pero chë buátëmbayënga, chë cachënga ndoñe tontsésertana soyëngama puerte bacá jtsóyebuambnayana, y chca, chënga mondmëna mo tja bayëngcá, soyënga tšabá josértama juabna ndbomnënga; chënga jtsiyenana nÿe ntšamo tojtsebiona y tmojtsebošcá, y chënga jónÿnana, chámuashebuayama y chamëbáyama. Chë buátëmbayënga mo chë bayëngcá mochántsapochocaye.

¹³ Chënga mochanjasúfria, ínÿenga chamosufrima tmojama causa. Chëngbe oyejuayana endmëna nÿe chora chënga tšabá jtsemnana soyënga. Tšëngaftangaftaca cánÿiñe mo ošbuachiyëngcá tmojtšesá ora, tšëngaftangbiama ouatjcá jtsemnana y chëngbe causa, ínÿenga tšëngaftangbiama podesca mochántsicamo, er chënga chentšë oyejuayënga jtsemnana, nÿe chënga tšabá jtsemnana jtsamëse; y chënga tšëngaftangbeñe jtsemnana, tšëngaftangbioye jtsaíngñase.

¹⁴ Chënga ndoñe ntsoobenana canÿe shembása jinÿana, cháftaca bacna soye jamama ntsebošcá, y sempre jtsenguayana ntšamo bacna soye jamama. Chënga chë Jesucristbeñe nÿe batšá ošbuachiyana bomnënga jtsaíngñayana, y sempre jtsentšëñana nÿe más soyënga jésebošama y jésebomnana, ínÿenga tmobomnana

más soyënga jashjáchama; chënga montsemna pochocánënga jtsemnana.¹⁵ Chënga chë tšabe benachentsana tmojtsojuánañe, y mora mo otšëngcá montsemna. Chca chënga imojtsiyena jtsamëse, mo chë Bëngbe Bëtsabe juabna oyebuambnayá Balaamcá, cha ndoñe tšabá tonjanma orca; Balaam Beorbe uaquiñá. Cha yapa inaboše bëtscá crocëñana juacánama ínÿëngbiama bacna soyënga jtsamëse;¹⁶ y Bëngbe Bëtsá, chábioye chabe bacna soyëngama tbojanácacana, cachabe asno chábioye chabuatsëtsama jamëse; y chca, ndoñe tbonjanlesenciá jama chë ndocna juábnaca soye jamama.

¹⁷ Entšanga jtsobátmanana chënga bëtscá tšabe soyënga chamotsamama, pero chë tmojtsama soyënga tondayama ntsošervëñana, y chca, chënga jtsemnana mo búyeshe obocantëse tojtsebuashjcá; y chënga mora canÿe soye jtsejuabnayana y chentsana inÿëtšá; chca chënga jtsemnana mo jantšëtëshënga bëts bínÿiaca bonjnëshëngcá. Chëngbiama Bëngbe Bëtsá tojayana castigo chamotsebomnana, chë más ibetoca, tondaye binÿiñe luarentšë.¹⁸ Chënga ba botamana palabréngaca jtsenábotamnayana, pero tondayama ntsošervëñana; y chë cabá mora Jesucristbeñe tmojtsošbuachëngbioye jtsaíngñayama, chënga ntšamo chëngbe enutënga Bëngbe Bëtsábioye nduabuátmënga imoyencá jtsiyenama imojtsajbananga. Chë buátëmbayënga chë soye jtsamana, chëngbioye jáyënjanase, nÿe cachënga tšabá jtsomñama bacna juabnéngaca soyënga chamotsamama, cachënga jenomándama ntsošencá.¹⁹ Chë abuátambayënga jašëbuachenana tšabe vida jónÿenama, nÿe ntšamo chënga tmojtsebošcá jtsejuabnayëse y jtsamëse; pero cachënga mondoyna

cachëngbe bacna juabnéngaca mandánënga, y chca, chënga montsajna pochocánënga jtsemnama, er ndaye entśánaca mandaná jtsemnana, chë nÿets tempo tobedecena sóyeca. ²⁰ Er ndëmuanÿënga, Bëngbe Utabná y Atsebacayá Jesucristo tmojtsábuatmama, tmojtsajbaná oyenana mo chë nÿe quem luarama enójuabnaye entśangcá, nÿetsca bacna soye amana y tśa bacna juabnénga ainaniñe bomnana, pero mora cachiñe chë soyënguñe tmojtésajna, y cachiñe mandánënga tmojtsemna chë bacna juabnéngaca, chënga mora más bacá tempscama jabocanana. ²¹ Chëngbiana más tśabá manjamna ndoñe ntjobenayana jtsetatśëmbuana ntśamo Bëngbe Bëtsabe bominiñe tśabá yomncá inétsamama, chë soye jatabuátmanana y chentśana játajbanana chë buatëmbana soyënga y chë abuayiynayëngaftaca chëngbiöye Bëngbe Bëtsá tojanoyé mandënga jtsobedecénana. ²² Pero chëngaftaca tojopasá ntśamo entśanga mondëntśayanacá chca ndegombre bëtsemnama: “Chë queşe chabe ashconánana tojtsemnoye jeshéconana ca” y “chë cotşe cabá chora bebená, ngüichetşoye jana jetsójanduouoyama ca”.

Jesucristo quem luaroye jésabama ora

3 Jesucristbeyeca atşe bonshana catśátanga, móraca ya uta soyama cbontśëbuabiamná. Quem uta tsbuanáchaca atşe sënjáboşena jamama tşëngaftangbe juabna nÿe ena tśabe soyëngaca chaotsemnama, y chca chaotsemnamna atşe jtsabuayiynayëse chë tcmojanabuatambá soyëngama. ² Atşe séntseboşe tşëngaftanga chaşmotsenojuabná, ntśamo chë inÿe tempënga ora, chë nÿe Bëngbe Bëtsábioye jtsoservénëse,

chabe juabna oyebuambnayënga tmojánayanama, y chë Bëngbe Utabná y Atsebacayabe buatëmbana soyëngama y mandëngama, ndayá chabe ichmónëngaftaca tşëngaftanga şmojanóyëngacñe.

³ Pero masna quem soye chacmot-sésertana: Jesucristo quem luaroye jésabama tempo chaojtsobeco ora, mochántsemna entśanga y chënga mochantsiyena nÿe cachënga tśabá jtsomñama bacna juabnéngaca, y cmochantsëbuayajuana, chë Cristo yochjésabama şmoşbuáchema. ⁴ Chënga mëntśá mochántsiçhamo: “Cristo tcmojanaşebuachená quem luaroye jésabama. ¿Ndegombre chca? Chcase, ¿ndayentşe cha yojtsemna? Bëngbe bëtśétsanga, ndëmuanÿëngbiöye cha tojanaşebuachená quem luaroye jésabama, ya tmonjóbana, y quem luarentşe lempe cachcá endesomñe, ntśamo quem luare tojanobojatśé orscana enjamncá ca.” ⁵ Chë entśanga ndoñe ntseboşana jtsejuabnayana ya bayté yojtsemna, Bëngbe Bëtsá tojanmandá y chca tojanma celoca y quem luare chaotsemnama. Cha quem luare tojanma búyeshentśana y búyeshëca; ⁶ y cach búyeshëcnaca, chë uabouana uaftenentśa béjayeca, ya bayté yojtsemna, cha lempe quem luarentşe yojanbinÿncá tojtsanpochocá. ⁷ Pero chë mora entsemna celoca y quem luare, cach Bëngbe Bëtsabe mándoca, ndoñe quenátopodena chamotsepoçocama, chë Bëngbe Bëtsá jayanama chábioye ndoñe mondadoránënga ntśamo tmojamcá ndoñe tśabá yonjamnama, y chë bacna soyënga tmojamama nÿetsca tescama castigo chamotsebomnama jamándama tempo candóshjanguëntscuana. Chora Bëngbe Bëtsá, celoca y quem luare íñeshëca echantsepoçóca.

⁸ Pero, atšbe bonshánënga, canÿe soye endmëna y chë soye ndoñe chacmondébnëjtjomba: Bëngbe Utabnabe juabnama, canÿe te endmëna mo canÿe uaranga uatcá, y canÿe uaranga uata mo canÿe tecá. ⁹ Ndoñe quenátsmëna, ntšamo báseftanga jtsejuabnayana, ntšamo tojašebuachenacá cha ndoñe betso yochanjama ca, chë cha quem luaroye jésabama, ndayá chana puerte uantado tšëngaftangaftaca comna; er cha jtsebošana ndocná nÿetsca tescama castigo chaondëtsebomnama, ndayá nÿetscanga bacna soyënga amana jtsajbanase, Bëngbe Bëtsabe tšabe benache chamuashjáchama.

¹⁰ Pero Bëngbe Utabná echanjésabo ndocná chama chaondëtsejuabná ora, mo canÿe atbëbanacá jashjanguana, ndocná chama tontsejuabná ora. Chora celoca echanjopochóca, canÿe jabuache shauenanánaca, y quem luare ndaye soyënguentsána yomnana íñsheca echántsefjatëjo, y ndayá Bëngbe Bëtsá y entsánga quem luarentše tmojamcá, lempe echántsejuinÿe.

¹¹ Lempe chca japochócama entsémnayeca, ndegombre tšëngaftanga cmontsamna jtseyenana ntšamo chë Bëngbe Bëtsabe entsánga jtseyenana entsamncá, y nÿets tempo jtsamëse chë Bëngbe Bëtsábioye jtsatschuanayama yomna soyënga, ¹² tšëngaftanga chë Jesucristo quem luaroye jésabama chaóshjanguama šmojtšobátmanëntscuana; y nÿa šmochtsentšëna cha más betso cháuesabama. Chë te íñsheca celoca echántsejuinÿe, y ndaye soyënguentsána quem luare yomnana cach íñsheca echántsefjatëjo. ¹³ Pero bënga mondobátmana ntšamo cha šojašebuachenacá: canÿe tsëm luare, mo canÿe tsëm celoca y tsëm fshantscá, y chentše nÿetscanga mochantsiyena

ntšamo Bëngbe Bëtsabe bominiÿiñe tšabá yomncá jtsamëse.

¹⁴ Chíyeca, atšbe bonshánënga, chë soyënga chaotsemnama šmojtšobátmanëntscuana, nÿa chiñe šmochtsentšëna, chca, cha yochjésabo ora, chacmanÿena oyeniñe tšabá Bëngbe Bëtsáftaca jtsatsmënëse, ínÿengaftaca natjëmbana jtseyenëse; chacmanÿena ainaniñe ndocna bacna soye ndbomnënga, y puerte tšabá jtsamëse oyeniñe; chca, ndocná chaondobená jayanama tšëngaftanga ndaye bacna soye šmojama ca. ¹⁵ Quem soye šmochtsejuabnaye: Bëngbe Atsebacayá ndoñe yapa betso tonjésabëna, chca jtsemnana cha puerte uantado nÿetscángaftaca yómnayeca; chca cha yomna, ba entsánga chë bacna soyënga amana chámajbanama y chabe benache chámuatishachama y chca, atsebácanënga chamotsemnama. Cach quem soyëngámncá, Jesucristbeyeca bëngbe bonshana catšata Pablo tcmónjanëbuábiana, chë Bëngbe Bëtsá tojanma cha chaotsebomnama osertanánaca. ¹⁶ Chë soyëngama, Pablo nÿetsca chabe tsbuanáchangañe tonjanoyebuambá. Chëchangañe endmëna soyënga totcá josértama; y chë soyëngama, chë Bëngbe Bëtsabe soyëngama ndoñe tmonjuatsjínÿënga, y chë mora canÿe soye jtsejuabnayana y chentšana ínÿetšá juabnayënga, jtsejuabnayana y ínÿëngbiöye jtsabuayinyayana ndoñe ndegombre yondmëna ca. Y cachcá jtsamana ínÿe soyëngaca, Bëngbe Bëtsabe uabemana palabrenguñe. Chca chënga montsajna pochocánënga jtsemnana.

¹⁷ Chíyeca, atšbe bonshánënga, tšëngaftanga chë ya šmojtsetátšëmbo chë ndoñe ndegombre soyënga abuátambayënga mochtsemnama, yejuana šmochtsantješna; chca, chë Bëngbe Bëtsá ntšamo yomandacá

ndobedecenëngbe soyëngaca ínÿenga jáingñama, tšëngaftanga ndoñe chašmondétsemna mo uambanëngcá, ndoñe chašmondétsajbanama jtsebomnana chë Bëngbe Bëtsabe soyënga ntšamo šmojashjachcá. ¹⁸ Pero atšna, Bëngbe Utabná y Atsebacayá Jesucristo séntseimpadana, tšën-

gaftanga chašmotsiyena jtsamëse, chë chábentšana šmojóyëngacñe ba soyënga ntšamo tomnama jtsejuabnayëse, y chaoma tšëngaftanga cada te más tšabá cha chašmotsábuatmama. ¡Nÿetscanga cha chamotsatschuaná, mora y nÿetsca tescama! Chca chaotsemna.

1 San Juan

Cristo, chë nyetsca tescama yomna tšabe vida entsanga chamotsebomnama amá

1 Bënga cbontsëbuabiamná chë Bëngbe Bëtsá ndabijana inëtsoyebuambnabiamna, chë nyetsca tescama yomna tšabe vida entsanga chamotsebomnama iuabiamna, chë Bëngbe Bëtsá cabá quem luare ndëma orscana ya yojamnabiamna. Bëngbe matscuašëngaca chabe oyeubuambnayana fsënjouena y bëngbe bomínýeca cha tonjama soyënga fsënjinyë. Aíñe bënga cha fsënjinyë y bëngbe cucuátšeca fsënjábojajo. ²Cha bëngbentšë tonjanonýná y fsënjáninyë; chíyeca bënga chabiamna cbontsëtsësná y cbontsabuayiná, nda sempre vida yobomna y nda chë nyetsca tescama yomna tšabe vida entsanga chamotsebomnama iuama. Chana, chë Taitá Bëngbe Bëtsáftaca inamna, pero mora bëngbioye šojinýanyé. ³Bënga tšëngaftanga cbontsabuayiná ntšamo tifjinyë y tifjouencá, tšëngaftanga cányiñe mo canýacá bëngaftaca chašmotsemnama. Bënga cányiñe mo canýacá fsëndmëna chë Taitá Bëngbe Bëtsáftaca y chabe uaquiñá Jesucrístoftaca. ⁴Bënga quem soyënga tšëngaftanga cbontsëbuabiamná, bëngbe oyejuayana corente bëtscá chaotsemnama.

Bëngbe Bëtsá endmëna chë entsangbiamna binýnayá

⁵Mëntšá entsemna ntšamo Jesucrístbentšana tifjouencá y chca tšëngaftanga cbontsabuayiná: Bëngbe Bëtsábeñe lempe binýniñe, lempe tšabá endmëna, y chábeñe tondaye ndoñe chca quenátsmëna. ⁶Bënga

tmojtsichamo cháftaca cányiñe mo canýacá fsëntsemna ca, pero cabá ndoñe Bëngbe Bëtsabe cucuatsiñe, chë binýniñe tmontsemna, y chca, bacna soye juabnayënga y amënga tmojtsiyena, asna, bënga mojtsebostero y ndoñe montsama ntšamo ndegombre yomncá. ⁷Pero bënga chë binýniñe tmojtsiyena, tšabe soye juabnayënga y amënga ntšamo Bëngbe Bëtsá iuamcá, as nyetscanga cányiñe mo canýacá mochántsemna, y chabe uaquiñá Jesucristbe uabuáshanana buñëca, Bëngbe Bëtsá bëngbe bacna soyënga sempre šochántsabujuanaye, y echanjama bënga chabe delante tšabá chamotsatsmënama.

⁸Bënga bacna soyënga ndoñe queftsátsbomna ca tmojtsichámëse, chca cabënga jtsenoíngñayana y ainaniñe chë ndegombre soyënga ndoñe tmonjóyëngacñe; ⁹pero bënga ndegombre bacna soye amënga fsëndmëna ca, Bëngbe Bëtsá tmojauyanëse, cha bënga šochanjínýanyíye cachá chë ntšamo šojiytsašëbuachecá amá y nyetsca soyënguñe tšabá amá yomnama; y chca, nyetsca bëngbe bacna soyënga šochanjáperdonaye y nyetsca bacna soyënga šochanjábuajuanaye. ¹⁰Bënga tmojtsichamo, bacna soyënga ndoñe chibiatsma ca, chca bënga muattsichamo mo Bëngbe Bëtsá canýe bostero cuaftsemncá, y ntšamo Bëngbe Bëtsá bënga šojauyancá ainaniñe ndoñe tmonjóyëngacñe.

Cristo, bëngbe obuauyayá

2 Tšëngaftanga mo atšbe basengcá, er atšë tcbonjanéjabuache Jesucristbe tšabe noticiënguñe chašmotsošbuáchema, quem soyënga cbontsëbuabiamná bacna soyënga ndoñe chašmondétsamama. Pero ndánaca Crístbeñe ošbuachiyënguentšá

bacna soye tojamëse, bënga canÿe obuauyayá Bëngbe Bëtsabe delante montsebomna, y cha endmëna Jesucristo, chë nyetsca soyënguine tšabá amá. ²Jesucristo tonjanóbana ndoñe nÿe Bëngbe Bëtsá bënga chášuaaperdonama bëngbe bacna soyëngama, ndayá quem luarentša nyetsca entságnaca chëngbe bacna soyëngama cháuaaperdonama.

³Bënga ntšamo Bëngbe Bëtsá šojtsamëndacá tmojtsamëse, ndegombre mochántsetatšëmbo bënga cha imuábuatmama. ⁴Pero nda tojayana: “Atše Bëngbe Bëtsá sënduábuatma ca”, pero ndoñe tontsama ntšamo Bëngbe Bëtsá ibuamëndacá, cha canÿe bostero jtsemnana y ainaniñe chë Bëngbe Bëtsabe ndegombre soyënga ndoñe tonjóyëngacñe. ⁵Pero nda ntšamo Bëngbe Bëtsá ibuamëndacá tojtsama, jtsinÿanÿnayana chabe ainaniñe Bëngbe Bëtsabiana corente bonshánana yomnama, y chca, mochántsetatšëmbo bënga sempre cánÿiñe mo canÿacá cháftaca imomnama. ⁶Nda tojtsichamo Bëngbe Bëtsáftaca cánÿiñe mo canÿacá yojtsemna ca, bontsemna jtsiyenana soyënga jtsamëse ntšamo Jesucristo yojëftsiyencá.

Canÿe tsëm mando

⁷Atšbe bonshana entsanga, ntšamo mora cbontsëbuabiamnacá, ndoñe canÿe tsëm mando quenátsmëna, pero añe canÿe tempsca mando; entsemna cach tsëngaftanga Cristbe ústonënga šmonjanobiama ora šmonjanóyëngacñe mando. Quem tempsca mando entsemna ntšamo tsëngaftanga béngbentsana šmonjouencá. ⁸Pero masque chca endmënëse, quem cbontsëbuabiamná soye tsëngaftangbiana echántsemna mo canÿe tsëm mandcá. Cristo enjëftsiyena ntšamo quem Bëngbe Bëtsabe mando

cachcá šmondoyena, er chë bacna juabnënga jtsebomnëse mo ibetiñcá jtsiyenana tempo ya echanjochnëngo, y chë entsangbe juabna ndegombre binÿnayá ya entsebuashinÿinÿana.

⁹Nda tojayana chë binÿnayáftaca yojtsemna ca, pero cha chabe catšátbioye tbojtsáboyënja, cha cabá tempcá, bacna juabnënga jtsebomnëse yojtsiyena, mo ibetiñcá. ¹⁰Nda chabe catšátbioye tbojtsébobonshana, cha chë binÿnayáftaca jtsiyenana, y tondaye queochátsmëna cha bacna soye chaotsamama. ¹¹Pero nda chabe catšátbioye tbojtsáboyënja, cha bacna juabnënga jtsebomnëse jtsiyenana, mo canÿa ibetiñe oyenacá. Cha ndoñe ntsetatšëmbuana chë ndayá tojamama ntšamo chentšana yochjopása, er chë bacna juabnënga jtsebomnëse jtsiyenana chábioye ndoñe ntjalesénciana ntšamo tšabá yomncá chaotsamama.

¹²Básenga, atše cbontsëbuabiamná Bëngbe Bëtsá tsëngaftangbe bacna soyënga tcmojáperdonama, ndayá Jesús tojanma sóyeca. ¹³Taitanga, tsëngaftanga cbontsëbuabiamná, er tsëngaftanga ya šmonjuábuatmana chë quem luare jobojátšama orscana ya inamná. Tsëngaftanga bobontsëngnaca cbontsëbuabiamná, er tsëngaftanga ya chë nyetsca bacna soyënga mandayá Satanás šmonjayëñaná.

¹⁴Básenga, tsëngaftanga tcbonjubaábiana, er tsëngaftanga chë Taitá ya šmonjuábuatmana. Taitanga, tsëngaftanga tcbonjubaábiana, er tsëngaftanga ya šmonjuábuatmana chë quem luare jobojátšama orscana ya inamná. Bobontsënga, tsëngaftángnaca tcbonjubaábiana, er tsëngaftanga bëtscá añemo ainaniñe šmambá, y Bëngbe Bëtsabe palabrama sempre tsëngaftangbe ainaniñe šmondëjuabná, y chë nyetsca bacna soyënga mandayá šmonjayëñaná.

¹⁵Ndoñe matsbošana oyejuayënga jtsemnana nÿe quem luarentša soyëngaca, ni nÿe chë soyënga jtsebmomna. Nda yapa tojtseboše quem luarentša bacna soyënga jtsebmomna, cha ndoñe chë Taitábioye bondbobonshana. ¹⁶Er chë nÿe quem luarama enójuabnayënga mëntšá juabnënga mondbomna: yapa jtsebošana jtsebmomna ntšamo chë ainaniñe bacna juabnënga bomnënga mondbetsebošcá; yapa jtsebošana nÿe ndayá tmojátinÿe soye; y yapa jtsebnábotamnayana chë tmobomna soyëngama. Chë juabnënga Bëngbe Bëtsábiocana ndoñe ntsóbocanana, ndayá nÿe chë quem luarama enójuabnayëngbentšana. ¹⁷Pero quem luare echanjopochóca y nÿetsca chentša soyënga, chë entsënga bacna juabnëngaca yapa imoboše jtsebmomna soyëngnaca. Pero nda ntšamo Bëngbe Bëtsá yobošcá tojtsama, cha chë nÿetsca tescama yomna tšabe vida echántsebmomna.

Chë Cristbe contra yomná

¹⁸Básënga, quem luare jopochócama tempo ya entsobeco. Ntšamo tšëngaftanga šmonjouencá, quem tempo echanjabo chë Cristbe contra yomná. Pero morna banga Cristbe contra imomnënga tmonjábocana. Chca bënga montsetátšëmbo chë quem luare jopochócama tempo ya yojtsobecuama. ¹⁹Chënga cach bëngbentšana tmonjábocana. Pero chënga Jesucristbeñe ndoñe tmonjanošbuachená ntšamo bënga mondošbuachecá, er chënga ntšamo bënga montsošbuachecá mamojtsošbuachese, cach bëngaftaca matmënjoquedanga. Pero chca tonjopasá, ndegombre jtsotatšëmbuama ntšamo bënga Jesucristbeñe mondošbuachecá, chënga nÿetscanga ndoñe mondošbuachema.

²⁰Pero Cristo, chë Uamaná, tšëngaftanga tmonjabacacá, y

cha tonjama chë Uámana Espíritu tšëngaftangbe ainaniñe cháumashënguama; y nÿetsca tšëngaftanga chë ndegombre soyënga šmondétatšëmbo. ²¹Atše cbontsëbuabimná, ndoñe chë ndegombre soyëngama ndoñe šmondétatšëmbuama, ndayá aiñe šmotatšëmbuama; er tšëngaftanga šmondétatšëmbo chë ndegombre soyënga y ndoñe ndegombre soyënga cánÿiñe jtsemnana ndoñe yondopodénama. ²²Nda tojayana Jesús chë Bëngbe Bëtsabe Uámana Uabuayaná, chë Cristo ndoñe yondmëna ca, chana jtsebmomnerana. Cha jtsemnana chë Cristbe contra yomná, nda iuichamo Cristo Bëngbe Bëtsabe Uaquiñá ndoñe yondmëna ca, y chca, cha Bëngbe Bëtsabiamama ndoñe ntsejuabnayana cha chë Taitá bëtsemnana. ²³Nda tojtsichamo Cristo Bëngbe Bëtsabe Uaquiñá ndoñe yondmëna ca, cha chë Taitáftaca cánÿiñe mo canÿacá ndoñe ntsemnana. Pero nda entsëngbeñe tojayana, Cristo aiñe Bëngbe Bëtsabe Uaquiñá endmëna ca, chana aiñe chë Taitáftaca cánÿiñe mo canÿacá jtsemnana.

²⁴Tšëngaftanga, chë Cristbe ústonënga šmojanóbiamama orscana šmojanuena soye, tšëngaftangbe ainaniñe šmochtsambaye. Chca chašmojtsamëse, tšëngaftanga chë Uaquiñá y chë Taitáftaca cánÿiñe mo canÿacá šmochántsemna. ²⁵Y quem soye entsemna ntšamo Cristo šojëftsasëbuachená: chë nÿetsca tescama yomna tšabe vida jtsebmomnana.

²⁶Atše chca cbontsëbuabimná, chë tšëngaftanga jáingñayama imojtsebošëngbiama chašmotsetatšëmbuama. ²⁷Pero Cristo tcmojanabacacá ora, Uámana Espíritu šmojanóyëngacñe, y mora tšëngaftangbe ainaniñe Uámana Espíritu šmontsebmomna, y ndoñe quenátšiyta ndocná más

chacmotsabuátambama, er chë Uámana Espíritu lempe cmontsabuatambá; y cha endabuatambá ndegombre soyënga, y bostero soyënga ndoñe. Mëntšá, ntšamo chë Uámana Espíritu tcmojabuatambacá jtsiyenëse, Crístoftaca cánÿiñe mo canÿacá šmochtsemna.

²⁸Y mora básenga, Crístoftaca cánÿiñe mo canÿacá šmochtsemna, chca, cha chaojabáisebocna ora, chábeñe jtsošbuáchiyëse, bënga añémoca chamotsemnana y ndoñe chamondëtséuatjama, bënga chabe delante chamojtsemna ora. ²⁹Tšëngaftanga šmontsetátšëmbo Jesucristo nÿetsca soyënguiñe tšabá amá yomnama. Chcasna, cmontsamna jtsetatšëmbuana, nÿetscanga ntšamo Bëngbe Bëtsá yobošcá tmojtsamëngna, Bëngbe Bëtsabe básenga imomnama.

Cristbeñe ošbuáchiyënga, Bëngbe Bëtsabe básenga

3 Menójuabonga, ntsachetšá Bëngbe Bëtsá chë Taitá šondábabuanÿe-shanama. Chabe bonshánana tša bëtscá endménayeca, bënga šondëubuabuatma chabe básenga ca, y ndegombre bënga chca mondmëna. Chë causa chë nÿe quem luarama enójuabnayënga ndoñe quenátësertana ntšamo bënga imomnama, er chënga cha ndoñe tmonjanábuatmana. ²Atšbe bonshana entšanga, mora bënga ya Bëngbe Bëtsabe básenga montsemna. Y masque cabá ndoñe quemuátstatšëmbo ntšamo más chcoye bënga mochjamnama, añe mondëtatšëmbo, Jesucristo chaojabáisebocna ora bënga cachacá mochtsemnana, er bënga mochanjobenaye jinÿama ntšamo cha ndegombre yomncá. ³Y nda chca chábeñe puerte jtsošbuáchiyëse tojtsobátmana, bacna soyënga amana jtsajbanana, más tšabia jtsemnana,

ntšamo cach Cristo yomncá, lempe tšabia y bacna soye ndbomná.

⁴Pero nda bacna soye tojama, chana ntšamo Bëngbe Bëtsá tojëftsemadacá jtsaboténana; er bacna soye jamana endmëna, jtsabotena ntšamo Bëngbe Bëtsá tojëftsemadacá. ⁵Tšëngaftanga ya šmondëtatšëmbo Jesucristo quem luaroye tojánabo bëngbe bacna soyënga jabëtsabuajuanama, y cha ni mo canÿe bacna soye ndoñe yondbomnama. ⁶Chcasna, nda cánÿiñe mo canÿacá cháftaca nÿets tempo tojtsemna, ndoñe ntsiyenana bacna soyënga jtsamëse. Pero nda tojtsiyena bacna soyënga jtsamëse, Jesucristbiana ndoñe tbonjosertá y ndoñe yondëtatšëmbo ntšamo cha bëtsemnana. ⁷Atšbe básenga, ndocná chacmondaingñé: nda nÿetsca soyënguiñe tšabá tojtsama, cha canÿe tšabá mándbomna entšá jtsemnana, ntšamo Jesucristo yomncá; ⁸pero nda tojtsiyena bacna soyënga jtsamëse, chabe ainaniñe Satanás jtsemándayana, er Satanás quem luare jobojátšama orscana bacna soyënga iuëtsama. Bëngbe Bëtsabe Uaquiñá nÿa quem soyama tojabo: chë Satanásbe soyënga jabëtsepochocama.

⁹Ndocná Bëngbe Bëtsabe uaquiñá tojtsemná jtsiyenana bacna soyënga jtsamëse, er cha jtsebomnana chë Bëngbe Bëtsá tbojuántšame tšabe vida, y Bëngbe Bëtsá chabe Taitá endmëna. Chíyeca cha ndoñe ntsiyenana bacna soyënga jtsamëse. ¹⁰Corente jtsotatšëmbuana ndëmuanÿenga Bëngbe Bëtsabe básenga imomnama y ndëmuanÿenga Satanásbe básenga; ndëmuanÿéngnaca ntšamo tšabá yomncá ndoñe tmontsama o chabe catsata ndoñe tmontsebobonshana, ndoñe ntsemnana Bëngbe Bëtsabe básenga.

Nyetscanga jtsenbobonshánana

¹¹ Quem buayenana entsemna ntšamo tšengaftanga šmojanuena, tšengaftanga Cristbe ústonënga šmonjanobiama orscana: nyetscanga šontsamna jtsenbobonshánama. ¹² Ndoñe Caincá muatjama. Chabe ainaniñe Satanás yojamánda, y chíyeca, chabe uabentsábioye tbojtsanóba. ¿Y ndáyeca tbojtsanóba? Cha ndoñe tšabá yonjánama; chabe uabentsana aññe; chíyeca tbojtsanóba.

¹³ Jesucristbeyeca atšbe catsátanga, ndoñe šmattsenjanayeye chë nye quem luarama enójuabnayënga cmojtsébuayënjama. ¹⁴ Bënga mondétatšëmbo, bënga tempo monjaniiyena chë nye quem luarama enójuabnayënga mondoyencá, y chca, Bëngbe Bëtsabiama mo obanëngcá monjamna, er bënga monjaniiyena ntšamo Bëngbe Bëtsá ndoñe yondëmandacá. Pero Bëngbe Bëtsá tonjama mora bënga tsëm vida chamotsebomnama, y chca, mo ndegombre ainëngcá montsemna. Chca mondétatšëmbo, er bënga bëngbe catsátangbiöye mondábabuanýeshana. Nda chabe catsátbiöye ndoñe tbontsebobonshana, cha cabá mo obanacá jtsiyenana. ¹⁵ Nda cachabe catsátbiöye tbojtsáboyënja, cha jtsemnana mo entšanga obanayacá. Y tšengaftanga šmondétatšëmbo entšanga obanayá ndoñe ntsobenana jtsiyenana, chë nyetsca tescama yomna tšabe vida chabe ainaniñe jtsebomnëse.

¹⁶ Ndayá chë jtsenbobonshánana bëtsemnama mëntšá montsetatšëmbo: Jesucristo chabe derecho vida jtsobomñama cachcá tojanonýá y bëngbiama tojanóbana; cachcá bënga šontsamna jtsemnana, sempre jtseprontánana chë Jesucristbeyeca bëngbe catsátangbiama jóbanama. ¹⁷ Canýa bomnana tojtsebomna y

catsátbiöye uajabotá tbojtsonýá, pero chabiamana ndoñe tbonjongmé y ndoñe tbonjuájabuache, cha ndoñe ntsobenana Bëngbe Bëtsabiama ainaniñe bonshánana jtsebomnana. ¹⁸ Atšbe básenga, ndoñe quešnátamna nye bëngbe catsátanga imuababuánýeshana ca jatichámuana, y nye chë bonshánama jatóyebuambnayana; pero ndegombre šontsamna ndayánaca jamana, chca, jinýanýiyama, bënga ndegombre ínýengbiama imuababuánýeshanama.

Bëngbe Bëtsabe delante natjémbana ainánaca entšanga

¹⁹ Chcase bënga mochántsetatšëmbo, ntšamo chë Bëngbe Bëtsabe ndegombre soyënga yomncá bënga imojtsamama. Y bënga ndoñe quemochátenocochinýena, Bëngbe Bëtsábioca jtsemnana mercedo ndoñe monduájona ca tmojtsejuabná ora; y bëngbe ainana natjémbana Bëngbe Bëtsabe delante echántsemna. ²⁰ Bënga chca bëngbe ainaniñe tmojtsejuabná ora, bënga montsobena natjémbana ainana jtsebomnana, er Bëngbe Bëtsá corente jtsotatšëmbñana ntšamo bëngbe ainana yomnana, y cha lempe yotátšëmbo. ²¹ Atšbe bonshana entšanga, bënga ndoñe bacna soye tmonjama ca bëngbe ainaniñe tmojtsejuabnase, jtsobenana añémoca jtsemnana y tondayama ntsauatjácá Bëngbe Bëtsabe delante jtsemnana. ²² Y cha lempe ntšamo chamojotjañcá šochanjátšataye, er bënga montsama ntšamo Bëngbe Bëtsá ibuamandacá y ndayá chabe bominýiñe tšabá yomncá. ²³ Y chabe mando endmëna: bënga chabe Uaquiñá Jesucristbeñe jtsošbuáchiyana, y bënga nyetscanga jtsenbobonshánana ntšamo Jesús šojéftsamëndacá. ²⁴ Ntšamo Bëngbe Bëtsá tojëftsemandacá amënga, Bëngbe Bëtsáftaca cánýiñe mo canýacá jtsemnana, y cha sempre chëngaftaca

cányiñe mo canyaca echanjéftsemna. Y quem sóyeca bēnga montsobena jtsetatšēmbuana cha bēngaftaca iuétsemnana: Uámana Espíritu bēngbe ainaniñe cháumashēnguama cha tojama.

Chē Bēngbe Bētsabe Espíritu y chē Cristbe uayayabe espíritu

4 Atšbe bonshana entšanga, nýetscanga chē Bēngbe Bētsabe juábnaca imoyebuambná ca ichámēngbioye ndoñe šmattsayaunana; botamana šmochjuarrepára corente jtsetatšēmbuama chēnga añe o ndoñe chē Bēngbe Bētsabe juábnaca imóyebuambnana. Quem tempo banga Bēngbe Bētsabe ndoñe ndegombre juabna oyebuambnayēnga quem luarējana mondajna. Chē causa tšēngaftanga cmontsamna botamana chēngbiana juarrepáraná. ²Chē Bēngbe Bētsabe Espíritu ndegombre imobomnēngbiana tšēngaftanga mēntšá šmotsobena jtsetatšēmbuana: nda tojayana Jesucristo quem luaroye añe entšacá tojánabo ca, cha ndegombre chē Bēngbe Bētsabe Espíritu yojtsebomna. ³Pero nda ndoñe chca Jesucristbiana tonjayana, cha Bēngbe Bētsabe Espíritu ndoñe yontsebomna; inýetsá, chana chē Cristbe contra yomnabe espíritu yojtsebomna. Tšēngaftanga šmojouena chē espíritu yochjabama; pero ndegombre cha ya quem luarentše entsemna.

⁴Atšbe básenga, tšēngaftanga Bēngbe Bētsábenga šmondmēna y ndoñe šmonjalesenciá chē Bēngbe Bētsabe ndoñe ndegombre juabna oyebuambnayēnga tšēngaftangbioye chacmaingñema, er chē nýets tempo tšēngaftangbe ainaniñe vida endbomná, chē nýe quem luarama enójuabnayēngbe ainaniñe mándayabiana más obená endmēna.

⁵Chē Bēngbe Bētsabe ndoñe ndegombre juabna oyebuambnayēngna chē nýe quem luarama enójuabnayēnguentšana mondmēna, chíyeca chēnga nýe quem luarentša soyēngama jtsóyebuambnayana, y chē nýe quem luarama enójuabnayēnga chēnga jtsayaunanana. ⁶Pero bēnga Bēngbe Bētsábenga mondmēna. Nda Bēngbe Bētsábioye tbojtsabuatma, bēngbioye jtsayaunanana; pero nda Bēngbe Bētsábioye ndoñe tbojtsabuatma, cha bēnga ndoñe ntsayaunanana. Chiñe bēnga montsobena jtsetatšēmbuana nda chē ndegombre soyēnga jóyebuambayama ama espíritu yobomnabiana, y nda chē ínýēngbioye jáingñama ama espíritu yobomnabiámnaca.

Chē bonshánana Bēngbe Bētsábíocana yóbocana

⁷Atšbe bonshana entšanga, chē bonshánana Bēngbe Bētsábíocana endóbocana; chcase, bēnga šontsamna nýetscanga jtsenbobonshánana. Nda Bēngbe Bētsábioye y chē inýe entšángbioye tojtsababuánýeshana, cha Bēngbe Bētsabe uaquiñá jtsemnana y Bēngbe Bētsábioye jtsabuatmana. ⁸Nda ndoñe chca tontsebobonshana, cha Bēngbe Bētsábioye ndoñe ntsábuatmana, er Bēngbe Bētsá bonshanánaca nýetsca soyēnga jamana. ⁹Bēngbe Bētsá šonjinñanyé bēnga šuababuánýeshanana, cha chē nýe canýe Uaquiñá ibobomná quem luaroye jíchmuase; cha tbojanichmó, bēnga chábeyeca chē nýetsca tescama yomna tšabe vida chamotsebomnana. ¹⁰Bēngbe Bētsabe bonshánana mēntšá endmēna: ndoñe quenátsmēna bēnga Bēngbe Bētsá imobobonshánayeca, ndayá cha bēnga šojánababuanýeshanayeca, y chabe Uaquiñá tbojanichmó, cha jóbanēse,

bënga bëngbe bacna soyëngama perdonánënga chamotsemnana.

¹¹ Atšbe bonshana entšanga, Bëngbe Bëtsá chca šuababuánÿeshana; chcasna, bëngnaca šontsamna nÿetscanga jtsebobonshánana. ¹² Ndocná ndocna te Bëngbe Bëtsábioye tbonjinÿe. Bënga nÿetscanga tmojtsebobonshánëse, Bëngbe Bëtsá nÿets tempo bëngaftaca echántsemna, y chabe bonshánana puerte bëtská bëngbeñe echántsemna. ¹³ Bënga mëntšá montsobena ndegombre jtsetatšëmbuana bënga Bëngbe Bëtsáftaca imomnana y cha bëngaftaca: cha tonjanma chabe Espiritu bëngbe ainaniñe cháumashënguama. ¹⁴ Y cach bënga fsënjjinÿe y entšanga fsëntsëtsëtsná, chë Taitá chabe Uaquiñá tbojichmoma, quem luarentša entšanga jabátsebacama. ¹⁵ Ndánaca tojayana Jesús Bëngbe Bëtsabe Uaquiñá yomna ca, cha Bëngbe Bëtsáftaca cánÿiñe echántsemna y Bëngbe Bëtsánaca sempre cháftaca cánÿiñe mo canÿacá.

¹⁶ Chcase bënga montsetátšëmbo y montsošbuaché ndegombre Bëngbe Bëtsá bënga šuababuánÿeshanama. Bëngbe Bëtsá nÿetsca soyënga bonshanánaca jamana y nda Bëngbe Bëtsá y chë inÿe entšanga sempre tojtšababuánÿeshana, cha Bëngbe Bëtsáftaca cánÿiñe mo canÿacá jtsemnana y Bëngbe Bëtsánaca sempre cháftaca cánÿiñe mo canÿacá. ¹⁷ Chca, Bëngbe Bëtsabe bonshánana puerte bëtská bëngbeñe echántsemna, bënga bëts añémoca y tondayama ntsauatjá chamotsemnana, chë tšabá o ndoñe tšabá tmonjamama entšangbiama jayanama Cristo yochjésabo orscama; er bënga Jesucrítoftaca cánÿiñe mo canÿacá jtsemnëse, quem luarentšë mondmëna ntšamo Jesucristo endmëncá. ¹⁸ Nda Bëngbe Bëtsá y chë inÿe entšanga tojtšababuánÿeshana, tondayama ntsauatjana; bënga

corente tmojtsebobonshana ora, ndoñe ntsopodénana uatjana jtsebobomnana. Canÿe entšá tojtšauatja ora, jtsemnana mo chabe castigo ya cuafjobojatšecá. Chca, nda uatjana tojtsebobomna, Bëngbe Bëtsábioye y chë inÿe entšanga cha ndoñe corente yondábabuanÿeshana, ntšamo Bëngbe Bëtsá bënga šuababuánÿeshancá.

¹⁹ Natsana Bëngbe Bëtsá šoján-ababuanÿeshana, y chíyeca bënga, cha y chë inÿe entšanga imuababuánÿeshana. ²⁰ Nda tojayana: “Atšë Bëngbe Bëtsábioye séndbobonshana ca”, pero cachca ora cachabe catsátbioye tbojtšáboyënja, cha canÿe bostero jtsemnana. Canÿa añe jtsoberenana chabe catsáta jinÿama; y cha chë catsátbioye ndoñe tbontsebobonshana, ndegombre cha Bëngbe Bëtsábioye ndoñe bondbobonshana, ndábioye jinÿama ndoñe ntsobenana. ²¹ Y bënga quem mando chábentsana tmonjanóyëngacñe: nda Bëngbe Bëtsábioye tbojtsebobonshana, cachabe catsátbioynaca chabotsebobonshana ca.

Chë Jesucrístbeñe ošbuachiyá endobena Satanasbe soyënga jayénjanana

5 Nda tojtsošbuaché Jesús chë Uámana Uabuayaná, chë Cristo yomnana, cha Bëngbe Bëtsabe uaquiñá jtsemnana; y nda canÿe taitábioye tbojtsebobonshana, chë taitabe uaquiñábioynaca cha jtsebobonshánana. ² Bënga Bëngbe Bëtsá tmojtsebobonshana y ntšamo cha tojtsemandacá tmojtsamëse, bënga ndegombre mochántsetatšëmbo, chë Bëngbe Bëtsabe basengbioynaca bënga imuababuánÿeshanama. ³ Bënga Bëngbe Bëtsábioye imobobonshánama quem soyiñe jtsinÿnana: bënga ntšamo Bëngbe Bëtsá tomandacá tmojtsamëse. Y ndayá Bëngbe Bëtsá yomandacá

ndoñe yapa totcá quenátsmëna bënga chamotsamama. ⁴Nda Bëngbe Bëtsabe uaqiñá tomna, chana jáyëñjanana quem luarentša entsanga y soyënga ntšamo Satanás yomandacá. Quem luarentša entsanga y soyënga ntšamo Satanás yomandacá, Crístbeñe bënga imošbuachéyeca montsobena bënga jáyëñjanana. ⁵Nye nda, Jesús Bëngbe Bëtsabe Uaqiñá yomna tojtsošbuaché, cha jtsobenana chë entsanga y soyënga ntšamo Satanás yomandacá jáyëñjanana; ndocná más.

**Bëngbe Bëtsá tojinÿanÿé
ntšamo chabe Uaqiñabiama
ndegombre yomncá**

⁶Cach Jesucristo endmëna nda quem luaroye tojánabo y mëntšá tojanenonÿinÿé: býyesheca cha tmojanabaye ora, y buñe juabuáshanëse cha tonjanóbana ora. Cha ndoñe tonjanenonÿinÿé nye býyesheca, ndayá býyesheca y buñeca. Cach Uámana Espíritu entsobena jayanana chca ndegombre bëtsemnama Jesusbiamá, er chë Espíritu endmëna chë sempre ndegombre oyebuambnayá. ⁷Endmëna unga soyënga, ndayá iuinÿanÿná ntšamo ndegombre yomncá Jesusbiamá: ⁸Espíritu, býyeshe y buñe; y chë unga soyënga lempe cachcá Jesusbiamá jtsinÿanÿayana. ⁹Bënga mondbëtsejuabnaye, ndayá entsanga tmojinÿe ca tmojtsichámuama mo ndegombre cuaftsemncá, pero ndayá Bëngbe Bëtsá tojtsichamcá chë ndegombre soye jtsemnana y puerte jtsámanana, er chë ndegombre soye ntšamo cha tojtsichamcá, endmëna ndayá chabe Uaqiñabiama iuichamcá. ¹⁰Nda Bëngbe Bëtsabe Uaqiñábeñe tojtsošbuaché, cha chca nyëts tempo chabe ainaniñe jtsejuabnayana; nda Bëngbe Bëtsábeñe ndoñe tontsošbuaché, cha chca jtsamana mo Bëngbe Bëtsá

canÿe bostero cuaftsemncá, er chë Bëngbe Bëtsá chabe Uaqiñabiama tojayana soyama cha jtsejuabnayana ndoñe ndegombre yontsemna ca. ¹¹Ntšamo Bëngbe Bëtsá chabe Uaqiñabiama tojayancá mëntšá entsemna: Bëngbe Bëtsá bëngbiama tojama chë nyëtsca tescama yomna tšabe vida chamotsebomnama; y quem vida chabe Uaqiñábeñe entsemna. ¹²Nda Bëngbe Bëtsabe Uaqiñáftaca cánÿiñe mo canÿacá tojsemna, cha chë tšabe vídnaca jtsebomnana; pero nda chë Bëngbe Bëtsabe Uaqiñáftaca cánÿiñe mo canÿacá ndoñe tontsemna, cha chë nyëtsca tescama yomna tšabe vida ndoñe ntsebomnana ca.

**Inÿe soyëngama jábuayenama y
jtadiósoftanama**

¹³Tšëngaftanga, chë Bëngbe Bëtsabe Uaqiñábeñe šmošbuachéngbiyoe quem soyënga cbontsëbuabiamná, ndegombre chašmotsetatšëmbuama chë nyëtsca tescama yomna tšabe vida šmojtsebomnama.

¹⁴Bënga bëts añémoca y ndauatjca Bëngbe Bëtsabe delante mondmëna, er bënga mondétatšëmbo, nderado ntšamo chaotsemnana cha tojtsebošcá bënga tmojotjañe ora, cha bënga šnétsayaunanama. ¹⁵Nderado ndayá chca Bëngbe Bëtsábíoye tmojtsotjanañe ora, cha bënga joyaunayana; bënga mondétatšëmbo chca ndegombre yomnama, y chca, bëngnaca montsetatšëmbo, ndayánaca chábíoye bënga chamojotjañcá cha šochjátšatayama.

¹⁶Nda cachabe catšátbíoye tbojinÿe canÿe bacna soye tojtsamama, pero chë bacna soye tojamentšana cha perdonaná jtsemnana cabá tojtsopodënëse, chábíoye bontsemna Bëngbe Bëtsá jaimpádana, y chca, Bëngbe Bëtsá echanjama chë catšata

chë nÿetsca tescama yomna tšabe vida chaotsebomnama, cha chca tojamentšana perdonaná jtsemnama cabá tojtsopodénëse. Pero canÿe bacna soye endmëna, y chca tojamama canÿa ndoñe ntsobenana perdonaná jtsemnana, y chca, cha jabocnana canÿa nÿetsca tescama castiganá chaotsemnana, y atše ndoñe quetsátichamo chë bacna soyama yojtsemna Bëngbe Bëtsá jtseimpadánana chaboperdonama ca. ¹⁷Nda tojtsama ntšamo Bëngbe Bëtsá ndoñe yondëmandacá, cha bacna soye jtsamana; pero nÿetsca bacna soyënga ntšamo canÿa tojtsamcá, ndoñe ntjamana cha ndëperdonaná chaotsemnana.

¹⁸Bënga mondétatšëmbo, nda Bëngbe Bëtsábioye mo taitacá tbojtsebomna, cha ndoñe ntsiyenana bacna soyënga jtsamëse, er chë Bëngbe Bëtsábentšana Onÿnaná chábioye jtsinÿenana, y Satanás, chë nÿetsca

bacna soyënga amëndayá, tondaye ntsobenana chábioye jabórlana. ¹⁹Bënga mondétatšëmbo, bënga chë Crístbeñe ošbuáchiyënga Bëngbe Bëtsábënga imomnama, y chë quem luarentša inÿe entšanga Satanasbe cucuatšinë imomnama. ²⁰Bëngnaca mondétatšëmbo Bëngbe Bëtsabe Uaquiñá tojabama, y cha iuama bënga osertánana chamotsebomnama, chë ndegombre Bëngbe Bëtsá yomná jtsabuatmama. Bënga chë ndegombráftaca cánÿiñe mo canÿacá mondmëna, bënga chabe Uaquiñáftaca cánÿiñe bëtsemnayeca. Cha chë ndegombre Bëngbe Bëtsá endmëna, y nda chë nÿetsca tescama yomna tšabe vida entšanga chamotsebomnama iuamá. ²¹Atšbe básënga, ndoñe šmattsadorana cach entšangbe pormana soyënga, chë ndayama ínÿënga mondbëtsejuabnaye diosënga yomna ca.

2 San Juan

Jtsiyenana ndegombre soyéngaca y nyetscanga jtsenbobonshánese

1 Atše chë bëtsëjema, quem tsbuanácha sentsabiamná, chë uámana mamá, chë Bëngbe Bëtsabe bocacaná y chabe basengbiámna, ndëmuanýenga atše ndegombre sëndábabuanýeshana. Y ndoñe nýe atše chënga quetsátababuanýeshana, ndayá nyetscanga chë Bëngbe Bëtsabe ndegombre soyënga uabuatméngnaca. ²Atše cbontsababuanýeshana, chë ndegombre soyënga bëngbe ainaniñe mondbómnyeca, y chë soyënga bëngbe ainaniñe sempre echántsemna.

³Atše sésentseimpadana Bëngbe Bëtsá chë Taitá, y Jesucristo chë Taitabe Uaquiñá, chaboma tsëngaftangbeñe tsabe bendicionënga chaotsemnana, chata tsëngaftangbiroye chácmalastemama, y chaboma tsëngaftangbe ainaniñe tsabe ebionana chašmotsebmoma. Quem soyënga, bënga chë ndegombre soyënga uabuátmënga y nyetscanga mondenbobonshánëngaftaca echántsemna.

⁴Puerte sënjoyejuá, er atše acbe básenguentše báseftanga sënjánýena chë ndegombre soyënga ntšamo Bëngbe Bëtsá chë Taitá šojamëndacá jtsamëse. ⁵Y mora, uámana mamá, cbontseimpadana Diosmanda nyetscanga chamotsenbobonshana. Chë cbontsëbuabiamná soye ndoñe canýe tsëm mando quenátsmëna, ndayá cach Cristbe ústonënga tmonjanobiama ora tmonjanóýëngaçñe mando. ⁶Bënga, Bëngbe Bëtsá y chë inýe entsanga imababuanýeshanama jtsinýnana, bënga ntšamo Bëngbe Bëtsá tojamandacá jtsamëse tmojtsiyenama.

Y chabe mando, ntšamo Cristbe ústonënga šmonjanobiama ora šmojanuencá, mëntšá endmëna: jtsiyenana Bëngbe Bëtsá y chë inýe entsanga jtsababuánýeshanëse.

Chë entsángbiroye áingñayënga

⁷Quem luarëjana banga entsángbiroye áingñayënga mondjana, y chënga jtsejuabnáyana Jesucristo quem luaroye ndoñe mo canýe ndegombre entsacá tonjánabo ca. Nda chca tojtsejuabná, cha jtsemnana chë aingñayá y Cristbe contra yomná. ⁸Chëngbiama cuedado šmochtsebmoma. Ndoñe chcase, tsëngaftanga ndoñe quešmochátsebmoma chë Cristbiama cach tsëngaftangbe trabajuentšana tojóbcna soyënga, y ndoñe quešmochatosháchiñe lempe ntšamo Bëngbe Bëtsá tsëngaftangbiroye jatšatayama yojtsebošcá.

⁹Ndánaca chë Cristo tojanabuatambá soyëngama inýe soyënga tojatabuatambá, cha ndoñe Bëngbe Bëtsáftaca cánýiñe mo canýacá ntsemnana; pero nda sempre ntšamo Cristo tojanbuatëmbacá tojtsabuatambá, cha añe chë Taitáftaca y chabe Uaquiñáftaca cánýiñe mo canýacá jtsemnana. ¹⁰Ndánaca tsëngaftangbiroye tojá jabuátambama, pero ndoñe ndayá Cristo tojanabuatambacá tojtsebuatëmbase, cha ndoñe šmatjofja, ni mo šmatjachuaye. ¹¹Er nda chábroye tbojachuase, chábroye jtsajabuáchanana chë bacna soye chaomama.

Jtadióšoftanama

¹²Atše ba soyënga sésentsebmoma tsëngaftanga jáuyanama, pero ndoñe quetsátsboše tsbuanáchañe jubuábiamama. Atše sésentsejuabná añe chjobenaye tsëngaftangbiroye jama, jobenayama nyetscángaftaca jencuéntama, chca, bëngbe oyejuayana puerte bëtscá chaotsemnana.

¹³Crístbeyeca acbe quenata, chë
Bëngbe Bëtsabe bocacaná, chabe
básenga cmontsacheuaná.

3 San Juan

Juan Gaybiana puerte tšabá tojanoyebuambá

1 Atše chë bëtsějema, quem tsbuanácha atšbe bonshana amigo Gaybiana sentsabiamná. Chábioye atše ndegombre sëndbobonshana.

²Atšbe bonshaná y Crístbeyeca atšbe catšata, Bëngbe Bëtsá sëntseimpadana aca tšabia nyetsca soyënguine chacotsemnana y salud bomnánaca. Atše sëntsetatšëmbo aca ainaniine tšabá cotsomñama, Bëngbe Bëtsabiana bëtská tšabe juabnënga chentše jtsebomnëse. ³Er báseftanga Jesucristbeñe ošbuáchiyënga átšbioye tmonjabo y šmonjacuentá ntšamo aca chë ndegombre soyënga yomncá icuamama, aca chë ndegombre soyënga jtsamëse icoyenama. Chíyeca atše bëtská sëntsoyejuá. ⁴Todaye jamana atše nyetšá oyejuayá chaitsemnana, ndayá nyë jouenana chë atšbe basengcá imoquedánënga ntšamo chë ndegombre soyënga yomncá jtsamëse imoyenama.

⁵Atšbe bonshaná, aca contsama ntšamo Jesucristo tonjanbuatëmbacá, aca chë ínÿenga Jesucristbeñe ošbuáchiyënga jujabuáchama ndayánaca tcojama ora, y masna, chë inÿe luaroquëngocana ashjajnëngbiana ndayánaca tcojtsama ora. ⁶Chë átšbioye tmonjabënga tmonjoyebuambá, chë Jesucristbeñe ošbuáchiyënga quem luarentše mondbenenefjnëngbe delante, aca tša chënga icuababuánÿeshanama. Diosmanda, ntšamo tojtsëjabotcá chënga cochjújabuache, chca, chënga chamobená tšabá inÿe luarëngoye játama. Chënga mondmëna Bëngbe Bëtsabiana trabájayënga; chcasna, chëngaftaca cochjama ntšamo chënga chama merecido imobuajoncá.

⁷Chca cochjama, er chënga chëngbe pueblënguentšana tmojëftsebecana Jesucristbe soyëngama entšángbioye jábuayenama, y chënga chama todaye crocénana quematóyëngacañe chë Jesucristbeñe ndošbuáchiyëngbe cucuatšëntšana. ⁸Chíyeca bënga šontsamna chëngbiana jtsantješnana y jtsëjabuáchanana, chca, bënga chamobená cányiine chëngaftaca jatrabájana, entšángbioye chë ndegombre soyëngama jábuayenama, ndayá chënga mondama.

Diótfes ndoñe tšabá tonjanma; Demetrio aïne

⁹Atše canÿe tsbuanácha chë Jesucristbeñe ošbuáchiyënga chentše mondbenenefjnëngbioye sënjubuábiana, pero Diótfes ndoñe yontsuenana ntšamo atše sentsichamcá, er cha yojtsebošë chë ínÿëngbioye nyë jtsamëndayana. ¹⁰Chíyeca atše choye chajjá ora, ndayá cha yojtsamama chanjauácacana. Cha sempre bacá yojtsoínÿana y uayátšenaye soyënga bëngbe contra yojtsichamo. Y chë soye chábioye ndoñe bontsobastana; chana chë Jesucristbeñe ošbuáchiyënga chabe pueblöye tmojáshjajnënga ndoñe ntjúbuajana, y chënga júbuajama tmojtsebošëngbioye ndoñe yontsalesenciana chca chamomama, y chë Jesucristbeñe ošbuáchiyënga bëtsemnana immétsenefjuana luarentšana yojtsatëbuacana.

¹¹Atšbe bonshaná, ndoñe cattsama chë ndoñe tšabá yontsamacá, ndayá chë tšabe soyënga tmojtsamëngcá cocht-sama. Nda ntšamo tšabá yomncá tojt-sama, cha Bëngbe Bëtsábiana jtsemnana; pero nda ndoñe chca tontsama, cha cabá ndoñe yondétatšëmbo ntšamo Bëngbe Bëtsá yomnama.

¹²Jesucristbeñe ošbuáchiyënga nyetscanga tšabe soyënga Demetriëbiana montsichamo, y Jesucristbe ndegombre soyënga

entsinyña ntšamo cha soyënga yojtsiyenama. Béngnaca chabiamama tšabá fséntsichamo, y aca condétatšëmbo ntšamo bënga fséntsichamcá, ndegombre yomnama.

Jadiósoftanama

¹³ Atše ba soyënga séntsebmoma aca jauyanama, pero ndoñe quetsátsboše

tsbuanáchañe juábobemana. ¹⁴ Atše séntsejuabná betso chjobenaye ácbioye jama jauatsëtsayama y jobenayana ácaftaca jencuéntama.

¹⁵ Puerte tšabe ebionana ainaniñe chacotsebmoma. Quem luarentša amiguënga cmontsechuaná. Diosmanda, bëngbe amiguéngbioye chocha cada ona cochjácheuaye.

San Judas

Jacheuayama

1 Atše Judas, Jesucristbe oservená y Santiagbe catšata, quem tsbuanácha sentsabiamná, ndémuanýengbioye Bèngbe Bètsá, chë Taitá chabe entsanga chamotsemnana tojáchembo, chabe bonshánènga, y ndémuanýenga Jesucristo endányena. ²Atše, Bèngbe Bètsá séntseimpadana, cha puerte lastemado tsèngaftangaftaca chaotsemnana, cha chaoma tsèngaftanga ainaniñe tsabe ebionana chašmotsebomnana, y chaoma tsèngaftanga cada te más Bèngbe Bètsábioye y ínýengbioye chašmotsababuányeshanama.

Chë ndoñe ndegombre soyènga buátèmbayènga

³Atšbe bonshánènga, atše tša séndboše tsèngaftanga jubuábiamama, ntšamo Jesucristo bèngbe bacna soyènguentšana šojátsebacama, tsèngaftangbioye y bèngbioynaca; pero atše séntsejuabná atše šojtsemna tsèngaftanga jubuábiamana, jáimpadama bètsá chašmotsama Jesucristbe soyèngama, chë mondošbuaché soyèngama jenujuérmama, ndoñe chaondopochocama. Chë soyènga Bèngbe Bètsá chabe entsanga canye tojatšatá, y nýetsca tescama. ⁴Er tsèngaftanga ntšamo ínýenga imomnana ntjatatšèmbonca, básefta entsanga tsèngaftangaftaca tmojenutaná. Chènga mondmèna Bèngbe Bètsá ndoñe adórayènga, y chë buátèmbana soyènga tmojtsetrocá. Bèngbe Bètsá bèngbe tsabiamana juabna yobómnayeca, chènga jtsichámuana tsèngaftanga šmojt sobena nýetsca bacna soyènga jtsamése jtsiyenana, jenomándama nt sobencá ca; y chca,

chènga montseboše jinýanýiyama, Jesucristo ndoñe bèngbe canye Nduiño y Bèngbe Utabná chèngbiama yondmèna ca. Y bayté, Bèngbe Bètsabe uabemana palabrènguine tmojanábema, chë chca amèngna jtsamnana nýetsca tescama castigánènga jtsemnana ca.

⁵Masque tsèngaftanga lempe quem soyama ya šmondétatšèmba, atše séntseboše jamama tsèngaftanga chašmotsenojuabná, Bèngbe Utabná, Israeloca entsanga Egiptoquèngbe cucuatšèntšana tojanatsebacá chentšana, cachá chë Israeloquènguentse chabeñe ndošbuáchiyènga tojánapochocama; ⁶y cachcá chë angelèngbiámnaca, ndémuanýenga ndoñe tmonjanoquedá chë tmojanóyèngacñe mándoca, pero aine chèngbe luarènga cachcá imojéftsonýaye. Chë causa, Bèngbe Bètsá tojanmandá cadenèjuangaca nýetsca tescama chamoquedama, chë más ibetiñe, tondaye binýiñe luarentse, chènga bacna soyènga tmojanmama nýetsca tescama castigánènga jtsemnana yojtsamna ca, cha jayanama tescama. ⁷Y chë Sodoma y Gomorra, y chë béconana pueblènguentse entsangbiámnaca; chéngnaca cach angelèngcá ndoñe tsabá monjánama, y nýetsca bacna soyènga imojánama boyabása o shembásaftaca, y ínýengaftaca y bayèngaftácnaca. Chíyeca chènga tmonjansufrí chë íñesheca castigo nýetsca tescama, y chca, nýetsca entsángbioye tmojaninýanyé, ndayá yochjopása chë chca Bèngbe Bètsábioye ndoñe tbontsobedecenáftaca.

⁸Cachcá, chë ndoñe ndegombre soyènga buátèmbayèngnaca chë mo otjenayoquécá tmojáninýe soyèngama jtsichámuana, y chë causa cachèngbe cuerpèngama bacna soyènga jtsamana, chë mando bomnéngbioye jtsébátenana, y chë espíritènga

obenana bomnëngbiama ndoñe tšabá ntsichámuana, mo chëngbioye cuafjoyanguangcá. ⁹ Pero ni mo chë angelëngbe mandayá Miguel quem buatëmbayëngcá tojanma. Cha chë diabloftaca ibojentsjaná ora, Moisesbe cuerpama cháftaca jabuachana ibojane-natsétsnaye ora, ndoñe tonjanenñemó jayanama chë diablëbiama podesca soyënga, jóyenguanguse, ndayá nñe mëntšá ibojayana: “Bëngbe Utabná chacmácacana ca.” ¹⁰ Pero quem buátëmbayëngna, chë ndoñe tontsésertana soyëngama podesca jtsichámuana, y ntšamo tojtsebionama y tmojtsebošama, nñe mo bayëngcá, chë soyëngama tšabá josértama juabna ndbomnënga, ndayá chentšana tmojtsësertancá jtsamëse, jamana chënga nñetsca tescama castigánënga jtsemnana chamotsajnama.

¹¹ ¡Tša lastema quem buátëmbayëngbiama! Er chënga ndoñe tšabá tmojanma, mo Caincá; cha tojanaboté ntšamo Bëngbe Bëtsá inétsama bacna soyënga japerdónama, y cabana chabe catsátbioye tbojanóba. Chënga crocénana juácánama, mo Balaam yojanamcá, Bëngbe Bëtsabe tšabe benachentsšana tmojtsojuánañe, bacna soyënga jamama. Chënga chë amëndayëngcá Bëngbe Bëtsá tojanabacacángbioye ndoñe ntsayaunanana, ntšamo Coré, Moisés y Aarónbioye joyaunayama ndoñe tonjanbošencá; y chë causa chënga pochocánënga mochántsemna, ntšamo Coré pochocaná chaotsemnana Bëngbe Bëtsá tojanmcá.

¹² Chëngna tšëngaftangbiama jtsemnana mo canñe ndétsenga luarentšë canñe bëts tsengacá, tšëngaftangftaca tmojenutaná ora, cánñiñe jasama mo Jesucristbeñe ošbuachiyëngcá. Chënga chca jtsemnana, er chca fiestënguñe chënga oyejuayënga jtsemnana, nñe

chënga tšabá jtsomñama soyënga jtsamëse, y chënga chama ndoñe ntsëuatjana. Chënga nñe cachëngbiama jtsantješnana, ínñëngbiama ndoñe. Chënga tša jtsašebuachiyana, pero chëngbe buatëmbana soyënga ínñëngbiama tondayama ntososervénana; y chca, chënga jtsemnana mo chë tša jënñá ora jantšëtšëngcá, tondaye ntjuaftena, bínñiaca ochñëjuanëshënga; y mo betiyeshënga jashtsnëshenga y buashanëshëngcá, chë jashacama tojtsemna ora tondaye shajuana causa. ¹³ Chënga nñets tempo bacna soyënga jtsamana cachëngbe bacna juabnëngaca, y chë bacna soyënga ntšamo tmojtsamcá jtsinñanñayana chënga chë bacna juabnënga imobomnana. Chca, chënga jtsemnana mo mar béjayoca oleshëngcá, chentšana espumushënga bëtscá tsenguéshëca jtsóbocanana. Y cabana, chënga jtsemnana mo estrellëngcá chëtemëngbe benachentsšana tmojtsebočna, y chentšana jtsefsanana. Bëngbe Bëtsá tojamandá, chë buátëmbayënga ntšamo tmojamamna, chë más ibetoca, tondaye binñiñe luarentšë nñetsca tescama chënga chamoquedama.

¹⁴ Adánbentsšana chñënguana pamillo entšanga tmojánachñëjna chentšana Enoc tojánashjango. Chánaca Bëngbe Bëtsabe juabna tojanoyebuambá chë bacna buátëmbayëngbiama, mëntšá tojánayana ora: “Šmochjinñe, Bëngbe Utabná echanjabo bëtscá uaranga angelëngftaca, ¹⁵ nñetsca entšangbiama jabáyanama ntšamo tmojamcá tšabá o ndoñe tšabá bëtsemnana; y cha echanjamánda chë Bëngbe Bëtsábioye ndoñe adórayënga nñetsca tescama castigánënga chamotsemnana, tša bacna soyënga chabe contra tmojamama, y bacna soyënga chabe contra tmojanayama, chënga, chë puerte bacna soyënga

amënga ca” —tojánayana. ¹⁶Chënga mondmëna chë tšabe soyëngama nyets tempo podesca ichámënga, y ndocna te tondáyeca oyejuayënga ntsemnana. Chënga jtsiyenana bacna soyënga jtsamëse nÿe cachënga tšabá jtsomñama, y puerte botamana palabrënga jtsichámuana uámanënga jtsenbiannayëse, y tšabe soyënga ínÿengbiöye jtsëtsënyana, chënga tšabá joquédama y chëngbentšana ndayánaca josháchiñama.

Ošbuáchiyënga jábuayenama

¹⁷Pero tšëngaftanga, atšbe bonshánënga, šmochtsenójuabnaye ndayá chë Bëngbe Utabná Jesucristbe ichmónënga tcmojanëyanama, mëntšá: ¹⁸“Jesucristo quem luare jésabama tempo chaojtsobeco ora, mochántsemna entšanga, y chënga mochantsiyena jtsamëse nÿe cachënga tšabá jtsomñama bacna juabnéngaca, y tšëngaftanga cmochantsébuayajuana ca.” ¹⁹Chënga mondmëna chë ošbuáchiyënguentšë nyetscanga ndoñe cachcá chamondétsejuabnama amënga; chënga mondoyena jtsamëse cachëngbe bacna juabnéngaca y ndoñe quemátsbomna Uámana Espíritu, chëngbe ainaniñe chaotsemándama.

²⁰Pero tšëngaftanga, atšbe bonshánënga, nyets tempo, cada te más Jesucristbeñe ošbuáchiyana šmochtsebomna, chë Bëngbe Bëtsábocana endóbocana osbuáchiyana, y Bëngbe Bëtsáftaca šmochjencuénta, ntšamo Uámana Espíritu tcmojtsamëndacá. ²¹Yejuana šmochtsantješna tšëngaftanga nyets tempo chašmotsiyenama, Bëngbe Bëtsá

cmababuánÿeshanama jtsejuabnayëse, y šmochtsobátmana chë tempo ndaye ora Bëngbe Utabná Jesucristo, tšëngaftanga jtsalastemánëse, yochjama tšëngaftanga chë nyetsca tescama yomna tšabe vida chašmotsebomnama.

²²Chë inÿe ora aíñe y inÿe ora ndoñe Jesucristbeñe ošbuáchiyana bomnënga šmochtsalastemana. ²³Bëtscá šmochtsama, báseftanga chë uabouana castigüentšana atsebácanënga chamotsemnana, mo chënga íñeshentšana cuaftëbuacancá. Inÿengbiama chacmotsangmena, pero cuedado šmochtsebomna, chënga chašmojtsejabuachana ora, ntšamo chënga bacna soyënga tmojtsamcá ndoñe chašmondétsamama; y chë bacna soyënga ntšamo chënga tmojtsiyena jtsamëse, chëngbe bacna juabnéngaca, nÿa tondaye chacmondétsogusetana.

Judas, Bëngbe Bëtsá jëtschuayama

^{24–25}Chë nÿe canÿe Bëngbe Bëtsá, bëngbe Atsebacayá obenana endbomna tšëngaftanga jtsanÿenama, chca, tondaye chaondëma tšëngaftanga Jesucristbeñe ošbuáchiyana chašmotsajbanama; y obenana endbomna tšëngaftanga ainaniñe ndocna bacna soye ndbomnënga chašmotsemnana y puerte oyejuayënga cachabe delante chašmotsemnana, cha canÿe puerte uamaná y obená bétsemnana chaojinÿanjé ora. Bëngbe Utabná Jesucristbeyeca, nyetscanga Bëngbe Bëtsá chamotsatschuaná; y cha puerte bëtsá chauesomñe, nyets obenana bomná y nyets mando bomná, nyets tempscana, tempo, mora y nyetsca tescama. Chca chaotsemna.

Apocalipsis

Ndayá quem librésañe yomna

1 Quemuentse entsábemana ndayá Bëngbe Bëtsá Jesucristbioye tbojaninñinyé, chë Bëngbe Bëtsabe oservénënga cha cháuinñanyëma, ndayá jopásama yojtsobecuama chënga chamotsetatsëmbuama. Jesucristo chama chabe ángel tbojichmó, chë soyëngama atše, Juan, chë Jesucristbe oservenábioye chašuinñinyëma. ²Y atše sënjayana lempe ntšamo ndegombre yomncá lempe chë tijinje soyëngama, chë Bëngbe Bëtsabe buayenana soyëngama y chë Jesucristo šonjaniyana ndegombre bëtsemna soyëngama.

³Oyejuayá nda tojtsalía, y oyejuayënga ndëmuanñyënga botamana tmojtsuenana quem yochjopása soyëngama, chë muentse entsabemancá ndegombre tmojóyeunanga, er chca jopasa tempo entsobeco.

Asia luaroca ošbuachiyëngcá enefjuanënga jacheuayama

⁴Atše Juan, sentsabianná chë Asia luaroca canýsëftañe ošbuachiyëngcá enefjuanëngbiama. Atše, Bëngbe Bëtsá sëntseimpadana, tsabe bendicionënga chábicana chašmosháchiñe y ainaniñe puerte tsabe ebionana chašmotsebomna, Bëngbe Bëtsábentšana, chë canýsëfta espíritëngbentšana y Jesucristbentšana. Bëngbe Bëtsá, chë mora endmëná, enjamná y sempre echantsemná; chë canýsëfta espíritënga, chabe uamana puesto natsanoica mondmëñënga; ⁵⁻⁶y Jesucristo, chë ntšamo Bëngbe Bëtsabiama yotatsëmbcá ndegombre oyebuambnayá, chë natsaná ndabiama Bëngbe Bëtsá tojama obanënguentšana cháuatayenama, y nyetsca quem luarentša mandadëngbe amëndayá.

Cristo šondábabuanñeshana y bëngbe bacna soyënguentšana šojatsebacá, cha tonjanóbanayeca, chabe buiñe juabuáshanëse. Cha tojama bënga chamotsobena cháftaca jtsemándayana y uámanënga chamotsemnana, y Bëngbe Bëtsá chabe Taitá mo bachnangcá chamotseservënama. ¡Nyetscanga nyets tempo chamotsinñanyá Cristo puerte bëtšá y uamaná bëtsemnana y obenana nyetsca tescama yobomnana! Chca chaotsemna.

⁷Mouenënga. Cristo jantšetëshënguñe echanjésabo.

Chábioye nyetscanga mochanjinje, chë tmonjancrucificágnaca; y quem luarentša nyetsca entsanga puerte ngmëñaca mochántsemna y mochantsošachna chábeyeca. Ndegombre, chca chaotsemna.

⁸“Atše sëndmëna chë nyetsca soyënga bojatšayá y pochocayá ca,” Bëngbe Utabná Bëngbe Bëtsá tojayana. Cha chë sempre endmëná, enjamná, nyets tempo echantsemná, chë nyets obenana bomná.

Juan mo otjenayoquëcá Cristbiama tojáninje

⁹Atše Juan, Jesucristbeyeca tsëngaftangbe catšata, cháftaca cánýiñe mo canýacá bëtsemnana, cach tsëngaftangcá sëndëpadecena, tsëngaftangcá chanjéftsashjache Bëngbe Bëtsabe amëndayoye jamashënguama, y tsëngaftangcá Bëngbe Bëtsabeñe jtsobátmanëse, uantado sëndmëna chë padecena soyënguñe. Bëngbe Bëtsabe palabra sënjánabuayiynama y Jesusbiama ntšamo ndegombre endmëncá sënjanóyëbuambnana, atše šmonjetsanétsëna mar béjayoca canye fshantsentše, Patmos ca uabáinoca. ¹⁰Y tonjanopasá, canye tmengo, chë ošbuáchiyënga Bëngbe Utabnábioye cánýiñe jëtschuayama

te, atše sēnjanoquedá chē Uámana Espíritbeyeca corente mandaná, mo otjenayoquécá soyēnga sēnjétsonyaye, y atšbe stētsoica canye jabuache oyebuambnayana sēnjanuena, mo canye trompetéjua cuafjuajatétcá; ¹¹mēntšá šontsanatsētná: “Canye libréšañe mábema lempe ntšamo contsonyácá y cochjuíchmua chē Asia luaroca canyšeftañe ošbuachiyēngcá enefjuanéngbioye: Efeso, Esmirna, Pérgamo, Tiatira, Sardis, Filadelfia y Laodiceoquēngbioye ca.”

¹²Sēnjanobuértana jinýama nda chca šojtsanatsētná, y chca sēnjanma ora, sēnjáninye canyšefta castellano candelerešēnga; ¹³y chē canyšefta castellano candelerešēnguiñe tsēntsaca canya sēnjáninye, mo entšacá inýná, canye bēn entšayá uichētjoná, y cochóntscoca canye tēntša castellano uasnanéjaca. ¹⁴Chabe stjēnashana uafjantsésha, puerta uafjantsésha mo canye oveshabe boboshēshacá, y chabe fšnēbenga mo iñeshcá enjétsinýna. ¹⁵Chabe shecuatšēnga enjétsēbuashinýinýana mo bronscá, ndaybé natsana iñējana tcojuchnēngo enabé chaotsemnana y chentšana entšéjuaca becá tcojajojó corente chaotsebuashinýinýanama; y chabe oyebuambnayana jabuache enjétsenana mo bētscá bėjaye cuaftsebuachquēc-jancá. ¹⁶Chabe catšbioica cucuatšīñe enjétsatbēna canyšefta estrellēnga, y chabe uayoicana enjétsobocana canye espadēja, nyets utoicajana puerta efsánēja, y chabe jubiá tša enjétsēbuashinýinýana, mo chē shinýe corente, lempe ntšamo tojobenacá tojtsebuashinýinýana orcá.

¹⁷Cha sēnjáninye ora, chabe shecuatšēntše mo obanacá sēnjánshajaye. Pero cha, chabe catšbioica cucuatše átšbeñe jajájuase, šonjaniyana: “Ndoñe matauatjana; atše sēndmēna chē nyetsca

soyēnga bojatsayá y pochocayá, ¹⁸chē sempre vida bomná. Atše obaná sēnjamna, pero mora nyetsca tescama vida sēntsebomna. Atše obenana sēndbomna, y chē obenánaca entšángbioye ndoñe quenátamna infernoca nyetsca tescama castigánēnga jtsemnana, mo nyets tempo cuaftsobancá. ¹⁹Ntšamo tconjinýcá mábema, chē quem tempo endmēna soyēngama y chē más chcoye echántsemna soyēngama. ²⁰Mēntšá endmēna chē atšbe catšbioica cucuatšīñe tconjinýe canyšefta estrellēngaca y chē canyšefta castellano candelerešēngaca: chē canyšefta estrellēnga montsinýinýná chē canyšeftañe ošbuachiyēngcá enefjuanéngbeñe chamotsemándama uámana ichmónēnga, y chē canyšefta candelerešēngna chē canyšeftañe osbuachiyēngcá enefjuanēnga.”

Efesoca ošbuachiyēngcá enefjuanēnga jábuayenama

2 Mēntšánaca cha šonjaniyana: “Mēntšá mabobema chē Efesoca ošbuachiyēngcá enefjuanéngbeñe chaotsemándama uámana ichmonábioye:

Mēntšá entsichamo chē chabe catšbioica cucuatšīñe canyšefta estrellēnga entsatbēná y chē canyšefta castellano candelerešēnga luarējana entsaná: ²Atše lempe sēndétatšēmbo ntšamo tšēngaftanga šmoyenana; atše corente sēndétatšēmbo tšēngaftanga jabuache šmotrabájama, y ntšamo tšēngaftanga Bēngbe Bētsábeñe jtsobátmanēse šmnétsauantana padecena soyēnguiñe šmojtsemna ora. Y átšnaca sēndétatšēmbo tšēngaftanga ndoñe šmotsobena jtsēuantánana ntšamo bacna entšanga tmojtšamcá. Atšnaca sēndétatšēmbo tšēngaftanga yejuana šmojarrepará y becá šmojenojuabó jinýama chē

Jesucristbe ichmónënga imomna ca tmojtsichamëngbiama; pero ndegombre chënga ndoñe chca quemátmëna; y chca šmójamayeca, tšëngaftanga mora šmontsetátšëmbo chënga bošterënga imomnama. ³ Padecena soyënguine becá šmojoboyá y chca ora, Bëngbe Bëtsábeñe šmobátmana. Chë soyënguine šmojasufrí, tšëngaftanga atše šmoservënama; y tšëngaftanga chca šmondëserveda, ainaniñe añemo jtsebomnama ntjajbanacá.

⁴ Pero canye soye séntsebomna tšëngaftangbe contra jayanama: Tšëngaftanga mora ya ndoñe cachca bonshánana quešmátsbomna ni atšbiama ni nyetsca entšangbiama, ntšamo átšbeñe jtsošbuáchiyama šmonjanbojatsé orcá. ⁵ Menójuabonga ntšamo chë tempo šmonjánbobonshanama, juabnayana motrocanga y cachiñe šmochtsama ntšamo chë átšbeñe jtsošbuáchiyama šmonjanbojatsé orcá. Ndoñe chcase, atše tšëngaftangbioye chanjá jabuache jetsacastígama, jtsapochócantscuana, mo chë tšëngaftangbe cuenta entsemna candelerëse chabe puestentsana cuaftsejuanacá. Chca chanjama, tšëngaftanga juabnayana ndoñe chašmonjatrocasa. ⁶ Pero tšëngaftangbe pavor quem tšabe soye šmontsebomna: Tšëngaftanga šmonduábotena lempe ntšamo chë nicolaíta ca uabaina entšanga tmojtsamcá, ndayá átšnaca sënduábotena.

⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá. Chë padecena soyënguentsana

tšabá chamojábocana mo ayënjayanayëngcá, chëngbiama chanjama chë nyetsca tescama yomna tšabe vida chamotsebomnama, y chca chënga mochántsemna mo chë nyetsca tescama yomna tšabe vida jtsebomnama betiyeshentšana cuaftsesacá, chë entšanga sempre oyejuayënga mondbetsemnoca ca” —cha šonjanianya.

Esmirnoca ošbuachiyëngcá enefjuanënga jábuayenama

⁸ Mëntšánaca cha šonjanianya: “Esmirna bëts pueblentše osbuachiyëngcá enefjuanëngbeñe chaotsemándama uámána ichmonábioynaca mëntšá mabobema:

Mëntšá entsichamo chë nyetsca soyënga bojatsáyá y pochocayá, chë tonjanobaná y ndabiamana Bëngbe Bëtsá tonjama cháuatayenama: ⁹ Atše sëndétatšëmbo tšëngaftanga tša jabuache šmojasufrima y ndbomnjëmënga šmomnama, pero ndegombre Bëngbe Bëtsábocana bëtsacá tšabe soyënga šmondëtsóbomñe. Y sëndétatšëmbo tša bacá tšëngaftangbiama mondoyebuambná chë judiënga imomna ca ichámënga, pero ndoñe ntsamana mo chë Bëngbe Bëtsabe bocacana entšangcá; chca, chënga mondmëna mo Satanasbe entšangcá, nye chábioye jtseservënese y jtsatschuanayëse.

¹⁰ Ndoñe matauatjëngana chë ndoñe yapa bën y tšëngaftanga šmochjasufrima, er Satanas echanjama tšëngaftanguentšënga báseftanga cárceloye ínÿyënga chacmëtámiamana, jinÿyama ntsachetšá Crístbeñe ošbuáchiyana šmobomnama, padecena soyënguine šmojtsemna ora; y entsamna baseftayté

jasúfriana. Sempre bëtscá ošbuáchiyana, y ainaniñe bëtš añemo šmochtsebmna, masque jobanámnaca chacmotsamna, Cristbiana trabájaye causa. Chca chašmojtsamëse, atše chanjama tšëngaftanga chašmotsebmnama mo canye uacanana soycá, chë nyetsca tescama yomna tšabe vida.

¹¹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tšabá chamojábocana mo ayëñjanayëngcá, ndegombre chënga ndoñe queochátamna játauatjana nyetsca tescama castigánënga jatsmënana ca” —cha šonjaniyana.

Pérgamoca ošbuachiyëngcá enefjuanënga jábuayenama

¹² Mëntšánaca cha šonjaniyana: “Pérgamo bëtš pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë nyets utoicajana puerte eřšana espadéja entsatbëná: ¹³ Atše sëndétatšëmbo ntšamo yomna tšëngaftangbe oyentëse, canye luare ndayentše Satanás entšángbioye puerte iuaménda. Masque chca, tšëngaftanga sempre nye atše šmondéteservena, y ndocna te chešmáisayana átšbeñe ndoñe šmondošbuaché ca, ni mo Antipas, chë canye nyets tempo atšbe ustoná y atšbiana ndegombre oyebuambnayá, ínÿenga tmonjanóba ora. Y lempe chca tojopasá tšëngaftangbe pueblentše, ndayentše Satanás bëtscá entsana.

¹⁴ Pero básefta soyënga sëntsebmna tšëngaftangbe contra jayanama: Chentše tšëngaftangbeñe báseftanga montsemna, soyënga montsabatambá ntšamo bayté entsemna Balaam enjanabu-atambacá. Cha rey Balácbioye tbojanbuayená ntšamo jamana Israeloca entšángbioye jáingñama, chënga chë ntšamo ndoñe tšabá yomncá chamotsamama; y chca, Balac tojanma chë ínÿenga diosënga vojamna ca imojanajuabná soyënga jadórama uátšëmbona saná chë Israeloca entšanga chamosama, y shembása o boyabásaftaca bacna soyënga chamotsamama. ¹⁵ Chëntšnaca ínÿenga montsemna, y chëngna chë nicolaitëngbe buatëmbana soyënguiñe mondošbuaché, y chca buatëmbana soyënga ndoñe tšabá quenátsmëna. ¹⁶ Šmochtse-juabnaye ntšamo šmojtsamama, chëngbioye tšëngaftangbeñe šmojtsëuantana ora, y chca jtsamana šmochjajbaná; er ndoñese, atše betscó tšëngaftangbioye chanjá, y chë chca buatëmbana soyënguiñe ošbuáchiyana ndoñe tmonjajbanángaftaca chanjéntsja chë atšbe uayoicana endóbocana espadéjaca.

¹⁷ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtnacá. Chë padecena soyënguentsana tšabá chamojábocana mo ayëñjanayëngcá, chëngbioye maná chanjátšataye chamosama, chë celoca tandëse, ndayá Bëngbe Bëtšá tempo entšángbioye ndoñe tonjinÿanjé; y canye fjantse ndëtšëtema chanjáyentšbuachiye, chënga oyejuayënga šmojábemama.

Chiñe canye tsēm uabaina echantsábemana; ndocná chē uabaina quenátabuatma, ndayá n̄ye chē chamojóyēngacñēnga ca” —cha šonjaniana.

**Tiatiroca ošbuachiyēngá
enefjuanēnga jábuayenama**

¹⁸ Mēntśánaca cha šonjaniana: “Tiatira bēts puebloca ošbuachiyēngá enefjuanēngbeñe chaotsemándama uámana ichmonábioynaca mēntśá mabobema:

Mēntśá entsichamo Bēngbe Bētsabe Uaquiñá, chē mo inēshcá uafšná y mo entšējuaca jojona puerte chaotsebuashin̄yīyanama bronze shecuatšēnga bomná: ¹⁹ Atše sēndétatšēmbo ntšamo tšēngaftanga šmoyenama; sēndétatšēmbo ntsachetśá tšēngaftanga Bēngbe Bētsábioye y n̄yetscángbioye šmababuán̄yēshanama, ntšamo tšēngaftanga Bēngbe Bētsábeñe puerte šmošbuáchema, ntšamo chábioye šmoservénama, ntšamo tšēngaftanga ín̄yēnga šmojuabuache y ntšamo Bēngbe Bētsábeñe jtsobátmanēse becá šmojoboyá padecena soyēnguiñe; y sēntsetatšēmbo mora más bētscá tšabe soyēnga šmojtsama, ntšamo tšēngaftanga átšbeñe jtsošbuáchiyama šmonjanbojatšé orscama.

²⁰ Pero canye soye sēntsebozna tšēngaftangbe contra jayanama: Tšēngaftangbeñe šmondēuantana chē shembása, mo chē bacna reiná Jezabelcá endmēnábioye. Chē shembása entsichamo Bēngbe Bētsabe juabna oyebuambnayá canmēna ca; pero chabe buatēmbana soyēngaca atšbe oservēngēnga entsaīngñā, shembása o boyabásaftaca bacna soyēnga

chēnga chamotsamama, y chē ín̄yēnga diosēnga yojamna ca imojanajuabná soyēnga jadórana uátšēmbona saná chamosama. ²¹ Cha sēn̄jueaná atše chjacastíga ca, chca juabnayana ndoñe tonjatrocace, y canye boyabásaftaca bacna soyēnga amana ndoñe tontsajbanase. Cha jacastígama batśá sēn̄jobatma, nderado chca amana nanjatróca, pero ndoñe chenátšbošena. ²² Mora atše chanjama bēts šocana cha chaboshachama, y chē cháftaca bacna soye tmojamēnga, juabnayana ndoñe tmonjatrocá y chca jtsamana ndoñe tmontsajbanase, chēngbiamā chanjama puerte chamosufrima; ²³ y chē shembásabe básēnga chantsēbaye. Chca, n̄yetsquénache ošbuachiyēngá enefjuanēnga mochántsetatšēmbo, ndayá entšanga juabniñe y ainaniñe tmojuabnacá atše tsuábuatmama; y cada ona tšēngaftanguentśá, chca bacna soye cháftaca tojamá, ntšamo ibojtsomerecencá chanjacastíga.

²⁴ Pero tšēngaftangbentše, ín̄yēnga Tiatira pueblentše šmojtsemnēnga, chē shembásabe buatēmbana soyēnguiñe ndoñe šmontsošbuachēnga, y chē ín̄yēnga imuábuatma Satanasbe soyēnga, chē ndoñe paselo josértama soyēnga ndoñe šmonjuabuátmanēnga, tšēngaftanga ndoñe quebochatamēnda in̄ye más toto soye chašmotsamama. ²⁵ Pero n̄ye sempre šmochtsama ntšamo mora šmojtsamcá, y šmochtsiyena ntšamo chē Bēngbe Bētsábiocana šmojóyēngacñe soyēnga yomncá, atše quem luaroye jesabámēntscuana.

²⁶ Chë padecena soyënguentshana tšabá chamojábocana mo ayëñjanayëngcá y ntšamo atše sëndëmandacá chamojtsamënga, chë quem luarentše ya ndoñe más vida jesebomnámëntscuana, atšbe obenana chanjátšataye nyëtsca mándayëngbentša entsángbeñe jtsemándayama, ²⁷ ntšamo atšbe Taitá chabe obenana šojatšetacá; y chënga entsángbioye puerte obenánaca mochántsamëndaye, mo canye hierro varëfjaquécá, y chëngbe contra chamojtsemnéngbioye mochántsapochocaye, mo nye matbajënga tmojtsëtsjanjñacá. ²⁸ Y chë jabínynama ora bínynaye estréllnaca chanjátšataye.

²⁹ Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsësnacá ca” —cha šonjaniana.

Sardisoca ošbuachiyëngcá enefjuanënga jábuayenama

3 Mëntšánaca cha šonjaniana: “Sardis bëts pueblentše ošbuachiyëngcá enefjuanëngbeñe chaotsemándama uámana ichmonábioynaca mëntšá mabobema:

Mëntšá entsichamo chë Bëngbe Bëtsabe canysëfta espíritënga y chë canysëfta estrellënga bomná: Atše lempe sëndétatšëmbo ntšamo tšëngaftanga šmoyenama; atše sëndétatšëmbo tšëngaftangbiana ínÿenga tša jtsichámuana Bëngbe Bëtsá jasérviana bëtscá šmojtsama ca, pero ndegombre tšëngaftanga nye batšatema šmontsama, y chca, chabiana mo obanëngcá šmondmëna.

² Botamana šmochjenóbobonÿe y más šmochtsama chë Bëngbe

Bëtsá jasérviana cabá šmondama básefta soyënga. Ndoñe yapa quenatájamna chë tšabe soyëgnaca chašmotsajbanama, er atše sënjinÿe chë Bëngbe Bëtsábioye jasérviana ntšamo jtsamëse šmoyencá, atšbe Bëtsabiana ndoñe yapa tšabá quenátšëmna. ³ Asna, šmochtsenójuabnaye ndayá Bëngbe Bëtsábioyana šmojóyëngacñama, y chabiana šmojouena soyënguñinaca. Ntšamo chë soyënga yomncá šmochtsiyena, juabnayana šmochjatróca y šmochjöntša bëtscá jtsamana Bëngbe Bëtsá jasérviana. Ndoñe tšabá cach tšëngaftanga chašmonjenójuabose y juabnayana ndoñe chašmonjatrocace, nye ndeolpe chanjá tšëngaftangbioye, mo canye atbëbanacá, chabiana ndocná tontsejuabná ora, y ndegombre tšëngaftanga ndoñe quešmochátstatšëmbo mocna ora atše tšëngaftangbioye chjama.

⁴ Masque chca, Sardisentše tšëngaftangbeñe básefta entsanga mondmëna, chënga ndoñe chematajbaná oyenana tšabe soyënga jtsamëse, bacna soyënga játamama. Chëngna átšëftaca mochántsjana uafjantsëjuangá uichëtjonënga, chënga chca mercedo montsebuajónayeca.

⁵ Chë padecena soyënguentshana tšabá chamojábocana mo ayëñjanayëngcá, chca uafjantsëjuangá uichëtjonënga mochántsemna, y chëngbe uabaina ndoñe quichatsjuána chë tšabe vida mochónÿenëngbe uabaina enduábemana libréšëntsana, ndayá atše, Bëngbe Bëtsabe delante y chabe angelëngbe delante, chënga atšbe entsanga imomna ca chanjayana.

⁶Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsëtsëtsnacá ca” —cha šonjaniana.

Filadelfioca ošbuachiyëngcá enefjuanënga jábuayenama

⁷Mëntšánaca cha šonjaniana: “Filadelfia bëts puebloca osbuachiyëngcá enefjuanëngbeñe chaotsemándama uámana ichmonábionayaca mëntšá mabobema:

Mëntšá entsichamo chë uamaná y ndegombre oyebuambnayá, chë jtsemándayama puerte obenana bomná, ntšamo Rey David enjanbomncá, chë nda ndayá chaotsemnama tojamandá ora, ndocná ntsoobenana jamama chca ndoñe chaondétsemnama, y ndayá ndoñe chaondétsemnama tojamandá ora, ndocná ntsoobenana jamama aiñe chaotsemnama:

⁸Atše lempe sëndétatšëmbo ntšamo tšëngaftanga šmoyenama. Minyënga, atše sënjama tšëngaftanga bëtscá tšabe soyënga chašmotsebomnama, y ndocná quenátobena jamama chca ndoñe chaondétsemnama; y chca entsemna mo atše tšëngaftangbiama canyë bësáša cuafjatéfcá, y chëša jtatámiaa ndocná quenátobena. Atše sëndétatšëmbo tšëngaftanga batsatema obenana šmobomnama, pero šmojouena ntšamo jtsamama tcbonjauyancá, y ndocna te chešmátayana atšbe entšanga ndoñe šmondmëna ca. ⁹Atše chanjama, chë mo Satanasbe entšangcá imomnënga, nyë chábioye jtseservënëse y jtsatschuanayëse, chë judiënga imomna ca ichámënga, pero chë Bëngbe Bëtsabe bocacana

entšangcá ndámënga y bosterënga, chënga tšëngaftangbioye chamua y tšëngaftangbe delante chamoshamentšé, tšëngaftangbiama respeto jinyaníyama, y chca, chënga chamotsetátšëmbo atše sempre cbababuányeshanama. ¹⁰Atše tcbonjanaméndá, Bëngbe Bëtsábeñe jtsobátmanëse, lempe chašmotsoboyá padecena soyënguñe, y tšëngaftanga chca šmonjama. Chíyeca, atše puerte tšabá cbochántsanýena, chë quem luarentše oyenënga nyetscanga jasúfriama y padecena soyënguñe jtsemnama chaojtsemna ora, Bëngbe Bëtsábeñe aiñe o ndoñe mondošbuáchema jinyaníyama.

¹¹Cachiñe quem luaroye betsco chanjésabo. Sempre šmochtsama ntšamo mora šmondamcá, y Bëngbe Bëtsábíocana šmojóyëngacñe soyënga šmochtsinýena; chca ndocná chaondobená ndayá jamana, y chë sóyeca chaoma tšëngaftanga ndoñe chašmondóyëngacñe ndayá Bëngbe Bëtsá chë chábioye jtseservënema ndoñe tmontsajbanángbioye yochjatsataycá, chëngbe uacanana soye.

¹²Chë padecena soyënguentšana tšabá chamojábocana mo ayëñjanayëngcá, chëngbiama atše chanjama sempre Bëngbe Bëtsabe delante chamuesomñama, y chca, chënga mochántsemna mo chë Bëngbe Bëtsabe bëts yebnentša ucuatjoniñcá; ndocna te Bëngbe Bëtsábentšana quemocháisebocana; y chëngbeñe atšbe Bëtsabe uabaina chanjuábema y atšbe Bëtsabe bëts pueblentša uabaina, chë tsëm pueblo Jerusalén, chë celocana yobá pueblo, Bëngbe Bëtsábíocana. Y chëngbeñnaca chanjuábema atšbe tsëm uabaina. Lempe

chca chanjama jinñanñiyama
chënga Bëngbe Bëtsábenga
mochtsemnama.

¹³ Chë jouenama tmojtsobenënga,
chamouena ndayá Espíritu chë
ndayenache ošbuachiyëngcá
enefjuanënga yojsëtsëtsnacá ca”
—cha šonjaniyana.

Laodiceoca ošbuachiyëngcá enefjuanënga jábuayenama

¹⁴ Mëntšánaca cha šonjaniyana:
“Laodicea bëts puebloca os-
buachiyëngcá enefjuanëngbeñe
chaotsemándama uámana
ichmonábioynaca mëntšá mabobema:

Mëntšá entsichamo chë sempre
Ndegombrá endmëná, chë
Bëngbe Bëtsabe soyëngama
ndegombre oyebuambnayá, y chë
ndábeyeca Bëngbe Bëtsá quem
luare tojanmá: ¹⁵ Atše lempe
sëndétatsëmbo ntšamo šmoyenama.
Atše sëntsetatsëmbo tšëngaftanga
ndoñe yapa šmontseboše Bëngbe
Bëtsá jasérviana, pero Bëngbe
Bëtsabe buayenana soyënga
ndoñe lempe šmontsabeté. Y
chca, nye batšatema šmojtseboše
Bëngbe Bëtsá jasérviana; chca,
tšëngaftanga šmontsemna mo
tibiye buyeshcá, ni ntšniñiye,
ni shécbaniye. ¡Atše sëntseboše
tšëngaftanga chašmotsemna mo
ntšniñiye o shécbaniye buyeshcá,
tšábá jtsamëse o tondaye! ¹⁶ Chca,
tšëngaftanga tibiye buyeshcá
šmondmëna, y ndoñe quešmátsboše
bëtscá jamama, pero Bëngbe
Bëtsabe soyënga ndoñe lempe
šmontsabeté. Chíyeca atše
sëntsejuabná jtsébatena, mo nda
tibiye búyeshe tojëtšbuashëtjca,
chcaye ndoñe bondogustana causa.

¹⁷ Er tšëngaftanga jtsichámuana
bomnënga šmomna ca, puerte

tšábá šmojábocana y tondaye
cmontsabuáshebena ca, pero
ndoñe quešmátsatsëmbo
Bëngbe Bëtsabe soyënga bëtscá
cmojtsabuáshebena. Chca,
tšëngaftanga šmontsemna nña
ndoñe tšábá, ínñyenga ngmënana
chacmotsabamna, mo ndbomñe-
jemëngcá, mo jtanëngcá, Bëngbe
Bëtsabe soyëngama ntosertancá,
y mo enašëngcá, bëtscá Bëngbe
Bëtsabe soyënga ntsebomncá.
¹⁸ Chíyeca cbaubayená, átšbentšana
chašmuatsjinñe chë Bëngbe Bëtsabe
soyënga y uámana soyënga, mo
chë ena castellano jabemama,
inñejana fjëchnënguëse castellano
átšbioye šmojtsontšabuamnañcá.
Tšëngaftanga Bëngbe Bëtsabe
delante mo enašëngcá šmondmëna,
er cha endonñá chë ba bacna
soyënga ntšamo tšëngaftanga
šmojtsamcá. Šmochjaleséncia
atše chacbéjabuache tšëngaftanga
Bëngbe Bëtsabe bominiñe
tšábenga chašmotsemnama, mo
juichëtjuama uafjantse entšayá
átšbioye šmojtsantšabuamnañcá.
Chca šmochjama, tšëngaftanga
Bëngbe Bëtsabe delante ndoñe chaš-
mondëtsëuatjama. Šmochjaleséncia
atše chacbéjabuache tšëngaftanga
Bëngbe Bëtsabe soyëngama
chacmósertama, mo tšëngaftanga
bominye šocanama shnana
átšbioye šmojtsontšabuamnañcá.
Chca šmochjama, Bëngbe
Bëtsabe soyëngama puerte tšábá
chacmósertama.

¹⁹ Atše chë sëndábabuanñe-
shanënga sëndbaucácana y
sëndbábuayenaye. Chíyeca, lempe
ntšamo šmojobenacá šmochtsama
Bëngbe Bëtsá jasérviana, y
juabnayana šmochjatróca, y
nyëts tempo puerte šmochtseboše

Bëngbe Bëtsá jtseservénana.
 20 Nderado canye tšabe amigo yebnoye tojabo y tojachembo, tšëngaftanga šmojouenëse y bësáša šmojebiatëfjese, cha jamashënguana, y cányiñe cháftaca joyejuayana y jasana. Cachcá, atše entsanga sentsachembuana chašmoleseñciá chëngbe ainaniñe jtsiyenama. Nderado nda šojóyeunase, atše chanjámashëngo chabe ainaniñe jtsiyenama, y nyets tempo cháftaca cányiñe mo canyáca chanjéftsemna.

21 Chë padecena soyënguentsana tšabá chamojábocana mo ayëñjanayëngcá, atše chanjama chënga puerta bëtšétsanga chamotsemnama ntšamo atše sëndmëncá, y átšëftaca chamótbemama, atšbe uamana tbemanentšë jtsemándayama, ntšamo atše atšbe uayayëngbioye sënjayëñjanacá, y atšbe Taitáftaca chabe uamana tbemanentšë tijotbemcá.

22 Chë jouenama tmojtsobenënga, chamouena ndayá Espíritu chë ndayenache ošbuachiyëngcá enefjuanënga yojtsétsësnacá” —cha šonjanianana.

Chë Ainënga Bëngbe Utabnabe uamana tbemanentšä natsana imojtsechuanaye

4 Chentšana mo otjenayoquëcá sënjäninye. Sënjanrepará y sënjäninye celoca canye bësáša enjétsatëfjna, y chë natsana sënjanuena oyebuambnayana, chë enjamna mo canye trompetëfjua cuafjuajatëtcá, mëñtsá šonjétsatsaye: “Moye másëngo, atše cbochanjinñinñiye ntšamo más chcoye yochjopasacá ca.”

2 Cachora, chë Uamana Espíritbeyeca, mo atšbe ainana celoca cuaftsemncá

atše sënjanoquedá, y sënjäninye celoca enjétssemna canye reybe uamana puesto, y chentšë canya enjétssetbemana.
 3 Chentšë enjétssetbemaná enjamna, puerta tëshinñná mo jaspe ndëtšbecá, puerta buanganá mo cornalina ndëtšbecá, y chë uamana puesto shëconana canye tsëfcuacuato enjamna, y enjétssebuashinñinñana mo canye esmeralda ndëtšbecá.
 4 Chë reybe uamana puesto juachajana, inye uta bnëtsana y canta puesto sënjäninye, y chiñe uta bnëtsana y canta bëtšëjëmënga amëndayënga monjétssetbiamana, uafjantsëjuangá uichëtjonënga, y castellano coronëshangá monjétsabestšajona.
 5 Chë uamana puententšana enjétsobocana tcuinjyëjënga, becá shauenanana y juesasanana; y chë uamana tbemaniñentšä natsanoicna, canyšëfta uajuinñanëshä enjétsangbototjuana; chë uajuinñanëshangá entsayana chë Bëngbe Bëtsabe canyšëfta espíritënga.
 6 Y chë uamana puententšä natsanoica enjétssemna mo canye mar bejaycá, tëshínñniye mo canye cristal ca uabaina ndëtšbecá.

Chë luariñe tsëntsaca, chë uamana puesto enjétssemnentšë y chë shëconánëjana monjétssemna canta Ainënga, nyëtšañe fšñëbëngaca, natsanoica y stëtšoica.
 7 Chë natsana Ainá enjamna mo canye leoncá, chë inye Ainá mo canye torošcá, chë inye Ainá enjánbomna mo canye entšabe jubiácá, y chë inye Ainá mo canye águila tojtsongüëfjnacá.
 8 Chë canta Ainënga, cada ona chñënguana juatëngmiáša enjanábomna, y tsoicajana y shjoicajana nyëtšañe fšñëbënga monjánbomna. Y chënga nyets tempo, ntjochnacá mëñtsá monjánichamo:

¡Uamaná, Uamaná, Uamaná, Bëngbe Utabná,
 Bëngbe Bëtsá nyets obenana bomná,

nda enjamná, endmēná y sempre echan-
jëftsemná ca!

⁹⁻¹⁰ Chca chē Ainēnga Bēngbe Bētsá bētsá tmontanchuá, Bēngbe Bētsá chē uámana puestentše tbemaná, chē n̄yets tempo y n̄yetsca tescama oyená. Chēnga puerte respeto chabiama monjésebomna y bētsá tmontanchuá. Cada ora chēnga chca tmonjanma ora, chē uta bnētsana y canta bētsējēmēnga amēndayēnga, chē uámana puestentše tbemanabe shecuatšentše joshamentšiyana y chábioye jtsatschuanayana, chē coronēshangá chē natsanoica jutsánana, y mēntšá jtsichámuana:

¹¹ Aca n̄yets merecido condētsobuájōne, Bēngbe Utabná y Bēngbe Bētsá, entšanga chamotsin̄yan̄nama, aca puerte bētsá comnama, y chamotsichamo aca n̄yets respeto buajoná comna, y n̄yets obenana bomná comna ca, er aca n̄yetsca soyēnga tcojama; aca icnabóseyeca chē soyēnga yojtsemna y aca chca tcojanma ca.

Chē uabemana uándmanana tsbuanácha y chē Oveshatema

5 Chē uámana puestentše enjetsetbemanabe catšbioica cucuatšīne can̄ye uándmanana tsbuanáchanaca sēnjánin̄ye, y n̄yetsāne enjétsabemana tsoicajana y shjoicajana, y can̄ysēfta tsengájaše sellēngaca enjétsajandmanana. ² Y can̄ye ángel puerte obenana bomná sēnjánin̄ye, y cha mēntšá enjétsayebuache: “¿Nda merecido yobuájona, quem uándmanana tsbuanácha jutéfjonama y chē sellēnga jutsécama ca?”

³ Pero, ni celoca, ni quem luarentše, ni quem luarentša jashenoye, ndocná quenjatsmēna obenánaca chē uándmanana tsbuanácha jutéfjonama, ni juin̄yama. ⁴ Y atše puerte sēnjánenobošachna, er ndocná ntjón̄ynana

merecido buajoná chē uándmanana tsbuanácha chautéfjonama, ni chauin̄yama. ⁵ Pero can̄ya chē bētsējēmēnguentšá šonjan̄iyana: “Ndoñe más matenóbošachena; mouena, chē Judabe pamillentsá, León ca uabobainá, mando y obenana bētsēbomnama, chē rey Davidbentsana Entšá, tonjayējaná; cha entsobena chē uándmanana tsbuanácha jutéfjonama, y chē can̄ysēfta sellēnga jutsécama ca.”

⁶ Chora sēnjánin̄ye, chē uámana puesto y chē canta Ainēnga y chē bētsējēmēngbe tsēntsaca, can̄ye Oveshatema tsanana, pero enjétsin̄yna mo cuaftsobacá. Chē Oveshatema enjánbomna can̄ysēfta tsētjonēse y can̄ysēfta fšnēbé. Chē can̄ysēfta fšnēbé monjanin̄yin̄ná chē Bēngbe Bētsabe can̄ysēfta espíritēnga, chē Bēngbe Bētsá n̄yets quem luarējana tojánichamonga. ⁷ Chē Oveshatema tonjanobeconá y chē uándmanana tsbuanácha tonjanaca, chē uámana puestentše tbemanabe catsbioica cucuatšentsana; ⁸ y chabe cucuatšīne tonjanaca ora, chē canta Ainēnga y chē uta bnētsana y canta bētsējēmēnga amēndayēnga chē Oveshatembe shecuatšentše tmonjanoshamentšé. N̄yetscanga monjétsētbēna arpagá y castellano cobbenga jútjena inciensiyecca; chē cobbenga inciensiyecca enjamna chē Bēngbe Bētsabe entšanga tmojayana palabrénga, cháftaca jencuéntama ora.

⁹ Y quem tsēm canto montsancántaye: Aca merecido condētsobuájōne, chē uándmanana tsbuanácha chacuacama y chē sellēnga chacutsécama; er acbe buiñe juabuáshanese tconjanóbana, y chca enjamna mo crocénana cuafjētsajocá, Bēngbe Bētsabiama chamotsemnama, entšanga n̄yetsca cachca buiñe bomnēnguentšana, n̄yetsca biyana bomnēnguentšana, n̄yetsca can̄ye

entsanguentshana, y nyetsca mándayëngbentsá entsanguentshana.

¹⁰ Aca tcojama chënga chamotsobena ácaftaca jtsemándayama y uámanënga chamotsemnama, Bëngbe Bëtsábioye mo bachnangcá chamoteseservénama, y quem luarentşe chënga montsemándaca —chënga monjétserversiaye.

¹¹ Y chca sënjétsonyaye ora, mallajta angelëngbe oyebuambnayana sënjanuena, y chënga monjétsemma chë uámana puestentşe, chë Ainënga y chë bët-sëjémënga amëndayëngbe shéconana. Nyetsá bëtscá angelënga monjétsemma, corente mallajta; ¹² y chënga mëntšá monjétsayebuache:

¡Chë Oveshatema cuafjocabá endméná, merecido endëtsobuájoñe, nyets obenana, nyets bomnana, nyets osertánana y nyets añemo chaotsebomnama, y entsanga chabiamama chamotsichamo cha nyets respeto buajoná yomnaca, y chamotsinýanýnama cha puerte bëtscá y uamaná yomnana, y nyetscanga chamotsatschuanama ca! —chënga monjétsayebuache.

¹³ Y sënjanuena, lempe ntšamo Bëngbe Bëtsá tojanmcá aina soyënga, celoca, quem luarentşe, quem luarentšá jashenoye y chë mar béjayoca, chëngnaca mëntšá monjétsichamo:

¡Chë uámana puestentşe tbemanábioye y chë Oveshatema nyetscanga nyets tempo y nyetsca tescama chamótsatacheuanaye y chamotsichamo chata puerte uámanata y nyets respeto buajonata ibomnaca,

y chamotsinýanýná chata puerte bëtset-sata y obenata bëtsemnama ca!

¹⁴ Y chë canta Ainëngna monjétsichamo: “Chca chaotsemna ca.” Y chë bët-sëjémënga amëndayëngna

tmonjanoshamentšé y chátbioye monjétsatacheuanaye.

Chë Oveshatema chë canýsëfta sellënga tonjanëtsécá

6 Chentshana más sënjáninye; chë Oveshatema chë canýsëftentshana natsana sello tonjanëtsécá ora, sënjanuena canya chë canta Ainënguentshana puerte jabuache, mo cuafjajuesascá, mëntšá enjétsichamo: “¡Mabo ca!” ² Sënjanrrepará y sënjáninye canye fjantse couaye, y chábeñe enjetsenjaquená canye arquëja enjétsatbëna. Chábioye canye coronésha tmonjaníyé, y mo canye ayëñjanayacá tonjétsanbocna, y cabá más jatsýëñjanámnaca.

³ Chë Oveshatema chë inye sello tonjanëtsécá ora, sënjanuena chë inya chë canta Ainënguentshana mëntšá enjétsichamo: “¡Mabo ca!” ⁴ Y inye couaye tonjánbocna, canye buanganá; y chë enjetsenjaquená obenana tonjanóyëngacñe jamama chë fshantsentsá natjém-bana vida chaotsopochocama, entsanga chamotsenóbama; y canye bëtspadëja tmonjanoyé.

⁵ Chë Oveshatema chë inye sello tonjanëtsécá ora, sënjanuena chë inya chë canta Ainënguentshana mëntšá enjétsichamo: “¡Mabo ca!” Sënjanontjeshé y canye ftsenga couaye sënjáninye, y chë enjetsenjaquená canye romanésha enjétsëtbëna. ⁶ Y chë canta Ainëngbeñe canye oyebuambnayana mëntšá sënjanuena: “Nyë canye kilo trigo canye tesca traba juama, y unga kilo cebadá canye tesca traba juama; pero chë aceitiye y chë vínoyna ndoñe cattsepochócaye ca.”

⁷ Chë Oveshatema chë inye sello tonjanëtsécá ora, chë ústonoca Ainá enjétsichamo: “¡Mabo ca!” ⁸ Sënjanontjeshé y canye shatsësiye couaye sënjáninye; chë enjetsenjaquená Obanana ca enjan-abaina, y stëtšoica bonjétsëstona canya,

Obanënga imomna luare ca uabainá; y chátbioye obenana tmonjanatšatá cãntañentsana cãnyëntšẽ quem luarentšẽ jtsepochócama, chentšã entsãnga jtsapochócãse, entsãnga tmojtsentsjanama, bẽts shẽntsanéngaca, šocanéngaca y quem luarentšã tšátjaye bayéngaca.

⁹Chẽ inyẽ sello tonjanẽtsécã ora, sãnjaninyẽ chẽ altarentšã tajsoye chẽ tmojanobanëngbe espíritënga, chẽ Bëngbe Bẽtsabe palabra entsãnga abuaiyinyayama tmojanobanënga. ¹⁰Chora chënga tmonjanontšẽ tšã uayebuáchana: “Uamaná y ntšamo tojašebuachenacá lempe amá bëngbe Nduiño, çntseco quem luarentšã entsãngbiama cochjayana ndoñẽ tšabá tmonjamama, y chẽ bëngbioye obanayama cochjácastigaye ca?”

¹¹Chentšãna nyetscãngbioye uafjantse entsáyã tmonjaninyẽ y tmonjanéyana batsatema más chamobatmã ca, chẽ cachëngcã Crístbeyeca catšátanga y oservénënga, chẽ cachëngcã mochjanobanënga, nyetscanga choca chamojtsemnëntscuana.

¹²Y más sãnjaninyẽ; chẽ inyẽ sello cha tonjanẽtsécã ora, jabuache fshantse tontsanangmẽmana; shinỹẽ tontsanftšénganga, mo chẽ obaná tojtsemnama juichëtjuama entsáyacá, y nyets juashcona mo buiñcã enjétsinyã, ¹³y estrellatémënga celocana fshantsoye tontsanquécjãna, mo canyẽ higo betiye jabuache binyiaca tojtseshatiyeyna ora, chẽ nguëfshna higuëbenga cuafjatquécjancã. ¹⁴Y celoca luare tontsanenatjẽmba mo canyẽ tsbuanácha cuafjuandmanacá, y nyetsca tjañẽ y bėjayoca fshantsënga, chẽ ndayentšẽ enjamnentšãna tontsanuojaná; ¹⁵y nyetscanga, fshantsoca reyënga, uámanënga, soldadëngbe amëndayënga, bomnënga, obenana bomnënga, y nyetscanga chẽ nyets tempo nyẽ inyãbiama

oservénënga y chẽ cachëngbiama trabájayëngnaca, chẽ cuevëshënguiñẽ y bẽts ndëtsbenguenache tjañẽ tmonsanoítana; ¹⁶y chẽ tjañëngoye y chẽ ndëtsbengoye montsanichamo: “¡Bëngbioye šmotsëtebuantsã y šmotsaitame, chẽ uámana puestentšẽ tbemanabe bominỹentsãna, y chẽ Oveshatembe uabouana castigo, cha bëngaftaca tbojtnama, bëngbeñẽ ndoñẽ chaondëtsemnama! ¹⁷Er chẽ uachuana te chabe castigo jtsebinyãna te tojóshjango; y mora çnda nanjobenaye chẽ sóyeca ndoñẽ chamondëtsepochocama ca?” —chënga montsanichamo.

Chẽ Bëngbe Bẽtsábioye oservénënga chẽ uabouana castigüentšãna mochãntsatsëbacana

7 Chca tonjanopasã chentšãna, canta angelënga sãnjananyẽ, monjétsatsana chẽ quem luarentšã canta opochócayenache; chënga ndoñẽ quemënjatanlesencia chẽ canta binyiënga jtsebinyãna, ndoñẽ chaondëtsebinỹiayama, ni fshantsentšẽ, ni mar bėjayoca, ni ndocna betiyeshënguiñẽ. ²Inyẽ ángelnaca sãnjaninyẽ, shinỹẽ bocana luaroicana enjetsabó, y chẽ Bëngbe Bẽtsã Ainabe sello enjétsiyëboye. Chẽ ángelna chẽ inyẽ canta angelëngbioye, ndëmuanỹëngbioye obenana tmojanatšatá chẽ fshantsentšẽ y mar bėjayoca lempe jtsepochócama, chëngbioye jabuache tonjánabachembo: ³“¡Tondaye šmatjapochóca, ni fshantsoca, ni mar bėjayoca, ni betiyeshënguiñẽ, chẽ Bëngbe Bẽtsabiama oservénëngbioye chẽ sëlloca juentsaca fchayauinyãnantscuana, ndoñẽ chamondëtšapochocama ca!”

⁴Y sãnjanuena buëtanga chẽ sëlloca tmojánauinyãnanayama: canyẽ patse, canta bnëtsana y canta uaranga

entsanga uinñananənga n̄yetsca
Israeloquentša bəts pamillanguentsana.

⁵ Judabe pamillentšana, bnétsana uta
uaranga uinñananənga;

Rubenbe pamillentšana, bnétsana uta
uaranga;

Gadbe pamillentšana, bnétsana uta
uaranga;

⁶ Aserbe pamillentšana, bnétsana uta
uaranga;

Neftalibe pamillentšana, bnétsana uta
uaranga;

Manasesbe pamillentšana, bnétsana uta
uaranga;

⁷ Simeonbe pamillentšana, bnétsana uta
uaranga;

Levibe pamillentšana, bnétsana uta
uaranga;

Isacarbe pamillentšana, bnétsana uta
uaranga;

⁸ Zabulonbe pamillentšana, bnétsana uta
uaranga;

Josebe pamillentšana, bnétsana uta
uaranga;

y Benjaminbe pamillentšana, bnétsana
uta uaranga entsanga.

Chə mallajta entsanga uafjantsəjuangá uichétjonənga

⁹ Chentsana, sənjanrrepará y
mallajta entsanga sənjánan̄yē, ndocná
quentaisobenaye jacúntana, n̄yetsca
mándayənguentsana, n̄yetsca cachca
buiñe bomnənguentsana, n̄yetsca
can̄yē entsanguentsana, y n̄yetsca
biyana bomnənguentsana; chənga
monjétsatsana chə uamana puesto
chə Oveshatembe natsanentšē,
uafjantsəjuangá uichétjonənga
y raməshangá monjétsətbəna.

¹⁰ N̄yetscanga tša monjétsayebuache:

¡Bənga atsebacayana endobá, Bəngbe
Bətsá,

chə uamana puestentšē
entsetbemanábentsana,

y chə Oveshatəmbentsana ca!

¹¹ Y n̄yetsca angelənga, chə
uamana puesto y chə bətsəjémənga
améndayənga y chə canta ainəngbe
shéconana monjétsatsanənga, chə
uamana puestentša natsanoica
tmonjanoshamentšē, fshantsóntscoñe
jotsejbénase, y Bəngbe Bətsá
tmonjanadorá, ¹² mēntšá jayanəse:

¡Chca chaotsemna!

Bəngbe Bətsábioye n̄yets tempo y
n̄yetsca tescama chamotsadorana
y n̄yets ainánaca cha chamotsatschuaná.
Entsanga chamotsin̄yan̄ná cha puerte
bətsá y uamaná bétsemnama;
cha endmēna n̄yets osertánana bomná, y
n̄yets respeto buajoná, y n̄yets obe-
nana y añemo bomná.

¡Chca chaotsemna ca! —chənga
monjétsichamo.

¹³ Chentsana, can̄ya chə bətsə-
jemənguentsá tonjanoyebuambá y
šonjantjá: “¿Ndēmuan̄yenga imomna
chə uafjantsəjuangá uichétjonənga, y
ndémocana tmojabo ca?”

¹⁴ “Taita, aca chəngbiana cotátšəmo
ca” —atše sənjanjuá.

Y cha šonjaniyana: “Chənga
montsemna chə jabuache
ngmenənguentsana tšabá tmojáb-
canənga; chə Oveshatema chəngbiana
tojóbana y chəngbe bacna soyəngama
perdonánənga montsemna; chəngbe
uichétjonəjuangá tmojtsaboshabé y chə
Oveshatembe buñeca tmojtabofjantsé.

¹⁵ Chíyeca chənga chə Bəngbe Bətsabe
uamana puestentša natsanoica
montsemna,
y chábioye n̄yets tempo chabe delante
mondəservena,

y chə uamana puestentšē entsetbemaná,
chəngbenache jtsemnəse, chənga
echántsan̄yena, mo cuafjutsebotscá.

¹⁶ Ya ndoñe más shəntsana, ni uajuen-
dayana quemochátsbomna;
shin̄yama, ni yapa jən̄yama ya ndoñe
más quemochátsufrina;

¹⁷ er chë Oveshatema, chë uámana puestentša natsana tséntsaca entsemná, chéngbioye mo oveshëngcá echantsabuajénÿa, y echanjunatse béjaye vida bomniye yóbocana luaroye, y Bëngbe Bëtsá echanjama ya ndoñe más ngménana chamondétsebomnama ca” —cha šonjanjuá.

Chë ústonoca sello

8 Chë Oveshatema chë uándmanana tsbuanáchañe chë ústonoca sello tonjanëtsécá ora, celoca ndocá quentét-sënëna mo tséntsaca hora nyëtšá.

² Chora sënjánanÿe chë canÿsëfta angelënga, chë Bëngbe Bëtsabe delante monjétsatsanënga; chéngbioye canÿsëfta trompetëfjuangá tmonjanijé.

³ Chentšana inÿe ángel tonjánashjango, canÿe castellano matbëtemaca inciense jajuinÿiyama, y altar natsanoica tonjantsá; chábioye bëtscá inciense tmonjanoyé chaojuinÿema chë castellano altaroca, chë uámana tbemana natsanoica enjëtsemnoca. Chë ángel inciense tonjanjuinÿé Bëngbe Utabná jëtschuayama, cánÿiñe nyetsca chë Bëngbe Bëtsabe entsanga tmojoyebuambá palabréngaca, cháftaca jencuéntama ora. ⁴ Y chë inciense juinÿentša ngona, chë ángelbe cucuatšentsana Bëngbe Bëtsabe delante tonjanótsjua, cánÿiñe chë Bëngbe Bëtsabe entsanga cháftaca jencuéntama palabréngaca. ⁵ Chentšana chë ángel chë inciense jajuinÿiyama matbëtema tonjanca, chë altarentša chebámbengaca tonjanajutjé, y quem luaroye tonjanëtsana. Chora enjëtsemna tša juesasanana, corente shauenanana, bëtscá tcuinÿënga, y quem luare tontsanangmémana.

Chë trompetëfjuangá

⁶ Chora chë canÿsëfta angelënga, chë canÿsëfta trompetëfjua uabomnënga, tmonjanoprontá chëfjuangá juajatëtama.

⁷ Chë natsana ángel chabe trompetëfjua tonjanájatëto, y quem luaroye tmonjanëtsana bëntstá y íñeshe, cánÿiñe buñeca. Ungañentsana cánÿentše quem luarentše tontsanjuinÿe, úngañentsana cánÿentše betiyeshënguñiñe y nyetsca nguëfshna shacuanënguñinaca.

⁸ Chë inÿe ángel chabe trompetëfjua tonjanájatëto, y chora chë mar béjayoye tmonjanëtsana canÿe soye mo canÿe bëts tjañe tojtsangbototjuancá, y chë mar béjayiñe úngañentsana cánÿentše buiñe tontsanóbema. ⁹ Chë mar béjayiñe vida imobomnéngbeñe úngañentsana cánÿentše tontsanopochocá, y chë barquënguëtsnaca úngañentsana cánÿentše.

¹⁰ Chentšana chë inÿe ángel chabe trompetëfjua tonjanájatëto, y canÿe bëts estrella, mo canÿe uajuinÿyanëshacá enjétsangbototjuana, celocana tonjanótsatše chë úngañentsana cánÿentše béjayënguñiñe, y béjaye óbocanénache.

¹¹ Chë estrella enjanabaina Untjana ca; y chë úngañentsana cánÿentše buyeshënguñiñe untjiye tontsanóbema, y chë untja búyeshe causa ba entsanga tmonjanóbana.

¹² Chë inÿe ángel chabe trompetëfjua tonjanájatëto, y chora tontsanóndbema chë úngañentsana cánÿentše shinÿiñe, y chë úngañentsana cánÿentše juashconiñe y chë estrellënguñinaca. Chca, nyetsca chentša úngañentsana cánÿentše ibetiñe tonjanoquedá, y chë causa ndoñe quemëntétsëbinÿnaye posufta horëntscuana, bnëté canta hora y ibeta canta hora.

¹³ Chentshana, sënjanrrepará y sënjanuena canye águila, tsbanánoca celoca enjetsongüefjná, jabuache méntšá enjétsichamo: “¡Tša lastema, tša lastema, tša lastema quem luarentša entsangbiama, chë inye trompetéfyuagá chë inye unga angelënga chamojuátatëto ora ca!”

9 Chentshana chë inye ángel chabe trompetéfyua tonjanájatëto, y sënjáninyë canye ángel quem luaroye jastjanguana y enjétsinyëna mo canye estrella celocana quem luaroye cuaftsotsatsancá; y moye tonjánashjango ora, tmonjanoyé chë uabouana tboca atëfjñentša llavëfja.

² Chë uabouana tboca atëfjñentšë tonjánatëfjo, y chentshana becá ngona tonjanótsjua, mo bëts hornentša ngoncá; y chë uabouana tboye atëfjñentšë ngona causa shinýe tontsanibétata y nyëts celoca ena ngona enjésemna.

³ Chë ngonentshana ba tsátjaye chapulinga tmonjánbocana, y nyëts quem fshantsëjana tmonjánashana; y chëngbioye obenana tmonjanatsatá, chánaca jándbemama, mo chë juetjuama alacranëngbe obenancá.

⁴ Chëngbioye tmonjanamëndá tondaye ntjándbemana chë shacuanënguiñe, ni ndocna nguëfshna matënguiñe, ni ndocna betiyeshiñe; nye chë juentsaca chë Bëngbe Bëtsabe sëlloca nduinýnanana entsangna añe. ⁵ Pero ndoñe chematanalesenciá entsangbioye jobáyana, ndayá nye jamama chënga shachna shinýentscuana tsetšanana chamotsebomnama; y chë chënga monjánama chamotsebomnama tsetšanana enjamna mo canye alacranbe uetjoniñcá.

⁶ Chca tempo chaojtsemna ora, entsanga mochántseguaye ntšamo jtsóbanama, chë tsetšanënga jauántama ndoñe quemochátobena causa, pero ndoñe quemochátinyëna ntšamo jamëse jtsóbanama; y masque tša

mochántseboše jóbanama, chora chëngaftaca ndoñe chca queochatopása, mo jóbanama ndoñe tmontsobencá.

⁷ Chë tsátjaye chapulinga monjétsinyëna mo couayëngcá prontánënga jama entsángaftaca jétsjama; chëngbe bestšašinië monjánábomna mo castellano coronëshangacá, y chëngbe jubiá enjamna mo entsabe jubiácá. ⁸ Stjënashë monjánbomna mo shembásabe stjënashacá, y chëngbe juatsašënga mo leonbe juatsašëngcá.

⁹ Chëngbe cuerpënga jenéuyanama cochaca monjánbomna morocho soyënga, mo hierro soyëngcá, y chëngbe juatëngmiashangá tmojtsabonjná ora, chë shauenanana bëtscá enjamna, mo ba cochëshangá couayënga cuaftsasjojnacá, chë inýengaftaca jétsjama tmojëftsátjajo ora tojtseshauenancá.

¹⁰ Chënga monjánábomna mo alacranbe uascuatšëjuacá, ba uetotjéfyangaca, y chë uascuatšëjuaca obenana monjánbomna shachna shinýentscuana entsanga mal chamotsepasama. ¹¹ Chë tsátjaye chapulinga canye amëndayá monjánbomna, chë uabouana tboca mándaye ángel; hebreo biyañna cha uabainá Abadón ca y grieguiñna Apolión o pochocayá ca.

¹² Chë natsana pochócayana ya tocjochnëngo, pero más chcoye cabá inye uta soye más pochócayana cachcá echántsemna.

¹³ Chentshana chë inye ángel chabe trompetéfyua tonjanájatëto, y canye oyebuambnayana sënjanuena, chë Bëngbe Bëtsabe delante enjésemna castellano altarentša juatsboica lado sibienache obocanentshana enjétsobocana. ¹⁴ Y chë oyebuambnayana, chë trompetéfyua tonjanájatëto y enjétsëtbëna ángelbioye tbonjaniyana: “Chë canta angelënga chë Eufrates bëts fshájaye tsachoca utsbuanënga mëjafjoná ca.” ¹⁵ Y chë canta angelënga

tmonjanējafjoná; y n̄ya ch̄e ora, ch̄e te, ch̄e shin̄ye y ch̄e uatama ch̄éngbioye tmojanaprontá, ch̄e quem luarentsá entsángbeñe úngañentsana cán̄yentsēnga jtsēbáyama. ¹⁶Atše s̄enjanuena buétanga imojamna ch̄e angeléngaftaca tmojána soldadēnga, couayēnguīne: uta patse millonēnga ca.

¹⁷Mēntšá s̄enjánan̄ye mo otjenay-oquécá ch̄e couayēnga y ch̄e ch̄éngbeñe enjaquenēnga: Ch̄e enjaquenēnga monjānbomna morocho soyēnga cochaca, jen̄euyanama, y ch̄e soye buanganana enjánin̄yana, mo in̄cá, y fchendana mo ch̄e uámana nd̄etšb̄e jacintcá y ts̄ēšiyana in̄ynana mo azufrcá; y ch̄e couayēnga monjānbomna mo leonbe bestšašcá, y ch̄éngbe uayoicana enj̄etsobocana in̄e, ngona y azufrana. ¹⁸Y ch̄e úngañentsana cán̄yents̄e entsānga tmonjanóbana quem unga uabouana pochócaye soyēngaca, ch̄e couayēngbe uayoicana enj̄etsobocanana: in̄e, ngona y azufrana. ¹⁹Er ch̄éngbe obenana entsānga japochócama monjānbomna uayáshañe y uascuatš̄éjuañe; er ch̄éngbe uascuatš̄éjua enjuamna mo m̄ētšcuayēngcá, bestšašēngaca, y ch̄ejuanga causa entsānga mal montsanpásaye.

²⁰Pero ch̄e in̄ye entsānga, ch̄e uabouana pochócaye soyēngaca ndoñe tmonjanopochocanga, juabna ndoñe chematanajbaná, y ndoñe chematanajbaná amana ch̄e bacna soyēnga ntšamo monjanamcá; ndoñe chematanajbaná adórayana ch̄e bacna bayējēnga, ni ch̄e mo diosēnga cuaftsemncá jtsejuabnayēse imojánadorana castellano soyēnga, midio soyēnga, bronce soyēnga, nd̄etšb̄e y niñeb̄e soyēnga; y chca soyēnga ndoñe quem̄enjatobena ni jin̄yama, ni jouenama, ni jtsanama. ²¹Juabna ndoñe chematanajbaná y ndoñe chematanajbaná entsānga obanayana, encjuanayana, bacna soyēnga boyabása

o shembásaftaca jtsamēse oyenana, ni atbēbanana.

Ch̄e ángel base uándmanana tsbuanáchaca

10 Chentsana s̄enjánin̄ye in̄ye ángel, puerte obenana bomná; celocana enj̄etsastajuana, y chabe sh̄econana can̄ye jantšet̄eshe enj̄etsemna; chabe bestšaše tats̄etsacá can̄ye ts̄ēfcuácatjo. Chabe jubíá shin̄ycá enj̄etsebuashin̄yín̄yana, y chabe shecuatšēnga mo úcuatjona niñebēnga cuaftsoin̄cá. ²Chabe cucuatš̄in̄e enj̄ets̄eb̄ena can̄ye base uándmanana y ut̄ēfjna tsbuanáchaca. Chabe catšbioica shecuatš̄eca ch̄e mar b̄ejayoca tonjantsá, y ch̄e uañicuayóicatšecna, quem fshantsent̄se. ³Y jabuache tonjanoyó, mo can̄ye león cuaftseyocá; y tonjanoyó ora, can̄ys̄ēfta juesasanent̄ša jabuache shauenanana s̄enjanuena. ⁴Ch̄e can̄ys̄ēfta juesasana chca tmonjanoyebuambá ora, atše s̄enjanoprontá ntšamo chēnga tmonjanayancá juabemama; pero can̄ye oyebuambnayana celocana s̄enjanuena, m̄ēntšá šonj̄etsatsaye: “N̄ye aca cochtsójuabnañe ntšamo ch̄e can̄ys̄ēfta juesasana tmonjayancá, ndocnábioye catjauyana, y ch̄e soye ndoñe catjuábema ca.”

⁵Chora ch̄e ángel, ch̄e mar b̄ejayoca y quem fshantsent̄se atsaná s̄enjanin̄yá, chabe catšbioica cucuatš̄e celoye tonjanatsbaná, ⁶y tonjanjurá Bēngbe B̄etsabíama, ch̄e n̄yets tempo y n̄yetsca tescama oyenabíama, ch̄e celoca, quem luare, ch̄e mar b̄ejaye, y lempe ch̄e luarēnguīne yobin̄ycá tojanmabíama. Tonjánayana: “Ya ndoñe más quemochatobatma; mora Bēngbe B̄etsá echanjama ntšamo tojašebuachenacá, ⁷er ch̄e tempo chaojóshjango, ch̄e ústonoye ángel chabe trompet̄éjua juajat̄etama chaojontš̄é ora, chora

ya echanjochñengo ntšamo Bëngbe Bëtsá jamama yojuabnacá; chë soye nyetsca entšángbioye cha ndoñe chenatinñanyé, ntšamo tempo cha chabe oservénëngbioye, chë chabe juabna oyebuambnyéngbioye tojanabuayenacá ca” —cha tonjánayana.

⁸Chë atše sënjanuena oyebuambnayanana celocana enjétsobocanana, cachiñe šonjanatsëtsá y šonjaniyana: “Motsa y mauaca chë mar béjayoca y quem luarentše ángel entsemnabe catšbioica cucuatšñe base uándmanana y utëfjna tsbuanácha ca.”

⁹As atše chë ángelbioye sënjána; chë base uándmanana tsbuanácha chašuíyema sënjaniyana, y cha šonjanjuá: “Quemécha, motsásañe. Acbe uayoye uamešquénëcha mo tjouangbe meloycá echántsamna, pero acbe uafsbioyna puerte uauntjécha echantsábema ca.”

¹⁰As chë base uándmanana tsbuanácha chë ángelbe cucuatšentšana sënjanaca, y sentsanásañe; y atšbe uayoye meloycá enjétsamna, pero sënjanabmuaná y atšbe uafsbioyna puerte uauntjécha tontsanábema.

¹¹Chora šmonjaniyana: “Aca cmontsemna cachiñe jtétabuayenana, ntšamo Bëngbe Bëtsá tojayancá chë ntšamo yochjopásama, ba canye luarentša entšángaftaca, ba mándayëngbentša entšángaftaca, ba biyana bomna entšanguentséngaftaca y quem luarentša reyéngaftaca ca.”

Chë útata Bëngbe Bëtsabe juabna oyebuambnayata

11 Chentšana canye medídaye niñëfja šmonjanoyé, mo jatsëmbonëfjá, y šmonjaniyana: “Motsa y Bëngbe Bëtsabe bëts yebna y chentša altar cochjamedída, y cochjácuntaye bueta entšanga chentše

Bëngbe Bëtsábioye imojtsadorana. ²Pero chë Bëngbe Bëtsabe yebnentše más shjoica luarna cachcá cochjonñaye, ndoñe catjamedída, er chiñe chë ndoñe judiëngbiama endmëna; y chënga, chë uámana ca uabaina bëts pueblama, canta bnëtsana y uta shinýentscuana soyënga mochántsama chiñe jtsepochócama, mo cuaftsebotajnacá.

³Pero atše, útata atšbiama tatšëmbuata y oyebuambnayata chanjichamuá atšbe cuenta entšángbioye jábuayenama, canye uaranga y uta patse y chñënguana bnëtsana tentscuana. Chatna uajojëscha entšayangá uichëtjonata bochántsemna, chca, ngmena bomnama jinñanyiyama ca” —chata tbonjánayana.

⁴Quem útata atšbiama tatšëmbuata y oyebuambnayata bontsinñiyëna chë uta olivos betíyeca y chë uta candelerëseca, ntšamo Bëngbe Bëtsá, chë quem luarentše mandayabe delante endmëncá. ⁵Nderado nda tojtseboše chatbiama bacna soye jamama, ndoñe quentatobenaye ntšámñaca jáborlana, er uayoicana ñneshe nanjóbcna y chë uayayéngbioye nantsapochócaye; nderado nda tojábosëna chatbiama bacna soye jamama, cachcá cha buántsemna jóbanama. ⁶Chë útata obenana bondbomna celoca jtsachtama, ndoñe chaonduaftema, entšángbioye Bëngbe Bëtsabiama chabojtsabuayiyiná tese; obenana béjayënga buiñe jtsebiama, y jamama quem luarentše chaotsóndbemama, nyetscna pochócaye soyëngaca, bueta sóynaca ntšamo chata tbojtsebošcá.

⁷Pero ntšamo Bëngbe Bëtsabiama ibotatšëmbcá entšángbioye jábuayenama chata chabojapochocá ora, chë uabouana bayá, chë corente bëts tboicana chaojabocná, chátbioye echántsatsjaye, echantsayëñaná y echantsëbaye. ⁸Y chatbe óbana cuerpo, chë corente bëts pueblentša

tsáshenañe echanjoquéda, chë chatbe Utabná tmojanrucificá luarentse, y chë bëts pueblo inyetsá juabáyamna nántsemna mo chë Sodoma y Egiptó luaroycá. Chentse endmëna mo chë bëts publënga Sodoma y Egiptcá, er chentse chë entsãnga yapa bacna soyënga jtsamana. ⁹Y unga y tsëntsa tentscuana, chë obanate cuerpo mochantsonyaye, nyetsca canye luarentsa entsãnga, nyetsca cachca buiñe bomna entsãnga, ba biyana bomna entsãnguentšana y ba mándayëngbentša entsãnga; ndoñe quenátslesenciana chata jutabuantsama. ¹⁰Chata bochjóbana, quem luarentse oyenënga mochanjóyejuaye; tša oyejuayënga mochántsemnama, ndayánaca mochanjénatsëtaye, er ntšamo chë Bëngbe Bëtsabe juabna oyebuambnayata tbojanayancá, tojanma quem luarentse oyenënga puerta chamosufrima.

¹¹Pero chë unga y tsëntsa te tonjanochnëngo ora, Bëngbe Bëtsá tonjanma chë obanata chábutayenama; chentšana tbontantsata, y chë monjétsantjeshnënga tša uatjana tonjanëbuache. ¹²Chora canye jabuache oyebuambnayana tbonjanuena, celocana mëntsá enjétsëtsënaye: “Moye mašënguata ca.” Y chatna canye jantsetëshiñe tbonjántsjua, y chatbe uayayënga chca monjëtsonyaye. ¹³Cachora quem fshantse jabuache tontsanangmémana, y chë bëts pueblentse bnëtsanentšana cányentse tontsanáshajaye, y canyësëfta uaranga entsãnga tmonjanóbana. Chë ainënga tmonjanoquedanga, tša auatjanánënga, chë celoca Bëngbe Bëtsábioye montsanadorana.

¹⁴Chë inye uabouana soye quem luare japochócama, mora tocjochnëngo, pero betscó chë ústonoye uabouana pochócaye soye echanjóshjango!

Chë ústonoye ángelbe trompetéjua

¹⁵Chë ústonoye ángel chabe trompetéjua tonjanátatëto ora, celoca tša monjétsayebuache, mëntsá monjétsichamo:

Ora tocjobuache, Bëngbe Utabná y chabe Uámana Uabuayaná Jesucristbe amëndayana quem luarentse chaotsemnama,

y chë amëndayana echántsemna nyets tempo y nyetsca tescama ca.

¹⁶Y chë uta bnëtsana y canta bëtsëjmënga amëndayënga, chë chëngbe uámana puestiñe Bëngbe Bëtsabe delante monjëtsetbiamanënga, tmonjanoshamentšé, fshantsóntscoñe jotsejbënase, y Bëngbe Bëtsá tmonjanadorá, ¹⁷mëntsá jayanëse:

Bëngbe Utabná, Bëngbe Bëtsá nyets obenana bomná,

aca chë mora cha condmëna y chë tempo cha conjamná cbontsatschuaná,

er nya mora acbe bëts obenánaca soyënga cochjama, acbe amëndayana jóntsama.

¹⁸Ba luarentsa entsãnga ácaftaca tmonjanotšatjayená;

pero chëngaftaca cmojetnama chë uabouana castigo jtsebínynama te tocjóshjango,

chë tempo tmojanóbanëngbiama jayanama tšabá o ndoñe tšabá tmonjéftsemama.

Tonjóshjango chë hora, uacanámana jtatsatayama chë acbiama oservënëngbioye,

chë acbe juabna oyebuambnayëngbioye, chë acbe entsãngbioye,

y chë acbe uabaina nyetscangbiama más bëts uabainana yomnama juabnayëngbioye,

uámanënga y nduámanënga;

y chë tempo tonjóshjango, quem luare pochocayënga jtsapochócayama ca —chënga tmonjánayana.

¹⁹Chora, Bëngbe Bëtsabe bëts yebna celoca tonjantëfjo, y choye enjëtsebinÿna chë cajontema, ndayëtema yojaninÿanÿná ntšamo Bëngbe Bëtsá chabe entsángbioye tojanašebuachenacá; y chora enjëtsemna tcuinÿënga, tša shauenanana, juesasanana, quem fshantse tontsanangmëmana y bëtscá bëntstá tonjantquécjana.

Chë shembása y chë uabouana bayá

12 Chentsana, canÿe bëts soye celoca tonjanonÿná entsanga canÿe soye jinÿanÿiyama: canÿe shembása, shinÿe mo chabe uichëtjoniaca, juashcona chabe shecuatšëntša tajsoye, y chabe bestšašiiñe canÿe coronësha bnëtsana uta estrelléngaca. ²Chë shembása ngomamaná enjëtsemna, y chë šëšona jónÿnama yojétsobecuama jabuache enjëtseyoye, chë šëšona jónÿnama cha puerta jasúfriama ibojamna causa. ³Y chora inÿe bëts soye celoca tonjanonÿná, entsanga inÿe soye jinÿanÿiyama: canÿe uabouana dragón buanganá, canÿsëfta bestšašëngaca y bnëtsana tsëtjonëšëngaca y chë bestšašënguñe enjanábomna canÿsëfta coronëshangá. ⁴Chabe uascuatšëjuaca úngañentsana cánÿentšë chë estrellatëmënga celocana tontsansjojó, y quem fshantsoye chëtëmënga tontsanëtsana. Y chë dragón chë šëšona jtsebomnama shembásabe delante tonjantsá, chë šëšonatëmbioye jtsósañama, cha tojonÿná ora. ⁵Chora chë shembása canÿe šëšona boyabásetema bontsanbomna, nda nÿets luarenache entsángbioye yochtsamëndaye mo canÿe hierro varëfjaquécá. Pero chë šëšona chábensana tmontsanjuaná y Bëngbe Bëtsábioye, chabe uámana puestoye tmontsanámbañe. ⁶Chë shembásana entsanga ndoyena luaroye

tontsanachá, Bëngbe Bëtsá canÿe luare ibojaboprónta choye, chentšë saná chamocaredadoma, canÿe uaranga y uta patse y chnënguana bnëtsana tentscuana.

⁷Chentsana celoca canÿe entsjanayana enjëtsemna: Miguel, chë angelëngbe amëndayá, y chabe angelënga chë dragónaftaca monjétsentsjanaye. Chë dragón y chabe angelënga monjétsatsjanaye, ⁸pero ndoñe chematanobená jáyënjanama, y chëngbiamya ya ndoñe más luare celoca quentëtsemna. ⁹Chcase, chë uabouana dragón chocana tmontanábocna, chë tempsca mëtscuaye, chë Diablo y Satanás ca uabainá, y chë bëtscá entsángbioye aingñayá; quem fshantsoye cha tmontsantsatšë, y chë cha yojanaménda angeléngnaca.

¹⁰Chora canÿe jabuache oyebuambnayana celoca sënjanuena, mëntšá enjëtsechamo: Chë Bëngbe Bëtsá entsanga játsebacama tempo ya tonjóshjango.

Mora Bëngbe Bëtsá echanjínÿanÿiye chabe obenana y mándayana, y chabe Uámana Uabuayaná Jesucristbe obenana jtsemándayama; er chë Cristbe delante bëngbe catsátanga mal aquedayá ya tmontábocna, nda nÿets tempo Bëngbe Bëtsabe delante mal enjanaquedayá.

¹¹Bëngbe catsátanga cha tmonjayëñaná, er Cristo, chë mo tmojóba Oveshatemcá, Bëngbe Bëtsá bacna soyëngama entsanga cháuaperdonama, tonjanóbana, chabe buiñe juabuáshanëse, y chë ndegombre soyëngama chënga monjanóyebuambnáyeca; er chëngbe vida chëngbiamya ndoñe quenjatámana; Jesucristo jaserviama jóbanama chënga monjanprontana.

¹² ¡Chcasna, celoca corente oyejuayana chaotsemna, y tšëngaftanga chë chocha oyenëngbeñnaca!

¡Pero tša lastema chë fshantsoca y mar béjayoca oyenëngbiama, er chë diablo tšëngaftangbioye tonjástjango, corente tšatjayá, er cha entsetátšëmbo ya nÿe batsá yo- jtsábojamna chë chábioye mochja- castígama ca! —enjétsichamo.

¹³ Chë dragón quem fshantsoye tmojtsantsatšama tonjáninÿe ora, chë šešona boyabásetema tbonjanéshjango shembásabioye tbontsanacmé.

¹⁴ Pero uta juatëngmiásha, chë bëts aguilbeshá, chë shembásabioye tmonjaniyé, chabiamna tmojanprontá luaroye chaongüefjoma, entšanga ndoyena luaroca, chë dragónbentšana bënoca; y chentše enjamna chë shembásabioye saná chamuájuatšema, unga y tsëntsa uatëntscuana. ¹⁵ Chora chë dragón, chabe uayoicana bëts béjaye tonjanbuashëtjo chë shembásabe stëtšoica, chaobuama y chabotsambama; ¹⁶ pero quem fshantse chë shembásabioye tbonjanájabuache, er chë fshantse mo uayašacá tonjantëfjo, y chë dragonbe uayoicana béjaye obocniye tontsanobmuánañe. ¹⁷ Y chë dragón chë shembásabioye tondaye jamana chenatanobená causa, corente cacháftaca tbonjánetna, y tonjána chë ínÿenga, chë shembásabe basengcá mondmënënga játsjayama, ntšamo Bëngbe Bëtsá yomandacá imobedecënënga, y ntšamo Jesucristo tonjanabuayená ndegombre soyëngaca sempre imoyenënga. ¹⁸ Y chë dragón chë mar béjaye tsachañe tonjantsá.

Chë dragón tonjanma, chë mar béjayoca uabouana bayá chabe obenana chaotsebomnama

13 Chentsana atše sënjaninÿe, canÿe uabouana bayá chë mar bejajoicana tonjánbocna; enjánbomna canÿsëfta bestšašënga y bnëtsana tsëtjonëšënga, y chëšënguinië bnëtsana coronëshangá, y chë bestšašënguinië bañe enjétsabemana Bëngbe Bëtsabiamna contra oyebuambnaye uabaina. ² Chë uabouana bayá sënjaninÿá enjamna mo canÿe leopardcá, mo osbe shecuášangaca, y chë uayáshana mo leonbeshacá. Chora chë dragón tonjanma chë uabouana bayá chaotsebomnama chabe obenana, y chabe uamana puesto jtsemándayama, y chabe bëts mando. ³ Canÿe chabe bestšašënguentše enjétsinÿna mo jóbanama tëtšeniñcá; pero chentše tbontanóbema; y chora quem luarentša nÿetsca entšanga ojanánënga monjëtsemna, y chë uabouana bayábioye montsanëyeunana. ⁴ Y chë dragón montsanadorana, chë uabouana bayábioye obenana tbojánatšetama; y chë uabouana bayábioynaca montsanadorana, mëntšá jayanëse: “Ndocná obenana quenátsbomna quem uabouana bayacá, y ndocná quenátobena chábioye jayénjanama ca.”

⁵ Chë uabouana bayábioye tbonjanlesenciá corente podesca Bëngbe Bëtsabiamna chaotsóyeuambnama, y obenana tbonjanatšetá, canta bnëtsana y uta shinÿëntscuana chaotsemándama. ⁶ Y podesca Bëngbe Bëtsabiamna tonjánayana, soyënga chabe contra, chabe bëts yebnama y chë celoca oyenëngbe contra. ⁷ Chábioynaca tbonjanlesenciá chë Bëngbe Bëtsábënga imomnënga játsjayama, jáyënjantscuana; y obenana

tbonjanatšetá chaotsemándama nÿetsca cachca buiñe bomna entsángbeñe, nÿetsca canÿe entsángbeñe, nÿetsca biyañe bomnéngbeñe, y nÿetsca mándayéngbentša entsángbeñe. ⁸ Chë uabouana bayá nÿetsca quem luarentša entsanga mochántsadorana. Chë entsanga mondmëna ndëmuanyéngbe uabaina ndoñe yontsábemana, chë Bëngbe Bëtsábioye jëtschuayama mo canÿe oveshatemcá, tojanóbanabe librésañe. Bëngbe Bëtsá quem luare cabá ndëma ora, quem librésañe tojanábema nÿetscanga chë tsabe vida mochjónyëngbe uabaina.

⁹ Chë jouenama obenënga, chamouena.

¹⁰ Chë cárceloye jama ibomná, cárceloye bochanjotóca jama; chë espadéjaca jobanamá, espadéjaca echanjóbana.

Chíyeca quem luarentše entseyta, chë Bëngbe Bëtsábenga imomnénga pade-cena soyënguiñe tmojtsemna ora, puerte uantadënga jtsemnana y Bëngbe Bëtsábeñe jtsošbuáchiyana, mo chë Bëngbe Bëtsabe entsángcá.

¹¹ Chentsana inÿe uabouana bayá sënjáninÿe, quem fshantsentsana enjëtsebocana; uta tsëtjonëše mo oveshabešcá enjábomna, pero mo canÿe dragoncá, mo canÿa Satanásbeyeca mandanacá enjëtsoyebuambnaye. ¹² Y enjánama soyënga chë natsana uabouana bayabe nÿets obenánaca, chabe delante. Chë fshantsentša bayá tonjanma nÿetsca luarentše oyenënga chamotsadoránama chë natsana uabouana bayábioye, chë jóbana tëtšeniñe tbontanobemá.

¹³ Cha ba bëts soyéngnaca enjánama chabe obenana entsanga jinÿanÿiyama, entsángbe delante jamana iñe celocana fshantsoye chaótsatšamnaca. ¹⁴ Y cha tbonjanlesenciá chaoma chabe obenana jinÿanÿiyama chë natsana uabouana bayabe delante. Chë soyéngaca entsanga

tonjanaíngñé, y quem luarentša entsanga tonjanéyana canÿe soye chamopormá, y chë soye cháótsinÿna mo chë natsana uabouana bayacá, chë espadéjaca tëtšená enjamná, y chora tsabá enjetsatsmëná. ¹⁵ Y chë inÿe uabouana bayábioye tmonjanlesenciá obenana chaotsebomnama jamama, chë natsana uabouana bayábioye jadórama entsanga tmonjanma soye vida chaotsebomnama, y chë soye jóyebuambayama chaotsobenámnaca, y jamama chë chábioye ndoñe tmontsadoránënga chamóbanama. ¹⁶ Y tonjanma, nÿetscángbioye, básenga y bëtsétsanga, bomnénga y ndbomnénga, cachëngbiama trabájayënga y nÿe inÿabiama nÿets tempo oservëngga, catsbioica cucuatšinë o juentsaca chamuínÿnanama. ¹⁷ Y ndocná quenjátanobena ni jiyama, ni jobuámiñama, chë uinÿnanánana ndoñe tontsebomnése; chë uabouana bayabe uabaina o chë chabe uabainama yomna número.

¹⁸ Chë número jinÿenamna bëtscá osertánana jtseytana. Chë becá osertánana bomná cháuinÿena ntšamo chë uabouana bayabe número iuayancá, er canÿe entsabe número endmëna. Chë número endmëna chë chnénguana patse y chnénguana bnëtsana y chnénguana.

Chë canÿe patse y canta bnëtsana y canta uaranga entsángbe canto

14 Y más sentsanonÿá. Sënjáninÿe, chë Oveshatema, enjëtsatsjabna Sión ca uabaina tjoca, y cháftaca monjëtsemna canÿe patse y canta bnëtsana y canta uaranga entsanga, y chëngbe juentsaca enjëtsabemana chë Oveshatembe y chabe Taitabe uabaina. ² Chora sënjanuena celocana canÿe shauenanana, mo bëtscá béjayënga y bëts juezasana shauenanancá; y chë shauenanana enjamna mo chë arpësha

uenanayënga chëngbe arpëshangá tmojtsabuastocá. ³Chënga canyë tsëm canto montsancánta Bëngbe Bëtsabe delante, chë chabe uámana puesto y chë cháftaca canta Ainënga y chë bëtsëjëmënga amëndayëngbe natsanentšë. Y ndocná quenjátanobena chë canto juatsjínÿana, nÿe chë canyë patse y canta bnëtsana y canta uaranga quem luarentšëngbentsana atsebácanëngna aínë. ⁴Chënga monjanmëna chë shembásaftaca ndocna bacna soye tmonjanmënga, er chënga imojanenománda chca bacna soyënga ndoñe ntsamama; chë Oveshatema ndémoye tojtsá y chëngnaca choye jtséstonana. Chënga imojamna chë natsanënga chë quem luarentša entsánguentšë atsebácanënga jtsemnama, y chënga atsebácanënga imojtsemna Bëngbe Bëtsá y chë Oveshatema jtsaservénama. ⁵Chënga ndocna te tmonjanobosteró; ndocná quenátobena jayanama chënga bacna soye tmojanma ca.

Ntšamo chë unga angelënga tmojánayana

⁶Chentsana inÿe ángel sënjáninÿe, tsbanánoca celëjana enjétsongüefjnaye. Cha enjánbomna canyë nÿets tempscama oservena buayenana soye, entsángbioye jáuyanama, nÿets quem luarentšë oyenënga, nÿetsca mándayëngbentsa entsanga, nÿetsca cachca buñe bomna entsanga, nÿetsca biyañe bomnëngbeñe y nÿetsca canyë entsángbiama. ⁷Y jabuache mëntšá enjétsichamo: “¡Bëngbe Bëtsabiama šmochjájuaboje cha nÿetscangbiama chë más uamaná endmënama, y cha šmochtsatschuanaye, er ya tonjóshjango chë tempo ntšamo entsanga tmojamama tšabá o ndoñe tšabá bëtsemnama cha cháuyanama! ¡Chë celoca y quem luare, chë mar béjaye y nÿetsca chë

fshantsentsana óbocana béjayënga tojamá šmochtsadorana ca!”

⁸Chábentsana inÿe ángel mëntšá enjétsichamo: “¡Ya bëts castigo, ya bëts castigo chë Babilonia bëts puebloca entsángbeñe echántsemna!, ndëmuanÿenga tmojinÿanÿé ntšamo puerte bacna soyënga shembása o boyabásaftaca jtsamama y inÿe corente bacna soyëngnaca, y chentsana nÿets quem luarentša entsanga mo cach Babilonioquëngcá tmojama. Chë causa, Bëngbe Bëtsá echanjama chëngbiámnaca chabe uabouana castigo chaotsemnama ca.”

⁹Chë útatbentsana inÿe ángel jabuache mëntšá enjétsichamo: “Nderado nda chë uabouana bayábioye y chë chábioye jadórama pormana soye tojtsadorana, y tojalesenciá chabe uinÿnanana soye juentsaca o cucuatšíñe chamojajoma, ¹⁰chánaca bontsemna, chë Bëngbe Bëtsabe uabouana castigo jasúfriana. Entsanga puerte bacna soye tmojamama, Bëngbe Bëtsá puerte tbojetna, y chë causa echanjama chë castigo chëngbeñe chaotsemnama. Y chë uámana angelënga y chë Oveshatembe delante, chë bayá adorayábioye puerte mochanjatsetšená, íñeshe y azúfrecá. ¹¹Chca chamojtsesufrina ora, becá ngona echantsóbocana, y chë ngona nÿets tempo chca echantsótsjuaye; y chënga, chë uabouana bayá y chábioye jadórama pormana soye adórayënga, y chabe uinÿnanana soye bomnëngbiama, ndocna te chë tsetšanana queochatëjbana ca” —cha enjétsichamo.

¹²Chíyeca quem luarentšë entseyta, chë Bëngbe Bëtsabe mandënga obedecëngna y Jesúsbeñe puerte ošbuáchiyana bomnënga, chë Bëngbe Bëtsabe entsanga, padecena soyënguñe

tmojtsemna ora, puerte uantana jtsemnana.

¹³ Chentsana canye oyebuambnayana celocana sēnjanuena, mēntšá šonjétsatsaye: “Mēntšá mábema: “Tša oyejuayēnga mochántsemna chē mēntescana mochjóbānēnga, Bēngbe Utabnáfata cányiñe mo canyáca jtsomñese ca.”

“Añe ca” —chē Uamana Espiritu tonjayana—, “chēnga ya ndoñe más queochátamna jatrabájana, ni jasúfrina, er chēnga tmojama tšabe soyēnga Jesús jaserviama, y chē soyēngama chēnga tšabe bendicionēnga mo uacancá celoca mochanjójyēngacñe ca.”

Ndayá chē angelēnga quem luarentše tmojanatbaná

¹⁴ Chora más sēnjáninye; sēnjáninye canye fjantse jantšetēshe, y chēshiñe canya enjétsatbemana. Cha enjamna mo canye entšacá; chabe bestšašiniñe enjanábomna canye castellano coronésha, y cucuatšiniñe canye puerte efsana mētštá enjétsatbēna. ¹⁵ Chentsana, chē celoca Bēngbe Bētsabe bēts yebnentsana inye ángel tonjánbocna, y jabuache bonjétsatsaye chē jantšetēshiñe tbemanábioye: “¡Acbe mētštaca machbonja y shajuanēnga matbaná, er chē játbanama tempo ya tonjóshjango; chē quem luarentša shajuana ya tonjaboche ca!” ¹⁶ Y chē jantšetēshiñe enjantbemaná chabe mētštaca quem luariñe tonjánachbonja, y nyets quem luarentše atbanániñe tonjanoquedá.

¹⁷ Chentsana inye ángel chē celoca Bēngbe Bētsabe bēts yebnentsana tonjánbocna; chánaca canye puerte efsana mētštaca. ¹⁸ Y chē altarentšana inye ángel tonjánbocna, chē mando bomná ñesheca castigo entšangbiama jamama; y chē puerte efsana mētštá bomna ángelbioye jabuache tbonjaniyana: “¡Acbe mētštaca machbonja y chē fshantsoca nyetsca uvas

betiyeshēnguentša uvasēšangá mátabe, er ya uabochenēšangá entsamna ca!”

¹⁹ Y chē ángelna chabe mētštaca quem luariñe tonjánachbonja, y nyetsca quem luarentša uvasēšangá tonjanátabe, y lempe chē juantšetetjama luaroye tonjanēšana. Chē soye entsinýinýná ntšamo yochtsemnana Bēngbe Bētsabe uabouana castigo. ²⁰ Chē uvasēšangana, chē bēts pueblentsana chaboye tmonjanantšetetje, y chē luarentšana tša buiñe tonjanóbocna; tonjanojutjé couayēngbe uayashbenēshantscoñe y mo unga patse kilómetrēnga tonjanábuashana.

Chē angelēnga chē canýsēfta pochócaye soyēngaca

15 Chentsana, inye bēts soye entšanga inye soyama jinýañiyama, celoca sēnjáninye, canye puerte bēts soye: canýsēfta angelēnga canýsēfta pochócaye soyēngaca, chē ústonoye pochócaye soyēnga. Chē soyēnga chaojtsemnentsana ya ndoñe inye pochócaye soye yochántsemna, er chēntscoñe Bēngbe Bētsá yochjacistiga, lempe ntšamo cha jamama tojanjuabocá.

² Canye mar bējaynaca sēnjáninye, mo cristalcá enjétsinýna ñeeca enájuañiye; y chē bējaye juachaca monjétsatsana chē tšabá tmojanbocnēnga, y ni chē uabouana bayá, ni chē chábioye jadórana pormana soye ndoñe tmonjánadoranga, y chē uabouana bayabe uabainama yomna número chēngbeñe chaotsemnana ndoñe tmonjanlesencianga. Nyetscanga

chēnga monjétsabomna Bēngbe Bētsá tojanētsatá arpangá. ³ Chēnga, canye canto monjétsacantaye ntšamo Moisés, chē Bēngbe Bētsabe oservená tojancantacá, y ntšamo chē Oveshatema tojancantacá. Mēntšá monjétsacantaye:

Puerte bëts soyënga y tšabe soyënga
entsemna lempe ntšamo aca
tcojamcá,

Bëngbe Utabná Bëngbe Bëtsá nyets obe-
nana bomná;

lempe ntšamo jtsamëse aca icyena,
acbe bominyiñe puerte tšabe y nde-
gombre soyënga yomna,

nyëts luarëngnache entsangbe Rey.

⁴Bëngbe Utabná, ¿nda nanjájuaboye aca
nyëtscangbiama ndoñe más bëtsá
condmëna ca,

o ndoñe cmantsatschuanaye?

Nye aca uamaná condmëna;

nyëtsca mándayëngbentša entsanga
ácbioye mochanjabo,

ácbeñtše mochanjoshamentšiyë aca
jadórama,

er ntšamo tcojamcá lempe entsángbioye
mora tcojinñanyé,

y lempe ntšamo aca tcojamcá tšabá jt-
semnana ca —monjëtsecantaye.

⁵Chca chentsana sënjanontjësé y
sënjáninyë chë celoca Bëngbe Bëtsabe
bëts yebna tonjantëfjo, chë Bëngbe
Bëtsá Moisésbioye tbojaniyé leyënga
uajajónentše. ⁶Y Bëngbe Bëtsabe
bëts yebnentšana tmonjánbocna chë
canysëfta angelënga, chë canysëfta
pochócaye soyënga uambayënga,
uafjantse lino entšëjuangá uabuash-
inñinñanëjuangá uichëtjonënga, y
tëntša castellano uasnanëjëngaca
cochóntscoñe. ⁷Chentsana, canya chë
canta Ainënguentšá chë canysëfta
angelëngbioye tonjanoyé canysëfta
castellano codbenga jútjena chë Bëngbe
Bëtsabe uabouana castígoca; Bëngbe
Bëtsá chë nyets tempo y nyëtsca
tescama vida bomná. ⁸Chorna, chë
Bëngbe Bëtsabe bëts yebna celoca becá
ngónaca tonjanojutjé, y chë ngona
enjétsobocana Bëngbe Bëtsábentšana,
chabe buashinñyanana y obenana
jtsinñanñayëse; y Bëngbe Bëtsabe
bëts yebnoye ndocná quenjátanobena

jamashënguana, chë canysëfta
angelëngbe canysëfta pochócaye
soyënga candochnënguëntscuana.

Chë castígoca codbenga

16 Chentsana, canye jabuache oye-
buambnayana sënjanuena, chë
celoca Bëngbe Bëtsabe bëts yebnentšana
enjétsobocana, y chë canysëfta an-
gelëngbioye mëntšá enjétsëtsësnaye:
“Motsajna y quem canysëfta codbenga,
chë Bëngbe Bëtsábiocana endóbocana
uabouana castígoca, fshantsoca šmoch-
jabuashcja ca.”

²Chora chë natsana ángel tonjána
y chabe codbé quem luariñe ton-
janbuashcja, y nyëtsca entsanga chë
uabouana bayabe uinñyanana soye bom-
nënga y chë chábioye jadórama por-
mana soye adórayëngbe cuerpiñe bañe
bacna nguayanana tonjanóbocna, puerte
tsetšënana.

³Chentsana, chë inye ángel chabe
codbé mar bëjayoca tonjanbuashcja, y
choca býyeshe buiñcá tontsanóbema,
mo canye entšá obanabe buiñcá, y
nyëtscanga chë mar bëjayoca vida bom-
nënga tmontsanóbana.

⁴Chora chë inye ángel chabe codbé
bëjayënguiñe y bëjaye obocanënguiñe
tonjanbuashcja, y buiñe tontsanobiama.

⁵Chentsana sënjanuena, chë bëjayën-
guiñe mando bomna ángel mëntšá
enjétsichamo:

Aca nyëtsca soyënguiñe tšabá amá
condmëna,

er aca tcojayana chë quem luarentša
entsanga chca castigánënga
chamotsemnana.

Bëngbe Bëtsá, Uamaná, mora chca cond-
mëna y chca conjamna;

⁶er chënga tmonjama, chë acbe
entsanga

y acbe juabna oyebuambnayëngbe buiñe
chauábuashanama, jtsëbáyëse;

y mora tconjama chënga buiñe chamofsema.

Nyets mercedo imobuájona chca japásama ca —cha enjétsichamo.

⁷Altarcánëna canye oye-buambnayana sënjanuena, mëntšá enjétsichamo: “Aíñe, Bëngbe Utabná, Bëngbe Bëtsá, nyets obenana bomná condmëna, y ntšamo entšanga contsacastigacá, ndegombre y tšabá entsemna ca.”

⁸Chentsana, chë inye ángel chabe copbé shinýiñe tonjanbuashcja; chë shinýe corente tontsanobonyaná y chíyeca entšangbiocyte íñesheca tontsanajuinýé. ⁹Y nyetscanga uabouancá juinýnënga tmonjanoquedá; pero chënga ndoñe chemátanbošëna bacna soyënga amana jtsajbanana, ni Bëngbe Bëtsabe benache jtishachana, ni chábiocyte quemëntétsatschuanaye, más chabe contra ba soyënga montsanichamo; cha nda obenana yobomna chëngbiocyte chë pochócaye soyënga jíchmuama, chënga chamosufrima.

¹⁰Chentsana chë inye ángel chabe copbé chë uabouana bayabe uámana puestiñe tonjanbuashcja, y nyets chabe amëndayiñe ibetiñe tonjanoquedá. Chë entšanga bichtaja montsanenó-jantsnaye, yapa tsetše causa; ¹¹pero ni chca, chë entšanga chematanajbaná bacna soyënga jtsamana, ndayá chë yapa tsetšama y chë chëngbe cuerpiñe bacna nguayanana causa, chë celoca Bëngbe Bëtsabe contra ba soyënga montsanichamo.

¹²Chentsana chë inye ángel chabe copbé chë bëts fshájaye Eufrates ca uabáiniyiñe tonjanbuashcja y chë béjaye tontsanbuashjo, japróntama chë shinýe bocanoica luarënguentša reyënga y chëngbe soldadënga chëjana chámuachnéjnama.

¹³Atše sënjáninye, chë dragonbe uayáshoicana, chë uabouana bayabe uayáshoicana y chë ndoñe ndegombre Bëngbe Bëtsabe juabna oyebuamb-nayabe uayoicana tmonjánbocna unga bacna espíritënga; mo sapošëngcá monjétsinýna. ¹⁴Chënga monjamna bayëjëngbe espíritënga; bëts soyënga monjánama obenana jinýanýiyama, y montsanbocana nyets luarentša reyënga jáchembuama, chë uámana te, ndayté Bëngbe Bëtsá, chë nyets obenana bomná yochjabo entšangbiana jabáyanama ntšamo chënga tmojamama, chë te chënga chabe contra chamotsetsjama.

¹⁵Bëngbe Utabná Jesucristo mëntšá tojayana: “Šmochjinýe, atše nye ndeolpe chanjabo, mo canye atbëbanacá, chabiana ndocná tontsejuabná ora; chíyeca oyejuayënga mochántsemna atše jabama tmojtseprontanënga, mo nda tojtsefsna y chabe entšayá totsaboprontañacá, nye enasá ndoñe chaondëtsemnama, y entšanga chca tmojinýe ora ndoñe chaondëtsëuatjama ca.” ¹⁶Y chë bacna espíritëngna chë reyëngbiocyte tmonjanënatse canye luare, hebreuiñe Armagedón ca uabáinoe.

¹⁷Chentsana, chë ústonoye ángel chabe copbé quem luarentša tsbanánoca tonjanbuashcja, y chë celoca Bëngbe Bëtsabe bëts yebnentša uámana puestentšana canye jabuache oyebuambnayana tonjanóbocna, mëntšá enjétsichamo: “¡Chë jopásama enjamna soye ya tocjochnëngo ca!”

¹⁸Chora enjésemna tcuinýënga, shauenanana y juesasanana, y quem luariñe tontsanangmémana, yapa jabuache quem luare tontsanëbanjó causa; quem luarentše entšanga imobinýna orscana, ndocna te nýa chca quem luare tontsanëbanjó. ¹⁹Chë puerte bëts pueblo úngañe tontsanajatá, y nyets luarentša bëts pueblënga tontsanáshajaye, y Bëngbe

Bëtsá tojanenojuabó chë puerte bëts pueblama, Babilonia ca uabaina pueblama, chentša entsanga chë uabouana castigo chamotsebomnama, Bëngbe Bëtsá tša tbojánetna causa, tša bacna soyënga chentše tmojanmama. Y chca, chë chëngbe bëts pueblo úngañe tontsanajatá ora, cha chënga tonjanacastigá. ²⁰ Mar bëjayoca nyetsca fshantsënga y quem luarentša nyetsca tjañe tontsanenatjëmbe. ²¹ Celocana bëtsëtsa bëntstbenga entsángbeñe tonjantquécjána, chëbenga canta bnëtsana kilama más utbenga; y entsanga Bëngbe Bëtsabe contra ba soyënga tmonjánayana, er chënga tša montsansufrina chë bëts pochócaye bëntstá causa, y chë pochócaye bëntstá chëngbiana puerte jabuache castigo enjamnama.

Chë puerte bacna vida bomna shembásabe castigo

17 Canya chë canyësëfta angelënguentšá, chë canyësëfta copbenga monjanatbënënguentšá, tonjánabo y šonjanianya: “Mabo; cbochanjinjinyiye ntšamo yochtsemna chë puerte bacna vida bomna shembása, chë bëjayënguñe entsetbemanabe castigo. ² Quem luarentša mandadënga cháftaca puerte bacna soyënga tmojama, y quem luarentša oyenënga puerte tmojóyejuanga chë cháftaca bacna soyënga amama, mo chë bacna vida bomna shembásabe vínoyeca puerte cuafjotmenangcá ca.”

³ Chentšana chë ángel, atše chë Uámana Espíritbeyeca corente mandaná jtsemnëse, šonjanánatse entsanga ndoyena luaroye. Choca sënjáninje canye shembása, canye uabouana buángana bayábeñe enjaquená; chë bayabe cuerpiñe nyëtsañe Bëngbe Bëtsabiana puerte bacá oyebuambnaye uabaina enjétsabemana,

y enjånbonna canyësëfta bestšaše y bnëtsana tsëtjonëse. ⁴ Chë shembása enjanichétjona uámana shbuenda uafjatsenga y buángana entsáyá, y entsanbotamana castellánoca, uámana botamana ndëtsëtëmëngaca y pérlica. Chabe cucuatšinë canye castellano copbé enjétsatbëna, jútjena puerte uaboyënja soyëngaca, y chë boyabásengaftaca cha tojanma puerte bacna soyëngaca. ⁵ Y chabe juentsaca canye uabaina enjétsabemana, ndoñe josërta soye, mëntšá: “Chë puerte bëts pueblo Babilonia, tša bacna entsanga chentše, mo chë puerte bacna vida bomna shembásengbe bebmá cuaftsemncá; chentšana tojanóbocna quem luarentša nyetsca puerte uaboyënja soyënga ca.” ⁶ Atše sënjáninje chë shembása tëmiá, er cha tojanofsé chë Bëngbe Bëtsábenga imojamnëngbe buiñe, ndëmuanyëngbiye tmojanëbaye Jesusbiana oyebuambnaye causa.

Chca sënjáninje ora, tša sënjanenjananá. ⁷ Chora chë ángel šonjanianya: “¿Ndáyeca tcojenjnaná ca? Atše cbochanjauyana ntšamo vojtsayana chë shembása y chë chábiye bontsambá uabouana bayá, chë canyësëfta bestšaše bomná y bnëtsana tsëtjonëse; chë soye ndocná quenátstatsëmbo. ⁸ Chë tconjinje uabouana bayá, tempo chca enjamna, pero mora ya ndoñe. Chë corente bëts tboicana cha echanjesetsjuá, pero lempe pochocaná jtsemnama chca echántsaye. Quem luarentše oyenënga, ndëmuanyëngbe uabaina quem luare jobojátšama orscana ndoñe yonduábemana, chë tšabe vida mochjónyëngbe uabaina iuábemana librësañe, chënga mochanjenjnaná, chë bayá chë tempo enjaniená y mora ya ndoñe, pero cachiñe yochjésabama chamojinje ora.

⁹“Muentše canye soye entsemna chë chca josértama chamojobenangiama: chë bayabe canysëfta bestšaše endmëna canysëfta tjañe ndayiñe chë shembása entsetbemana; chë bestšašëgnaca mondmëna canysëfta mandadënga. ¹⁰Chentšana, shachnëngbe amëndayana ya tonjochnëgo, canya mora entsetbemana jtsamëndayama y chë inya cabá ndoñe tonjášhango. Y cha chaojášhango ora, ndoñe bënama cha queochaisemánda. ¹¹Chë tempo enjaniyena uabouana bayá pero mora ya ndoñe, endmëna chë canysëfta mandadënguentshana inye mandado, pero chánaca chë inye canysëftangcá endmëna y lempe pochocaná jtsemnama entsá.

¹²“Chë tconjinye bnétsana tsëtjonëše mondmëna bnétsana mandadënga, jamëndama cabá ndoñe tmonjójayenga; pero básefta tescama cányiñe chë uabouana bayáftaca, mando mo reyëngcá mochanjóyëngacñe. ¹³Quem bnétsanënga nyetscanga cachcá mochántsejuabnaye, y chë uabouana bayábioye chëngbe obenana y mando mochanjátsetaye. ¹⁴Chë Oveshatembe contra mochántsejtanaye; pero chë Oveshatema echantsayëñaná, er chë Oveshatema endmëna nyetsca amëndayëngbiama chë más uámana Utabná y nyetsca reyëngbiama chë más uámana Rey. Chë bnétsana mandadënga cháftaca mochántsejtanaye ora, cha chentše chabe entsángaftaca cányiñe echántsemna. Chënga mondmëna chë cha tojáchembo y tojubuáyanënga y chábeñe sempre ošbuáchiyënga ca” —cha šonjaniyana.

¹⁵Chë ángel mentsánaca šonjaniyana: “Chë tconjinye béjayënga, ndayiñe chë bacna vida bomna shembása entsetbemana, mondmëna nyetsca canye luarentša entsanga, enutanana entsanga, nyetsca biyañe oyeuamb-

nayënga y nyetsca mándayëngbentša entsanga. ¹⁶Y chë uabouana bayábeñe tcojinye bnétsana tsëtjonëše y chë uabouana bayá, chë bacna vida bomna shembásabioye mochantsáboyënja; enašá cachcá mochanjesonýaye; chabe cuerpentša mentsëna mochantsósañe y ññesheca mochántsejuinýiye, chaopochocantscuana. ¹⁷Bëngbe

Bëtsá tojama chë bnétsanënga ainaniñe tša chamotseboše, ntšamo cha yobošcá chamotsamama. Chca, chënga mochanjenóyeunaye chëngbe mando chë uabouana bayábioye jantšabuáchiyana, ntšamo Bëngbe Bëtsá tojayancá chaojopasantscuana. ¹⁸Chë tconjinye shembása chë puerte bëts pueblo endmëna, chë ndayentša mandadënga nyets quem luarentša mandadëngbeñe mando mondbomna ca” —cha šonjaniyana.

Babilonia japochócama

18 Chentšana inye ángel sënjaninye, celocana enjétsastajauana, puerte obenana bomná, y chabe buashinýinýananaca nyets quem luariñe entsanbinýna. ²Chë ángel jabuache mentsá enjétsichamo:

¡Ya mochantsepochoá, ya mochantsepochoá chë uámana pueblo Babilonia!

¡Chentše tojtsóbema diablëngbe oyeniñe, nyetsca bacna espírituengbe oyeniñe, y ndoñe tšabe y uaboyënja shloftëngbe oyeniñe!

³Er nyetsca quem luariñe mándayëngbentša entsanga puerte bacna soyënga tmojama chentša entsangbe causa, mo chë bacna vida bomna shembásafataca bacna soyënga cuafjamcá, mo puerte cuafjotmenangcá chë bacna vida bomna shembásabe vínoyeca.

Njetsca luarënguentša mandadënga
puerte bacna soyënga tmojama,
mo chë shembásaftaca bacna soye
cuafjamcá,
y quem luarentša obuámnañënga y
enënga, bomnënga tmojobiama
chentša entsãnga yapa crocénana
nyë ndayíñnaca ntsejuabnycá
gástaye causa ca —cha
enjétsichamo.

⁴Chentsana, celocana inyë
oyebuambnayana sënjanuena, mëntšá
enjétsichamo:

¡Chë bëts pueblentsãna maisebocana!,
tšëngaftanga chë atšbe entsãnga
šmommnënga,
chë chentša entsãnga mondbët-
sama bacna soyënga ndoñe
chašmondétsamama,
ni chë chëngbioye japochócama
soyënga tšëngaftangbiama cach
ndoñe chaondëtsemnama.

⁵Chënga tša bacna soyënga tmojama,
tša bëtscá nyã mo celóntscoñe
cuafjojutjecá,
y Bëngbe Bëtsá mora entsejuabná
chënga tša puerte bacna soyënga
tmojama causa, chë soyëngama
jácastigama.

⁶Ntšamo chentša entsãnga ínÿengbiama
ndoñe tšabá tmonjamcá,
chë entsãngbiámnaca cachcá
chaotsemna;
ntšamo tmojamama, cabá uta soye
más cachca soye chëngbiama
chaotsemna;
ntšamo chentša entsãnga ínÿenga
chamosufrima tmojamcá,
chëngnaca cachcá uta soye más
chamosufrí.

⁷Chënga corente jtsenábotamnayana y
yapa crocénana nyë ndayíñnaca
ntsejuabnycá jtsegástayana;
chë causa, chënga entsamna puerte
jasúfriama y becá tsetšanana
jtsebomnama.

Er chëngbe ainaniñe mëntšá
jtsejuabnayana:

“Muentše mo reyëngcá mondëtbiámana.
Viudacá ngménaca ndoñe
quemuátsmëna; tondayama
quemochátssufrina ca.”

⁸Chíyeca, canyë ora pochócaye soyënga
chëngbiama echanjóshjango:

jóbanama šocanënga, puerte ngménana
y jabuache shëntsana,

íñeshca lempe chëngbeñe
echántsejuinyë;

er Bëngbe Bëtsá corente obenana bomná
endmëna,

Bëngbe Utabná chë chënga chca castigo
chamotsebomnama tojayaná ca —
cha enjétsichamo.

⁹Quem luarentša mandadënga,
chentša entsãngaftaca puerte bacna
soyënga tmojamënga, y chëngaftaca
nyë ndayíñnaca yapa crocénana,
ntsejuabnycá tmojagastanga,
mochanjošachna y puerte ngmenánaca
mochántsemna, chë bëts pueblo
chaojtsangbototjuantëša ngona
chamojinÿe ora. ¹⁰Chentsana bënoca
mochanjoquëda antješna, chë uabouana
castiguama auatja causa, y chentša
entsãngbiama mochanjayana:

¡Tša lastema, tša lastema tšëngaftanga
chë uámana bëts pueblo,
Babilonientše oyenëngbiama, chë
tša obenana binÿnentše!

Canyë ora tšëngaftangbe castigo tojósh-
jango ca —mochántsichamo.

¹¹Chë quem luarentša obuámnañënga
y enëngnaca mochanjošachna y
ngmenánaca mochántsemna chë
pueblentsã entsãngbiama, er chora
ya ndocná queochátsmëna chë
chënga tmojúshjango soyënga
chamobuámiñama: ¹²tmojúshjango
castellano soyënga, midio soyënga,
uámana y botamana ndëtšbenga,
perlënga, uámana lino y shbuenda
uafjatsenga entsáyá y sedéjua y uámana

uabuángana entsáyá; nyetsca botamana uanguëtse betiyënga, marfiloca pormana soyënga, uámana niñésëngaca pormana soyënga, bronce soyënga, hierro y marmol soyënga; ¹³bëtscá canela y inye botamana uanguëtse y tamna soyënga, botamana uanguëtse béjayënga, incienso y mirra; vínoye, aceitiye, uámana arninýá, trigo; bayënga ndayánaca uasmëmnayënga, oveshënga, couayënga, cochëshangá y entsànga nyets tempo nye inyabiama oservenëngnaca. ¹⁴Y chë pueblentsá entsàngbiamana mochanjayana:

¡Chë tša cmonjanogúsetana jtsebom-nama soyënga, mora ya ndoñe quešmátsbomna;

chë uámana y buashinýinýana soyënga y tša bomnana lempe šmojobuetše, y ndocna te más cachca soye queš-mochátsbomna ca!

¹⁵Chë soyënga enënga, chë bëts pueblentsá entsángbeyeca bomnënga tmojanobiamënga, bënoca mochanjoquéda antješna, chë bëts pueblentsá entsàngbiamana tša bëts castiguama auatja causa; mochanjošachna, puerte ngmenánaca mochántsemna. ¹⁶Y mëntšá chentsá entsàngbiamana mochanjayana:

¡Tša lastema, tša lastema tsëngaftanga chë uámana bëts pueblentsé oyenëngbiamana!

Chë enjáninýna mo canye shembasacá, uámana lino entséjua uichëtjoná, uámana shbuenda uafjatsenga y uabuán-gana entsáyá uichëtjoná, botamananá castellánoca, perlënga y uámana botamana ndëtsbéngaca.

¹⁷¡Y canye ora chabe tša bomnana lempe tojtsopochocá ca! —mochanjayana.

Nyetsca chë barquënguentša mándayënga, chentsá entsànga inye luaroye ajnënga y chentsá

trabájayënga, y nyetscanga chë vida onguayiñe mar béjayoca trabájayëngnaca, chentsana bënoca mochanjoquéda antješna, ¹⁸y chë bëts pueblo chaojtsangbototjuanentsá ngona chamojinýe ora, jabuache mochanjayana: “¡Quem uámana bëts pueblécá ndocna inye pueblo cachcá quenátsmëna ca!” ¹⁹Chca chamojinýe ora, ngménama bestšašiniye polvëshe mochántsenotboto, y mëntšá mochántseyona ošachiyënga y puerte cochtsetšenánënga:

¡Tša lastema, tša lastema tsëngaftanga chë uámana bëts pueblentsé oyenëngbiamana!

Chentsá bomnánaca bomnënga tmojanobiamana nyetscanga chë mar béjayoca barco bomnënga.

¡Canye ora lempe tojtsopochocá ca! —chënga mochántseyona.

Chora chë ángel tonjánayana:

²⁰¡Celoca oyenënga móyejuanga chë pueblo chca tojapasama;

y tsëngaftángnaca móyejuanga, Bëngbe Bëtsabe entsànga, Jesucristbe ichmónënga y Bëngbe Bëtsabe juabna oyebuambnayënga,

er chca jacastígase, Bëngbe Bëtsá tojama chënga chamosufrima, ntšamo tsëngaftanga chašmosufrima chënga tmojanmcá ca! —cha tonjánayana.

²¹Chentsana, canye ángel puerte obenana bomná, canye ndëtsbé tonjanatsbaná, mo canye bëts nantsnëbé ndëtsbecá, mar béjayoye tonjanashbuetše y mëntšá tonjánayana:

Mëntšá, nye ndeolpe y jabuache, Babilonia chë uámana bëts pueblo mochántsetsatše, y ndocna te más quem pueblo queochátsmëna.

²²Chentsé, ndocna te más quemochátuenana

arpangá uabuástoyana, ni cantayana, flautēfjēnga y trompetēfjuangá cach ndoñe;

ndocna te más quemochátsmēna obrerēnga,

ni chē nantsnēbeñe trabájayana quemochátuenana.

²³ Chentše, ndocna te más ndocna uajuinñanésha queochátsbinñaye, ni casamento fiestentša enbouenanana quemochátuenana.

Er chē bēts pueblo chca mochantsepochóca,

masque chentša obuámnañēnga y enēnga nyets quem luarentse chē más bomnēnga monjamna,

y chentša bocjuanánaca nyetsca luarēnguentša entsānga ingñénēnga monjamna ca —cha tonjánayana.

²⁴ Bēngbe Bētsá chca chē bēts pueblentše echanjama, er chentše tmojínjēna chē Bēngbe Bētsabiama trabájaye causa tmojanóbanēngbe buiñe; chē chabe juabna oyebuambnayēnga, chabe entsānga, y chē chábioye oservénama nyets quem luarentse tmojtsēbayēngbe buiñe.

19 Chentšana celoca sēnjanuena mo mallajta entsānga cuaftsayebuachcá, mēntšá monjétsichamo:

¡Bēngbe Utabná matschuanga!

Bēngbe Bētsá endmēna nda chabe entsānga tojatsebacá;

cha puerte uámanana, buashinñinñana y mando endbomna,

² er ndayama cha tojayancá ndegombre jtsemnana,

y ntšamo tšabá chama tojtsemncá.

Cha chē uachuana bacna vida bomna shembásabioye tbojacastigá.

Chē shembásabe puerte bacna soyēnga causa,

nyets luarentša entsāngnaca bacna soyēnga tmojama.

Chábioye chca jacastigase,

Bēngbe Bētsá tojama ntšamo jamama ibomerecencá,

chábioye oservénēnga chē shembásabeyeca tmojóbana causa ca — chēnga monjétsichamo.

³ Y cachiñe mēntšá tmonjánayana:

¡Bēngbe Utabná matschuanga!

¡Chē bēts pueblo pueblo japochócama uangbototjuanentša ngona nyetsca tescama chca echanjósjuaye ca!

⁴ Y chora, chē uta bnētsana y canta bētsējēmēnga amēndayēnga y chē canta Ainēnga tmonjanoshamentšé, y Bēngbe Bētsá, chē uámana tbemanentše enjēt-

setbemanabioye tmonjanadorá, mēntšá jayanēse: “¡Chca chaotsemna! ¡Bēngbe Utabná matschuanga ca!”

⁵ Y chē uámana puestentšana canye oyebuambnayana tonjanóbozna, mēntšá:

Bēngbe Bētsá matschuanga, nyetsca chabe oservénēnga

y chē nyetscangbiama cha chē más uamaná yomnama juabnayēnga,

básēnga y bētsétsānga ca.

Chē Oveshatembe casamento fiesta

⁶ Y sēnjanuena mo mallajta entsāngbe oyebuambnayancá, mo bētscá bėjaye cuaftsobonjnacá y mo bēts juesasanana shauenanancá; mēntšá monjétsichamo:

¡Bēngbe Utabná matschuanga!

Er Bēngbe Utabná, Bēngbe Bētsá nyets obenana bomná tojontsé jamándana.

⁷ Puerte móyejuanga y mochjínñanyeye Bēngbe Bētsá puerte bētsá y uamaná bētsemnana,

er mora entsemna mo chē Oveshatembe casamento te cuaftjoshjangcá;

chabe shema yochjabocná puerte tojtenobotamá;

⁸ tmojalesenciá cha chauatíchéto uámana, nduatsēnga uafjantse y uabuashinñinñana lino entsáyá.

Chē shema entsinñinñá chē Bēngbe Bētsabe entsānga;

y chë lino entsáyá jtsichétjonana entsinýinýná chënga lempe ntšamo tšabá yomncá jtsamëse imoyena ca —chënga monjétsichamo.

⁹Chentsána chë ángel šonjaniyana: “Mëntšá mábema: ‘Oyejuayënga chë Oveshatembe casamento fiestama óf-janënga ca.’” Y mëntšánaca šonjaniyana: “Chca, ndegombre Bëngbe Bëtsabe palabrënga endmëna ca.”

¹⁰As chabe shecuatšëntše sënjanoshamentšé cha jadórama, pero cha šonjaniyana: “Ndoñe, átšeftaca ndoñe chca mátamana, er atše Bëngbe Bëtsabe canye oservená sëndmëna, ntšamo aca condmëncá, y chë Crístbeyeca acbe catsátanga, ntšamo chabiama motatšëmbcá y chabe ndegombre palabrënga nýets tempo imabuayinyanga mondmëncá. Aca cmontsemna Bëngbe Bëtsá jadórama ca.”

Ndayá Jesús tojanma y tojanayancá, endama chë Bëngbe Bëtsabe juabna oyebuambnayënga chëngbe ainaniñe osertánana y añemo chamotsebomnama, chë soyëngama entsángbioye jábuayenama.

Chë fiantse couayiñe enjaquená

¹¹Chora sënjáninýe celoca atëfjniñe; canye fiantse couaye enjésemna y chë chábeñe enjaquená enjanabaina “Ntšamo tojašëbuachenacá amá” y “Ndegombre oyebuambnayá ca”, er ntšamo tšabá yomncá cha tojanjuabó y tojanma entsángaftaca; y chca chabe uayayëngaftaca monjánentsjanaye. ¹²Chabe fšnëbenga mo iñeshcá enjáninýna, bestšašinë ba uabuashinýinýana coronëshangá enjanábomna, y canye uabaina chábeñe enjanábemana; nýe cha chë uabaina yojanábuatma. ¹³Cha enjanichétjona buñeca unétjona entsáyá y chabe

uabaina enjamna “Bëngbe Bëtsabe palabra ca”. ¹⁴Y chabe ústonoye monjétsajna mallajta soldadënga celoquënga, nduatsenga uafjantse y uámana lino entsáyá uichétjonënga, fiantse couayënguñe enjaquenënga. ¹⁵Chë enjétsenbatsanabe uayoicana enjanóbocana canye puerte efsana espadëja, chë Bëngbe Bëtsabeñe ndošbuáchiyënga játatsetšama. Cha puerte obenánaca echántsamëndaye, mo canye hierro varëfjaquécá. Cha echanjama entsángaftaca monda uvasëšangá juantsëtetjama tojtsabotajná ora cuafjamcá; y echanjama chënga chamotsebomnama chë puerte uabouana castigo, Bëngbe Bëtsá chë nýets obenana bomná tbojetna causa. ¹⁶Chabe uabonjaníyañe y chabe mëntjoca canye uabaina enjanábemana: “Nýetsca reyëngbiama chë más uámana Rey, y nýetsca amëndayëngbiama chë más uámana Utabná ca”.

¹⁷Chentsána canye ángel sënjáninýe, shinýiñe enjétsatsana, chë celoca tsbanánoca nýetsca monjanongüefjná shloftšënga jabuache mëntšá enjétsëtsëtsnaye: “¡Mabënga, menefjna chë Bëngbe Bëtsá tojaprontá bëts saná jasama; ¹⁸chašmosama reyëngbe mëntšëna, soldadënga amëndayëngbe mëntšëna y valente entsangbe mëntšëna, couayënga y chëngbeñe enjaquenëngbe mëntšëna, y nýetsca entsangbe mëntšëna, cachëngbiama trabájayënga y nýe ínýabiama nýets tempo trabájayënga, básesenga y bëtsëtsanga ca!”

¹⁹Chora atše sënjáninýe chë uabouana bayá y quem luarentša reyënga chëngbe soldadëngaftaca tmojánenefjna, chë fiantse couayiñe enjaquená y chabe soldadëngaftaca jéntsama. ²⁰Chë uabouana bayá tmonjanotbá, y cháftaca chë Bëngbe

Bëtsabe ndoñe ndegombre juabna oyebuambnayá, chë bayabe delante ba bëts soyënga tonjanmá obenana jinýanýiyama; y cha chë soyëngaca tojanaingñé chë uabouana bayabe uinýnanana soye chamuayentšjajoma tmojanlesencianga, y chë chábioye jadórana pormana soye adórayënga. Y chë útatbioyna ainata tmonsanatmetšë chë ñeshëca uafjónayoye, chë azufre endëjuinýinýanentšë. ²¹ Chë ñyëngbioyna tmonsanapochocá chë fjtante couayiñe enjaquenabe uayoicana enjanóbocana espadéjaca, y nyetsca shloftšënga chëngbe mëntšénaca yapa tmontanoshachá.

Chë uaranga uata

20 Chentšana canýe ángel sënján-inýe celocana entsanastjajuana chë corente asentoye tboca llavéjaca, y canýe bëts cadenéjua entsanëtvena. ² Chë ángel tbontsanbá chë dragónbioye, chë tempsca mëtscuaye, chë Diablo y Satanás endmëná, y canýe uaranga uatama tbontsanbátsëca. ³ Chë corente asentoye tboye tbontsantsatšë, chentšë tbontsanëtame, y chentšë bëšáša tsen-gájašëca tonjaninýaná, ndotatsëmbcá jatëfjuama ndocná chaondobenama; y chca, chë dragón ndoñe chaondobená jabocnama entsanga jáingñama, chë uaranga uata candochnënguëntscuana; y chora, básefta tescama chë dragón mochanjétsboshjona.

⁴ Uámána puestënga sënjáninýe, y chiñe tmonjanotbiama chë entsanga tšabá o ndoñe tšabá tmonjamama jayanama obenana tmojanóyëngacñënga. Chë bestšašë jtsëstjanguëse tmojanóbanëngbe espíritëngnaca sënjánanýe. Chënga chca tmojanóbana, Jesús tojánayana soyënguñe y chë Bëngbe Bëtsabe buayenana soyënguñe sempre ošbuáchiye causa. Chënga ndoñe tmonjanadorá ni chë uabouana

bayá, ni chë chábioye jadórana pormana soye, y ndoñe tmonjanlesenciá chë bayabe uinýnanana soye juentsaca o cucuatšíñe chamuayentšjajoma. Y sënjáninýe chëngna tmontanayena y Crísoftaca canýe uaranga uatama montsanmánda. ⁵ Chë entsanga mondmëna chë natsanënga jtayenama, pero chë tempo chë inýe obanënga ndoñe chemëntétanayena, ndayá nýe chë canýe uaranga uata chentšana. ⁶ ¡Oyejuayënga y Bëngbe Bëtsabe entsanga, chë tmojtanayenënga chë obanënga chámuatayenama Bëngbe Bëtsá tojanma ora! Chënga ndoñe quenátamna chë nyetsca tescama castigo jtsebomnana, ndayá Bëngbe Bëtsá y Crístbioye mo bachnangcá chënga mochántseservena, y Crísoftaca chë uaranga uatama mochántsemandaye.

Satanás japochócama

⁷ Chë uaranga uata chaojochnëngo ora, Satanás chabe utámenocana mochanjétsboshjona; ⁸ y cha echanjábocna nyets luarentša entsángbioye, chë Bëngbe Bëtsabe soyëngama contra imomnéngbioye jáingñama, chë ntšamo Bëngbe Bëtsabe contra Gog y Magog tempo ibojamncá imomnënga. Satanás, chë entsanga echanjáchembo Bëngbe Bëtsabe contra jétsjama, y tša chëftanga cha echanjáchembo, nýa mo chë mar bójaye chënyoca cascajcá mochántsemna.

⁹ Chënga nyetscanga nyets luarëjana mochanjétsjua, y chë Bëngbe Bëtsabe entsanga oyentšë y chabe bonshana entsangbe bëts pueblo shéconana mochanjotsaye. Pero celocana ñe echanjatquécjana y chë Bëngbe Bëtsabe contra imomnënga lempe echántsjuinýe. ¹⁰ Y Satanás, chë aingñayá, mochántsatmetšë chë ñeshë y azúfrecá uafjónayoye, ndayentšë

chë uabouana bayá y chë Bëngbe Bëtsabe ndoñe ndegombre juabna oyebuambnayá tmonsanatmetše. Chentše bëts castigo nyëts tempo, bnëtë y ibeta mochanjasufrina.

Chë obanëngbiama tmonjánayana ntšamo chëngaftaca jamama yojtsemnana

¹¹ Chentšana sënjáninÿe canÿe bëts uámana fiantse puesto jamándama y nda chiñe enjetsebemaná. Celoca y quem luare chabe delante lempe tonjanenatjëmbe, y ndócnentše más chenatanobinýná. ¹² Y chë obanënga sënjánanÿe, bëtsétsanga y básesenga, chë uámana puestentša natsanoica monjétsatsana; y chë libréšangá tmonjanëtëfjo, y inÿe libréšanaca, ndëmuanÿenga nyëtsca tescama tšabe vida mochjónÿenëngbe uabaina uabemana libréša. Chë obanëngbiama tmonjánayana ntšamo chëngaftaca jamama yojtsemnana, cachënga vida imojábomna ora ntšamo tmojëftsema soyëngaca, ntšamo chë libréšangañe yojanabemancá. ¹³ Chë mar béjayoye tmojanóbanënga choicana tmontanbocna, y chë obanënga tmojanóquedanga luarënguentsana tmontanbocna, y cada cánÿabiama tmonjánayana ntšamo cháftaca jamama yojtsemnana, cachënga vida imojábomna ora ntšamo tmojëftsema soyëngaca. ¹⁴ Chentšana ya ndoñe más obenana quentésemna entšanga chamóbanama chaomama, mo chë obenana chë ññesheca uafjajónayoye cuaftsëtšencá; quem ññesheca uafjajónayoye endmëna chë nyëtsca tescama castigo jtsebomnama luare; chë choca castigánënga jtsamnama yojtsamnéngbiama entsemna mo chënga cachiñe cuafjatobancá; ¹⁵ y ndëmuanÿengbe uabaina chë tšabe vida mochjónÿenëngbe uabaina iuábemana

libréšañe ndoñe yonjanabemana, chë ññesheca uafjajónayoye tmonsanatmetše.

Celoca tsmiñe y fshantse tsmiñe

21 Chentšana atše sënjáninÿe canÿe celoca tsmiñe y canÿe fshantse tsmiñe, ndoñe ntšamo tempo enjamncá, er chë tempo enjamna celoca y fshantse chora ya ndoñe quentésemna, y chë mar béjaye chora cach todaye. ² Sënjáninÿe chë “uámana ca” uabaina bëts pueblo, chë tsëm bëts pueblo Jerusalén, Bëngbe Bëtsábíocana celocana enjétsostjajuana, puerte botamaniñe, mo canÿe shembása puerte botamananacá, chabe boyá jábocnabiama. ³ Y chora canÿe jabuache oyebuambnayana Bëngbe Bëtsabe uámana puestentšana sënjanuena, mëntšá: “Mouena. Bëngbe Bëtsá entšángaftaca echántsemna y cha chëngbeñe echantsiyena. Chënga chabe entšanga mochántsemna, cach Bëngbe Bëtsá chëngaftaca echántsemna, y cha chëngbe Bëtsá echántsemna. ⁴ Cha echanjama chënga ndocna te más ngmënënga chamondëtsemnana, y ndoñe más chamondóbanama, ndoñe más chamondošachema, ni ngmënaca ndoñe chamondëtsoyebuambnama y ndoñe más tsetšanana chamondëtsebomnama; er ntšamo chënga entšangcá fshantsoca tempo imojëftsiyena ora enjamncá, chora ya ndoñe chca queochátsmëna ca.”

⁵ Chë uámana puestentše enjantbemaná šonjaniyana: “Atše lempe mo tsëm soyëngcá sëndbama ca.” Y mëntšánaca tonjánayana: “Chë soyënga mábema, er chë palabrënga endmëna ntšamo ndegombre yomncá, y nyëtscanga mondobena chiñe corente jtsošbuáchiyana ca.”

⁶Chentshana šonjaniyana: “Lempe tonjochnëngo. Atše sëndmëna chë nyetsca soyënga bojatsayá y pochocayá, chë natsaná y chë ustonoyá. Mo nda tša uajuendayana tojtsebozná canye bėjaye fshantsiñe obocanentshana cuafjofšecá, cachcá nda tša tojtseboše atšbe soyënga jtseboznama, atše chanjama cha chë soyënga chaotseboznama, y chë nyetsca tescama yomna tšabe vídnaca, chca jtseboznama chábioye tondaye ntsotjañcá. ⁷Nda nyetsca soyënguentshana tšabá chaojabocná mo ayënjanayacá, lempe echanjóyëngacñe ntsamo atšbe entsángbioye jatsatayama tijäsebuachenacá, y atše chabe Bëtsá chántsemna y cha atšbe uaquiñá. ⁸Pero chë auatja causa Crístbioye ndoñe mondësërvënënga, chábeñe ndošbuáchiyënga, chë bacna soyënga causa Bëngbe Bëtsabiama puerte uaboyënjanënga imomnënga, chë ínÿengbioye obánayënga, chë shembása o boyabásaftaca bacna soye amënga, chë bocjuana soyënga amënga, chë soyënga adórayënga diosënga yomna ca jtsejuabnayëse, y nyetscanga bosterënga imomnëngbiamna, chënga entsamna chë ññesheca uafjónayoca jasúfriana, chë azufre yojuinÿinÿanentše. Chentše puerte castigánënga sempre mochanjëftsemna, mo uta soyama cuafjobancá ca.”

Chë tsëm bëts pueblo Jerusalén

⁹Chentshana canya chë an-gelënguentshá, chë canysëfta codbenga bomnënga jútjena chë canysëfta ústonoye pochócaye soyëngaca, átšbioye tonjánabo y šonjaniyana: “Mabo, cbochanjinÿinÿiye chë tojobouamá shembása, chë Oveshatembe shema ca.” ¹⁰Y atše chë Uámana Espíritoftaca corente mandaná jtsemnëse, chë ángel šonjanánatse canye bëts y tsbanana tjoje, y šonjaninÿinÿé chë tsëm bëts

pueblo Jerusalén, chë “uámana ca” uabaina pueblo, celocana Bëngbe Bëtsábocana enjëtstojajuana. ¹¹Chë bëts pueblo enjëtsebuashinÿinÿana Bëngbe Bëtsabe buashinÿinÿanánaca; enjëtsebuashinÿinÿana mo canye uámana botamana ndëtšbecá, mo jaspe ndëtšbecá, pero mo cristalcá tëshinÿiniñe. ¹²Chë bëts pueblo shëconana canye bëts y tsbanana tapiëse enjamna, chë tapiësiñe bnëtsana uta bëshashangá y cada bëshashentše canye ángel, y chë bëshashangañe enjanábemana chë Israeloca bnëtsana uta bëts pamíllangbe uabaina. ¹³Shinÿe bocanoica unga bëshashangá, shinÿe uenatjëmbambanoica ungashá, tsjuanoica unga bëshashangá, y tsmanoica ungashá. ¹⁴Chë tapiëse enjanécuatjona bnëtsana uta ndëtšbenguinÿe, y chëbenguinÿe enjanábemana Jesucristo chë Oveshatembe bnëtsana uta ichmónëngbe uabaina.

¹⁵Chë ángel átšeftaca oyebuambnayá canye castellano juinÿnanëšëfja enjánatbëna jamedídama chë bëts pueblo, chentša bëshashangá y chentša tapiëse. ¹⁶Chë bëts pueblo cach medida enjánbomna nyets cantoica, cach medida tëntšoye y nÿanëjoye. Chë ángel chabe juinÿnanëšëfjaca chë bëts pueblo tonjanmedidá: enjánbomna uta uaranga y uta patse kilómetrënga; tëntšoye, tsbanánoye y nÿanëjoye cach medida enjánbomna. ¹⁷Chentshana chë tapiëse tonjanmedidá, enjánbomna chñënguana bnëtsana y shachna metrënga; ntsamo entsanga chca soyënga jamedídama mondëtatšëmbečá chë ángel tonjanmedidá.

¹⁸Chë tapiëse enjanpormana jaspe ndëtšbeca, y chë bëts pueblo ena castellanoca, tša chca nÿa mo cristalcá tëshinÿiniñe enjaninÿana. ¹⁹Chë ndëtšbënga ndayinÿe chë tapiëse enjanécuatjona enjánbotamanana nyetsca uá-

mana botamana ndëtsbéngaca: canyebé jaspe ndëtsbéca, chë inyebé zafiroca, chë inyebé ágata ndëtsbéca, chë inyebé esmeráldaca, ²⁰ chë inyebé ónice ndëtsbéca, chë inyebé cornalina ndëtsbéca, chë inyebé crisólito ndëtsbéca, chë inyebé berilo ndëtsbéca, chë inyebé topácioca, chë inyebé crisoprasa ndëtsbéca, chë inyebé jacíntoca y chë inyebena amatista ndëtsbéca. ²¹ Chë bnétsana uta bëshashangá enjuamna bnétsana uta perlénga; cada bëshasha nye canye pér-laca uapormanésha. Y chë más bëts tsáshenëjana enjamna ena castellánoca; mo cristalcá tëshínyniñe enjáninýna.

²² Chë bëts pueblentše ndocna Bëngbe Bëtsabe bëts yebna chiyátaninýe, er Bëngbe Utabná, chë Bëngbe Bëtsá nyets obenana bomná y chë Oveshatema chentše bonjamna, y chata nyetscangbiama chë bëts pueblentše ndayéntsna adóránata bonjésemna. ²³ Chë bëts pueblentše ndoñe quenjatsiyta shinýe o juashcona chaotsebínýnaye, er Bëngbe Bëtsabe buashinýinýanana chentše enjétsbinýnaye, y chë Oveshatembe buashinýinýanana mo uajuinýanëshacá enjamna chë bëts pueblama. ²⁴ Chentša binýnayánaca, entsanga nyetsca mándayëngbentše mochantsiyena, y quem luarentša mandadënga chëngbe uámana y bëts soyënga chë bëts puebloye mochanjiyëbo. ²⁵ Chë bëts pueblentša bëshashangá ndocna te quemochtétatame, y chentše ndocna ora ibeta queochátsmëna. ²⁶ Chë bëts puebloye mochanjiyëbo chë nyetsca luarënguentša entsangbe uámana y bëts soyënga, y chë nyetsca luarënguentša entsangbeñe bëtsétsanga y uámanënga iuabiamná soyëngnaca. ²⁷ Pero ndocna te queochátómashëngo ndayánaca, y chë soye chaotsama entsanga ndoñe tsábënga chamotsemnama

Bëngbe Bëtsá jadórama; ni ndocná queochátamashëngo, Bëngbe Bëtsabiama nýa tondayama ogustana soyënga amá o ínýengbiöye jáingñama soyënga amá. Choye mochanjámashjna nye chë ndëmuanyëngbe uabaina yojtsábemana chë Oveshatembe librésañe, chë nyetsca tescama tsábe vida mochjónýenëngbe uabaina uábemanentše.

22 Chë ángel šonjaninýinýe chë enjanobëjna béjaye vida bomniye. Chë búyeshë enjamna ndëtsenguiye y tëshínyniye mo cristalcá. Enjanóbocana chë Bëngbe Bëtsá y chë Oveshatembe uámana puestocana, ² y chë más bëts tsashená tsëntsajana enjanobëjna. Chë fshajayentša catoica lado enjanójuajna betiyeshënga chë nyetsca tescama yomna tsábe vida jtsebomnama, canye uatiñe bnétsana uta soye jashájonana, canye cada shinýe; chë betiyeshentša tsbuanáchënga josérviana nyetsca mándayëngbentša entsanga jáshnama. ³ Choca ndocna soye queochátsmëna chë ndayama Bëngbe Bëtsá tojayana ndoñe tsábá yondmëna ca, y ndaye bacna soye japásama chaotsemna soye. Chë Bëngbe Bëtsá y chë Oveshatembe uámana puesto chë bëts pueblentše echántsemna, y chatbe oservénënga mochántadorana.

⁴ Chënga mochanjinýe Bëngbe Bëtsabe jubíá, y chabe uabaina chëngbe juentsaca mochantsambaye. ⁵ Chentše ndocna ora ibeta queochátsmëna, y chentša oyenënga ndoñe queochátëjaboto canye uajuinýanëshá o shinýe chaotsebínýnaye, er Bëngbe Bëtsá Bëngbe Utabnabe buashinýinýanana chëngbiama echantsebínýnaye, y chënga mochántsemna mo reyëngcá uámanënga, y Bëngbe Bëtsáftaca nyetsca tescama mochántsemandaye.

Jesucristo jésabama entsobeco

⁶Chentšana chë ángel šonjaniyana: “Quem palabrénga endmëna ntšamo ndegombre yomncá, y nyetscanga mondobena chiñe corente jtsošbuáchiyana. Bëngbe Utabná, cach Bëngbe Bëtsá, nda endbama chabe juabna oyebuambnayënga, chëngbe ainaniñe osertánana y añemo chamotsebomnama jóyebuambayama, chabe ángel tbojichmó chabe oservénëngbioye jinýanýiyama ndayá betscó yojtsemna jopásama ca.”

⁷Chora Jesús tonjánayana: “Mouena. ¡Atše cachiñe betscó chanjésabo! Oyejuayá nda quem buayenana soyënga, ntšamo ndegombre jopásama, chë Bëngbe Bëtsabe juábnaca oyebuambana soye tojoyeuná, chë ndayama quem librésañe entsábemana ca.”

⁸Atše Juan, chë soyënga sënjanuena y sënjáninýe. Y chca sënjanuena y sënjaninýentsana, chë chca šonjaninýinýé ángelbe delante atše sënjanoshamentésé, cha jadórama. ⁹Pero cha šonjaniyana: “Ndoñe, átšeftaca ndoñe chca mátamana, er atše canýe Bëngbe Bëtsabe oservená sëndmëna, ntšamo aca condmëncá, y ntšamo chë Crístbeyeca acbe catšátanga, chë Bëngbe Bëtsabe juabna oyebuambnayënga y nyetscanga chë ndayá quem librésañe endayanama tmojóyeunanga mondmëncá. Aca cmontsemna Bëngbe Bëtsá jadórama ca.”

¹⁰Chora mëntšánaca šonjaniyana: “Ndoñe mo iytëmencá catjáboshjona ndayá quem librésañe entsabemancá, chë ndegombre jochnënguama soyënga, er chca jopásama chë tempo ya entsobeco. ¹¹Cachcá monýá chë bacna entsá bacna soyënga chaotsama; chë puerte bacna soyënguñe jtsiyenama bošá, cachca soyënga chaotsama; pero

chë tšábiana ntšamo tšabá yomncá chaotsama, y chë Bëngbe Bëtsabe entsá, nyets tempo nyets ainánaca chábioye chabotseservena ca” —cha šonjaniyana.

¹²Chora Jesús cachiñe tonjánayana: “Mouena. Atše quem luaroye betscó chanjésabo, y átšeftaca chanjiyëbo chë uacanana soye, y cada ona tšëngaftanguentsábioye chanjoyiye ndayá tojamama ntšamo tbojtsomerecencá. ¹³Atše sëndmëna chë nyetsca soyënga bojatšayá y pochocayá, chë natsaná y ustonoyá, chë ndábeyeca y ndabiama lempe yomna ca” —šonjaniyana.

¹⁴Oyejuayënga chë bacna soyëngama perdonánënga imojtsemnënga, mo chënga chëngbe entsáyá botamana cuaftsaboshabecá. Chca chënga mochantsobena chë nyetsca tescama yomna tšabe vida jtsebomnama uacanána jashjáchama, mo chë nyetsca tescama yomna tšabe vida jtsebomnama betiyeshentsana cuaftsescacá, y mochanjobenaye chë tsëm bëts pueblöye bëshásajana tšabá jamashjnana. ¹⁵Pero ndoñe quemochatobenaye jamashjnana chë ba ndoñe tšabe juabnënga ainaniñe bomnënga, chë bocjuanënga, chë shembása o boyabásaftaca bacna soye amënga, chë ínýenga obánayënga, chë soyënga adórayënga diosënga yomna ca jtsejuabnayëse, y nyetscanga chë bostero soyënga ogusetánënga y chca jtsamëse oyenënga.

¹⁶Chora Jesús cachiñe tonjánayana: “Atše Jesús, atšbe ángel tijichmó chë ntšamo atše sëntsejuabnacá ndayenache ošbuachiyëngcá enefjuanëngbioye lempe chámabuayenama. Atše sëndmëna chë Rey Davídbentsana Entšá. Atše sëndmëna mo chë bínýanoye puerte bínýnaye estrellcá ca.”

¹⁷Chë Uámana Espíritu y chë Oveshatembe shema bondbëtsichamo:

“¡Mabo ca!” Y nda chca chaojouená cháuyana: “¡Mabo ca!” Y mo nda tša uajuendayana tojtsebomna, tojabo y bëtscá bėjaye cuafjofšecá, cachcá nda tša tojtseboše Jesusbe soyënga jtsebomnama, chábioye chaobeconá y cha echanjama chë soyënga cha chaotsebomnama y chë nyetsca tescama yomna tšabe vídnaca, chca jtsebomnama tondaye ntsotjañcá.

¹⁸Nyetscanga ntšamo quem librëšañe entsabemancá, chë ndegombre echanjopásama chamojouenëngbioye šcuabuayená. Nderado nda chë soyëngama más chaojaboté, Bëngbe Bëtšá echanjama cha chaosufrí chë quem librëšañe entsábemana pochócaye soyënga. ¹⁹Y nderado nda ntšamo

quem librëšañe entsabemancá, chë ndegombre echanjopásama soyënguiñe ndayánaca tojajuaná, Bëngbe Bëtšá chábioye bochantsebojuána ntšamo chabiamama yomncá chë nyetsca tescama yomna tšabe vida jtsebomnama betiyeshentšana y chë tsëm bëtš pueblentšana, chë ndayama quem librëšañe entsábemana.

²⁰Quem soyënga oyebuambnayá, chë lempe ndegombre echantsemnama tonjayaná, atše, Jesús séntsichamo: “Aíñe, betesco chanjésabo ca.”

Chca chaotsemna. ¡Cochjabo, Bëngbe Utabná Jesús!

²¹Bëngbe Utabná Jesús chaoma tšabe bendicionënga tsëngaftangbeñe chaotsemnama.